


Niospa meka fena  
Jesucristoñoa



New Testament in Yaminahua (PE:yaa:Yaminahua)

# Niospa meka fena Jesucristo<sup>noa</sup>

## New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

### Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 22 Feb 2024 from source files dated 29 Jan 2022

6c7b7ce2-9d87-5405-91e6-71ce1387adcc

## Contents

MATEO . . . . .	1
MARCOS . . . . .	82
LUCAS . . . . .	128
JUAN . . . . .	208
LOS HECHOS . . . . .	264
ROMANOS . . . . .	333
1 CORINTIOS . . . . .	371
2 CORINTIOS . . . . .	412
GÁLATAS . . . . .	436
EFESIOS . . . . .	449
FILIPENSES . . . . .	462
COLOSENSES . . . . .	470
1 TESALONICENSES . . . . .	478
2 TESALONICENSES . . . . .	485
1 TIMOTEO . . . . .	489
2 TIMOTEO . . . . .	500
TITO . . . . .	507
FILEMÓN . . . . .	512
HEBREOS . . . . .	514
SANTIAGO . . . . .	543
1 PEDRO . . . . .	554
2 PEDRO . . . . .	565
1 JUAN . . . . .	571
2 JUAN . . . . .	580
3 JUAN . . . . .	582
JUDAS . . . . .	584
APOCALIPSIS . . . . .	588

## Mateo Jesúsnoa Yoikĩ Keneni

*Jesucristo ãfe xinifãfe anefo  
(Lc. 3.23-38)*

<sup>1</sup> Ë mato yoinõ a taeyoi ipaonifo Jesucristo ãfe xinifo. Jesucristo ãfe xini David. Nã David ãfe xini Abraham. Nãfo Jesucristo ãfe xinifo taeyoi iyopaonifo.

<sup>2</sup> Nã Abraham ãfe fake Isaaca ini. Isaaca ãfe fake Jacobo ini. Jacobo fake Judá ini. ãfe extofori ini. <sup>3</sup> Judapa fake Fares fe Zara ini. ãto afa Tamar ini. Fares ãfe fake Esrom ini. Esrom ãfe fake Aram ini. <sup>4</sup> Aram ãfe fake Aminadab ini. Aminadab ãfe fake Naasón ini. Naasón ãfe fake Salmón ini. <sup>5</sup> Salmón fake Booz ini. Booz ãfe afa Rahab ini. Booz ãfe fake Obed ini. Obed ãfe afa Rut ini. Obed ãfe fake Isaí ini. <sup>6</sup> Isaí ãfe fake xanifo David ini. Xanifo David ãfe fake Salomón ini. Salomón ãfe ãfa fene fetsaya iyopaoni, Urías.

<sup>7</sup> Salomón ãfe fake Roboam ini. Roboam ãfe fake Abías ini. Abías ãfe fake Asa ini. <sup>8</sup> Asa ãfe fake Josafat ini. Josafat ãfe fake Joram ini. Joram ãfe fake Ozías ini. <sup>9</sup> Ozías ãfe fake Jotam ini. Jotam ãfe fake Acaz ini. Acaz ãfe fake Ezequías ini. <sup>10</sup> Ezequías ãfe fake Manasés ini. Manasés ãfe fake Amón ini. Amón ãfe fake Josías ini. <sup>11</sup> Josías ãfe fake Jeconías ini; ãfe extofori ini. Mã Jeconías rama xanifo ikaino, Babilonia anoxõ xanifãfe ãfe sorarofõ nĩchini israelifo ato ifitanõfo anã ato yonomaxikakĩ. Mã sorarofãfe ato ifitanaifono israelifo Babilonia ano fonifo. Jeconíasri iyonifo. Jeconías ãfe extofori kainifo.

<sup>12</sup> Nãskata Babilonia anoax fake fetsafori kainifo. Jeconías ãfe fake Salatiel ini. Salatiel ãfe fake Zorobabel ini. <sup>13</sup> Zorobabel ãfe fake Abiud ini. Abiud ãfe fake Eliaquim ini. Eliaquim ãfe fake Azor ini. <sup>14</sup> Azor ãfe fake Sadoc ini. Sadoc ãfe fake Aquim ini. Aquim ãfe fake Eliud ini. <sup>15</sup> Eliud ãfe fake Eleazar ini. Eleazar ãfe fake Matán ini. Matán ãfe fake Jacobo ini. <sup>16</sup> Jacobo ãfe fake José ini. Nã José ãfe ãfi ini, María. Nã María fake ini, Jesús. Jesús ãfe ane fetsa Cristo ini.

<sup>17</sup> Abraham ãfe fenafo ichapa ini, nã David kainitĩa catorce inifo Abraham ãfe fenafo. Askatari nã David ãfe fenafo ichapa ini. Nãskano David ãfe kaifo yora fetsafãfe Babilonia ano ato iyonifo ato yonomaxikakĩ. Babilonia ano ikanax David ãfe fenafo catorce inifo. Askatari David ãfe fenafo Babilonia anoax anã fenifo ãto mai ano. Mã fenixakakĩ David ãfe fena fetsafori kainifo catorce inifo. Askatari Cristo kaini.

*María Jesucristo kãini  
(Lc. 2.1-7)*

<sup>18</sup> Ë mato yoinõ ea nikakapo afeskax Jesucristo kãinimakĩ. José fe María yoinãyonifo fianãxikakĩ. Fianãyofafomano Niospa

Yōshi Sharapa María fake nanemani. <sup>19</sup> José Nios Ifo-fasharakōiax sharakōi ini. Nāskaxō José María yōapainima yorafāfe ferotaifi. Fomāxopaoni. Nāskaxō tsoa yoixoma José María enepaini. <sup>20</sup> Nāskano José āfe namapa ōini Niospa āfe ājirinī yoiaito. Yoikī iskafani: “José, rateyamafe María fe fianāxiki. Na fake nanea Niospa Yōshi Sharaōxō akaki. <sup>21</sup> María fake feronāfake fii kiki. Mī anekī Jesús faxikai. Nāato ato ifipakenakaki. Nāskaxō afe yorafo āto chaka soaxoxii kiki ato nimapakexakī,” ixō ājirinī José yoini.

<sup>22-23</sup> Chanīmakōi nāskakōi nā Nios yoimisto yoini keskarakōi. Iskafakī kirika keneyoni Niospa shināmanaino:

Kēro xotofake feronāfake fe imisma fake onixii. Fake feronāfake fixō anekī Emanuel faxii, ixō yoini. (Akka nōko mekapā Emanuel fakī, “Nios nofe ika,” ixō nō yoimis.)

<sup>24</sup> Mā ājirinī yoiano José moinākfani. Nā ājirinī yoia keskafakī, José María fini. Mā fixō āfe pexe ano iyoni. <sup>25</sup> Mā afe fianāx afe chotanānima āfe fake kāiyonō. Mā fake kāiano anekī Jesús fani.

## 2

*Feronāfakefo fishi tāpikōimisfo a xini oaikirinoax mai fetsa anoax Jesús ōipai fenifo*

<sup>1</sup> Herodes xanīfo ikano Jesús kāini Belén pexe rasi anoax, Judea mai anoax. Nāskano a xini oaikirinoax mai fetsa anoax feronāfakefo fishi tāpikōimisfo fenifo Jerusalén ano. <sup>2</sup> Nokotoshikaxō yōkanifo: “¿Fanīmē a rama kāia judeofāfe āto xanīfo ikai? Mā nō ōia āfe fishi oaito. Nāskakē nō oa Jerusalén ano xanīfo ōiyoi. Nō akiki inimai nō oa, ‘Mī nōko xanīfokōi,’ ixō yoipaikī,” fanifo.

<sup>3</sup> Askafaifono fetsafāfe yoiaito nikakī Herodes shināchakakōini xanīfo iki kiki ixō. Askatari keyokōi Jerusalén anoafāferi shināchakakōinifo. <sup>4-5</sup> Akka Herodes judeo inima. Nāskaxō ato kenamani a ato Nios kīfixomis āfe xanīfofo fenōfo ato yōkaxiki. Askatari a Moisés yoikī kirika keneni keskara ato tāpimamisfo ato kenamani ato yōkaxiki. “¿Fanīax Cristo kāixiimē?” ato faito kemanifo iskafakakī: “Belén anoax iki, Judea mai anoax,” fanifo. “Niospa meka yoimisto nānori kirika keneyoni a inōpokoai yoikī Niospa shināmanaino. Iskafakī keneni:

<sup>6</sup> Belén, Judá mai anoax pishtakōi. Akka pexe rasi fet-safo efapakōifo. Askafiax Belén sharafinākōia ixii māmāi israelifo āto xanīfo finākōia kāixiaino Belén anoax. Nāskakē āfe inakōifo israelifo āto xanīfokōi ixii, ixō kirikaki keneni Niospa meka yoimisto Niospa shināmanaino,” fanifo.

<sup>7</sup> Nāskakē Herodes a fishi tāpimisfo ato yōkani onexō tsōa nikayamanō: “¿Afetīa fishi mā ōitamē?” ato fani. <sup>8</sup> Nāskaxō ato nīchini Belén ano. Herodes tāpipaikī, “Belén ano fotakāfe a fake tāpixikakī. Mā fichixō ea yoifexikakī ēri akiki inimaikanō,” ato fani āa ato pārakī.

<sup>9</sup> Ato askafaino fonifo. Fokakī fishi rekē kaino chīfafainifo. Nāskax fishi nēteni nā fake yome ano. <sup>10</sup> Nā fishi anā ōikanax inimakōinifo. <sup>11</sup> Nāskakanax pexe mēra ikifaikaxō fake yome fichinifo afa María yafi. Mā fichikaxō ratokonō mai chachipakefofānifo, a fakeki inimakakī. Nāskakaxō āto kafo fēpekaxō afama mīshti sharakōifo Jesús inānifo. Oro minikāta, pirofomāri mininifo a nō koofatiro pirofomā nakas sharakōi. Askatari pirofomā fetsari āfe ane mīra inānifo. <sup>12</sup> Nāskakē namakē Niospa ato yoiano anā Herodes ano fonifoma. Fai fētsa fonifo āto mai ari.

### *María feta José Jesús ichokinifo Egipto mai ari*

<sup>13</sup> Askata a fishi tāpimisfo mā foaifono, José namakē, Niospa āfe ājirinī yoini: “Moinākafafe. Mī āfi feta mī fake yome ichokitāfe Egipto mai ari. Nāri ikiyoxiki nā ē mato yoiano mā anā onō. Herodes na fake yome fenai kiki retepaikī,” Niospa ājirinī José fani namakē.

<sup>14</sup> Nāskata moinākafata, nā fakishi fonifo María fe José āto fake Jesús iyoi fokani Egipto ano. <sup>15</sup> Egipto ano José fe María ipaonifo mā Herodes naano fexixakakī. Nāskakē Egipto ano iyopaonifo. Niospa meka yoimisto nānorikōi kirika keneyoni Niospa shināmanaino iskafakī: “Ēfe fake ē kena Egipto ano,” ixō Niospa meka yoimisto kirika keneni.

### *Fakefo retenōfo Herodes ato manamani*

<sup>16</sup> Fishi tāpimisfo Herodes fomākani. Fai fētsa foafono nikai, Herodes ōitifishkikōini. Fishi tāpimisfāfe taeyoi Herodes yoiyonifo ato yōkaito iskafakakī: “Afetīama nō nā fishi ōikī taefati, mā xini rafe aka,” fanifo. Nāskakē Herodes sorarofo ato manamani fake feronāfake xini rafe akafo, yome mīshtifoya ato retenōfo, Belén anoafo retekāta, a Belén pasotai ikafori ato retenōfo. <sup>17-18</sup> Nāskara taeyoi Jeremías Niospa shināmanaino kirika keneyoni a inōpokoai yoikī. Iskafakī keneni:

Ramā anoxō nikanifo fāsikōi oiaifono. Raquel oiaito nikanifo āfe fake manoi, mā āfe fake nano. Oiyayamafe fafiaifono nishpanima, ixō Jeremías keneni.

Nā Jeremías yoini keskara mā askakōia.

<sup>19</sup> Mā Herodes naano Niospa ājirinī afianā José yoini namakē iskafakī: <sup>20</sup> “Moinākafafe. Mī āfi feta mī fake iyotaxiki Israel mai ano. A fake yomefo retepaimisfo mā naafoki,” fani.

<sup>21</sup> Nāskafaino moinākafani José. Āfe āfiri mōini āfe fake yafi. Nāskakanax Israel ano anā fonifo. <sup>22</sup> Mā fōkakī nikanifo ato yoiaifono Herodes fake Arquelao mā xanīfokē Judea anoax. Nikai José rateni Judea ano kapai. Nāskaito anā ājirinī José yoini namakē iskafakī: “Galilea mai ano katāfe,” fani. Nāskafaino fonifo Galilea ano āfe āfi fe Jesús iyokani. <sup>23</sup> Nāskax nokonifo Nazarete pexe rasi ano. Nāno inifo. Nānori taeyoikōi Niospa meka yoimisfāfe yoiyonifo, “Cristo Nazarete ano imis,” fakakī, a inōpokoai yoikakī. Nāskakōini.

### 3

*Juan Maotista tsōa istomaxō ato yoini*  
(Mr. 1.1-8; Lc. 3.1-9, 15-17; Jn. 1.19-28)

<sup>1</sup> Jesús Nazarete ano ikano Juan ato maotisafapani tsōa istoma ixō Judea mai anoxō. Nānoxō Niospa meka ato yoipaoni. <sup>2</sup> Nānoxō ato yoipaoni iskafakī: “Yorafāfe, anā Nios shinākāfe. Māto chaka xatekōikāfe, a mā chakafamis shināmakikāfe. Niospa meka nikakōikāfe. Mā chaima nōko Ifo Nios oi kiki nōko xanīfo finakōia ixii kiki,” ixō Juan ato yoipaoni fāsikōi.

<sup>3</sup> Isaías kirika kenekī yoiyoni a inōpokoai yoikī Niospa shināmanaino. Iskafakī yoini:

Tsōa istoma anoxō yorafo yoixii akiki feaifono. Iskafaki ato yoixii: “Mā nōko Ifo oi kiki. Nāskakē itipinīsharakāfe. Āfe fai sharafaxokāfe. Māto chaka xatekāfe,” ixō ato yoiaito nikaxikani,

ixō Isaías kirika keneyoni Juanoa yoikī.

<sup>4</sup> Akka Juan āfe rapati kamīcho fichi kishi faxō safepaoni. Āfe sītorari fichi koiro safepaoni. Nāskaxō tseo pipaoni, fonari apaoni. <sup>5</sup> Nāskano Jerusalén anoafō yafi Judea anoafō fenifo Juan nikai fekani. A faka Jordán chaima ikafori fenifo. <sup>6</sup> Mā fēkaxō Juan yoinifo a afara chakafamisfo. Nāskaxō āto chaka xatepaiyaifono Juan ato maotisafapani faka Jordán anoxō.

<sup>7</sup> Nāskaifono fariseofo xanīfo metsamafo feaifono, saduceofo xanīfo metsamafori fenifo Juan ano. Ichapakōi fenifo, “Nokori Juan nashimanōra,” ikanax. Juan ato ōikī ato iskafani: “¿Afeskai mā ea ano oimē? ¿Ē mato maotisafapanō mā oimē? ¿Tsōa mato yoiamē? Mā shināiraka nō chiifā mēra katirora ixō nāskax mā maotisapaimē, nō chiifā mēra kayamanōra ikax. Maa, mā kai afaa tāpiama, askax mā maotisatiroma. Mā Nios Ifofaima. Mā oa shano keskara māto ōiti chakakōi. Nāskaxō mā Satanás ifofaa. Nāskakē kaxpa ē mato maotisafatiroma māmāi Satanás fisti shināito. Āa fētsa mato pāratiro nō maotisanō nō chiifā mēra kaimakai Nios nikayamafax ixō mato pārano mā chiifā mēra katiro fetsa

afaa tãpiamato mato pãrano. Askara Niospa mato ifitiroma mākairoko shinãito, ěroko mato maotisafaano. <sup>8</sup> Mãto chaka xatekãfe, Nios shinãkãfe. Mã Nios shinãito ě mato maotisafapakai. <sup>9</sup> Ě mato anã yoinõ nikakapo. Mã shinãtiro: ‘Nã Abraham nõko xini ipaoni, õiti sharayaxõ Nios shinãpaoni.’ Akka mã shinãkĩ: ‘Nõmãi Abraham fenaxõ nõ shara shinãi,’ ixõ mã shinãkĩ mã shinãsharaima. Askara shinãyamakãfe. Akka mãto õitinĩ mã chaka shinãfi mã chanĩ. Nikasharakõikãfe, ě mato yoinõ. Na tokiri Niospa onifaxõ nĩchikẽ mã õitiro Abraham ãfe fena inõ. Nãskakanax Abraham fakefo itirofo na tokiri õikĩ Nios shinãkanax. Akka mãkai anori shinãima mã mã chanĩ: ‘Abraham shinãpaoni keskara nõ shinãira,’ ikax. Askara shinãyamafi Satanás fisti ifofafiai. <sup>10</sup> Akka fana fimiyamaito ifãfe reratiro. Āfe tapori tsekaxõ koofatiro anã niyamanõ. Nãskarifikĩ mã Nios nikakaspaito a omiskõipakenakafo mẽra Niospa mato potaxii mã chaka xateaxma mã isharayamaito. <sup>11</sup> Nãskakẽ ě mato maotisafai mãto chaka mã xatepaiyaito Nios Ifofapaikĩ. Akka nã ea keskarama mã chaima oi kiki, nã sharafinakõia. Aato afama mĩshti fatiro, ě atiroma keskara. Akka ě afaama. Mã Nios chanĩmara faino aato ãfe Yõshi Shara mato mẽra naneyoi. Akka tsõa Nios chanĩmara fayamaito, Niospa mato omiskõimaxii. <sup>12</sup> Akka yõra ãfe tarepa aros fanaxõ mã pachiano topitiro. Nãskaxõ katotiro a sharafo fixõ a chakafo potaxõ koofatiro. Nãskarifikĩ a chipo oaito a chanĩmara faafo yafi a nikakaspamisfo ato paxkanãfaiyoi. Nãskaxõ a chanĩmara faifo a ika ano ato iyoxii afe isharapakex-anõfo. Akka nã nikakaspamisfo chiifã mẽra ato potano anoax omiskõipakenakafo. Chiifã mẽranoax omiskõi xatenakafoma,” ixõ Juan ato yoini.

*Juan Jesús maotisafani faka Jordán anoxõ  
(Mr. 1.9-11; Lc. 3.21-22)*

<sup>13</sup> Askata Galilea anoax Jesús kani faka Jordán ari Juan maotisafanõ. <sup>14</sup> Akiki nokoaino Juan Jesús iskafani: “Jesús, ¿afeskakĩ ě mia maotisafatiro mẽ? Akka mĩroko ea atironõ,” fani.

<sup>15</sup> Askafaino Jesús kemani iskafakĩ: “Epa Niospa noko yoia keskara keyokõi nõ nikakõitiro. Nãskakẽ ea mã maotisafatiro,” fani.

Jesús askafaino, Juan Jesús maotisafani. <sup>16</sup> Nãskata Jesús faka mẽranoax fininãkafãnaino nai fepekemetani. Ariax Niospa Yõshi Shara akiki ftoni, oa rifi keskara Jesús õiaino. <sup>17</sup> Askaino nai mẽraxõ Āpa yoiaito nikani iskafaito: “Mĩ ěfe Fakekõi ě mia noikõi. Ě mikiki inimasharakõi,” ikaito nikanifo.



## 4

*Satanás chakata Jesús afara chakafamapaini*  
(Mr. 1.12-13; Lc. 4.1-13)

<sup>1</sup> Nāskaino Niospa Yōshi Sharapa Jesús iyoni tsōa istoma anoxō Satanás afara chakafamapainō.

<sup>2</sup> Mā cuarenta nia oxax Jesús fonāikōini afaa pishta piyamax. <sup>3</sup> Nāno Satanás akiki nokoni. Mā akiki nokoxō ifofamapaini. Askatari chakafamapaini. Iskafakī yoini: “Mī Niospa Fakemākī na tokirifo pāa fapo,” fani.

<sup>4</sup> Askafaito Jesús kemani: “Maa, na mī ea yoiyai keskara ē akima. A nō piyai fisti nō shināima nipaikī. Akka Epa Niospa āfe meka fisti shara nō shinā tiro. Nāskara Niospa meka yoimisto kenei,” Jesús fani.

<sup>5</sup> Jesús askafaino Satanás iyoni Jerusalén ano a Nios kīfiti pexefā māmākīa. <sup>6</sup> Nānoxō yoini iskafakī: “Mī Niospa Fakekōiaxroko mī niriāx ichopakekafanikai. Mī ichopakekafanax mī afeskaimakai. Nā Niospa meka kirikaki keneaki iskai: ‘Niospa āfe ājirifo yoixii mia kexenōfo.’ Askatari kirika keneano iskaki: ‘Mī āto mīfiki pakeaito mia achixikani kiki mī tokiriki pakenōma,’ kirika kenea iskaki,” Satanás Jesús fani.

<sup>7</sup> Askafaito anā Jesús kemani: “Akka na kirika keneano yoinifo iskafakī Niospa meka: ‘Nōa nō meka fetsafaxō nō yoitiro: “Ē afara afeskarafaito, ea Niospa kexei,” ixō nō shinā tiro. Akka, “Niospa ea amapaiyai keskara nā fisti ē atiroki Niospa ea kexenō,” ixō shinākāfe,’ ikaki na kirika keneano,” Jesús fani.

<sup>8</sup> Askata Satanás Jesús iyoni māchifā mǎnānē. Arixō ōimani nā maifo tii sharafinakōia. <sup>9</sup> “Ōipo. Mī ea ratokonō mai chachixō, ‘Mī ēfe ifoki,’ mī ea faito na maitio keyokōi ē mia inā tiro mī āfe ifo inō,” fani.

<sup>10</sup> Askafaito Jesús kemani: “Satanás. Emakinoax katāfe. Ē mia ifofaimakai. Na kirika kenea ano Niospa meka yoimisto iskafani: ‘Nā nōko Ifo Nios fisti nō ratokonō mai chachixō nō yoitirokī, nā fistimāi nōko Ifokē,’” fani.

<sup>11</sup> Askafaino Satanás Jesús makinoax kaino Niospa āfe ājirifo akiki fotonifo pimaxikakī.

*Galilea anoxō Jesús ato yoikī taefani*  
(Mr. 1.14-15; Lc. 4.14-15)

<sup>12</sup> Akka mā Juan sorarofāfe karaxa mēra ikimana nikata Jesús Galilea mai ano anā oni. <sup>13</sup> Nazarete anoax Capernaúm ano nokoni ano ixiki. Nā Galilea ĩa kesemē Capernaúm ini. Nānori yora fetsafori osia ini. Zabulonōfo fe Neftalifo ano ikafo ini. <sup>14-16</sup> Isaías kirika kenekī yoini keskakōi Jesús nāno ipaoni. Isaías kirika kenekī iskafani:

Zabulonõfo fe Neftalifo äto mai ano ikafo ãa Galilea ano. Faka Jordán okiri chai poketa nãno judeofoma fakish mēra ika keskara, Niospa meka nikakatsaxakakima. Fakish mēra ika keskara ifiakaxõ, oa koshi penai keskara õixikani. Fakish mēra ipafikeranaxakakĩ atoki penarisatani, ixõ Isaías a inõpokoai yoikĩ Jesúsnoa kenení. Nãskarífiai omiskõipakenakafo mēra ikeranafo. Askafikeranafono atoki Jesús nokoaitia nã Ifofafo tii ato nimapakenaka.

<sup>17</sup> Anoxõ Jesús ato yoikĩ taefakĩ iskafani: “Mã chaima nõko Ifo Nios xanĩfo finakõia oi kiki. Nãskakē shinãmitsayanã mãto chaka xatekãfe. Afaa chakafatamaroko Niospa meka nikakõikãfe,” ixõ Jesús ato yoini.

*Jesús cuatro feronãfake kenani tarafanãfãñē foe fimisfono ãfe inakõi inõfo*

*(Mr. 1.16-20; Lc. 5.1-11)*

<sup>18</sup> Ato yoita Jesús Galilea ãa kesemē kani. Kakĩ fichini Simón yafi onefetsa Andrés. Simón ãfe ane fetsa Pedro ipaoni. Nã rafeta tarafanãfãñē fimisfo inifo, äto tarafanãfã faka naki poteaifãfe. <sup>19</sup> “Efe fokãfe. Mãfi tarafanãfãñē fimiskĩ. Mã foe ichapa rasi tarafanãfãñē fiai keskari fakĩ iskaratĩari mã ekeki yora ichapa efexii ã äto Ifo inõ,” ixõ Jesús ato yoini. <sup>20</sup> Ato askafaino tarafanãfã fafaikani afe fonifo.

<sup>21</sup> Askata ori chaimashta kaxõ Zebedeo fake raferi fichini, Santiago yafi Juan. Nã rafeta äto apa feta kanõa nakixõ tarafanãfã itipinĩ fanifo, kishifakãkĩ. Nã raferi, “Efe fokãfe,” Jesús ato fani. <sup>22</sup> Ato askafaino äto apa kanõa ano nĩchifainifo Jesús fe fokakĩ.

*Jesús yora ichapafõ tãpimani*

*(Lc. 6.17-19)*

<sup>23</sup> Mã askafaxõ afe foafono nã Galilea anoafõ kafãsakĩ Niospa meka ato yoini. Judeofãfe ichanãti pexe mēraxõ Jesús ato Niospa meka shara yoisharakĩ iskafani: “Itipinĩsharakãfe. Nios nonoax mãto xanĩfo ipai kiki,” ixõ ato yoifofãsafani. Askatari a isinĩ ikaifo fetsa fetsatapafõ ato sharafãpani. <sup>24</sup> Askafaano nikakaxõ Siria mai anoafõ isinĩ ikaifo akiki efenifo ato sharafapanõ. Isinĩ ikaifo fetsa fetsatapafõ akiki efenifo. A yõshi chaka äto mēra naneafori ato sharafani. A nĩsoaifori efeta, a finimismafori efeta, a chatofori efenifo. Ato keyokõi sharafapani. <sup>25</sup> Askafaito yorafã rasichi chĩfafainifo. Atiri Galilea anoax fonifo, atiri Decápolis anoax fonifo, atiri Jerusalén anoax fonifo, atiri Judea anoax fonifo, atiri faka Jordán okirinoax fekãta Jesús chĩfafainifo.

## 5

*Machi mǎnǎnēxō Jesús ato yoini*  
(Lc. 6.20-23)

<sup>1-2</sup> Yorafā rasi akiki feaifono ōi Jesús ato paxafāini kaax, machi pochini tsaoni. Tsaoano āfe meka tāpipaimisfo akiki fenifo. Āfe meka nikai fekani. Akiki feafono ato yoikī iskafani:

<sup>3</sup> “Fētsa āto shinā mēraxō shinākī iskafax: ‘Ēakai ē isharatiroma. Ē Nios yopakōi,’ ikaito Niospa inimamaxii māmāi Nios Ifo sharafaino āfe fakekōi inō.

<sup>4</sup> “Fetsa shināmitsakōifiaino chipo Niospa noikī inimamaxii.

<sup>5</sup> “Fetsa kakapaimisma imisno Niospa inimamasharaxii. ‘Keyokōi maitio atonā ixii,’ ixō Niospa yoiyoni keskara atonāri ixii.

<sup>6</sup> “Fētsa Niospa meka noikōikī Niospa ato imapaiyai keskara shara ipaikōikani, nā keskarafo Niospa ato inimamaxii.

<sup>7</sup> “Fētsa fetsafori noikī ato sharafaito Niospa tāpia. Nāskakē ari Niospa noikī axosharapakenaka inimamakī.

<sup>8</sup> “Fētsa Nios shināsharakī, āfe ōiti mēra afaa chaka shinātama Nios fisti shinākī chipo Nios ōixii. Nāskax inimakōixii.

<sup>9</sup> “Akka noikaspā faatanāifono fētsafāfe ato raenā faano, nāfo Niospa ato yoikī iskafaxii: ‘Mā ēfe fakefo,’ ixō ato yoiaino inimakōixikani.

<sup>10</sup> “Fētsa Nios Ifofasharapaiyaino, fetsafāfe ato omiskōimafiaifono, Epa Niospa kexesharakōiano nāskakē inimakōixii.

<sup>11-12</sup> “Mā ea Ifofakē fetsafāfe mato ĭchakani, mato omiskōimayanā askatari matoōnoa meka chaka yoikani meka fetsa fetsatapafo. Nā mato chakafaifo keskafakīri mātō xinifāfe nā Niospa meka ato yoixomisfori ato chakafapaonifo. Nāskakē inimasharakāfe eōxō matori chakafakani kiki. Mā askaito Niospa afara sharafo mato mekexona nai mēranoa mātonā inō,” ixō Jesús afe imisfo ato yoini.

*“Mā tashi keskara askatari mā pena keskara,” ixō a Ifofafo Jesús ato yoini*

(Mr. 9.50; Lc. 14.34-35)

<sup>13</sup> Anā Jesús ato yoini iskafakī: “Māfi nono mai anoax tashi keskarakī. Nāskakē shinākāfe. Tashi sharakē nō meetiro. Akka tashi sharayamakekai nō shara meetiroma. Nāskarakai tsoa pishta fichipaima. Mā paispakē anā nō pitiroma. Nāskakē nō potatiro. Nāskarifiāi mā tashi keskara. Mā nono mai ano isharaino yorafāfe mato ōikani inimatirofo. Askafixō mā Nios anā Ifofasharayamaito matoōxō tsōakai tāpitirofoma Niospa meka shara. Mā tashi paispa keskarakē

mato potatirofo. Iskafakī yoitirofo: ‘Mā chakafoki nonoax fotakāfe. Mā kai afaama,’ ixō yoitirofo.

<sup>14</sup> “Nāskatari mā oa luz peeikai keskarakī. Akka pe xe rasi māchi keya mǎnǎnēnoax onetiroma. Chai ixō penakōi nō ōitiro. Nāskarīfai matoōxō yorafāfe xafakīa eōnoa nikatirofo. <sup>15</sup> Nāskafakīri tsōakai fakishaino ōipaifikī luz fepotiroma. Tapo kamaki luz ōtaxō kēsho fepotiroma. Askatamaroko tapo kamaki fomākīa nō ōtaxō tsāotiro a pe xe mēra ikafāfe ōisharanōfo. <sup>16</sup> Nāskarīfai isharakāfe. Mā askaito mato ōikakī tāpitirofo mā eōnoax xafakīa isharakē. Askata māto Epa Nios nai mēra ikano aōnoa yoikī iskafaxikani: ‘¡Aicho! Na yorafo Niosnoax isharakōimisfo. Āto Nios sharakōi,’ ixō yoixikani,” Jesús ato fani yoikī.

*Jesús ato yoini a Niospa shināmanaino Moisés keneniōnoa nikasharakōinōfo*

<sup>17</sup> Anā Jesús ato yoini: “Mā shināiraka iskafakī: ‘A Moisés Niospa shināmanaino keneni, askatari a Niospa meka yoimis fetsafāferi kirika kenenifo afo Jesús noko nikamakaspai,’ ixō mā shināiraka. Anori shināyamakāfe. Ēkai Moisés feta a Niospa meka yoimis fetsafāfe kenenifo keskara ē potayoi onima. Askatamaroko nā kenenifo keskara ē ato tāpimaxii ē ftoni nai mēranoax. <sup>18</sup> Akka ē mato xafakīa yoi. Ea nikasharakāfe. Nai fe mai keyoyoamano a Moisés yoini keskara tsōa fetsafatiroma. Askatari afaa nō potatiroma. Akka mā keyokōi mitokomeano, mai fe nai keyoxii. Mā afama mīshtifo keyoano nō anā Moisés mekari nō yopaxima. <sup>19</sup> Akka fētsa Moisés meka nikasharayamaxō fetsafori ato meka chaka tāpimanaino nikakaspamisfo a Moisés keneni keskara. Nā feronāfake Epa Nios ika ariax anā afaa itiro. Nāskafekē fētsa Niospa meka nikasharataifakī fetsafori Niospa meka xafakīa yoiax Epa Nios ika anoax afe xanīfo itiroki. <sup>20</sup> Askano nā fariseofo fe a Moisés yoikī kirika keneni keskara ato tāpimamisfo, ‘Nōfi sharakōi,’ ifiamisxakakī Niospa yoini keskara keyokōi nikafoma. Akka a Moisés yoikī keneni keskara nikakōikanaxma tsoa Epa Nios ika ari nokotirofoma,” ixō Jesús ato yoini.

*“Ōitifishkiyamakāfe,” ixō Jesús ato yoini  
(Lc. 12.57-59)*

<sup>21</sup> Anā Jesús ato yoini iskafakī: “Mā mā nikamiskī a Moisés nōko xinifo ato yoipaoni keskara. Iskafakī ato yoini: ‘Tsoa reteyamakāfe. Mā fetsa retekē xanīfofo ano mato iyotirofo matori kopikiri retematirofo,’ ixō nōko xinifāfe yoinifo. <sup>22</sup> Mēstekōi anori yoifinikē ē mato meka fetsari mēstekōi yoinō. Ea nikasharakāfe. Fētsa fetsa ĭchaito mī

xanĩfofo ari iyotiro a omiskõimanõ. Askatari fẽtsa fetsa chakafai iskafakĩ: ‘Mĩ afaa tãpiama. Mĩ tatimakõ,’ faito Niospa a omiskõipakenakafo mẽra chiifã mẽra potatiro anoax omiskõipakexanõ.

23-24 “Nãskakẽ mã Nios kĩfiti pexefã mẽraxõ mã kĩfipaikĩ mã iskafaki shinãino: ‘Ooa, ẽ fetsa chakafaa ẽ raefama,’ ixõ shinãkĩ, anã Nios kĩfixoma nã mã Nios inãpaifafãinai fetsa ano koshi fotakãfe. Akiki nokoxõ yoisharafe anã mikiki raenõ. Nãskaxõ anã mã Epa Nios kĩfitiro.

25 “Mã fetsa nimiano matoki oxõ mato iskafatiro: ‘Mĩ ea nimia. ¿Afetĩa mĩ ea kopifaimẽ? Mĩ ea kopifayamaito ẽ mia xanĩfo ano iyoikai,’ mato faito, xanĩfo ano kayoxoma koshi raefakãfe. Akka mã askafayamaino xanĩfo ano mato iyotiro. Mã mato iyoano xanĩfãfe policia yoitiro iskafakĩ: ‘Na feronãfãke fetsa nimiakĩ kopifaamaki, karaxa mẽra ikimafe,’ fatiro. 26 Ẽ mato paraima. Fẽtsa mato karaxa mẽra ikimanano mã fena tseketiroma. Akka nã mã nimia kopifatĩa mã tseketiro,” ixõ Jesús ato yoini.

*“Mãto ãfikõima chotapaiyamakãfe,” Jesús ato fani*

27 Anã Jesús ato yoini: “Mã mã nikamis a nõko xini Moisés yoini keskara. Iskafakĩ ato yoini: ‘Mãto ãfima chotayamakãfe. Askatari kẽromãri mãto fenema chotamayamakãfe,’ ixõ ato yoini. 28 Nãskara chanĩma. Nãskakẽ ẽri mato yoi, fẽtsa ãfe ãfima õikĩ ãfe shinã mẽraxõ shinã: ‘Ẽ na kẽro chotapai,’ ixõ shinãkĩ ãfe shinã mẽraxõ chotai.

29 “Akka mãto fẽro õikĩ mã chakafatiro. Nãskakẽ afara chaka õiyamakãfe afara chakafaxikakima, nã nõko fero tsekaxõ nõ õitiroma keskafakĩ. Mã mãto chaka xateyamax omiskõipakenakafo mẽra mã katiro. Akka mã mãto chaka xateax mã Nios ika ari kaax mã afe ipaxatiro. Askara shara. 30 Nãskarifikĩ mãto mẽke kayakai aõxori mato afara chakafamakẽ, mextemekãfe. Mã askafax shara mã itiroki. Nãskarifikĩ mãto chaka xatekãfe nã mã mextemea keskaraxõ. Akka mã mãto chaka xateyamax, nã omiskõipakenakafo mẽra mã katiro. Akka mã mãto chaka xateax, Nios ari mã kaax afe mã ipaxatiro. Askara shara,” ixõ Jesús ato yoini.

*Feronãfake ãfe ãfi fe enẽnãtirofoõnoa Jesús ato yoini  
(Mt. 19.9; Mr. 10.11-12; Lc. 16.18)*

31 Anã Jesús ato yoini: “Nãskatari Moisés nõko xinifo yoini iskafakĩ: ‘Fẽtsa ãfe ãfi potaxikĩ a potayoxoma iskafatiro kirika kenexõ: ‘Ẽ anã mia fipaima. Ẽ mia eneikai,’ ixõ kenexotiro,’ ixõ Moisés ato yoini. 32 Akka anori Moisés yoifinikẽ anã meka fetsari ẽ mato yoinõ. Tsõa ãfe ãfi chotayamafiano, feronãfake ãfe ãfi eneano nã kẽro feronãfãke fetsa fe chotanãi chakanai.

Askatari feronãfake fêtsa nã kěro fĩax chakanai ãfe ãfikõima chotai,” ixõ Jesús ato yoini.

*“A mã yoiyomis keskara akãfe,” ixõ Jesús ato yoini*

<sup>33</sup> Askata anã Jesús ato yoini: “Mã mã nikamis a Moisés nõko xinifo yoini keskara. Ato iskafakĩ yoipaoni: ‘A mã Nios yoiyomis keskara axosharakãfe. A mã yoiyomis keskara Epa Niospa mã nikakĩ akka mã ayamano nã chakakõi itiro,’ ixõ Moisés nõko xinifo yoini. <sup>34</sup> Akka nãnori ato yoifinikẽ, ěri mato yoisharanõ. Nikakapo. Mã fetsafo yoiyomis keskara axosharakãfe. Iskafakĩ yoiyamakãfe: ‘A ě mato yoiyoya keskara ě axii. Ě mato yoiyoya keskara ě ayamaino Epa Niospa ea omiskõimatiro,’ ixõ yoiyamakãfe. Askatari, ‘A ě mato yoia keskara ě akẽma keyokõi nai měraxõ ea omiskõimatiro,’ ixõ yoiyamakãfe. Akka nai měranoax Epa Nios xanĩfo finakõia iki. Nãskakẽ anori nõ yoitiro. <sup>35</sup> Askatari, ‘A ě mato yoiyoya keskara ě ayamaino nono mai anoafãfe ea omiskõimatiro,’ ixõ anori yoiyamakãfe. Keyokõi mai ano Epa Niosnã. Askatari, ‘A ě mato yoiyoya keskara ě ayamaino a Jerusalén anoafãfe ea omiskõimatirofo,’ ixõ anori yoiyamakãfe. Nã Jerusalén nõko xanĩfo finakõi Niosnã. <sup>36</sup> Askatari, ‘A ě mato yoiyoya keskara ě ayamaino ěfe mãpo ea omiskõimatiro,’ ixõ yoiyamakãfe. Akka nõa nõko mãpo shinãxõ nõko foo nõ fetsafatiroma oxo inõ, askatari fiso inõ. Epa Nios fistichi askafatiro. <sup>37</sup> Akka fetsafo parayamakãfe. ‘Ě mia axõikai,’ ixõ axokãfe. Askatari, ‘Ě mia axõima,’ ixõ axoyamakãfe. ‘A ě yoiyoya keskara ě ayamaino afaa ranã ea omiskõimatiro,’ ixõ anori yoiyamakãfe. Mã askara yoikĩ mã chakafai,” ato fani.

*“Tsoa kopiyamakãfe,” Jesús ato fani*  
(Lc. 6.29-30)

<sup>38</sup> Anã Jesús ato yoini iskafakĩ: “Mã mã nikamiski a nõko xinifo Moisés yoini. Iskafakĩ ato yoini: ‘Fêtsa mato fero tsẽkaito, kopikiri mã fero tsẽkatiro. Askatari mato piti tẽkeaito, pitiri mã tẽketiro,’ ixõ Moisés yoini. <sup>39</sup> Akka nõko xinifo anori yoifinifono, ě mato meka fetsa yoinõ. Ea nikakapo ě mato yoinõ. Fêtsa mato chakafayanã mato tapasaito, ‘Takai fetsari ea afe,’ fakãfe mato tãpinõfo mã ato kopiyamaito. <sup>40</sup> Fêtsa mia xanĩfo ano iyoxõ mia rapati fĩapaiyaito, inãfe fotanõ. Mĩ chõpari inãfe. <sup>41</sup> Xanĩfo iyamakĩ soraronõ, ‘Ea pisha chaima foxõikafe,’ mato fafaiito, mã chai foxotiro. <sup>42</sup> Akka fêtsa mato afarafo yõkaito inãkãfe. ‘Ea inãyope,’ mato faito inãfe fĩshkoyamakãfe,” ixõ Jesús ato fani.

*“Mato noikaspafiaifono mãroko ato noikãfe,” Jesús ato fani*  
(Lc. 6.27-28, 32-36)

<sup>43</sup> Anã Jesús ato yoini iskafakī: “Askatari mā mā nikamis a nōko xinifo yoipaonifo keskara. Iskafakī ato yoipaonifo: ‘Māto kaifo noikāfe. Akka a mato noikaspaifo ato kopikiri noikaspakāfe,’ ixō nōko xinifo yoipaonifo. <sup>44</sup> Anori yoifinifono, akka ē mato yoi a mato noikaspaifo ato kopikima ato noikāfe. Askatari ato axosharakāfe. Askatari a mato omiskōimamiso Epa Nios ato kīfixokāfe. <sup>45</sup> Mā askafai Niospa fake mā iki. Akka Niospa xini onifani yora chakafoya, yora sharafo ato chaxanō. Askatari oiri imani nã yora sharafoya a yora chakafori ato onifaxoni. Nãskakē mări a mato chakafaifo a mato sharafaifo keyokōi ato noikāfe. Nãskax mā Niospa fake ikikai. <sup>46</sup> Akka a mato noiaifos mā ato noia fetsafo noiyamata askarakai sharama. Akka yora chakafo a ato paraxō kori ichapa ato fīamisofo aska famis. Mā askaino Nios matoki inima. <sup>47</sup> Mato fe yorafos mā noia askarakai afaama. Akka a Nios Ifofaafomari nãskarifiakani aa ranări noinākani. <sup>48</sup> Nãskakē Epa Nios nai mēraxō yorafo noiai keskafakī mări yorafo keyokōi noikāfe. A Epa Niospa shināsharamis keskafakī mări askafakāfe,” ixō Jesús ato yoini.

## 6

*“Afaamaisfo ato noikī afara ato ināsharakāfe,” Jesús ato fani*

<sup>1</sup> Anã Jesús ato yoini iskafakī: “Mā fetsafo sharafaino, ‘Nã feronāfake sharakōi ea fanōfora,’ ixō anori shināyamakāfe yorafāfe ferotaifi. Mā askaino yorafāfe, ‘Sharara,’ mato fafiaino, akka Epa Nioskai matoki inimatiro. Nãskaxō mato afaa inātiro. <sup>2</sup> Nã ãa keparanāmisfo keskara iyamakāfe. Afāfe nōko kaifāfe ichanāti pexe mēraxō afaamaisfo afara ato ināmisfo, ‘Sharara noko fanōfora,’ ikaxō. Askatari fofāsakakī afaamaisfo ato afara ināfofāsafamiso, ‘Noko yoisharanōfora,’ ikaxō. Akka askafiaifono Niospa ato afaa ināxima. <sup>3</sup> A afara yopaifo mā afara inākī tsoa yoyamakāfe tsōa tāpiyamanō. <sup>4</sup> Akka tsōa ōiyamaino a afaamaisfo mā ato ināino Epa Nios matoki inimani. Nãskaxō mato afara axosharatiro,” ixō Jesús ato yoini.

*“Epa Nios kīfikī iskafakāfe,” ixō Jesús ato fani*  
(Lc. 11.2-4)

<sup>5</sup> Anã Jesús ato yoini iskafakī: “Mā Epa Nios kīfiatīa a chanīmisfāfe kīfimisfo keskara iyamakāfe. Akka afāfe nōko kaifāfe ichanāti pexe mēraxō yorafāfe ferotaifi Epa Nios kīfimisfo: ‘Noko ōinōfora,’ ikaxō. Epa Nios shinātamaroko ato ōimapaikani. Yorafāfe ato ōiaifono askamisfo. Akka Epa Nios atoki inima. Nãskakē ato afara shara ināxiima. <sup>6</sup> Akka mări ato keskara iyamakāfe. Mā Nios kīfikī tsōa mato ōiyamaino nānoxō Epa Nios kīfikāfe. Māto pexe kene mēra ikixō tsōa

mato õiyamaino nãnoxõ Epa Nios kîfikãfe. Akka yorafãfe mato õiyamafiaino Epa Nios fistichi mato nikatiro. Nãskakẽ matoki inimai. Nãskaxõ afara shara mato inãxii.

<sup>7</sup>“Akka a Nios chanîmara faafãfema kîfimisfo keskayamakãfe. Nãfãfe mẽxotaima nã meka fisti yoiri famisfo. ‘Nõ na meka fisti yoirifaito noko Epa Niospa nikai,’ ixõ shinãmisfo. Askafai-fonokai Niospa a keskara meka nikapaima. <sup>8</sup> Akka mãri ato keskara iyamakãfe. Mã Epa Niospa tâpiakî mã afara yopaito, mã yõkayoamano. <sup>9</sup> Akka mã kîfikî iskafatiro:

Epa Niosi, mî fisti sharafinakõia. Mî nai mẽra ika. Nõ mia noikõi. <sup>10</sup> Nai mẽra mefe ikafo mî ato yoiaito mia nikakõimisfo. Akka nono mai anoxori nã mî noko amapaiyai keskara nõ atiro. Na nono mai ano ikafãfe keyokõichi mia Ifofanõfo. <sup>11</sup> Nã pena tii a nõ piyai noko inãfafãife nõ afaa yopayamanõ. <sup>12</sup> Nõ afara chakafaito nõko chaka noko soaxõfe nã noko chakafaiãfe nõ ato raefai keskafakî. <sup>13</sup> Nokoki Satanãs chaka omayamafe, askakimaroko nomakinoa põtafe nõ nikayamanõ, ixõ kîfikî iskafakãfe.

<sup>14</sup> “Akka fetsafãfe mato chakafafono mã ato raefai keskafakî Epa Nios nai mẽranoato mã fetsafo raefai keskafakî matori chaka soaxotiro. <sup>15</sup> Akka mã fetsafo raefayamaito Epa Niospari mato chaka soaxotiroma,” ixõ Jesús ato yoini.

### *Foni tenemisfoõnoa Jesús ato yoini*

<sup>16</sup> Anã Jesús ato yoini iskafakî: “Ë mato yoionõ. Mã foni tenei oa shinãmitsai keskara mãto femãnã iyamakãfe a ãa keparanãmisfo ikaifo keskai. Afãfe foni tenekani ãto femãnã shinãmitsai keskara ikani yorafãfe ato õikani. Askatari foaromekanima yorafãfe ato õinõfo. Nãskakẽ Epa Niosnoa shinãkanima. Askaifono Epa Nios atoki inimaima. Nãskakẽ ato afaa inãima. Akka mãri foni tenei ato keskara iyamakãfe. <sup>17-18</sup> Akka mã foni tenei mã Nios shinãyanã mã fechokometiro. Askatari fõxti mã foaromesharatiro. Nãskakẽ Epa Nios fistichi tâpitiro yorafãfe tâpiafomano. Mã askaito yorafãfe tâpitirofoma mã foni teneaito. Akka Epa Nios fistichi tâpitiro. Nãskakẽ Epa Nios matoki inimatiro. Askatari mato afara shara inãxii,” ixõ Jesús ato yoini.

*“Epa Nios ika anoxõ afara sharakõifo mato mekexona,” ixõ Jesús ato yoini*

*(Lc. 12.33-34)*

<sup>19</sup> Anã Jesús ato yoini iskafakî: “Nono mai anoxõ afama mîshti ichapa mekeyamakãfe. Mato nakaxa pñaino mã fenotiroki. Askatari chakanai fetsetiro. Askatari yometsofo mãto pexe mẽra ikixõ mãto afama mîshtifo keyokõi mato fiano mã fenotiro. <sup>20</sup> Akka afama mîshti noitama Nios noikãfe. Nã



mato yoini keskara akāfe. Mā akiki nokoaito nā mato afara sharakōi mekexona mato ināxii. Akka ono nai mēraxō afama mīshti mato mekexona, a nakaxa mato pīatiroma. Askatari chakanaima. Askatari anā māto pexe mēra ikiax tsoa yomet-sotiroma. <sup>21</sup> Akka māto afama mīshtifo noikī mā shināfafāini. Nā māto afama mīshtifo mā shināfafāinai keskafakī Niosri shināfafāikāfe, a noikī yonoxosharakāfe,” ixō Jesús ato yoini.

*“Nōko ōiti sharakē nō shināsharakōitiro. Akka nōko ōiti chakakē nō shināsharatiroma,” ixō Jesús ato yoini*

*(Lc. 11.34-36)*

<sup>22</sup> Anā Jesús ato yoini iskafakī: “Anā ē mato meka fetsari yoinō mā tāpikōinō. Akka nōko fero rafeta nā rāparinī chai chaxai keskarakē, nōko yora shara itiro. Nāskarifiāi nōko fero sharano nō xafakīa ōisharatiroma. Nāskatari nō isharakōitiro. <sup>23</sup> Akka nōko fero chakakē nō ōisharatiroma. Fakishkōi itiro. Nāskarifiakī nōko ōiti mēraxō nō chaka shinākī nō afara chakafamis nō itiro. Akka ōisharakāfe. Mā Epa Nios shināi xafakīa ifiaxō āfe meka kachikiri faxō mā anā xafakīa shinātiroma. Fakish keskara mā itiro,” ixō Jesús ato yoini.

*“Nōko afama mīshti noisharatama nō Nios noisharakōitiro,” Jesús ato fani*

*(Lc. 16.13)*

<sup>24</sup> Anā Jesús ato yoini iskafakī: “Tsōa āfe ifo rafe yonosharaxotiroma. Fetsa noikaspata, fetsa noisharatiroma, nā yoiāi keskarakōi axotiroma, akka a fētsa amapaiyai keskara axotiroma noikaspatiroma. Nāskarifiakī mā kori fisti shinākī mā Nios shinātiroma. Nāskatari Epa Nios fisti shinākī mā kori noitiroma,” ixō Jesús ato yoini.

*“Epa Niospa āfe fakefo kexesharamis,” ixō Jesús ato yoini*

*(Lc. 12.22-31)*

<sup>25</sup> Anā Jesús ato yoini iskafakī: “Anā ē mato yoisharanō. Ea nikasharakāfe. Shināchakayamakāfe. Nō afaa piyamata, afaari nō ayaima iyamakāfe. Askatari afaari nō safeima ixō shināchakayamakāfe. Akka a nō piatokai noko imasharatiroma. Askatari a nō safeatori nōko yora noko imasharaxotiroma. <sup>26</sup> Akka shinākapo. Peyafāfe afaa fanamisfoma. Afaari topimisfoma. Askaxori afaa mekemisfoma. Nāskafekē Epa Niospa ato pimamis. Akka nā peyafō afaayamafoiakē Epa Nios nai mēra ikato ato pimamis. Akka Niospa mato noikī nā peyafō finōmainīfofā mato kexesharakōimis. <sup>27</sup> Nāskakē, ¿afeskakī mā shināchakaimē? A nō shināchakaitokai pena fisti noko anā nimatiroma. Nāskakē afaa shināchakayamakāfe.

<sup>28</sup> “Askatari iskakī shināyamakāfe: ‘Ooa. ¿Fanīa ē rapati fitiromē safexiki?’ ixō anori shināyamakāfe. Akka shinākapo afeskax charofo foaikamakī. Nā charofāfe yonokanima.

Askatari xapo toro atirofoma rapati faxikakī. <sup>29</sup> Nāskafiax charofo sharamīshti foaikani. Nāskarari xanīfo Salomón rapati sharafinakōia safefixō nā charofo finōama. <sup>30</sup> Akka Niospa nafefo sharashtafo onifani. Sharafiano nō sepakī xateano natiro. Nāskaxō nō koofatiro. Akka Niospa nafefo finōmainīfofā mato noikī mato rapati safematiro mato kexesharaxō. Akka mā shināchakakī mā Nios chanīmara fasharaima. <sup>31</sup> Nāskakē shināchakayamakāfe. Shinākī iskafayamakāfe: ‘Ooa. Ĕ fonāiki a Ĕ pi ai keyoano, a Ĕ ayairi keyoano koriyaxomari Ĕ afaa safeima,’ ixō anori shināchakayamakāfe. <sup>32</sup> Akka nā Nios Ifofaifāfema iskara shināmisfo. A pi ai fisti shinākata, a safepaiyai fori shināmisfo. Akka Epa Niospa mā mato tāpia afarafo mā yopaito. <sup>33</sup> Nāskakē Nios māto xanīfoōnoa shinākāfe. A Niospa mato amapaiyai keskara nāskara fisti shinākōikāfe. Mā askafaito afara fetsa mā yopaito Epa Niospa mato ināxii. <sup>34</sup> Nāskakē shināchakayamakāfe. Yoi iskayamakāfe: ‘Ooa. Ĕ tāpiama penama afara chaka afeskara afiaino. Ĕ nā keskara tenetiroma,’ ixō shināyamakāfe. Shinākī iskafakāfe: ‘Epa Niospa na penata ea kexesharamis keskafakī penamari ea kexesharai,’ ixō nānori shinākāfe,” ixō Jesús ato yoini.

## 7

*“Fetsafo mekafakī chakafayamakāfe,” ixō Jesús ato yoini (Lc. 6.37-38, 41-42)*

<sup>1</sup> Anā Jesús ato yoini iskafakī: “Mēxotaima fetsafo mekafayamakāfe iskafakī yoikī: ‘Naato afara chakafakī Niospa omiskōimapainō,’ fakī. Akka mā ato askafayamaino Niospari mato mekafatiroma iskafakī yoikī: ‘Na yorafo chakafo,’ mato fatiroma. <sup>2</sup> Akka māri nāato akai keskafakī afara mā chakafaito, matori Niospa omiskōimaxii. Akka mā fetsafo afara ināsharakēma Niospa matori afaa ichapa ināxima, mā ato afara ināsharakōikēma. <sup>3</sup> ¿Afeskakī ifi pasta pishta fetsa feronaki ikano mā ōimē, māroko ifi pasta efapa feostamefixō? <sup>4</sup> Akka, ¿mā shināimamē a mā ifi pasta efapa feostamea? Akka, ¿afeskakī mā fetsa iskafaimē?: ‘Yamā, Ĕ mia fixonō a mī ifi pasta pishta fero naki ika,’ fakī, mākoī mā kakamepaimis. Mākai afaa tāpiama. <sup>5</sup> Nāskax mā chanīkōi mā ato parapaimis. Akka Ĕ mato yoinō ea nikakapo. Akka māto fero mēranoa a ifi pastafā mā feostamea tsekayokāfe. Nāskaxō ōisharakī, a fetsafo ifi pasta pishta feronaki ika mā tsekaxotiro. Nāskarifikī māto chaka xateyamaxō mā fetsafo chaka xatematiroma. Akka māto chaka xatexō fetsafo mā chaka xatematiro.

<sup>6</sup> “Ē meka fetsari mato yoinō mā tāpinō. Paxta pōfe nō nami shara ināpaifiaino noko keyotiro mifiki. Askatari kochi nō afara shara ināino peama peamakī chakana fatiro. Nāskari fakī yorafāfe Niospa meka shara nikakaspakī chakafatirofo, Epa Nios chakafakī mekafakakī. Askaifono Epa Niospa meka shara anā ato yoipaiyamakāfe,” ixō Jesús ato yoini.

*“Nō Epa Nios afara yōkaito noko inātiro,” ixō Jesús ato yoini (Lc. 6.31; 11.9-13)*

<sup>7-8</sup> Anā Jesús ato yoini iskafakī: “Nāskakē ē mato yoi, afara fichipaikī Epa Nios yōkakāfe mato ināi kiki. Fena fena kakīma manakāfe nā Epa Niospa mato ināitīa. Nāskakē Epa Nios kīfifafāikāfe mā kīfīaito mato ināi kiki. Akka nā yōkai Epa Niospa afara shara ināxii. Nāskarifiakī fētsa afara shara fenaīto Epa Niospa fichimatiro. Nāskarifiakī fētsa Epa Nios kīfīaito ināsharakōixii.

<sup>9</sup> “Akka mātō fake mato yoa yōkaito, ĵmā tokiri inātiromē? Maa. Mākai mātō fake mā askafatiroma. <sup>10</sup> Askatari, ĵmātō fāke mato foe yōkaito mā rono inātiromē? Maa. Mākai mātō fake mā askafatiroma. <sup>11</sup> Akka mā chakafixō mātō fakefo kexesharaxō afara sharafo mā ato inātiro. Nāskarifikī Epa Nios nai mēranoato mā afara yōkaito mato kexesharakatsaxakī afara sharafo mato ināsharaxii nā nai mēraxō mato mekexona.

<sup>12</sup> “Nā mā fichipaiyai keskafakī fetsafāfe mato axosharai-fono, nāskarifikī māri fetsafo axosharakāfe. Moisés feta a Niospa meka yoimisfāfe nānori yoinifo kirika kenekakī,” ixō Jesús ato yoini.

*Fepoti pishtaōnoa Jesús ato yoini (Lc. 13.24)*

<sup>13</sup> Anā Jesús ato yoini iskafakī: “Meka fetsa ē mato yoinō. Nikakapo. Fepoti rafe iskarakī: Fepoti fetsa pishtaki nā fepoti pishta ikikāfe. Akka nā fepoti fetsa efapa. Nā fepoti efapato fai efapa kaa. Nāskakē nā fai efapato yora ichapa fomisfo a omiskōipakenakafo mēra. <sup>14</sup> Akka fepoti pishta ano fai kaa, pishta fekax. Nā fai Nios ano nokoa nā fai atsō pishtakōi. Nāskakē ichapama aō fomisfo,” ixō Jesús ato yoini.

*Ifi āfe fimioxō nō tāpitiro afe keskaramākī (Lc. 6.43-44)*

<sup>15</sup> Anā Jesús ato yoini iskafakī: “Ōisharakāfe, a chanīaifāfe mato paratirofokī: ‘Nō Niospa meka yoimis,’ ixō mato paratirofo. Afāfe Niospa meka yoimisfomaki. Akka afofi ovejafo keskarafo fikanax akka āto shinā mēra poomā pōfefo keskarakōifo. Nāskakē ato fishtayamakāfe. <sup>16</sup> Akka mā tāpitiro afaa afeskafakanimākai. Akka ifi āfe fimioxō nō tāpitiro afe keskaramākī. Xopa foaikī moxaya foaitiroma. Askatari

kachafi moxaya foaitiroma. Nāskaxō nō tāpitiro moxayafo ōikī xopakairokokē. Nāskarifikā nō tāpitiro kachafimāi moxayakē. <sup>17</sup> Akka ifi shara fimi sharaya itiro. Akka ifi chaka fimi chakaya itiro. <sup>18</sup> Nāskakē Ifi shara fimi chakaya itiroma. Ifi chakari fimi sharaya itiroma. <sup>19</sup> Akka ififo fimi sharaya iyamaito ifāfe reraxō koofatiro. <sup>20</sup> Nāskakē a ato tāpimamisfoōnoa mā ato tāpitiro sharafo iyamakani chakafo itirofo,” ixō Jesús ato yoini.

*“Akka keyokōi fotirofoma Epa Nios ika ano. Fisti rasi fotirofo,” ixō Jesús ato yoini*

*(Lc. 13.25-27)*

<sup>21</sup> Anā Jesús ato yoini iskafakī: “Akka yora ichapato yoimis iskafakakī: ‘Jesús, mī ēfe Ifokōi,’ famisfo. Nāskafikaxō atirito ea Ifofamisfoma. Nāskakē ēfe Epa Nios ika ari nokotirofoma. Ēfe Epa nai mēra ikato nā ato amapaiyai keskara akatsaxakakī nāfo ēfe Epa ari nokotirofo afe ipaxakakī. <sup>22</sup> Akka mā mai keyoaino nā onifanifo tii keyokōi Niospa ichanāfaxii. Nā nikakaspamisfo tii omiskōipakenakafo mēra ato potaxii. Nāskakē yora ichapafāfe ea yoikani iskafakakī: ‘Ifo, shināpo. Nō mī aneōxō nō yorafo yoimis. Mī aneōxori nō a niafaka chakafo yorafo mēra nanea nō ato makinoa potamis. Mī aneōxori nō afama mīshti famis yorafāfe atiroma keskafakī. Noko shināfe, Ifo,’ ixō ea yoixikani. <sup>23</sup> Askaifono ē ato xafakīa yoixii iskafakī: ‘Mā kai efe yorama. Māfi ato pāramiski. Afara chaka fisti mā famiski. Emakinoax fotakāfe,’ ē ato faxii,” ixō Jesús ato yoini.

*Pexe rafeōnoa Jesús ato yoini*

*(Mr. 1.22; Lc. 6.47-49)*

<sup>24</sup> Anā Jesús ato yoini iskafakī: “Akka nā ea nikaito nā ē yoiai keskara aki, nā yōra pexe fakī tāpixō mai chai pōkixō mai teikī pexe kishi nīchitiro keskafakī. <sup>25</sup> Akka oi ikaino, pexe nāmā faka faitiro. Askatari nēfefakī pexe afeskafatiroma. Nāskakē pexe paketiro ma mā mai teikōikimāi pexe kishi niano. <sup>26</sup> Akka nā ē yoiaito ea nikafikī a ē yoiai keskara nikaima, askara yora nā yora tatimato pexe fakī mashi ano pexe fatiro keskarakōi. <sup>27</sup> Akka oi ikaino faka faitiro. Askatari nēfefakī pexe potatiro. Nāskax pexe chakanatiro. Nāskarifikā fētsa ēfe meka nikafikī ea nikaima afofi fenoi fetsekani. Nāskakē omiskōipakenakafo,” ixō Jesús ato yoini.

<sup>28-29</sup> Nāskata mā Jesús mekai xateano yorafāfe nikakaxō, “¡Kee! Nikakapo. Nato tāpikī finakōia, a Moisés yoikī kirika keneni keskara ato tāpimamisfo keskarama, meka sharakōi nato yoi,” fanifo.

## 8

*Jesús yora rashkishiai sharafani**(Mr. 1.40-45; Lc. 5.12-16)*

<sup>1</sup> Askata Jesús ato yoikī xateta māchi keya ariax tisir-imepakeaito yorafāfe chīfafainifo afe fōkakī. <sup>2</sup> Jesús kaino feronāfake isinī iki rashkishi fetseax Jesúski oni. Akiki oxō ratokonō mai chachipakefofā yoini iskafakī: “Ifo, ea sharafa-paikī mī ea sharafatiro,” fani. <sup>3</sup> Askafaino Jesús āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino, a rashkishi fetseai koshikōi sharatani. <sup>4</sup> Mā sharano Jesús nīchini iskafakī yoiyanā: “Mī tsoa yoiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

*Jesús sharafani romanō xanīfāfe āfe ina yonaito**(Lc. 7.1-10)*

<sup>5</sup> Askafafāini Capernaúm ano kani. Nāno akiki soraro xanīfo nokoni a yonoxomis sharafamapai. <sup>6</sup> Nokoxō yoini: “Ifo, a ea yonoxomis isinī iki. Ēfe pexe ano rakax omiskōiferoikima,” fani.

<sup>7</sup> Askafaino, “Ē kanōkī sharafaxikī,” fani.

<sup>8</sup> “Ifo, ēkai afama. Akka mī tsoa keskarama. Mī finakōiakī ēfe pexe ano kayamafe. Mī mekapa a ea yonoxomis ea sharafaxōfe nonoxō. <sup>9</sup> Akka eari ēfe xanīfāfe yonomamis. Ēri sorarofō yonomatiro. ‘Katāfe,’ ē faino karisatiro. Askatari, ‘Ekeki ofe,’ ē faino ekeki orisatiro. Nāskakē a ea yonoxomis afara ea axōfe ē faino ea axotiro. Akka mī afama mīshti fatiroki. Mī mekapa a ea yonoxomis ea sharafaxōfe,” ixō yoini.

<sup>10</sup> Askafaito nikakī a afe foafo Jesús ato yoini: “Kee, nikakapo. Na feronāfake israeliyamafixō ea chanīmara fakī finakōi fetsafo keskarama. Akka Israel anoafāfe ea iskafamisfoma chanīmara fakakī. <sup>11</sup> Ē mato xafakīa yoinō. Na maitio ano ikafo Nios chanīmara fakanax nōko xinifo Abrahamnō Isaacnō Jacobonō ichanāxikani Nios yorafo ixikakī. <sup>12</sup> Akka atiri nōko kaifo nā israelifo Niospa afe yorafo ato imapai-faino chanīmara fakanima. Nāskakanax Nios ika ano nokotirofoma. Niospa ato fakishifā mēra potaxii. Anoax eaiyanā fasi omiskōixikani,” ixō Jesús ato yoini.

<sup>13</sup> Nāskata Jesús yoini soraro xanīfo: “Mī pexe ano katāfe. Mī ea chanīmara faino a mia yonoxomis mā sharaki,” fani.

*Jesús Pedro rayos sharafani**(Mr. 1.29-31; Lc. 4.38-39)*

<sup>14</sup> Askata Jesús Pedro pexe ano kani. Nāno Pedro āfe rayos yōxafa yonai oxati kamaki raka ini. <sup>15</sup> Jesús ōikī āfe mēkemā

ramāni. Ramāino āfe yona matsirisatani. Mā Jesús sharafaano anā yonanima. Mā sharaxō fininākfāta Jesús pimani.

*A isinī ikaifo Jesús ato sharafani*

*(Mr. 1.32-34; Lc. 4.40-41)*

<sup>16</sup> Nāskano mā xini kaino a isinī ikaifo Jesúski efenifo ato Jesús sharafapanō. Atiri a niafaka chakafo ato mēra nanea Jesús āfe mekapa ato makinoa pōtapakeni. Keyokōi Jesús ato sharafapani. <sup>17</sup> Nānori Niospa meka yoimisto Isaías a inōpokoai yoikī kirika kenekī iskafani: “Nō isinī imisno Cristo mā noko sharafaa. Askatari nā noko pāefaifo nomakinoa mā noko potaxona,” ixō Isaías kirika keneni keskara Jesús ani.

*A afe fopaimisfoōnoa Jesús ato yoini*

*(Lc. 9.57-62)*

<sup>18</sup> Askata Jesús ōini yorafā rasi akiki feaifāfe. Askaifono aōxō tāpimisfo yoini iskafakī: “Okiri nō ĩamāfā pokefainō fokāfe,” ato fani. <sup>19</sup> Akka Jesús kayoamano a Moisés yoikī kirika keneni keskara ato tāpimamis akiki oxō yoikī iskafani: “Maestro, ěri mefe kapai nā mī kai ari ěri mefe kafāsaxiki,” faito, <sup>20</sup> Jesús kemani: “Akka maxoteneroa kiniya, peyafari naayafo akka ěkai pexe yama,” fani.

<sup>21</sup> Askatari a afe kafāsamis fētsa iskafakī yoini: “Maestro, ea nīchiyofe ěfe epa naito ě maifayotanō. Chipo mia Ifofaxiki,” faito, Jesús kemani: <sup>22</sup> “Iskaratīa ea Ifofafe. Akka nā ea Ifofaafāfema yora nakē maifatirofo,” ixō Jesús yoini.

*Jesús nefe yaŋi ĩamāfā poo iki meseniaito nishpa fani*

*(Mr. 4.35-41; Lc. 8.22-25)*

<sup>23</sup> Nāskata Jesús kanōanāfānē naneinīkfāni aōxō tāpimisfori afe naneinīfofānifo. <sup>24</sup> ĩamāfā pokefainaifono atoki nēfefā nokoni. Jesús kanōanāfā xaki mēra rakax oxano nefeyanā ĩamāfā poo ini. Kanōanāfā faka fospikōini. <sup>25</sup> Askaino aōxō tāpimisfāfe mōinifo iskafayanā: “ĭlfo, mā nō āsaikai! ĭNō āsayamanō moife!” fanifo.

<sup>26</sup> Askafafono, Jesús ato yoini: “ĭAfeskai mā rateimē? Mā ea chanīmara fasharama. Nāskakē mā ratei,” ato fani. Ato askafata, fininākfāta fāsikōi, “ĭNēfe, nishpafe!” fata, “ĭĩamā, nishpafe!” fani. Askafaino anā ĩamāfā feroinima. <sup>27</sup> Askafaito ōikani yoinānifo: “ĭKee! ĭNa feronāfake afe keskaramē na nefe feta ĩamāfānē ato yoiaito nikaifo?” ikanax yoinānifo.

*Feronāfake rafeta Gadara mai anoxō niafaka chakafo nanea-fono Jesús ato makinoa potani*

*(Mr. 5.1-20; Lc. 8.26-39)*

<sup>28</sup> Askata Jesús okiri ĩamāfā aōxō tāpimisfo feta pokefainax Gadara mai ano nokonifo. Nāno feronāfake rafe niafaka yōshi chaka nanekanax Jesúski nokonifo kinīfā mēranoax. Nā

rafe mesekōi ipaonifo. Nāskakē yorafāfe a ikafo ano tsōa ato finōtiroma ipaoni atoki mesekakī. Nā maiyafō ano nā rafe ipaonifo. <sup>29</sup> Nāskakē Jesús fichikanax fāsikōi fiisiyanā yoinifo: “Mifi Niospa Fakeki. Akka, ¿mī noko afeskafaiyoamē? ¿Mī noko omiskōimaniyoamē?” Jesús fanifo.

<sup>30</sup> Askafafono chaimaxō kōchifā rasichi pinifo. <sup>31</sup> Nāskakē niafaka chakafāfe Jesús iskafanifo: “Mī nā feronāfake rafe makinoa mī noko potaimākai kochifo mēra noko nīchife,” faifono, <sup>32</sup> “Fotakāfe,” Jesús ato fani. Nāskax niafakafo feronāfake rafe makinoax tsekekanax kochifo mēra ikinifo. Nāskakē kochi rasi ichoax ĩamāfā mēra keyopakeni. Nāskax āsai fetseni.

<sup>33</sup> Askaito ōikani a kochifo kexemisfo ichonifo. Mā pexefo tii ano nokokaxō ato yoinifo: “Nā feronāfake rafe nā niafaka naneafo rafe mā Jesús ato makinoa niafaka pōta. Askatari nōko kochifo mēra ikimanano keyokōi nāfoya nōko kochifo ĩamāfā mēra keyopakeax āsai fetsea,” ato fanifo. <sup>34</sup> Ato yoiaifono nikakanax keyokōi nā pexefo tii anoax Jesúski fenifo. Akiki nokokaxō yoinifo: “Na nōko mai anoax katāfe,” fanifo.

## 9

### *Jesús yora finimisma sharafani* (Mr. 2.1-12; Lc. 5.17-26)

<sup>1</sup> Askata Jesús kanōanāfā mēra nanekaini. ĩamāfā okiri pokefaini kaax āfe mai ano nokoni. <sup>2</sup> Nāno ikano a feronāfake finimisma yorafāfe akiki efenifo āfe ratatinī rataxō Jesús sharafanō ikaxō. Jesús ōini shināifāfe iskakakī na finimisma Jesús sharafai kiki ikaxō. Nāskakē a finimisma Jesús iskafani: “Efe yorashta, inimafe. Iskaratīa mē mia chaka soaxonaki,” fani.

<sup>3</sup> Askafaino a Moisés yoikī kirika keneni keskara ato tāpimamisfāfe atirito nikakaxō āto shinā mēraxō shinānifo iskafakakī: “Natokai ato chaka soaxotiro. Njos fistichi ato chaka soaxotirokī. Akka nato noko feparapai, ‘Ē Niosra’ noko fapai,” ixō āto shinā mēraxō shinānifo. <sup>4</sup> Askafono Jesús tāpixō a shināifo keskara ato yoini: “¿Afeskakī mātō shinā mēraxō mā chaka shināimē? <sup>5-6</sup> Ēfi Cristokī ē yorafo ato chaka soaxotiro. Akka, ¿ē afaa fatiromē? Mē mia chaka soaxona ē fatiroraka. Askatari ē mia sharafaa ē fatiroraka,” ato fani. “Akka ē mato tāpimanō ē Niosxō mato chaka soaxotiro nono mai anoxō.” Nāskata Jesús a feronāfake finimisma yoini: “Fininākfata mī rakati fifaini mī pexe ano katāfe,” Jesús fani.

<sup>7</sup> Jesús askafaino a finimisma fininākfata āfe pexe ano kani.

<sup>8</sup> Askaito ōikani yorafo ratei fetsenifo. “¡Kee, ōikapo! Nios tsoa keskarama. Fāsi sharakōi. Nō ōimisma keskara mā noko rama ōimana. Niospa Yōshi Sharaōxō na feronāfake finimisma Jesús

ãfe mekapa mã sharafaa. Askatari ãfe chakari mã soaxona,”  
 ikanax yoinãnifo.

*Jesús Mateo ifini aõxõ tâpimis inõ*  
 (Mr. 2.13-17; Lc. 5.27-32)

<sup>9</sup> Jesús nãnoax kakĩ feronãfake fisti fichini, ãfe ane Mateo,\* ãfe xanĩfo kori fixõi tsaokẽ. Nãskaito Jesús yoini: “Efe kofe ãfe mia tâpimanõ,” faino Mateo fininãkafã Jesús fe kani.

<sup>10</sup> Nãskafaito Mateo Jesús iyoni ãfe pexe anoxõ pikikakĩ. Askatari a yora chakafori afe inifo a xanĩfo kori fixomisfo. Nãfãfe ãa chanĩxõ kori finõmainĩfofã fimisfo inifo. Askatari a yora fetsafo chakafamisfori fekanax akairi mãsa ano Jesús fe tsaonifo a feta pixikakĩ. Jesúsxõ tâpimisfori nãno ato fe tsaonifo ato feta pixikakĩ. <sup>11</sup> Askaito õikakĩ fariseofãfe Jesúsxõ tâpimisfo yõkanifo: “¿Afeskakĩ mãto maestro nã ato kori fixomisfo feta piimẽ, a yora fetsa chakafo fetari pii?” fanifo.

<sup>12-13</sup> Askafaifãfe nikakĩ Jesús ato yoini: “A sharafãfe notoro fenakanima. Akka nã isinĩ ikaifãfe notoro fenakani. Nãskafakĩri yorafãfe yoimisfo iskakakĩ: ‘Ëkai afaa chakafamisma. Nãskakẽ ãfe afaa yopaima ãfe chaka ea soaxonõ,’ imisfo. Nãskakẽ ãfe ato chaka soaxotiroma. Akka fetsafãfe yoikĩ iskafaifono: ‘Ë afara chakafamis. Nãskakẽ a ãfe imis keskara ãfe anã ipaima,’ ikaifono ãfe ato chaka soaxotiro. Akka nã nõ sharakõi ikaifoõnoax ãfe onima. Akka ãfe oni a yora chakafo ãto chaka ato soaxoxiki. Akka ãfe mato yoipai mã tâpinõ a Niospa ato shinãmanaino iskafakĩ kenenifo: ‘Mã yoinãfo retexõ ea inãxiki mã koamis mãto chaka soapaikĩ, askara ãfe fichipaima. Akka ãfe fichipai fetsafo mã ato noikĩ mã ato sharafaxõaito,’ ixõ kenenifo.

“Akka ãfe onima a yora sharafoõnoax. Askatamaroko a yora chakafoõnoax ãfe oni ato chaka soaxoxiki,” ixõ Jesús ato yoini.

*Nã foni tenemisfofãfe Jesús yõkanifo*  
 (Mr. 2.18-22; Lc. 5.33-39)

<sup>14</sup> Juan ãfe inafõ fẽkaxõ Jesús yoinifo iskafakakĩ: “Fariseofãfe foni tenekĩ feyafamisfo Nios shinãkakĩ. Nõri askafamis foni tenekĩ Nios shinãkĩ. Akka, ¿afeskakĩ mãõxõ tâpimisfãfe foni tenekanimamẽ?” fanifo.

<sup>15</sup> Askafaifãfe Jesús ato kemani: “Feronãfake ãfiyaino, yorafo ano fisti ichanãkaxõ afara fetsa fetsatapafo afeta pitirofo inimayanã, aicho fakakĩ akiki inimakakĩ. Nã kẽromã ãfe fene ano ato fe ikano tsõa foni tenetirofoma inimakakĩ. Akka mã fene rẽteafono afe yorafãfe shinãkakĩ foni tenetiro,” ixõ Jesús ato yoini.

<sup>16</sup> “Tsõa sama fenaya sama xini kishi fatiroma. Nõ askafaino sama fena samama chakanatiro. Nãskatari sama

\* 9:9 Mateo ane rafeya ipaoni. ãfe ane fetsa Leví.



fena fe sama xini isharatiroma. Nāskakēri nã ě mato yoiai keskara mã nikakōixō a mã ipaoni keskara anã mã itiro ma mãmãi ea nikakōiax. A mã ipaoni keskara shinãmakita nãskax mãto yora fena keskara shara itiro. <sup>17</sup> Nāskarifikã tsōa mãmã fata koiro pisha xini mēra nanetiroma nã mãmãnō faraxakaino toxamãiyano. Nāskakē nã mãmã fata fe koiro pisha chakanatirofo. Akka nã mãto xinifãfe mato yoimisfo keskara fe nã ě mato yoiai keskara ōsinãtiroma. Nã ě mato yoiai keskara Niospa meka sharakōi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka ōsinãtiroma. Nāskakē mã nikapai fi mã shinãsharatiroma. Nāskarifikã tsōa mãmã fata koiro pisha xini mēra nanetiroma nã mãmãnō faraxakaino toxamãiyano. Nāskakē nã mãmã fata fe koiro pisha chakanatirofo. Akka nã mãto xinifãfe mato yoimisfo keskara fe nã ě mato yoiai keskara ōsinãtiroma. Nã ě mato yoiai keskara Niospa meka sharakōi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka ōsinãtiroma. Nāskakē mã nikapai fi mã shinãsharatiroma,” ixō Jesús ato yoini.

*Jairo fake xotofake mã nakē Jesús otofani. Askatari kēromãri Jesús rapati mēeax sharani*

(Mr. 5.21-43; Lc. 8.40-56)

<sup>18</sup> Nānori Jesús ato yoiai no judeofãfe xanĩfo nokoni. Jesús ki nokoxō xanĩfãfe a nãmã ratokonō mai chachipakefofã yoini: “Ĕfe fake xotofake rama naa. Akka mĩ kaxō mĩ mēkemã mĩ ramãino anã ototiro,” xanĩfãfe Jesús fani.

<sup>19</sup> Askafaino Jesús fininãfata aōxō tãpimisfo fe kani xanĩfo acho. <sup>20</sup> Askatari nānori kēro imi nesemisma ini, doce xinia amis imi nesekima. Nã kēromã Jesús kaito acho kaxō a kachikirixori ãfe tari kexa ramãkani. <sup>21</sup> “Ĕ ãfe tari mēeax ě sharatirora,” ixō ãfe shinã mēraxō shinãni. <sup>22</sup> Akka Jesús ifiakekafãta nã kēro fichini. Fichita yoini: “Yōxashta, rateyamafe. Mĩ ea chanĩmara faax mã mĩ sharaki,” Jesús faino nã kēro imi neserisatani.

<sup>23</sup> Askata mã Jesús nokoax xanĩfãfe pexe mēra ikikaini. Anoxō Jesús ōia yorafãfe ãto xãiti manenifo, yora fetsafo oiakani sheesaifono. <sup>24</sup> Askafaino Jesús ato iskafani: “Nonoax fōtakãfe. Na fakekai naamaki. Oxaki,” ato faito Jesús ōsanifo. <sup>25</sup> Ato kãimata xotofake mētsoinĩfōfãnaino koshikōi fininãkafani. <sup>26</sup> Nāskata Jesús nã xotofake naa otoakē nikakanax pexefo tii chanifofãsanifo.

*Fēxo rafe Jesús sharafani*

<sup>27</sup> Nāskata Jesús xanĩfãfe pexe anoax kaino fēxo rafetari chĩfafainifo iskafayanã fãsikōi: “Mĩ nõko xini David fenaki, noko noife,” fanifo. <sup>28</sup> Askafafaino Jesús pexe fetsa mēra

ikikaini. Nāno afe ikiafono Jesús ato yōkani: “¿Mā chanīmara faimē a ē mato sharafatiro?” ato faito, “Ēje, Ifo, nō mia chanīmara fai,” fanifo. <sup>29</sup> Nāskata ato fero ramākayanā ato yoini: “Ea chanīmara faaxfi mā sharaikai,” ato fani. <sup>30</sup> Ato askafaino ōisharanifo. Nāskakē Jesús ato yoisharani: “Ea nikakapo. A ē mato sharafaa tsoa yoiyamakāfe,” ato fani. <sup>31</sup> Akka ato anori yoifekē nā Jesús sharafaa nā ano ikafo ato yoifofāsafanifo nā rafeta.

### *Feronāfake mekamisma Jesús sharafani*

<sup>32</sup> Nā fēxo rafe imisfo pexe mēranoax tsekefainaifono fetsafāfe feronāfake mekamisma Jesúski efenifo Jesús sharafanō. Niafaka chaka a mēra naneano mekamisma ini. <sup>33</sup> Jesús mā feronāfake makinoa niafaka chaka potano nā feronāfake mekamisma mekani. Nāskakē nā ano ikafo rateyanā yoinānifo: “¡Kee, ōikapo! Na nōko mai Israel anoxō Jesús akai keskara tsōa ōimisma,” ikanax yoinānifo. <sup>34</sup> Askafaifono fariseofāfe yoinifo: “Nato nīafaka xanīfoōxō niafaka potai,” ikanax yoinānifo chakafakī mekafakani.

### *Jesús yorafo shinākōini*

<sup>35</sup> Nāskakē Jesús pexefo tii judeofo ikafo ano kafāsani. Judeofāfe ichanāti pexe mēraxō Jesús Niospa meka shara ato yoisharani iskafakī: “Isharakāfe. Nios māto xanīfokōi ipai kiki,” ixō ato yoifofāsafani. Nāskaxō a isinī ikaifo fetsa fetsatapafo ato sharafani. <sup>36</sup> Yorafā rasi akiki feaifono ōikī Jesús ato shinākōini fekaxteaifāfe ōikī, nā ovejafō ifomaiskanax tsōa ato kexeyamano fofāsatirofo keskara ato ōikī. <sup>37</sup> Nāskaxō a aōxō tāpimisfo ato yoini iskafakī: “Yora ichapafāfe ea nikayamafi-aifono ichapatoma ea yonoxokani eōnoa ato yoikakī. Nāskakē mā Epa Nios kīfikāfe a yonoxomisfo katonō eōnoa ato yoinōfo. <sup>38</sup> Akka Epa Nios kīfikāfe yorafo nīchinō ēfe meka ato yoitanōfo ea Ifofanōfo,” ixō Jesús ato yoini.

## 10

### *Jesús aōxō tāpimisfo doce feronāfake ifini*

(Mr. 3.13-19; Lc. 6.12-16)

<sup>1</sup> Askata Jesús aōxō tāpimisfo kenani: “Ekeki fekāfe,” ato faino, akiki foaifono ato yoini aōxō yorafo sharafanōfo, a niafaka chakafo yorafo mēra nanea ato makinoa potanōfo, a isinī ikaifo fetsa fetsatapafo aōxō sharafanōfo.

<sup>2</sup> Nā feronāfake docefāfe āto anefo iskarakī: fetsa Simón. Nā Simón āfe ane fetsa Pedro. Āfe exto Andrés. Fetsafori āto ane Santiago, āfe exto Juan, nā rafe Zebedeo fake ini. <sup>3</sup> Felipe, Bartolomé, Tomás, Mateo, nā Mateo Roma anoxō xanīfo kori fixomis ini. Askatari Santiago fetsa, Alfeopa fake, Tadeori ini. <sup>4</sup> Simón fetsa nāato āfe kaifo feta romanōfo potapaini anā

israelifo yonomayamanõfo. Askatari Judas Iscarioteri ifini, nãato Jesús chakafakĩ ato achimani Jesús retenõfo. Nã tii Jesús ifini aõxõ tãpimiskõi inõfo.

*Jesús aõxõ tãpimisfo nĩchini Nios Xanĩfoõnoa ato yoitanõfo  
(Mr. 6.7-13; Lc. 9.1-6)*

<sup>5</sup> Nãskata Jesús aõxõ tãpimisfo nĩchini ato iskafakĩ yoiyanã: “Nã nõko kaifomafãfe ãto mai ano foyamakani. Askatari nã samãritanõfo ikafo anoriri foyamakani. <sup>6</sup> Akka nã nõko kaifo israelifo ato mẽra fotakãfe. Nãfo oveja fenoafo keskarafokĩ. <sup>7</sup> Fokaxõ ato yoikĩ iskafatakãfe: ‘Mã chaima nõko Ifo Nios oi kiki nõko xanĩfo finakõia ixii,’ ixõ ato yoitakãfe. <sup>8</sup> A isinĩ ikaifo ěfe sharaõxõ ato sharafatakãfe. Askatari naafono ato otofatakãfe. A rashkishii fetseaifori ato sharafatakãfe. A niafaka chakafori ãto mẽra naneafõ ato makinoa põtatakãfe. Akka ěfe shara kaxpa ě mato minia afaa ě mato yõkama. Nãskari fakĩ, ato kaxpa sharafatakãfe.

<sup>9-10</sup> “Akka mã kakĩ afaa mã fokiki. Mãto kori foyamata, mãto rapati fetsa foyamata, mãto sapato fetsa foyamata, mãto forosa foyamata, mãto mẽsteti foyamata fakãki, eõxõ ěfe meka mã ato tãpimani kaikai. Nãskakẽ mã afara yopaito mato inãtirofo mã pinõ a mato nikamisfãfe.

<sup>11</sup> “Mã pexe rasi ano nokoxõ nã feronãfãke Nios Ifo-fasharakõia fenakãfe. A keskara fichixõ ãfe pexe ano iyoxõ Niospa meka ato yoisharaxikaki nã mã kaitĩa. <sup>12</sup> Nã pexe mẽra ikixõ ato yoikĩ iskafakãfe: ‘Aicho. Nõ mato õiyoa,’ ato fakãfe. <sup>13</sup> Akka mato ifisharaino, mã tãpitiro nã pexe ifãfe afe yorafo ĩkisharamis. Nã mã yoiãi keskafakĩ Epa Niospa axosharai tanaima shara inõ. Akka a mato ifisharayamaifo, afãfe afe yorafo ĩkisharamisfoma. Nãskakẽ nã mã yoiãi keskafakĩ Epa Niospa ato axosharaima. <sup>14</sup> Akka pexe fetsa mẽraxõ mato ifikaspaifono, a pexe mẽranoax mã tseketiro. Askatari pexe rasi mẽraxori mato askafaifono, mã anoax katiro. Mã anoax tsekekaikĩ mãto taekinoa mã mapo taa taa atiro ato õimakĩ. Mã askafaino tãpitirofo Nios atoki inimayamaino. <sup>15</sup> Ě mato paraima yoi. Nã pexe rasi Sodoma anoafõ feta Gomorra anoafãfe afara chakakõi fapaonifo. Nãskakẽ Niospa nã ato omiskõimanaitĩa ato omiskõimaxii. Akka nã mato nikakaspaifo nãfo ato omiskõimaki finakõixii,” ixõ Jesús ato yoini.

*“Mato omiskõimakani kiki,” ixõ Jesús ato yoini*

<sup>16</sup> Anã Jesús ato yoini iskafakĩ: “Õikapo. Ě mato nĩchikai nã yora chakafo mẽra. Akka nã yora chakafãfe nã poomãnã ovejafo pipaitiro keskafakani kiki mato. Mato askafaifono nã poomã onãyakõi keskara ikãfe eõxõ tãpisharakãfe. Nã rĩfi afaa chaka shinãmisma keskafakĩ mãri askara shinãkãfe. <sup>17</sup> Oisharakaki. Nã yora chakafãfe mato achikaxõ ãto xanĩfofo

ano mato iyotirofoki. Nāskakaxō āto ichanāti peXe mēraxō mato koshatirofoki. <sup>18</sup> Nāskakaxō xanīfofo ano mato iyotirofo eōxō. Akka anoxō na meka shara eōnoa mā ato yoixii. Askatari judeofomari māto kaifomafori na meka shara eōnoa mā ato yoixii. <sup>19</sup> Akka mato achikaxō xanīfofo ano mato ināifono shināchakayamakāfe afeskaxō mā ato yoisharaimākai. Xanīfofo ano mato iyofaifono Epa Niospa mato shināmanaino mā ato yoisharaxii. <sup>20</sup> Akka mā ato yoi mā mekaima Epa Niospa Yōshi Shara mekai mā ato yoiaino.

<sup>21</sup> “Nāskatari yorafāfe āto extofo ato achimaxikani, yora fetsafāfe ato retenōfo. Askatari ato apafāferi āto fakefo ato achimakani fetsafāfe ato retenōfo. Fakefāferi āto apa yafi āto afaki ōitifishkikakī ato achimakani fetsafāfe ato retenōfo. <sup>22</sup> Mā ea chanīmara fakē nāskakē eōxō mato yorafāfe noikaspakani. Akka mato noikaspafiaifono mā eōnoax omiskōifikī mā ēfe meka nikasharakōiaito ē mato kexesharakōixii Epa Nios fe mā isharapakexanō. <sup>23</sup> Akka peXe rasi anoxō mato omiskōimanaifono, peXe rasi fetsa ano ichotakāfe. Akka ē mato yoisharanō. Ea nikasharakāfe. Mā israelifāfe peXe rasi anoxō keyokōi mā ato yoioamano, ē orisaxii.

<sup>24</sup> “Akka a aōxō tāpimisfāfe a ato tāpimamis finōtirofoma. Askatari a yonoxomisfāfe āfe patoro finōtirofoma. <sup>25</sup> Akka a aōxō tāpimisfo a ato tāpimamis keskara ikani. Askatari a yonoxomisfo āto patoro keskara itirofo. Nāskax māri ea keskara ixii. Nāskakē nā ea chakafamisfo keskafakī matori chakafakakī finakōixikani. Nāfāfe ea noikaspakakī ea yoimisfo iskafakakī: ‘Mī niafaka yōshi chakafāfe xanīfo. Mī Beelzebū,’ ixō ea yoimisfo. Ē māto Ifokē ea askafamisfo. Akka matori askafakakī finakōixikani,” ixō Jesús ato yoini.

### *Akka Nios fistiki nō mesetiro*

*(Lc. 12.2-7)*

<sup>26</sup> Anā Jesús ato yoini iskafakī: “Akka mato omiskōimafiaifono, atoki rateyamakāfe. Akka nā afara one yoifimisfono Niospa ato xafakīa kāimaxoxii, afarari fomāpaimisfono, nāfori Niospa ato xafakīa kāimaxoxii. <sup>27</sup> Akka nā ē mato yoimis yorafāfe ato ferotaifi xafakīa ato yoisharakāfe. <sup>28</sup> Akka mato retepafiaifono rateyamakāfe. Afāfe mato retetitirofono, akka māto fero mēsho afeska fatirofoma. Atoki ratetamaroko, Nios fistiki mesekāfe. Nāato noko retexō nōko fero mēsho nā omiskōipakenakafo mēra potatiro.

<sup>29</sup> “Nāskakē a yora chakafo retemitsamisfoki atoki rateyamakāfe. Epa Niospa mato kexesharai kiki. Shinākapo. Peya mīshti afaayamafekē Epa Niospa afo shināki. Ato namapaiyaino tsōakai nā peya mīshtifo retetiroma. <sup>30</sup> Akka ē mato

yoi, Epa Niospa m̄ato foo fisti rasi mato t̄apikakōia. <sup>31</sup> Nāskakē rateyamakāfe. Nā peya m̄ishtifo kexesharamis keskafakī, matori Epa Niospa kexesharakī finakōiakī,” ixō Jesús ato yoini.

*“Akka atiri yorafāfe, ‘Jesús ēfe Ifora’ ea famisfo yorafāfe ferotaifi. Akka atirifāferi, ‘Jesús ēfe Ifomara’ ea famisfo,” ixō Jesús ato yoini*

*(Lc. 12.8-9)*

<sup>32</sup> Anā Jesús ato yoini iskafakī: “Yora fetsafāfe ferotaifi, ‘Jesús ēfe Ifora’ ea faifāfe ēri ēfe Epa Nios nai mēra ika anoxō, ‘Nafo efe yoraki’ ē ato faxii. <sup>33</sup> Akka nā yora fetsafāfe ferotaifi, ‘Jesús ēfe Ifomara’ ea faifāfe ēri, ‘Nafo efe yorafomara’ ē ato faxii ēfe Epa Nios arixō,” ixō Jesús ato yoini.

*“Akka atirifāfe ea chanīmara faifono, atirifāferi ea chanīmara fakanima,” ixō Jesús ato yoini*

*(Lc. 12.51-53; 14.26-27)*

<sup>34</sup> Anā Jesús ato yoini iskafakī: “¿Mā shināimē maitio anoax keyokōi yorafo eōnoax inimanōfo ē oni? Maa. Anorima. Akka nā ē mato yoiai keskara tsōa anoris shinākanima. Akka nā ea chanīmara faifāfe shara shināifono akka nā ea chanīmara faafāfema afara fetsa chakafo shinākani. <sup>35</sup> Akka āfe apa ea chanīmara faino āfe fāke ea chanīmara fakaspakī āfe apaki ōitifishkitiro. Askatari āfe āfari ea chanīmara faino āfe fake xotofāke ea chanīmara fakaspakī āfe afaki ōitifishkitiro. Askatari āfe fāfafa yōxafāfe ea chanīmara faino, āfe fāfafa naetāfa ea chanīmara fakaspakī, āfe fāfafa yōxafoki ōitifishkitiro. Akka ē nai mēranoax matoki oyamanikē askakeranafoma. <sup>36</sup> Eōxō nānorifos shinākanima. Akka fetsafāfe ea chanīmara faifono eōxō ato fe yorakōifo noikaspatirofo.

<sup>37</sup> “Fētsa āfe apa yafi āfe afa noikī finakōixō akka ea noikī finayamax, ea Ifofamis itiroma. Askatari fētsari āfe fake feronāfake yafi āfe fake xotofake noikōixō, akka ea noikī finayamax ea Ifofamis itiroma. <sup>38</sup> Akka fētsa yoitiro iskafakī: ‘Ea omiskōimafiaifono ēfe Ifo ē potatiroma,’ ixō yoitiro. Akka fētsari yoikī iskafatiro: ‘Ea omiskōimanaifono ē Jesús Ifofaima,’ ea askafax efe nīpaxatiroma. <sup>39</sup> Akka fētsa iskafakī shināi: ‘Ē Jesús Ifofaito ea omiskōimakanira,’ ixō shinākī, ēfe meka kachikiri faax, nā keskara yora naax omiskōipakenaka. Akka fetsa eōnoax omiskōifikī ea potaxma nā keskara yora naax efe isharapakenaka,” ixō Jesús ato yoini.

*Akka fetsafāfe ato sharafaxōaino, Niospa afara shara ināxii (Mr. 9.41)*

<sup>40</sup> Anā Jesús ato yoini iskafakī: “Akka fetsafāfe mato nikakōikakī eari nikakōikani. Askatari fetsafāfe ea nikakōikakī ēfe Epa Niosri nikakōikani nāatomāi ea nono mai ano ea nīchinino. <sup>41</sup> Akka fētsa shinākī iskafatiro: ‘Nāatofi Niospa

meka yoimiski. Nāskakē ē āfe meka nikasharai,' ixō yoitiro. Akka nā Niospa meka yoimis afara shara ināi keskafakī ari Niospa ināsharaxii. Nāskakē fētsari shinākī iskafatiro: 'Nā feronāfake sharaki Niospa meka nikasharamiski. Nāskakē āfe meka ē nikakōi,' ixō shināino, nā Niospa meka yoimis afara shara ināi keskafakī ari afara shara ināsharaxii. <sup>42</sup> Fētsa ea chanīmara faxō ea Ifofakī, aato shināi iskatiro: 'Ē Jesús Ifofamis. Nāskakē afara shara ē axōi,' ixō shinākī afara shara axotiro. Nāskakē ē yoinō, ea nikakapo. Faka pishta mā fetsa ayamakē Niospa matori afara shara ināsharaxii," ixō Jesús ato yoini.

## 11

*Juan aōxō tāpimisfo Jesúski nīchini*  
(Lc. 7.18-35)

<sup>1</sup> Askata Jesús aōxō tāpimisfo doce ato tāpimaxō ato nīchini yorafo Niospa meka shara ato tāpimatanōfo. Jesús mā ato yoikī keyoax ari kani, fetsafo tāpimanikai a pexe rasi chaimashta ikafo ano.

<sup>2-3</sup> Askatari Juan Maotista karaxa mēra ixō nikani Jesús Apa Niosxō yorafo sharafaito. Nāskakē tāpisharapaini. Nāskaxō karaxa mēraxō aōxō tāpimisfo nīchini Jesús ano. Mā ato nīchia fōkaxō yōkanifo: "¿Mīmē Cristo nā Epa Niospa nokoki nīchiai, askayamai fetsa nokoki oiraka nā nō manai?" ixō yōkatanōfo Juan ato nīchini.

<sup>4-5</sup> Mā Jesús ano nokokaxō yōkanifo. Askafaifono Jesús ato kemani: "Fokaxō Juan yoitakāfe a mā ōiyanā a mā nikafori. Yoitakāfe, mā fēxofāfe sharakaxō ōisharakani kiki, askatari nā chatofori mā sharakanax niafoki, a rashkishiaifori mā sharafokī, a pastofāferi mā nikasharakani kiki, a namisfori mā otoafoki, a afaamaisfāferi Niospa meka shara nikakani kiki afeskaxō Epa Niospa noko ifitiromakī." <sup>6</sup> Nāskaxō ato yoini: "Akka a ea chanīmara fasharakōia afara fetsa shinātama ekeki inimakōitiro," Jesús ato fani, Juan ina rafe.

*Jesús ato yoini Juanoa*

<sup>7</sup> Nā a Juan ato nīchia rafe mā foaifono Jesús yorafo yoikī taefani Juanoa. "¿Afeskakī tsōa istoma anoa Juan ōifokani fonifomē? Juankai nā nēfe tafa pei taka taka akai keskarama. Nāskarifiakī mā mā tāpia Juankai ōiti ranāyama. <sup>8</sup> Akka, ¿tsoa ōikai mā kamismē? Ōitsai, feronāfake rapati sharakōi safekē ōikai mā kamisraka. Akka mā mā tāpia a rapati sharakōi safemisfo xanīfofōfāfe āto pexe anoxō rapati sharakōi safe-tirofo. <sup>9</sup> Akka, ¿tsoa ōikai mā kamismē? Nā Niospa meka yoimis ōikai mā kamisraka. Akka chanīma, nā Juan Niospa

meka yoimis finakōia, fetsafo keskarama. <sup>10</sup> Akka nã Juanoa yoikĩ Isaías kirika keneni iskafakĩ:

Mĩ nai ariax mai ano oyoamano, nã ěfe meka yoimis ě nĩchi taefakĩ mĩonoa ato yoiaino itipinĩ sharakaxō mia nikakōinōfo,

ixō keneni. <sup>11</sup> Akka ě mato yoi ě mato paraima. Tsōakai Juan finōama. Juan yoimis keskara meka shara noko tsōa yoimisma. Juanki Nios inimakōimis. Akka fetsafāferi afaayamafikaxō ea Ifofaifono Nios atoki inimakōirikai. Nāskakē Juan Maotista finakōifiano fetsafāfe finōkōiafo Niospa ato ōimis.

<sup>12</sup> “Nã Juan ato matotisa fapanitĩa Niospa meka nikanixakakĩ, iskaratĩari yorafo Nios ika ano ikipaikōikani. Iskakĩ shināmisfo; ‘Nios xanĩfo ariax ěri ěfe yora ipai afe nĩpaxakĩ. Afaa pishtakai ea nētefatiroma ě ěfe yora inō,’ ixō shināmisfo. <sup>13</sup> Akka Juan oniyamano taeyoi nã Niospa meka yoimisfo feta Moisésri keneni iskafakĩ: ‘Nã noko ifimis nōko Xanĩfo finasharakōi oxii,’ ixō kenenifo. Akka nã Niospa meka yoimisfāfe kenenifo keskara nānorikōi Juan ato yoini. <sup>14</sup> Niospa meka yoimisto keneni iskafakĩ: ‘Ĕ matoki Elías nĩchixii,’ ixō Niospa yoini. Akka mã ěfe meka chanĩmara fapaikĩ mã tāpitiro nã Juan Elías keskarari. <sup>15</sup> Mã ea nikatirokĩ ea nikakāfe. Ĕfe meka mãto shinā mēra nanekāfe,” ato fani.

<sup>16</sup> Nāskaxō anã ato yoini: “Iskaratĩa na niyoafo afe keskarafo mākĩ ě mato yoinō mã tāpinō. Nã fakefo āto kaxeti anoax kaxekakĩ āto yamafo kenatirofo tai tai iyanã. Akka mã āto yamafo nokokanax a ato yamafāfe fichipaiyaifo keskai tsoa kaxesharayamaino ato yoitirofo iskafakakĩ: <sup>17</sup> ‘Nō nōko xāiti manaino akka mã mairamisma. Askatari shināmitsayanã nō fanāikaino mã oiamisma,’ ixō ato yoitirofo. Akka mări nāskariai mã tsoaki inimamisma. <sup>18-19</sup> Nāskafakĩri Juan yafi ea mã mekafai. Juankai pikĩ finapaimisma nã ōiai pishta pimis, askatari fimi ene pae pishta ayamisma. Nāskakē aōnoa mã yoia iskafakĩ: ‘Nã Juan niafaka yōshi chakaya,’ mã famis. Akka ě yorakōi ě Niospa Fakekōi piyanã ě ayasharamis. Akka mã ea iskafakĩ yoimis: ‘Jesús ichapakōi piimis, askatari pae ayamis,’ mã ea famis. ‘Nāskax yora chakafo fe rafemis, a romanō xanĩfo kori fixomisfo feri rafemis,’ mã ea famis. Akka ě shara imis ea Niospa ea shināmanaino. Juanri shara imis Niospa shināmanaino. Yorafāfe noko ōikĩ tāpitirofo,” ixō Jesús ato yoini.

*Pexe rasi anoxō Jesús nikakaspanifo*  
(Lc. 10.13-15)

<sup>20-21</sup> Askata anori ato yoita Jesús nã pexe rasi anoafo ato yōani iskafakĩ: “Ooa, Corazin anoafāfe Betsaida anoafo fe, mã omiskōi finakōixii. Akka Tiro anoxō Sidón anoxori nã ě

mato õimana keskara, ě ato õimanano ģto chaka xatekaxõ Epa Nios Ifofakeranafo. ‘Ooa, nõ afara chakafamiskĩ iskaratĩa nõ anã Nios Ifofai,’ iyanã rãfikaxõ ģto rapati chapo safekaxõ chii mãpo raish akeranafo fetsafãfe ato õinõfo. <sup>22</sup> Akka Niospa Tiro anoafu yafi Sidón anoafori ato omiskõimafiakĩ ato omiskõimasharaima, akka matoroko omiskõimakĩ finakõixii. <sup>23</sup> Akka, ģnõ Capernaúm anoax nõ nai mĕra kai Epa Nios ari ixõ mã shinãimĕ? Maa. Nã omiskõipakenakafo mĕra ě mato potaxii. Akka yõra atiroma keskara afara shara ě mato ispaiano mãto chaka mãkai xateama. Akka nã ě mato õimana keskara Sodoma anoafu ě ato õimamiskĕ ģto chaka xatekeranafo. Nãskakĕ keyokeranafoma. Askatari ģto pexefã rasi keyokeranama. <sup>24</sup> Ĕ mato yoinõ. Afetĩara Epa Niospa nã chanĩmara faafoma ato omiskõimani. Nã Sodoma ano ipaonifo omiskõixikani. Akka mãfi omiskõi finakõixii,” ixõ Jesús ato yoini.

*“Ekeki fekãfe ě mato shinãmasharanõ,” ixõ Jesús ato yoini (Lc. 10.21-22)*

<sup>25</sup> Ato askafata Jesús Apa kĩfini iskafakĩ: “Epa, ě mia aicho fai. Keyokõi nai mĕranoafoya nono mai anoafu mĩ ģto Ifo. Mĩ sharafinakõi. Akka atirifãfe kirika kene tãpifikaxõ mia Ifofakaxoma. Iskafakĩ shinãmisfo: ‘Tsoa fetsakai noko keskarama. Nõ tãpikõia,’ ixõ shinãmisfo. Akka nãfo mĩ meka mĩ ato tãpimanima. Akka nã kirika kene tãpikaxoma, mia Ifofaifono nãfo mĩ meka shara mĩ ato tãpimani, <sup>26</sup> nã mĩ fichipaiyai keskafakĩ,” ixõ Jesús yoini.

<sup>27</sup> Askata anã Jesús ato yoini iskafakĩ: “Epa Niospa a tãpia keskara eari keyokõi tãpimani, ěmãĩ ģfe Fakekĕ. Akka tsõakai ea tãpiama, ěfe Epa fistichi ea tãpikõia. Nãskarifikĩ tsõa ěfe Epa tãpiama, akka eres fisti ě tãpikõia. Akka nã fetsafori ě ato tãpimanaino nãfãferi Epa Nios tãpitirofo. <sup>28</sup> Akka mã shinãchakakõikĩ ea kĩfikãfe. Nãskaxõ mã ea chanĩmara fasharayanã mã ea nikasharaito a mato fekaxtefai ě mato potaxotiro anã mã shinãchakayamanõ. <sup>29</sup> Akka ea shinãkõikĩ eõxõ mã tãpisharakõitiro. Ĕ mato noikĩ fenãmãshita ě mato yonomamis tenemasharayanã. Nãskaxõ mã anã shinãchakatiroma. <sup>30</sup> Akka a ě mato amapaiyai keskara anã fekaxma. Nãskakĕ anã mãto õiti fekaxtetiroma,” Jesús ato fani.

## 12

*Nã judeofãfe pena tenetitĩa Jesúsxõ tãpimisfãfe aros keskara metesfenifo*

*(Mr. 2.23-28; Lc. 6.1-5)*

<sup>1</sup> Askata judeofãfe ģto pena tenetitĩa Jesús aõxõ tãpimisfo fe tarepa kani. Aõxõ tãpimisfãfe fonãikakĩ aros keskara



meteskaxõ pii fonifo. <sup>2</sup> Fariseofãfe õikakĩ Jesús yoinifo: “Õipo, Jesús. Iskaratĩa nõko pena teneti. Akka Moisés noko yoini na pena tenetitĩa tsõa pishta yonotiroma. Akka mĩ inafãfe yonokani na aros keskara meteskakĩ,” ixõ yoinifo.

<sup>3</sup> Ato askafaifono Jesús ato kemani: “Akka, ¿a nõko xini Davidõnoa kirika kenenifo keskara mã õimismẽ David afaa afeska fanimẽ ãfe inafõ feta fonãikõikĩ? <sup>4</sup> Nãskaxõ Nios kĩfiti pexefã mẽra ikikaixõ a mẽranoa pãa ato pikĩni fonãikõikĩ ano afaayamano. Akka nã pãa nã judeofo ato Nios kĩfixomisfonã ini. Nãskakẽ fetsafãfe nã pãa tsõa pitiroma ini. Nãnori Niospa Moisés yoifinino akka fonãikõikĩ David pini a afe rafeafo feta. <sup>5</sup> Akka, ¿a Moisés keneni keskarari mã tãpiamamẽ? Iskafakĩ yoini: ‘Nios kĩfiti pexefã mẽra a ato Nios kĩfixomisfãfe yonotirofo nã pena tenetitĩa. Nãskakẽ afaa chakafakanima,’ ixõ Moisés keneni. <sup>6</sup> Nios kĩfiti pexefã sharafiano akka ã na pexefã finõkõia. <sup>7-8</sup> Epa Niospa shinãmanaino Niospa meka yoimisto Oseas kirika keneni iskafakĩ: ‘Mã yoinãfo inafõ retexõ ea inãxikĩ, mã koofamis ea shinãkĩ nã shara. Askafiano fetsafo noikĩ, mã ato sharafaxõaito ã õimis nã sharafinakõia,’ ixõ kirika keneni Niospa shinãmanaino. Niospa noko yoimis keskara mã tãpisharaxõ, mã ato yoikĩ chakafakeranama. Nãskakẽ ã mato yoi iskafakĩ, ãfe Epa Niospa ea nãmã nĩchini xanĩfofinakõi ã inõ. Nãskakẽ ã yoitiro afaa nõ atiomakĩ pena tenetitĩa. ã mato yoi na ãfe inafãfe akaifo keskara shara,” ixõ ato yoini.

*Feronãfake mẽke yõshiya Jesús sharafani*  
(Mr. 3.1-6; Lc. 6.6-11)

<sup>9</sup> Nãskata Jesús nãnoax kaax judeofãfe ãto ichanãti pexe mẽra ikitoshini. <sup>10</sup> Nãno feronãfake ãfe mẽke yõshia ini. Nãskakẽ fariseofãfe Jesús yõkanifo afara chakafaito yõaxikakĩ. Iskafakĩ yõkanifo: “Maestro, pena tenetitĩa, ¿nõ yora sharafatiromẽ?” ixõ yõkanifo.

<sup>11</sup> Askafaifono Jesús ato kemani iskafakĩ: “Mã ovejayaxõ mãto oveja kini mẽra pakeano, ¿mã pena tenetitĩa mã ifirisafatiromamẽ?” ato fani. <sup>12</sup> “Akka yorafo sharafinakõiafo, oveja keskarafoma. Nãskakẽ yorafo nõ shinãkĩ pena tenetitĩa nõ ato sharafatiro. Nãskaxõ nõ afaa chakafaima. Na pena tenetitĩa yorafo nõ sharafakĩ Epa Niospa õia shara,” ixõ Jesús ato yoini.

<sup>13</sup> Nãskata a feronãfake mẽke yõshiya Jesús yoini iskafakĩ: “Mẽshafe,” faino, nã feronãfake mẽke yõshiya mẽshatanaino ãfe mẽke sharatani. Nã takai fetsa keskara shara ini. <sup>14</sup> Nãskata fariseofo mã tsekekanax yoinãnifo: “¿Afeskaxõ nõ Jesús ato achimatiromẽ retenõfo?” ikanax yoinãnifo.

*Epa Niospa shinãmanaino Isaías keneni Jesúsnoa a inõpokoai yoikĩ*

<sup>15</sup> Jesús nãnoax kani mã tâpiax retepaiyaifono. Nãskakẽ anoax kaino yorafã rasichi chĩfafainifo. Akka a isinĩ ikaifo Jesús ato sharafapani. <sup>16</sup> Akka ato sharafaxõ ato yoini: “Ë Niospa Fakekĩ tsoa yoyimakãfe,” ato fani. <sup>17</sup> Nãskarokõi Isaías kirika keneni Niospa shinãmanaino Jesúsnoa. <sup>18</sup> Iskafakĩ keneni:

Õikapo. Nakĩa ea yonoxomis ã katonĩ. Ë aõ noikõĩ. Ë akiki inimakõĩ. Ëfe Yõshi Shara ã afe rafemamiş. Nã maifotio ano ikafãfe ãfe meka nikasharaifono ã ato chaka soaxotiro efe yora inõfo. <sup>19</sup> Nakai yora fetsafo fe feratenãxima. Meka mitsisipato ato yoima. <sup>20</sup> Akka tafa kerexma ã xatexima. Askatari chii ketesharayamaito ã nokafaxima. Askatamaroko ã ketefaxii. Nãskarifikĩ yorafãfe ãfe meka nika-paifikakĩ nikasharayamaifono ã ato potaima. Ato potatamaroko ã ato axosharai ea Ifo sharafanõfo. <sup>21</sup> Nãskakẽ keyokõĩ maitio ano ikafãfe yoixikani iskafakakĩ: “Nã fistichi noko ifitiro nõ aõnoax Epa Nios fe nĩpaxanõ,” ixõ yoixikani. Nãskara Isaías yoikĩ kirikaki keneni. Nãskarokõĩ nõ õi Isaías keneni.

*Yora fetsafãfe, “Jesús niafakaõxõ ato sharafaira,” fanifo*  
(Mr. 3.20-30; Lc. 11.14-23; 12.10)

<sup>22</sup> Askata Jesúski feronãfake fẽxo efenifo. Askatari mekamisma ini. A mẽra niafaka chaka naneano Jesús sharafanõ akiki efenifo. Nãskakẽ Jesús a fẽxo õimasharani, askatari mekamasharani anã mekanõ. <sup>23</sup> Askafaito õikani yoinãnifo: “¡Kee! Õikapo. Jesús afama mĩshti shara fatiro. Akka, ¿namẽ David ãfe fena nã Epa Niospa katonĩ, nãmẽ na nõ manai?” ikax yoinãnifo.

<sup>24</sup> Askafaifãfe nikakaxõ fariseofãfe yoinifo: “Maa. Natokai Epa Niosxõ niafaka chaka potatiroma. Akka nã niafaka chakafãfe ãto xanĩfo nã Beelzebúxõ ato makinoa niafaka chaka potai,” ikax yoinãnifo.

<sup>25</sup> Askafaifono Jesús tâpini a shinãifo keskara. Nãskaxõ ato yoini: “Yorafo paxkanãkanax ãa ranã retenãĩ keyotirofo. Askatari pexe rasi anoax ãa ranã retenãĩ keyotirofo. Nãskax isharatirofoma ãa ranã retenãĩtirofo. <sup>26</sup> Nãskarifikĩ Satanás ãfe niafaka chakafo potaxõ anã afaa afeska fatiroma. <sup>27</sup> Akka mã ea iskafai: ‘Nato niafaka xanĩfoõxõ niafaka chakafo ato makinoa potai,’ mã ea fai. Akka ea yoikapo, ¿tsõaõxõ mãto inafãfe niafaka chakafo potafomakĩ? Akka, ‘Niosxõ nõko inafãfe niafaka chakafo potafo,’ ixõ mã ea yoitiro. Nãskakẽ mã tâpitiro ãri Niosxõ niafaka chakafo potaino. <sup>28</sup> Akka ã niafaka chakafo Niospa Yõshi Sharaõxõ ato makinoa potaino

mã tãpitiro a Niospa matoki nĩchiai mã nokoano. Nãskakẽ yorafãfe ea Ifo sharafaxii.

29 “Ë anã mato yoinõ, nikasharakãfe. Akka, ¿afeskaxõ yorafãfe feronãfake mitsisipakõĩ ãfe pexe kene mẽranoa ãfe rapatifo fĩatirofomẽ? Akka rapati fĩakakĩ achixõ metexkere akaxõ ãfe rapati fĩatirofo. Askafakaxõ fĩaifonokai ato afeska fatiroma.

30 “Akka fetsa efe rafepaikima ea nikakaspatiro. Akka fẽtsa ãfe meka nikakaspai ea noikaspai. Nãskakẽ fetsafãferi ea Ifofaifono fichikaspakani. Askakimaroko emakinoa ato paxkanãfapai Epa Nios Ifofayamanõfo.

31 “Nãskakẽ ãfe mato yoi. Fẽtsa afara fetsafo chakafakẽ Niospa ãfe chaka soaxotiro. Askatari fẽtsa afara chaka yoiaino Niospa ãfe chaka soaxotiro. Akka ãfe Yõshi Shara chakafakĩ mekafaito, Niospa ãfe chaka soaxonakama. ãto chaka neepakenaka. 32 Askatari fẽtsa Niospa Fake yorakõĩ chakafaino Epa Niospa ãfe chaka soaxotiro. Akka fẽtsa Epa Niospa Yõshi Shara mekafakĩ chakafaino, Epa Niospa ãfe chaka soaxonakama. ãto chaka neepakenaka. Nã naitĩari ãfe chaka aõ neepakenaka,” ixõ Jesús ato yoini.

*Ifi ãfe fimioxõ nõ tãpitiro afe keskaramãkĩ  
(Lc. 6.43-45)*

33 Anã Jesús ato yoini iskafakĩ: “Akka shinãkapo. Ifi shara ãfe fimi sharakõĩ itiro. Akka ifi chaka ãfe fimiri chaka itiro. Ififo ãfe fimioxõ nõ tãpitiro afe keskaramãkĩ. 34 Akka mãfi keyokõĩ chakakõĩ, nã rono pae keskarakõĩ mã. Nãskaxõ meka shara mã yoitiro ma mãmãĩ chakakõixõ. Nã mãto shinãmã mã shinãĩ keskafakĩ chakai mã mekamis. 35 Nãskarifikĩ yora sharapa meka shara yoitiro, ãfe õiti mẽraxomãĩ shara shinãkĩ. Akka yora chakapari meka chaka yoitiro, ãfe õiti mẽraxomãĩ chaka shinãkĩ. Nãskaxõ mã ãfe õiti mẽraxõ shinãĩ keskara yoitiro. 36 Akka ãfe mato yoinõ. Fatora penata keyokõĩ Niospa ato ichanãfai tãpikõixõ ato yoixiki fatofãfe chanĩmara faafomãkĩ, akka fatofãferi nikakaspakanimãkĩ. Nãskatari mã shinãtama chaka yoimisfori Niospa ato shinãmaxii kiki. 37 Akka mã mãto mekaoxõ mã Nios ispatiro mã isharamãkĩ, askayamai mã isharamamãkĩ. Nãskax isharax mã afe nipanaka. Askatari mã meka chaka yoimisno mã omiskõipakenakafo mẽra mato potaxii. Mãto mekapa mato omiskõimaxii,” ixõ Jesús ato yoini.

*Yora chakafãfe, “Tsõa atiroma keskara noko ispafe nõ mia chanĩmara fanõ,” ixõ yõkanifo  
(Mr. 8.12; Lc. 11.29-32)*

<sup>38</sup> Askata fariseofo feta a Moisés yoikī kirika keneni keskara ato tāpimamisfāfe Jesús iskafanifo: “Maestro, nõ õipai tsõa atiroma keskara mī faito,” ixõ yoinifo.

<sup>39</sup> Askafaifono Jesús ato kemani: “Māfi afara chaka shināyanā mā Nios kachikiri famis. Nāskakē, ‘A tsõa atiroma keskara noko ispafe,’ mā ea fai. Akka nā Jonás ini keskara nā fisti mā õixii. <sup>40</sup> Akka nā Jonás ini keskai ēri askai. Jonás fafīnõa xaki mēra tres nia ini. Nāskarifiai ēri mai mēra maiax tres nia ixii. <sup>41</sup> Akka fatora penata nā Niospa yorafo keyokōi ichanāfaitīa ato yoixii fatofāfe chanīmara faafomakī, akka fatofāferi nikakaspakanimākai. Nāskakē nā Nīnive anoafāfe mato yoixikani iskafakakī: ‘Jonáspa noko Niospa meka yoiaito nikaxõ nõko chaka xatexõ nõ Niospa meka chanīmara fani. Akka mā Niospa Fake nikafikī mātõ chaka mā xatemisma,’ ixõ mato yoixikani. Akka ē Jonás finõfekēkai mā ea nikapaimisma. <sup>42</sup> Askatari okirinoax nā nafa kēro āto xanīfo ipaoni nõko xanīfo Salomón õipai chai inoaxkōi oni. Afara sharafo tāpikōia nikaferani oni. ‘Afara shara ea tāpimanõ,’ ikax akiki oni. Akka ē nā Salomón ē finõfekē, mākai ea nikapaima. Akka keyokōi mā mai keyoano Niospa noko yoixii fatofomākī sharafo fatoforimākī nikayospafo. Askatari nā kēromā mato yoixii iskafakī: ‘Māfi chakakōifokī. ¿Afeskakī mā Niospa Fake nikakaspamismē? Mātõ xanīfo Salomón tāpikōia keskafakī nāato keyokōi tāpikōifiano. Akka ē Salomón nikaikai chaikōi ē kani. Akka mākai nā Jesús mato fe ifiakē mā nikakaspamis nāato tāpikōifekē,’ ixõ mato yoixii,” ixõ Jesús ato yoini.

*Anā niafaka chaka yoraki nanetiro  
(Lc. 11.24-26)*

<sup>43-44</sup> Anā Jesús ato yoini iskafakī: “Ē mato yoinõ meka fetsafaxõ. Niafaka chaka feronāfake makinoax tsekeax kafāsatiro tsõa istoma ano fenafofāfõfāitiro ano tsoaxõ tene-paikī. Akka tsoa fichixoma niafaka chakata anā shinātiro: ‘A ē anoax tsekeita ano ē anā kapai,’ itiro. Mā nokoxõ õia nā feronāfake nā pexe xaka mātsoamea keskara shara ini. <sup>45</sup> Nāskakē nā niafaka afe niafaka siete efetiro nā chaka finakōiafo, nāfo nā feronāfake mēra iki fetsenõ. Nāskakē nā feronāfake chaka finakōi itiro a iypaoni keskarama,” ixõ Jesús ato yoini.

*Jesús õifekani āfe afanõ āfe extonõ fenifo  
(Mr. 3.31-35; Lc. 8.19-21)*

<sup>46</sup> Jesús yorafo yoiaino āfe afanõ āfe extonõ akiki fenifo afe mekapaikani, pexe emāiti nikaxõ mananifo. <sup>47</sup> Fētsa yoini: “Mī efanõ mī extonõ emāiti niafo mefe mekapaikani,” fani. <sup>48</sup> Askafaino kemakī: “¿Fatomē ēfe efa keskarafo ēfe exto keskarafori?” ato fani.

49 Nāskata a aōxō tāpimisfo yoini mētoxō: “Nafō ěfe efafo keskarafō, ěfe exto keskarafori ě ato ōi. 50 Akka nā ěfe Epa nai mēra ikato ato amapaiyai keskara akaifo nāfofi ěfe extofo ěfe chikofori ěfe efafori,” ixō Jesús ato yoini.

## 13

*Jesús ato yoini meka fetsafaxō fimi exe saamisnoa*  
(Mr. 4.1-9; Lc. 8.4-8)

1 Askata na pena fisti Jesús peXe mēranoax tsekekaini kaax, ĩamāfā kesemē tsaoni. 2 Nāno tsaono yorafā rasi akiki fenifo, āfe meka nikai fekani. Akka Jesús kanōanāfā xaki mēra tsaoxō ato yoiaino nikanifo, ĩamāfā kesemēxō. 3 Askata meka fetsafaxō afama mīshti Jesús ato yoini iskafakī: “Feronāfake fistichi fimi exe saafoni āfe nōxati mēra kēchoxō fokī. 4 Fimi exe saafōikaino ranāri fai nēxpakīa pakeaino a kachikirixori peyafāfe pini. 5 Nāskata fimi exe ranāri makexfoki pakei fetseni mai shara anoma. Nāskakē samamakōi fimi exe foaipaini. 6 Akka mā foaipaiyaito xinī namani, yosipanā, āfe tapokairoko mai mēra kasharakē. Foaikax, samama nani xinī tsasifaano. 7 Ranāri fimi exefo moxafo mēra pakei fetseni. Moxafo mēranoax moxafoya foaipaiyaito moxafāfe namani. 8 Akka fimi exe ranāri mai shara ano pakeni. Nāskax foaisharax fimi ichapayakōi ini. Fetsa cien fimiya ini, fetsari sesenta fimiya ini, fetsari treinta fimiya ini. 9 Mā pachoyakī ea nikasharakōikāfe,” ato fani.

*Meka fetsafaxō yorafō yoixō a aōxō tāpimisfo xafakīakōi ato yoini*

(Mr. 4.10-12; Lc. 8.9-10)

10 Nāskata Jesúski a aōxō tāpimisfo fēkaxō yōkanifo: “¿Afeskakī meka fetsafaxō mī yorafō yoimē? Meka xafakīa mī ato yoimisma,” ixō yōkanifo.

11 Askafaifāfe Jesús ato kemani: “Akka afeskaxō Epa Niospa afe yorafō ĩkināmakī ě mato fisti tāpimanō. 12 Akka nā Niospa meka nikasharakōiaifo āfe Yōshi Shara āto mēra naneeano nāato ato tāpimasharakōixii kiki. Nāskaxō mā tāpikī finasharakōi. Akka nā nikasharayamaifāfe tāpisharakanamax nāfo fenokōixikani. 13 Nāskakē meka fetsafaxō ě ato yoi. Akka ōifikakī tāpikanima. Askatari nikafīkakī nikasharakanima. 14 Nānori a Niospa meka yoimisto Isaías kirika keneni a inōpokoai yoikī. Iskafakī yoini:

Nikataifafīfīkakī nikakanima. Ōifikakī tāpikanima. 15 Nā yorafō āto mapo kerexkōifo. Askatari āto pachō fēstokōifo. Askatari āto fero fepoa keskarafō. Nāskaxō ěfe meka chanīmara fakanima. Nāskakē ě āto chaka soaxotiroma, ixō Niospa yoini keskara Isaías kirika keneni.

16 “Akka mākai ato keskarama. Ë mato yoia keskara mā nikasharamis. Ë mato tāpimanai keskara mā tāpisharakōia. 17 Shinākapo. Mā ōimis keskara a Niospa meka ato yoimisfo feta a Nios Ifofamis fetsafāferi ōipaifikakī ōipaonifoma. A Ë mato yoimis keskara nikasharapaifikakī nikapaonifoma,” ixō Jesús ato yoini.

*Jesús meka fetsafaxō fimi exe saamisnoa ato yoini ato tāpimasharakōixiki*

*(Mr. 4.13-20; Lc. 8.11-15)*

18 Anā Jesús ato yoini iskafakī: “Nā Ë mato meka fetsafaxō yoiai nā fimi exe saamisfoōnoa Ë mato yoikai. Nikasharakāfe tāpixikakī. 19 Atiri fimi exe fai kesemē pakeaino peyafāfe pinifo. Nāskafakīri fētsa Nios Xanīfoōnoa nikafikī Niospa meka nikasharayamaito, nā Satanás chakata Niospa meka fiatiro. 20-21 Akka atiri fimi exe makex mēra pakeax, foaipafiaito xinī namani, āfe tapo mai mēra ikikēma. Nāskafakīri fētsa taefakī Niospa meka nikai inimayotiro. Akka afara chaka nokoaino anā inimatiroma, anā Nios Ifofayamaino Niospa meka anā āfe shinā mēra nanetiroma. 22 Akka atiri fimi exe moxafo mēranoax foaikax yosinima. Nāskari fakī fētsa Niospa meka nikasharamax, nāskaxō afara fetsa shinākī, āfe shinā mēraxō shināchakakōitiro. Nāskaxō kori ichapakōi noikī, ‘Ë kori ichapayax Ë inimatiro,’ ixō shinākī Niospa meka anā shināima. Nāskakē Niospa meka nikafikī afara fetsafo shināino, afaa Niospa axotiro. 23 Akka atiri fimi exe mai shara anoax foaikax mā yosiax fimi ichapaya ini, āfe fimi cien ini, fetsari āfe fimi sesenta ini, fetsari āfe fimi treinta ini. Nāskafakīri fētsa Niospa meka nikakōikī Niospa meka nanexō nikasharakōitiro. Akka fētsa Niospa meka nikakōisharakī nā fimi exe cien keskara itiro, fētsari nikasharakōi nā fimi exe sesenta keskara itiro, fētsari nikakōisharakī nā fimi exe treinta keskara itiro,” ixō Jesús ato yoini.

*Meka fetsafaxō afara fetsa ato tāpimaxiki anā Jesús ato yoini*

24 Anā Jesús meka fetsafaxō afara fetsa ato tāpimaxii ato yoini iskafakī: “Ë mato yoinō nā Nios xanīfokōi ika anoax afe keskara ixikanimākai. Ifokōi faafo afe keskaramākī Ë mato anā yoinō. Nā yorafāfe Nios Ifokōi faafāfe fimi exe shara fana keskarafo. 25 Akka tare ifo āfe inafō fe oxano, a ato noikas-pamis fakishi kaxō a fana shara ano fana chakafanafaini kani. 26 Akka nā fana shara foaikī pei sharayakōi foaini. Askatari fana chakari foaini. 27 Nāskata a tare ifoki āfe inafō fokaxō yoinifo: ‘Ifo, fana shara mī tarepa mī fanafiano, akka, ¿fanāx na fana chaka foaikamē?’ ixō yōkanifo.

28 “Askafaifono nā tare ifāfe ato yoini: ‘Nā noko noikas-pamisfāfe fanafō rakikā,’ ato faito āfe inafāfe yoinifo: ‘¿Na

fana chaka nõ tsekatiromẽ?’ fanifo. <sup>29</sup> Akka a tare ifãfe ato yoini iskafakĩ: ‘Maa, fana chaka tsekapaikĩ fana sharari mã tsekatiro. <sup>30</sup> Nãskanõki. Nã fana sharafoya yosiyonõ nã fana shara ãfe fimi topiaifotĩa, ã mato yoixinõ iskafakĩ: “Na fana chakafo xatekãfe. Xatexõ mextexõ koaxikaki. Nãskata nã fana sharafos ãfe tapas mẽra ea faxoxikaki,” ’ ixõ a tare ifãfe ato yoitiro keskafakĩ, nãskarifikĩ Epa Niospa mato paxkanãfaxii ea Ifofaafo ã ato ifixii. Akka ea Ifofayamafo chiifã mẽra ã ato nĩchixii,” Jesũs ato fani.

*Mostaza exeõnoa yoikĩ meka fetsafaxõ Jesũs ato tãpimani*  
(Mr. 4.30-32; Lc. 13.18-19)

<sup>31-32</sup> Askata anã Jesũs meka fetsafaxõ ato yoini iskafakĩ: “Afe keskaramãkĩ Nios xanĩfãfe noko ikinã ã mato yoinõ. Nã fimi exe mostaza yõra ãfe tarepa fanatiro. Akka nã mostaza exe pishtakõi. Akka mã yosiax efapakõi itiro fana fetsafo keskarama. Nãskakẽ peyafãfe ãfe teshpafo ano naa faxõ too fatiro. Nãskari fakĩ taefakĩ pishta mã Epa Nios Ifofayotiro. Nãskaxõ fisti rasichi mã Ifofayotiro. Akka chipo ichapakõichi atirofo Nios Ifofakakĩ,” ixõ ato yoini.

*Meka fetsafaxõ pãa faraxika keskaraõnoa Jesũs ato yoini*  
(Lc. 13.20-21)

<sup>33</sup> Askata anã Jesũs meka fetsafaxõ ato yoini iskafakĩ: “Afe keskaramãkĩ Nios xanĩfãfe noko ikinã ã mato yoinõ. Nã kẽromã pãa fakĩ levaduraya arinã osixõ kamosakano faraxitiro keskara. Nãskarifiakĩ nõ õitiro. Yorafãfe Niospa meka ãto shinã mẽra naneano nõ õiyamafiaino ãto õiti fetsafakanax Nios keskara shara itirofo,” ixõ Jesũs ato yoini.

*Afama mĩshtikiri yoikĩ meka fetsafaxõ Jesũs ato yoipaoni*  
(Mr. 4.33-34)

<sup>34</sup> Askatari Jesũs nã yorafã rasi yoini meka fetsafaxõ afara fetsa ato tãpimaxii. Akka meka fetsafaxõ Jesũs mẽxotaima ato yoipaoni. <sup>35</sup> Akka nã Niospa meka yoimisto a inõpokoai yoikĩ kirika kenekĩ keskakõifakĩ Jesũs nãskakõi fani. Iskafakĩ keneni Jesũsnoa yoikĩ:

Ë ato meka fetsafaxõ yoixii. Niospa keyokõi onifanitĩa nãskatari a nikamifoma ã ato tãpimaxii, ixõ Jesũsnoa yoikĩ keneni.

*Jesũs nã fana chakafoõnoa ato tãpimani*

<sup>36</sup> Askata yorafã rasi makinoax Jesũs pexe mẽra ikikaini. Mã pexe mẽra kaano, aõxõ tãpimisfãfe anã yõkanifo ato yoisharanõ. “Ifo, meka fetsafaxõ mĩ noko yoia nã fana chakaõnoa nõ tãpiama. Anã noko xafakĩa yoife nõ tãpisharanõ,” ixõ yoinifo.

<sup>37</sup> Askafaifono Jesũs ato kemani: “A fana shara fanamisfo keskara ãkĩa,” ato fani. <sup>38</sup> “Akka a tare ã yoiai mã tãpitiro nã

maitio ě yoi. Akka nã fimi exe shara ě yoiai nã Nios Ifofamisfo ě yoi. Akka nã fana chakafo ě yoiai nã Satanás ifofamisfo ě yoi. <sup>39</sup> Akka nã noko noikaspamisto fimi chakafana ě yoiai, a Satanás ě yoi. Akka nã fimi exe topiaifo ě yoiaito mã nikai, mã mai keyoaino ě yoi. Akka a fimi exe topimisfo ě yoiaito mã nikai, nã Niospa áfe ájirifo ě yoi. <sup>40</sup> Nã fana chakafo xatekaxõ chíi koatirofo keskai, nãskarifaxikani nã omiskõiai nokoaitia omiskõixikani mã mai keyoaino. <sup>41-42</sup> Nãskarifaxĩ ěfe ájirifo ě nĩchixii a afara ato chakafamamisfoya a afara chaka tãpimisfori ato chii xoisai mēra ato potanõfo anoax oiayanã omiskõipakexanõfo. <sup>43</sup> Akka nã Niospa meka nikasharakõiaifo, Epa Nios ika anoax nã xinĩ chaxai keskara shara ixikani. Mã pachoyakĩ ěfe meka nikasharakĩ mãto shinã mēra nanekãfe,” ato fani.

*Afara sharakõi oneaõnoa yoikĩ meka fetsafaxõ Jesús ato tãpimani*

<sup>44</sup> Anã Jesús ato yoini iskafakĩ: “Ě mato yoinõ nã Nios xanĩfokõi ika anoax afe keskara ixikanimãkai. Feronãfãke tare ano yonokĩ orokĩ afara sharafinakõia fichixõ nã fichia ano anã oneni. Nãskaxõ áfe afama mĩshti keyokõi ato minixõ mã kori fixõ nã mai fini nã afara sharakõi áfenã inõ. Nãskarifaxĩ mã Nios Ifokõifapaikĩ mã fichikõipaitiro,” ixõ Jesús ato yoini.

*Makex oxo fakkai fakkaisai keskaraõnoa áfe ane perlaõnoa, meka fetsafaxõ Jesús ato tãpimani*

<sup>45-46</sup> Anã Jesús ato yoini iskafakĩ: “Ě mato yoinõ nã Nios xanĩfokõi ika anoax afe keskara ixikanimãkai. Yora fistichi fenafõfãfõfãimis perla ato inãxii. Akka nã perla sharafinakõia mã fichixõ áfe afama mĩshti keyokõi ato minixõ kori fixõ nã perla sharakõi fini. Nãskarifaxĩ nõ Epa Nios Ifofasharapaikĩ nõko afama mĩshtifo nõ shinãmakitiro Epa Niosmãi sharafinakõikē,” ixõ Jesús ato yoini.

*Anã meka fetsafaxõ riniõnoa Jesús ato tãpimani*

<sup>47</sup> Anã Jesús ato yoini iskafakĩ: “Ě mato yoinõ nã Nios xanĩfokõi ika anoax afe keskara ixikanimãkai. Nã rini faka mēra potexõ foe fetsa fetsatapafo fitirofo keskara ixikani. <sup>48</sup> Akka nã rini mã foe fospikõiano, nã rinipa fimisfãfe faka ketokonõ rini ninifotirofo. Faka ketokonõ tsoaxõ foefo katotirofo. Nã sharafo fēta mēra nanekaxõ nã chakafo potatirofo. <sup>49</sup> Nãskarifaxii nõko mai keyoaino. Nãskatari Niospa áfe ájirifãfe noko paxkanã faxii nã chakafoya nã sharafo. <sup>50</sup> Akka nã chakafo nã chii xoisai mēra ato potaxii. Nãnoax oiayanã omiskõipakenakafo,” ato fani.

*Afara fena sharakõi yafi afara shara xiniõnoa Jesús ato yoini*



<sup>51</sup> Nāskaxō Jesús ato yōkani: “¿Nā ě mato yoiai keskara mā mā nikaimē?” ato faito, “Ĕje, a mī noko yoiai nō nikai,” faifono anā Jesús ato yoini: <sup>52</sup> “Akka pexe ifāfe pexe xaki mēra āfe afara shara onekatsaxakī nā fena yafi nā xini ato ispatiro. Nāskarifiakī a Moisés yoikī kirika keneni keskara ato tāpimamisfāfe mā Nios Ifokōi faifono, Nios xanīfoōnoa ato yoitirofo. Akka meka xiniōxō meka fena sharari mā tāpitiro,” ato fani.

*Jesús Nazarete anoxō nikakaspanifo*  
(Mr. 6.1-6; Lc. 4.16-30)

<sup>53</sup> Askata Jesús mā meka fetsafaxō ato yoikī keyoax nānoax kani. <sup>54</sup> Mā kaax āfe mai anokōi nokoni. A judeofāfe āto ichanāti pexe mēraxō ato yoikī taefani ano. Nānoxō yorafāfe iskafanifo: “¡Kee, nikakapo! ¿Fanīxō iskara tāpixō yoimē askatari nā tsōa atiroma keskara fai? ¿Fanīxō iskara tāpīamē?” fanifo. <sup>55</sup> “Nā mīsa famisto fakeki. Āfe afa María. Āfe extofo mā nō ōimis. Santiago ikaino, José ikaino, Simón ikaino, Judas ikaino, nāfo āfe extofo,” fanifo. <sup>56</sup> “Āfe poifori nofe imisfo. Nōfi Jesús tāpia. Nākai afama. Akka, ¿afeskaxō afama mīshti fatiromē?” ikax yoinānifo.

<sup>57</sup> Nāskakē nikakaspanifo. Akka Jesús ato yoini iskafakī: “Keyokōi nā maitio anoxō Niospa meka yoimis nikatirofo. Akka nā āfe maikōi anoxō nikapaitirofoma. Nāskakē mā ea nikakaspamis,” ixō ato yoini.

<sup>58</sup> Nāskakē anoxō afama mīshti ato ōimanima tsōakairoko nikaito.

## 14

*Juan Maotista nani*  
(Mr. 6.14-29; Lc. 9.7-9)

<sup>1-2</sup> Nāskatari Galilea anoa nā xanīfo Herodes ini. A Jesús afama mīshti faito nikaxō āfe inafō yoini iskafakī: “Akka nā Juan Maotista ě ato textemayamea mā anā otoa. Mā otoxō tsōa atiroma keskara afama mīshtifo fai,” ixō shināni.

<sup>3-4</sup> Akka Herodes Juan reteyoamano Juan yōani iskafakī: “Xanīfo Herodes, mī exto Felipe mī āfe āfi Herodías mī fīa. Askara chakakōi,” nāskafani. Nāskakē Herodes akiki ōitifishkini. Nāskaxō āfe sorarofō achimani karaxa mēra ikimaxii.

<sup>5</sup> Akka Herodes Juan retepaifi yorafoki meseni yorafāfemāi chanīmara faifono Juanmāi Niospa meka ato yoimiskē. Nāskakē Herodes shināni iskafakī: “Ĕ Juan retekē eari yorafāfe retetirofo,” ixō shināni. <sup>6-7</sup> Akka Herodes āfe cumpleño ikaino, yorafo ato ichanāfani. Ichanāfono nā Herodías fake xomaya ares mairani yorafāfe ferotaifi ato inimamai. Nāskakē Herodes yoikī iskafani nā xomaya yorafāfe ferotaifi,

“Mī afara fichipaiyai keskara ea yōkafe ē mia inānō,” ixō yoini. <sup>8</sup> Nāskakē nā kēro xomayato āfe afa ano kaxō yōkani iskafakī: “ĵĒ afaa Herodes yōkatromē?” faito āfa yoini iskafakī: “Juan Maotista āfe mapo textexō ea sapaki rataxō ea fexōfe fafe,” fani.

<sup>9</sup> Askafaito nikai xanīfo Herodes shināmitsani, Shināmitsayanā āfe shinā mēraxō shināni iskafakī: “ĵOoa! Ē Juan ato textemapaima. Akka yorafāfe nikaifono mē na kēro xomaya yoia. Nāskakē ē Juan ato textemapaiyamafikī ē ato textemani,” ixō shināni. <sup>10</sup> Nāskaxō xanīfāfe āfe sorarofō yoini: “Juan textexō āfe mapo ea fixotakāfe,” ixō yoini. <sup>11</sup> Ato askafaino fōkaxō sorarofāfe Juan textekaxō āfe mapo sapaki rataxō fenifo. Fēkaxō nā kēro xomaya inānifo. Nāatori āfe afa ināni.

<sup>12</sup> Nāskakē Juan inafō fēkaxō āfe yora fōkaxō maifanifo. Mā askafakaxō Jesúski nokokaxō yoinifo.

*Jesús cinco mil feronāfakefo ato pimani*

*(Mr. 6.30-44; Lc. 9.10-17; Jn. 6.1-14)*

<sup>13</sup> Askata Herodes sorarofō Juan textemana nikai Jesús ares fisti kani kanōanāfānē tsōa istoma ano. Mā Jesús ato makinoax kaa nikakani pexe rasi anoax yorafā rasi fāi fonifo.

<sup>14</sup> Mā kanōanāfā makinoax fotoxō akiki yorafā rasi foaito fichini. Ato ōikī ato shinākōini. Nāskaxō a isinī ikaifo ato sharafapani.

<sup>15</sup> Mā yātapakeaino aōxō tāpimisfo akiki nokokaxō yoinifo: “Mā yātapakei kiki nono afaamakī yorafo nīchife a piaifo fitanōfo pexe rasi anoafō,” ixō yoinifo.

<sup>16</sup> Askafaifono Jesús ato kemani: “Maa. Fokanima kiki. Māroko ato pimakāfe,” ato faito, <sup>17</sup> kemanifo: “Nō nono cinco pāaya, askatari foe rafes,” fanifo.

<sup>18</sup> Askafaifono Jesús ato yoini: “Ea fixotakāfe,” ato fani.

<sup>19</sup> Nāskaxō yorafā rasi yoini fasi ano tsaonōfo. Askata foe rafe yafi cinco pāa tsofaxō nai foisinīfofā Apa Nios kīfini iskafakī: “Aicho, Epa, mīōxō ē ato pimai. Mī sharakōi,” fata, pāa kaxketa foe rafeya osixō aōxō tāpimisfo ināni a yorafo ato ināketsanōfo. <sup>20</sup> Nāskax pikanax māyakōinifo. Akka nā chete-fafo doce fēta fospini. <sup>21</sup> Nā piaifo cinco mil feronāfakefos ini. Kērofāferi fakefo feta pinifo.

*Jesús ĩamāfā femākīa kani*

*(Mr. 6.45-52; Jn. 6.16-21)*

<sup>22</sup> Mā cinco mil yorafo pimata Jesús aōxō tāpimisfo yoini iskafakī: “Kanōanāfānē nanekāfe, okiri ĩamāfā pokefaitaxikākī,” ixō ato yoini. Jesús kayoxoma yorafo nīchiaino aōxō tāpimisfo fonifo. <sup>23</sup> Mā yorafo nīchita, māchi keya ari arese kani arixō Apa Nios kīfikai. Mā fakishaino,

ares fisti ano ini. <sup>24</sup> Akka a aõxõ täpimisfo kanõanãfãñẽ mã chai foafono, nẽfefaino ãamãfã poikĩ ato katimafani.

<sup>25</sup> Akka mã penaino Jesús ãa femãkĩa atoki kaito tsõa täpinima.

<sup>26</sup> Nãskata täpikanamax aõxõ täpimisfo Jesús ãamãfã femãkĩa kaito fichikanax tai tai iyanã ratekõinifo, niafakara ikanax.

<sup>27</sup> Askaifono Jesús ato yoini: “Rateyamakãfe, ãki,” ato fani.

<sup>28</sup> Ato askafaino Pedro kemani: “Ifo, mĩmãkĩ eari kenafe ãri ãamãfã femãkĩa kanõ mia ari,” Pedro fani.

<sup>29</sup> “Ofẽ,” Jesús fani. Nãskakẽ Pedro kanõanãfã makinoax fotopakekafã ãamãfã femãkĩa Jesús ari kani. <sup>30</sup> Kapaifi ne-feaito õi nefe kerexkõi mei mesekõini. Nãskakẽ ãamãfã mẽra ikipakekafakĩ fãsikõi kenani: “¡Ifo, ea ifife!” fani.

<sup>31</sup> Askaito Jesús koshikõi ãfe mẽke achixõ yoini: “Mĩkai ea chanĩmara fasharama. ¿Afeskakĩ mã chanĩmara faimamẽ?” ixõ Jesús yoini.

<sup>32</sup> Askata nã rafe kanõanãfã mẽra naneinĩfofanaifono nefe nishpatani. <sup>33</sup> Nãskakẽ nã kanõanãfã mẽra naneafãfe Jesús nãmã ratokonõ mai chachipakefofã yoinifo: “Chanĩma, mĩfi Niospa Fakeki,” ixõ yoinifo.

*Jesús Genesaret anoafõ a isinĩ ikaifo ato sharafani*  
(Mr. 6.53-56)

<sup>34</sup> Akka ãamãfã pokefaikani Genesaret mai ano nokonifo. <sup>35</sup> Nãskata nã ano ikafãfe yorafãfe Jesús täpirisafanifo. Nãskakẽ nã chai ikafori ato yoinifo akairi täpinõfo. Nãskakẽ a isinĩ ikaifo Jesúski efenifo. <sup>36</sup> Nãskakẽ Jesús yõkanifo: “¿Nõ mia tari kexa maikiri pishta ramãkatromẽ nõ sharaxiki?” fanifo. Nãskakẽ Jesús tari ramãkanax sharai fetsenifo.

## 15

*Jesús ato yoini afeskai yorafo chakafomakĩ*  
(Mr. 7.1-23)

<sup>1</sup> Askata fariseofo fe a Moisés yoikĩ kirika keneni keskara ato täpimamisfo Jerusalén anoax Jesúski fẽkaxõ yõkanifo: <sup>2</sup> “¿Afeskai na mĩõxõ täpimisfo a nõko xinifo ipaonifo keskakanimamẽ? Akka a nõko xinifãfe yoinifo keskara täpifikaxõ pixikakĩ mechokomekeranafo,” ixõ yoiãifãfe Jesús ato kemani:

<sup>3</sup> “Akka, ¿afeskakĩ mãri mãto xinifo ipaonifo keskara mã tanapaimẽ? Nãskaxõ a Niospa yoini keskara mã nikatama nã mãto xinifãfe yoimisfo keskara mã nikamis. <sup>4</sup> Akka Epa Niospa yoikĩ iskafani: ‘Mãto epa yafi mãto efa nikasharakãfe. Akka a ãto apa yafi ãto afa chakafaifo ato retemakãfe,’ ixõ Niospa yoini. <sup>5-6</sup> Nãnori Niospa yoifinikẽ mãfi ato mẽstekõi nofe yorafo mã ato täpimamismaki. Akka mã ato yoimis iskafakĩ: ‘Mãto epa yafi mãto efa mã yoikĩ iskafatiro: “Epa,

na kori ĕ mia inākerana. Nāskafixō mē kori keyoa ĕ Nios inākī. Nāskakē ĕ mia anā afaa inātiroma,” ixō mā ato yoitiro. Nāskaxō māto epafo mā shināmakīa keskara mā itiro,’ ixō mā ato yoimis parakī. Askafixō mā ato tāpimasharamisma. A kirikaki yoikī Niospa meka kenenifo anori mā yoimisma. Nā māto xinifo ipaonifo keskara fisti mā tanamis. A Niospa yoini keskara mā akima. <sup>7</sup> Māfi keparanāmiski. Matoōnoa yoikī Niospa meka yoimisto Isaías kirika kenei chanīmakōi iskafakī:

<sup>8</sup> Nā yorafāfe eōnoa yoisharafikakī āto shinā mēraxō ea shinākōiafoma. <sup>9</sup> Āa kaxpa ichanākanax fanāimisfo ea kīfīyanā. A ato tāpimanaifo yorafāfe shinā keskarrafo. Akka askarakai Niospa shināma, ixō Isaías kenei, Niospa shināmanaino.”

<sup>10</sup> Nāskata Jesús yorrafo kenaxō ato yoini iskafakī: “Ea nikasharakōikāfe tāpisharakōixikakī ĕ mato yoinō. <sup>11</sup> Na mā piato choshta keskara mato imatiroma. Askatamaroko yorafāfe āto shinā mēraxō chaka shinākani, askatari chakai mekaifono choshta keskara Niospa ato ōi,” Jesús ato fani.

<sup>12</sup> Askata aōxō tāpimisfo fōkaxō Jesús yōkanifo: “Ifo, ĵmī tāpīamamē fariseofo ōitīfishkikani nā mī yoiaito nikakani?” ikaxō yoinifo.

<sup>13</sup> Askafaifono Jesús ato kemani meka fetsafaxō: “Tare ifāfe afara chakafo fanatiroma. Askatamaroko a chaka foaikaino tsekaxō potatiro. Nāskarīfakī ĕfe Epa nā nai mēra ikato afarafo fanayamaxō, āfe tapo tsekaxō potaxii anā afaa inōma. <sup>14</sup> Akka fariseofo nikayamakāfe. Nā fēxo keskarafoki. Akka fēxo afe fēxo iyopai xato mēra paketiro. Nāskarīfiakī nā fariseofāfe Niospa meka tāpīkaxoma fetsafo tāpīmatirofoma. Nāskakē ato fe Nios ari nokotirofoma,” ixō Jesús ato yoini.

<sup>15</sup> Ato askafaito Pedro Jesús yoini: “A na mī yoia keskara meka fetsafaxō noko yoisharafe nō tāpīsharanō,” fani.

<sup>16</sup> Askafaito Jesús kemani: “ĵAfeskakī mārī mā nikasharaimamē? <sup>17</sup> Akka nō afara piano nōko ato mēranoax payokomeano nō aya safatiro. Nāatokai mato chakana fatiroma. <sup>18</sup> Akka a māto shināmā shināxō mā afara chaka yoiaino nāto mato chakana fatiro. <sup>19</sup> Akka yorafāfe afara chakafakakī āto shinā mēraxō chaka shinātirofo, ato retetirofo, askatari āto āfīma chotatirofo, askatari kēro fetsa kaxefatirofo, askatari yometsoatirofo, askatari chanītirofo, askatari ato iĉatirofo. <sup>20</sup> Akka mechokomexoma mā piaino Epa Niospa choshta keskara mato ōīma. Akka yorafāfe āa shinākaxō afara chakafatirofo. Nāskakē Epa Niospa ato ōi choshta keskara,” ixō Jesús ato yoini.

*Xotofake judeoyamafixõ Jesús chanĩmara fakõini*  
(Mr. 7.24-30)

<sup>21</sup> Askata Jesús aõxõ täpimisfo fe kani nã pexe rasi Tiro fe Sidón chaimashta ano. <sup>22</sup> Askata këro fisti Canaán mai ano ikatsaxakĩ judeo kaifoma Jesús ano kani. Kaxõ fãsikõi yoikĩ kenani iskafakĩ: “Ifo, mĩ David fenaki, ea shinãfe. Ëfe fake xotofakeshta niáfaka chakata omiskõimamiski,” ixõ yoini.

<sup>23</sup> Askafaito nikafikĩ Jesús kermanima. Nãskakẽ äfe inafãfe fõkaxõ yoinifo: “Ifo, na këro yoife katanõ. Nocho okĩ noko fekaxtefafei kiki. Fãsikõi fiisiki kiki,” fanifo.

<sup>24</sup> Askafaifono Jesús ato yoini: “Ëfe Epa Niospa ea nĩchini judeofos ano, nãfo oveja fenoa keskarafo. Akka yora fetsafo ano ea nĩchinima,” ato askafani.

<sup>25</sup> Akka nã këro Jesús nãmã ratokonõ mai chachipakefõfãyanã iskafakĩ yoini: “Ifo, ãfe fake ea sharafaxope,” fani.

<sup>26</sup> Askafaino Jesús kemani meka fetsafaxõ: “A fakefãfe piai fĩaxõ nõ paxta inã, askarakai sharama,” fani.

<sup>27</sup> Jesús askafaito nã këromã kemani: “Ëje, Ifo. Akka paxtafãfe pitirofo a ifãfe piai äfe potofõ mĩsa nãmã keyo pakeaito,” fani.

<sup>28</sup> Askafaito Jesús yoini nã këro: “Mĩ ea chanĩmara fakõini fetsafo keskarama. Akka nã mĩ ea yoiai keskara ã mia axonõ,” ixõ Jesús nã këro yoini. Askafaino äfe fake xotofake shararisatani.

*Jesús yora ichapa sharafani*

<sup>29</sup> Askata Jesús anoax aõxõ täpimisfo fe kaax ãa Galilea kesemẽ nokoni. Nãskata machi keya mãpefainax tsaoni. <sup>30</sup> Nãno yorafã rasi akiki fenifo. Nã isinĩ imisfo akiki efenifo Jesús ato sharafanõ. Fetsa chãto ini, fetsari fẽxo ini, fetsari mifi yõshia ini, fetsari mekamisma ini. Nãskakẽ fetsa fetsatapafo a isinĩ ikaifo Jesús keyokõi ato sharafani. <sup>31</sup> Ato sharafaino õikani yorafo yoinãnifo: “¡Kee! Õikapo. Iskarakai nõ õimisma. Nã mekamisfoma mã mekakani. A mifi yõshiafori mã sharafo. Nã chatofori mã nisharakani. Nã fẽxofãferi mã õisharakani. Jesús afama mĩshti fatiro. Akka nõfi israelifokĩ nõko Nios fãsi sharakõi,” ikanax yoinãnifo.

*Jesús cuatro mil feronãfakefo pimani*  
(Mr. 8.1-10)

<sup>32</sup> Askata Jesús aõxõ täpimisfo kenaxõ yoini: “Ë na yorafo shinãkõi, nono tres nia mã efe ikafono, nonoxori afaa pikanima. A piaifo mã keyoa. Akka afaa pimaxoma äto pexe ano ã ato nĩchiano fonãikani afaa pikanaxma fai nẽxpakĩa paketirofo,” ixõ Jesús ato yoini.

<sup>33</sup> Akka ato askafaino aõxõ täpimisfäfe kemanifo: “Akka, ¿afeskaxõ a nõ piari nõ fichitiromẽ na yorafo ato pimaxikĩ nono tsoa ikama?” fanifo.

<sup>34</sup> Askafaifono Jesús ato yõkani: “¿Afe tii mã pãayamẽ?” ato faito, “Siete pãa pishta, foe ichapamashtari,” fanifo.

<sup>35</sup> Nãskata nã yorafo nãmã tsaonõfo Jesús aõxõ täpimisfo ato yoini. <sup>36</sup> Nãskata Jesús siete pãa yafi foeri tsoamaxõ Apa Nios kifini: “Aicho Epa, mĩõxõ ẽ ato pimaikai. Mĩ fãsi sharafinakõiaki,” fata, pãa kaxketa, foeri tekenãfaxõ aõxõ täpimisfo ato inãni nã yorafã rasi ato miniketsanõfo. <sup>37</sup> Nãskakẽ keyokõichi pikanax mãyakõinifo. A pikĩ chetefaafõ siete fẽta fospikõia ini. <sup>38</sup> Akka nã pãa piafo cuatro mil feronãfakefos inifo. Kẽrofãferi fakefoyaxori ato feta pinifo. <sup>39</sup> Nãskata Jesús yorafo yoini fõtanõfo ãto pexe ano. Nãskata Jesús kanõanãfã mẽra naneinãkafani aõxõ täpimisfo fe. Mã naneinãkafãta aõxõ täpimisfo fe mai fetsa ano kani, Magdala ano.

## 16

*Fariseofo feta saduceofãfe, “Tsõa atiroma keskara noko ispafe nõ mia chanĩmara fanõ,” ixõ Jesús yõkanifo*

*(Mr. 8.11-13; Lc. 12.54-56)*

<sup>1</sup> Askata Magdala mai ano Jesús nokoano fariseo fe saduceofo Jesús õifokani fonifo afara chakafamapaikani. Nãskakaxõ yoinifo: “Mĩ Niospa Fakemãkĩ tsõa atiroma keskara noko ispafe nõ mia chanĩmara fanõ,” fanifo. Nãskakaxõ Jesús afara chakafamapainifo. <sup>2</sup> Askafaifono Jesús ato kemani: “Mã yãtapakeainõ xini iki sharapakekõikai, ‘Penama oi ikima,’ mã famis. <sup>3</sup> Akka mã penaino nai choshtakõi õikĩ, ‘Oi iki kiki,’ mã famis. Akka nai choshtakẽma õikĩ, ‘Oi ikima,’ mã famis. Nai foiskĩ mã täpitiro oi feyamai feima rakikĩa mã fatiro. Askafixokai nã Niospa mato yoiai keskara mã chanĩmara faima. Nãskakẽ mã ea tsõa atiroma keskara fafe, nõ õinõ mã ea famis. Akka, ¿afeskakĩ mã täpiamamẽ Epa Niospa noko ikĩfiano?” ato askafani yoikĩ. <sup>4</sup> “Na yora chakafãfe ea chanĩmara faafãfema õipaikani ẽ Niosxõ afara shara ẽ ato ispanõ. Akka ẽ ato õimanima. Akka Jonás fafĩnõfãnẽ xeaitano fafĩnõfãnẽ xaki mẽra tres nia ini. Nãskakẽ Niospa Jonás kãimani fafĩnõfãnẽ xãki mẽranoax tsekeinõ. Nãskakẽ a tsõa atiroma keskara ẽ mato ispaima,” ato fata ato makinoax Jesús kani.

*“Fariseofo feta saduceofãfe anorima yoimisfoki ato nikayamakãfe,” Jesús ato fani*

*(Mr. 8.14-21)*

<sup>5</sup> Nãskano Jesúsxõ täpimisfãfe okiri ãamãfã pokefaini fõkakĩ a pii foaifo shinãmakifainifo. Nãskakaxõ shinãnifo: “Kee, ¿nõ

afaa piikaimē? A nō piikai mā nō shināmakikerani,” ikanax yoinānifo. <sup>6</sup> Nāskakē Jesús ato yoini iskafakī: “Nā fariseofo feta saduceofāfe āto pāa faraxati keskara fiyamakāfe,” ixō ato yoini.

<sup>7</sup> Ato askafaito nikakani aōxō tāpimisfo yoinānifo: “¿Afeskakī Jesús noko yoimē fariseofo feta saduceofāfe āto pāa faraxati fiyamakāfe noko fai? Akka nō pāa feama. Nāskakē pāanoa noko yoiraka,” ikax yoinānifo.

<sup>8</sup> Akka mā tāpixō Jesús ato yoini: “¿Afeskai nō pāayamara mā ikimē? Akka mā ea chanīmara fasharama,” ato fani. <sup>9</sup> “Mā kai ea tāpisharama. Akka, ¿mā shināimamē cinco pāa kaxkexō cinco mil feronāfakefo ē ato pimati? Akka, ¿afe tii fēta pāa fospia ikitamē?” ato fani. <sup>10</sup> “Askatari, ¿mā shināimamē nā siete pāa kaxkexō cuatro mil feronāfakefo ē ato pimati? Akka, ¿afe tii fēta texefafo mā fitamē? <sup>11</sup> Akka, ¿mā tāpiamamē pāanoa ē mato yoima? Nā fariseofoya saduceofoōnoa ē mato yoi,” Jesús ato fani.

<sup>12</sup> Nāskakē tāpinifo Jesús ato yoiaito. Akka nā pāa faraxitiōnoa Jesús ato yoinima. Nā fariseofāfe saduceofo feta ato anorima tāpimapaiyaito Jesús ato yoini.

*“Mī Cristo mia Niospa ifini nokoki nīchixii mī nōko xanīfo finakōia inō,” ixō Pedro Jesús yoini*

*(Mr. 8.27-30; Lc. 9.18-21)*

<sup>13</sup> Askata Jesús aōxō tāpimisfo fe mai fetsa ari nokoni, Cesearea Filipino mai ano. Nānoxō aōxō tāpimisfo yōkani iskafakī: “Yorafāfe, ¿afaa ea fakanimē ē tsoamē?” ato fani.

<sup>14</sup> Ato askafaito kemanifo iskafakakī: “Fetsafāfe, ‘Juan Maotistara’ mia fakani. Fetsafāferi, ‘Elíasra’ mia fakani. Fetsafāferi mia iskafakani: ‘Nā Niospa meka ato yoimis nā Jeremiaskā, askayamai nā Niospa meka ato yoimis fetsa rakikā,’ mia fakani,” fanifo aōxō tāpimisfāfe.

<sup>15</sup> “Akka, ¿mā, ea tsoara faimē?” ato faito, Pedro kemani iskafakī: <sup>16</sup> “Mīfi Cristoki, nā Nios nīpanakato Fakekōi,” fani.

<sup>17</sup> Askafaito Jesús kemani iskafakī: “Simón, mīfi Jonás pa fakeki. Niospa mia noixō mia sharafaxōa. Akka ē Niospa Fakekē tsōa mia tāpimanama. Ēfe Epa Niospa nā nai mēra ikato āa mia tāpimana. <sup>18</sup> Ē mia anā yoinō. Mīfi Pedroki,” ixō Jesús yoini. Akka israeli mekapa Pedro Tokirinīfā nō fatiro. Tsōa tokiri efapa pītsi itiroma. Nāskaxō Jesús anā yoikī iskafani: “Mī ea yoia: ‘Mī Cristo, nā Nios nīpanakato Fakekōi,’ mī ea faa. Nā mī yoia keskaraōxō fetsafāfe arifi chanīmara faxikani. Nāskaifāfe efe yorafo ē ato imaxii. Nāskax ichanāxikani ea fanākani ekeki inimakani. Yōshi chakafāfe Nios noikaspakakī ato namapayanā ato xatemapaifiaifono tosa xatetiroma. Nā ea Ifofaafo xatenakafoma ea fanākani.

Tokiri efapanāfā pītsikiki tsōa tararatiroma keskara ixikani. <sup>19</sup> Akka fētsa chamisi fepoti fēpetiro yorafo pexe mēra iki-maxikī. Nāskarifiakī ē mia yoi mī yorafo eōnoa mī ato tāpimaxii ea Ifofanōfo. Akka mī ato yoiaino nikakōikanax efe yora itirofo Epa Nios fe ipaxakakī. Nāskai mī chamis keskara itiro. Nā mī ōiai fato sharakōimākī mī ato yoitiro: ‘Nā sharakōi mā atiro,’ ixō mī ato yoitiro. Nā sharakōi mī ōiai, Epa Niospari sharakōi ōi. Askatari mī ōikai fato chakamakī, mī ato yoitiro: ‘Na chaka mā atiro.’ Nāskara mī yoiaino, Epa Niospari nā chaka ōitiro.”

<sup>20</sup> Nāskata Jesús aōxō tāpimisfo yoini: “Tsoa yoiyamakāfe ēfi Cristokī,” ato fani.

*“Chipo ea retexikani,” Jesús ato fani*

*(Mr: 8.31-9.1; Lc. 9.22-27)*

<sup>21</sup> Akka anā meka fetsafaxō Jesús ato yoinima. Xafakīakōi a aōxō tāpimisfo ato yoini achiyoafomano: “Ē Jerusalén ano kai. Nānoxō a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāferi, askatari nōko kaifāfe āto xanīfofofāferi ea omiskōimaxikani. Ea ato retemafifono, tres nia oxata ē anā otoxii,” ixō ato yoini. <sup>22</sup> Askafaino Pedro Jesús ori iyoxō yoini iskafakī: “Ifo, askayamafe. Miakai retekanima kiki,” fani.

<sup>23</sup> Pedro askafaino Jesús texkeakekafāni. Nāskaxō iskafakī yoini: “Satanás, emakinoax katāfe. Mī ea xītipaikai a Niospa ea amapayai ē anōma. A Niospa shināi anori mī shināima. Akka nā yorafāfe shināi keskara mī shināi,” fani.

<sup>24</sup> Askafata Jesús aōxō tāpimisfo yoini: “Fatora fetsa ēfe inakōi ipaikī āakōi apayai keskara anā atiro. Nā ē yoiaino keskara nikakōitiro. Nāskakē iskatiro: ‘Ēfe Ifoxō ea retefiaifono ēkai ēfe Ifo ē potapakenakama,’ ixō shinātiro. <sup>25</sup> Akka fētsa āa shinātiro iskakī: ‘Ē Nios Ifofaito ea retetirofo. Nāskakē ē Nios Ifofaima,’ ixō shinātiro mesekī. Askara yora naax ēfe Epa ano katiroma. Akka nā ea Ifofaa, eōxō reteafono ē ifixii efe ĩpaxanō eamāi Ifofamiskē. <sup>26</sup> Akka fatora fetsa nono mai anoax kori ichapaya ikatsaxakī mā naax aya katiroma. Ea Ifofayamax koriya ifiyakatsaxakī Epa Nios ano katiroma. Nāskakē afama mīshtifoya iyopaofinixakī nā omiskōipakenakafo mēra mā kaax anā aya itiro. Nāskakē āfe afaraforikai Nios inātiro afe ĩpaxakī. <sup>27</sup> Akka ēfi Niospa Fakekī yorakōiri. Nāskakē shara finakōia chaxapakefofāxii ēfe ājirifo fe nai mēranoax mai ano okī. Mē oax ē āto xanīfo finakōia ē ixii. Nāskakē nā afara shara famisfo ē ato ināsharakōixii ē atoki inimakōikī. Akka nā afara chakafamisfo afara shara ē ato ināsharakōima. Ē ato omiskōimaxii. <sup>28</sup> Ē mato yoi ē xanīfo finakōia ixii. Akka mā atirito ea Ifofaxō nayoxoma mā ōiyotiro,” ixō Jesús ato yoini.



## 17

*Jesús áfe femānā fetsa keskara ini, fafekōini. Áfe rapatiri oxokōi ini*

*(Mr. 9.2-13; Lc. 9.28-36)*

<sup>1</sup> Askata seis nia mā finōano Jesús aōxō tāpimisfo tres iyoni. Pedro iyota, Santiago iyota, Santiago áfe exto Juanri iyoni. Ranāri ato nīchifaini. Nāskaxō māchi keya māmākīa ato iyoini.

<sup>2</sup> Nānoax āto ferotaifi Jesús fetsa keskara itani. Áfe femānā fafekōini xini keskara. Áfe rapatiri oxokōi itani oa luzpa chaxa keskara. <sup>3</sup> Nāskakē nānoa Moisés yafi Elías ōinifo Jesús fe mekaifāfe. <sup>4</sup> Askaito Pedro Jesús yoini: “Ifo, sharakōi ano nō oa. Akka, ¿mī fichipaimē ē tres tapas fanō? Mia fetsafaxota, Moisés fetsafaxota, Elías fetsafaxota, ē fanō,” ixō Pedro yoini.

<sup>5</sup> Akka Pedro askafaino kōinī ato keyokōi maipakefōfāni. Nā kōi mēranoax Nios mekaito nikanifo iskaito: “Nafi ēfe Fakeki ē fichisharapaikōi. Ē akiki inimakōi. A nikakōikāfe,” ikaito nikanifo. <sup>6</sup> Nikakani Jesúsxō tāpimisfo ratekōiyanā feopakefōfānifo. <sup>7</sup> Askafono Jesús ato ano kaxō ato ramāyanā ato yoini: “Finikāfe. Ratekakima,” ato fani. <sup>8</sup> Nāskakē fois-inīfōfākāki anoa tsoa ōinifoma, Jesús fisti nikē ōinifo.

<sup>9</sup> Nāskata machi keya ariax anā tisirimepakenifo mā fekani. Tisirimepakekī Jesús ato yoifeni: “A mā ōia keskara mā tsoa yoiki. Ē naax mē anā otoano mā ato yoitiroki,” ixō Jesús ato yoini.

<sup>10</sup> Nāskakē a aōxō tāpimisfāfe Jesús yōkanifo iskafakakī: “A Moisés yoikī kirika keneni keskara ato tāpimamisfāferi iskafakī yoinifo: ‘Cristo oyoamano Elías rekē oi taexii kiki,’ ixō yoimisfo. Akka, ¿afeskakī iskara yoimē?” fanifo.

<sup>11</sup> Askafaiāfe Jesús ato kemani: “Chanīma, Elías rekē oi taei nāato keyokōi itipinīsharafaiyoi āto chaka xatenōfo. <sup>12</sup> Akka ē mato yoinō mā Elías ifana māakai tāpiama. Nāskakē nā apaiyai keskafakakī chakafanifo. Nāskarifikāki ea omiskōimakani,” ixō Jesús ato yoini.

<sup>13</sup> Nāskakē aōxō tāpimisfāfe tāpinifo Juan Maotistaōnoa Jesús ato yoiaito.

*Jesús feronāfake naetapa niafaka chaka pōtaxoni*

*(Mr. 9.14-29; Lc. 9.37-43)*

<sup>14</sup> Askata Jesús a aōxō tāpimisfo fe mā māchifā ariax fotoano yorafā rasi akiki fenifo. Akka feronāfake fistichi ratokonō mai chachipakefōfā Jesús yoini: <sup>15</sup> “Ifo, ēfe fake shināfe. Ēfe fake nīsoi omiskōimiski. Nāskakē chii naki pakeyanā faka mēra pakemiski. <sup>16</sup> Akka mī inafō ano ēfe fake ē efefekē mī inafāfe ēfe fake ea sharafaxomisfoma,” fani.

<sup>17</sup> Askafaito Jesús kemani: “Ooa. Mākai ea tāpisharama. Mā afara shināmis. Akka afetīakai ē matoki onima. ¿Afetīakai mā ea tāpimē? Niri nā fake efekāfe,” Jesús ato fani.

<sup>18</sup> Nāskakē Jesús nā feronāfake naetapa makinoa niafaka chaka potani. Nāskax sharakōi itani nā feronāfake naetapa.

<sup>19</sup> Nāskaxō aōxō tāpimisfāfe Jesús yōkanifo: “Akka, ¿afeskakīri nō niafaka yōshi chaka potatiromamē?” ixō yōkanifo.

<sup>20</sup> Askafaifono Jesús ato yoini: “Akka mā ea nikaima. Ē mato yoinō, ea nikakapo. Akka mā ea pishta nikaxō mā na machi, ‘Nonoax tsekekainax mai fetsa ari katāfe,’ mā faino na machi tsekekaitiro. Ea nikakōixō nā mā apaiyai keskara mā atiro. <sup>21</sup> Akka na keskara niafaka chaka mā foni tenekī Nios shinākī mā Epa Nios kīfiyanā mā potatiro,” ixō Jesús ato yoini.

*Anā Jesús ato yoini: “Chipo ea retexikani,” ixō  
(Mr. 9.30-32; Lc. 9.43-45)*

<sup>22-23</sup> Askata aōxō tāpimisfo fe Galilea ano ichanāxō ato yoini: “Ea achikaxō āto xanīfofo ano ea iyoxikani, afāfe ea retenōfo. Akka ea retefiafono tres nia oxata ē anā otoxii,” ixō Jesús ato yoini. Ato askafaito nikakani aōxō tāpimisfo shināmitsakōinifo.

*Nā Nios kīfiti pexefā ano yonomisfāfe ato kori yōkanifo*

<sup>24</sup> Askata Jesús aōxō tāpimisfo fe Capernaúm ano nokoaino a Nios kīfiti pexefā anoxō ato kori fiamisfāfe Pedro ōifokaxō yōkanifo: “¿Mī Ifāfe kopifaimamē na Nios kīfiti pexefā nā ato kori fixomisfāfe?” Pedro fanifo. <sup>25</sup> “Ēje, kopifai,” Pedro ato fani.

Askata Pedro pexe mēra ikikainaito Jesús yoini iskafakī: “Simón, ¿afe keskara mī shināimē? ¿Xanifāfe nā maitio anoa āfe kaifo kori fīaimē, askayamakī yora fetsafo ato fīairaka?” ixō Jesús Pedro yōkani.

<sup>26</sup> Askafaito Pedro kemani: “Yora fetsafo fīatiro,” fani. “Ēje, chanīma,” Jesús ini. “Akka āfe kaifāfe kopifatiroma. <sup>27</sup> Akka nokoki ōitifishkiyamanōfo ĩa ano kaxō mīshkimātāfe. Nā mī fafī mīshkimāna āfe axfa mēranoa mī kori exe fichikai. Nāskakē nā Nios kīfiti pexefā kori fixomisfo nō ato kopifaikai,” ixō Jesús Pedro yoini.

## 18

*“Akka, ¿tsoakaimē sharafinakōia?” inifo  
(Mr. 9.33-37; Lc. 9.46-48)*

<sup>1</sup> Akka nāskatari aōxō tāpimisfo fōkaxō Jesús yōkanifo: “Akka, nō mia Ifofamiski, ¿fatomē finakōia?” ixō yōkanifo.

<sup>2</sup> Askata Jesús fake yome kenaxō ato nēxpakīa nīchini. <sup>3</sup> Nāskaxō ato yoini: “Ē mato pārāima. Iskara mā shinātiroma: ‘Ē keyokōi finōfakī,’ mā itiro. Akka fake yome kakapaitiro. Akka mā shinā fetsafaax na fake yome keskara mā itiro. Mā

askayamaxō mā Nios Ifofatiroma. <sup>4</sup> Akka Nios Ifo sharakōi faax nā Nios nikakōiaifo fake yome keskarrafo, askatari, ‘Nō tsoama,’ ixō shināifo nāskarrafo sharafinakōiafo. <sup>5</sup> Akka fatora fētsa ēfe aneōxō na fake yome noikī nāatori ea noisharakōi,” ixō Jesús ato yoini.

*Noko fētsa afara chakafamaino āfenā mesekōi itiro*  
(Mr. 9.42-48; Lc. 17.1-2)

<sup>6</sup> Jesús anā yoini iskafakī: “Akka nā ea rama Ifofai fetsafāfe ato afara chakafamaino ōikī, nā keskarrafo ato achixō tokirinifāya tenextifaxō fakafā noa mēra potatirofo āsanōfo fetsafo anā ato afaa chakafamayamanōfo. Nā keskara shara ikerana,” ato fani. <sup>7</sup> Askafata Jesús aōxō tāpimisfo yoini iskafakī: “Mēxotaima ea chanīmara faafāfema yorrafo chakafamapaimisfo. Akka fētsa fetsafo chakafamax omiskōi finakōixikani.

<sup>8-9</sup> “Akka mātō mēkemā mato afara chakafamatiro, askayamākī mātō tae mato afara chakafamatiro, askayamākī mātō fēro mato chakafamatiro. Nāskaino mātō chaka xatekōitakāfe anā chakafayamaxii. Oa mātō mēke xateta pota keskara itaxikakī, oa mātō tae xateta pota keskara itaxikakī, oa mātō fero fetoshimea keskarakōi itaxikakī afaa mā chakafayamanō. Akka mā mā mēke fisti potax anā afaa chakafayamai mā Epa Nios fe isharapakenakaki. Nā keskara sharakōi. Nā mātō mēke mā xateama keskaraxō mā aō chakafaino, nā omiskōipakenakafo mēra mā kanaka ari chiifā nokanakama mēra. Nā mātonā chaka finakōia ixii. Nāskatari mātō tae fisti xatea keskara mā sharafinakōia mā isharapakekōitiro. Nāskax, mā askayamaino nā omiskōipakenakafo mēra mā ipanakaki ari chiifā nokanakama mēra. Nāskatari mātō fēro chakafaino, mā fetoshimeax mā isharapakenakaki. Mā askayamax fero rafeyax nā omiskōipakenakafo mēra mā kaxii nā chiifā nokanakama mēra,” ato askafani.

*Oveja fenoaōnoa Jesús meka fetsafaxō ato yoini*  
(Lc. 15.3-7)

<sup>10</sup> Anā Jesús ato yoini iskafakī: “Nā rama ea Ifofaōnoa fakefo keskara shinākī iskafayamakāfe: ‘Na rama Jesús Ifofaafokai afaafoma,’ ixō yoyiamakāfe. Ē mato mēstekōi yoinō. Epa Niospa āfe ājirifāfe nā rama ea Ifofafo ato kexesharafafāimis. Nā ājirifo Epa Nios fe imisfo. Nāskakē āfe fakefo kexesharamis. <sup>11</sup> Akka nā yorrafo fenoafo ē āto chaka soaxoniyoi ē oni ishara-pakexanōfo.

<sup>12</sup> “Akka, ¿afaa mā shināimē? Feronāfake fetsa cien ovejaya itiro. Nāskakē fisti a makinoax fenoano nā noventa y nueve anā kāimatiroma nā fenoa fenakī. <sup>13</sup> Ē mato chanīma yoinō. Mā oveja fisti fichiix inimaifinakōitiro. Akka nā fenoamafoki inimatama nā fenoitaki mā fichiix inimaifinakōitiro.

14 Nāskarifiiai Epa Nios nã nai mēranoato nã rama Ifofaifo keyokōi ato noisharai ato òikī. Askatari tsoa pishta fenopaima āfe fakefo,” ato fani.

*Jesús chanĩmara faa fētsa mia chakafaito mĩ raefatiro (Lc. 17.3)*

15 Anã Jesús ato yoini iskafakī: “Akka meka fetsa ē mato yoinō. Ea chanĩmara famis fētsa mia chakafakē mĩ yoitiro iskafakī: ‘Yamã, mĩ ea chakafaa,’ ixō mĩ yoitiro. Mĩ askafaito mia nikaxō, ‘Ēje. Ea mĩa chakafa. Ea anã raefafe,’ ixō mia yoiaito mĩ afe rae faatanãtiro. 16 Nã mĩ askafafaito mia nikakaspaito feronãfake fisti kenafe, askayamakī rafe kenafe nã rafetari nikanōfo mia chanĩmara faimākai. 17 Nāskatari atori nikayamaito nã ea Ifofafo ichanãfo anoxō ato yoife mia tãpinōfo. Nã ichanãfo anoxō mĩ yoiaito mia nikayamaito mĩ iskafakī yoitiro: ‘Na feronãfãke Epa Nios Ifofafiax nã Nios Ifofaafoma keskara ika. Nāskatari nã ato pãraxō ato kori fiamisfo keskarakōi,’ ixō mĩ yoitiro.

18 “Ē mato chanĩma yoi. Nã mã òiai fato sharakōimākī mã ato yoitiro: ‘Nã sharakōi. Nāskara nō atiro,’ ixō ato yoitiro. Nāskara mã sharakōi òi Epa Niospari shara òi. Askata mã òikai fato chakamakī, mã ato yoitiro: ‘Na chaka. Nāskara nō atiroma,’ ixō ato yoitiro. Nāskara mã òikī chakamakī, ‘Na chaka nō atiroma,’ ixō mã yoiaino, Epa Niospari nã chaka òitiro.

19 “Askatari fetsari ē mato yoinō, ea nikakōikapo. Fatora mã rafeta nono mai anoxō mã shināsharaxō, mã Epa Nios afara yōkaiyanã mã kīfaiito ēfe Epa nai mēranoato mato afara ināsharaxii. 20 Akka rafe iyamakani tres yora ea shinākani eñoax ichanākaxikani ēri ato fe ichanãxii,” ixō Jesús ato yoini.

21 Askata Pedro akiki kaxō Jesús yōkani: “¿Ifo, oato ea noikaspakī ea chakafamis, afe tii fakī ē yoitiromē ē raefaxiki? ¿Siete fakī ē yoitiromē?” faito, 22 Jesús kemani: “Maa. Siete fakī mĩ yoitiroma. Mēxotaima mĩ yoitiro,” fani.

*Jesús anã meka fetsafaxō ato yoini feronãfake fētsa a afeta yonomis raefapainima*

23 Anã Jesús ato yoini: “Nō Epa Nios Ifofaxō nō fetsafo raefatiro, Epa Niospa mato raefamis keskafakī. Nã ē mato yoiai keskara nikakapo mã tãpinō mã rae faatanãino. A xanĩfãfe ato yonomamis kenani ato yoixii afe tii mã nimiamakī. 24 Xanĩfãfe taefakī afe rafea kenani ichapakōi nimiano. 25 Akka a nimia koriya inima afaa kopifatiroma ini. Nāskakē xanĩfãfe iskafani: ‘Mĩ koriyama mĩ kori nokotiroma mĩ ea kopifapanã. Akka ē mia xanĩfo fetsa inãi mĩ āfe ina inō ea kori inãnō. Mia inãta mĩ āfi inãta mĩ fakefo inãta mĩ afama mĩshtifo keyokōi ea inãi mĩ ea aō kopifanō,’ ixō xanĩfãfe yoini.

<sup>26</sup> Nāskakē āfe inapa ratokonō mai chachipakefōfā yoini: ‘Ifo, ea manayofe. A ē mia nimia ē mia chipo kopifaikai,’ ixō yoini.

<sup>27</sup> “Askafaito nikakī xanīfāfe shinākōini. Nāskaxō yoini: ‘Rateyamafe. A mī ea nimia ē anā shināima. Mī ea nimia ē keyokōi sofai mī anā ea niminōma. Kasharatāfe,’ ixō yoini. <sup>28-29</sup> Nāskakē xanīfāfe pexe mēranoax kakī, āfe yama fichini, nāato ichapama pishta nimia ini. Nāskakē fichixō testopa achixō temo temosayanā yoini: ‘Mī ea nimia ea kopifarīsafāfe,’ fani. Mā eneano ratokonō mai chachipafōfā yoini, ‘Ea manayofe ē mia inānō,’ fani. <sup>30</sup> Askafaito nikakas-pakī karaxa mēra ikimani a mēraxō kopifanō. <sup>31</sup> Nāskakē ranāri shināmītsakōikakī a ōiaifo āto xanīfo yoifokani fonifo. <sup>32</sup> Nāskakē xanīfāfe kenaxō mā oano yoini: ‘Mī chaka finakōia. Akka ē mia askafatima mī ea nimifiano, “A ē mia nimia ē mia kopifanō ea manayofe,” mī ea faito, <sup>33</sup> akka mīri mī yama mī shinākerana nā ē mia noikī shināti keskafakī,’ ixō xanīfāfe yoini. <sup>34</sup> Nāskax ōitīfishki finakōikī xanīfāfe nā āfe ina karaxa mēra ikimani anoax omiskōi finakōinō nā nimia kopifayanā.

<sup>35</sup> “Ēfe Epa nai ari ikato matori askafaxii fetsafo mā raefayamaito mato omiskōimaki,” ixō Jesús ato yoini.

## 19

*Feronāfake āfe āfi fe enēnātirofōōnoa Jesús ato yoini*  
(Mr. 10.1-12; Lc. 16.18)

<sup>1</sup> Mā ato yoikī keyota Jesús aōxō tāpimisfo fe Galilea anoax kakī faka Jordán pokefainax Judea mai ano nokoni. <sup>2</sup> Nāskakē yorafā rasichi chīfafāinifo. Nārixō nā isinī ikaifo ato sharafapani.

<sup>3</sup> Nāskakē fariseofo akiki fēkaxō chakafakī mekamapainifo. Nāskaxō yōkanifo iskafakī: “Nōko xinifāfe Niospa meka yoikī kenenifo keskafakī, ¿feronāfāke āfe āfi enepaikī enetiromē afeskaraito?” ixō yōkanifo. <sup>4</sup> Askafafono Jesús ato kemani: “¿A Moisés kirika keneni mā ōimismamē? Iskafakī keneni: ‘Niospa keyokōi onifani. Feronāfake yafi kēro onifakī taefani. <sup>5-6</sup> Mā askafaxō iskafakī yoini: “Feronāfake mā āfiyax āfe apa yafi āfe afa makinoax paxkatiro āfi fe fianāxiki. Nāskakē āfe āfi fe yora fisti keskara itirofo,” ’ ixō Niospa yoinino Moisés keneni. Nāskakē anā yora rafema, yora fisti keskara ikani āfe āfi fe. Nāskakē feronāfāke āfe āfi enetiroma Niospamāi ato fianāmano,” ixō Jesús ato yoini.

<sup>7</sup> Ato askafaino yōkanifo: “Akka, ¿afeskakī Moisés yoinimē iskafakī? ‘Feronāfāke āfe āfi eneyoxoma kirika kenexō yoitiro iskafakī: “Ē anā mia fipaima. Ē mia enei,” ’ ixō yoitiro Moisés fani,” fariseofāfe Jesús fanifo.

<sup>8</sup> Askafaifono Jesús ato yoini: “Akka mări măto xinifo keskara mã Niospa meka nikakaspamis. Akka Moisés yoini nõ këro enetiro. Akka Niospa taefakĩ anori shinänima. <sup>9</sup> Ë mato yoinõ. Akka fëtsa äfe äfi enetiroma fetsa fe chotanâyamafiano. Akka fëtsa äfe äfi enexõ këro fetsa fia askara sharama, chakafai. Askatari a këro fenë enea fëtsa fia askarari sharama, chakafai,” ixõ Jesús ato yoini.

<sup>10</sup> Askara nikakakĩ Jesús a aõxõ täpimisfäfe yoinifo: “Akka nã mĩ noko yoiai keskara nikakanax, fianäfoma askara shara itirofo,” ikaxõ yoinifo.

<sup>11</sup> Askafaifono Jesús ato kemani: “Na ã yoiai keskara atirifäfe nikasharatirofoma. Akka nã Niospa ato shinãmanai tiitos shinãkanax nãfo shara itirofo fianãkanamax. <sup>12</sup> Akka yõshikõĩ kãiax mã yosiax äfiyatiroma. Akka fetsafori ato oxkofixotirofo äfiyanõfoma. Akka fetsafäferi Epa Nios fisti nikakõipaikakĩ, nã fisti nikakõitirofo. Nãskakë afo äfiyapakenakafoma,” ixõ Jesús ato yoini.

*Jesús fakefo chishtoxõ ato mãmãyanã Epa Nios kifixopakeni*  
(Mr. 10.13-16; Lc. 18.15-17)

<sup>13</sup> Ato askafaino yorafäfe äto fakefo Jesúski efenifo ato mãmãpakeyanã ato Nios kifixonõ. Akka a Jesúsxõ täpimisfäfe ato iskafanifo: “Măto fakefo efexõ nõko Ifo fekaxtefayamakäfe,” ato fanifo.

<sup>14</sup> Ato askafaifono Jesús ato yoini: “Ato enekäfe nã fakefo ekeki fenõfo. Ato nëtefayamakäfe. Ëfe Epa Nios xanïfo ika ari na fakefo keskarakõifoki,” ixõ ato yoini. <sup>15</sup> Nãskaxõ fakefo mãmãpaketa Jesús nãnoax kani.

*Feronäfake naetapa kori ichapayax Jesús fe mekani*  
(Mr. 10.17-31; Lc. 18.18-30)

<sup>16</sup> Feronäfake naetapa fistichi Jesús õikaxõ yõkani: “Maestro, mĩ sharaki, ea yoife afaa shara ã afeska fatiromakĩ Nios xanïfo fe ipaxaki,” ixõ yõkaito, <sup>17</sup> Jesús kemani: “¿Afeskakĩ sharara mĩ ea faimë? Akka Nios fisti sharafinakõia. Nios xanïfo fe mĩ ipaxapaikĩ a Moisés yoini keskara mĩ nikasharakõitiro,” faito, <sup>18</sup> “¿Fatomë ã nikanõ?” faito, Jesús yoini iskafakĩ: “Nã Moisés yoini keskarakõĩ mĩ nikakõitiro. Iskafakĩ yoini: ‘Ato reteyamakäfe. Askatari măto äfima chotayamakäfe. Askatari atoki yometsoyamakäfe. Askatari chanĩ yoiyamakäfe. Askatari kaxpa ato parayamakäfe. <sup>19</sup> Askatari măto epa yafi măto efa nikasharakõikäfe, ato sharafakäfe. Askatari a mã chaima nikari noisharakõikäfe a mã mã noimeai keskafakĩ,” ixõ Jesús yoini.

<sup>20</sup> Askafaito a kori ichapayato kemakĩ iskafani: “Nã mã yoiai keskara më nikakõimis. Akka, ¿afaa fetsari ã nika-mamë?” faito, <sup>21</sup> Jesús kemani: “Mĩ isharakõipaikĩ, mĩ afama

mīshtifo ato minitāfe. Kori fixō nā afaamaisfo ato ināketsatāfe. Nāskakē nai mēranoax afama mīshtifoja mī ixikai. Mā mī kori ato ināketsata anā oxō ea Ifofasharafe,” ixō Jesús yoini.

<sup>22</sup> Askafaito nikai nā feronāfāke shināchakakōi tooxinima kori ichapayamāiyaxō ato inākaspai. Nāskax Jesús makinoax kani.

<sup>23</sup> Nāskaxō Jesús aōxō tāpimisfo yoini: “Ē mato pāraima, fekaxkōi yora kori ichapayato Epa Nios Ifofapaia. <sup>24</sup> Akka anā ě mato yoinō meka fetsafaxō. Camello akoja kini mēra ikipaifi ikitiroma, fekaxkōi, efapamāiax. Nāskarari yora kori ichapayato Nios Ifofapai, fekaxkōi āfe afama mīshtifomāi potakas-pakī,” ixō Jesús ato yoini.

<sup>25</sup> Ato askafaito nikakakī a aōxō tāpimisfāfe tāpipainifo. “¡Keel ¿Afeskax nō Nios fe ipaxatiromē?” ikanax yoinānifo.

<sup>26</sup> Askaifāfe ōikī Jesús ato yoini: “Yorafokai āa ifimetrofoma. Nios fistichi yorafo ifitiro. Niospa afama mīshtifo fatiro, yorafāfe atiroma keskara,” ixō ato yoini.

<sup>27</sup> Ato askafaito nikakī Pedro yoini: “Ifo, nō mefe okī nōko afama mīshtifo nō ōiferani nō mefe oni. Akka, ¿afaa nō fiimē?” fani.

<sup>28</sup> Askafaito Jesús ato kemani: “Ē mato pāraima. Keyokōi ě ato ikināno sharafinakōia ea ōixikani, ěfe Epa Nios keskara sharakōi ě ikaito. Akka māmāi ea Ifofasharakatsaxakī nai mēranoax mā efe xanīfofo ixii. Mā nōko kaifo israelifāfe āto xanīfori mā ixii. Nā doce nofe yorafo israelifo mā ato ikipakenakakī. <sup>29</sup> Akka yora fētsa eōxō ěfe meka sharaōnoa ato yoikakī āfe pexe ōifaini, askatari āfe onefetsafori ōifaini, āfe poifori ōifaini, āfe apari ōifaini, āfe afari ōifaini, āfe āfiri ōifaini, āfe fakefori ōifaini, āfe tareri ōifaini, akka nāato afama mīshtifo fixii. Nāskatari mā naax Nios fe ipanaka. <sup>30</sup> Akka iskaratīa yora ichapafāfe ato finōpaikani, nō finakōiara ikaxō, akka chipo fenotirofo. Akka a ato finōpaiyamaifo iskaratīa Niospa ato finakōia imaino Nios fe ipanakafo,” ixō ato yoini.

## 20

*A yonomisfokiri yoikī meka fetsafaxō Jesús ato yoini*

<sup>1</sup> Anā Jesús ato yoini: “Afe keskaramākī Epa Niospa keyokōi ato ikinā mā Ifosharafaino, ě anā meka fetsafaxō ě mato yoinō. Ea nikasharakāfe. Nā tare ifo mā fakishparikōi kani yorafo fenaikai āfe tare ano yonoxonōfo. <sup>2</sup> Ato fichixō ato yoini iskafakī: ‘Ē mato pena fisti yonomapai. Akka nā ě ato kopifamis tii mā pena fisti yonoano ě mato kopifai, ¿nāskara sharamē?’ ato faito, ‘Ēje, shara,’ fanifo. Nāskaxō āfe tare ari ato nīchini. <sup>3</sup> Askata rama xini keyaino tare ifo anā kakī ōia plaza anoxō ranārīto manaifono yonopaikakī tsōa ato yonomayaino. <sup>4</sup> Askaifono tare ifāfe ato yoini: ‘¿Māri ěfe tare ano

yonopaimē nā ē ato kopifamis keskafakī ē mato kopifanō? ato faito nikakata atiri fonifo yonoi fokani. <sup>5</sup> Askata tare ifo anā xini keya kaxō ōia ranārīto mananifo yonopaikakī. Nāskakē afori nīchīni āfe tare ano. Askata mā xini kaino anā kaxō ōia ranārītori manaifono. Nāfori nīchīni yonotanōfo. <sup>6</sup> Askatari yātapishtakōi plaza ano anā kaxō ōia nānoa ranārī ato fichitoshini yonopaiyaifāfe. Nāskaxō ato yōkani: ‘¿Afaa nonoxō mā afeskafaimē yonokima?’ ato faito kemanifo, <sup>7</sup> ‘Tsōa noko yonomayamaino nō iki,’ fanifo. Askafaifono ato yoini: ‘Māri ēfe tare ano yonotakāfe,’ ato fani.

<sup>8</sup> “Nāskata mā fakishano nā tare ifāfe afe xanīfo yoini iskafakī: ‘Ea yonoxonaifo ato kenafe ato kopifanō. Nā rama ikiafo ato kopifakī taefafe. Askata nā iki taeafō chipo ato kopifaxiki,’ fani. <sup>9</sup> Akka yātapishtakōi ikikaxō yonoafo nāfo ato kopifani nā pena fisti yonoafo kopifamis keskafakī. <sup>10</sup> Akka nā yonoi iki taeafāfe shinānifo: ‘Nō kori ichapa fira,’ ikaxō, askafīkaxō nā fetsafāfe fiaitiri finifo. <sup>11</sup> Nāskakē mā ato kopifaino, nā tare ifo mekafakakī yōachēpenifo. <sup>12</sup> Iskafakī yoinifo: ‘Akka nā rama fēkaxō yonoafo mā ato kopifaa nā mā noko kopifaa keskafakī. Akka nō xini pae meeyanā nō yonoa nīskayanā nā pena tii,’ fanifo. <sup>13</sup> Akka nā tare ifāfe fisti kemani: ‘Efe yorashta, ē mia chakafakī mekafaama. Akka mē mia kopifaa nā mī pena fisti yonoa. Nā pena fisti ē ato kopifamis tii ē mato kopifai ē mato faaki. Nā sharaki mā ea faaki,’ fani. <sup>14</sup> ‘Akka ē mia kopifanō, nakīa mī kori. Katāfe mī pexe ano. Akka nā rama ikikaxō yonoafo nā ē mia ināi keskafakī atori ē ināi. <sup>15</sup> Nā ē ināpaiyai keska fakī ē ato inātiro, ēfe korimāiyakē. Akka, ¿afeskai mī ekeki ōitifishkikimē ē fetsafo ināsharaino?’ ixō yoini. <sup>16</sup> Nāskarīfakī Epa Niospa nā taefakī chanīmara faafo ato ināi keskafakī nā rama chanīmara faifo nāfori ato ināsharaxii. Akka Epa Niospa yora ichapa kena a ika ano fonōfo. Nāskakē Epa Niospa ato kenafiaito tsōa nikayamaito nā Ifofaafos ato ifixii,” ixō Jesús ato yoini.

*Anā Jesús ato yoini: “Mā chaima ea retekanira,” ixō  
(Mr. 10.32-34; Lc. 18.31-34)*

<sup>17</sup> Askata Jesús Jerusalén ari fāi kakī a aōxō tāpimisfo kenaxō ato yoini iskafakī: <sup>18</sup> “Ea nikakāfe. Mā mā ōikai iskaratīa Jerusalén ano nō māpei kaikai. Nānoxō ea achikaxō ea ato inākani, a Nios ato kīfixomisfāfe āto xanīfofo, askatari a Moisés yoikī kirika kenenī keskara ato tāpimamisfo anori ea iyoxikani. Nānoxō, ‘Mā mī naikai,’ ixō ea yoixikani kiki. <sup>19</sup> Nāskakaxō yora fetsafo nōko kaifoma ea inākani ea kamaketsayanā ea koshaketsakani. Nāskakaxō ifi cruz ikaki ea mastakani. Akka ea askafafono tres nia oxata ē anā otoxii Epa Niospa ea otoaano,” ixō ato yoini.



*Āfa āfe fake rafe Jesús yoixoni*  
(Mr. 10.35-45)

<sup>20</sup> Zebedeo fake rafe Juan fe Santiago ini. Nā rafe āto afa fe Jesús ano fonifo. Mā Jesúsiki nokoxō nā kēromā ratokonō mai chachipakefofāni Jesús afara shara yōkapaikī. <sup>21</sup> Askafaito Jesús yōkani: “¿Afaa mī fichipaimē ē mia axonō?” faito, nā kēromā yoini: “Ifo, nā mī xanīfo finakōia ikaitīa ēfe fake raferi mefe xanīfo inōfo ato xanīfo imafe. Nā xanīfāfe tsaoti ano mī tsaono ēfe fake rafe takairafe mefe ketaxamei tsaonōfo,” fani.

<sup>22</sup> Askafaito Jesús nā kēromā fake rafe yoini: “Mā tāpiama a mā ea yōkai keskara. ¿A ē omiskōixiai keskara māri omiskōitiromē?” Jesús ato faito kemanifo: “Ēje, nōri tenetiro,” fanifo.

<sup>23</sup> Askafafāfe Jesús ato yoini: “Chanīma, māri mā omiskōixii. Akka ēkai tosa yoitiro, ‘Efe ketaxamei tsaofe efe rafexii’ ixō. Akka ēfe Epa Nios fistichi yoitiro. Nā Niospa ato katoafos nāfo afe ketaxamei tsaotirofo efe rafexikakī,” ixō ato yoini.

<sup>24</sup> Nāskakē a aōxō tāpimis rafeta askafakī yōkaifāfe a aōxō tāpimisfo fetsafāferi nikakakī, “¿Afeskai oa iskai rafe mekakanimē?” ikaxō a rafe meepainifo. <sup>25</sup> Askaifono Jesús ato kenaxō ato yoini: “Mā mā tāpia yora fetsafāfe āto xanīfofo afe keskarafo māikī. Nā xanīfāfe mitsisipakōixō ato yonomamis. A xanīfo fe rafeafāferi ato yoimisfo iskafakakī: ‘Nōri māto xanīfo. Nō mato yoiāto mā noko afara axorisafatiro,’ ixō fāsikōi ato yoimisfo. <sup>26</sup> Akka mā ranā askayamakāfe. Askatamaroko fatora fetsa mā xanīfo ipai ato yonoxomis keskara mā itiro.

<sup>27</sup> Askatari fatora fetsari xanīfo ipaikī iskafakī shinātiro: ‘Ēkai afaama. Nāskakē ē fetsafo axosharapai. Nā apaiyaifo keskara ē ato axosharai,’ ixō shinātiro. <sup>28</sup> Akka ēri anori shināima, ēfe Epa Nios ariax ē nāmā fotoni feronāfakekōi ixiki, ē Niospa Fakefekē ea afara axonōfo ē onima. Askatamaroko fetsafo ē ato afara sharafaxoxiki ē onj. Ē atoōnoax naxiki ē oni Satanás chaka āto ifo inōma,” ixō Jesús ato yoini.

*Jesús yora fēxo rafekōi sharafani*  
(Mr. 10.46-52; Lc. 18.35-43)

<sup>29</sup> Askata Jericó anoax Jesús aōxō tāpimisfo fe kaino yorafā rasichi chīfāfainifo. <sup>30</sup> Akka fai kesemē fēxokōi rafe tsaonifo. Nānoxō Jesús fāi kaito nikakaxō nā rafeta kenanifo iskafakakī: “Ifo, David fenapa, noko shināfe,” fāsikōi fanifo.

<sup>31</sup> Askafafono nā yorafā rasichi ato iskafanifo: “Nōko Ifo fekaxtefayamakāfe,” ato faifono, akka nā fēxokōi rafe fāsikōi kenanifo: “Ifo, David fenapa, noko shināfe!” fanifo.

<sup>32</sup> Askafafono Jesús nēteakekafani. Ato kenaxō ato yōkani nā fēxokōi rafe: “¿Afaa mā fichipaimē ē mato axonō?” ixō ato yōkani.

<sup>33</sup> Ato askafaito kemanifo: “Ifo, nõ fěro õisharapaikõi,” fanifo. <sup>34</sup> Jesús ato shinãkĩ ãto fero mẽeni. ãto fero mẽeaino nõ fěxokõi rafeta ãto fěro õirisafatanifo. Nãskakaxõ Jesús chĩfafainifo.

## 21

*Jesús nokoni Jerusalén ano*

*(Mr. 11.1-11; Lc. 19.28-40; Jn. 12.12-19)*

<sup>1</sup> Nãskata mã Jerusalén chaima fokanax peXe rasi Betfagé ano nokonifo machi Olivos ano. Nãnoxõ Jesús a aõxõ tãpimis rafe nõchini, <sup>2</sup> ato iskafayanã: “Městekõi fotakãfe oa ono peXe rasi ano. Nãnoa burro nexekẽ mã fichi kaikai ãfe fake fe nexekẽ. Nãkakẽ tẽpexõ ea efexotakãfe. <sup>3</sup> Anoxõ yora fětsa mato yõkaito: ‘¿Afeskakĩ mã burro tẽpeyoamẽ?’ mato faito, yoikĩ iskafakãfe: ‘Nõko Ifãfe fichipaiyaito nõ ifixoniyoa. Akka samama nõ mia nõchixoniyokai,’ fakãki,” a aõxõ tãpimis rafe fani.

<sup>4</sup> Nã Niospa meka yoimisto kirikaki kenekĩ yoini keskakõini Jesús. <sup>5</sup> Iskafakĩ keneni:

PeXe rasi Siõn anoafõ ato yoikãfe iskafakĩ: “Õikapo. Mãto xanĩfokõi mã matoki oi kiki. Xanĩfofiãx afama keskara oi kiki. Burro fake kamaki tsoa na feronãfakekai kaka-paimisma,”

ixõ Niospa meka yoimisto kirika keneni.

<sup>6</sup> Nã Jesúsxõ tãpimisfãfe mã fõkaxõ nõ ato yoia keskara fanifo. <sup>7</sup> Nãskata burro fake yafi ãfe afa iyonifo. Nãskaxõ burro kate kamaki ãto sama fanifo. Nãkakẽ Jesús a kamaki tsoainãkafãni. <sup>8</sup> Yora ichapakõi inifo. Nãfãfe ãto rapatifo kakafa fonifo fai nẽxpakĩa. Ranãritori epe pei xatekaxõ kakafanifo. <sup>9</sup> Akka nõ rekẽ foaifo fe a acho foaifo fãsikõi mekafonifo. Tai tai fokani. “¡Aicho! ¡Nõko xanĩfo David ãfe fena nokoki oi kiki! ¡Sharafinakõia nokoki oi kiki Niospa nõchiano nai mẽraxõ! ¡Nõko Ifo Nios sharafinakõia!” ikanax tai taifonifo.

<sup>10</sup> Nãskata Jesús Jerusalén ano kaito õikani yorafo ratei fet-senifo õiakafaikani. “¿Tsoamẽ na?” ikanax ãa ranã yõinãi fetsenifo. <sup>11</sup> Askaifãfe nõ Jesús fe foafãfe ato kemanifo: “Nafi Jesúski Niospa meka ato yoimis. Nazarete anoa Galilea mai ano imis,” ixõ ato yoinifo.

*Jesús a Nios kĩfiti pexefã mẽraxõ a ato inãifo ato potani*

*(Mr. 11.15-19; Lc. 19.45-48; Jn. 2.13-22)*

<sup>12</sup> Mã fotoax Nios kĩfiti pexefã mẽra Jesús ikitoshini. Ikikaixõ õia a mẽraxõ yorafãfe ãto afama mĩshtifo ato miniket-sakani inifo kori fikani. Askafaifãfe õikĩ Jesús ato põtaketsani a ato afama mĩshtifo miniaifo, a ato fiaifori potani. A kori fianõnãifo anoari ãto mĩsa põtakĩ ato nãpakaketsani. Askatari

a ato rifi miniaifori āto tsaotifori ato pōtaketsani. <sup>13</sup> Askafata ato yoini iskafakī: “Niospa shināmanaino Isaías Niospa meka keneni iskafakī: ‘Mā ēfe pexefā mēraxō mā ea kīfitiro,’ ixō keneni. Akka nā yometsofāfe pexe keskara mā famis,” ixō Jesús ato yoini.

<sup>14</sup> Ato askafaino a Nios kīfiti pexefā ano fēxofo, chatofa Jesúski fenifo. Nāskakē anoxō Jesús ato sharafani. <sup>15</sup> Jesús askarafa ato sharafaino ōikani. Akka nā Nios ato kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe ōinifo afama mīshtifo Jesús akaito. Askatari fakefo Nios kīfiti pexefā mēranoaxri tai tai ikaifāfe nikanifo iskaifāfe, “¡Aicho! ¡Nā Jesús David āfe fena sharafinakōia!” ikaifāfe nikakani ōitifishkinifo.

<sup>16</sup> Nāskakakī Jesús yoinifo iskafakakī: “¿Oaiskai mī nikaimē yoiaifo keskara faifāfe?” Jesús ato kemani: “Ēje, mē nikai,” ato fani. “Akka a kirika keneano, ¿mā ōimismamē? Iskafakī kenenifo, Niospa ato shināmanaino:

“Fake yomefāfe mia fanākani, mī ato fanāimaino, ixō kenenifo,” Jesús ato fani.

<sup>17</sup> Askafakī ato yoita ato makinoax kani pexe rasi ano Betania ano. Nāno oxafistishini.

*“Fana higuera, mī anā fimiyanakama,” Jesús fani*  
(Mr. 11.12-14, 20-26)

<sup>18</sup> Mā penano Jerusalén ano anā okī Jesús meea fonāikōini. <sup>19</sup> Mā anā kakī Jesús ōini a fana higuera fai kesemē nikē. Nāskakē akiki kaxō āfe fimi fenani pipaikī. Akka fimiya inima, āfe pei fisti ini. Nāskakē yoikī iskafani: “Anā mī fimiyanakamaki,” faino koshikōi nā higuera xanarisatani.

<sup>20</sup> Askaito ōikakī aōxō tāpimimisfāfe yōkanifo: “Kee, ¿afeskai na ifi xanarisatanimē?” ikaxō, <sup>21</sup> yōkaifono Jesús ato kemani: “Ē mato pāraima mā ea nikakōixō māri atiro na ē ifi higuera xanafaa keskafakī. Nāskarifikā na machiri mā yoitiro iskafakī: ‘Nonoax tsekekainax fakafā mēra paketāfe,’ mā faino fakafā mēra paketiro. <sup>22</sup> Mā Epa Nios chanīmara fakōixō mā afara kīfiaito mato inātiro,” ixō ato Jesús yoini.

*“¿Tsōa mia nīchinimē mī xanīfo inō?” ixō Jesús yōkanifo anoxō achipaikakī*

(Mr. 11.27-33; Lc. 20.1-8)

<sup>23</sup> Ato askafata Nios kīfiti pexefā mēra ikikaini. Nā Nios kīfiti pexefā mēraxō ato tāpimanaino, nā ato Nios kīfixomisfāfe āto xanīfofo fe judeo anifofo fonifo. Akiki fōkaxō yōkanifo iskafakakī: “¿Tsōa mia nīchinimē? ¿Tsōa mia yoiamē mī iskafanō?” ixō yōkanifo.

<sup>24-25</sup> Askafaifono Jesús ato kemani: “Ēri mato yōkanō. Ea yoikapo ē nikanō. ¿Tsōa Juan nīchinimē ato maotisafakī

ato faka mēra ikimapakenō? Niospa nīchiyamakī yorafāfe nīchiniforaka. Akka mā ea kemaito, ēri mato yoikai tsōaōxō ē iskafaimākai.”

Ato askafaino, āa ranā mēenāpai fetsayanā. Shinānifo iskakakī: “Niospa Juan nīchini nō faito noko yoikī iskafatiro: ‘Ĝakka afeskakī mā Juan nikamismamē?’ noko fatiroki,” ikanax yoinānifo. <sup>26</sup> “Akka nō iskafatiroma: ‘Yorafāfe Juan nīchinifo,’ nō fatiroma. Nō yorafoki mesei keyokōichi shinākani Niospa shināmanaino Juan ato yoipaoni,” ikanax xanīfofo yoinānifo.

<sup>27</sup> Nāskakaxō Jesús yoinifo iskafakakī: “Nō tāpiama,” fai-fono Jesúsri ato kemani iskafakī: “Ēri mato yoima tsōa ea nīchinimākī ē iskafanō,” Jesús ato fani.

*Meka fetsafaxō feronāfake rafeōnoa Jesús ato yoini*

<sup>28</sup> Jesús ato yoini: “Meka fetsafaxō ē mato yoinō. Feronāfake fisti fake naetapa rafeya ini. Nāskaxō āfe fake iyoa yoini: ‘Ēfe tare ano kaxō ea yonoxotāfe,’ fani. <sup>29</sup> Askafaito āfe fāke kemani: ‘Ē kapaima,’ fani. Askafiax mā shināx kani.

<sup>30</sup> “Askata āfe fake chipokori yoini iskafakī: ‘Mīri kaxō ēfe tare ano ea yonoxotāfe,’ fani. Askafaito nāto kemani iskafakī: ‘Ia, epa. Ē yonotanōkī,’ fāfiax kanima. <sup>31</sup> Akka, ĝfatoto a āfe āpa fichipaiyai keskafakī axonimē?” ato faito, “Iyoato axoni,” fanifo. Nāskaxō Jesús ato yoini: “Ē mato pāraima. Nā xanīfo kori fīxomisfo fe, nā kēro chotaferomafo āto chaka xatekanax mā Epa Nios Ifofakōikani. Akka mā afaa afeskafaxoma mā Epa Nios Ifofaama. <sup>32</sup> Akka Juan ato maotisafamis oni ato tāpimaxiki afeskax mā itiromāki, Niospa fichipai keskara. Akka māakai Juan nikamisma. Akka nā xanīfo kori fīxomisfo feta nā kēro chotaferomafāfe nikakōinifo. Akka mātō chaka mā xateama mā afara fetsafo shināmis,” ixō Jesús ato yoini.

*Meka fetsafaxō Jesús ato yoini a ato yonoxomis chakafōnoa (Mr. 12.1-12; Lc. 20.9-19)*

<sup>33</sup> Anā Jesús ato yoini iskafakī: “Ea nikakapo ē mato meka fetsafaxō yoinō. Tare ifāfe āfe tare ano uva fanani. Fanaxō akiki keneakeni. Nāskaxō mai pōkini a mēraxō uva tsinīxiki. Askatari pexe keya fani anoxō kexexiki tsōa mēeyamanō. Mā askafakī fetsaxō ato ināni nā uva tare kexenōfo. Nāskata mai fetsa ari kani. <sup>34</sup> Akka nā fimimistīa mā āfe fanafo pachaiino, a yonoxomisfo nīchini a kexexonafo ato yōkaxō nā āfenā tiiri fixotanōfo. <sup>35</sup> Akka nā tare kexexonafāfe a xanīfo yonoxomis achikaxō fisti seteketsanifo. Askatari fetsari retenifo. Askatari fetsari tokirinī tsakaketsanifo. <sup>36</sup> Nāskakē tare ifāfe anā āfe inafō ichapakōi nīchini. Mā foafono nā tare kexem-isfāfe ato askari fanifo.

37 “Mā ato askafapaxō āfe fakekōi nīchini aōnoa shināchakatama, ‘Ēfe fake nikatirofokī,’ ixō. 38 Akka mā āfe fake kaito fichikanax nā tare kexemisfo aa ranā yoinānifo: ‘Nato āfe apa naano na fanafo fixii kiki. A nari retekape na āfe fanafo nōkonā inō,’ inifo. 39 Nāskakata achinifo. Mā achikaxō tare pasotai iyokaxō retenifo. 40 Akka, ¿mā tare ifo oxō a tare kexemisfo ato afeskafatiromē?” ixō Jesús ato yōkani.

41 Ato askafaito kemanifo: “Ato retetiro ato noitama yora chakafokē. Nāskaxō tare ifāfe yora fetsafo āfe tare inātiro, nāfāfe inānōfo nā āfenā tiiri mā āfe fana fimifo pachiano,” ixō yoinifo.

42 Nāskata Jesús ato yoini meka fetsafaxō: “¿Na kirika kenea anoa mā anemismamē? Iskafakī kenenifo:

Tokiri pexe fapaikakī nā pexe famisfāfe na tokiri chakara ixō potafiafono, fetsafāfe fichikaxō na tokiri sharakōi ikaxō akiki pexe fatirofo. Nāskarifiakī xanīfofofāfe, ‘Nakai afama,’ ikaxō Niospa Fake ōikaspamisfo. Askafafiaifono Niospa āfe Fake katonī nōko Ifo inō. Nāskakē nō akiki inimakōi, ixō kirika ano kenenifo,” Jesús ato fani.

43 “Nāskakē ē mato yoi, taeyoi Nios fe rafexō āfe meka mā ato yoiyomis. Askafixō mā ea nikakaspai. Nāskakē Epa Niospa fetsafo yoi āfe meka ato tāpimanōfo afeska faxō Nios Ífo sharakōifatiromakī. 44 Akka tokiriki fetsa pakeki aō xao teketiro. Akka tokiri yoraki pakekī yamakōi fatatiro. Nāskarifiakī ē Niospa Fakekōixō a ea nikakaspaifono ē ato omiskōimaxii,” ixō Jesús ato yoini.

45 Akka nā Nios ato kīfixomisfo āto xanīfofo feta fariseofāfe nikanifo Jesús meka fetsafaxō ato yoiaito. Nāskakaxō tāpinifo Jesús atoōnoa yoiaito. 46 Nāskakaxō achipainifo. Akka achipaifikani mesenifo yorafāfemāi chanīmara faifono Jesús Niospa meka ato yoimiskē. Nāskakē achinifoma achipaifikakī.

## 22

*Meka fetsafaxō Jesús ato yoini a feronāfake āfiyaino inimayanā piaifoōnoa yoikī*

*(Lc. 14.15-24)*

1 Anā Jesús meka fetsafaxō ato yoini iskafakī: 2 “A Epa Nios xanīfo ika ano iskaraki ē mato yoinō. Nikakāfe. Nā xanīfāfe āfe fake āfi fiaino fista axoxiki. 3 Akka xanīfāfe a yonoxomisfo nīchini ato yoitanōfo fenōfo. Akka mā fōkaxō ato yoiiaifono fekaspanifo. 4 Nāskaxō anā a yonoxomis fetsafo nīchini ato iskafayanā: ‘Ato yoikī iskafatakāfe: “Mā xanīfāfe āfe fāke āfiyaino mā itipinīsharakōi faa pixiki. Āfe fakka efapa mā ato retemana. Askatari fakka fake xoakōiari ato retemana. Mā

keyokōi itipinīsharafakī, kookāfe pixikakī,” ’ ato fani. <sup>5</sup> Akka ato askafaifono ato fe fekaspanifo. Fetsa āfe tare ari kani. Fetsari kani āfe afama mīshti minikai. <sup>6</sup> Atirifāfe nā xanīfāfe inafō ato achikaxō ato seteketsayanā ato retenifo. <sup>7</sup> Nāskakē xanīfō ōitifishkifinakōini. Nāskaxō āfe sorarofō nīchini a retemit-samisfo ato reteyanā āto pexefori ato kōakī mītōkakōitanōfo. <sup>8</sup> Nāskaxō xanīfāfe a yonoxomis fetsafo yoini ato iskafakī: ‘Mē itipinīshara faa ēfe fāke āfiyaino pixiki. Akka nā chakafo ē ato kenamanafo fekaspakōiafokī. <sup>9</sup> Akka māri fotakāfe nā pexe rasi ano. Nāria ato fichixō nā mā ōiaifo ato yoikāfe fenōfo pii fenōfo, ēfe fāke āfiyaino,’ ixō ato yoini. <sup>10</sup> Nāskakē a yonoxomisfo fai fētsa fonifo. Mā fōkaxō yora ichapafo fichikaxō ato efenifo. Yora sharafo efeta yora chakafori efenifo. Nāskakē xanīfāfe āfe fāke āfiyaino yorafo pexe fospikōinifo.

<sup>11</sup> “Nāskakē xanīfō pexe mēra ikikaini yorafo feaito itipinīsharafaxō ato rapati sharakōi ato ināketsani safenōfo āfe fāke fista akaino. Xanīfō ikikaini ato ōikai mā sharakōi safeketsafomakī. Akka fistichi rapati shara safea inima, chapokōi safea fichini. <sup>12</sup> Akka a rapati shara safeama fichixō yoini: ‘¿Afeskakī mī rapati sharakōi safeax mī oamamē ēfe fāke āfiyafiaino?’ Askafaino nā feronāfake tooxinima. <sup>13</sup> Nāskaxō xanīfāfe a yonoxomisfo yoini: ‘Na feronāfake otekere ata metexkeraxō fakishifā mēra potakāfe, anoax omiskōipakexanō eaiyanā,’ ixō ato yoini. <sup>14</sup> Nāskarifiāi Epa Niospa yora ichapa kenai a ika ano fenōfo nā āfe Fake Ifofaifo tii afe ipanakafo,” ixō Jesús ato yoini.

*“¿Xanīfō nō kori inātiromē noko yōkaito?” ixō Jesús yōkanifo  
(Mr. 12.13-17; Lc. 20.20-26)*

<sup>15</sup> Nāskata mā Jesús ato yoiaito nikakata mā fokanax farise- ofo yoinānifo: “¿Afeskaxō nō Jesús afara chaka yoimatiromē? Afara chaka noko yoiaito nō yōaxiki,” ikanax yoinānifo. <sup>16</sup> Nāskafakata āto inafō nīchinifo, Herodes āfe inafoya iskafakī yoitanōfo: “Maestro, mā nō tāpia mī chanīmakōi yoimis. Nā Epa Niospa noko shināmapaiyai keskarakōi mī noko yoimis yorafāfe mīōnoa afara chaka yoifiaifono. Afara mī yoipai mī ranomisma. Keyokōi nāskarafos mī ato yoimis. <sup>17</sup> Nāskakē noko tāpimasharafe. Akka chanīmamakī noko yoife na romanō xanīfō nō kopifatiromakī askayamakī nō kopifatiroma rakikīa,” fanifo. Jesús chakafamapaikakī askafanifo.

<sup>18</sup> Askafaifāfe ōikī Jesús tāpini feparapaiyāifāfe. Ato yoini: “Feparamisfāfe, ¿afara chaka mā ea yoimāpaimē eōnoa afara chaka yoipaikī? <sup>19</sup> Akka māto kori exe ea ispakāfe a aō mā xanīfō kopifamis,” ato fani. Ato askafaito kori exe fisti fōxonifo. <sup>20</sup> Nāskaxō Jesús ato yōkani: “¿Tsōa femānā na keskaramē? ¿Tsōa aneri na kori exe ano keneamē?” ixō ato

yōkaito, <sup>21</sup> kemanifo iskafakakī: “Nōko xanīfo César keskara,” fanifo. Nāskakē Jesús ato yoini: “Akka na kori exe Césarnākē César inākāfe, akka Niosnākē Niosri inākāfe,” ixō Jesús ato yoini.

<sup>22</sup> Ato askafaito nikakani, ratekōiyanā. “Kee. Āfe mekakai tsōa finōtiroma,” ikanax a makinoax fonifo ōifaikani.

*“¿Yora naax anā otoax afeskatiromē?” ixō Jesús yōkanifo  
(Mr. 12.18-27; Lc. 20.27-40)*

<sup>23</sup> Nāskatari afia pena fisti saduceofo fenifo Jesús ōifekani. Nā saduceofāfe yoimisfo iskafakakī: “Yora naaxkai anā afeskax ototiroma,” ixō shināmisfo. Nāskakaxō Jesús yōkai fekani fenifo iskafakakī: <sup>24</sup> “Maestro, Moisés yoini iskafakī: ‘Feronāfake naano āfe āfi feta fake akamax, one fētsa nā kēro fitiro, āfe āfi inō. Mā fixō afeta fake atiro āfe ōchi fake inō,’ ixō Moisés noko yoikī keneni. <sup>25</sup> Akka nō mia yoikī taefanō. Noko nikafe chipo noko yoixiki. Akka nā nane tii siete inifo, feronāfake. Āto ochi iyoa āfiyai taeni. Mā āfiyax afeta fake akamax nani. Mā āfe ochi naano chipokoto fini. <sup>26</sup> Nāskarifiyai nā chipokori nani afeta fake akamax. Nāskatari chipoko fētsari fini, nāri nani afeta fake akamax. Nāskakanax akikinoax nai keyonifo afeta fake akanamax. <sup>27</sup> Nāskata mā nai keyoafono nā kērori chipo nani. <sup>28</sup> Akka, ¿a yorafo mā otokaxō nai mēraxō, fatoto nā kēro fixiimē, nā fistimāi fipakaxō?” ixō yōkanifo.

<sup>29</sup> Askafaifono Jesús ato kemani: “Mākai afaa tāpiama. Nā kirika ano Niospa meka yoikī kenenifokai mā tāpiama. Nāskaxori Niospa akai keskara āfe sharaōxō ari mā tāpiama. Na mā ea fanīrira yoiyai,” ato fani. <sup>30</sup> “Akka yorafo nakanax anā otokanax anā āfiyatirofoma. Kērofori anā feneyatirofoma. Nāskakanax ājirifo keskara itirofo nai mēranoax. <sup>31</sup> Akka, ¿a yorafo naax otokiaifo Niospa yoini keskara, a kirika keneano mā ōimismamē? <sup>32</sup> Iskafakī Niospa yoini: ‘Ēfi mī xinifāfe āto Nioskōiki, Abraham ikaino Isaaca ikaino Jacobo ikaino,’ ixō Niospa yoini. Akka yorafo mā nafiafono naafoma keskara Epa Niospa ato ōimis. Niospa yoini iskafakī: ‘Ēkīa āto Nioskōi,’ ixō Niospa yoini.” Nāskara Jesús keyokōi ato yoini.

<sup>33</sup> Saduceofāfe nikanifo Jesús ato askafaito, “¡Airal! ¡Nikakapol! Jesús sharakōi yoi,” ikanax yoinānifo.

*“Akka, ¿fato meka sharafinakōiamē, nā Niospa shināmanaino Moisés ato yoiniraka?” ikaxō fariseofāfe Jesús yōkanifo  
(Mr. 12.28-34)*

<sup>34</sup> Nāskakē saduceofo Jesús ato meka xatemanaito nikakaxō fariseofo ichanākanax Jesús ano fenifo. <sup>35</sup> Akka feronāfake fisti a Moisés yoikī kirika keneni keskara ato tāpimamis ini. Nāato Jesús fanīrira kemamapaikī yōkani, <sup>36</sup> “Maestro, ¿fato meka

sharafinakōiamē, nā Niospa shināmanaino Moisés keneniraka sharafinakōia?” faito,

<sup>37-38</sup> Jesús yoini iskafakī: “Moisés yoikī taefani iskafakī: ‘Nōko Ifo Nios noikōikāfe nōko ōitifoyaxō, nōko māpori shināsharakōita, nōko yōshi sharafoyaxori.’ Nā mekafi sharafinakōiakī nā Moisés yoini keskara. <sup>39</sup> Nāskatari nā ē mato taefakī yoia keskarakōiri nāno fetsari, a mia chaima nikari noisharafe a mīa mī noimeai keskafakī ixō Moisés keneni. <sup>40</sup> Moisés noko yoini keskai afeskax nō shara itiomākī. Askatari a Niospa meka yoimifāfe yoinifo keskai afeskaxri nō askatiromākī. Akka nō askasharapai nā meka rafe nikakōisharax nō askasharakōitiro,” ixō Jesús ato yoini.

*“Akka, ¿tsōa fenamē Cristo?” ixō Jesús ato yōkani  
(Mr. 12.35-37; Lc. 20.41-44)*

<sup>41</sup> Fariseofo afe ichanāyoafono, <sup>42</sup> Jesús ato yōkani: “Akka, ¿nā Niospa katoa nā Cristoōnoa, afaa mā shināmē? ¿Tsōa fenamē?” ato faito kemanifo: “David āfe fenakīa,” fanifo. <sup>43</sup> Nāskata Jesús ato yoini: “David Niospa Yōshi Sharapa shināmanaino nōko Ifo Cristoōnoa kirikakī keneni iskafakī Cristo oyoamano. Ē mato yoinō mā shinākōinō:

<sup>44</sup> Epa Niospa ēfe Ifo yoini iskafakī: ‘Mī efe xanīfokōi ĩpanakaki. Akka nā mia noikaspaifo mī ato finōkōinō ē ato mīnāmā nīchikai,’  
ixō Epa Niospa yoinino David kirika keneni.

<sup>45</sup> “Akka, ¿afeskai Cristo David āfe fena itiomē, nā David Cristo ēfe Ifora fafiapaonino?” Jesús ato fani.

<sup>46</sup> Ato askafaino nikakakī tsōakai pishta kemanima. Nāskakē akiki ranokakī anā tsōa afaa pishta yōkanima.

## 23

*Jesús ato yōani fariseofoya a Moisés yoini keskara ato tāpimamisfo*

*(Mr. 12.38-40; Lc. 11.37-54; 20.45-47)*

<sup>1</sup> Mā askafata Jesús yorafo yoini aōxō tāpimisfoya: <sup>2</sup> “A Moisés yoikī kirika keneni keskara ato tāpimamisfo feta fariseofāfe a Moisés yoini keskara mato tāpimakani. <sup>3</sup> Akka ato nikakāfe. Nā mato yoiaino keskara akāfe. Akka nāfāfe nā yoiaino keskara akanima. Nāskakē nā yoiaino keskara akātama afara fetsafo amisfo. Nāskakē māri ato keskara iyamakāfe.

<sup>4</sup> Āto patoronō ato yoitiro iskafakī: ‘Na efekōi pefexō fōtakāfe,’ ato fafiāxō ēri foyoikanō ato fatiroma. Nāskarifiakī a Moisés keneni ato tāpimamisfo feta fariseofāfe mato afara fekaxkōi yoimisfo afeskax Epa Nios fe mā itiomākī Epa Nios matoki inimanō ikaxō. Nāskafikaxō mato afara axosharamisfoma. <sup>5</sup> Afama mīshti sharafo apaikani yorafāfe noko ōinōfora ikaxō



kakapaiyanā. Niospa meka kirikaki kenekata koiro kafo pishta fakāta a mēra Niospa meka nanekaxō āto fishpi ano nētamisfo. Askatari āto pōya anori nētamisfo. Askatari tari kepanātia chainipa safemisfo sharakōira noko fanōfo ikaxō. <sup>6</sup> Askatari sharakōi anoxō pipaimisfo, askatari tsaoti sharakōi anori tsaopaimisfo ichanāti pexe anoax, keyokōichi noko ōinōfora ikanax. <sup>7</sup> Nāskakata nā yora ichapa rasi ano fopaikani noko finōkakī noko yoisharakakī, ‘Maestro noko fanōfora,’ ikanax.

<sup>8</sup> “Akka mā, ‘Maestro, noko fakāfe,’ ato fayamakāfe. Akka keyokōi mā yora fisti keskara. Tsoa fetsakai finama. Akka māto Maestro fisti finakōiaki. <sup>9</sup> Nāskakē iskaratīa nono mai anoxō tsoa Ēpa fayamakāfe. Akka nōko Epa Nioskōi nai mēra ikaki. Nā fisti Epa nō fatiroki. <sup>10</sup> Askatari tsoa ifofayamakāfe. Akka nā Epa Niospa katonni fisti na Cristo fisti mā Ifofatiro. <sup>11</sup> Nā fatora fetsa xanīfo ipai nā ato yonoxomis keskara itiro. Nāskaxō ato afara axosharatiro. <sup>12</sup> Akka fatora fētsa ato finōpaiyaito a keskara Niospa ato nāmā nīchitiro anā afaa inōma. Akka a shināi is kai: ‘Ēkai afama, ē fetsafo finōpaima, ē ato keskarama,’ ixō shināito Niospa fetsafo finōmainīfofā sharakōi nīchitiro,” ixō Jesús ato yoini.

<sup>13</sup> Nāskata Jesús a Moisés yoikī kirika keneni keskara ato tāpimamisfoya fariseofo yoini iskafakī: “Moisés meka ato tāpimamisfāfe, māri fariseofāfe ea nikasharakāfe. Māfi ato pārāpaimiski. Mākai a mā yoia keskara mā ato yoimisma. Mā ato xītimis Epa Nios Ifofayamanōfo. Māri mā Nios Ifofamisma. Nā Nios Ifofapaiyaifo mā ato xītimis. ¡Ooa! Epa Niospa mato fāsi omiskōimaxii.

<sup>14</sup> “¡Ooa! Mā omiskōikai, Moisés meka ato tāpimamisfāfe fariseofo fe. Mā ato yoimiski iskafakī: ‘Nō mato afara shara faxōira,’ ixō mā ato pārāmis. Akka kēro ifomafa mā pāraxō mā pexe fīamis. Nāskaxō mā Nios kīfikī mā chaikōi kīfimis yorafāfe sharakōi shinānōfora ixō. Nāskakē Epa Niospa mato fāsi omiskōimaxii.

<sup>15</sup> “¡Ooa, a Moisés yoikī kirika keneni keskara ato tāpimamisfāfe, mā omiskōixii fariseofo fe! Akka mā judeofoma ari kafāsamis ato yoikai noko keskara inōfora ikax, nō mato Niospa meka tāpimanōra ixō. Askafixō mā ato yoisharamisma. Nāskakē mato nikakanax mato keskarari ikani kiki. Mā chakakōifo nāfori chakafinakōia ikani kiki. Nāskakē mā nakanax Epa Nios ari foxikanima. Mato fe nā omiskōipakenakafo mēra foxikani.

<sup>16</sup> “¡Ooa! Niospa mato omiskōimaxii, mā ato mēstekōi yoimiskēma. Mā tāpamafixō mā ato paramiski ato tāpimapaikī. Mā fēxo keskarakī fēxo afe fēxo iyoikai nā rafe fenotirofo. Nāskarifiakī Niospa meka anoriyamafiano mā ato paramiski

iskafakī mā ato yoikī: ‘Ē mato paraima. Nāskakē ē mato yoi, nā ē mato yoioa keskara ē ayamaito Nios kīfiti pexefānē ea omiskōimatiro,’ mā imis. ‘Akka nā Nios kīfiti pexefā aneōxō mā yoioa keskafakī mā ato axoyamaxō shināchakayamakāfe. Askafixō nā Nios kīfiti pexefā mēranao oro aneōxō mā ato yoioa keskafakī ato axokāfe,’ ixō mā ato yoimis. <sup>17</sup> Mā tatimakōifo, askatari mā fēxo keskarakōifo. Akka, ¿fato shara-finakōiamē? Nā Nios kīfiti pexefā mēranao oro raka sharafinakōia, askayamai Nios kīfiti pexefā raka sharafinakōia. Akka oro ares rakax shara itiroma. Akka Nios kīfiti pexefā mēramāi rakax shara itiro.

<sup>18</sup> “Nāskarifiakī, ‘Nā ē mato yoioa keskara ē ayamaito nā a kamakixō yoinā koati mīsamāfānē ea omiskōimatiro,’ ixō yoimisfo. Akka mā fariseofāfe, anorima mā ato yoikī iskafamis: ‘Nā mīsamāfā aneōxō mā ato yoioyomis keskafakī mā ato axoyamafixō shināchakayamakāfe. Askatari nā mīsamāfā kamakixō yoinā koaki nā yoinā aneōxō mā ato yoioyomis keskara akāfe,’ ixō mā ato yoimis.

<sup>19</sup> “Akka mā fēxo keskarakōi. Akka, ¿fato sharafinakōiamē? Nā afarafo mā Nios ināi raka sharafinakōia, askayamai a kamakixō yoinā koati mīsamāfā raka sharafinakōia. Akka nā yoinā ina ares shara itiroma. Askafixō nā shara, māmāi mā Nios ināno mīsamāfā anoxō koakī. Nāskakē nā yoinā inapa nā koati mīsamāfā finōama. <sup>20</sup> Akka nā koati mīsamāfā aneōxō afara yoiaito nā koati mīsafā fistiōnoa aneima. Akka nā mīsamāfā kamaki rakaōnoari yoi. <sup>21</sup> Akka nā Nios kīfiti pexefā aneōxō afara yoikī Nios kīfiti pexefā fistiōnoa yoima. Akka Niosri a mēra ikano mā yoi. <sup>22</sup> Akka nā nai aneōxori mā afara yoikī, nai fistiōnoa mā yoima. Nā Nios Xanīfo nai mēra ika anoafori mā yoi.

<sup>23</sup> “¡Ooa, a Moisés yoikī kirika kenei keskara ato tāpimamisfāfe fariseofo feta! Ea nikakapo. Māfi ato parapaimiski. Māto afama mīstififo mā Nios ināpaifiki a Niospa afara fetsa yoia keskara mā shināmisma. Mā māto fana mīstififo nā korātorofo fana fetsa mīstifori mā Nios ināmis. Akka fetsafo mā ato yonomaxō afara fichipaifiaifāfe mā ato noikima mā ato afaa ināmisma. Epa Niospa yoini keskafakī mā ato noima. Akka a mā yoiai keskara tsōa māto meka chanīmara fatiroma. Nāskaxō māto fana mīstififo mā Nios ināfikī a Niospa yoia keskara mā shināima. <sup>24</sup> Akka mā nā fēxo afe fēxo iyotiroma keskarafifo. Nāskarifiakī māri mēstekōi shināsharaima yorafo Niospa meka tāpimapaifiki. Nāskaxō afara sharakōifo mā ato tāpimasharamisma. Akka afara sharama mā ato tāpimamis. Akka nāpe pishta māto kecho mēra naneeano, mā fixō mā potamiski. Akka nā camello efapakōi mā potakaspakī mā ayamis.

25 “¡Ooa, a Moisés yoikĩ kirika keneni keskara ato tãpimamisfãfe fariseofo feta! Mã ato parapaimiskõi. Akka mãto kecho yafi mãto sapa femãkĩa fisti chokasharafikĩ, oke mërakai mã chokasharamisma, nachoshtax pisikõi itiro. Nãskarifiakĩ mã yorafo õimapai nafo sharafora noko fanõfora ixõ. Akka mãto shinã mëraxõ mã shara shinãyamafikĩ, oa choshta pisi keskaraxõ. Nãskaxõ afarafo mã ato fiamis fetsafo ratexõ. Askatari mareskõi mã shinãkĩ, ichapakõi fichipaikĩ mã icha icha famis. Nãskakẽ Epa Niospa mato omiskõimakõixii. 26 Fariseofãfe, mãkai mëstekõi shinãsharamisma. Akka iskaratĩa mãto shinã mëraxõ shinãsharakãfe, isharakõixikakĩ. Anã afaa chaka shinãkakima. Nãskaxõ mã yorafo ikisharakõitiroki.

27 “¡Ooa, a Moisés yoikĩ kirika keneni keskara ato tãpimamisfãfe, fariseofo feta! Mãfi ato parapaimiski. Mãfi nã mafa kini keskaraki. Akka mafa kini femãkĩa oxo sharakõi nõ õifiaino oke mëra sharama. A namisfãfe ato xaofu fospikõia pisia fetsa fetsatapafo. 28 Nãskarari shara keskara yorafãfe mato õikani. Akka mãto shinã mëraxõ mã shara shinãima. Afara chakakõifo mã shinãmis, ato mã parakõimis.

29 “¡Ooa, a Moisés yoikĩ kirika keneni keskara ato tãpimamisfãfe, fariseofo feta! Mã ato parapaimis. Nãskakẽ Niospa mato omiskõimakĩ finakõixii. Nã mãto xinifo a Niospa meka yoimisfo fetsafãfe ato retenifo maiayo ano mã tokiri famis a mãto xinifo namisfo ato shinãxikĩ. Nãskaxori a maiayo mãnão charofori mã famis yorafãfe õikakĩ na mëra sharakõira fanõfora ixõ. 30 Nãskaxõ mã yoimis iskafakĩ: ‘Nõko xinifãfe a Niospa meka ato yoimisfo retenifo keskafakĩ nõri niyoxõ nõ ato retekeranima,’ ixõ mã yoimis. 31 Akka nã mã yoiai keskara chanĩma. Mãto xinifãfe ato chakafakĩ ato retenifo. Mãri ato keskarakõifo. 32 Nã Niospa matoki nĩchiari mã retexii. Akka nã mã apaiyai keskafakĩ ayotakãfe.

33 “Mã afara chakafa fafãfãini. Nãskakẽ mã rono keskarafu. Mã chakafa fafãfãini. Mã rono paekapato fake keskarakõifo. Nãskakẽ mã omiskõipakenakafu mëra mã kaxii. Akka afeskax mã faki ichotiroma. Askatari tsõakai mato nëtefatiroma. 34 Nãskakẽ a Niospa meka yoimis ã matoki nĩchikai. Askatari a Niospa meka tãpisharakõixõ shinãsharakõimisno ã nĩchikai. Nãskatari a Moisés yoikĩ kirika keneni keskara ato tãpimamisfori ã matoki nĩchixii. Nãskakẽ atiri mã ato retexii. Askatari fetsafori ifi cruz ikaki mã ato mastaxii nanõfo. Askatari fetsafori mãto ichanãti pexe mëraxõ mã ato koshaxii. Nãskakĩ mã ato omiskõimakõixii. Nãskaxori fetsafori mã ato chĩfafafãsa faxii ato omiskõimayanã. 35 Nãskakẽ Epa Niospa matori omiskõimaxii nã mãto xinifãfe nã yora sharafo retenifono. Akka taefakĩ nã Abel sharafiano ãfe õchi reteni. Askatari fetsafori sharafafono ato retenifo. Chipori mã xini

ichapa finõano nã Zacarías, Berequías fake, mãto xinifãfe retenifo. Nã Zacarías feronãfake sharafiano Nios kīfiti pexefã chaimashtaxõ koati mīsamãfã nakirafexõ retenifo. Nãskakē Niospa atoõxõ mato omiskõimaki finakõixii. <sup>36</sup> Akka chanĩma ẽ mato yoinõ. Na yorafo iskaratĩa niyoafo Niospa ato omiskõimaki finakõixii,” ixõ Jesús ato yoini.

*Jesús Jerusalén anoafo ato shinãi oiani*

*(Lc. 13.34-35)*

<sup>37</sup> Anã Jesús ato yoini iskafakĩ: “¡Ooa, Jerusalén ano ikafãfe! Mãfi a Niospa meka yoimisfo mã ato retemiski. Askatari aõnoa ãfe meka shara yoitanõfo Niospa mato ano nĩchiafori mã ato tokorinĩ tsakakĩ retemis. Oa takaranã ãfe fakefo ãfe pei nãmã onetiro keskafakĩ ẽ mato kexepaifiaito mã ea nikakaspamis. Mãfi ekeki omismakĩ ẽ mato ĩkipanã. <sup>38</sup> Akka õikapo, iskaratĩa anã tsõa mato kexeima nã mã imis anoa. <sup>39</sup> Ẽ mato yoinõ, iskaratĩakai mã ea anã õima. Nã ẽ oaitĩa mã ea õixii. Nã ẽ nai mẽranoax ẽ oaitĩa mã yoikĩ iskafaxii: ‘Nafi Niospa nokoki nĩchia. Fãsi sharafinakõia Epa Niospa na shara fapanaka,’ ixõ mã eõnoa yoixii,” ixõ Jesús ato yoini.

## 24

*Jesús ato yoini: “Na Nios kīfiti pexefã pãõixii,” ixõ*

*(Mr. 13.1-2; Lc. 21.5-6)*

<sup>1</sup> Nãskata Jesús Nios kīfiti pexefã mẽranoax tsekekainaino, aõxõ tãpimisfo akiki fẽkaxõ yoinifo iskafakakĩ: “Ifo, õipo. Nõko Nios kīfiti pexefã sharakõi,” fanifo. <sup>2</sup> Askafaifono Jesús ato yoini: “Na mã õiai, akka ẽ mato pãraima anãkai tokirifo pet-sanãmẽxima, keyokõi pãõixii. Na tokirifori maui fetsexii,” ato fani.

*Afaa afeskaximãkai mã chaima nõko mai keyoaino Jesús ato yoini*

*(Mr. 13.3-23; Lc. 21.7-24; 17.22-24)*

<sup>3</sup> Askata fonifo mãchifã Olivos ano. Nãno Jesús tsaoni. Nãskakē aõxõ tãpimisfo akiki fonifo yõkaxikakĩ iskafakakĩ: “Nõ tãpipai mĩ noko yoinõ afetĩa iximẽ a mĩ yoiai keskai. Afeskaxõ nõ tãpitiromẽ a mĩ anã oxiai mã mai keyoaino noko yoife,” fanifo.

<sup>4</sup> Askafaifono Jesús ato kemani: “Kexemesharakani mã ato nikaino mato afara chakafamatirofoki. <sup>5</sup> Yora ichapa fẽkaxõ, ‘Ẽ Cristora,’ ixõ mato paraxikani. <sup>6</sup> Nãskaxori mã nikaxii yorafo retenãifãfe chai inoax. Nãskatari nonoaxri askaxikani retenãkani. Askara õi, rateyamakãfe. Nã ẽ mato yoimis keskakõi kiki. Nãskafiax nõko mai fena keyoxima kiki, chipo ixii. <sup>7</sup> Akka yorafo mai fetsa anoax mẽenãpaiyaifono yora fetsafori mai fetsa anoax retenãxikani. Askatari fonãiki

finakōixikani afaa pikanima. Nāskatari nā mai fetsa anoax mai naya naya ixii. Askatari pae finakōia fetsa fetsatapafo nokoxii kiki. <sup>8</sup> Akka taei nā omiskōiaifo, askai fetsexii.

<sup>9</sup> “Nāskata mato achikaxō fetsafo mato ināxikani mato omiskōimanōfo. Nāskaxō mato retenōfo. Nāskaxō keyokōi nā mai tio anoxō eōxō mato noikaspaxikani. <sup>10</sup> Nāskatari yora ichapafāfekai ea anā chanīmara fakanima. Nāskakanax āa ranā noikaspā faatanāxikani. Nāskakaxō yora fetsa yōsixikani ato achinōfo. <sup>11</sup> Nāskatari yora ichapafo āa chanīxikani iskakani: ‘Ea Niospa shināmani kiki ē Niospa meka mato yoinō,’ iki āa chanīxikani. Nāskaxō yora ichapafo ato pāraxikani. <sup>12</sup> Nāskaxō ato chakakōi faxikani. Ato noimisfo keskakafā atirififāfe anā ato noisharaxikanima. <sup>13</sup> Akka nā ea shināmāxixoma ea shinākōiai nāfi ēfe Epa Nios fe ipaxatiroki. <sup>14</sup> Nāskakē na meka shara Jesúsnoa nikaxakani Jesús noko nāxonikē Epa Nios xanīfo anoax nō afe ĩpaxanō. Na maifo tii ano ato yoiāifono, chipo nōko mai keyoxii.

<sup>15</sup> “Nā Niospa meka yoimisto Daniel a inōpokoai yoikī keneni iskafakī: ‘Nios kīfiti pexefā mēra afara chakakōi faxikani,’ ixō kirika keneni. Nāskakē na kirika kenea anexō tāpikāfe. <sup>16</sup> Nā chakafinakōia ōikanax, nā Judea anoafō machi keya ano ichorisatakāfe. <sup>17</sup> Askatari āfe pexe māmākīa tsoxō ato fichiax koshikōi fotopakekafā āfe afaa fiamax ichotiro. <sup>18</sup> Askatari a āfe tare ano yonoaito anā oxō āfe rapati fitiroma. <sup>19</sup> Askatari a kēro fake naneafo fe a fake yome pishta chocho amaifo omiskōixikani māmāi yorafo omiskōifinakōiaifono. <sup>20</sup> Akka Epa Nios kīfikāfe iskafakī: ‘Epa Niosi, noko omiskōimayamafe nōko pena tenetitīa askayamai yōtaino matsi meexikakīma,’ ixō yoikāfe. <sup>21</sup> Askatari a omiskōiaifo nokoxii, taeyoi askakatsaxakīma. Nā Niospa yora onifakī taefanitīa tsōa askara ōiyomisma. Askatari anā tsoa chipo omiskōinakama. <sup>22</sup> Akka a omiskōiaifo nōko Ifāfe xateyamano, tsoa nikeranama nai keyokeranifo. Akka afe yorafo ato noikī omiskōinōfoma xateni atomāi katonixakī.

<sup>23</sup> “Akka fētsa mato yoikī iskafaino: ‘Ōikapo, nakīa Cristo,’ mato fayana, ‘Oa onokīa, ōikapo,’ mato faito nikayamakāfe. <sup>24</sup> Akka nā chanīmisfo fekani, ē Cristora ixikani, nāfo nō Niosxō nō mato yoirā ikani. Nāskakaxō tsōa atiroma keskara fakani Satanās yōshixō mato parapaikakī. Nā Niospa ato katoafori nāfo ato parapaikani. <sup>25</sup> Mē mato yoikai iyoamano shināsharakāfe. <sup>26</sup> Nāskakē mato parapaikani: ‘Cristo mā tsōa istoma ano oa,’ ikaxō. Nāskakē ari foyamakāfe. Askatari mato iskafakani: ‘Ōikapo, na Cristo na pexe mēra,’ mato faifāfe ato nikayamakāfe. <sup>27</sup> Akka nā kana peikī fafetanaito nō ōitiro keskara, nāskarīfai ē oxii xafakīakōi ea ōixikani ē oaito. <sup>28</sup> Akka

nā naafo ano ishpifo ichanātiro. Nāskari fakī keyokōichi ea tāpīxikani ē oaito,” ato fani.

*“Niospa Fake fotoaino afe keskara iximākai,” ixō Jesús ato yoini*

*(Mr. 13.24-37; Lc. 17.26-30, 34-36; 21.25-33)*

<sup>29</sup> Anā Jesús ato yoini iska fakā: “Akka nā penatari, nā omiskōiaifo mā keyoano, xini fakishkōi ixii, ōxeri anā chaxaxima. Fishifori nai mēranoax pakei fetsexii, askatari nā nai mēranoafo naya naya iki fetsexii. <sup>30</sup> Nāskatari ōixikani nai mēranoax afara afeskaraito mā tāpinō ē fotoaitīa. Nāskatari keyokōi nā maitio anoax ratei fetseyanā oiaxikani. Nāskatari ea ōixikani ē nai mēranoax nai kōinī fotoiyoaito. Ē shara fi-nakōia ēfe shara ōnoax ē fotoaito ea ōixikani. <sup>31</sup> Nāskatari ēfe ājirifori ē yoixii āto maneti fāsikōi manekakī chāi chāisafanōfo a nikakanax efe yorafo a ē ato katoa ichanānōfo. Chai inoax fisti rasi efe yorafo fexikani nāno fistiax ichanāxikakī.

<sup>32</sup> “Akka shinākapo ē mato yoinō. Mā yōkkafiaino mā tāpitiro āfe pei sirikiaito. Nāskakē āfe peifo keyopakeaito ōikī mā tāpitiro māmāi chaima xiniāito. <sup>33</sup> Nāskarifiakī afarafo afeskaraito ōikī mā tāpitiro mē chaima oaino askai fetsexii. <sup>34</sup> Ē mato pāraima ē mato yoikōi, na ē mato yoiai keskara nono mai anoxō yorafāfe nayokaxoma ōiyokani. <sup>35</sup> Akka nai fe mai keyoi. Akka ēfe meka fisti keyonakama, nā ē mato yoiai keskakōi.

<sup>36</sup> “Afetīara nai mēranoax ē oxii tsōakai tāpiama. Nā ājirifāfe nai mēra ifiakaxō tāpiafoma. Ērikai tāpiama. Ēfe Epa Nios fistichi tāpia. <sup>37</sup> Akka nā Noé niyoano ini keskai, nāskarifiaxii ē anā oaino. <sup>38</sup> Nāskata fakafānē ato maiyoamano, Noé kanōanāfā mēra ikini, yorafo pikāta, ayakāta fīanākāta ikai-fono. <sup>39</sup> Akka tsōa shināyamaino mā faka faipafaxō keyokōi ato āsakī mitokōini. Nāskarifiaxii ē oaino ea shinātama afara chakafaifono. <sup>40</sup> Nāskatari feronāfake rafeta āto tare ano yonokani. Fetsa ea ari kai yamarisatatiro. Akka fetsa nēteti-ro nā omiskōipakenakafo mēra kaxiki. <sup>41</sup> Nāskarifiāi kēro rafeta xiki renokani. Fetsa ea ari kai yamarisatanaino akka fetsa nēteti-ro nā omiskōipakenakafo mēra kaxiki.

<sup>42</sup> “Nāskakē itipinīsharakāfe oa mā moinākafanai keskakāfe. Akka mā tāpiamaki afetīara ē anā oxikai. <sup>43</sup> Nāskakē māri nā keskara tāpisharakāfe. Akka pexe ifāfe mā tāpīxō afetīa yometso nokoimākai ixō āfe pexe itipinīshara fatiro mā moixō, a mēra ikiāx yometsoyamanō. <sup>44</sup> Nāskarifiāi māri itipinīsharakāfe. Akka oimara ixō mā ea manayamaino ē matoki nokorisatani,” ixō Jesús ato yoini.

*Ina shara yafi ina chakaōnoa Jesús yoini  
(Lc. 12.41-48)*

45 Anā Jesús ato yoini iskafakī: “Ē mato yoinō afe keskaramākī a yonoxomis shara mā tāpinō. Xanīfāfe mai fetsa ari kakī, a yonoxomis āfe pexe ano nīchifaini nānoxō a yonoxomis fetsafo a piaifo pena tii ato ināfafainō. 46 Mā mai fetsa ari katani oxō ōitoshini a yonoxomisto mā yonoxosharakōiano. Nāskakē akiki inimakōini a yonoxomisri inimakōini māmāi yonoxosharakōiax. 47 Ē mato paraima. Nāskaxō āfe xanīfāfe mā xanīfo imaxō āfe afama mīstiffo kexexonō inātiro. 48 Akka nā yonoxomis chakapa shinātiro: ‘Ēfe xanīfo fena oimara,’ ixō. 49 Nāskaxō a yonoxomis fetsafori ato seteketsani. Askatari nā pāemisfo fe rafexō ato feta piyanā askatari ato feta ayayanā. 50 Iskaratīa ēfe xanīfo oimara ixō manasharayamaino nā penata āfe xanīfo nokorisatani. 51 Mā oxō nā yonoxomis omiskōimaxii. Nā yora keparanāmisfo fomisfo mēra potaxii. Nāskakē anoax oiayanā omiskōipakenaka,” ixō Jesús ato yoini.

## 25

### *Meka fetsafaxō Jesús ato yoini diez xotofake xomayaōnoa*

1 Anā Jesús ato yoini iskafakī: “Ē mato yoinō meka fetsafaxō mā tāpinō ē anā oxii a Nios Ifofaafōnoax afe keskara ixikanimākai. Akka nā diez xotofake xomayafāfe āto rāpari fifaikani fonifo. Feronāfāke rama āfiyaino afe fista mēra foxikakī manai fokani fonifo. 2 Akka nā cinco xomayafāfe shināsharanifoma, itipinīnifoma. Akka nā cincofāferi shināsharanifo. 3 Akka nā shināsharaifāfema āto rāpari foiyakakī āto kirosī fonifoma anā fospifaxikakima. 4 Akka nā shināsharakōiaifāfe āto manishomoki kirosī fonifo. Askatari āto rāpari fonifo. 5 Akka feronāfake fena nokoyamaino, mā fakishaino, oxakatsa ikani. Nā kēro xomayafo oxanifo. 6 Nāskakē yame nakekafanaino nikanifo kenāifāfe iskaifono: ‘jMā nā feronāfake oi kiki! jMoinīfōfākāfe, ifixikaki!’ ato faifono. 7 Nāskakē nā kēro xomayafo moinīfōfākata itipinī fakī fetsanifo āto rāparifo ōtaketsakakī. 8 Nāskata nā cinco xotofake shināsharaifāfema nā cinco xotofake shināsharaifo āto kirosī pishta yōkanifo: ‘Noko kirosī pishta inākāfe. Nōko rāpari otasharaima kiki,’ ato fanifo.

9 “Ato askafaifono nā xotofake shināsharaifāfe ato kemanifo ato iskafakakī: ‘Maa. Nō mato inātiro, nōri afaa otatiroma. Akka mā kaxō fitiro a kirosī miniaifo anoa fitakāfe mātonā faxikakī,’ ato fanifo. 10 Akka nā cinco xotofakefāfe kirosī fiifōfāfono nā manaifo feronāfake nokoni. Nāskakē nā cinco xotofakefo shara shināmisfo nā feronāfake mā nokoaino afe pexe mēra ikinifo afeta fista ayanā pixikāki. Nāskakaxō pexe fepoti feponifo. 11 Nāskano nā xotofakefo kirosī fitakanī anā fenifo. Mā fēkaxō iskafakī yoitoshinifo: ‘Xanīfo, noko fepoti

fēpexōfe nō ikikanō,' faifāfe, <sup>12</sup> ato kemani: 'Maa. Ēkai mato ōimisma, ē mato ikimatiroma,' ato fani.

<sup>13</sup> "Nāskarifiakī māri isharakōixō ea manasharakōikāfe. Afetiara ē anā matoki oxikai tsōa tāpiamaki," Jesús ato fani.

*Meka fetsafaxō koriōnoa Jesús ato yoini*  
(Lc. 19.11-27)

<sup>14</sup> Anā Jesús ato yoini iskafakī: "Ē anā mato yoinō Nios xanīfo iskaraki. Feronāfake mā mai fetsa ari kakī a yonoxomis kenaxō yoini āfe kori kexexonō. <sup>15</sup> Akka a yonoxomis fetsa ināni cinco mil. A yonoxomis fetsari ināni dos mil, fetsari ināni mil. Akka nā kori kexekī tāpia ichapa ināni. Akka a kori kexekī tāpisharafomari ichapa ato inānima. Nāskax kani mai fetsa ari. <sup>16</sup> Akka āfe ina fetsa nā cinco mil fiato nā kōri afama mīshti fini. Nāskaxō anā cinco mil fini āfe afama mīshtiōxō. <sup>17</sup> Nāskafakīri nā dos mil kori fiato nāatori nāskarifani afianā dos mil kori fikī. <sup>18</sup> Akka nā mil kori fiato nāato kori oneni āfe xanīfo mekexokī. Mai kini mēra maifani.

<sup>19</sup> "Akka mā samarakax anā oni āto xanīfo. Mā oxō a yonoxomisfo nā tres ato yōkani afe tii kori fixofomākī. <sup>20</sup> Nāskakē nā cinco mil kori fini akiki oi taeni. Nāskaxō āfe xanīfo kori ināni iskafakī yoiyanā: 'Xanīfo, mī ea cinco mil kori ināti. Akka ē finōmainīfofā anā cinco mil faxō ē fia. Ōipo. Nakīa mī kori,' fani.

<sup>21</sup> "Askafaito āfe xanīfāfe yoini: 'Aicho, mī ea yonoxomis sharakōi. Nā pishta ē mia ināoxō mī yonosharakōia. Nāskakē ēfe afama mīshtifo ichapakōi ē mia anā ināni mī ea kexexonō. Nāskakē nā ē inimai keskariai mīri inimafe,' ixō yoini.

<sup>22</sup> "Nāskatari a yonoxomis fetsari chipo oni, nā dos mil kori fini. Oxō yoini iskafakī: 'Xanīfo, mī ea dos mil kori ināni. Akka ē finōmainīfofā anā dos mil faxō ē fia. Nakīa mī kori,' fani. <sup>23</sup> Nāatori askafaito āfe xanīfāfe yoini: 'Aicho, mī ea yonoxomis sharakōi. Nā ē mia ināoxō mī yonosharakōia. Nāskakē ēfe afama mīshtifo ē mia anā kexemani. Nāskax mīri nā ē inimai keskariai mīri inimafe,' fani.

<sup>24</sup> "Nāskata a yonoxomis fetsari oni nā mil kori fini. Mā oxō āfe xanīfo yoini: 'Xanīfo, ē tāpia mī feronāfake mitsisipakōi. A mī fanama ano a mī fimis. Askatari a mī saakama ano afori mī fimis. <sup>25</sup> Nāskakī ē mesekī ē mia kori maifaxōa. Nakīa mī kori,' faito āfe xanīfāfe kemani: <sup>26</sup> 'Mī ea yonoxomis chakakōi. Askatari mī xanikōi. Akka, ¿mī shināmē a ē fanama ano afo fita, a ē saakama ano afori ē fimis? <sup>27</sup> Nāskakī nānori mī shinākī mī kori banco ano ea fāxōama anā oxō ē kori ichapa fikerana mā ēfe kori ichapano ē anā fikerana,' fani. <sup>28</sup> Nāskaxō nā ano afo ato yoini: 'Nā feronāfake nā mil kori fiakāfe fetsa ināxikakī nā kori diez milya,' ato fani. <sup>29</sup> Akka nā afara ichapaya ichapayakōi itiro. Nāskaxori āfe afara ranāri anā meketiro. Akka nā afaa ichapayama āfe afara fiatiro anā



afaa ichapaya iyamanō. <sup>30</sup> Nāskata a yonoxomis chaka mā potaxō fakishifā mēra nīchini nā fakishi mēranoax oiaiyanā omiskōipakexanō,” ixō Jesús ato yoini.

*Mā mai keyoaino nā omiskōipakenakafoōnoa Jesús ato yoini*

<sup>31</sup> Anā Jesús ato yoini iskafakī: “Ē mato anā yoinō, ea nikakapo. Ē nai mēranoax oni. Ē Niosfiax feronāfakekōi ē oni. Ē anā nai mēranoax fotoyoi, ē xanīfokōi oxii ēfe ājirifo fe keyokōi ē oxii, ea kemataima mapoi fetsexikani. Askatari efe xanīfāfe tsaoti ano tsaoxikani. Keyokōi sharafinakōia ōixikani. <sup>32</sup> Nāskatari yorafo keyokōi nā maitio anofo ēfe ferotaifi ichanāxikani. Nāskakē ē ato paxkanā faxii nā oveja kexemisto āfe ovejafoya āfe cabrafo paxkanā fatiro keskafakī. <sup>33</sup> Nā āfe inafō kexemisto āfe inafō paxkanā fakī āfe ovejafos āfe pōya kayakai aōri nīchixii. Askatari āfe cabrafori āfe pōya mishkiori nīchixii. Nāskarifiakī ē yorafo keyokōi ē paxkanā faxii. Nā ea Ifofaafos ēfe pōya kayakai aōri ē ato nīchixii, akka a ea Ifofaafomafori ēfe pōya mishkiori ē ato nīchixii. <sup>34</sup> Nāskaxō mē xanīfoxō ē ato yoixii nā ēfe pōya kayakai aōrinofo ekeki fekāfe, ēfe Epa Niospa mato inimamamiski. Nāskakē ēfe Epa Xanīfo anofo mā afara fikai nā mai onifaitīa mato yoiyoni keskara. <sup>35</sup> Akka ē fonāikaito mā ea pimamis; ē nōamāikaitori mā ea ayamamis; ē pexemaisax kafāsaitori, ‘Nono ēfe pexe ano ofe nono oxaxiki,’ mā ea famis. <sup>36</sup> Askatari ē rapatimaiskē mā ea ināmis; ē isinī ikaitori mā ea kexesharamis; ē karaxa mēra ikikēri kaxō mā ea ōimis.

<sup>37</sup> “Ē ato askafaito ea yōkaxikani iskafakākī: ‘Ifo, ¿afetīa nō mia ōimismē mī fonāikaito, akka mī fonāikaito nō mia pimamis? Askatari, ¿afetīa nō mia ōimismē mī nōamāikaito, akka mī nōimāikaito nō mia ayamamis? <sup>38</sup> Askatari, ¿afetīa nō mia ōimismē pexemaisax mī kafasaito, akka nō mia pexe ināmis ano mī oxanō, askatari mī rapatimaiskē akka nō mia rapati ināmis? <sup>39</sup> Askatari, ¿afetīa mī isinī ikaito nō mia ōimismē? Askatari, ¿afetīa karaxa mēranoa nō mia ōikamismē?’ ixō ea yōkaxikani.

<sup>40</sup> “Ea askafaifono ē ato kemaxii: ‘Ē mato paraima, nā fetsafo omiskōiaino mā tanaima isharaxō eōxō mā axomis.’

<sup>41</sup> “Askatari na ēfe pōya mishkiorinofo ē ato yoikī iskafaxii: ‘Na ēfe pōya mishkiorinofo emakinoax fotakāfe mā chakakōikī. Chii xoīsai mēra fotakāfe anoax omiskōixikaki. Nā ē chii xoīsai itipinī fani mēranoax Satanás chaka fe āfe yōshi chakafori anoax afe omiskōinakafo. <sup>42</sup> Akka ē fonāikaito mā ea pimamisma. Askatari ē nōamāikaito mā ea ayamamisma. <sup>43</sup> Askatari ē pexemaisax kafāsaito, “Nono nōko pexe mēra ife,” mā ea famisma. Askatari mā ea rapati ināmisma. Askatari

karaxa mēraŋoa mā ea ōikamisma. Askatari ē isinī ikaito mā ea ōikamisma, ixō ē ato yoixii.

<sup>44</sup> “Ato askafaito yorafetsafāfe yōkaxikani iskafakakī: ‘Ifo, ĵafetiā nō mia ōimismē mī fonāikaito, askatari a mī nōiamāikaito, askatari mī pexemaikē, askatari mī rapatimaikē, askatari a mī isinī ikaito, askatari a mī karaxa mēra ikikē nō mia tanamisma nō mia ōikaspamis?’

<sup>45</sup> “Ea askafaifono ē Xanīfokōixō ē ato kemaxii iskafakī: ‘Ē mato paraīma. Nā omiskōiaifo mā ato tanamisma nafokai afaafoma ixō askatari eari mā tanamisma,’ ixō ē ato yoixii.

<sup>46</sup> Nāskakē nāfo nā omiskōipakenakafo mēra foxikani. Akka nā ea Ifofafo efe nīpanakafo,” ixō Jesús ato yoini.

## 26

*“Ĵafeskaxō nō Jesús retetiromē?” ixō shinānifo  
(Mr. 14.1-2; Lc. 22.1-2; Jn. 11.45-53)*

<sup>1</sup> Nāskata mā ato yoikī keyota Jesús aōxō tāpimisfo yoini:

<sup>2</sup> “Mā mā tāpiakī oxa rafeta Pascua fista ikiki. Nāskatari Pascua fistaīa ea achikani fetsafāfe ea mastanōfo,” ixō Jesús ato yoini.

<sup>3</sup> Nāskakē a Niospa meka yoimis xanīfofo fe a judeo anifofo ichanānifo Caifás pexe anoax. Nā Caifás ato Nios kīfixomisfāfe āto xanīfo ini. <sup>4</sup> Nāno ichanākanax yoinānifo: “Ĵafeskaxō nō Jesús achitiromē paraxō retexiki?” ikanax yoinānifo.

<sup>5</sup> Nāskakanax yoinānifo: “Fistaīakai nō achitiroma yorafā rasi mekai fetsekani nokoki ōitifishkitirofo,” ikanax yoinānifo.

*Kēromā Jesús shinākī āfe mapoki pirofomā nachini  
(Mr. 14.3-9; Jn. 12.1-8)*

<sup>6</sup> Nāskata Jesús Betania ano ini Simón pexe ano. Nā Simón “Rashkishiai” fapaonifo. <sup>7</sup> Jesús nānoxō piaino kēro fisti akiki kani pirofomā manishomo sharakōikī foikai nā manishomo āfe ane alabastro. Akka nā pirofomā kopikōi ini. Jesús mīsa ano tsoxō piaino, nā kēromā āfe mapoki pirofomā nachini. <sup>8</sup> Askafaito ōikani Jesúsxō tāpimisfo ōitifishkiyanā iskanifo: “Ĵafeskakī nā pirofomā shara mī nachimē? <sup>9</sup> Mī ato minixō mī kori ichapa fixō a afaamaisfo mī ato inākerana,” fanifo.

<sup>10</sup> Askafaifāfe nikakī Jesús ato yoini: “Ĵafeskakī na kēro mā fekaxtefaimē? Na ea iskafai sharaki,” ato fani. <sup>11</sup> “Akka nā afaamaisfori mato fe ipanakafo. Akka eakai mēxotaima mā ea anā ōima. <sup>12</sup> Akka na kēromā ea iskafakī ēfe yoraki pirofomā nachia ea itipinīsharafakī ea iskafa ea maifasharaxinōfo. <sup>13</sup> Ē mato pāraima, fanīxōra na meka shara eōnoa yoikakī nā mai tio anoxō na kēromā ea iskafaōnoa yoixikani. Askatari na kēroōnoa shināpakenakafo, shināmakiyamaxikakī,” ixō Jesús ato yoini.

*Judaspa aõxõ tãpifikatsaxakĩ Jesús ato achimani*  
(Mr. 14.10-11; Lc. 22.3-6)

<sup>14</sup> Nãnori Jesús ato yoiaino a aõxõ tãpimis fetsa, ãfe ane Judas Iscariote, nã kani nã ato Nios kĩfixomis xanĩfofo ano. <sup>15</sup> Mã kaxõ ato yoini: “¿Afe tii mã ea kori inãtiromẽ ã mato Jesús achimanõ?” ato feito yoinifo: “Treinta nõ mia inãtiro,” fanifo. <sup>16</sup> Nãskaxõ Judaspa shinãkĩ taefani: “¿Afeskaxomã ã Jesús ato achimanõ?” ixõ shinãni.

*Mã chaima reteaifono Jesús aõxõ tãpimisfo feta yãtapake pini*  
(Mr. 14.12-25; Lc. 22.7-23; Jn. 13.21-30; 1 Co. 11.23-26)

<sup>17</sup> Akka nã Pascua fistatĩa pãa faraxatimais pipaonifo. Nãskata mã fista pakeano aõxõ tãpimisfo akiki fokaxõ yõkanifo: “¿Fanĩ mĩ fichipaimẽ ano kaxõ nõ itipinĩ fanõ, anoxõ Pascuatĩa yãtapake pixiki?” fanifo.

<sup>18</sup> Askafaifono Jesús ato kemani iskafakĩ: “Oa pexe rasi ano fotakãfe. Nãnoa feronãfake fetsa fichixõ yoitakãfe iskafakĩ: ‘Nõko Ifãfe noko yoia nõ mia yoiyonõ iskafaki: Mẽ chaima naikai. Nõko fistatĩa mĩ pexe anoxõ eõxõ tãpimisfo feta ã pii kaikai,’ ixõ yoitakãfe,” ato faano, <sup>19</sup> nãskafakĩ yoinifo nã ãto Ifãfe ato yoia keskafakĩ. Nãnoxõ itipinĩ fanifo Pascua fistatĩa pixikakĩ.

<sup>20</sup> Jesús mã fakishaino pexe ano nokoax mĩsa ano tsaoni a aõxõ tãpimiskõifo fe. <sup>21</sup> Nãnoxõ piyanã ato yoini: “Ë mato pãraima, fatora mã fẽtsa ea mã ato achimafainaka,” ato fani.

<sup>22</sup> Ato askafaito nikai shinãmitsakõinifo. Nãskaxõ yõkaketsanifo: “¿Ëraka, Ifo?” fakĩ fetsanifo.

<sup>23</sup> Askafaifono Jesús ato kemani: “Nã efeta sapakinoa pãa momoxõ piaito nãato ea ato achimaxii. <sup>24</sup> Ë Niospa Fakekõifiax ã yorakõi. Nã eõnoa yoikĩ kirika kenenifo keskakõi fakĩ ã asharakõitiro. Akka nã feronãfake ea ato achimafiax akairi omiskõikõixii. Akka nã feronãfake shara ikerana fakeyamanixakĩ,” ixõ Jesús ato yoini.

<sup>25</sup> Nãskakẽ Judaspa nã ato achimanaito yõkani: “Maestro, ¿Ëraka?” feito, “Ëje, nã mĩ yoiai keskarakĩa,” Jesús fani.

<sup>26</sup> Nãskakaxõ piaifono Jesús pãa tsomainĩfofã Apa Nios kĩfini. Mã Apa kĩfita pãa kaxkeketsaxõ aõxõ tãpimisfo inãni ato iskafayanã: “Na ãfe nami keskara pikãfe,” ato fani.

<sup>27</sup> Ato askafata kechokinoa fimi ene tsomainĩfofãxõ Apa Nios kĩfini. Nãskaxõ aõxõ tãpimisfo ato ayamani ato iskafayanã: “Na fimi ene ayakãfe,” ato fani. <sup>28</sup> Nãskaxõ ato yoini: “Nafi ãfe imi keskaraki. Akka nã ã mato yoiyonĩ keskai mẽ nai. Nãskakaxõ ãfe imi õikaxõ tãpitirofo Epa Niospa yoiyonĩ keskafakĩ yora ichapafõ ã ato chaka soaxonõ. <sup>29</sup> Akka anã ã mato yoinõ ã anã mato feta fena na fimi ene ayaima. Mã mã

nai mēra kano ē mato feta anā fimi ene ayaxii ēfe Epa xanīfo anoxō,” ixō Jesús ato yoini.

*“Ē Jesús ōimisma,” Pedro ixiaino Jesús ato yoini  
(Mr. 14.26-31; Lc. 22.31-34; Jn. 13.36-38)*

<sup>30</sup> Nāskakata mā fanāiki xatekata machi Olivos ano fonifo. <sup>31</sup> Nānoxō Jesús ato yoini: “A na fakishi keyokōi mā ea shināmaki fetsei. Nānori kirika kenenifo iskafakakī: ‘Āfe ifo reteaifono, āfe ovejafo ichoi fetsetirofo,’ ixō kirika kenenifo,” ato fani. <sup>32</sup> “Akka ea retefiafono ē otoax ē Galilea ano rekē kai mā kayoamano,” ato faino, <sup>33</sup> Pedro kemani: “Keyokōi shināmakiaifono, akka ēkai mia shināmakima,” fani.

<sup>34</sup> Askafaito nikakī Jesús yoini: “Ē mia pāraima na fakishi takara fene keofamano, ‘Ē Jesús ōimismara,’ mī ea fai tres fakī,” fani.

<sup>35</sup> Askafaito nikakī anā Pedro kemani: “Maa. Mia retefiaifono ē mefe nai. Ē ōimismara ē mia faima,” fani. Pedro askafaito nikakakī keyokōichi aōxō tāpimisfāfe askafakī fet-sanifo.

*Getsemaní anoxō Jesús Apa Nios kīfini  
(Mr. 14.32-42; Lc. 22.39-46)*

<sup>36</sup> Nāskata Jesús kani aōxō tāpimisfo fe Getsemaní ano. Nānoxō ato yoini: “Nono tsaokāfe onī chaimashta kaxō ē Epa Nios kīfiyotanō,” ato fani.

<sup>37</sup> Akka Pedro iyonī, Zebedeo fake rafe yafi. Nāskaxō āfe yora meeni shināmitsakōiyanā fekaxteaito. <sup>38</sup> Anoxō ato yoini: “Ēfe yōshi shināmitsai napaiyaito ē meikai. Nono nētekāfe oxakakima māri efeta ōisharaxikakī,” ato fani.

<sup>39</sup> Ato askafata Jesús ares fisti ori chaimashta kani. Nānoax maikiri fepepakekafata āfe fishpi mai tiisani. Nāskaxō Apa kīfini iskafakī: “Epa, na ē omiskōiai ekeki nokoyamafe. Akka nā ē apaiyai keskafakima. Nā mī ea amapaiyai keskafafe,” fani.

<sup>40</sup> Nāskata anā anoris oni aōxō tāpimisfo ano. Oxō ato ōia oxafo inifo. Nāskaxō Pedro yoini: “¿Mā efeta pishta oxa tenetiromamē?” ato fani. <sup>41</sup> Nāskafata anā yoini: “Moikaxō Epa Nios kīfikāfe Satanás chakata mato chakafamapaiyai keskara axikakima. Chanīma, nā Epa Niospa mato amapaiyai keskara mātō shinā mēraxō mā apafikī mā atiroma. Akka mātō yora pachikōikī,” ato fani.

<sup>42</sup> Ato askafata anā kani Apa Nios kīfikai iskafakī: “Epa, ea mīa omiskōimayamakī ea mīa omiskōimatiroma. Akka nā mī ea amapaiyai keskafafe,” fani.

<sup>43</sup> Nāskata anā oxō ato fichitoshini aōxō tāpimisfo oxafono, oxa paemei fetsoafono. <sup>44</sup> Nānoa ato ōifaini kaxō anā Apa Nios kīfini, afia yoitana keskafakī. <sup>45</sup> Nāskata Jesús anā oni aōxō

tāpimisfo ano. Mā oxō ato yoini: “¿Aimã oxamē tenekōiyanã? Akka iskaratīa a ea ato achimaniyoai mā chaima oi kiki. Yora chakafāfe ea achifenōfo ato efei kiki. <sup>46</sup> Fininīfofākāfe nō kanō. Mā chaima oi kiki a ea ato achimaniyoai,” Jesús ato fani.

### *Jesús achinifo*

(Mr. 14.43-50; Lc. 22.47-53; Jn. 18.2-11)

<sup>47</sup> Jesús ato yoiaino Judas nokoni, nã Judaspa Jesúsxō tāpifikatsaxakī, yorafā rasifo fe oni. Nã yorafo kenofoya ifi xatefoya fenifo, a ato Nios kīfixomisfāfe āto xanīfofo feta judeofāfe āto xanīfofofāfe ato nīchiafono. <sup>48</sup> Judaspa nã ato efeaito ato yoiyoni iskafakī: “A ě kokoki tsoo akaito ōikī achirisafaxikākī,” ato fani.

<sup>49</sup> Mā Jesús ano nokoxō Judaspa iskafakī yoini: “Maestro, ¿mīmē?” fatishoni. Nāskaxō kokotoshini.

<sup>50</sup> Askafaito ōikī Jesús kemani: “Efe yora, nã mī apaiyai keska farisafafe,” fani.

Askafaito ōikakī nã Judas fe foafāfe Jesús achinifo. <sup>51</sup> Akka Jesús achiaifāfe ōikī a aōxō tāpimis fētsa āfe keno chainipa tsekainīfofā a ato Nios kīfixomisfāfe āto xanīfāfe ina paxteni.

<sup>52</sup> Askaito ōikī Jesús yoini: “Mī keno fafe. Akka nō kenopa retenāino kenopari noko retetirofo. <sup>53</sup> ¿Mī tāpiamamē Epa Nios ě yoiaito iskaratīa āfe ājirifo ichapakōi ea nīchixotiro ea kexei fenōfo?” fani. <sup>54</sup> “Ē iskaratīa ājiri kenano ea kexeaifono ě naima. Akka nã Niospa meka yoikī kirika kenekī yoinifo keskai ě naikai,” Jesús ato fani.

<sup>55</sup> Askaifono ōikī Jesús yorafo yōkani: “¿Afeskai kenofoya ifixatefoya mā oamē ea achiyoi oa ě yometso keskarakē? Pena tii ě mato fe itiani Nios kīfiti pexefā mēraxō ě mato tāpimani, akka māakai ea achipaimisma. <sup>56</sup> Akka nã eōnoa yoikī kenenifo keskafakī mā ea achi,” ixō Jesús ato yoini.

Ato askafaino aōxō tāpimisfo Jesús ōifaikani. Ichoi fetsenifo a makinoax.

### *Xanīfo finakōiafo ano Jesús iyonifo*

(Mr. 14.53-65; Lc. 22.54-55, 63-71; Jn. 18.12-14, 19-24)

<sup>57</sup> Mā Jesús achikaxō a ato Nios kīfixomisfāfe āto xanīfo Caifás āfe pexe ano iyonifo. A xanīfofo fe a Moisés yoikī kirika keneni keskara ato tāpimamisfo fe a judeo anifofo fe nã tsaofafo ano Jesús iyonifo. <sup>58</sup> Pedro chai ixō ōini faki Jesús iyoi fokanimākai. Nāskaxō ato chīfafoni. Nāskata nã ato Nios kīfixomisfāfe āto xanīfāfe pexe emāiti ano Pedro nokoni. Mā nokoax nāno tsaoni nã pexefā kexemisfo fe anoxō Jesús afeska fakanimākai ōixiki.

<sup>59</sup> Nã Nios kīfixomis xanīfofo feta a ato fe rafeafāfe Jesús noikaspakakī, “¿Afaa nō fatiromē Jesús afaa chakakōi faamakī

nō retexiki?” ixō shinānifo. <sup>60</sup> Akka Jesús afaa chakafayamafiano, yora ichapafāfe āa chakafakakī mekafanifo parakī. Akka aōnoa afaa chaka nikanifoma. Nāskakē feronāfake raferi mekafai fekani fenifo. <sup>61</sup> Nā rafeta yoinifo: “Mā nō nikaita Jesús iskaito: ‘Ē na Nios kīfiti pexefā ē pāo fatiro. Nāskata tres nia oxata ē anā pexefā fatiro,’ ikaito nō nikaita,” fanifo nā rafeta āa parakakī.

<sup>62</sup> Askafaifono a ato Nios kīfixomis xanīfo fininīkafāta Jesús yōkani: “¿Mī kemamitsaimamē afamē na mīōnoa meka chaka yoiaifo?” ixō yoini.

<sup>63</sup> Akka Jesús tooxinima. Nā Nios ato kīfixomis xanīfāfe yoini iskafakī: “Nā Nios nipanakato mia ōi kiki mī yoikai chanīmakōi, noko yoife mīmākī Cristo Niospa Fake,” fani.

<sup>64</sup> Askafaito nikakī Jesús kemani: “Nā mī ea yoiai keskarakīa, ēkīa Niospa Fake. Ē mato yoinō. Akka mā ea ōixii ēfe Epa ketaxamei āfe pōya kayakai aōri ē tsāokē xanīfo finakōia ēfe Epa fe. Askatari mā ea ōixii nai kōi mēranoax ē anā fotofaito,” Jesús ato fani.

<sup>65</sup> Ato askafaito nikakakī a Nios ato kīfixomisfāfe āto xanīfāfe āfe rapati faxteni yorafāfe tāpinōfo Jesús yoiaito nikakas-pakī. Askafata yoini: “Na feronāfake āfe meka chakakōi Nios chakafakī mekafai. Mā nōakōi nō nikakī noko anā tsōa yoitiromaki nō tāpinō,” ato fani. <sup>66</sup> “¿Afe keskara mā shināimē?” ato faito keyokōichi kemanifo: “¡Nanōki!” fanifo.

<sup>67</sup> Mā fenexkaxō āfe femānāki kemo mechoketsayanā koshaketsanifo. Atirito fepasketsanifo. <sup>68</sup> Iskafakī yoiyanā: “Mīkai Cristomākī, noko yoife tsōa mia koshaketsamakī,” fanifo.

*“Ē Jesús ōimisma,” Pedro ini*

*(Mr. 14.66-72; Lc. 22.56-62; Jn. 18.15-18, 25-27)*

<sup>69</sup> Pedro nāno ato fe pexefā emāiti tsaano, nāno kēro xomaya a xanīfo yonoxomis akiki kaxō yoini: “Mīri Jesús fe kafāsamis Galilea anoax,” faito, <sup>70</sup> Pedro kemani, yorafāfe ōiaifono iskafakī: “Ēkai Jesús ōimisma. Ēkai afaa tāpīama tsoaraōnoa mī yoi,” fani.

<sup>71</sup> Nāskafata pexe fepoti ano kani. Nānoa kēro xomaya fētsari fichixō fetsafo yoini: “A nari Jesús fe Nazarete anoax kafāsamis,” fani.

<sup>72</sup> Askafaino anā Pedro kemani: “Maa, nā mī yoiai keskara Niospa tāpia ē na feronāfake ōimisma,” fani.

<sup>73</sup> Nāskafaino nā anoafāfe Pedro ano fōkaxō yoinifo: “Chanīma, mīri Jesús fe rafemis mā nō mia nikai mī mekaito, nā keskara,” fanifo.

<sup>74</sup> Nāskafaifono Pedro ato yoikī taefani iskafakī: “Ē mato paraima, Niospa ea ōi ē chanīkē Niospa ea omiskōimatiro.

Niospa tãpia ã mato yoikõĩ nã feronãfake ã õimisma,” ixõ ato yoini.

Pedro askaino takara keoinãkafani. <sup>75</sup> Nãskaino Pedro shinãni nã Jesús yoita keskara. “Takara keoyoamano mĩ ato yoikĩ tres faxii: ‘Ë Jesús õimismara,’ mĩ ixii,” ixõ Jesús yoita keskara Pedro shinãtani. Nãskata Caifãs pexefã mëranoax kãikainax oiã finakõini.

## 27

### *Pilato ano Jesús iyonifo*

(Mr. 15.1; Lc. 23.1-2; Jn. 18.28-32)

<sup>1</sup> Nãskata mã penaino keyokõĩ a ato Nios kĩfixomis xanĩfofo fe judeo anifofo yoinãnifo: “¿Afeskaxõ nõ Jesús retetiromẽ?” ikanax yoinãnifo. <sup>2</sup> Nãskakaxõ metexkere akaxõ Jesús iyonifo Pilato ano. Nã Pilato ãto xanĩfo yora fetsa Roma anoa ini.

### *Judas nani*

<sup>3</sup> Judaspa Jesús ato achimaxõ reteaifãfe õikĩ shinãmitsayanã ato treinta kori exe inãni, a ato Nios kĩfixomis xanĩfofoya judeo anifofo. <sup>4</sup> Ato iskafayanã: “Ë chakafaa, Jesús afaa chakafayamafiamiskẽ. Paraxõ ã ato achimana retenõfo,” ato feito kemanifo: “Nõkai aõnoa afaa shinãchakaima. Mĩã mĩ shinãchakakõĩ,” fanifo.

<sup>5</sup> Askafaifãfe nikai nã Nios kĩfiti pexefã mëraxõ ato nãmã kori exe saafaini kaax ãari tenexemeax Judas nani.

<sup>6</sup> A ato Nios kĩfixomis xanĩfofofãfe anã kori finifo iskayanã: “Na kori exe imi foano mã chakanaki. Nãskakẽ a kori fati mërã nõ nanetiromaki,” ikax yoinãnifo.

<sup>7</sup> Nãskakanax yoinãnifo: “A na kõri nõ mai finõ ano yora fet-safo maifaxiki. Nã neo kesho fakakĩ neo fimisfo anoa nã mai nõ finõ,” ikanax yoinãnifo. <sup>8</sup> Nãskakẽ nã mai anekĩ fetsafanifo. “Imi Mai,” fanifo. Akka iskaratĩari, “Imi Mai,” famisfo. <sup>9</sup> Nãskakẽ nã Niospa meka yoimisto Jeremías a inõpokoai yoikĩ kirika keneni keskakõini. Iskafakĩ yoikĩ keneni:

Kori exe treinta fixikani nã israelifãfe yoinifo keskafakĩ.

<sup>10</sup> Nãskakẽ nã kõri kesho faxii mai fimisfo anoa nã mai finifo nã Niospa ea yoiyoni keskafakĩ, ixõ Jeremías keneni.

### *Pilato xanĩfãfe Jesús yõkani*

(Mr. 15.2-5; Lc. 23.3-5; Jn. 18.33-38)

<sup>11</sup> Jesús iyonifo Pilato xanĩfo ano. Mã iyoafono nãnoxõ yõkani iskafakĩ: “¿Mĩmẽ judeofãfe xanĩfo?” feito Jesús kemani: “Ëje, nã mĩ ea yoiaĩ keskarakĩã,” fani.

<sup>12</sup> Akka nã ato Nios kĩfixomis xanĩfofo feta judeo anifofofãfe, “Mĩ chakakõĩ famis,” pãrakĩ fanifo. Askafaifono Jesús ato

kemanimā. <sup>13</sup> Nāskakē Pilato yōkani: “¿Mī nikaimamē mia chakafakī mekaifaifāfe?” fani.

<sup>14</sup> Askafaito nikakī, Jesúskaī pishta kemanimā. Nāskakē xanīfo Pilato, “Kee, ¿afeskai ea kemaimamē?” ixō shināni.

*Pilato ato yoini Jesús retenōfo*

*(Mr. 15.6-20; Lc. 23.13-25; Jn. 18.38-19.16)*

<sup>15</sup> Akka Pascua fistatīa xanīfo Pilato yora fisti karaxa mēranoa kāimapaoni. Nā yorafāfe kāimapaiyaifo ato kāimaxopaoni. <sup>16</sup> Akka nā karaxa mēra ika feronāfake chakakōi ini, āfe ane Barrabás ini. <sup>17</sup> Nāskakē yorafo ichanāfono Pilato ato yōkani: “¿Fato mā fichipaimē ē mato kāimaxonō? ¿Barrabás iyamai Jesús nā Cristo nā Niospa nīchini ē kāimatiromē?” ato fani.

<sup>18</sup> Akka mā Pilato tāpia ini judeo xanīfāfe shināchakaito nō anā xanīfo itiromara ixō, a ano Jesús iyoaifono.

<sup>19</sup> Nā xanīfāfe tsaoti kamaki tsaoxō Pilato shināino, āfe āfinī āfe ina nīchini Pilato yoitanō: “Mī āfinī ea yoia ē mia yoinō iskafakī: ‘Na feronāfake afaa chakafamismakī afeska fayamafe. Ēfe namapa aōxō chakakōi ē namakī,’ mia faa,” āfe inapa fani.

<sup>20</sup> Akka nā ato Nios kīfixomisfāfe āto xanīfofo feta judeo anifofofāfe āfe yorafo ato yoinifo iskafakakī: “Jesús kāiyamanō. Akka Barrabás kāinō. Jesús ato retemanō Pilato yoikāfe,” ato fanifo. <sup>21</sup> Askaiifāfe xanīfo Pilato anā ato yōkani: “Fato mā fichipaimē ē mato kāimaxonō ea yoikāfe,” ato faito, “Barrabás kāimafe,” fanifo.

<sup>22</sup> Anā Pilato ato yōkani: “Akka, ¿ē Jesús nā Cristo famisfo ē afeska faimē?” ato faito, keyokōichi kemanifo: “¡Ifi cruz ikaki mastamafe!” fanifo.

<sup>23</sup> Askafaifāfe nikakī Pilato ato yoini: “Akka, ¿naato afaa chakafamē?” ato fani.

Ato askafaito nikakakī fāsikōi yoinifo: “¡Mastafe!” fanifo.

<sup>24</sup> Akka Pilato ōia tsōa nikakanima inifo. Yorafā rasi fāsikōi mekanifo. Nāskakē āfe ina faka fixotanō nīchini. Askata mechokomeni yorafāfe ferotaifi ōinōfo ato iskafakī yoiyanā: “Ēkai afaamaki na feronāfake ē retepanā. Mā mā apaikai akāfe. Eōnoax naima kiki. Matoōnoax nai kiki,” ato fani.

<sup>25</sup> Ato askafaito yorafāfe kemanifo: “Akka nō akikai retekī nō tenetiroma nokoōnoax nai. Nōko fakefoōnoaxri nai,” fanifo.

<sup>26</sup> Nāskakē Pilato Barrabás ato kāimaxoni. Nāskata mā Jesús ato koshamata ifi cruz ikaki mastatanōfo ato yoini.

<sup>27</sup> Askata sorarofāfe Jesús iyonifo xanīfāfe pexefā ano. Nānoax sorarofō ichanākanax Jesús kemataima niakenifo.

<sup>28</sup> Nāskakaxō āfe rapati pēkakaxō, rapati ōshi nana safemanifo, xanīfāfe tari keskara. <sup>29</sup> Nāskatari moxa chainipafō maiti



fākaxō maimanifo. Āfe mēke kaiyakai aōriri ifi chati tsoamanifo. Nāskakaxō āfe ferotaifi ratokonō mai chachipakefofā āto xanīfo feyakanakōi keskarakaxō kaxemetsamakōi fanifo, iskafakī: “Mī sharakōi. Mīfi judeofāfe āto xanīfo,” fanifo kaxefakakī. <sup>30</sup> Nāskakata akiki kemo mechokata, afia ifi xate tsoa fīakaxō aō mapoki koshanifo. <sup>31</sup> Mā kaxemetsama fakaxō, tari ōshi fīakata, Jesús āfe rapatikōi safemakaxō iyonifo mā mastai fokakī.

*Jesús ifi cruz ikaki mastanifo*

(Mr. 15.21-32; Lc. 23.26-43; Jn. 19.17-27)

<sup>32</sup> Anoax fōkakī, feronāfake fisti fichinifo āfe ane Simón. Nā Simón Cirene anoa ini. Nāskaxō yoinifo: “Na Jesús ifi cruz ika foxōi afe,” fanifo.

<sup>33</sup> Nāskakata nokonifo machi āfe ane Gólgota ano. (Nā āfe ane fetsa Mapo Xao fanifo.) <sup>34</sup> Nānoxō fimi ene moka osia Jesús ayamapainifo. Akka Jesús mā meexō ayakaspani.

<sup>35</sup> Nāskata mā Jesús mastakaxō āfe rapati fīanifo. Sorarofāfe makex tokoronō tsakaketsakaxō nāskakaxō sakka sakka anifo kanānōnākakī. Nā kanāto Jesús tari fōani. Nāskaxō Jesús rapati fetsa fīanifo. <sup>36</sup> Mā Jesús mastakanax nāno tsaonifo anoxō kexexikakī. <sup>37</sup> Nāskaxō āfe mapo mǎnǎori tafaraki kenexō mastanifo. Mā retakaxō kenekī iskafanifo: “Jesúsfi judeofāfe xanīfoki,” ikaxō kenenifo.

<sup>38</sup> Jesús yafi yometso rafe mastanifo, fetsa āfe pōya kayakai aōri ata, fetsari āfe pōya mishkiori anifo. <sup>39</sup> Nā ano finōfāifāfe ĭchayanā āto mapo rafe rafeanifo. <sup>40</sup> Iskafakī yoinifo: “Mī yoimis ē Nios kīfiti pexefā pāofaxō ē tres nia oxata ē anā axii pexefā fakī mī imiski, akka mī ifimetiromākī mīa ifimefe. Mī Niospa Fakemākī na ifi cruz ikakinoax fotopakekafāfe,” fanifo.

<sup>41</sup> Nāskariakani akiki kaxemetsamanifo a ato Nios kīfixomisfāfe āto xanīfofo fe a Moisés yoikī kirika kenenī keskara ato tāpimamisfo a judeofāfe āto xanīfofori āa ranā yoinānākani iskanifo: <sup>42</sup> “Naato fetsafo ififitiroxakī, akka āakai ifimeima. A nafi israelifāfe ato xanīfokī, akka ifi cruz ikakinoax fotoano nō chanīmara fai. <sup>43</sup> A naato Nios shināmis. Mēxotaima noko yoimis: ‘Epa Nios ēfe Epakōira,’ noko famis. Akka chanīmamakī Niospa noikī ifimākai nō ōinō,” ixō mekafakī chakafanifo.

<sup>44</sup> Nāskaxō nā yometso rafeya mastafono fētsa chakafakī mekafakī ĭchani.

*Jesús nani*

(Mr. 15.33-41; Lc. 23.44-49; Jn. 19.28-30)

<sup>45</sup> Nāskata xini keya nā mai tio fakishifākōi itani. Nāskax mā xini kaino anā penani. <sup>46</sup> Nāskata mā penano Jesús fāsikōi āfe mekapa kenai iskani: “Elí, Elí, ¿lema sabactani?” Nōko

mekapa iskafakī yoini: “Ēfe Nios, Ēfe Nios, ¿afeskakī mīa ea potamē?” fani.

<sup>47</sup> Nāskaito nā ano niafāfe nikakakī iskafanifo: “Nikakapo, nā ato Niospa meka yoipaoni Elías kenai kiki,” fanifo.

<sup>48</sup> Nāskaito nikafaini fetsa ichoni xapo keskara fiikai. Nā xapo keskara fimi ene kachaki momoxō tafa xate kaxkexō akiki aō nētaxō ayamapaini. <sup>49</sup> Askafaito ranārīto yoinifo: “Enefe. Elías nai mēranoax fotoxō ifimākai nō ōinō,” fanifo.

<sup>50</sup> Anā Jesús fāsikōi ea ini. Nāskax nani. <sup>51</sup> Mā Jesús natanaino, sama nami Nios kīfiti pexefā mēranoax naki rafekōi faxtepakekafāni fomākīanoax. Nāskatari mai naya naya ini. Tokirinīfāfori kaxkei fetseni. <sup>52</sup> Nāskakē a maiāfo anoax kini fepekemetani. Akka a Nios Ifofaāfo nakatsaxakakī otoinīfofānifo. <sup>53</sup> Nāskakata maiāfo anoax fonifo. Mā Jesús otoitano, Jerusalén ano fonifo. Nānoxō yora ichapafāfe ōinifo.

<sup>54</sup> Nāskata soraro xanīfāfe a afeta Jesús kexeāfo feta ōinifo mai naya naya ikaito afarāfori afeskara ikaito. Nāskakē ratekōiyanā yoinānifo iskayanā: “Chanīma, na feronāfake Niospa Fake ika,” fanifo.

<sup>55</sup> Kērofāferi chaimashta nikaxō ōinifo. Kēro ichapafāferi Jesús fe fopaonifo Galilea anoax ato afara axosharamisno. <sup>56</sup> Nā tiixō Jesús ōinifo. María Magdalena ikaino María fetsari ikaino, nā María Jacobo feta José āto afa ini. Askatari kēro fetsari ini Zebedeo āfe āfi. Āfe fake rafe Santiago fe Juan ini. Keyokōichi Jesús ōinifo chaimashta nikaxō.

*Jesús makex kini mēra maifanifo*

*(Mr. 15.42-47; Lc. 23.50-56; Jn. 19.38-42)*

<sup>57</sup> Akka mā fakishaino feronāfake kori ichapaya fisti kani āfe ane José. Nā José Arimatea mai ano ini. Nāatori Jesús Ifofamis ini. <sup>58</sup> Nā José xanīfo Pilato ano kaxō Jesús āfe yora yōkani maifai axiki. Nāskakē Pilato ato yoini Jesús āfe yora inānōfo. <sup>59</sup> Nāskata José mā Jesús yora fixō, sama oxosharakōipa rakoni. <sup>60</sup> Nāskaxō makex kini a tsoa maiyomisma mēra ratani. Nā makex kini fakī José ayoni. Nāskata nā Jesús maifaa ano makex kini tokirinīfanē fepofaini kani. <sup>61</sup> Akka María Magdalena fe María fetsa nāno nētekanax a Jesús maia ano tsaokaxō ōinifo.

*Sorarofāfe Jesús maia ano kexenifo*

<sup>62</sup> Mā askaitano, judeofo āfe pena tenetitīa a ato Nios kīfixomisfāfe āto xanīfofo fe fariseofo fonifo Pilato ōifokani. <sup>63</sup> Mā fōkaxō yoinifo iskafakakī: “Xanīfo, mā nō shināi na feronāfake chanīmisto nayoxoma yoikī iskafamis: ‘Ē naax tres nia oxata ē otaxii,’ ixō yoimis. <sup>64</sup> Nāskakē mī sorarofō nīchife a maia ano kexeyonōfo tres nia aōxō tāpimisfo fakishi fēkaxō

ãfe yora fiyamanõfo. Fĩakaxõ yorafo yoitirofo iscafakĩ: ‘Mã Jesús otoaki,’ ato fatirofoki. Akka ã otoxira ikax a chanĩmiskĩ. Nãskakẽ mã otoara ikaxõ ato parakĩ finakõitirofoki,” fanifo.

<sup>65</sup> Askafaifono Pilato ato yoini: “Nakĩa sorarofu. Ato iyotakãfe. Fokaxõ mafa kini kexesharatakãfe nã mã apaiyai keskafakĩ,” ato fani. <sup>66</sup> Nãskakanax fonifo. Mã fõkaxõ itipinĩ fanifo nã mafa kini. Nãskata nã aõ fepoa tokirinĩfã sichopa marakka fanifo. Nãskakaxõ ano sorarofu nĩchitakani fenifo anoxõ kexesharanõfo.

## 28

### *Jesús otoni*

(Mr. 16.1-8; Lc. 24.1-12; Jn. 20.1-10)

<sup>1</sup> Judeofãfe ãto pena teneti safaro mã finõano, nãskata nomĩkonõ fakishparikõĩ fonifo a Jesús maia ano. María Magdalenanõ María fetsanõ fonifo a Jesús maia ano õifokani.

<sup>2</sup> Nãskata samamakõĩ fãsikõĩ mai naya naya ini, nõko Ifo Niospa ãfe ãjiri nai mẽraxõ fotomanaino. Mã fotota a Jesús maia ano kaxõ, a aõ fẽpoita tokirinĩfã fepeta a kamaki tsaoni.

<sup>3</sup> Nã nõko Ifo Niospa ãfe ãjiri fafekõini, nã kana peekai keskara. ãfe rapati oxofinakõĩ ini. <sup>4</sup> Askaito õikani sorarofu choayanã ratekõinifo. Nãskakanax oa naa keskara nãmã pake pakefofãnifo. <sup>5</sup> Akka nã nõko Ifo Niospa ãfe ãjirinĩ nã kẽro rafe yoini: “Rateyamakãfe. Mẽ tãpiakĩ mã Jesús fenaiyoaki a mastaitafo,” ato fani. <sup>6</sup> “Nonomaki, mã otoaki a mato yoimis keskai. Õifekapo, a rãtaitafo ano. <sup>7</sup> Koshikõĩ fõkaxõ aõxõ tãpimisfo yoirisafatakãfe iscafakĩ: ‘Mã otoaki. Galilea ano kai kiki mã kayoamano. Nãnoa mã õikaikai ato yoitakãfe. Mẽ mato yoikai shinãmakiyamakãfe,’” ato fani.

<sup>8</sup> Ato askafaito nikafaikani nã kẽro rafe koshikõĩ fonifo nã Jesús maita anoax. Ratefianã ãto shinã mẽra inimakõinifo aõxõ tãpimisfo chanifaifokani ichonifo. <sup>9</sup> Ichoaifono Jesús atoki nokorisatani nã kẽro rafeki. Nãskaxõ, “Mẽ oi,” ato fani. Ato askafaino nã kẽro rafe Jesúski fõkaxõ akiki inimakakĩ ratokonõ mai chachipakefofã ãfe fitax ano achinifo. “Mĩ sharakõĩ,” fanifo. <sup>10</sup> Nãskaxõ ato yoini: “Rateyamakãfe. Fokaxõ ãfe extofo ã yoimis keska fakĩ ea ato yoixotakãfe Galilea ano fotanõfo. Nãnoa ea fichifokani kiki,” ixõ ato yoini.

### *Sorarofãfe ato yoinifo*

<sup>11</sup> Mã nã kẽro rafe foaifono, nã Jesús maia ano kexekanax soraro ranãri fonifo pexe rasi ano. Mã fõkaxõ a ato Nios kĩfixomis ãto xanĩfofo yoinifo nã õiafo keskara. <sup>12</sup> Nã xanĩfo ano fonifo. Nã anifofo fe mekai fokani, ato fe yoinãsharaxikaki. Nãskakaxõ sorarofu kori ichapakõĩ inãnifo. <sup>13</sup> Ato iskafanifo: “Ato iscafakakĩ yoitakãfe: ‘Nõ fakishchãĩ oxano Jesús ãfe

inafo fĕkaxō āfe yora yometsoanafo,' ato fatakāfe. <sup>14</sup> Mā ato askafaito xanĭfāfe nikaxō mato afara faito, nō yoisharanō mato afeska fanōfoma," ato fanifo.

<sup>15</sup> Nāskakaxō sorarofāfe mā kori fĭkaxō, mā fōkaxō nā ato yoiafo keskafakĭ ato yoinifo. Nāskakē nā maitio anoxō nikaketsanifo. Iskaratĭari a keskara chanĭmara famisfo jude-ofāfe.

*Jesús aōxō tāpimisfo yoini aōxō keyokōi yoifofāsafatanōfo  
(Mr. 16.14-18; Lc. 24.36-49; Jn. 20.19-23)*

<sup>16</sup> Nāskakanax Jesús aōxō tāpimisfo once fonifo Galilea ano, nā Jesús ato yoiyomis keskai fonifo māchifā ari. <sup>17</sup> Nāskakata Jesús ōikakĭ, "Aicho, mĭ nōko Ifo Jesús nō mia noikōi," fanifo. Akka Jesús otoano ranārito chanĭmara fanifoma. <sup>18</sup> Nāskaifono Jesús atoki kaxō ato yoini: "Ēfe Epa Niospa ea yoia nai mĕranoafoya nono mai anoafori ĕ ato yoinō. <sup>19</sup> Akka nā maitio ano yorafoki fotakāfe ato yoixikakĭ ea Ifofasharanōfo. Nāskaxō ĕfe Epa aneōxō ato maotisafapatakāfe. Ēfe aneōxori ato askafatakāfe, āfe Yōshi Sharaōxori ato askafatakāfe. <sup>20</sup> Nāskaxō ato yoisharakāfe nikasharakōinōfo nā ĕ mato yoia keskara. Akka ĕ mato fe mĕxotaima ipanakaki," Jesús ato fani.

## Marcos Jesúsnoa Yoikī Keneni

*Juan Maotista tsōa istomaxō ato yoini  
(Mt. 3.1-12; Lc. 3.1-9, 15-17; Jn. 1.19-28)*

<sup>1</sup> Ē mato meka shara yoinō Jesucristoōnoa. Nā Jesucristo Niospa Fakekōi.

<sup>2</sup> Afetiama nā Isaías Niospa shināmanaino Jesucristoōnoa yoikī kirika keneni iskafakī:

Mī nai mēranoax nāmā fotoyoamano nā ěfe meka yoimis ě atoki rekē nīchixii mīōnoa ato yoinō, itipinīsharanōfo chipo mia nikasharaxikani kiki,

ixō Epa Niospa āfe Fakeōnoa yoinino Isaías keneni. <sup>3</sup> Askatari anā keneni iskafakī:

Tsōa istoma anoxō yorafo yoixii akiki feaifono iskafakī ato yoixii nā ěfe meka yoimisto ato yoixii iskafakī: “Itipinīsharakāfe. Mā chaima nōko Ifo oi kikī. Māto chaka xatekāfe isharaxikāki,” ixō ato yoixii,

ixō Juanoa yoikī Isaías kirika keneni. <sup>4</sup> Nānorikōi Juan ato yoini tsōa istomaxō yorafo ato maotisafayanā. Ato iskafakī yoiyanā: “Anā Nios shinākāfe māto chaka xateyanā ě mato maotisafanō Epa Niospa māto chaka mato soaxonō,” ixō Juan ato yoini. <sup>5</sup> Nāskakē keyokōi Judea anoax feaifono, Jerusalén anoaxri fenifo, ato yoiaito nikai fekani. Nānoxō a afara chakafamisfo yoiiaifono, Juan ato maotisafapani faka Jordán anoxō.

<sup>6</sup> Akka Juan āfe rapati kamīcho fichi kishi faxō safepaoni. Āfe sītorari fichi koiro safepaoni. Nāskaxō tseo pipaoni, fonari apaoni. <sup>7</sup> Nāskaxō Juan ato mēxotaima yoipaoni: “Nā ea keskarama mā chaima oi kiki, nā sharafinakōia. Aato afama mīshti fatiro, ě atiroma keskara. Akka ě afaama,” ixō ato yoipaoni Jesúsnoa yoikī. <sup>8</sup> “Akka ě mato fāka mēra ikimapakea maotisafakī. Akka nā rama oaito āfe Yōshi Shara mato mēra naneyoi,” ixō Juan ato yoini.

*Juan Jesús maotisafani faka Jordán anoxō  
(Mt. 3.13-17; Lc. 3.21-22)*

<sup>9</sup> Nāskano Jesús kani Nazarete anoax, Galilea mai ano. Nānoxō faka Jordán anoxō Juan ato maotisafani. <sup>10</sup> Nāskafaino Jesús fakanakinoax fininākafā ōia nai fepekemeaito ōini. Akiki Niospa Yōshi Shara fotoiyoi oa rifi keskara oni. <sup>11</sup> Nāskaino nai mēranoax mekaito nikani iskafakī yoiaito: “Mī ěfe Fakekōi, ě mia noikōi. Ē mikiki inimasharakōi,” ixō yoiaito nikani.

*Satanás chakata Jesús afara chakafamapaini  
(Mt. 4.1-11; Lc. 4.1-13)*

<sup>12</sup> Nāskata Niospa Yōshi Sharapa Jesús iyoni tsōa istoma ano.  
<sup>13</sup> Nāri cuarenta nia ini, yoināfo mēra. Nārixō Satanás afara chakafamapaiyaito āfe ājirifāfe kexenifo.

*Galilea anoxō Jesús ato yoikī taefani*  
 (Mt. 4.12-17; Lc. 4.14-15)

<sup>14</sup> Akka mā Juan karaxa mēra ikimaitafono Jesús kani Galilea ano Niospa meka shara yorafo yoikai. <sup>15</sup> Ato yoikī iskafani: “Nōko Ifo Nios mā chaima matoki oi kiki, xanīfofinakōi a ixii. Māto chaka xatekāfe anā Nios nikakōisharaxikakī. Āfe meka sharari nikakōikāfe chanīmara fayana.”

*Jesús cuatro feronāfake kenani tarafanāfānē foe fimisfono āfe inakōi inōfo*

(Mt. 4.18-22; Lc. 5.1-11)

<sup>16</sup> Ato askafakī yoita Jesús Galilea ĩa kesemē kani. Kakī fichini Simón yafi onefetsa Andrés. Nā rafeta tarafanā fimisfo inifo, āto tarafanāfā faka naki poteaifāfe. <sup>17</sup> Jesús ato yoini iskafakī: “Efe fokāfe. Māfi tarafanāfānē fimiskī. Mā foe ichapa rasi tarafanāfānē fiari keskari fakī iskaratīari mā ekeki yora ichapa efexii ē āto Ifo inō,” ixō Jesús ato yoini.

<sup>18</sup> Ato askafaino tarafanāfā fafaikani afe fonifo.

<sup>19</sup> Anā orishta fāi katapaikī Jesús ōia Santiago onefetsa Juan fe nia ini. Nā rafeta āto apa feta kanōa nakixō tarafanāfā itipinī fanifo, kishifakākī. <sup>20</sup> Nā raferi Jesús ato kenaino nā rafeta āto apa Zebedeo yafi āfe inafoya ato nīchifainifo. Āto kanōari ōifainifo Jesús fe fokākī.

*Nā feronāfake niafaka nanea ini*  
 (Lc. 4.31-37)

<sup>21</sup> Jesús aōxō tāpimisfo fe kaax Capernaúm ano nokoni. Pena tenetitīa nā ichanāti pexe mēra Jesús ikikaixō ato yoikī taefani. <sup>22</sup> Ato yoiaito nikakī yorafā rasichi Jesús ōiketsanifo. “¡Kee! Nikakapo. Nato tāpikī finakōia, a Moisés yoikī kirika keneni keskara ato tāpimamisfo keskarama, meka sharakōi nato yoi,” fanifo. <sup>23</sup> Judeofāfe ichanāti pexe mēraxō yora mēra niafaka yōshi chaka nanexō Jesús fāsikōi mekafani.

<sup>24</sup> Iskafakī yoini: “¿Afeskakī mī noko fekaxtefaiyoamē, Jesús Nazarete anoato? ¿Mī noko a omiskōipakenakafo mēra mī noko potaiyoamē? Ē mia ōimisnō, mī sharakōinō Niospa mia nīchiano,” fani.

<sup>25</sup> Jesús niafaka yōshi chaka iskafakī yoini: “Askayamafe. Na feronāfake makinoax tsekekaitāfe,” faino, <sup>26</sup> niafaka yōshi chakata feronāfake choamata, fāsikōi mekainākfata a maki-noax tsekekaini. <sup>27</sup> Askaito ōikani, yora rasi ratei fetseyana āa ranā yoināi fetsenifo iskakani: “¿Tsoamē na? Na

tāpisharakōixō ato yoiai nā xanīfāfe tāpisharakōixō ato yoiai keskara. Nā niafaka yōshi chakafāferi nikakani ato yoiaito,” ikanax yoinānifo.

<sup>28</sup> Nāskakē keyokōichi nikaketsanifo Galilea mai anoxō nā Jesús aka keskara.

*Jesús Simón Pedro rayos sharafani*  
(Mt. 8.14-15; Lc. 4.38-39)

<sup>29</sup> Nā ichanāti pexe mēranoax Jesús tsekekaini. Santiagonō, Juannō fonifo, Simón feta Andrés āfe pexe ano. <sup>30</sup> Akka nāno Simón āfe rayos yōxafo yonai raka ini. Nāno rakano Jesús yoinifo. <sup>31</sup> Jesús akiki kaxō āfe mīfi fininīfofanaino a yonai koshikōi sharatani. Mā sharaxō pīchani ato pimaxii.

*A isinī ikaifo Jesús ato sharafani*  
(Mt. 8.16-17; Lc. 4.40-41)

<sup>32</sup> Mā xini kaino a isinī ikaifoya a niafaka chaka naneafō Jesúsiki efenifo. <sup>33</sup> Nāskakē nānoafō keyokōi yorafo ichanānifo nā pexe fepoti anoax. <sup>34</sup> Jesús ato sharafani yora ichapa pae fetsa fetsatapafāfe ikaifono. Niafaka chakafori ato mēra naneano ato makinoa pōtani. Akka Jesús niafakafo meka-manima māmāi tāpiafāfe Jesúsmai Niospa Fakekē.

*Jesús ichanāti pexe mēraxō Apa Niospa mekasharaōnoa ato yoini*

(Lc. 4.42-44)

<sup>35</sup> Mā chaima penaino, Jesús fininākafe pexe rasi mēranoax tsekekaini tsōa istomaxō Apa Nios kīfikai. <sup>36</sup> Mā Jesús ato makinoax penaino kaano Simón āfe rafeafō fe kani Jesús fenaikai. <sup>37</sup> Mā fichikaxō yoinifo iskafakakī: “Keyokōichi mia fenakani,” fanifo.

<sup>38</sup> Askafaiāfe nikakī Jesús ato kemani iskafakī: “Nō chaima fetsa ano kanō fokāfe, anoxori nō ato Niospa meka tāpimanō. Nāskakē ē oa,” ato fani.

<sup>39</sup> Nāskakē Jesús kafāsapaoni nā Galilea pexefo tii ano Niospa meka shara ato yoifofāsafai ichanāti pexe mēraxō. Fanīma mīshtixō niafaka yōshi chakafo ato makinoa ato potafofāsafai.

*Jesús yora rashkishiai sharafani*  
(Mt. 8.1-4; Lc. 5.12-16)

<sup>40</sup> Feronāfake fetsa isinī iki rashkishi fetseax Jesúsiki oni. Akiki oxō ratokonō mai chachipakefōfā yoini iskafakī: “Ea mīa sharafapaikī, ea mīa sharafatiro,” fani.

<sup>41</sup> Askafaito nikakī Jesús shinākōini, omiskōiaito. Nāskaxō āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino, <sup>42</sup> a rashkishi fetseai koshikōi sharatani. Nāskax sharakōi ini. <sup>43-44</sup> Mā sharano Jesús nīchini iskafakī yoiyanā: “Mī tsoa yoiki. Akka nā ato Nios kīfixomis ispatāfe.

Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

<sup>45</sup> Jesús askafakī yoifiano, akka nā feronāfake mā kaxō ato yoifofāsafani. “Ōikapo, mā Jesús ea sharafaa,” ixō ato yoifofāsafani. Nāskakē Jesús anā pexe rasi ano ikixō ato yoitiroma ini. Xafakīa nini, tsōa istoma ano. Nāskafiaino pexe rasi anoafo akiki fenifo ōifekani.

## 2

### *Jesús yora finimisma sharafani*

(Mt. 9.1-8; Lc. 5.17-26)

<sup>1</sup> Mā samaraka pishtata Capernaúm ano anā oni Jesús. Mā nokoano, “Mā Jesús anā oa āfe pexe ano,” fanifo. <sup>2</sup> Nāskakata Jesús fe anā ichanānifo pexe mēraxō. Jesús nikakani. Pexe ano fospikōikanax āfe emāiti ninifo āfe fepoti ano ikitiroxakākima. Nānoxō Jesús ato tāpimani Niospa meka. <sup>3</sup> Mā ato tāpimanaino feronāfake cuatro nokotoshinifo. Yora finimisma āfe xefapa efenifo. <sup>4</sup> Mā xītiafono ikitirofoma, Jesús ano nā yora finimisma efepaiyaifono ikitirofoma ini. A pexe sapa mñāoxori paitinī māpekaxō fotomanifo āfe xefapa ratakaxō. Risfi rafeta nexati fākaxō a mñāoxori kini fakaxō, nā finimisma fotomanifo, āfe xefapa. <sup>5</sup> Jesús ato ōikī tāpikōia ini. “Naato nōko yama noko sharafaxotiroki,” faifono Jesús tāpini. Nāskafaifono a finimisma Jesús yoini iskafakī: “Efe yorashta, mī chaka mē mia soaxona,” Jesús fani.

<sup>6</sup> A Moisés yoikī kirika keneni keskara ato tāpimamisfāfe ranārīto ano tsoaxō nikakī shinānifo. <sup>7</sup> Nānoxō shinānifo: “¿Afeskai Jesús mekaimē iscai? Tsōa noko chaka soaxotiroma. Nios fistichi noko axotiro. ¿Jesús āa shināimē Nios?” ixō shinānifo.

<sup>8</sup> Askafaifāfe Jesús ato tāpini āto shinā mēraxō shināifāfe. Jesús ato yoini: “¿Afeskai mā iskara shināimē?” ato fani. <sup>9-10</sup> “Akka ea Niospa shināmani. Nāskakē ē mato ōimanō Niosxō na feronāfake ē sharafatiro. Tsōa iskara atiroma, Niospa shināmanai fistichi atiro. Nāskakē ē na feronāfake sharafa mā tāpinō Niosxō ēri āfe chaka soaxotiro,” ixō ato yoini. Nāskafata anā yoini feronāfake finimisma, <sup>11</sup> “Fininākaifāfe. Mī xefa fifaini, mī pexe ano katāfe,” fani.

<sup>12</sup> Askafaino fininākaifani. Fininākaifaxō āfe xefa fifaini, āfe pexe ano kaito keyokōichi ōinifo. Nāskakaxō, “¡Aicho, Nios sharakōi! Na keskara nō ōimisma, sharakōi,” fanifo.

### *Jesús Leví ifini aōxō tāpimis inō*

(Mt. 9.9-13; Lc. 5.27-32)

<sup>13</sup> Nāskax Jesús anā kani ĩa efapa ano. Anoxō yora ichapa rasichi ōinifo. Nānoax Jesúski ichanānifo. Nānoxō ato tāpimani.



<sup>14</sup> Nãnoax kakĩ Jesús finõfãikĩ Levĩ\* õini, a yonoai ãfe tsaoti mĩsa ano tsaoxõ, ato keyokõĩ kori fĩaito. Nã Levĩ ãto kori fĩamis ini ãfe xanĩfo minixiki Roma anoa. Levĩ Alfeo fake ini. Jesús õixõ yoini: “Levĩ, efe kafe ã mia tãpimanõ,” fani. Askafaino Levĩ afe kani.

<sup>15</sup> Nãskax Jesús aõxõ tãpimisfo fe kani Levĩ ato kenano a anoxõ pii fokani. Ato kori fĩamisfo fe yora chakafori a Moisés keneni nikamisfomafãferi Jesús feta pinifo. Yora ichapa Jesús fe foafofãinifo. Nãskakẽ yora ichapakõichi Levĩ pexe mẽraxõ pinifo. <sup>16</sup> Nãskakẽ a Moisés yoikĩ kirika keneni keskara ato tãpimamisfo nãfori fariseofo inifo. Afãfe Jesús õinifo yora chakafo feta piaito. Nãskaxõ a Jesúsxõ tãpimisfo yõkanifo: “¿Afeskakĩ mãto maestro na ato kori fĩxomisfo feta piimẽ? Yora chakafo fetari pii,” ato faifono, <sup>17</sup> Jesús nikaxõ ato yoini: “A sharafãfe notoro fenakanima, a isinĩ ikaifãfemari notoro fenakanima. Akka nã isinĩ ikaifãfe notoro fenakani. Nãskakẽri ã ato yora sharafos kenatapa ikerani ã oama. Nã yora chakafo ã ato tãpimaniyoi ã oanõ,” ato fani.

*Nã foni tenemisfofãfe Jesús yõkanifo  
(Mt. 9.14-17; Lc. 5.33-39)*

<sup>18</sup> Juan Maotista ãfe inafãfe ãto feyafati ipaoni fisti rasi pikakĩ pipaonifoma foni tenemisfo ipaonifo Nios shara shinãkakĩ. Nã fariseofo nãskarari ipaoni ãto feyafati. Nãskakẽ yora fetsafãfe Jesús yõkanifo tãpipaikakĩ, “Jesús, ¿afeskakĩ mĩ inafãfe mẽxotaima piimẽ? Juan ãfe inafãfe foni tenekaninõ Nios shinãsharakakĩ. Askatari fariseofãferi foni tenekaninõ. Akka, ¿afeskai mĩõxõ tãpimisfo askaramamẽ?” fanifo.

<sup>19</sup> Askafaifãfe anã Jesús ato yoini: “Feronãfake ãfiyaino, yorafo ano fisti ichanãkaxõ afara fetsa fetsatapafõ afeta pitirofo inimayanã, aicho fakakĩ akiki inimakakĩ. Akka feronãfãke ãfi fikĩ foni tenetiroma. Askafixõ inimakĩ pitiro. <sup>20</sup> Akka mã fene rẽteafono ãfe yorafãfe shinãkakĩ foni tenetiromo,” Jesús ato fani. (“Nãskakẽ ã nono ikano inimakĩ eõxõ tãpimisfãfe efeta pimisfo. Akka mẽ naano ea shinãkakĩ tsõa pitiroma eõ noikakĩ,” ato fani.)

<sup>21</sup> Askata anã fetsa ato yoini: “Tsõa sama fenaya sama xini kishi fatiroma. Nõ askafaino sama fena samama chakanatiromo. Nãskatari sama fenafe sama xini isharamatiroma. Nãskakẽri nã ã mato yoiai keskara mã nikakõixõ a mã ipaoni keskara anã mã itiroma mãmãĩ ea nikakõiax. A mã ipaoni keskara shinãmakita nãskax mãto yora fena keskara shara itiro. <sup>22</sup> Nãskarifikĩ tsõa mãmã fata koiro pisha xini mẽra nanetiroma nã mãmãnõ faraxakaino toxamãiyonõ. Nãskakẽ nã mãmã fata fe koiro pisha chakanatiromo. Akka nã

\* **2:14** Levĩ ane rafeya ipaoni. ãfe ane fetsa Mateo.

mãto xinifãfe mato yoimisfo keskara fe nã ã mato yoiai keskara osinãtiroma. Nã ã mato yoiai keskara Niospa meka sharakõi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka osinãtiroma. Nãskakẽ mã nikapaifi mã shinãsharatiroma. Nãskarifikĩ tsõa mãmã fata koiro pisha xini mẽra nanetiroma nã mãmã nõ faraxakaino toxamãianõ. Nãskakẽ mã mãmã fata fe koiro pisha chakanatirofo. Akka mã mãto xinifãfe mato yoimisfo keskarafe mã ã mato yoiai keskara osinãtiroma. Nã ã mato yoiai keskara Niospa meka sharakõi. Akka a mãto xinifãfe mato yoimisfo anori shinãx mã isharatiroma. Niospa mekaya meka chaka osinãtiroma. Nãskakẽ mã nikapaifi mã shinãsharatiroma.”

*Nã judeofãfe pena tenetitã Jesúsxõ tãpimisfãfe aros keskara metesfenifo*

*(Mt. 12.1-8; Lc. 6.1-5)*

<sup>23</sup> Jesús aõxõ tãpimisfo fe kani a judeofãfe tenetitã. Tarepa kakĩ ãfe inafãfe aros keskara meteskaxõ fikaxõ pinifo. <sup>24</sup> Nãskafaifãfe fariseofãfe õikakĩ ato iskafanifo: “Õipo. ¿Afeskakĩ mã inafãfe na aros keskara metesfekanimẽ na pena tenetitã tsõa yonotiroma ixõ Moisés noko yoifinino?” fariseofãfe fanifo.

<sup>25</sup> Ato askafaifono Jesús ato kemani: “Akka, ¿a nõko xini Davidõna kirika kenenifo keskara mã õimismamẽ? ¿David afaa afeska fanimẽ ãfe inafõ feta fonãikõikĩ? <sup>26</sup> Nãskakẽ David Nios kĩfiti pexefã mẽra ikikaini. Akka mã Nios kĩfiti pexefã anoax Abiatar mã ato Nios kifixomisfãfe ãto xanĩfo ini. Akka mã Nios kĩfiti pexefã mẽranao David pãa pini a pãa tsõa pishta pifiatiromano. Akka mã ato Nios kifixomisfãfe arese a pãa pimisfo ini. Nãskafekẽ mã pãa David pini a afe foafori ato pikĩni.

<sup>27</sup> “A Niospa taefakĩ feronãfake onifani. Askata teneni. Nã feronãfake Niospa tenemani, pena tenetitã yonoyamanõ. <sup>28</sup> Nãskakẽ Niosxõ ã yoitiro na pena tenetitã ãmãi xanĩfokõixõ afeskaimãkai ã yoitiro. Nãskakẽ ã mato yoi ãfe inafãfe afaa chakafakanima aros keskara meteskakĩ pena tenetitã fonãiki finakõikaxõ,” ato Jesús fani.

### 3

*Feronãfake mẽke yõshiya Jesús sharafani*

*(Mt. 12.9-14; Lc. 6.6-11)*

<sup>1</sup> Jesús anã ikikaini judeofãfe ãto ichanãti pexe mẽra. Nãno feronãfake mẽke yõshiya ini. <sup>2</sup> Aas õinifo, judeofãferi. “Jesús sharafaimãkai nõ õinõ na pena tenetitã,” fanifo yõaxikakĩ.

<sup>3</sup> Askata Jesús yoini nã feronãfake mẽke yõshiya: “Fininãkafata ano nife nakirafe,” fani.

<sup>4</sup> Askata yorafo yõkani: “¿Afaa nõ afeska fatiromẽ pena tenetitĩa? ¿Shara nõ atiomẽ? ¿Chaka nõ atiroraka? ¿Nõ ifitiromẽ? ¿Nõ retetiroraka?” ixõ ato yõkani.

Ato askafaito tsõa kemanima. <sup>5</sup> Ato feratexõ Jesús ato õini, yora fetsafoõnoax shinãyamaifãfe. Askatari Jesús shinãmitsani. Shinãmitsaxõ yoikĩ iskafani feronãfake: “Mëshafe,” fani. Askata nikax mëshatani. Mëshatanaino sharatani. <sup>6</sup> Askaito õikani fariseofo õitifishkinifo. Tsekefainifo ichanãti pexe anoax. Taefakakĩ shinãnifo: “¿Afeskafaxõ na Jesús nõ retetiromẽ?” fanifo. Herodes ãfe inafõ feta shinãnifo.

*Yora ichapa ini ãamãfã ano*

<sup>7</sup> Askata Jesús anã kani aõxõ tãpimisfo fe ãamãfã kesemẽ ano. Nãskakẽ Galilea anoafõ yora ichapa rasi fonifo. Jesús chĩfafainifo. <sup>8</sup> Mã yorafãfe nikakanax fonifo, nã Jesús ato sharafaino nikafaikani fonifo Jesús ari. Judea anoafõ, Tiro yafi Sidón anoafõ fonifo. Jesús ano nokonifo.

<sup>9</sup> “Kayakõi yorafo fei kiki,” ato fani aõxõ tãpimisfo Jesús. “Ea shoi aki fetirofoki, ea kanõa fexokãfe ã nanenõ,” ato fani. <sup>10</sup> Jesús ichapa yora rasi sharafaino, nãskakẽ na yora isinĩ ikani akiki fenifo Jesús shinãfãikani ramãpaikani ato sharafanõ. <sup>11</sup> Nãskaino a niafaka chakafoyafãfe Jesús õinifo. Nãskakẽ Jesús fichikanax feopakefofãnifo Jesús nãmã. “Jesús mĩ Niospa Fakekõiki,” niafaka naneafãfe fãsikõi fanifo.

<sup>12</sup> Askata Jesús ato yoini: “Tsoa yoyamakãfe ã Niospa Fakeki,” ato fani.

*Jesús aõxõ tãpimisfo doce feronãfake ifini  
(Mt. 10.1-4; Lc. 6.12-16)*

<sup>13</sup> Nãskata Jesús mãchi keya mãpeni. Ari kakĩ aõxõ tãpimisfo ichapa ato kenani ato yoixiki arixõ tãpinõfo. Askata Jesús ano fonifo aõxõ tãpimisfo. <sup>14-15</sup> Feronãfake doce faxõ ato ifini, afe rafeafono ato nĩchixiki aõnoa ãfe meka shara ato yoitanõfo, nãfãfe yorafo makinoa niafaka yõshi chakafo ato potaxotanõfo. Nãskata nãfo ato aneni, “Èfe meka yoimisfo” ato fakĩ. <sup>16</sup> Nã tii ato ifipakeni fisti rasi. Taefakĩ Simón ifini. ãfe ane fetsafaxoni, Pedro kenaxiki. Simón ikaino, <sup>17</sup> Jacobo yafi ãfe onefetsa Juan kenani, ãto apa Zebedeo ini. Jesús ato ane fetsa kenani Boanerges fakĩ. Nõ askafatiro, “Yora finakõia oa nai tiri ikai keskara” fakĩ. <sup>18</sup> Askatari Andrés kenani, Felipe ikaino, Bartoloméri ikaino, Mateori ikaino, Tomásri ikaino, Jacobo fetsari ikaino, Alfeo fake. Askatari Tadeori ikaino, Simón fetsari ikaino. Na Simón nãskara ipaoni nã yora xanĩfo chakafapaikĩ, potapaikĩ fetsafo feta. Mã ato makinoax ota Jesús fe rafeni. <sup>19</sup> Askatari Judas Iscarioteri ifini. Nã

Judás Iscariote Jesús fe iyopaoni. Nāskaxō chipo chakafakī ato achimani Jesús retenōfo. Nā tii Jesús ifini aōxō tāpimiskōi inōfo.

*Yora fetsafāfe, “Jesús niafakaōxō ato sharafaira,” fanifo*  
(Mt. 12.22-32; Lc. 11.14-23; 12.10)

Nāskata māchifā ariax fotota, āfe inafō fe ikikaini pexe mēra. <sup>20</sup> Anā yora rasi ichanāfashoni. Askaito ōikī, yora ichapa ōikīkakī, pitirofoma inifo. <sup>21</sup> Jesús afe yorafāfe tāpinifo mā pexe mēra kaano fōkaxō Jesús anoa ifipainifo. Yoiaifāfe nikakakī ifipainifo fōkaxō Jesús anā shināsharaima faifāfe.

<sup>22</sup> Askatari a Moisés yoikī kirika keneni keskara ato tāpimamisfo Jerusalén anoax Jesús ano feafono ato yoini: “Na Jesús nā niafaka chakafāfe āto xanīfoōxō nā Beelzebú āfe shara miniano aōxō āto niafaka pōtai,” fanifo.

<sup>23</sup> Jesús nikakī ato kemani meka fetsafaxō: “¿Afeskax Satanás āa potametiromē? Āa itiroma. <sup>24</sup> Nāskakēri yorafo paxkanākanax āa ranā retenāi keyotirofo. Askatari pexe rasi anoax āa ranā retenāi keyotirofo. Nāskax isharatirofoma āa ranā retenātirofo. <sup>25</sup> Fetsari nā nofe yorafo mīshti paxkanātirofoma. Paxkanāx keyotirofo. <sup>26</sup> Nāskakēri Satanás āfe inafō fe paxkanātiroma. Paxkanāx keyotiro anā xanīfo itiroma.

<sup>27</sup> “Askatari feronāfake mitsisipakōi taefakī metexkere akaxoma tsoa āfe pexe mēra ikitiroma āfe afama mīshti fīaxikakī. Nāskarifiakī nō yora nexaxō āfe afara nō fīatiro keskafakī, nāskarifikī ē Satanás nexaxō Niospa Yōshi Sharaōxō ē Satanás āfe ina pōtatiro.

<sup>28-29</sup> “Chanīma ē mato yoikōi, keyokōi chaka Niospa soaxotiro. Askatari keyokōi meka chakari Niospa soaxotiro. Askafixō fētsa yoixō, ‘Jesús Niospa Yōshi Sharaōxō askara ato sharafatiroma, Satanás āfe yōshioxō ato sharafai,’ askafaito Niospa ato āfe chaka soaxotiroma, āto neepakexanō,” ato fani Jesús.

<sup>30</sup> Anori yorafāfe yoini: “Jesús yōshi chakaya,” fanifo. Nāskakē Jesús ato yoini Epa Niospa Yōshi Sharaōxō ato sharafai.

*Jesús ōifekani āfe afanō āfe extonō fenifo*  
(Mt. 12.46-50; Lc. 8.19-21)

<sup>31</sup> Jesús āfe afanō onefetsanō nokonifo a Jesús ano. Mā nokokanax pexe mēra ikinifoma. Xafakīa ninifo pexe emāiti. Nānoxō yora fetsa nīchinifo Jesús yoitanōfo. <sup>32</sup> A Jesús foaketi-faya kekanax tsaoafāfe yoinifo: “Jesús, mā mī efanō mī extonō nokofo. Mia yōkakamekani,” fanifo.

<sup>33</sup> Askafaiifāfe ato Jesús kemani: “Ēfe efanō, ēfe poinō, ē ato fistis shināima. Yora fetsafori ē ato shināi efe yora keskarafo.

¿Tsoamē ěfe efa, ěfe extofori? ¿Mā tāpipaimē tsoamāki ěfe efa, ěfe extofori? Ĕ mato yoinō,” ato fani.

<sup>34</sup> Askafaxō Jesús ōini a tsoafo. Nāskaxō ato yoini: “Nā ea Ifofaifo, ea nikaifo efe yorafo. Nakīa ěfe extofo, ěfe efafo,” nāskafani. <sup>35</sup> “Nā Niospa fichipaiyai mā akaino Niospa mato fichipaiyai keskarifakī nā ěfe extofo, ěfe chikofo, ěfe efa keskara,” ato fani Jesús.

## 4

*Jesús ato yoini meka fetsafaxō fimi exe saamisnoa*  
(Mt. 13.1-9; Lc. 8.4-8)

<sup>1</sup> Nāskata anā Jesús ato tāpimani ĩa kesemēxō. Nāskakē yora ichapa ichanānifo Jesús ano. Nāskaifono Jesús kanōa ĩa ketokonō rakano aō naneinīkafanax tsaoni. Akka yorafo ĩa ketokonō tsaonifo. <sup>2</sup> Nāskaxō Jesús ato tāpimani afama mīshti meka fetsafaxō. Ato yoikī iskafani:

<sup>3</sup> “Ea nikakāfe ě mato yoinō,” Jesús ato fani. “Feronāfake fistichi fimi exe saafoni āfe nōxati mēra kēchoxō fokī. <sup>4</sup> Fimi exe saafokaino ranāri fai nēxpakīa pakeaino a kachikirixori peyafāfe pini. <sup>5</sup> Nāskata fimi exe ranāri makexfoki pakei fetseni mai shara anoma. Nāskakē samamakōi fimi exe foaipaini. <sup>6</sup> Akka mā foaipaiyaito xinī namani, yosipanā, āfe tapokairoko mai mēra kasharakē. Foaikax, samama nani xinī tsasifaano. <sup>7</sup> Akka ranāri fimi exe moxafo mēra pakeni. Nāskakē moxafo foaikī namani. Nāskakē fimi exe foaikax fimiyamax nani. <sup>8</sup> Akka fimi exe ranāri mai shara ano pakeni. Nāskax foaisharax fimi ichapayakōi ini. Fetsa treinta fimiya ini. Fetsa sesenta fimiya ini. Fetsari cien fimiya ini.”

<sup>9</sup> Nāskaxō Jesús ato yoini: “Mā pachoyakī ea nikasharakōikāfe,” ato fani.

*Meka fetsafaxō yorafo yoixō a aōxō tāpimisfo xafakīakōi ato yoini*

(Mt. 13.10-17; Lc. 8.9-10)

<sup>10</sup> Mā yora ichapa rasi foaifono Jesús ares nēteni, akka nā foafāfema a aōxō tāpimisfo docefo fe nēteafāfe yōkanifo. “¿Afaa mī noko yoipaiamē meka fetsafaxō?” faifono, <sup>11-12</sup> Jesús ato kemani, “Epa Niospa a ika anoxō afe yorafo ato ĩkināi afe keskaramākī ě mato xafakīa yoinō. Akka fetsafo meka fetsafaxō ě ato yoiaki. Akka ōifikakī tāpikanima nikafikakīri nikasharakanima. Nios Ifofakaspakani. Nāskakē Niospari ato chaka soaxotiroma.”

*Jesús meka fetsafaxō fimi exe saamisnoa ato yoini ato tāpimasharakōixiki*

(Mt. 13.18-23; Lc. 8.11-15)

13 Nāskata ato yoini: “¿Nā ě ato meka fetsafaxō yoiai mā tāpīamamē? Akka, ¿afeskakī fētsa nikatiromē? 14 Nā fimi exe fanamis, nā Niospa meka yoimis keskara. 15 Akka ranāri yora fetsafo fimi exe fai nēxpakīa pakea keskarafo Niospa meka nikafikani. Akka Niospa meka mā nikafiaifono Satanās ato xītītiro peyafāfe fimi exe pitiro keskafakī. 16 Fetsafo nā fimi exe tokirifo mēra pakeax foaipaiyai keskarafo. Niospa meka nikai akiki inimakōikī nikayotiro. 17 Akka nā fimi exe foaikax āfe tapo mai mēra ikikēma xinī namatiro keskafakī. Nāskarīfakī fētsa taefakī Niospa meka nikai inimayotiro. Akka afara chaka nokoaino anā inimatiroma anā Nios Ifofatiroma, Niospa meka anā āfe shinā mēra nanekema. 18-19 Akka atiri fimi exe moxafo mēranoax foaikax yositiroma keskarafo. Nāskariatirofo Niospa meka shara nikasharakanaxma. Akka fētsa afarafo shinākī āfe shinā mēraxō shināchakakōitiro. Nāskaxō kori ichapakōi noikī, ‘Ē kori ichapayax ě inimakōitiro,’ ixō shinākī Niospa meka anā shināima. Nāskakē Niospa meka nikafikī afara fetsafo shināino afaa Niospa axotiroma. 20 Akka atiri fimi exe mai shara anoax foaikax fimi ichaya ini. Āfe fimi treinta ini, fetsari afe fimi sesenta ini, fetsari āfe fimi cien ini. Nāskafakīri fētsa Niospa meka nikakōikī nikasharakōitiro. Akka fētsa Niospa meka nikakōisharakī nā fimi exe treinta keskara itiro, fetsari nikasharakōikī nā fimi exe sesenta keskara itiro, fētsari nikasharakōikī nā fimi exe cien keskara itiro,” ixō Jesús ato yoini.

*Meka fetsafaxō rāpariki Jesús aōxō tāpimisfo yoini  
(Lc. 8.16-18)*

21 Nāskatari ato yoini. “Akka tsōa rāpari otaxō kafo mēra nanetiroma, askatari a ika nāmā tsāotiroma chaikairoko chaxanō. Akka nō rāpari fomākīa tsāofaano chai chaxatiro. Nāskakē ōisharakōitirofo. 22 Nāskarīfiakī nō afaa pishta onetiroma, nō onefiano keyokōichi tāpitirofo. Nāskarīfiakī a fomāyomisfo Niospa xafakīa faxii. 23 Mā pachoyakī ea nikasharakōikāfe,” ixō Jesús ato yoini.

24 Nāskaxō anā ato yoini. “Nikakapo, ě mato yoinō. Akka a ea nikakī finasharakōiai, Niospa tāpimasharakōi. 25 Akka nā tāpia nā Epa Niospa tāpimakī finasharakōi. Akka fetsa ě tāpisharakōia ifīaxō nikamiskēma, askara yora nā tāpia pishta Niospa anā fīatiro,” ixō Jesús ato yoini.

*Jesús meka fetsafaxō yoini, fimi exe yositiroōnoa*

26-29 Nāskata Jesús anā ato yoini. “Epa Nios xanīfāfe noko īkinā iskaraki. Nā feronāfāke fimi exe mai shara ano fana keskarakī. Mā fanax oxatiro fakishi, akka penata yonotiro. Nāskakē ifāfe ōiyamaino ares fimi exe yositiro. Nāskakē mai mēranoax fimi exe āfe tapo foaikax yositiro. Mā yosiax efaa

itiro, nāskata chipo fimitiro. Nāskata mā fana fimi pachiano, ifāfe topitiro māmāi pachiano,” ixō Jesús ato yoini.

*Mostaza exeōnoa yoikī meka fetsafaxō Jesús ato tāpimani*  
(Mt. 13.31-32; Lc. 13.18-19)

<sup>30</sup> Askata anā Jesús ato yoini iskafakī: “Afe keskaramākī Nios xanīfāfe noko īkinā ē mato yoinō. <sup>31</sup> Nā mostaza exe yōra āfe tarepa fanatiro. Akka nā fimi exe pishtakōi fetsafo keskerama. <sup>32</sup> Akka nā fimi exe fanax, mā yosiāx efapakōi itiro fana fetsafo keskarama. Nāskakē mā teshpapafai fetseano peyafāfe āfe teshpafo ano naa fatiro. Nāskarifiakī tafakī ichapatoma Nios Ifofayotirofo. Akka chipo ichapafāfe Ifofakōitirofo,” ixō Jesús ato yoini.

*Afama mīshtikiri yoikī meka fetsafaxō Jesús ato yoipaoni*  
(Mt. 13.34-35)

<sup>33</sup> Nāskatari meka fetsafaxō Jesús ato tāpimani Niospa meka shara keyokōi tāpikanimākai. <sup>34</sup> Akka meka fetsafaxō Jesús mēxotaima ato yoipaoni. Akka nā aōxō tāpimisfo xafakīakōi ato yoipaoni.

*Jesús nefe yafi īamāfā poo iki meseniaito nishpa fani*  
(Mt. 8.23-27; Lc. 8.22-25)

<sup>35</sup> Mā yātapakeaino nā pena fisti Jesús aōxō tāpimisfo yoini: “Nō okiri īamāfā pokefainikanō, fokāfe,” ato fani.

<sup>36</sup> Nāskata nāno yorafo nīchifainifo, Jesús iyoifokakī. Nāskakanax kanoānāfā mēra nanefainifo. Mā foaifono kanōanāfā fētsari fokākī yorafāfe ato chīfafainifo. <sup>37</sup> Īamāfā pokefainaifono nāno atoki nēfēfākōi nokoni. Atoki nēfēfākōiaino īamāfā pooiyanā kanōanāfā faka fospikōini. <sup>38</sup> Akka Jesús oxano kanōanāfā chipo kamaki rakax, āfe tēkesati kamaki tēkesameax. Oxakē aōxō tāpimisfāfe mōinifo iskafayanā: “¿Ifo, mī noko shināimamē mā nō āsaikai?” faifono, <sup>39</sup> Jesús fininīkafāta, “Nēfe, nishpafe,” fata, “Īamā nishpafe,” fani.

Nāskafaino nefe nishpani anā feroanima ĩa fe nefe. <sup>40</sup> Nāskata chipo Jesús aōxō tāpimisfo yoini. “¿Afeskai mā rateimē? ¿Mā ea chanīmara fasharamamē?” ato fani.

<sup>41</sup> Ato askafaino, akka aōxō tāpimisfo ratekōiyanā āa ranā yoinānifo iskakani: “¡Kee! ¿Na feronāfake afe keskaramē na nefe feta īamāfānē ato yoiaito nikaifo?” ikanax yoinānifo.

## 5

*Gadara anoxō Jesús feronāfake makinoa niafaka rasi potani*  
(Mt. 8.28-34; Lc. 8.26-39)

<sup>1</sup> Nāskata okiri īamāfā pokefaikanax nokonifo, Gadara mai ano. <sup>2</sup> Nāskata Jesús kanōanāfā makinoax fotopakekafanaino,

nã feronãfake niafaka yõshi chaka nanea nãno akiki oni. Nã feronãfake nã maiabo kinĩfã mēranoax oni. <sup>3</sup> Mai kinĩfã mēra ipaoni. Tsõa nexatiroma ipaoni kaninãnã nexafiaifono. <sup>4</sup> Akka mēxotaima kaninãnã otxkere ata metexkere ata fafiainfono, kaninã tesa tesa aki fetsapaoni. Tsõakai afeska fatiroma ipaoni. <sup>5</sup> Nãskata penata kafãsata fakishchãiri kafãsapaoni, mãchifã ariri mãpepaoni maiabo anori kinĩfã mēra kapaoni. Nãskata fiisiyanã tokirinĩ ãa tsakamepaoni. <sup>6</sup> Akka chai ixõ Jesús fichiax, akiki farekekeranax aõ ferotaifi ratokonõ mai chachipakefofãni. <sup>7-8</sup> Fãsikõi yoini fiisiyanã. “¡Ea afeska fayamafe, Jesús! Mĩ Nios Sharapa Fakekĩ, ě mia yoi Niospa mia õi kiki ea omiskõimayamafe,” fani. Nãskai mekani, akka Jesúsmãi iskafakĩ yoiano: “Niafaka yõshi chakata, na feronãfake maki-noax tsekekaitãfe,” mãmãni faano.

<sup>9</sup> Askafaito Jesús yõkani: “¿Mĩ afe anemẽ?” faito, nãato kemani: “Ĕfe ane Legiõn nõmãni ichapax,” fani.

<sup>10</sup> Nãskaxõ nã nãfaka Jesús yoini iskafakĩ: “Mai fetsa ari noko nĩchiamape,” fani. <sup>11</sup> Akka nã chaima mãchifã mãnãnẽxõ kochifãfe pinifo. <sup>12</sup> Nãskakẽ niafaka yõshi chakafãfe iskafanifo: “Kochifo mēra noko nĩchife, kochifo mēra nõ ikinõ,” faifono, <sup>13</sup> kochifo mēra Jesús ato nĩchini. Nãskakẽ niafaka yõshi chakafo feronãfake makinoax tsekekainax kochifo mēra iki fetseni. Nã niafaka chakafo dos mil ini. Nã niafakafo kochifo mēra ikiano kochifo ichoax mãfãfã ariax ãamãfã mēra keyopakeax ãsai fetsenifo.

<sup>14</sup> Askaito õikani nã kochifo kexeabo ichoi fetsenifo. Mã fokaxõ a pexe rasi anoabo ato yoinifo, a pexe rasi pasotai ikafori ato yoinifo nã õiabo keskara. Ato askafakĩ yoiaifono nikakani yõrafã rasi fenifo kochifo ãsaito õipaikani. <sup>15</sup> Mã nokokaxõ õiabo nã feronãfake tsoa ini rapati shara safeax, mã shinãsharai a makinoax mã niafaka yõshi chaka tsekeano. Nãskaito õikani yõrafã rasi ratei fetsenifo. <sup>16</sup> Nã Jesús niafakafo kochifo mēranoa potaito õikaxõ ãto kaifo yoifokani fonifo. <sup>17</sup> Nãskakẽ yorafãfe yoinifo iskafakakĩ: “Jesús, nonoax katãfe, nõ mia õipaimakai,” fanifo.

<sup>18</sup> Mã Jesús kanõanãfã mēra naneinãkafanaino, nã feronãfake niafakaya ikato, “Ĕri mefe kapai,” fani. <sup>19</sup> Nãskafaino, “Maa, mĩ efe katiroma. Mĩ pexe ano katãfe. Mĩ kaifofo fe kaxõ mefe yorabo ato yoitãfe a nõko Ifãfe mia sharafa, mĩno noikĩ mia sharafaki,” ixõ Jesús yoini.

<sup>20</sup> Askafaito nikafaini nã feronãfake kani. Kaxõ nã pexe rasi anoabo ato yoini, nã Decápolis anoabo nã Jesús sharafaa keskara. “Aira, nikakapo, ¿afeskax sharamẽ?” iki fetsenifo.



*Jairo fake xotofake mā nakē Jesús otofani. Askatari kēromāri Jesús rapati mēeax sharani*

(Mt. 9.18-26; Lc. 8.40-56)

<sup>21</sup> Askafata Jesús mā kanōanāfānē ĩamāfā pokeferani oano yōrafā rasi ano ichanānifo. Akka Jesús ĩamāfā ketokonō nēteni.

<sup>22</sup> Akka nāno nā ichanāti pexe anoax xanīfo fisti akiki oni, āfe ane Jairo. Jesús fichiax a nāmā feopakekafani. <sup>23</sup> Nāskaxō yoini iskafakī: “Mā ēfe fake xotofake nai kiki. Mī mēkemā ea rāmāxoniyofe, sharax ninō,” ixō yoiaino, <sup>24</sup> Jesús afe kani, yōrafā rasiri afe fonifo. Afe fokakī shoiakī fetsanifo.

<sup>25</sup> Nā yōrafā rasi mēra kēro fisti ato fe kani, doce xinia aka ini isinī iki, imi nesemisma ini. <sup>26</sup> Omiskōitiani sharapai notorofa mēra katiani, mā kori potakī mitotiani ini. Tsōa pishta sharafatiroma ini, askatamaroko isinī iki finakōini.

<sup>27-28</sup> Nā kēromā Jesúsnoa yoiāifāfe nikani. Nāskakē yōrafā rasi foaifono ato acho kaxō āfe tari kexa ramākani. “Ē āfe tari kexa ramākax ē sharatiroraka,” ixō āfe ōiti mēraxō shināni.

<sup>29</sup> Nāskaxō āfe tari kexa ramākaxō meea āfe imi koshikōi nesetani. Nāskaxō āfe yora meea mā sharakōia meeni. <sup>30</sup> Jesús mā tāpixō āfe sharaōnoax nā kēro mā sharano, yōrafā rasi mēra fesoakekafā ato yōkani: “¿Tsōa ea tari ramākamē?” ato faito, <sup>31</sup> a aōxō tāpimisfāfe yoinifo iskafakakī: “¿Mī meimamē yorafāfe mia shoiakifetsakaxō mia pitsikinaifāfe? ¿Afeskakī mī noko yōkaimē tsōa ea ramāmē?” ixō fanifo.

<sup>32</sup> Askafaifono Jesús aa kemataima ōiakeni, tāpixiki tsōa ramāmākī. <sup>33</sup> Nāskaino nā kēromā ratei choayanā a sharafaa mā tāpixō, akiki kaxō ratokonō mai chachipakefofā yoini: “Ē mia tari kexa ramākax mē shara,” ixō yoita a isinī itianiri yoini. <sup>34</sup> Nāskafaito Jesús yoini: “Yōxashta, mā mī shara ea chanīmara faax. Nāskakē tanaima katāfe a mī isinī imis mā mī sharaki,” fani.

<sup>35</sup> Jesús mekai xateamano nā xanīfo Jairo pexe anoax fet-safo akiki fēkaxō yoifekani fenifo. Iskafakī yoinifo: “Mā mī fake naaki anā nōko Ifo fekaxtefayamafe,” faifono, <sup>36</sup> akka Jesús ato nikakima, iskafakī nā xanīfo Jairo yoini: “Ratekima, ea chanīmara fafe,” ixō yoini.

<sup>37</sup> Nāskaxō Jesús, “Tsoa nofe kaima kiki,” ato fani. Pedro iyota, Santiago iyota, āfe exto Juan iyota ato fani. <sup>38</sup> Nāskata mā Jairo pexe ano nokokaxō ōiafo yorafo oiakani fiisinifo nā fake xotofake manokani mā naano. <sup>39</sup> Nāskata pexe mēra ikikaixō ato yoini iskafakī: “¿Afeskai mā oiai fiisikimē? Na fakekai nakeroko oxanō,” ato fani.

<sup>40</sup> Ato askafaito yorafāfe Jesús ōsaketsanifo. Askafaifono pexe xaki mēranoa keyokōi Jesús ato kāimani. Nāskaxō apa yafi afa iyoni, a afe foafori afe fonifo. Nāskakanax nā

fake xotofake raka ano ikifainifo. <sup>41</sup> Nāskata Jesús mēkemā mētsoinīfofā yoini: “Xotofakeshta, ē mia yoikai fininīkafāfe,” faino, <sup>42</sup> koshikōi fininīkafāni, nā xotofake doce xinia aka ini. Mā fininākafānax kani. Nāskaito ōikani yorafo ratei fetsenifo. “¡Kee, ōikapo! ¿Afeskaxō otofamē?” fanifo. <sup>43</sup> Nāskaxō Jesús ato yoini: “Mā tsoa yoiki na fake xotofake nakē ē otofakī,” ato fani. Nāskaxō, “Pimakāfe na fake xotofake,” ato fani.

## 6

### *Jesús Nazarete anoxō nikakaspanifo*

*(Mt. 13.53-58; Lc. 4.16-30)*

<sup>1</sup> Nāskata Jesús nānoax kani āfe maikōi ano. A aōxō tāpimisfori afe fonifo. <sup>2</sup> Nāskata pena tenetitīa ichanāti pexe mēraxō ato yoikī taefani. Anoxō Jesús ato yoiaito nikakani yorafo āa ranā yoinākani iskanifo: “Aira nikakapo, ¿Fanīxō iskara tāpikī finakōiamē? Tāpikī finakōixō afama mīshtifo fai tsōa atiroma keskafai,” ikanax āa ranā yoinānifo. <sup>3</sup> “¿Akka namamē a mīsa famis? María fake Santiagonō Josénō Judasnō Simónnō āto ochi. ¿Akka mā ōimamē afe chikofori nono nofe ikafo? Nāskakē nō nikapayaitoroko,” fanifo. <sup>4</sup> Askafafono Jesús ato yoini iskafakī: “Na mai tio anoxō a Niospa meka yoimis nikakōitirofo aōnoa yoisharakōiyānā. Akka āfe maikōi anoxō nikatirofoma, āfe kaifofo feta afe yorakōifāfe.”

<sup>5</sup> Nāskakē arixō afama mīshti fapaifikī anima. Akka a isinī ikaifo fisti rasi ato ramāino sharai fetsenifo. <sup>6</sup> Nāskata Jesús shināni: “¿Afeskakī ea chanīmara fakanimamē?” ixō tsōa nikayamaino. Nāskakē pexe rasi chaima ano Jesús kafāsani ato tāpimafofāsafai.

### *Jesús aōxō tāpimisfo nīchini Nios Xanīfoōnoa ato yoitanōfo*

*(Mt. 10.5-15; Lc. 9.1-6)*

<sup>7</sup> Nāskata aōxō tāpimisfo doce kenani. Ato kenaino akiki feafono rafe rasi faxō ato nīchini: “Eōxō niafaka yōshi chakafo ato makinoa pōtatakāfe,” ixō ato yoini. <sup>8</sup> Nāskaxō anā ato yoini: “Fāi kakī, mā afaa fokiki, akka mātō mēsteti fisti mā fotiro. Mātō pishari mā fokiki a mā piairi mā fokiki mātō koriri mā fokiki. <sup>9</sup> Nāskax fotakāfe mātō sapato fistiya, mātō rapati fetsari mā fokiki.” <sup>10</sup> Nāskaxō ato yoini: “Mā pexe fetsa mēra ikiāx nāno nētekāfe, nā mā anoax kaitīa. <sup>11</sup> Akka fatora pexe rasi anoxō mato ifikaspayanā mato nikakaspai-fono anoax tsekekāfe mātō taekinoa mapo taa taa ayanā. Mā askafaino tāpinōfo Nios atoki inimayamaino. Ē mato parakima yoi. Nā pexe rasi Sodoma anoāfo feta Gomorra anoāfāfe afara chakakōi fapaonifo. Nāskakē Niospa nā ato omiskōimanaitīa ato omiskōimaxii. Akka nā mato nikakaspaifo nāfo ato omiskōimaki finakōixii,” ixō Jesús ato yoini.

<sup>12</sup> Nāskakē Jesúsxō tāpimisfo anoax fonifo yorafo yoifokani. “Māto chaka xatekaxō Nios Ifofakāfe,” ato fayanā. <sup>13</sup> Ato makinoa ichapa niafaka chakafo potanifo. A isinī ikaifoya ato sharafayanā xiniyaxō ato māmāyanā.

*Juan Maotista nani*  
(Mt. 14.1-12; Lc. 9.7-9)

<sup>14</sup> Xanīfo Herodes nikani Jesúsnoa yoiiaifono aōnoa fanīma mīshtixō yoifofāsafaifono. Nāskakē Herodes shinākī iskafani: “Mā Juan Maotista otoita, nāskakē āfe sharaōxō ato sharafai,” ixō shināni.

<sup>15</sup> Akka fetsafāfe yoikī iskafanifo: “Nā ato Niospa meka yoimis Elíaskīa,” faifono, fetsafāferi yoikī iskafanifo: “Nato Niospa meka ato yoimis, nā afetiama Niospa meka ato yoipaonifo keskafakī,” ixō yoiiaifono.

<sup>16</sup> Nāskafakī yoiiaifāfe nikai Herodes iskani: “Nākīa Juan, mē ato textemafaitano mā anā otoa,” ixō shināni.

<sup>17</sup> Herodes Juan reteyoamano yoikī iskafani: “Mī exto āfi fīayamafe,” faito nikakī, Herodes akiki ōitifishkiki āfe sorarofo yoini achikaxō metexkere akaxō karaxa mēra iki-manōfo. Akka nā Herodías Felipe āfe āfi ini, nā Felipe Herodes āfe exto ini. Akka nā Herodes Herodías fe fīanāni.

<sup>18</sup> Akka Juan Herodes yoini: “Na mī exto āfi mī fīatiroma,” ixō yoiaino, <sup>19</sup> nāskakē Herodías Juan noikaspakōikī retepaini. Akka retepaifikī retetiroma ini. <sup>20</sup> Akka Herodes Juanki rateni māmāi tāpiax Juanmāi feronāfake sharakōikē Nios Ifofasharakōia. Nāskakē kexesharakōini. Nāskakē āfe āfinī noikaspafaito nikafikī, “¿Ē afeskaimē?” ixō shināta, Herodes Juan nikakōini. <sup>21</sup> Akka Herodías mā ato Juan retematiro ini, Herodes āfe cumpleaños ikaino. Nāskakē Herodes fista akī afe xanīfofoya soraro xanīfofoya Galilea anoa xanīfofori ato ichanāfani. <sup>22</sup> Nāskaifono Herodías fake xomaya fista ikaino ikikainax ares yorafāfe ōinōfo mairani. Mairaito ōikī Herodes inimanī, a afeta piaifori inimanifo askafanifo. Nāskakē nā xanīfāfe nā fake xomaya iskafani: “Ea yōkafe a mī fichipaiyai, ē mia mininō,” fani. <sup>23</sup> “Mā na yorafāfe ōikani ē mia pāraima a mī fichipaiyai keskara ea yōkafe ē mia mininō,” ixō yoini.

<sup>24</sup> Askafaino nā xomaya kāikaixō afa yoini iskafakī: “¿Ē afaa xanīfo yōkatromē?” faito āfa kemakī iskafani: “Juan textexō ea āfe mapo ināfe fafe,” fani.

<sup>25</sup> Nāskata nā xomaya anā ikikaixō xanīfo yoini iskafakī: “Iskaratīa sapaki rātaxō Juan Maotista textexō ea āfe mapo ināfe,” fani.

<sup>26</sup> Askafaito nikai xanīfo shināmitsakōini, Juan shināni. “Akka na yorafāfe nikaifono mē na kēro xomaya yoia. Nāskakē ē ato Juan textemapaiyamafikī ē ato textemani,” ixō shināni.

<sup>27</sup> Nāskakē āfe soraro nīchini, Juan textexō āfe mapo fixotanō.

<sup>28</sup> Nāskakē soraro karaxa mēra kaxō, Juan textexō āfe mapo sapaki feni. Nāskaxō nā kēro xomaya ināno, nāatori āfe afa ināni.

<sup>29</sup> Nāskakē Juan āfe inafāfe nikanifo mā texteafono. Nāskakē āfe yora fonifo maifaxikakī.

*Jesús cinco mil feronāfakefo ato pimani*

(Mt. 14.13-21; Lc. 9.10-17; Jn. 6.1-14)

<sup>30</sup> Mā askano a aōnoa yoimisfāfe afe ichanākaxō yoinifo a atanaifo keskara ato tāpimayanā. <sup>31</sup> Askafaifāfe nikakī Jesús ato yoini: “Niri fekāfe tsōa istoma ano nores kaxō nō teneyonō,” ato fani. Yorafo mēxotaima atoki feaifono, nāskakē pitirofoma inifo. <sup>32</sup> Nāskakē Jesús aōxō tāpimisfo fe kanōanāfānē tsōa istoma ano kani. <sup>33</sup> Akka mā fōkaxō yorafāfe Jesús kaito ōikakī tāpinifo. Nāskakē nā pexe rasi anoafō nā aōxō tāpimisfo fe kai ari ichonifo. Jesús aōxō tāpimisfo fe nokoamatai nokoi taenifo. <sup>34</sup> Mā nokoax Jesús kanōanāfā makinoax fotopakekafā ōia yōrafā rasi ōini. Ato fichixō ato shinākōini, nā oa ovejafo ifomais keskara ato ōikī. Nāskaxō afama mīstiffo ato yoisharakōini. <sup>35-36</sup> Nāskakē mā yātapakeaino aōxō tāpimisfo akiki fōkaxō yoinifo: “Mā yātapakei kiki nono tsoa ikamakī. Na yorafo nīchife pexe rasi ari yafi a pexe pasotai ikafo ari fokaxō a piaifo fitanōfo,” faifono, akka Jesús ato kemani: <sup>37</sup> “Askakakīma māroko ato pimakāfe,” ato faito, kemanifo iskafakakī: “¿Mī shināimē na yorafo pimaxiki kaxō a piaifo dos cientos kori exenē pāa nō ato fixotanō?” faifono, <sup>38</sup> Jesús ato yoini: “¿Afe tii mā pāayamē? Fokaxō ōiyotakāpo,” ato faito, mā fokaxō ōitakakī yoinifo iskafakakī: “Nāno cinco pāa yafi foe rafes,” fanifo.

<sup>39</sup> Nāskakē ato yoini: “Ichanāfaxō na yorafo yoikāfe fasi ano tsaonōfo,” ato fani. <sup>40</sup> Ato yoikī askafaifono keyokōi tsaoi fetsenifo, fetsa ano cien ini, fetsa ano cincuenta ini. <sup>41</sup> Nāskata Jesús cinco pāa yafi foe rafe tsomainīfōfā, nai foisnīfōfā Apa Nios aicho fani. Nāskata mā pāa kaxkeketsaxō aōxō tāpimisfo ināni, yorafori ato inānōfo. Askatari foe raferi keyokōi ato inānifo pinōfo. <sup>42</sup> Nāskakē mā keyokōichi pikanax māyakōinifo. <sup>43</sup> Nāskakē a chetefaafo pāa yafi foe doce fēta fospikōiya ini. <sup>44</sup> A cinco pāa piaifo cinco mil feronāfakefos inifo.

*Jesús ĩamāfā femākīa kani*

(Mt. 14.22-27; Jn. 6.16-21)

<sup>45</sup> Mā yorafo pimata Jesús aōxō tāpimisfo yoini iskafakī: “Kanōanāfānē nanekāfe okiri ĩamāfā pokefaitaxikākī Bet-saida ano rekē nokotaxikakī. Ĕ fenakaimakai, Ĕ na yorafo nīchyonō,” ixō ato yoini. <sup>46</sup> Mā yorafo nīchita māchi keya ari

arese kani arixō Apa Nios kīfikai. <sup>47</sup> Mā fakishaino ĩamāfā nakirafe kanōanāfā ini. Akka Jesús kanima, ares fisti nēteni. <sup>48</sup> Jesús ōini aōxō tāpimisfāfe tōfeaifāfe nēfefanē ato katima faino ĩamāfā pooiki mesenikōiaino, mā penaino. Nāskakē Jesús atoki kani ĩamāfā femākīa. Akka ĩamāfā femākīa kakī oa ato finōfainai keskara ini. <sup>49-50</sup> ĩamāfā femākīa kaito ōikakī niafakara ixō shinākani. Tai tai inifo. Nāskakē keyokōichi ōikani rateaifono. Akka Jesús ato yoini iskafakī: “¿Afeskai mā rateimē? Ĕki rateyamakāfe,” ato fani.

<sup>51</sup> Nāskata kanōanāfā mēra naneinākakā, nēfefā nishpafani. Nēfefā nishpafaito ōikakī a aōxō tāpimisfāfe, “¡Kee! ¿Afeskaxō nēfefā nishpafaimē?” fanifo. <sup>52</sup> Akka Jesúsnoa tāpiyonifoma, Jesús afama mīshti fatiroxakī cinco pāa cinco mil feronāfakefo ato pimafitano. Niospa Fake fiano āto ōiti mēraxō tsōa shinānima, tāpiyonifoma.

*Jesús Genesaret anoafo a isinī ikaifo ato sharafani*  
(Mt. 14.34-36)

<sup>53</sup> Jesús aōxō tāpimisfo feta ĩamāfā pokefainax Genesaret mai ano nokoni. Nāno ĩamāfā ketokonō kanōanāfā nexanifo. <sup>54</sup> Nā kanōanāfā mēranoax fotopakefōfānaifono, yorafāfe tāpinifo. <sup>55</sup> Mā tāpikanax pexe rasi pasotai ichoi fetsenifo. Nāskakaxō a isinī ikaifo, rātati kamaki rātakaxō ato efenifo Jesús ano. <sup>56</sup> Nā Jesús kai ari fanīma mīshtixō, a isinī ikaifo fai nēxpakīa ato rātanifo. Nāfāfe, “Noko ramāmafe nō mia tari kexa ramākanō,” fanifo. Nā ramāifo tii sharai fetsenifo.

## 7

*Jesús ato yoini afeskai yorafo chakafomakī*  
(Mt. 15.1-20)

<sup>1</sup> Nāskata fariseofo fe a Moisés yoikī kirika keneni keskara ato tāpimamisfo Jerusalén anoax Jesús ano fenifo. <sup>2-3</sup> Nāfāfe ōinifo Jesúsxō tāpimisfāfe mechokomexoma piaifāfe, a āto xinifāfe yoinifo keskayamaifono. Nāskakē ato mekafanifo. Akka fariseofāfe keyokōi judeofo āto xinifāfe yoipaoni keska-paonifo. Piamax taeyoi mechomepaonifo chipo pixakakī. <sup>4</sup> Akka a afarafo ato miniaifo anoax fekanax, a ato xinifāfe yoinifo keskai mechokomekaxoma pitirofoma. Āto xinifāfe afarafo feyafapaonifo keskai nāfori askapainifo. Āto ke-chofoya, āto jarafoya āto ochamefetifoya, āto rakoti choka-paonifo āto xinifāfe apaonifo keskara.

<sup>5</sup> Nāskakē fariseofo feta a Moisés yoikī kirika keneni keskara ato tāpimamisfāfe Jesús yōkanifo: “¿Afeskakī na mīōxō tāpimisfāfe a nōko xinifāfe yoinifo keskara nikakanimamē na mechokomexoma piaifofaifāfe?”

6-7 Jesús ato kemani iskafakĩ: “Nã Niospa meka yoimisto Isaías matoõnoa yoini iskafakĩ:

Na yorafãfe afaa tâpiafoma ato feparapaimisfo. Na yorafãfe eõnoa yoisharafikakĩ, akka ãto õiti mēraxõ ea shinãsharafoma. Æakõi ichanãkanax fanãikani ea kifíyanã. A yorafo tâpimanaifo keskarakai ãfe mekama. Æakõi shinãkaxõ ato yoikani,

ixõ Isaías Niospa meka keneni. <sup>8</sup> Nãskakẽ a Niospa yoini keskara mã shinãkima, a mãto xinifãfe yoini keskara mã shinãmis.

<sup>9</sup> “Nã mã shinãpaiyai keskara fisti mã shinãpai. Nãskakẽ a Niospa mato yoini keskara mã anã nikapaima. <sup>10</sup> Akka Moisés yoini iskafakĩ: ‘Mãto epa yafi mãto efa nikasharakãfe. Akka a ãto apa yafi ãto afa chakafaifo ato retekãfe,’ ixõ yoini. <sup>11-12</sup> Anori kenekĩ yoifinino, akka mã yoikĩ iskafamis: ‘Feronãfãke ãfe apa yafi ãfe afa yoikĩ iskafatiro: “Ë mato afaa inãtiroma, nã ãfenãfo mē Nios inãkĩ ixõ yoitirofo,” ’ mã famis. Nãskata a Niospa yoini anori mã ato yoimisma mãto epa yafi mãto efa kexeshakãfe ifiano. Akka mã ato yoimis iskafakĩ: ‘Anã mãto epa yafi mãto efa mã afaa inãtiroma,’ ixõ mã ato yoimis. Na shara. <sup>13</sup> Nãskakẽ a Niospa yoini anori yoitama, a mãto xinifãfe yoipaonifo anori fisti mã ato yoimis. Nãskaxõ afara fetsafo mã famis, Niospa mekakõi mã yoimisma,” ixõ Jesús ato yoini.

<sup>14</sup> Nãskaxõ Jesús yorafo kenaxõ ato yoini iskafakĩ: “Keyokõichi ea nikasharakõikãfe tâpisharakõixikakĩ ã mato yoinõ. <sup>15</sup> Nã nõ piatokai noko chakana fatiroma, akka nõko shinã mēraxõ nõ afara chakafo shinãito noko chakanafatiro. <sup>16</sup> Mã pachoyakĩ nikasharakãfe,” ato fani.

<sup>17</sup> Nãskata Jesús yorafo nĩchifaini pexe mēra ikini, nãnoxõ a aõxõ tâpimisfãfe yõkanifo: “A mĩ yorafo yoia keskara nokori yoife nõ tâpinõ,” faifono, ato yoikĩ iskafani: <sup>18</sup> “¿Afeskakĩ mãri mã nikasharaimamẽ? ¿Mã tâpiamamẽ afara nõ piato nõko xaki mēraxõ noko chakafatiroma? <sup>19</sup> Akka a nõ piati nõko õiti mēra kaima, nõko ãto mēra kai, mã nõko ãto mēranoax payokomeano chipo nõ aya safatiro.”

“Akka a nõ piati chakama, keyokõi shara,” ixõ ato yoini. <sup>20</sup> Nãskaxõ anã ato yoini: “Akka mãto shinãmã shinãxõ mã afarafo chakafatiro. <sup>21-22</sup> Nãskakẽ ãto shinã mēraxõ shinãkakĩ, yorafãfe afara chakafo shinãmisfo. Feronãfakefãfe ãto ãfima chotaifono, kērofãferi ãto fenema chotamamisfo. Nãskata yometsokata, ato retemisfo. Askatari kēro fetsafo kaxefakãta, fetsafo chakafakĩ, mekakãta; afara fetsafo chakafakãta, ato pãrakãta, a afara apaiyaifo fisti akãta, a fetsafãfe fiaiti fipaikãta, ãa chanikãta, ãa kakapaikãta, askatari

shināsharamisfoma. <sup>23</sup> Nā afara chakafo āto shinā mēraxō shināifo keskafakī nāato ato chakafaxii,” ixō ato yoini.

*Xotofake judeoyamafixō Jesús chanīmara fakōini*  
(Mt. 15.21-28)

<sup>24</sup> Nāskata nānoax pexe rasi Tiro ano Jesús kani. Mā kaax pexe fetsa mēra ikini, ano ikikē tsōa tāpīamanō. Akka nāno ikiax onetiroma ini. <sup>25</sup> Nānoa koshiikōi tāpinifo, nāskakē nā fake xotofake niafaka naneato āfe afa Jesús ano kaxō a nāmā ratokonō mai chachipakefōfāni. <sup>26</sup> Nā kēro xoko fetsa Sirofenicia mai anoa ini. Nāskakē Jesús ano kani. Kaxō yoikai iskafakī: “Ēfe fake xotofake makinoa niafaka yōshi chaka potaxōfe,” fani.

<sup>27</sup> Askafafaiito nikakī Jesús yoini iskafakī: “Āa fakefāfe pikī taefayonōfo. Enefe, a fakefāfe piāi fīaxō nō paxta inā, askarakai sharamaki,” faito, <sup>28</sup> nā kēromā kemani iskafakī: “Ēje Ifo, a mī ea yoiai keskara mē nikai. Akka paxtafāfe pitirofo a fakefāfe piāi āfe potofo mīsa nāmā keyo pakeaito,” faito, <sup>29</sup> Jesús yoini iskafakī: “Chanīma, mī ea kemasharakōia. Nāskakē mā mī katiro, mī fake xotofake makinoax mā niafaka yōshi chaka mā tsekeaki,” fani.

<sup>30</sup> Nā kēro mā āfe pexe ano nokoxō ōia āfe fake xotofake raka ini, a makinoax mā niafaka tsekeano.

*Jesús feronāfake pāstokōi ita mekamisma sharafani*

<sup>31</sup> Jesús Tiro mai anoax tsekekainikakī, Sidón yafi pexe rasi Decápolis finōfaini kaax, Galilea ĩamāfā kesemē nokoni. <sup>32</sup> Nāno yorafāfe feronāfake mekamisma ita pāstokōi iyonifo. Mā iyokaxō yoinifo iskafakakī: “Mī mīfi māmāfe nikamismaki pāstokī,” faifono, <sup>33</sup> Jesús a fisti ori iyonī, yorafo makinoa. Nāskaxō āfe mīfi āfe pacho kini mēra meeini. Askafatari āfe mifiki kemo mechota āfe ana ramākani. <sup>34</sup> Nāskafata nai foisnīfōfā xakaita yoini iskafakī: “Efata,” fakī. (Akka nōko mekapa nō yoimis iskafakī: “Papeita nikasharafe,” faki.)

<sup>35</sup> Nāskafaino, nā pāsto āfe pācho nikasharakōini. Āfe anari sharakōitani, nāskax meka sharakōini. <sup>36</sup> Nāskafata, “Mā tsoa yoiki,” Jesús ato fafaiino, askatamaroko ato yoikī finakōifōfāsa fanifo. <sup>37</sup> Nāskakē, “¡Kee, ōikapol! ¿Afeskaxō iskara sharafaimē?” ikata iskafakī yoinifo: “A pastofa ato sharafaino mā nikakani, a mekamisfomari mā ato sharafaino mā mekakani,” ikanax yoinānifo.

## 8

*Jesús cuatro mil feronāfakefo pimani*  
(Mt. 15.32-39)

<sup>1</sup> Nāskata pena fetsa yorafā rasi anā Jesúski fenifo āfe meka nikai fekani. Nāskata a piaifori ano afaa inima. Nāskaifono Jesús aōxō tāpimisfo kenaxō yoini iskafakī: <sup>2</sup> “Ē na yorafo shinākōi, nono tres nia mā efe ikafono, nonoxori afaa pikanima. A piaifo mā keyoa. <sup>3</sup> Akka afaa pimaxoma āto pexe ano ē ato nīchiano, fonāikani afaa pikanaxma fai nēxpakīa paketirofo. Atiri chai inoax feafoki,” ato faino, <sup>4</sup> a aōxō tāpimisfāfe kemanifo: “Akka, ¿afeskaxō nō ato pimatiromē? ¿Faniā nō afaa fitiromē, nonokai tsoa ikama?” faifono, <sup>5</sup> anā Jesús ato yōkani: “Akka, ¿afe tii mā pāayamē?” ato faito, “Siete pākāi,” fanifo.

<sup>6</sup> Nāskakē Jesús, “Yōrafā rasi nāmā tsaokāfe,” ato fata, siete pāa tsomainīfofā. Apa Nios aicho fata, pāa kaxke pakexō aōxō tāpimisfo ināni. Nāfāferi nā yorafo inānifo pinōfo. <sup>7</sup> Nāskata foe ichapama ranāri ini. Nāskakē atoōxō Jesús Apa Nios aicho fata, aōxō tāpimisfo foe ināni a yorafori ato inānōfo. <sup>8</sup> Nāskakē keyokōichi pikanax māyakōinifo. A pikī chetefaafo siete fēta fospikōia ini. <sup>9</sup> A piaifo yorafo ichapakōi inifo, cuatro mil inifo. Nāskaxō Jesús ato nīchini fotanōfo. <sup>10</sup> Nāskata Jesús a aōxō tāpimisfo fe kanōanāfā mēra naneinākafanax Dalmanuta mai ano kani.

*Fariseofāfe, “Jesús, tsōa atiroma keskara noko ispafe nō mia chanīmara fanō,” ixō yōkanifo*  
(Mt. 16.1-4; Lc. 12.54-56)

<sup>11</sup> Nāno fariseofo akiki fenifo afe yoināi fekani, feparaxō yōkapaikani. Iskafakī yoinifo: “Tsōa atiroma keskafakī afama mīshtifo fakī noko ispafe nō mia chanīmara fanō mī Nios ariax oamāki,” faifono, <sup>12</sup> Jesús fāsi xakainākafā ato yoini iskafakī: “¿Afeskakī na yorafāfe tsōa atiroma keskafakī noko ispafe ea fakanimē? Ē mato pāraima a Nios fistichi atiro keskara ē mato ispaima,” ixō ato yoini.

<sup>13</sup> Ato askafata mā ato makinoax kai kanōanāfā mēra naneinākafā okiri ĩamāfā pokefaini kani.

*“Fariseofo feta saduceofāfe anorima yoimisfoki ato nikayamakāfe,” Jesús ato fani*  
(Mt. 16.5-12)

<sup>14</sup> Akka mā fōkakī, a pifofaifo shināmaki fainifo. Akka nā kanōanāfā mēra pāa fisti ini. <sup>15</sup> Askaifono Jesús ato yoini: “Ōisharakāfe. Fariseofāfe Herodes feta pāa faraxakafo piyamakāfe,” ato fani.

<sup>16</sup> Ato askafaino, a aōxō tāpimisfo āa ranā yoinānifo iskakani: “¿Afeskakī noko iskafaimē? Nōkai pāa yama,” ikanax yoinānifo.

<sup>17</sup> Nāskaifono mā tāpixō Jesús ato yoini iskafakī: “¿Afeskai nō pāayamara mā ikimē, mātō ōiti mēraxō mā shināsharaimamē?



18-19 Feroyafiaxō mā ōi sharaima, pachoyafiaxori mā nikasharaima. ¿Akka mā shināimamē? A cinco pāa cinco mil yorafo ē ato pimaita akka, ¿a chetefaafo afe tii fēta fospia mā fiitamē?” ato faito kemanifo: “Doce fēta ikita,” fanifo.

<sup>20</sup> “Askatari a siete pāa cuatro mil yorafo ē ato pimaita, akka, ¿afe tii fēta fospia mā fiitamē?” ato faito, “Siete ikita,” fanifo. “Askatari, ¿nā siete pāa ē kaxkeketsaxō ē ato minita cuatro mil feronāfake, afe tii fēta texefafo mā fiitamē?” ato fani. “Sietekīa,” fanifo.

<sup>21</sup> Askafaifono ato yoini iskafakī: “¿Ai mā tāpīamamē?” ato fani.

### *Jesús yora fēxo Betsaida anoxō sharafani*

<sup>22</sup> Nāskata mā Betsaida ano nokoafono, yora fēxo Jesús ano iyonifo. Mā iyokaxō iskafakī yoinifo: “Jesús, na feronāfake ramāfe,” faifono, <sup>23</sup> Jesús āfe mēkemā nā fēxo mētsoinīfofā pexe rasi pasoatai iyonī. Nārixō āfe kemō āfe fero mechanafayanā āfe mēkemā ramāni iskafakī yōkayanā: “¿Mā mī afara ōitīromē?” faito, <sup>24</sup> nā fēxo mā ōisharaki iskafakī yoini: “Ē ōi na feronāfakefo oa ififo kafanai keskara,” faito, <sup>25</sup> Jesús anā āfe mēkemā fero ramākani. Nāskafaano nā fēxo mā sharaxō ōisharakōini. Nāskaxō keyokōi xafakīakōi ōisharakōini. <sup>26</sup> Nāskakē Jesús āfe pexe ano nīchīni iskafakī yoiyanā: “Mī anā pexe rasi ano kakiki, mī pexekōi ano katāfe, mī tsoa yoikī,” fani.

*“Mī Cristo mia Niospa ifini nokoki nīchīxii mī nōko xanīfo finakōia inō,” ixō Pedro Jesús yoini*

*(Mt. 16.13-20; Lc. 9.18-21)*

<sup>27</sup> Nāskafata Jesús a aōxō tāpīmisfo fe pexe rasi Cesarea Filipino pasoato fonifo. Fāi kakī Jesús ato yōkani: “¿Ea afaa yorafāfe faimē?” ato faito, <sup>28</sup> aōxō tāpīmisfāfe kemanifo iskafakakī: “Fetsafāfe Juan Maotistara, mia fakani. Fetsafāferi Elíasra mia fakani. Fetsafāferi nā ato Niospa meka yoipaoni fetsa rakikīa mia fakani,” ixō yoinifo.

<sup>29</sup> “Akka, ¿mā ea tsoara faimē?” ato faito, Pedro kemani iskafakī: “Mī Cristo mia Niospa ifini nokoki nīchīxii mī nōko xanīfo finakōia inō,” faito, <sup>30</sup> Jesús yoini iskafakī: “Eōnoa tsoa yoiyamakāfe,” fani.

*“Chipo ea retexikani,” Jesús ato fani*

*(Mt. 16.21-28; Lc. 9.22-27)*

<sup>31</sup> Nāskata Jesús ato yoikī taefani iskafakī: “Ē chipo omiskōi finakōixii. Askatari ea ōikaspakakī ea potaxikani, judeofāfe āto xanīfofo feta a Nios ato kīfixomis xanīfofāfe a Moisés yoikī kirika kenenī keskara ato tāpīmamisfāfe. Askatari ea retexikani, akka ea retefiafono tres nia oxata ē anā otoxii,” ato

fani. <sup>32</sup> Nāskakē xafakĩakōi ato yoini. Ato yoikĩ askafaito ori iyoxō Pedro yoini iskafakĩ: “Ifo, askayamafe mia retekanima kiki,” faito, <sup>33</sup> anā Jesús fesoakekafā aōxō tāpimisfo ōiyanā iskafakĩ Pedro yoini: “Emakinoax katāfe, Satanás. A Epa Niospa shināi keskara mĩ tāpiamak. Akka nā yorafāfe shināifo keskara mĩ shināikai,” fani.

<sup>34</sup> Nāskata Jesús aōxō tāpimisfoya yorafo kenaxō ato yoini iskafakĩ: “Fatora fetsa ěfe inakōi ipaikĩ āakōi apaiyai keskara anā atiroma. Nā ě yoiai keskara nikakōitiro. ‘Ĕfe Ifoxō ea retefiaifono ěkai ěfe Ifo ě potapakenakama,’ ixō shinātiro. <sup>35</sup> Akka fĕtsa āa shinātiro iskakĩ: ‘Ĕ Nios Ifofaito ea retetirofo. Nāskakē ě Nios Ifofaima,’ ixō shinātiro mesekĩ. Askara yora naax ěfe Epa ano katiroma. Akka nā ea Ifofaa, ěfe meka yoiaito askayamākĩ eōxō reteafono ě ifixii efe ĩpaxanō eamāi Ifofamiskē. <sup>36</sup> Akka fatora fetsa afara ichapayakōi ikatsaxakĩ, anā āfenā itiroma. Mā naax omiskōipakenaka. <sup>37</sup> Akka, ĩnĭpaxakĩ yorafāfe afe tii kopifatirofomē? Maa, afaa kopifatirofoma. <sup>38</sup> Akka fatora fetsa eō rāfikĩ, ěfe meka sharari yoikaspai yora chakafāfe ferotaifi ěri aō rāfikĩ yoikĩ iskafaxii: ‘Ĕ na yora ōimisma,’ ě faxii ěfe Ĕpa sharafoya fotoxō, ěfe ājiri sharafori efe fotopakefofāxikani,” ixō ato yoini.

## 9

<sup>1</sup> Askatari anā Jesús ato yoini iskafakĩ: “Ĕ mato pāraima, fatora fĕtsa nono efe iyoxō nayoxoma ěfe Epa xanĭfo finakōia ōiyoxikani āfe sharaōnoax oaito,” ixō ato yoini.

*Jesús āfe femānā fetsa keskara ini, fafekōini. Āfe rapatiri oxokōi ini*

*(Mt. 17.1-13; Lc. 9.28-36)*

<sup>2</sup> Nāskata mā seis nia finōta, Jesús māchi keyakōi ari māpekĩ āfe ina tiis ato iyoni. Pedro iyota, Santiago iyota, Juan iyota ato fani. Nāriax āto ferotaifi Jesús fetsa keskara ini. <sup>3</sup> Āfe rapati fafekōini oxo finakōia ini, mā patsasharafikakĩ tsōa askafatiroma ini. <sup>4</sup> Nānoa Elías yafi Moisés ōinifo Jesús fe mekaifono. <sup>5</sup> Nāskaifono Pedro Jesús yoini iskafakĩ: “Ifo, sharakōi ano nō oa. Nono nō tres tapas fanō, fetsa mia axota, fetsa Moisés axota, fetsa Elías axota, nō fanō,” fani.

<sup>6</sup> Akka aōxō tāpimisfo ratekōinifo. Nāskakē Pedro tāpinima a yoiai keskara, shināyamaino yoini. <sup>7</sup> Nāskaifono kōinĩ ato maipakefofāni. Nā kōi mĕranoax mekai iskaito nikanifo: “Nafi ěfe Fakekōiki ě aō noikōi. Nāskakē nikasharakōikāfe,” ikaito nikanifo.

<sup>8</sup> Askaito nikafikakĩ, a kemataima ōiafo ano ato fe tsoa inima, Jesús fisti ares ato fe ini.

<sup>9</sup> Nāskata mā māchi keya ariax fotoxō, “A mā ōia keskara mā toa yoiki. Ē naax mē anā otoano mā ato yoitiro,” ixō ato yoini. <sup>10</sup> Nāskakē toa yoitama. Ares fisti āto ōiti mēraxō shinānifo mā tāpifikaxō. Naax ě anā otoxira nokofaito nō tāpiama ikanax yoinānifo.

<sup>11</sup> Nāskaxō Jesús yōkanifo, iskafakakī: “¿Afeskakī a Moisés yoikī kirika keneni keskara ato tāpimamisfāfe iskafakī yoimisfomē Elías rekē oi taexii?” ixō yoimisfo faifono, <sup>12</sup> ato kemakī iskafani: “Chanīma, Elías rekē fotoi taexii, nāato ato yoisharaxii itipinīsharanōfo. Akka, ¿afeskakī kirika ano kenenifomē, a ě omiskōixiai yorafāfe ea chakafakakī ea potaifono?” <sup>13</sup> Akka ě mato yoinō mā Elías ifana. Nāskakē nā apaiyai keskafakakī chakafanifo. Nānori aōnoa yoikī kirika kenenifo,” ixō ato yoini.

*Jesús feronāfake naetapa niafaka chaka pōtaxoni  
(Mt. 17.14-21; Lc. 9.37-43)*

<sup>14</sup> Nāskata mā Jesús fe fōtakakī a Jesúsxō tāpimis fetsafo ano nokokaxō ōitoshinifo yōrafā rasifo fe a Moisés yoikī kirika keneni keskara ato tāpimamisfo fe ato fe feratenāifāfe. <sup>15</sup> Nāskaifono Jesús oaito fichikanax akiki keyokōi farekefaikaxō, “Kee, mā Jesús oi kiki,” ikaxō yoisharanifo.

<sup>16</sup> Askaifono Jesús ato yōkani iskafakī: “¿Afeskai mā ato fe feratenāimē?” ato faino, fētsa kemani iskafakī: <sup>17</sup> “Maestro, ěfe fake ě mikiki efea, niafaka chaka a mēra nanexō mekamamismo. <sup>18</sup> Nā kapaiyai arixō, niafaka chakata achiano paketiani. Āfe axfapa fākokeyopaketiani, askatari āfe piti yeyexamis, askatari charishi fetsemis. Mē mī inafō yoia a makinoa niafaka yōshi chaka pōtanōfo. Akka mī inafāfe atirofoma,” faino, <sup>19</sup> Jesús kemani: “Mākai ea chanīmara faima. Mā afara shināmis. Akka afetiakai ě nono mato fe itianima. ¿Afetiakai mā ea nikaimē? Niri nā fake efekāfe,” faino, <sup>20</sup> nāskakē Jesús ano nā fake iyonifo. Akka nā niafaka mā Jesús tāpixō, nā feronāfake anā choamanaino anā nāmā pakeni. Nāskakē taramē taramē iyanā āfe axfapa fākokeyopakeni.

<sup>21</sup> Nāskaxō Jesús apa yōkani iskafakī: “¿Afetiā fichinimē?” iskaifaito, apa yoini iskafakī: “Afetiā fichinima. Yomeax fichini. <sup>22</sup> Mēxotaima na niafaka chakata iskafaino, chinaki paketa fakanaki pakemis, retepaikī iskafaino. Nāskakē mī sharafatiromakī sharafafe, noko shinākī ěfe fake ea sharafaxōfe,” faino, <sup>23</sup> Jesús yoini: “¿Afeskakī ěfe fake mīa ea sharafaxotiromamē mī ea faimē? Ea chanīmara faifono ě ato afama mīshti faxotiro,” fani.

<sup>24</sup> Nāskakē nā fake āpa fāsikōi mekani iskafakī yoini: “Ē mīa chanīmara fai, ea axōfe ě mia chanīmara fakī finakōinō,” ixō yoiaino, <sup>25</sup> yōrafā rasi ichanāfono Jesús ōini, Jesús feronāfake

makinoa niafaka potaito òipaikani. Nāskakē Jesús niafaka iskafakī yoini: “Niafaka yōshi chakata, na fake mī meka-matama, mī nikamamismaki, ē mia yoikai na fake makinoax tsekekaitāfe, nāskax mī anā a mēra ikiki,” faino, <sup>26</sup> niafaka yōshi chaka fāsikōi fiisini. Nāskakī nā fake anā choamani. Nāskata mā fake makinoax tsekekaikī oa naa keskara fafāini. Nāskakē iskafakī yoinifo: “Mā naa raka,” faifono, <sup>27</sup> akka Jesús āfe mēkemā mētsota fininīfofanaino nā feronāfake niinākaḡāni.

<sup>28</sup> Nāskafata Jesús pexe mēra ikikainano, anoxō a aōxō tāpimisḡāfe a fisti yōkanifo: “Akka, ḡafeskakīri nō niafaka yōshi chaka potatiromamē?” ixō yōkaifono, <sup>29</sup> Jesús ato kemani: “Na keskara niafaka mā potakī Epa Nios kīfita foni teneyanā Nios shinākī mā potatiro. Akka mā askayamaxō mā potatiroma,” ato fani.

*Anā Jesús ato yoini: “Chipo ea retexikani,” ixō  
(Mt. 17.22-23; Lc. 9.43-45)*

<sup>30-31</sup> Nāskata Jesús nānoax a aōxō tāpimisfo fe kakī Galilea finōfaini. Akka Jesús ato tāpimakaspani, “Ea tāpiyamanōfora,” ixō. A aōxō tāpimisfoosmāi ato tāpimakī iskafakī ato yoini: “Ea achikaxō āto xanīfofo ano ea iyoxikani, afāfe ea retenōfo. Akka ea retefiafono tres nia oxata ē anā otoxii,” ato faito, <sup>32</sup> tsōa tāpinima a ato yoiai keskara. Yōkapai akiki ranonifo.

*“Akka, ḡtsoakaimē sharafinakōia?” inifo  
(Mt. 18.1-5; Lc. 9.46-48)*

<sup>33</sup> Nāskata pexe rasi Capernaúm ano nokonifo. Nā pexe anoxō Jesús ato yōkani: “ḡAfeskai fai anoax mā feratenāmē?” ato faino, <sup>34</sup> tsoa tooxinima, akka fai nēxpakīanoax feratenāi iskakanax: “ḡTsoakai sharafinakōiamē?” ikanax.

<sup>35</sup> Nāskakē Jesús tsoaxō a aōxō tāpimisfo doce kenaxō ato yoini: “Fatora fētsa ato finōpai nā yorafāfe āto ina keskara itiro, nāskakē keyokōi ato axosharakōitiro,” ixō ato yoini.

<sup>36</sup> Nāskata ato nēxpakīa fake yome nīchita, chishtoinīfoḡā ato yoini: <sup>37</sup> “Akka fatora fētsa ēfe aneōxō na fake yome noikī nāatori ea noisharakōi. Nā ea noisharaito ea fisti noima, nā ea nīchiniri noisharai,” ixō Jesús ato yoini.

*Fētsa noko noikaspatama noko sharafai  
(Mt. 10.42; Lc. 9.49-50)*

<sup>38</sup> Ato askafaito Juan yoini: “Maestro, mā nō ōia oa feronāfake fistichi mī aneōxō niafaka chaka potaito. Nāskakē mī nofe rafemismaki, askafayamafe mī yorafo makinoa niafaka potatiromaki nō faa,” faito, <sup>39</sup> Jesús kemani iskafakī: “Askafayamakāfe. Akka nā ēfe aneōxō afama mīshtifo faxō chipo ea chakafakī mekafatiroma. <sup>40</sup> A noko chakafakī mekafaima, nofe rafesharai. <sup>41</sup> Akka fētsa mato shinākī, nato

Cristo Ifofaki ixõ mato faka ayamanaito, askara Niospa afara inãsharatiro. Chanĩmakõi ẽ mato yoi,” ixõ ato yoini.

*Noko fẽtsa afara chakafamaino ăfenă mesekõi itiro  
(Mt. 18.6-9; Lc. 17.1-2)*

<sup>42</sup> Ană Jesús ato yoini iskafakĩ: “Na fakefăfe ea chanĩmara faifono, fatorafăfe ato afara chakafamaifono, tokirinĩfaya tenextifaxõ fakafă năafă mĕra mă ato potatiro ato ană afaa chakafamanõfoma. <sup>43-44</sup> Akka măto mĕkemă mato afara chakafamaino mextemekăfe. Akka mă mă mextemeax Epa Nios ari mă katiro afe nĩpaxakĩ. Akka mifi rafeyaxõ mă afara chakafaax chiifă xoisai mĕranoax mă omiskõipakenaka, a chiifă nokanakama anoax. Anoax xenafo nayamaino, chiiri nokanakama anoax. <sup>45-46</sup> Askatari mĩ tăe mia afara chakafamaino oxtemefe. Akka mă mĩ oxtemeax Epa Nios ari mĩ katiro afe ĩpaxakĩ. Akka mĩ oxtemeamax tae rafeyax chiifă mĕranoax mĩ omiskõipakenaka, anoax xenafo nayamaino, chiiri nokanakama anoax. <sup>47</sup> Askatari mĩ fĕro mia afara chakafamakĕ tsekafe. Năskax mĩ fero fistiax Epa Nios xanĩfo ano mĩ katiroki. Akka mĩ fero rafeyax chiifă mĕranoax mĩ omiskõipakenaka. <sup>48</sup> Anoax xenafo nayamaino chiiri nokanakama anoax.

<sup>49</sup> “Năskakĕ chiifă mĕranoax keyokõi omiskõipakenakafo. <sup>50</sup> Akka tashi shara. Akka mă nami tashiya ayamaxõ, afeska faxõ mă ană sharafatiromĕ, mă ană sharafatiroma, chakanatiro. Năskakĕ oa tashi keskara ikăfe isharakõiax. Fetsafo ato yoisharaxikakĩ ană afaa chakafanõfoma.”

## 10

*Feronăfake ăfe ăfi fe enenătirofoõnoa Jesús ato yoini  
(Mt. 19.1-12; Lc. 16.18)*

<sup>1</sup> Năskata Jesús Capernaúm anoax tsekekainax Judea mai ano kani. Nă Jordán faka ketokonõ, nănoxõ ană yorafo ichanăfaxõ ană ato yoini, ato yoimis keskafakĩ. <sup>2</sup> Ato yoikĩ askafaino fariseofo Jesús ano fenifo. Akiki fĕkaxõ chakafakĩ mekamapaikani. Năskaxõ yõkanifo iskafakĩ: “Nõko xinifăfe Niospa meka yoikĩ kenenifo keskafakĩ, ĩferonăfăke ăfe ăfi enepaikĩ enetiromĕ?” ixõ yõkaifono, <sup>3</sup> Jesús ato kemani: “Moisés mato kirika kenexokĩ, ĩfanĩri mato yoinimĕ?” ato faito, iskafakĩ yoinifo: <sup>4</sup> “Moisés kenekĩ iskafani: ‘Fĕtsa ăfe ăfi enepaikĩ taefakĩ kirika kenexotiro iskafakĩ: “Ĕ mia ană fiima, mĩ ană ěfe ăfi ikima,” ’ ixõ mă yoitiro noko fani,” ixõ yoiaifono, <sup>5</sup> Jesús ato kemani iskafakĩ: “Moisés iskafakĩ mato yoini: ‘Măkai afaa tăpiama măto õiti kerexkõi,’ ixõ mato yoini. <sup>6</sup> Akka taekõifakĩ, Niospa feronăfake yafi kĕro onifani. <sup>7-8</sup> Năskakĕ feronăfake mă ăfiyax ăfe apa yafi ăfe afa makinoax

paxkatiro āfi fe fianāxiki. Nāskakē āfe āfi fe yora fisti keskara itirofo. Nāskakē anā yora rafema, yora fisti keskara ikani āfe āfi fe. <sup>9</sup> Nāskakē feronāfāke āfe āfi enetiroma Niospamāi ato fianāmano,” ixō ato yoita, <sup>10</sup> mā pexe mēra ikiano, anā a aōxō tāpimisfāfe yōkanifo: “A mī yorafo rama yoiai keskara nokori yoife,” faifono, <sup>11</sup> Jesús ato yoini iskafakī: “Akka fētsa āfe āfi enexō kēro fetsa fixō afe ikī a fikī taefani chakafai. <sup>12</sup> Askatari feronāfake āfe āfi enexō fetsa fixō fetsa fe ikī āfe āfi chakafai,” ixō Jesús ato yoini.

*Jesús fakefo chishtoxō ato māmāyanā ato Epa Nios kīfixopakeni*

*(Mt. 19.13-15; Lc. 18.15-17)*

<sup>13</sup> Askatari yorafāfe āto fakefo Jesúski efenifo ato māmāpakeyanā ato Epa Nios kīfixonō. Akka a Jesúsxō tāpimisfāfe ato iskafanifo: “Māto fakefo efexō nōko Ifo fekaxtefayamakāfe,” ato faifono, <sup>14</sup> nikakī Jesús ato iskafani: “Ato enekāfe na fakefo ekeki fenōfo, ato nētefayamakāfe. Ēfe Epa Nios xanīfo ika ari na fakefo keskarakōifoki,” ixō ato yoini.

<sup>15</sup> “Ē mato pāraima, mā Epa Nios xanīfo nikayamax na fakefāfe ea nikaifo keskafakī, Epa Nios xanīfo ika ari mā katiroma,” ixō ato yoita, <sup>16</sup> fakefo chishtoinīfofā ato māmāpakeyanā: “Epa Niospa, na fakefo sharafafe,” fani.

*Feronāfake naetapa kori ichapayax Jesús fe mekani*

*(Mt. 19.16-30; Lc. 18.18-30)*

<sup>17</sup> Mā askafata mā Jesús kaino feronāfake fetsa ichoax akiki nokoni. Mā akiki nokoxō ratokonō mai chachipakefofā yōkani iskafakī: “Maestro mī sharaki, ea yoife ē afaa afeskatitromakī Nios xanīfo fe ipaxakī,” ixō yōkaito, <sup>18</sup> Jesús kemani: “¿Afeskakī sharara mī ea faimē? Akka Nios fisti shara. <sup>19</sup> Niospa shināmanaino a Moisés yoini keskara mā mī tāpia. Iskafakī yoini: ‘Ato reteyamakāfe, askatari māto āfima chotayamakāfe, askatari kēromāri māto fenema chotamayamakāfe, askatari atoki yometsoyamakāfe, askatari chanī yoiyamakāfe, askatari mā kaxpa ato pārayamakāfe, askatari māto epa yafi māto efa nikasharakōikāfe,’ ” ixō Jesús yoini.

<sup>20</sup> Askafaito nā feronāfake kemani iskafakī: “Maestro, nā mīa yoiai keskara mē nikamis yomexō,” faito, <sup>21</sup> nikakī Jesús ōiyanā aō noiyanā iskafakī kemani: “Nāno afara fisti mī tāpiama. Kaxō mī afarafo minixō kori fixō nā afaamaisfo ato ināketsatāfe. Nāskakē nai mēranoax afama mīshtifoya mī ixikai. Mā mī kori ato ināketsata anā oxō ea Ifofasharafe,” ixō yoini.

<sup>22</sup> Askafaito nikai nā feronāfake shināchakakōi tooxinima kori ichapayamāiyaxō ato inākaspa. Nāskax Jesús makinoax kani.

<sup>23</sup> Nāskaito Jesús aa kemataima òiakexõ, aõxõ tãpimisfo yoini iskafakĩ: “A yora afama mĩshti ichapaya Nios xanĩfo ano katiroma, fekax pishta,” ixõ ato yoiaino, <sup>24</sup> nikakakĩ ãfe in-afãfe: “Kee, ãfe meka nõ tãpitiroma,” ixõ tãpipainifo. Askaifono anã Jesús ato yoini iskafakĩ: “Èfe fakefãfe, fekax pishta afama mĩshtifoya ikatsaxakĩ mã Nios Ifofapaia. <sup>25</sup> Mãraki camello akoja kini mẽra ikipaifi ikitiro, fekaxkõi efapamãiax. Nãskarari yora afama mĩshti ichapayato Nios Ifofapai, fekaxkõi ãfe afama mĩshtifomãi potakaspakĩ,” ixõ Jesús ato yoini.

<sup>26</sup> Ato askafaito nikakakĩ a aõxõ tãpimisfãfe tãpipainifo. “¡Kee! ¿Afeskax nõ Nios fe ipaxatiromẽ?” ikanax yoinãnifo.

<sup>27</sup> Askaifãfe õikĩ Jesús ato yoini: “Yorafokai ãa ifimetiroma. Nios fistichi yorafo ifitiro. Niospa afama mĩshtifo fatiro, yorafãfe atiroma keskara,” ixõ ato yoini.

<sup>28</sup> Ato askafaito nikakĩ Pedro yoini: “Ifo, nõ mefe okĩ nõko afama mĩshtifo nõ õiferani nõ mefe oni,” faito, <sup>29</sup> Jesús kemani iskafakĩ: “È mato paraima, fẽtsa eõxõ ãfe meka sharaõnoa ato yoikakĩ ãfe pexe õifaini, ãfe onefetsafori õifaini, ãfe poifori õifaini, ãfe apari õifaini, ãfe afari õifaini, ãfe fakefori õifaini, ãfe tareri õifaini, <sup>30</sup> nãato niyoxõ afama mĩshtifo fitiro, Niospa inãino, pexefoya ita, onefetsafoya ita, poifoya ita, afafoya ita, fakefoya ita, tarefoya ita itiro. Nãfo Niospa inãsharafiano omiskõixii. Nãskafiax chipo Epa Nios fe ipanaka. <sup>31</sup> Akka iskaratĩa yora ichapafãfe ato finõpaikani, nõ finakõiara ikaxõ, akka chipo fenotirofo. Akka a ato finõpaiyamaifo iskaratĩa Niospa ato finakõia imaino Nios fe ipanakafo,” ixõ ato yoini.

*Anã Jesús ato yoini: “Mã chaima ea retekaniira,” ixõ (Mt. 20.17-19; Lc. 18.31-34)*

<sup>32</sup> Askafakĩ ato yoita Jerusalén ari kani. Jesús rekẽ kaino aõxõ tãpimisfo acho fonifo. “Kee, ¿afeskai nõko Ifo Jerusalén ano kaimẽ?” ikanax ratekõinifo. Nãskaifono a aõxõ tãpimisfo tii ato kenaxõ Jesús ato yoini iskafakĩ: “Iskaratĩa afaa afeskaimãkai ã mato yoinõ. <sup>33</sup> Mã mã õikai, iskaratĩa Jerusalén ano nõ mãpei kaikai. Nãnoxõ ea achikaxõ a ato Nios kĩfixomis xanĩfofo yafi a Moisés yoikĩ kirika keneni keskara ato tãpimamisfo ea ato inãkani kiki. Anoxõ ea iskafakani: ‘Na Jesús ato chakafamiskĩ retekãfe,’ ixõ ea yoikãta, yora fetsafo ano ea iyokani afãfe ea retenõfo. <sup>34</sup> Nãfãfe ea kaxemetsama fayana, ekeki kemo mechoketsayanã ea koshaketsakata ea retekani. Akka ea askafafiafono tres nia oxata ã otoxii,” ixõ ato yoini.

*Santiago feta Juan Jesús yõkanifo afe xanĩfo ipaikakĩ (Mt. 20.20-28)*

<sup>35</sup> Santiago fe Juan, Zebedeo fake rafe ini. Nã rafeta Jesús ano fõkaxõ iskafakĩ yoinifo: “Maestro, na nõ mia

yoiai keskafakī noko axōfe, nō mia yōkaikai,” faifono, <sup>36</sup> ato yōkani: “¿Ē mato afaa afeska faxotiomē?” ato faito, <sup>37</sup> anā yoinifo iskafakakī: “Mī xanīfokōikī nokori xanīfo imafe, nō mefe xanīfo inō. Takai fetsa ē tsaofaino, takai fetsari ēfe ochi tsaonō,” faifono, <sup>38</sup> Jesús ato yoini iskafakī: “Na mā ea yōkai keskara mā tāpiama. ¿Na ē omiskōiai keskai māri mā omiskōitiromē?” ato faino, <sup>39</sup> kemanifo iskafakakī: “Ēje, nōri nō tenetiro,” faifono, Jesús ato yoini iskafakī: “Chanīma, nā ē teneai keskafakīri, mā tenetiro omiskōifinakōifikī. <sup>40</sup> Akka efe ketaxamei tsaopai tsoa efe ketaxamei tsaotiroma. Ēfe Epa Nios fistichi tāpia. Nā Epa Niospa katoafo ano efe tsaotirofo,” ixō ato kemani.

<sup>41</sup> Askafaiāfe nikakani a aōxō tāpimisfo diez atoki ōitifishkinifo, Santiago yafi Juan mepaikani.

<sup>42</sup> Askaifono akka Jesús ato kenaxō ato yoini iskafakī: “Mā mā tāpia, yora fetsafo xanīfokaxō fāsikōi mekayanā ato yonomamisfo. A xanīfo fe rafeafāferi ato yoimisfo iskafakakī: ‘Nōri mātō xanīfo. Nō mato yoiaito mā noko afara axorisafatiro,’ ixō fāsikōi ato yoimisfo. <sup>43-44</sup> Akka mā ranā askayamakāfe. Askatamaroko fatora fetsa mā xanīfo ipai, ato yonoxomis keskara mā itiro. <sup>45</sup> Akka ēri anori shināima, ēfe Epa Nios ariax ē nāmā ftoni feronāfakekōi ixiki, ē Niospa Fakefekē ea afara axonōfo ē onima. Askatamaroko fetsafo ē ato afara sharafaxoxiki ē oni. Ē atoōnoax naxiki ē oni. Satanás chaka āto ifo inōma ē oni,” ixō Jesús ato yoini.

### *Jesús Bartimeo fēxokē sharafani*

*(Mt. 20.29-34; Lc. 18.35-43)*

<sup>46</sup> Nāskata Jericó peixe rasi ano nokonifo. Nānoax mā Jesús tsekekainaino, aōxō tāpimisfo fe yōrafā rasi afe fonifo. Fokākī yora fēxo fai ketokonō tsoa fichinifo, āfe ane Bartimeo, Timeo fake ini. Nāno fai ketokonō tsoaxō ato kori yōkatiani ini. <sup>47</sup> Nāno fai ketokonō tsoaxō nā fēxo nikani Jesús Nazarete anoa kafani faifāfe. Nāskafaiāfe nikai nā fēxo fāsikōi fiisini, iskafakī yoini: “¡Jesús mīfi David fenaki, ea shināfe!” fani.

<sup>48</sup> Askafaito, “Nōko Ifo fekaxtefayamafe,” fanifo. Askafaiāfono fāsikōi fiisini, iskani: “¡David fenapa, ea shināfe!” faito nikai.

<sup>49</sup> Nāskakē Jesús nēteakekafā ato yoini iskafakī: “Ea kenaxokāfe,” ato faino, kenanifo iskafakī yoiyanā: “Inimayanā fininākakāfe, Jesús mia kenakī,” ixō yoiaifono, <sup>50</sup> nikakī āfe tari rashkita potata koshikōi niinākakā ichotiri ichotiri ita Jesús ano oni.

<sup>51</sup> Mā akiki oano Jesús yōkani: “¿Ē mia afeska fanō ea mā yōkamē?” faito, nā fēxo kemani: “Maestro, ēfe fero ē sharafapai,” faino, <sup>52</sup> Jesús yoini iskafakī: “Mā mī katiro, ea



chanĩmara faax, mã mĩ sharaki,” fani. Naskafaino nã fẽxo õisharakõitani. Mã sharaxõ Jesús fãĩ kaino chĩfafaini.

## 11

*Jesús nokoni Jerusalén ano*

*(Mt. 21.1-11; Lc. 19.28-40; Jn. 12.12-19)*

<sup>1</sup> Nãskata Jesús fe fokakĩ Jerusalén chaima fonifo. Nãno pexe rasi Betfagé fe Betania chaima ini, machi Olivos ano. Nãnoxõ Jesús a aõxõ tãpimis rafe nĩchini. <sup>2</sup> Ato iskafakĩ yoiyanã: “Mẽstekõĩ fotakãfe oa ono pexe rasi ano. Nãno mã nokoxõ mã fichi kaikai burro fake nexekẽ tsoa aõ nimisma. Tẽpexõ ea efexotakãfe. <sup>3</sup> Anoxõ mato yõkaifono iskafakaki: ‘¿Afeskakĩ mã burro tẽpeimẽ?’ mato faifono, iskafakĩ ato yoikãfe: ‘Nõko Ifãfe fichipaiyaito nõ ifixoniyoa, samama mato nĩchixoni kiki,’ ixõ ato yoikãfe,” Jesús a aõxõ tãpimis rafe fani.

<sup>4</sup> Askata mã fõkaxõ fichitoshinifo burro pexe fepoti ano nexekẽ emãiti fainaki fichixõ tẽpexõ efenifo.

<sup>5</sup> Nã ano ikafãfe ato iskafanifo: “¿Afaa mã afeskafaimẽ? ¿Afeskakĩ mã burro tẽpeimẽ?” ato faifono, <sup>6</sup> nã Jesús ato yoia keskafakĩ ato kemanifo: “Ia. Iyoxotakãfe,” ato fanifo. <sup>7</sup> Nãskata Jesús ano burro efekãta, ãfe kate kamaki ãto rapati kakafanifo. Nãskafafono a kamaki Jesús tsaoinãkafãni. <sup>8</sup> Akka mã Jesús kaino yorafãfe ãto rapatifoya epe peifo xatekaxõ kakafaxõ fonifo akiki inimakakĩ.

<sup>9</sup> Akka nã rekẽ foaifãfe a acho foaifo fãsikõĩ tai taifonifo. Iskafa fonifo: “¡Aicho, nã sharafinakõia nokoki oi kiki, nõko Ifo Niospa nokoki nĩchiano! <sup>10</sup> Nõko xini David xanĩfo ipaoni keskai, mĩri nõko xanĩfo ixiki oa. ¡Aicho! ¡Nios sharakõĩ!” ixõ yoinifo.

<sup>11</sup> Nãskata Jesús mã Jerusalén ano nokoax, Nios kĩfiti pexefã mẽra ikixõ, a mẽranoafo õifofãsafani. Nãskata nãnoax tsekekaini kaax a aõxõ tãpimisfo docefo fe Betania ano kani, mã yãtapakeaino.

*“Fana higuera, mã anã fiminakama,” Jesús fani*

*(Mt. 21.18-19)*

<sup>12</sup> Pena fetsa mã Betania anoax okĩ Jesús mea fonãikõĩ fini.

<sup>13</sup> Nãskakẽ chai ixõ fana higo nikẽ õini, peifoya ini. Kaxõ õini fimiyamakĩ, akka kaxõ õia fimiya inima ãfe peifos ini. Nã fimiyamaitĩa õini. <sup>14</sup> Nãskakẽ Jesús fana higo yoikĩ iskafani: “Anã tsõa mã fimi pinakama,” faito, ãfe inafãfe nikanifo.

*Jesús a Nios kĩfiti pexefã mẽraxõ a ato inãifo ato potani*

*(Mt. 21.12-17; Lc. 19.45-48; Jn. 2.13-22)*

<sup>15-16</sup> Nãskata anã Jerusalén ano nokonifo. Nãnoax Jesús anã Nios kĩfiti pexefã mẽra ikitoshini. Ikitoshixõ õia a mẽraxõ afarafõ ato miniaifono xafakĩa ato kãimani, a ato fãifori

askafani xafakā kāimakī. A ato kori ināifo anoari mīsafo ato pōtaketsani, askatari a ato rifi miniaifo anoari āto tsaotifori ato pōtaketsani. “Nā Nios kīfiti pexefā mēraxō tsōa afaa ato inātiroma,” ixō fāsi mekainākafā ato yoini. <sup>17</sup> Ato tāpimakī iskakafā ato yoini: “Niospa meka yoikī iskakafā kirikaki kenenifo: ‘Na ēfe pexefā anoxō keyokōichi nā maitio ano ikafāfe ea kīfitirofo,’ ixō kenefinifono, akka nā yometsofāfe pexe keskara mā famis,” ixō ato yoini.

<sup>18</sup> Ato askafaito, a ato Nios kīfixomis xanīfofo feta, a Moisés yoikī kirika keneni keskara ato tāpimamīsfāfe nikanifo. Nāskakē afeskaxoma Jesús retēpainifo, retēpaifikani mesenifo, yorāfāfemāi nikakōiaifono a yoiai keskara, “Airā, na keskara meka nō nikamisma, āfe meka sharakōi,” ikaxō. <sup>19</sup> Akka mā fakishaino Jesús a aōxō tāpimisfo fe Jerusalén anoax anā kani.

### *Fana higuera xanani*

*(Mt. 21.20-22)*

<sup>20</sup> Askano anā pena fetsa finōfāikakī ōinifo, nā fana higuera mā xanano āfe tapofoya. <sup>21</sup> Nāskakē Pedro shinākī Jesús yoini iskakafā: “Maestro, ōipo na higuera mī kamafofāita mā xana,” faito, <sup>22</sup> Jesús kemakī iskakafā: “Nios nikakōikāfe,” ato fani. <sup>23</sup> “Akka ē mato pārāima. Māto ōiti mēraxō mā Nios nikakōixō na māchifā mā yoikī iskakafiro: ‘Nonoax tsekekainax fakafā mēra paketāfe,’ mā faino fakafā mēra paketiro. Nā mā yoiai keskai nāskakōitiro. <sup>24</sup> Nāskakē ē mato yoi, afara mā fichipaikī mā Epa Nios chanīmara faxō mā kīfiaito mato inātiroma, mātonā inō. <sup>25</sup> Akka mā Epa Nios kīfikī, fetsaki mā ōitifishki iyoxō ikisi raefayokāfe, Epa Nios nai mēranoato māto chaka mato soaxonō. <sup>26</sup> Akka mā fetsafo raefayamaito, matori Epa Niospa nai mēraxō māto chakafo mato soaxotiro,” Jesús ato fani.

*“¿Tsōa mia nīchinimē mī xanīfo inō?” ixō Jesús yōkanifo anoxō achipaikakī*

*(Mt. 21.23-27; Lc. 20.1-8)*

<sup>27</sup> Nāskata Jerusalén ano anā fenifo. Nānoax Nios kīfiti pexefā mēra Jesús kafāsaino, nāno akiki fenifo. A ato Nios kīfixomisfāfe āto xanīfofo fe, a Moisés yoikī kirika keneni keskara ato tāpimamīsfō, judeofāfe āto xanīfofori fenifo. <sup>28</sup> Anoxō yōkanifo iskakafakakī: “¿Tsōaōxō mī iskakaimē, tsōa mia yoiamē mī iskakafanō?” ixō yōkaifono, <sup>29-30</sup> Jesús ato kemani iskakafā: “Ēri mato yōkanō ea yoikapo ē nikanō. Ea mā yoiaito ē mato yoikai tsōaōxō ē iskakaimākai. Akka, ¿tsōa Juan nīchinimē ato maotisafakī ato faka mēra ikimapakenō? Niospa nīchiamakī yorāfāfe nīchiniforaka ea yoikapo,” <sup>31</sup> ato faino āa ranā mēenāpaiyanā iskanifo: “Nō kemakī iskakafano: ‘Niospa nīchini,’ nō faino noko yoikī iskakafai: ‘Akka, ¿afeskakī

mã Juan nikamismamẽ?’<sup>32</sup> Akka nõ iskafakĩ yoitiroma: ‘Yorafãfe Juan nõchinifo,’ ixõ nõ yoitiroma, yorafoki nõ mesei nokoki õitifishki itirofo.” Akka yorafãfe keyokõichi tãpiafo Niospa shinãmanaino Juan ato yoipaoni.

<sup>33</sup> Nãskakẽ yoikĩ iskafanifo: “Nõ tãpiama tsõara Juan nõchini,” faifono, Jesúsri ato yoikĩ iskafani: “Èri mato yoitiroma tsõaõxõ ã iskafaimãkai,” ixõ ato yoini.

## 12

*Mekafetsafaxõ Jesús ato yoini a ato yonoxomis chakafoõnoa (Mt. 21.33-46; Lc. 20.9-19)*

<sup>1</sup> Anã Jesús ato yoini meka fetsafaxõ iskafakĩ: “Feronãfake fẽtsa ãfe tare ano uva fanani. Fanaxõ akiki keneakeni. Akiki keneakexõ mai põkini a mẽraxõ uva tsinĩxiki. Askatari pexe keya fani anoxõ kexexiki tsõa mẽeyamanõ. Mã askafakĩ fetsaxõ a ano yonofaifo ato inãyoni. Nãskafata mai fetsa ari kayoni. <sup>2</sup> Nã fimimistĩa mã ãfe fana pachaiino, ãfe ifãfe a yonoxomis nõchini, a kexexonafo ato yõkaxõ ãfe fana fimifo fixotanõ nõ ãfenã tiiri. <sup>3</sup> Akka ãfe kaifo fichikaxõ nõ fana kex-eafãfe achikaxõ seteketsakaxõ, afaa inãkaxoma afaamaiskõi nõchinifo. <sup>4</sup> Nãskata nõ tare ifãfe anã a yonoxomis fetsa nõchini. Akka nãri ìchaketsayanã tokirinĩ mapoki tsakakĩ imi tofeket-safono oni. <sup>5</sup> Nãskano afianã fetsari nõchiano nãa retenifo. Mã reteafono ranãfaxõ ato nõchini, nãfori ato seteketsayanã, ranãri ato retenifo.

<sup>6</sup> “Mã ato askafafono, nãno ãfe fake fisti ini, nõ aõ noikõiai. Nãskakẽ chipokõi fakĩ ãfe fake nõchini: ‘Èfe fake nikatirofokĩ,’ ixõ. <sup>7</sup> Akka mã ãfe fake nõchia kaito fichikanax nõ tare kex-emisfo yoinãnifo iskakani: ‘Nato ãfe apa naano na fanafo fixii kiki, a nari nõ retenõ na tare nõkonã inõ,’ ” ikanax yoinãnifo.

<sup>8</sup> Nãskakẽ achikaxõ mã retekaxõ tare pasotai potanifo.

<sup>9</sup> Nãskakẽ Jesús ato yõkani: “Akka, ¿a tare ifãfe ato afeska fatiromẽ? Kaxõ a tare kexemisfo ato retekĩ mitoxõ fetsafo ãfe tare inãtiro afãfe kexexonõfo,” ixõ Jesús ato yoini.

<sup>10-11</sup> “Akka, ¿a kirika kenekĩ iskafanifo mã anemismamẽ?:

Tokiri pexe fapaikakĩ nõ pexe famisfãfe na tokiri chakara ixõ potafono, fetsafãfe fichixõ na tokiri sharakõi ikaxõ akiki pexe fatirofo. Nãskarifiakĩ xanĩfofõfãfe, ‘Nakai afama,’ ikaxõ Niospa Fake õikaspamisfo. Askafafiaifono Niospa ãfe Fake katoni nõko Ifo inõ. Nãskakẽ nõ akiki inimakõi, ixõ kirika ano kenenifo,” Jesús ato fani.

<sup>12</sup> Nãskakẽ Jesús achikaxõ karaxa mẽra ikimapainifo, mã tãpikaxõ meka fetsafaxõ atoõnoa yoiaito. Akka achipaifikani yorafoki mesekani a makinoax fonifo.

*“¿Xanĩfo nõ kori inãtiro mẽ noko yõkaito?” ixõ Jesús yõkanifo (Mt. 22.15-22; Lc. 20.20-26)*

13 Nāskakē chipo fariseofāfe Herodes feta afe yorafo Jesús ano nīchinifo, fanīrira Jesús ato yoiaito afāfe yōanōfo āto xanīfofo yoikakī. 14 Nāskakē mā akiki fēkaxō nāfāfe yōkanifo iskafakakī: “Maestro, mā nō tāpia a mī yoiai anori chanīmakōi mī yoimis. Epa Niospa noko shināmapaiyai anorikōi mēstekōi mī noko yoimis. Afara yoipai mī ranomisma, afarikai mī fomāmisma, na yorafāfe yoiaifo anori mī nikatama, a shināifo anori mī shināmisma. Askatamaroko Epa Niospa meka shara mēstekōi mī yoimis. Akka chanīmamakī noko yoife na romanō xanīfo nō kopifatiromakī askayamakī nō kopifatiroma rakikīa,” ixō yōkaifono, 15 Jesús tāpini feparapaiyāifāfe, nāskaxō ato yoini iskafakī: “¿Afeskakī mā ea feparapaimē?” ato fata, “Ea kori exe fisti fēxokāfe, ē ōinō,” ato faino, 16 kori exe fisti fēxofafono, nā kori exe ōiyanā Jesús ato yōkani: “¿Tsōa femānā na keskaramē? ¿Tsōa aneri na kori exe ano ke-neamē?” ato faino, kemanifo iskafakakī: “Nōko xanīfo César keskara,” faifono, 17 Jesús ato yoini iskafakī: “Akka na kori exe Césarnākē César inākāfe, akka Niosnākē Niosri inākāfe,” ato faino, “¡Kee! ¡Nikakapo! Āfe meka finakōia tsōakai finōtiroma,” ikanax rateyanā yoīnānifo.

*“Yora naax anā otoax, ¿afeskatiromē?” ixō Jesús yōkanifo (Mt. 22.23-33; Lc. 20.27-40)*

18 Nāskakē saduceofo Jesús ōifokani fonifo. Nā saduceofāfe yoimisfo iskafakakī: “Yora naaxkai anā afeskax ototiroma,” ixō yoimisfo. Nāskakē mā fokaxō yōkanifo iskafakakī:

19 “Maestro, Moisés noko kirika kenexoni iskafakī yoikī: ‘Feronāfake fetsa āfiyax natiro afeta fake akamax, akka nā kēro ifomafa onefētsa fitiro, afeta fake axiki nā fake nā onefetsa naitanā inō.’ 20 Akka nā nane tii siete feronāfake inifo. Āto ochi iyoa āfiyai taeni, mā āfiyax afeta fake akamax nani. 21 Nāskata nāa chipoko fētsa nā kēro ifomafa fini. Nāskarīfiai nāari nani afeta fake akamax. Afianā chipoko fētsari fini, nāari nani afeta fake akamax. 22 Nāskakē nā siete feronāfakefāfe nā kēro fipakanax, afeta fake akanamax nai keyonifo. Chipokōitani nā kērori nani.

23 “Nāskakē mā otokaxō, ¿fatoto nā kēro fiximē, nā fistimāi fīpakaxō?” ixō yōkaifono, 24 Jesús ato kemanī: “Mākai afaa tāpiama. Na Niospa meka yoikī kenenifokairoko mā ōikatsaxakī. Niospa āfe sharaōnoari mā ōimisma. 25 Yorafo nakanax mā anā otokanax, anā āfiyatirofoma, anāri āto āfi feta fake atirofoma. Askatamaroko nā ājiri nai mēranoafo keskara itirofo. 26-27 Akka, ¿a yorafo nakanax anā otokiaifoōnoa yoikī Moisés kirika kenekī yoiniōnoa mā anemismamē? Niospa fana koofai mēraxō Moisés yoini iskafakī: ‘Ēfi mī xinifāfe āto Nioskōi, Abraham ikaino, Isaaca ikaino, Jacobo ikaino,’ ixō

Niospa yoini. Akka Niospa naafoma keskara ato òi, aõnoax keyokõi niafono. Akka mākai afaa tāpiama mā mā chanĩmis,” ixõ Jesús ato yoini.

*“Akka, ¿fato meka sharafinakõiamē, nã Niospa shinãmanaino Moisés ato yoiniraka?” ikaxõ fariseofãfe Jesús yõkanifo (Mt. 22.34-40)*

<sup>28</sup> A Moisés yoikĩ kirika keneni keskara ato tāpimamis Jesús ano nokoni, Jesús anoax ato fe yoinãino māmãĩ tāpixõ Jesúsmãĩ ato kemasharakõiaino. Nãskaxõ akairi yõkani: “Akka, ¿fato meka sharafinakõiamē, nã Niospa shinãmanaino Moisés keneniraka sharafinakõia?” ixõ yõkaito, <sup>29</sup> Jesús kemani iskafakĩ: “Niospa yoini iskafakĩ: ‘A sharafinakõia ē mia yoinõ nikapo. Nã israelifo nikasharafe, nõko Ifo Nios fisti nõko Ifokĩ anã ano fetsamaki. <sup>30</sup> Nõko Ifo Nios noisharakõikãfe nõko õitifoyaxõ, nõko yõshi sharafoyaxori noikãfe. Nõko mapo mēraxori shinãsharakãfe, nõko kerex sharafoyaxõ,’ ixõ nã meka shara Moisés keneni. <sup>31</sup> Nã ē mato taefakĩ yoia keskarari nãno fetsari. ‘Nã mato chaima nikari noisharakõikãfe a mā mā noimesharakõiai keskafakãfe.’ Na meka rafe sharafinakõia Niospa yoini,” ixõ Jesús ato yoini.

<sup>32</sup> Naskafaito a Moisés yoikĩ kirika keneni keskara ato tāpimamisto yoini iskafakĩ: “Mĩ yoikõi. Maestro, chanĩmakõi mĩ yoimis. Nãno Nios fisti, anã ano a keskara fetsama. <sup>33</sup> Askatari iskafakĩ mĩ yoia, mãto õitifoyaxõ Nios noikõikãfe, mãto shinã sharafoyaxori askafakãfe, mãto yõshi sharafoyaxori askafakãfe, mãto kerexfoyaxori askafakãfe, a mato chaima nikafori noisharakõikãfe, a mā mā noimeai keskafakĩ askatari a afarafo nõ Nios inã, nãfo nõ finõinĩfofana sharakõikĩ. A nõ afara koakĩ nõ Nios inãfori nãfori nõ finõinĩfofana nõko õitifoyaxõ nõ Nios noikõikĩ,” ixõ mĩ yoia fani.

<sup>34</sup> Askafakĩ yoisharaito nikakĩ Jesús yoini iskafakĩ: “Epa Niospa afe yorafo imasharai keskara mĩri mĩ tāpiax mĩ afe nĩpanaka,” ixõ yoiaito, nikakakĩ tsoa anã tooxinima. Askata anã tsõa yõkanima.

*“Akka, ¿tsõa fenamē Cristo?” ixõ Jesús ato yõkani (Mt. 22.41-46; Lc. 20.41-44)*

<sup>35</sup> Jesús Nios kĩfiti pexefã mēraxõ ato tāpimayanã ato yõkani iskafakĩ: “Akka, ¿afeskakĩ a Moisés yoikĩ kirika keneni keskara ato tāpimamisfãfe na Cristo David ãfe fenara fakanimē? <sup>36</sup> Akka Niospa Yõshi Sharapa shinãmanaino nã David yoini iskafakĩ:

Epa Niospa ēfe Ifo yoini iskafakĩ: ‘Mĩ efe xanĩfokõi ĩpanakaki. Akka nã mia noikaspaifo mĩ ato finõkõinõ ē ato mĩ nãmã nĩchikai.’  
ixõ Niospa yoinino David keneni.

<sup>37</sup> “Akka, ĵafeskai Cristo David ĵefe fena itiomē, nā David Cristo ěfe Ifora fafiapaonino?”

Nāskakē yōrafā rasi inimanifo Jesús ato yoiaito nikakani.

*Jesús ato yōani a Moisés yoikī kirika keneni keskara ato tāpimamisfāfe anorima ato yoiifono*

(Mt. 23.1-36; Lc. 11.37-54; 20.45-47)

<sup>38</sup> Nāskano Jesús ato yoianā iskafakī ato yoini: “Ōisharakakī a Moisés yoikī kirika keneni keskara ato tāpimamisfo tari chainipa safekanax fofāsamisfoki, askatari nafāfe tāpikōiara noko fanōfora ipaikani. Yora ichapafo ano fofāsapaimisfo noko yoisharakōinōra ikanax, nāfo kakapaimisfo. <sup>39</sup> Nāfāfe ichanāti pexe mēraxō tsaoti sharakōi fenamisfo noko ōinōfora ikaxō. A piaifo anoaxri ano tsaopaikakī sharakōi ano tsaopaimisfo. <sup>40</sup> Nāskarafāfe kēro ifomafafo ato pexe fīamisfo, nō mato Nios kīfixonira ikaxō chaikōi Nios kīfimisfo atoki kaxemet-samapaiyanā. Nāfo omiskōi finakōixikani Epa Niospa ato omiskōimanaino,” ixō Jesús ato yoini.

*Kēro ifomafa afaamais fixō Epa Nios ināsharakōini*

(Lc. 21.1-4)

<sup>41</sup> Nāskata Jesús tsoaxō ōini yorafāfe a kori naneti mēra kori naneifāfe Nios kīfiti pexefā mēraxō. Akka nā afama mīshti ichapayafāfe kori naneti mēra kori ichapa nanenifo. <sup>42</sup> Nāskafaifono nāno kēro ifomafa nokoni. Nā kēro ifomafa afaamais fixō ĵefe kori exe rafe nā kori naneti mēra ĵefe kori nanekī mitofaito Jesús ōini.

<sup>43-44</sup> Nāskafaito ōikī Jesús aōxō tāpimisfo kenaxō iskafakī ato yoini: “Chanīma ě mato yoikōi, nā kēro ifomafa afaamaisfixō fetsafo finōmainīfōfā ĵefe kori exe rafe nā kori naneti mēra nanea. Akka nā kori ichapayafāfe nā kori naneti mēra mā āto kori nanefikakī tsōa keyo naneama. Akka nā kēro ifomafa afaamaisfixō nā kori naneti mēra ĵefe kori nanekī mitokōia. Nāskakē a piāi anā afanā fitiroma,” ixō Jesús ato yoini.

## 13

*Jesús ato yoini na Nios kīfiti pexefā pāoixii ixō*

(Mt. 24.1-2; Lc. 21.5-6)

<sup>1</sup> Mā Jesús a Nios kīfiti pexefā mēranoax tsekeano, a aōxō tāpimis fētsa yoini iskafakī: “Maestro, ōipo, nōko Nios kīfiti pexefo tokirifo petsanāmeakea sharashtakōifo,” ixō yoiaito, <sup>2</sup> Jesús kemani iskafakī: “ĴMā mī ōimē na Nios kīfiti pexefo? Akka, Ĵna tokirifo anā petsanamexima chipo maoui fetsexii anākai na tokirifo petsanāmexima?” ixō Jesús ato yoini.

*Afaa afeskaximākai mā chaima nōko mai keyoaino Jesús ato yoini*

(Mt. 24.3-28; Lc. 17.22-24; 21.7-24)

<sup>3</sup> Nāskakata machi Olivos ano fonifo, anoxō ōiafo Nios kīfiti pexefā chaima ini. Nāno Jesús tsaono, Pedro ikaino, Santiago ikaino, Juan ikaino, Andrés ikaino one yōkanifo tsōa ato nikayamanō iskafakakī:

<sup>4</sup> “Nō tāpīpaikai noko yoife. Na mī yoiai keskai afetīa iximākai, afeskaxō nō tāpitiromakī. Askayoamano afaa nō ōitiromakī noko tāpīmafe,” faifono, <sup>5-6</sup> Jesús ato kemani iskafakī: “Kexemesharakani mā ato nikaino mato afara chakafamatirofokī. Yora ichapafo fekani kiki, ēfe aneōnoa mato yoikī iskafakani kiki. ‘Ē Cristoki,’ ikaxō yora ichapafo ato pārāpaikani kiki.

<sup>7</sup> “Akka yorafo retenāifāfe nikai rateyamakāfe. Nā ē yoiai keskai nāskakōixii. Akka fena nōko mai keyoima, chipo ixii.

<sup>8</sup> Akka yorafo mai fetsa anoax mēenāpaiyaifono, yora fetsafori mai fetsa anoax retenāxikani. Nāskaifono mai fetsa anoax mai naya naya ixii. Askatari fonāiki finakōixikani afaa pikanima. Askatari mekai finakōixikani. Nāskai omiskōi taexikani.

<sup>9</sup> “Akka māroko kexemesharakāfe. Mato achikaxō xanīfofo mato inākani kiki, nāskakaxō mato koshakani kiki ichanāti pexe mēraxō. Xanīfofofāfe ferotaifi mato iyoxikani. Eōxō mato askafaifono, mā ato yoisharakōixikai. <sup>10</sup> Akka a omiskōiaifo nokoyoamano efe īpaxanōfo ēfe meka sharaōnoa ato yoikāfe, nā mai tio anoafo. <sup>11</sup> Akka mato achikaxō mato iyoxikani, xanīfofo mato ināxikakī. Shināchakayamakāfe nō ato afaa faikaimē iyamakāfe. Mā afaa shināpaimakai, nā Niospa mato shināmapaiyai anori mā ato yoikai. Akka mā mekaimakai Niospa Yōshi Shara mekai kiki. <sup>12</sup> A yorafāfe āto extofo yora fetsafo ato achimaxikani ato retenōfo. Ato apafāferi āto fakefo yora fetsafo ato achimaxikani. Nāskarifiakī āto fakefāfe āto apakōifo ato chakafakī mekafaxikani, yora fetsafāfe ato retenōfo. <sup>13</sup> Akka eōxō keyokōichi mato noikaspaxikani. Akka mato noikaspafiaifono mā eōnoax omiskōifiki mā ēfe meka nikasharakōiaito ē mato kexesharakōixii Epa Nios fe mā isharapakexanō.

<sup>14</sup> “Nā Niospa meka yoimisto Daniel a inōpokoai yoikī kirika keneni Nios kīfiti pexefā mēra afara chakakōi faxikani kiki ixō yoikī. (Nāskakē na kirika kenea anexō tāpikāfe.) Nā chakafinakōia ōikanax, nā Judea anoafo machi keya ano ichorisatakāfe. <sup>15</sup> Askatari āfe pexe māmākīa tsoaxō ato fichiax koshikōi fotopakekafā āfe afaa fiamax ichotiro. <sup>16</sup> Askatari a āfe tare ano yonoaito anā oxō āfe rapati fitiroma. <sup>17</sup> Askatari a kēro fake naneafo fe a fake yome pishta chocho amaifo omiskōixikani māmāi yorafo omiskōifinakōiaifono. <sup>18</sup> Askatamaroko mā Epa Nios kīfikāfe mato kexesharanō ichoxō yōtaino matsi mexikakīma. <sup>19</sup> Askatari a omiskōiaifo nokoxii, taeyoi askakatsaxakīma. Nā Niospa yora onifakī

taefanitīa tsōa askara ōiyomisma. Askatari anā tsoa chipo omiskōinakama. <sup>20</sup> Akka a omiskōiaifo nōko Ifāfe xateyamano, tsoa nikeranama nai keyokeranifo. Akka afe yorafo ato noikī omiskōinōfoma xateni atomāi katonixakī.

<sup>21</sup> “Akka fētsa mato yoikī iskafaino: ‘Ōikapo nakīa Cristo,’ mato fayana: ‘Oa onokīa, ōikapo,’ mato faito nikayamakāfe. <sup>22</sup> Akka nā chanīmisfo fekani, ē Cristora ixikani, nāfo nō Niosxō nō mato yoirā ikani. Nāskakaxō tsōa atiroma keskara fakani Satanās yōshixō mato pārāpaikakī. Nā Niospa ato katoafori nāfo ato pārāpaikani. <sup>23</sup> Akka ōisharakāfe afetiāma keyokōi mē mato yoiyomiski,” Jesús ato fani.

*Niospa Fake fotoaino afe keskara iximākai ixō Jesús ato yoini (Mt. 24.29-35, 42-44; Lc. 21.25-36)*

<sup>24-25</sup> Anā Jesús ato yoini iskafakī: “Akka nā penatari, nā omiskōiaifo mā keyoano, xini fakishkōi ixii, oxeri anā chaxaxima. Fishifori nai mēranoax pakei fetsexii, askatari nā nai mēranoafo naya naya iki fetsexii. <sup>26</sup> Askatari ea ōixikani nai mēranoax nai kōifoya ē fotoaito sharafinakōia ēfe sharafoya ē fotoxii. <sup>27</sup> Nāskatari ēfe ājirifo ē nīchixii a ē ato katoafo ato ichanāfatanōfo, a chai ikafo ekeki efenōfo.

<sup>28</sup> “Akka shinākapo ē mato yoinō. Mā yōkkafiaino mā tāpitiro āfe pei sirikiaito. Nāskakē āfe peifo keyopaito ōikī mā tāpitiro māmāi chaima xiniaito. <sup>29</sup> Nāskarifiakī afarafo afeskaraito ōikī mā tāpitiro mē chaima oaino askai fetsexii. <sup>30</sup> Ē mato pārāima ē mato yoikōi, na ē mato yoiai keskara nono mai anoxō yorafāfe nayokaxōma ōiyokani. <sup>31</sup> Akka nai fe mai keyoi. Akka ēfe meka fisti keyonakama, nā ē mato yoiai keskakōi.

<sup>32</sup> “Afetīara nai mēranoax ē oxii tsōakai tāpiama. Nā ājirifāfe nai mēra ifiakaxō tāpiafoma. Ērikai tāpiama. Ēfe Epa Nios fistichi tāpia.

<sup>33</sup> “Nāskakē mā itipinīsharayanā kexemesharakāfe Epa Nios kīfianā. Mā tāpiamaki afetiāra ē oxikai. <sup>34</sup> Akka feronāfake fētsa fakira chaikakī, akka kayoxoma a yonoxomisfo yoini āfe pexe kexexonōfo. Nāskaxō ato yono ināketsani yononōfo, akka fētsa āfe pexe fepoti anoxō kexesharayanā mananō yoini. <sup>35-36</sup> Nāskarifiāi māri kexemesharakāfe, mā tāpiamaki fatora penata ē matoki nokorisatanikai. Xini kaino nokoyamata, yamenakefanaino iyamata, takaranā akaino iyamata, fakishparikōi ē matoki nokotiroki. Iskaratīa oimara ea faax mā oxakē ē mato fichitoshitiroki, nāskakē itipinīsharaxō ea yonoxosharakāfe isharakōixō. <sup>37</sup> Nā ē mato yoiai keskafakī, keyokōi ē yorafo yoi itipinīsharakāfe ixō ē ato yoi,” Jesús ato fani.



## 14

*“¿Afeskaxō nō Jesús retetiromē?” ixō shinānifo  
(Mt. 26.1-5; Lc. 22.1-2; Jn. 11.45-53)*

<sup>1</sup> Mā chaima oxa rafeta āto fista Pascua ikaino, nā fistatīa pāa faraxatimais pipaonifo, nā Niospa ājirinī Ejipto anoxō āto fake iyoafo rētenima shinākakī. Nāskaifono a ato Nios kīfixomisfāfe āto xanīfofo feta a Moisés yoikī kirika kenenī keskara ato tāpimamisfāfe, afeskaxoma Jesús pārapainifo pārakaxō retexikakī. <sup>2</sup> Akka achixō retepaifikani, iskanifo: “Fistatīakai nō achitiroma yorafā rasi mekai fetsekani nokoki ōitifishkitirofo,” ikanax yoinānifo Jesús retepaifikani.

*Kēromā Jesús shinākī āfe mapoki pirofomā nachini  
(Mt. 26.6-13; Jn. 12.1-8)*

<sup>3</sup> Akka Jesús Betania ano ini, Simón pexe ano. Nā Simón “Rashkishiai” fapaonifo. Nāato pexe ano Jesús mīsa kamaki tsaoano, nāno akiki kēro fisti oni manishomo “alabastro” foikai. Na manishomo mēra xinia pirofomā osia nanea nakas sharakōi ini, āfe ane “nardo.” Nā pirofomā kopipaekōi ini, na manishomo āfe fepoti fepexō maneakefōfā Jesús āfe mapoki nachini, nā kēromā. <sup>4</sup> Askafaito ōikani nā anoafo ōitifishkiyanā āa ranā yoinānifo iskakani: “¿Afeskakī na kēromā na pirofomā sharakōi chakanafaimē?” <sup>5</sup> Ato minixō, aōxō kori ichapa fixō a afaamaisfo ato inākerana,” ikaxō nā kēro feratenifo.

<sup>6</sup> Askafaiāfāfe ōikī Jesús ato yoini iskafakī: “Enekāfe. ¿Afeskafakī na kēro mā fekaxtefaimē? Na ea iskafai sharakī,” ato fani. <sup>7</sup> “Akka nā afaamaisfori mato fe ipanakafō, fatora penata mā ato sharafaxopaikī mā ato sharafaxotiro. Akka eakai mēxotāima mā ea anā ōima. <sup>8</sup> Akka na kēromā ea iskafakī ea sharafa. Ē nayoamano tafakī ēfe yoraki pirofomā nachia. <sup>9</sup> Ē mato pāraima, fanīxōra na meka shara eōnoa yoikakī nā mai tio anoxō na kēromā ea iskafaōnoa yoixikani. Askatari na kēroōnoa shināpakenakafo, shināmakiyamaxikakī,” ixō Jesús ato yoini.

*Judaspa aōxō tāpifikatsaxakī Jesús ato achimani  
(Mt. 26.14-16; Lc. 22.3-6)*

<sup>10</sup> Nāskafakī Jesús ato yoiaino nā afe rafemis fetsa nā docefo anoa, nā Judas Iscariote a ato Nios kīfixomis xanīfofo fe mekaikai kani. Mā kaxō ato yoini iskafakī: “¿Afe tii mā ea kopifatiromē ē mato Jesús achixonō?” ato faito, <sup>11</sup> nikakani inimakōiyanā yoikī iskafanifo: “Nō mia kori ichapa ināikai,” faifono, nāskakē Judaspa shināni: “Afeskaxomāi ē Jesús ato achimanō,” ixō shināni.

*Mā chaima reteaifono Jesús aōxō tāpimisfo feta yātapake pini  
(Mt. 26.17-29; Lc. 22.7-23; Jn. 13.21-30; 1 Co. 11.23-26)*

<sup>12</sup> Akka nã fistatĩa pãa faraxatimais pipaonifo. Afia penatari Pascua fistatĩa ovejanã fake retexõ pinifo. Nãskano aõxõ tãpimisfãfe Jesús yõkanifo. “¿Fanĩ mĩ fichipaimẽ ano kaxõ nõ itipinĩ fanõ, anoxõ Pascuatĩa yãtapake pixiki?” ixõ yõkaifono, <sup>13</sup> nãskakẽ Jesús aõxõ tãpimis rafe nĩchini, iskafakĩ ato yoiyanã: “Pexe rasi ano fotakãfe. Nãnoa feronãfake fisti mã fichikaikai keshoki faka tetsaomexõ foikaino, nã feronãfake fe fõtakãfe. <sup>14</sup> Akka nã feronãfake ikiai ano afe ikixõ, nãnoa pexe ifo yõkakãfe iskafakĩ: ‘Nõko Maestro noko yoikĩ iskafaa: “Nã pexe ifo yõkakãfe, ¿Fato kene mẽraxõ Pascua fistatĩa eõxõ tãpimisfo feta yãtapake ẽ pitromãkĩ?” ixõ yõkakãfe.’ <sup>15</sup> Mã askafakĩ yõkaito pexe kene efapa fomãkĩanoa mato ispai kiki mã itipinĩkõia. Nãno noko itipinĩsharafaxokãfe,” Jesús aõxõ tãpimisfo rafe fani.

<sup>16</sup> Ato askafaino aõxõ tãpimis rafe fonifo. Mã fokanax pexe rasi ano nokonifo. Mã nokokaxõ nã Jesús ato yoia keskarakõi fichitoshinifo. Nãnoxõ itipinĩ fanifo Pascua fistatĩa pixikakĩ.

<sup>17</sup> Mã fakishaino Jesús aõxõ tãpimis docefo fe nokonifo. <sup>18</sup> Mã fokaxõ mĩsa ano tsaõxõ piaifono Jesús ato yoini. “Ë mato pãraima fatora na mã efeta piai fẽtsa mã ea ato achimafainaka,” ato faino, <sup>19</sup> nikakani shinãmitsakõiyã maikiri fepepakefofãnifo. Nãskakanax ãa ranã yoinãnifo iskakani: “¿Tsoamẽ, ẽraka?” Fetsari iskani: “Õitsai, ẽraka,” iki fetsenifo.

<sup>20</sup> Askaifono Jesús ato kemani: “Nã mã docefo anoafãfe, nã mã efeta sapaki piai fẽtsa mã ea yõaikai ea achinõfo. <sup>21</sup> Nã Niospa meka yoiki, eõnoa yoikĩ kenenifo keskai ẽ askakõi. Akka na feronãfake ea ato achimafax akairi omiskõikõixii. Akka na feronãfake shara ikerana fakeyamanixakĩ,” ixõ Jesús ato yoini.

<sup>22</sup> Piaifono Jesús pãa tsomainĩfõfã. Apa Nios kĩfiki aicho fata, mã kaxkepakexõ ato inãni, iskafakĩ ato yoiyanã: “Na ẽfe nami keskarakĩ pĩkãfe,” ato fani.

<sup>23</sup> Nãskata mã Apa Nios aicho faxõ, kecho tsomainĩfõfã ato inãni. Nãskakẽ mã ato inãno keyokõichi ayanifo. <sup>24</sup> Nãskaxõ ato yoikĩ iskafani: “Nafi ẽfe imi keskaraki. Mẽ naino ẽfe imi foxii. Keyokõi yorafãfe afara chakafamisfono ẽ atoõnoax naikai. Ë askaino Niospa ato potapakenakama. Ë ato naxõi ãto chaka ato soaxoxiki. <sup>25</sup> Ë mato pãraima. Ë mato yoikõi ẽ anã mato feta na fimi ene ayaima. Mẽ nai mẽra kai. Nã ẽfe Epa Nios xanĩfokõi ika anoxõ ẽ anã mato feta na fimi ene shara ayaxii,” ixõ ato yoini.

*“Ë Jesús õimisma,” Pedro ixianino Jesús ato yoini  
(Mt. 26.30-35; Lc. 22.31-34; Jn. 13.36-38)*

<sup>26</sup> Nãskata mã fanãiki xatekata machi Olivos ano fonifo. <sup>27</sup> Nãskata Jesús ato yoini iskafakĩ: “A na fakishi keyokõi mã

ea shināmakī fetsei. Akka kirika ano kenekī iskafakī yoinifo: ‘Āfe ifo reteaifono, āfe ovejafo ichoi fetsetirofo,’ ixō kirika ano kenenifo,” ato fani. <sup>28</sup> “Akka ea retefiafono mē otoax Galilea ano ē nokoi taexii mā nokoamano,” ixō ato yoini.

<sup>29</sup> Ato askafaito nikakī Pedro kemani. “Akka keyokōi shināmakifiaifono ēkai mia shināmakima,” ixō yoiaito, <sup>30</sup> nikakī akka Jesús yoini iskafaki: “Ē mia pāraima na fakish fistichi takara keoi rafeyamano, ‘Ē Jesús ōimismara,’ mī ato fai tres fakī.”

<sup>31</sup> Askafaito nikakī anā Pedro kemani. “Maa. Mia retefiaifono ē mefe nai. Ē ōimismara ē mia faima,” fani.

Pedro askafaito nikakakī keyokōichi askafakī fetsanifo.

*Getsemaní anoxō Jesús Apa Nios kīfini*

*(Mt. 26.36-46; Lc. 22.39-46)*

<sup>32</sup> Nāskakata nā ifi mapoa āfe ane Getsemaní ano nokonifo. Nānoxō Jesús aōxō tāpimisfo yoini iskafakī: “Nono tsaokāfe. Ē Epa Nios kīfiyotanō,” ato fani.

<sup>33</sup> Akka Pedro iyota, Santiago\* iyota, Juan iyota ato fani. Nāskaxō āfe yora meeni shināmitsakōiyanā fekaxtekōiaito,

<sup>34</sup> nāskakī ato yoini: “Ēfe yōshi shināmitsakōi napaiyaito ē meikai. Nono nētekāfe, akka mā oxaki,” ato fani.

<sup>35</sup> Nāato askafata ori chaimashta Jesús ares kani. Nānoxō ratokonō mai chachipakefofā Apa Nios kīfikī iskafani: “Epa, ea mīa kexetiromakī ea kexefe ea reteaifono ē omiskōinōma. <sup>36</sup> Epa, mī keyokōi tāpiaikī. Ea mīa ifipaikī ea mīa ifitiro ē omiskōinōma. Akka nā ē apaiyai keskafakīma nā mī ea amapaiyai keskafafe,” Apa fani.

<sup>37</sup> Nāskata mā aōxō tāpimisfo ano oxō ōia oxafo ato fichitoshini. Nāskaxō Pedro yoini: “Simón, ¿mā mī oxamē? ¿Afeskakī mī pishta oxa tenetiromamē? <sup>38</sup> Moikaxō Epa Nios kīfikāfe Satanás chakata mato chakafamapaiyai keskara axikakima. Chanīma, nā Epa Niospa mato amapaiyai keskara mātō shinā mēraxō mā apaifikī mā atiroma. Akka mātō yora pachikōikī,” ixō Jesús Pedro yoini.

<sup>39</sup> Ato askafata anā kani Apa Nios kīfikai a yoitana keskafakī.

<sup>40</sup> Nāskata anā oxō ato fichitoshini aōxō tāpimisfo oxafono, oxa paemei fetsoafono, a Jesús ato yoiyai keskara tāpikaxoma tsōa kemanima. <sup>41</sup> Nāato askafata anā ato makinoax kani orish-taxō Apa Nios kīfikai. Mā Apa Nios kīfitani oxō ato yoitoshini iskafakī: “¿Ai mā oxamē tenekōiyanā? Moikāfe. Akka iskaratīa a ea ato achimaniyoai mā chaima oi kiki. Yora chakafāfe ea achifenōfo ato efe ikiki. <sup>42</sup> Fininīfofākāfe nō kanō. Mā chaima oi kiki a ea ato achimaniyoai,” Jesús ato fani.

\* 14:33 Santiago āfe ane fetsa Jacobo ini.

*Jesús achinifo**(Mt. 26.47-56; Lc. 22.47-53; Jn. 18.2-11)*

<sup>43</sup> Jesús ato yoiaino Judas nokoni, nã Judaspa Jesúsxõ tãpifikatsaxakĩ, yorafã rasifo fe oni. Nã yorafo kenofoya ifi xatefoya fenifo, a ato Nios kĩfixomisfãfe ãto xanĩfofo feta a Moisés yoikĩ kirika keneni keskara ato tãpimamisfãfe, a xanĩfo fetsafãferi ato nĩchiafono. <sup>44</sup> Judaspa nã ato efeaito iskafakĩ ato yoiyoni: “A ã kokoki tsoo akaito õikĩ koshi achirisafaxikãki metexkere axõ iyotaxikãki,” ixõ ato yoini.

<sup>45</sup> Nãskata Judas mã Jesús ano nokoxõ iskafakĩ yoini: “¿Mae-stro, mĩmẽ?” ixõ kokotoshini. <sup>46</sup> Nãskafaito õikakĩ nã Judas fe foafãfe Jesús achinifo.

<sup>47</sup> Akka Jesús achiaifãfe õikĩ a aõxõ tãpimis fẽtsa ãfe keno chainipa tsekainĩfõfã, a ato Nios kĩfixomisfãfe ãto xanĩfãfe ina paxteni. <sup>48</sup> Nãskakẽ Jesús yorafo yoini iskafakĩ: “¿Afeskai kenofoya ifi xatefoya mã oamẽ ea achiyoi oa ã yometso keskarakẽ? <sup>49</sup> Pena tii ã mato fe itiani Nios kĩfiti pexefã mẽraxõ ã mato tãpimani, akka mãkai ea achipaimisma. Akka nã eõnoa yoikĩ kenenifo keskafakĩ mã ea achi,” ixõ Jesús ato yoini.

<sup>50</sup> Ato askafaino aõxõ tãpimisfo Jesús õifaikani. Ichoi fetsenifo a makinoax.

<sup>51</sup> Akka naetapa fistichi sabanãnã rakoxõ Jesús chĩfafainaito õikakĩ achinifo. <sup>52</sup> Akka achiaifono ãfe sabanã potafaini chitoria ichoni.

*Xanĩfo finakõiafo ano Jesús iyonifo**(Mt. 26.57-68; Lc. 22.54-55, 63-71; Jn. 18.12-14, 19-24)*

<sup>53</sup> Nãskakẽ Jesús achikaxõ iyonifo a ato Nios kĩfixomisfãfe ãto xanĩfãfe pexe ano. Nãskakẽ keyokõĩ anofistiax ichanãnifo a ato Nios kĩfixomisfãfe ãto xanĩfofo fe a judeofãfe ãto xanĩfofo a Moisés yoikĩ kirika keneni keskara ato tãpimamisfori ato fe inifo. <sup>54</sup> Akka Pedro acho kakĩ chai ixõ õifoni. Nãskata a ato Nios kĩfixomisfãfe ãto xanĩfãfe pexe emãiti nokoni. Nãnoax a Nios kĩfiti pexefã kexemisfo fe chii ketefax ato fe yooni.

<sup>55</sup> A ato Nios kĩfixomis xanĩfofõfãfe a ãto xanĩfofinakõiafo fe iskai yoinãnifo: “Afeskaxomãĩ nõ pãranõ na Jesús afara chakafara ixõ retexiki. Akka afaakai chakafa nõ nikaima,” inifo. <sup>56</sup> Nãskaifono yora ichapafãfe, “Na Jesús afara chakafaito nõ õia,” ixõ pãraketanifo. Askafafiakakĩ anoris yoiketsanifoma. ãa chanĩ fetsenifo. <sup>57</sup> Askafaifono ranãri fininĩfõfãkãta ãa mekafakakĩ chakafakĩ fetsanifo iskafakakĩ: <sup>58</sup> “Nõ nikaino na feronãfake iskaita: ‘Na Nios kĩfiti pexefã yorafãfe akafo ã pãofaxii. Nãskata tres nia oxata ã anã fetsafaxii, anã yorafãfe efeta akanima, eres fisti ã aki,’ ixõ yoiaito nõ nikaita.”

<sup>59</sup> Askafakĩ yoifikakĩ tsõa anoris yoinifoma, ãa chanĩ fetsenifo.

<sup>60</sup> Nāskafaifono a ato Nios kīfixomisfāfe āto xanīfāfe ato nēxpakīa niinākaḡa iskaḡakī Jesús yōkani: “¿Mī kemamit-saimamē aḡamē na mīōnoa meka chaka yoiaifo?” ixō yoini.

<sup>61</sup> Askafaino akka Jesús tooxinima, pishtakai kermanima. Afianā a ato Nios kīfixomisfāfe āto xanīfāfe iskaḡakī yōkani: “¿Mīmē Cristo? ¿Nā Nios nipanakato āḡe Fakemē, mī?”

<sup>62</sup> Askafaito nikakī Jesús kemani: “Ēje, ēkīa Niospa Fake. Akka mā ea ōixii ēḡe Epa ketaxamei āḡe pōya kayakai aōri ē tsāokē xanīfo finakōia ēḡe Epa fe. Askatari mā ea ōixii nai kōi mēranoax ē anā fotofaito,” Jesús ato fani.

<sup>63</sup> Askafaito nikakī a Nios ato kīfixomisfāfe āto xanīfāfe āḡe rapatī faxteni fetsafāḡe tāpinōfo nā xanīfo ōitifishkikaito. Nāskaxō ato yoini iskaḡakī: “Mā nōakōi nō nikakī noko anā tsōa yoitiromaki nō tāpinō. <sup>64</sup> Mā mā nikakī na feronāḡe āḡe mekapa Nios chakaḡakī mekaḡaito. Akka, ¿nō afeskaḡaimē?” ato faito keyokōichi, “Nanōki,” fanifo.

<sup>65</sup> Nāskakata mā fenexkaxō āḡe femānāki kemo mechoketsayanā koshaketsanifo iskaḡakī yoianā: “Tsōa mia koshamakī tāpiḡo noko yoixiki,” faifono, a Nios kīḡiti pexefā kexemisfāḡeḡe fepasketsanifo.

*“Ē Jesús ōimisma,” Pedro ini*

*(Mt. 26.69-75; Lc. 22.56-62; Jn. 18.15-18, 25-29)*

<sup>66-67</sup> Pedro pexefā emāiti ato fe tsaono, nāno akiki a xanīfo yonoxomis xomaya nokoni. Nāno ato fe chii ketefaax tsaonax yooaito ōikī, iskaḡakī yoini: “Mīri Nazarete anoax Jesús fe kaḡāsamis,” faino, <sup>68</sup> akka Pedro iskaḡakī kemani: “Ēkai Jesús ōimisma. Ēkai aḡa tāpiama tsoaraōnoa mī yoi,” fata, pexefā kāiti ano Pedro nasteinīḡofānaino, takara keonākaḡāni.

<sup>69</sup> Afianā nā xanīfo yonoxomis xomayato Pedro ōiki, nānoafo iskaḡakī ato yoini: “A na feronāḡe Jesús fe rafemis ōikapo, a nā Jesús Nazarete ano aḡa fe kaḡāsamis,” fani.

<sup>70</sup> Akka Pedro anā iskani: “Maa, ēkai Jesús fe rafemisma,” ini. Nāskaino nā anoafāḡe anā Pedro yōakakī iskaḡanifo: “Chanīma, mīri Jesús fe rafemis. Mīri Galilea anoakī mī mekai nā Jesús mekai keskarakī,” faifono, <sup>71</sup> akka Pedro ato yoikī iskaḡani: “Ē mato pāraima, ē chanīaito ea Niospa omiskōimatiro. Niospa tāpia chanīmakōi ē mato yoi. Ēkai na Jesús ōimisma tsoaraōnoa mā yoi,” Pedro ato fani.

<sup>72</sup> Pedro nāskaino anā takara keoinākaḡāni. Nāskaino Pedro shinātani nā Jesús iskaḡakī yoita keskara: “Taeyoi takara keofi rafeamano, ‘Ē Jesús ōimismara,’ mī ea faxii tres fakī,” ixō yoitano, nā shinātani Pedro shināmitsai oiakōini.

## 15

*Pilato ano Jesús iyonifo**(Mt. 27.1-2, 11-14; Lc. 23.1-5; Jn. 18.28-38)*

<sup>1</sup> Mā penaino a ato Nios kīfixomisfāfe āto xanīfofo ichanānifo, a judeofāfe āto xanīfofo fe, a Moisés yoikī kirika kenei keskara ato tāpimamisfori ato fe inifo. Nā xanīfo fetsafori a ato rafeafori ato fe inifo. Nāskakaxō Jesús metexkere akaxō iyokaxō Pilato inānifo. <sup>2</sup> Mā iyoxō ināfono Pilato yōkani iskafakī: “¿Mīmē judeofāfe xanīfo?” askafaito, Jesús kemani: “Ēje, nā mī ea yoiai keskarakīa,” Jesús fani.

<sup>3</sup> Nāskaino nā ato Nios kīfixomisfāfe āto xanīfofofāfe āa pāarakī yōaketsanifo. <sup>4</sup> Nāskafaifono anā Pilato yōkaxō iskafakī yoini: “¿Mī ato kemaimamē mīōnoa afara chakafo yoifiaifono?”

<sup>5</sup> Askafaito nikakī Jesús tooxanima. Nāskakē Pilato shināni iskafakī: “Kee, ¿afeskakī ea kemaimamē?” ixō shināni.

*Pilato ato yoini Jesús retenōfo**(Mt. 27.15-31; Lc. 23.13-25; Jn. 18.38-19.16)*

<sup>6</sup> Akka Pascua fistatīa Pilato karaxa mēranoa nā xinia tii fisti rasi ato kāimapaoni māmāi askafakī feyafakatsaxakī. Nā yorafāfe kāimapaiyaifo ato kāimaxopaoni. <sup>7</sup> Akka nā karaxa mēra feronāfake āfe ane Barrabás ika ini. Nāato fetsafo feta yora retemis ini nā āto xanīfo ato pōtapaikī. <sup>8</sup> Akka yorafo fenifo. Mā fēkaxō Pilato yōkanifo māmāi askafakī feyafakat-saxakakī.

<sup>9</sup> Askafaifono Pilato ato kemani: “¿Mā fichipaimē judeofāfe āto xanīfo ē kāimanō?” ato fani.

<sup>10</sup> Akka Pilato tāpini a ato Nios kīfixomisfāfe āto xanīfofofāfe Jesús chakafakī mekafaifono anā yorafāfe noko nikakani-mara ikaxō, nāskakaxomāi akiki efekaxō ināfono. <sup>11</sup> Akka a ato Nios kīfixomis āto xanīfofofāfe fāsikōi yorafo mekamanifo: “¡Noko Barrabás kāimaxōfe!” ikaxō Pilato yoinifo.

<sup>12</sup> Askafaifono Pilato ato yōkani: “Akka, ¿na judeofāfe āto xanīfora mā fai ē afeska fatiromē?” ato faito, <sup>13</sup> kemakakī fāsikōi iskafanifo: “¡Mastafe!” fanifo keyokōichi.

<sup>14</sup> Askafaifono Pilato ato yoini iskafakī: “Akka, ¿na feronāfake afaa chakafamē?” ato faino, anā fāsikōi mekainīfofānifo: “¡Mastafe!” fanifo.

<sup>15</sup> Nāskafaifono yorafāfe sharakōi fanōfo Pilato ato Barrabás kāimaxoni. Nāskata mā Jesús ato koshamata, ato nīchixonī ifi cruz ikaki mastatanōfo.

<sup>16</sup> Nāskakē sorarofāfe xanīfāfe pexe emāiti Jesús iyonifo, nānoax sorarofo ichanānifo. <sup>17</sup> Nāskakaxō āfe rapati pēkakaxō, rapati ōshi nana safemanifo, moxa maiti fakaxori maimanifo. <sup>18</sup> Nāskakaxō fāsikōi mekafanifo iskafakakī: “¡Aicho, mīfi judeofāfe āto xanīfo!” ikaxō kaxemetsama fanifo.

<sup>19</sup> Nāskatari tafa xatenē mapoki koshaketsayanā akiki kemo mechoketsanifo. Nāskakata akiki ratokonō mai chachipakefofā kaxemetsama fanifo. <sup>20</sup> Nāskai mā akiki kaxemetsamakaxō a rapati ōshi nana safemanafō fiakaxō āfenākōi safemanifo. Nāskakaxō iyonifo mā ifi cruz ikaki mastai fokakī.

*Jesús ifi cruz ikaki mastanifo*

(Mt. 27.32-44; Lc. 23.26-43; Jn. 19.17-27)

<sup>21</sup> Mā Jesús iyoifokakī feronāfake Cirene anoa fichinifo, āfe ane Simón. Alejandro feta Rufo āto apa ini. Pexe rasi pasotai inoax oaito, fichikaxō yoinifo iskafakakī: “Na Jesús āfe cruz foxōikafe,” fanifo.

<sup>22</sup> Nāskaxō Jesús iyonifo āfe ane Gólgota ano. Āfe ane fetsa Mapo Xao fanifo. <sup>23</sup> Nānoxō fimi ene osia mokakōi Jesús ayamapainifo. Akka Jesús ayakaspani. <sup>24</sup> Nāskafakaxō mastanifo. Mā mastakanax sorarofō makex tokoroya kaxenifo. Nā potakī kanāto āfe rapati fīani. Nāskafakaxō keyofīanifo.

<sup>25</sup> Rama xini keyaino Jesús mastanifo. <sup>26</sup> Mā mastakaxō a mǎnǎo tafaraki kenenifo iskafakakī: “Judeofāfe āto Xanīfokōi,” ikaxō a mǎnǎo kenenifo. <sup>27</sup> Nāskakaxō Jesús yafi yometso raferi mastanifo, fetsa āfe pōya kayakai aōri ata, fetsari āfe pōya mishkiori anifo. <sup>28</sup> Afetīama aōnoa yoikī keneyonifo iskafakī yoinifo: “Nā yora chakakōifo keskarakōi ixō aōnoa yoixikani,” ikaxō kenenifo. Chanīmakōi. Nāskakōi fanifo aōnoa yoikakī.

<sup>29</sup> Nā ano finōfāifāfe ĭchayanā āto mapo rafe rafe ayanā iskafanifo: “Iskafakī mī yoimis: ‘Nā anoxō Nios kīfiti pexefā ē pǎo axii. Nāskaxō tres nia oxata ē anā axii,’ ixō mī yoimis. <sup>30</sup> Mī ifimetiromakī mīa ifimefe na ifi cruz ikakinoax fotopakekafāfe,” faifono, <sup>31</sup> nāskarifakī a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe askafanifo akiki kaxemetsamapaikakī. Nāskax āa ranā yoinākani iskanifo: “Nato fetsafo ififikatsaxakī, akka aakai ifimeima. <sup>32</sup> A na Cristo israelifāfe āto xanīfo, iskaratīa nō ōipanā afeskai ifi cruz ikakinoax fotopakekafanimamē, nāskaito nō chanīmara faikai,” ikaxō, nā ayafi mastaforti ĭchaketsanifo.

*Jesús nani*

(Mt. 27.45-56; Lc. 23.44-49; Jn. 19.28-30)

<sup>33</sup> Nāskata xini keya nā mai tio fakishifākōitani. Nāskax mā xini kaino anā penani. <sup>34</sup> Nāno xini rakano fāsikōi Jesús kenani isakai: “Eloi, Eloi, ¿lema sabactani?” fani. Nōko mekapa iskafakī yoini: “Ēfe Nios, ēfe Nios, ¿afeskakī mī ea potaimē?” fani.

<sup>35</sup> Nāskaito nā ano niafāfe nikakakī iskafanifo: “Nikakapo, nā ato Niospa meka yoipaoni Elías kenai kiki,” fanifo.

<sup>36</sup> Nāskaito nikafaini nānoa fetsa ichoni xapo keskara fiikai. Nā xapo keskara fimi ene kachaki momoxō tafa xate kaxkexō akiki nētaxō ayamapaini, iskafakī ato yoiyanā: “Enekāfe nō ōinō Elías oi kiki fotomaniyoi,” ixō ato yoini.

<sup>37</sup> Nāskakē Jesús fāsikōi eaita nani. <sup>38</sup> Nāskakē sama nami Nios kīfiti pexefā mēranoax naki rafekōi faxtepakkekafāni fomākīanoax. <sup>39</sup> Nāskaito ōikī nā soraro xanīfāfe Jesús eaita naito ōikī chaimashta nīxō iskafakī yoini: “Chanīma, na feronāfake Niospa Fake ika.”

<sup>40</sup> Askatarī kērofāferi chai nikaxō ōinifo. Nāno ato fe María Magdalenari ini, María fetsari ini, Jacobo feta José āto afa ini. Saloméri ato fe ini. <sup>41</sup> Nā kērofāfe Jesús chīfamisfo inifo, pimaxikakī Jesús Galilea ano ikano. Nānori kēro fetsafo inifo, Jerusalén anoax afe foitaxakakī.

### *Jesús makex kini mēra maifanifo*

*(Mt. 27.57-61; Lc. 23.50-56; Jn. 19.38-42)*

<sup>42</sup> Penama safaro ikaino judeofāfe itipinīfapaonifo, nā safaromāi āto teneti penakē, nā yātapake <sup>43</sup> José oni, nā Joséri judeofāfe āto xanīfo. Nāato Nios xanīfo manapaoni, nā José finakōixō Pilato ano ikikaixō Jesús āfe yora yōkani. <sup>44</sup> Askafakī yōkaito nikai Pilato rateni, “¿Mā Jesús naamē?” ikax. Nāskaxō soraro xanīfo kenani yōkaxiki mā Jesús naamakī. <sup>45</sup> Nāskafaito soraro xanīfāfe yoini: “Mā naakīa,” faito, Pilato Jesús āfe yora José ināni. <sup>46</sup> Nāskakē José sama sharakōi fixō nā samapa Jesús āfe yora rakoni. Nāskaxō a makex kini fanifo mēra rātani. Nāskaxō makexefanē nā kini feponi. <sup>47</sup> Akka María Magdalena feta María José āfe afa nā maifaafo anoxō ōinifo.

## 16

### *Jesús otoni*

*(Mt. 28.1-10; Lc. 24.1-12; Jn. 20.1-10)*

<sup>1</sup> Mā pena teneti finōano María Magdalena ikaino, María fetsa Jacobo āfe afa ikaino, Salomé ikaino, nā tiito pirofomā fonifo, Jesús āfe yora raish akī foxikaki. <sup>2</sup> Fakishparikōi fonifo mā pena teneti finōano nāskanax a Jesús maia ano nokonifo, mā xini keyaino. <sup>3</sup> Mā nokokanax āa ranā yoinākani iskanifo: “¿Tsōa na kini anoa tokiri noko fēpexotiromē?” ikanax yoinānifo.

<sup>4</sup> Akka ōiafo a kini aō fepoitafo a tokirinīfā, mā fepeke-meā ini, anā fepoa inima. <sup>5</sup> Nāskakē nā kini mēra ikifaikakī ōiafo. Nā kini mēra naetapa tsaoa ini, nā nōko pōya kayakai aōri. Rapati chainipa oxokōi safeax, nāskaito ōikani ratekōinifo. <sup>6</sup> Nāskaifono nāato ato yoini iskafakī:



“Rateyamakāfe, Jesús Nazarete anoa mā fenaikai nā ifi cruz ikaki mastaitafo mā otoaki anā nonomaki. Ōikapo a rātaitafo ano. <sup>7</sup> Fokaxō aōxō tāpimisfo yoitakāfe, Pedrori yoikakī mā nokoamano nā Galilea ano nokoi taei kai kiki. Nā mato yoifafaina keskara nārixō mā ōikaikai,” ixō ato yoiaino, <sup>8</sup> nāskakē nā kērofo fonifo nā kini anoax ato yoiaito nikafaikani. Ratei choayanā ato yoinifoma, mesemāiakaki.

*Jesús María Magdalenaki nokoni*  
(Jn. 20.11-18)

<sup>9</sup> Mā pena nomīkonō fakishpari Jesús otoitaxaki, María Magdalenaki nokoi taeni, nā María makinoa siete niafaka yōshi chakafo Jesús pōtani. <sup>10</sup> Nāato kaxō a afe rafemisfo ato yoikai kani a ōia keskara. Kaxō ato ōia shināmitsakani oiaifāfe ato ōini. <sup>11</sup> “Mā nōko Ifo Jesús otoakī mē ōiaki,” ixō ato yoiaito, tsōa chanīmara fanima.

*Jesús aōxō tāpimis rafeki nokoni*  
(Lc. 24.13-35)

<sup>12</sup> Mā askata fetsa keskarax Jesús aōxō tāpimis rafeki nokoni fāi foaifono. <sup>13</sup> Nā rafetari a afe rafemisfo yoifokani fonifo. “Mā nō Jesús ōiaki,” ato faifono, tsōa ato nikanima.

*Jesús aōxō tāpimisfo yoini aōxō keyokōi yoifofāsafatanōfo*  
(Mt. 28.16-20; Lc. 24.36-49; Jn. 20.19-23)

<sup>14</sup> Nāskata chipo Jesús aōxō tāpimis oncefoki nokoni, mīsa ano tsoaxō piaifono. Mā atoki nokoxō iskafakī ato yoini: “¿Afeskakī mā ato chanīmara famamē mē otofiano nā ea ōiafāfe mato yoiiaifono?” <sup>15</sup> Nāskaxō ato yoikī iskafani: “Nā mai tio ano fokaxō na meka shara eōnoa keyokōi ato yoitakāfe mē otoakī āto chaka ato soaxoxiki efe ĩpaxanōfo. <sup>16</sup> Akka na meka shara chanīmara fakanax, faka mēra iki maotisameax ēfe Epa Nios fe nīpanakafo. Akka na meka shara eōnoa chanīmara fayamakanax, nāfo omiskōipakenakafo. <sup>17</sup> Akka nā ea chanīmara faifāfe, ēfe aneōxō ato maki-noa niafaka yōshi chakafo potatirofo. Nāskakanax meka fena sharapa mekatirofo. <sup>18</sup> Nāskakaxō rono tsomatirofo nāskakaxori rao paekōi ayakanax afeskatirofoma. A isinī ikaifori ato ramāifono sharatirofo,” ixō Jesús ato yoini.

*Jesús nai mēra kani*  
(Lc. 24.50-53)

<sup>19</sup> Nāskafakī ato yoita, nōko Ifo Jesús ronoinākfāni nai mēra kai. Mā nai mēra kaax Apa Nios ketaxamei tsaoni afe xanīfokōi ixiki. <sup>20</sup> Mā Jesús nai mēra kaano aōxō tāpimisfo fonifo. Nā mai tio anoafo aōnoa meka shara yoifokani afe nīpaxanōfo. Nōko Ifāfe ato axōfaino aōxō aōnoa meka shara

yoikõinifo, tsõa atiroma keskafakĩ aõxõ afama mĩshtifori fan-  
ifo. Nã tii.

## Lucaspa Jesúsnoa Yoikĩ Keneni

*Lucaspa kirika keneni Jesús nõko mai ano ipaonino*

<sup>1-4</sup> Teófilo, ẽ mia kirika kenexõ manamani, mĩ tãpinõ. Mã mĩ tãpia Jesús nõko mai ano ipaoni. Nõko mai ano ikano yorafãfe õipaonifo. Akka nã fakenitĩa õiaifono yosini. Nãfãferi õikaxõ yora fetsafo yoipaonifo akairi Jesúsnoa tãpinõfo. Ato yoiãifãfe nikakakĩ akairi kirika kenepaonifo afeskai nofe Jesús ikimamẽ ikaxõ. Nãskarifiakĩ ẽ mia kirika kenexoni, nã Jesús tãpiafo yõkaxõ. Efe yorashta Teófilo, nãskakẽ ẽ mia kirika kenexõ manamani, nã mia Jesúsnoa yoiãifono nikakĩ mĩ chanĩmara fanõ.

*Ãjirinĩ yoini, Juan Maotista kãiyõamano*

<sup>5</sup> Jesús fakeamano Zacarías iyopaoni Judea mai ano ãfe kaifo fe. Ari ikano Herodes ãto xanĩfo finakõia ipaoni. Nã Zacarías ãfe xini ane ipaoni Aarón. Nã Aarón ãfe fena Zacarías ipaoni. Akka ãfe ãfi Elizabetri Aarón fena ipaoni, ãto xinimãi Aarónkẽ. Nã Aarón ãfe fenafãfe ato Nios kĩfixopaonifo ãto kaifofo. Zacaríasri ato kĩfixopaoni Aarón ãfe fenamã axõ. Nã Zacarías ãfe kaifo feta yonopaoni, Nios kĩfiti pexefã mẽraxõ Abíasfo feta. <sup>6</sup> Zacarías ãfe ãfi feta Niospa meka nikasharakõipaonifo, nã Niospa meka yoikĩ keneniõo keskafakĩ. Akka nã Niospa yoiãi keskafakĩ nikasharakõiaifono Niospa ato õini, shara shinãi ikafono. <sup>7</sup> Akka Elisabet fake fimisma ipaoni. Nãskaxõ mã yõxãfoxõ fake fipaonima fene feta. Nãskax fene anifoaino nãri askani yõxãfoi.

<sup>8</sup> Nãskakẽ ãto xanĩfãfe ato yoini, Abías yorafo: “Nã Nios kĩfiti pexefã mẽra yonomisfo mã tsekefaini fokani kiki. Mãri ikiferakãfe,” ato fani. Ato askafaino a mẽra ikifaikaxõ yononifo. Zacaríasri a mẽra ato fe ikikaixõ ato feta yononi. <sup>9</sup> Nios kĩfiti pexefã mẽra ikifaikanax yoinãnifo iskakani: “¿Iskaratĩa tsõa na pirofomã shara koofaimẽ nõ õinõ?” inifo. Askaifono ãfe xanĩfãfe Zacarías yoini: “Mĩ koofafe na nakas Niospa xeteax inimanõ,” fani. Akka nãskara feyafapaonifo, pirofomã nakas shara koofapaonifo. <sup>10</sup> Zacarías pirofomã shara koofaino yorafãfe emãiti nikaxõ Nios kĩfinifo. <sup>11</sup> Yorafãfe emãitixõ Nios kĩfiaifono, Zacarías pexefã xãki mẽraxõ pirofomã koofaino ãjiri nĩtani, pexe xaki mẽra pirofomã koofai kesemẽ ãfe põya kayakai aõri. <sup>12</sup> Nãskakẽ ãjiri nikẽ fichiax Zacarías mesta itani. <sup>13</sup> Rateaino Niospa ãfe ãjirinĩ yoini: “Zacarías, rateyamafe. Mã Niospa mia nikakĩ mĩ kĩfiaito mã mĩ ãfinĩ fake feronãfake fii kiki. Mĩ fake kãiano anekĩ Juan mĩ faxikai. <sup>14</sup> Mã mĩ fakeyax

mĩ inimaxikai. Yorafori akiki inimakõixikani. <sup>15</sup> Niosri akiki inimasharakõixii. Fãsi finakõia Niospa õixii, Niospa Yõshi Sharapa shinãmanaino. Nãskakẽ afaa pae pishta ayaxima. <sup>16</sup> Nãskaxõ mã yosixõ Niospa meka ato yoixii ãfe kaifo israelifo ãfe fenafo, Niospa meka ato yoiaino ãto chaka xatenõfo. ãto chaka xatekaxõ Nios fisti nikakõinõfo. <sup>17</sup> Nõko Ifo oyoamano taeyoi Niospa Juan nĩchixii ãfe meka ato yoinõ. Akka Juan ãfe shara nã Eliãsnã ipaoni keskara ixii Niospa Yõshi Sharapa shinãmanaino. Afe yorafo ato tãpimaxii. Nãskaino ãto apafo fe ãto fakefo anã noinãxikani. Askatari nã Niospa meka nikakaspamisfãfe akairi ãto chaka xatekaxõ Nios Ifofaxikani shinãsharaxikakĩ. Nãskakẽ Juanoax ãfe kaifo itipinĩsharaxikani Niospa Fake atoki nokoaitĩa ifisharaxikakĩ,” ixõ ãjirinĩ yoini.

<sup>18</sup> Askafaito nikakĩ yoini: “¿Afeskai ã fakeyatiromẽ? Êkai anã fake atiroma ã anifokõi. Êfe ãfiri nãskarari yõxafokõi. Afeskaxõ afeta nõ anã fake fitiroma,” fani.

<sup>19</sup> Askafaito nikakĩ ãjirinĩ kemani: “Êkĩa Gabriel, ã Nios fe ika. Ea nĩchiano ã oa. Nikapo, ãfe meka shara ã mia yoinõ. Mã mã ãfinĩ fake feronãfake fii kiki. <sup>20</sup> Akka, nã ã mia yoiaito mã ea nikakaspax mã anã mekaima. Mã mã fake kãiano mã mekaxii. Nãskax mã mekamais iyoi. Akka Niospa ea fake fimatiroma ãmã anifokẽ mã ifiãito Niospa mia fake fimatiro. Nã ã mia yoiã keskafakĩ Niospa mia askafaxii. Nã Niospa mia apaiyãitĩa mia askafaxõi kiki,” ãjirinĩ fani.

<sup>21</sup> ãjiri fe Zacarías pexe xaki mẽranoax yoinãino yorafo pexe emãiti nikanax yoinãnifo, Zacarías fena kãiyamaino pexe xaki mẽranoa. “¿Afeskai Zacarías samarakaimẽ pexe mẽranoax? Afetĩakai ikiyama,” faifono <sup>22</sup> Zacarías kainãkafani Nios kĩfiti pexefã xakĩ mẽranoax anã mekanima yõkapaifaifono. “¿Afaa pexefã mẽranoa õiax mã iskaimẽ?” fanifo. Askafaifono ato yoipãifi mekanima. Mekapaikĩ ãfe mĩfis ato yoini a õia.

<sup>23</sup> Nãskai anã mekaima Zacarías ãfe xanẽnẽ kani mã yonokĩ keyoax. <sup>24</sup> Nãskata mã Zacarías ãfe pexe ano nokoano ãfe ãfinĩ chipo fake naneni. Mã fake naneax faki kafãsapãonima nã ãfe xanẽnẽ fisti ipaoni cinco oxe ani ãfe xanenẽxõ. <sup>25</sup> Nãskaxõ mã postoxõ yoini: “Aicho, mã Niospa ea sharafakĩ ã fake finõ ã yõxafofiakẽ. Niospa ea fake fima. Aicho, iskaratĩa ã anã yorafoki rãfinakamaki mẽ fakeyakĩ,” Elizabet ini.

### *ãjiri fotopakekafãni, Marĩa yoiyoi*

<sup>26</sup> Elizabet mã fake nanekĩ seis oxe akano Galilea mã ano Niospa anã nĩchini ãfe ãjiri Gabriel, Nazarete pexe rasi ano. <sup>27</sup> Nãskakẽ Niospa ãfe ãjiri Marĩa ano fotopakekafãni yoiyoi. Fotopakekafaxõ yoini. Nã Marĩa fenemais ini. Feronãfake fetsa fe oxamisma. Marĩa fenemais ikano José apa yõkani,

María fixiki. Nã José áfe xini David ipaoni. Nã David áto xanĩfo finakõia ipaoni. Akka José María fiyoamano ájiri fotopakekafãni, María ano. <sup>28</sup> Fotopakekafãxõ María yoini: “Mẽ oi mia yoiyoi, Nios mikiki inimai mefe ika,” fani.

<sup>29</sup> Askafaino María shinãpaini: “¿Afaa ea yoipaimẽ, na ea iskafai?” ixõ shinãpaini. <sup>30</sup> Shinãpaiyaito anã ájirinĩ yoini: “Rateyamafe. Mia Niospa noisharai kiki mia sharakõi õi kiki, mikiki inimasharai kiki. <sup>31</sup> Mã mĩ fake feronãfake fikai. Mã mĩ fake kãixõ anekĩ Jesús mĩ faxikai. <sup>32</sup> Mĩ fake xanĩfo finakõia Niospa imaxii. Áfe xini David keskara ixii. Nios nã nai mẽra ikato áfe Fakekõi faxii. <sup>33</sup> Nãskakẽ mĩ Fake xanĩfo finakõia ixii. Mĩ kaifãfe xanĩfo ipanaka. Anã xanĩfoi xatenakama,” fani.

<sup>34</sup> Askafaito María kemani: “¿Afeskakĩ ã fake fitiromẽ ã feneyaxoma, ea tsõa tanamismano?” María ini.

<sup>35</sup> Askafaito ájirinĩ kemani: “Niospa áfe Yõshi Shara mikiki oxõ mia fake nanemaxii. Nãskax nã fake kãiax Niospa Fakera faxikani. Akka na fake kãiax sharafinakõia fisti ixii. <sup>36</sup> Nã mĩ yaya Elisabet ‘Fake fitiromara’ fafiamisfono mã fake nanea seis oxe aka yõxafofiaxõ. <sup>37</sup> Nãskakẽ nã apaiyai keskara fakĩ Niospa afama mĩshti fatiro. Miari fake fimatiro mĩ fenemaisfikẽ,” ájirinĩ fani.

<sup>38</sup> Ájirinĩ askafaino, “Nãskafinõ, ã fake finõ, ã Nios nikamiskĩ. Nã ea amapaiyai keskafanõ ã Nios itixomafamiski,” nãskafani. María askafaino ájiri anã nai mẽra kani.

### *María kani Elisabet õikai*

<sup>39</sup> Nãskata nã pena fisti mã Niospa ájiri kaano María itipinĩ fata koshi kani áfe yaya õikai Judea mai ari. Judea mai ari mãchifãfo mẽra kaax pexe rasi ano nokoni. <sup>40</sup> Mã nokoax Zacarías áfe pexe mẽra ikitoshini. Mã nokoxõ María áfe yaya yoitoshini. “Yaya, ã oi mia õiyoi,” fatishoni. <sup>41</sup> Áfe rare askafatishonaito Elisabet nikani. Áfe rare askafaito nikakĩ Elisabet xakĩ mẽraxõ áfe fake tokko tokko ani. <sup>42</sup> Nãskata Niospa Yõshi Sharapa shinãmanaino Elisabet onãni mã María fake naneano. Nãskakẽ fãsi yoini iskafakĩ: “María, Niospa mia inimamasharakõi. Fato xotofake fetsakai iskafaima mia fisti inimamakõi. Mĩ fake feronãfake chipo kãiano Apa Niospa akiki inimakõikĩ kexesharakõixii. <sup>43</sup> Nõko Ifokõi mĩ fake ixii. Akka, ¿mĩ ea ano oamẽ, nõko Ifãfe afafiãx êkai afaakeroko êakõi ã ikanõ? <sup>44</sup> Akka mĩ ea yoiãito nikakĩ êfe xakĩ mẽraxõ êfe fake ea tokko tokko aka, mikiki inimakĩ. <sup>45</sup> Niospa meka nikakõikĩ, ‘Nẽ askanõki,’ ixõ mĩ yoita. Nãskakẽ Niospa meka nikai mĩ inimasharakõi,” ixõ Elisabet yoini.

<sup>46</sup> Nãskafaito María kemani:

Èfe õiti mẽraxõ ã shinãkĩ iskafai, nõko Ifo tsoa keskaramãkĩ. Nõko Ifo Nios fãsi sharakõi. <sup>47</sup> Akiki ã inimakõiaino ea anã potanakama, ã afe ipanaka, ea

kexepakenaka, ea ifixii ě afe ĩpaxanō. <sup>48</sup> Ĕ nā yonoxomis, ě afaa tāpīamafekē nā Niospa ea noikōi. Nāskakē yorafāfe yoipakenakafo: “Nā María Niospa inimamakōia,” ĩxō yoipakenakafo. <sup>49</sup> Nios fāsi sharafinakōia. Afaa pishta fayamatiroma. Afama mīshti fatiro, ea sharakōi faxōa. Niosfi sharakōiki. Afaa chakafamisma Niosfi nāskarakōi. <sup>50</sup> Nāskara yorafāfe yoitirofo: “Ĕ Nios nikasharapaikōiaito, ě nikakaspaitori ea chakafatiro. Nāskax ě akiki mesetiro. Akiki mesekī ě Nios nikasharakōi,” ĩxō yoiāito nā keskara yorafo Niospa ato noikī ato shināpakenaka. <sup>51</sup> Akka Nios nikakaspakī āto ōiti fekaxtefakani, “Tsōa afaa tāpikeroko ě akai keskafakī,” ĩxō āto ōiti fekaxtefatirofo. Nāskaifono Niospa ato fenomatiro. Nāskara ato ōimatiro afaa tāpīamafāfe. Akka Niospa āfe shināmā afama mīshti famiski. Afaa pishta Niospa fayamatiroma. Nāfi mitsisipakōikī tsoa keskarama. Nāato afara mīshti fatiro. <sup>52</sup> Nāato xanīfofo potano anā tsoa xanīfo itiro. Akka nā afaayamafo Niospa ato sharakōi imatiro. <sup>53</sup> Akka fetsafāfe Nios shināifono Niospa ato kexesharatiro. Āfe shināmā āto ōiti mēra ato shināmatiro inimanōfo. Akka fētsa shinākī iskafai: “Ĕ iskaratīa shara ě afara fetsa anā shināima Niospa afara fetsa ea anā shināanima ě anā Nios fe rafepaima,” ĩxō shināito askara yora Niospa anā tanaima. Afaa pishta tāpikanamax yorafo askatirofo. <sup>54</sup> Niospa noko kexesharapakenaka nōko kaifo israelifāfemāi yonoxomisfono. Noko shināmakinakama mēxotaima noko noipakenaka nā yoini keskafakī. <sup>55</sup> Niospa nōko xini Abraham yoikī iskafani: “Mī kaifo efe yorafo ipanakafo. Askatari mī fenafo ě ato kexesharapakenaka,” ĩxō Niospa nōko xini Abram yoini,

ĩxō María fani.

<sup>56</sup> Nāskax María Elizabet ano ipaoni tres oxe ani anoxō. Tres oxe ata anā María āfe xanēnē oni.

### *Juan Maotista kāini*

<sup>57</sup> Mā María āfe xanēnē oano Elisabet fake feronāfake kāini. <sup>58</sup> Mā fake kāiano āfe kaifāfe a chaima nikafāfe tāpinifo. “Mā Elisabet fake kāia nōko Ifo Niospa mā Elisabet aō noikī fake fimismano mā fake fima,” nāskafanifo. Askafakanax akiki inimanifo. <sup>59</sup> Mā fake kāitaxakī ocho nia oxano Zacarías pexe ano yorafo fonifo. Fake ōikai fokani āfe foshki repa xateyanā nāskaramāi feyafakatsaxakakī. Fokaxō yoinifo: “Āfe apa anekiriri nō anenō Zacarías fakī,” fanifo. <sup>60</sup> Nāskafaifono āfa ato yoini: “Maa, ě aō aneima, Zacarías ě faima. Afeskakīkai apa anekiri ě anetiroma. Ĕa ě anei Juan fakī,” ato fani.

<sup>61</sup> Ato askafaito yoinifo: “¿Tsõa anekiri mĩ aneimẽ? Anokai ãfe xinifo Juanma. ãfe apa nõ yõkanõki,” fanifo.

<sup>62</sup> Akka nõ fãke apa mekamais ita pastori ini. Nãskakaxõ apa yõkanifo. Mẽkemã ato yoini: “¿Afe ane mĩ fake mĩ faimẽ?” fanifo. <sup>63</sup> Askafaifono ato yoini mẽkemã: “Ea kirika inãkãfe, ẽ mato kenexonõ,” ato askafani. Kirika inãfono kirikaki kenekĩ: “Ë ãfe ane Juan fai,” ixõ kirikaki keneeni. Mã kirikaki keneano õikaxõ yoinifo: “Õikapo. Mã anea Juan fakĩ. ãfe ane Juan ixii,” fanifo, apa feta ãfe ãfa aneaito shinãpainifo. <sup>64</sup> Nãskata ãfe fake ane keneta Zacarías mekani. Anã mekamais inima, mã mekaya ini. Mã mekayaxõ ato yoini: “Nios sharakõi,” ato fani. <sup>65</sup> Mã Zacarías mekaito õikani ratenifo. Mã ratekanax fokani yoinãi fetsenifo. Nãskakanax mã fokani Judea mai ari fokani yoinãfonifo: “Mã Zacarías ãfe fake aneax mã mekai. Mã ãfe ãfinĩri fake fikatsaxakima, mã fake fia,” ikanax yoinãi fetsenifo. <sup>66</sup> Yoinãi fetsekaxõ shinãnifo: “Nã fake afeskaimãkai nõ õinõ shinãya iki kiki, Niospamãi shinãmasharaino,” ikaxõ shinãnifo.

### *Zacarías fanãini*

<sup>67</sup> Niospa Yõshi Sharapa shinãmanaino Juan ãfe apa Zacarías yoini:

<sup>68-69</sup> Ëfe kaifo israelifãfe nõko Niosfi sharakõikĩ, nãfi nõko Ifokõikĩ. Nõko chaka noko soaxoxii. Nõko xini David ãfe fena finakõia ixii. Nã David nõko xinifãfe ãto xanĩfo ipaoni. Nã ãfe fena Niospa nĩchia noko ifipakexanõ afe nõ ipaxanõ. Nãskakẽ noko shinãmakinakama. <sup>70</sup> Nãskakaxõ ato yoipaonifo, nã ato Nios yoixomisfãfe Judea mai anoafo. <sup>71</sup> Niospa ato shinãmanaino yoipaonifo noko kexesharano afanã noko afeskafanõma noko õikaspaifono ixõ yoinifo. <sup>72</sup> Nã noko yoiaifãfe nõ ato nikapaoni keskafakĩ noko Niospa kexesharapakenaka noko noikĩ. Nã noko yoipaonifo keskai Nios noko shinãmakimisma. <sup>73</sup> Nãskaxõ nõko xini Abraham Niospa yoini iskafakĩ: “Mĩ kaifo efe yorafo ipanakafo. Nãskakẽ mĩ fena ẽ ato nĩchixoni ãto xanĩfo finakõia inõ. Nãskaxõ keyokõi ato ifixii afe ipaxanõfo. <sup>74</sup> Nãato nõ mato õikaspaifo ato paxkaxii anã mato afeskafanõfoma,” ixõ Niospa yoini. Noko askafaino nõ ãfe inafõax nõ anã mesetiroma nokomãi nõko Ifãfe ikikẽ. <sup>75</sup> Nõ ãfe ina kayakõikẽ nõko õiti noko shara faxoxii aa noiax nõ isharakõipakexanõ, ixõ Zacarías ato yoini.

<sup>76</sup> Nãskata Zacarías ãfe fake yome pishta yoini:

Anifoshta, nõko Nios finakõia nõ mãnão nikõina. Akka mĩ yosixõ Niosnoa mĩ ato yoixoxii. Taefakĩ mĩ ato yoixonano chipo nõ nõko Ifo finakõia oxii. Nãskakẽ itipinĩkãfe mã nõko

Ifo oi kiki mĩ ato faxii. <sup>77</sup> Nāskakē mĩ ato tãpimaxii mã nõko Ifo oaino afe yorafo ato chaka soaxoniyo. <sup>78</sup> Akka Niospa noko shinãino ãfe Fake finakõia nai mēranoax nokoki oi nõko õiti noko sharafaxoxiki. Oa fakishpari xini koshi kafanai keskafakĩ nõko õiti xafakĩa sharakõi noko faxoxiki, <sup>79</sup> anã fakish keskara nõko õiti inõma. Nāskax nai nõ mesetiroma noko shinãmasharaino,

ixõ Zacarías ato yoini.

<sup>80</sup> Nāskax Zacarías ãfe fake yosini Niospa ãfe shinãmã shinãmasharaino. Nāskax ares tsõa istoma ano ipaoni, nã Niospa meka israelifo ato yoikĩ taefaitĩa.

## 2

*María Jesucristo kãini*

*(Mt. 1.18-25)*

<sup>1</sup> Nã Jesús kãiyaitĩa romanõ ãfe xanĩfãfe César Augusto ãfe yorafo nĩchini nã maitio anoafõ ato tanãkaxõ ãto anefo kenenõfo afe tii yorafomakĩ. <sup>2</sup> Taefakĩkõi kirika kenenifo ãto anefo keyokõi. Akka Siria mai anoafãfe ãto xanĩfãfe ane Cirenio ipaoni. <sup>3</sup> Nāskakē keyokõi fonifo ãto mai anoxõ ãto ane kenei fokani. <sup>4</sup> Nāskaifono María feri José kani Belén ari, Nazarete ano ikanax. Nã Nazarete pexe rasi Galilea mai anoa ini. Nãnoax José fe María fonifo, José ãfe xini Davidmã Belén anoax kãinino. Nã Belén Judea mai anoa ini. <sup>5</sup> Nāskakē María fe José fonifo ãto ane kenei fokani. María fe José mã yoinãfo ini fianãxikakĩ. Fianãyokanamax María fe José kani. Nã María tosa pishta tanamisma ini, akka Niospa Yõshi Sharapa fake nanemani. <sup>6</sup> Mã María Belén ano nokoano fãke pãe fani mã kãiki. <sup>7</sup> Mã fake kãiax fakeyai taeni. ãfe fake feronãfake ini. Akka ãto fakka inafãfe piã mēra fonifo. Anoax María fake kãini. Mã fake kãixõ sama faxte pishta rakoni. Askata ãfe fake rãtani a fakkafãfe piã kamaki.

*Ājirifo oveja kexemisfoki nokoni*

<sup>8</sup> Nã María fakishi fake kãiano oveja kexemisfãfe fasifo mēraxõ ãto ovejafo kexeshinifo pexe rasi pasotaixõ. <sup>9</sup> Āto ovejafo kexeshinaifono Nios ariax ãfe ājiri atoki fotokĩ chaxapakefõfãni. Niospa nĩchiano chaxapakefõfãni. Mã Niospa ājiri nĩchiakĩ inifo chaxatanaito fichikanax ratekõinifo. <sup>10</sup> Nāskaifono ājirinĩ ato yoini: “Rateyamakãfe. Ē mato meka shara yoiyoaki nikax mã inimai finakõinõ. Askatari yorafãferi nikakanax akairi keyokõi inimakõinõfo. <sup>11</sup> Iskaratĩa fotoxõ ě mato yoiyoa. Nã fakishi mã mãto Ifo Cristo mã kãia mãto Ifokõi mato ifixiki mã afe ĩpaxanõ. Nã mãto xini David kãini anoaxri kãia mãto Ifokõi. <sup>12</sup> Ē mato yoinõ nikakapo afeskaxõ



mã tãpitiromakĩ nã fake ãfe afa rapatinĩ rakoxõ rãta fakkafãfe piai ano fichixõ mã tãpitiro nã mãto Ifo finakõia,” ixõ ãjirinĩ ato yoini.

<sup>13</sup> Ato yoikĩ xatetanaino atiri Niospa ãfe ãjiri ichapakõifo atoki fotopakefõfãni. Fotopakefõfãkata inimakõi Nioski fanãinifo. Inimakata iskafakĩ yoinifo:

<sup>14</sup> Nios sharakõi nai mẽra ika. Nã ato fichipaiyai tii nono mai anoax ikafo ato shinãmasharai inimanõfo, ixõ yoinifo.

<sup>15</sup> Mã yoikanax anã nai mẽra fonifo. Mã nai mẽra ãjirifo foafono, “Nõ õinõ,” inifo, “Chanĩmamakĩ nõ õinõ, fokapo Belén ano na nõko Ifo Niospa ãfe ãjirifo nĩchiano noko yoiãfo keskara nõ õinõ fokapo,” ixõ yoinifo.

<sup>16</sup> Nãskata nã oveja kexemisfo fonifo. Mã fokakĩ ichokaxõ fichitoshinifo María yafi José. Nãno ãto fake yome rãtafono fakkafãfe piai mẽra fasi mẽra rakakẽ õinifo. <sup>17</sup> Nã fake yome õiafo tiito ato yoifõfãsafanifo. <sup>18</sup> Nã oveja kexemisfãfe ato yoiãifãfe nikakakĩ, “Aira, ¿afeskakĩ iskara shara noko yoikanimẽ?” inifo. <sup>19</sup> Nãskakẽ María nã nika keskafakĩ ãfe õitinĩ fãsi shinãfãfãini. <sup>20</sup> Nãskakata nã oveja kexemisfo ato yoitakani anã ato ovejafo ano fenifo. “Aicho, Nios sharakõikĩ nã noko yoiã keskafakĩ mã nõ õitanikai,” ikanax ãa ranã yoinãnifo.

*Nios kĩfiti pexefã mẽraxõ apa feta ãfa ãto fake Jesús Nios ispanifo*

<sup>21</sup> Mã ocho nia oxano Jesús foshki repa xatenifo. Nãskafakaxõ anenifo Jesús fakakĩ, nã ãjirinĩ yoiyoni keskafakĩ María fake naneyoamano.

<sup>22</sup> Moisés israelifo yoini iskafakĩ: “Kẽro fake kãiax fena faki kafãsatiroma. Askatari Nios kĩfiti pexefã mẽra fena iki-tiroma cuarenta nia oxa finõaxma,” ixõ ato yoini. Akka mã cuarenta nia oxa finõano José fe María fonifo. Jerusalén ano iyoifokani ãto fake Nios kĩfiti pexefã mẽraxõ Apa Nios ispaxikakĩ. <sup>23</sup> Nãnori Niospa shinãmanaino Moisés kirikaki keneni iskafakĩ: “Fake kãi taexõ feronãfakekẽ mã Nios ispatiro ãfenã inõ,” ixõ ato yoipaonino, José feta María ãto fake Jesús iyonifo Jerusalén ano. <sup>24</sup> Nãskakẽ José fe María mã fokaxõ a Moisés yoini keskafakĩ a Nios ato kĩfixomis rifi rafe iyamai nopoxpoiki rafe inãnifo retexõ Nios kĩfixonõ nãnorimãi Moisés yoipaonino.

<sup>25</sup> Nã Jerusalén anoa feronãfake Nios Ifokõi faa ini, ãfe ane Simeón. Nãato Nios Ifo sharakõi faxõ kĩfitaifapaoni. Niospa Yõshi Sharapa Simeón ikinãno, nãato Cristo manapaoni, ãfe kaifo israelifo ifinõ Niospa Yõshi Sharamãi afe ikano. <sup>26</sup> Niospa Yõshi Shara a mẽra naneano a mẽraxõ tãpimani iskafakĩ: “Mĩ fena naima na Niospa nĩchiai nõko Ifo

Cristo mĩ òiyoi mã mĩ òiax mĩ naxii,” ixõ tãpimani, Niospa Yõshi Sharapa Simeón. <sup>27</sup> Nãskata Niospa Yõshi Sharapa shinãmanaino Nios kĩfiti pexefã mēra ikikaini. Nãnori José fe María ãto fakeya ikifainifo, Moisés yoini keskafakĩ ãto fake ispaxakakĩ. Mã ikiafono, <sup>28</sup> Simeón atoki oxõ inimayanã Jesús yome pishtakē chishtoinĩfofãni, mã tãpixõ. Nãskafaxõ Nios yoisharani iskafakĩ:

<sup>29-31</sup> Ifo, ea mã yoyimis keskafakĩ mē òi. Aicho, mē akiki inimakõiax mē naikai ěfe Ifo òiax. Nãatofi noko ifixii kiki nõ afe ĩpaxanõ. Keyokõichi nõ Ifofanõ mĩ nokoki nĩchia.

<sup>32</sup> Nãskata mĩ nõko kaifo yamafiano mia shinãkatsaxakakĩma mĩ fãkeoxõ mia tãpikõikani. Akka nõ israelifo mefe yorafo nõ tãpikõixii, nã fakeõnoa Niospa nokoya rafemanano. Aõxõ nã noko yoyimis keskafakĩ noko axoxii,

Simeón fani.

<sup>33</sup> Ato askafaito nikakĩ María feta José ãto õitinĩ shinãnifo: “Aira, nõkai nafo meka nikamisma,” ixõ shinãnifo. <sup>34</sup> Akka Simeón Niospa Yõshi Sharapa shinãmanaino ato yoisharani. Nãskaxõ ģfe afa yoini: “Nã mĩ fake chanĩmara fakanax nõko kaifofo israelifo inimatirofo. Aõnoax isharapakexakakĩ. Akka nõko kaifo fetsafori afe rafeyamakanax omiskõipakenakafo. Nãskakē yora ichapafãfe chanĩmara fakani. Akka fetsafãferi chanĩmara fakaxõ mã shinãkani. <sup>35</sup> Akka a ãto õitinĩ shinãifo keskafakĩ onetirofoma. Akka fētsa ãa shinãkĩ a shinãĩ keskara onetiroma. A shinãyamaifori onetirofoma. Xafakĩakõi ato õitiro. Nãskakē mĩ fake aa noikaspaxõ chakafaxikani. Askafaiãfe òi aõnoax mĩ omiskõixii shinãi. Nã kenopa mĩ õiti xatea keskara mĩ meexii omiskõikĩ,” Simeón fani.

<sup>36</sup> Nãnori kēro fistiri ini, ģfe ane Anã. Nãatori Niosnoa yoini, a inõpokoai yoikĩ. Akka nã Anãmã apa Fanuel ini. ģfe kaifo Aser nafafoni. Akka nã Anã yõxafokõi ini. Xomayakõi feneyayoni, siete xinia afeta akax fene nani. Nãskakē anã Anã feneya ipaonima. <sup>37</sup> Ares ikax yõxafokõi ini ochenta y cuatro xinia ani feneyaxoma. Nãskakē Anãmã mēxotaima Nios kĩfipaoni, pena fisti foni teneyanã. Nios kĩfiti pexefã mēranoax Anã askapaoni. <sup>38</sup> Nãskata María fe José Simeón fe yoinãifono Anãri atoki oni. Oxõ nãnoa Jesús fichini. Fichita akiki inimani. Inimayanã Epa Nios iskafani: “Aicho Epa Niosi, iskaratĩa mĩ Fake mĩ nokoki nĩchiaki nofe rafemis ĩpaxanõ,” ixõ yoini. Mã õixõ Anãmã Jerusalén anoafoni ato yoini a na manamisfoki israelifo ato ifinõ. “Mē nõko Ifo õiaki mã nokoki nokoaki,” Anãmã ato fani.

### *Nazarete ano anã fenifo*

<sup>39</sup> Nãskata María feta José Jesús Nios ispatakani, nã Niospa yoipaoni keskai anã ãto mai ano fenifo, Nazarete pexe rasi

ano. <sup>40</sup> Nãnoax Jesús mitsisipakõï yosini Maríã fake. Afama mĩshti tâpiakõï ini. Niospa aõ noikĩ shinãmasharani.

*Jesús Nios kĩfiti pexefã mēra ikini yomeax*

<sup>41</sup> Nãskax nã xinia tii Jesús ãfe afa fe apa Jerusalén ano fopaonifo. Pascua fista aki fokani. <sup>42</sup> Jesús mã doce xinia akano apa feta ãfa iyonifo, amisfo keskafakakĩ fista akifokakĩ. <sup>43</sup> Mã fista keyoano Maríã fe José fenifo, ãto pexe shinãferakani. Akka Jesús nēteaito apa feta ãfa tâpinifoma, mãmãï ato fe kaira ikaxõ tsõa tâpinima. <sup>44</sup> Mã ato fe kaira ikanax tâpiamax fãï fonifo. Fãï fokãta shinãnifo akka nõko fake akka inifo. Nãskata apa feta ãfa fenani. Fenayanã afe yorafoya a afe rafemisfo yõkani: “¿Mã nõko fake õimamē?” ato fani. <sup>45</sup> “Maa, nõ mã fake õima. Niri oama,” fanifo. Ato askafaifono ãfe apa fe ãfe afa anã anori nētefaikani anã fonifo. Afianã fõtanifo Jerusalén ari. Mã nokokaxõ fenafofãsafanifo.

<sup>46</sup> Nãskata mã tres nia oxakata fichinifo nã judeofãfe Nios kĩfiti pexefã mēranoa nã ato tâpimamisfo fe tsoaxõ nikaino. Ato nikayanã ato yõkapakeni a ato tâpimamisfo. <sup>47</sup> Ato askafaino nikakakĩ, “Nikakapo, ¿na fãke yomefixõ afeskakĩ mekakĩ tâpisharakõiamē? Ato kemasharakõï,” fanifo. <sup>48</sup> Ato askafaino afa feta ãpa fichinifo. “Nono tsaofekē nõ fenai nõko fake,” fanifo. Nãskata ãfa kenatoshini: “Kõkaishta, ¿afeskai mã nēteamē? Mã mã noko ratekõia epa yafi. Afeskara ikara nõ mia faa. Nãskakē nõ mia fenafei nono ato fe tsoaxõ mã yoifiaino,” fanifo.

<sup>49</sup> Askafaifono ato kemani apa yafi afa: “¿Afeskakĩ mã ea fenaimē? ¿Ea mã tâpiamamē nã ãfe Epa Niospa pexe mēra ã ikikē nã ãfe Epa ea yoiai keskara ã faito?” ixõ Jesús ato yoini.

<sup>50</sup> Ato askafaito apa feta ãfa tâpinima.

<sup>51</sup> Nãskata apa feta ãfa iyonifo Nazarete pexe ari ato xanēnē. Nãskata mã nokoxõ Maríã shinãni ãfe fakeõnoa. Nãskaxõ Jesús apa feta ãfa yoiaito ato nikakõisharapaoni ato shinãkõikĩ. <sup>52</sup> Nãskata Jesús yosikõini, ãfe õiti sharakõia. Mã ãfe mãpo afama mĩshti shinãkõï ini. Nãskax yosini. Nãskaito õikani yorafo akiki inimakõinifo. Niosri akiki inimakõï ini.

### 3

*Juan Maotista tsõa istomaxõ ato yoini*

(Mt. 3.1-12; Mr. 1.1-8; Jn. 1.19-28)

<sup>1-3</sup> Akka mã yosixõ Zacarías fãke ato Nios yoipaoni tsõa istoma anoxõ. Tsõa istoma ano yora ichapa akiki fonifo nikaxikakĩ, nãskakē Zacarías fãke ato Nios yoiaino. Nãnori Tiberio xanĩfo finakõia ipaoni, Roma anoax. Nãskakē aa ranã ikanax ãto pexefo anoax xanĩfo ikaxõ ato ikĩpaonifo. Pexe fisti rasi anoax xanĩfo iki fetsepaonifo. Judeofãfe ãto xanĩfo ini

pexe fetsa anoax āfe ane Poncio Pilato. Askata pexe fetsa anoaxri āto xanīfo fetsa Galilea anoax Herodes ato xanīfo ini. Akka Feliperi xanīfoxō pexe rasi anoax rafe kexepaoni. Itooria ano kexeta Traconite ano kexeta fapaoni. Akka nā Felipe āfe exto ipaoni Herodes. Nāskatari pexe fetsa anori xanīfo fetsa ipaoni āfe ane Lisantias Abilinia anoax. Akka āto xanīfo finakōia ipaoni Tiberio. Nāato keyokōi kexepaoni. Mā xanīfokī catorce xinia akano Zacarías fake Juan tsōa istoma ano ixō Niospa meka yoipaoni. Askatari judefo yoipaoni āto mai ano ixō, yorafāferi ato Nios kifixopaonifo. Akka Anás fe Caifás āto xanīfo ipaonifo. Nāskakē nā Zacarías āfe fake Juan Judea mai ano ipaoni. Akka mā yosiax tsōa istoma ikē Niospa yoini aōxō ato yoinō iskafakī: “Māto chaka xatekāfe, a mā afara chaka shināi keskara anā shināyamakāfe. Niospa mato yoiai keskara nikakōikāfe. Mā nikakōiaito Niospa mato chaka soaxotiro. Mā askaito ē mato maotisafatiro, faka mēra ikimapakekī māto chaka mā xatenō ato ispaxiki ixō ato yoitāfe,” ixō Niospa nīchiano Juan ato yoifofāsafani faka Jordán arixō. <sup>4</sup> Afia Isaías ato yoipaoni keskafakī Juan yoifofāsafani. Nānorikōi Isaías kirika kenenī a Juan mekanōpokofai yoikī:

Tsōa istoma ixō yorafo yoixii akiki feaifono. Iskafakī ato yoixii: “Mā nōko Ifo oi kiki. Nāskakē itipinīsharakāfe, āfe fai sharafaxokāfe. Māto chaka xatekāfe. <sup>5</sup> Nā xexa naxpe chakafo ano mai forosharakōi fanōfo. A machifo anori sapa sharakōi fanōfo. Nāskatari āfe fai mēstesharakōi faxonōfo. A xexa naxpefo ano mai forosharafaxonōfo sapa sharakōi inō nōko Ifofai. <sup>6</sup> Mā nōko Ifo Niospa nīchiano oxō a shināifo ato ifiyoi afe ĩpaxanōfo. Nāskakē keyokōichi ōixikani,” ixō yoinōpokoi kiki nā yōra, ixō Isaías kirika keneyoni, Juan-noa yoikī.

<sup>7</sup> Nāskakē nā Isaías ato yoipaoni keskafakī Juan ato yoipaoni, mā chaima Jesús oaino. Ato Juan yoikī iskafapaoni, a nikakani akiki yora ichapa feafono: “Noko Juan maotisafanō faka mēra ikimakī nō chiifā mēra kayamanō,” ikanax akiki feafono Juan ato yoini iskafakī: “¿Afeskaī mā ea ano oimē? ¿Ē mato maotisafapanō mā oimē? ¿Tsōa mato yoiamē? Mā shināiraka nō chiifā mēra katirora ixō nāskax mā maotisapaimē, nō chiifā mēra kayamanōra ikax. Maa, mā kai afaa tāpiama, askax mā maotisatiroma. Mā Nios Ifofaima. Mā oa shano keskara māto ōiti chakakōi. Nāskaxō mā Satanás ifofaa. Nāskakē kaxpa ē mato maotisafatiroma mā māi Satanás fisti shināito. Āa fētsa mato pāratiro nō maotisanō nō chiifā mēra kaimakai Nios nikayamafiāx ixō mato pārano mā chiifā mēra katiro fētsa afaa tāpiamato mato pārano. Askara Niospa mato ifitiroma mā kairoko shināito, ēroko mato maotisafaano. <sup>8</sup> Māto chaka xatekāfe, Nios shinākāfe. Mā Nios shināito

ē mato maotisafapanō. Ē mato anā yoinō nikakapo. Mā shinātiro: ‘Nā Abraham nōko xini ipaoni, ōiti sharayaxō Nios shināpaoni.’ Akka mā shinākī: ‘Nōmāi Abraham fenaxō nō shara shināi,’ ixō mā shinākī mā shināsharaima. Askara shināyamakāfe. Akka mātō ōitinī mā chaka shināfi mā chanī. Nikasharakōikāfe, ē mato yoinō. Na tokiri Niospa onifaxō nīchikē mā ōitiro Abraham āfe fena inō. Nāskakanax Abraham fakefo itirofo na tokiri ōiki Nios shinākanax. Akka mākai anori shināima mā mā chanī, ‘Abraham shināpaoni keskara nō shināira’ ikax. Askara shināyamafi Satanás fisti ifofafiai. <sup>9</sup> Akka fana fimiyamaito ifāfe reratiro. Āfe tapori tsekaxō kooatiro anā niyamanō. Nāskari fakī mā Nios nikakaspaito a omiskōipakenakafo mēra Niospa mato potaxii mā chaka xateaxma mā isharayamaito,” ixō Juan ato yoini.

<sup>10</sup> Ato Juan askafaito nikakakī kemanifo: “¿Chanīmamē? ¿Na mī yoiāi keskara tāpiaxma nō afeskatiromē? ¿Afeskaxō a keskara shara nō shinātiromē?” faifāfe anā ato yoini: <sup>11</sup> “A yora omiskōiaito afaamais oxō mato rapati yōkatoshiaito mā inātiro mā rapati rafeyaxō. Askatari yora fonāiki oaito mā pimatiro,” ato Juan faito nikanifo.

<sup>12</sup> Xanīfo kori fixomisfāferi Juan yōkanifo: “Maestro, ¿nō afeskatiromē, mī noko maotisafanō?” fanifo.

<sup>13</sup> Askafaifono ato yoini: “Mātō xanīfāfe a tii mato yoiyamafiano finōmainīfōfā mā kori fitiroma,” ato fani.

<sup>14</sup> Nāskatari sorarofāferi yōkanifo: “Akka, ¿nō afeskatiromē?” ixō yōkanifo. Askafaifono ato yoini: “Ato kori fīapiakī shināyamakāfe. Askaxori ato feratēni mitsisipayamakāfe. Ato askafayamakāfe. Mātō xanīfori pārayamakāfe. Nā xanīfāfe mato inā tiya inimakāfe,” ixō ato yoini.

<sup>15</sup> Nāskata yorafāfe ōinifo Juan mekaito. “¿A naamē Cristo?” ixō āto ōiti mēraxō shinānifo. <sup>16</sup> A shināifo keskara mā tāpixō Juan ato yoini: “Ēkai Cristoma. Nāskakē ē mato maotisafapai. Akka nā chipo oaito āfe Yōshi Shara mato mēra naneyoi. Nā sharafinakōia, ea keskarama. Aato afama mīshti fatiro, ē atiroma keskara. Akka ē afaama,” ixō Juan ato yoini. Mā chaima Jesús oaito yoikī ato askafani. <sup>17</sup> Nāskaxō ato yoipakeni: “Mā Nios shināito mato ifixii. Akka a shināyamaifo ato ifixiima. Afāfekairoko ifofaifono nāfo chiifā mēra ato potano anoax omiskōipakenakafo” ato fani.

<sup>18</sup> Nāskatari meka shara ato yoini, āto ōiti mēra ato nanema-paikōini āto chaka xatenōfo. “Mā nōko Ifo Jesucristo chaima oi kiki, shināsharakōikāfe,” ixō ato yoitafapaoni. <sup>19-20</sup> Askatari xanīfo Herodes yoini: “¿Afeskakī mī exto āfi fīaitamē? Askatari mī ato chakafafōfāsafai,” fani Juan. Askafaito nikakī Herodes akiki ōitifishkixō achixō karaxa mēra ikimani.

*Juan Jesús maotisafani faka Jordán anoxō*  
(Mt. 3.13-17; Mr. 1.9-11)

<sup>21</sup> Akka Herodes karaxa mēra nīchiyoamano Juan ato maotisafapani. Jesúsri mā yosiaito nāri maotisafani. Mā maotisafaano fininākfāta Apa Nios kīfini. <sup>22</sup> Apa kīfiaino nai mēranoax oa rifi keskara āfe Yōshi Shara fotopakekafāni akiki. Fotopakekafanaino nai mēranoax mekaito nikani iskaito: “Mī ēfe Fakekōi ē mia noikōi. Ē mikiki inimasharakōi,” ixō Apa Jesús yoiaito nikani.

*Jesucristo āfe xinifāfe anefo*  
(Mt. 1.1-17)

<sup>23</sup> Jesucristo mā treinta xinia axō taefakī ato yoini Apa Niospa meka. Yorafāfe José fakera fafiaifono Niospa Fake ini. Nāskafiax nāato chata ipaoni Elí. <sup>24</sup> Elí apa Matat ini. Matat apa Leví ini. Leví apa Melqui ini. Melqui apa Jana ini. Jana apa José ini. <sup>25</sup> José apa Matatías ini. Matatías apa Amós ini. Amós apa Nahúm ini. Nahúm apa Esli ini. Esli apa Nagai ini. <sup>26</sup> Nagai apa Maat ini. Maat apa Matatías ini. Matatías apa Semei ini. Semei apa Josec ini. Josec apa Judá ini. <sup>27</sup> Judá apa Joanán ini. Joanán apa Resa ini. Resa apa Zorobabel ini. Zorobabel apa Salatiel ini. Salatiel apa Neri ini. <sup>28</sup> Neri apa Melqui ini. Melqui apa Adí ini. Adí apa Cosam ini. Cosam apa Elmadam ini. Elmadam apa Er ini. <sup>29</sup> Er apa Josué ini. Josué apa Eliezer ini. Eliezer apa Jorim ini. Jorim apa Matat ini. <sup>30</sup> Matat apa Leví ini. Leví apa Simeón ini. Simeón apa Judá ini. Judá apa José ini. José apa Jonam ini. Jonam apa Eliaquim ini. <sup>31</sup> Eliaquim apa Melea ini. Melea apa Mena ini. Mena apa Matata ini. Matata apa Natán ini. <sup>32</sup> Natán apa David ini. David apa Isaí ini. Isaí apa Obed ini. Obed apa Booz ini. Booz apa Sala ini. Sala apa Naasón ini. <sup>33</sup> Naasón apa Aminadab ini. Aminadab apa Admín ini. Admín apa Arní ini. Arní apa Esrom ini. Esrom apa Fares ini. Fares apa Judá ini. <sup>34</sup> Judá apa Jacobo ini. Jacobo apa Isaaca ini. Isaaca apa Abraham ini. Abraham apa Taré ini. Taré apa Nacor ini. <sup>35</sup> Nacor apa Serug ini. Serug apa Ragau ini. Ragau apa Peleg ini. Peleg apa Heber ini. Heber apa Sala ini. <sup>36</sup> Sala apa Cainán ini. Cainán apa Arfaxad ini. Arfaxad apa Sem ini. Sem apa Noé ini. Noé apa Lamec ini. <sup>37</sup> Lamec apa Musalén ini. Musalén apa Enoc ini. Enoc apa Jared ini. Jared apa Mahalaleel ini. Mahalaleel apa Cainán ini. <sup>38</sup> Cainán apa Enós ini. Enós apa Set ini. Set apa Adán ini. Nāskanifo āto xinifo. Akka āto fenafo mā kaiafo. Adán āfe apa Nios ini, nāatomāi onifakē.

## 4

*Satanás chakata Jesús afara chakafamapaini  
(Mt. 4.1-11; Mr. 1.12-13)*

<sup>1</sup> Mā Juan Jesús maotisafaano Niospa Yōshi Sharapa iyoaino faka Jordán anoax kani. Tsōa istoma ano kani, Niospa Yōshi Sharapa iyoaino māmāi Niospa Yōshi Shara āfe ōiti mēra naneano. <sup>2</sup> Nāskata Jesús ares kafāsani, tsōa istoma ano cuarenta nia oxax afaa pishta piaxma. Nāskakē Satanás akiki kani. Mā akiki nokoxō ifofamapaini. Nāskaxō afara chakafamapaini. Nāskata mā cuarenta nia oxax Jesús fonāikōini, afaa pishta piaxma. <sup>3</sup> Nāskaito ōiki Satanás yoini iskafakī: “Mī Niospa Fakemākī na tokiri pāa fapo,” fani.

<sup>4</sup> Nāskafaito Jesús kemani: “Maa, na mī ea yoiai keskara ē akima. Anō piyai fisti nō shināima nipaikī. Akka Epa Niospa āfe meka shararoko nō shinātiro. Nāskara Niospa meka yoimisto kenei,” Jesús fani.

<sup>5</sup> Nāskata Jesús fe Satanás yamaris iakekēfofānifo. Māchifā mánānē fokani. Nārixō Satanás Jesús nā maitio ispani. <sup>6-7</sup> Nāskaxō Satanás yoini: “Ōipo, ea mīa ifofaxō mī ea yonoxonaito na mī ōiaifo keyokōi sharastakōifo ē mia inātiro. Nāskakē keyokōichi āto ifo mī itiro. Nafō ēfenākōifo. Ōipo, na maitio ē ato ināpaiki ē ato inātiro atonā inō,” Satanás fani.

<sup>8</sup> Nāskafaito Jesús kemani: “Maa, ē mia ifofaima. Nios fisti nōko Ifokōi. Nāskakē nō ratokonō mai chachixō nō yoitiro aato noko shināmanō. Nāskaxō nō yoitiro iskafakī: ‘Mīfi nōko Ifoki nō mia shināi,’ ixō nō yoitiro. Nāskarafi kirika ano keneakī,” Jesús fani.

<sup>9</sup> Jesús askafaito Satanás anā Jesús iyoni a Nios kīfiti pexefā māmākīaxō yoixiki iskafakī: “Mī Niospa Fakekōiaxroko mī niriāx ichopakekafanikai. <sup>10</sup> Mī ichopakekafānax mī afeskaimakai. Nā Niospa meka kirikaki keneaki iskai: ‘Niospa āfe ājirifo yoixii mia kexenōfo.’ <sup>11</sup> Askatari kirika keneano iskaki: ‘Mī āto mifiki pakeaito mia achixikani kiki mī tokiriki pakenōma,’ kirika kenea iskakī,” Satanás Jesús fani.

<sup>12</sup> Satanás askafaito afianā Jesús kemani: “Nōa nō meka fet-safaxō nō yoitiro, ‘Ē afara afeskarafaito, ea Niospa kexei,’ ixō nō shinātiro. Akka, ‘Niospa ea amapaiyai keskara nā fisti ē atiroki Niospa ea kexenō,’ ixō shinākāfe, ikaki na kirika keneano,” Jesús fani. <sup>13</sup> Jesús askafaito nikai Satanás kani, Jesús afeskafatiroma mei. Anā oxō Satanás Jesús afara chaka shināmaniyoxiki ikaini kani. Jesús afara chakafamapaifiki chakafanima. Akka Jesús finakōia ini Satanás mñāo nia.

*Galilea anoxō Jesús ato yoikī taefani  
(Mt. 4.12-17; Mr. 1.14-15)*

<sup>14</sup> Nāskata Jesús Galilea ano anā kani, Niospa Yōshi Sharapa shināmanaino. Mā nokokē Galilea anoxō yorafāfe nikanifo mā Jesús noko ikaxō. <sup>15</sup> Nāskata mā nokoxō judeofāfe ichanāti pe xe mēraxō ato yoini. Nāskaito ōikani, akiki ini-masharakōinifo. “Na feronāfake āfe meka sharakōi,” fanifo.

*Jesús Nazarete anoxō nikakapanifo*

*(Mt. 13.53-58; Mr. 6.1-6)*

<sup>16</sup> Nāskata nā yosini ano kani Nazarete ano. Nāskax safaronō judeofāfe ichanāti pe xe mēra ikini māmāi askai feyakatsaxakī. Ikikainax tsaoni. Nāskata niinākfā kirika fita aneni. <sup>17</sup> Nāskata afia Niospa shināmanaino Isaiás kirika keneni inānifo anenō. Nā kirika fepexō aneni iskafakī:

<sup>18</sup> Niospa Yōshi Shara emēra naneano ea nīchini ē ato yoinō āfe meka shara a afaamaisfo, “Niospa mato noisharai,” ixō, “A Satanás chaka ifofaafō a chaka potakāfe, mato mēra nanepaiyaito anā a chaka nikayamakāfe isharakōixikakī,” ixō ē ato yoinō; askatari nā fēxofori ē ato fero sharafaxonō aō ōisharanōfo: nāskatari nā omiskōikakī afaa shināifoma nāfori ē ato shināmasharanō; <sup>19</sup> askatari ē ato yoisharanō afetīa Epa Niospa afe yorafo ifimākai, ixō Jesús aneni. <sup>20</sup> Niospa meka mā yoikī xatexō kirika fēpoxō feronāfake fetsa ināni, tsaopakekafāxō ato yoixiki.

Ato askafaito aas ōiketsanifo. <sup>21</sup> Nāskata ato yoini: “Ē fakeyoamano Isaiás eōnoa yoipaoni keskafakī iskaratīa mē mato kirika anexona,” ato Jesús fani.

<sup>22</sup> Ato askafaito nikakakī: “¡Aira! Nikakapo, āfe meka sharakōi. José fakefixō ¿afeskakī iskara yoimē?” fanifo.

<sup>23</sup> Askafaifono Jesús ato yoini: “Mā ea iskafairaka: ‘Mī ato Capernaúm anoa sharafaito nō nikamiski mīa anoi sharamefe. Nāskakēri nā mī yoiai keskafakī nonoafari ato sharafafe mia ōixō nō mia chanīmara fanō,’ ixō mā ea yoipairaka,” Jesús ato fani.

<sup>24</sup> Anā Jesús ato yoini: “Chanīma ē mato yoikōi. Āto pexekōi anoxō noko iskafatirofo mā nō na ōimis koshikai afaa tāpiama na Niospa meka yoipaiyai aa chanī noko fatirofo. <sup>25</sup> Chanīma ē mato yoikōi. Kirika kenekī nō anetiro iskafakī. Elías nōko mai ano ipaoni. Israel mai ano ari ikano akiki oi inima. Arixō tres xinia ata seis oxe ani, oi manakī. Nāskakē israeli yorafo fonāiki finakōinifo, afaa pikanima. Ari kēro ifomafa fenemais ichapa inifo omiskōikani. <sup>26</sup> Nāskafixō Epa Niospa nōko xini Elías ato ano nīchinima. Askatamaroko Sarepta pe xe rasi Sidón mai ano nīchini kēro ifomafa fisti nīchini pimanō. Niospa nīchiaino chai kani. <sup>27</sup> Askatari yora fetsafo israelifāfe mai anoax ichapakōifo rashkishikani inifo. Akka Elías Niospa



meka yoimisto aa rashkishiaifo ato sharafapaonima. Askatamaroko nã Siria mai anoa fistikõï sharafani. Āfe ane Naamán. Nã Naamán Siria mai anoa ini, israeli inima,” Jesús ato yoini.

<sup>28</sup> Jesús ato askafaito nikakani yorafo ichanãti pexe anoax akiki õitifishkinifo. Akiki õitifishkikaki achinifo. <sup>29</sup> Achikaxõ iyonifo Nazarete pasotai mafa keyakõï ano Jesús iyopainifo arixõ potapaikakã. <sup>30</sup> Potapaifiaifono Jesús ato rãiferani. Nãskax ato makinoax kani.

*Nãnori feronãfake niafaka chaka nanea ini*

*(Mr. 1.21-28)*

<sup>31</sup> Jesús Capernaúm ano kani, Galilea mai ano. Nãnoxõ pena tenetitã Apa Niospa meka ato yoini. <sup>32</sup> Ato yoiaito nikai iskanifo: “¡Kee! Nikakapo. Nato tãpikĩ finakõia, meka sharakõï nato yoi,” ikanax aa ranã yoinãnifo.

<sup>33</sup> Judeofãfe ichanãti pexe mëraxõ yora mëra niafaka yõshi chaka nanexõ Jesús fãsikõï mekafani. <sup>34</sup> Iskafakĩ yoini: “¿Afeskakĩ mĩ noko fekaxtefaiyoamë, Jesús Nazarete anoato? ¿Mĩ noko a omiskõipakenakafõ mëra mĩ noko potaiyoamë? Ē mia õimisnõ, mĩ sharakõinõ Niospa mia nĩchiano,” fani.

<sup>35</sup> Nãfaka askafaino Jesús yoini: “Mekayamafe. Na feronãfake makinoax tsekekaitãfe,” ixõ mitsisipakõikai Jesús niafaka nĩchini.

Jesús askafaino nãfaka yora fia kekëfõfã potafaini yorafãfe ferotaifi nãskax tsekekaikĩ afeskafanima.

<sup>36</sup> Askafaito õikakĩ yorafãfe iskafanifo: “Chanĩma, Jesús afama mĩshti fatiro. Iskarakai nõ tsõa õimisma. ¿Afeskaxõ iskafaimë, na feronãfake makinoa niafaka potai? Meka finayakõikë nãfaka nikafainikai,” yorafãfe fanifo.

<sup>37</sup> Askafaito õikaxõ yorafãfe pexe tii anoafõ yoifõfãfõfãinifo Jesús yora makinoa niafaka potaito õikaxõ.

*Jesús Pedro rayos sharafani*

*(Mt. 8.14-15; Mr. 1.29-31)*

<sup>38</sup> Askakaini Jesús judeofãfe ichanãti pexe anoax tsekekainax Simón pexe mëra ikini. Nãnoax Simón rayos yõxafo yonai finakõini. Nãskaito õikakĩ Jesús yoixonifo: “Na yonai sharafafe,” fanifo. <sup>39</sup> Askafaifono nã këro yõxafo yonai mãnão kãta Jesús kãtipakekafãta yoini iskafakĩ: “Mĩ yona nishpafe,” faino samamakõï ãfe yona nishpatani. Nãskata mã yonai nishpata, fininĩkafãta itipinĩshara fani ato pimaxiki.

*A isinĩ ikaifo Jesús ato sharafani*

*(Mt. 8.16-17; Mr. 1.32-34)*

<sup>40</sup> Akka mã xini kaino nã isinĩ ikaifo fetsa fetsatapafo Jesús ano efenifo. Nãskakë Jesús ãfe mëkemã ato mãmãpakeaino sharai fetsenifo. <sup>41</sup> Ranãri nã isinĩ ikaifo mëranoax niafaka chakafõ tsekeni. Fãsikõï mekayana iskafanifo: “Mifi Niospa

Fakekī,” fanifo. Niafakafāfe askafaifono kerexkai Jesús ato pōtapakeni. Nāskaxō ato mekatima fani māmāi tāpiafāfe nāmāi Cristokē.

*Jesús ichanāti pexe mēraxō Apa Niospa mekasharaōnoa ato yoini*

(Mr. 1.35-39)

<sup>42</sup> Mā penaino Jesús tsekekaini, pexefā rasi anoax tsōa istoma ano kai. Nāskaino yorafāfe fenanifo. Nāskakanax akiki nokokaxō nētefapainifo ato makinoax kayamanō. <sup>43</sup> Askafaifono Jesús ato yoini: “Akka, ē Niospa meka shara ato yoifofāfōfāni pexe fetsafo ano afe keskaramākī Epa Nios xanīfāfe noko īkinā. Nāskakē Epa Niospa ea nīchini, ē ato yoinō.”

<sup>44</sup> Nāskakē kafāsakī Jesús Niospa meka ato yoifofāsafani, ichanāti pexe mēraxō Judea mai anoxō.

## 5

*Jesús foe rasi tarafanāfā mēra ato fospi faxoni, tsōa atiroma keskafakī*

(Mt. 4.18-22; Mr. 1.16-20)

<sup>1</sup> Pena fetsa Jesúsxō foe rasi finifo iamāfā ketokonōxō Genesaret anoxō. Askafaito ōikani yora rasi akiki fenifo. Niospa meka niakai fekani. <sup>2</sup> Jesús nānoa kanōanāfā rafe rakakē fichini, nā kanōanāfā mēranoax mā fotokaxō ifofāfe ato tarafanāfā chokaifono. <sup>3</sup> Nāskakē nā kanōanāfā fetsa mēra Jesús naneinākfani, nā Simonā mēra. Nāskaxō yoini: “Eaya fenāmāshta kanōanāfā pitsikife,” fani. Nāskata kanōanāfā mēra tsaoxō yorafo yoikī taefani. <sup>4</sup> Mā ato yoikī xatexō Simón yoini: “Nā ia noa ano kanōanāfā fotakāfe. Anoxō mātō tarafanāfā potaxō foe fixikakī,” fani.

<sup>5</sup> Askafaito Simón kemani: “Maestro, fakishchāi nō yonoshina tarafanāfānē fipaikī. Akka nō fiama. Akka mī noko yoikai ē tarafanāfā potenō,” fani.

<sup>6</sup> Mā āto tarafanāfā potekaxō foe ichapakōi finifo. Oa tarafanāfā faxteai keskara meenifo. <sup>7</sup> Nāskakaxō nā ato fe rafeafo ato kenanifo, kanōanāfā fetsaōnoa, ato feta fii fenōfo. Nāskakaxō nā kanōanāfā rafe foe rasi fospiakōi faafono nā kanōanāfā rafe faka fospiakōiax foefoya ikikerani. <sup>8</sup> Nāskara ōikī Simón Pedro Jesús nāmā ratokonō mai chachipakefōfā yoini: “Ifo, emakinoax katāfe, ē feronāfake chakakī,” fani.

<sup>9</sup> Simón askaito ōi a āfe rafeafori ratekōinifo Jesús foe ichapa tarafanāfā mēra ato nanexonano. <sup>10</sup> Akka nā Simón fe rafeafo inifo, Santiago fe Juan āto apa Zebedeo ini. Nāskakē Jesús Simón yoini: “Rateyamafe. Iskaratīa yorafo ēfe Yōshi Sharaōxō mī ekeki efeikai,” fani.

<sup>11</sup> Nāskakata āto kanōanāfā fōkata ĩamāfā kesemē nexakata mā Jesús fe fōkakī āto afama mīshti ōifainifo.

*Jesús yora rashkishiai sharafani*  
(Mt. 8.1-4; Mr. 1.40-45)

<sup>12</sup> Pena fisti pexe rasi ano Jesús ikano nāno feronāfake isinī iki rashkishi fetseax akiki oni. Mā akiki oxō ratoonō mai chachipakefōfā yoini: “Ifo, ea sharafapaikī mī ea sharafatiro,” faito, <sup>13</sup> Jesús āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino a rashkishi fetseai koshikōi sharatani. <sup>14</sup> Mā sharano Jesús nīchini iskafakī yoiyanā: “Mī tsoa yoiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

<sup>15</sup> Jesús askafaito ađnoa mēxotaima nikakī finakōinifo. Nāskakanax yora kaya akiki fenifo nikakani, a isinī ikaifori ato sharafapanō. <sup>16</sup> Nāskax Jesús ato makinoax kani, a tsōa istoma anoxō Apa Nios kīfikai.

*Jesús yora finimisma sharafani*  
(Mt. 9.1-8; Mr. 2.1-12)

<sup>17</sup> Pena fetsa Jesús ato yoiaino nāno fariseofo tsoafo inifo. A Moisés yoikī kirika keneni keskara ato tāpimamisfori inifo. Pexe rasi Galilea anoax fekāta Judea anoax fēkata Jerusalén anoax fēkata inifo. Nānoxō Niospa āfe shara Jesús ato ōimani, a isinī ikaifo ato sharafapakī. <sup>18</sup> Nāskakata feronāfakefo nokonifo. Feronāfake finimisma ratatinī rataxō iyoifokani. Nāskakata pexe mēra ikimapainifo, Jesús ano iyopaikakī. <sup>19</sup> Akka afeskaxma ikitiroma inifo, yorafo ichapakōimāiyakē ikipanāfāfe. Nāskakanax pexe fomākīa inanifo. Nārixō nā finimisma ratatinī ratakaxō fotomapakefōfānifo, yorafāfe ferotaifi Jesús nia nāmā. <sup>20</sup> Jesús ōini shināifāfe iskakakī na finimisma Jesús sharafai kiki ikaxō. Nāskakē a finimisma Jesús yoini: “Efe yorashta, mē mia chaka soaxona,” fani.

<sup>21</sup> Nāskafaito ōikakī, a Moisés yoikī kirika keneni keskara ato tāpimamisfo feta fariseofāfe shinānifo iskakakī: “Akka, ¿na tsoamē na chanīai Nios chakafakī mekafayanā? Akka Nios fistichi ato chaka soaxotiro,” fanifo.

<sup>22</sup> Akka Jesús tāpini askafaifono. Nāskaxō ato yōkani: “¿Afeskakī iskara mā shināimē? <sup>23</sup> Akka, ¿ē afaa fatiromē? Mē mia chaka soaxona ē fatiroraka, askayamakī mē mia sharafaa ē fatiroraka,” ixō ato yoini. <sup>24</sup> “Akka ē mato tāpimanō Niosxō ē ato chaka soaxotiroki nono mai anoxō,” ato fani. Nāskaxō a finimisma yoini: “Ē mia yoi, fininīkafāta mī rakati fifaini mī pexe ano katāfe,” fani.

<sup>25</sup> Nāskafaino a finimisma fininākafani yorafāfe ferotaifi. Nāskaxō a kamaki rakamis āfe rakati fifaini āfe pexe ano kani. Epa Nioski inimayanā. “Aicho, Epa Nios sharafinakōia,” faafoni. <sup>26</sup> Finikainaito ōikani ratei fetsenifo. Nāskakanax, “¡Aicho, Epa Nios sharafinakōia!” inifo. Ratekōiyanā iskafakī yoinifo: “Akka mā nō ōi afama mīshti shara fai,” fanifo.

*Jesús Leví ifini aōxō tāpimis inō*  
(Mt. 9.9-13; Mr. 2.13-17)

<sup>27</sup> Mā askafata Jesús tsekekaikī ōini, a āfe xanīfo Roma anoa kori fixomis. Nā āfe xanīfo kori fixomisto āfe ane Leví\* ini. Akka nā ato kori fixomis ano tsoa ini. Nāskakē Jesús yoini: “Efe kafe,” fani.

<sup>28</sup> Nāskafaino Leví fininākafāta āfe afama mīshtifo ōifaini Jesús fe kani. <sup>29</sup> Nāskata chipo Leví āfe pexe anoxō fista efapa ani Jesús noisharakōiyanā. Yora ichapa rasiri afe inifo. Nā xanīfo Roma anoa kori fixomisfo. Yora fetsafori afe inifo. Nāno ato fe mīsa ano tsaonifo. <sup>30</sup> Akka nā fariseofo feta a Moisés yoikī kirika keneni keskara ato tāpimamisfāfe Jesúsxō tāpimisfo mekafakī taefanifo. Ato iskafanifo: “¿Afeskakī ato feta pita ato feta ayata mā faimē? Na ato kori fixomisfo feta na yora chakafo fetari mā pii,” ato faifono, <sup>31</sup> Jesús ato kemani: “A sharafāfe notoro fenakanima, a isinī ikaifāfemari notoro fenakanima. Akka nā isinī ikaifāfe notoro fenakani. <sup>32</sup> Akka a yora sharafoōnoax ē onima. Nā afara chakafakanax shināmitsaifoōnoax ē oni, ato chaka soaxoxiki Epa Nios Ifofanōfo,” ato fani.

*Nā foni tenemisfofāfe Jesús yōkanifo*  
(Mt. 9.14-17; Mr. 2.18-22)

<sup>33</sup> Iskafakī Jesús yoinifo: “Akka Juan inafāfe, fariseofāferi foni tenekōiyanā Epa Nios kīfikī chai yoimisfo. Akka mī inafāfe mēxotaima piyanā ayakani,” faifono,

<sup>34</sup> Jesús ato kemani: “Akka yorafo matoki feafono mā ato foni tenematiroma, feronāfake āfiyai. Nā feronāfake mato fe ikano inimakōikī mā ato feta pitiro. <sup>35</sup> Akka nā feronāfake ato makinoa iyoafono āfe yorafāfe shinākakī foni tenetirofo. Nāskarifiakī eōxō tāpimimisfāfe inimakakī pitirofo. Akka mē ato makinoax kaano ea shinākakī tsōa pitiroma,” ixō Jesús ato yoini.

<sup>36</sup> Nāskafata afianā Jesús ato yoini iskafakī, meka fetsafaxō: “Tsōa sama fenaya sama xini kishi fatiroma. Nō askafaino sama fena samama chakanatiro. Nāskatari sama fena fe sama xini isharatiroma. Nāskakēri nā ē mato yoiyai keskara mā nikakōixō a mā ipaoni keskai anā mā itiroma māmāi ea nikakōiax. A mā ipaoni keskara shināmakita nāskax

\* 5:27 Leví ane rafeya ipaoni. Āfe ane fetsa Mateo.

māto yora fena keskara shara itiro. <sup>37</sup> Nāskarifikĩ tsōa māmā fata koiro pisha xini mēra nanetiroma nā māmānō farax akaino toxamāianō. Nāskakē nā māmā fata fe koiro pisha chakanatirofo. Akka nā māto xinifāfe mato yoimisfo keskara fe nā ē mato yoiai keskara osinātiroma. Nā ē mato yoiai keskara Niospa meka sharakōi. Akka a māto xinifāfe mato yoimisfo anori shināx mā isharatiroma. Niospa mekaya meka chaka osinātiroma. Nāskakē mā nikapaifikĩ mā shināsharatiroma. <sup>38</sup> Nāskarifikĩ tsōa māmā fata koiro pisha xini mēra nanetiroma nā māmānō farax akaino toxamāianō. Nāskakē nā māmā fata fe koiro pisha chakanatirofo. Akka nā māto xinifāfe mato yoimisfo keskara fe nā ē mato yoiai keskara osinātiroma. Nā ē mato yoiai keskara Niospa meka sharakōi. Akka a māto xinifāfe mato yoimisfo anori shināx mā isharatiroma. Niospa mekaya meka chaka osinātiroma. Nāskakē mā nikapaifikĩ mā shināsharatiroma. <sup>39</sup> Akka māmā pae ayatiakaxō anā tsōa fata ayapaitiroma. Nāskariai iskatirofo: ‘Nā ē ipaoni keskara afianā ē askapai, ēfe xinifāfe ea yoimisfo keskara shara nā fisti ē shināi. Akka meka fetsa chaka ē nikapaima. Askatari meka fena chaka ē shināima,’ ixō shināmisfo fariseofāfe,” Jesús fani.

## 6

*Nā judeofāfe pena tenetitĩa Jesúsxō tāpimisfāfe aros keskara metesfenifo*

*(Mt. 12.1-8; Mr. 2.23-28)*

<sup>1</sup> Nā pena tenetitĩa Jesús aōxō tāpimisfo fe tarepa kani. Kaki aōxō tāpimisfāfe aros keskara meteskaxō fonāikakĩ piifonifo.

<sup>2</sup> Nāskakē fariseofāfe ato yōkanifo: “¿Afeskakĩ mā na aros keskara metesfeimē na pena tenetitĩa tsōa yonotiroma ixō Moisés noko yoifinino?” fariseofāfe ato fanifo.

<sup>3</sup> Ato askafaifono Jesús ato kemani, “Akka, ¿a nōko xini Davidōna kirika kenenifo keskara mā ōimismē David afaa afesa fanimē āfe inafō feta fonāikōi? <sup>4</sup> Nāskax a Nios kīfiti pexefā mēra ikikaini. A mēra ikikaixō pāa fichixō pini, nā pāa Nios ināmisfo. Nāskaxō āfe inafori ināni akairi pinōfo, akka nā Nios ato kīfixomisfāfe ares nā pāa pīfiamisfono. Akka fonāikĩ finakōikĩ David nā pāa pini āfe inafō feta. <sup>5</sup> Akka ēfe Epa Niospa ea katonni. Nāskakē eres fisti ē yoitiro a nō atiro keskara na pena tenetitĩa,” ixō Jesús ato yoini.

*Feronāfake mēke yōshiya Jesús sharafani*

*(Mt. 12.9-14; Mr. 3.1-6)*

<sup>6</sup> Pena fetsa pena tenetitĩa Jesús ikikaini judeofāfe ichanāti pexe mēra anoxō ato yoixiki. Anoxō ato yoiaino, nāno ato fe feronāfake āfe pōya kayakai aōri āfe mēke yōshiya ini.

<sup>7</sup> A Moisés yoikī kirika keneni keskara ato tāpimamisfo feta fariseofāfe òinifo, na pena tenetitīa na mēke yōshiya Jesús sharafaimākai ikaxō, afara chakafaira ixō yōapaikakī.

<sup>8</sup> Akka Jesús mā tāpia ini a shināifo keskara. Nāskaxō a feronāfake mēke yōshiya yoini: “Fininākfāta ato nēxpakīa nife,” faino, nā mēke yōshiya fininākfāta niini. <sup>9</sup> Nāskaxō Jesús ato yoini: “Ēri mato yōkanō. Akka, ¿pena tenetitīa afaa nō afeskafatiromē, shara fayamakī nō chakafatiro-raka? Askatari ato ifiyamata, nō ato retetiroraka,” ato fani. <sup>10</sup> Nāskaxō keyokōi ato òiakeni, a kemataima tsaoafo. Nāskata a feronāfake mēke yōshiya yoini: “Mēshafe,” faino nā mēke yōshiya meshatani. Nāskax mēke sharakōia ini. <sup>11</sup> Akka nā fariseofo fe a Moisés keneni tāpimisfo akiki òitifishkinifo. Nāskax āa ranā yoinānifo: “¿Nō Jesús afeskafatiromē?” ikanax.

*Jesús aōxō tāpimisfo doce feronāfake ifini*  
(Mt. 10.1-4; Mr. 3.13-19)

<sup>12</sup> Pena fetsa Jesús kani māchi keya ano Apa Nios kīfikai. Arixō fakishchāi Apa Nios kīfishini. <sup>13</sup> Mā penano a aōxō tāpimisfo ato kenani. Nānoxō doce faxō ato katoni, aōnoa ato yoimisfo inōfo. <sup>14</sup> Nā feronāfake docefāfe āto anefo fetsa Simón ini, āfe ane fetsa Jesús faxoni Pedro fakī; fetsari Andrés ini, nā Simón exto; fetsari Santiago ini; fetsari Juan ini; fetsari Felipe ini; fetsari Bartolomé ini; <sup>15</sup> fetsari Mateo ini; fetsari Tomás ini; fetsari Santiago ini, nā Alfeo fake; fetsari Simón ini. Nāato āfe kaifo feta romanōfo potapaipaoni, anā israelifo yonomanōfoma. <sup>16</sup> Fetsari Judas ini, nā Santiago fake; fetsari Judas Iscariote ini, nāato Jesús ato achimani. Nā tii Jesús ifini doce faxō aōxō tāpimisfo inōfo.

*Jesús yora ichapafō tāpimani*  
(Mt. 4.23-25)

<sup>17</sup> Jesús māchi keya ariax fotoni, aōxō tāpimisfo fe a mai sapa shara ano. Nānoax aōxō tāpimisfo mā ichanāfo inifo. Yora fetsafori ato fe inifo, Judea mai anoax, Jerusalén anoaxri feafo ini fākafā kesemēnoaxri. Tiro anoa fekāta Sidón anoaxri fenifo. Āfe meka nikaxikakī Jesúski fenifo, aa isinī ikaifori ato sharafapanō. <sup>18</sup> A niafaka chakata ato feaxtefaito ato makinoa Jesús potano sharai fetsenifo. <sup>19</sup> Nāskakē yorafāfe Jesús ramāpaikani, āfe sharaōxomāi Jesús ato sharafapaino.

*Nā inimaifo yafi a inimaifoma Jesús ato yoini*  
(Mt. 5.1-12)

<sup>20</sup> Jesús aōxō tāpimisfo òikī yoini iskafakī: “Afaamaisfi ax mā inimakōitiro. Nios Ifofoax afe mā ipaxatiro nōko xanīfokōimāiyakē. Nāskakē mā inimatiro.

21 “Nā yorafāfe fonāikī pipaiyaifo keskafakī māri mā Nios Ifofasharakōipaiyaito mātō ōiti mēra āfe meka shara nanetiro, mā inimasharakōinō. Iskaratīari omiskōi mā oiafiāx chipo mā inimai fitsakōitiro Nios fe ipaxakī,” ixō Jesús ato yoini.

22 Anā Jesús ato yoini: “Inimakōikāfe yorafāfe mato noika-spaifono mato potayanā. Askatari mato Īchaifono, askatari mato ōikaspafono askatari mato anekī chakafaifono. nāskakē inimakāfe eōxō mato askafakani kiki. 23 Nāskakē mato askafaifono inimai finasharakōikāfe. Nāskaxō a nai mēraxō Niospa afara sharafo mato mekexona mā fixikai. Akka nā mato chakafaifo keskafakī āto xinifāferi nā Nios ato yoixomisfo chakafapaonifo ato omiskōimayanā,” ixō Jesús ato yoini.

24 Akka nā kori ichapayayo Jesús ato yoini iskafakī: “Ooa. Iskaratīa mā kori ichapayax mā inimakōi. Akka chipo naax mā omiskōipakenaka, Nios Ifofamax kori fisti shinākatsaxakī.

25 “Ooa. Iskaratīa afara ichapayax mā inimakōiyoi; akka chipo mā fonāixii. Askatari iskaratīa mā fitsakōiyoi; akka chipo shināmitsai mā oiaxii.

26 “Yorafo sharakōira mato faifono, mā inimakōimis. Mātō xinifori nāskapaonifo, nō Niospa meka tāpikōikē noko yoisharakōikanira ikanax āa chanīfikani,” Jesús ato fani.

*“Mato noikaspafiaifono māroko ato noikāfe,” Jesús ato fani (Mt. 5.38-48; 7.12)*

27 Nāskata anā Jesús ato yoini: “Akka mā ea nikaito ē mato yoi. A mato noikaspaifo ato kopikima ato noikāfe. Askatari ato axosharakāfe. 28 Mato chakafaifāferi ato yoisharakāfe. Askatari a mato omiskōimamisfo Epa Nios ato kifixokāfe. 29 Akka fētsa mato tapasaito, ‘Takai fetsari ea afe,’ fakāfe. Askatari fētsa mato tari fīaino āa fotanō inākāfe, rapatiri mato fīaito inākāfe āa fotanō. 30 Akka fētsa mato afara yōkaito inākāfe. Askatari fētsa mato afara fīaito ferateyamakāfe. 31 Nā mā fichipaiyai keskafakī fetsafāfe mato axosharaifono, nāskarifiakī māri fetsafori axosharakāfe.

32 “Akka mā ato noikī nā mato noiaifos mā ato noia, askarakai sharama. Yora chakafori nāskariakani; nā ato noiaifos ato noikani. Mā askainokai, ‘Mā afarafo shara faa,’ ixō Niospa mato yoima. 33 Askatari mā ato afara axoshara nā mato afara axosharaifos, askarakai sharama. Nāskariakani yora chakafori. ‘Mā afara sharafo shara faa,’ ixō Niospa mato yoima. 34 Akka mā ato kori ināxō mā ato shinākōimis nokomāi kopifakōikanira ixō; akka na yora fetsafāfe ea afaa kopifatiro-foma. Nāskakē ē ato afaa ināpaima ixō mā shinākī mā afaa ināma, askara sharama. Nāskarifiakani yora chakafo kori inānōnāmisfo nokomāi kopifasharakōikanira ikanax. 35 Akka ē mato yoinō, nikakapo. A mato noikaspaiāfe māroko ato

noikāfe, ato shara fakāfe. Afara ato ināxō ea kopifafe iya-makāfe. Mā askai Epa Nios ari mā nokoaito matoki ini-mayanā afara sharafo mato ināxii. Nāskax mā Nios Sharapa fake mā iki. Nāfi tsoa keskaramāki sharafinakōiaki. Epa Nios sharakōi tsōa fayamafiaino ato noikōi. Nā yora chakafori ato noi. <sup>36</sup> Nāskakē māri ato noikōikāfe, nā Epa Niospa ato noikōiai keskafakī,” ixō Jesús ato yoini.

*“Fetsafo mekafakī chakafayamakāfe,” ixō Jesús ato yoini (Mt. 7.1-5)*

<sup>37</sup> Anā Jesús ato yoini iskafakī: “Mēxotaima fetsafo mekafayamakāfe iskafakī yoikī: ‘Nato afara chakafakī Niospa omiskōimapainō,’ fakī. Akka mā ato askafayamaino Niospari mato mekafatiroma iskafakī yoikī: ‘Na yorafo chakafo,’ mato fatiroma. Akka yorafo fe rafesharaxō ato raefakāfe. Mā askaino Epa Niospa matori raeshara faxii mā yorafo fe rafesharano. <sup>38</sup> Fetsafo afara ināsharakōikāfe. Mā fetsafo afara ināsharakōikē, matori Niospa afara ichapa sharakōifo ināxii. Akka mā fetsafo afara ināsharakēma Niospa matori afaa ichapa ināxima, mā ato afara ināsharakōikēma,” Jesús ato fani.

<sup>39</sup> Jesús meka fetsafaxō ato yoini iskafakī: “Akka yora fēxo afe fēxo iyopaikī iyotiroma, mai xato mēra paketiro. Nāskari fakī fētsa Niospa meka tāpixoma mato yoitiro. Askara yorafo yoyiamakāfe, mato anorima yoitirofoki. <sup>40</sup> Akka a aōxō tāpimisfāfe a ato tāpimamis finōtirofoma. Akka mā tāpisharakōikanax āto maestro keskara itirofo.

<sup>41</sup> “¿Afeskakī ifi pasta pishta fetsa feronaki ikano mā ōimē, māroko ifi pasta efapa feostamefixō? <sup>42</sup> Akka, ¿mā shināimamē a mā ifi pasta efapa feostamea? Akka afeskakī mā fetsa iskafaimē: ‘Yamā, ē mia fixonō a mī ifi pasta pishta fero naki ika,’ fakī, mākōi mā kakamepaimis. Mākai afaa tāpiama. Akka a mā ifi pastafā feostamea mā tsekayokāfe. Nāskaxō mā mā ōisharakī a fetsa feronaki ika mā fixosharatiro. Nāskari fakī mā chaka xateyamaxō mā fetsafo chaka xatematiroma. Akka māto chaka xatexō fetsafo mā chaka xatematiro,” ixō Jesús ato yoini.

*Ifi āfe fimioxō nō tāpitiro afe keskaramākī (Mt. 7.17-20; 12.34-35)*

<sup>43</sup> Anā Jesús ato yoini iskafakī: “Ifi shara fimi chakaya itiroma. Ifi chakari fimi sharaya itiroma. <sup>44</sup> Akka ififo āfe fimioxō nō tāpitiro afe keskaramākī. Moxaya ōikī nō tāpitiro. Na keoimara nō fatiro. Nāskari fakī nō tāpitiro moxaya ōikī, nari uvamara nō fatiro. <sup>45</sup> Nāskari fakī yora sharapa meka shara yoitiro, āfe ōiti mēraxomāi shara shinākī. Akka



yora chakapari meka chaka yoitiro, āfe ōiti mēraxomāi chaka shinākī. Nāskaxō nā āfe ōiti mēraxō shināi keskara yoitiro.”

*PeXe rafeōnoa Jesús ato yoini*  
(Mt. 7.24-27)

<sup>46</sup> Nāskaxō anā Jesús ato yoini: “Akka, ¿afeskakī mā ea Ifofafiakī, a ē mato yoiāi keskara mā akimamē? <sup>47</sup> Ē mato yoinō afe keskara fomākī nā ea nikaifo, nāfāfe nā ē ato yoiāi keskara amisfo. <sup>48</sup> Nā yōra peXe fai keskara, peXe fakī mai chai pōkixō mai teiki nokoxō peXe kishi nīchiano. Mā faka faikī faka poikōikī peXe afeskafatiroma pexemāi kerexkōikē. Nāskarifiakī yōra ea Ifofasharakōixō afara afeskara afaito shināchakatiroma. <sup>49</sup> Akka nā ē yoiāito ea nikaito nā ē yoiāi keskara akima, nā yora tatimato peXe fai keskara. PeXe fakī tāpixoma peXe kishi nīchisharamano, a nāmā faka faikī potatiro. Nāskax mā peXe pāoikax chakanakōitiro. Nāskarifiakī fētsa ēfe meka nikafikī ea nikasharaima. Nāskakē omiskōipakenakafo,” ixō Jesús ato yoini.

## 7

*Jesús sharafani romanō xanīfāfe āfe ina yonaito*  
(Mt. 8.5-13)

<sup>1</sup> Mā Jesús yorafo yoikī xateax Capernaúm ano kani. <sup>2</sup> Nāno soraro xanīfo romanō ini. Nāato a yonoxomis fichishara-paikōimis yonaifinakōi nakerani. <sup>3</sup> Nānoxō nā soraro xanīfāfe nikani Jesúsnoa yoaifono. Nāskaxō judeo anifofo nīchini Jesús yoixotanōfo a yonoxomis sharafaxoyonō.

<sup>4-5</sup> Ato askafaino mā fokaxō Jesús yoinifo iskafakakī: “Oa soraro xanīfāfe nofe yora yamafixō noko axosharamis ikaxō chikishta,” fanifo. “Noko keyokōi noikōimis nāato ichanāti peXe noko faxoni. Nāskakē āfe ina mī sharafaxotiro,” judeofāfe Jesús fanifo.

<sup>6</sup> Askafaifono Jesús ato fe kani. Akka Jesús mā peXe chaima faikaino, nā soraro xanīfāfe afe rafeafo nīchini yoitānōfo iskafakī: “Ifo, ē mia fekaxtefaima. Ēkai afaama. Akka mī tsoa keskarama. Mī finakōiakī ēfe peXe ano kayamafe. <sup>7</sup> Akka ēkairoko afaax nāskakē ē mikiki kaama. Akka mī mekapa a ea yonoxomis ea sharafaxōfe nonoxō. <sup>8</sup> Akka eari ēfe xanīfāfe yonomamis. Ēri sorafōfo yonomatiro. ‘Katāfe,’ ē faino karisatiro. Askatari, ‘Ekeki ofe,’ ē faino ekeki orisatiro. Nāskakē a ea yonoxomisri afara ea axōfe ē faino ea axotiro. Akka mī afama mīshti fatirokī. Mī mekapa a ea yonoxomis ea sharafaxōfe,” ixō yoini.

<sup>9</sup> Askafaito nikakī a afe foafo Jesús ato yoini: “Kee, nikakapo. Na feronāfake israeli yamafixō ea chanīmara fakī

finakōi, fetsafo keskarama. Akka Israel anoafāfe ea iskafam-isfoma chanīmara fakakī,” ato fani.

<sup>10</sup> Ato Jesús askafaino a sororo xanīfo fe rafeafo mā āto pexe ano fokaxō ōiafo a yonaito ōifaino mā shara fichitoshinifo.

*Jesús otofani kēro ifomāfa fake*

<sup>11</sup> Mā askafata Jesús kani pexe rasi āfe ane Nain ano. Āfe inafu fe kaino yora ichapafu afe fonifo. <sup>12</sup> Mā pexe rasi chaima fāi kakī ōini a naa iyofifafu maifafokakī. Kēro ifomafa nā āfe fake fisti ini. Nā kēro ifomafa fe yora ichapafu afe fonifo. <sup>13</sup> Nā kēro ifomafa oiaito ōikī, Jesús shinākōikī yoini iskafakī: “Oiyamafe,” fata, <sup>14</sup> Jesús kaxō a kamaki rataxō iyoi foaifo ramāni. Akka nā iyoi foaifo nāno nētenifo. Nāskata nā naita Jesús yoini: “Naetapa, ē mia yoi, fininīkafāfe,” faino, <sup>15</sup> fininīkafāni. Nāskakē a naita fininīkafā tsaota mekani. Nāskaxō Jesús afa yoini: “Nakīa, mī fake,” fani. <sup>16</sup> Nā naita Jesús otoa ōikani. Yorafo ratei fetsenifo. Nāskakaxō Nios yoisharakōinifo iskafakakī: “Epa Niosfi finakōiakī āfe meka yoimis nokoki nokoa,” fanifo. Nāskatari yoikī iskafanifo: “Epa Nios nokoki nokokōia, afe yorafo kexesharaxiki,” fanifo. <sup>17</sup> Nāskakē Judea anoxō keyokōi nikaketsanifo, aa kematai ixori nikaketsanifo a naita Jesús otofakē.

*Juan aōxō tāpimisfo Jesúski nīchini*  
(Mt. 11.2-19)

<sup>18</sup> Juan karaxa mēraxō nikani Jesús ato sharafaito Apa Niosxō. Nāskaxō āfe ina rafe kenani. <sup>19</sup> Nāskaxō ato nīchini Jesús ano fotanōfo mā ato nīchia fokaxō yoinōfo iskafakī: “¿Mīmē Cristo nā Epa Niospa nokoki nīchiai, askayamai fetsa nokoki oiraka nā nō manai?” ixō yoitanōfo Juan ato nīchini. <sup>20</sup> Mā Juan ato nīchia fokaxō Jesús yoinifo: “Juan Maotista noko nīchia nō oa mia yōkaiyoi, mīmakī a Niospa nokoki nīchia, askayamakī fetsa nō manairaka,” fanifo. <sup>21</sup> Jesús anoxō yora ichapa sharafapani, a isinī ikanaifo sharafata, a omiskōifinakōiafo sharafata, a niafaka chaka ato mēra nanea ato makinoa potata, a fēxofu ato fero sharafaxōaito ōinifo.

<sup>22</sup> Nāfo askafata Jesús ato kemani iskafakī: “Fokaxō Juan yoitakāfe a mā ōiyana a mā nikafori. Yoitakāfe, mā fēxofāfe sharakaxō ōisharakani kiki, askatari nā chatofu mā sharakanax niafoki, a rashkishiaifori mā sharafokī, a pastofāferi mā nikasharakani kiki, a namisfori mā otoafoki, a afaamaisfāferi Niospa meka shara nikakani kiki afeskaxō Epa Niospa noko ifitiromakī. <sup>23</sup> Akka a ea chanīmara fasharakōia afara fetsa shinātama ekeki inimakōitiro,” Jesús ato fani, Juan ina rafe.

<sup>24</sup> Nā Juan ato nīchia rafe mā foaifono Jesús yorafo yoikī taefani Juanoa, iskafakī ato yoikī: “¿Afeskakī tsōa istoma

anoa Juan òifokani fonifomě? Juankai nã něfe tafa pei takka takka akai keskarama. Nãskarifiakĩ mã mã tãpia Juankai òiti ranãyama. <sup>25</sup> Akka, ¿tsoa òikai mã kamismě? Òitsai, feronãfake rapati sharakõi safekě òikai mã kamisraka. Akka mã mã tãpia a rapati sharakõi safemisfo xanĩfofofãfe àto pexe anoxõ rapati sharakõi safetirofo. <sup>26</sup> Akka, ¿tsoa òikai mã kamismě? Nã Niospa meka yoimis òikai mã kamisraka. Akka chanĩma, nã Juan Niospa ina finakõia fetsafo keskarama. <sup>27</sup> Akka nã Juanoa yoikĩ Isaías kirika keneni iskafakĩ:

Mĩ nai ariax mai ano fotoyoamano nã ěfe meka yoimis ě nĩchiki taefai mĩõnoa ato yoiaino itipinĩsharakaxõ mia nikakõinõfo, ixõ keneni. <sup>28</sup> Akka ě mato yoi, ě mato pãraima. Tsõakai Juan finõama. Juan yoimis keskara meka shara noko tsõa yoimisma. Juanki Nios inimakõimis. Akka fetsafãferi afayamafikaxõ ea Ifofaifono Nios atoki inimakõi. Nãskakě Juan finõkõiafo Niospa ato õimis.”

<sup>29</sup> Keyokõichi Juan nikanifo, a xanĩfo Roma anoa kori fixomisfãferi nikanifo. Nãskakě Juan ato maotisafapani mãmã mã tãpikõiafãfe Nioskairoko chanĩmiskě. <sup>30</sup> Akka nã fariseofo fe a Moisés yoikĩ kirika keneni keskara ato tãpimamisfo afo maotiskaspanifo Juan yorafo maotisafapaino. Nã Niospa ato yoipaiyai keskara nikakaspanifo.

<sup>31</sup> Nãskaxõ anã ato yoini: “Iskaratĩa na niyoafo afe keskarafomãkĩ ě mato yoinõ mã tãpinõ. <sup>32</sup> Nã fakefo àto kaxeti anoax kaxekakĩ àto yamafo kenatirofo tai tai iyanã. Akka mã àto yamafo nokokanax a ato yamafãfe fichipaiyai fo keskai tsoa kaxesharayamaino ato yoitirofo iskafakakĩ: ‘Nõ nõko xaiti manaino akka mã mairamisma. Askatari shinãmitsayanã nõ fanãikaino mã oiamisma,’ ixõ ato yoitirofo. Akka mãri nãskariai mã tsoaki inimamisma. <sup>33</sup> Akka Juan Maotista oni. Atokai pikĩ finapaimisma, askatari afaa pae ayamisma. Akka mã yoimis iskafakĩ: ‘Juan niafaka yõshi chakaya,’ mã famis. <sup>34</sup> Akka ě Niospa Fakekõi oni. Piyana ě ayamis. Akka ea mã iskafakĩ yoimis: ‘Jesús ichapakõi piimis, askatari pae ayamis,’ mã ea famis. ‘Nãskax yora chakafo fe rafemis, a romanõ xanĩfo kori fixomisfo ferĩ rafemis,’ mã ea famis. <sup>35</sup> Akka ě shara imis Niospa ea shinãmanaino. Juanri shara imis Niospa shinãmanaino. Yorafãfe noko òikĩ tãpitirofo,” ixõ Jesús ato yoini.

*Jesús Simón pexe ano kani. Nã Simón fariseo ini*

<sup>36</sup> Fariseo fistichi pikĩxiki Jesús iyoni. Afe Jesús kani ěfe pexe ano nãno mãsa ano tsoaxõ piaino. <sup>37</sup> Nãnoa nã kěro chotaferomato nikani nãno ato fe ixõ. Nã fariseo pexe anoxõ Jesús pii ano, nãno nã kěro nokoni, manishomo oxokõiki

pirofomā foikai. <sup>38</sup> Mā nokoax oiayanā Jesús āfe tae resotai nitishota tsaopakekafāni. Tsaoox oiaino Jesús āfe tae pichiki āfe fēotoshini. Nāskaxō āfe fōo otekere ayanā āfe tae tsōokakata akiki pirofomā nachini. <sup>39</sup> Nā fariseo a Jesús iyoato na kēro askaito ōikī āfe ōiti mēraxō shināni: “Na feronāfake Niospa meka yoikatsaxakitsi tāpi kiki na kēro afe keskaramakī na āfe tae ramākai, nā kēro chakakōi,” ixō āfe ōiti mēraxō shināni.

<sup>40</sup> Nāskara āfe ōiti mēraxō shināito Jesús yoini nā fariseo: “Simón, afara fetsa ē mia yoipai,” faito nā Simón fariseo kemani: “Ea yoife, Ifo,” fani.

<sup>41</sup> Askafaito nikakī Jesús yoini feronāfake rafeōnoa meka fetsafaxō: “Nā feronāfake rafeta a ato kori minimis niminifo, Fētsa nimini quinientos nā kori ane denarios. Fētsari nimini cincuenta. <sup>42</sup> Afeskaxoma kopifatiroma inifo. Akka nā ato kori minimisto ea kopifakāfe ato fanima. Ato shara fani nā rafe. Akka ea yoife fatoto noikī finasharakōimākai,” faito, <sup>43</sup> Simón kemani: “Ētsa, nā ichapa nimiato noikī finakōi rakikīa,” faito, Jesús yoini: “Ēje, mī yoisharakōiaki.”

<sup>44</sup> Nāskaxō nā kēro ōiyanā Jesús Simón yoini: “¿Mā mī na kēro ōimē? Akka ē mī pexe mēra ikikē mī ea faka ināma, ē aō ochokomepanā. Akka na kēromā oiayanā ēfe taeki āfe fēo tosiyanā ea ōchoa. Nāskaxō āfe fōo ea otekere aka. <sup>45</sup> Akka mā nō feyai askafimisno, mī ea tamoki tsoo akama. Akka na kēromā ikitoshixō ēfe tae pemākīa tsoo akī xateama. <sup>46</sup> Akka mā nō feyai askafimisno mīkai xinī ēfe mapoki mīa matekere akama. Akka na kēromā ēfe taeki pirofomā nachia. <sup>47</sup> Akka ē mia yoi, na kēro chaka finakōikē mē āfe chaka soaxona, ea noikōiaito. Akka fētsari afaa chakafai finamano mē āfe chaka pishta soaxofiano ea noisharaima,” ixō Jesús yoini.

<sup>48</sup> Nāskaxō a kēro yoini: “Mē mia chaka soaxona,” fani. <sup>49</sup> A ato feta piaifori nāno ato fe inifo. Nāskax aa ranā yoinānifo. “¿Tsoamē na ato chaka soaxonai?” ikanax yoinānifo. <sup>50</sup> Nāskaxō afianā Jesús nā kēro yoini iskafakī: “Ea mīa chanīmara faito ē mia chaka soaxonaki, kasharatāfe,” ixō Jesús yoini.

## 8

### *Kērofāfe afara Jesús axosharapaonifo*

<sup>1</sup> Mā askafata pexe rasi mēra Jesús kafāsapaoni. Afe keskaramakī Apa Nios xanīfoōnoa ato yoifofāsafai. Nā doce feronāfake aōxō tāpimisfo afe fofāsapaonifo. <sup>2</sup> Kēro ranāri Jesús fe fofāsapaonifo, māmāi ato sharafaano ato makinoa niafaka yōshi chaka potakī, a isinī ikaiifori ato sharafani. Nānori ato fe ini āfe ane María Magdalena. Nā María Magdalena makinoa Jesús siete niafaka potani. <sup>3</sup> Nāskata Juanāri ato fe ipaoni,

Cuzapa āfi. Nā Cuzapa Herodes yonoxopaoni. Susanāri ato fe ipaoni. Nāskatari nā kēro fetsafāferi Jesús yafi aōxō tāpimisfo ato kori ināpaonifo.

*Jesús ato yoini meka fetsafaxō fimi exe saamisnoa*  
(Mt. 13.1-9; Mr. 4.1-9)

<sup>4</sup> Pexe rasi anoax yora rasi fenifo, Jesús ōifekani. Nāskakē yora kaya ichanāfono meka fetsafaxō Jesús ato yoipakeni iskafakī: <sup>5</sup> “Feronāfake fistichi fimi exe saafoni āfe nōxati mēra kēchoxō fokī. Āfe tarepa āfe fimi exe saakaino ranāri fai nēxpakīa pakeaito peamanifo, ranāri peyafāfe xēani. <sup>6</sup> Akka mā foaipaiyaito xinī namani, yosipanā, āfe tapo airoko mai mēra kasharakē. Foaikax samama nani xinī tsasifaano. <sup>7</sup> Ranāri fimi exeфо moxafo mēra pakei fetseni. Moxafo mēranoax moxafoya foaipaiyaito moxafāfe namani. <sup>8</sup> Akka fimi exe ranāri mai shara ano pakeni. Nāskax foaisharax fimi ichapayakōi ini fetsa cien ini,” ixō Jesús ato yoini. Nāskaxō anā fāsi ato yoini: “Mā pachoyakī ea nikasharakōikāfe,” ato fani.

*Meka fetsafaxō yorafo yoixō a aōxō tāpimisfo xafakīakōi ato yoini*

(Mt. 13.10-17; Mr. 4.10-12)

<sup>9</sup> A aōxō tāpimisfāfe Jesús yōkanifo: “Noko yoisharafe, nō mia nikasharamakī afaa mī yoiamāki meka fetsafaxō,” faifāfe <sup>10</sup> ato yoini: “Ē mato yoinō Epa Nios xanīfāfe afeskaxō afe yorafo ikināmāki, ē mato tāpimasharai afe keskaramāki. Akka fetsafo meka fetsafaxō ē ato yoi. Nā ē ato yoiai ōisharafikakī ōisharafoma. Nikafikakīri nikasharafoma,” ixō Jesús ato yoini.

*Jesús meka fetsafaxō fimi exe saamisnoa ato yoini ato tāpimasharakōixiki*

(Mt. 13.18-23; Mr. 4.13-20)

<sup>11</sup> Anā Jesús ato yoini iskafakī: “Na meka fetsafaxō ē mato yoiai iskarakī nikakapo. Na fimi exeōnoa ē mato yoiai, fimi exeōnoa ē mato yoima. Niospa mekaōnoa ē mato yoi. <sup>12</sup> Akka na fai nēxpakīa fimi exe pakea peamatirofo keskafakī, nāskarifiakī Niospa meka nikapaiyaifono Satanás chakata ato nikatima fatiro afe iyamapakexanōfo. <sup>13</sup> Akka nā fimi exe makex mēra pakeax foaitiro keskariakī, nāskarifiakī fētsa Niospa meka nikapaisharakōiyotiro. Akka nā fana tapo foaisharama keskaraxō nikafikī nikasharaima. Nāskaxō afara afeskaraino samamashta kachikiri fatiro. <sup>14</sup> Akka nā moxafo mēra fimi exe pakea keskaraforti a ea nikaifo. Akka ea nikafikani, nā moxafāfe fanafo namai keskarafō, āto shinā mēraxō afara sharafo shinākakī. Nāskakakī a Niospa ato amapaiyai keskara shinākanima. Nā fimi exe-mais keskarafō. <sup>15</sup> Akka nā fimi exe mai shara ano pakea keskara. Nāskarifiakī yora ōiti sharayato itipinīsharaxō ea

nikasharai, Niospa meka chanĩmara fakõini, nã fimi exe icha-paya keskarakõixõ. Nãskasharakõikaxõ fetsafo Niospa meka nikamasharakõikani fetsafãfe chanĩmara fanõfo,” ixõ Jesús ato yoini.

*Meka fetsafaxõ räpariki Jesús aõxõ täpimisfo yoini*  
(Mr. 4.21-25)

<sup>16</sup> Anã Jesús ato yoini iskafakĩ: “Akka räpari õtaxõ tsõa kēsho fepotiroma, askatari a ika nãmãri tsõa tsãotiroma. Askakimaroko fomãkĩa tsãotirofo, chai chaxasharakõikē fetsafãfe ikikaxõ õisharakõinõfo. <sup>17</sup> Nãskarifiakĩ a afara oneyomis chipo xafakĩakõi õixikani. Nãskatari a afara fomãyomisfo Niospa xafakĩakõi ato faxoxii keyokõichi õinõfo. <sup>18</sup> Nãskakē nikakõisharakãfe. Akka a ea nikakĩ finasharakõiai Niospa täpimasharakõi. Akka fetsa ẽ täpisharakõia ifiaxõ nikamiskēma, askara yora nã täpia pishta Niospa anã fiatiro,” ixõ Jesús ato yoini.

*Jesús õifekani ãfe afanõ ãfe extonõ fenifo*  
(Mt. 12.46-50; Mr. 3.31-35)

<sup>19</sup> Jesús yorafo yoiaino ãfe afanõ ãfe extonõ akiki fenifo afe meka paikani. Akka akiki fotirofoma inifo, yora ichapa fospikõimãiyafono. <sup>20</sup> Nãnoa fētsa Jesús yoini: “Mĩ efanõ mĩ extonõ emãiti niafo mia õipaikani.” <sup>21</sup> Askafaino Jesús kemani: “Akka nã ẽfe Epa Niospa meka nikakõiaifo nãfofi ẽfe efafo ita ẽfe extofoki,” ixõ ato yoini.

*Jesús nefe yafi ãmãfã poo iki meseniaito nishpa fani*  
(Mt. 8.23-27; Mr. 4.35-41)

<sup>22</sup> Pena fetsa Jesús kanõanãfãñē naneinĩkafã aõxõ täpimisfo yoini: “Nõ okiri ãmãfã pokefainõ fokãfe,” ato faino afe fonifo. <sup>23</sup> Mã ãmãfã pokefainafono kanõanãfã xaki mēra rakax Jesús oxani. Nãno atoki nēfefakõiyana ãmãfã poo ini. Nãskaino kanõanãfã faka fospikõini mesekõi ini mã kanõanãfã ikikerani. <sup>24</sup> Nãskakē aõxõ täpimisfãfe Jesús mõinifo iskafayanã: “Ifo, mã nõ nataramaikai, moife,” faifono, Jesús fininãkafã nefe yafi ãmãfã poo ikaito ãfe mekapa nishpa fani. Nãskax anã ãmãfã poo inima, sharakõi ãtani.

<sup>25</sup> Askafafono aõxõ täpimisfo yoini: “¿Afesikai mã rateimē? ¿Mã ea chanĩmara faimamē?” ato faino, akka aõxõ täpimisfo rateyanã ãa ranã yoinãnifo iskakani: “¡Kee! ¿Na feronãfake afe keskaramē na nefe feta ãmãfãñē ato yoiaito nikaifo?” ikanax yoinãnifo.

*Gadara anoxõ Jesús feronãfake makinoa niafaka rasi potani*  
(Mt. 8.28-34; Mr. 5.1-20)

<sup>26</sup> Nãskata Gadara mai ano nokonifo, nã ãmãfã Galilea okiri. <sup>27</sup> Mã nokoax Jesús kanõanãfã makinoax fotopakekafanaino,

pexe rasi makinoax feronāfake niafaka yōshi chaka nanea akiki oni. Rapati safekatsaxakima. Pexe mērari ikatsaxakīma. Akka nā maiāfo mafa kini mēra ano ika ini. <sup>28</sup> Nāskakē Jesús fichita a nāmā ratokonō mai chachipakefofā fāsikōi fiisiyanā yoini: “¡Ea afeska fayamafe, Jesús! Mī Nios Sharapa Fakeki ē mia yoi mī ea omiskōimayamafe,” fani. <sup>29</sup> Nāskafakī yoini māmāi Jesús a makinoa niafaka yōshi chaka potaino, mēxotaimamāi a mēra niafaka yōshi chaka nanemisno. Nāskaito yorafāfe kaninānā metexkere ata otexkere axō kexefiafono, nāfo tesaket-safaini ichopaoni. Nāskakē niafaka yōshi chakata nā feronāfake tsōa istoma ano iyopaoni.

<sup>30</sup> Nāskaito Jesús yōkani: “¿Mī afe anemē?” faito, nāato kemani: “Ēfe ane Legión,” fani, a mēramāi niafaka yōshi chaka ichapa nanekē. <sup>31</sup> Nāskaxō niafaka yōshi chakafāfe Jesús yoinifo: “A omiskōipakenakafo kinīfā mēra noko potayamafe,” fanifo.

<sup>32</sup> Akka nāno māchi keya anoxō kochifāfe pinifo. Nāskakē niafaka yōshi chakafāfe Jesús yoikakī iskafanifo: “Noko kochifo mēra nīchife,” faifono Jesús kochifo mēra ato nīchini. <sup>33</sup> Nāskakē niafaka yōshi chakafo feronāfake makinoax tsekefaini kochifo mēra iki fetseni. Kochifāfe pifiai ĩamāfā mēra keyopakei fetseax āsai fetseni, keyokōi.

<sup>34</sup> Askaito ōikani a kochifo kexeāfo ichoi fetsenifo, a pexe rasi anoa ato chanifai fokani. Askatari a pexe rasi pasotai ikafori ato chanifanifo. <sup>35</sup> Askaito nikakani yōrafā rasi fenifo kochifā rasi āsaito ōifekani. Nokokaxō ōiafo Jesús nāmā a feronāfake niafaka yōshi chaka nanea tsoa ini, mā a makinoa Jesús niafaka yōshi chakafo pōtano. Rapati safeta mā shināsharakōia ini. Nāskakē yorafo ratei fetsenifo. <sup>36</sup> Nā feronāfake makinoa Jesús niafaka yōshi chaka potaito, ōiafāfe ato yoinifo afeskax sharamākī a feronāfake niafaka yōshi chaka nanea. <sup>37</sup> Keyokōi yorafāfe nā Gerasa anoafāfe nikakaxō ratekōiyanā. “Nonoax katāfe,” faifono, Jesús kanōanāfā mēra naneinākafanax kani. <sup>38</sup> Nā feronāfake a makinoax niafaka yōshi chakafo tsekeato, “Ēri mefe kapai,” faito, akka Jesús, “Mī efe katiroma. Nono mī nētetiro. <sup>39</sup> Akka mī pexe ano kaxō a mia Niospa axōa keskara yorafo yoifotāfe,” fani.

Nāskafaino nā feronāfake kaxō nā pexe rasi anoāfo ato yoifofāsafani nā Jesús axōa keskara.

*Jairo fake xotofake mā nakē Jesús otofani. Askatari kēromāri Jesús rapati mēeax sharani*

*(Mt. 9.18-26; Mr. 5.21-43)*

<sup>40</sup> Nāskafaferani Jesús anā oni ĩamāfā pokeferani. Jesús nokoaito fichikaxō akiki inimakōiyanā yorafāfe ifinifo keyokōichimāi manakakī. <sup>41</sup> Akka nāno feronāfake āfe ane

Jairo akiki nokoni. Nā Jairo Niospa meka yoimis xanīfo ipaoni nā judeofāfe ichanāti peXe sināgoga anoax. Nā Jairo Jesús nāmā ratokonō mai chachipakefofā fāsikōi yoini āfe peXe ano kanō, <sup>42</sup> āfe fake xotofake napaiyaino. Akka nā Jairo fake xotofake fisti ini, doce xinia aka. Nā xotofake mā nakerakōini. Jesús Jairo fe kakī meea yorafāfe shoiakī fetsafo meeni afe fokakī.

<sup>43</sup> Nānori kēro ato fe kani. Na kēro imi neseKima, doce xinia amis. Notoro kopifakī āfe kori keyotiani. Tsoa pīshta sharafatiroma ini. <sup>44</sup> Nā kēromā aa kachikiri kaxō āfe tari kexa Jesús ramākani. Tari kexa ramākaino koshikōi āfe imi nesetani. <sup>45</sup> Nāskakē Jesús ato yōkani: “¿Tsōa ea ramāmē?” ato faito, keyokōichi yoinifo: “Nō mia ramāma,” fanifo. Ato askafaito Pedro yoini: “Ifo, yorafāfe mia shoiaki fetsakaxō mia pitsikinafo,” faito, <sup>46</sup> afianā Jesús ato yoini: “Fatora mā fētsa ea ramā. Akka mē tāpia fatora fetsa ēfe sharaōnoax mā shara,” ixō ato yoiaino, <sup>47</sup> nikai nā kēro ratekōini. “¿Mā ea tāpiaromē?” ikax ratekōiyanā Jesús ano kaxō ratokonō mai chachipakefofā yoini yorafāfe ferotaifi nāatomāi āfe tari kexa ramākaxō. “Ē mia tari kexa ramākata mē shara,” ixō yoini.

<sup>48</sup> Askafaito Jesús yoini: “Yōxashta, mā mī shara mīmāi ea chanīmara faax. Nāskakē tanaima kasharatāfe,” fani.

<sup>49</sup> Jesús nā kēro yoiaino, yora fistichi oxō Jairo yoini: “Mā mī fake xotofake naaki. Anā nōko Ifo fekaxtefayamafe,” faito, <sup>50</sup> nikakī Jesús yoini: “Ratekima. Ea chanīmara fāfe mī fake naamakī otoi kiki,” fani.

<sup>51</sup> Mā peXe ano nokoxō, tsoa Jesús ikikinima. Akka Pedro kaino Santiago kaino Juan kaino inifo nā fāke apa fe fokani, nā fāke afari ato fe kani. <sup>52</sup> PeXe mēra ikifaikaxō oiafo keyokōi oiakani fiisinifo shinākani nā fake xotofake mā naano. Akka Jesús ato yoini: “Oiyamakāfe. Na fake xotofake naamakī oxaki,” ato faino, <sup>53</sup> keyokōichi ōsaketsanifo, tāpifikaxō nā fake xotofake mā nafiano. <sup>54</sup> Nāskaxō Jesús mēkemā mētsoinīfofā fāsikōi yoini: “Xotofakeshta, fininākafāfe,” faino, <sup>55</sup> mā otoax nā xotofake koshikōi fininākafani. Nāskaxō ato yoini nā xotofake pimanōfo. <sup>56</sup> Nāskakē apa fe afa ratekōinifo. “¡Ke! ¿Afeskaxō otoamē?” ikanax inimakōiyanā. Nāskaifono ato yoini: “Tsoa yoiyamakāfe nā mātō fake xotofake nakē mē otoaki,” ixō ato yoini.

## 9

*Jesús aōxō tāpimisfo nīchini Nios Xanīfoōnoa ato yoitanōfo  
(Mt. 10.5-15; Mr. 6.7-13)*

<sup>1</sup> Jesús aōxō tāpimisfo doce ichanāfani. Nāskaxō ato yoini iskafakī: “Ēfe sharaōxō ato makinoa niafaka fetsa fetsatapafo



põtatakãfe, a isinĩ ikaifo ato sharafayanã. <sup>2</sup> Askatari Nios xanĩfoõnoa ato yoitakãfe, a isinĩ ikaifori ato sharafayanã. <sup>3</sup> Afaa mã fokiki, mãto mēstetiri mã fokiki, mãto pishari mã fokiki, a mã piikairi mã fokiki, koriri mã fokiki, rapati fetsari mã fokiki. <sup>4</sup> Akka nã mã õiai pexe fetsa anoxõ mato ifiaifono, nãno iyokani, nã mã anoax kaitĩa. <sup>5</sup> Akka fatora pexe rasi anoxõ mato ifikaspaifono, anoax tsekekaikĩ mãto taekinoa mã mapo taa taa atiro ato õimaxiki. Mã askafaino tãpitirofo Nios atoki inimayamaino,” ixõ Jesús ato yoini. <sup>6</sup> Nãskata Jesúsxõ tãpimisfo fonifo, pexe fetsafo mēra ato yoifokani. Fokaxõ ato yoisharakõinifo. Nios nikasharakõikãfe ato fayanã a isinĩ ikaifo ato sharafanifo.

*Juan Maotista nani*

*(Mt. 14.1-12; Mr. 6.14-29)*

<sup>7</sup> Xanifo Herodes nikani Jesúsnoa yoiaifono afama mīshti akaito. ¿Tsoamē a feronãfake? ixõ shinãni. Akka yoinifo: “Mã Juan afianã mã otoa,” fanifo. <sup>8</sup> Fetsafãferi yoinifo: “Nã ato Niospa meka yoipaonikĩa Elías,” fanifo. Fetsafãferi yoinifo: “Nã nõko xinifo ato Niospa meka yoipaonikĩa afianã mã otoa,” ixõ yoinifo. <sup>9</sup> Askafaifono Herodes ato yoini: “Maa, akai Juanma. Mē Juan ato textemayamea. Akka na nõ nikai tsoamē na aõnoa yoiaifo afama mīshti faito,” ixõ Herodes Jesús õipaikõini.

*Jesús cinco mil feronãfakefo ato pimani*

*(Mt. 14.13-21; Mr. 6.30-44; Jn. 6.1-14)*

<sup>10</sup> Nã Jesúsnoa yoimisfãfe mã fēkaxõ yoitoshinifo a atanaifo keskara. Askafaifãfe nikakĩ ato tiis iyoni, pexe rasi ãfe ane Betsaida chaima tsõa istoma ano. <sup>11</sup> Akka mã yorafãfe tãpikanax Jesús kaino, nãskakē chifafainifo. Akiki foafono Jesús ato ifini. Apa Nios xanĩfoõnoa ato yoianã a isinĩ ikaifori ato sharafapani.

<sup>12</sup> Mã yãtapakeaino, aõxõ tãpimisfo doce akiki fēkaxõ yoinifo: “Yorafo nĩchife fokaxõ tenetanõfo a piaifo fenayanã fonãikani kiki, pexe rasi ano fokãta a chaima ikafo anori fotanõfo. Akka nono afaamaki,” faifono, <sup>13</sup> Jesús ato yoini: “Ato pimakãfe,” ato feito kemanifo: “Nõko pãa cinco pishta foe raferi,” fanifo. “Akka, ¿mĩ shinãimē na yorafo pimaxiki a piaifo nõ ato fixotanõ?” ixõ yoinifo. <sup>14</sup> Akka nãno cinco mil feronãfakefo inifo. Akka Jesús aõxõ tãpimisfo yoini: “Cincuenta faxõ ato tsãoketsakãfe,” ato fani.

<sup>15</sup> Ato askafaifono keyokõi tsoai fetsenifo. <sup>16</sup> Askata Jesús cinco pãa tsoainĩfofãni foe rafeya. Nãskaxõ nai foisnĩfofã Apa Nios kĩfini iskafakĩ: “Aicho Epa, mĩoxõ ē ato pimai. Mĩ sharakõi,” fata, pãa kaxketa foe rafeya osixõ aõxõ tãpimisfo

ināni a yorafo ato ināketsanōfo. <sup>17</sup> Nāskakē yorafāfe pikanax māyakōinifo. Akka nā chete faafo doce fēta fospini.

*“Mī Cristo mia Niospa ifini nokoki nīchixii mī nōko xanīfo finakōia inō,” ixō Pedro Jesús yoini*  
(Mt. 16.13-19; Mr. 8.27-29)

<sup>18</sup> Pena fetsa Jesús Apa Nios arese kīfini. Akka aōxō tāpimisfo afe inifo. Nāskaxō ato yōkani: “¿Yorafo afaa ikanimē ē tsoamāki?” ixō āto yōkani.

<sup>19</sup> Ato askafaito kemanifo iskafakakī: “Fetsafāfe Juan Maotistara, mia fakani. Fetsafāferi Elíasra mia fakani. Fetsafāferi mia iskafakani: ‘Nā nōko xinifo ato Niospa meka yoipaonikīa mā otoa,’ mia fakani,” aōxō tāpimisfāfe fanifo. <sup>20</sup> “Akka mā, ¿ea tsoara faimē?” ixō ato yōkani. Ato askafaito Pedro kemani iskafakī: “Mī Cristo nā Niospa mia nīchini mī nōko Xanīfo finakōia inō,” fani.

*“Chipo ea retexikani,” Jesús ato fani*  
(Mt. 16.20-28; Mr. 8.30-9.1)

<sup>21</sup> Nāskata Jesús aōxō tāpimisfo yoini: “Tsoa yoiyamakāfe ēfi Cristoki,” ato fani. <sup>22</sup> Nāskata aōxō tāpimisfo yoini iskafakī: “Ē chipo omiskōifinakōixii. Askatari ea ōikaspakakī ea potaxikani, judeofāfe xanīfofo feta a Nios ato kīfixomis āto xanīfofōfāfe a Moisés yoikī kirika keneni keskara ato tāpimamisfāferi. Askatari ea retexikani. Ea retefiafono, tres nia oxata ē anā otoxii,” ato fani.

<sup>23</sup> Nāskata keyokōi ato yoini iskafaki: “Fatora fetsa ēfe inakōi ipaikī āakōi apaiyai keskara anā atiroma. Nā ē yoiyai keskara nikakōitiro. Pena tii iskatiro, ea Ifofapai: ‘Ēfe Ifoxō ea retefiafono ēkai ēfe Ifo ē potanakama,’ ixō shinātiro. <sup>24</sup> Akka fētsa āa shinātiro iskakī: ‘Ē Nios Ifofaito ea retetirofo. Nāskakē ē Nios Ifofaima,’ ixō shinātiro mesekī. Askara yora naax ēfe Epa ano katiroma. Akka nā ea Ifofaa, eōxō reteafono ē ifixii efe ĩpaxanō eamāi Ifofamiskē. <sup>25</sup> Askatari fatora fetsa nōko mai anoax afara ichapayakōi ikatsaxakī mā naax aya katiroma. Ea Ifofayamax koriya ifiakatsaxakī Epa Nios ano katiroma. Akka afama mīstifoya iyopaofinixakī nā omiskōipakenakafo mēra kaax anā aya itiroma. Āfe afarafori Nios inātiroma afe ĩpaxakī. <sup>26</sup> Akka fatora fetsa eō rāfikī ēfe meka sharari yoikaspaito, ēri aō rāfikōixii ē yoikī iskafaxii: ‘Ē na yora ōimisma,’ ē faxii. Ēfe sharafoya mē oax ēfe Epa sharafoyari ē oxii, ēfe ājiri sharafori efe fotopakefōfāxikani. <sup>27</sup> Ē mato pāraima, fatora mā fetsa nayoxoma nono efe iyoxō ēfe Epa xanīfo finakōia mā ōiyoxii,” ixō Jesús ato yoini.

*Jesús áfe femānā fetsa keskara ini, fafekōini. Áfe rapatiri oxokōi ini*

*(Mt. 17.1-8; Mr. 9.2-8)*

<sup>28</sup> Askata ocho nia mā finōano ato yoikī keyota, Jesús māchi keya māpefaini arixō Apa Nios kīfikai. Áfe ina tres iyonī. Santiago iyota Juan iyota Pedro iyota ato fani. <sup>29</sup> Apa Nios kīfiaino, áfe femānā fetsa keskara itani. Áfe rapati oxokōi ini fafekōiyanā. <sup>30</sup> Akka nāno feronāfake rafe akiki nokokanax afe mekanifo. Mā nafianixakī Moisés fe Elías inifo. <sup>31</sup> Nā rafeta chaxapakefōfānifo. Mā fotokanax Jesús fe ketaxamei nikaxō yoinifo nā Jerusalén anoax Jesús omiskōixiai reteaifono. <sup>32</sup> Nāskata Pedronō Santiagonō Juannō oxapaifikakī oxatenekōinifo. Jesús fafekōiaito ōinifo nā feronāfake raferi ōinifo Jesús fe niafāfe. <sup>33</sup> Mā Moisés fe Elías Jesús makinoax foaifono, Pedro yoini: “Ifo, sharakōi ano nō oa. Nono nō tapas fanō, tres fakī. Mia fetsafaxota Moisés fetsafaxota Elías fetsafaxota nō fanō,” fani. Akka Pedro tāpinima a yoiai keskara shināfenokōini. <sup>34</sup> Pedro mekai askaino ato kōinī maipakefōfāni. Ato kōinī maipakefōfānaito ōikani ratekōinifo. <sup>35</sup> Nā kōi mēranoax mekai iskaito nikanifo: “Nafi ēfe Fakekōikī ē aō noikōi. Nāskakē nikasharakōikāfe,” ixō yoiaito nikanifo. <sup>36</sup> Mā mekai askai nishpatanaino, Jesús ares nikē ōinifo. Akka tsoa yoitama ares fisti āto ōiti mēraxō shinānifo. Nāskaxō tsoa yoinifoma nā ōiafo keskara.

*Jesús feronāfake naetapa niafaka chaka pōtaxoni*

*(Mt. 17.14-21; Mr. 9.14-29)*

<sup>37</sup> Pena fetsa māchi keya ariax mā Jesús aōxō tāpimisfo fe fotoano, yōrafā rasi akiki fenifo ōipaikani. <sup>38</sup> Nānoxō yōrafā rasi mēraxō yora fistichi fāsikōi Jesús yoini: “Ifo, ēfe fake ea ōixoniyope. Nā fisti ēfe fakeki. <sup>39</sup> Niafaka chaka a mēra nanexō, fāsikōi fiisimamiski, mesta mesta imayanā áfe axfapari fākok potamamiski. Chakakōi famis a makinoax tsekekaspayanā. <sup>40</sup> Akka mī inafō mē yoia ēfe fake makinoa niafaka yōshi chaka potakāfe ē ato fafiaino akka tsōa atiroma,” fani.

<sup>41</sup> Askafaino Jesús kemani: “¡Ooa! Mā kai ea tāpisharama. Mā afara shināmis. Akka afetiakai ē matoki onima. ¿Afetiakai mā ea tāpimē?” Jesús ato fani. Nāskaxō yoini: “Niri mī fake ea efexōfe,” Jesús apa fani. <sup>42</sup> Nāskata āpa Jesús ano efeaino, nā fake nīafaka fia kekēfōfā anā nāmā potani, anā ea ea imapaikī. Akka Jesús fāsi mekainā kafā iskafani: “Nīafaka mī chaka chakakōikī, nā feronāfake makinoax tsekekaitāfe,” fani. Nāskax nā feronāfake sharakōi itani. Nāskaxō apa ināni. “Nakīa mī fake,” fani.

<sup>43</sup> Askafaito ōikani āa ranā yoinānifo: “Aira, Niospa afama mīshti atiro,” ikanax āa ranā yoinānifo.

*Anã Jesús ato yoini: “Chipo ea retexikani,” ixõ  
(Mt. 17.22-23; Mr. 9.30-32)*

Jesús nã feronãfake sharafaito õikaxõ shinãifono, Jesús aõxõ tãpimisfo yoini, <sup>44</sup> “Ë mato yoiaito nikakõisharakãfe, shinãmakikãkĩma. Fetsafãfe ea ato achimaxikani kiki,” ixõ ato yoini. <sup>45</sup> Akka tsõa tãpinima a ato yoiai keskara Niospamãi ato shinã mëraxõ ato shinãtima faino. Nãskai ranonifo Jesús yõkapaikani ato xafakã yoipanã.

*“Akka, ¿tsoakaimẽ sharafinakõia?” inifo  
(Mt. 18.1-5; Mr. 9.33-37)*

<sup>46</sup> Nãskata chipo aõxõ tãpimisfo ãa ranã feratenãnifo, “Akka, ¿fato nõ fetsa sharafinakõimẽ?” ikanax. <sup>47</sup> Nãskaxõ a aõxõ tãpimisfãfe shinãifo keskara mã Jesús tãpixõ fake yome ifixõ chishtoinĩfofãni. <sup>48</sup> Nãskata aõxõ tãpimisfo yoini: “Akka fatora fẽtsa ãfe aneõxõ na fake yome noikĩ nãatori ea noisharakõi. Nã ea noisharaito ea fisti noima, nã ea nĩchiniri noisharai. Akka fatora mã fetsa ãto ina keskaraxõ mã yorafo shara faa, nãfi sharafinakõiakĩ,” ixõ Jesús ato yoini.

*Fẽtsa noko noikaspata noko sharafai  
(Mr. 9.38-40)*

<sup>49</sup> Ato askafaito Juan yoini: “Ifo, mã nõ õia oa feronãfake fistichi mã aneõxõ niafaka chaka potaito. Nãskakẽ, ‘Askafayamafe,’ nõ faa. ‘Mĩ nofe rafemismaki mã niafaka chaka yorafo makinoa potatiroma,’ ixõ nõ yoia,” fani.

<sup>50</sup> Askafaito Jesús kemani: “Askafayamakãfe, noko chakafatama, noko sharafai askara sharaki,” fani.

*Jesús Santiago yafi Juan mekatima fani*

<sup>51</sup> Mã chaima Jesús Apa Nios ari nai mërã kaino tsõakai nẽtefatiroma ini mãmãĩ tãpikẽ a Jerusalén anoax noko nãxoxiai Apa Niospa yoyoni keskai. <sup>52</sup> Nãskaxõ fetsafo rekẽ nĩchini, mã fokaxõ pexe rasi Samãria anoxõ itipinĩsharafaxonõfo a nokoikai anoxõ. <sup>53</sup> Akka samãritanõfãfe ato ifikaspanifo, mãmãĩ tãpikaxõ Jerusalén anoamãĩ foaifono. <sup>54</sup> Ato askafaiãfe a aõxõ tãpimisfo rafeta Santiago feta Juan õinifo. Nãskaxõ yoinifo: “Ifo, mã noko yoife nõ atoõxõ Epa Nios kĩfinõ na pexe rasi anoafo nai mëranoax chii pakeki ato kooakĩ mitonõ,” ixõ yoinifo. <sup>55</sup> Akka Jesús anã ato yoini: “Anori shinãyamakãfe. Mã shinãĩ keskara ã shinãimakai,” ixõ ato yoini. <sup>56</sup> Askafata pexe rasi fetsa ari fonifo.

*A afe fopaimisfoõnoa Jesús ato yoini  
(Mt. 8.19-22)*

<sup>57</sup> Fãĩ foaifono feronãfake fistichi Jesús yoini iskafakĩ: “Ifo, ãri mefe kapai nã mã kai ari ãri mefe kafãsaxiki,” faito, <sup>58</sup> Jesús kemani iskafakĩ: “Maxoteneroa kiniya, peyaforti naayafo.

Akka ĕkai pexeyama,” fani. <sup>59</sup> Nāskaxō Jesús anā feronāfake fetsa yoini: “Efe kafe,” faito, akka nāato kemani iskafakī: “Ifo, ea manayofe ĕfe epa naito ĕ maifayotanō,” faito, <sup>60</sup> Jesús kemani: “Askakima ea Ifofafe. Akka nā ea Ifofaafāfema yora nakē maifatirofo. Akka mī efe koofe ĕfe Epa Nios xanīfoōnoa ato yoifofāsafaxiki,” fani. <sup>61</sup> Akka anā fĕtsari yoini iskafakī: “Ifo, ĕ mefe kapai, akka ea manayofe ĕfe pexe ano kaxō ĕ ato yoisharayotanō,” faito, <sup>62</sup> Jesús kemani iskafakī: “Akka fĕtsa ea yonosharaxofiakī a apaoni keskara anā aki, askara yorakai itipinīsharama. Nāskakē ĕfe Epa Nios xanīfo ano katiroma,” ixō Jesús yoini.

## 10

### *Jesús setenta y dos yorafo nĕchini pexe rasi ano fotanōfo*

<sup>1</sup> Nāskata Jesús anā setenta y dos yorafo katonĕ. Nāskaxō rafe rasi faxō ato nĕchini nā pexe rasifo mĕra fanĕma mĕshti fotanōfo chipo akairi atoki kaxiki. <sup>2</sup> Nāskaxō ato yoini iskafakī: “Yora ichapafāfe ea nikayamafiaifono ichapatoma ea yonox-okani eōnoa ato yoikakī. Nāskakē mā Epa Nios kĕfikāfe a yonoxomisfo katonō eōnoa ato yoinōfo. <sup>3</sup> Akka mā fotakāfe, ĕ mato nĕchikai yora chakafo mĕra nāfāfe mato chakafapaikani. Oa chaxo poomānā pipaitiro keskafakī, matori askafapaikani eōnoax mā isharafiakē yora chakafāfe mato chakafapaikani. <sup>4</sup> Ato mĕra kakī māto forosa foyamakāfe, māto koriri foyamakāfe, māto sapatori foyamakāfe. Fokākī yorafo finōfāikakī nĕteax ato fe mekakakīma. <sup>5</sup> Pexe fetsa mĕra ikixō taefakī ato yoisharakāfe iskafakī: ‘Niospa mato sharafanō mā isharakōinō,’ ixō ato yoikāfe. <sup>6</sup> Akka nā pexe mĕra ika fetsa isharakōikē nā Niospa shara fakōini. Akka a mā ato yoiĕi keskara nikakaspaifono Niospa ato inimamaima. Nāskakē fenokani. Akka mā ato yoiĕi keskarakōinoax mā afaa fenoima. Epa Niospa mato sharafakōini. <sup>7</sup> Nāskata pexe rasi mĕra nokoax pexe fetsa mĕra oxayamakāfe. Nā mā nokoax anoxō mato pimayanā mato ayamanaifono pikāfe. Akka Niosxō yonomisfo nā afara yopaifo ato inātirofo. Nāskakē pexe fetsafo mĕra iki foa foayamakāfe. <sup>8</sup> Mā nokoaito pexe rasi anoxō mato ifiyanā mato pimaifono pikāfe. <sup>9</sup> Nānoxō a isinī ikaifo eōxō ato sharafakāfe, iskafakī yoiyanā: ‘Epa Nios xanīfo finakōi afe yorafo ĕkixikī mā chaimashta oi,’ ixō ato yoikāfe. <sup>10</sup> Akka pexe rasi ano mā mā nokoano anoxō mato ifikaspaifono, anoax tsekekāikī ato iskafakāfe: <sup>11</sup> ‘Nā māto pexe rasi anoax nōko tae ano mapo neano, nō taa taa akanō anā nōko neima. Nāskarifiakī mā noko nikakaspaino māto chaka nōko neima, māto nei. Akka shināsharakāfe Nios xanīfo māto Ifo ipai mā chaimashta matoki oi kiki,’ ixō ato

yoikāfe. <sup>12</sup> Akka ě mato yoi, nā omiskōiai nokoaitīa, na pexe rasi anoa ato omiskōimaniyoi nā Sodoma anoafo ani keskafakī finōmainīfofā ato omiskōimakī finakōiyoi,” ixō Jesús ato yoini.

*Pexe rasi anoxō Jesús nikakaspanifo  
(Mt. 11.20-24)*

<sup>13</sup> Anā Jesús ato yoini iskafakī: “¡Ooa! Corazin anoafāfe Betsaida anofo fe mā omiskōifinakōixii. Akka Tiro anoxō Sidón anoxori nā ě mato ōimana keskara, ě ato ōimanano āto chaka xatekaxō Epa Nios Ifofakeranafo. ‘¡Ooa! Nō afara chakafamiskī iskaratīa nō anā Nios Ifofai,’ iyanā rāfikaxō āto rapati chapo safekaxō chii māpo raish akeranafo fetsafāfe ato ōinōfo. <sup>14</sup> Akka Niospa Tiro anofo yafi Sidón anofofori ato omiskōimafiakī ato omiskōimasharaima, akka matoroko omiskōimakī finakōixii. <sup>15</sup> Akka, ¿nō Capernaúm anoax nō nai mēra kai Epa Nios ari ixō mā shināimē? Maa. Nā omiskōipakenakafo mēra ě mato potaxii,” ixō Jesús ato yoini.

<sup>16</sup> Nāskata Jesús anā aōxō tāpimisfo yoini: “Nā mato nikaifāfe, eari nikasharakani. Akka nā mato nikakaspaiāfe, eari nikakaspakani. Nā ea nikakaspaiāfe nā ea nīchiniri ěfe Epari nikakaspakani,” ixō Jesús ato yoini.

*Anā fenifo setenta y dos feronāfakefo Jesús ato nīchitano*

<sup>17</sup> Nā setenta y dos feronāfakefo anā fenifo, inimakōiyanā. Mā fēkaxō iskafakī yoinifo: “Ifo, niafaka chakafāfe noko nika mī aneōxō yorafo makinoa nō potaino,” faifono, <sup>18</sup> Jesús ato kemani: “Ĕje, mē ōia Satanás nai mēranoax pakeaito oa kana piishikai keskara. <sup>19</sup> Ĕ mato ěfe shara inā, ěfe sharaōnoax mā kaito rono feta nīfo mato chachiyamanō. Nāskaxō nā noko noikaspamis Satanás chaka mā finōkōinō, mato afeskafanōma. <sup>20</sup> Akka inimayamakāfe niafaka yōshi chaka potax. Akka mā nai mēraxō Epa Niospa mātō anefo āfe kirikaki keneaki, nā sharafinakōia,” ixō Jesús ato yoini.

*“Ekeki fekāfe ě mato shināmasharanō,” ixō Jesús ato yoini  
(Mt. 11.25-27)*

<sup>21</sup> Ato askafata, Jesús Apa Yōshi Sharaōnoax inimakōikī yoini iskafakī: “Epa Niosi, keyokōi nai mēranoafoya nono mai anofo mī āto Ifo. Mī sharafinakōia. Akka atirifāfe kirika kene tāpifikaxō mia Ifo fakaxoma. Iskafakī shināmisfo: ‘Tsoa fetsakai noko keskarama, nō tāpikōia,’ ixō shināmisfo. Akka nāfo mī meka mī ato tāpimani. Akka nā kirika kene tāpikaxoma mia Ifofaifono nāfo mī meka shara mī ato tāpimani, nā mī fichipaiyai keskafakī. Nāskakē ě mia aicho fai,” ixō yoini. <sup>22</sup> “Ĕfe Epa Niospa a tāpia keskara eari keyokōi tāpimani ěmāi āfe Fakekē. Akka tsōakai ea tāpiama, ěfe Epa fistichi ea tāpikōia. Nāskarifiakī tsōa ěfe Epa tāpiama, akka eres fisti ě tāpia.

Akka nã fetsafori ẽ ato tãpimanaino nãfãferi Epa Nios tãpitirofo,” ixõ Jesús ato yoini. <sup>23</sup> Anã aõxõ tãpimisfoki oxõ ato fisti yoini: “Nã mã õiai keskara õikanax fetsafori inimakõikani. <sup>24</sup> Akka ẽ mato yoi, Niospa meka yoimisfo feta xanĩfofofãfe nã ẽ mato yoiai keskara õipaifikãĩ õipaonifoma. Nã mã nikai keskarari nikapaifikãĩ nikapaonifoma.”

*Meka fetsafaxõ samãritanõ sharaõnoa Jesús ato yoini*

<sup>25</sup> Feronãfake fisti a Moisés yoikĩ kirika keneni keskara ato tãpimamis Jesús fe mekaikai kani. Jesús ea kemaimãkai ixõ yõkakai: “Ifo, ¿ẽ afeskatirofõ Nios fe ãpaxakĩ?” ixõ yõkaito, <sup>26</sup> Jesús kemani: “Akka, ¿a Moisés keneni ano anexõ mĩ õimismamẽ afaa ikamãkĩ?” faito, <sup>27</sup> a Moisés keneni tãpiato kemani iskafaki: “Nõko Ifo Nios noikõikãfe nõko õitifoyaxõ nõko yõshi sharafoyaxori nõko kerex sharafoyaxõ nõko mãpori shinãsharakõikãfe, askatari a mia chaima nikari noisharafe a mã mĩ noimeai keskafakĩ ixõ Moisés keneni,” faito, <sup>28</sup> Jesús kemani: “Mĩ ea kemasharakõia, mĩ askafai mĩ Nios fe ãpaxatiro,” ixõ Jesús yoini.

<sup>29</sup> Akka nã Moisés keneni ato tãpimamisto shinãni, mĩ isharakõimisra ea Jesús fanõra ixõ. Nãskaxõ Jesús yõkani: “Akka, ¿tsoamẽ ea chaima nika?” faito, <sup>30</sup> Jesús yoini: “Ë mia yoinõ mĩ tãpinõ. Feronãfake fisti Jerusalén anoax Jericó ari fãi kaito, yometsofãfe achikaxõ rapati fãanifo. Nãskakẽ seteketsakata nasharakẽma fai kesemẽ rãtafainifo. <sup>31</sup> Nãskano nã ato Nios kĩfixomisri nã fai fistichi kani. Akka kakĩ õia fai kesemẽ rakakẽ õifikĩ tanafainima. <sup>32</sup> Nãskano feronãfake fetsa levita arifi okĩ õia rakakẽ õini, nãatori kakĩ finõfaini. <sup>33</sup> Akka feronãfake fisti Samãria anoax nã fai fistichi akairi chipo kakĩ, mã fichixõ aõ noikõikĩ shinãkõini. <sup>34</sup> Nãskata akiki kaxõ, a ãfe tsefefe ano xini yafi uva ene osixõ aõ tereaki fetsani. Nãskaxõ taxta fakĩ fetsaxõ, ãfe kamayo kamaki tsaoinĩfofã iyoni, pexe mëraxõ kexeshiyoni. <sup>35</sup> Nãskata pena fetsa nã feronãfake samãritanõ ãfe kori exe rafe tsekaxõ nã pexe ifo kopifani iskafakĩ yoianã: ‘Na feronãfake ea kexexõfe. Mĩ kexesharakẽ ẽ mia anã kopifaiyoxikai,’ ixõ yoini. <sup>36</sup> Akka na feronãfake tresnoa ẽ mia yoipai. Akka, ¿fato aõ noikõinimẽ na feronãfake omiskõiai, a noko chaima nika nõ noitiro keskafakĩ?” ixõ yoikaito, <sup>37</sup> a Moisés keneni tãpiato kemani iskafakĩ: “Nã noikõiaito akiki kaxõ sharafani,” ixõ yoiaito, Jesús iskafani: “Mĩri ato noikĩ askafafe,” fani.

*Marta feta María pexe ano Jesús kani*

<sup>38</sup> Nãskata Jesús fãi kai pexe rasi mẽra nokoni, nãno kẽro ãfe ane Marta ika ini nãato ãfe pexe ano ifini. <sup>39</sup> Akka nã Marta ãfe chiko fistiya ini, ãfe ane María. Nã María Jesús nãmã tsaoni a Jesús yoiai keskara nikakõixikĩ. <sup>40</sup> Akka Martakai nikanima.

Pĩchani Jesús pimapaikĩ. Nãskakẽ Jesúski kaxõ yoini: “Ifo, ¿ea mĩa shinãimamẽ eres fisti ẽ pĩchai ẽfe chikokai efeta akima? Ea yoixõfe efeta anõ,” faito, <sup>41</sup> akka Jesús kemani: “Marta, mĩ fekaxtei afarafo shinã. <sup>42</sup> Akka nã sharafinakõia María nikakõisharai. Nãskakẽ ẽfe meka shara nikaito tsõa xĩtitiroma,” ixõ Jesús yoini.

## 11

*“Epa Nios kĩfikĩ iskafakãfe,” ixõ Jesús ato yoini  
(Mt. 6.9-15; 7.7-11)*

<sup>1</sup> Pena fetsa Jesús Apa Nios kĩfini. Mã kĩfikĩ xateano aõxõ tãpimis fistichi yõkani: “Ifo, afeskaxõ Epa Nios nõ kĩfitiromakĩ noko tãpimafe, Juan aõxõ tãpimisfo tãpimani keskafakĩ,” faito,

<sup>2</sup> Jesús yoini: “Akka mã kĩfikĩ iskafatiro:

Epa Niosi, mĩ fisti sharafinakõia. Keyokõichi mia Ifofanõfo mĩ ãto xanĩfo finakõia inõ ato ikisharakõipakexakĩ. <sup>3</sup> Nã pena tii a nõ piai noko inãfafãife nõ afaa yopayamanõ. <sup>4</sup> A noko chakafaifo nõ ato raefa keskafakĩ nõko chakari noko soaxõfe. Satanás noko afara chakafamapaifaito nokoki kematimafafe, ixõ kĩfikãfe,” Jesús ato fani.

<sup>5</sup> Nãskafata anã Jesús ato yoini: “Õitsai, fatora mã fetsa mã yamayano, mato yama yamenakẽ kafanaino mato pexe ano kaxõ mato yoikĩ iskafaino: ‘Yamã, tres faxõ ea yoa inãpe. <sup>6</sup> Mã ẽfe yama rama noi kiki chai inoax ẽfe pexe ano, ẽ afaayamaki afaa ẽ pimatirodaki,’ ixõ mato yõkaito, <sup>7</sup> kemakĩ mato pexe mëraxõ mã iskafatiroma: ‘Ea fekaxtefayamafe. Ẽfe pexe fepoti fetaoxikakĩ ẽfe fakefo fe ẽ oxaki. Finixõ ẽ mia afaa inãtirodaki,’ ixõ mã yoitirodaki. <sup>8</sup> Ẽ mato yoi, fininãkafã afara ãfe yama inãkaspafikĩ inãtiro fekaxtefaito nã fichipaiyai tii.

<sup>9</sup> “Nãskakẽ ẽ mato yoi, afara fichipaikĩ Epa Nios yõkakãfe mato inãi kiki. Fena fenakãkĩma manakãfe nã Epa Niospa mato inãitĩa. Nãskakẽ Epa Nios kĩfifafãikãfe mã kĩfaiito mato inãi kiki. <sup>10</sup> Akka nã yõkai Epa Niospa afara shara inãxii. Nãskarifiakĩ fẽtsa afara shara fenaito Epa Niospa fichimatiro. Nãskarifiakĩ fẽtsa Epa Nios kĩfaiito inãsharakõixii.

<sup>11</sup> “Akka, ¿fatora fẽtsa mã ãto epaxõ mãto fakefo mã rono ato inãtiro mẽ mato foe yõkaito? Maa. Mãkai mãto fake mã askafatiroma. <sup>12</sup> Mãto fake mato takaranã too yõkaito, ¿nifo mã inãtiro mẽ? Maa. Mãkai mãto fake mã askafatiroma. <sup>13</sup> Akka, mã chakafixõ mãto fakefo kexesharaxõ afara sharafo mã ato inãtiro. Nãskarifiakĩ Epa Nios nai mẽra ikato ãfe Yõshi Shara mato inãsharakõixii mã yõkaito,” Jesús ato fani.

*Yora fetsafãfe, “Jesús niafakaõxõ ato sharafaira,” fanifo  
(Mt. 12.22-30; Mr. 3.20-27)*



<sup>14</sup> Nāskata Jesús niafaka yōshi chaka potani feronāfake maki-noa mekamamismano. Mā a makinoax niafaka tsekeano, nā mekamisma mekainīkafani. Mā mekaito ōikani, “¡Kee! Ōikapo, mā mekai,” yorafo iki fetsenifo. <sup>15</sup> Akka atirifāfe yoinifo iskafakakī: “Na Jesús nā niafaka chakafāfe āto xanīfoōxō nā Beelzebúxō\* ato makinoax niafaka yōshi chakafo potai,” ikanax yoinānifo.

<sup>16</sup> Fetsafāferi chakafamapai kakī yoinifo iskafakakī: “Nios feta nai mēraxō afara fetsafo noko ōimafe,” faifono, <sup>17</sup> akka Jesús tāpini a shināifo keskara. Nāskaxō ato yoini: “Keyokōi mai tio anoax āa ranā retenākani keyotirofo. Nāskarifiāi pexe fisti mēra ikanax āa ranā noikaspa faatanākani paxkanātirofo anā ano fistikai tsoa itiroma. <sup>18</sup> Nāskarifiakī Satanás āfe yōshi chakafo potaxō anā afaa afeskafatiroma. Akka āfe yono keyoano anā āfe yōshi chaka afe itiroma. Nā ē mato yoi, akka mā yoikī iskafai: ‘Satanás yōshi chakaōxō niafaka potai,’ mā ea fai. <sup>19</sup> Akka askafiano, akka, ¿tsōa āfe shara mātō inafō ināno niafaka chakafo potamisfomē? Nāskakē atoōxō mā tāpitiro akka mā eōnoa shināsharamisma. Akka Niosxō mātō inafāfe niafaka potamisfo. <sup>20</sup> Akka ē niafaka yōshi chakafo potatiro Niospa Yōshi Sharaōxō ato makinoax. Nāskakē mā tāpitiro a Niospa atoki nīchiai mā nokoano. Nāskakē yorafāfe ea Ifofasharakōixikani.

<sup>21</sup> “Akka feronāfake mitsisipakōichi marayaxō āfe pexe kex-ekōiano tsōa āfe afaa fiatiroma. <sup>22</sup> Akka fetsa nā mitsisipa finakōia oxō achixō metexkere axō āfe afarafo fiaitokai anā afeskafatiroma. Nāskax paxkanāi fetsetirofo.

<sup>23</sup> “Akka fetsa efe rafekaspakī ea chakafai. Nāskakē nāfāfe fetsafo ea Ifofamakaspakani ato paxkanā fakani Epa Nios Ifofayamanōfo,” ixō Jesús ato yoini.

*Anā niafaka chaka yoraki nanetiro  
(Mt. 12.43-45)*

<sup>24</sup> Anā Jesús ato yoini iskafakī: “Ē mato yoinō mā tāpinō. Niafaka chaka feronāfake makinoax tsekeax tsōa istoma ano kafāsatiro anoxō tenepai. Akka anoxō tsoa fichiamax niafaka chakata anā shinātiro iskakī: ‘A ē anoax tsekeita ano anā kapa,’ ixō shinātiro. <sup>25</sup> Mā kaxō ōia nā feronāfake nā pexe xaki mēra mātsoema keskara sharakōi ōitiro itipinīsharakōia. <sup>26</sup> Nāskakē nā niafaka afe niafaka siete efetiro nā chakafinakōiafo, nāfo nā feronāfake mēra iki fetsenō. Nāskakē nā feronāfake chakafinakōia itiro a iyopaoni keskarama.”

*Niospa meka nikakani inimasharakōitirofo*

<sup>27</sup> Nāskata Jesús anori ato yoiaino kēro fistichi yorafā rasi mēraxō fāsikōi yoini iskafakī: “Mī efa mikiki inimakōi mia

\* 11:15 Satanás āfe ane fetsa Beelzebú.

fake fixō mĩ yome pishtakē mia chocho amayanāmāi mia pexkoax,” ixō fāsikōi yoiaito, <sup>28</sup> Jesús kemani: “Akka nā Niospa meka nikasharakōiai nāfi inimai finasharakōi kiki,” ato fani.

*Yora chakafāfe Jesús yōkanifo: “Tsōa atiroma keskara noko ispafe nō mia chanīmara fanō,” ixō yōkanifo*

*(Mt. 12.38-42; Mr. 8.12)*

<sup>29</sup> Yorafā rasi Jesúski feafono anā ato yoini iskafakī: “Na keyokōi yorafo chakakōifo. Tsōa atiroma keskafakī ē afara afeskarafanō ōipaikani ea Niospa nīchiamākī tāpixonakī. Akka a keskara ōipaifakī ōikanima. Nā Jonás ini keskara fisti ōixikani. <sup>30</sup> Akka Epa Niospa Jonás Nínive pexe rasi ano nīchini āfe meka shara ato tāpimatanō Epa Nios Ifofanōfo mā āto chaka xatekaxō. Nāskarifiakī Epa Niospa ea nīchia na yorafā rasi āfe meka shara ē ato tāpimanō. <sup>31</sup> ¿Mā shināimamē nā kēro xanīfo chai inoax kani Salomón tāpisharakōiano nikaikai? Akka mā kai ea nikamisma ē Salomón finōkōifiano nono efe ifiaxō. Akka nā Niospa yorafo keyokōi ichanāfaitīa ato yoipakexii fatofo afe ipanakafomakī, fatofori a omiskōipakenakafo mēra fokanimākai. Nāskaifono nā kēro xanīfo Salomón nikaikai chai inoax kanito mato yoikī iskafaxii: ‘Mā chakakōifo mā Jesús nikakaspamis,’ ixō mato yoixii. <sup>32</sup> ¿Mā shināimamē nā Nínive anoafāfe Jonás Niospa meka ato yoiaito anā Nios nikakōinifo? Akka mā kai ea nikamisma ē Jonás finōkōifiano nono efe ifiaxō. Akka nā Niospa yorafo keyokōi ichanāfaitīa ato yoipakexii fatofo afe ipanakafomākī, fatofori a omiskōipakenakafo mēra fokanimākai. Nāskaifono nā Nínive ano ipaonifāfe mā āto chaka xatekaxō mato yoikī iskafaxikani: ‘Mā chakakōifo mā Jesús nikakaspamis,’ ixō mato yoixikani,” Jesús ato fani.

*“Nōko ōiti sharakē nō shināsharakōitiro. Akka nōko ōiti chakakē nō shināsharatiroma,” ixō Jesús ato yoini*

*(Mt. 5.15; 6.22-23)*

<sup>33</sup> Anā Jesús ato yoini iskafakī: “Akka tsōa rāpari otaxō tsōa istoma tsāotiro. Askatari tsōa kesho fepotiro. Askatamaroko fomākīa tsāotirofo chai chaxasharakōikē a mēra ikiaifāfe ōinōfo. <sup>34</sup> Akka māto afama mīshtifo noikī mā shināfafāini. Akka nōko fero rafeta nā rāparinī chai chaxai keskarakē, nōko yora shara itiro. Nāskarifiāi nōko fero sharano nō xafakīa ōisharatiro. Nāskatari nō isharakōitiro. Akka nōko fero chakakē nō ōisharatiroma, fakishkōi itiro. <sup>35</sup> Akka ōisharakāfe mā Epa Nios shināi xafakīa ifiaxō āfe meka kachikiri faxō mā anā shināsharatiromaki, fakish keskara mā itiro. <sup>36</sup> Akka mā xafakīa isharakōiano, māto ōiti mēra oa fakish keskara itiro. Mā xafakīa shināsharakōitiro rāpari otaxō mato xafakīa chaxa keskara shara mā itiro,” Jesús ato fani.

*Jesús ato yōani fariseofoya a Moisés yoini keskara ato tāpimamisfo*

*(Mt. 23.1-36; Mr. 12.38-40; Lc. 20.45-47)*

<sup>37</sup> Mā Jesús ato yoikī xateano fariseo fistichi iyoni āfe pexe ano pikīxikī. Nāskakē Jesús āfe pexe mēra ikikainax mīsa ano tsaoni. <sup>38</sup> Akka nā fariseo shināni Jesús mechokomeyamaito āto xinifāfe yoipaonifo keskai. Akka taeyoi mechokomepaonifo, chipo pixikakī. <sup>39</sup> Akka nōko Ifāfe Jesús mā tāpixō yoini askara shināito: “Mā fariseofo mechokomesharafxō, akka mātō shinā mēraxō afara sharafo mā shināima. Yora fetsafo mā noima, afara fetsa fetsatapafo noikī mātō shinā mēraxō afara chakafo mato mēra fospikōia. <sup>40</sup> Akka mā anorima shināmis. ¿Mā tāpimamē tsōa nōko yora femākīa onifata, nōko ōiti mērari onifanimē? <sup>41</sup> Nāskaxō a yora afaamaisfo afara ato inākāfe. Mā askafakī yorafo mā ōimatiro mātō ōitinī mā Nios shinākī. Nāskax mā isharakōitiro, Nios matoki inimanō. Nāskaxō a Niospa mato amapaiyai keskara mā atiro.

<sup>42</sup> “¡Ooa, fariseofāfe! Mātō afarafo atiri mā Nios ināmis. Mātō fanafori atiri mā ināmis. Askafxō mā fetsafo mā ato shināmisma, askatari mā ato sharafamisma. Askatari mā Nios noikōiama. Akka nā mātō fanafō mā Nios ināmis keskafakī fetsafori noikōikāfe Niosri noikōiyanā.

<sup>43</sup> “¡Ooa, fariseofāfe! Ichanāti pexe anoax tsaoti sharakōi ano mā tsaopaimis noko ōisharanōfora ikax. Askatari yorafāfe noko finōkakī noko yoikōisharanōfora ikax.

<sup>44</sup> “¡Ooa! Māfi nā yora naa keskarafokī. Nā yora maia ano kaxō nō pisi xetetiroma keskarafō mā oke mēra pisifiano. Nāskarifiakī mātō ōiti chakafiano mato ōikakī sharara mato famisfo,” ixō fariseofo Jesús yoini.

<sup>45</sup> Jesús ato askafaito, a Moisés yoikī kirika keneni keskara ato tāpimamisto kemani iskafakī: “Maestro, anori mī yoikī nokori mī Ichayanā yoi,” faito, <sup>46</sup> akka Jesús yoini: “¡Ooa a Moisés yoikī kirika keneni keskara ato tāpimamisfāfe! Akka mātō kaiffo yoikī mā iskafamis: ‘Moisés keneni keskara nikakōikāfe,’ ixō mā ato yoifikī akka māri nikasharakōimisma. Askatamaroko a Moisés yoini keskara finōmainīfōfā mā ato yoimis mato nikakanax askanōfo. Nā mā ato yoiai keskara apaifikakī tsōa atiroma. Akka māri mā ato afaa axomisma.

<sup>47</sup> “¡Ooa! Māfi nā Niospa meka yoimisfo maiafo anoxō mā afarafo onifamiski ato shināxikī. Akka nāfo mātō xinifāfe retepaonifo. <sup>48</sup> Akka mā mā nikakī tāpikōia a mātō xinifāfe apaonifo keskara. Akka mātō xinifāfe ato retepaonifo. Akka a maiafo anoxō mā afarafo onifamis yorafāfe ōinōfo. Nāskarafo mā ato ōimani nā mātō xinifāfe apaonifo keskara, māri ato fe ixō mā ato feta askafakerana.

49 “Nāskakē Niospa atoōnoa tāpixon iskaſakī yoini: ‘A ēfe meka yoimisfo yafi eōxō yonomisfo fetsa ē ato nīchixii. Akka ranāri ato reteyanā ranāri ato omiskōimakani.’<sup>50-51</sup> Nāskakē na yorafo iskaratīa niyoafo Niospa ato omiskōimaxii atoōxō. Nā Niospa mai onifaki taefanitīa Abel sharaſiano afe ōchi reteni. Nāskatari xinia fetsa finōmata a Niospa meka yoimisfo ato retepaonifo. Nāskata chipokōi fakakī Zacarīasri retenifo. Nā Nios kīfiti pexefā chaimashtaxō koati mīsamāfā nakirafexō retenifo. Akka ē mato yoi na yorafo iskaratīa niyoafo Niospa ato omiskōimaxii atoōxō.

52 “iOoa a Moisés yoikī kirika keneni keskara ato tāpimamisfāfe! Niospa meka shara oa onea keskara mā faa yorafāfe tāpinōfoma. Mā kai Niospa meka tāpisharama. Nāskaxō fetsafāfe nikapaifiaifono mā ato nikatimafai. Nāskakē Niospa mato omiskōimakī finakōixii,” ixō Jesús ato yoini.

53 Ato Jesús askafakī yoiaino, a Moisés yoikī kirika keneni keskara ato tāpimamisfo fe fariseofo akiki ōitifishkiki finakōinifo. Nāskakaxō fe xatefayanā afara ichapakōi yōkanifo,<sup>54</sup> afara ato yoiaito nikakaxō yōaxikakī. Nāskakaxō yōkanifo xanīfofo yoipaikakī.

## 12

*Jesús ato yoikī iskaſani: “Ato fe parapaimis iyamakāfe,” ixō ato yoini*

*(Mt. 10.26-27)*

1 Nāskakē yorafā rasi akiki fekanax ichanānifo. Shoiki fetsenifo yora ichapakōi māiyakanax. Nāskakē Jesús aōxō tāpimisfo yoikī taefani, ato iskaſakī: “Ōisharakāfe fariseofāfe nafo sharafora noko fanōfora ikaxō mato anorima yoimpaikani kiki sharafoyamafikaxō. Nāfo fe paramitsapaimisfokī. Nāskakē māri ato keskara iyamakāfe.

2 “Akka nā afara one yoifimisfono Niospa ato xafakīa kāimaxoxii, afarari fomāpaimisfono nāfori Niospa ato xafakīa kāimaxoxii.

3 “Nāskakē a yora fetsafo fomāfai ares shināmisfo, nāfori Niospa xafakīa faxii. Nā pe xe kene mēraxō pe xe fe poti tserexō afara one yoimisfori, nāfori Niospa pe xe kachiori ato xafakīa kāimaxoxii keyokōichi tāpinōfo,” ixō Jesús ato yoini.

*Akka Nios fistiki nō mesetiro*

*(Mt. 10.26-31)*

4 Anā Jesús ato yoini iskaſakī: “Efe yorafāfe, ē mato yoi. Mato retepaifiaifono rateyamakāfe. Akka māto yora nafiaino māto fero mēsho naima kiki. <sup>5</sup> Akka ē mato yoi, tsoaki mā mesetiroma, atoki mesetamaroko Nios fistiki mesekāfe.

Nāato noko retexō nōko fero mēsho nā omiskōipakenakafo mēra potatiroki. Nāskakē akiki mesekāfe.

<sup>6</sup> “Akka ē mato yoi mā tāpinō. Na cinco peya mīshtifo minixō mā kori ichapa fiima. Āfe exe rafes mā fii. Askatamaroko Niospa keyokōi peya mīshtifo noi. Atokai shināmakinakama. Peya mīshtifo afaamafiakē Niospa ato noi. Keyokōi Niospa ato shināpakenaka. <sup>7</sup> Akka ē mato yoi, Epa Niospa mātō foo fisti rasi mato tāpikakōia. Nāskakē rateyamakāfe. Nā peya mīshtifo kexesharamis keskafakī matori Epa Niospa kexesharakī finakōiakī,” ixō Jesús ato yoini.

*Akka atiri yorafāfe, “Jesús ēfe Ifora,” ea famisfo yorafāfe ferotaifi. Akka atirifāferi, “Jesús ēfe Ifomara,” ea famisfo (Mt. 10.32-33; 12.32; 10.19-20)*

<sup>8</sup> Anā Jesús ato yoini iskafakī: “Akka ē mato yoi yorafāfe ferotaifi, ‘Jesús ēfe Ifora,’ ea faifono, ēri, ‘Nafo efe yorafo,’ ē ato faxii Epa Niospa āfe ājirifāfe ferotaifi. <sup>9</sup> Akka nā yorafāfe ferotaifi, ‘Jesús ēfe Ifomara,’ ea faifono, ēri Niospa āfe ājirifāfe ferotaifi, ‘Nafo efe yorafomara,’ ē ato faxii.

<sup>10</sup> “Akka Niospa Fake chakafakī mekafaifono Niospa ato chaka soaxotiro. Akka Epa Niospa āfe Yōshi Shara chakafakī mekafaifono Epa Niospa ato chaka soaxonakama.

<sup>11</sup> “Nāskata ichanāti pexefo ano mato iyoaifono, askayamakī xanīfofo ano mato iyoaifono, shināchakayamakāfe afeskaxō mā ato kemaimākai afaa mā ato faimākai. Epa Niospa mato shināmasharai kiki. <sup>12</sup> Akka a mato chakafakī mekafaifono Epa Niospa Yōshi Sharapa mato shināmasharaino mā ato kemasharai,” ixō Jesús ato yoini.

*Yora afama mīshti ichapayax mesekōixii*

<sup>13</sup> Nānoa fētsa Jesús yoini: “Ifo, ēfe ochi ea yoixōfe āfe afama mīshtifo ea paxkaxonō,” faito, <sup>14</sup> Jesús kemani: “Efe yorashta, tsōakai ea nīchima ē ato yoinō āto afama mīshti paxkanānōfo,” ixō yoita. <sup>15</sup> Nāskaxō anā yoini: “Mā kexemesharakāfe afarafō ato fichipaiyamakāfe, ayafixō finōmafai fipaiyamakāfe. Nā nō yopaifo shināyamakāfe, afama mīshtiōnoaxkai nō isharatiro-maki. Nōko afama mīshtifāfekai nōko ōiti noko inimamaxotiro-maki,” ixō Jesús ato yoini.

<sup>16</sup> Nāskaxō anā meka fetsafaxō ato yoini: “Feronāfake fetsa afama mīshti ichapaya ini. Āfe tare ano yonosharaxō afama mīshti fanano ichapakōi ini. <sup>17</sup> Nāskakē nā feronāfake afama mīshti ichapayato iskafakī shināni: ‘Ĵēfe yonofō ē afeskafaimē? Fanīkai ēfe yonofō ē fatiroma,’ ixō shināni. <sup>18</sup> Nāskaxō anā shināni: ‘Ēje, mē shinā ē afeskafaimākai. Nā ē ano afama mīshtifo famis ēfe pexe nasaxō anā efapafai, nāno ēfe fana fimifo mekexiki ēfe afama mīshtifoya. <sup>19</sup> Nāskaxō

ēfe shināmā ē shināi iskafakī: “Nē afama mīshti mekekōia nā xiniai tii rakakōikai pixiki, ayayanā inimasharakōiyanā.”

<sup>20</sup> “Nāskaito Niospa iskafakī yoini: ‘Mīkai afaa tāpiama. A na fakishi mī nai, akka, ɔna mī mekeafō tsoanā ikimē?’ fani. <sup>21</sup> Nāskariatiro a yora afama mīshti ichapaya ikatsaxakī Nios shinātama. Akka Niospa ōiaino anā afaya itiroma,” ato fani Jesús.

*“Epa Niospa āfe fakefo kexesharamis,” ixō Jesús ato yoini  
(Mt. 6.25-34)*

<sup>22</sup> Nāskata chipo Jesús aōxō tāpimisfo yoini iskafakī: “Ē anā mato yoisharanō. Ea nikasharakāfe. Shināchakayamakāfe. <sup>23</sup> Akka a nō piatokai noko imasharatiroma. Askatari a nō safeatori nōko yora noko imasharaxotiroma. <sup>24</sup> Shinākapo. Nā peyafāfekai afaa fanamisfoma, afarikai topimisfoma. Askatari afari mekemisfoma. Nāskafekē Epa Niospa ato pi-mamis. Akka Niospa nā peyafō finōmainīfōfā matoroko kexesharakōimis. <sup>25</sup> Nāskakē, ɔafeskakī mā shināchakaimē? A nō shināchakaitokai pena fisti noko anā nimatiroma. <sup>26</sup> Akka afaa shināyamakāfe. A nō shināitokai noko nimatiroma. Nāskakē afaa shināyamakāfe.

<sup>27</sup> “Akka shinākapo afeskax charofo foaikamakī. Na charofāfe yonokanima. Askatari xapo toro atirofoma rapati faxikakī. Nāskakē ē mato yoi, na charofo sharafiano xanīfo Salomón rapati sharafinakōi safefixō na charofo finōama. <sup>28</sup> Akka Niospa nafefo shara mīshti onifasharafiano nō sepakī xateano natiro. Nāskaxō nō koofatiro. Akka charofo finōmainīfōfā Niospa mato noikī mato rapati shara safematiro, mato kexesharaxō. Akka mā shināchakakī mā Nios chanīmara fasharaima. <sup>29</sup> Nāskakē shinākī iskafayamakāfe: ‘Ooa, ē afaa piimēti a ē piiai keyoano, askatari ē afaa ayaima,’ ixō shināyamakāfe. <sup>30</sup> Akka nā Nios Ifofaifāfema iskara shināmisofo. A piiai fisti shinākata, a safepaiyaifori shināmisofo. Akka Epa Niospa mā mato tāpia afarafo mā yopaito. <sup>31</sup> Nāskakē māroko Nios xanīfoōnoa shināfafāikāfe. Mā askaito afara shara Niospa mato ināxii kiki,” ixō Jesús ato yoini.

*“Epa Nios ika anoxō afara sharakōifo mato mekexona,” ixō Jesús ato yoini  
(Mt. 6.19-21)*

<sup>32</sup> Anā Jesús ato yoini iskafakī: “Efe yorafāfe, rateyamakāfe, Epa Niospa mato kexesharaikiki. Akka Epa Niospa āfe afama mīshti mato ināsharai inimakōikai mato ināsharai. <sup>33</sup> Māto afama mīshtifo minixō kori fiyokāfe. A yora afaamaisfo ato ināxikakī. Mā askaino Niospa nā ika anoxō mato afama

mīshti mekexona. Nāfokai keyonakama, tsoarikai yomet-sotiroma. Askatari nakaxari mato pīatiroma, Epa Niospamāi mato mekexonano.<sup>34</sup> Akka māto afama mīshti shinākī nā fisti mā shināi. Akka mā Nios fisti shinākī nā fistiri mā shinākōitiro māmāi noikōikī. Nāskax mā afe isharapakexatiro,” ixō Jesús ato yoini.

*Īkisi itipinīsharakāfe*

<sup>35</sup> Anā Jesús ato yoini iskafakī: “Nāskakē itipinīsharakāfe mātō rapati safesharakōita mātō rāpariri ōtasharakōikāfe.<sup>36</sup> Nā āfe ifo yonoxomisto āfe ifo manatiro keskakāfe pexe fetsa ari kaax, āfiyatani oaino. Mā nokoaito āfe fepoti koshi fepexoxiki, mā nokoxō fepoti ramātoshiaiino.<sup>37</sup> Nāskaifono āto ifo atoki inimasharakōitiro, manasharakōiaifono. Akka ē mato yoikōi āto ifāfe mīsa ano ato tsāotiro atoki inimayanā. Nāskaxō ato pimatiro atoki inimasharakōiyanā.<sup>38</sup> Nāskakē inimasharakōitirofo āto ifomāi manasharakōikanax, yame-nake kafanaino nokoaino, askayamai penanaki kafanaino nokoainori akiki inimasharakōitirofo.<sup>39</sup> Nāskakē mārī nā keskara tāpisharakāfe. Akka pexe ifāfe mā tāpixō afetiā yometso nokoimākai ixō āfe pexe itipinīshara fatiro, a mēra ikiax yometsoyamanō.<sup>40</sup> Nāskarifiāi mārī itipinīsharakāfe. Akka oimara ixō mā ea manayamaino ē matoki nokorisatani,” ixō Jesús ato yoini.

*Ina shara yafi ina chakaōnoa Jesús yoini*

*(Mt. 24.45-51)*

<sup>41</sup> Nāskaito Pedro yōkani: “Ifo, ¿noko fisti meka fetsafaxō mī yoiamē, askayamakī keyokōi mī noko yoiamē?” ixō Pedro yoikaito,<sup>42</sup> Jesús kemani: “Mā tāpinō ē mato yoi afe keskaramākī ina shara āfe xanīfāfe āfe afama mīshti kex-emaifaini mai fetsa ari kakī nā āfe pexe anoafō ato kexesharaxonō ato pimasharayanā, nā āfe xanīfo fena oyamaino.<sup>43</sup> Mā mai fetsa ari katani oxō ōitoshini a yonoxomisto mā yonoxosharakōiano. Nāskakē akiki inimakōini a yonoxomisri inimakōini māmāi yonoxosharakōiax.<sup>44</sup> Ē mato pāraima. Nāskaxō āfe xanīfāfe mā xanīfo imaxō āfe afama mīshti kex-exonō inātiro.<sup>45</sup> Akka nā āfe xanīfo yonoxomisto, ‘Ēfe xanīfo fena oimara,’ ixō shinākī, a yonoxomis fetsafo sēteketsani, kērofoya. Nā pāemisfo fe rafexō ato feta piyanā, askatari ato feta ayayanā, askatari ato fe pāeyanā.<sup>46</sup> Iskaratiā ēfe xanīfo oimara ixō manayamaino, nā pena fistichi āfe xanīfo nokofiaino mā nokoxō a yonoxomis omiskōimatiro, nā yora chakafo fomisfo mēra potakī.

<sup>47</sup> “Akka a yonoxomisto mā tāpia āfe ifāfe fichipaiyai keskara, nāskakē mā tāpifiāx itipinīsharama, nāskakēri nikasharaima, nāskakē āfe ifāfe omiskōimayanā

koshaketsatiro. <sup>48</sup> Akka a yonoxomis fĕtsa Āfe ifāfe yoia keskara tāpixoma afara chakafakē Āfe ifāfe omiskōimafiakī, omiskōimasharanima. Nāskarifiakī Niospa fetsa ichapa tāpimaxō ichapari yōkaxii. Iskafakī a ē mia yoia keskafakī, ĵfetsafo mā mī ato tāpimasharamē? ixō yōkaxii. Akka fetsafo tāpimasharamano Niospa omiskōimakī tāpimaxii,” ixō Jesús ato yoini.

*“Akka atirifāfe ea chanīmara faifono, atirifāferi ea chanīmara fakanima,” ixō Jesús ato yoini*

*(Mt. 10.34-36)*

<sup>49</sup> Anā Jesús ato yoini iskafakī: “Ē keyokōi maifo tii anoa āto chaka xatemanioi ē oa. Atirifāfe ea chanīmara faifono, fetsafāferi ea chanīmara fakanima. Nā chanīmara faamafo Niospa ato omiskōimaxii. Ēfe Epa Niospa ea mai ano yonomanai keskara iskaratīa keyokōi shara ikerana. <sup>50</sup> Akka matōnoax naxii ē oni. Akka ē nayoamax ē omiskōixii. Nāskakē ē omiskōifinakōita ē naxii. <sup>51</sup> Akka, ĵmā shināimē ē oni nono mai anoax eōnoax inimanōfo? Maa. Askarakaima. Akka ē mato yoī nā ea chanīmara faafāfe shara shināifono, akka a ea chanīmara faafāfema shara shinākanima, afara chaka shinākani. <sup>52</sup> Akka iskaratīa nā peXe fisti mēra cinco yorafo ikaxō anorisfo shinākanima, paxkanātirofo. Trespato nā rafe noikaspaino, nā rafetari nā tres noikaspairofo. <sup>53</sup> Apa Āfe fake noikaspaino Āfe fakefāferi Āfe apa noikaspairo. Āfe āfari Āfe fake xotofake noikaspaino Āfe fake xotofākeri Āfe afa noikaspairo. Askatari Āfe fāfa yōxafāfe Āfe fāfa naetafa noikaspaino Āfe fāfa naetafari Āfe fāfa yōxafo noikaspairo.”

*Nai foiskī nō tāpitiro*

*(Mt. 16.1-4; Mr. 8.11-13)*

<sup>54</sup> Nāskata Jesús yorafo yoini iskafakī: “Nai foiski nai kōi ōikī nai choshtakē oi feira mā faino oi itiro. <sup>55</sup> Akka nā xini oaima anorinoax nēfefā oaino, mā xiniaira mā fatiro. Chanīma, nāskatiro. <sup>56</sup> Akka māakai afaa tāpiama, mākōi mā kakamepaimis a mā yoiai keskara mā yoifkī mā chanīmara famisma. Mā nai foiskī mā yoimis oi feira mā famis. Askara tāpifixō māakai a Niospa mato yoiai keskara mā chanīmara fapaima. Iskaratīa afara afeskarafaitokai mā tāpiama,” ixō Jesús ato yoini.

*Fĕtsa mia chakafaito raefarisafafe*

*(Mt. 5.25-26)*

<sup>57</sup> Anā Jesús ato yoini iskafakī: “Akka, ĵafeskakī mā shara shināimamē a sharafinakōia? <sup>58</sup> Akka fĕtsa mato yoikī iskafaino: ‘Mī ea chakafaa. Ē xanīfo yoikai,’ ixō mato yoiaino,



xanĩfo ari kayoamano koshi raefakãfe. Akka mã askafayamaino nã xanĩfãfe ãfe sorarofoyoitiro nã sorarofãfe mato karaxa mẽra ikimanõfo. <sup>59</sup> Ë mato paraima. Fẽtsa mato karaxa mẽra ikimanano mã fena tseketiroma. Akka nã mã nimia kopifaĩa mã tseketiro,” ixõ Jesús ato yoini.

## 13

*Nõko chaka xatexõ nã Jesús noko amapaiyai keskara fisti nõ atiro*

<sup>1</sup> Nãskaino yorafo Jesúski fokaxõ yoinifo iskafakĩ: “¿Mã mĩ tãpiamẽ na Pilato yorafo ato retemanita Galilea anoafo yoinã retexaxõ Nios kĩfiti pexefã mẽraxõ Epa Nios inãifono ãto imifo yoinã nã imifoya osita?” ixõ yoinifo. <sup>2</sup> Askafaifãfe Jesús ato yoini iskafakĩ: “¿Mã shinãimẽ na Galilea anoax na feronãfakefo naitafo? ¿Yora chakakõifo keskarakanax ãto kaifo keskarakanaxma chakafinakõiax naitafo ixõ mã shinãimẽ? <sup>3</sup> Maa. Askarama. Akka mãri mãto chaka xateyamaxõ mã Nios Ifofayamax nã ikaifo keskai mãri mã narisatiro mato reteafono. <sup>4</sup> ¿Akka mã shinãimẽ nã feronãfake dieciochonoa atoki pexe keya ãfe ane Siloé atoki pakeano nanifo? ¿Mã shinãiraka: ‘Nãfo chakafinakõia nanifo Jerusalén anoafo keskaraxma,’ ixõ mã shinãimẽ? <sup>5</sup> Maa. Askarama. Chanĩma ã mato yoi. Akka mãto chaka mã xateyamaxõ mã Nios Ifofayamax, mãri mã omiskõipakenaka.”

*Meka fetsafaxõ higuera fimimaisnoa Jesús ato yoini*

<sup>6</sup> Jesús meka fetsafaxõ ato yoini iskafakĩ: “Feronãfake fistichi ãfe tarepa higuera fana ini. Nãskax õikai kani mã fimiyamãkĩ, kaxõ õini fimimais ini. <sup>7</sup> Nãskakẽ yoini a tare kexemis. ‘Õipo mã tres xinia afix na fana higuera fimiyama. Ë ãfe fimi fichipaiñaino fimiyama. Ichakanõ rerafe, ano fimi fetsa nõ fananõ,’ fani.

<sup>8</sup> “Akka ifãfe askafaino a tare kexexomisto kemani: ‘Ifo, na xinia fisti manayofe. Ë a nãmã orosharata ã mai tatsispo sharayonõ. <sup>9</sup> Õitsai, ã askafaano fimisharatirokĩ. Akka fimiyamaito mã ea reramanõ,’ ixõ a tare kexemisto yoini.”

*Jesús pena tenetitĩa kẽro petoko sharafani*

<sup>10</sup> Nãskano pena tenetitĩa ichanãti pexe mẽra kaxõ Jesús ato yoini. <sup>11</sup> Nãnori kẽro ini isinĩ itiani dieciocho xinia amis, niafaka chakata isinĩ imamis nã kẽro sharamisma ini petoko itiani. <sup>12</sup> Nãnoa Jesús õikĩ kenaxõ yoini iskafakĩ: “Yõxafoshta, mã mã shara isinĩ itiyaniakĩ,” fani.

<sup>13</sup> Nãskaxõ ãfe mẽkemã ramãino, koshikõi nã kẽro sharakõitani. Nãskaxõ, “Epa Nios fãsi sharakõi,” nã kẽromã fani. <sup>14</sup> Nãskakẽ Jesús pena tenetitĩa kẽro sharafaino, nã

ichanāti pexe anoa xanīfo òitifishkikī yorafo yoini iskafakī: “Seis nia nō yonotiro, akka na pena tenetiſiã tsõa yonotiroma. Nāskakē seis nia otafe sharaxiki, akka na pena tenetiſiã tsõa mato sharafatiroma,” xanīfāfe ato fani.

<sup>15</sup> Askafaito nōko Ifo Jesús kemani iskafakī: “Mā kai afaa tãpiana, mākōi mā kakapaimis, akka pena tenetiſiari mā yonomis mato yoinā inafō mā tēpemis ato faka ayamanikakī. <sup>16</sup> Akka na kēro Abraham āfe fena Satanás chakata finitima famis isinī imayanā dieciocho xinia amamis. ¿Akka afeskakī na pena tenetiſiã na kēro ē sharafatiromamē?” ixō Jesús ato yoini.

<sup>17</sup> Nikakani a Jesús noikaspamisfo rãfipainifo. Akka yorafo inimakōinifo nã kēro Jesús sharafaito òikani.

*Mostaza exeõnoa yoikī meka fetsafaxõ Jesús ato tãpimani  
(Mt. 13.31-32; Mr. 4.30-32)*

<sup>18</sup> Nāskata Jesús anã ato yoini iskafakī: “Afe keskaramakī Nios xanīfāfe noko ikinã ē mato yoinō. Nikakapo iskarakī: <sup>19</sup> Oa mostaza exe feronãfāke āfe tarepa fana keskarakī. Mā foaikax efapakōiax ifi tio itiro. Mā efepakōiano peyafāfe āfe pōyamã naa fatirofo. Nāskarifiakī mā taefakī fisti rasichi mā Epa Nios Ifofayotiro. Akka chipo ichapakōichi mā Epa Nios Ifofatiro,” ixō Jesús ato yoini.

*Meka fetsafaxõ pãa faraxika keskaraõnoa Jesús ato yoini  
(Mt. 13.33)*

<sup>20</sup> Afianã Jesús ato yoini: “Afe keskaramakī Nios xanīfāfe noko ikinã ē mato yoinō. <sup>21</sup> Nã kēromã pãa fakī lewaduraya harina osixõ kamosakano faraxitiro keskara. Nāskarifiakī nō òitiro. Yorafāfe Niospa meka āto shinã mēra naneafono nō òiamafiaino āto òiti fetsafakanax Nios keskara shara itirofo,” ixō Jesús ato yoini.

*Fepoti pishtaõnoa Jesús ato yoini  
(Mt. 7.13-14, 21-23)*

<sup>22</sup> Jerusalén ano fãi kakī, Jesús pexe rasi anoafō ato yoini a pexe rasi pasotai ikafo anoafori ato yoifoni. <sup>23</sup> Ato askafaito fistichi yōkani: “Ifo, ¿fisti rasi Niospa ato ifimē?” faito Jesús kemani,

<sup>24</sup> “Pexe fepoti atsokē ikipaifikani tsoa ikitiroma. Akka ē mato yoi yora ichapakōi ikipaifikani ikitirofo. Nāskarifiã i ēfe Epa ika ano ikipaifikani ikitirofoma. Nāskakē āfe meka tãpisharakāfe a mēra ikisharaxikakī. Akka yora ichapato ēfe Epa nikafikatsaxakakī, tsõa Ifofamax a ika ano ikipaifikani tsoa ikitiroma. <sup>25</sup> Nāskakē pexe ifo fininākafã āfe pexe fepoti fepotiro. Nāskakē mā pexe emãiti nīxō mā kenakī iskafatiro: ‘Ifo, noko fepoti fepexõfe,’ mā faino mato kemakī iskafatiro:

‘Ēkai mato òimisma mākai efe yorama tiiri fakiranoax mā oa,’ ixō mato yoitiro.

<sup>26</sup> “Nāskakē mā yoikī taefakī iskafaxii: ‘Nō mefeta pita nō mefeta ayamis, askatari mī noko yoiaito nō nikamis,’ mā faxii.

<sup>27</sup> “Mā askafaino mato kemakī iskafaxii: ‘Mē mato yoi ē mato òimisma fakiranoax mā oa. Emakinoax fotakāfe mā yora chakafo mato faxii.’ <sup>28</sup> Mato askafaino anoax mā oiayanā mā omiskōi fetsexii, Abrahamnō Isaacanō Jacobonō a Niospa meka yoimisfonō ato òi Nios xanīfo ika anoa ato òi. Nāskakē ato makinoa Niospa mato potaxii. <sup>29</sup> Akka yorafo nā mai ano keyokōi ikanax fetsa fetsatapafō fexikani Nios xanīfo anoxō afe tsaioxō pixikakī. <sup>30</sup> Nāskakē fetsafo iskaratīa Nios nikafikani afe rafeafoma, akka a chipo nikaifo Ifofakanax afo afe rafetirofo. Akka fetsafāfe nikakī taefafianixakakī Ifofakanamax a rama nikaifo keskarakanax afe ipaxatirofoma,” ixō Jesús ato yoini.

*Jesús Jerusalén anoafō ato shināi oiani*  
(Mt. 23.37-39)

<sup>31</sup> Nāskata fariseofo Jesús ano fēkaxō yoinifo iskafakakī: “Nonoax katāfe Herodes mia retepai kiki,” faifono,

<sup>32</sup> Jesús ato kemani: “Fokaxō ea Herodes yoixotakāfe aato ato pāramiski. Ē fena nonoax kaimakai. Iskaratīa na yorafo sharafayanā penamari ē ato makinoa niafaka chakafo ē ato pōtaikai. A isinī ikaifori ē ato sharafapaikai. Mā ato askafakī keyota nā ē kapaiyai ari ē kaikai. <sup>33</sup> Akka iskaratīa ē yonoyoi, pena fetsari ē yonoi, akka a Niospa meka ato yoimis Jerusalén makinoax na sharama.

<sup>34</sup> “iOoa Jerusalén ano ikafāfe! Māfi a Niospa meka yoimisfo mā ato retemiski. Askatari aōnoa āfe meka shara yoitanōfo Niospa mato ano nīchiafori mā ato tokorinī tsakakī retemis. Oa takaranā āfe fakefo āfe pei nāmā onetiro keskafakī ē mato kexepaifiaito mā ea nikakaspamis. Māfi ekeki omismakī ē mato īkipanā. <sup>35</sup> Akka òikapo, iskaratīa mato anā tsōa kexeima na mā imis anoa. Ē mato yoi anā mā ea òima. Akka nā ē anā oiaitīa mā ea òixii. Mā yoikī iskafaxii: ‘Nafi Niospa nokoki nīchia fāsi sharafinakōia Epa Niospa na shara fapanaka,’ ixō mā eōnoa yoixii,” ixō Jesús ato yoini.

## 14

*Jesús a isinī imis sharafani pōya rafe faraxita kishi raferi faraxikē*

<sup>1</sup> Nāskakē pena tenetitīa Jesús kani nā fariseo xanīfāfe āfe pexe anoxō pikai. Akka nānoxō fariseo fetsafāfe òinifo Jesús

afaa afeska faimākai nō ōinō ikaxō. <sup>2</sup> Nāskano nānori āfe ferotai fi feronāfake fisti isinī imis ini pōya rafeki faraxika ita kishi rafeki faraxika ini. <sup>3</sup> Nāskakē Jesús ato yōkani, a Moisés yoikī kirika keneni keskara ato tāpimamisfoya fariseofo: “¿Na pena tenetitīa a isinī ikaifo nō ato sharafatiromē, askayamakī nō ato sharafatiromaraka?” ixō ato yōkaito, <sup>4</sup> akka tsōa tooxanima. Nāskakē Jesús a isinī ikai mētsoinīfōfā sharafani. Nāskaxō yoini: “Mā mī sharaki, katāfe,” fani. <sup>5</sup> Nāskaxō fariseofo Jesús ato yoini iskafaki: “Akka, ¿fatora mā fētsa, mātō fake iyamāi mātō yoinā ina kini mēra pakeano mā koshi ifirisa fatiromamē pena tenetitīa?” ato faino, <sup>6</sup> tsōa kemanima.

*Feronāfake āfiyaino fista ayanā pitirofoōnoa Jesús ato yoini*

<sup>7</sup> Nāskata Jesús ōini mā fēkaxō tsaoti sharakōi fikanax mīsa ano tsaofaifāfe. Nāskaifāfe ōikī Jesús meka fetsafaxō ato yoini iskafakī: <sup>8</sup> “Akka fētsa fista ayanā kēro fikī mato kenano, tsaoti sharakōi ano tsaoyamakāfe. Akka mato keskarama nā feronāfake sharafinakōia pexe ifāfe kenano oax nā tsaoti sharakōi ano tsaotiroki. <sup>9</sup> Akka pexe ifāfe fetsa fe oxō mia yoikī iskafatiro: ‘Na feronāfake tsaoti ināfe,’ mia faino mī rāfikōiyānā kaax chikayakōi mī tsaotiro. <sup>10</sup> Akka askatamaroko mia fētsa kenamana kaax ori chikayakōi mī tsaoyotiro. Akka nā mia kenamanato mā oxō mia yoinō iskafakī: ‘Efe yorashta, na tsaoti sharakōi ano tsaoyofe,’ mia faino, nāskakē mī inimasharakōitiro yorafāfe ferotai fi a mefe mīsa ano tsaofafāfe mia ōiaifono. <sup>11</sup> Akka fatora fētsa ato finōpaiyaito a keskara Niospa ato nāmā nīchitiro anā afaa inōma. Akka a shināi is kai: ‘Ēkai afama, ē fetsafo finōpaima, ē ato keskarama,’ ixō shināito Niospa fetsafo finōmainīfōfā sharakōi nīchitiro,” ixō Jesús ato yoini.

<sup>12</sup> Ato askafata a ato pimairi Jesús yoini iskafakī: “Mī ato pimakī mī yamafoos ato pikīyamafe, mī extofoosri ato pikīyamafe, mī kaifoosri ato pikīyamafe, a mia chaima nikaforti kori ichapayaforti ato pikīyamafe. Akka afāferi kopikiri mia pikītirofo, nāskakē mā pimanāsharakōitiro. <sup>13</sup> Askatamaroko mī fista ayanā a yora afaamaisfoya a nipaikī ranāifo chātofoya a fēxofori ato pikīfe. <sup>14</sup> Nāskakē mī ato askafaax mī inimakōitiro. Akka afāfe mia kopifatirofoma, akka mī ato askafaito Niospa mia inimamasharaxii naax mī anā otokē,” ixō Jesús yoini.

*Meka fetsafaxō Jesús ato yoini feronāfāke mā a piai mā itipinīsharakōi faxō ato pimapaiyaiōnoa yoikī*  
(Mt. 22.1-10)

<sup>15</sup> Ato askafaito nikakī fētsa a mīsa ano tsaoto Jesús yoini iskafakī: “Ifo, inimasharayanā Epa Nios xanīfāfe keyokōi yorafo ikināi anoax ato fe ikanax fāsi inimasharakōitirofo,”

ixõ yoiaito, <sup>16</sup> Jesús yoini iskafakĩ: “Feronãfake fistichi a piã sharakõĩ faxõ yora ichapa kenamani afeta pii fenõfo. <sup>17</sup> A piã mã itipinĩshara faxõ a yonoxomis nĩchini ato yoitanõ iskafakĩ: ‘Kookãfe pixikakĩ. Mã ěfe xanĩfãfe itipinĩshara faki,’ ixõ ato yoitanõ.

<sup>18</sup> “Ato askafaino, akka keyokõichi yoinifo iskafakakĩ: ‘Nõ kayotiroma,’ ixõ yoinifo. Akka a yoikĩ taefato yoini iskafakĩ: ‘Ĕ rama mai fiaki ě õiyotanõ. Ĕ mia yoikai ě mefe kayotiro-maki,’ ixõ yoini. <sup>19</sup> Fĕtsari yoikĩ iskafani: ‘Ĕ rama diez faxõ fakka fiaki yonomaxii ě õiyonõ sharamakĩ. Nãskakĕ ě mefe kayoi kaimakai,’ ixõ yoini. <sup>20</sup> Fĕtsari yoikĩ iskafani: ‘Ĕ rama kĕro fia. Ĕ mefe katiroma,’ ixõ yoini.

<sup>21</sup> “Nãskakĕ a yonoxomisto oxõ nã yoiãfo keskafakĩ ģfe ifo yoini, a yonoxomisto yoiãito nikai õitifishkikõini. Nãskakĕ afianã a yonoxomis yoikĩ iskafani: ‘Nã mĩ kapaiyai ari kaxõ pexe rasi pasotainoa ato ifitãfe a afaamaisfoya, a nipaikĩ ranãifo ifita fĕxofori ifita chatofori ifita ato fatãfe,’ ixõ nĩchini.

<sup>22</sup> “Mã ģfe ifãfe nĩchia katani. Okĩ yoitoshini, iskafakĩ yoini: ‘Ifo, nã mã yoiã keskafakĩ mĕ ato yoitani. Akka mã fekani, mã fefiakanax mĩ pexe fospikanima,’ faito, <sup>23</sup> afianã ģfe ifãfe yoini iskafakĩ: ‘Na fãĩ kaxõ ato yoirisafafe a chaima ikafoya, nãskaxõ ato yoikĩ iskafafe: “Ĕfe ifãfe pexe mĕra ikikãfe afeta pixikakĩ,” ato fafe ěfe pexe fospikõinõfo. <sup>24</sup> Akka ě mato yoi nã yorafo taefakĩ ě ato pimapaiyoa ěfe pexe anoxõ efeta pinõfo akka afãfe anã efeta pinakafoma,’ ixõ pexe ifãfe yoitiro,” ixõ Jesús ato yoini.

*Jesús Ifofai omiskõifikani isharakõitirofo*  
(Mt. 10.37-38)

<sup>25</sup> Yora ichapafãfe Jesús chĩfaifono atokiri fesoakekafã ato yoini: <sup>26</sup> “Fĕtsa ea Ifofapaikĩ ea noikĩ finakõitiro. Ąfe apanõ ģfe afanõ ģfe ģfinõ ģfe fakefonõ ģfe extonõ ģfe chikonõ ato noifikĩ earoko noikĩ finakõiama, askatari ģa anoi noimeĩ ea noisharakõitama nãskakĕ a keskara eõxõ tãpimis itiroma. <sup>27</sup> Akka ě cruznoax mato nãxoxii. Nãskakĕ ea tsõa yoikĩ iskafaima: ‘Iskaratĩa ě Jesús Ifofai. Nãskakĕ ě nai omiskõifikĩ ě shinãchakaima,’ ixõ tsõa anori yoiaxma, nãskakĕ ěfe ina itirofoma.

<sup>28</sup> “Akka fatora fĕtsa mã pexe fapaikĩ ĩkisi mã shinãyotiromamĕ afe tii xepa peimãki õixiki aõ pexe fakĩ mitoxiki. <sup>29</sup> Akka mã pexe fapaikĩ mã xepa pei ichapama fixõ mã mitotiroma. Nãskakĕ nã õiaifãfe mato kaxemetsama fatirofo.

<sup>30</sup> “Mato iskafakĩ yoianã: ‘Kee, õikapo, na feronãfake pexe fafiakĩ akka pexe fakĩ mitoama.’ <sup>31</sup> Nãskarifiakĩ xanĩfo fĕtsa afe xanĩfo fetsa fe retenãpaikĩ shinãtiro a diez mil soraroyato a

veinte mil soraroya retetiromakī. <sup>32</sup> Nāskakē afe retenātiroma meekī, xanīfo fetsa oyoamano meka fomatiro iskafakī yoikī: ‘Nō retenāimakai, nō raenānō, ixō yoitiro. <sup>33</sup> Nāskarifiyai fatora mā fetsa mātō afarafo mā potayamax ēfe ina mā itiroma,” ixō Jesús ato yoini.

*Akka tashi sharakēma nō pitiroma*

*(Mt. 5.13; Mr. 9.50)*

<sup>34</sup> Anā Jesús ato yoini iskafakī: “Akka shinākāpo. Tashi sharakē nō tsopeitiro. Akka tashi sharayamakē nō tsopeitiro, paispa chakakē. <sup>35</sup> Askarakai tsōa fichipaima. Potatirofo. Nāskariakakī ea Ifofayamakakī ea tsōa Ifofasharakanima chakakōi ea fakani. Akka mā pachoyakī ea nikasharakāfe,” ixō Jesús ato yoini.

## 15

*Oveja fenoaōnoa Jesús meka fetsafaxō ato yoini*

*(Mt. 18.10-14)*

<sup>1</sup> Nāskakē nā xanīfo Roma kori fīxomisfo fe yora chakafo Jesúski fenifo āfe meka nikai fekani. <sup>2</sup> Nāskaifono fariseofo feta a Moisés yoikī kirika keneni keskara ato tāpimamisfāfe Jesús mekafakakī iskafakī yoinifo: “Ōikapo nato yora chakafo ifimis, askatari ato feta pimis,” ixō yoinifo.

<sup>3</sup> Askafaifono Jesús ato yoini meka fetsafaxō mā tāpioxō iskafakī: <sup>4</sup> “Fatora mā fetsa cien oveja inayano fisti ato makinoax fenoano, nā noventa y nueve mā anā fasifo mēra nīchitiro. Nāskaxō nā oveja fenoa fisti mā fenatiro shināmitsakōijyanā. Nā mā fichiatiā fetsafo kāimaxiki. <sup>5</sup> Mā fichiax āfe oveja fenoaki akiki inimakī tepapiinīfofā tepokomexō iyotiro. <sup>6</sup> Nāskax mā āfe pexe ano nokoxō āfe yamafoya a chaima nikafo yoitiro iskafakī: ‘A ēfe oveja fenoa. Mē fichiakī efe inimakāfe,’ ixō ato yoitiro. <sup>7</sup> Nāskakē ē mato yoi, nāskarifiyai inimakōikani nā nai mēra ikafo fētsa āfe chaka xatekōiano Jesús Ifofakī. Akka nā noventa y nueve yorafokiri nai mēranoax atokiri inimakani, afomāi isharakōipaonifono nono mai ano ikanax. Akka nā feronāfake chakafinakōi iyopaonixakī āfe chaka xatekōiano akiki inimaifinakōikani nai mēranoax,” ixō Jesús ato yoini.

*Meka fetsafaxō Jesús ato yoini kēromā āfe kori exe fenoa fīaoxō*

<sup>8</sup> Anā Jesús ato yoini iskafakī: “Nāskarifiyai kēro kori exe diezyaano fisti pakeano āfe pexe mēra rāpari otaxō fenakī ōisharata mātsoikī fichitiro. <sup>9</sup> Nāskata mā fichixō, āfe yamafoya a chaima ikafoya ato ichanāfatiro. Nāskaxō ato yoikī iskafatiro: ‘¡Aicho! A ēfe kori exe fenoa mē fichiaki efe inimakāfe,’ ixō ato

yoitiro. <sup>10</sup> Nāskarifiakī ē mato yoi. Nāskarifiakani Epa Niospa āfe ājirifo inimakani fētsa āfe chaka xateax a anā ipaoni keskara iyamaito ōikani,” ixō Jesús ato yoini.

*Meka fetsafaxō Jesús ato yoini apa āfe fake raefatiroōnoa yoikī*

<sup>11</sup> Jesús afianā ato yoini iskafakī: “Feronāfake fisti fake rafeya ini. <sup>12</sup> Akka nā chipokoto apa yoikī iskafani: ‘Epa, mā mī chaima nakī a mā ināxiai ikisi ea ināfe,’ fani. Nāskakē āpa āfe afama mīshti ato paxkaketsaxoni.

<sup>13</sup> “Nāskano pena fetsa āfe fake chipokoto āfe afama mīshti ato ināketsani kori fixiki. Mā kori fiax chaikōi kani mai fetsa ari. Nārixō āfe kori potakī mitoni mēxotaima pāekī kēro chota feromafo fe ikī. <sup>14</sup> Akka mā āfe kori potakī keyoano, nā mai anoaxri fonāikōinifo. Nāskakē nā mai anoax nā feronāfakeri chipo omiskōini afaamaisax. <sup>15</sup> Nāskakē kaxō nā mai anoa feronāfake fetsa yono yōkani yonoxopaikī, iskafakī yoini: ‘Ē mia yonoxopai,’ ixō yōkaito āfe tarepa nīchini āfe kochifo pimaxonō. <sup>16</sup> Nāskata fonāikōifikī a kochifāfe piāi maropei xaka pisharapaikōini tsōakairoko afaa pimaino.

<sup>17</sup> “Nāskakī iskafakī shināni: ‘Ēfe epa yonoxomisfāfe ēfe ēpa pexe anoxō pikī finasharakōiyanā texefamisfo. Akka ē nonoax fonāiki finakōi mē nairokomē,’ ixō shināta, <sup>18</sup> ‘Mia iskaratīa afianā ēfe ēpa pexe ari kapa. Mē kaxō iskafakī ēfe epa yoi kaikai, “Epa, ē Nios chakafata miari ē chakafamis. <sup>19</sup> Nāskakē iskaratīa ēfe fakera mā ea fatiroma. Mia yonoxomisfo keskara mī ea fatiro,” ’ ixō shināta, <sup>20</sup> āfe āpa pexe ari fāi kani. Nāskakē chai inoax oaito āfe āpa fichini shināmāi fakī. Nāskax akiki koshi farekekāi akiki nokota chishtoinīfofā kokoketsani.

<sup>21</sup> “Nāskafaito āfe fāke āfe apa yoikī iskafani: ‘Epa, ē Nios chakafata miari ē chakafamis. Nāskakē ēfe fakera mā fatiroma,’ ixō apa yoini.

<sup>22</sup> “Apa askafaino akka āfe āpa a yonoxomis yoini ato iskafakī: ‘Koshikōi rapati fenasharakōi fīxokāfe ēfe fake ea safemaxokāfe, askatari anīcho sharari safemakāfe, askatari sandalia sharari safemakāfe,’ ato fata, <sup>23</sup> ‘Fākka fake xoakōiari ifitakāfe retexikakī nō pinō fista ayanā. <sup>24</sup> Akka na ēfe fake mā nani keskara ikatsaxakī mā anā ekeki nokoaki. Mā fenofinino mā nō anā fichiaki,’ ixō akiki inimakī fista axoni.

<sup>25</sup> “Akka āfe fake iyoato āfe tare ano yonofai okī nikaferani pexe chaima nokoiyokī mōsika maneyanā mairaifono. <sup>26</sup> Nāskakē a yonoxomis fetsa kenaxō yōkani āfe āpa pexe anoxō afaa afeskafakanimākai. <sup>27</sup> Askafaito a yonoxomisto yoini: ‘Mā mī exto nokoā. Nāskakē āpa fakka fake xoa sharakōia ato retemana afeskaxma mī exto sharakōi nokoano,’ ixō yoini.

28 “Akka āfe ochi iyoa akiki ōitifishkiki finakōini. Nāskakē pexe mēra ikinima. Nāskaino āfe apa āfe pexe mēranoax kāinākfani āfe fake yoiyoi mā āfe fake chipoko nokoano, ‘Mā mī exto nokoaki. Nōko pexe mēra ikikofe,’ fani. 29 Āpa askafaino apa kemani iskafakī: ‘Shināpo epa, ē mia yonoxomis keskaraxō, ĵafe tii xinia ē mia yonoxomismē? Ea mīa yoiaitokai ē mia nikakaspamisma, akka eakai cabranā fakeshta mīa ināmisma retexō piyanā ēfe yamafo feta ē fista apanā. 30 Akka mī fake mā nokoa nā mī kori ināni kēro chotaferomafoki potakī keyotani. Nāskafikē mī fākka fake xoashara retexona,’ faito, 31 āpa kemani: ‘Anifoshta, mīkai ea potamisma, mī efe itiani. Akka na ēfenāfo mīnā, keyokōi iki kiki. 32 Akka iskaratīa nō fista aki mī extoki inimayanā. Akka mī exto naa keskara ikatsaxakī, mā anā ekeki nokoa afeskaxma, mā afetiāma fenofinino anā oaito nō fichia,’ ixō āpa āfe fake iyoa yoini,” ixō Jesús ato yoini.

## 16

*Meka fetsafaxō Jesús ato yoini, xanīfokōichi afe xanīfo yōaniōnoa yoikī*

1 Jesús afianā aōxō tāpimisfo yoikī iskafani: “Feronāfake fetsa afama mīshti ichapayato feronāfake fetsa afe xanīfo inō yoini. Nāskaxō nikani āfe afama mīshti āfe inapa kexesharaxokēma. 2 Nāskakē āfe xanīfāfe kenaxō yoikī iskafani: ‘ĵAfamē a mīōnoa ea mīa yoiāi? Akka a mī yonofaiōnoa ea yoife. Akka iskaratīa mī anā efe xanīfo ikima,’ ixō yoini.

3 “Askafaito nikakī āfe inapa shinākōini: ‘ĵĒ afeskaimē? Iskaratīa ēfe xanīfāfe ea anā yonomanima, mā ea potai. Ēkai afeskaxō anā yonotiroma kerexkai ē tarepanā. Nāskatari ē anā afaa yōkapaima ē rāfitiro. 4 ĵChoo! Mē shināi. Nā ēfe ifo nimiyāfo ē ato xekaxopakefofāni anā ichapa niminōfoma. Ē ato askafaino āto pexe anoxō ea ifinōfo ēfe ifāfe ea potano,’ ixō shināni.

5 “Nāskaxō fisti rasi ato kenapakeni afe tii āfe ifo nimi-afomāki ato yoixiki. Nā akiki kai taea yōkakī taefani: ‘ĵAfe tii mī ēfe xanīfo nimiamē?’ ixō yōikaito, 6 kemani iskafakī: ‘Ē nimia xini ene cien galon,’ faito, a xanīfo fētsa yoini iskafakī: ‘Nā mī nimia potaxō nono tsoaxō fetsa arisafafe cincuenta faxō kenefe,’ fani.

7 “Nāskaxō fetsari yōkani: ‘Akka mīri, ĵafe tii nimiamē?’ faito, atori yoini iskafakī: ‘Cien saco de trigo ē nimia,’ faito, ari yoini iskafakī: ‘A mī nimia potaxō fetsa arisafafe ochenta faxō kenefe,’ fani.

8 “Nāskakē a āfe ina chakapa āa shināxō akai keskara āfe xanīfāfe tāpikōini. Nāskakē yoini iskafakī: ‘Mī tāpikōia, nāskakē



fetsafāfe mia sharara fakani,' ixō yoini. Nāskarifiakī a Nios Ifofaafāfema tāpikī finakōiafo ato pāarakīki, āa shinākaxō. Akka a Nios Ifofaafō askarafoma, ato pāratirofoma. Chanīma fisti yoitirofo.

<sup>9</sup> “Ē mato yoinō, mā afama mīshti ichapayaxō a afaamaisfo ato inākāfe, mā ato askafakē mato yoisharanōfo. Nāskakē mā mā naxō mā anā kori yopatiroma mā Nios ari nokoaito nā mā kori ināmisfāfe mato yoikī iskafatirofo: ‘Aicho, mī noko shara famis. Iskaratīa nono Nios ano mī nofe ipanaka,’ ixō mato yoitirofo.

<sup>10</sup> “Akka nā isharakōixō afara ichapama kexesharakōimis nō tāpitiro afara ichapa kexesharakōitirokē. Akka nā isharaxoma afara ichapama kexesharamisma nāri nō tāpitiro afara ichapa kexesharakōitirokēma. <sup>11</sup> Akka nono mai anoxō āto afarafo kexesharayamaifono, Niospa ato afara sharakōifo ināpaifikī anā ato afaa inātiroma. <sup>12</sup> Nāskarifiakī Niospa mato afara shara ināpaifikī mato inātiroma.

<sup>13</sup> “Nāskarifiakī tsōa āfe ifo rafe yonoxosharatiroma. Akka fetsa noikaspata fetsa noisharatiro, nā yoiāi keskarakōi axotiro, akka a fētsa amapaiyai keskara axotiroma noikaspatiro. Nāskarifiakī mā kori fisti shinākī mā Nios shinātiroma. Nāskatari Epa Nios fisti shinākī mā kori noitiroma,” ixō Jesús ato yoini.

<sup>14</sup> Akka nā fariseofāfe kori noikōimisfono Jesús atoōnoa yoiāito nikakani akiki kaxemetsamanifo. <sup>15</sup> Askafaifono Jesús ato yoini: “Māfi nō sharafora imiski yorafāfe ferotaifi, akka mā askafiaito Epa Niospa mato tāpikōia. Akka yorafo mā pāratiro nafo sharafoki mā ato fatiro, mā ato askafaino Niospa mā mato tāpixō mato iskafai: ‘Nafo chakakōifo,’ ixō mato yoi,” Jesús ato fani.

*A Moisés yoini keskara sharafiano Nios xanīfāferoko ato finōkōinīfofana*

<sup>16</sup> Anā Jesús ato yoini iskafakī: “Moisés Niosxō yoini keskafakī, a Niospa meka yoimisfāferi yoinifo keskara Juan mato yoini. Nāskakē meka shara Nios xanīfoōnoa Juan ato yoini iskafakī: ‘Māto chaka xatekāfe anā a mā ipaoni keskara iyamakāfe Nios xanīfo ari ikixakakī.’

<sup>17</sup> “Akka chanīma, maife nai koshikōi keyotiro. Akka a Moisés yoini keskakōi, Niospa meka shara keyonakama,” ixō Jesús ato yoini.

*Feronāfake āfe āfi fe enēnātirofoōnoa Jesús ato yoini  
(Mt. 19.1-12; Mr. 10.1-12)*

<sup>18</sup> Anā Jesús ato yoini iskafakī: “Akka fētsa āfe āfi enexō, fetsa fia sharama. Chakafai. Askara sharama. Askatari mā

fenē enea feronāfake fētsa fīari sharama. Nāatori chakafai āfe āfimakōi fe ikī,” ixō Jesús ato yoini.

*Feronāfake fetsa afama mīshti ichapaya ikaino akka Lázaro afaamais ini*

<sup>19</sup> Nāskata afianā Jesús ato yoini iskafakī: “Feronāfake fetsa afama mīshti ichapaya ini, rapati sharakōi safea. Nāskaxō pena tii fista apaoni pisharakōiyanā inimakōikī. <sup>20-21</sup> Nānori feronāfake afaamais ini āfe ane Lázaro, yorafoki koyoi fetseax tsaoni a yora afama mīshti ichapayato āfe pexe fepoti ketokonō. Nā feronāfake afaamaisyato shināni iskafakī: ‘Na feronāfake afama mīshti ichapayato a piāi ea ināpainōra,’ ixō shināni. Nāskaino paxtafo akiki kaxō āfe koyoyo tāxoketsani.

<sup>22</sup> “Nāskax Lázaro nani. Mā nakē ājirifāfe āfe fero mēsho iyonifo Abraham fe ikikanō Nios xanīfo ano. Nāskatari a yora afama mīshti ichapayari nani. Nāri nakē maifanifo. <sup>23</sup> Nāskakē a yora afama mīshti ichapaya omiskōikōini chiifā mēranoax a yorafo naax fomisfo anoax. Nānoxō foisnīfofā chai inoa Abraham yafi Lázaro fichini. <sup>24</sup> Nāskakē fāsikōi Abraham kenani iskafaki: ‘jEpa Abraham, ea shināfe! Ea Lázaro nīchixōfe āfe mifi rechoko fāka mechanafaxō ea ana mechana faxoyonō. Nonoax ē omiskōi finakōikai na chiifā mēranoax,’ ixō yoiāito, <sup>25</sup> akka Abraham kemakī iskafani: ‘Ēfe fāke, ¿mī shināimamē nayoamax mī isharakōiyopaoni inimakōiyanā? Akka Lázaro isharakōipaonima. Omiskōipaoni. Nāskakē iskaratīa nonoax isharakōia inimasharakōiyanā, akka mī omiskōikōi. <sup>26</sup> Nāskakē afeskax mia ari tsoa katiroma, mīrikai afeskax noko ano otiroma. Na mafa kinīfā mesekōi afeskaxō nō finōtiroma. Māri afeskaxō arixori finōtiroma,’ ixō yoiāito, <sup>27</sup> nā afama mīshti ichapayato anā yoini iskafakī: ‘Ē mia yoi epa Abraham mī Lázaro nīchinō ēfe ēpa pexe ano <sup>28</sup> a ēfe exto cinco ikafo ano, anoxō Niospa meka ato yoinō nikakōinōfo akairi nono feyamanōfo nonoax omiskōi fetirofoki,’ ixō yoini.

<sup>29</sup> “Askafaito Abraham yoini iskafakī: ‘Afāfēfi mā kirika kene ōiafoki a Moisés feta a Niospa meka yoimisfāfe kenenifo. Nā ōikaxō tāpisharakōinōfo,’ ixō yoiāito, <sup>30</sup> a afama mīshti ichapayato anā kemani iskafakī: ‘Mē tāpia, Epa Abraham, akka a yora naax otoato atoki oxō ato yoiāito nikakōitirofo,’ ixō yoiāito, <sup>31</sup> anā Abraham yoini iskafakī: ‘Akka a Moisés feta Niospa meka yoimisfāfe yoinifo keskara nikakaspakaki. Nāskarifiakī tsōa nikatiroma a yora otoato ato yoiāito,’ ixō Abraham yoinino,” Jesús ato fani.

## 17

*Noko fētsa afara chakafamaino āfenā mesekōi itiro*  
(Mt. 18.6-7, 21-22; Mr. 9.42)

<sup>1</sup> Jesús aōxō tāpimisfo yoini iskafakī: “Mēxotaima a ea Ifofaafāfema yorafo afara chakafamapaimisfo. Akka fētsa fetsafo afara chakafamax omiskōiifinakōixii. <sup>2</sup> Akka ato askafamayoamano, tokiriya tenexti faxō fakafā nōafā mēra potatirofo a ea rama Ifofaifo ato afaa chakafamayamanō. Nāskara shara,” ato fani.

<sup>3</sup> “Kexemesharakāfe. Fētsa mia chakafaito yoisharafe anā mia chakafanōma. Mī yoiaito nikakī iskafakī shinānō: ‘Chanīmarokomē ea yoisharakōi ē anā askanōma,’ ixō shināito raefaxō yoisharafe. <sup>4</sup> Akka anā mia chakafakī mekafxō, ea raefafe ixō mēxotaima mia yoiri faito akiki ōitifishkikīma mī yoisharaxō mī raefatiro,” ixō Jesús yoini.

*Nō chanīmara faito Niospa noko afama mīshti faxotiro*

<sup>5</sup> Nāskata a aōnoa yoimisfāfe Jesús yoinifo iskafakakī: “Ifo, nō mia chanīmara fai finōmainīfofā noko yoisharafe nō mia chanīmara fakōinō,” ixō yoiifono, <sup>6</sup> Jesús ato kemani: “Akka mā ea nikakōixō na ifi efapa mā yoikī iskafakerana: ‘Mī tapofoya tsekekainax fakafā mēra pakeax anā foaife,’ mā faino anā foaitiro.”

*Āfe xanīfāfe yoiāi keskafakī a yonoxomisto axosharakōitiro*

<sup>7</sup> Nāskaxō anā ato Jesús yoini iskafakī: “Na meka fetsari ē mato yoinō nikakakī. Fatora fetsa mā inayaxō māto inapa māto tare ano yonoxotani oaino askayamakī fakkafo kexetani oaino akka, mā iskafakī yoitiromē: ‘Pexe mēra ikikerafe tsaōxō pixiki,’ mā fatiromē? <sup>8</sup> Maa, mā askafatiroma. Askafatamaroko mā yoitiro iskafakī: ‘Ea pīchaxōfe ē pinō, mā nafakē ea yoixii ē pikī taefanō, mī chipo axiki,’ ixō māto ina mā yoitiro. <sup>9</sup> Nāskatari āfe inapa nā āfe xanīfāfe yoiā keskafakī mā axosharakōiano iskafakī yoima: ‘Aicho, ea mīa axosharakōia,’ ixō yoima. <sup>10</sup> Nāskarifiakī māri a Niospa mato yoiā keskarakōi fakī iskafakī yoikāfe: ‘Nōkai afama, nōa shināxō nō afaa akima. Nōko Ifāfe noko yoiā keskafakī nō aki,’ ixō yoikāfe,” Jesús ato fani.

*Jesús diez feronāfake sharafani rashkishi fetseaito*

<sup>11</sup> Jerusalén ano fāi kakī Jesús Samāria yafi Galilea xat-sokama rafe finōfaini. <sup>12</sup> Nāskax Jesús pexe rasi pasotai nokoni. Nāno mā nokoano chai ixō diez feronāfake nā rashkishi fetseaiāfe ōikakī kenanifo fāsikōi. <sup>13</sup> Akka iskafakī fāsikōi yoinifo: “Jesús, Maestro, noko shināfe,” faifono, <sup>14</sup> Jesús ato ōikī ato yoini iskafakī: “A ato Nios kīfixomisfo ano fotakāfe, a

mã shara ato ispaxiki,” ato faino, mã fokani koshikōi a isinĩ ikaifo sharai fetsenifo.

<sup>15</sup> Akka fistichi ãfe yora sharakōi meekĩ anã akiki oxō fãsikōi yoikĩ iskafani: “¡Aicho, fãsi Nios sharakōi! Mã ea sharakōi faki,” ixō yoini. <sup>16</sup> Nãskafata Jesús ferotaifi ratokonō mai chachipakefofã maikiri fepopakekafã. “¡Aicho Jesús, mã ea sharafaa! ¡Mĩ fãsi sharakōi!” ixō yoini. Akka nã feronãfake Samãria anoa ini.

<sup>17</sup> Askafaito Jesús yoini: “¿Akka diez feronãfake ikafomamẽ a ã ato sharafa isinĩ ikaifono? ¿Akka fakimẽ ranãri a nueve feronãfake? <sup>18</sup> ¿Akka na feronãfake fisti efe yora yamafixō ekeki oxō Nios aicho faiyoamẽ?” ixō Jesús yoini. <sup>19</sup> Nãskaxō nã feronãfake yoini iskafakĩ: “Fininĩkafãfe kãtaxiki. Mĩ ea chanĩmara fakōinax mã mĩ sharaki,” ixō Jesús yoini.

*Nios xanĩfãfe keyokōi yorafo ãkinãino afe keskara iximẽ*

<sup>20</sup> Nãskano fariseofãfe Jesús yōkanifo iskafakakĩ: “¿Afetĩa nono mai anoax yorafãfe ato xanĩfo iximẽ Nios?” ixō yōkaifono, Jesús ato kemani: “Nios xanĩfãfe ato ãkinãino nõ õitiro. <sup>21</sup> Tsōakai yoima iskafakĩ: ‘Nakĩa, õikapo,’ askatari, ‘Oa onokĩa, õikapo,’ mato faima. Akka Nios xanĩfo mato mẽra ixō mã mato shinãmani nõ õiyamafiaino,” ixō ato yoini.

<sup>22</sup> Nãskaxō ãfe inãfo yoini iskafakĩ: “Ë samama mato maki-noax kai. Mẽ mato makinoax kaano anã mã ea õima. Ea õipaifikĩ mã ea shinãkõixii iskayanã, ‘Nõko Ifo nofe imis keskara nõ õipaikōi,’ ixō mã ea yoifikĩ a keskara mã anã õima. <sup>23</sup> Akka mato fetsafãfe pãrakĩ iskafakani: ‘Nakĩa Cristo,’ mato fata, ‘Oa onokĩa,’ mato faifãfe, akka ato nikayamakãfe ãa mato pãrakani kiki. <sup>24</sup> Akka ã nai mẽranoax oi oa kana peiki fafetanaito nõ õitiro keskara, nãskarifiã ã õaito mã ea õixii ã chaxaferanaito. <sup>25</sup> Akka ã taei omiskõifinayoxii yorafãfe ea õikaspaifono nã ea õikaspaifotĩa. <sup>26</sup> Akka nã Noé niyoano ini keskaĩ nãskarifiãxii ã anã oaino. <sup>27</sup> Akka yorafo pikãta ayakãta fãanãkãta ikaifono, mã Noé kanõanãfã mẽra ikiano faka faipafãino, keyoi ãsai mitokomenifo. Nãskarifiãxii ã oaino ea shinãtama afara chaka shinãifono.

<sup>28</sup> “Nãskarifiãni nã feronãfake Lot niyoano, yorafo pikãta, ayakãta, afarafo fikãta, afarafo ato minikãta ãto tarepa afarafo fanakãta pexe fakãta ikaifono, <sup>29</sup> akka Lot mã Sodoma anoax tsekeano, oa oi ikai keskara nai mẽranoax atoki chiifã pakeaino keyokōi koofi mitokomenifo.

<sup>30</sup> “Nãskarifiãxii ã oaino, ea shinãkãtama nã ipaiyai keskara shinãifono. <sup>31</sup> Nãskarifiãkĩ ã oaino fetsa ãfe pexe fomãkĩa tsaoxō anã ãfe afara fipai ãfe pexe mẽra ikitiroma ãfe afara fixiki. Askatamaroko ichotiro. Nãskarifiãni a ãfe tarepa yonofai anã ãfe pexe ano katiroma ãfe afara fixiki. <sup>32</sup> Akka

nā Lot āfe āfiōnoa shinākāfe. Nā kēromā āfe afarafo shināi ifiakēkafā ōipai narisatani keskai māri askatiroki. Askayamakāfe. <sup>33</sup> Akka fētsa shinākī iskafai: ‘Ē Jesús Ifofaito ea omiskōimakaniraiti,’ ixō shinākī ēfe meka kachikiri fai. Nā keskara yora naax omiskōipakenaka. Akka aa eōnoax omiskōiai naax efe isharakōipakenaka.

<sup>34</sup> “Akka ē mato yoi, yora rafe nā fakishi mishkitiro fistichi oxakanax ē oaino fetsa efe kaino fetsa nēteti. <sup>35</sup> Nāskarifiāi kēro rafeta xiki renekani. Fetsa ea ari kai yamarisatanaino akka fetsa nēteti nā omiskōipakenakafo mēra kaxiki. <sup>36</sup> Nāskatari feronāfake rafeta āto tare ano yonokani, fetsa ea ari kai yamarisatanaino, fetsa nēteti nā omiskōipakenakafo mēra kaxiki,” ixō ato yoiaino, <sup>37</sup> yōkanifo iskafakakī: “Ifo, ¿faki fokanimē?” ixō yōkaifono ato kemani iskafakī: “Mā tāpitiro a afara naa ano ishpifo fotofaifāfe. Nāskarifiāxii ē fotofaino a ea Ifofamisfo ekeki ferisaxakani,” ixō Jesús ato yoini.

## 18

*Meka fetsafaxō kēro ifomafaōnoa yafi xanīfo Jesús ato yoini*

<sup>1</sup> Jesús anā ato yoini meka fetsafaxō ato tāpimaxiki, Epa Nios mēxotaima kīfikani xokenāyamanōfo. <sup>2</sup> Ato yoikī iskafani: “Nā pexefā rasi anoxō xanīfāfe Nios shinātama yorafori noimisma. <sup>3</sup> Nā pexefā rasi anori kēro ifomafa ika ini. Nāskakē nā kēro ifomafa mēxotaima a xanīfoki kapaoni yoikī iskafaikai: ‘A ea noikaspamisto ea chakafai kiki ea yoixōfe ea anā chakafayamanō,’ ixō yoifiaito, <sup>4</sup> nā xanīfāfe nikakaspayanā tooxanima. Nā kēro ifomafa fekaxtefaiaino akka nāskaxō xanīfāfe shināni iskakī: ‘Ē Nios shināima, yorafori ē noima. <sup>5</sup> Akka na kēro ifomāfa ea fekaxtefai kiki, ē yoisharaxonō anā a chakafaito fekaxtefayamanō, mē yoixonano anā ea fekaxtefaima kiki,’ ixō xanīfāfe yoini.”

<sup>6</sup> Iskafakī Jesús ato yoini: “A xanīfo chakapa yoini keskara nikasharakāfe. Chakafixō nā kēro ifomafa fekaxtefaito axosharaniki. <sup>7</sup> Akka Nioskai nā xanīfo chaka keskarama. Akka, ¿Niospari āfe yorafo ato afara axosharatiromamē? Noko nikaikai fekaxtetiroma penachāi yafi fakishchāi kīfiaifono ato nikakaspatiroma. ¿Askayamakī, ‘Ea manayokāfe,’ ixō ato yoitromē? <sup>8</sup> Maa. Akka ē mato yoi mā manamiskē koshi mato afara shara faxoxii. Akka a mato chakafamisfo ē ato omiskōimaxii. Akka, ¿ēfe Epa ariax anā ē nāmā fotoaitia ea chanīmara faifāfe ē ōitoshiximē?” ixō Jesús ato yoini.

*Meka fetsafaxō fariseofoya a ato kori fīamisfo Jesús ato yoini*

<sup>9</sup> Jesús meka fetsafaxō ato yoini ato tāpimaxiki. “Ēfi sharaki, ēkai afaa chakafamisma yora fetsafokai ea keskarama,” ixō shināmisfoōnoa Jesús ato yoini iskafakī: <sup>10</sup> “Feronāfake rafe

fonifo Nios kīfiti pexefā mēra anoxō Nios kīfi fokani. Fetsa fariseo ini. Fetsari āfe xanīfo kori fixomis ini. <sup>11</sup> Nā fariseo arese nīxō kīfikī iskafani: ‘Epa Niosi, ē fetsafo keskarama. Akka fetsafo yometsomisfo, chakakōifo, askatari ato āfima chotamisfo. Akka ēkai nā āfe xanīfo kori fīxomis keskarama. Nāskakē ē mia aicho fai. <sup>12</sup> Na semānā tiifi ē foni tenekī rafefa fafāfāini mia shinākī. Akka nā ē fiairi ē mia paxkaxō fafāini,’ ixō fariseo Epa Nios kīfini. <sup>13</sup> Akka a āfe xanīfo kori fīxomis ori chai nini. Nāri chai nīxokai nai foispainima. Askatamaroko shināmitsayanā Epa Nios yoini iskafakī: ‘¡Ooa! Epa Niospa, ē mia chakafamiski. Eō noikī ea sharafafe ē chakakī,’ fani. <sup>14</sup> Ē mato yoi nā āfe xanīfo kori fixomis āfe pexe ano oni mā Niospa āfe chaka soaxonano. Akka nā fariseo āfe chaka soaxonima. Nāskarifiāi fetsa āa anoi yoimesharai: ‘Ē sharara,’ imiskē chipo Niospa afaa imatiroma. Akka fētsa shinākī iskafai: ‘Ēfi afarafo chakafamiski,’ ixō shināito nā keskara yora Niospa chaka soaxotiro afe ĩpaxanō,” ixō Jesús ato yoini.

*Jesús fakefo chishtoxō ato māmāyanā ato Epa Nios kīfixopakeni*

*(Mt. 19.13-15; Mr. 10.13-16)*

<sup>15-16</sup> Nāskatari yorafāfe ato fake mīshti Jesúski efenifo ato māmāpakeyanā ato Epa Nios kīfixonō. Akka nā Jesúsxō tāpimisfāfe ato iskafanīfo: “Māto fakefo efexō nōko Ifo fekaxte-fayamakāfe,” ato fanifo. Ato askafaifono Jesús ato yoini: “Ato enekāfe na fakefo ekeki fenōfo. Ato nētefayamakāfe. Ēfe Epa Nios xanīfo ika ari na fakefo keskarakōifoki,” ixō ato yoini. <sup>17</sup> “Ē mato pāraima, mā Epa Nios xanīfo nikayamax na fakefāfe ea nikaifo keskafakī, Epa Nios ika ari mā katiroma,” ixō Jesús ato yoini.

*Feronāfake naetapa kori ichapayax Jesús fe mekani*

*(Mt. 19.16-30; Mr. 10.17-31)*

<sup>18</sup> Xanīfo fetsa Jesús ano oxō yōkani iskafakī: “Maestro, mī sharaki, ea yoife ē afaa afeska fatiromāki Nios xanīfo fe ipaxaki,” ixō yōkaito, <sup>19</sup> Jesús kemani: “¿Afeskakī sharara mī ea faimē? Akka Nios fisti shara. <sup>20</sup> A Niospa yoini keskara mā mī tāpia. Iskafakī yoini: ‘Mī āfima chotayamafe; askatari yora reteyamafe; askatari yometsoyamafe; askatari chanīyamafe mā kaxpa ato pārayamakāfe. Nāskaxō māto epa yafi māto efa nikasharakāfe,’ ” ixō yoiaito, <sup>21</sup> nā feronāfake yoini iskafakī: “Nā mīa yoiaifo keskara mē nikamis naetapaxō,” faito, <sup>22</sup> askafakī yoiaito nikakī Jesús kemani iskafakī: “Nāno afara fetsa fisti mī tāpiama. Akka mī afarafo minixō kori fixō nā afaamaisfo ato minife. Nāskax nai mērañoax mī afama mīshtifoya ixikai. Nāskafata efe koofe,” ixō yoiaino, <sup>23</sup> akka

nã feronãfake Jesús askafaito nikai, shinãchakakõi tooxinima, afama mĩshti ichapayax.

<sup>24</sup> Shinãmitsaito õikĩ Jesús ato yoini: “A yora afama mĩshti ichapaya Nios xanĩfo ano katiroma, fekax pishta. <sup>25</sup> Mãraki camello akoja kini mẽra ikipaifi ikitiro fekaxkõi efapamãiax. Nãskarari yora afama mĩshti ichapayato Nios Ifofapai fekaxkõi ãfe afama mĩshtifomãi potakaspakĩ,” ixõ Jesús ato yoini.

<sup>26</sup> Ato askafaito nikakakĩ a aõxõ tãpimisfãfe tãpipainifo. “¡Keel ¿Afeskax nõ Nios fe ipaxatiromẽ?” ikanax yoinãnifo. <sup>27</sup> Jesús ato kemani: “Akka yorafokai ãa ifimetiroma, Nios fistichi yorafo ifitiro. Niospa afama mĩshti fatiro. Tsõakai afama mĩshti fatiroma, Nios fistichi atiro,” ato faito, <sup>28</sup> Pedro yoini: “Ifo, nõ mefe okĩ nõko afama mĩshtifo nõ õiferani nõ mefe oni,” faito, <sup>29</sup> Jesús kemani iskafakĩ: “Ë mato yoikõi, fẽtsa Nios xanĩfoõxõ ato yoikakĩ ãfe pexe õifaita ãfe apa yafi ãfe afa õifaita ãfe onefetsafo õifaita ãfe ãfi õifaita ãfe fakefo õifaita ixõ, <sup>30</sup> nãato afama mĩshtifo fixii. Nãskatari mã naax Nios fe ipanaka,” ixõ Jesús ato yoini.

*Anã Jesús ato yoini: “Mã chaima ea retekanira,” ixõ  
(Mt. 20.17-19; Mr. 10.32-34)*

<sup>31</sup> Jesús aõxõ tãpimis tiis doce kenani. Nãskaxõ ato yoini iskafakĩ: “Iskaratĩa mã nõ Jerusalén ano kaikai. Nãnoax nã Niospa meka yoimisfãfe eõnoa yoikĩ kenenifo keskakõi kaikai ã. <sup>32</sup> Nãnoxõ yora fetsafo ea ato achimakani kiki. Nãfãfe ea kaxemetsama fayanaã ea ãchakani kiki ekeki kemo mechoketsayanã. <sup>33</sup> Ea koshaketsakata ea retekani. Akka ea askafafiaifono tres nia oxata ã otoxii,” ixõ ato yoini.

<sup>34</sup> Ato askafakĩ yoiaitokai tsõa tãpinima. Mã nikafikakĩ tsõa tãpisharanima, Niospa Yõshi Sharapa ato shinãmayoamano.

*Jesús yora fisti fẽxokõikẽ Jericó anoxõ sharafani  
(Mt. 20.29-34; Mr. 10.46-52)*

<sup>35</sup> Mã chaima Jesús Jericó ano nokoi kakĩ, yora fẽxo fai ketokonõ tsaokẽ fichini, anoxõ ato kori yõkaito. <sup>36</sup> Nãnoxõ nã fẽxo fai ketokonõ tsaõxõ nikakĩ yorafã rasi fofãnaiãfãfe ato yõkani: “¿Afaa afeskafakanimẽ?” ato faito, <sup>37</sup> yoinifo: “Jesús Nazarete anoa kafani,” fanifo. <sup>38</sup> Askafaifono nikai fãsikõi kenani iskai: “Jesús mĩfi David fenakĩ, ea shinãfe,” fani.

<sup>39</sup> Askafaito nã rekẽ foaifãfe iskafanifo: “Nõko Ifo fekax-  
tefayamafe,” fãfiaifono, akka nã fãsikõi kenai iskani: “¡David fenapa, eõ noifel!” faito nikai, <sup>40</sup> Jesús nẽteakekafã ato yoini iskafakĩ: “Ea ifixotakãfe oaikai kenariai,” ato faito ifixotani-  
ifo. Mã oano Jesús yõkani iskafakĩ: <sup>41</sup> “¿Ë mia afeskafatiromẽ?”  
faito, nã fẽxo kemani iskafaki: “Ifo, ã õisharapai afeskaxõ ã õisharatiroma,” faito, <sup>42</sup> Jesús yoini iskafaki: “Ea mã chaniãmara faax mã mã shara. Nãskaxõ mã mã õisharai,” fani.

<sup>43</sup> Nāskafaino nā fēxo òisharakòitani. Nāskax Jesús fe kakī, “Aicho mā ea Niospa sharafaki, Nios fāsi sharakòikī,” ikax afe kaino yorafāfe òikakī akairi, “Nios fāsi sharakòi,” ikanax akiki inimakòinifo.

## 19

### *Jesús fe Zaqueo*

<sup>1-2</sup> Nāskano Jesús Jericó pe xe rasi ano finòfaini. Akka nāno feronāfake afama mīshti ichapaya ika ini, āfe ane Zaqueo. A ato kori fixomisfāfe āfe xanīfo ini. Nāatori āfe xanīfo kori fixomis ini. <sup>3</sup> Nāato Jesús òipaifiki òinima, yora ichapafāfemāi nakifafono Zaqueomāi mīsto pishtamāi axò. <sup>4</sup> Nāskakē fāi rekē ichoni Jesús kaito òixiki. Nāskata ĭfiya inani nā Jesús kafanai anori. <sup>5</sup> Jesús anori finòfāikī fomākīa naiskī fichixò yoini iskafaki: “Zaqueo, fotopakekafāfe. Iskaratīa mī pe xe ano ē nēteyoikaikai,” faino, <sup>6</sup> koshikòi Zaqueo fotopakekafāni. Nāskakē akiki inimasharakòiyānā āfe pe xe ari iyoni.

<sup>7</sup> Nāskaito òikakī yora rasichi iskafakī yoinifo: “ĭKee, òikapo! ĭAfes kai na yora chakapa pe xe ano Jesús iki kaimē?” fanifo. <sup>8</sup> Askafafiaifono Zaqueo finināka fā Jesús yoini iskafakī: “ĭfo, òipo. Nā afaamaisfo na ēfenāfo ē ato paxkaxonikai. Nā ē atoki yometsomisfo cuatro veces faxò ē ato ināi,” ixò yoini.

<sup>9</sup> Askafaito Jesús yoini iskafaki: “Iskaratīa mē mia chaka soaxona mī Niospa fake iki mī afe ĭpanaka,” ixò yoini. Nāskaxò nānoafo ato yoini: “Na feronāfake Abraham āfe fena. Abraham Nios nikakòipaoni keskafakī natori Nios nikakòi. <sup>10</sup> Akka ē oni ēfe Epa Nios anoax a fenoafo ato fenayanā ato ifiyoi,” ixò ato yoini.

### *Meka fetsafaxò koriònoa Jesús ato yoini* (Mt. 25.14-30)

<sup>11</sup> Nā yorafāfe nikanifo Jesús ato yoiaito māmāi Jerusalén chaima faifokakī, “Mā Nios xanīfo chaima nokoira,” ixò shināifono. Nāskara shināifono mā tāpixò Jesús meka fetsafaxò ato yoini. <sup>12</sup> Iskafakī ato yoini: “Nāno feronāfake fetsa xanīfo keskara ini. Nā feronāfake chai kani mai fetsa ari, nāriax mā xanīfo ikax opai. <sup>13</sup> Akka kayoxoma a yonoxomisfo diez kenani. Nāskaxò ato kori ichapa ināketsayanā ato yoini iskafakī: ‘Na kòri afara ichapa mā fikāfe nā ē oaitīa,’ ixò ato yoini. <sup>14</sup> Akka yorafāfe āfe mai anoxò noikaspanifo. Nāskaxò aho yora rafe nīchinifo iskafakī ato yoitanòfo: ‘Na feronāfake nò fichipaima nòko xanīfo inò,’ ixò ato yoitanòfo.

<sup>15</sup> “Akka askafafiaifono mā xanīfo itani anā anoris oni āfe mai ano. Mā nokoxò a yonoxomisfo kenamani nā ato kori ināfaini tii, tāpixiki afe tii kori fīafomākī. <sup>16</sup> Nāskano fetsa akiki oitaexò yoikī iskafani: ‘ĭfo, a ea mīa kori



ināfainitatima finōmainīfofā kori exe diez faxō mē mia fīxōa,' fani. <sup>17</sup> Askafaino āfe xanīfāfe kemani: 'Aicho, mīfi ea yonoxō sharamiski. Ē mia afaa ichapa ināyamafiano finōmainīfofā mīa fīxosharakōia. Nāskakē pexe rasi diez anoa ē mia xanīfo imai,' ixō yoini. <sup>18</sup> Nāskatari āfe ina fetsari akiki oxō yoikī iskafani: 'Ifo, a ea mīa kori ināfainitatima finōmainīfofā kori exe cinco faxō mē mia fīxōa,' fani. <sup>19</sup> Nāskafaino nāri kemakī iskafani: 'Mīri cinco pexe rasi anoa xanīfo ikikai,' fani. <sup>20</sup> Akka a yonoxomis fetsari akiki oxō iskafakī yoini: 'Ifo, nakīa mī kori ē mia mekexona samapa rakoxō. <sup>21</sup> Ē mikiki mesekī, mīmāi feronāfake mitsisipakōikē, mīnāyamafekē mī fimis, askatari a mī fanama anoafori mī fimis. Nāskakē ē mikiki mesekī ē mia kori mekexona, nakīa mī kori,' ixō yoini.

<sup>22</sup> "Askafaito nikakī āfe xanīfāfe yoini iskafakī: 'Mī ea yonoxosharamisma, mī chakakōi, askatari mī xanikōi. Mī mekaōxō ē mia omiskōimani. Mī ea iskafakē, na feronāfake mitsisipakōi āfenāyamafekē fimis, askatari a fanama anoafori fimis mī ea fakē. <sup>23</sup> Akka, ĵafeskakī banco ano mī ea kori faxōfamamē mā ēfe kori ichapano ea ināxikima, mē anā ēfe pexe ano ē oano?' <sup>24</sup> Nāskata nā anoafō ato yoini iskafakī: 'Na feronāfake kori fīakāfe nā diez faxō finōmainīfofā ea kori fīxōa ināxikakī,' ato faito, <sup>25</sup> kemakī iskafanifo: 'Ifo, akka nāatoroko mā diez faxō finōmainīfofā fia,' faifono, <sup>26</sup> anā xanīfāfe ato kemani: 'Akka ē mato yoi nā afara ichapaya nō afara ichapa inātiro. Akka a afaa ichapayama, āfe afara nō fīatiro anā afaa ichapaya inōma. <sup>27</sup> Askatari a ea noikaspakakī a ea xanīfo fakaspafo, fitakāfe ato retextikakī ēfe ferotaifi,' ixō xanīfāfe ato yoini," Jesús ato fani.

### *Jesús nokoni Jerusalén ano*

*(Mt. 21.1-11; Mr. 11.1-11; Jn. 12.12-19)*

<sup>28</sup> Nāskara ato yoita Jesús kani Jerusalén ano a aōxō tāpimisfo fe. <sup>29</sup> Mā chaima Betfagé fe Betania ano nokoxō machi Olivos anoxō a aōxō tāpimis rafe nīchini. <sup>30</sup> Ato iskafakī yoiyanā: "Mēstekōi fōtakāfe oa ono pexe rasi ano. Mā nokoxō nānoa burro fake nexekē mā fichi kaikai tsoa aō nimisma. Tēpexō ea efexotakāfe. <sup>31</sup> Anoxō mato yōkaifono iskafakī: 'ĵafeskakī mā burro tēpeimē?' mato faifono ato yoikī iskafakāfe: 'Nōko Ifāfe fichipaiyaito nō ifixoniyoa,' ato fakakī," Jesús ato fani. <sup>32</sup> Ato nīchia fōkaxō ōiafo nā Jesús ato yoia keskarakōi fichitoshinifo.

<sup>33</sup> Mā burro tēpeaifono, nā burro ifofāfe ato yōkanifo: "ĵafeskakī mā noko burro tēpekaimē?" ato faifono, <sup>34</sup> ato kemanifo iskafakakī: "Nōko Ifāfe fichipaiyaito nō ifixoniyoa," ato fanifo. <sup>35</sup> Nāskaxō burro kateki āto rapati kakafakaxō efenifo Jesús ano. Nāskaxō a kamaki Jesús tsaoinīfofānifo. <sup>36</sup> Nāskakē Jesús tanaima kani. Akka yorafāfe āto rapatifo

fai nēxpakīa kakafafonifo. <sup>37</sup> Mā chaima machi Olivos tisiri mekani keyokōi a aōxō tāpimisfāfe fāsikōi yoinifo iskafakakī inimayanā: “¡Aicho, Nios fāsi sharakōi! ¡Niosxō afama mīshti mī akaito nō oia!” fanifo. <sup>38</sup> Iskafakī yoinifo akiki inimakakī: “¡Aicho, nōko xanīfo nokoki oakī! ¡Niospa nai mēraxō shara famafafāini! ¡Niospa yoini Jesús nōko xanīfo inō, aōnoax yorafo Nios fe nīpaxanōfo! ¡Aicho, Nios fāsi finakōia!” ixō fāsikōi yoinifo.

<sup>39</sup> Nāskafaifono fariseofāfe yorafā rasi mēraxō yoinifo iskafakakī: “Maestro, mī inafō yoife iskanōfoma,” faifono, <sup>40</sup> akka Jesús ato kemani: “Ē mato yoi nafāfe ea yoisharayamaifono, na tokirifāfe fāsikōi eōnoa meka shara yoikeranafo,” ixō Jesús ato yoini.

<sup>41</sup> Mā chaima Jerusalén ano nokoax nā peXe rasi anoafō ato ōi, atoōnoax Jesús oiani. <sup>42</sup> Iskafakī ato yoiyanā: “Ea chanīmara faax mā isharaapakenakaki. Akka mā kai tāpiama iskaratīa Niospa Fake mā nokoa. Eakai mā xanīfo fapaima ē mato imasharapaifaito, mā ea nikakaspai. Iskaratīa ē mato afeskafatiroma. Mā mā fenoa. <sup>43</sup> Fatora penata mato noikas-pakani nā mato noikaspaifāfe. Nāskaxō mato chetekaxō mato mēra ikiferakaxō mato retekī mitokani. <sup>44</sup> Māto pexefori pāoiki fetsexii, mī kaifofoya mato retekī mitoxikani tsoa pishta ichoxima, mā ea nikakaspamis Niospa ea matoki nīchifiano,” ixō Jesús ato yoini.

*Jesús a Nios kīfiti pexefā mēraxō a ato ināifo ato potani*  
(Mt. 21.12-17; Mr. 11.15-19; Jn. 2.13-22)

<sup>45</sup> Nāskata Nios kīfiti pexefā mēra Jesús ikikaixō ōia a mēraxō afarafo ato miniaifāfe ōikī ato kāimani. <sup>46</sup> Naskafata ato yoini iskafakī: “Niospa meka yōra kenekī iskafani: ‘Mā ēfe kīfiti pexefā mēraxō mā ea kīfitiro,’ ixō yoifinino, akka nā yometsofāfe peXe keskara mā famis,” ixō Jesús ato yoini.

<sup>47</sup> Nāskata Nios kīfiti pexefā mēraxō pena tii Jesús ato yoini. Ato yoifiaino a ato Nios kīfixomisfāfe āto xanīfofo feta a Moisés yoikī kirika kenenī keskara ato tāpimamisfāfe judeofāfe āto xanīfofofāferi afeskaxoma Jesús retepaikakī shinānifo. <sup>48</sup> Akka afeskaxō retetiroma inifo, yorafāfemāi nikasharapaikōiaifono a Jesús ato yoiāi keskara.

## 20

*“¿Tsōa mia nīchinimē mī xanīfo inō?” ixō Jesús yōkanifo anoxō achipaikakī*

(Mt. 21.23-27; Mr. 11.27-33)

<sup>1</sup> Pena fetsa Nios kīfiti pexefā mēra Jesús ikikaini anoxō yorafo tāpimani afeskax Nios fe īpaxatirofomākī. Anoxō ato

yoiaino a ato Nios kīfixomisfāfe āto xanīfofo fe, a Moisés yoikī kirika keneni keskara ato tāpimamisfo, judeofāfe āto xanīfofori fenifo. <sup>2</sup> Iskafakī yōkanifo: “¿Tsōaōxō mī iskafaimē? ¿Tsōa mia yoiamē mī iskafanō?” ixō yōkanifo.

<sup>3</sup> Askafaifono Jesús ato kemani: “Ēri mato yōkanō ea yoikapo. <sup>4</sup> ¿Tsōa Juan nīchiamē ato maotisafakī ato faka mēra ikimapakenō? Niospa nīchiamakī yorafāfe nīchiniforaka.”

<sup>5</sup> Ato askafaino āa ranā mēenāpai fetseyanā shinānifo iskakakī: “Nō kemakī iskafaino: ‘Niospa nīchini,’ nō faino noko yoikī iskafai: ‘Akka, ¿afeskakī mā Juan nikamismamē?’

<sup>6</sup> Akka nō iskafakī yoitroma: ‘Yorafāfe Juan nīchinifo,’ nō fatiroma yorafāfemāi tokirinī tsakakakī noko retenōfo. Akka keyokōichi shinākani Niospa ato shināmanaino, Juanmāi Niospa shināmanaino ato yoiaino,” ikanax yoinānifo. <sup>7</sup> Nāskaxō kemanifo: “Nō tāpiama tsōara Juan nīchini ato maotisafakī ato faka mēra ikimapakenō,” faifono, <sup>8</sup> akka Jesúsri ato kemani iskafakī: “Ēri mato yoima tsōaōxō ē iskafaimākai,” ixō ato yoini.

*Meka fetsafaxō Jesús ato yoini a ato yonoxomis chakafoōnoa (Mt. 21.33-44; Mr. 12.1-11)*

<sup>9</sup> Nāskata taefakī Jesús yorafo yoini. Meka fetsafaxō ato yoikī iskafani: “Feronāfake fētsa āfe tare ano uva fanaxō fētsafāfe kexexonō ato ināfaini chai kayoni. <sup>10</sup> Nā āfe fana fimimistīa ifāfe a yonoxomis nīchini a kexexonafo ato yōkaxō āfe fana fimifo fixotanō nā āfenā tiiri. Akka nā fana kexeafāfe seteketsakaxō afaamais nīchinifo. <sup>11</sup> Nāskata tare ifāfe anā a yonoxomis fetsa nīchini. Akka nāri īchaketsayanā seteketsakaxō afaamais nīchinifo. <sup>12</sup> Nāskaxō afianā fetsari nīchini. Akka mā kaano nāri imi tofeketsakaxō tarepaxō potanifo.

<sup>13</sup> “Nāskata tare ifāfe shināni: ‘¿Ē afeskafaimē? Ēfe fakekōi a ē aō noiai mia nīchipa, ōitsai ēfe fake nikakōitirofoki,’ ixō nīchini. <sup>14</sup> Akka mā āfe fake nīchia kaito fichikanax nā tare kexemisfo yoinānifo iskakani: ‘Nato āfe apa naano na fanafo fixii kiki. A nari nō retenō na tare nōkonā inō,’ ikax yoinānifo. <sup>15</sup> Nāskakata achikaxō tare pasotai iyokaxō retenifo. Akka, ¿afaa mā shināimē ato afeska faimē a tare ifāfe? Ē mato yoinō. <sup>16</sup> Kaxō a tare kexemisfo ato retekī mitoxō, fetsafo āfe tare ināxii afāfe kexexonōfo,” Jesús ato fani.

Ato askafaito nikakani iskanifo: “Askayamapainōra,” inifo.

<sup>17</sup> Akka askaifāfe ōikī Jesús ato yoini: “Akka, ¿afeskakī Niospa meka iskafakī kenenifomē?

Tokiri pexe fapaikakī nā pexe famisfāfe na tokiri chakara ixō potafiafono, fetsafāfe fichikaxō na tokiri sharakōi ikaxō akiki pexe fatirofo,

ixõ kirikaki kenenifo. <sup>18</sup> Akka tokiriki fetsa pakekĩ aõ xao teketiro. Akka tokiri yoraki pakekĩ renekõitatio.”

<sup>19</sup> Nã ato Nios kifixomisfãfe ãto xanĩfofo feta a Moisés yoikĩ kirika keneni keskara ato tãpimamisfãfe Jesús achipainifo karaxa mẽra ikimapaikakĩ. Atoõnoa meka fetsafaxõ yoiaito nikakakĩ akiki õitifishkikaki. Akka achipaifikakĩ tsõa achinima yorafoki mesekakĩ.

*“¿Xanĩfo nõ kori inãtiromẽ noko yõkaito?” ixõ Jesús yõkanifo (Mt. 22.15-22; Mr. 12.13-17)*

<sup>20</sup> Nãskakaxõ a ato feparamisfo nĩchinifo Jesús fe yoinãtanõfo fanĩrira Jesús ato yoiaito nikakakĩ ãto xanĩfofo yoixikakĩ Jesús achinõfo. <sup>21</sup> Nãskakẽ nãfãfe yõkanifo: “Maestro, mã nõ tãpia a mã yoiai anori chanĩmakõi mã yoimis. Nã mã ato yoiai anoriri, nokori yorafãfe yoimisfo. Chanĩmakõi mã yoimis nã Niospa fichipaiyai keskarakõi. Afara yoipaikai mã ronomisma, mẽstekõi mã ato yoimis. <sup>22</sup> Akka chanĩmamakĩ noko yoife na romanõ xanĩfo nõ kopifatiromãki askayamakĩ nõ kopifatiroma rakikã,” ixõ yoinifo.

<sup>23</sup> Akka Jesús tãpini feparapaiyaifãfe. Nãskaxõ mã tãpixõ ato yoini, <sup>24</sup> “Ea kori exe fisti ispakãfe ã õinõ,” ato feito ispai-fono ato yoini iskafakĩ: “¿Tsõa femãnã na keskaramẽ? ¿Tsõa aneri na kori exe ano keameẽ?” ixõ ato yõkaito kemanifo iskafakakĩ: “Nõko xanĩfo César keskara,” faifono, <sup>25</sup> Jesús ato yoini: “Akka na kori exe Césarnãkẽ César inãkãfe, akka Niosnãkẽ Niosri inãkãfe.”

<sup>26</sup> Ato askafaito nikakani, rateyanã yoinãnifo: “Kee, na yoiai keskarakai tsõa finõtiroma. Tãpikĩ finakõia,” ikanax ãa ranã yoinãnifo. Nãskakẽ yorafãfe õiaifono Jesús fanĩrira mekamapaifiaifono fanĩrira mekatiroa ini. “Kee, finakõia,” ikanax anã tsoa tooxinima.

*“Yora naax anã otoax ¿afeskatiromẽ?” ixõ Jesús yõkanifo (Mt. 22.23-33; Mr. 12.18-27)*

<sup>27</sup> Nãskata saduceofo Jesús õifokani fonifo. Nã saduceofãfe yoimisfo iskakakĩ: “Yora naaxkai anã afeskax ototiroa,” ixõ yoimisfo. Akka nãfãfe Jesúski fõkaxõ yõkanifo <sup>28</sup> iskafakakĩ: “Maestro, noko Moisés kirika kenexoni iskafakĩ yoikĩ: ‘Feronãfake fetsa ãfiyax afeta fake akamax naano one fẽtsa nã kẽro ifomafa fitiro ãfe ãfi inõ. Mã fixõ afeta fake atiro ãfe õchi fake inõ,’ ixõ Moisés keneni. <sup>29</sup> Akka nõ mia yoinõ, nã naneti siete feronãfake inifo. ãto ochi iyoa ãfiyai taeni. Mã ãfiyax afeta fake akamax nani. <sup>30</sup> Mã ãfe ochi naano chipokoto fini. <sup>31</sup> Nãskata nã chipoko fẽtsari nã kẽro fini. Nãskarifiã nãari nani afeta fake akamax. Nãskakanax akikinoax nai keyonifo nã siete feronãfake afeta fake akanamax. <sup>32</sup> Nãskata mã nai keyoafono nã kẽrori chipo nani. <sup>33</sup> Akka, ¿fatoto mã otokaxõ na

këro fixikanimë, nã fistimãi fĩpakaxõ?” ixõ yõkaifono, <sup>34</sup> Jesús ato kemani: “Yorafo nono mai ano niyokanax feronãfakefo fe kërofo fianãyokani. <sup>35</sup> Akka fatorafãfe Niospa meka chanĩmara faafono Niospa ato imasharatiro afe ìpaxanõfo. Akka nãfo mã otokanax feronãfakefo fe xotofakefo anã fianãtirofoma Nios ika ari nokokanax. <sup>36</sup> Nãskakë anã tsoa natiroma. Ajirifo keskara ixikani Niospa fakekõifori ixikani mã otokanax. <sup>37</sup> Akka Moisés nikani oa fana kooai xoisai keskara mēranoax mekaito, yoikĩ iskafaito: ‘Mã nafianixakakĩ mã anã otoafõ, ěfi Abraham ikaino Isaaca ikaino, Jacobo ikaino, ě ato Nioskõiki. Iskaratĩa efe niafo,’ ixõ yoiaito Moisés nikani. Nãskakë nõ tãpitiro naax nõ anã ototiro. <sup>38</sup> Akka Epa Niospa naafoma keskara ato õi Epa Niosnoax keyokõi niafo,” ixõ Jesús ato yoini.

<sup>39</sup> Nã Moisés yoikĩ kirika keneni keskara ato tãpimamisfãfe ranãrito iskafakĩ yoinifo: “Maestro, mĩ ato yoisharakõi,” fanifo. <sup>40</sup> Nãskakë anã tsoa yõkapainima, atomã kemasharakõiaito akiki rãfikakĩ.

*“Akka, ĵtsõa fenamë Cristo?” ixõ Jesús ato yõkani  
(Mt. 22.41-46; Mr. 12.35-37)*

<sup>41</sup> Nãskata Jesús ato yõkani: “Akka, ĵafeskakĩ Cristo David ãfe fenara mã faimë? <sup>42</sup> Nã David Niospa Yõshi Sharapa shinãmanaino fanãiti kirika keneni iskafaki:

Epa Niospa ěfe Ifo yoini iskafaki: ‘Mĩ efe xanĩfokõi ìpanakaki. <sup>43</sup> Akka nã mia noikaspaifo mĩ ato finõkõinõ ě ato mĩ nãmã nĩchikai,’ ixõ yoini. <sup>44</sup> Akka, ĵafeskai Cristo David ãfe fena itiomë, nã David Cristo ěfe Ifora fafiapaonino?” ixõ Jesús ato yoini.

*Jesús ato yõani a Moisés yoikĩ kirika keneni keskara ato tãpimamisfãfe anorima ato yoiaifono  
(Mt. 23.1-36; Mr. 12.38-40; Lc. 11.37-54)*

<sup>45</sup> Keyokõichi yorafãfe nikaifono Jesús aõxõ tãpimisfo yoini, <sup>46</sup> “Õisharakakĩ. A Moisés yoikĩ kirika keneni keskara ato tãpimamisfãfe mato pãrapaikani kiki. Akka nãfo rapati chainipa safekanax fofãsapaimisfo. ‘Noko yoisharakõinõfora,’ ikanax tsaoti sharakõi fenamisfo ìchanãti pexe anoxõ, a piaifo anori sharakõi ano tsaopaimisfo, ‘Noko õisharanõfora,’ ikanax. <sup>47</sup> Nãskakaxõ këro ifomafa pexe fiamisfo. Nãskatari Epa Nios chaikõi kĩfimisfo, ‘Noko nikanõfora,’ ikaxõ. Akka nãfo chanĩmisfono Epa Niospa ato omiskõimakĩ finakõixii,” ixõ Jesús ato yoini.

## 21

*Këro ifomafa afaamaisfixõ Epa Nios inãsharakõini  
(Mr. 12.41-44)*

<sup>1</sup> Jesús òini a kori ichapayafãfe kori naneti mēra kori naneaifãfe Nios kīfiti pexefã mēraxõ. <sup>2</sup> Nāskatari òini a kēro ifomafa afaamaisfixõ ãfe kori exe rafe kori naneti mēra ãfe kori nanekī mitofaito. <sup>3</sup> Nāskata ato yoikī iskafani: “Chanīma ě mato yoikõ, na kēro ifomãfa afaamaisfixõ ato finõmainīfofã inākõia. <sup>4</sup> Akka na kori ichapayafãfe mã Nios inãfikakī tsõa keyo inãma, texe faafo. Akka na kēromã omiskõifikī ãfe kori rafe potakī mitokõia. Anã afanã a piati fitiroma,” ixõ Jesús ato yoini.

*Jesús ato yoini na Nios kīfiti pexefã pãoixii ixõ  
(Mt. 24.1-2; Mr. 13.1-2)*

<sup>5</sup> Nāskata a afe rafea fetsafãfe Nios kīfiti pexefãõnoa yoinifo iskafakakī: “Nõko Nios kīfiti pexefã sharafinakõia. Tokiri pet-sanãmeax nã kori ichapayafãfe afara sharafifikaxõ nētakeafo,” ikaxõ yoiifono, Jesús ato yoini: <sup>6</sup> “Akka na mã õiai anãkai tokiri petsanãmexima, keyokõ pãoixii. Na tokirifori maoti fetsexii,” ixõ Jesús ato yoini.

*Afaa afeskaximãkai mã chaima nõko mai keyoaino Jesús ato yoini  
(Mt. 24.3-28; Mr. 13.3-23)*

<sup>7</sup> Nāskakē yõkanifo iskafakī: “Maestro, ¿na mĩ yoiati keskai afetia iximē? ¿Afeskakõ nõ tãpitiromē na ixiai keskara?” ixõ yõkanifo.

<sup>8</sup> Askafaifono Jesús ato kemani: “Kexemesharakani mã ato nikaino mato afara chakafamatirofoki. ‘Ēfi Cristokī. Mē oa mãto xanīfo ixiki,’ ixõ mato pãrapaikani kiki. Nāskakaxõ afãfe yoikani kiki a ě yoimis keskara. Akka yoiãifãfe ato nikayamakãfe. <sup>9</sup> Akka yorafo retenãifãfe nikai rateyamakãfe. Askatari a fetsafãfe ãto xanīfofori potapaiãifãfe nikairi rateyamakãfe. Nã ě mato yoimis keskakõiyoxii kiki. Nāskafiax nõko mai fena keyoxima, chipo ixii.

<sup>10</sup> “Akka yorafo mai fetsa anoax mēnãpaiãifono, yora fet-safori mai fetsa anoax retenãixikani. <sup>11</sup> Nāskaifono nã mai fetsa anoãfo mai naya naya ixii. Askatari fonãiki finakõixikani, afaa pikanima. Askatari pae finakõia ixii nã mai fetsa anofo. Askatari nã nai mēranoãfori a õimismafo õixikani. Ratekõixikani.

<sup>12</sup> “Akka askayoamano, mato achikaxõ fãsi mato omiskõimaxikani. Mato achikaxõ judeofãfe ãto ichanãti pexe mēra mato iyokani xanīfofofãfe mato yõkanõfo. Nāskakaxõ mato karaxa mēra ikimãkani xanīfofofãfe. Eõxõ mato askafakani. <sup>13</sup> Mato askafaifono mã eõnoa ato yoitiro. <sup>14</sup> Akka kayoxoma shinãchakayamakãfe. Ē mato shinãmanikai mã ato yoisharanõ. Afaa nõ ato faimē iyamakãfe. <sup>15</sup> Akka ě mato ato kemamasharaikai fanīrira mato mekafaifono mã ato kemasharanõ. Nāskakē nã mato noikaspaifãfe

mato kemakanima, fanĩrira mã noko yoi tsõa mato faima. <sup>16</sup> Akka mãto epafãfe mãto efafo feta mato ato achimaxikani. Mãto ochifãfe, mãto kaifofofãfe mato fe rafemisfãferi mato askafaxikani. Akka ranãri mato retextikani. <sup>17</sup> Akka eõxõ yorafãfe keyokõichi mato noikaspaxikani. <sup>18</sup> Akka mato noikaspafiaifono Epa Niospa mato kexesharai mato retextiaifonokai mãto fero mẽsho fenonakama. <sup>19</sup> Akka afara afeskara ifiaino ea shinãmakiyamakãfe. Nãskax mã efe isharpakenakaki.

<sup>20</sup> “Jerusalén anoafo sorarofãfe ato cheteafono mã õikĩ mã tãpitiro mã chaima ato reteafono, ãto pexefori pão iki keyoi. <sup>21</sup> Nãskakẽ a Judea ano ikafo mãchi keya ari ichotanõfo. A Jerusalén ano ikafori nã pexefã rasi mẽranoax tsekenõfo. A Jerusalén pasotai ikafori anã Jerusalén ano feyamanõfo. <sup>22</sup> Nã Niospa meka yoikĩ kenenifo keskakõ: fakĩ Jerusalén anoafo Niospa ato omiskõimani. <sup>23</sup> Askatari a kero fake naneafõ fe a fake yome pishta chocho amaifo omiskõixikani mãmã yorafo omiskõifinakõiaifono. Nãskakẽ nã Judea mai anoafo omiskõifinakõixikani, Niospa ato omiskõimanaino. <sup>24</sup> Ranãri ato kenopa retekani. Akka ranãri ato achikaxõ karaxa mẽra ato ikimakani mai fetsafo ano. Ato askafaifono nã judeofoma Jerusalén ano iyokani. Akka nã Niospa ato omapaiyaitã judeofo Jerusalén ano anã fexikani,” ixõ Jesús ato yoini.

*Niospa Fake fotoaino afe keskara iximãkai ixõ Jesús ato yoini (Mt. 24.29-35, 42-44; Mr. 13.24-37)*

<sup>25</sup> Anã Jesús ato yoini iskafakĩ: “Nãskakẽ xini fe oxe fishi-fori a nõ õimis keskara anã iki fetseima. Fetsa keskara iki fetsei. Askaito õikani nono mai anoafo ratekõixikani. Fãkafãri poo iki meseniaito nikakani. Ratekõixikani nõkai iskara afaa õimisma ikanax. <sup>26</sup> Nãskaito õikani yorafo ratekani shinã fenoyotaxikani. Afarafo afeskaraito õikani a õiyomisfoma keskara õikani. <sup>27</sup> Nãskatari ea õixikani ã nai mẽranoax nai kõinĩ ã fotoiyõaito. Shara finakõia ã fotoaito ea õixikani. <sup>28</sup> Nãskakẽ nã ã mato yoiai keskai taei afarafo afeskaraino, inimayanã ea manasharakãfe, ea chanĩmara fayanã. Mẽ chaima okĩ ã mato ifirisa fatanõ,” ixõ ato yoini Jesús.

<sup>29</sup> Nãskaxõ anã meka fetsafaxõ ato yoini iskafakĩ: “Akka shinãkãpo yõkka fiyafi ifi fetsaõnoa. <sup>30</sup> ãfe pei siri ikaito õikĩ mã tãpitiro mãmã chaima xiniãito. <sup>31</sup> Nãskarifiakĩ mã tãpitiro nã ã mato yoimis keskara afarafo afeskaraito õikĩ mã chaima Nios Xanĩfo oi kiki xanĩfo ikiyoi nono nãmãnoax.

<sup>32</sup> “Akka ã mato pãraima. Na afarafo ã mato yoiai keskaito na yorafãfe nayokaxoma õiyokani. <sup>33</sup> Akka nai fe mai keyoi. Akka ãfe meka fisti keyonakama na ã mato yoiai keskakõ.

34-35 “Nāskakē kexemesharakāfe māto ōitinī afaa chaka shinākakīma. A mā pāepaiyai fisti shināyamakāfe. Afaa fet-safori shināyamakāfe. Anori shinākī a ikaifo keskakī mā ea chanīmara fatiromaki. Akka afo itipinīsharafomano ē noko-risataxii. Māraki poomānā tanasharaxma tarapa faafo mēra ikiyamatiro. Māri nāskatiro ea shināxma. Nāskata afarafo afeskara iki fetseaino nā mai tio anoax omiskōi fetsexikani. <sup>36</sup> Nāskakē itipinīsharakāfe, Epa Nios mēxotaima kīfifafāikāfe afara afeskaraino omiskōixikakima. Nāskax mā ekeki chipo nokoaino ē matoki inimaxikai,” ixō Jesús ato yoini.

<sup>37</sup> Nāskata Jesús pena tii Nios kīfiti pexefā mēraxō ato yoini. Akka fakish tii machi āfe ane Olivos ano oxatai aponi. <sup>38</sup> Nāskakē yorafā rasi pena tii akiki fepaonifo Nios kīfiti pexefā ano. Anoxō ato yoiaito nikai fekani.

## 22

*“¿Afeskaxō nō Jesús retetiromē?” ixō shinānifo  
(Mt. 26.1-5, 14-16; Mr. 14.1-2, 10-11; Jn. 11.45-53)*

<sup>1</sup> Mā chaima fista ikaino a Niospa ājirinī Egipto anoxō āto fake iyoafo retenima shinākakī pāa faraxatimais pi-paonifo, Pascua fistaṭia. <sup>2</sup> Afia penata a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe afeskaxoma Jesús pāraxō retepaikani yorafoki ratenifo.

<sup>3</sup> Nāskaifono Judas mēra Satanás ikini. Nā Judasri Jesús āfe ina ini. Āfe ane fetsa Iscariote ini. <sup>4</sup> Nā Judas kani a ato Nios kīfixomis xanīfofo yafi a anoxō Nios kīfiti pexefā kexemisfo xanīfofo yoikai. Anoxō ato yoini iskafakī: “¿Afeskaxō ē mato Jesús achimatiromē?” ixō ato yōkani. <sup>5</sup> Akiki inimayanā yoikī iskafanifo: “Aicho, nō mia kori ināi mī noko ato Jesús achimaxonō,” ixō Judas yoiaifono, <sup>6</sup> “Ia. Ē mato achixonō,” ixō ato yoini. Nāskaxō Judaspa shināni afetia ē ato Jesús achixotiromē ini. Yorafā rasichimāi naki faafono afeskaxō achitiroma ini.

*Mā chaima reteaifono Jesús aōxō tāpimisfo feta yātapake pini  
(Mt. 26.17-29; Mr. 14.12-25; Jn. 13.21-30; 1 Co. 11.23-26)*

<sup>7</sup> Akka nā fista Pascuatia pāa faraxatimais pinifo. Afia penatari oveja fake retexō Nios ināpaonifo āto xinifāfe anifo keskafakī. Akka mā fista pakeano, <sup>8</sup> Jesús Pedro yafi Juan nīchini ato yoikī iskafayanā: “Fokaxō itipinīsharafatakāfe fistaṭia nō pinō,” ato faito, <sup>9</sup> kemanifo: “¿Fanīxō nō itipinīsharafaikaimē?” faifono, <sup>10</sup> Jesús ato kemani: “Mā mā pexefā rasi ano nokoxō feronāfake fisti mā fichi kaikai keshoki faka tetsaomexō foikaino. Nā chīfafaitakāfe fato pexe mēra ikikaimākai ōixikakī. <sup>11</sup> Nānoxō nā pexe ifo yoikī iskafaxikakī:



‘Nōko Ifāfe noko yoikī iskafakī: “Fato pexe kene mēraxō eōxō tāpimisfo feta fistatīa ē pitiromāki ixō yōkatakāfe nōko Ifāfe noko faa,” mā faito, <sup>12</sup> nāato mato ispai kiki pexe keya kene efapaya itipinīsharakōia. Nāno itipinīsharafakāfe anoxō nō pinō,” Jesús ato fani.

<sup>13</sup> Nāskata mā fokaxō fichinifo nā Jesús ato yoia keskarakōi. Nāskaxō itipinī fanifo Pascua fistatīa pixikakī.

<sup>14</sup> Mā itipinīshara faafono, Jesús a aōxō tāpimisfo fe kaax, mīsa ano tsaoni. <sup>15</sup> Nāskaxō tsaofono Jesús ato yoini: “Ē mato feta pipaitiani na fista Pascuatīa ē nayoxoma. <sup>16</sup> Akka ē mato yoikōi ēkai anā mato feta Pascua fistatīa pifainakama. Akka nā mā Epa Nios xanīfo ano nokoaitīa ē mato feta pixii inimayanā.”

<sup>17</sup> Nāskata kecho tsomainīfofā Apa Nios kīfikī, “Aicho,” fata, ato yoikī iskafani: “Na mato tiito ayakāfe. <sup>18</sup> Ē mato yoikōi ē anā mato feta na fimi ene ayaima. Akka nā ēfe Epa Nios fe ē xanīfo ixō keyokōi ē yorafo īkixō na fimi exe ē anā ato feta ayaxii,” ixō ato yoini.

<sup>19</sup> Nāskaxō anā pāa tsomainīfofā, Apa Nios kīfikī aicho fata, ato pāa kaxkexopakeyanā ato yoikī iskafani: “Nafi efe nami keskaraki. Matoōnoax ē nai. Nāskakē nā mā piatīa ea shināfafāikāfe,” ixō ato yoini.

<sup>20</sup> Nāskarifiakī kecho tsomainīfofā nā pixō ato yoini iskafakī: “Na ayatiōxō ē mato afara fenashara yoi iskafakī: Ēfe imi foaino ē matoōnoax nai mā ēfe Epa Nios fe ĩpaxanō.”

<sup>21</sup> “Akka nā efe mīsa ano tsaofa fētsa ea ato achimani. <sup>22</sup> Akka nā eōnoa yoikī kirika kenenifo keskakōi ē naikai. Akka nā ea ato achimanai akairi omiskōi finakōi,” ixō Jesús ato yoini.

<sup>23</sup> Ato askafaito nikakani āa ranā yoināi fetsenifo: “¿Fato-tokai nō achimanimē?” ikanax āa ranā yoinānifo.

### *Akka, ¿tsoa sharafinakōiamē?*

<sup>24</sup> Nāskakē aōxō tāpimisfo feratenānifo fatokai sharafinakōiamē ikanax. <sup>25</sup> Nāskaifono Jesús ato yoini iskafakī: “Nā yora fetsafo xanīfokaxō ato ferateyanā ato yonomamisfo. Ato askafafiakakī nōko xanīfo noko afara shara faxō fafāini ixō nokoōnoa yoikāfe, ato famisfo.

<sup>26</sup> “Akka māri askayamakāfe. Askatamaroko nā sharafinakōia mato exto chipoko keskara ikāfe. Nā chipokofāfe āto iyoafo ato yonoxosharatirofo keskara ikāfe. Akka xanīfo ipaikakī fetsafo sharafakāfe ato axosharaxikakī. <sup>27</sup> Akka, ¿fatokaimē sharafinakōia, nā mīsa ano tsaoxō pimistraka, askayamai nā ato pimamistraka? Akka nā mīsa ano tsaoxō piāi nā sharafinakōia. Akka ē mato fe ixō ē mato yonoxomis keskara ē imis.

28 “Akka mā efe itiani mā ea potamisma, na afara chakafāfe ea chakafafiaino. 29 Nāskakē ēri mato xanīfo imaxii, ēfe Epa Niospa eari xanīfo imaino. 30 Akka mā efeta pita efeta ayata mā faxii ēfe mīsa ano tsaoxō. Nāskakē mā mā xanīfoxō nā doce nōko kaifo israelifāfe mā ato ikixii,” ixō Jesús a afe rafeafo yoini.

“*Ē Jesús ōimisma, Pedro ixiaino,*” *Jesús ato yoini*  
(Mt. 26.31-35; Mr. 14.27-31; Jn. 13.36-38)

31 Nāskata nōko Ifāfe Simón yoini iskafakī: “Simón, ōipo Satanás Nios yōkaxō mato afara chakafamapai, mā ea potanō. 32 Akka ē mia Epa Nios kīfixoni mī ea nikakī xateyamanō. Akka mā mī paxkafixō mī ea anā Ifofakōixō a mefeta ea Ifofaafō ato yoisharafe ea Ifosharafanōfo,” ixō yoiaino, 33 Simón kemani: “Īfo, ē mia potanakama. Mia karaxa mēra ikimanai-fono ēri mefe kai. Mia reteaifonori ēri mefe nai,” faito, 34 Jesús kemani: “Pedro, ē mia yoi iskaratīa takara fene keoyoamano mī ato yoi iskai: ‘Ē Jesús ōimisma,’ ixō mī ato yoikī tres fai,” Jesús fani.

“*Mē samamashta omiskōikai,*” *Jesús ato fani*

35 Nāskafata Jesús anā ato yoini iskafakī: “Ē mato nīchiyamea pishamais koriri mā foyameama, sapatori mā fotima. Akka ē mato nīchia kaxō ĵmā afaa yopatimē?” ato faito kemakakī iskafanifo: “Maa. Nōkai afaa yopatima,” fanifo.

36 Nāskata ato yoini iskafakī: “Akka iskaratīa nā pishayato āfe pisha foikanō, āfe koriyafi. Akka nā keno yamato āfe rapati minixō kori fixō, nā kōri keno fetsa finō. 37 Akka ē mato yoi nā eōnoa yoikī kirika kenenifo keskai mē askakōi. Ē askarayamafiano ea pārakani yora chakafāfe, ‘Nato ato chakafamis,’ ea fakani. Nāskakē nā eōnoa yoikī kirika kenenifo keskara nē askakōi,” ixō ato yoiaino, 38 a aōxō tāpimisfāfe yoinifo: “Ifo, nono keno rafe,” faifono, ato kemani: “Nā rafe inōkī anā nō yopaimakai. Nāskanō,” ixō ato yoini Jesús.

“*Getsemani anoxō Jesús Apa Nios kīfini*  
(Mt. 26.36-46; Mr. 14.32-42)

39 Nāskata Jesús kani nā Kamis keskai machi Olivos ano. Aōxō tāpimisfori afe fonifo. 40 A Kamis ano mā nokoxō ato yoini: “Epa Nios kīfikāfe Satanás mato afara chakafamapaiyai keskara axikakīma,” ixō ato yoini.

41 Ato askafata ato makinoax orishta kaxō Apa kīfini ratokonō mai chachipakefofā. 42 Apa kīfikī iskafani: “Epa, ea ifipaikī ea ifife ē omiskōinōma. Akka nā ē apaiyai keskafakīma, nā mī ea amapaiyai keskafafe,” Apa faino, 43 āfe ājiri nai mēranoax akiki nokorisatani mitsisipakōi imaxiki.

44 Shināmitsai finakōiyanā, Jesús Apa kīfini nā omiskōiai shināyanā. Nāskaino āfe nīskaya āfe imi mai ano tosini.

45 Mā Apa kīfita fininākafāta, aōxō tāpimisfo ari kani. Kaxō ōia oxafo inifo shināmitsai finakōikani āto Ifo omiskōiaino. 46 Nāskaxō ato yoini: “¿Afeskai mā oxaimē? Fininīfōfākāfe Epa kīfixikakī Satanás chakata mato afaa chakafamayamanō,” ato fani.

### *Jesús achinifo*

(Mt. 26.47-56; Mr. 14.43-50; Jn. 18.2-11)

47 Jesús ato yoiaino yorafā rasi nokotoshinifo. Nā āfe ane Judas, nāri Jesúsxō tāpimis iyopaoni, nā Judas rekē oaino acho yorafā rasi fenifo. Nā Judas Jesús ari kani kokoikai. 48 Askafaito Jesús yoini iskafakī: “¿Judas, ea mīa kokoxō mī ea ato achimanimē?” fani.

49 Askafaito ōikakī a aōxō tāpimisfāfe Jesús yōkanifo: “¿Īfo, nō ato kenopa rerapaketiromē?” ixō yōkanifo.

50 Nāskata fētsa nā ato Nios kīfixomisto āfe xanīfāfe ina āfe pacho kayakai aōri paxteni. 51 Askafaito ōikī Jesús yoini iskafakī: “Enefe. Nāskanō,” fata afianā koshikōi xanīfāfe āfe ina āfe pacho ramākaxō pacho tichixotani. 52 Nāskaxō ato yoini a Nios kīfixomis xanīfofo yafi a Nios kīfiti pexefā kexemis xanīfofo, nā anifo tiiri mā ifi feafono ato yōkani: “¿Afeskai kenofoya ifixatefoya mā oamē ea achiyoi oa ē yometso keskarakē? 53 Pena tii ē mato fe itiani Nios kīfiti pexefā mēraxō ē mato tāpimani, akka mākai ea achipaimisma. Akka na fakishi mā ekeki oa Satanás mātō ifono,” Jesús ato fani.

### *“Ē Jesús ōimisma,” Pedro ini*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

54 Jesús achixō iyonifo a ato Nios kīfixomis xanīfāfe pexe ano. Akka Pedro acho chipo kani. 55 Akka pexe emāiti chii ketefaax tsaoax yoaifono Pedrori nāno ato fe tsaoax yooni. 56 Nāno ato fe tsaoax yooaino xanīfo yonoxomis xomayato fichixō yoini iskafakī: “A nari Jesús fe imiski,” faito,

57 Akka Pedro iskani: “Ēkai Jesús ōimisma. Mī ea pārai,” faito, 58 fētsari tāpixō yoini iskafakī: “Mīfi na Jesús fe imiski,” faito, Pedro kemani: “Maa. Ēkai Jesús fe imisma,” fani.

59 Mā askafafo samaraka pishtano, fetsari anā iskafani: “Chanīma, a nafi Jesús fe imiski. A na feronāfake Galilea anoa,” faito, 60 Pedro yoini iskafakī: “A mī yoiāiōnoa ē tāpiama tsoaraōnoa mī yoi ē tāpiama,” Pedro faino takara keoinākafāni.

61 Pedro askaito Jesús texkeakekafā festani. Festanaino Pedro shinātani nā āfe Ifāfe yoia keskara. “A takara keoyoamano, ‘Ē Jesús ōimismara,’ ixō mī ato yoi tres fakī,” Jesús faa

nā Pedro shinātani. <sup>62</sup> Nāskakē nānoax tsekekaini kaax Pedro shināmitsai oiāi finakōini.

*Jesús kaxemetsama fanifo*

(Mt. 26.67-68; Mr. 14.65)

<sup>63</sup> Nāskakē nā kexeafāfe Jesús kaxemetsama fanifo koshaketsayanā. <sup>64</sup> Nāskata feopokaxō yōkanifo: “Noko yoife tsōa mia koshamakī.”

<sup>65</sup> Nāskakata ĭchaketsanifo afara fetsa yōkaketsayanā.

*Xanīfo tiito Jesús yōkanifo*

(Mt. 26.59-66; Mr. 14.55-64; Jn. 18.19-24)

<sup>66</sup> Mā penano a judeofāfe āto xanīfofo ichanānifo. Nā ato Nios kīfixomisfāfe āto xanīfonō, a Moisés yoikī kirika keneni keskara ato tāpimamisfori ato fe ichanānifo. Nāskakaxō Jesús iyonifo xanīfo finakōia ano. Nārixō yōkanifo iskafakākī: <sup>67</sup> “Noko yoife mīmākī Cristo.”

Askafaifono ato Jesús kemani: “Ēje, ē mato faitokai mā ea chanīmara faima. <sup>68</sup> Ēri mato yōkaito mā ea kemaima. <sup>69</sup> Akka iskaratīa ēfe Epa Nios ketaxamei ē tsaosharakōi. Nāmāi fasi finakōikē afama mīshti atiro,” ixō ato yoiāito, <sup>70</sup> keyokōichi yōkanifo: “Akka, ġmīmē Niospa Fake?” ixō yōkaifono Jesús ato kemani: “Nā mā yoiai keskarakīa ē,” ato fani.

<sup>71</sup> Ato askafaito nikakākī anā yoinifo iskafakākī: “ĭNikakapo! Nōkai anā aōnoa meka fetsa nō nikapaima. Mā nōakōi nō nika noko yoiaito,” ikanax yoinānifo.

## 23

*Pilato ano Jesús iyonifo*

(Mt. 27.1-2, 11-14; Mr. 15.1-5; Jn. 18.28-38)

<sup>1</sup> Nāskakata keyokōi fininīfofākāta Jesús iyonifo Pilato xanīfo finakōia ano. <sup>2</sup> Nāskakata judeofāfe Jesús chakafakākī yōanifo iskafakākī: “Na feronāfāke nōko kaifofo ato chakafamai iskafakī yoikī: ‘Na romanō xanīfokōichi mato kori yōkaito ināyamakāfe,’ ato faa. Nāskatari, ‘Ēkīa Cristo, ea Niospa nīchia ē māto xanīfo inō. Ē Niospa Fake,’ noko faa,” ixō Pilato yoinifo.

<sup>3</sup> Askafaifono Pilato yōkani: “ġMīmē judeofāfe xanīfo?” ixō yōkaito Jesús kemani: “Ēje, nā mī ea yoiai keskarakīa,” fani.

<sup>4</sup> Nāskafaino Pilato nā ato Nios kīfixomis xanīfofo yafi nā ano niafo yoini iskafakākī: “Na feronāfākekai afaa chakafaa ē ōima,” ato fani.

<sup>5</sup> Ato askafaito fāsikōi mekainīfofā yoinifo iskafakākī: “Na feronāfāke ato tāpimayanā pexefo tii anoa ato chakafakī mekafamafofāsafai. Galilea anoxō ato taefamati, iskaratīa nono Judea anoxori ato askafamai,” ixō yoinifo.

*Jesús Herodes ano iyonifo*

<sup>6</sup> Askafaifāfe nikakī Pilato ato yoini: “¿Chanĩmamē na feronāfake Galilea anoamē?” ato faino, <sup>7</sup> “Ēje, nānoa,” fanifo. Nāskaxō xanĩfo Herodes ano nĩchini, nā Herodesmāi Galilea anoax xanĩfokē. Nāskafaifono Herodes Jerusalén ano oni. <sup>8</sup> Jesús ōi Herodes inimakōini, mēxotaimamāi ōipaikatsaxakī, aōnoa yoiāifāfe nikakatsaxakī afama mĩshti faito ōipaikī. <sup>9</sup> Nāskaxō afama mĩshtifo yōkaketsani. Akka Jesúskai pishta kemanima. <sup>10</sup> Nāskano nānori inifo, a ato Nios kĩfixomisfāfe āto xanĩfofo fe a Moisés yoikī kirika keneni keskara ato tāpimamisfo, nāfāfe Jesús mekafakī chakafanifo. <sup>11</sup> Nāskakē Herodes āfe sorarofa feta chakakōifayanā kaxemetsama fanifo. Nāskakaxō rapati nana safemanifo nā rapati xanĩfonā. Nāskaxō Herodes anā Pilato ano Jesús nĩchini. <sup>12</sup> Nāskatari Pilato fe Herodes rafe fatanānifo. Akka taeyoi chakafatanāyopaonifo.

*Pilato ato yoini Jesús retenōfo*

*(Mt. 27.15-26; Mr. 15.6-15; Jn. 18.39-19.16)*

<sup>13</sup> Nāskaxō Pilato ato ichanāfani a ato Nios kĩfixomis xanĩfofo yafi xanĩfo fetsafo, askatari a ano ikafori ato ĩchanāfani. <sup>14</sup> Nāskaxō ato yoini iskafakī: “Mā ekeki na feronāfake efea iskafakī yoiyanā: ‘Nato yorafo chakafakī mekafa,’ ixō. Akka māto ferotai fi mē yōka. Natokai afaa chakafa ē ōima, askatarikai ato chakafakī mekafaama a mā yoiāi keskafakī. <sup>15</sup> Akka Herodesri aōnoa afaa chaka nikama. Nāskaxō nokoki anā nĩchia. Mā mā ōi natokai afaa chakafaama napanā. <sup>16</sup> Akka ē omiskōimakī tāpimani, chipo anā nĩchixiki katanō,” ixō ato yoini.

<sup>17</sup> Akka Pascua fistatīa Pilato ato inimamapaoni yora fisti karaxa mēranoa tsekakī. <sup>18</sup> Akka keyokōi fāsikōi mekainĩfofānifo. “¡Na chaka retefe, Barrabás noko kaimaxoxiki!” fanifo.

<sup>19</sup> Nā Barrabás karaxa mēra ikimanifo pexefā rasi anoxō romanōfāfe āto xanĩfo nō potanō fāsikōi mekainĩfofākāfe ato faito. Askatari ato retekē karaxa mēra ikimanifo. <sup>20</sup> Akka Pilato Jesús nĩchipaikī, afianā yorafo yoini. <sup>21</sup> Ato askafaito nikakakī yorafāfe fāsikōi mekafainĩfofānifo: “¡A chaka mastafe!” fanifo.

<sup>22</sup> Askafaifono afianā Pilato ato yoini: “Akka, ¿afaa chakafamē? Natokai afaa chakafa ē ōima. Afeskaikai natiroma. Akka ē omiskōimakī finata ē nĩchi katanō,” ato faito, <sup>23</sup> akka afo mēxotaima mekarianifo. “¡Mastafe!” faria fanifo. Askafaria faifono, “Māa akāfe,” ato fani. <sup>24</sup> Ato iskafakī, yoiyanā, “Nā mā apaiyai keskafakāfe” ato fata, <sup>25</sup> nāskaxō nā Barrabás karaxa mēranoa kaimani, “Noko kaimaxōfe,” faifono. Nā Barrabás karaxa mēra ipaoni xanĩfofo potapaita ato retেকatsaxakī. Nāskaxō Jesús ato ināni nā apaiyai keskafanōfo.

*Jesús ifi cruz ikaki mastanifo**(Mt. 27.32-44; Mr. 15.21-32; Jn. 19.17-27)*

<sup>26</sup> Mā Jesús mastai fokakī iyokakī, feronāfake fisti fichikaxō yoinifo cruz foxōikanō. Nā feronāfake Cirene anoa ini, āfe ane Simón. Oriax oaito fichikaxō cruz iyamanafono Jesús acho cruzya kani.

<sup>27</sup> Nāskakē yorafā rasi kērofo fe oiakani, fiisi fonifo. Acho fokani, shināmitsakani āto Ifo shinākani. <sup>28</sup> Nāskaifono Jesús ato ōikī ato yoini iskafakī: “Kērofo Jerusalén anoafofāfe, eōnoax ōiayamakāfe, eōnoax ōiakīmaroko māa ranā oia faatanākāfe, mātō fakefoōnoaxri oiakāfe. <sup>29</sup> Akka chipo a mā omiskōiai nokoxii, nāskakē mā yoikī iskafaxii: ‘Inimakāfe a fake fimisfoma, mā nofe omiskōikeranaki,’ ixō mā yoixii. <sup>30</sup> Nāskakē yorafāfe machi yoikī taefakī iskafaxikani: ‘Nokoki māchifā mafakerafe noko fepoxiki nō narisanō omiskōixikima,’ ixō yoixikani. <sup>31</sup> Ē afaa chakafayamafiamiskē ea iskafakani. Akka nā afara chakafakī xateyamaifo omiskōimakī finakōikani,” ixō Jesús ato yoini.

<sup>32</sup> Nāskata yora chaka raferi iyonifo Jesúsya mastai fokakī. <sup>33</sup> Nāskata a mastai ano nokonifo āfe ane Mapo Xao ano. Nānoxō Jesús mastanifo. Yora chaka rafeya fetsa takai fetsa ata, fetsari takai fetsa anifo. <sup>34</sup> Nāskaxō mā mastafono Jesús Apa kīfini: “Epa, ato raefafe na ea iskafaifo tsōa tāpiamakī,” Apa fani.

Nāskano sorarofō ato kaxetiya kaxenifo mā kanākanax Jesús rapati paxkanāxikakī. <sup>35</sup> Nānoxō yorafāfe ōinifo. Nā xanīfofōfāfe kaxemetsamafaifono iskafayanā: “Nō ōinō nato yorafo ifimiski, iskaratīa āari ifimeimākai. Niospa Fakeaxroko āa ifimeiki kiki a Niospa katonino,” fanifo.

<sup>36</sup> Sorarofori Jesúski kaxemetsamanifo. Nāskaxō akiki fokaxō fimi ene kacha ayamapainifo. <sup>37</sup> Iskafakī yoiyanā: “Mī judeofāfe āto xanīfomākī mīari ifimefe,” fanifo.

<sup>38</sup> Nāskaxō āfe mapo mǎnāori tafara kenekī iskafanifo: “Nafi judeofāfe āto Xanīfoki,” fanifo.

<sup>39</sup> Nāskano nā aya mastafō fētsa Jesús chakafakī mekafani iskafakī: “Mī Cristomākī mīa ifimeta nokori ifife,” faito, <sup>40</sup> akka fētsa yoikī iskafani: “Askafayamafe. ¿Mī Nioski meseimamē a mī afara chakafaax omiskōiai?” fani. <sup>41</sup> “Akka nō omiskōikōi chanīmakōi nōmāi afara chakafakatsaxakī. Akka na feronāfakekai afaa chakafama na omiskōiai,” fani.

<sup>42</sup> Nāskaxō nāato Jesús yoini iskafakī: “Ifo, xanīfo finakōixō ea shināfe,” faito, <sup>43</sup> Jesús kemani: “Ē mia pārāima iskaratīakōi mī efe kai nā sharafinakōia ari mī efe inimakōipakenaka,” fani.

*Jesús nani**(Mt. 27.45-56; Mr. 15.33-41; Jn. 19.28-30)*

44 Nāskata xini keya nā mai tio fakishifākōitani. Nāskax mā xini kaino anā penatani. 45 Nāskakē xini peinima. Nāskaino sama nami Nios kīfiti pexefā mēranoax nakirafekōi faxtepakakafāni. 46 Nāskaino Jesús fāsikōi Apa kenani: “Epa, ea ifife ē mia ano kanō,” fata, nāskax nani.

47 Nāskaito soraro xanifāfe ōikī, Epa Nios aicho fayanā iskafakī yoini: “Chanīma, na feronāfake afaa chakafamisma,” ixō yoini.

48 Nā ano niafāfe ōinifo Jesús naito. Nānoax fokani, oiai finakōi fonifo Jesús shinākani. 49 Akka nā Jesús ōimifāfe ano nētekaxō chai nikaxō ōinifo. Kērofāferi ōinifo, Galilea anoax afe foitaxakakī.

*Jesús makex kini mēra maifanifo*

*(Mt. 27.57-61; Mr. 15.42-47; Jn. 19.38-42)*

50-51 Nāno feronāfake sharakōi fisti ini. Nāato Nios Ifo-fasharapaikōini. Āfe ane José, Arimatea anoa ini judeofāfe āto xanīfo. Nā José Nios xanīfokōi manapaoni. Nāatokai xanīfo fetsafāfe shināifo keskara shināpaonima. 52 Nā José Pilato ano kaxō Jesús yora yōkani maifai axiki. 53 Mā yōkatani oxō cruz anoa fotomaxō sabanā fena sharakōipa rakoxō iyoxō mafa kini mēra rātani, a tsoa maiyomisma mēra. 54 Nā penata itipinīshara fanifo, mā chaima safaro faino, 55 kērofo Jesús fe Galilea anoax foitaxakakī. Nāfāfe José chīfafainifo afeskaxō kini mēra Jesús rātaimākai ōifokakī. 56 Mā āto pexe ano fēkaxō, pirofomā yafi a aō tereati itipinīsharafanifo. Akka kērofāfe judeofāfe pena tenetitīa teneyonifo nā Moisés yoini keskafakī.

## 24

*Jesús otoni*

*(Mt. 28.1-10; Mr. 16.1-8; Jn. 20.1-10)*

1 Akka nā pena teneti safaro mā finōfaano nomīkonō fakishparikōi fonifo a Jesús maia ano. Pirofomā foifokani mā itipinīshara fakaxō. 2 Mā nokokaxō ōiafo a kini a aō fepoitafo tokirinīfā mā fepekemea ini. 3 Akka ikifaikakī ōiafo āto Ifo Jesús āfe yora ano inima. 4 Nāskai ratekōiyanā afeskamē ikaxō shināpaiyaifono, feronāfake rafe ato ketaxamei nītani, āto rapati fafekōiyanā. 5 Nāskaifono kērofo ratekōiyanā maikiri fepepakefōfānifo. Nāskaifono nā ājiri rafeta ato yoini: “¿Afeskakī nā yora nia mā fenaimē na yora nakē maifamisfo mēranoa? 6 Anākai nonoma, mā otokaina. Akka shinākapo a Galilea ano iyoxō mato yoimis keskara. 7 ‘¿A yora chakafāfe ea achikaxō ea mastafono tres nia oxata ē anā otoxira,’ mato faito mā nikamismamē?” ixō ājiri rafeta ato yoini.

<sup>8</sup> Ato askafaino a Jesús ato yoimis anori shinānifo. <sup>9</sup> Nāskakata nā Jesús maita anoax anā fekakī, nā once aōxō tāpimisfoya nā fetsafori ato yoitoshinifo nā ōitanaifo keskara. <sup>10</sup> Akka nā Jesúsnoa ato yoimiski chanifofāifo tii, María Magdalena ikaino Juana ikaino Santiago āfe afa María ikaino kēro fetsafori inifo. <sup>11</sup> Akka a aōxō tāpimisfāfe, “Āa chanīkanira,” ato fanifo. Ato nikakaspanifo.

<sup>12</sup> Ato askafaifono nikai Pedro fareke kaini, a Jesús maita ano ōikai. Kaxō ōia kini mēra a aō rakoita sabanā fisti mania ini. Nāskax anā Pedro pexe ano oni, “Kee, ¿afeskaitamē?” ikax.

### *Jesús Emaús ano fāi kani*

*(Mr: 16.12-13)*

<sup>13</sup> Afia pena fistichi Jesús fe rafemisfo rafe pexe rasi āfe ane Emaús ano fonifo. Jerusalén fe Emaús once kilometro ini. <sup>14</sup> Fokakī yoifonifo a Jesús reteitafo. <sup>15</sup> Yoināfōfāifono Jesús atoki nokoax ato fe fāi kani. <sup>16</sup> Akka mā ōifikakī tsōa tāpinima, Niospa ato onātimafaino. <sup>17</sup> Askafofāifono Jesús ato kemani: “¿Tsoaōnoa mā yoifokaimē fāi kakī?” ato faino tsoa tooxinima nāno nētenifo shināmitsakōiyānā.

<sup>18</sup> Nāskaito nā āfe ane Cleofás kemani: “¿Meres fisti mī Jerusalén ano ixō, mī tāpitamamē na rama iskaita?” faito, <sup>19</sup> Jesús kemani: “¿Afaa afeskaitamē?” ato faito yoinifo: “Jesús Nazarete anoa nō yoi, nāatofi Niospa meka yoimiskī. Nāskakē yorafo akiki inimakōimisfo, Niosri akiki inimakōimis. Niospa āfe sharaōxō noko yoimis Niosxō afama mīshti noko faxomis. Āfe mekapa yorafo sharafata afara sharafo noko axomis. <sup>20</sup> Nāskafiaito a ato Nios kīfixomis xanīfofo feta nōko xanīfofōfāfe achikaxō ato ināitafo retetakō mastanōfo. <sup>21</sup> Akka nā nōko kaifo israelifo romanōfo anoa ifimis ipainōra nō famis nōko xanīfo ixiki romanōfāfe anā noko afeskafanōfoma. Akka mā tres nia finōa a naita. <sup>22</sup> Akka nā kērofo nofe ikafāfe noko yoikakī noko ratekōiafo. Fakishparikōi a maia ano ōifokaxō ōiafo āfe yora ano ikama. <sup>23</sup> Ano āfe yorakēma ōitakani pexe ano anā feafo. Nāskaxō yoaifo a āfe ājiri rafeta atoki nokoxō ato yoaifo keskara iskafakī: ‘Jesús naama, iskaratīa nia,’ ato faafono. <sup>24</sup> Nāskakē nofe yora rafe chipo a maia ano fokaxō ōiafo nā kērofāfe yoaifo keskarakōi ika. Akka Jesús āfe yora ano ikama.”

<sup>25</sup> Nāskafaifono Jesús ato yoini iskafakī: “Kee, māakai afaa tāpiama, mā tatimakōi. Akka a Niospa meka yoimisfāfe yoinifo keskarakai mā chanīmara faima. <sup>26</sup> Akka kenenifo iskafakī: ‘A Niospa nīchia Cristo omiskōikōifiax, chipo Apa Nios fe xanīfokōi ixii,’ ixō aōnoa kenenifo,” Jesús ato askafani.

<sup>27</sup> Nāskaxō ato yoikī taefani a aōnoa yoikī kenenifo, a Moisés aōnoa yoikī keneni yoita, a Niospa meka yoimisfāfe aōnoa yoikī kenenifori; nāfo ato fe kakī ato yoifoni.



28 Mā chaima pexe rasi ano nokokakī nā rafeta shinānifo: “Noko finōfainikaira,” ikaxō. 29 Akka nā rafeta nētefanifo iskafakī yoivanā: “Kayamafe. Nono nofe nētefe mā yātapakei kiki. Mā fakishaki,” faifono Jesús nāno ato fe nēteni. 30 Nāskata mā mīsa ano tsaofono pixakakī Jesús pāa tso-mainīfōfā, Apa Nios kīfīkī. “Aicho,” fata, nāskaxō pāa kaxkepakexō ato ināni pinōfo. 31 Ato askafaito nāskakē koshikōi Jesús tāpinifo. Akka mā tāpiafono ato makinoax yamarisatani. Nāskakē anā tsōa ōinima. 32 Nāskakē āa rafe yoinānifo: “No fe fāi okī a Niospa mekaōnoa yoikī kenenifo keskara noko yoifeaito nō mea nōko ōiti fepeisharakōia. Āfe meka sharakōi,” ikanax yoinānifo.

33 Nāskakanax Jerusalén ano anā fenifo. Mā fēkaxō ato fichitoshinifo, nā Jesúsxō tāpimisfo once a ato fe rafeafo fe ĭchanākaxō, 34 iskafakī yoiaifono: “Chanīma, mā nōko Ifo otoa, mā Simón ōimana,” ixō yoinifo.

35 Nāskaifono nā rafetari ato yoinifo nā Jesús ato fe fāi kaito ōitanaifo: “Mā nō ōia noko pāa torexopakeaito,” ixō ato yoinifo.

*Jesús aōxō tāpimisfoki nokoni*

*(Mt. 28.16-20; Mr. 16.14-18; Jn. 20.19-23)*

36 Nā ato yoiaifono, Jesús ato nakirafekōi nirisatani. Nāskaxō ato yoisharakōini iskafakī: “Inimakōikāfe,” ato fani.

37 Ato askafaino ratekōinifo, “Niafaka chaka nokoki nokoara,” ikanax. 38 Askaifono Jesús ato yoini: “ĶAfeskai mā rateimē? ĶAfeskakī māto ōiti mēraxō mā chanīmara fatiromamē? 39 Ōikapo ēfe mēke yafi ēfe tae. Ēkīa. Ea ramākapo. Akka ōikapo na rāfo tsefeto. Akka niafakakai namiyata xaoyama, nā mā ea ōiai keskara,” ixō ato yoini.

40 Ato askafakī yoivanā, āfe mēke toa yafi āfe tae toa ato ispani. 41 Ato askafakī yoiaino āto ōiti mēraxō shinānifo: “Jesúsmara,” ikaxō. Nāskaxō chanīmara fakeratama akiki inimakōinifo. Nāskaifono Jesús ato yōkani: “ĶNono mā afaayamamē ē pipanā?” ato faito, 42 foe xoia pishta inānifo. 43 Mā fixō āto ferotaifi pini.

44 Nāskaxō afianā ato yoini: “Mēfi mato yoiyomiskī mato fe iyoxō eōnoa yoikī Moisésnō nā a Niospa meka yoimisfonō, eōnoa fanāiti kenenifo keskai nē askakōi,” ixō Jesús ato yoini.

45 Nāskakē āfe shināmā a kenenifo keskara ato shināmanaino tāpikōinifo. 46 Ato yoikī iskafani: “Eōnoa yoikī kenekī iskafanifo: ‘Cristo a Niospa nīchia mā nafiax tres nia oxata anā otoxii,’ ixō eōnoa yoikī kenenifo. 47 Akka ēfe aneōxō ato yoikāfe. Jerusalén anoxō ato yoikī taefakāfe. Nāskaxori nā maniafo tii anoafori ato yoifofāsafakāfe āto chaka xatekaxō anā Nios nikasharakōinōfo, nāskaifono āto chaka ē ato soaxonikai. 48 Akka nā ē mato yoiaito, mā ōiai a mā nikaifori fetsafo yoipakexakāfe. 49 Akka ēfe Yōshi Shara ē matoki nīchi

ẽfe Epa yoiyoni keskafakĩ. Akka mã nono Jerusalén ano nēteyokãfe, ẽfe shara matoki nĩchionõ nai mēraxõ mã ẽ mato yoiyai keskafakĩ mã fetsafo eõnoa mã ato yoinõ,” ixõ Jesús ato yoini.

*Jesús nai mēra kani*

*(Mr: 16.19-20)*

<sup>50</sup> Nãskaxõ Jesús ato iyoni Jerusalén anoxõ Betania pasotai. Nãnoxõ Jesús mēshainãkafã Apa Nios yoini iskafakĩ: “Epa Niospa, eõxõ tãpimisfo ato kexesharapakexafe.” <sup>51</sup> Nãskafakĩ yoiyanã ato makinoax Jesús Apa Nios ari kani. <sup>52</sup> Akka a aõxõ tãpimisfãfe iskafakĩ yoinifo: “Jesús, mĩ nõko Ifo sharakõi, nõ mĩo noikõi,” ixõ yoikanax chipo Jerusalén ano fonifo in-imakõiyã. <sup>53</sup> Nãskakẽ mēxotaima Nios kĩfiti pexefã mēraxõ Nios yoisharapaonifo. Nã tii.

## Juan Jesúsnoa Yoikĩ Keneni

### *Jesucristoõnoa Juan keneni*

<sup>1</sup> (Ēkĩa Juan. Iskaratĩa Jesucristoõnoa ě mato yoi mã tãpinõ. Cristo ģfe ane ipaoni, Meka. Nãato Niosnoa noko tãpimani.)

Afaa oniataima na Meka aneya iyopaoni. Apa Nios fe iyopaoni. Nãrifi Nioski. <sup>2</sup> Taefenakõĩ Nios fe iyopaonixakĩ, iskaratĩari afe ika. Afaa oniamatai nã Meka aneya Apa Nios fe iyopaoni. <sup>3</sup> Aõxõ Epa Niospa keyokõĩ onifani. Akka Jesúsmaisxõ afaa onifanima. Nãskaxõ Jesús feta Niospa afama mĩshti onifani. <sup>4</sup> Aõnoax keyokõĩ niafo. Niospa yorafo tii shinãmapaiyai keskafakĩ Jesúsxõ ato shinãmatiro ģto õiti xafakĩakõĩ inõfo. <sup>5</sup> Ąfe õiti xafakĩakõĩfiãx yora chakafo mēra Jesucristo ipaoni. Yora chakafãfe ģto õiti fakish keskara, shara shinãkanima. Askafiano yora chakafãfe Jesucristo xĩtirofoma yorafo shara shinãmanaino ģto õiti anã fakish keskara inõfoma.

### *Niospa Juan Maotista nĩchini ato yoinõ*

<sup>6-7</sup> Epa Niospa Juan nĩchini Jesucristoõnoa yorafo yoinõ iskafakĩ: “Ąfe õiti xafakĩakõĩ. Epa Niospa mato shinãmapaiyai keskara aõxõ mato shinãmatiro,” ixõ Juan ato yoini Jesús chanĩmara fanõfo.

<sup>8</sup> Juankai Cristoma, Niospa nĩchini Jesucristoõnoa ato yoinõ. <sup>9</sup> Cristo fistichi yorafo shinãmatiro ģto õiti xafakĩakõĩ inõfo. “Mã oi,” ixõ Juan ato yoini. <sup>10</sup> Oaito yorafãfe tãpinifoma. Niospa Jesúsxõ ato onifafiano tsõa tãpinima Jesús. <sup>11</sup> Nã mai onifani ano nokoni. Nãno nokofiaito ģfe yorafãfe, nãfãfe ifikaspanifo. <sup>12</sup> Askafafiaifono a ifipaiyaiãfe Jesús ato yoini iskafakĩ: “Mã ea noikĩ chanĩmara faa. Nãskakē ģfe Epa Niospa fakefo mã itiro ea chanĩmara faax,” ixõ Jesús ato yoini. <sup>13</sup> Niospa fakefo yorafãfe fakefo keskarama. Yorafãfe fakefo yora keskara, yõramãĩ ato fake faano. Akka Nios fistichi ato fake fatiro. Yõrakai Niospa fakefo fake fatiroma. Nã Jesús chanĩmara faafo tii Epa Niospa ģto shinã ato fetsafaxotiro ģfe fakefo inõfo.

<sup>14</sup> Nãskakē na Meka aneya Apa Nios ika anoax mai ano oni yorakõĩ ixikĩ. Nonoax nofe iyopaoni. Apa Nios keskara sharakõĩ mã nõ õipaoni. Nãato yorafo noikõimis. Ąfe meka chanĩmakõĩ. Nã fisti Epa Niospa Fakekõĩ. Apa Nios imis keskara nãskakõĩriai sharakõĩ imiski.

### *Juan Maotista Jesucristoõnoa ato yoini*

<sup>15</sup> Jesúsnoa Juan ato yoini iskafakĩ: “Ea nikakãfe, õikapo. Nãõnoa ģ mato yoimis. Iskafakĩ ģ mato yoimis: ‘Mã oi.

Ē taeyoi ofiano ea finōkōia ē fakeamano amāi Apa Nios fe iyopaonixakī,” ixō Juan ato yoini.

<sup>16</sup> Jesús keyokōi noko shara famiski. Noko noikōixō noko sharafa fafāfāini. Akka keyokōichi nōko ōiti inimasharakōiaito nō meemis. <sup>17</sup> Epa Niospa noko amapaiyai keskara Moisés yoini. Nāskakē Niospa noko yoini keskara Moisés noko tāpimani. Nāskakē Niospa noko ōimapai noko noikōi afi chanīmakī. Nāskaxō Jesucristo nokoki nīchini. Jesucristo noko keyokōi noimis. Nāskaxō noko ōimatiro Nios chanīmakōi. Askatari Epa Niospa noko noi. <sup>18</sup> Tsōakai Epa Nios ōimisma. Askafiax āfe Fakekōi nā afe rafemis, arifi Nioskōi. Apa Nios-noa noko yoimis. Aōxō nō tāpitiro afe keskaramāki Epa Nios.

*Juan Maotista judeofāfe āto xanīfofo yoini*

*(Mt. 3.11-12; Mr. 1.7-8; Lc. 3.15-17)*

<sup>19</sup> Nā judeofāfe āto xanīfofāfe Jerusalén anoxō nā ato Nios kīfixomisfo nīchinifo, Juan ano. Akka nā Levifori ato nīchinifo Juan yōkatanōfo: “¿Mī tsoamē?” fatanōfo.

<sup>20</sup> Askafaifono Juan ato kemani: “Ēkai Cristoma. A nō manai nōko xanīfo ēkai aama,” ato faito, <sup>21</sup> “¿Akka mī Cristoma, mī tsoamē? ¿Mīmē Elías?” faifāfe, “Ēkai Elíasma,” ato faito, “¿Akka mī Elíasmaax mī tsoamē? ¿Mīmē nā nō manamis Niospa meka yoimis, nā nokoki oai?” faifāfe, “Maa, ēma,” ato fani.

<sup>22</sup> Ato askafaino anā yōkanifo: “¿Akka mī tsoamē? Noko yoife a noko nīchiafo nō ato yoitanō. Mī tsoamāki noko tāpimafe,” fanifo.

<sup>23</sup> Askafaifono Isaías kirika keneni keskara nānorikōi Juan ato yoini iskafakī: “Niospa mato yoipaiyai keskara ē mato yoinō. Tsōa istoma anoxō ē fāsikōi mekaikai: ‘Nōko Ifo nokoki oxii. Īkisi itipinīsharakāfe. Mā ipaoni keskara afianā iyamakāfe. Keyokōichi māto chaka potakāfe, mēstekōishara ishaxikakī,’” ixō Juan ato yoini.

<sup>24-25</sup> Nikakata judeofāfe nā fariseofo a Juanki nīchinifo yōkatanōfo iskafakakī: “Mī Cristomamamāki, mī Eliasmamamāki nā nō manamis Niospa meka yoimis mīmaraka, akka, ¿afeskakī mī yorafo faka mēra ikimapakeimē maotisafakī?” ixō yōkakāfe ato fanifo. <sup>26</sup> Juan ato kemani: “Ēfi ato maotisafapaikai. Ē ato askafafiaino nono fetsa nokoki nokoi. Māka tāpiana. <sup>27</sup> Ē iskaratīa mato Niospa meka yoifafāini. Askafiano aato chipo mato yoixii. Fāsi ea finōkōia. Ē afaa tāpiana ē sharakeroko ē āfe zapato risfi nexaxopanā,” ixō Juan ato yoini.

<sup>28</sup> Nā pexe rasi Betania faka Jordán okirishtaxō Juan ato faka mēra ikimapakekī maotisafani. Nānoax ato fe yoināni.

*Niospa āfe oveja fake keskara, Jesús*

<sup>29</sup> Askata pena fetsa Juanki Jesús kani. Jesús fichixō Juan yorafo yoini iskafakī: “Ōikapo. Nā Niospa āfe oveja tetomashta keskara oa. Nato keyokōi yorafo chaka soaxonō Epa Niospa nīchia nokoōnoax naxō nōko chaka noko soaxonō. <sup>30</sup> Ē mato aōnoa yoimis. Ē mato yoia iskafakī: ‘Chipo oi ea keskarama finakōia, nāmāi ě fakeamano iyopaonixakī.’ Nakīa mā oa. <sup>31</sup> Ērifi Cristo tāpixoma yorafo maotisafapai a nōko kaifo judeofāfe tāpinōfora,” ixō Juan ato yoini Cristoōnoa yoikī.

<sup>32</sup> Ato yoixō anā Jesúsnoa Juan ato yoini: “Niospa Yōshi Shara nai mēranoax rifi keskara Jesúski fotopakekafanaito ě ōia. <sup>33</sup> Ēri ōiyamano Epa Niospa ea yoiti iskafakī: ‘Fatofāfe ea chanīmara faimākai mī faka mēra ato ikimapaketiro maotisafakī. Akka mikiki fetsa nokoano ěfe Yōshi Shara nā feronāfakeki fotopakekafāxii. Afe nītaxii. Nā mī ōikī mī tāpixii nāato ěfe Yōshi Shara matoya rafemaxii āfe shinā shara māto shinā mēra nanenō,’ ixō ea yoia. Epa Niospa ea anori yoiyamakē Jesús nā Niospa Fake ěri tāpikeranama. <sup>34</sup> Askafixō mē ōia. Askaxō ě mato chanīmakōi yoi nafi Niospa Fakeki,” ixō Juan ato yoini.

### *Jesúsxō tāpikī taefanifo*

<sup>35</sup> Pena fetsa nāno Juan aōxō tāpimisfo rafe ini. <sup>36</sup> Afe niafono Jesús ato finōfaini. Ato finōfainaito Juan ato yoini: “Ōikapo. Oa Niospa ina oveja fake keskara,” ixō Juan ato yoini.

<sup>37</sup> Juan ato yoiaito nikakata Jesús chīfafāinifo. <sup>38</sup> Jesús ifi-akekafā ato ōikī ato yōkani: “¿Tsoa mā fenaimē?” ato faito, “Maestro, ¿fanī mī ikamē?” faifāfe, <sup>39</sup> “Ono ōifokāfe, ě mato ispanō,” ixō ato iyoni. Askata afe fokakī ōiafo nā ika ano afe nokoni. Mā nokoafono mā xini kai ini. Nāno afe yātapakenifo.

<sup>40</sup> Nā rafe Juan ato yoia keskara nikakata Jesús chīfafāinifo. Fetsa āfe ane Andrés. Nā Andrés Simón Pedro āfe exto ini. <sup>41</sup> Jesús ika ano nokokata Andrés āfe ochi Simón fenaikai kani. Akiki nokoxō yoini: “A Niospa nokoki nīchia Mesías mā nō fichia. Nā Cristora nō famis. Ōiyotāfe,” fani. <sup>42</sup> Askata Andrés Simón Jesúski nokokini. Akiki nokoaino Jesús Simón yoini: “Mī Simón, Jonásfa fake. Iskaratīa ě mia ane fetsafaxonō. Nō mia Cefas fanō,” fani. (Cefas nāfa mekapa yoimis Pedro fakī.)

### *Jesús Felipe yafi Natanael kenani afe fonōfo*

<sup>43</sup> “Ē Galilea ano kaira,” ixō Jesús shināni. Kapaikī Felipe fichixō yoini: “Efe kafe, eōxō tāpisharakōixikī,” fani. Askafaino afe kani. <sup>44</sup> Felipenō Andrésno Pedronō pexe rasi āfe ane Betsaida ano imisfo.

<sup>45</sup> Askata Felipe Natanael fichixō yoini: “Moisés Niospa yoini keskara kenekī iskafani: ‘Ē māto xanīfokōi Cristo matoki nīchixira,’ ixō Niospa yoini anori Moisés keneni. Nānorikōi

Niospa meka yoimisfāfe kenenifo. Nākai mā nō fichia. Jesús José fake Nazarete ano ika. Nāōnoa Moisés feta Niospa meka yoimis fetsafāfe kenenifo,” faito, <sup>46</sup> “¿Afaa shara Nazarete anoax oimē?” ixō yōkaito, “Ofe, ōixikī,” Felipe fani.

<sup>47</sup> Natanael akiki nokoaino Jesús ōixō aōnoa yoini: “Nafi israelifāfe fakeki. Nato afaa chaka yoimisma. Chanīmakōi fisti shināfafāimiskī. Tsoakai pāramisma,” ixō Jesús aōnoa yoini.

<sup>48</sup> Askafaito nikakī Natanael kemani: “¿Afeskaxō mī ea ōiyamafikatsaxakī mī ea tāpiamē?” faito, “Mia Felipe fichiyomanō ē mia ōikī taefaita ifi higuera nāmānoa ē mia ōita,” Jesús fani. (Akka Jesús Natanael chai ixō tāpini ōiyamafikī.)

<sup>49</sup> Askafaito, “Maestro, mīfi Niospa fakeki. Askatari mīfi israelifāfe āto xanīfokī,” faito, <sup>50</sup> Jesús kemani: “ ‘Mī ifi higuera nāmā tsoaō ē mia ōia,’ ixō ē mia yoia, ¿nā nikaxō mī ea chanīmara faamē? Afara shara fetsa finakōia mī ōixii. <sup>51</sup> Chanīmakōi ē mia yoi. Ēfi yōra fakefiāx ē Niospa Fakekōi. Nai fepekemeanō mī Niospa ājirifo ōixii. Epa Nios ika anoax āfe ājiri ekeki fotota, māpeinīfōfā fotota, māpeinīfōfā ikaito mī ōixii,” ixō Jesús fani.

## 2

### *Jesús āfe mekapa fakakōifekē fimi ene onifani*

<sup>1-2</sup> Tres nia oxakata Caná pexe rasi anoxō Galilea mai anoxō feronāfāke kēro fiaino yorafo ano fisti ichanānifo. Jesús ikaino afa ikaino Jesúsxō tāpimisfori nāfo ato kenamanafono fenifo. <sup>3</sup> Fimi ene mā netsoafono, āfa Jesús yoini iskafakī: “Nafokai fimi eneyama,” fani. <sup>4</sup> Āfa askafaito Jesús kemani: “Efa, ¿afeskakī mī ea yōkaimē afara fetsa afeskarafanōra ixō? Iskaratīa ē afara fetsa fena ayoima. Tsōa atiroma keskara ē fena akimakai,” fani. <sup>5</sup> Askafaito Jesús āfe āfa a yonoxomisfo ato yoikī iskafani: “Nā Jesús mato yoiai keskara faxokāfe,” ato fani.

<sup>6</sup> Nāno tokiri kesho seis efapafo chaimashta tsoaō ini. Treinta galon a mēra ikitiro ini. Nāskata nā kesho mēra faka fikaxō, judeofāfe āto chokati mēraxō chokaketsanifo. Nāskakī judeofāfe chokasharaiāfe Niospa ato ōi nafo sharara ato fanō, āto xinifo ipaonifo keskara.

<sup>7</sup> Nāskata Jesús a yonoxomisfo yoini: “Nā keshofo mēra faka fospifakāfe,” ato faito, faka fospikōi fanifo keshofo mēra.

<sup>8</sup> Askata Jesús ato yoini: “A ichanāifono ato kexemis na faka ayamatakāfe,” ato faino, nāskata a ato kexemis faka foxonifo.

<sup>9</sup> A ato kexemisto ayaxō mea faka inima fimi enekōi ini. Nāskakē tāpinima Jesús faka fetsafaano. (Akka nā yonoxomisfāfe ōinifo Jesús faka fetsafaito. Nāskakē tāpinifo.) Nāskakē tāpixoma a ato kexemisto a Jesús faka fetsafaa a rama kēro fīai

foxoni. <sup>10</sup> Nāskaxō yoini: “Fistatiā nā fimi ene sharakōi taefakī nō ato ayamamis. Akka nā fimi ene sharakōi mā mitoxō, nā fimi ene sharama chipo nō ato ayamamis. Akka iskaratiā fimi ene sharakapakōi mī ato ayamani,” fani.

<sup>11</sup> Jesús nā pexe rasi Caná anoxō tsōa atiroma keskara taefaito ōinifo Jesúsmai finakōixō tsōa afama mīshti atiroma keskara atiro. Nāskakē ōikaxō aōxō tāpimisfāfe chanīmara fanifo.

<sup>12</sup> Askata Jesús afanō āfe extofonō aōxō tāpimisfonō nā pexe rasi āfe ane Capernaúm ano fonifo. Nāno oxa ranāyonifo.

*Jesús a Nios kīfiti pexefā mēraxō a ato ināifo ato potani*  
(Mt. 21.12-13; Mr. 11.15-18; Lc. 19.45-46)

<sup>13</sup> Mā judeofāfe āto fista Pascua mā chaima ikaino Jesús nā pexe rasi Jerusalén ano kani. <sup>14</sup> Nānoxō Nios kīfiti pexefā mēraxō fakkafo, ovejafo, rififo afo ato minikaxō kori finifo. Nānori a kori kāmiafamisfori tsaofono Jesús ato fichini. <sup>15</sup> Jesús ato fichita risfi koshati fata ato koshapaita a ato inafō ato pōtaketsani. Ovejafo potakī, fakkafo potakī fani. Askata yorafori potani. Mīsa kamaki āto kori māchiafo saakī fetsani. Mīsari kexkafaya kekēfōfā potani. <sup>16</sup> Nā rififāfe āto ifofo ato yoini: “Na māto inafoya ēfe Epa Niospa pexe mēranoax fotakāfe. ¿Afeskakī ēfe Ēpa pexe mēraxō mā afarafo ato miniket-saimē kori fixikī? Afianā ēfe Ēpa pexe mēranoax afarafo inānōnāyamakāfe kori fixikī. Na ēfe Epa āfe pexe mēranoaxkai mā afarafo minimitsaima,” ixō Jesús ato yoini.

<sup>17</sup> Ato askafaito nikakata aōxō tāpimisfāfe shinānifo iskakakī: “Chanīma, Niospa meka nānorikōi Jesúsnoa kenenifo iskakakakī: ‘Epa Niosi, ē mī pexe kexesharapai a mēraxō mia fisti shinānōfo. Afara fetsa a mēraxō anōfoma. Afara fetsakai mī pexe mēranoa ē ōipaima,’ ixō kenenifo Jesúsnoa yoikī.”

<sup>18</sup> Jesús askafaito judeofāfe āto xanīfofōfāfe yōkanifo: “¿Afeskakī Nios kīfiti pexefā mēraxō mī ato potaimē? Niospa mia yoiaito afara tsōa atiroma keskara noko ōimafe nō mia chanīmara fanō,” ixō yōkaifāfe <sup>19</sup> Jesús ato yoini: “Mā na pexe pāoikano afianā tres nia oxata ē anā pexe faxii,” ixō Jesús ato yoini.

<sup>20</sup> Ato askafaino, “Kee. Nōko xinifāfe cuarenta y seis xinia anifo Nios kīfiti pexefā fakakī. Akka, ¿mī koshikōi tres nia pexe faimē?” fanifo. <sup>21</sup> Askafafiakakī tsōa tāpinifoma Jesús Niospa pexeñoa yoinima. Aafi anofi yoimeni. <sup>22</sup> Askata Jesús nafiax oxa rafeta tres nia ĩta otoano aōxō tāpimisfāfe shinānifo: “Chanīma, a Jesús ato yoita keskara, nā pexefā pāoikaikiri keparanākī, ‘Ēfi tres nia otoxii,’ ixō yoita. Iskaratiā mā nō tāpia aafi anofi yoimeita,” ixō aōxō tāpimisfāfe shinānifo Jesús otoano. Nāskakē Niospa meka kenenifo

keskara chanĩmara fanifo. Nãskata nã Jesús ato yoini keskara shinãkakĩ: “Chanĩmakõi Jesús noko yoini,” fanifo.

### *Jesús keyokõi yorafo tãpini*

<sup>23</sup> Askata tsõa atiroma keskara afama mĩshti Jesús fani Jerusalén anoxõ fista Pascuatĩa. Nãskara õikaxõ yorafã rasichi, “Na Cristo,” ixõ chanĩmara fanifo. <sup>24</sup> Askafiaifono a yorafãfe ãto shinã mẽraxõ shinãifo keskara Jesús ato tãpini. (“Iskaratĩa ea chanĩmara fakani. Askafikaxõ chipo, ãa chanĩra, ea fakani,” ixõ Jesús ato tãpini.) <sup>25</sup> Yorafãfe ãto shinã mẽraxõ shinãifo keskara tsõa Jesús tãpimatiroma. Areskõi Jesús onãtiro a ãto shinã mẽraxõ shinãifo Jesús tãpikõia. Chanĩmara fayoaifãfe Jesús ato onãni nãskax koshi shinãmakĩ fetsenifo.

## 3

### *Jesús Nicodemo tãpimani*

<sup>1</sup> Nã feronãfake fariseo ini, ãfe ane Nicodemo. Nãri judeofãfe ãto xanĩfo ini. <sup>2</sup> Nãato fakishi oxõ Jesús yõkani: “Maestro, nõ tãpia mĩ noko tãpimanõ mia Niospa nĩchini. Mã nõ tãpia Nios fe rafexoma tsõa afara fetsa atiroma nã mĩ akai keskara fakĩ tsõa atiroma,” faito, <sup>3</sup> Jesús kemani: “Èfi chanĩmakõi mia yoikai. Tsoari oa fake yome rama kãia keskaraxma Nios xanĩfo ano nokotiro, fani.”

<sup>4</sup> Askafaito afianã Nicodemo Jesús kemani: “¿Afeskax afianã feronãfake yometatiromẽ? ¿Mã anifofiax afeskai afianã ãfa xaki mẽra nanetiromẽ, fake yomeax anã kãixikĩ?” ixõ Nicodemo Jesús yõkani.

<sup>5</sup> Askafaito afianã Jesús kemani: “Fake yome rama kãia fakaya kãitiro. (Nãskax yõra fake itiro. Nãskariakĩ ãfe Yõshi Sharaõxõ Niospa mato õiti fetsafaano mã ãfe fake itiro.) Akka Niospa Yõshi Sharapa mãto õiti fetsafayamano mã Nios xanĩfo ano nokotiro. <sup>6</sup> A yõra fake fia nã keskara itiro. Nãskarifiakĩ Niospa Yõshi Sharapa mato fake fiano mãri a keskara itiro. <sup>7</sup> È mia yoiaino mĩ ea nikax, ‘Mĩri oa fake yome rama kãia keskara mĩ itiro,’ ãfe mia yoiano, ‘Aira, ¿afeskax nõ afianã yometatiromẽ?’ iyamafe. <sup>8</sup> Nefeaito tsõa tãpitiroma fakirinoax oimãkai. A nefe kai ariri tsõa tãpiama fakiri nefe kaimãkai. Nãskari fakĩ Niospa yorafo ãfe Yõshi Sharapa ãto shinã fetsafaano tsõa tãpitiroma,” Jesús faito, <sup>9</sup> anã Nicodemo kemani: “¿Afeskax nõ askatiromẽ?” ixõ fani.

<sup>10</sup> Askafaito afianã Jesús kemani: “Mĩ israelifo tãpimamis, ¿afeskakĩ na ãfe mia yoiai mĩ tãpiamamẽ? <sup>11</sup> È mia chanĩmakõi yoi. Nã nõ nikafo nã nõ õiafo nãfo nõ mato yoi. Nãskafekẽ nõ mato yoiaino mã noko chanĩmara faima. <sup>12</sup> Nono mai anoafo afarafo afeskaraito ãfe mia yoiaito mĩ ea chanĩmara



faima. Askatari nai mēranoafori afeskaraito ē mia yoiaito mī ea chanīmara faima.

<sup>13</sup> “Tsoakai nai mēra kaax anā fototiroma. Akka ē fisti ē nai mēranoax fotoa yora fakekōi ikiyoi. Ē afianā chipo kaxii. <sup>14-15</sup> (Nōko kaifo israelifo tsōa istomanoax chaka iyopaonifo. Nāskakē Niospa rono atoki nīchini ato chachinō. Nāskaxō Niospa Moisés yoini iskafakī: ‘Na rofetaxō rono faxō nīchinīfofāfe ifiki ratāfe yorafāfe ōikanax sharanōfo, a ato chachia tii.’) Nāskari fakī ifi cruz ikakī ea mastakaxō ea nīchinīfofāxikani. Nāskakē nā ea chanīmara faafo tii eōnoax Nios fe nīpanakafo,” ixō Jesús ato yoini.

### *Epa Niospa keyokōi yorafo noi*

<sup>16</sup> Anā Jesús ato yoini iskafakī: “Epa Niospa keyokōi yorafo noikī āfe Fake fisti ato nīchixononi nai mēraxō nono mai anoax atoōnoax naiyonō. Nāskakē nā chanīmara faafo tii omiskōipakenakafoma afe nīpanakafo. <sup>17</sup> Niospa āfe Fakekōi mai ano nīchini ato omiskōimatama āto chaka soaxoniyonō aōnoax isharapakexanōfo,” ixō Jesús ato yoini.

<sup>18</sup> Askata anā Jesús ato yoini iskafakī: “Nā Niospa Fake chanīmara faifokai omiskōipakenakafoma. Akka nā nikakaspaifo ato Niospa omiskōimaxii. Niospa Fake nikakaspakanax omiskōipakenakafo. <sup>19</sup> Pena fe fakish osinātiroma. Nāskarifiiai afara chaka fe Niospa fake rafetiroma. Nāskakē Niospa āfe fake nāmā nīchini nā yorafo pena keskara shara inōfo āto chaka xatekanax. Akka yorafāfe āto chaka potakaspakani. Niospa āfe fakeki fekaspakani. Nāskax isharakaspakani, chaka fisti shinākani. Niospa fake ōikaspakani āto chaka xateax isharaxikakima. Nāskakē Niospa ato omiskōimani. <sup>20</sup> Afara chaka fichipaiyaito Niospa Fake ōikaspai. Nā chakafaifo fisti fichipaikani. <sup>21</sup> Nā shara nīpaiyaifo Niospa Fakeki fekani. Ato ōimasharaxikakī Niospa ato imasharanō,” ixō Jesús ato yoini.

### *Jesús Judea mai ari kani*

<sup>22</sup> Nāskata Jesús fe aōxō tāpimisfo Judea mai ari fonifo. Nāno ato fe iyoni. Nānoxō āto chaka potapaiyaiāfe ato maotisafapani. <sup>23-24</sup> Juan karaxa mēra ikimayofafomano nāatori yorafo maotisafapani. Nā Enón nā Salim chaimashta nika ini. Nāno faka noa ini. Nāskata nānoxō ato maotisafapani. Nāno yorafo akiki feaifāfe ato maotisafapani.

### *Juan Maotista Jesúsnoa anā ato yoini*

<sup>25</sup> Nāskata Juan aōxō tāpimisfo āto kaifo judeo fetsafo fe feratenānifo. Afeskaxō mā chaka soatiromē ikanax feratenānifo. <sup>26</sup> Nāskaxō Juan ano fōkaxō Juan yoinifo: “Maestro, nō mia yoipai. Faka Jordán okixori mī Jesús fichita. Fichixō mī noko yoita: ‘Nā Cristo Niospa noko nīchixona nā nō manamis,’ mī noko feita. Nāatori iskaratīa yorafo maotisafapai. Oa yorafo

keyokōi akiki fokani,” fanifo. <sup>27</sup> Askafaifono nikakī Juan ato kemani iskafakī: “Nios fistichi yonomatiro a yonoxonō. Akka Niospa axoyamaino afaa afeska fatiroma. <sup>28</sup> Akka ěkai Cristoma. Epa Niospa ea yoia ě Cristoōnoa yorafo tāpimanō āto chaka xatenōfo, Cristo nokoaito chanīmara fanōfo. Nānori ě mato yoiaito mā nikamis. <sup>29</sup> Afianā ě mato yoinō ea nikapo. Mā mā tāpia feronāfake āfe yama yoikī iskafatiro: ‘Aicho. Na kēro mī ea yoixona iskaratīa ěfe āfi iki,’ ixō yoiaino āfe yamari aōnoax inimatiro. Nāskarifiāi ě Cristoyamafīax fetsafāfe nā Cristo Jesús chanīmara faifono ěri fāsi akiki inimakōi. <sup>30</sup> Akka nā Cristo finakōia. ěkai Cristoma. ě afaa tāpiama, Cristo finakōia. Akka ě afianā afaa yoitiroma ea tanatamaroko, Cristo fisti nikakōinōfo,” ixō Juan ato yoini.

### *Jesús nai mēranoax fotoni*

<sup>31</sup> Anā Jesús ato yoini iskafakī: “A nai mēranoax nāmā fo-toato nāato nāmānoafo ato finōa. Akka nā nāmānoax fakeafāfe nāmānoa fisti yoitirofo. Akka nā nai mēranoax fotoato nāatofi keyokōi finōa. <sup>32</sup> Nāato noko yoitiro a ōiafo, a nikafori. Nāskakē fisti rasichi chanīmara fakani. <sup>33</sup> Niospa meka chanīmara fakī nōko ōiti mēraxō nō tāpisharakōitiro Niospa noko pāramisma, āfe meka chanīmakōi.

<sup>34</sup> “A Niospa nīchiato Niospa meka yoi Niospa āfe Yōshi Shara a mēra naneano. Nāskaxō tāpikōia. <sup>35</sup> Epa Niospa āfe Fake noikī nīchini nai mēra ikafāfe āto Ifo inō, nāmānoafāferi āto Ifo inō. <sup>36</sup> Nāskakē Niospa Fake chanīmara faax nō afe nipaxatiro. Akka tsōa chanīmara fayamakē Niospa ato omiskōimapakenaka. Akka Jesús nikayamakanax nakanax afe nīpanakafoma fakishifā mēranoax omiskōipakenakafo.”

## 4

### *Jesús kēro samāritanōki nokoni*

<sup>1-3</sup> Fariseofāfe nikanifo Juan yorafo maotisafapaito. Akka yora ichapa Jesús maotisafapaito fariseofāfe nikanifo. Akka Jesús kai ato maotisafapanima, nā aōxō tāpimisfāfe ato maotisafapanifo. Aōnoa yoinifo keskai mā Jesús tāpiāx aōxō tāpimisfo fe Judea anoax Galilea ano kani. <sup>4</sup> Judea mai anoax Galilea ano kakī Jesús Samāria finōfaini.

<sup>5</sup> Askata Samāria ano Jesús nokoni. Nāno nā pexe rasi āfe ane Sicar ano nokoni. Nāno chaimashta Jacobo āfe tare ipaoni. Nā tare āfe fake José ināni māmāi anifoxō. <sup>6</sup> Nānori Jacobo kini fani nā kini mēranoa faka fixikī. Nā faka fiti ano xini keya Jesús nokoni. Chai inoaxmāi oax xokenāi Jesús nāno tsaoni. <sup>7-8</sup> Jesús teneyoaino, a aōxō tāpimisfāfe a piaifo pexe rasi anoā fiifokani fonifo. Mā foafono nāno kēro samāritanō akiki nokoni faka fiyoi. Faka fiti ketokonō Jesús tsaono akiki

nokoni. Nāskaxō Jesús a kēro yoini: “Ea faka fexōfe ē ayanō,” fani.

<sup>9</sup> Judeofo fe samāritanōfo ōikaspa faatanāmisfo. Ato fetakai pimisfoma. Nāskakē nā kēromā Jesús yoini: “Mīfi judeoki. Ēfi samāritanōki. ¿Afeskakī mī, ‘Ea faka fexōfe,’ mī ea faimē?” faito, <sup>10</sup> Jesús kemani: “Niospa mia ināpaiyai mī tāpiama mī eari tāpiama. Akka mī ea yōkaito ē mia faka shara inākerana. Nā faka sharapa yorafo nimasharatiro,” Jesús fani. <sup>11</sup> Nāskafaito kēromā Jesús kemani: “Mī keshoyata mī risfi yama. Kini chaikōi, ¿afeskafaxō mī faka kini mēranoa fimmē a noko ni-masharatiro a mī ea yoiai keskara?” kēromā fani.

<sup>12</sup> Nāskata anā kēromā yoini: “Nōko xini Jacobo kini faxō faka fixō ayapaoni. Āfe fakefāferi ayapaonifo. Āto inafari ayamapaonifo. Nōri nā faka ayai. ¿Mī nōko xini Jacobo finōamē?” kēromā fani.

<sup>13</sup> Askafaito Jesús kemani iskafakī: “Na faka kini mēranoa ayax chipo afianā mā nōamā iki. <sup>14</sup> Nāskafixō na faka ē ato ayamani anā nōamākiyamanōfo. Chanīmakōi, nā faka ayakanax isharapakexanōfo,” fani.

<sup>15</sup> Askafaito kēromā kemani: “Mī feronāfake shara. Na faka shara ea ināfe ē ayax anā ē nōamākiyamanō ē afianā nonoa faka fiyamanō,” fani. (Jesús fakakiri keparanākī yoiaito nā kēromā tāpinima.)

<sup>16</sup> Nāskaxō Jesús yoini: “Mī fene ifitāfe afianā nētekaini kaxō mī fene ifitāfe afe oxikī,” faito, <sup>17</sup> “Ēkai feneyama,” faito, “Mī chanīmakōi yoi. Mīkai feneyama,” Jesús fani. <sup>18</sup> “Mī fene cincoya mia fimisfo mī fenefo. Akka iskaratīa mī fetsa fe ika a mī fenema fe. Ea mīa yoikōi mī feneyama,” ixō Jesús yoiaino, <sup>19</sup> “Ē iskaratīa ē mia tāpia mī Niospa meka ato yoimis. <sup>20</sup> Nōko xinifāfe na machi anoxō Nios kīfipaonifo. Akka mī kaifo judeofāfe yoimisfo iskakakī: ‘Jerusalén anoxō nō Nios kīfitiro,’ ixō yoimisfo,” faito, <sup>21</sup> “Ē mia yoinō, ea chanīmara fafe. Na machi fisti anoxos nō Nios kīfitiroma. Jerusalén fisti anoxori nō Nios kīfitiroma. Akka fanīma mīshtixō nō Nios kīfitiro. <sup>22</sup> Māfi samāritanōfoki. Nios kīfifikī nōko Epa Nios mā tāpisharama. Akka nōfi judeofoki. Nō nōko Epa Nios tāpikōia. Niospa noko tāpimani afeskaxō yorafāfe āto chaka soatirofomāki Epa Nios fe ipaxakakī. <sup>23</sup> Chipo afetiāra nō Nios kīfikōikē, āfe Yōshi Shara fistichi noko tāpimatiro nō kīfisharanō. Āfe Yōshi Sharaōxō nō Epa Nios kīfikōiaito nāskara Niospa fichipai. <sup>24</sup> Nios yorama. Niosfi fero mēsho keskara sharakī. Nāskakē āfe Yōshi Sharaōxō nō Nios kīfitiro,” Jesús fani.

<sup>25</sup> Askafaito kēromā kemani: “Mē tāpia a Niospa nīchia chipo nokoki nokoxii. Nā āfe ane Cristo. Nāato afama mīshti noko tāpimaxii,” faito, <sup>26</sup> “Ēfi Cristoki, ē mefe mekai,” ixō Jesús yoini.

<sup>27</sup> Askata Jesús kēro fe mekaino aōxō tāpimisfo fenifo. Fēkaxō ōiafo Jesús a kēro samāritanō fe mekaito ōikani ratenifo. Nāskax yoinānifo: “¿Afeskai mī na kēro fe mekaimē?” nō Jesús faima,” fanifo. Nāskata shinānifo: “Nā kēro samāritanō mī yoia keskarari nokori yoife, nōkai faima,” inifo.

<sup>28-29</sup> Askata nā kēromā āfe kesho potafaini āfe pexe rasi ano kakī. Āfe pexe ano kaxō āfe yorafo yoini: “Oa feronāfāke ekeki nokoxō ea yoia. Nā ē afama mīshti ē chakafamis mā ea kāimaxōa. Nāraka Cristo, ōifokāfe,” ixō ato iyoni. <sup>30</sup> Nikakata nā pexe rasi anoax Jesúski fenifo.

<sup>31</sup> Mā kēro kaano aōxō tāpimisfāfe Jesús yoinifo: “Maestro, piyofe,” faifono, <sup>32</sup> “Ē aya a ē piāi. Nā ē piāi mā tāpiama,” ato fani. <sup>33</sup> Ato askafaito nikakani yoinānifo: “Kee. ¿Tsōa a piāi ināfanamē?” ikanax yoinānifo.

<sup>34</sup> Askata Jesús ato yoini: “Ēfe Epa Niospa ea nīchini ē āfe yono shara yonoxonō. Nāato ea amapaiyai keskara ē apai. Nā ē piāi keskara,” Jesús ato fani. (“Mā nō piāx nō anā fonāikima, nō shara iki. Nāskarifiāi Niospa noko amapaiyai keskara nō iki nōko ōiti sharakōi iki. Nāskara noko amapaiyai nō aki, a nō piāi keskara,” ato fani.)

<sup>35</sup> Anā Jesús ato yoini: “Māfi iskamiski: ‘Mā nōko tarepanoax mā nōko xiki choshiaki. Mā cuatro oxe akaki nō finō,’ mā imis. ¿Nāskarifiakī mā shināimē: ‘Nō Jesúsnoa yorafo Niospa meka yoiano chipo chanīmara faxikani,’ ixō mā shināimē? Akka ē mato yoi: ‘Ōikapo, mā iskaratīa itipinīsharakōiafo Nios Ifofaxikakī,’ ato fani. <sup>36</sup> Akka fētsa āfe yama āfe tare kexexotiro, āfe xiki topixoxiki. Chipo kopifaxinō, tare ifāfe. Nāskarifiakī fētsa taefakī yorafo Niospa meka yoitiro. Ato yoifiaino chanīmara fayokanima. Askatari chipo fetsa oxō ato yoiaito chanīmara fakani. Nā rafe Niospa ato shara imapakenaka nā rafetamāi Niospa meka ato yoimisfono. <sup>37</sup> Nāskakē chanīkima mā yoimis iskakī: ‘Fētsa xiki fanano chipo fētsa nā xiki fimi fitiro.’ Nāskarifiakī fētsa Niospa meka yoikī taefaano fētsari chipo rama oxō nāatori ato chanīmara famatiro. <sup>38</sup> Akka mā taefakī ato yoimisma iskaratīa ē mato nīchia mā ato chanīmara famanō. Taefakī fetsafāfe Niospa meka ato tāpimani, mā ato tāpimayoamano. Mā ato tāpimayoxoma koshikōi mā ato chanīmara famatiro māmāi taefakī ato yoiyomisfono,” ixō Jesús ato yoini.

<sup>39</sup> Nāskata Jesús aōxō tāpimisfo yoiaino nā kēro samāritanō āfe kaifo yoikai kani pexe rasi ano. Kaxō ato yoini: “Oa feronāfāke mā ea tāpixō ea yoia nā ē afara amis keskara. Ea ōiyamafikatsaxakī mā ea tāpia,” ato fani. Ato askafaino Jesús fisti rasichi chanīmara fanifo.

<sup>40</sup> Askata nã kěro nikakanax Jesúski fonifo áfe meka nikakani. Akiki nokoxõ yoinifo: “Nofe nono iyofe,” fanifo. Askafaifono nikata Jesús ato fe oxa rafeyoni. <sup>41</sup> Áfe meka nikakaxõ yora ichapato chanĩmara fanifo. <sup>42</sup> Askata chanĩmara fakaxõ yorafáfe nã kěro yoinifo: “Mĩ Jesúsnoa noko yoia fisti nõ chanĩmara faima. Nõakõĩ mã nõ áfe meka nikakõia. Nãskakě iskaratĩa nõ chanĩmara fai. Nãato na yorafo ikafo tii ato ifitiro afe ĩpaxanõfo.”

*Jesús sharafani xanĩfo yonoxomisto fake*

<sup>43</sup> Askata mã oxa rafeta Jesús nã samãritanõfo anoax Galilea ano kani. <sup>44</sup> Jesús Galilea anoax yosini, nãnoxori yonopaoni. Afe yorafo nãno inifo. Askata Jesús ato yoini iskafakĩ: “A afe pexkonifáfe a ato Nios yoixomis yoikakĩ iskafatirofo: ‘Akai tsoama, afi nofe pexkoniki,’ fatirofo,” ixõ ato Jesús yoini.

<sup>45</sup> Askata Jesús Galilea ano nokoni. Jerusalén anoax Galilea ano Jesús nokoamano yorafo Galilea anoax Jerusalén ano fonifo fista aki fokani. Nãnoxõ tsõa atiroma keskara Jesús Niosxõ ani. Nã afama mĩshti Jesús anoxõ akaito õinifo. Nãskakě Galilea ano Jesús atoki nokoano akiki inimanifo: “Aicho, mã mĩ oakĩ,” Galilea anoxõ fanifo.

*Jesús xanĩfáfe fake sharafani*

<sup>46</sup> Askata nã pexe rasi áfe ane Caná ano Jesús nokoni nã Galilea mai ano. A áfe mekapa faka fetsafani ano fimi ene keskara fakĩ nãno Jesús nokoni. Nãnoa xanĩfo fětsa Jesús õiyoi oni. Nã pexe rasi áfe ane Capernaúm anoax oni. Nãnoax xanĩfáfe fake isinĩ ini.

<sup>47</sup> Askata xanĩfáfe nikani Jesús Judea anoax oano Caná ano nã Galilea mai ano. Nikata akiki oxõ yoini: “Xanĩfo, ěfe fake isinĩ iki nai kiki. ěfe fakeshta ea õixoni ope ěfe fake ea sharafaxoxikĩ,” ixõ iyopaini. <sup>48</sup> “¡Ooa! Tsõa atiroma keskara ě fayamakě mã ea chanĩmara fakeranama,” ixõ Jesús ato yoini. <sup>49</sup> Afianã nã xanĩfáfe Jesús yoini: “Xanĩfo, efe kayoikape ěfe fake nayamanõ,” ixõ iyopaini. <sup>50</sup> Askafaito Jesús kemani: “Mĩ fake namaki. Katáfe. Iskaratĩa mĩ fake niaki,” Jesús fani.

Jesús askafaito nikafaini kani. <sup>51</sup> Mã nokoĩ kaino áfe inafõ akiki nokokaxõ yoinifo: “Mĩ fake mã shara, anã isinĩ ikima,” fanifo. <sup>52</sup> Askafaifáfe ato yõkani: “¿Fanĩ xini rakano ěfe fake sharamě?” ixõ ato yõkaito, “Xini keya mĩ fake áfe yona mat-sita,” fanifo. <sup>53</sup> Yoiaifáfe nikata ápa shinãni: “Chanĩma, Jesús ea yoita xini keya, ‘Mã mĩ fake sharakĩ katáfe,’ ea Jesús faita,” ixõ xanĩfáfe shinãni. Nãskata na xanĩfonõ áfinõ afe yorafoyaxõ Jesús chanĩmara fanifo.

<sup>54</sup> Nãskata Jesús Judea anoax Galilea ano nokoxõ afianã tsõa atiroma keskara fakĩ ato õimani. Ato õimakĩ rafe fani.

## 5

*Jesús feronāfake isinĩ imis Betesda anoxõ sharafani*

<sup>1</sup> Askata Jesús Galilea anoax Jerusalén ano kani āfe kaifo judeofo feta fista akikai. <sup>2</sup> Nāno Jerusalén ano ovejāfāfe āto kãiti ano ĩa ini. Judeofāfe yoimisfo a ĩamā āfe ane Betesda. Nā ĩa kesemē pexe kafāshara mĩshti tsaofafāina ini, cinco pexe. <sup>3-4</sup> Nāno yora isinĩ imisfo ichapa rasi inifo nāno rakafafāinafo. Fēxofo, chātofo, sifitianifo nāfo isinĩ imisfo nā pexe kafāshara mĩshti mēra rakafafāinafo ini. Akka Niospa āfe ājiri nā ĩa ano nokomis nā ĩa fecha fecha axiki. Nā ĩa fecha fecha akaino nā isinĩ ikaifo nā nashi taea nashiax koshi sharamisfo. Nāskakē nā isinĩ ikaifāfe Niospa āfe ājiri manamisfo ato ĩa fecha fecha axoyonõ nā nashi nā taea koshi sharaxikakĩ.

<sup>5</sup> Jesús nāno nokoxõ feronāfake fichini treinta y ocho xiniya amis finipaikĩ ranāmis. <sup>6</sup> Feronāfake finimisma fichixõ Jesús tãpini nā feronāfake treinta y ocho xiniya amis isinĩ itiani. Nāskaxõ yõkani: “¿Mĩ sharapaimē?” ixõ yõkani. <sup>7</sup> Askafaito kemani: “Niospa ājirinĩ ĩa fecha fecha akaino tsõakai ea ĩa ano iyomisma. Akka ē nashipaifiaino ea xĩtimisfo. Ĕkai fena nashitiroma. Nono tsõama ea ĩa ano iyoikaxiki,” faito, <sup>8</sup> Jesús yoini: “Fininākakā, mĩ rakati fifaini kasharatāfe,” Jesús fani. <sup>9</sup> Askafaito nikai fininākakāta āfe rakati fifaini kani.

Nā pena safaronõ finimisma Jesús sharafani. <sup>10</sup> Nāskano nā judeofāfe āto xanĩfofofāfe õinifo nā feronāfake finimismato āfe rakati fifaini kaito yõkanifo: “¿Afeskakĩ mĩ rakati safaronõ mĩ foikaimē? ¿Mĩ tãpiamamē nõko xinifāfe yoipaonifo safaroaino nõ afaa metiroma? Akka mĩ rakati na safaronõ mĩ fotiroma,” fanifo. <sup>11</sup> Askafaifono ato kemani: “Oa feronāfāke ea sharafaxõ ea yoia iskafakĩ: ‘Mĩ rakati fotāfe,’ ea faa,” ato faito, <sup>12</sup> “¿Tsõamē a feronāfake anori mia yoia?” fanifo. <sup>13</sup> Finimismatokai tãpinima tsõa sharafaamāki Jesúsmāi a finimisma sharafafāini koshikõi a makinoax yorafā rasi mēra kaano. Nāskakē finimismato anā õinima.

<sup>14</sup> Askano chipo Jesús a feronāfake sharafaa Nios kĩfiti pexefā mēranoa fichixõ yoini: “Anā mĩ isinĩ ikima. Mā mĩ shara. Anā a mĩ chakafapaoni keskafakĩ afianā chakafayamafe. Mĩ chaka xatefe. Mĩ chaka mĩ xateyamakē afaranā mia anā omiskõimatiroki,” ixõ Jesús yoini. <sup>15</sup> Nāskax nā feronāfake Jesús makinoax kani judeofo yoikai, “Oa Jesús ea sharafaa,” ato fani. <sup>16</sup> Nā Jesús safaronõ yora sharafaa nikakanax judeofo āto xanĩfofo Jesúski õitifishkinifo. Õitifishkikakĩ Jesús mekakafakĩ chakafanifo. <sup>17</sup> Askafaifono Jesús ato yoini: “Ĕfe Epa pena tii yonofafāini. Iskaratĩari yonoi. Ĕri Ĕfe Epa yonoai keskafakĩ Ĕri yonoi,” ixõ ato yoini.

18 Nāskakē fakirira shinānifo. Nāskara shinākakī Jesús mekafanifo: “Nōko xinifāfe yoini keskara nō safaronō afaa metiroma, akka Jesús yonoi yorafo sharafakī. Nāskaxō noko yoia: ‘Nios ēfe Epakōi,’ noko faa. Nāskax Nios keskarakōi ipai,” fanifo. Nāskax a ranā yoinānifo: “¿Afeskaxō nō Jesús ato retematromē?” ikanax yoinānifo judeofo āto xanīfofo.

*Jesús Niospa Fakexō nā Niospa akai keskara fai*

19 Nāskara shināifāfe Jesús ato tāpini. Nāskaxō Jesús ato yoini iskafakī: “Chanīma ē mato yoinō. Ea nikakapo. Ē Niospa Fakekōikī ēa ē afara afeskarafaima. Ēfe Epa Niospa akai keskara ðixō ēri aki. Nā fisti ē aki. 20 Ēfe Epa Niospa ea noikōi. Nāskakī nā akai keskara ea tāpimani ēri anō. Akka afara fetsa finakōia ea ispaxii. Askaino mā ea iskafakī yoixii: ‘Airā ðikapo. ¿Afeskakī iskara shara akimē?’ mā ea faxii. 21 Epa Niospa yora naano anā otofatiro. Nāskaxō anā nimasharatiro. Ēri āfe Fakexō nāskari fakī ē ato nimapaikī ē ato nimatiro shara ipaxanōfo. 22 Epa Niospa ato yoima fatora yora shara nīpanaka, akka fatorari omiskōipakenaka. Ēfi Niospa Fakeki. Ea nīchini ē yorafo yoinō fatofomāki a afe nīpanakafo, akka fatoforimāki a omiskōipakenakafo. 23 Nāskaxō yorafāfe Epa Nios yoixikani: ‘Mī fāsi shara. Tsōa mia finōtiroma,’ ixō yoixikani. Nāskarifiakī eari yoixikani ēmāi āfe Fakekē. Ea nīchini. Akka iskaratīa ea tsōa yoisharaima. Ēfe Epa Niosri askari fakani yoisharakima.

24 “Ē mato chanīmakōi yoinō. Fatoto ēfe meka nikasharaimākai, akka nā ea nīchiniri, fatotori chanīmara faimākai nāfi ēfe Epa Nios fe nīpanakakī. Akka iskaratīa yorafo oa naa keskara ikafo Nios Ifofaamax. Akka Epa Nios chanīmara fakanax afe ipanakafo. Nafiax afianā otoxikani.

25 “Ē afara fetsa chanīmakōi mato yoinō. Yorafāfe āto ðiti mēra shināsharakōiafoma oa naa keskarakōi ikafo. Akka ē Niospa Fakeki. Iskaratīa ē ato yoiaito ea nikakanax anā naa keskara ikanima, efe isharapakenakafo. 26 Akka tsōa Epa Nios onifanima. Akōi ika. Nāskarifiakī Epa Niospa yoia keskara āfe Fakeri tsōa onifanima. Ēakōi ē ikaki. 27 Ēfi Niospa Fakeki. Nāskakē ea yoia iskafakī: ‘Mī yorafo yoitiro fatofomāki efe nīpanakafo, akka fatoforimāki omiskōipakenakafo,’ ixō ea nīchini. 28-29 Nāskara ē mato yoiaino rateyamakāfe. Akka nā namisfāfe ēfe meka nikakani otoxikani. Afara shara famisfo nikasharakōimisfo nāfo Nios ano nīpanakafo. Akka nā afara chakafamisfo afo otokanax omiskōipakenakafo,” ixō Jesús ato yoini.

*Niospa Jesús nīchini a apaiyai keskara famaxikī*

30 Anā Jesús ato yoini iskafakī: “Akka ēakōi ē yorafo omiskōimanima. Epa Niospa ea yoiaino ē aki. Epa Niospa

keyokōi tāpia. Akka ea mēstekōi yoia keskara ē yorafo yoitiro fatofo omiskōipakenakafomāki. Ē ato kaxpa omiskōimanima. Eres fistikai ē apaiyai keskara ē shināima. Ēfe Epa Niospa ea nīchini a apaiyai keskara ea famaxiki. <sup>31</sup> Ēakōi ē yoime-sharaito tsōa ea tāpitiro ma ē afe keskaratiromakī. <sup>32</sup> Akka nāno yora fētsa eōnoa yoisharamis. Nāato ea chanīmara fakē māri a nikasharakōitiro. <sup>33</sup> Akka mā yorafo Juan Maotistaki nīchimis eōnoa nikanōfo. Juan eōnoa meka shara yoimis nā yorafāfe mato tāpimakani. ‘Jesúsfi Cristoki,’ Juan ato famis. Nā nikakaxō mato tāpimamisfo.

<sup>34</sup> “Ēfi tsōa atiroma keskara fakē mā mā ōimiski. Akka tsōa eōnoa mato yoiamaito nāfo ōixō mā tāpitiro ē mato chanīkima yoimis. Nāskafekē Juan eōnoa mato yoimis keskara ē afianā mato shināmāni māto chaka mā xatenō omiskōitamāroko Epa Nios fe mā isharapakexanō. <sup>35</sup> Juan feronāfake fāsi sharakōi. Oa rāpari fafeai keskara shara. Fakishikakī nō rāpari ōtano fai chaxasharano nō fāi katiro. Oa rāpari fafeai keskara shara mato Juan tāpimanano mā māto chaka xateax mā Nios fe mā isharapakexatiro. Mato yoimis keskara mā shināmis iskafakī: ‘Aicho, Juan noko mēstekōi Niospa meka yoimis. Nō nikashara,’ ixō mā shināmis. <sup>36</sup> Juan eōnoa yoikōimis; akka ēfe Epa Niospa Juan finōkōia. Ēfe Epa ea nīchini a apaiyai keskara ē anō. Iskaratīa a ea yonomanai keskara ē aki. Akka a ē akai keskara ōixō mā tāpitiro Epa Niospa ea nīchini a ea yonomanai ē mitonō. <sup>37</sup> Epa Niospa ea matoki nīchini. Nāatori eōnoa yoimis. Mākai Epa Niospa āfe meka nikamisma, askatari mā ōimisma. <sup>38</sup> Niospa ea nīchifinino mā ea chanīmara faima. Nāskax āfe meka shara māto shinā mēra naneama.

<sup>39-40</sup> “Moisés feta a Niospa meka yoimis fetsafāferi kenenifo keskara mā mā ōisharai māmāi shinākī iskafakī: ‘Ē Niospa meka anakī ē tāpitiro afeskax ē Nios fe isharapakenakamāki,’ ixō mā shināi. Nāskaxō a Niospa meka yoikī kenenifo mā anefafāimis. Akka Moisés feta a Niospa meka yoimifāfe eōnoa kenefinifono mā ekeki opaima ē mato imasharapanā.

<sup>41</sup> “Epa Niospa ea yoikī iskafaino: ‘Ēfe fake shara,’ ea faino ē inimatiro. Akka yorafāfe, ‘Jesús sharaki,’ ea faifono ē askafamapaima. <sup>42</sup> Ē mato tāpikōia. Mākai Epa Nios noima. <sup>43</sup> Epa Niospa ea nīchini ē matoki onō. Ē matoki ofiakē mā ea ifipaima. Akka yora fetsa āakōi matoki oaito mā ifitiro. <sup>44</sup> Akka mā yora fetsafo, ‘Na yorafo sharafora, noko fanōfora,’ ixō mā ato yoimapai. Akka Niospa mato yoisharaino mā fichipaima. Nāskakī mā Niospa meka mā nikakaspai.

<sup>45</sup> “Mā ea chanīmara fayamakē ēfe Epa Nios ē yoima. Nāskakē, ‘Nā Jesús noko chakafai,’ ixō shināyamakāfe. Mā



shināmis iskakī: ‘Moisés meka nikai nō Epa Nios fe nīpanaka,’ ixō mā shināmis. Anori mā shināfiaino Moisés Epa Nios yoixii mākairoko āfe meka nikakōimiskē. <sup>46</sup> Moisés eōnoa yoikī keneni. Nāskaxō Moisés āfe meka chanīmara faxō eari mā chanīmara fakerana. <sup>47</sup> Nāskafixō a Moisés kirika keneni mā chanīmara faima. Nāskaxō eari mā chanīmara faima,” ixō Jesús judeofāfe āto xanīfofo yoini.

## 6

*Jesús cinco mil feronāfakefo ato pimani*  
(Mt. 14.13-21; Mr. 6.30-44; Lc. 9.10-17)

<sup>1</sup> Askata Jesús anā ĩamāfā āfe ane Galilea pokefaini. Āfe ane fetsa Tiberias. <sup>2</sup> Nāskaxō Jesús isinī imisfo āfe mekapa ato sharafaito ōikani yorafā rasichi chīfafainifo. <sup>3-4</sup> Nāskaifono judeofāfe āto fista Pascua mā chaima pakeaino Jesús māchi keya ano nokoax aōxō tāpimisfo fe tsaoni. <sup>5-6</sup> Nāno tsoaofono yorafā rasi Jesúski fenifo. Akiki feaifāfe atokiri fesoxō Jesús ōini. (Ato ōikī Jesús shināni oa yorafo fonāikani rakikīa. Nāskaxō Jesús āa tāpini afeskaxō ato pimaimākai.) Nāskaxō Jesús Felipe tāpimapaikōini a āfe mekapa afama mīshti atiro. Nāskaxō Jesús Felipe yōkani: “¿Fanīa afaa ato pimaxikī nō fimē?” ixō Jesús Felipe yōkaito, <sup>7</sup> nikaxō Felipe kemani: “Kee, Ifo, nō dos cientos nia oxata yonoxō nō kori fitiro akka a tiikai nokotiroma na yorafā rasi nō ato pimapanā,” Felipe fani. <sup>8</sup> Nāskafekē Jesúsxō tāpimis fetsa Andrés nā Pedro ēxto yoini: <sup>9</sup> “Ōipo. Na fāke cinco pāa fea. Foe rafeya fea. Akka yora ichapato pitirofoma. Fisti rasichi pitirofo. Nono yora ichapa rasi. Na pāa pishta tsoa nokotiroma,” fani.

<sup>10</sup> Askafaito Jesús yoini iskafakī: “Ato yoikāfe tsaonōfo,” ato fani. Nāno fasi ichapa ini. Nā Jesús ato yoiai keskai fasi mēra tsaoui fetsenifo. Cinco mil feronāfakefo tsaoui fetsenifo. Kērofori, fakefori tsaonifo. <sup>11</sup> Nāskax tsaofafono Jesús nā cinco pāa fita Apa Nios yoini: “Aicho, Epa,” ixō Apa Nios yoita pāa yafi nā foe rafe kaxkepaketa aōxō tāpimisfo ato ināni, afāferi ato inānōfo. Fikaxō pikani māyakōinifo. <sup>12</sup> Nāskax keyokōi yorafo māyakōiafono Jesús ato yoini: “Nā pāa yafi foe texefafo fikāfe fēta mēra nanekāfe afaa pishta fenoyamanō,” ato fani. <sup>13</sup> Ato askafaito nikakaxō nā pāa yafi foe texefafo finifo. Doce fēta fospifanifo.

<sup>14</sup> Nāskata Jesús āfe mekapa foe rafe yafi cinco pāa ato pimaito ōikanax yoinānifo: “Chanīmakōi Jesús Niospa meka yoimis. Nā Epa Niospa aōnoa yoipaoni. Nokoki nīchini,” ikanax yoinānifo. <sup>15</sup> Askafaifono Jesús tāpixō āfe ōiti mēra shināni: “Na yorafāfe ea kerexkai āto xanīfokōi ea ima-paikani,” ixō tāpini. Askata ato makinoax machi fetsa ari kani.

*Jesús ĩamãfã femãkĩa kani*  
(Mt. 14.22-27; Mr. 6.45-52)

<sup>16-17</sup> Askata mã xini kaino aõxõ täpimisfo kanõanãfã mëra nanefainifo ĩamãfã pokefainifo nã pexe rasi Capernaúm ano fokani. Nokoafomano mã fakishaino Jesús atoki nokonima. <sup>18</sup> Nëfefaino ĩamãfã pooitifikõini. <sup>19</sup> ĩamãfã chai naisti nëxpakĩaxõ nëfefãnë ato akaino ĩamãfã pooitifikõini. Jesús ĩamãfã kamaki kaitokai tsõa täpinima mã fichifikaxõ. Täpiamax ratekõinifo. <sup>20</sup> “Ëkĩa. Rateyamakãfe,” Jesús ato fani. <sup>21</sup> Nãskaxõ yoinifo: “Aicho. Kanõa mëra naneyofe,” fanifo. Mã Jesús naneano nãskax ĩamãfã kesemë nokorisanifo.

*Yorafã rasichi Jesús fenanifo*

<sup>22</sup> Nãskaino mã penano yorafã rasi okiri ĩamãfã kesemë nëtenifo. “A aõxõ täpimisfo fe Jesús kaito nõ õiama. Nonokai kanõa fetsama. Akka Jesús nonoki,” ikanax yoinãnifo.

<sup>23</sup> Nãskatari Tiberias chaimaxõ kanõa rasi fenifo. A Jesús yorafã rasi ato pimaita ano fenifo. <sup>24</sup> Askatari Jesúsxõ täpimisfo ano inifoma. Jesúsri ano inima. Nãskaxõ yora rasichi Jesús fenaifokani fonifo kanõanãfãnë Capernaúm ano.

*Jesúsfi a nõ piã keskaraki. Akka nõ piãxma nõ nitiroma.*  
*Nãskarifiãkĩ nõ Jesús chanĩmara faaxma nõ afe nĩpaxatiroma*

<sup>25</sup> Mã fichikaxõ Jesús yoinifo: “Maestro, ¿afetĩa mĩ nono oamë?” ixõ yõkanifo. <sup>26</sup> Askafaifono ato kemani: “Chanĩmakõi ã mato yoi. A yõra atiroma keskara ã mato ispafekë mã ea fenaĩma. Akka ã mato pimaino keyokõi mã mãyakõita. Nãskakë mã ea fenai. <sup>27</sup> Shinãkapo. a piã fisti mã shinãfafãini. Akka a mã piã pisiãx payokometiro. Nãskaxõ mã yonofafãini a mã piã fixiki. Akka a mã piã fisti shinãyamakãfe. A ã mato inãtiro shinãkãfe. A mã piã ã mato inãtiro a keyonakama. Nã piãx mã efe isharpakenaka. Ëfi yõra fakekõiki. Ëfe Epa Nios ekeki inimai ea katõxõ matoki ea nĩchini ã mato imasharapakexanõ,” ato faino, <sup>28</sup> nikakãkĩ yoinifo: “¿Nõ afeskatiromë Nios nokoki inimanõ?” ixõ yoinifo. <sup>29</sup> Askafaifãfe Jesús ato kemani: “Epa Niospa ea matoki nĩchini. Akka mã Epa Nios inimapaikĩ ea chanĩmara fakãfe,” Jesús ato faino, <sup>30</sup> kemanifo: “A tsõa atiroma keskara fakĩ noko afama mĩshti ispafe nõ mia chanĩmara fanõ. <sup>31</sup> Akka Niospa meka kenenifo iskafakĩ: ‘Tsõa atiroma keskara Moisés a piãifo ato inãpaoni. Nã pena tii nai mëranoax pakepaoni a piãifo,’ ixõ kirika kenenifo. A nõko xinifãfe pipaonifo tsõa istoma anoxõ ãfe ane mãnã. Nãskakë mĩri a Moisés aka keskara fafe, nõ mia chanĩmara fanõ,” ixõ yoinifo.

<sup>32</sup> Askafaifono Jesús ato yoini: “Ë mato pãraĩma na Moiséskai a nõko xinifãfe piã ato inãnima, nai mëraxõ Epa Niospa ato

ināni. Akka Epa Niospa mā iskaratīa mato mēra nīchia a mā piāi keskara nai mēraxō māto ōiti mēra nanenō. <sup>33</sup> Nā fistichi yorafo nimapakekōixatiro. Epa Niospa nāmā nīchini yorafo ato imasharapakexanō,” ato faito, <sup>34</sup> “Īfo, a nō piāi noko ināfafāife a mī noko yoiai,” fanifo. <sup>35</sup> Jesús ato kemani: “Ēfi nā mā piāi keskarakī. Ē yorafo nimasharapakexatiro. Mā nō piāx māyatiro. Nāskax nō anā fonāitiroma. Nāskarifiakī ea shināifāife ē ato shināmafafāini. Ē ato potanakama. Nāskakē āto ōiti mēra inimakōitirofo. Askatarī mā nō faka ayax nō anā nōamāitiroma. Nāskarifiakī ea shinākanax efe isharapak-enakafo. <sup>36</sup> Nāskafekē ē mato yoiaito mā ea nikakī mā ea chanīmara faima. <sup>37</sup> Akka nā ea Ifofaafo Epa Niospa ea atoya imasharapakenaka nāfāfemāi ea Ifofakōiafono. Akka fatorafāferi ea Ifofaifāfe nāfo ē ato kexesharapakenaka. Ē ato potapakenakama. <sup>38-39</sup> Epa Niospa ea nīchikī ea yoini iskafakī: ‘Nā mefe ipaikani mefe ipanakafo tsoa pishta fenonakama. Nāfo mā nafiamisfono mī anā fotoxō mī ato ōtofaxii nofe nipaxanōfo. Nāskara ē fichipai,’ ixō ea nīchini. Nāskakē nā ēa ē apaiyai keskara faxiki ē mai ano onima. Akka nā ea nīchiato ea amapaiyai keskara faxikī ē mai ano fotoni.

<sup>40</sup> “Ēfi Niospa Fakeki. Ea chanīmara fakanax nāfo ēfe Epa Nios ari efe isharapakenakafo. Nafiafāfe ē afianā mai ano fotoxō ē ato ōtofaxii isharapakexanōfo. Nāskara ēfe Epa Niospa fichipai,” ixō Jesús ato yoini.

<sup>41</sup> “Ēfi nai mēranoax onikī a mā piāi keskaraxō yorafo imasharaxikī,” Jesús ato faito nikafikaxō chanīmara fatama judeofāfe Jesús mekafakakī yōachepenifo: <sup>42</sup> “Kee, nikakapo. Na Jesús, āfe apa José yafi āfe afa María nō ōimis. Nakai afaama. Akka, ¿afeskakī noko yoimē: ‘Ēfi nai mēranoax Nios ika ariax onikī?’ Nāskakē na meka nō chanīmara faima. Iskara meka nō nikapaima,” ikanax yoinānifo. <sup>43</sup> A āto ōiti mēraxō shināifo keskara Jesús ato onāxō ato yoini: “Ekeki yōachepeyamakāfe. <sup>44</sup> Ē chanīma. Epa Niospa ea nīchini. Nāskafekē Epa Niospa āto ōiti mēra ato shināmayamaino ea tsōa chanīmara fatiroma. Akka nā ea chanīmara faax nakē ē anā nai mēranoax fotoxō ē ato otofaxii efe ipaxanōfo. <sup>45</sup> Niosnoa yoimisfāfe kirika kenenifo iskafakakī: ‘Epa Niospa keyokōi ato tāpimaxii,’ ixō kirika kenenifo. Fatora yorafāfe ēfe Epa Nios nikaifono ato tāpimaxii. Nāskaxō afāferi ea chanīmara faxikani.

<sup>46</sup> “Tsōakai Epa Nios ōimisma. Eres fisti ē Epa Nios ōimis, ēmāi a makinoax onixakī. <sup>47</sup> Ēfi mato chanīmakōi yoikai. A ea chanīmara fai ēfe Epa Nios fe ipanaka.

<sup>48</sup> “Ēfi nā mā piāi keskaraki. Nā ea chanīmara faafo tii Epa Nios fe isharapakenakafo. <sup>49</sup> Nōko xinifo Moisés fe tsōa

istoma ano ipaonifo. Nā pipaonifo, āfe ane mǎnǎ. Akka mǎnǎ pipaofinixakī mā nai mitokomenifo. <sup>50-51</sup> Ē nai mēranoax ēfe Epa Nios ika anoax oni. Ēfi na mā piāi keskaraki. Nā ea chanīmara fai nāfi efe nīpanakakī. Nā nōko xinifāfe pipaonifo nai mēranoax pakeaito aatokai ato nimasharamisma. Iskaratīa afianā Epa Niospa nai mēraxō mato ināi a mā piāi. Nā piāx yorafo isharapakenakafo anā nanakafoma. Ēfi nā mā piāi keskaraki. Nāskakē ē keyokōi yorafo ē ato nāxoxii nisharapakexanōfo,” ixō Jesús ato yoini.

<sup>52</sup> Nikakani judeofo fochishpanā faatanānifo. “¿Afeskaxō na feronāfāke āfe nami noko inātiromē nō pinō?” ikanax yoinānifo. <sup>53</sup> Jesús āfe namikiri keparanākī ato yoini: “Ē mato pāraima. Ēfi yōra fakekōiki. Mā ēfe nami piyamata ēfe imi ayayamata ikax mā nipaxatiroma. <sup>54</sup> Fatorafāfe ēfe nami pikani ēfe imiri ayakani isharapakexikakī. Nāskakē ē afianā nai mēranoax fotoaitīa a namisfo ē ato otofaxii Epa Nios ari nisharapakexanōfo. <sup>55</sup> Ēfe nami na mā piāi keskara. Ēfe imiri a mā ayatiro keskara. <sup>56</sup> Fatorafāfe ēfe nami pikani, ēfe imiri ayakani, nāfo efe rafesharapakenakafo. <sup>57</sup> Akka ēfe Epa nīpanakato nāato ea nīchini. Nāskai ēri aōnoax nipanaka. Nāskakē efe rafesharakanax eōnoax nīpanakafo.

<sup>58</sup> “Afiānā ē mato yoi. Nōko xinifāfe a pipaonifo āfe ane mǎnǎ. Nā pifiakanax mā nai keyonifo. Akka ēfi Epa Nios ariax ē matoki oni. Ēfi a mā piāi keskarakī. Ea pikanax eōnoax nisharapakenakafo,” ixō Jesús ato yoini. <sup>59</sup> Judeofāfe āto ichanāti pexe mēraxō Capernaúm anoxō āfe meka Jesús ato yoini.

### *Jesúsnoax yorafo nīpaxatirofo*

<sup>60</sup> Jesúsxō tāpimisfo a ranā yoinānifo: “A Jesús noko yoia keskara fekaxkōi. Tsōakai tāpitiroma. Nōkai na keskara meka nikamisma,” ikanax yoinānifo. <sup>61</sup> Jesús ato onāni a ranā yoināifāfe. Akka atirifāfe Jesús nikapainifoma. Nāskaxō ato yoini: “¿A ē mato rama yoia keskara mā nikapaimamē? ¿Anā mā ea chanīmara faimamē? <sup>62</sup> Ē yōra fakekōi fiāx a ē ipaoni ano nai mēra ē anā kaito mā ea ōiki, ¿mā ea chanīmara faimamē? <sup>63</sup> Akka Niospa Yōshi Sharapa nā fistichi yorafo nimasharapaketiro. Yorafokai yōra nimapaketiro. Akka ēfe Epa Niospa Yōshi Sharaōxō ē mato yoimis. Nāskakē ēfe meka chanīmara faax mā nisharapakexatiro. <sup>64</sup> Nāskafekē fetsafāfekai ea chanīmara fakanima,” ixō Jesús ato yoini. Jesús taefakī ato ifini. “Fatotokai ea chanīmara fatama ea ato achimaximē,” ixō Jesús tāpiyoni. <sup>65</sup> Askaxō anā ato yoini: “Ē mato yoia iskafakī, Epa Niospa āto ōiti mēra ato shināmayamaino ea chanīmara fatirofoma,” ixō ē mato yoia.

<sup>66</sup> Nāskaxō Jesús ato yoiyai keskara nikakaxō a chīfamisfāfe Jesús potakaxō anā tananifoma. <sup>67</sup> Akka Jesús a aōxō tāpimis doce ato ifini. Afetiama ato ifiyoni aōxō tāpimisfo inōfo. Nāskaxō ato yoini iskafakī: “¿Māri emakinoax kapaimē?” ato faino, <sup>68</sup> Pedro kemani: “Ifo, nō fato fetsakai Ifofatiroma. Mī fistichi mī noko yoitiro afeskax nō isharapakexatiromākī. <sup>69</sup> Mīfi mī Nios ariax nokoki oniki. Mīfi sharakōi Cristokī. Nios nā nipanakato nāato āfe Fakekōi mī. Nā nō chanīmara fai,” askafaito, <sup>70</sup> “Ē mato doce feronāfake ifini mā eōxō tāpimis inō. Akka ē mato ififinino a mato fe rafea fetsa mā a mēra Satanás chaka nanea,” ixō Jesús ato yoini. <sup>71</sup> Nā Simón Iscariote āfe fake Judas ini. Nā Judasnoa Jesús ato yoini. Jesús nā Judasri ififinino nāato Jesús ato achimani fetsafāfe retenōfo.

## 7

### *Jesús āfe extofāfe chanīmara fanifoma*

<sup>1</sup> Askata Jesús Galilea ano kafāsani ato tāpimafofāsafai. Judea ano kayopainima judeofāfe āto xanīfōfāfemāi retapaiyaifono. <sup>2-5</sup> Judeofāfe āto xinifāfe tapas fapaonifo shinākakī fista anifo. Askata judeofo ichapa rasi Judea mai ari Jerusalén anoxō fista aki fokani fonifo. Mā fista chaima ikaino Jesús Judea mai ari kayotama, Galilea ano nēteni. Āfe extofori nā Galilea ano afe inifo. Āfe extokōifofiakaxō Jesús kai nafi Cristoki Niospa nīchini ixō tsōa chanīmara fanifoma. Nāskaxō yoinifo iskafakakī: “Nonoax Judea mai ano katāfe nā mia Ifofamisfāfe nā mī ato axomis keskara ōinōfo. Nā mī amis keskara mī ato ōimanamano fetsafāfekai mia tāpitirofoma. Nā mī afama mīshti akaifo ato ispafotāfe,” faifāfe <sup>6</sup> ato kemani: “Ē iskaratīa ari katiroma. Ēfe Epa ea nīchiyoima. Akka afetiara kapai mā katiro,” ato fani. <sup>7</sup> “Na yorafāfekai Epa Nios yafi ea chanīmara faafoma. Nāfāfe ea noikaspakani. ‘Māfi afarafo chakafamis,’ ē ato famis. Nāskakē ea noikaspakani. Akka mato noikaspakanima. <sup>8</sup> Akka māri fista axiki Jerusalén ano fotakāfe. Ē kayoikaima. Ēfe Epa Niospa ea nīchiyoima,” ixō Jesús āfe extofo yoini.

<sup>9</sup> Mā ato yoita Galilea ano Jesús nēteni.

### *Jesús kani fista akikai*

<sup>10</sup> Nāskata mā āfe extofo fista akikai, Jerusalén ano foafono Jesúsri chipo kani. Tsōa tāpianamo onekōi Jerusalén ano kani. <sup>11</sup> Nānoxō nā judeofāfe āto xanīfōfōfāfe Jesús fenakani yoinānifo: “¿Fanīmē nā feronāfake?” fanifo. <sup>12</sup> Nāno yora ichapa rasi inifo. Atirifāfe iskafanifo: “Jesús feronāfake sharakōi,” ikaxō yoinifo. Askafafiaifāfe atirifāfe yoikī iskafanifo: “Maa. A feronāfakekai sharama. Yorafo pāramis,” ikaxō

yoinifo. <sup>13</sup> Nāskax a ranā yoinānifo judeofāfe ato nikayamanōfo judeo xanīfofoki mesekakī.

<sup>14</sup> Fista mitokomeamano Jesús Nios kīfiti pexefā mēra ikikaini a mēraxō ato yoixikī. <sup>15</sup> Judeofāfe āto xanīfofōfāfe nikakaxō yoinifo: “Aira. Nikakapo. ¿Afeskakī na feronāfāke kenekī tāpikī finayamafixō tāpifinakōiamē?” ikanax yoinānifo. <sup>16</sup> Nā yoiaifo keskara onāxō Jesús ato yoini: “Ēfe shināmā shinākōixō ē mato yoima. Epa Niospa ea nīchini nā ea shināmanai keskara ē mato yoi. <sup>17</sup> Fatotora a Niospa yoiai keskara apaikī tāpitiro akka ēa ē shināxō ē mato yoima, Epa Niospa ea shināmanaino ē mato yoi. <sup>18</sup> Fatora yora fētsa āfe shināmā shināxō āakōi ato yoi. Nāato yorafo shināmapai iskakakī: ‘Nā feronāfāke mekakī tāpikōia, ea fanōfora,’ ixō anori ato shināmapai. Akka yōra fētsa āa āfe shināmā shināx mekaima. A nīchinito shināmanaino mekai, a nīchini fisti yoisharanōfo. Nāskakē nā yōra ato chanīkima yoi, ato pāraima. <sup>19</sup> Nōko xini Moisés Niospa meka mato kenexoni. Akka mā nikasharamisma. Nāskakē pena tenetitīa ē feronāfake sharafaano mā ea retepai,” ato faino, <sup>20</sup> “Kee. Tsoakai mia retepaima. Mī mēra niafaka yōshi chaka nanea,” faifāfe <sup>21</sup> ato kemani: “Ē feronāfake pena tenetitīa sharafaino akka mā ea yoikī iskakafamis: ‘¿Afeskakī Jesús pena tenetitīa feronāfake sharafaimē?’ ixō mā eōnoa yoimis. <sup>22</sup> Ē pena tenetitīa afara shara faa keskafakī māri pena tenetitīa afara memis. Moisés kirika kenekī yoini keskafakī māri māto fake feronāfakefo rama kākē mā ocho nia oxano māto fake feronāfakefo mā foshki repa xatemis. (Akka Moiséskai askara noko yoinima, nōko xinifāfe askara yoinifo.) Akka iskaratīa pena teneti ikaino mā māto fake feronāfakefo mā foshki repa xatemis.

<sup>23</sup> “Moisés yoini keskara nikakī pena tenetitīari mā māto fake feronāfakefo mā foshki repa xatemis. Akka, ¿afeskai mā ekeki ōitifishkikimē na pena tenetitīa ē na feronāfake sharafaano? <sup>24</sup> Nāskakē a yōra afara shara fakē ōixō yoikī iskakafayamakāfe: ‘Nāto afara chakafai kiki,’ fayamakāfe. Mēstekōi yoisharakāfe,” ixō Jesús ato yoini.

*“Ē ēfe Epa Nios ariax ē oni,” Jesús ato fani*

<sup>25</sup> Askata yora rasi Jerusalén ano ikanax yoinānifo: “¿A na feronāfake mē xanīfofōfāfe retepaiyaifo?” ikanax yoinānifo: <sup>26</sup> “Ōikapo, yorafā rasichi ōifiaifono mā ato yoi. Akka tsōakai afaa faima. Mā xanīfofōfāfe mā tāpiafo rakikīa nā Cristo, a Niospa nokoki nīchini. <sup>27</sup> Ētsa, aama rakikīa Cristo. Cristo oaito nō tāpitiroma fakiranoax oi. Akka na feronāfake mā nō tāpia fakiax oamāki,” ixō yoinifo.

<sup>28</sup> Askafaiŋāfe nikaxō Nios kīfiti pexefā mēra ikixō Jesús ato yoini iskafakī: “Chanīma, mā mā ea tāpia ē fakiax oamē,” ato fani. “Akka ēa ēfe shināmā shināx ē oama. Akka ēfe Ēpa ea nīchini. Nāfi chanīmismaki. Akka māfi ēfe Epa mā tāpiama. <sup>29</sup> Ē ēfe Epa ariax oni. Nāato ea nīchini. Nāskakē ē a tāpikōia,” ixō Jesús ato yoini.

<sup>30</sup> Ato askafaito nikakani akiki ōitifiŋski ikakī achipainifo karaxa mēra ikimapaikakī. Akka a reteaifo āfe pena nokoamano achipainifo. Tsōakai Jesús afeska fanima. <sup>31</sup> Nā yorafā rasichi Jerusalén anoafāfe yoinifo: “Tsoa fētsa atiroma keskara fakī Jesús Niosxō afama mīshti noko ispa. Nā Jesús afama mīshti fai tsōa atiroma keskara fakī. Akka yora fetsa oax āa is kai yoi: ‘Ēkīa Cristo,’ iki yoi. Akka atokai afama mīshti fakī Jesús finōtiroma,” ikanax yoinānifo. Nāskakī Jesús chanīmara fanifo.

*Fariseofāfe āto inafo nīchinifo Jesús achitanōfo*

<sup>32</sup> Nā yorafā rasichi Jesúsnoa meka shara yoiāifāfe fariseofāfe nikanifo. Nāskaxō judeofāfe āto xanīfofo feta fariseofāfe a Nios kīfiti pexefā kexemisfo nīchinifo Jesús achitanōfo karaxa mēra ikimaxikakī.

<sup>33</sup> Askata Jesús ato yoini: “Ē anā nono mato fe samarakaima. Ē samamashta kai a ea nīchini shināfāini. <sup>34</sup> Ē mato anoax kaino mā ea fenakī mā ea fichitiroma. A ē kai arikai mā katiroma,” ixō Jesús ato yoini.

<sup>35</sup> Ato askafaito nikakanax judeofāfe āto xanīfofo yoinānifo: “¿Faki na feronāfake kaimē nō fichitiroma? Nā nōko kaifo griegofo nā pe xe rasi anoax paxkafainifo nāno kai rakikīa. Nānoxō griegofo tāpimaxikī kai rakikīa,” fanifo. <sup>36</sup> “¿Afaa noko yoipaimē iskafakī? ‘Mā ea fenafikikai mā ea fichitiroma. Ē ika arikai mā katiroma,’ ixō noko yoiāi. ¿Afaa noko yoipai iskaimē?” ikanax yoinānifo.

*Niospa Yōshi Sharapa yorafo nimapaketiro*

<sup>37</sup> Askata mā fista mitokomeaino Jesús nā yorafā rasi mēraxō niinākafā fāsi mekainākafā ato yoini iskafakī: “Nikakapo. Nā mā nōamā iki faka ayapaiyai keskai ekeki fekāfe. <sup>38</sup> A ea chanīmara faafāfe Niospa meka kenenifo keskara yora āfe xaki mēra faka poyo poyo iki netsotiroma keskara shara itiro ea Ifofaax,” ixō āfe Yōshi Sharaki keparanākī Jesús ato yoini. <sup>39</sup> Akka faka ato yoinima, Niospa Yōshi Sharaōnoa ato yoini iskafakī: “A ea chanīmara fai ēfe Epa Niospa āfe Yōshi Shara fe rafepakenaka,” ixō Jesús ato tāpimani Apa Nios ari kayoxoma yorafāfe āto xanīfokōi ixikī. Nāskakē Jesús kayoamano Niospa āfe Yōshi Shara ato fe rafeama.

*Jesúsnoa yoinifo. Askafikaxō anoris shinānifoma*

<sup>40</sup> Jesús nikakaxō atirifāfe yoinifo: “Chanĩmakōi nã feronãfake Niospa meka yoimis a nō manai,” ikanax yoinānifo. <sup>41</sup> Atirifāferi yoinifo: “Nãfi Cristoki,” ixō yoinifo. Akka fetsafāfe yoini: “Maa, nakai Cristoma. Cristokai Galilea anoax kãitiroma. <sup>42</sup> Niospa meka kenenifo keskara, ‘David āfe fena inō Cristo. Nã David ipaoni Belén ano. Nãnoaxri Cristo kãixira,’ ixō kirika kenenifo. Akka Cristokai Galilea anoax kãitiroma,” ixō yoinifo. <sup>43</sup> Nãskakē nã yorafāfe Jesúsnoa nikakaxō anoris shinānifoma. Fetsafāfe Jesús chanĩra fanifo, fetsafāferi chanĩmara fanifo. <sup>44</sup> Atirifāfe Jesús achipainifo karaxa mēra ikimapaikakĩ. Achipaifikakĩ tsōa Jesús afeska fanima.

*Judeofo āto xanĩfofofāfe Jesús chanĩmara fanifoma*

<sup>45</sup> Askata fariseofāfe āto Nios kĩfiti pexefā kexemisfo fenifo. Āto xanĩfofoki feaifono ato yōkanifo: “¿Afeskakĩ mã Jesús achiamamē noko efexoxikĩ?” ixō ato yoinifo. <sup>46</sup> Ato askafaifono ato kemanifo: “Na feronãfake āfe meka sharakōi, tsōa anori yoimisma,” ato fanifo. <sup>47</sup> Ato nikakaxō fariseofāfe ato yoinifo: “Kee, Jesús mã matori pãra. <sup>48</sup> Akka nōfi mato xanĩfofo feta a Moisés kirika keneni nō tãpikōiakĩ. Akka nō fatotokai nō Jesús chanĩmara faima. <sup>49</sup> Akka nã yorafāfe mã rama Jesús nikafo nãfāfe a Moisés kirika keneni tsōa tãpiafoma. Niospa ato omiskōimaxiki,” ikaxō ato yoinifo.

<sup>50</sup> Askafafiaifono Nicodemo taeyoi nãato pena fetsa Jesúski kani fakishi afara yōkaikai. Nãrimãi fariseoax nãskaxō afe rafeafo yoini: <sup>51</sup> “Efe yora mĩshtichi, ě mato yoinō. Nōko xinifāfe āto xanĩfofāfe yoinifo keskara nō fatora feronãfake nikasharayamaxō, ‘Afara chakafaira,’ nō fatiroma iskafakĩ: ‘Nãto afarafo chakafai kiki nō omiskōimanō,’ ixokai nō askafatiroma,” ato askafaino kemanifo: <sup>52</sup> “Mĩ noko yoi Galilea anoxō yoiaifo keskara. Galilea anoxō Niospa meka tãpiafoma. Shināpo. Fato feronãfakekai a Galilea anoxō Niospa meka yoimis oama. Akka nono fistixō Niospa meka noko yoitirofo,” ikaxō Nicodemo kemanifo.

<sup>53</sup> Nãskax yoinākanax āto pexe rasi ano fonifo.

## 8

*Kēro āfe fenema fe ikaito xanĩfofofāfe retepainifo*

<sup>1</sup> Nãskata Jesús machi āfe ane Olivos ano kani. <sup>2</sup> Penaino Jerusalén ano nokoax anã a Nios kĩfiti pexefā mēra Jesús oni. Nãno yorafā rasi afianã akiki fenifo nikai fekani. Askata tsaoxō ato yoini.

<sup>3</sup> Ato yoiaino a Moisés yoikĩ kirika keneni keskara ato tãpimamisfo fe fariseofo fenifo. Kēro āfe fenema fe ikaito fichikaxō Jesúski efenifo. Yorafā rasi nēxpakĩa kēro nĩchinifo



keyokōichi ōinōfo. <sup>4</sup> Askafakaxō Jesús yoinifo: “Maestro, na kēromā afarafo chakafaa. Āfe fenema fe ikaito nō fichia. <sup>5</sup> Moisés iskafakī noko yoini: ‘Kēro āfe fenema fe ikaito ōikī nō tokirinī tsakakī retetiro,’ ixō Moisés noko yoini. Akka, ¿mī noko afaa faimē?” fanifo.

<sup>6</sup> Nāskaxō Jesús kemamapainifo, “Fakiri noko yoimākai,” ikaxō āto xanīfofo yoipaikakī. Askafaifono Jesús āfe mēkemā mai keneni. <sup>7</sup> Yōkarifaifono Jesús atoki fininākafā ato yoini iskafakī: “Fatotokai mā afaa chakafamismamē na kēro mā tokirinī tsakakī taefai,” Jesús ato fani.

<sup>8</sup> Mā ato yoixō afianā āfe mēkemā mai keneni. <sup>9</sup> Nāskano mā ato yoiaito nikakaxō a Jesús mai keneai ōikanax nā kēro mekafakī chakafamisfo fisti rasi tsekefaifāinifo. Nā anifo tii foi taenifo. Chipa naetapafo fonifo. Mā foafono Jesús fisti nāno kēro fe nēteni. <sup>10</sup> Nāskax Jesús fininākafā nā kēro yōkani: “¿Nā feronāfakefo mia yōafo mā foafomē? ¿Tsoa fisti nēteamamamē anā mia yōaxikakīma?” ixō Jesús yōkaito, <sup>11</sup> “Īfo, tsoa pishta nēteama,” faito, “Ērikai mia mekafakī chakafaima. Iskaratīa mī katiro. Afianā mī chaka ipaoni keskara anā askayamafe,” ixō Jesús nā kēro yoini.

### *Jesús pena xafashara keskara*

<sup>12</sup> Askata mā kēro kaano Jesús yorafā rasi yoini. Ato yoini iskafakī: “Ēfi pena keskarakī. Ē nā yorafo tii imasharatiro shara ĩpaxanōfo, anā fakish keskara inōfoma. A ea Ifofai fenotiroma,” ixō Jesús ato yoini. <sup>13</sup> Nikakakī fariseofāfe yoinifo: “Na mī noko yoiai anorikai tsōa mīōnoa noko yoima. Mīa mī yoime. Akka a mī noko yoiaikai tsōa mia nikatiroma,” faifāfe <sup>14</sup> Jesús ato kemani: “Ē fakiax oamē fakiri ě kaimē mē tāpia. Akka ěa ě yoimeai ěfe meka chanīmakōi. Askafiax fakiax ě oamē ě fakiri ě kaimē mākai tāpiama. <sup>15</sup> Mā ea tāpixoma, mā ěfe meka chanīmara faima. Ea tāpixoma mā ea shināi oa chanīai keskara ě mekaito. Mā askara shināi Niospa mato askara anori shināmanainoma. Ēkai tsoa mekafakī chakafaima. <sup>16</sup> Akka, ‘Na yorafāfe afara chakafamisfo,’ ěa ě mato faima. Ēfe Epa shināi keskara nānorikōiri ě mato yoi. Askaxō chanīmakōi ě yoimis. Ēfe Epa nāato ea nīchini, nā ea tāpimanai ě yoimis. <sup>17</sup> Moisés mato yoini iskafakī: ‘Feronāfake rafeta nānoris mato yoiaito mā nikatiro,’ ixō mato Moisés yoini. <sup>18</sup> Akka ěakōi ě yoime. Akka nā ea nīchinito ěfe Ēpari eōnoa nānorikōi yoimis,” ato faito, <sup>19</sup> nikakakī yōkanifo: “¿Fanīmē mī Epa?” faifāfe, “Mākai ěfe Epa yafi mā ea tāpiama. Ea tāpixō ěfe Epari mā tāpikerana,” ixō ato Jesús yoini.

<sup>20</sup> Nios kīfiti pexefā mēraxō ato yoini. Nāno nā kene mēra judeofāfe āto kori naneti ini. Niospa meka yoimisfo ato

ināmisfo. Jesús ato yoiaino judeo xanĩfofofãfe achipainifo. Askafixõ tsõa achinima ãfe penakairoko nokokẽ achipanãfãfe.

*Jesús yorafo yoini: “Ë kai arikai mã katiroma,” ato fani*

<sup>21</sup> Askata Jesús afianã judeofo ãto xanĩfofo yoini: “Ë chai mẽ kai. Ë kaano mã ea fenafikĩ mã ea fichitiroma. Mãto chaka soaxoma nãskax mã nai. Ë kai arikai mã nokotiroma,” ixõ Jesús ato yoini. <sup>22</sup> Jesús ato askafaito nikakaxõ yoinifo: “¿Akõi retemeimẽ? Nã noko yoiyai: ‘A ã kai ari mã nokotiroma,’ noko fai,” ikanax judeofo xanĩfofo yoinãnifo.

<sup>23</sup> Jesús ato tãpixõ ato yoini: “Mãfi na mai anoakĩ. Akka ãfi nai mẽranoakĩ. <sup>24</sup> Nã ãa ã yoimea keskara mãto chaka potaxma mã nai eakairoko mã ea chanĩmara faax. Nãskakẽ afara chakafaxõ mãto chaka soaxma mã naax Epa Nios ari mã nokotiroma. Mã mã naano mãto chaka mato fe ipanaka.”

<sup>25</sup> Ato askafaito kemanifo: “¿Mĩ tsoamẽ?” ixõ yõkaifãfe, “Nã ã mato yoitaifamis ãkĩa. <sup>26</sup> Matoõnoa afama mĩshti ã yoitiro. A mã afara chakafamis ã yoitiro. A ea nĩchinito ea yoiaito ã nikai. Nãskakẽ nã ã mato yoifafãini. A ea nĩchinito yoiyai chanĩmakõi,” Jesús ato fani.

<sup>27</sup> Apa Niosnoa ato yoifiaitokai tsõa tãpinifoma. <sup>28</sup> Nãskaifãfe Jesús ato yoini: “Ëfi yõra fakekõiki. Mã ea ifi cruz ikakĩ mastaxõ mã ea fininĩfofãxõ mã ea õixii ã tsoamãki mã ea tãpitiro. Nãskatari eõnoa mã tãpitiro ãa ã mato yoimisma. Epa Niospa ea yoiya keskara ã mato yoimis. <sup>29</sup> Nã ea nĩchini efe ika. Eres ã ikama. A ea amapayai keskara ã amiski. Nãskax ekeki inimasharamiski,” ixõ ato Jesús yoini. <sup>30</sup> Yoiaito nikakaxõ yora ichapato chanĩmara fanifo.

*Niospa fakefãfe Nios ãto Ifo, akka afara chakafamisfãfe afara chaka ãto ifo*

<sup>31</sup> Nãskaxõ Jesús a chanĩmara faafo yoini: “Ë mato yoiaito mã ea nikasharakõiax mã eõxõ tãpimiskõifo mã itiroki. <sup>32</sup> Ëfe meka nikakõixõ mã Nios tãpitiro, Nios chanĩmisma. Askax mã isharatiro. Afara chanĩ mãto ifo itiroma.”

<sup>33</sup> Ato askafaito kemanifo: “Nõfi Abraham ãfe fenaki. Fato fetsa nõko ifo imisma. Nõkai tsõa yonomatifoma. ¿Afeskakĩ ‘Afara chanĩ mãto ifo itiroma’ noko Jesús faimẽ?” fanifo.

<sup>34</sup> Askafaiãfe anã Jesús ato yoini: “Chanĩmakõi ã mato yoi. Nã afara chakafamisfãfe nã chaka ãto ifo ixii. <sup>35</sup> Mã mã tãpia pexe ifãfe ãfe yonomati ãfe pexe mẽra ipaxatiroma. Akka ãfe fake fisti ãfe pexe mẽra ipaxatiro. <sup>36</sup> Nãskarari Niospa Fãke mato chaka soaxonano afara chaka mãto ifo itiroma. Niospa mato fakekõifai, mã afe isharakõipakenaka. <sup>37</sup> Mẽ mato tãpia mãto xini Abraham. ãfe fenafofiaxõ ãfe meka mã nikakaspai. Nãskaxõ mã ea retepai. <sup>38</sup> Ëfe Epa amis keskara mẽ õimis.

Nãõnoa ã yoimis. Mãri a mãto epa mato yoimis keskara mãri yoimis,” ato feito, <sup>39</sup> kemanifo: “Akka nõko xini Abraham,” faifãfe, “Akka mã Abraham ãfe fenafokĩ ¿afeskai mã Abraham apaoni keskara mã amismamẽ? <sup>40</sup> Epa Niospa ea yoimis keskara chanĩma ã mato yoifiaino mã ea retepai. Abrahamkai mato keskara ipaonima. <sup>41</sup> Mãto epa akai keskara mãri mã amiski,” ato feito, “Nõkai Epa ichapayama. Nõko Epakõi fisti Nios. Nõfi ãfe fakekõifoki,” faifãfe <sup>42</sup> Jesús ato yoini: “Ëfi Nios fe imiski. Ë Nios ariax oni. Ëa shinãx na mai ano ã onima, ãfe Ëpa ea nĩchini. Akka mãto Epa Nioskẽ mã ea noikerana. <sup>43</sup> ¿Afeskakĩ ãfe meka mã nikaimamẽ? A ã mato yoiaito mã nikakaspai. <sup>44</sup> Akka mãto epa Satanás. Mã ãfe fakekõifo. Nãskaxõ mãto epa apaiyai keskara mãri mã apai. Nãfi taeyoi retemitsamis iyopaoni. Afi iskaratĩa nãskara. Atokai afara shara yoimisma, chanĩkõi. ãfe shinã mẽraxõ chanĩ fisti shinãmis. Nãskaxõ chanĩ fisti yoimis. Nã chanĩai shinãifãfe nã chanĩmis nãfi ãto apaki. <sup>45</sup> Nã keskara chanĩ ã mato yoiyamafaito mã ea chanĩmara famisma. <sup>46</sup> Ë afaa chakafaito mã ea õimisma. Ëkai afaa chakafamisma. Ramashara ã chanĩmisma. Ë askafaito mã ea chanĩmara famisma. <sup>47</sup> Nã Nios fe rafeafãfe Niospa meka nikatirofo. Mãkai Nios fe rafeama. Nãskaxõ mã ãfe meka mã nikaima,” ixõ Jesús ato yoini.

### *Abraham fakeamano Cristo Apa fe iyopaoni*

<sup>48</sup> Judeofãfe Jesús kemanifo: “Chanĩma nõ yoimis. Mĩfi samãritanõ chakaki. Askatari mĩ mẽra niafaka chaka nanea,” faifãfe, <sup>49</sup> “Niafaka chaka ã mẽra naneama. Ë ãfe Epa Niosnoa meka shara ã yoimis. Akka mãfi eõnoa meka chaka yoimis. <sup>50</sup> Askafixõ, ‘Ea yoisharakãfe,’ ã yorafo famisma. Ëfe Epa Niospa meka shara eõnoa ato tãpimapai. Nãato ato yoitiro fatofomãki yora sharafo, fatoforimãki yora chakafo. <sup>51</sup> Chanĩmakõi ã mato yoinõ. Nã ãfe meka nikaifo nakanamax nĩpanakafo,” ato feito kemanifo, <sup>52</sup> “Iskaratĩa mã nõ mia tãpikõi mĩfi niafaka chakaya. Akka mã Abraham nani, Niospa meka yoimisfori mã nanifo. Nãskafikẽ mĩ noko yoia: ‘Nã ãfe meka nikakõiaifo nãtamaroko nĩpanakafo,’ ixõ mĩ noko yoi. <sup>53</sup> Mã nõko xini Abram nani. Niospa meka yoimisfori mã nanifo. ¿Akka mĩ Abram finõkõiamẽ? ¿Mĩ shinãimẽ ‘Ë ato finõara’ iki?” faifãfe, <sup>54</sup> Jesús ato kemani: “A ãa ã yoimesharai ãfe meka sharama. Akka ãfe Ëpa eõnoa yoisharai. Mã a yoimis: ‘Nõko Epa Nios,’ fakĩ. <sup>55</sup> Mãkai ãfe Epa Nios tãpimisma. Akka ãfi ãfe Epa tãpikõia. Akka ã mato keskaraxõ, ‘Ëfe Epamara,’ ã fakerana mato keskara chanĩmis ã ikerana. Askatamaroko ãfe Epa Nios ã tãpikõia. Ea yoiai keskara ã amis. <sup>56</sup> Mãto xini Abram yoini: ‘Cristo oaito ã õixii,’ ixõ yoi inimani. Mã ã

oaito ea ðini askax fãsi inimani,” ato faito, <sup>57</sup> “Mĩkai cincuenta xiniya akama. Mĩkai nõko xini Abram õimisma. Afetĩakai nanima. Akka, ¿afeskakĩ, ‘Ë Abram õimis,’ ixõ mĩ noko yoimẽ?” faifãfe, <sup>58</sup> “Chanĩmakõi ã mato yoinõ. Abram fakeamano ãfi iyopaoniki,” ixõ Jesús ato yoini.

<sup>59</sup> Askaito nikakani nã judeofãfe ãto xanĩfofo õitifishkikaxõ tokiri fikaxõ Jesús tsakapainifo. Askafapaiifaifono Jesús ato makinoax yamarisatani, Nios kĩfiti pexefã mẽranoax. Kaitokai tsõa õinima.

## 9

### *Feronãfake fẽxo kãini Jesús sharafani*

<sup>1</sup> Jesús kakĩ feronãfake fẽxo nãskarapa kãini fichini. <sup>2</sup> Õikakĩ aõxõ tãpimisfãfe yõkanifo: “¿Maestro, afeskai na feronãfake fẽxo kãinimẽ? Afara chakafakatsaxakĩ ikaraka, apa feta ãfa afara chakafamisfono ikaraka,” ixõ Jesús yõkanifo. <sup>3</sup> “Afara chakafayamafikatsaxakĩ nãskarapa fẽxo kãini. Apa feta ãfari afara chakafamismo nã feronãfake fẽxo kãini. Nãskarapa kãini. Akka Niospamãi afama mĩshti fatirokẽ nãskax fẽxo kãini ato õimasharaxikĩ. <sup>4</sup> Niospa ea nĩchini ã yonoxonõ. Nã ã akaitĩã ã yonoxotiro. Akka fakishikai nõ yonoxotiroma. Nãskarifiakĩ mã nõ naxõ nõ anã Nios yonoxotiroma. <sup>5</sup> Ë nono mai ano iyoax ã pena keskara. Ë ato õimayoi afeskax isharakanimãkai,” ixõ Jesús yoini.

<sup>6</sup> Nãskara yoita maiki kemo mechota a mai kemõ mechanafaxõ a feronãfake fẽxo aõ fetekere ani. <sup>7</sup> Askafata, “Iamã fechokometãfe,” fani. Nã iamã ãfe ane Siloé, ãto mekapa anemisfo na Siloé ãfe ane “Nĩchia” famisfo.

Nãskata fẽxo iamã kaax fechokomeni. Fechokomexõ õiakefaini. Nãskax oni. <sup>8</sup> Nãskata nã chaima nikafãfe a õimisfãferi yoinifo: “Nã fẽxo tsoax afara yõkakameaito nõ õimis. ¿Nãmẽ?” faifãfe <sup>9</sup> atirifãfe, “Nãkĩã,” fanifo. Atirifãfe yoinifo: “Akerokõi,” fanifo. Nãskafikaxõ yoinifo: “Nã keskarakõi,” faifãfe, ato yoini: “Ëkĩã. Ëfi fẽxo iyopaoniki. Nãskafixõ iskaratĩã mẽ õisharai,” ato faito, <sup>10</sup> “¿Afeskaxõ mẽ iskaratĩã õisharaimẽ?” faifãfe, <sup>11</sup> “Nã feronãfake ‘Jesúsra’ faifãfepi ãfe kemõ mai mechanafaxõ ea fetekere axõ: ‘Nã Siloé iamã fechokometãfe,’ ea faano, Siloé iamã fechokomexõ ã õishara,” ato fani. <sup>12</sup> Ato askafaito nikakaxõ, “¿Fanĩmẽ a feronãfake Jesús?” faifãfe, “Ëtsa ã tãpiama. Mã fakira kaa,” ato fani.

### *Nã fẽxo kãinito õisharaino fariseofãfe a yõkanifo.*

<sup>13</sup> Askaito yorafãfe nã feronãfake fẽxo iyopaoni fariseofo ano iyonifo. <sup>14</sup> Jesús nã feronãfake pena tenetitĩã sharafani. <sup>15</sup> Fariseofãfe nã feronãfake anã yõkanifo: “¿Afeskax

mĩ fero sharamẽ?” faifãfe, “Ea Jesús sharafaa ãfe kemõ mai mechanafaxõ ea aõ fetekere akano. Ë ãamã fechokomexõ ë õisharakõia,” ato fani.

<sup>16</sup> Nikakakĩ fariseo fetsafãfe yoinifo: “Akai Nios fe rafeama. Moisés kirika kenexõ noko yoini iskafakĩ: ‘Pena tenetitĩa nõ yonotiroma,’ ixõ yoini. Nãskakẽ nõ yora sharafatiroma pena tenetitĩa,” faifono, fetsafãfe ato kemanifo: “Akka yora chakapa fẽxo sharafatiroma. Yora chakapakai nãato akai keskara fatiroma,” ikanax fariseofo fochishpanã faatanãnifo. Atirifãfe fariseofãfe yoinifo: “Jesúsakai sharama,” faifono, atirifãferi, “Jesús sharaki,” fanifo. <sup>17</sup> Nãskata afianã fariseofãfe a yora fẽxo ipaoni yõkanifo: “Mĩ noko yoia, ‘Nãto ea fero sharafaxõa,’ fakĩ. ¿Akka afaa mĩ shinãimẽ tsoamãki?” faifãfe, “Nã Nios ato yoixomisto ea sharafaa,” ato fani.

<sup>18</sup> Ato askafaito nikakakĩ judeo fetsafãfe, “A chanĩra,” fanifo. “Na fẽxo ipaonima,” ixõ. Nãskaxõ fariseofãfe apa yafi afa kenaxõ yõkanifo. <sup>19</sup> “¿Namẽ mĩ fake fẽxo ipaoni? Akka, ¿afeskakĩ iskaratĩa õimẽ?” faifãfe, <sup>20</sup> “Nãkĩa nõko fake, nã fẽxo kãini. Mã nõ tãpia nõko fake. <sup>21</sup> Tiiri afeskara axora mã õi nõkai tãpiama. Akka fakefomaki, xiniki mato yoitiroki afeskax sharamãki. Yõkakãfe,” afa feta ãpa ato fani. <sup>22</sup> Judeofoki mesekakĩ nãnori yoinifo. Akka judeo xanĩfãfe yoiyoni iskafakĩ: “Tsõa yoitiroma: ‘Epa Niospa Jesús nĩchini nõko Ifo Cristo inõ,’ ixõ yoitiroma. Akka askara yoixõ anã nõko ichanãti pexe ano ikitiroma,” judeo xanĩfãfe anori ato yoiaino nã fẽxo ipaonito ãfe afa fe ãfe apa mesenifo. <sup>23</sup> Nãskaxõ ato yoinifo: “Xiniki fakefomaki. Yõkakãfe,” ato fanifo.

<sup>24</sup> Nãskata fariseofãfe nã feronãfake fẽxo ipaoni yõkanifo: “Noko yoikĩ iskafafe: ‘Niospa ea sharafaa,’ ife,” fanifo. “Jesúsakai sharama. ‘Niosfi sharaki,’ ife. ‘Jesús sharara,’ fayamafe. Nõ tãpia Jesús chakaki,” fanifo.

<sup>25</sup> “Ëtsa. Ë tãpiama chaka iyamai shara rakikĩa. Ë tãpia ë fẽxo iyopaoni ë iskaratĩa õisharai. Nã fisti ë tãpia,” ato faito, <sup>26</sup> “¿Afeskafaxõ mia sharafaamẽ?” ixõ yõkaifãfe, <sup>27</sup> “Ë mato yoiaito, ¿mã ea nikamamẽ? ¿Afeskakĩ mã afianã ea yõkaimẽ? ¿Mãri aõxõ tãpimis mã ipaimẽ?” ato faito, <sup>28</sup> nikakakĩ ãchaketsanifo. Nãskaxõ yoinifo: “Mĩfi a Ifofaikai. Akka nõfi Moisés meka nikamiski. <sup>29</sup> Nõ tãpia Moisés Nios fe meka-paoni. Nõkai na Jesús tãpiama. Fakira anoax oa afe keskarara a feronãfake nõ tãpiama,” faifãfe anã ato kemani: <sup>30</sup> “¿Mã tãpiamamẽ fakira anoax oxõ ea sharafaa ë fẽxokẽ? <sup>31</sup> Nõ tãpia yõra chakafamisfokai Niospa ato nikapaitiroma. Fatorato Nios Ifofasharapai ishatariro. Nãskara Niospa nikapai. <sup>32</sup> Nã Niospa mai onifani chãikai nõ afaa nikayomisma yora fẽxo kãini tsõa sharafai. Akka iskaratĩa mã ea Jesús sharafaa. <sup>33</sup> Na

feronāfake Niospa nīchiyamanokai afaa afeskafakeranama,” ato faito, <sup>34</sup> nikakani akiki ōitifishkinifo. “Mīfi chakakōi kāini. ¿Afskakī mī noko tāpimapaimē mī chakafixō? Anā nōko ichanāti pexe mēra mī ikitiroma. Nonoax kariskatāfe. Nōkai anā mia ōipaima. Anā nōko ichanāti pexe mēra ikiyamafe,” fanifo.

*Fatorafāfe Jesús chanīmara fayamakanax nā yora fēxo keskarakōifo*

<sup>35</sup> Nāskano nā fēxo imis āto ichanāti pexe mēraxō potaifāfe nikafaini Jesús kani. Nāskaxō fenakī a fēxo imis fichini. Fichixō yōkani: “¿Mī Niospa Fake chanīmara faimē?” ixō yōkaito, <sup>36</sup> “¿Fatomē ē chanīmara fanō?” faito, <sup>37</sup> “Nā mī ea ōi. Ēkīa,” Jesús fani. <sup>38</sup> Askafaito ratokonō mai chachipakefofā yoini: “Ifo, ēfi mia chanīmara faikai. Mī fāsi sharakōi. Ē mia Ifofai. Mī Niospa Fakeki,” ixō yoini.

<sup>39</sup> Askata chipo afianā yorafo akiki feafāfe Jesús ato yoini iskafakī: “Ēfe Epa Nios ika anoax ē nono mai ano oni. Fato yorafomāki a ea nikayamaifo, fatoforimāki a ea nikaifo ē ato ōiyoi oni. Fatotora shināi iskaito: ‘Mē afara chakafamiski. Ea chaka soaxope,’ ixō anori shināito ē āfe chaka soaxotiro afianā afara chakafayamanō. Ē na fēxo fero sharafaxōa keskafakī ē yorafo āto chaka soaxotiro shara inōfo. Akka fetsafāfe shināi iskakani: ‘Ē afaa chakafamisma, ē yora sharakōi. Ē tāpikōia,’ ixō shinākani. Askarafofi yora fēxo keskarafokī, a ato sharafamis ano fopaikanima ato sharafapanā. Nāskarafāfekai yoipaikanima āto chaka soapaikanima. Nāskarafo fenopakenakafa,” ixō Jesús ato yoini. <sup>40</sup> Fariseofāfe a Jesús yoiiai nikaxō yōkanifo: “Kee. ¿Mī noko yoimē nōmē fēxo?” faifāfe <sup>41</sup> Jesús anā ato yoini: “Mā ea yoikerana: ‘Nō fēxo keskarafo. Mā nō afara chakafamis,’ ixō mā ea yoiaito ē mato chaka soaxokerana. Akka mā kai ea askafamisma. Mā yoimis: ‘Nō ōisharatiro. Nōkai fenoama. Nō sharakī. Nōkai chakama,’ ixō anori mā yoimis. Akka māto chaka soaxma, mā fenokōiax Epa Nios ika ano mā nokopakenakama,” ixō Jesús ato yoini.

## 10

*Oveja keneaki keparanākī Jesús ato yoini*

<sup>1</sup> (Askata Jesús ato tāpimani nāatomāi āto kexekatsaxakī. Oveja kexemisto āfe ovejafo kexemis keskari fakī nāskarifiakī Jesús ato kexemis.) Nānori Jesús ato yoini iskafakī: “Chanīmakōi ē mato yoinō. Yōra ovejafo kenexotiro āfe kene mēra inōfo, faki fofāsanōma. Nāskata yora yometsopai ovejafo āfe kāiti ano ikitiroma, fomākīari ikitiro. <sup>2</sup> Akka nā ovejafo kexemis nā oveja kāitinī ikikaitiro. <sup>3</sup> Kāiti ano

nokoano feronāfake nā kāiti kexemisto fepoti fēpexonano oveja kexemis ikitiro. Nā oveja kexemis ikiano āfe ovejafāfe āfe oi tāpikatirofo. Nāskaxō āfe ovejafo āfe anē ato kenaito āfe ovejafāfe chīfafāitirofo. <sup>4</sup> Nā ovejafo kexemis rekē kaino āfe ovejafo āfe kene mēranoax kāiferatirofo. Māmāi āfe oi tāpikanax nāskaxō chīfafaitirofo. <sup>5</sup> Akka a kexeamatokai iyotiroma, āfe oi tāpikatiro, a ato kexemisto āfe oikairoko askarakē. Nāskakē a makinoax ichotirofo,” ixō Jesús ato yoini. <sup>6</sup> Jesús nā ovejafoki keparanākī ato yoini. Ato yoiaito tsōa tāpinifoma.

### *Jesús noko kexesharamis*

<sup>7</sup> Nāskano Jesús afianā ato yoini: “Ē chanīmakōi mato yoinō. Nā ovejafo kene mēra ikikani nā kini fisti mēra ikitirofo. Ēfi na oveja kini keskaraki. Nā Epa Nios ano ikipaikani eōnoax fisti ikitirofo. <sup>8</sup> Ē matoki nokoamano fetsafāferi mato yoikī iskafakani: ‘Ēfi Cristoki. Ē mato tāpimatiro afeskax mā Epa Nios ari nokotiomāki afe ipaxakī,’ ixō anori yoikani āa chanīmisfo. Yometso keskarakōifo. A Nios chanīmara faifo ato pārapaikani: ‘Noko fisti nikanōfora,’ ikaxō. Nāskakē Niospa fakefāfe ato nikakanima, ‘Noko fisti nikanōfora,’ ixō ato pārapaiyaifono. <sup>9</sup> Akka ēfi na kini kāiti keskaraki. Nā ēfe Epa Nios ika ano ikipaikani eōnoax ikitirofo afe ipaxakakī. Nāskatari eōnoax isharatirofo anā fekaxtetirofoma. <sup>10</sup> Akka fetsafāfe efe yorafo ato pārapaikani: ‘Ea ifofakāfe. Ē mato tāpimasharanō,’ ixō ato yoifikakī anorima ato pārakani. Nāskakaxō emakinoa ato ifipaikani. Yometso keskarakōifo. A ea chanīmara faafo ato kexesharapaikanima. Ato chakafata ato retepaikani. Akka ē askarama. A ea Ifofamisfo ē ato kexesharai efe isharapakexanōfo, nono nāmānoaxri ishara-pakexanōfo. Nāskax ē nono nāmā oni ato kexesharaxikī.

<sup>11-13</sup> “A ea chanīmara faifo ovejafo keskarafa. Ēfi nā oveja kexesharamis keskaraki. Nāskakē ē efe yorafo ē ato nāxoxii. Oveja ifāfe feronāfake fetsa kori inātiro āfe oveja kexexonō. Nāskaxō mā kori ināno nā feronāfake oveja kexesharatamaroko, kori fisti shinātiro. Nāskakē poomā oaito fichiax ovejafo kexetama ichotiro. Nāskaxō shināi iskakī: ‘Na poomā mesekōi. Na ovejafo ēfenākōima, aa poomānā pinō ēfenākōimakī. Nāskakē ē ichoikai ea poomānā afeska fanōma,’ ixō shinātiro. Akka ovejafāfe ifokōi askarama. Āfe oveja kexesharai. Poomā oaito fichixō ato kexesharatiro, poomānā ato afeska fanōma. Nāskaxō shinātiro iskakī: ‘Ēfe ovejafoōnoax ē natiro afokai afeskatiroma,’ ixō shinātiro.

<sup>14-15</sup> “Ēfi nā ovejafāfe ifo keskara sharakī. Ovejafo āfe ifāfe ato tāpia atomāi kexesharakatsaxakī. Ēri nā ea chanīmara faafo ē ato kexesharamis. Ēfe Epa Niospa ea tāpikōia. Ēri

ēfe Epa ē tāpia. Nāskarifiakī a ea chanīmara faafo ē ato tāpia. Afāferi ea tāpiafo. Nāskax ē atoōnoax naxii. <sup>16</sup> Yora fetsafāferi ea chanīmara faxikani. Afokai nono ikafoma. Mai fetsa ano ikafo. Nāfāfe ea nikasharaxikani. Nāfo ēfe Epa ika ano ē ato iyotiro. Akka nā yora fetsafāfe a nono ikafāferi ea chanīmara fakanax yora fisti keskara ixikani. Nāskax Epa Niospa yorakōifo ixikani. Eres fisti ē ato kexesharai. <sup>17</sup> Ē ato kexeax ē atoōnoax naxii. Nāskaito ēfe Epa Niospa ea noi. Naax ē anā otoxii. <sup>18</sup> A ea chanīmara faafoōnoax ēakōi ē nai, ea tsōa retekeranama. Ēfe Ēpa ea yoini keskara ē atoōnoax naikai. Ēfe Epa Niospa ea yoini keskara ē atoōnoax nafiax ē anā otoxii,” ixō Jesús ato yoini.

<sup>19</sup> Nikakaxō judeofāfe chanīmara fanifo. Akka atirifāfe chanīmara fanifoma. <sup>20</sup> Atirifāfe yoini iskafakakī: “Nīafaka yōshi chaka a mēra nanea. Afaa tāpiama. Noko yoiai nō tāpitiroma. ¿Afeskakī na feronāfake nō nikatiromē?” ixō yoinifo. <sup>21</sup> Akka atirifāfe yoinifo: “Niafakakai a mēra naneama. Niafaka a mēra naneanokai iskara meka shara yoikeranama. Nīafakakai feronāfake fēxo ōimatiroma,” ixō yoinifo.

### *Judeofāfe āto xanīfofōfāfe Jesús chanīmara fanifoma*

<sup>22-23</sup> Askafafono Jesús kani judeofāfe āto Nios kīfiti pexefā mēra Jerusalén ano mā mechakaino. Nāno tapas keskara ini pexe kachiori. Ano Jesús kani. Nā tapas āfe ane Salomón. Nāskatari judeofāfe āto fista anifo. Nā fistatīa shinānifo a Niospa pexe onifani.

<sup>24</sup> Judeofāfe āto xanīfofo Jesúski fenifo yōkai fekani: “¿Mīmē Cristoki? Noko yoife. ¿Afeskakī mī noko yoisharaimamē? ¿Afetīakairoko mī noko xafakīa yoimē?” faifāfe, <sup>25</sup> “Ē mato yoifimiskē mā ea chanīmara faima. Ēfe Epaōxō a yorafāfe atiroma keskara fakī mē mato ispa ēmāi Niospa Fakexō. <sup>26</sup> Akka mā kai ea chanīmara faima mā kairoko Ēpa Niospa yorafoxō. <sup>27</sup> A ea chanīmara faifāfe ea nikasharatirofo. Mē ato tāpia a ea Ifofakōinafo. <sup>28-30</sup> A ea Ifofaafoma omiskōipakenakafo mēra fokani. Akka a ea Ifofamisfokai ari fokanima. Askatamaroko ē ato imasharapakenaka. Epa Niospa atoya ea rafemani. Epa Niospa keyokōi ato finōkōia. Ē ēfe Epa Nios fe nā yora fisti keskara. Nāskakē a ea Ifofamisfo emakinoa tsōa ato ifitiroma, ēfe Epa makinoari tsōa ato ifitiroma,” ixō Jesús ato yoini.

<sup>31</sup> Nikakaxō judeofāfe āto xanīfofōfāfe anā tokiri fikaxō aō Jesús tsakapainifo retepaiyanā. <sup>32</sup> Nāskafaiifāfe Jesús ato yoini: “Epa Niosxō afama mīshti ē mato ispa tsōa atiroma keskafakī. Akka, ¿afaōxokai mā ea tokirinī tsakaimē?” ato faito, <sup>33</sup> “Akka



na afama mīshti mī noko ispaõxokai nō mia tokirinī tsakaima. Akka nā mī meka chakaõxō nō mia tokirinī tsakapai, ē Nios keskarara mī ikaito. Anā ano Nios fetsama. Mīri noko keskara yora. Akka mī noko yoia: ‘Ēri Nios keskara,’ iki. Akka mī Nios chakafai. Nāskakē nō mia tokirinī tsakai,” faifāfe, <sup>34</sup> Jesús ato kemani iskafakī: “Mā is kai: ‘Anā ano Nios fetsama,’ mā imis. Akka nā Niospa meka yoimisto kirika keneni iskafakī: ‘Ē mato yoi māfi Nios keskarakōifokī. Niospa mato nīchia,’ ixō kirika keneni, Niospa meka yoikī. Akka nā meka tsōa chanīra fatiroma. <sup>35-36</sup> Akka Niospa anori yoifiano ¿afeskakī mā ea yoimē ē Nios chakafai? Akka Niospa ea nai mēraxō nāmā nīchini. Nāskakē ē mato yoitiro ēfi Niospa Fakeki. <sup>37-38</sup> Mā kai ea nikapaima. Ēfe Epa Niospa aka keskara ē ayamakē, āa chanīra mā ea fakerana. Akka ēfe Epa akai keskara ēri akaito mā yoikerana: ‘Chanīma Epa Niospa atiro keskara Jesús aki,’ ixō mā yoikerana. Nāskakē a ē afama mīshti akaõxō ea chanīmara fakāfe. Ēfe Ēpa akai keskara ēri akaito mā ea tāpitiro ēfe Epa fe ika,” ixō Jesús ato yoini.

<sup>39</sup> Nikakaxō anā Jesús achipaifiaifono, ato makinoax kaitokai tsōa tāpinima. Nāskakē tsōa achinima.

<sup>40</sup> Ato makinoax kai, faka Jordán ari kani nā Juan yorafo maotisafapaoni ano. Nāno chaimashta Jesús nēteni faka kesemē. <sup>41</sup> Nāskakē yorafo akiki fēkaxō yoinifo iskafakakī: “Jesús Niosxō afama mīshti fakī noko ispa. Juankai askafapaonima. Askafixō Juan Jesúsnoa noko yoini chanīmakōi,” ikanax yoinānifo. <sup>42</sup> Nāskakaxō yora ichapato Jesús Niospa fakera fakaxō Jesús chanīmara fanifo.

## 11

### *Lázaro mā nani* (Mt. 12.46-50; Lc. 8.19-21)

<sup>1</sup> Askata feronāfake Lázaro isinī ini. Nā Lázaro Betania ano ikax isinī ini. Poi rafe fe ikax María ikaino, Marta ikaino, nā rafe ato fe ikax. <sup>2</sup> Nā María pirofomā sharakapa Jesús āfe tae pemākīa nachiyoni. Nāskaxō āfe fōo otekere ani.

<sup>3</sup> María feta Marta iskafakī Jesús yoitanōfo ato nīchini: “Ifo, mī yamakōi Lázaro isinī iki kiki,” ikaxō yoitanōfo.

<sup>4</sup> Kenamanaifāfe nikaxō Jesús aõxō tāpimisfo ato yoini iskafakakī: “Nā Lázaro isinī ikai naima. Akka yorafāfe ōikani ē afara afeskarafaito. Nāskakē ea tāpikani ēmāi Niospa Fakekē. Nāskaxō yorafāfe yoikani: ‘Epa Nios fāsi sharakōi,’ ikaxō yoinōfo,” ixō Jesús ato yoini.

<sup>5</sup> Jesús poi rafeya Lázaro noikōini. <sup>6</sup> Lázaro isinī ikaito nikafi Jesús oxa rafeyoni. <sup>7</sup> Nāskata a aõxō tāpimisfo Jesús yoini: “Nō Judea mai ano nō anā kanō,” ixō Jesús ato yoini. <sup>8</sup> Ato

askafaito kemanifo: “Maestro, nõko xanĩfofãfe Judea anoxõ mã mia retekeraitafo. ¿Afeskai mĩ afianã ari kapaimẽ?” ixõ yoiaino, <sup>9</sup> Jesús anã ato kemani: “Penata nõ õisharatiro. Xinĩ chaxaino nõ õisharatiro. Nãskax nõ otisikax nõ paketiroma. Nãskarifiakĩ pena tii Niospa ea amapaiyai keskara ea tãpimani. Nãskaxõ ea kexeano ã mesetiroma. <sup>10</sup> Akka fakishi yora kai xafasharayamano otisikax paketiro. Nãskarifiakĩ Nios fe rafeamato tãpisharatiroma afeskax isharatiromãki. Askax fenotiro,” ixõ Jesús ato yoini.

<sup>11</sup> Nãnori ato yoita anã Jesús ato yoini iskakafã: “Nofe yora Lázaro mã oxakẽ ã mõikai,” ato faito, <sup>12</sup> a aõxõ tãpimisfãfe nikakaxõ yoinifo: “Ifo, akka oxakõiax naima. Chipo sharatiro,” fanifo. <sup>13</sup> “Nofe yora Lázaro mã oxaki,” Jesús ato fani. Mã Lázaro nafiakẽ ato tãpimapainima. Nãskakẽ shinãnifo: “Lázaro oxara,” ikaxõ tsõakairoko tãpixõ. <sup>14-15</sup> Nãskaxõ Jesús ato xafakã yoini mã Lázaro nakõinano: “Mã Lázaro naki. Nãskax ã inimaikai ã ano ikamano Lázaro naki. Akka mã ea chipo õitiro ã afara afeskarafaito. Nãskaxõ mã ea chanĩmara fai. Nãskakẽ iskaratã nõ Lázaro ano kanõ,” ixõ Jesús ato yoini. <sup>16</sup> Ato askafaito nikakata Tomás nã Rafe Naneni nãato Jesúsxõ tãpimis fetsafori ato yoini: “Nõ kanõ nõri afe naxikĩ,” ixõ ato yoini.

### *Jesús fistichi naafo ato otofatiro*

<sup>17</sup> Askata Betania ano nokoxõ Jesús nika: “Mã Lázaro naa,” nikani. Mã cuatro nia oxa nikani a maifaitafo mafa kini mẽra, Betania ano. <sup>18</sup> Betania fe Jerusalén chaima ini. <sup>19</sup> judeofo ichapa María fe Marta ika ano fenifo ato ferarofai fekani, mã ãto poi naano.

<sup>20</sup> Nãskata Marta Jesús oaito nikai akiki nokoikai kani María pexe mẽra nĩchifaini. <sup>21</sup> Marta Jesúski nokoxõ yoini: “Ifo, mĩ nono ikanokai ãfe exto nakeraitama. <sup>22</sup> ã tãpia mĩ iskaratã afara fetsa mĩ Nios yõkaito mia axorisafatirokĩ,” faito, <sup>23</sup> “Extofi anã otoi kiki,” faito, <sup>24</sup> “ã tãpia nã namisfo mã mai keyoaino afianã otoxikani. ãfe extori otoxii,” ixõ Marta yoiaino, <sup>25</sup> Jesús kemani: “Eõnoax nã nafo tii otokani. Akka eõnoax niafori. Nã ea chanĩmara faax nafiax anã otoxii kiki. <sup>26</sup> Nãskakẽ ea chanĩmara faax anã nanakama. ¿Nãskakẽ mĩ ea chanĩmara faimẽ?” faito, <sup>27</sup> “ãje, Ifo, ã mia chanĩmara fai mĩmãi Cristokẽ, Niospa fake. Nõ mia manamis. Akka nõko xinifãferi Cristo manapaonifo. ‘¿Afetã na mai ano Cristo oimẽ?’ ikaxõ nõko xinifãfe mia manapaonifo,” Marta fani.

### *Lázaro mafa kini mẽra maia õi Jesús oiani*

<sup>28</sup> Nãskata mã yoikĩ xateta, Marta ãfe chiko María yoikai kani. Kaxõ õia a María fe rafeafo oiyakani inifo. Nãskata

Marta afe chiko María one mēshanāxō yoini: “Mā nōko Ifo oaki. Mia kenamana, ōikofe,” fani. <sup>29</sup> María nikata fininākfāta kani Jesúski nokoikai. <sup>30</sup> Jesúskai pexe rasi ano nokoama ini. Nā Marta akiki nokoano Jesús nēteni. <sup>31</sup> Mā María ato fe oiafai kaino a afe oiafaiyaifāfe ōinifo. “María poi maia mǎnāonoax oiai kai kiki,” ikaxō chīfafainifo.

<sup>32</sup> María Jesúski nokota ratokonō mai chachipakefōfā yoini: “Ifo, mī nono ikanokai ēfe exto nakeraitama,” María fani. <sup>33</sup> María oiaito Jesús ōini. Judeofori a María fe feafori oiaifāfe Jesús ato ōini. Nāskaxō ato shinākōini. <sup>34</sup> Nāskaxō ato yōkani: “¿Fanī mā maifaitamē?” ato faino, yoinifo: “Ifo, ono nō akitakīa ōiyopo,” fanifo. <sup>35</sup> Askafafono Jesús oiani. <sup>36</sup> Oiaito ōikakī judeofāfe: “Ōikapo. Lázaro manoi oiai,” fanifo. <sup>37</sup> Nāskaxō fetsafāfe yoinifo: “Nā fēxo sharafaita keskafaxō, ¿afeskafakī nonoxō Lázaro sharafaitamamē?” fanifo.

### *Jesús Lázaro otofani*

<sup>38</sup> Nāskata Jesús anā shināmitsani Lázaro maia ano nokoax. Nā Lázaro maia ano nā kini tokiri efapato fepoafō ini. <sup>39</sup> Nāno nokoxō Jesús ato yoini: “Na tokiri aō fepoa fepekāfe,” ato faito, nikakī Marta yoini: “Iskaratīa mā pisiaki,” faito, <sup>40</sup> nikakī anā Jesús yoini: “¿Ē mia yoiaito mī ea nikaimamē? Ea mīa nikaino Niospa afara shara faito mī ōitiro,” fani. <sup>41</sup> Askafaito nikakakī fēpexonifo. Fēpexonaifono nai foisnīfōfāta Apa yoini: “Epa, ē mia kīfaiito mī ea nikai. Ē mia aicho fai. <sup>42</sup> Ē tāpiaki ea mīa nikafafāimiskī. Nāskakī ē mia kīfi na yorafāfe mia chanīmara fanōfo. Nāskakaxō ea tāpinōfo ea mīa nīchiniki.”

<sup>43</sup> Apa kīfikī askafata fāsikōi Lázaro kenani: “Lázaro, kini mēranoax kāikerafe,” faino, <sup>44</sup> Lázaro kāikerani nā aō rakoitafoya. Nāskaxō ato yoini: “Na mā aō rakoita pekakāfe kāisharanō,” ato fani.

### *“¿Afeskaxō nō Jesús retetiromē?” ixō shinānifo (Mt. 26.1-5; Mr. 14.1-2; Lc. 22.1-2)*

<sup>45</sup> Nāskata judeofo a María fe feafāfe Jesús Lázaro otofaito ōikakī Jesús chanīmara fanifo. <sup>46</sup> Nāskafaito ōikani atiri fariseofoki chanifokani fonifo. <sup>47</sup> Ato yoiāifāfe nikakanax fariseofo fe a Nios ato kīfixomisfāfe āto xanīfofo ichanānifo. Ichanākanax yoinānifo: “¿Nō Jesús afeska faimē? Tsōa atiroma keskara fai kiki. <sup>48</sup> Nō afeskafayamaino keyokōichi chanīmara fakani kiki. Romano xanīfokōifo fēkaxō noko yoitirofo iskafakakī: ‘Mākai anā xanīfoma,’ noko fatirofo. Nāskaxō nōko kīfiti pexefā noko pōtatirofo,” ikanax yoinānifo. <sup>49</sup> Nāskaifāfe Nios ato yoixomis xanīfokōichi Caifás ato yoini: “Māfi tatimakōikī,” ato fani. <sup>50</sup> “¿Mā tāpīamamē? na feronāfake fisti a yorafoōnoax naxiai. Nāfi sharaki. Ares fisti natiro nō nanōma, nōko kaifo fetsafori

nanõfoma,” ixõ ato yoini. Chanĩmakõi Caifás yoini a ixiai keskara yoikĩ.

<sup>51</sup> A Caifás yoiai ãa shinãkĩ yoinima. Niospa ãfe shinãmã shinãmanaino yoini. Nios kĩfixomisfãfe ãto xanĩfokẽ Niospa ãfe shinãmã shinãmanaino, “Jesús judeofonoax naxira,” ixõ yoini. <sup>52</sup> Jesúskai judeofo fistiõnoax naima. Mai fetsa ano ikafãferi chanĩmara faafono ato nãxoxii. Nãskata Niospa fake ixikakĩ noinãkõikanax, nã yora fisti keskara ixikaki.

<sup>53</sup> Nãskata nã penata judeo xanĩfofõfãfe shinãnifo: “¿Afeskaxõ nõ Jesús retetiromẽ?” ikaxõ pena tii shinãpaonifo. <sup>54</sup> Mã retepaiyaifono tãpiax judeofo ano anã Jesús kanima. Yorafã rasi ano katamaroko pexe fisti rasi ano kani, nã pexe ãfe ane Efraín ano, tsõa istoma ano. Nã aõxõ tãpimisfo fe nãno iyoni.

<sup>55</sup> Judeofãfe ãto fista Pascua mã chaima ikaino, yora rasi Jerusalén ano fonifo, Pascua fista akifokani. Moisés ãto xinifo yoipaoni keskai akairi ãto chaka soapaikani Nios kĩfiti pexefã mẽra ikifokani, fista ikamano fonifo. <sup>56</sup> Nãskaifono judeofãfe Jesús fenanifo. Nãskakanax Nios kĩfiti pexefã mẽra ikinifo. Nãnoax yoinãnifo: “¿Fanĩmẽ Jesús?” ikanax yoinãnifo. “‘Nonoxõ Jerusalén anoxõ Jesús fista akiyoirã,’ ¿mã ikimẽ?” ikanax aa ranã yoinãnifo. <sup>57</sup> Askakaxõ judeofo ãto xanĩfofo feta fariseofãfe ato yoinifo iskafakakĩ: “Jesús fichixõ noko tãpimakãfe nõ achinõ,” ato fanifo.

## 12

*Kẽromã Jesús shinãkĩ pirofomã ãfe tae pemãkĩa nachini*  
(Mt. 26.6-13; Mr. 14.3-9)

<sup>1</sup> Nãskano seis nia Pascua fista mã chaima ikaino Jesús aõxõ tãpimisfo fe Betania ano kayoni. Nãno Lázaro ika ini. Nã Lázaro nakẽ Jesús otofani. <sup>2</sup> Nãnoxõ Jesús pimaxikakĩ pĩchanifo, a Jesús fe foafãferi pinifo. Lázarori ato feta pini. Nã Marta ato pimani. <sup>3</sup> Mã piafono María Jesúski oni ãfe pirofomã sharaya. Oxõ nã pirofomã ãfe tae pemãkĩa nachini. Nãskaxõ ãfe fõo otekere ani. Nãskafaano yorafãfe nã pexe mẽra ikafãfe nã pirofomã sharakõi xetenifo. <sup>4</sup> Nã Jesúsxõ tãpimis fẽtsa nã Judas Iscariote, Simón fake, nã ato achimaxiaito yoini, <sup>5</sup> “Kee. ¿Afeskakĩ na kẽromã pirofomã shara potaimẽ? Ato minixõ kori ichapa fixõ noko inãkerana a afaamaisfo nõ ato inãpanã. Nãskax shara ikerana,” Judaspa fani. <sup>6</sup> Anori Judaspa yoifikĩ ato kori inãkeranama. Nã Judasfi yometsokõi iniki. Nã Judaspa ãto kori kexexopaoni. Yometsofixõ nãskakẽ tsõa tãpipaonima. Nã kori fixõ a afaamaisfo ato inãkeranama, nã a kori onekerana. <sup>7</sup> Nãskafaito nikakĩ Jesús Judas yoini: “María fekaxtefayamafe. Ë samamashta naito mã tãpixõ ekeki pirofomã nachia,” fani. <sup>8</sup> “Nã yora afaamaisfo mato fe ipanakafo.

Nāskakē mā ato mēxotaima afarafo inātiro. Akka êkai mato fe nono mai ano ipanakama, ē mato yoi. Akka na María iskaratīa ea shara faa,” ato Jesús fani.

### *Judeofāfe āto xanīfofōfāfe Lázaro retepainifo*

<sup>9</sup> Nāskata judeofo ichapa rasi Jesúski fenifo, Betania ano ikano mā tāpikanax Jesús fistikai òifekani fenifoma. Lázarori òifekani fenifo. Nā Lázaro Jesús otofaita nikakaxō òipainifo. <sup>10-11</sup> Nā Lázaro Jesús otofaita nikakaxō judeofāfe ranārīto anā āto xanīfofo tananifoma Jesús fisti chanīmara fakakī. Nāskaifono nā xanīfofo òitifishkikanax yoinānifo: “Jesús yafi Lázaro nō retenō. Jesús fistima. Lázarori nō retenō,” ikanax yoinānifo.

### *Jesús nokoni Jerusalén ano*

(Mt. 21.1-11; Mr. 11.1-11; Lc. 19.28-40)

<sup>12</sup> Nāskano pena fetsa judeofāfe āto fistatīa yorafā rasi Jerusalén ano fenifo. Jesús nokoaito nikakani nāskax akiki fenifo. <sup>13</sup> Epe pei tsumakanax akiki fekani. Nāskakanax fāsikōi tai tai ifenifo iskakani: “¡Sharafinakōi nokoki oi kiki Niospa nīchiano! Israelifo mī nōko xanīfo oi nokoki. ¡Sharafinakōial!” ikaxō fāsikōi yoinifo. <sup>14-15</sup> Askafaifono Jesús burro fakeshta kamaki tsaoax oni. Niospa meka fētsa keneni iskafakī Niospa shināmanaino:

Jerusalén ikafāfe, rateyamakāfe. Māto xanīfo matoki oxii burro fakeshta kamaki tsaoax, ikaxō kirika keneni. <sup>16</sup> Nāskafikē Jesúsnoa yoikī kirika keneni keskara aōxō tāpimisfāfe tāpiyonifoma. Akka mā reteafono otoax Apa ari kaano nāskakē aōnoa tāpinifo. Iskakakī shinānifo: “Nā Jesús nono mai anoxō a afama mīshti axiai aōnoa yoikakī kirika keneyoni. Nōko xinifāfe Jesús fakeyoamano a inōpokoai aōnoa yoikakī kirika keneni,” ikaxō Jesúsxō tāpimisfāfe āto òiti mēraxō shinānifo.

<sup>17</sup> Jesús Jerusalén ano nokoaino nikakakī yorafā rasichi a mananifo òipakakī. Atirifāfe mā Lázaro nakē Jesús otofaitano òinifo. Nāskakē mā Lázaro Jesús otofaita òikanax fetsafoki chaninifo akairi tāpinōfo. <sup>18</sup> Jesús Lázaro mā nakē otofaita nikakaxō nāfāferi òipainifo. Nāskaxō fai nēxpakīaxō mananifo. <sup>19</sup> Nāskakē fariseofo yoinānifo: “Kee. Shinākapo. Nōkai na yorafo afeska fatiroma anā Jesús tanayamanōfo. Tsōakai noko anā tanapaima keyokōichi yorafāfe Jesús nikakōipaikani,” ikanax yoinānifo.

### *Griegofāfe Jesús fenanifo*

<sup>20</sup> Nāskata Jerusalén ano nā yorafā rasi mēra griegofori ato fe inifo judeofāfe āto fista akaifono. <sup>21</sup> Nānoax Felipe ano fonifo, Felipe yōkai fokani. Nā Felipe Galilea mai anoax fakeni, nā pexe rasi āfe ane Betsaida anoax. Felipe ano fokaxō

griegofāfe Felipe yōkanifo: “Nō Jesús ōipai noko efexōfe nō afe yoinānō,” Felipe fanifo.

<sup>22</sup> Askafaifāfe nikaxō Felipe Andrés yoini: “Na griegofa Jesús fe mekapaikanikiki. Nō Jesús ato yoixonō,” fani. <sup>23</sup> Yoiaifāfe nikakī Jesús ato kemani: “Ēfi samamashta ēfe Epa ari ē kaikai afe xanīfo ikikai. Akka ēfe Epa ari kayotama ē yorafonoax nayoxii. <sup>24</sup> Akka ē mato tāpimani mā tāpinō. Xiki fero fisti nō fanayamano kāitiroma. Akka nō fanasharano foaikax āfe fimi ichapa itiro. Nā nō fana āfe exe fisti payokometiro, akka āfe kaya yositiro. Nāskarifiai ē matoōnoax nayamakē mā efe ipaxatiroma. Eres fisti ē ipaxatiro. <sup>25</sup> Akka āa fētsa shināi iskai: ‘Niospa ea amapaiyai keskara ē shināima, ēa ē apaiyai keskara ē shināi,’ ixō anori shināi fenotiro. Akka nā iskakī shināi: ‘Ē nono mai ano niyoxō ē apaiyai keskara ē shināpaima, Niospa ea amapaiyai keskara fisti ē shināpai,’ ixō shināi afi Epa Nios fe nipanakaki. <sup>26</sup> Akka a ea yonoxopaikī ēfe meka nikakōixō a ē yoiai keskara atiro. Ea Ifofax a ē ika ano nāri efe ipaxatiroki. Ea yonoxomis a ē yoiai keskara ea axōaito ēfe Epa Niospa yoixii iskafakī: ‘Aicho. Mī ēfe Fake Jesús nikasharamiski. Mī fāsi sharakōiki,’ Epa Niospa yoikī iskafaxii a ea Ifofamis.

<sup>27</sup> “Iskaratīa ēfe ōiti mēra ē shināmitsai. ¿Ē afeskaimē? Akka, ‘Epa, ea ifife ea omiskōimayamanōfo,’ ē faima. Akka ēfe Ēpa ea nīchini ē ato omiskōixonō,” ato Jesús fani. <sup>28</sup> Nāskaxō Jesús Apa yoini: “Epa, eōxō ato ispafe mī fāsi sharaki,” ixō Jesús Apa yoini. Askafaito nikakī nai mēraxō fāsikōi Niospa kemani: “Ē mīōxō mē ato ispa ēmāi afama mīshti shara fakī afianā afama mīshti ē ato ispai,” ixō yoini.

<sup>29</sup> Nā yorafā rasichi anoxō nikakani yoinānifo. Atirifāfe yoinifo: “Mā nai tiri ika,” fanifo. Atirifāfe yoinifo: “Epa Niospa ājirinī Jesús yoia,” ikanax yoinānifo. <sup>30</sup> Nāskaifono Jesús ato yoini: “Na meka nai mēranoa mā nikai ea tāpimatama, mato tāpimaxikī yoia,” ato fani. <sup>31</sup> “Iskaratīa nā ea Ifofaifoma Niospa ato omiskōimani. Āto ifori nā yōshi chaka Satanás nāri ēfe Epa Niospa potaxii anā xanīfo inōma. <sup>32</sup> Akka ēfi yōra fakekōi. Ea retekaxō ifi cruz ikakī ea mastakaxō ea fininīfōfāxikani. Ea askafaifono ē yorafo ē ato ifi efe rafenōfo,” ixō Jesús ato yoini. <sup>33</sup> Nānori ato yoini nā ifi cruz ikakī mā mastaxiaifono ato tāpimani.

<sup>34</sup> Nikakaxō yorafāfe nāno nixō yoinifo iskafakakī: “Niospa meka sharaōnoa kirikaki kenekī yoikī iskafanifo: ‘Cristo, nā Niospa nīchia nīpanaka nanakama,’ fanifo. Akka, ¿afeskakī mī noko yoimē iskafakī?: ‘Na yōra fakekōi retekaxō ifi cruz ikakī mastakaxō fininīfōfāxikani,’ mī noko fai. ¿Akka tsoaōnoa mī noko yoimē?” fanifo. <sup>35</sup> Askafaifono Jesús ato yoini: “Ē

nono ika pena keskara shara. Nāskakē ē anā mato fe nono ifāinakama. Ē mato yoiaito nikasharakāfe fenoxikakima. Pena yamaino fakish itiro. Nāskakē yora fenotiro. Tsōa fakish mēra ōitiro, fāi kai fenotiro. Nāskarīfiai a chaka shināmis fenotiro. Fenokī tāpitiroma afeskax Nios fe rafetiromāki. <sup>36</sup> Ē mato fe iyoano ea Ifo shara fakāfe fenoxikakima. Mā ea nikasharaino ē mato pena keskara shara fatiro, xafakīa mā inō. Ēfi pena keskarakī. Ea Ifo shara fakaxō māri fetsafo pena keskara shara fatiro mātōxō eari Ifo sharafanōfo,” ato Jesús fani. Mā ato yoikī senēfax, nāskax ato makinoax kaitokai anā tsōa ōinima.

### *Judeofāfe Jesús nikanifoma*

<sup>37</sup> Yorafāfe ferotaifi tsōa atiroma keskara Jesús fafiaino tsōa chanīmara fanima nā Niospa Fakekōi fiano. <sup>38</sup> Nā Isaías Niospa meka ato yoipaoni. Nāato kirika keneyoni a inōpokoai yoikī. Iskafakī yoini:

Ifo, nō mī meka nō ato yoifiainokai tsōa noko chanīmara faima. Yōra atiroma keskafakī mī ato ispafiaino tsōa tāpiama,

ixō Isaías a inōpokoai yoikī kirika keneyoni.

<sup>39</sup> Nāskakē tsōa Jesús nikanima. Askatari afianā Isaías kirika keneni a inōpokoai yoikī iskafakī:

<sup>40</sup> A nikaiyamaifo Epa Niospa fēxo keskara ato imapak-enaka Niospa meka chanīmakōi mā tāpifikaxō tsōa nikayamaito. Niospa ato shinātimafai anā shināsharanōfoma. Nāskakē Niospa meka ōifikakī tsōa shināima āto ōiti kerexkōi fakani mā nikafikaxō. Āto chaka xateaxma ekeki fekanima ē ato fetsa keskara shara fapanā,

ixō Niospa ato yoini. Nānori a Jesús inōpokoai yoikī Isaías kirika keneyoni.

<sup>41</sup> Isaías Niospa shināmanaino Jesús tāpini xanīfo sharakōi ikiyoai. Nāskaxō Isaías Jesúsnoa yoini.

<sup>42</sup> Judeofāfe xanīfofo atirifāfe Jesús chanīmara fanifoma. Akka atirifāfe chanīmara fanifo. Akka afaa tsōa yoinifoma fariseofoki mesekakī noko potayamanōra ikanax āto ichanāti pexe mēraxō. <sup>43</sup> Yora fetsafāfe ato yoiaito nafo sharakōifora nā yorafāfe atoōnoa meka shara yoiaifono nikapaimisfo. Akka Niospa atoōnoa nafo sharakōira ixō yoiaino fichisharapainifoma.

### *Jesús mekaōxō nō tāpia nō chakakōifo*

<sup>44</sup> Nāskata Jesús fāsikōi mekainīkafā ato yoini iskafakī: “Nā ea chanīmara faito ea fisti chanīmara fatama nā ea nīchiniri chanīmara fai. <sup>45</sup> Nāskafakīri mā mā ea ōia nā ea nīchiniri mā mā ōia. <sup>46</sup> Nono mai ano fakish keskara. Nāskakē ēfe Epa Nios ariax ē nono mai ano ē oni pena keskara ikiyoi.

Fakishi tsōa ōitiroma. Akka nā ea chanīmara faito Epa Nios Ifo sharakōifatiro pena keskara shara ixiki.

<sup>47</sup> “Mā ēfe meka nikafikaxō ea nikayamaifono ēkai ato omiskōimanima. Akka ē mai ano oni yorafo omiskōimatama ato ifiyoi ē oni efe ipaxanōfo. <sup>48</sup> Akka nā iskakī shināi: ‘Ēkai Jesús Ifofapaima, askatari āfe mekari ē nikapaima,’ ixō shināi nā ē mato yoimis keskara nikayamax Nios ari katama omiskōipakenakafo mēra kaxii. Nāskakē ē mato yoiaito mā ea nikayamax mā mai keyoaino mā omiskōipakenaka. <sup>49</sup> Ēfe Epa Niospa ea yoia keskara nānorikōi ē mato yoimis. Ēa ē mato yoima. Ēfe Epa Nios nā ea nīchinioxō ē mato yoimis. <sup>50</sup> Mē tāpia Epa Niospa yoia keskara chanīmara faax mā nīpaxatiro. Nāskakē, ‘A ē ato yoimis keskara nānori ato yoife,’ Ēfe Epa Niospa ea famis,” ixō Jesús ato yoini.

## 13

### *Jesús aōxō tāpimisfo āto tae chokapakeni*

<sup>1</sup> Mā judeofāfe āto Pascua fista chaima ikaino Jesús tāpini a mai anoax Apa ari kaxiai. A Ifofaafō nā nono mai anoafō ato noini. Mā atoōnoax nakī ato noikōini.

<sup>2</sup> Jesús aōxō tāpimisfo feta mā xini kaino ato feta pipaini. Nāskaino nā Judas Iscariote mēra Satanás yōshi chaka nanetani. Nā Simón fetsa āfe fake Judas Iscariote. Nā Judas mēra niafaka nanexō shināmani iskafakī: “Ato tāpimafe afeskaxō na Jesús achitirofomāki,” ixō Satanás shināmani.

<sup>3</sup> Akka Epa Niospa āfe Fake yoini: “Nā nai mēranoafoya nā mai anoafari mī ato yonomatiro. Mī āto xanīfo,” ixō Epa Niospa anori yoiaito Jesús tāpini. Epa Nios ariax onixakī mā anā akiki kakī Jesús tāpini. <sup>4</sup> Nāskata pikī keyotama Jesús finināka fā āfe rapati pekata āfe rakotinī pinixemeni. <sup>5</sup> Nāskata faka tasoki manexō a aōxō tāpimisfo ato fāka ochopakeni. Mā ato ochopakexō ato otekere apani āfe rakotinī.

<sup>6</sup> Ato askafapakī Pedrori āfe tae chokapaiyaito yoini: “Ifo, ¿afeskakī mī ēfe Ifo fixō mī ea fāka ochopaimē?” faito, <sup>7</sup> Jesús kemani: “Na ē mato fāka ochofai mī tāpiama. Akka mī chipo tāpixii,” faito, <sup>8</sup> anā Pedro kemani: “Maa, Ifo, miakai ea fāka ōchopaknakama,” Pedro faito, anā Jesús kemani: “Ē mia ōchoyamainokai mī efe rafetiroma,” fani. <sup>9</sup> Askafaito nikakī Pedro yoini: “Ifo, taekis ea chokakima ēfe mifikiri ea afe, ēfe mapokiri ea māchofe,” faito, <sup>10</sup> “Nā rama yora nashiax āfe yora choshtanatiroma, āfe tae fisti choshtanatiro. Nāskakē nō tae fistiki nō chokatiro. Akka keyokōi mā choshtama, ranāri mā shara,” ato Jesús fani. <sup>11</sup> Nānori ato yoini māmāi tāpixō fatoto ato achimaximākai.



<sup>12</sup> Mā ato ōchopaketa āfe rapati safeni. Mā āfe rapati safeta afianā tsaopakekafāni. Nāskaxō ato yoini: “¿Mā mā tāpiamē na ē mato fāka ōchofaito?” ato fani. <sup>13</sup> Nāskaxō anā ato yoini: “Māfi, ‘Maestro,’ mā ea fayanā, ‘Ifo,’ mā ea famis. Chanīmakōi ēmāi mātō Ifo ita ē mātō maestrori.” <sup>14</sup> Askata anā ato yoini: “Ē mātō Ifokī, askatari ē mātō maestrokī ē mato fāka ōchopakea oa mātō ina keskarakōixō. Akka nā ē mato fāka ochopakea keskariai mā ranā fāka ōchokome faatanākāfe oa mātō inafō keskarax. <sup>15</sup> Ē mato ōimana keskariai māri askakāfe,” ato fani. <sup>16</sup> “Ē mato chanīma yoi. A yonoxomistokai āfe xanīfo finōtirioma. Akka ē mato nīchia mā fetsafo ēfe meka yoinō. Nāskafixokai fetsafo ēfe meka ato yoifīkīkai mā ea finōama. Ē mato fāka ōchomis oa ē mato yonoxomis keskaraxō. Nāskaxō, ‘Nō fetsafo finōa, nō āto inama,’ iyamakāfe,” ato Jesús fani. <sup>17</sup> “Na ē mato yoiaito mā nikakōiax, nāskax mā fāsi inimakōitiro.

<sup>18</sup> “Nāskakē ē mato yoi, akka keyokōiōnoa ē mato yoima. Ē tāpia fatomākī ē katoa a nofe kai, askatari a nofe kaima. Nāskakē ē mato yoi, eōnoa Niospa meka yoikī kirika keneyonifo nō nikakī nō chanīmara fatiro. Iskafakī kirika keneyonifo, Niospa meka: ‘A feta piāi fētsa ea ōikaspakī ea chakafaxii,’ ixō kirika keneyonifo. Chanīmakōi mā ōifainaka,” ato Jesús fani. <sup>19</sup> “Ea askafayoamano ē mato yoiyomis. Akka nā ē mato yoiai keskara ea askafafono mā ea ōikī, nāskakē mā ea chanīmara fatiro. <sup>20</sup> Ē chanīkima mato yoi ē mato nīchi mā ēfe meka ato yoitanō. Mā ato yoiaito nikakaxō eari nikakani. Nāskatari ea chanīmara fakaxō nā ea nīchiari chanīmara fakani,” ixō Jesús ato yoini.

*“Mā fētsa ea ato achimaxii,” ixō Jesús ato yoini  
(Mt. 26.20-25; Mr. 14.17-21; Lc. 22.21-23)*

<sup>21</sup> Mā yoikī keyota Jesús fāsi shināmitsakōini. Nāskaxō xafakīakōi ato yoini: “Ē chanīma mato yoi. Fatora mā fētsa ea mā ato achimaxii,” ato faito, <sup>22</sup> nikakani fesenākefainifo tāpikanaxma. <sup>23</sup> Afe ketaxamei tsoa Jesús fichisharapaikōini. <sup>24</sup> “Fatora mā fētsa ea mā ato achimaxii,” ato faito nikakī a Jesús fe ketaxamei tsoa Pedro fenāmāshta yōkani: “Tsoaōnoa yoimākai, yōkafe,” fani. <sup>25</sup> Nāskafaito nikakī a Jesús fe ketaxamei tsoato chaimashta fani yōkaxikī: “Ifo, ¿tsoaōnoa mī yoimē?” faito, <sup>26</sup> Jesús kemani: “Na pāa tore pishta nami ene mēra mechanafaxō ē ināito nāatofi ea ato achimaxii kiki,” Jesús fani. Nāskafaxō nami ene mēra pāa mechanafaxō Judas Iscariote Jesús ināni, Simón fetsa āfe fake. <sup>27</sup> Jesús pāa mechanafaxō Judas ināino Judas mēra Satanás chaka nanerisatani. Nāskaxō Jesús Judas yoini: “Nā mī apaiyai keskara farisafafe,” fani.

28 Nā tsaokaxō piaifāfekai tāpinifoma afeska fakī askafaimākai. 29 Atirifāfe shinānifo: “Jesús Judas nīchiaito Judaspa afara fitanō Jesús nīchi fista ayanā pixikī,” ixō shinānifo. Akka atirifāferi shinānifo iskafakī: “Jesús Judas nīchia a afaamaisfo kori inātanō,” ixō shinānifo. Nā Judaspa āto kori kexexomis ini. 30 Nāskax Judas koshi kani mā fakishaino.

### *Jesús Ifofamisfo noinā faatanātirofo*

31-32 Nāskata mā Judas ato makinoax kaano Jesús ato yoini: “Iskaratīa ē naino Epa Niospa mato ōimani ēmāi āfe Fake sharakōikē. Nāskafiax ēfi yōra fakekōi. Ē afama mīshti akaito ōikaxō, ‘Epa Nios fāsi sharara,’ faxikani. Nāskakē mā tāpitiro ēmāi Niospa Fakekōikē a keskara sharakōi.

33 “Ēfe fakefāfe, ēkai anā nono mato fe ifīinakama. Mā ea fenaxii. Ē judeofo yoita keskafakīri ē matori yoi. Ē kai arikai mā katiroma. 34 Ēfe meka fenashara ē mato yoikai, noināi finakāfe. Nā ē mato noiai keskariai māri noinā faatanāsharakāfe. 35 Mā noināiyaito yorafāfe ōinōfo mā eōxō tāpimiski,” Jesús ato fani.

“*Ē Jesús ōimisma, Pedro ixiano,*” Jesús ato yoini  
(Mt. 26.31-35; Mr. 14.27-31; Lc. 22.31-34)

36 Nāskata Pedro Jesús yōkani: “Ifo, ¿faki mī kaimē?” faito, nikakī Jesús kemani: “Ē kai arikai iskaratīa mī efe kayotiroma. Chipō mī kaxii,” faito, 37 anā Pedro kemani: “¿Afeskai iskaratīa ē mefe katiromamē? Mē iskaratīa itipinīshara mīōnoax naxikī,” faito, 38 anā Jesús kemani: “¿Mī chanīmamē? ¿Mā mī itipinīsharamē naxikī?” Jesús fani. Nāskaxō anā yoini: “Na fakishi takara keoyoamano mī ea iskafai: ‘Ēkai Jesús ōimisma,’ ixō mī ato yoi tres fakī,” Jesús fani.

## 14

### *Jesús fai keskara. Aōnoax nō Nioski nokotiro*

1 Anā Jesús ato yoini: “Ēfe fakefāfe, māto ōiti fekaxtefayamakāfe. Nios chanīmara fata, eari chanīmara fakāfe. 2 Ēfe Epa ika ano pexe ichapa sharakōifo. Ē mato itipinīsharafaxōi kaikai. Askarayamakē ē mato yoikerana. 3 Ē kaxō ē mato itipinīshara faxōikai. Afianā oxō ē mato ifiyoxii, a ē ika ari mato iyoxiki ari mā efe ipaxanō. 4 Mā mā fai tāpiaki a ē kai ari,” ato faito, 5 Tomás kemani: “Ifo, nōkai a mī kai ari tāpiama, afeskaxō nō fai tāpitiro,” faito, 6 Jesús kemani: “Ēfi nā fai keskarakī. Ēfi chanīmismaki. Eōnoax yorafo nīpaxatirofoki. Tsoakai ēfe Epa ika ano nokotiro. Eōnoax fisti ēfe Epa ari nokotirofo.

<sup>7</sup> “Ea tãpikõixõ ãfe Epari mã tãpikõitiro. Akka iskaratã mã ãfe Epa tãpikõikai. Nã mã ea õiai keskarari mã ãfe Epa mã õi,” ato Jesús faito, <sup>8</sup> Felipe kemani: “Ifo, noko Epa Nios õimafe. Mĩ noko Epa Nios õimanaino nõ inimakõitiro,” faito, <sup>9</sup> Jesús kemani: “Felipe, afetãakai ã mato fe imisma. ¿Afeskakĩ mã ea tãpiyomismamẽ? Ea õikĩ ãfe Epari mã mĩ õi. ¿Afeskakĩ: ‘Ea Epa õimafe,’ mĩ ea faimẽ? <sup>10</sup> Ëfi ãfe Epa fe fisti keskarakõiki. ¿Nã mĩ chanĩmara faimamẽ? A ã mato yoiai ãa ã mato yoima ãfe Epaõnoa ã mato yoi. Epa Niospa nã apaiyai keskara ea famai efe imis. <sup>11</sup> Ë mato yoi ãfe Epa efe rafea ãri ãfe Epa fe rafemiski. Nãskakẽ ea chanĩmara fakãfe. Nã tsõa atiroma keskarafori ã famis nã õixõ ea chanĩmara fakãfe.

<sup>12</sup> “Chanĩmakõi ã mato yoi. Nã ea chanĩmara faxõ nã ã akai keskarari faxii. Ëfe Epa ari kaxõ a ã aka keskaramaroko finõmainĩfofã axikani. <sup>13</sup> Afara ãfe aneõxõ ãfe Epa mã yõkaito ã mato axoxii, eõxõ Epa Nios sharara fanõfo. <sup>14</sup> Afara fetsa ãfe aneõxõ mã Epa Nios yõkaito ã mato axotiro,” ixõ Jesús ato yoini.

*“Epa Nios ãfe Yõshi Shara ã matoki nĩchixii,” Jesús ato fani.*

<sup>15</sup> Anã Jesús ato yoini iskafakĩ: “Ea noikõikĩ nã ã mato yoiai keskai ikãfe. <sup>16</sup> Ë Epa Nios mato kĩfixoni mato fetsa nĩchixonõ, nãato mãto õiti fepeaxoyonõ. Nã Niospa Yõshi Shara, nãfi chanĩmismaki. Mato fe ipanaka. <sup>17</sup> A nikayamaifãfe õitirofoma. Askatari tãpitirofoma. Akka mãfi mã mã tãpimiski mato femãi ikẽ. Nãskatari mãto shinã mẽra mato fe ika.

<sup>18</sup> “Akka ãkai mato fe ikima. Askafixõ ã mato potaima. Ë matoki anã oxii. <sup>19</sup> Ë anã nono ikima. A ea Ifofaifãfema anã ea õikanima. Akka mã ea õixii, ã niano. Nãskakẽ mãri efe nĩpanaka. <sup>20</sup> Naax ã otoaito mã ea tãpitiro ãmã Epa Nios fe nĩpanakakẽ. Nãskarifiã mã efe ixii. Ëri ã mato fe ixii. <sup>21</sup> Nãskakẽ ã mato yoiaito mã ea nikakõixõ mã ea fãsi noi. Ea noixori ãfe Epari mã noi. Askatari ãri ã mato noi. Nã ã shinãi keskara ã mato tãpimani,” ixõ Jesús ato yoini.

<sup>22</sup> Nãskaito Judas fetsa, Judas Iscariotema yõkani: “Ifo, ¿afeskakĩ a mia Ifofaifoma mĩ ato tãpimatama noko fisti mĩ tãpimanimẽ?” ixõ yõkaito, <sup>23</sup> Jesús kemani: “Ea noikakĩ nã ã mato yoiai keskara ea nikakõitirofo. Ëfe Epa ato noiaino ãri ato noi. Nãskax nõ ato fe rafetiro. <sup>24</sup> Ea noiyamakaxokai ã yoia keskara ea nikakanima. Na meka mã nikai ãfe mekama, ãfe Ëpa meka ã mato yoi. Nã ea nĩchinõto ãfe meka.

<sup>25</sup> “Mato fe iyoxõ ã mato yoiyofafãina. <sup>26</sup> Nãskaxõ Epa Niospa ãfe Yõshi Shara matoki nĩchi eõxõ mato fe ixõ mãto õiti mato inimamasharaxonõ. Keyokõi mato tãpimani. Nã ã mato yoia keskara mato shinãmani.

27 “Ĕ mato makinoax kakĩ ĕ mato ōiti fepeaxosharafāinikai. Akka nā ea nikaifāfema mato ōiti fepeaxotirofoma, ĕ fistichi ĕ mato axotiro. Nāskakē shināchakayamakāfe. Rateyamakāfe. 28 Ĕ mato yoiaito mā mā nikai ĕ mato makinoax kaikai. Askafiax ĕ anā matoki oxii. Ea noikōiax mā ekeki inimatiro ĕmāi ĕfe Epa ari kaino, ĕfe Epamāi ea finōkōikē. 29 Nā ĕ mato rama yoiai keskaito mā ea chanīmara fatiro. Mē mato yoi a ixiai mā ōixō mā ea chanīmara fanō.

30 “Ĕ mato mēxotaima yoipaiſiaino nā yōshi chakafāfe āto xanīfo Satanás chaka ekeki oi. Askafixō ea afeska fatiroma. 31 Akka ĕ Epa Nios fāsi noikōi. Nāskakē nā ea yoiai keskai ĕ akōini. Nāskaxō keyokōichi ea tāpikani ĕ fāsi aō noiaito. Fininīfofākāfe. Nonoax nō kanō,” ato fani.

## 15

*Jesúsfi fana āfe kaya keskaraki. Akka nā fana pōya keskarafō a Ifofamisfo*

1 Anā Jesús ato yoini iskafakĩ: “Ĕfi uva āfe kaya keskarakōiki. Akka ĕfe Epa nā uva āfe ifo keskara. 2 Akka mā na uva āfe pōya keskarafō. Nā uva pōya fetsa fimiyamaito āfe ifāfe mextetiro potaxikĩ. Akka nā uva āfe pōya fimiyafō nā āfe teshpa mīshti ifāfe xatetiro. Nāskax uva pōya sharayakōi itiro fimi sharaya ixikĩ. 3 Nāskarifiakĩ mā ĕfe meka nikaxō mā mātō chaka mā potax mā isharaxii. 4 Emakinoax paxkayamakāfe. Efe rafekāfe, nā ĕ mato fe ika keskariai. Akka uva pōya fisti fimitiroma āfe kayamaisax. Nāskarifiakĩ mā efe rafexoma nā ĕ mato amapaiyai keskara mā atiroma.

5 “Ĕfi nā uva āfe kaya keskarakĩ. Akka mā na uva āfe pōyafō keskara. Akka nā efe rafekōiai ĕri afe rafekōiaino ea keskarakōiri itiro. Ĕ mato fe ikamano mā afaa afeskatiroma. 6 Uva āfe pōya chaka fimimais nō mextexō potatiro. Nāskaxō mā xinī tsasifaano nō ichafaxō nō kofatiro. Nāskarifiiai nā efe rafekaspaiſfo nāfo chiifā mēra fokani.

7 “Akka mā efe rafekōixō ĕfe meka mā nikakĩ mātō ōiti mēraxō mā shinākĩ mā afarashta fapaikĩ ĕfe Epa Nios mā kifiaito mato axōi. 8 A ĕ mato amapaiyai keskara mā akĩ nāskax eōxō tāpimis mā iki. Mā askafaito ōikakĩ Epa Nios tāpitirofo Epa Niosmāi fāsi finakōikē. 9-10 A Epa Niospa noikōiai keskafakĩ ĕri mato noikōi. Epa Niospa ea yoiai keskara ĕ afafāini. Akka ĕ afe imiskē ea noifafāini. Nāskafakĩri nā ĕ mato yoiaito mā atiro māmāi efe ixō. Nāskakē ĕ mato noifafāini.

11 “Anori ĕ mato yoi ĕ inimai. Nāskarifiiai māri mā inimanō. Ĕ mato yoiaito mā anori akĩ mā tāpitiro ĕ mato noiaino. 12 Iskafakĩ ĕ mato yoi: Ĕ mato noiai keskai māri noinākāfe. 13 Nō fetsafō fe rafekōiax nō aō noikōiax nō aōnoax natiro. A mā nakĩ noiai keskarakōi tsōa finōtiroma. 14 Ĕ mato yoiai

keskara aki mā efe rafemis mā itiro. <sup>15</sup> Akka a mato fe rafea mā tāpimatiro a mā shināi keskara. Nā ēfe Epa ea yoimis keskara ē matori tāpimani māmāi efe rafeano. Nāskakē ea yonoxomisfora ē anā mato faima. Efe rafeafora ē mato faxii. <sup>16</sup> Mā ea ifiyamafiaino ē mato ifini ea keskara mā inō mātoxō fetsafāferi ea chanīmara fanōfo. Nāfāfe ea Ifofapanakafo efe ipaxakakī. Nāskaifono mā afarashta ēfe Epa Nios ēfe aneōxō mā yōkaito mato axosharaxii. <sup>17</sup> Nā ē mato yoiai keskai noinānkāfe,” ixō Jesús ato yoini.

### *Jesús Ifofamisfo ato noikaspakani*

<sup>18</sup> Anā Jesús ato yoini iskafakī: “Anā ē mato yoi mato noikaspayokanima. Akka ea noikaspayokani. Mato iskaratīa noikaspafiaifono mā tāpitiro taefakī ea noikaspakani. <sup>19</sup> A ea Ifofaaafoma fe mā ato fe rafeaito mato noikeranafo. Aa ranā noināifo keskari fakī matori noikeranafo. Akka mā kai ato keskarama. Ē mato ifini a ea Ifofaifoma keskara mā inōma. Akka nā ea Ifofaafāfema mato noikaspakani. <sup>20</sup> Nā ē mato yoiai keskara shinānkāfe. Ē mato yoi iskafakī a yonoxomistokai āfe ifo finōtiroma. Akka ea omiskōimakani matori omiskōimaxikani. Akka a ē ato tāpimana nikakaxō matori nikaxikani mā ato yoiaito. <sup>21</sup> Akka mā ea Ifofaito, nā ea amisfo keskafakakī matori askafaxikani. Akka a ea nīchini tsōa tāpiama. Nāskaxō mato chakafaxikani.

<sup>22</sup> “Ē atoki oyamaxō Niospa meka ē ato yoiyamaito tsōa tāpikeranafoma. Akka Niospa meka pishta tsōa nikayomisma afara chakafamisfo. Nāskax āto chaka atoō neama. Nāskafiaifono Niospa meka ē ato yoixiki ē oni. Nāskakē tsōa iskaratīa iskatiroma: ‘Tsōa ea Niospa meka yoiaama.’ Askatari: ‘Ē afaa chakafamisma,’ itirofoma. Mā nikafikatsaxakakī āto chaka xateafoma. Nāskax āto chaka atoō nea. <sup>23</sup> Ea noikaspayanā ēfe Epari noikaspakani. <sup>24</sup> Niosxō tsōa atiroma keskara ē ato ispamis. Askafikaxokai tsōa āto chaka xateafoma. Tsōa atiroma keskara ē faito ōifikakī ea nikakanima. Nāskax shara ikanima. Akka ē afarafo shara fayamaito ea tāpikeranafoma. Nāskax ato chaka atoō nekeranama. Akka ē afarafo shara faito mā ōifikaxō ea noikaspayanā ēfe Epari noikaspakani. <sup>25</sup> A Niospa meka yoikī kirika kenenifo nē askakōi. Niospa meka yoikī eōnoa kirika kenenifo iskafakakī: ‘Ē afara chakafayamafiakē ea noikaspakani,’ ixō eōnoa yoikī kirika kenenifo.

<sup>26</sup> “Matori noikaspaifono ēfe Epa Nios arixō āfe Yōshi Shara ē matoki nīchixii. Nāato mato ōiti fepeaxosharanō. Nāfi chanīmakōikī eōnoa mato yoixii. <sup>27</sup> Ē yorafo Niospa meka ato yoikī taefani. Nāskax mā efe imiski. Nāskarifiakī māri eōnoa tāpixō mā ato yoitiro.

## 16

<sup>1</sup> “A mā omiskōixiai ē mato yoiyoni mā iskakī shinānōma: ‘¿Afeskai Jesús ēfe Ifo fiano ē omiskōimē?’ ixō mā anori shinākī mā ea potapaixii, anākai mā ea chanīmara faxima. <sup>2</sup> Tāpikāfe. Māto kaifāfe nā ea Ifofaafāfema mato potaxikani mā anā āto ichanāti pexe mēra īkinōma. Ē mato yoikōi anā shināsharakanima. Fakirira shinākani iskakakī: ‘Nā Niospa apaiyai keskara nō faxōi. Nā Jesús Ifofaafō nō retei,’ ixō anori shinākani. <sup>3</sup> Ēfe Epa tāpiafoma eari tāpiafoma. Nāskakaxō mato chakafaxikani. <sup>4</sup> Akka nā mā ea Ifofakī taefanitīa mā omiskōixii ē mato famisma, ē mato fe ifiaxokai ē mato afaa yoimisma. Akka iskaratīa ē mato yoi. Nāskakē mā mato omiskōimanaifono mā shināxii nā ē mato yoimis keskara,” Jesús ato fani.

*Niospa Yōshi Sharapa noko shināmatiro*

<sup>5</sup> Anā Jesús ato yoini iskafakī: “Ēfe Epa ea nīchini. Iskaratīa ē anā akiki kai. Akka mā, ‘¿Faki mī kaimē?’ mā ea faima. <sup>6</sup> Ē mato yoiaino mā shināmitsai. <sup>7</sup> Ē mato yoikōi, ē mato makinoax kaano mā shara ixii. Akka ē mato makinoax kayamaino Niospa Yōshi Shara matoki oima. Nāskakē māto ōiti mato fepeaxoyoima. Nāskafiano ē mato makinoax kaxō ēfe Yōshi Shara ē matoki nīchixii. <sup>8</sup> Nā ēfe Yōshi Sharapa nai mēranoax oxō a ea Ifofaafoma ato yoixii iskafakī: ‘Mā mā afarafo chakafamiski,’ ato faxii. Nāskatari a Niospa fichipaiyai ato tāpimaxii. Nāskaxō a Nios Ifofaafoma ato yoixii iskafakī: ‘Mā mā afarafo chakafamiski, nāskakē mā omiskōi,’ ato faxii. <sup>9</sup> Nā ea Ifofaitoma afara chaka shināi. Nāskakē ēfe Yōshi Sharapa a afara chakafamis ispayoxii. <sup>10</sup> Ēfi nā ēfe Epa ea amapaiyai keskara ē amiski. Nāskax ēfe Epa ari ē kai anā ea ōinōfoma. Nāri Niospa Yōshi Sharapa ato tāpimaniyoxii. <sup>11</sup> Nāskatari Niospa Satanás omiskōimaniyoxiai Niospa āfe Yōshi Sharapa ato tāpimaniyoxii, nā Satanás āto xanīfo.

<sup>12</sup> “Ē mato meka ichapa yoipaifaitokai mā tāpitiroma. <sup>13</sup> Nāskafikē Niospa Yōshi Shara matoki oxō a Niospa āfe meka chanīmakōi mato tāpimaxii. Nāfi chanīmisma. Akka āfe meka mato yoitama nā ēfe Epa shināmanai anori mato tāpimaniyoi. Nā afarafo afeskara ixiai mato tāpimaniyoi. <sup>14</sup> Nāto eōnoa yoisharakōixii. Nāskakē nā ē mato yoimis keskara Niospa Yōshi Sharapa mato tāpimaxii. <sup>15</sup> Nā ēfe Epanāfori ēfenāfori. Nāskakē nā ē yoiyai keskara ēfe Epa āfe Yōshi Sharapa mato tāpimaxii,” ixō Jesús ato yoini.

*Jesús aōxō tāpimisfo shināmitsafikanax chipo inimaxikani*

<sup>16</sup> Anā Jesús ato yoini iskafakī: “Akka ēkai anā mato fe nono samarakaima. Mē ēfe Epa ari kai. Nāskakē mā ea ōiyoima.

Nāskafiax anā ē samamashta oaito mā ea õixii,” aõxõ tãpimisfo Jesús ato fani.

17-18 Ato askafaito nikakani yoinãnifo: “¿Afeskakĩ, ‘Èfe Epa ari kaito mā anā ea õiyoima,’ noko faimē? ‘Afianā ē oaito mā ea õixii,’ noko fai. Na noko yoiai keskarakai nō tãpiama,” ikanax yoinãnifo.

19 Nāskakaxõ yõkapaiyaifāfe Jesús ato tãpini. “¿Na ē mato yoiai keskara mā tãpiamax mā yoinõnãimē?” ato fani. 20 “È mato xafakĩa yoinõ. Mē omiskõiaino a ea Ifofaafoma fãsi inimakani. Akka mãfi ea shinãi mā oiai. Mā ea shinãi oiafiar chipo mā ekeki inimaxii. 21 Akka mā kēro fake kãikĩ pae metiro. Nāskax mā fake kãixõ anā pae metiroma mãmãi āfe fake kãiax. Nāskax inimasharakõitiro mãmãi āfe fake kãisharax. 22 Nāskarifiar ē mato makinoax kaino mā oiai omiskõixii. Nāskax ē anā chipo matoki oaino mā inimakõixii. Tsõakai mato xatematiroma mā ekeki inimaito.

23 “È naax ē otoax ē anā mato fe iyamaino mā anā afara mā ea yõkatiro. Akka ēfe aneõxõ mā Epa Nios yõkatiro. Afarashta ēfe aneõxõ mā Epa Nios yõkaito mato axoxii. 24 Èfe aneõxokai ēfe Epa mā yõkayomisma. Akka ē naax otokē nāskakē ēfe aneõxõ ēfe Epa mā yõkatiro. Mā yõkaito ēfe Epa mato inãxii. Mato inãino mā fãsi inimakõixii,” ixõ Jesús ato yoini.

### *Jesús keyokõi finõa*

25 Anā Jesús ato yoini iskafakĩ: “È mato meka fetsafaxõ yoiaito mā tãpiyomisma. Èkairoko xafakĩa mato yoiaito mā tãpipanã. Akka iskaratĩa xafakĩa ē mato yoi Epa Niosnoa mā tãpinõ. 26-27 Nāskaxõ mā ea noi. Èmãi Nios ariax matoki onikē mā mā ea chanĩmara faa. Nāskakē Epa Niospa matori noikõi. Akka, ‘È mato makinoax kakĩ anā ē mato Epa Nios kĩfixoni,’ ē mato faima. Mā mā yõkaxii ēfe aneõxõ. 28 È Epa ariax nono mai ano oni. Nāskakē iskaratĩa nono mai anoax ēfe Epa ari ē kai,” ixõ ato Jesús yoini.

29 Ato askafaino aõxõ tãpimisfāfe kemanifo: “Aicho, iskaratĩa xafakĩakõi mĩ noko yoikai. A mĩ noko taefakĩ yoiaito nō tãpiyoitama. Anā meka fetsafaxõ mĩ noko yoima. 30 Iskaratĩa mā nō tãpia keyokõi mĩ tãpikõia. Nō mia yõkapaiyaito mĩ noko tãpitiro. Nāskakē mĩ Nios ariax onikē nō mia chanĩmara fai,” ixõ yoiaifāfe 31 Jesús anā ato kemani: “¿Chanĩmamē mā mā ea chanĩmara faimē?” ato fani. 32 Nāskaxõ anā ato yoini: “Chipo mā emakinoax mā paxkakãinikai. Mā fakirira kai. Chanĩma, iskaratĩa mā emakinoax mā fakirira kai. Tsoakai efe nēteima. Mā askafiainokai eres ē nēteima. Èfe Epa fe ē nētei. 33 Nã ē mato yoi mato õiti shara inõ. Akka nã ea chanĩmara faafoma fe mā nono nãmã nētei. Nāskakē

mato omiskõimafiaifono shinãchakayamakãfe. Ë Satanás yafi nã ea chanĩmara faafomafo ã ato finõkõia. Nãskakẽ ã mato kexesharatiro,” Jesús ato fani.

## 17

*Aõxõ tãpimisfo Jesús Epa Nios ato kifixoni*

<sup>1</sup> Nãskata Jesús nai foisnĩfofã Apa yoini: “Epa, iskaratĩa ã naano ato tãpimafe ã mĩ Fakekõiki. Mĩ ato tãpimanaino ãri ato tãpimatiro mĩ fãsi sharakõi. <sup>2</sup> Mĩ ea nĩchini ã ato xanĩfo inõ. Nãskaxõ mĩ ea ato inãni ã ato imasharapakexanõ. <sup>3</sup> Meres fisti mĩ Nioskõi. Akka ãfi Jesucristo nã mĩa nĩchini. Nã noko tãpiafo nãfo nipanakafo.

<sup>4</sup> “Ë nono mai anoxõ afarafo ã ato ispa, mĩmãi sharafinakõikẽ. Nã mĩa yoiai keskara mẽ aka. <sup>5</sup> Nõ mai onifamatai ã mia keskara xanĩfo shara iyopaoni. Nãskakẽ iskaratĩa ã mefe xanĩfo inõ ea xanĩfo imafe a ã ipaoni keskara.

<sup>6</sup> “Nono mai anoa yorafo mĩ ea ato minini ã ato tãpimanõ mĩ afe keskaramãki. Nã mĩnãfofiano mĩ ea ato minini. Mĩ meka nikakõinifo. <sup>7</sup> A mĩ ea yoia keskara ã ato yoimis. Nãfo mã tãpikõiafo. <sup>8</sup> A mĩa yoiai keskara ã ato yoiaito ea chanĩmara fakõikani. A ã mia ariax oniri mã tãpiafo. Chanĩmara fakani a ea mĩa nĩchini.

<sup>9</sup> “Ë mia ato kifixõfafãini. Akka a ea chanĩmara faafoma ã mia ato kifixonima. Nã ea mĩ ato mininiõxõ ã mia kifixõfafãini. Ë mia ato kifixõfafãini nãfomãi mĩnãfokẽ. <sup>10</sup> Akka nã ãfenãfori mĩnãki. Nã mĩnãfori ãfenã. Nãskaxõ nã ea chanĩmara faafoõxõ fetsafãferi tãpitirofo ã sharakẽ.

<sup>11</sup> “Ëkai anã na mai ano ikima. Ë mikiki kai. Akka nã mia Ifofaafofi nono na mai ano nẽtekani. Epa, mĩ fãsi sharaki. Ato kexesharafe. Mĩ aneõxõ ato kexesharafe. Nã mĩ ea inãni tii ato kexesharafe. Akka nõfi fisti keskaraki. Nãfori nofe fisti keskara inõfo. <sup>12</sup> Ë ato fe iyoxõ ã ato kexeshara. Mĩoxõ ã ato kexeshara, ã fato fenoama. Akka nã Satanás ãfe fake fisti ã fenoa. Nã mĩ meka yoikĩ kirika keneyonifo keskarax nã fisti mã fenoa.

<sup>13</sup> “Iskaratĩa ã mia ari kai. Ë kayoxoma ã ato yoioi nã ã ikai keskariai akairi inimakõinõfo. <sup>14</sup> Nã mĩ yoiai keskara mẽ ato tãpimani. A mia chanĩmara faafãfema ato noikaspakani, miamãi Ifofaafono. Nãskakẽ ato noikaspakani. Nãskakẽri ãrikai ato keskarama. Akka eari noikaspakani.

<sup>15</sup> “Akka ã mia yoima na mai anoa mĩ ato ifinõ. Akka ã mia yoi na mai anoa mĩ ato kexesharanõ Satanás chakata ato afeska fanõma. <sup>16</sup> Nã mia Ifofaafo a mia chanĩmara faafomafo fe, ato fe rafetiropoma. Ërikai ã ato fe rafetiroma. <sup>17</sup> Mĩ meka chanĩmakõi. Mĩ mekapa ato sharafafe mia keskara shara inõfo. <sup>18</sup> Ea mĩ mai ano nĩchini ã mĩ meka ato yoinõ. Nãskarifikĩ



ẽ yorafo nĩchi mĩ meka shara ato yoitanõfo. <sup>19</sup> Mĩa ea yoia keskara ẽ akaino nãfãferi askari fanõfo.

<sup>20-21</sup> “Èkai ato fistiõxõ kĩfifafãinima. Nã ea Ifofaafãfe ato yoiai-fono nikakaxõ ea Ifofaxikani. Nãskakẽ ẽ mia ato kĩfixõfafãini nã nõ shinãi keskara fisti shinãnõfo. Mĩ efe imis keskai nãfori nofe inõfo. Nõ ato fe tanaima niaito õikakĩ a ea chanĩmara faafãfema akairi chanĩmara fanõfo mĩ ea nĩchini. <sup>22</sup> Mĩ efe imis keskai ẽri ato fe imiski. Nã nõ shinãi keskarrafo akairi shinãnõfo. <sup>23</sup> Mĩ efe ika keskarari ẽri ato fe ikaki. Akka nã mĩ shinãi keskarrafo nõri shinãtiro. Mĩ õiti keskara nõ itiro. Akka mĩ ea atoki nĩchini. Nã mĩ ea noiai keskari fakĩ nãfori mĩ ato noikõi. Mĩ askafaino nã ea chanĩmara faafãfema tãpitirofo.

<sup>24</sup> “Epa, nã yorafo mĩ ea inãfo efe inõfo mĩ ika anoa mia keskara shara ea õinõfo. Mĩ mai onifayoxoma mĩ ea noiyo-paoni. <sup>25</sup> Epa, mĩ fãsi sharakõi. Nã ea chanĩmara faafãfemakai mia tãpiafoma. Akka ẽ mia tãpikõia. Mĩ ea nĩchini nã efe ikafãfe mã tãpiafo. <sup>26</sup> Mĩ afe keskaramãki mẽ mia ato tãpimamis nã mĩ ea noiai keskari fakĩ, nãfãferi fetsafo noikõinõfo ẽ ato fe ikano. Askatari ẽ ato õimafafãini,” ixõ Jesús Apa kĩfini.

## 18

### *Jesús achinifo*

(Mt. 26.47-56; Mr. 14.43-50; Lc. 22.47-53)

<sup>1</sup> Nãskata mã Apa kĩfikĩ nishpata aõxõ tãpimisfo fe fakishi Jesús kani, xexa Cedrón pishta pokefaini. Nãno ifi fanafãfe ãfe anefo olivos ini. Olivos mẽra ikitoshinifo. <sup>2</sup> Judaspa ato Jesús achimani kakĩ tãpini faki Jesús kaamãki, Olivos anomã aõxõ tãpimisfo Jesús ato iyomiskẽ. <sup>3</sup> Nãnori Judaspa sorarofa iyoni Jesús achinõfo. Nã ato Nios kĩfixomis xanĩfofãfe askatari fariseofãferi Nios kĩfiti pexefã kexemisfo nĩchinifo Judas fe fõtãnõfo. Chiifoya kenofoya koshatifoya ashifoya fonifo. <sup>4</sup> Mã achifõfãifono Jesús ato tãpini. Mã nokoafono ato yõkani: “¿Mã tsoa fenaimẽ?” ato faito, <sup>5</sup> “Nõ Jesús Nazarete anoa nõ fenai,” faifãfe, ato kemani: “Èkĩa, nono ẽ ika,” ato fani. Ato askafaino nã Jesús ato achimanai Judasri nãno ato fe ini. <sup>6</sup> “È nono ikaki,” Jesús ato faino, chetekiri iflakekafãpakei fetsenifo. <sup>7</sup> Nãskaxõ Jesús anã ato yõkani: “¿Tsoa mã fenaimẽ?” Jesús ato faino, “Nõ Jesús Nazarete anoa nõ fenai,” faifãfe <sup>8</sup> anã ato yoini: “Èkĩa nã mã ea fenai ẽ mato faa,” ato fani. Nãskaxõ ato yoini: “Mã ea fenamãkai na eõxõ tãpimisfo ato nĩchikãfe fotanõfo,” ato fani.

<sup>9</sup> Nã Jesúsnoa yoikĩ kirika keneyonifo iskafakĩ: “A mĩa ea minia fato fisti fenoima,” ixõ kirika kenenifo. Nãskaxõ nã kirika kenenifo keskarakõi Jesús Apa Nios kĩfini. <sup>10</sup> Nãskaino Pedro ãfe keno tsekani, ãfe keno tsiostamexõ. Mã ãfe keno fixõ nã ato Nios kĩfixomisto ãfe xanĩfãfe yonomati paxteni. Nã xanĩfãfe ãfe yonomati ãfe ane Malco ini. Nã Pedro paxteni.

11 Pedro askafaito òikĩ, “Mĩ keno fafe,” Jesús Pedro fani. “¿Mĩ shināimamē? Ēfe Epa ea afara kechoki inā ē ayai,” ayatiki keparanākĩ Jesús Pedro yoini. “Nā ēfe Epa Niospa apaiyai keskara ē akikai,” ixō Jesús yoipaini.

*Jesús Anás ano iyonifo*

(Mt. 26.57-58; Mr. 14.53-54; Lc. 22.54)

12 Sorarofāfe āfe xanĩfo feta a Nios kĩfiti pexefā kexemisfo feta osinākaxō Jesús achikaxō metexkere anifo. 13 Metexkere akaxō Anás pexe ano iyonifo. Nā Anás Caifás āfe rayos ini. Nā Caifás Nios ato kĩfixomis xanĩfokōi ini. 14 Nā Caifás āfe kaifo israelifo yoini: “Feronāfake fisti yorafoñoax naa, sharaki,” ato fani.

*“Ē Jesús òimisma,” Pedro ini*

(Mt. 26.69-70; Mr. 14.66-68; Lc. 22.55-57)

15 Askata Jesús iyoaifono Pedro fe a Jesúsxō tāpimis fetsa ato acho fonifo. Mā pexe ano nokoano nā Jesúsxō tāpimis fetsa xanĩfāfe mā òimis ini. Nā Jesús fe ikikaini. 16 Akka Pedro kāiti ano nēteni, ikinima. Akka nā Jesúsxō tāpimis fetsa ikikaini. Nāato xomaya a kāiti kexea yoini Pedrori ikimanō. 17 Mā Pedro ikiano nā kāiti kexemis xomayato yōkani: “¿Mĩri mĩ Jesús āfe inamē?” faito, “Maa, ēkai Jesús āfe inama,” Pedro fani.

18 Mā fakishano matsinākōikanax chii ketefaax keyokōi chii yoonifo matsi meymaxikakĩ. Nā xanĩfofo āto yonoxomisfo fe a Nios kĩfiti pexefā kexemisfāfe chii ketefaax yoonifo. Pedrori ato fe yooni.

*Judeofāfe xanĩfāfe Jesús yōkani*

(Mt. 26.59-66; Mr. 14.55-64; Lc. 22.66-71)

19 Nāskata ato Nios kĩfixomisfāfe āto xanĩfāfe Jesús yōkani iskafakĩ: “¿Fatofomē a mĩōxō tāpimisfo? ¿Afaa mĩ ato yoimismē?” faito, 20 “Ēkai one ato yoiaama. Keyokōichi ea nikanōfo ē ato yoimis. Ē mātō ichanāti pexe mēranoa yafi a mātō Nios kĩfiti pexefā mēranoa ē ato yoimis. Ēkai ēfe meka ē onemisma. 21 ¿Afeskakĩ mĩ ea yōkaimē? Ea yōkakima a ea nikamisfo yōkafe. A ē ato yoimis tāpiafoki,” Jesús faito, 22 a Nios kĩfiti pexefā kexemisto afe ketaxamei niato fepasyanā yoini: “¿Afeskakĩ nōko xanĩfo mĩ anori yoimē?” faito, 23 Jesús anā kemani: “Afaa chaka ē yoimē ea yoife. Akka ē afaa chaka yoiaama ¿afeskakĩ mĩ ea fepasimē?” Jesús fani.

24 Askafaito nikakĩ Anás āfe rayos Caifás ano Jesús nĩchini metexkere axō. Nā Caifás ato Nios kĩfixomis āto xanĩfokōi ini.

*Pedro anā ato yoini: “Ēkai Jesús òimisma,” ato fani*

(Mt. 26.71-75; Mr. 14.69-72; Lc. 22.58-62)

<sup>25</sup> Nãnoax Pedro ato fe chĩ yooni. ato fe yooaito afianã Pedro yõkanifo: “Mĩfi nã Jesús ãfe ina fetsakĩ,” faifãfe, “Maa, êkai nã Jesús ãfe inama,” ato fani.

<sup>26</sup> Ato askafaino nã paxteato afe yõra yõkani: “¿Ë mia õiamamẽ? Akka ã mia õia. Nã fanafo mapoa mẽranoa Jesús yafi ã mia õia,” nã paxteato afe yõra Pedro fani. <sup>27</sup> “Maa. Êkaima,” Pedro faino takara keoinãkafani.

### *Pilato ano Jesús iyonifo*

(Mt. 27.1-2, 11-14; Mr. 15.1-5; Lc. 23.1-5)

<sup>28</sup> Nãskano fakishpari judeofãfe Caifás ãfe pexe anoxõ Pilato xanĩfo ano Jesús iyonifo. Nã judeofo Pilato ãfe pexe mẽra iki-tiroma inifo. Pilatokairoko judeokẽ a mẽra ikipanãfãfe. “Nõ Pilato ãfe pexe mẽra ikiax nõ chakanatiro,” ikanax, ikikaspanifo. Nã judeofo a judeofoma fe rafexõ Pascua fistatĩa pitirofoma ipaonifo. Nãskara feyafamisfo ipaonifo. Nãskakẽ Pilato ãfe pexe mẽra ikikaspanifo. <sup>29</sup> Nãskaifono pexe kachiori kãinãkafã Pilato ato yõkani: “¿Afaa chakafakẽ na feronãfake mã ea ano efeamẽ?” ato faito, <sup>30</sup> “Afaa chakafayamakekai nõ mikiki efekeranama,” faifãfe, <sup>31</sup> ato Pilato yoini: “Iyotakãfe. Mãto xinifãfe yoini keskafakĩ omiskõimaxikakĩ. Nã keskara mã feyafamiski. Afaa chakafamãki mã akãfe,” ato Pilato faito, judeofãfe kemanifo: “Akka mãto xanĩfofãfe yoinifo nõ tsoa retẽkĩ mastatiroma,” fanifo.

<sup>32</sup> Jesús aõxõ tãpimisfo taeyoi yoini keskafakĩ nãskakõi fanifo ifi cruz ikaki mastakakĩ.

<sup>33</sup> Nãskano Pilato ãfe pexe mẽra Jesús ikimani yõkaxiki. Mã ikimaxõ yõkani: “¿Mĩmẽ judeofãfe ãto xanĩfo?” Pilato faito, <sup>34</sup> Jesús kemani: “¿Mĩ ea shinãimẽ ã judeofãfe xanĩfo mia yoiãforaka?” Jesús faito, <sup>35</sup> anã Pilato kemani: “¿Mĩ shinãimẽ ã judeo? Ë judeoma. Akka mĩ kaifo feta mĩ xanĩfofãfe mia ekeki efeafõ ã mia omiskõimanõ. ¿Mĩ afaa chakafakẽ mia ekeki efeafomẽ? Ea yoife,” Pilato faito, <sup>36</sup> Jesús kemani: “Ëkai na mai anoax xanĩfoma. Ë nonoax xanĩfokẽ a ea Ifofaafãfe yorafo setekeranafo ea achiyamanõfo. Akka êkai na yorafãfe ãto mai anoax ã ãto xanĩfoma,” Jesús faito, <sup>37</sup> Pilato kemani: “¿Akka mĩ xanĩfo rakikĩa?” faito, “Nã ea mã yoiãi keskarakĩa ã xanĩfo. Nãskakẽ ã yõra fakekõi kãini meka chanĩmakõi ato yoixikĩ. A meka chanĩmakõi fisti nikapaiyãifãfe nãfãfe ea nikamisfo,” Jesús faito, <sup>38</sup> “¿Afaamẽ a meka chanĩmakõi?” Pilato fani.

### *Pilato ato yoini Jesús retenõfo*

(Mt. 27.15-31; Mr. 15.6-20; Lc. 23.13-25)

Askafata Pilato pexe kachiori kãinãkafani. Kãinãkafaxõ judeofo yoini: “Ë na feronãfake yõkakĩ êkai aõnoa afaa chaka nikama,” ato fani. <sup>39</sup> “Iskaratĩa na Pascua fistatĩa ã yora fisti

karaxa mēranoa ē mato kāimaxomis, nāskaramāi māto feyafamiskē. ¿Akka ē māto xanīfo ē mato kāimaxotiro mē katanō?” ato faino, <sup>40</sup> fāsikōi mekainīfofānifo: “¡Jesús tsekakima! ¡Barrabás noko kāimaxōfe!” fanifo. Nā Barrabás yometso ini.

## 19

<sup>1</sup> Nāskaxō Pilato ato yoiano Jesús iyonifo sorarofāfe koshatinī koshaxikakī. <sup>2</sup> Askano sorarofāfe moxa chainipafo maiti fakaxō maimanifo. Akiki kaxepaiyanā nāskatari tari ōshi nana safemanifo. <sup>3</sup> Nāskax akiki kaxepai kakī iskafanifo: “Aicho. Mīfi judeofāfe āto xanīfoki. Mī mēxotaima nipanakaki,” iyanā fepasketsanifo.

<sup>4-5</sup> Askafafono Pilato Jesús pe xe xaki mēranoa kāimani ōinōfo. Jesús tari ōshi nana safeax kāikaini, moxari maiti fakaxō maimanafono. Nāskaxō Pilato ato yoini: “Ōikapo na feronāfake kai afaa chakafaa ē nikama ē chakafapanā,” ato fani. <sup>6</sup> Ato askafaito judeofāfe āto xanīfo yaxō a Nios kīfiti pexefā kexemisfāferi fāsikōi mekafanifo: “¡Mastafe! ¡Mastafe!” faifono, “Mā iyokaxō mastatakāfe. Ēkai aōnoa afaa chaka ē nikama ē chakafapanā,” Pilato ato fani. <sup>7</sup> Ato askafaino judeofāfe kemanifo: “Akka na feronāfāke noko yoimis: ‘Ēfi Niospa fakeki,’ noko famis. Akka nōko xinifāfe yoini: ‘Ē Niospa fakera ikai natiro,’ fanifo. Nāskakē na feronāfake nayamaima,” fanifo.

<sup>8</sup> Askafai fāfe nikai Pilato ratekōini. <sup>9</sup> Nāskaxō āfe pe xe mēra Jesús anā iyonī. Iyoxō yōkani: “¿Fanīamē mī?” faino, Jesús kemanima. <sup>10</sup> Pilato anā Jesús yoini: “¿Ea mīa kemaimamē? ¿Ea mīa tāpiamamē ē xanīfo? Ē mia kāimatiro, askayamai ē mia ato mastamatiro,” Pilato askafaino, <sup>11</sup> Jesús kemani: “Niospa mia xanīfo imayamainokai mī ea afeska fakeranama. Akka mī ea ato mastamanax mī chaka iki. Akka nā ea mikiki efea nā chakafinakōi iki mī ea reteano,” Jesús fani.

<sup>12</sup> Askafaito nikakī Pilato Jesús kāimapaini. Kāimapaiyaino nikakani fāsikōi judeofo mekainīfofākata yoinifo: “Fatora fetsa xanīfo ipaikī nāato César xanīfo chakafai. Akka na Jesús xanīfo ipai. Akka mī Jesús kāimaxō mī anā nōko xanīfo César tanaima,” fanifo.

<sup>13</sup> Askafai fāfe nikakī afianā Pilato Jesús pe xe mēranoa kāimani. Nāskax Pilato a xanīfāfe tsaoti ano tsaoni. Nā xanīfāfe tsaoti pe xe emāiti ini tokiri sapa kamaki āfe tsaotiki tsāoni. Nā tokiri hebreofāfe āto mekapa anemisfo Gabata fakakī. <sup>14</sup> Mā Pascua fista ikaino xini keya Pilato tsoaxō ato yoini mā Jesús kāimaxō, “Nakīa ōikapo māto xanīfo,” ato fani. <sup>15</sup> Ato askafaino fāsikōi mekainīfofākata yoinifo: “¡Iyoxō mastatāfe ifi cruz ikikakīnoax nanō!” faifono, “¿Mā ōipaimē ē māto xanīfo

mastanõ?” ato Pilato faino, “César fisti nõko xanĩfokõi. Anã ano nõko xanĩfo fetsama,” judeofãfe ãto xanĩfofãfe Pilato fanifo.

<sup>16</sup> Askafaifono Pilato ato Jesús nĩchixoni iyoxõ mastatanõfo.

*Jesús ifi cruz ikaki mastanifo*

(Mt. 27.32-44; Mr. 15.21-32; Lc. 23.26-43)

<sup>17</sup> Nãskano sorarofãfe Jesús iyonifo. Iyoaifono ãakõi ifi cruz ika Jesús iyaxõ foni. A mastaiфо ano nokoni. A mastaiфо nãno ãfe ane ini: “Mapo Xao,” fanifo anekakĩ. Judeofãfe meka pa Gólgotara fapaonifo. <sup>18</sup> Nãskata Jesús yafi yometso raferi mastanifo. Takai rafe yometso rafe mastanifo. Akka Jesús nẽxpakĩa anifo.

<sup>19</sup> Mã Jesús mastakaxõ ãfe mapo mãnãori kenenõfo Pilato ato yoini. “Jesús Nazarete anoa judeofãfe ãto xanĩfokõi,” fanifo kene kakĩ. <sup>20</sup> Jerusalén ano yora fetsafo osiafo ichapakõifo inifo. Nãnoxõ Jesús Jerusalén chaimashtaxõ mastaiфо ini. Nãnoxõ Pilato meka fetsa fetsatapafo ato kenemani Jesús judeofãfe ãto xanĩfokẽ tãpinõfo. Judeofãfe ãto meka keneta, griegofãfe ãto meka keneta, romanõfãfe ãto mekari kenenifo.

<sup>21</sup> Nãskax judeofãfe ãto xanĩfofo Pilato ano fonifo yoi fokani: “Jesús nõko xanĩfoma. Nãskakẽ ato kenemayamafe iskafakĩ: ‘Jesús judeofãfe ãto xanĩfokõi,’ askara ato kenemayamafe. Akka, ‘Jesús yoimis, “Ë judeofãfe xanĩfora” imis.’ Nãnori mĩ ato kenematiro,” faifãfe, <sup>22</sup> Pilato ato yoini: “Nã ãto kenemana keskara ãto kenemani. Ëkai anã afaa fetsa ãto kenematiroma,” Pilato ato fani.

<sup>23</sup> Sorarofãfe Jesús mastaiфono ãfe rapati fĩanifo. Nãskax paxkanãi fetsenifo Jesús ãfe rapati soraro cuatropa Jesús rapati finifo. Nãskata nã ãfe tari chainipari fĩanifo. <sup>24</sup> Nãskax yoinãnifo: “Nã tari nõ faxteimãkai fetsakanãyamaxikĩ. Nãskara memashara nõ finõ,” inifo. Nãskax ãfe tariya kaxenifo ãto kaxetiya. “Na finõmanato Jesús ãfe tari fii kiki,” inifo. Nãnori Niospa meka yoikakĩ keneyonifo. A Jesús inõpokoai yoikakĩ keneyonifo. Iskafakĩ kenenifo: “Ëfe rapati paxkanãxikani. Askata ãfe tari chainipayari ãto kaxetiya kaxexikani. Nã finõmanato ãfe tari fixii,” ixõ kirika keneyonifo. Nãskakẽ sorarofõ Jesús ãfe tariya kaxenifo.

<sup>25</sup> Nãskano nã Jesús mastaiфо ano chaimashta Jesús ãfe afa nini. ãfe afa fetsari nãno nini. Nã Cleofaspa ãfe ãfinõ María Magdalenanõ nãno chaimashta ninifo. <sup>26</sup> Nã aõxõ tãpimis fisti ãfe yamakõi a Jesús noikõipaoni afa fe ketaxamei nikẽ Jesús õini. Nãskaxõ Jesús afa yoini: “Na feronãfakefi mĩ fakeki,” fani. <sup>27</sup> Nãskata nã feronãfakeri Jesús yoini: “Nafi mĩ efaki,” fani. Askafaino nikakĩ María ãfe pexe ano iyoni kexesharaxikĩ.

*Jesús nani**(Mt. 27.45-56; Mr. 15.33-41; Lc. 23.44-49)*

<sup>28</sup> Jesúsnoa yoikĩ Niospa meka keneyonifo keskakõini. Mã Jesús täpioxõ yoini: “Ë nõamãiki,” ato fani. <sup>29</sup> Ato askafaino fimi ene kacha ocha mefetiki tsaono nã mĩxa fikaxõ fimi ene kachaki momokaxõ Jesús ayamapainifo tafa xatekĩ rõtati fakaxõ. <sup>30</sup> Mã fimi kacha yaxõ Jesús yoini: “Keyokõi ãfe Ëpa ea yoia keskara mẽ aka,” ato fani. Ato yoita nãskax nai tepopakekafãni.

*Soraronõ Jesús ãfe pishi nãmã chachini*

<sup>31</sup> Mã Pascua fista ikaino Jesús yafi yometso rafe ifi cruz ikakĩnoa judeofãfe õikaspanifo. Nã fistatĩa ato pena tenetitĩa ini. Nãskax mã fista ikaino Pilato ano fonifo yoi fokani iskafakakĩ: “Mã penama nõko fista iki kiki. Nã Jesús yafi nã yometso rafe ãto fitax xao tẽkerisa fanõfo koshi nanõfo ato yoife. Mã penama nõko fista iki kiki nã ato mastafõ ano anã inõfoma nõko fistatĩa,” judeofãfe ãto xanĩfofõfãfe Pilato fanifo. <sup>32</sup> Nãskafaifono Pilato sorarõfo yoini iskafakĩ: “Ãto fitax xao ato tẽkerisa fakãfe koshi nanõfo.” Ato askafaino fokaxõ õiafo yometso rafe naafoma inifo. Naafomano ãto fitax xao ato tãkenifo nanõfo. <sup>33</sup> Akka Jesúski fokaxõ õiafo mã Jesús naa õinifo. Nãskakẽ tsõa ãfe fitax xao tẽkenima. <sup>34</sup> Akka soraro fistichi ãfe ãshi ãfe pishi nãmã chachiaino ãfe imi fakaya siini. <sup>35</sup> Ëkĩa Juan na kirika ã keneai nã ã õimis keskara ã mato yoi na kirika kenekĩ mã chanĩmara fanõ. Ëfi chanĩmakõi mato yoi. <sup>36</sup> Niospa meka yoimisto a Jesús inõpokoai yoikĩ kirika keneni iskafakĩ: “Ãfe xaokai tsõa tẽkexikanima,” ixõ kirika keneyonifo. <sup>37</sup> Askatari, “A ãfe pishi chachiaifono õixinõfo,” a Niospa meka yoimisto nãnorikõi kirika keneyoni.

*Jesús makex kini mẽra maifanifo**(Mt. 27.57-61; Mr. 15.42-47; Lc. 23.50-56)*

<sup>38</sup> Nãskano José Arimatea ano ikax Pilato ano kani. Kaxõ Jesús ãfe yora yõkani: “Ifi cruz ikakĩnoa ã Jesús fotomapai maifaxikĩ,” José faito, “Atãfe,” Pilato fani. Nã José Jesús Ifofamis ini. Jesús Ifofafxõ ato yoinima. Judeofãfe ãto xanĩfofoki mesekĩ ato yoinima. <sup>39</sup> Nicodemo feta José Jesús ifi cruz ikakĩnoa fotomanifo maifaxikakĩ. Nã Nicodemo Jesúski fakishi kaxõ yõkayoni. Nãato ãfe pirofomã shara treinta kilo feni Jesús ãfe yora raish axiki fena pisiyamanõ. Fetsa ãfe ane mĩrra ini. Fetsa aneri áloes ini. Nã rafe osia ini. <sup>40</sup> Askano José feta Nicodemo sama oxo shara pirofomã raish axõ aõ rakonifo. Judeofãfe ãto kaifo maifakĩ askara feyafamisfo ini. <sup>41</sup> Nã ifi shara mĩshti mapoa anoxõ chaimashtaxõ Jesús mastanifo. Nãnori mafa kini fena, tsoa a mẽra maiyomisma

ini. <sup>42</sup> Mā judeofāfe āto pena teneti chaimashta ikaino mā xini kaino Jesús maifanifo. Nāskakē nā mafa kini chaimashta nā mēra Jesús maifanifo.

## 20

### *Jesús otoni*

(Mt. 28.1-10; Mr. 16.1-8; Lc. 24.1-12)

<sup>1</sup> Nāskano nomīkonō fakishparikōi María Magdalena kani nā Jesús mafa kini mēra maia ano. Kaxō ōia mā mafa kini fepekemea ini. Nā tokirinifā aō fepoitafo mā fepekemea ini. <sup>2</sup> María ōifaini ichoni Pedro yafi nā Jesúsxō tāpimis fetsa nā Jesús āfe yamakōi chanifaikai kani. Ato yoini: “Nōko Ifāfe āfe yora kini mēraano mā fakira oneafo nōkai tāpiama,” ato fani.

<sup>3</sup> Ato askafaino Pedro fe a Jesúsxō tāpimis fetsa ōifokani ichonifo. Mafa kini ano ōifokani. <sup>4</sup> Nā fētsa Pedro xonōfaini rekē nokoikakī. Akka Pedro chipo nokotoshini. <sup>5</sup> Rekē nokotoshixō a Jesús maia ano mafa kini mēra tēkepakekafā naisni. Ari naiskī ōia a aō rakoitafo sama mania ini. <sup>6</sup> Nāskata Pedrori chipo nokotoshini. Nokoax mafa kini mēra ikikaini. Ikikaixō ōia aō rakoitafo mania ini. <sup>7</sup> A aō mapoki marakoitafo nā fosoita ariri āfe sama mania ini chaimashta. <sup>8</sup> Askaino a Pedro fe kaari kini mēra ikikaini. Ikikaikī ōia ano Jesúsma ini. Nāskaxō chanīmara fani. <sup>9</sup> A Jesús otoxiai Niospa meka yoikī kirika kenenifo tsōa tāpiyonima. <sup>10</sup> Nāskata mā ōita āto pexe ano fenifo.

### *Jesús María Magdalenaki nokoni*

(Mr. 16.9-11)

<sup>11</sup> Mā foaifono María kanima. Mafa kini kachiori niax María oiani. Oiayanā nāatori kini tēkepakekafā naiski ōini. <sup>12</sup> Niospa āfe ājiri rafe rapati oxokōi safekanax tsoafo ini Jesús rakaita ano. Nā fosoita ariri fetsa tsoa, fetsari āfe tae ikita ariri tsoa ini. <sup>13</sup> Nāskaxō Niospa āfe ājiri rafeta yoini: “¿Afeskai mī oiaimē?” faifono, “Ēfe Ifāfe āfe yora mā fakira oneafo ē tāpiama,” ato fani.

<sup>14</sup> Nāskata María texkeakekafā ōia Jesús a kachiori niano tāpinima. <sup>15</sup> Jesús María yōkani: “Kēromā, ¿afeskai mī oiaimē? ¿Mī tsoa fenaime?” faito, María shināni: “Nā fanafo kexemisra,” fani. Nāskaxō María yōkani: “Mī ēfe Ifāfe āfe yora fanī mī faamē ea yoife, ē afianā nono maifanō,” faito, <sup>16</sup> Jesús: “María,” faito, foisnīfofā María ōia nā Jesús āfe fesokōi ini. Nāskaxō María judeo meka: “Rabonī,” fani. Rabonī fakī, “Noko tāpimamisto,” fani. <sup>17</sup> Askafaino, “Ea ramāyamafe. Ēfe Epa ari ē kaamaki. Akka ea ramākima efe yorafo ea ato yoixotāfe, mā ēfe Epa Nios ari ē kaikai. Nā ēfe Epari mātō Epaki. Nā ēfe Niosri mātō Nioski, ato fatāfe,” fani. <sup>18</sup> Askafaino

María kaxõ aõxõ tãpimisfoki nokoxõ ato yoini: “Mẽ nõko Ifo ẽ õiaki,” ato fani. Nã ãfe Ifãfe yoia keskara ato yoini.

*Jesús aõxõ tãpimisfoki nokoni*

(Mt. 28.16-20; Mr. 16.14-18; Lc. 24.36-49)

<sup>19</sup> Nãskata nomĩkonõ mã xini kaino a aõxõ tãpimisfãfe judeofoki mesekakĩ ãto pexe fepoti feponifo ichanãkakĩ. Mã ichanãifono ãto nẽxpakĩa Jesús nirisatani. Ato yoini: “Mãto õiti fepeakax inimasharakãfe,” ato fani. <sup>20</sup> Ato askafata a mifiki rãfomã mastaitafo ãfe tsefe ato ispani. A ãfe pishiki ãshi chachitaforti ato ispani. Ato ispaito õikani ãto Ifoki fãsi inimakõinifo.

<sup>21</sup> Afianã Jesús ato yoini: “Mãto õiti fepeakax inimasharakãfe. Nã ẽfe Ẽpa ea nĩchini keskafakĩri iskaratĩa ẽ matori nĩchikai,” ato fani. <sup>22</sup> Nãskaxõ ato yoini: “Na ẽfe Epa ãfe Yõshi Shara fikãfe,” ixõ atoki axfainãkafa ato xoõ ani. <sup>23</sup> “Fatora fetsa mã ãto chaka soaxonaino Niospari ãto chaka soaxoxii. Mã ato chaka soaxoyamaino atoõ chaka nepakenaka,” ixõ Jesús ato yoiax nãskax ato makinoax kani.

<sup>24</sup> Ato Jesús yoiaínokai Tomás ato fe ano inima. Nã Tomásri Jesúsxõ tãpimis ini. ãfe ane fetsa “Rafe Kãini” fapaonifo. <sup>25</sup> Tomás atoki oaino yoinifo: “Mã nõko Ifo nokoki oaito nõ õia,” faifãfe Tomás ato yoini: “Ẽ ãfe mifi natakino a rãfo tsefefe ẽ meikerana a ãfe pishi tseferi ẽ meikerana nãskaxõ ẽ chanĩmara fakerana. Akka ẽ ãfe tsefefe ramãkayamaxõ a mã Jesús õia ẽ chanĩmara faima,” ato Tomás fani.

*Jesús aõxõ tãpimisfoki anã nokorisatani*

<sup>26</sup> Nãskata ocho nia oxata Jesús aõxõ tãpimisfo anã kene mẽranoax ichanãfono Tomásri nãno ato fe ini. Pexe fepoti fepokõiafono Jesús atoki nokorisatani. Anã ato yoini: “Mãto õiti fepeakax inimasharakãfe,” ato fani. <sup>27</sup> Nãskaxõ Jesús Tomás yoini: “Ea mĩ mĩfi ramãfe ẽfe mifi natakĩ. Ẽfe pishi nãmãri ea ramãfe. Anã ea chanĩmara fakima, ea chanĩmara fafe,” Jesús faito, <sup>28</sup> Tomás kemakĩ: “Mĩfi ẽfe Ifoki. Mĩfi ẽfe Nioski,” faito, <sup>29</sup> “Ea mã õikĩ mĩ ea chanĩmara fai,” fani. “Akka ea õiyamafikakĩ ea chanĩmara faifofi Epa Niospa ato shara faxii. Inimakõixikani,” Jesús fani.

*Juan kirika kenenĩ tãpinõfo*

<sup>30</sup> Akka afama mĩshti tsõa atiroma keskafakĩ Jesús aõxõ tãpimisfo ato õimamis. Afara fetsaforti Jesús aka ẽ afo mato kenexonama. <sup>31</sup> Epa Niospa Jesús nĩchini nõko Ifo inõ. Nãfi Niospa Fakeki. Ẽ mato Jesúsnoa kenexoni mã chanĩmara fanõ. Chanĩmara faax mã aõnoax Nios fe nĩpaxanõ.



## 21

*Īamāfā kesemē Jesús aōxō tāpimisfoki nokoni*

<sup>1</sup> Nāskano Jesús anā aōxō tāpimisfoki atoki nokoni. Īamāfā Tiberias kesemē nāno atoki nokoni. Ē mato yoinō afeskax Jesús onimāki.

<sup>2</sup> Pedro fe Tomás (nā Tomás “Rafe Naneni” fapaonifo), Natanael Caná anoa ini Galilea mai anoa, Zebedeo fake raferi ini, Jesús fe rafemis raferi ato fe ichanānifo. <sup>3</sup> Nāskaxō Pedro ato yoini: “Ē rinipa fii kaikai,” Pedro ato faino, “Nōri mefe kai,” fanifo. Nāskax fonifo kanōanāfānē nanefainifo. Fōkata rini potenifo nā rini fakishchāi potefikaxokai tsōa foe fini-foma.

<sup>4</sup> Mā penaino Jesús Īamāfā kesemē atoki nokorisatani. Īamāfā kesemēxō aōxō tāpimisfāfe tsōa Jesús tāpinifoma. <sup>5</sup> “ĶĒfe fakefāfe, mā foe fiamamē?” ato faino, “Nō fiamā,” fanifo. <sup>6</sup> Askafaifono ato yoini: “Māto pōya kayakai aōri māto rini potekāfe. Askafaxō mā fitiroki,” ato faino nikakakī nā ato yoiai keskafanifo āto rini potekakī āto pōya kayakai aōri. Nāskaxō meafō mā foe kayakōi fia menifo. Ato kanōanāfā mēra nanepaikakī ranānifo. <sup>7</sup> Nā Jesúsxō tāpimis fētsa nā Jesús āfe yamakōi ipaonito Pedro yoini iskafakī: “ĶNāfi nōko Ifoki!” fani. Askafaito nikai Pedro koshikōi āfe rapati safeni nāskax kanōanāfā makinoax Īamāfānaki pakekaini āfe Ifoki nokorisapai. <sup>8</sup> Nāskaito ōikani atiri kanōanāfānē acho fonifo. Āto rini foe fospikōiano ninifonifo Īamāfā kesemē chaimashta nokoxikakī.

<sup>9</sup> Mā Īamāfā kesemē nokokaxō ōiafo chii mǎnǎ mǎnǎ ikaito ōinifo. Foe yafi pǎa xoimea chii ketokonō raka ōinifo. <sup>10</sup> Askata Jesús ato yoini: “A mā rama foe fia niri fekāfe,” ato fani.

<sup>11</sup> Akka Pedro kanōanāfāoxō rini ninifoni Īamāfā kesemē rataxiki. Mā rini fixō ōia foe rini mēra fospikōia ōini. Ciento cincuenta y tres ini. Akka fōe rini faxtenima. <sup>12</sup> Askaifono Jesús ato yoini: “Piyoi fekāfe,” ato fani. Akka tsōa yōkanima: “ĶMī tsoamē?” tsōa fanima mǎmǎi tāpikaxō āto Ifomāiyakē. <sup>13</sup> Nāskaxō Jesús ato pimakī ato pǎa yafi foe ato ināni.

<sup>14</sup> Mā reteafono otoitaxakī aōxō tāpimisfoki nokoni. Tres ves ini atoki oi.

*Jesús Pedro yoini*

<sup>15</sup> Mā pixō Jesús Simón Pedro yoini: “Simón mīfi Juan fakeki. ĶNa fetsa finōmainifofā mī ea noimē?” faito, “Ēje Ifō. Mā mī tāpiaki ē mia noiaito,” Pedro faito, Jesús yoini: “A ea noisharaxō a ea rama Ifofaifori ato kexesharafe ea Ifosharafanōfo. A oveja kexemisto āfe oveja fake kexemis keskafafe ato kexekī,” fani.

16 Anã Jesús Pedro yōkani: “Simón, mīfi Juan fakeki. ¿Chanĩmamē mī ea noimē?” faito, “Ēje, Ifo. Mā mī tāpia ē mia noiaito” Pedro faito, anã Jesús yoini: “A ea noisharaxō ea Ifofamisfo ato kexesharafe ea Ifosharafanōfo. A oveja kexemisto āfe oveja kexemis keskafafe ato kexekī,” fani.

17 Nāskaxō anã Jesús yōkani: “Simón, mīfi Juan fakeki. ¿Ea mīa noikōimē?” ixō Jesús yōkari faino Pedro anã tooxinima. Nāskaxō anã Pedro kemani: “Ifo, mīfi afama mīshti tāpiaki. Mā mī tāpia ē mia noiaito,” fani. Askafaino anã Jesús yoini: “A ea Ifofamisfo ato kexesharafe ea Ifofasharanōfo. 18 Ē mia yoikōinō. Mī naetapakī nā mī apaiyai keskara mī fapaoni. Askatari nā mī kapaiyai ari mī kapaoni. Akka mā mī anifoax mī takairafe mēshax kaxii mia iyoaifono a mī kapaiyamai ari mia iyoxikani,” Jesús fani. 19 Askafakī Jesús Pedro tāpimani afeskax naximākai. Pedro Jesúsnoax naxiaino yorafāfe mā tāpikaxō, “Nios finakōia,” faxikani. Nāskano Jesús Pedro yoini: “Ea Ifosharafafe,” fani.

20 Askafaino Pedro texkeakekafā Juan fichini acho oaino. (Nā Juanri Jesúsxō tāpimis ini, Juan Jesús noikōia ini. Jesús reteyoafomano aōxō tāpimisfo feta fakishi piyoni. Akka Juan afe ketaxamei tsoaxō Jesús yōkani iskafakī: “¿Ifo, tsōakai mia ato achimaximē?” fani Jesús reteyoafomano afeta pikī.) 21 Nāskaxō Pedro nā Juan fichixō Jesús yōkani: “¿Ifo, afeskax na Juan naximē?” fani.

22 Askafaino Jesús kemani: “A ē nimapaikī ē nimaino niyoxii nā ē anā oaitīa. Akka mīkai aōnoa shināchakatiroma. Askatamaroko ea Ifofatitai fafe. Eōnoa fisti shināfafāife,” fani. 23 Nāskax Jesúsxō tāpimisfo āa ranā yoinānifo: “Juankai nanakama,” fanifo. Askafafiaifono Jesúska Pedro anori yoinima. Akka iskafakī yoini: “A ē nimapaikī ē nimaino niyoxii nā ē anā oaitīa. Akka mīkai Juanōnoa mī shināchakatiroma,” fani. Nānori fisti Jesús Pedro yoini.

24 Ēkīa Juan ē kirika kenexō ē mato yoi. Ēri Jesúsxō tāpimis. Ea Jesús noikōia. Jesús afarafo faito ē ōimis. Nāfo ē mato kenexoni. Jesús afarafo akaito mē ōimis. Nāskakē mā ēfe meka chanĩmara fatiro. Ē mato yoiāito mā Jesús chanĩmara fatiro. 25 Jesús afama mīshti fani afo yoikī nō kirika kenekī mitotiroma. Ēkīa Juan ē mato kirika kenexoni. Nā tii.

## Jesúsxō Tāpimisfāfe Apaonifo Keskara

*“Niospa āfe Yōshi Shara matoki nīchixii kiki,” ixō Jesús yoini aōxō tāpimisfo*

<sup>1</sup> Teófilo, ě mia anā kirika kenexoni mia yoikī. Ěfi Lucaski, mia kirika fomai. A Jesús nai mēra kayoxoma afama mīstiffo fayaná ato tāpimapaoni keskara yoikī ě mia kirika kenexō fomayoni, mī tāpinō. <sup>2-3</sup> Mā Jesús retefiafono oxa rafeta anā otoni. Mā otoxō aōxō tāpimisfo ato ifixō ato tāpimani Niospa Yōshi Sharapa shināmanaino akairi fetsafo tāpimanōfo. A metasitafo ato ispaketsani a aōxō tāpimisfo. “Nafo ea meta-sitafo kī ōikapo,” ato fani ōikakī tāpisharanōfo. Mā anā nia afia ipaoni keskara ixō tāpinōfo ato yoisharani nai mēra kayoxoma. Cuarenta nia oxata ato tāpimasharani chipo katāxiki ato yoipakeyoni a Nios xanīfoōnoa ato yoisharapakeni. Nāskax Apa Nios ari kani nai mēra.

<sup>4</sup> Nai mēra kayoxoma anā pena fetsa aōxō tāpimisfo yoisharani iskafakī: “Nonoax fakifoyoyamakāfe. Ě mato yoisharayonō, mā nikasharanō. Ěfe Epa āfe Yōshi Shara matoki nīchixii kiki a ě mato yoimis keskafakī. Mā mā nikafafainakī ě mato yoiaito. Nāskakē na Jerusalén anoxō manayokāfe, ěfe Epa āfe Yōshi Shara mato mēra naneyonō. <sup>5</sup> Juan mato maotisafakī faka mēra ikimapakeni Niospa māto chaka mato soaxonano mā ato ōimanō. Nāskafakīri samama fatora penata Niospa āfe Yōshi Shara mato mēra naneaino mā shinā sharaya ixii.”

### *Jesús nai mēra kani*

<sup>6</sup> Anā ano fisti Jesús fe ichanākaxō yorafāfe yōkanifo iskafakakī: “¿Ifo, iskaratīa nōko kaifo israelifāfe āto xanīfo mī ikimē? ¿Anā nafa nōko xanīfo ixiiimamē?” fanifo yōkakakī.

<sup>7</sup> Askafaifāfe Jesús anā ato yoini iskafakī: “Tsōa tāpiama. Epa Nios fistichi tāpia. Afetīara inōpokoi mā tāpitiroma. <sup>8</sup> Mā tāpiyamafitirono Niospa āfe Yōshi Shara mato mēra naneano aōxō mā afama mīsthi tāpitiro. Nāskakē mā eōnoa ato yoitiro mēstekōi. Taefakī nā Jerusalén anoafō yoita, nā Judea anoafō yoita, nā Samāria anoafō yoita, keyokōi nā maitio anoafō eōnoa mā ato yoitiro,” ixō Jesús aōxō tāpimisfo yoini.

<sup>9</sup> Nāskata mā ato yoita Apa Niospa ifiaino nai mēra kani. Aōxō tāpimisfāfe ōiaifono fininākafā kani. Mēstekōi māpeinīfofani nai kōi mēra ikikainaito aōxō tāpimisfāfe anā ōinifoma mā kaano. <sup>10</sup> Nai mēra foisaifono feronāfake rafe ato ketaxamei nītanifo rapati oxo shara safekanax ato yoinifo iskafakī: <sup>11</sup> “¿Na Galilea anoafāfe, afeskakī mā nai mēra

foisimē? Mā Jesús nai mēra kaa. Afetiāra anā matoki oxii. Fatora penata afia mā kaito ōia keskara oxii kiki,” ixō feronāfake rafeta ato yoini.

*Jerusalén anoax aōxō tāpimisfo ichanānifo*

<sup>12</sup> A māchifanē āfe ane Olivos anoax Jesús ronoinākfā nai mēra kaito ōikata anā anoris fenifo Jerusalén ano chaima. Un kilometro Olivos fe Jerusalén nā tiixō rafe ini. <sup>13-14</sup> Jerusalén ano nokokata pexe mēra ikifaikata fomākīa māpeinīfōfākata a ikafo ano ikifainifo. Ano ikifaikanax ano fistiax ichanānifo. Pedro ikaino, Jacobo ikaino (nā Jacobo āfe ane fetsa Santiago ipaoni), Juan ikaino, Andrés ikaino, Felipe ikaino, Tomás ikaino, Bartolomé ikaino, Mateo ikaino, Jacobo Alfeo fake ikaino, Simón Celote ikaino, Judas Santiago fake ikaino, Jesús onefetsafo ikaifono, Jesús āfe afa María ikaino, a kēro fetsafori ikaifono ano fisti ichanānifo Nios kīfikani. Nānoxō pena tii Nios kīfifāinifo.

<sup>15</sup> Askata pena fetsa yora rasi ciento veinte ichanānifo. Askaifono Pedro niinākfā ato yoini <sup>16</sup> iskafakī: “Efe yorafāfe, ea nikakōisharakāfe ē mato yoinō. Na Judaspafi yorafo iyoita Jesús achifonōfo. ‘Fato Jesúsmākī noko yoife,’ faifāfe, ‘Nakīa,’ ato faito ōikakī achitafo. Afia Niospa shināmanaino nōko xini David yoikī kirika kenepaoni keskafakī Judaspa ato yoita. <sup>17</sup> Na Judas nofe rafemis noko akai keskari fakī Jesús ifini. Nāskakē nofeta yonoxofikatsaxakī mā chakafakī yorafo ato achimanita,” ixō Pedro ato yoini.

<sup>18</sup> (Ato askafaito kori ināitafo āa anofi chakamenō. Kori ināfiafono anā anoris xanīfofo ināita. Nā kōri xanīfofōfāfe mai fiitafo. Askata Judas āa tenexemeta ifikī nexeax ronoinākfāita. Ronoax ariax xetaori pakei mā nafaraxikax āfe poko napakemeita. <sup>19</sup> Askaito nikaitafo Jerusalén anoxō. Anoax āfe imi fokē nā mai aneitafo “Acéldama” ixō aneitafo. Nōko mekapa nō yoitiro iskafakī: “Imi Mai” fakī.) <sup>20</sup> Askata anā Pedro ato yoini iskafakī: “Nōko xini David a inōpokoai yoikī kirika Salmos ano keneni a Judasnoa yoikī iskafakī:

A yōra āfe mai ano tsoa inōma,  
yoikī keneni. Nāskata anā yoini iskafakī:

Feronāfake fetsa a yonomis ano ikiakēkafanō,  
ixō anori yoikī noko kenexoni.

<sup>21</sup> “Nāskakē iskaratīa a feronāfake fetsa nō ifinō, a nofe Judas ipaoni keskara inō. Fatora fetsa nō ifinō, a Jesús fe taefenai kafāsapaoni keskara nofe inō. <sup>22</sup> Nā nofe ixō ōini Juan Jesús maotisafakī faka mēra ikimanaino, nāskakē mēxotaima nofe imis, akka mā Jesús nai mēra kaito nofeta ōitakī, nāskakē nō ifinō nofeta ato yoimis inō. Nofe rafexō Jesúsnoa iskafakī yoinō: ‘Mā Jesús nayofiax mā anā otofaa,’ ixō ato yoinō,” Pedro ato fani.

<sup>23</sup> Ato askafaino José Barsabás fe Matías nãno inifo. Nã rafe ato ifipaikĩ, “¿Fato nõ ifimẽ?” ixõ shinãnifo. Nã José Barsabás ãfe ane fetsa Justo. <sup>24</sup> Askata a rafe ifipaifikakĩ fisti ifinifo. Nãskakẽ Nios kĩfinifo iskafakakĩ: “Epa Niospa, ¿fato nõ ifimẽ? Epa, mĩ nõko Ifoki. Keyokõi nõko õiti mẽra mĩ tãpikõiaiki. Nãskakẽ noko tãpimafe fato mĩ ifiamãki nofeta mĩõnoa yoimis inõ. <sup>25</sup> Judaspa Jesús ato achimaita. Nãskakẽ Judas naax omiskõipakenaka. Nãskakẽ Judaspa anã mĩõxõ yonotiroma nofeta. Noko tãpimafe fato a Judas ipaoni keskara itiomãkĩ mĩõxõ ato yoimis inõ,” ixõ Nios kĩfinifo.

<sup>26</sup> Nãskakata ãto ane rafe tokiriki kenexõ kesho mẽra nanexõ napakefõfãnaifono fisti pakeaito õikakĩ nã ifinifo. Matías ãfe ane ini. Nãskakẽ Matías ifiafono nã feronãfake oncefo feta Jesúsnoa yoimis ini.

## 2

### *Niospa Yõshi Shara ato õiti mẽra naneni*

<sup>1</sup> Askata judeofãfe ãto fista Pentecostés ikaino a Jesús Ifofafo pexe fisti mẽra ichanãnifo. <sup>2</sup> Anoxõ nikafo nai mẽranoax oa nẽfefã oi itikikerani pexe mẽraxõ nikafo. <sup>3</sup> Nãskata õiafo oa chii keskara fotopakekafãni. Oa nõko ana keskarafiax oa chii rekẽfo keskara maratamefafãinafo ini. <sup>4</sup> Askaifono Niospa Yõshi Shara ato mẽra nanetani. Askaino anã a meka fistichi tsoa mekanima. Meka fetsafãfe fisti rasi mekanifo Niospa Yõshi Sharapa ato meka fetsafamano.

<sup>5</sup> Nãskaifono judeofãferi Nios Ifofapaikani Jerusalén ano ipaonifo, chai inoax fekanax. Nã Jerusalén ano inifo mai fetsa fetsatapafo anoax fekanax. <sup>6</sup> Anoxõ nikafo oa nẽfefã oai keskara nikanifo. Askaito nikaferakani a Jesús Ifofafo ichanãfo ano ikitoshinifo. Tãpipaikani afaa afeskaimãkai ikanax. Nãskata nikafo a chai inoax feafãfe ãto mekapa mekaifãfe nikanifo, fisti rasi ãto mekapa mekaifono. “¿Afeskaxõ nõko meka tãpiafomẽ? Nikakapo,” ato fakĩ fetsanifo. Askakanax ratei fetsenifo. <sup>7-8</sup> Rateyanã yoinãnifo. Iskanifo: “Na Galilea anoafãfe nõko meka nikayamafikatsaxakakĩ nõko meka tãpiafo nõ nikai. ¿Afeskaxõ tãpiafomẽ mai fetsanoax nõ ofiafiano?” <sup>9</sup> Akka nõ Partia anoax oni. Fetsafori Media anoax fenifo. Fetsafori Elam anoax fenifo. Fetsafori Mesopotamia anoax fenifo. Fetsafori Judea anoax fenifo. Fetsafori Capadocia anoax fenifo. Fetsafori Ponto anoax fenifo. Fetsafori Asia anoax fenifo. <sup>10</sup> Askatari fetsafori Frigia anoax fenifo. Fetsafori Panfilia anoax fenifo. Fetsafori Egipto anoax fenifo. Fetsafori nã Africa fe, Cirene chaima nikakanãfo anoax fenifo. Akka fetsafori judeofo Roma anoax fenifo; <sup>11</sup> nãfo judeokõifo ini. Akka a Roma anoax feafori judeokõifoma inifo. Nãskafikaxõ

mã Nios Ifofakani judeofo keskara inifo. Askatari fetsafori Creta anoaxri fenifo. Askatari fetsafori Arabia anoaxri fenifo. Nõfi mai fetsa fetsatapafo anoax nõ onikĩ,” ikanax yoinãnifo. “Nãskax nõ ichanãiyoi oa chai inoax, akka nõko mekapa mekaifãfe nõ nikai. Nãskaito nikai nõ ratei,” ikanax yoinãnifo. “Na Galilea anoafõ nõko mekakõichi xafakĩakõi yoikani iskakani: ‘Niospa afama mĩshti tãpikõia,’ ixõ noko yoikani nõko mekapa. <sup>12</sup> Afeskaxõ na yorafãfe nõko meka nikayamafikatsaxakakĩ noko yoiaifãfe nõ ato nikasharakõi,” ikanax rateyanã yoinãnifo: “¿Afeskai iskafofõ?” ikanax.

<sup>13</sup> Askaifãfe õikakĩ a yora fetsafãfe ato iskafanifo: “¿Afeskai na yorafo pãekanax nõko mekapa mekakanimẽ?” ixõ yorafãfe ato kaxemetsama fanifo ato õsakakĩ.

### *Pedro Niospa meka ato yoini*

<sup>14</sup> Askaifono Pedro niinãkafã Jesúsxõ tãpimisfo oncefo feta fãsikõi mekainãkafã ato yoini: “Èfe kaifo judeofofãfe na Jerusalén ano ikafo feta, ea nikasharakãfe. <sup>15</sup> ¿Afeskakĩ pãekanax nõko mekapa mekakanira, mã noko faimẽ? Nafõ pãekanima. Penamakai tsoa pãeima mã rama xini keyaino. <sup>16</sup> Nã mã nikai anori Niospa meka yoimisto Joel kirika keneni Niospa Yõshi Sharapa shinãmanaino. Nã iskanõpokoai yoikĩ kirika keneni iskafakĩ:

<sup>17</sup> A ea Ifofaifo nã maniafo tii anoa èfe Yõshi Shara ãto õiti mẽra ã nanexii. Nãfo askayoi mã chaima nõko mai keyoaino. Afia penatari mãto fenafãfe èfe meka yoixikani. Naetapafãfe õiafo oa namakẽ õia keskara õixikani. Anifo tiitori eõnoa namaxikani. <sup>18</sup> Askata a ea yonoxomisfori feronãfakfoya kãrofoya èfe Yõshi Shara ã ato mẽra nanei fatora penata èfe Yõshi Sharaõxõ eõnoa ato yoinõfo. <sup>19</sup> Afama mĩshti tsõa õimisma afo ã ato ispaxii nai arixõ, nãmãxori ã ato afama mĩshti ispaxii. Imi yafi chii ãfe kõimãfãri õixikani ã ato õimanaino. <sup>20</sup> Askatari xinĩ anã chaxaxima, fakishkõi ixii. Oxeri oa imi keskarakõi õshikõi ixii. Askata nãfo askai fetseyoi mã chaima mãto Ifo oaino. Askata mã mãto Ifo nokokõiaino keyokõichi xafakĩa õixikani. <sup>21</sup> Mã askai fetseaino akka nõko Ifo yoikĩ fatorafãfe iskafãifãfe: ‘Ifo Cristo, ea shinãfe, ã mefe ipaxanõ,’ faifãfe ato ifixii, ixõ Joel kirika keneni Niospa anori yoiaino,” ixõ Pedro ato yoini.

<sup>22</sup> Askatari Pedro anã ato yoini iskafakĩ: “Israelifãfe,\* ea nikakãfe. Mã mã tãpia Jesús Nazarete anoa Niospa nai mẽraxõ nãmã nĩchini, nãmãxõ mato afama mĩshti õimanõ afara sharafo fakĩ. Mato askafaino mã tãpinõ Niospa Jesús nĩchinikẽ. <sup>23</sup> Nãskafikẽ mãfi Jesús achixõ yora chakafo inãyameaki achixõ

\* 2:22 Israelifo ãto ane fetsa judeofo ipaoni.

cruzki mastanõfo. Akka reteyoafomano Niospa mã tâpixõ Jesús nãmã nĩchini: ‘Èfe Fãke mato nãxoxii,’ ixõ Niospa yoini mã tâpixõ. Nãskakõikĩ mãtoõxõ yora chakafãfe reteyameafo Niospa yoini keskafakĩ. <sup>24</sup> Mã retefitafono Niospa anã Jesús otofani. Anãkai omiskõinakama. Anãkai nanakama. Anãkai natiroma. <sup>25</sup> Askatari a xanĩfo David afianori yoikĩ kirika mēra keneni Cristoõnoa ãfe meka iskafakĩ:

Mē tâpia ãfe Ifo Nios efe itiani. Efe ixõ efeta aki kiki. Nãskaxõ ea kexei tsõa ea fekaxtefanõma. <sup>26</sup> Nãskakē ãfe õiti mēra ã fãsi inimakõi Niospa ea kexesharaino. Nãskakē ã yoikĩ: ‘Nios fãsi sharakõii,’ ã fafafafãini. Ë Nios chanĩmara fakõini afe ipaxakĩ ãfe yora ea fena faxõano. <sup>27</sup> Ea potayamaino ãfe fero mēsho omiskõipakenakama. Ëfe yora mai mēra nēteima. Epa Niosi, mĩ ea noi. Ëfi mĩ fakekõikĩ, ãfe yora mĩ pisi famaima. <sup>28</sup> Ë nafiakē mĩ ea nimapakenaka. Ë mia ari kai, mefe ikax ã inimakõixii, ixõ David yoini Cristoõnoa yoikĩ.

<sup>29</sup> “Efe yora mĩshtichi, ea nikakãfe. Nõko xini David ãa yoikĩ kenenima. Jesúsnoa yoikĩ keneni. Afetĩama mã David nani. Mã nõ tâpia a maia ano. <sup>30</sup> A mã askanõpokoai yoikĩ keneni. Niospa David yoini iskafakĩ: ‘È mia yoi na chipo kãiyai mĩ fena ãfe Fakekõi ixii. Mia keskara xanĩfokõiri ixii. Ëfi Nioskĩ. Ë mato pãraima,’ ixõ Niospa yoini. Niospa yoiaito nikakĩ David chanĩmara fani, tâpini Niospa pãrayamaino. <sup>31</sup> Nãskakē David tâpixõ a inõpokoai Cristoõnoa yoini iskafakĩ:

Nafiax otoxii. Nãskax ãfe fero mēsho omiskõipakenakama, ãfe yorari pisinakama, ixõ David keneni. <sup>32</sup> Nã David yoini keskakõifakĩ Epa Niospa mã Jesús otoakē nõ õita keyokõichi. <sup>33</sup> Mã otoax mã nai mēra kaa Apa Nios ano. Iskaratĩa xanĩfo finakõia Apa fe. Nãskaxõ Epa Niospa yoikĩ taefani iskafakĩ: ‘Èfe Yõshi Shara ã atoki nĩchixikai nãmã,’ ixõ Niospa yoini. Nãskakē Niospa ãfe Yõshi Shara nai mēraxõ nãmã nĩchia. Oa nēfefã keskara Niospa ãfe Yõshi Shara nokoki nĩchia. Nãskakē nõ mãto meka nikayamafikatsaxakĩ nõ meka fetsafãfe nõ mekai fetsea. Mã chai inoax oxõ mã noko nika, nõ mãto mekapa mekai fetseaito. <sup>34-35</sup> Nãskakē mãri tâpikãfe, nãnori David kirika kenenikĩ Jesúsnoa yoikĩ. Æa yoinima. David otoax nai mēra kanima. Nãskaxõ kirika kenepakekĩ yoini iskafakĩ nõko Ifo Cristoõnoa:

Nono efe ife, efe xanĩfokõi ixiki. A mia noikaspaifo ã ato mĩ nãmã nĩchinõ, ixõ yoini Niospa. Nãnori tâpixõ David yoikĩ kirika keneni,” ixõ Pedro yoini.

<sup>36</sup> Askata Pedro anã ato yoini: “Èri mato anori yoikai,

israelifāfe, ē mato pāraima. Mā Jesús reteskī mā mastayamea. Akka Niospa yoini Jesucristo nōko Ifokōi inō,” ixō Pedro ato yoini.

<sup>37</sup> Ato askafaito nikakakī shinānifo: “¿Afeskakī Jesús askafayameafomē?” ixō shinākī ato ōitinī shināketsanifo, Jesús shinākakī. Askata Pedro yafi a Jesúsnoa yoimimis fetsafori yōkanifo: “No fe yorafāfe, nō mato nikai. ¿Nō anā afeskatirōmē?” ixō ato yōkanifo.

<sup>38</sup> Askafaiifāfe nikakī Pedro ato yoini: “Iskaratīa mātō chaka soakāfe anā anori shinākakīma. Jesús aneōxō mato maotisafanōfo, faka mēra ikimapakekī. Mato maotisafaifono yorafāfe mato ōinōfo mā Jesucristo Ifofaito. Nāskaxō āfe Yōshi Shara mato mēra nīchi kikī mato fe rafekōinō. <sup>39</sup> Jesús yoini iskafakī: ‘Fatora fetsa nōko Ifo Niospa ifixii āfe Yōshi Shara ato mēra nanexii. Mātō fakefori, mātō fenafori a chai ikafo tiiri nā fake refonoafori Niospa āfe Yōshi Shara ato mēra nanexii Niospa ato ifiano,’ ixō noko Jesús yoini.”

<sup>40</sup> Ato askafakī yoita anā Pedro ato yoini ato iskafakī yoivanā: “Mātō chaka soakāfe. Na yora nono nāmā ikafo ichapa chakakōifo chaka shināmisfo. Askakakīma māa kex-emesharakōikāfe anā askayamaxikakī. Mā askaito Jesús mato chaka soaxonō mato ifixiki mā afe ipaxanō,” ixō Pedro ato yoini.

<sup>41</sup> Ato askafaito nikakakī yora rasichi chanīmara faifāfe, ato maotisafapanifo, ato faka mēra ikimapakekakī. A ato maotisafaifo tres mil yorafo ini. Nāskax ato fe rafenifo a Jesús Ifofakakī taefanifo fe. <sup>42</sup> Nāskakē keyokōichi ato nikakōinifo a Jesúsnoa yoimisfāfe ato yoiaifono. Nāskax Jesús Ifofaafo fe rafesharakōipaonifo, a rama Jesús chanīmara faifo. Askaxō pāa torekaxō ato pikīpaonifo Jesús shinā kakī, a ato nāxoyamea. Nāskakē Nios kīfitai fapaonifo pena tii ichanākaxō.

### *Jesús Ifofamisfo isharakōipaonifo*

<sup>43</sup> Nāskaxō anoxō a Jesúsnoa yoimisfāfe, nā docefāfe, afama mīshtifo apaonifo, yonaifono ato sharafata, afara fetsafori apaonifo, nāskaxō afama mīshti faifāfe ato tāpinōfo. Nāskafaiifāfe ōikani keyokōi anoax yorafo ratenifo. <sup>44</sup> Jesús chanīmara fakani pena tii ichanānifo. Anoax āto afama mīshti paxkanāi fetsexikakī. <sup>45</sup> Āto afarafo ato minikaxō kori fixō, a afaamaisfo kori inānifo tsoa afayakēma. <sup>46</sup> Nāskata pena tii Nios kīfiti pexefā mēranoax ichanākaxō Nios kīfinifo. Nāskaxō āto pexe mēraxō a Jesús ato nāxoyamea shinākakī pāa torepakexō pinifo inimakōiyanā. <sup>47</sup> “Aicho, Nios fāsi sharaki,” ikanax inimai finakōinifo. Askaifāfe ōikani a Jerusalén ano ikafāfe ato yoinifo iskafakakī: “Na Jesús Ifofaafo isharakōiafo,” ixō ato yoinifo. Nāskakē pena tii a yora fetsafāferi Jesús



Ifofaifono Niospa ato chaka soaxoni. Nāskax nā Jesús rama Ifofaifo fe ano fistiax ichanānifo, ato fe rafekanax.

### 3

#### *Pedro feta Juan yora finimisma sharafanifo*

<sup>1</sup> Askata a Nios kīfiti pexefā mēra Pedro fe Juan yātapake fonifo. Yātapakes anoxō yorafāfe Nios kīfifokani fopaonifo. <sup>2</sup> Nā Nios kīfiti pexefā kāiti ano feronāfake finimisma nāskarapa kāini tsaoa ini. Nā mēxotaima iyopaonifo pe xe fe poti ano, nā pe xe fe poti nī afe ane “Sharashta” fanifo. Anoxō ikiaifāfe ato kori yōkanō iyopaonifo. <sup>3</sup> Pedro fe Juan ikifainaifāfe ōikī a finimismato ato kori yōkani iskafakī: “Ea kori inākāfe,” ato faito, <sup>4</sup> Pedro feta Juan feesnifo. Pedro yoini iskafakī: “Noko feisfe,” fani.

<sup>5</sup> Askafaito, “Ea kori inākanira,” ixō ato feisni. <sup>6</sup> Ato feisaito Pedro yoini: “Ē mia kori ināima. Ē koriyama. Ē mia kori inākima ē mia sharafatiro. Nikafe, ē mia yoinō. Jesucristo nā Nazarete ano ipaoni āfe sharaōnoax fininākafāfe,” fani.

<sup>7</sup> Askata Pedro mētsoinīfofāni aō pōya mēste aōxori. Nāskax a finimisma fininākafani. Pedro mētsoinīfofānaino niinākafāni. Askaxō mea mā nisharakōia meeni a finimismato. Āfe taefoya āfe opoxko mā shara meeni. <sup>8</sup> Nāskax inimakōini. Askata mono mono ini. Mono mono ita Pedro fe Juan ikifainaifono, akairi ato fe ikikaini ichotiri ichotiri ikani inimayanā. Nios kīfiti pexefā mēra ato fe ikikaini. Askata mekani: “Aicho, Niospa mā ea sharafaki,” ixō Nios sharafani. <sup>9</sup> Askaito yorafāfe a ichanāfo anoxō ōiketsanifo kafāsaito Nios yoisharayanā. <sup>10</sup> Askata, “Kee, ōikapo. Mā finia, na pe xe kāiti āfe ane ‘Sharashta’ ano tsaotiani, a ato kori yōkamis. ¿Afeskax finiamē?” ikanax yoinānifo, rateyanā.

*Nios kīfiti pexefā kene fetsa āfe ane Salomón anoxō Pedro ato yoini*

<sup>11</sup> Pedro fe Juan kaino ato fe kani nā finimisma mā sharax. Nā Nios kīfiti pexefā kene fetsa mēra ikifainifo. A pe xe kene āfe ane “Salomón” ini. Askaito nikakani yorafāfe ōifokani ichonifo ano ikiafono. Nāno nokotoshikata ōiafo a finimisma Pedro fe Juan niano ato fe nia ini ato mētsoax. <sup>12</sup> Askaiifāfe ōikī Pedro ato yoini iskafakī: “Israelifāfe, ea nikakāfe. ¿Afeskax nā finimisma sharamē ixō mā shināimē? ¿Afeskakī mā noko ōimē? Nōkai sharafama. Akka Jesúsxō nō sharafaa,” Pedro ato fani. <sup>13</sup> Askata anā Pedro ato yoini: “Nōko xinifo Abraham, Jacobo, Isaaca atiito Nios Ifofapaonifo. Afia fistichi a yonoxomis Jesús finakōia imani. Nāskakē afama mīshti famis. Nāskafikēkai mā Jesús Ifofapaiyameama. Nāskakē xanīfo Pilato Jesús shinākī, ‘Nō reteimakai’ fafiatio, ‘Maa, nō sharafaima,

ato retemafe,' ixõ Pilato mã yoiyamea, Jesús retenõfo. <sup>14</sup> Jesús õiti sharayaxõ afaa pishta chakafamisma, akka mã noikas-payamea. Nãskakẽ mã Pilato yoikĩ: 'A chaka kãimayamafe,' mã fayamea. Pilato Jesús kãimapaifiaino a yora chakakõi Barrabás kãimakaspakĩ. Askafaito mã iskafayamea: 'Barrabás kãimafe, Jesúsroko ato retemafe,' mã fayamea. <sup>15</sup> Akka nã Jesús taefakĩ yora onifani, iskaratĩari noko ìkinã, aõnoax nõ nia. Nãskafekẽ mã reteyamea. Mã mã retefiano Apa Niospa afianã otofayamea. Nãskaito Juan feta nõ õiyamea. Mã anã otoyamea. Iskaratĩa nia. <sup>16</sup> Nãskakẽ nã finimisma Jesús chanĩmara faax mã fininãkafãna. Jesúsnoax mã shara. Nãskakẽ keyokõichi mã õi.

<sup>17</sup> "Nãskakẽ ã mato yoi, efe yora mĩshtichi. Akka ãfi mẽ mato tãpimiskĩ. Akka mã tãpixoma mã Jesús reteyamea, 'Niospa Fakemara,' ixõ. Askata mãto xanĩfofofãferi tãpiyameafoma. Jesús nõko Ifokõi fiano tãpixoma reteyameafo. <sup>18</sup> Nãskakẽ afetĩama Niospa yoini a inõpokoai mã tãpixõ: 'Èfe Fake Cristo retexikani,' ixõ Niospa yoini. Nãnori yorafãfe kirika kenenifo, Niospa ato shinãmanaino. Nãskakẽ mã reteyameafo a Niosnoa ato yoimisfãfe nãnorikõiri yoinifo. Mã askakõia. Akka Niospa mã tãpiano, mã askakõifayamea. <sup>19</sup> Nãskakẽ mãto chaka xatekãfe. Mã afara chakafamiskĩ anã anori shinãyamakãfe. Nãskakẽ Epa Nios fisti shinãkãfe, mãto chaka mato soaxonõ. <sup>20</sup> Nãskaxõ nõko Ifãfe mãto õiti mato inimamasharakõinõ. Nãskakẽ mato ano Cristo Jesús Niospa anã nĩchixii, mãto Ifokõi mato nĩchixoxii. Æfe Fake Cristo Jesús katonu mato ifimis inõ. <sup>21</sup> Iskaratĩa Apa fe nai mẽra iyoa, oyoxoma na nãmã anoafo keyokõi Niospa fena shara fayoi. Askata chipo nãmã Jesús anã fotoxii. Nãnori a Niosnoa yoimisfãfe yoiyopaonifo a inõpokoai yoi kakĩ, Niospa ato shinãmanaino. <sup>22</sup> Moisésri nãnori yoikĩ kirika keneni iskafakĩ afia Nios fistiche shinãmanaino: 'Nõko Ifo Niospa mato mẽra fisti nĩchixii mato Nios yoixomis inõ, ea ani keskafakĩ. Nãato mato yoiai anori nikasharakõikãfe. <sup>23</sup> Akka a nikakaspaifo Niospa afe yorafo mẽra ato ifixiima. Ato makinoa ato potaxii anã ato fe inõfoma.' <sup>24</sup> Na iskaratĩa nõ õiai yoikĩ Samuel taefakĩ yoini a inõpokoai yoikĩ. Nãnori fisti a Niosnoa yoimis fetsafãferi keyokõichi yoinifo Niospa ato shinãmanaino. <sup>25</sup> Nãskax mã mãto xinifãfe ãto fenakõifokĩ mã. Nãskakẽ Niospa mãto xinifo iskafakĩ yoini: 'Mãto fenafoõxõ ã ato sharafai keyokõi nã maniafo tii,' ixõ Niospa Abraham yoini. <sup>26</sup> Nãskakẽ Niospa ãfe Fake Jesús nokoki nĩchini nai mẽraxõ yonoxomis inõ. Taefakĩ nokoki nĩchini nõko chaka nõ xatenõ anã chaka shinãyamaxiki a Ifo sharafaxõ. Nãskax nõ isharakõinõ," ixõ Pedro ato yoini.

## 4

*Pedro yafi Juan xanĩfofo ano iyonifo*

<sup>1-2</sup> Pedro feta Juan Jesúsnoa yorafã rasi yoiiaifono õikani atoki fenifo, a ato Nios kĩfixomisfo ita, a Nios kĩfiti pexefã kexemisfo xanĩfofo ita, saduceofo ita nãfo atoki fekanax õitifishkinifo, Pedro feta Juan mã Jesús nafiãx anã otoita ato faifono. <sup>3</sup> Nãskakata yãtapakẽ ato achixõ karaxa mẽra ato iki-manifo. Fakishchãĩ ishini fo a mẽra. <sup>4</sup> Ato ikimayofafomano a yora rasi ato yoiiaifono nikakakĩ ato chanĩmara fakõinifo. Afia penata cinco mil yora rasichi Jesús Ifofanifo.

<sup>5</sup> Pedro fe Juan karaxa mẽra ikafono, Jerusalén anoax jude-ofãfe xanĩfofo fe a xanĩfo fetsafori, askatari a Moisés yoikĩ kirika keneni keskara ato tãpimamisfori pena fetsa fakishpari ichanãnifo. <sup>6</sup> Nãnori a ato Nios kĩfixomis xanĩfo finakõia ini ãfe ane Anás. Askatari a xanĩfo fetsari ãfe ane Caifás ini, Juanri ini, Alejandrori ini, a ato Nios yoixomisfãfe ãto kaifori ato fe inifo, ano fisti ichanãkani. <sup>7</sup> Nãskaxõ Pedro yafi Juan kenanifo ato yõkaxikakĩ. Tsõaõxõ a finimisma sharafafomãki tãpipai kakĩ Pedro yafi Juan kenanifo karaxa mẽranoa. Mã feafono ato nakirafe nĩchikaxõ ato yõkanifo iskafakakĩ: “¿Tsõaõxõ na finimisma mã sharafaitamẽ?” ato fanifo.

<sup>8</sup> Ato askafaifono Pedro ato yoini iskafakĩ Niospa Yõshi Sharapa shinãmanaino: “Efe xanĩfofofãfe, efe anifofõfãfe, ea nikakapo ã mato yoinõ. <sup>9</sup> ¿Tsõaõxõ nõ yora sharafatiromẽ mã tãpipaimẽ? Na mã tãpipaiyai finimisma tsõaõnoax sharamãkĩ mã noko yõkaito ã mato yoinõ. Ea nikakãfe. <sup>10</sup> Tãpixikakĩ israelifãferi tãpinõfo mẽstekõĩ ã mato yoisharanõ. Ea nikakãfe. Na feronãfake keyokõichi õiaifo Jesús Nazarete anoato mã sharafaita. Nã mã ifi cruz ikaki mastaitato mã Apa otoaitano nãato mã sharafaa,” Pedro ato fani. <sup>11</sup> “Aõnoa yoiyokĩ yõra kirika keneni iskafakĩ Niospa shinãmanaino:

Tokiri pexe famisfãfe, ‘Na tokiri chakara,’ ixõ potanifo sharafiano. Nãskakaxõ chipo tãpinifo nã tokiri sharafinãkõifiano.

Nãskarifikã nã Jesucristo tokiri keskarafiano mã potamis sharafinãkõifiano. Mã mã potafiano Epa Niospa ifini aõnoax mã afe yorafo inõ. <sup>12</sup> Anã fato yora fetsakai nãmã ikama noko shara fatiro. Jesús fistichi nõko õiti noko shara faxotiro nõ afe nĩpaxanõ,” ixõ Pedro ato yoini.

<sup>13</sup> Ato askafaito nikakani a xanĩfofo ãa ranã yoinãnifo: “¿Afeskakĩ iskara yoimẽ kirika kenekĩ tãpisharayamafixõ? Rannotamakõĩ iskara noko yoi. ‘Na rafe Jesús fe ipaonifo,’ ” ikanax yoinãnifo. <sup>14</sup> Nãskaxõ õiaifono nã finimisma mã finiax ato fefotai kafãsaito õinifo mã sharax. Nãskakẽ na rafeta afaa chakafafoma ixõ atoõnoa afaa yoitiro ma inifo nã finimisma

mã shara òikakĩ. <sup>15</sup> Nãskakaxõ Pedro yafi Juan nĩchinifo ato makinoax fotanõfo. Pedro fe Juan mã kãifainaifono, nã xanĩfofo ãa ranã yoinãnifo iskakani: <sup>16</sup> “¿Na rafe nõ afeska faimẽ? Akka keyokõ Jerusalén anoafãfe mã tãpiafo, na feronãfake rafeta finimisma sharafaito õitaxakakĩ. Fato feronãfake fẽtsakai iskara finimisma sharafatiroma. Iskarakai nõ fomãtiroma. <sup>17</sup> Akka iskaratĩa nõ ato yoinõ anã Jesúsnõax mekanõfoma. Nõ ato yoinõ iskafakĩ: ‘Mã anã Jesúsnõa yoiãito nõ nikakĩ nõ mato omiskõimani,’ ” ikanax ãa ranã yoinãnifo. <sup>18</sup> Askaxõ ato kenanifo pexe emãitinoã. Ato kenakaxõ ato yoinifo: “Anã mã Jesúsnõa afaa yoikĩ.”

<sup>19</sup> Ato askafaifãfe nikakĩ Pedro feta Juan ato kemani iskafakakĩ: “¿Akka nõ tsoã nikaimẽ? Mato nõ nikasharairaka, askayamakĩ Nios nõ nikairaka. Mã shinãkãfe fato sharamãkĩ. <sup>20</sup> Nã nõ Jesús õifafaina keskafakĩ, nã noko Jesús yoiãito nõ nikafafaina keskafakĩ nõ yoipaketiro enetama,” ixõ Pedro feta Juan ato yoini.

<sup>21</sup> Ato askafaifono ato yoinifo iskafakakĩ: “Mã anã Jesúsnõa yoiãito nikaxõ nõ mato omiskõimani,” ato fanifo xanĩfo tiito. Ato askafakaxõ ato nĩchinifo yora fetsafãfemãi ato õiaifono. A xanĩfo tiito ato koshapaifikakĩ ato koshanifoma yorafoki mesekakĩ. Akka a yorafãfe, “Epa Nios sharakõira,” fanifo Pedro feta Juanmãi Niosxõ ato sharafaino. <sup>22</sup> A finimisma nãskara kãini ini mã cuarenta xinia akano Pedro feta Juan sharafanifo Niospa Yõshi Sharaõxõ.

### *Jesús Ifofaafãfe Nios kĩfinifo mitsisipakõi ixikakĩ*

<sup>23</sup> Nãskata a xanĩfofõfãfe ato nĩchiafono Pedro fe Juan fonifo mã ichanãxõ a ato fe rafeafo ato yoixikakĩ, a ato Nios kĩfixomis xanĩfofo feta anifofõfãfe ato yoiãfo keskara. <sup>24</sup> Ato askafakĩ yoiãifono nikakaxõ a Jesús Ifofamisfãfe Nios kĩfinifo iskafakakĩ: “Epa Niosi, mĩ nõko Ifo finakõiãiki. Mĩ keyokõi onifani. Nai yafi mai mĩ onifani. Fãkafãri mĩ onifani. Nai mẽranoari mĩ onifani. Nãmãnoãfori mĩ onifani, fãkafã mẽranoãfori mĩ onifani, afama mĩshtifo. <sup>25-26</sup> Akka nã mia yonoxomis nõko xini David mĩ Yõshi Sharapa mĩ shinãmani mĩõxõ ato yoini iskafakĩ:

¿Afeskai na yorafo Nioski õitifishkikanimẽ? Keyokõichi yorafãfe ãa shinãkani Nios potapaikakĩ. Askafikaxõ potatirofoma. ãto xanĩfo tiitori ano fisti ichanãkaxõ nõko Ifo Nios noikaspaxikani potapaikakĩ. Askatari a Niospa noko nĩchioxiai Cristori noikaspaxikani. Aa askara shinãkakĩ, ixõ David kirika keneni mĩõxõ yoikõikĩ.

<sup>27</sup> “Iskaratĩa nãskakõi Herodes fe Poncio Pilato yorafetsafo fe ichanãitafo, israelifori ato fe ikitãfo mĩ Fake Cristo Shara-finakõia ifixõ mĩ nĩchifinino chakafakani. <sup>28</sup> Nã mĩ yoyoni

keskafakī mā nāskakōi faitafo a inōpokoai mī yoini keskafakī.  
<sup>29</sup> Epa Niosi, noko nikāfe mīoxō noko noimati fakani kiki. Nāskakē noko mesemayamafe nō mia yonoxosharamiskī. Nāskakē atoki mesetama mī meka shara nō ato ranotamakōi yoinō mitsisipakōi noko imafe. <sup>30</sup> Epa Niosi, mī sharaōxō a isinī ikaifo ato sharafafe, afama mīshtifo ato ōimayanā a mia yonoxomis Jesucristo aneōxō,” ixō Epa Nios kīfinifo.

<sup>31</sup> Mā askafakakī kīfikī xateaifono nā ichanāfo anoax mai naya naya ini. Nāskaino Niospa Yōshi Shara āto mēra naneaino ranotamakōi Niospa meka shara yoinifo.

### *Nā afarafo keyokōi atonā ini*

<sup>32</sup> Jesús Ifofaafāfe nānori fistis shinānifo āto ōitinī. Nāskakanax na afarafo nōkonā fistis ixō tsōa shinānima. Askakimaroko keyokōi atonā ini. <sup>33</sup> A Jesúsnoa yoimisfāfe, “Nōko Ifo Jesús noko nāxofiax mā anā otoni,” ixō ato yoinifo Niospa Yōshi Sharapa ato shināmanaino. Nāskakē keyokōi nā chanīmara faafo Epa Niospa ato shināmasharaino inimakōinifo. <sup>34-35</sup> A Jesús Ifofaafāfe atirito āto tarefoya āto pexefo ato minikaxō kori fikaxō nā Jesúsnoa yoimisfo ato inānifo afāferi a afaamaisfo ato inānōfo tsōa afaa yopayamanō. <sup>36</sup> Akka José Levī āfe fena ini. Chipre anoax fakea ini. Nāskakē a Jesúsnoa yoimisfāfe āa anenifo iskafakakī: “Yora Inimamamis” fanifo. Akka āfe ane kaiyakōi Bernabé ini. <sup>37</sup> Nā feronāfake tareya ini. Nāato āfe tare ato minixō kori fixō a Jesúsnoa ato yoimisfo ināni a afaamaisfo ato inānōfo.

## 5

### *Āfe āfi feta Ananías ato feparapaini*

<sup>1</sup> Akka feronāfake fetsa āfe ane Ananías ini. Āfe āfinī ane Safira ini. Nāato āfe tare ato minini kori fixii. <sup>2</sup> Nā feronāfake āfe āfi feta shinākaxō ranāri kori finifo. Ranāri a Jesúsnoa ato yoimisfo inānifo keyokōi mā noko ināfo ixō shinānōfo.

<sup>3</sup> Nāskaito Pedro yoini iskafakī: “Ananías, ¿afeskai mī mēra Satanás naneamē mī Niospa Yōshi Shara feparapainō ranāri mā mī kori fifiaxō mī tareōxō? <sup>4</sup> Akka, ¿taeyoi mī tare iyoa-mamē? Akka mā mī ato minia, akka, ¿na kori mīnāmamē? Nāskakē nā mī apaiyai keskafatiro. Akka atiri mekepaikī mī noko yoia shara ikerana. Askatamaroko mī noko fomāpai. Mīkai noko pāraima, akka Nios mī pārapai,” ixō Pedro yoini.

<sup>5</sup> Askafaiāfe nikai Ananías koshikōi nani. Askaito nikakani yorafā rasi ratei fetsenifo. <sup>6</sup> Nāskakē naetapafo fēkaxō Ananías rakonifo mā nakē. Nāskafakāta maifaifokakī iyonifo.

<sup>7</sup> Mā askai samarakano āfe āfiri ikitoshini, afaa tāpiamax. <sup>8</sup> Nokotoshiaito Pedro yōkani iskafakī: “Ea yoipo mā tare minixō afe tii mā kori fiamāki,” ixō Pedro yōkani. Kemani a kēroma iskafakī: “Nā noko inā tii nō mato inā,” faito,

<sup>9</sup> Pedro yoikĩ iscafani: “¿Afeskakĩ mĩ fene feta mã shinãxõ nõko Ifãfe ãfe Yõshi Shara mã feparapaimẽ? Mã mĩ fene nakẽ maifatakani a pexe kachiori fekani. Õipo, iskaratĩari mia iyoi fokani,” ixõ Pedro yoini.

<sup>10</sup> Askafaito nikai Safira koshikõi nãtani. Pedro nia nãmã pakeni. Naetapa tiito mã fene maifatakani ikiferakakĩ õiafo mã ãfe ãfiri naa fichitoshinifo. Ari ififainifo maifafokakĩ, fene ketaxamei. <sup>11</sup> Askaito nikakani a Jesús Ifofamisfo ratenifo. Yora fetsafori askanifo nikakani akairi ratei fetsenifo.

### *Iskarafokai tsõa õiyomisma inifo*

<sup>12</sup> Tsõa atiroma kescafakĩ nã Jesúsnoa yoimisfoõxõ afama mĩshtifo fanifo yorafãfe õinõfo. Nãskakanax keyokõi ichanãnifo pexe kene ãfe ane Salomón anoax. <sup>13</sup> Atiri a Nios Ifofaafoma a Nios Ifofaafo fe ato fe rafenifoma. Akka ato askafafiaifono yorafãfe, “Na Nios Ifofaafo isharakõiafo,” ato fanifo. <sup>14</sup> Ato askaifaifono yorafãfe nõko Ifo nikakõinifo, feronãfakefo feta kërõfãfe. Nãskax ichapakõi inifo. <sup>15</sup> Nãskakata a isinĩ ikaifo xafakĩa ato kãimanifo ãto rakatiki ato rataxõ fãi kesemẽ, “Pedro ãfe yõra ato fakish faafõfãnaino sharatirofora,” ikaxõ. <sup>16</sup> Nãskakata a chaima ikafori yora kaya Jerusalén ano fonifo. A isinĩ ikaifo ato efeyanã a niafaka chakata ato mẽra nanexõ ato fekaxtefaifori ato efenifo. Nãfo a Jesúsnoa ato yoimisfãfe ato sharafapanifo.

### *A Jesúsnoa ato yoimisfo ato omiskõimakõinifo*

<sup>17</sup> A Nios ato kĩfixomis xanĩfo fe saduceofo afe ikanax õitifishkinifo, afeskakĩ noko nikakanimamẽ ikanax. <sup>18</sup> Nãskakaxõ a Jesúsnoa ato yoimisfo ato achikaxõ karaxa mẽra ato ikimanifo. <sup>19</sup> Akka Niospa ãfe ãjiri fakishi oxõ karaxa ãfe fepoti fepexõ ato kãimani iscafakĩ ato yoiyanã: <sup>20</sup> “Nonoax kãifaikaxõ a Nios kĩfiti pexefã mëraxõ ato yoitakãfe afeskaxõ nõko Ifo Jesús ato ikitiromãkĩ,” ato fani. <sup>21</sup> Nã ãjirinĩ ato yoiaito nikafo keskakani penakaiama Nios kĩfiti pexefã mẽra ikifainifo, anoxõ ato yoixikakĩ.

Nãskaifono a ato Nios kĩfixomis xanĩfãfe, a afe ikafoya israeli xanĩfofo ato kenani, ano fistiax ichanãi fenõfo xanĩfo finakõia anoax, anoxõ a Jesúsnoa yoimisfo ato ifitanõfo ato fe ichanãi fenõfo. <sup>22</sup> Mã ato nĩchiafono a ato kexemisfo fokaxõ õiafo a karaxa mẽra tsoa inima. Nãskakẽ anã ato yoifekani fenifo. <sup>23</sup> Iscafakĩ ato yoinifo: “Kaxõ nõ õia karaxa fetaoxikõina nõ fichitoshia, sorarõfãfe kexekõiafono kãiti ano. Akka a mẽra ikikaixõ nõ õia ano tsoa ikama,” ato faifono, <sup>24</sup> nikakani a Nios kĩfiti pexefã kexemisfãfe a ato xanĩfofo fe, a ato Nios kĩfixomisfo xanĩfokõifo ãa ranã yoinãnifo: “¡Aira! ¿Afeskax tsekeafomẽ?” ikanax ratenifo.

<sup>25</sup> Askafono feronãfake fetsa atoki oxõ ato yoini iscafakĩ: “Nikakapo a mã ato karaxa mẽra ikimanita feronãfake rafeta,

a Nios kīfiti pexefā mēraxō mā ato yoikani,” ato faino, <sup>26</sup> a ato kexemisfāfe āto xanīfo āfe inafō fe kani ato ifikai. Akka mā fokaxō ato efenifo. Nāskaxō ato afeska fanifoma yorafoki mesekakī tokirinī noko tsakatirofora ikaxō.

<sup>27</sup> Mā fokaxō ato iyonifo a xanīfo finakōia ano. Nānoxō a ato Nios kīfixomis xanīfāfe ato yoini iskafakī: <sup>28</sup> “Mā nō mato yoita, ‘Anā ato Jesúsnoa yoiyamakāfe,’ nō mato feita, akka, ¿afeskakī Jesúsnoa mā ato yoirifaimē? Jerusalén anoafō mā ato yoiki mā mā ato tāpimakōia. Nāskaxō mā noko pārapai nafāfe Jesús reteitafora mā noko fapai, noko chakafapaikī.”

<sup>29</sup> Ato askafaifono Pedro a afe rafeafo feta ato kemani: “Akka nōfi Nios nikaikai. Yorafokai nō nikapaima. <sup>30</sup> Nōko xinifāfe āto Niospa Jesús otoaita, mā mā retefitano ifi cruz ikaki mastaxō. <sup>31</sup> Nāskaxō Niospa Jesús a keskara xanīfofinakōi imani yorafo ato ifixō ato ikikōipakexanō. Nāskakē israelifāfe keyokōichi Nios chanīmara fanōfo, a afara chakafamisfono āto chaka ato soaxonō. <sup>32</sup> Chanīma mā nō ōimis, askatari Niospa Yōshi Sharapa mā tāpia. Akka a nikaifo Niospa āfe Yōshi Shara ato mēra nanea,” Pedro ato fani.

<sup>33</sup> Ato askafaito nikakakī akiki ōitifishkiyanā ato retepainifo. <sup>34</sup> Akka nā xanīfofo fe fariseo āfe ane Gamaliel ato fe ini. Nāato a Moisés yoikī kirika keneni keskara ato tāpimamis ini. Yorafāfe aōnoa yoisharakōimisfo. Nāato niinākaifā ato yoini iskafakī: “Xafakīa ato kāimayokāfe,” ato fani. <sup>35</sup> Nāskaxō ato kāimaxō a xanīfo fetsafo yoini: “Efe yorafāfe israelifāfe, ea nikakapo ē mato yoinō. Māfi na feronāfake rafe retepaikāi, ¿afeskaito mā ato retepaime? Shināsharakāfe. Ato retepaikakīma,” ato fani. <sup>36</sup> Nāskata anā ato yoini: “Shinākapo, oa feronāfake Teudas xanīfo iyonī. Xanīfo finakōia ipaiyaito cuatro cientos yorafāfe chīfafainifo. Akka nā mā yora fetsafāfe retenifo. Mā reteafono āfe inafō paxkanāi fetsenifo. Nāskakanax ariax keyonifo. <sup>37</sup> Askatari chipo āto anefo kenekakī censo akaifono, Judas fetsa. Galilea ano ini. Xanīfo ipaikī ato yoini yorafāfe chīfafāinōfo. Askafafiaino nāri retenifo. Nāskakē āfe inafori paxkanāi fetsenifo. <sup>38</sup> Nāskakē ē mato yoi na feronāfake rafe ato enekāfe ato afeska fakakīma. Akka a Niospa shināi anori ato yoiyamakakī, āa ato yoikakī kaxpa ato yoitirofo. Nāskakanax keyotirofo. <sup>39</sup> Akka Nios ato fe ikano mā ato afeska fatiroma. Māroko kexemesharakāfe ato chakafayanā Niosri mā chakafatiroki,” ixō Gamaliel ato yoiaito nikanifo.

<sup>40</sup> Ato askafaito nikakakī, a Jesúsnoa yoimisfo ato kenakaxō ato koshakata, “Anā Jesúsxō mā afaa yoiki,” ato fakaxō ato nīchinifo. <sup>41</sup> Nāskakē a Niosnoa yoimisfo xanīfofo anoax tsekekani inimakōinifo, Niosnoaxmāi omiskōikanax Jesúsnoa meka shara ato yoikani. <sup>42</sup> Nāskakē pena tii nōko Ifo Cristo

Jesúsnoa meka shara ato yoinifo. A Nios kīfiti pexefā anoxō ato yoita pexefo anoxori ato yoifofāsafanifo.

## 6

*Jesúsxō tāpimisfāfe docefāfe feronāfake fetsafo siete ato ifinifo ato feta yononōfo*

<sup>1</sup> Nāskaifono a Jesús Ifofaifo ichapakōi inifo. Akka fetsafo a griego meka ikaifāfe, hebreofo ato mekafakakī taefanifo ato iskafakakī: “¿Afeskakī nōko kaifo a fenemaisfo a piaifo mā ato ināsharaimamē? Akka māto kaifo fisti mā ato ināi,” ikaxō ato mekafanifo. <sup>2</sup> Ato askafaifāfe nikakata a Jesúsxō yoimisfāfe nā docefāfe a Jesús Ifofamisfo ato ichanāfakaxō ato yoinifo iskafakakī: “Nō mato Niospa meka yoikī nō xate-tiroma a ma piāi mato paxkaxoxiki. Akka pena tii nō mato Niospa meka yoifafāini,” ato fanifo. <sup>3</sup> “Efe yora mīshtichi, feronāfakefo siete fenakāfe a mā piāi mato ināsharanōfo. Mā mā tāpiakī fatofomākī Niospa Yōshi Shara fe rafeafo. Nāfo nō ato yonomanō a mā piāi mato ināsharanōfo. <sup>4</sup> Akka nō pena tii Epa Nios kīfifafāinikai, āfe meka sharari yoīyanā,” ixō ato yoinifo.

<sup>5</sup> Ato askafaifono nikakani keyokōi inimanifo. Nāskakata Esteban ifinifo, nāato Nios chanīmara fakōina ini, āfe Yōshi Shara a mēra naneano. Feliperi ifinifo, Prócorori ifinifo, Nicanori ifinifo, Timónri ifinifo, Parmenasri ifinifo, Nicolásri ifinifo. Nā Nicolás Antioquía anoa ini. Judeofāfe Nios Ifofaifo keskafakī Nicolás Nios shināmīs ini. <sup>6</sup> Ato askafakāta a ato Jesúsnoa yoimisfo ano ato iyonifo. Anoxō ato Nios kīfixoyanā ato māmānifo.

<sup>7</sup> A Jesúsxō yoimisfāfe Niospa meka ato yoiaifono atoōxō yorafāfe chanīmara fanifo, Jerusalén anoxō. Askatari judeofāfe a ato Nios kīfixomisfāferi akairi Jesús Ifofanifo. “Jesús Niospa Fakekōira,” ixō chanīmara fanifo.

### *Esteban achinifo*

<sup>8</sup> Esteban Jesús chanīmara fakōina ini. Niospa āfe kerex shara a mēra naneano akiki inimakōini. Nāskakē aōxō afama mīshtifofakī ato ōimani. <sup>9</sup> Akka judeofo fetsafo nā ichanāti pexe mēranoax ichanāpaonifo. Nā ichanāti pexe anenifo: “Anā Ato Inafoma,” fakakī. Nāfo Cirene anoafō ikaino Alejandría anoafō ikaino Cilicia anoafō ikaino fetsafori Asia anoafōri nāfo ichanākanax Esteban fe feratenānifo. <sup>10</sup> Meka finōmapaifiaifono Niospa āfe Yōshi Sharapa Esteban āfe ōiti mēra shināmani. Shināsharakōita ato yoini. Ato askafaito tsōa Esteban kemanima.

<sup>11</sup> Ato askafaito nikakakī akiki ōitifishkiyanā yora fetsafo ato kori inānifo ato iskafayanā: “Nō mato kori inānō Esteban mā pāratakāfe iskafakī: ‘Na Esteban Moisés yoini



keskara chakafaito nõ nika, Niosri chakafayanã,' ixõ ato yoitakãfe," ato fanifo. <sup>12</sup> Mã fokaxõ ato yoikĩ askafaifono, yorafo õitifishkikani mekai fetsenifo, a judeofãfe ãto xanĩfo fe a Moisés yoikĩ kirika keneni keskara ato tãpimamisfori askanifo. Nãskakaxõ Esteban achikaxõ xanĩfokõi ano iyonifo. <sup>13</sup> Mã iyokaxõ ãa pãranifo ãa chanĩ fetsekakĩ iskafakakĩ: "Na feronãfãke nõko Nios kĩfiti pexefã mēxotaima chakafai, askatari a Moisés yoini keskara chakafai. <sup>14</sup> Nãskatari, 'Nã Jesús Nazarete anoato nã Nios kĩfiti pexefã pãoaxii kiki,' ikaito nõ nikamis. Nãskatari, 'A Moisés yoini keskara ẽ fetsafaxii,' ikaito nõ nikamis," fanifo ãa pãrakakĩ.

<sup>15</sup> Askafaifono xanĩfofo feta a ano tsaofãfe õiafo Esteban ãfe femãnã nã ãjirinĩ femãnã keskarakõi õinifo.

## 7

### *Esteban ato kemasharakõini*

<sup>1</sup> A judeofo Nios kĩfixomis xanĩfo finakõiato Esteban yõkani: "¿Chanĩmamakĩ a mĩõnoa yoiainifo keskara?"

<sup>2</sup> Askafaito nikakĩ Esteban kemani iskafakĩ: "Efe yora mĩshtichi, ea nikakapo. Nõko Nios fãsi sharakõixõ afetĩama nõko xini Abraham yoini, Mesopotamia ano iyoano, Harán mai ano kayoamano. <sup>3</sup> Iskafakĩ yoini: 'Na mai anoax tsekekaini katãfe, mefe yorafoya ato õifaini. Nã mĩ kai ano ẽ mia ispaikai,' ixõ Niospa Abraham yoini. <sup>4</sup> Nãskakẽ Abraham Caldea anoax tsekekaini kani, Harán ano ikikai. Mã anoax ãfe apa naano Niospa Abraham efeni na mai ano, na iskaratĩa nõ ika ano. <sup>5</sup> Akka Niospa afaa pishta inãyonima. Mairi fena inãnima. Akka iskafakĩ yoini: 'Ë mia na mai inãxii,' ixõ yoiyoni. 'Akka mã mĩ nanino mĩ fenafo ẽ ato inãxii,' ixõ Niospa Abraham yoiyoni ãfe ãfi feta fake akamano.

<sup>6</sup> Askata Niospa anã yoini iskafakĩ: 'Mĩ fenafo yora fetsa keskarakanax mai fetsa ano iyonõfo. Nãnoax ãto yonomati keskarakanax omiskõikõiyonõfo cuatrocientos xinia akani.'

<sup>7</sup> Nãskata anã yoini iskafakĩ: 'Ë na yorafo omiskõimani, nã ato yonomakĩ omiskõimanaifo. Ë ato askafaino anoax mĩ fenafo tsekefaixikani. Mã anoax fokaxõ nã Canaán mai anoxõ ea nikasharakõixikani,' ixõ Epa Niospa Abraham yoini. <sup>8</sup> Niospa afetĩama Abraham yoini: 'Mĩ fake feronãfãke mĩ foshki repa xatetiro,' ixõ yoiyoni. Nãskakẽ Abraham ãfe fake Isaaca mã ocho nia ikano foshki repa xateni. Nãskarifikĩ Isaaca ãfe fake Jacobori askafani. Nãskarifikĩ Jacobo ãfe fakefo ato foshki repa xatepakeni.

<sup>9</sup> "Jacobõ ãfe fakefo nõko xinifo ipaonifo, nãfãfe ãto exto José õikasapaonifo. Nãskakaxõ Egipto anoax foaifono yora fetsafo ato inãnifo aõxõ kori fixikakĩ nãfãfe Egipto ari iyotanõfo.

Askafafiaifono Epa Niospa José potanima. <sup>10</sup> José omiskōiaito Epa Niospa ifini. Nāskaxō shināsharamani. Nāskakē Egipto anoxō ato xanīfokōichi José noisharakōini. Nāskaxō xanīfāfe José xanīfo imani, Egipto anoxō āfe pexe anoax xanīfokōi inō.

<sup>11</sup> “Nāskakē Ejipto anoafō fe Canaán anoax fonāiki finakōinifo omiskōiyanā. Nāskakē nōko xinifāfe afaa pinifoma.

<sup>12</sup> Akka Jacobo nikani Egipto anoa a piaifo ichapakē. Nāskakē nāri āfe fakefo nīchini a piaifo fitanōfo, nā nōko xinifo. Ari fokatsaxakakīma foitaenifo. <sup>13</sup> Nāskakata afianā fonifo. Mā anā foafono José āfe ochifo tāpimani. Nāskakē nā xanīfo Faraón tāpini José āfe kaifo. <sup>14</sup> Nāskata chipo José apa kenamani Egipto ano onō āfe fakefo fe. Nā yorafo setenta y cinco inifo Egipto ano ikifeaifo. <sup>15</sup> Nāskakē Jacobo kani Egipto ano ikikai. Nānoax Jacobo nani, nānoaxri nōko xinifori nāpanifo. <sup>16</sup> Nāskakē Jacobo āfe xafo Siquem ano fonifo maifaifokakī. Nā mai nōko xini Abraham afetīama fini, feronāfake āfe ane Hamor minini. Nā mai kini mēra nōko xinifo maifanifo.

<sup>17</sup> “Akka mā anoax chaima tsekeafono nā Epa Niospa Abraham yoiyoni keskai, mā Egipto anoax kaikanax fakefo ichapakōi kainifo. <sup>18</sup> Nāskatari Egipto anoax nā xanīfo fetsa finakōiato José ōimisma ini. <sup>19</sup> Nā xanīfāfe nōko kaifofo ato pārāpaoni. Nāskaxō nōko xinifo ato omiskōimapaoni. Ato pāraxō āto fakefo ato potamapaoni nā fake rama kāiyaifo nanōfo. <sup>20</sup> Ato askafaino nānoaxri Moisés fakeni. Akiki Epa Nios inimakōini. Nānoxō apa feta āfe afa ato pexe anoxō kexesharapaoni. Tres oxe anifo kexekakī. <sup>21</sup> Mā tres oxe akano apa feta āfa fētāmā fepoxō faka ketokonō ratanifo. Nānoa Faraón fake xomayato fichixō ifini āfe fake keskarakōi inō. <sup>22</sup> Nāskakē Moisés nā Egipto anoxō tāpiafo keskarari tāpikōini. Mā yosixō yoikī tāpisharakōia ini a xanīfāfe yoitiro keskafakī.

<sup>23</sup> “Mā cuarenta xinia axō Moisés āfe kaifo israelifo ōikai kani. <sup>24</sup> Akka mā kaxō ōia Egipto anoato āfe kaifo koshaito ōini. Askafaito ōikī timamapaikī, Moisés Egipto anoa feronāfake koshakī reteni. <sup>25</sup> Askafata Moisés shināni: ‘Ēfe kaifāfe tāpikani eōxō Niospa ato ifipai,’ ixō shināni. Akka tsōa tāpinima. <sup>26</sup> Nāskata pena fetsa Moisés āfe kaifo ari kaxō ōia āfe kaifo raferi setenāifāfe ōitoshini. Nāskaxō ato raefapaita ato yoini iskafakī: ‘Nā yora fistifiāx ¿afeskai mā setenāimē?’ <sup>27</sup> Ato askafaino a fētsa seteai Moiséski ōiti fishkiyanā yoini iskafakī: ‘¿Tsōa mia xanīfo imamē mī noko ĩkinō? <sup>28</sup> ¿Akka mī ea retepaimē nā Egipto anoa mī retefaiyamea keskafakī?’ ixō yoini akiki ōiti fishkiyanā. <sup>29</sup> Askafaito nikai Moisés onekaini Madián mai ari kani. Nāri ipaoni yora fetsa keskarax. Nāriax āfiyaxō fake feronāfake rafe ani.

<sup>30</sup> “Nārixō Moisés mā cuarenta xinia akano, tsōa istoma machi Sinai chaima akiki ājiri nokoni, oa fanafo kooai

keskara mēranoax. <sup>31</sup> Askaito nikai Moisés rateyanā namakē ōia fani. Nāskakē akiki chaimashta kaxō ōipaikī nika a mēranoax Nios mekaito nikani iskafakī yoiaito, <sup>32</sup> ‘Ēfi mī xinifāfe ato Nioski. Abraham ikaino Isaaca ikaino Jacobo ikaino ēfi āto Nioskōikī,’ ixō Niospa yoiaito nikai Moisés rateyanā choani. Nāskakē anā ari naisnima. <sup>33</sup> Nāskaito Epa Niospa yoini iskafakī: ‘Mī zapato pekafe, nā mī nia ano sharakōikī. <sup>34</sup> Efe yorafo mē ōia omiskōiaifāfe Egipto anoax. Mē ato nika tetsosikaifāfe. Nāskax ē fotoa ato ifiyoi. Nāskakē iskaratīa Egipto ano ē mia nīchi,’ Niospa Moisés fani.

<sup>35</sup> “Āfe kaifāfe noikaspakakī iskafafianifono: ‘¿Tsōa mia yoiamē mī nōko xanīfo inō noko ikixikī?’ ixō yoifinifono. Akka Epa Niospa xanīfo imaxō nīchini āfe kaifo ifitanō, āfe ājiriōxō. <sup>36</sup> Mā Moisés kaxō Egipto anoa nōko xinifo ifini. Mā ato ifitani oxō Moisés afama mīshti fani tsōa atiro ma keskara fakī. Nā mai anoxō cuarenta xinia ani. Nā ĩamāfānē āfe ane Ōshi anoax tsōa istoma ipaonifo. <sup>37</sup> Moisés āfe kaifo israelifo yoikī iskafani: ‘Niospa fatora fetsa ea keskara mato ano nīchixii kiki. Nikasharakāfe,’ ato fani. <sup>38</sup> Nā Moisés judeofo fe tsōa istoma ano ipaoni. Nānoax ājiri fe mekani machi Sinai anoax, nā ājirinī yoia keskafakī nōko xinifo yoini. Nā Moisés a noko ĩkipakexatiro Niospa meka shara fini, nā meka sharapa noko ĩkipakexatiro ixō ato yoini.

<sup>39</sup> “Akka nōko xinifāfe nikakaspayanā chakafanifo. Nāskakanax afianā Egipto ano fepainifo. <sup>40</sup> Nāskakaxō Aarón yoinifo iskafakakī: ‘Noko nios faxōfe noko ĩkinō. Fakira Moisés kaaki nō tāpiamaki, Egipto anoa noko efefiitaxakī.’ <sup>41</sup> Nāskafaifāfe Aarón ato fakka fake keskara oro ato onifaxoni. Mā ato onifaxōano yoinā retexō ināyanā akiki inimayanā fista axonifo. ‘Aicho, nōko nios fasi sharakōi,’ fanifo āa onifakaxō. <sup>42</sup> Nāskakē Nios ato makinoax paxkani iskafakī ato yoianā: ‘Na fishifo nai mēranoafo nōko niosra mā fatiro,’ ato fani. Akka nā Niosnoa yoimisfāfe, nānorikōi kirikaki kenenifo iskafakī:

Israelifāfe tsōa istomaxō mā mā cuarenta xinia afiaxō mā kai yoinā retexō mā ea ināpaonima, <sup>43</sup> Askatamaroko mā mā afara fetsa onifaxō, ‘Nā nōko niosra,’ ixō Moloc mā iyafofāsafamis. Askata māto nios Refán āfe fishifori mā noimis. Na nōko niosra ixō mā afara onifanixakī, akiki mā ĩnima kakāini. Nāskakē ē māto na tsōa istoma anoa ē mato chai nīchi, Babilonia finōfāi,

Niospa ato fani.

<sup>44</sup> “Nāskakē nōko xinifāfe tsōa istomaxō nā Moisés Niospa yoini keskafakī pe xe fakanax ipaonifo. Nā Niospa Moisés yoini iskafakī: ‘Karpa pe xe fafe nā ē mia ōimana keskara fakī,’ ixō yoini. <sup>45</sup> Nāskakē mā xini ichapa finōta nōko xinifāfe nā karpa pe xe finifo. Akka mā Josué xanīfoxō ato iyon

yora fetsafo potaxõ ato mai fñiafonõfo. Niospa ato axõfaino ato mai fñanifo. Mã askapakeafono Davidri chipo xanĩfoni. <sup>46</sup> Xanĩfo Davidki Nios fãsi inimakõini. Nãskakẽ David Nios yoini iskafakĩ: ‘Epa Niosi, ẽ pexe efapa shara mia faxopai ano Jacobo ãfe fenafo inõ,’ ixõ yoini. <sup>47</sup> Askafakĩ yoifixõ axonima, ãfe fake Salomón Epa Nios pexe faxoni. <sup>48</sup> Akka yorafãfe pexe faxõfiafono nã Nios finakõia a pexe mẽra itiroma. Niospa keyokõi ikinã ixõ a Niosnoa yoimisto kirika keneni iskafakĩ:

<sup>49</sup> Ẽ nai mẽra ika. Nãrixõ na mai anoafõ ẽ onifani tii keyokõi ẽ ikinã. Akka, ¿afeskakĩ mã ea pexe faxotiromẽ a fisti mẽra ẽ inõ faki kafãsaxikima? <sup>50</sup> Akka, ¿ẽ afama mĩshti onifanimamẽ?  
ixõ Niospa ato yoini.

<sup>51</sup> “Akka mãfi mãto xinifo keskarakĩ. Mã nikayospakõifo Epa Niospa meka mã nikakaspakõimis, chanĩmarakai mã famisma. Niospa Yõshi Sharapa mato yoimis mã nikakõimisma. <sup>52</sup> Nãskaxõ mãto xinifãfe a Niospa meka ato yoimisfo ato omiskõimapaonifo. Nãfãferi retenifo, ‘A sharafinakõia nokoki fotoxii kiki,’ ixõ aõnoa yoinifo. Akka nã sharafinakõia mã nokoki oano, mã achixõ ato retemayamea. <sup>53</sup> Niospa ãjirifoõxõ Moisés Niospa meka shara mato yoifimisno mã nikakaspamis,” ixõ Esteban ato yoini.

### *Esteban retenifo*

<sup>54</sup> Esteban ato yoikĩ askafaito nikakani judeofãfe Esteban noikaspakani, akiki õitifishkikĩ finakõinifo. <sup>55</sup> Askafiaifono Esteban shinãchakanima mãmãi Niospa ãfe Yõshi Shara ãfe õiti mẽra naneano. Askata nai ari foisnĩfofãkĩ õia Niospa ãfe shara chaxasharakõiaito õini, Jesús Apa fe ketaxamei nikẽ. <sup>56</sup> Nãskaxõ ato yoini iskafakĩ: “¡Õikapo! Mã nai fepekemea ẽ õikai Jesucristo Apa ketaxamei niakĩ,” ixõ Esteban ato yoini.

<sup>57</sup> Ato askafaito nikakaspakõikakĩ fãsikõi fiisiyanã paopomenifo. Nãskakaxõ noikaspayanã akiki fareke ferakaxõ, <sup>58</sup> mã achikaxõ pexe rasi pasotai iyokaxõ nã Esteban yõaitafãfe feronãfake naetapa ãfe ane Saulo rapati inãnifo ato kexexonõ. Nãskakaxõ chipo Esteban tokirinĩ tsakaketsanifo.

<sup>59</sup> Nãskafakĩ tokirinĩ tsakaketsaifono Esteban Epa Nios kĩfini iskafakĩ: “Ifo Jesús, ẽfe fẽro mẽsho ifife,” ixõ yoini. <sup>60</sup> Nãskata ratokonõ mai chachipakefõfã, fãsikõi fiisini. Iskafakĩ yoini: “Ifo, ea chakafakani kiki ato raefãfe,” ixõ yoiax nani.

## 8

### *A Jesús Ifofaafõ Saulo ato omiskõimani*

<sup>1</sup> Mã Esteban reteafono Saulo inimayanã: “Mã mã akakõikĩ,” ato fani. Nãskata afia penata nã Jesús Ifofamisfo

ato omiskōimakī finakōinifo Jerusalén anoxō. Akka Jesúsxō tāpimisfo ichonifoma, Jerusalén ano nētenifo. Akka nã ato omiskōimanaifo ichokanax paxkanãi fetsenifo. Ranãri Judea mai ari foaifono, ranãri Samãria ari fonifo. <sup>2</sup> Atiri yorafãfe a Nios Ifofamisfãfe Esteban maifakani oiai finakōinifo aō noikani. <sup>3</sup> Akka nã Saulo Jesús Ifofamisfo ato omiskōimani pexefo tii mēra ikikafākakãini ato achixō karaxa mēra ato ikimaxiki, kērofoya feronãfakefo.

*Niospa meka sharaōnoa Samãria anoa ato yoinifo*

<sup>4</sup> Akka nã Jerusalén anoax ichoafãfe Jesucristoōnoa meka shara ato yoifofãsafanifo nã foaifo arixō. <sup>5</sup> Felipe pexe rasi Samãria ano kani, anoxō Cristoōnoa ato yoikai. <sup>6</sup> Ato yoiato nikakani yorafo ichanākaxō Felipe nikakōinifo. Askatari Niospa Yōshi Sharaōxō tsōa atiroma keskafakī Felipe afama mīshtifo faito ōinifo. <sup>7</sup> Askata a niafaka chakafo ato mēra nanea ato makinoa potapakeni. Nāskakē niafaka chakafo ato makinoax tsekei fiisiki fetsenifo. Askatari a finimisfoma sharafata chãtofori sharafani. <sup>8</sup> Askafaito ōikani a pexe rasi anoafu Felipeki inimakōinifo, ato sharafapaito ōikani.

<sup>9</sup> Akka nã Samãria mai anoa feronãfake ãfe ane Simón ini. Taeyoi yōfe iyopaoni, nãato Samãria anoafu ato pãrapaoni: “Ē feronãfake sharafinakōiara,” ixō. <sup>10</sup> Keyokōichi fakefoyaxō anifofofãfe nikakōisharanifo iskafakī yoiyanã: “A nã yoimisfo a nato Niosxō afama mīshtifo fai kiki,” ixō yoinifo.

<sup>11</sup> Nāskakē akiki inimakakī nikakōipaonifo ãfe yōfeōxomãi mã ato pãrapakemiskē. <sup>12</sup> Akka askafiaifono Felipe Nios xanīfoōnoa yafi Jesucristoōnoa meka shara ato yoiato nikakakī chanīmara fakōinifo. Nāskakē chanīmara faifãfe Felipe faka mēra ato ikimapakeni maotisafakī ãto chaka xatenōfo. Feronãfakefoya kērofoya ato faka mēra ikimapakeni. <sup>13</sup> Askatari a Simón yōfe ifiakatsaxakī atori Jesús chanīmara faxō Ifofani. Askafaito ōikī aari Felipe maotisafani. Nāskax nã Simón Felipe afe kapaoni. Akka Felipe tsōa atiroma keskafakī Niosxō afarafo sharafaito ōikī yoini iskafakī: “Aira. ¿Afeskaxō iskafaimē?” ixō Simón yoini.

<sup>14</sup> Nāskaifono a Jesús fe rafemisfãfe Jerusalén anoxō nikanifo Samãria anoxō yorafãfe Niosnoa meka shara chanīmara faifãfe. Nāskakē Pedro yafi Juan nīchinifo, Samãria ari fotanōfo. <sup>15</sup> Mã Samãria ano nokokaxō a Nios Ifofaafu ato Nios kīfixonifo Niospa Yōshi Shara ato mēra nanenō. <sup>16</sup> Ato mēra Epa Niospa Yōshi Shara naneyoamano Jesús aneōnoax maotisanoifo. <sup>17</sup> Nāskakē Pedro feta Juan ato māmānifo ato Nios kīfixoyanã. Ato askafiaifono Niospa Yōshi Shara ato mēra naneni.

<sup>18</sup> Nāskakē Simón ōini Niospa Yōshi Shara ato mēra naneaito Pedro feta Juan ato Nios kīfixoyanã ato māmāifono. Ato

askafaifono òikī Simón ato kori ināpaini. <sup>19</sup> Ato iskafakī yoiyanā: “Eari na kerex shara inākāfe ēri ato māmāpakenō Niospa Yōshi Shara ato mēra nanenō,” ixō Simón ato yoini.

<sup>20</sup> Ato askafaito Pedro kemani: “A na mī koriya mī nai, akka mī shinā korioxō a Niospa noko ināpaiyai keskara nō fitiro. Maa, askarakaima. <sup>21</sup> Mīkai afaa tāpiama na nō Nios yonoxonai keskarakai mī nofeta atiroma. Mia Niospa tāpikōia mī òiti mēraxokai mī shināsharaima. <sup>22</sup> Nāskakē mī chaka xatefe a mī shināi anori anā shinākima. Nios yōkafe mī kīfaiato mia chaka soaxotiroki. <sup>23</sup> Mē mia òi mī òitifishkiki finaito mīmāi chakakōiax,” ixō Pedro yoini.

<sup>24</sup> Askafaito nikakī Simón kemani iskafakī: “Ea Nios kīfixōfe, nā mīa yoiai keskafakī, Niospa ea omiskōimayamanō,” ixō yoini.

<sup>25</sup> Askakāta Pedro feta Juan Samāria anoafō nōko Ifo Jesúsnoa meka shara ato yoitakani Jerusalén ano anā fenifo.

*Mā fekakī pexe rasi anoafō Jesúsnoa meka shara ato yoiifenifo*

<sup>26</sup> Nāskata Niospa āfe ājirinī Felipe yoini: “Fai fētsa kakīma, na fāi katāfe na fāi Jerusalén yafi Gaza finōfainaki tsōa istoma ari na fai kaaki,” fani. <sup>27</sup> Askata Felipe fininākafāta kani. Fāi kai feronāfake Etiopía anoaki nokonī. Nā feronāfake xanīfori ini. Nāato kēro xanīfokōi kori kexexopaoni Etiopía ano. Nāato Jerusalén ano kaxō Epa Nios kīfitani. <sup>28</sup> Mā āfe kaifo mēra okī āfe karo mēra tsoaxō kirika anefeni, nā Isaías Niosnoa yoikī keneni. <sup>29</sup> Nāskata Niospa Yōshi Sharapa anā yoini Felipe: “Oa karo ano katāfe,” fani. <sup>30</sup> Mā Felipe akiki kaxō nikani nā feronāfake Etiopía anoato kirika aneaito, nā Isaías keneni. Nāskaxō yōkani: “¿Mā mī tāpiamē a mī aneai?” faito, <sup>31</sup> Etiopía anoato kemani iskafakī: “¿Afeskaxō ē tāpitiromē? ¿Tsōa ea tāpimatiromē?” fata nāskaxō nā feronāfāke Felipe keneni: “Ēfe karomā naneyofe efe tsoaxiki,” fani. <sup>32</sup> A kirika kenea anekī òiai iska ini:

Oveja iyokaxō retetirofo keskafakī, ari iyonifo retekakī. Ovejanā fake achikaxō āfe rani xateafono feroitiroma keskai ari tooxinima. <sup>33</sup> Rāfinī fanifo afaa chakafayamafiakē noikaspa kakī. A xanīfofo aō rafanā inifoma aō rafanā itamaroko retenifo. Akka āfe fenafāfe nikanakafoma, ixō Isaías keneni òini.

<sup>34</sup> Nāskata nā xanīfo Etiopía anoato Felipe yōkani: “Ea yoife ē tāpinō na Niospa meka yoimisto yoini afaa ikamākī, fetsaōnoa yoikī kenenimākī askayamakī āa anoi yoimekī kenenimākī,” faito, <sup>35</sup> Felipe yoini iskafakī: “Na mī kirika òiai Isaías keneni a Jesucristo noko nāxoxiai yoikī keneni,” fani. Nāskafaxō Jesúsnoa meka shara yoipakeni. <sup>36</sup> Nāskakata fāi fokani faka

ano nokonifo. Nānoxō a xanīfo Etiopía anoato Felipe yoini: “Na faka ōipo. ¿Na fāka mī ea maotisafatiromamē?” fani.

<sup>37</sup> Askafaito Felipe yoini: “Mī ōiti mēraxō mī chanīmara fakōinaito ē mia atiro,” fani. Askafaito a feronāfāke kemani: “Ēje, ē chanīmara fai Jesucristo Niospa Fake,” fani.

<sup>38</sup> Askafaito nikakī Felipe, “Mī karo nētefafe,” fani. Mā karo nētefakata nā rafe fotopakefofānifo faka ano. Nānoxō Felipe a feronāfake Etiopía anoa maotisafani. <sup>39</sup> Mā faka anoax feaifono, Niospa Yōshi Sharapa Felipe iyofaino yamarisatani. Nāskakē a feronāfake Etiopía anoato Felipe anā ōinima. <sup>40</sup> Nāskata Felipe mai fetsa, Azoto ano nokoni. Nānoax kakī a pexe rasi anoafo Jesúsnoa meka shara ato yoifoikaax, Cesarea ari nokoni.

## 9

*Saulo Jesús chanīmara fani Damasco ano kakī*  
(Hch. 22.6-16; 26.12-18)

<sup>1</sup> Nāskatari nā Saulo mēxotaima ē mato reteikai ixō ato retepaipaoni a Jesús Ifofaafo. Nāskakē a ato Nios kīfixomisfo āfe xanīfo ano kani. <sup>2</sup> Mā kaxō ato yoini iskafakī: “Ea kirika kenexokāfe ē aya katanō, ichanāti pexefo Damasco ano a Jesús chanīmara faifo ē ato achitanō, feronāfakefoya kērofoya, Jerusalén ano ato iyoxō karaxa mēra ato ikimaxiki,” ixō ato yoini. <sup>3</sup> Akka mā pexe rasi Damasco chaima fāi kaino, nai mēraxō a kemataima chaxatanaino, <sup>4</sup> Saulo pakēni. Pakexō nikani, iskafakī yoiaito: “Saulo, Saulo, ¿afeskakī mī ea omiskōimanimē?” faito nikakī, <sup>5</sup> Saulo kemani: “Ifo, ¿mī tsoamē?” faito kemakī iskafani: “Ēkīa Jesús, a mī ea omiskōimanai. <sup>6</sup> Fininākaḡā. Pexe rasi ano katāxiki. Anoxō mia yoikani kiki mī afaa afeska faimākai,” fani.

<sup>7</sup> Akka a Saulo fe foaifo ratekōinifo mekaito nikakani. Akka anoa mekaito nikafīkakī toa ōinifoma. <sup>8</sup> Nāskata Saulo fininākaḡani. Fininākaḡāta ōipaikī anā ōinima, mā fēxoa ini. Nāskakē mētsokaxō iyonifo Damasco ano. <sup>9</sup> Nā Damasco ano tres nia ini ōiaxma. Askatari afaa pinima, afaari ayanima.

<sup>10</sup> Akka nā Damasco ano Jesús Ifofaa fisti ika ini, āfe ane Ananías. Nāato namakē ōini nōko Ifāfe yoiaito iskafakī: “Ananías,” faito, “Ēkīa, Ifo,” fani. <sup>11</sup> Askafaito nōko Ifāfe yoini: “Na fai āfe ane ‘Mēstekōi’ ari katāfe. Mā nokoxō Judaspa pexe ano yōkafe nānoa feronāfake Tarso anoa, mī fichikai āfe ane Saulo. Nānoxō Epa Nios kīfi kiki. <sup>12</sup> Anoxō mia namakē ōiafai kiki, mī mīfi mī māmāito, anā ōisharaxiki,” ixō yoiaito, <sup>13</sup> nikakī Ananías kemani: “Ifo, na feronāfakeōnoa ea yoiaifāfe mē nikamis. Nāato keyokōi Jerusalén anoafo chakafaito a mia Ifofaafo. <sup>14</sup> Akka mā nono oa a ato Nios kīfixomis xanīfofofāfe nīchiafono. A mia Ifofamisfo ato karaxa mēra nīchixikī mā

ato ifiyoa,” faito, <sup>15</sup> anã nõko Ifãfe yoini iskafakĩ: “Mẽ na feronãfake katoa eõnoa meka shara ato yoinõ mai fetsafo anoafoya ãto xanĩfofoya israelifoya ato yoinõ. <sup>16</sup> Nãskakẽ ẽ Saulo õimana eõnoax omiskõifinakõinõ,” ixõ yoini.

<sup>17</sup> Askafaito nikafaini Ananías kani. Kaax pexe mẽra ikitoshita nãnoa Saulo fichitoshini. Nãskaxõ ãfe mĩfi mãmãni iskafakĩ yoiyanã: “Saulo, ẽfi mefe yorakĩ. Nõko Ifo Jesús nã mĩ fãi oaito mikiki nokoitato, ea nĩchia ẽ mia fero sharafaxonõ, askatari Niospa Yõshi Shara mĩ mẽra ẽ nanenõ,” faino, <sup>18</sup> koshikõi Saulo fero mẽranoax oa foe pese keskara pakeni. Nãskaxõ õisharakõitani. Nãskakẽ Ananías maotisafani faka mẽra ikimakĩ. <sup>19</sup> Nãskaxõ mã pixõ meea ãfe yora sharakõi ini, anã ãfe yora pachi inima. Nãskakẽ nã Jesús Ifofafo fe Damasco ano ato fe oxa ranãyonifo.

### *Damasco anoxõ Saulo Niosnoa yoini*

<sup>20</sup> Askata Saulo ichanãti pexe mẽraxõ ato yoikĩ taefani iskafakĩ: “Jesús Niospa Fakekõi,” ixõ ato yoini. <sup>21</sup> Ato askafaito nikakani ratei fetsenifo. Nãskaxõ yoinifo iskafakakĩ: “Akka, ¿nato Jerusalén anoxõ a Jesús Ifofamisfo ato omiskõimamismamẽ? Akka, ¿naamamẽ? Mã nono oa nonoafõ ato achiyoi, a Nios kĩfixomisfãfe ãto xanĩfofo ato iyoxoni axiki.”

<sup>22</sup> Akka taeyoi Saulo ratepishtakĩ yoiyoni. Nãskaxõ feyafani fãsikõi yoikĩ. Nãskaxõ mẽstekõi ato yoini Niospa ãfe Fake Jesús nokoki nĩchini. Nãskakẽ judeofãfe Damasco anoxõ tãpipaiketsanifo. “¿Fato nõ chanĩmara faimẽ?” ikaxõ, “Jesu-cristofi Niospa Fakekõikĩ,” ixõ ato yoiaito.

### *Saulo judeofoki mesei onekaini*

<sup>23</sup> Nãskata mã oxai ichapano, judeofãfe ichanãkaxõ shinãnifo: “¿Afeskaxõ nõ Saulo retetiromẽ?” ikaxõ, <sup>24</sup> akka Saulo tãpini yoiaifono. Pena yafi fakishchãi manaifono pexe rasi kãiti anoxõ retepaikakĩ. <sup>25</sup> Askaito õikakĩ a Jesús Ifofamisfãfe Saulo fẽta mẽra nanexõ kene fomãkĩaxõ risfichi fakishi fotomanifo a tsoa niama anori. Mã fotomanafono onekaini.

### *Saulo Jerusalén ari kani*

<sup>26</sup> Mã Saulo Jerusalén ano nokoax a Jesús Ifofamisfo fe rafe-paiyaito, akka keyokõichi omisnifo tãpikaxoma koshikairoko Nios Ifofara ikaxõ. <sup>27</sup> Askaito õikĩ Bernabé Saulo iyoni Jesús ãfe inakõifo ari. Nãskaxõ ato yoini iskafakĩ: “Na Saulo nõko Ifo õia fãi kakĩ, nõko Ifãfe yoiaito. Nãskaxõ na Saulo Damasco anoxõ ato yoisharapakea, ‘Jesús Niospa Fakekõi,’ ixõ ato yoia ranotamakõi,” Bernabé ato fani. <sup>28</sup> Nãskakẽ Saulo Jerusalén ano ato fe ikax, kafãsaoni. Nõko Ifo Jesúsnoa ato yoifofãsafapaoni mesetama. <sup>29</sup> Anoxõ ato yoiaito judeofãfe



griego meka tãpikaxõ fochishpamanifo. Nãskakaxõ afeskax-oma retepainifo. <sup>30</sup> Askafaifono a Jesús Ifofaafãfe mã tãpikaxõ Saulo iyonifo Cesarea ano. Nãnoxõ Tarso ano nĩchinifo.

<sup>31</sup> Nãskakẽ a Jesús Ifofaafõ Judea anoax ita Galilea anoax ita Samãria anoax ita isharakõinifo anã tsõa ato omiskõimanaimano. Anoxõ Nios nikasharakõinifo isharakõikaxõ Niospa Yõshi Sharapa ato axosharaino. Nãskakẽ a Nios Ifofaafõ ichapakõi inifo.

### *Pedro Eneas sharafani*

<sup>32</sup> Nãskakẽ Pedro kafãsani a Nios Ifofaafõ ato õifofãsafai. A Lida ano ikaxõ Nios Ifofaafõri ato õikai kani. <sup>33</sup> Nãnoa feronãfakẽ ãfe ane Eneas fichini. Rakatiani mã ocho xinia aka ini. <sup>34</sup> Fichixõ Pedro yoini iskafakĩ: “Eneas, Jesucristo mia sharafaaki fininãkafãta mĩ oxati itipinĩfakẽ,” ixõ yoiaino, Eneas koshikõi fininãkafani. <sup>35</sup> Nãskakẽ Lida ano ikafãfe, Sarón anoafãferi õikakĩ nõko Ifo Jesús chanĩmara fanifo.

### *Mã Dorcas naano Jesúsxõ Pedro otofani*

<sup>36</sup> Nãskaifono nã pexe rasi Jope ano kẽro Nios Ifofaa ika ini, ãfe ane Tabita. Griego mekapa Dorcas famisfo. Nã kẽromã isharakõixõ ato axosharakõipaoni ato afara inãsharakõikĩ. <sup>37</sup> Nãato askafai, Dorcas isinĩ iki nani. Mã nakẽ chokakaxõ fomãkĩa mãpemainĩfofã pexe kene fetsa ano ratanifo. <sup>38</sup> Akka Jope fe Lida chaima ini. Nã Lida ano Pedro ika ini. Nãno ikẽ nã Nios Ifofaafãfe tãpikaxõ feronãfakẽ rafe nĩchinifo, iskafakĩ yoitãnofo: “Jope anoxõ mia kenafõ mĩ koshi kanõ,” ixõ yoitãnofo.

<sup>39</sup> Askafaifono Pedro ato fe kani. Mã nokoano fomãkĩa mãpemainĩfofãinifo a Dorcas raka ano. Anoax a kẽro fene-maisfo oiakakĩ Dorcas nayoxoma ato samafaxomis ispanifo. <sup>40</sup> Askaifãfe õikĩ Pedro ato kãimani. Ato kãimata ratokonõ mai chachipakefofã Epa Nios kĩfini. Nãskata a kẽro naa õiyanã yoini iskafakĩ: “Tabita, fininãkafãfe,” faino, nã kẽromã Pedro feista nãskax tsoainãkafãni. <sup>41</sup> Nãskata Pedro mêtsoxõ fininĩfofãni. Nãskata a Jesús Ifofaafõya a kẽro ifomafafõ ato kenani ato õimaxiki mã Dorcas anã otoano. <sup>42</sup> Askaito nikanifo a pexe rasi Jope anoafãfe. Nãskakẽ ichapakõichi nõko Ifo chanĩmara fakõinifo. <sup>43</sup> Mã askafata Pedro Jope pexe rasi ano oxaranãyoni, a Simón anoxõ fichi shinã famis ano.

## 10

### *Pedro fe Cornelio*

<sup>1</sup> Nã pexe rasi Cesarea anoa feronãfakẽ ãfe ane Cornelio ini. Sorarofãfe ãto xanĩfo ipaoni. Nã sorarofõ, “Italianõra,” ato famisfo. <sup>2</sup> Nã feronãfakẽ ãfe yorafo fe isharakõixõ Epa Nios kĩfipaonifo. Nãskatari judeofo ato axosharayanã kori ichapa ato inãpaoni. Nãskaxõ Epa Nios mẽxotaima kĩfipaoni. <sup>3</sup> Nãskata pena fetsa yãtapake oa namakẽ õia fani, Niospa

āfe ājiri xafakīakōi ōini akiki oxō iskafaito: “Cornelio,” faito. <sup>4</sup> Nāskakē Cornelio ājiris ōini. Nāskaxō rateifinakōiyanā yōkani iskafakī: “¿Afaa mī ea yoipaikī kenaimē, Ifo?” faito, ājirinī yoini: “Mī kīfaiito mā Epa Niospa mia nikakōia, a yora afaa-maisfo ato axosharayanā mī ato kori ināito.” <sup>5</sup> Nāskaxō yoini: “Fatora fetsa nīchife Joje pe xe rasi ano kaxō Simón ifitanōfo. Āfe ane fetsa Pedro. <sup>6</sup> Simón fetsa pe xe ano oxaki nā Simón ĩamāfā ketokonō ikaki fichi koiro fai.”

<sup>7</sup> Askafakī yoiax mā ājiri kaino, Cornelio a yonoxomis rafeya āfe soraro fisti kenani nā soraronō kexekōimis ini. Akka nā soraronō Nios shināmis ini. <sup>8</sup> Nā ājirinī yoia keskara mā ato yoixō Joje ari ato nīchini.

<sup>9</sup> Penama xini keya mā Joje chaima faifoaifono, Pedro pe xe māmākīa māpeinīfōfāni arixō Epa Nios kīfikakī. <sup>10</sup> Nāskax fonāikōikī pipaini. Akka pixikakī mā pīchafono Pedro namakē ōia fani. <sup>11</sup> Ōia nai fepekemeaito ōini ariax sabanā keskara petapafā nexeax nai mēranoax nāmā fotopakekafanaito. <sup>12</sup> Nā sabanā petapafā mēra yoinā fetsa fetsatapafo ōini ronofoya, peyafo, afama mīshti ini. <sup>13</sup> Nāskata mekaito nikani iskafakī yoiaito: “Pedro, finināka fāfe. Nafo retexō pixiki,” faito nikani.

<sup>14</sup> Askafaito nikakī Pedro kemani: “Maa, Ifo, nafo ē pimisma, Moisés noko yoini nafo nō pitiroma,” faito, <sup>15</sup> afianā yoiaito nikani iskafakī: “Niospa nafo shara imaki. Akka nafo chakara fayamafe,” faito nikani.

<sup>16</sup> Yoikī tres fata nāskax nā sabanā petapafā anā nai mēra kaito ōini. <sup>17</sup> Nāskakē Pedro shināchakakōiyanā tāpipaini. “¿Afaa iskara Niospa ea yoipaimē na namakē ōia keskara ē ōiai?” ixō Pedro shināni. Nāskaino a Cornelio ato nīchia fokaxō, pe xe fe poti anoxō ato yōkanifo: “¿Fatomē Simón pe xe?” ixō ato yōkanifo. <sup>18</sup> Anoxō fāsikōi ato yōkanifo: “¿Fanī Simón fetsa oxamē, āfe ane fetsa Pedro?” ixō ato yōkanifo.

<sup>19</sup> Oa namakē ōia keskara ōixō Pedro shināpaiyaino, Niospa Yōshi Sharapa yoini iskafakī: “Ōipo, feronāfake trespa mia fenai feafokī. <sup>20</sup> Finināka fāfe. Nā mā fotoax ato fe kataxiki tanaimakōi, ē ato nīchia feafoki,” faino, <sup>21</sup> Pedro fotopakekafāxō a feronāfake tii ato yoini iskafakī: “¿Afaa mā akiyoamē? Ĕrokonō a mā ea fenai,” Pedro ato fani.

<sup>22</sup> Ato askafaino kemanifo: “Nō oa nā sorarofāfe āto xanīfo Cornelio noko nīchiano nā feronāfakefi sharakōiki. Nios nikakōimis. Judeofāfe aōnoa meka shara yoimisfo sharara famisfo, Niospa āfe ājirinī yoia mia kenanō āfe pe xe ano mī kanō, nāato mia nikasharai mī yoiaito,” fanifo.

<sup>23</sup> Askafaifāfe nikakī Pedro ato ikimani. Nāno afe oxa fistinifo, nāskata Pedro ato fe penama kani. A afe rafeafori Nios Ifofakanax Pedro fe fonifo Joje anoax.

<sup>24</sup> Mā fokanax pena fetsa Cesarea ano nokonifo, a Cornelio ato manai ano, afe yorafo feta. Āfe yamakōifori ano afe inifo ato kenamana fekanax. <sup>25</sup> Mā Pedro pexe ano nokoano, Cornelio āfe pexe anoax kāinākafā Pedro ifikai kani. Mā kaxō a nāmā ratokonō mai chachipakefōfā: “Mī fāsi sharakōira,” fani.

<sup>26</sup> Askafaito ōikī Pedro fininīfōfāni iskafakī yoiyanā: “Fininākafāfe. Ēri yoraki mia keskara,” fani.

<sup>27</sup> Nāskax afe mekayanā pexe mēra ikikaikī ōia yora ichapakōifo ichanā inifo. <sup>28</sup> Anoxō Pedro yoini: “Mā mā tāpia a nōko xinifāfe noko yoini keskara a judeofoma fe nō rafetiroma. Askatari āto pexe mēra nō ikitiroma. Akka Niospa ea tāpimana ē tsoa chakafatama ē ato noisharakōinō. <sup>29</sup> Nāskakē ea yoiaifono ē koshi oa, ē okaspama. Akka ē tāpipai afeskakī mī ea kenamāki,” faito, <sup>30</sup> Cornelio kemani iskafakī: “Mā cuatro nia finōa, a nono xini rakato ēfe pexe anoxō foni teneyanā ē Epa Nios kīfiaino yātapake, feronāfake rapati fafekōiai safeax ekeki nokoita, <sup>31</sup> ea yoikī iskafaita: ‘Cornelio, mā Niospa nika mī kīfiaito. A mī akai keskarari mā tāpia, a afaamaisfo mī ato afara ināsharaito,’ ea faito ē ōita. <sup>32</sup> ‘Nāskaxō feronāfake tres pexe rasi Jope ano nīchife Simón ifitanōfo. Āfe ane fetsa Pedro. A Simón fetsa āfe pexe mēra ikaki. Nā Simón fetsa fichi koiro shinā famiski iamāfā kesemē ikaki,’ ixō ea yoita. <sup>33</sup> Nāskakē feronāfake tres ē koshikōi nīchita mia ififonōfo. Akka mī nokoki osharakōiyanā mī noko inimamasharakōia. Nāskakē keyokōi mā nō ichanā Niospa noko ōiaino. Akka nō nikapai a nōko Ifāfe mia yoia keskara mī noko yoinō,” ixō Cornelio yoini.

### *Pedro ato yoini Cornelio pexe anoxō*

<sup>34</sup> Askafaito nikakī Pedro yoini iskafakī: “Chanīma mē tāpikōia Niospa noko yora fetsa keskara ōima, keyokōi nā yora fisti keskara noko ōi. <sup>35</sup> Askakimaroko nā mani fetsafāferi Nios nikakōiakā, afarafo sharakōi fakanax, Epa Niospa fake itirofo. <sup>36</sup> Niospa israelifāfe fenafo meka sharaōnoa ato yoini, inimasharakōinōfo. Jesucristoōxō ato yoini, nā nōko Ifoōxō. <sup>37</sup> Mā mā nikamiski a Judea mai anoax ini keskara. Tafakī Galilea anoxō ato yoikī tafani: ‘Māto chaka xatekāfe Nios chanīmara fakāfe ē mato maotisafapanō,’ ixō Juan ato yoini. <sup>38</sup> Akka mā mā tāpia Niospa āfe kerex sharafoya āfe Yōshi Shara Jesús mēra naneni. Jesús afama mīshtifo fapaoni, ato sharafayanā a omiskōiaifo, niafaka chakata ato omiskōimanaino. Nāskakē afama mīshtifo fatiro Niosmāi afe ikano. <sup>39</sup> Akka nō ōiyamea Jesús afama mīshtifo faito judeofāfe āto mai anoxō ata Jerusalén anoxori akaito nō ōiyamea. Nāskafafiaito reteyameafo ifi cruz ikakī mastakaxō. <sup>40</sup> Akka

mã retelitafono Epa Niospa tres nia oxata otofayamea. Nãskakē nokoki nokoaito nō òiyamea. <sup>41</sup> Akka atiri yorafoki nokoyameama, nokoki nokoaito nō òiyamea. Afetĩamamã Niospa noko katonixakĩ chanĩmakõi nō mato yoi. Nō a feta piyanã nō afeta ayayamea mã Niospa otofayameano. <sup>42</sup> Nãato noko nĩchiyamea pexe rasi anoafõ nō ato yoinõ iskafaki: ‘Niospa Jesús nĩchini,’ ato yoinõ fatofomãkĩ afe nĩpanakafo mã nafianixakakĩ, askatari a niafori ato yoixii. <sup>43</sup> A Niosnoa yoimisfãfe a nã Jesús iskanõpokoai yoikĩ aõnoa yoyonifo. Iskafakakĩ yoinifo: ‘Nã chanĩmara faifono aõxõ Epa Niospa ato chaka soaxotiro,’ ixõ yoinifo,” Pedro ato fani.

### *Nã judeofomafãfe Niospa Yõshi Shara finifo*

<sup>44</sup> Pedro ato yoikĩ xateamano Niospa Yõshi Shara ato mēra naneni ãfe meka shara nikaifono. <sup>45</sup> Nãskakē a judeofãfe Jesús Ifofamisfãfe Pedro fe foitaxakakĩ ato õinifo. Ato iskafanifo: “Aira. Òikapo. Na nõko kaifomafo Niospa Yõshi Shara ato mēra naneakekafana,” ikax yoinãnifo. <sup>46</sup> Anoxõ ato nikanifo meka fetsapa mekaifãfe iskakani a ato kaifomafo: “Nios fãsi sharakõi,” ikanax mekaifãfe ato nikanifo judeofãfe. <sup>47</sup> Askafãfe Pedro ato yoini: “Akka tsõa na yorafo ato maotisanõ fayamakãfe noko fatirofoma. Akka Niospa Yõshi Shara mã ato mēra nanea, nõmēra naneni keskai.”

<sup>48</sup> Pedro ato yoini Jesucristo aneõxõ ato maotisanõ fanõfo. Mã ato maotisanõ faafono, Pedro nĩchikaspanifo. “Kayamafe, nono nofe iyoixiki,” fanifo.

## 11

### *Pedro a Nios Ifofaafõ Jerusalén anoafõ ato yoini*

<sup>1</sup> Nã Cesarea anoafãfe Jesús Ifofanifo judeofo yamafikaxõ. Afãfe Jesús Ifofaifãfe ato nikanifo a Jesúsxõ tãpimiskõifãfe. A Nios Ifofamisfo fetsafãferi nikanifo. Atiixõ ato nikanifo ãto mãi Judea anoxõ. <sup>2</sup> Askata Pedro Cesarea anoax kani Jerusalén ano. Anoxõ a Jesús Ifofamis fetsafãfe Pedro mekafanifo a Moisés keneni tãpiafãfe: “Judeofoma fe mĩ rafeira,” ikaxõ. <sup>3</sup> Iskafanifo: “¿Afeskai a nõko kaifoma ano mĩ kaitamē? Anoxõ ato fe rafexõ mĩ ato feta piaito nō nikaita a Moisés yoini keskafakĩ nō ato feta pitiroma,” fanifo.

<sup>4</sup> Askafãfe nikakĩ Pedro ato yoini a namakē õiafanta keskara, <sup>5</sup> iskafakĩ: “Ë pexe rasi Jope anoxõ ã Nios kĩfyanã oa namakē õia keskara ã õita. Ë õita oa sabanã keskara nexeax nai mēranoax fotopakekafanaito a ã nia ano. <sup>6</sup> Askaito ã õia a mēra yoinã fetsa fetsatapafo ikita askatari a xõchixaraifoya peyaforti ã õita a mēra kechokomekē. <sup>7</sup> Askata mekaito ã nikaita ea yoikĩ iskafaito: ‘Pedro, fininãkafãfe. Na fetsa retexõ pixiki,’ ea feita. <sup>8</sup> Ea askafaito nikakĩ ã kemakĩ iskafaita:

'Maa, Ifo. Moisés yoikī keneni keskafakī, nafo nō pitiroma. Nāskakē na yoināfo ē pimisma,' ē feita. <sup>9</sup> Ē askafaito afianā nai mēraxō iskafakī ea yoiaito ē nikaita: 'Niospa yoia nafo mī pitiroki. Pife, sharaki, chakafakīma,' ea feito ē nikaita. <sup>10</sup> Ea yoikī tres fata, afianā nai mēra kaito ē ōita. <sup>11</sup> Askaino Cesarea anoax feronāfake tres ekeki feitafo. Ato nīchiafono ea fenai fekani. Mā fekanax pexe ano nokoitafo a ē ika ano. <sup>12</sup> Nāskakē Niospa Yōshi Sharapa ea nīchita iskafakī ea yoivanā: 'Shināchakakīma ato fe katāfe,' ea feita. Nāskatari a Nios Ifofaafō seis feronāfake efe foitafo. Nāskakē ato fe yora yamaflix Cornelio pexe mēra nō ikitoshita. <sup>13</sup> Nānoxō noko Cornelio yoita a āfe pexe anoxō ājiri ōitaxakī iskafakī yoiaito: 'Fatora fetsa pexe rasi Jope ano nīchife Simón ifitanōfo, āfe ane fetsa Pedro. <sup>14</sup> Nāato mia yoi kiki afeskax Nios fe mī ipaxatiromākī, mefe yorafo fe,' ixō Niospa yoitano Cornelio ea yoita," Pedro ato fani. <sup>15</sup> "Ē ato yoiaino Niospa Yōshi Shara ato mēra naneita, taeyoi nō mēra naneni keskai. <sup>16</sup> Nāskakē ē shināfaita a nōko Ifāfe noko yoiyamea anori chanīma. 'Juan ato fāka maotisafani, akka Niospa āfe Yōshi Shara mato mēra nanei,' ixō Jesús noko yoiyamea. <sup>17</sup> Epa Niospa āfe Yōshi Shara ato mēra naneita a nōmēra naneni keskafakī, nōko Ifo Jesucristo nō chanīmara feito. Akka ē, 'Mī Yōshi Shara ato mēra naneyamafe,' ē Nios fatiroma," ixō Pedro ato yoini.

<sup>18</sup> Ato askafaito nikakani a Nios Ifofamisfo Jerusalén anoax anā tsoa tooxinima, Nioskiroko inimanifo. Iskafakī yoinifo: "Aicho, Nios fāsi sharakōi, nā noko ināni keskafakī, āfe Yōshi Shara ato mēra nanea, a nikakōisharakanax afe ĩpaxanōfo," ixō yoinifo.

### *Antioquia anoafāfe Jesús Ifofanifo*

<sup>19</sup> Mā Esteban reteitafono a Jesús Ifofamisfo ato omiskōimakī taefanifo. Ato askafaifono ranāri Fenicia ari ichonifo, ranāri Chipre ari fonifo, ranāri Antioquia ari fonifo. Nārixō judeofo Jesúsnoa meka shara ato yoinifo. Yora fetsafo ato yoinifoma, judeofos ato yoinifo. <sup>20</sup> Ato askafaifono a Nios Ifofamisfo Chipre anoax fekāta Cirene anoaxri fenifo pexe rasi Antioquia ano. Mā fēkaxō a judeofoma nōko Ifo Jesúsnoa meka shara ato yoinifo. <sup>21</sup> Nōko Ifāfe āfe Yōshi Shara ato fe ikano, a āto xinifāfe ato yoipaonifo shināmakikāta nōko Ifo chanīmara fakōinifo.

<sup>22</sup> Askafono a Jesús Ifofamisfāfe Jerusalén anoxō ato nikanifo. Nāskakē Bernabé Antioquia ano nīchinifo. <sup>23</sup> Mā Bernabé nokoxō ōia Niospa ato imasharakōia ōitoshini. Askafāfe ōikī Bernabé inimasharakōini. Nāskaxō ato yoisharakōini shināsharakōixō. "Isharakōixō nōko Ifo nikasharakōikāfe," ato fani. <sup>24</sup> Akka Bernabé feronāfake sharakōi ini. Niospa Yōshi

Shara āfe ōiti mēra nanea, Jesús chanĩmara fakōina. Nāskakē yorafāfe aōxō nōko Ifo Jesús chanĩmara fakōinifo.

<sup>25</sup> Mā askata Bernabé Tarso ano kani Saulo fenaikai. Mā fichixō Antioquía ano iyoni. <sup>26</sup> Nārixō a Nios Ifofaafo feta xinia fisti ani, yora ichapafo ato tāpimayanā. Antioquía anoxō taefakī ato anenifo a Jesús Ifofaafo. “Cristianōra,” ato fanifo.

<sup>27</sup> Askaifono a Niospa ato shināmanaino Niosnoa ato yoipaonifo nāfo Jerusalén anoax Antioquía ano fonifo. <sup>28</sup> Mā fokaxō fishtichi niinākafāxō ato yoini āfe ane Agabo, Niospa Yōshi Sharapa shināmanaino, “Nā maitio anoax fonāiki finakōixikanira,” ixō ato yoini. Akka chanĩma, askakōini Claudio xanĩfo ikano. <sup>29</sup> Nāskakē a Nios Ifofaaafāfe Antioquía anoxō shinānifo a Nios Ifofaa fetsafo Judea anoafo ato kori manamaxikakī, afe tii ato fomakanimāikai. <sup>30</sup> Nāskakaxō Bernabé yafi Saulo inānifo ato foxotanōfo. Nāno a Jesús Ifofamisfo Judea ano xanĩfofo ikafo inifo. Nāfo ato kori inānifo ato paxkaketsaxonōfo.

## 12

### *Santiago retekāta Pedro karaxa mēra ikimanifo*

<sup>1</sup> Nāskaino Herodes xanĩfāfe a Jesús Ifofamisfo atiri ato achixō karaxa mēra ato ikimani ato omiskōimayanā. <sup>2</sup> Nāskata Herodes ato yoini Santiago retenōfo kenopa. Nā Santiago Juan fe nanea ini. <sup>3</sup> Mā Herodes Santiago ato retemanano ōikani judeofo akiki inimanifo. Askafaiifāfe ōikī Herodes āfe inafō yoini Pedrori achinōfo. Nāato askafanifo fistatīa pāa faraxaxoma piyanā. <sup>4</sup> Mā Pedro achiafono Herodes Pedro karaxa mēra ikimani. Nānoxō dieciseis sorarofāfe kexenifo. Herodes shināni: “Mā fista senēano chipo ē Pedro kāimanō yorafāfe ōinōfo,” ixō shināni. <sup>5</sup> Nāskakē Pedro karaxa mēra ini, sorarofāfe kexekōiafono. Askafafiaifono a Jesús Ifofamisfāfe Epa Nios kīfixonifo Niospa kexesharakōinō.

### *Niospa Pedro kāimani karaxa mēranoa*

<sup>6</sup> Nā fakish fistichi Herodes shināni: “Ē penama Pedro kāimanikai yorafāfe ōinōfo,” ixō, akka karaxa mēranoax Pedro oxani soraro rafe fe cadenānā takai rafe metexkere ikax. Nāskaino atiri sorarofāfe karaxa fepoti anoxō kexeshinifo. <sup>7</sup> Nāskaino nōko Ifāfe āfe ājiri akiki nokorisatani. Karaxa mēra fakishfiāx penasharakōi ĩtani. Nāskaxō ājirinĩ Pedro mōini ramāyanā iskafakī yoini: “Fininākafāfe kataxiki,” faino koshikōi Pedro mifi inoax cadenās mepekemetani. <sup>8</sup> Nāskafata ājirinĩ yoini iskafakī: “Mī rapati yafi mī sapato safefe,” faito nikakī Pedro koshi āfe rapati yafi āfe sapato safeni. Nāskaxō ājirinĩ anā yoini: “Mī tariri safefe efe kaxiki,” fani.

<sup>9</sup> Nāskafaino Pedro ājiri acho kani. Acho kakī shināpaina: “¿Chanīmamē mā ea ājirinī kāimanamē? Akka ē namakē ōiafaī keskara ē ōi,” ixō shināpaina. <sup>10</sup> Nāskax ājiri fe kakī a soraro kexei taea finōfaini. A fetsari kexea finōfaini. Nāskax nā fepoti firo ano nokoxō ōia, mā fepoti āakōi fepekemea ini. Nāskax ājiri fe mā tsekeano fāi kaax ājiri a makinoax yamarisatani.

<sup>11</sup> Nāskafaito ōikī Pedro tāpini. Nāskaxō shināni iskafakī: “Chanīma, mē ōi ēfe Ifāfe āfe ājiri nīchia. Herodes feta judeofāfe ea retepaiyaifono ea kāimana,” ixō shināni.

<sup>12</sup> Mā tāpiax Pedro María pexe ano kani, Juan āfe afa ano. Nā Juan āfe ane fetsa Marcos ipaoni. Nā María pexe anoxō yora ichapafāfe ichanākaxō Epa Nios kīfiaifono Pedro kani.

<sup>13</sup> Mā kaxō pexe fepoti anoxō ato kenaino, nā xomayato María yonoxomis āfe ane Rode, nāato kaxō ōini tsoamāki. <sup>14</sup> Mā Pedro āfe meka tāpikāta, inimakōiyanā pexe fepoti fēpexotama ato yoikai ichoni. “Mā Pedro oa. Na pexe fepoti ano nia,” ato fani. <sup>15</sup> Ato askafaito tsōa chanīmara fanima. Iskafanifo: “Mī chanī, Pedrokai oama,” faifono, “Maa, mē Pedro āfe meka nikakōia,” ato fani. Ato askafaino iskafakī yoinifo: “Aamaki, āfe ājiriki,” fanifo.

<sup>16</sup> Askafaifono Pedro pexe fepoti anoxō mēxotaima ato kenani. Mā fēkaxō fepoti fepekaxō Pedro fichikanax ratenifo.

<sup>17</sup> Askafāfe ōikī Pedro āfe mēkemā mekayamakāfe ato fani. Nāskaxō ato yoini afeskaxō nōko Ifāfe karaxa mēranao kāimanamākī. Nāskata anā ato yoini iskafakī: “Santiago yafi a Nios Ifofamisfo ato yoitakāfe,” ato fani. Ato askafakī yoita pexe fetsa ari kani.

<sup>18</sup> Akka mā penano anoa Pedro ōikanima sorarofa yoinānifo, tāpikanamax Pedro afeskamē ikanax. <sup>19</sup> Mā kāikaina nikaxō, Herodes ato fenamani, “Akka mā fenafikāki fichiyamaifono mā kexesharamaki,” ixō Herodes, “Nā sorarofa retekāfe,” ato fani. Ato askafata Herodes Judea anoax kani Cesarea ari ikikai.

### *Herodes nani*

<sup>20</sup> Herodes atoki ōitifishkini Tiro pexe rasi anoafu yafi Sidón pexe rasi anoafoki. Atoki ōitifishkikaino Tiro anoa feta Sidón anoafāfe shinānifo Herodes yōkaifoxikakī anā atoki ōitifishkiyamanō. Nāskakaxō xanīfo Blasto yoinifo: “Noko Herodes yoixōfe nō afe mekapaikai. Nokoki ōitifishkiki kiki, nō afe rafepaisharaikai anā nokoki ōitifishkiyamanō. Nokoki ōitifishkiki afe yorafo yoitiroki a nō piai noko inānōfoma,” ixō Tiro anoafu feta Sidón anoafāfe Blasto yoiiaifono. Nā yoiiaifo keskafakī Blasto Herodes yoini. <sup>21</sup> Askafaito nikakī, “Pena fetsa ē ato fe mekanō,” fani. Nāskata pena fetsa mā akiki feaifono, rapati sharakōi nā xanīfāfe safemis keskara safeax

tšaoti sharakōi ano tšaoni, anoxō ato yoixiki. <sup>22</sup> Ato yoikī askafaino fāsikōi yorafo mekainīfōfānifo. Iskafakī yoinifo: “Na mekai yora mekaima, nios mekai,” fanifo. <sup>23</sup> Askafaifono nōko Ifāfe āfe ājirinī Herodes isinī imani, “Ē Niosma. Nios sharakōi,” ato faimano. Nāskax Herodes nani xenafāfe xaki mēraxō piaino.

<sup>24</sup> Askano Niospa meka shara Jesúsnoa ato yoifofāsafanifo akairi Niospa meka shara nikakaxō chanīmara fanōfo. <sup>25</sup> Nāskafaifono Bernabé feta Saulo mā yonokī mitokanax Jerusalén anoax fonifo, Antioquía ano. Juanri ato fe kani, āfe ane fetsa Marcos ini.

## 13

### *Bernabé feta Saulo Niospa meka ato yoikī taefanifo*

<sup>1</sup> Antioquía ano Jesús Ifofamisfo inifo, a Niosnoa ato yoipaonifori ano ato fe inifo. A Jesús Ifofaax afeskax ishariatirofomākī ixō ato tāpimamisfori ano ato fe inifo. Bernabé ikaino, Simón āfe ane fetsa Nā Fisora fapaonifo ikaino, Lucio a Cirene anoa ikaino, Manaén xanīfo Herodes fe yosini ikaino, nā Saulori ato fe ini. <sup>2</sup> Akka pena fetsa foni teneyanā nōko Ifo kīfiaifono Epa Niospa Yōshi Sharapa ato yoini iskafakī: “Bernabé yafi Saulo ato paxkanāfakāfe ě ato katoaki eōxō yononōfo,” ato fani.

<sup>3</sup> Nāskata foni teneyanā mā Epa Nios kīfikaxō Bernabé yafi Saulo ato mīfi māmākaxō Epa Nios ato kīfixoyanā, ato nīchinifo fetsafo ari fokaxō Epa Niospa meka shara ato yoitanōfo.

### *Bernabé fe Saulo Chipre ano fonifo*

<sup>4</sup> Mā Niospa Yōshi Sharapa ato nīchia fokanax Bernabé fe Saulo Seleucia ano fonifo. Nānoax kanōanāfānē nanefainifo Chipre ano fokani. Nā ĩamāfā fakafā nakirafe mai toomāfā ano fokani. <sup>5</sup> Mā fokanax pexe rasi Salamina ano nokokaxō judeofāfe āto ichanāti pexe mēraxō Niospa meka sharaōnoa ato yoikī taefanifo. Juanri ato fe kani afara fetsa ato axoxii.

<sup>6</sup> Nā ĩamāfā nakirafe mai toomāfā anoa ato yoikāta, Pafos ano fonifo. Nānoa judeo yōfe fichinifo āfe ane Barjesús. Nā chanīkōi ipaoni ě Niosxō yoiri iki. <sup>7</sup> Nā yōfe Barjesús xanīfo Sergio Paulo fe ipaoni. Nā xanīfāfe tāpisharakōia ini. Nāskaxō Bernabé yafi Saulo kenamani, Niospa meka shara nikapaikōiki. <sup>8</sup> Akka nā yōfemā āfe ane fetsa griego mekapa Elimas fapaonifo. Nāato āfe xanīfo yoini: “Ato nikayamafe mia pārakani kiki,” fani, ea nikanōra ixō. <sup>9</sup> Nāskakē Saulo āfe ane fetsa Pablo ini. Niospa Yōshi Shara a mēra nanekōia. Nāato aas ōini. <sup>10</sup> Nāskaxō yoini iskafakī: “Chanīchakapa nīafaka fake, nā sharafo mī noikaspamis. Mī chanīmis ato pārapaiyanā nōko Ifāfe mēstekōi ato yoifimisno, akka anorima mī ato yoimis.



¿Afeskai mĩ xateimamě? <sup>11</sup> Akka iskaratĩa nõko Ifãfe mia omiskõimani. Mĩ anã fěro õima, xinĩ chaxafiaino mĩ anã fena õiyonakama,” fani.

Askafaino Elimas anã fěro õinima. Fakish měra nia keskara ini. Askaxõ ato kenani mětsoxõ iyoifonõfo anã fěro õiyamaito. <sup>12</sup> Nãskaito õikĩ xanĩfãfe nõko Ifo chanĩmara fani. “Aira, Jesús afama mĩshti fatiro,” ixõ yoinifo.

*Pablo fe Bernabé Antioquía ano inifo. Nã Antioquía Pisidia mai ano ini*

<sup>13</sup> Pablo afe rafeafo fe Pafos anoax kanõanãfãñē nanefainifo pexe rasi Perge ano fokani. Nã Perge Panfilia mai ano ini. Nãnoax Juan anã ato fe kanima. Nãno nēteax anã oni, Jerusalén ano. <sup>14</sup> Nã Perge anoxõ Antioquía finõfainifo, Antioquía anoxõ shinã Pisidia chaima ini. Nãriax pena tenetitĩa ichanãti pexe měra ikifaikanax tsaonifo. <sup>15</sup> A Moisés Niospa meka yoikĩ kirikaki kenei yafi a Niospa ato shinãmanaino yoipaonifo keskara anekãta, a ichanãti pexe kexemisfo xanĩfofõfãfe Pablo yafi Bernabé ato yoini iskafakakĩ: “Nõko kaifo rafeta mã noko afara yoipaimãkai noko yoikãfe, noko inimamaxikakĩ,” ixõ ato yoinifo.

<sup>16</sup> Ato askafaifono Pablo niinãkafã atokiri mēshainãkafã mekayamakãfe ato fani. Nãskaxõ ato yoini iskafakĩ: “Ea nikakãfe ěfe kaifo israelifãfe yora fetsafo feta mã nofeta Epa Nios kifipaimãkai ě mato yoisharanõ. <sup>17</sup> Israelifãfe ãto Niospa taefakĩ nõko xinifo katonni afe yora inõfo. Nãskakē Egipto anoax kainifo yora fetsafo měra iyokanax Ejipto mai anoax. Nãskakē chipo Epa Niospa ãfe kerex sharaõxõ Ejipto anoa ato iyoni. <sup>18</sup> Nãskakē Niospa meka tsõa nikasharayamafai-fono, Niospa ato kexepaoni cuarenta xinia tsõa istoma anoxõ. <sup>19</sup> Nãskata Niospa Canaán mai anoxõ siete faxõ mani fetsafo ato potani, nõko xinifo a mai ato inãxiki. <sup>20</sup> Nãskakē cuatrocientos cincuenta xinia ayonifo. Fena Canaán mai ano fonifoma. Mã cuatrocientos cincuenta xinia finõta xanĩfoya inõfo Niospa ato yoini.

“Nãskatari chipo nã Niospa meka ato yoimisri Samuel xanĩfo ini. <sup>21</sup> Nãskakē, ‘Xanĩfo finakõia nõ fichipai noko ĩkinõ,’ ixõ yoinifo. Nãskakē Niospa Saúl cuarenta xinia imani xanĩfokĩ. Akka nã Saúl ãfe apa Cis ini, Benjamín ãfe kaifo. <sup>22</sup> Nãskata Epa Niospa Saúl tsekani anã xanĩfo iyamanõ. Akka Epa Niospa David xanĩfo inõ imani. Nãskaxõ yoini iskafakĩ: ‘Isaĩ ãfe fãke David mã ea inimamakõi nã ě apaiyai keskafaki nãato akõini,’ ixõ yoini. <sup>23</sup> Nã David ãfe fena ini Jesús. Epa Niospa nai mēraxõ nãmã nĩchini israelifo ato ifipakexanõ nã yoiyoni keskafakĩ. <sup>24</sup> Askatari Jesús oyoamano israelifo Juan Jesúsnoa

meka shara ato yoini iskafakī: ‘Māto chaka xatexō Nios Ifakāfe maotisaxakakī fetsafāfe tāpinōfo mā māto chaka mā xateano,’ ixō ato yoini. <sup>25</sup> Askata mā Juan chaima nakī, ato yoini: ‘¿Mā shināimē ē Cristokē? Maa, ēkai aama. Akka a Cristo samama oi a nō manai nōko xanīfo ikiyoi. Akai ea keskarama. Ato afama mīshti tāpia. Atokai afaa chakafamisma,’ ixō ato yoini.

<sup>26</sup> “Ēfe kaifo mīshtichi, māfi Abraham fenafokī, ea nikakapo a ēfe kaifomafo feta ē mato yoinō. Māfi Epa Nios chanīmara fapaikai. Nā meka sharaōnoa nikakāfe Epa Niospa āfe Fake nīchiniki noko ifipakexanō. <sup>27</sup> Nā Jerusalén ano ikafāfe āto xanīfofo feta tāpinifoma Jesús tsoamāki. A inōpokoai yoikī aōnoa kirika kenenifori tsōa tāpiyameama, pena tenetitīa ichanāti pexe mēraxō anefikakī. Nāskakaxō reteyameafo nā aōnoa yoikī kenenifo keskakōifakī. <sup>28</sup> Afaa chakafaito ōiyamafikakī retepaikakī. ‘Ato retemafe,’ yorafāfe Pilato fanifo. <sup>29</sup> Nāskakē nā aōnoa yoikī kirika kenenifo keskakōifakī, mā askafayameafo retekaxō ifi cruz ikakinoa fotomapakefōfākaxō mafa kini mēra maifanifo. <sup>30</sup> Akka mā mafa kini mēra maifafafono Epa Niospa otofayamea. <sup>31</sup> Mā oxa ranāta a Galilea anoax Jerusalén ano afe foitafāfe atoki nokoaito ōiyameafo. Nāfāfe judeofo Jesúsnoa ato yoikani.

<sup>32-33</sup> “Nāskakē na meka shara aōnoa nō mato yoi, Epa Niospa nōko xinifo yoini keskafakī. Mā noko askafaxokōia nō āto fenafokē. Nāskakē Epa Niospa mā retefitafono Jesús otoayamea. A kirika Salmo ano kenea iskai:

Mī ēfe Fake. Iskaratīa ē mia nima,  
ixō kenenifo. <sup>34</sup> Niospa afetīama yoiyoni iskafakī:

Mī nafiano ē mia otofaxii mī yora pisiyamanō,  
ixō yoinino, nānorikōi aōnoa kirika kenenifo:

Chanīma, nā ē David yoini keskafakī ē mia sharafai,  
ixō Niospa yoini. <sup>35</sup> Nāskakē ana aōnoa yoikī yōra keneni iskafakī:

Epa Niosi, mī Fake mī kexesharai āfe yora pisinōma,  
ixō keneni. <sup>36</sup> Chanīma, David nayoxoma ato īkiyopaoni, Niospa yoiaino. Nāskax chipo nani āfe xinifo nāpa keskai, nā āfe xinifo mai anori David maifanifo. Anoax āfe yora pisini. <sup>37</sup> Akka Jesús mā nafiakē Epa Niospa otoani. Ato āfe yora pisinima. <sup>38-39</sup> Efe yora mīshtichi, mā nō mato yoimis māri tāpisharakāfe, māto chaka mā soapaimākai Jesúsxō mā atiro. Mā chanīmara faito aōxō Epa Niospa mato chaka soaxotiro. Akka a Moisés noko yoinioxōkai nōko chaka nō soatiroma. <sup>40</sup> Kexemesharakāfe a inōpokoai yoikī Niospa meka yoimifāfe kenenifo keskai mā askatiroki. Iskafakī yoinifo:

<sup>41</sup> Akka ĕ yoiaito mǎ ea nikakaspai, ekeki kaxemet-samayanǎ. Nǎskakĕ ĕ afarafō akaito ōiax rateyanǎ mǎ nai iskarafō nō ōimisma ikax. Nǎskakĕ mǎ chanĭmara famisma, fetsafǎfe mato yoifiaifono, ixō kenenifo,” ixō Pablo ato yoini.

<sup>42</sup> Mǎ Pablo afe rafeafō fe judeofǎfe āto ichanǎti pexe mĕranoax tsekefainaifono, nǎ judeofofǎfema ato iskafanifo: “Mǎ noko yoia keskafakĭ pena teneti fetsatĭa noko anǎ yoifaix-akǎfe,” ixō ato yoinifo. <sup>43</sup> Mǎ ichanǎti pexe anoax ichanǎi xateafono, judeofo feta yora fetsafǎfe a Epa Nios Ifofaafō keskafakĭ akairi Epa Nios Ifofapaikani ato fe fonifo, Pablo fe Bernabĕ foaifono. ato fe foaifono ato iskafanifo: “Nofe yora mĭshtichi, Niospa mato yoiai anori tǎpisharakǎfe. Niospa mato afara sharafaxōfai keskara shinǎkǎfe inimayanǎ,” ato fanifo.

<sup>44</sup> Nǎskata afianǎ pena fetsa pena tenetitĭa, pexe rasi anoax yora ichapakōifo ichanǎnifo nōko Ifǎfe āfe meka shara nikakani. <sup>45</sup> Nǎskaifono judeofǎfe ato ōinifo yōrafǎ rasichi Pablo yafi Bernabĕ ato nikaifono. Nǎskakĕ ōitifishkikōinifo. Nǎskaifono judeofo Pablōki ōitifishkiyanǎ mekafakĭ chakafayanǎ ĭchanifo. <sup>46</sup> Ato askafaifono Pablo feta Bernabĕ mesetama ato kemanifo ato iskafakakĭ: “Nō mato Niospa meka sharaōnoa yoikĭ taefafiaino, mǎ nikakaspamis. Nikakaspaxkai mǎ Epa Nios fe ĭpanakama. Nǎskakĕ nǎ judeofoma nō ato yoikai. <sup>47</sup> Nǎskakĕ nōko Ifǎfe noko nĭchini iskafakĭ yoivanǎ:

Ĕ mato nĭchi oa luzpa keyokōi chaxa keskara faxō, eōnoa mǎ ato yoifotanō, efe ĭpaxanōfo. Maifo tii anoa na chai ikafo ari kaxō mǎ ato yoitanō,”

ixō noko nĭchini.

<sup>48</sup> Ato askafaifono nikakani, a judeofoma inimakōinifo. Nǎskaxō yoinifo iskafakakĭ: “Nōko Ifǎfe āfe meka sharakōi,” fanifo. Nǎfǎfe chanĭmara fakōinifo a Niospa ato katoafō afe ĭpanakafora ikaxō. <sup>49</sup> Nǎskakĕ nǎ mai anoafō, nōko Ifǎfe āfe meka sharaōnoa ato yoifofǎsafanifo. <sup>50</sup> Ato askafaifono judeofo nǎ kĕrofo isharakōimisfo fe mekanifo, a pexe rasi anoa xanĭfofo feri inifo. Nǎskakaxō ato yoinifo Pablo yafi Bernabĕ ato chakafakĭ ato omiskōimata a mai anoxō ato potanōfo. <sup>51</sup> Ato askafaifono Pablo feta Bernabĕ āto sapato tsekakaxō taatakanifo yorafǎfe ato tǎpinōfo. Nǎskanax Pablo fe Bernabĕ Iconio ari fonifo. <sup>52</sup> Akka nǎ Nios Ifofaafō inimakōinifo, Epa Niospa Yōshi Shara ato fe ikano, mǎ Pablo fe Bernabĕ foaifono.

## 14

*Pablo fe Bernabĕ Iconio ano inifo*

<sup>1</sup> Mā fokanax Pablo fe Bernabé Iconio ano nokonifo. Nānoax judeofāfe ichanāti peXe mēra ikifainifo. Nānoxō Niospa meka sharaōnoa ato yoiainifo ato nikakōisharayanā ato chanīmara fanifo, judeofāfe yora fetsafo feta. <sup>2</sup> Askaifono judeofāfe ato nikakaspakakī, a judeofoma ato yoinifo iskafakakī: “Ato nikayamakāfe āa chanīkani kiki,” ato fanifo Pablo yafi Bernabé nikanōfoma. <sup>3</sup> Ato askafafiaifono Pablo fe Bernabé nāno ato fe iyopaonifo. Nānoxō nōko Ifoōxō mesetamakōi ato yoipaonifo. “Nōko Ifāfe noko chaka soaxotiro Nios fe nō ĩpaxanō,” ixō ato yoinifo. Nāskaxō afama mīshtifo fakakī ato ispanifo. Askafaifono Niospa ato noikī ato ōimani aōxō ato yoinōfo. <sup>4</sup> Akka yorafāfe peXe rasi Iconio anoxō anoris shinānifoma. Ranārito judeofo chanīmara faifono, ranāritori Pablo yafi Bernabé chanīmara fanifo.

<sup>5</sup> Nāskaifono judeofo yora fetsafo fe xanīfofo fe yoinānifo, Pablo yafi Bernabé ato tokirinī tsakakī omiskōimaxikakī. <sup>6-7</sup> Ato askafapaiyaifono Pablo feta Bernabé mā tāpikanax Iconio anoax Listra ano fonifo, nānoax Derbe ano fonifo. Nā peXe rasi Listra fe Derbe Licaonia mai ano ini. Nāskakē nānoafo Niospa meka sharaōnoa ato yoifofāsafanifo.

### *Listra anoxō tokirinī Pablo tsakaketsanifo*

<sup>8</sup> Listra ano feronāfake finimisma ika ini, kafāsamisma chatomāiax. Nāskarapa kāini tsoa ini. <sup>9</sup> Pablo yoiaito nikai. Nāskaito Pablo aas ōikī shināni na feronāfake Jesús sharafatiroraka chanīmara faito ixō shināni. <sup>10</sup> Nāskaxō fāsikōi yoini iskafakī: “Fininākafāfe,” faino, koshikōi fininākafānax kafāsani. <sup>11</sup> Pablo askafaito ōikani, yorafo Licaonia mekapa mekanifo iskakani: “Aicho, na nios rafe nokoki fotoaki yora keskarakanax,” ikanax yoinānifo.

<sup>12</sup> Nāskakaxō Bernabé na nōko nios Zeus fakaxō, Pablorigo ato yoiaito, “Na nōko nioskōi Hermes,” fanifo. <sup>13</sup> Zeus kīfiti pexeya ini peXe rasi chaima, peXe efapa ini. Nā mēraxō na nōko niosra ikaxō Nioskōima kīfipaonifo. Nā peXe mēra yonomisto Pablo yafi Bernabé shināmaxō fakkafoya charofo fexonifo. Nāfāfe yorafo feta mā niosra ixō ato fakka retexopainifo ato ināxikakī.

<sup>14</sup> Akka ato askafaifono Bernabé feta Pablo mā tāpikaxō, āto rapati faxtenifo, ato niosra faifono āto ōiti mēraxō shinākōikaki. Nāskakaxō ato mēra ikifaikata fāsikōi ato yoinifo <sup>15</sup> iskafakakī: “¿Afeskafakī mā noko na rafe niosra mā noko faimē? Nōkai niosma. Nōri mato keskara, nō mato meka shara yoiyoi oa na afarafo nōko niosra mā famis a chakafo mā potanō a chakafokai afama. Nāskaxō nā Nioskōi nīpanaka Ifokōi fakāfe, nai yafi mai fakafāri onifaniki. Nai mēranoafo onifata, nono mai anoafo onifata fakafāri mēranoafo onifani. <sup>16</sup> Nā iyopaonifāfe afara chakafakī xateafomano Epa Niospa

ato xatemanima ãa anõfo. <sup>17</sup> Nãskafiaifono Niosxõ afarafõ sharafakakĩ ato õimanifo, tãpinõfo Nios tsoamãki. Akka nãato mato oi imaxona, mãto fanafõri mato fofaimasharaxona, a mã piãiri mato inãsharataifa, mã inimasharakõinõ,” Pablo feta Bernabé ato fani.

<sup>18</sup> Ato askafakĩ yoifikakĩ ato xatematiroma inifo, ato fakka retxopaiyaifono nõko niosra ixõ ato inãpaikakĩ.

<sup>19</sup> Ato askafaifono judeofo Antioquía anoax fekãta Iconio anoax fenifo. Ato pãrai fekani, “Pablo feta Bernabé mato pãrakani,” ixõ ato yoinifo. Ato askafaifono Pablo tokirinĩ tsakaketsanifo. Mã nõ reteara ikaxõ xarafokaxõ pexe rasi pasotai potanifo. <sup>20</sup> Askafaifono a Jesús Ifofaafo a mãnão niakekaxõ õiaifono Pablo fininãkafani. Askata finikaini pexe rasi mẽra anã kani. Nãskata nãnoax pena fetsa Bernabé fe Derbe ano kani.

<sup>21</sup> Derbe anoxõ Niospa meka sharaõnoa ato yoiaifono yõrafã rasichi ato nikakaxõ Nios Ifofasharakõinifo. Mã ato yoikanax Lистра ano fenifo, nãnoax Iconio ano fenifo, nãnoax Antioquía ano nokonifo. <sup>22</sup> Nãriafo a Nios Ifofaafo ato yoifofãsafakakĩ ato inimamakõinifo, “Isharakõikãfe Nios nikakõisharayanã. Epa Nios xanĩfo fe ipaxakakĩ, nai mẽra oyoamano nono mai anoax mã omiskõi finakõitiro,” ixõ ato yoinifo. <sup>23</sup> Nãskatari Pablo feta Bernabé a Nios Ifofaafo anoafõ a ato kexeaifo xanĩfofo katonifo, Nios chanĩmara fakõinafono. Mã foni teneyanã Epa Nios kifikaxõ iskafakakĩ: “Epa Niospa, ato kexesharafe mia chanĩmara fakani kiki,” ixõ yoinifo.

*Pablo fe Bernabé anã Antioquía ano fenifo nã Antioquía Siria mai ano ini*

<sup>24</sup> Mã anoax fokakĩ Pisidia finõfãikanax Panfilia ano nokonifo. <sup>25</sup> Nãskakata Perge anoxõ Niospa meka sharaõnoa ato yoikata, Atalia ano fonifo. <sup>26</sup> Nãnoax kanõanãfãnẽ fonifo Antioquía ano anã fokani. Nã Antioquía anoxõ ato nĩchinifo. “Niosnoax fokaxõ ato yoisharatakãfe,” ixõ ato nĩchiyameafono ato yoitakani anã fenifo. <sup>27</sup> Mã Antioquía ano nokoafono a Jesús Ifofamisfo ato fe ichanãfono anoxõ ato yoinifo a Niospa ato feta afama mĩshiti aka keskara. Iskafakĩ ato yoinifo: “Nõko Ifãfe a judeofoma ato chanĩmara famaino mã Ifofaafo,” ixõ ato yoinifo. <sup>28</sup> Nãskakanax Pablo fe Bernabé nã Nios Ifofaafo fe nãno ato fe iyopaonifo.

## 15

*Jerusalén anoax a Jesús Ifofaafo ichanãnifo*

<sup>1</sup> Nãskaifono feronãfakefo Judea anoax Antioquía ano fonifo. Mã nokokaxõ a Jesús Ifofamisfo ato yoinifo iskafakakĩ: “Moisés noko yoini iskafakĩ: ‘Foshki repa xateyamax nõ Nios ano katiroma,’ ixõ noko yoini. Nãskakẽ nã Moisés noko yoini

keskai nō askamis,” ixō ato yoinifo. <sup>2</sup> Ato askafaiifāfe nikakī Pablo feta Bernabé, “Maa, askarakaima. Fanīrira mā yoi,” ato fakanax ato fe feratenānifo. Ato askafaifono Pablo yafi Bernabé a Jesús Ifofamisfo fetsafori ato katokaxō Jerusalén ari ato nīchinifo a Jesúsxō āfe meka ato yoimisfoya a Nios Ifofaafo ato kexemisfo ato yōkatanōfo chanīmamakī.

<sup>3</sup> Nā Nios Ifofaafāfe Antioquía anoxō ato nīchiafo fokakī, Finicia yafi Samāria finōfāikakī ato yoifainifo: “A judeofofāfema Nios Ifofakakī mā āto chaka xateafora,” ixō ato yoiaifono nikakani a Nios Ifofaafo inimakōinifo.

<sup>4</sup> Mā Pablo fe Bernabé Jerusalén ano nokoafono, a Jesús Ifofaafo feta a Jesúsxō āfe meka yoimisfo feta a ato kexemisfofāferi ato ifinifo, ato iskafayanā: “Aicho, mā nokoki os-harakī,” ixō ato yoivanā. Ato askafaifono anoxō ato yoinifo a Niosxō afama mīshtifofamisfo. <sup>5</sup> Ato askafaifono nikaxō fariseofāfe Jesús Ifofakaxō ato iskafainifo: “Judeo yamafikaxō Nios Ifofakaxō āto foshki repa xatetirofo Moisés yoini keskafakī,” ixō ato yoinifo.

<sup>6</sup> Nāskaifono a Jesúsxō āfe meka ato yoimisfo fe ato kexemisfo fe ichanānifo tāpikakakī a yoiaifo keskara. <sup>7</sup> Mā ichapa yoināfono Pedro finināakafā ato yoini iskafakī: “Efe yora mīshtichi, mā mā ea tāpia afetiama Niospa ea katonī, mato mēranoa āfe meka shara a judeofoma ē ato yoinō, akairi chanīmara fakanax afe īpaxanōfo. <sup>8</sup> Niospa a shināifo keskara tāpikōia. Nāato ato tāpimani afe yora inōfo. Nāskaxō āfe Yōshi Shara ato mēra nanei, a nōmēra naneni keskafakī. Nāskakē keyokōichi tāpitirofo Niospa ato ifiaito. <sup>9</sup> Niospa atoya yora fetsa keskara noko ōima, nā yora fisti keskara noko ōi. Nā noko ani keskafakī āto chakari mā ato soaxona chanīmara faifono. <sup>10</sup> Akka māto xinifāfe a Moisés yoini keskara nikakōipaonifoma. Nāskarifiakī māri mā nikakōimisma. Akka a Moisés yoini keskara nikakōiyamafikatsaxakī, ¿afeskakī a judeofoma Jesús Ifofafiafono a Moisés yoini keskara nikakōikāfe mā ato famismē? Nāskakē afāferi nikakōitirofoma. Akka Jesús fistichi noko nimafitirono, ¿afeskakī mā chanīmara faimamē? <sup>11</sup> Akka Moisés yoini keskarato noko nimatirora ixō mā shināmis. Akka nōko Ifo Jesús nō chanīmara faito, noko noikōixō noko ifitiro afe nō īpaxanō. Nāskarifiakī a judeofoma ato ifitiro chanīmara faifono,” ixō Pedro ato yoini.

<sup>12</sup> Nāskakē anā toxa tooxinima, ato nikakani. Akka Pablo feta Bernabé ato yoinifo a Niospa atoōxō afama mīshtifo faa, judeofoma mēraxō. <sup>13</sup> Mā yoikī xateafono, Santiagori ato yoini iskafakī: “Efe yora mīshtichi, eari nikakapo ē mato yoinō. <sup>14</sup> Simón Pedro noko yoiyamea Epa Niospa a judeofoma ato noikī mā ato katoa āfe yorafo inōfo ixō noko

yoiyamea. <sup>15</sup> Nānorikōi a inōpokoai yoikakī a Niosnoa yoimisfāfe kenenifo. Iskafakī yoinifo na kirika keneano:

<sup>16</sup> Nāskata ē anā oxii a David āfe kaifāfe ea anā shinātama chaka shināifono, ato chaka soaxoxiki. Ato ōiti fepeaxosharayanā isharakōinōfo ea anā Ifofakanax. <sup>17</sup> Ea ōikakī fetsafāferi ea fenanōfo nā maitio ikafo feta nā ē ato ka-toafāfe ixō Epa Niospa yoini. <sup>18</sup> Nōko Ifāfe afetiama afama mīshti tāpiyoni,

ixō aōnoa yoikī kenenifo.

<sup>19</sup> “Nāskakē ē shinākī iskafai, nōko kaifāfema Nios Ifofapaiyaifono nō ato afara fetsa kerexkai amatiroma.

<sup>20</sup> Askatamaroko nō ato kirika kenexō fomanō iskafaki yoikī:

Na nōko niosra ikaxō afara onifakaxō nami ināfo piyamakāfe. Askatari māto āfima chotayamakāfe. Kēromāri āto fenemafo chotamayamanōfo. Askatari yoinā yafi afara inafakaxō tetoxakafo āfe imi foyamaito piyamakāfe, āfe imiri ayayamakāfe,

ixō nō ato kirika kenexō fomanō judeofoma. <sup>21</sup> Nā taeyoi ato yoipaonifo keskafakī, iskaratiāri pexefo anoxō a Moisés ato yoipaoni keskafakī ato yoikani. Mēxotaima ichanāti pexe mēraxō pena tenetitīa nā kirika anemisfo.”

### *A judeofoma ato kirika kenexō fomanifo*

<sup>22</sup> Nāskakata a Jesúsxō ato yoimisfāfe a ato kexemisfāferi a Nios Ifofaafāferi shinānifo a Nios Ifofaa fetsafo katoxikakī, Antioquía ano ato nīchixikakī Pablo fe Bernabé foaifono. Judas yafi Silas ifinifo, nā Judaspa āfe ane fetsa Barsabás ipaoni. Na feronāfake rafe isharakōiafo a Nios Ifofaafāfe ato fapaonifo.

<sup>23</sup> Nāskakaxō mā foaifono ato kirika kenei inānifo ato foxotanōfo, iskafakī ato yoikaxō:

Nōfi Jesúsxō āfe meka yoikatsaxakī, ato kexemisfo feta a Jesús Ifofafo nō mato kirika kenexō fomai, mā tāpinō. Efe yora mīshtichi, mā nōko kaifoyamafekē nō mato meka shara fomai, Antioquía anoa fomata Siria anoa fomata Cilicia anoa fomata nō mato fai. <sup>24</sup> Mā nō tāpia yora fetsafo nonoax foitafo nō ato nīchiyamafiano, mā foitaxakakī mato yoikakī āto mekapa mato fekaxtefakani, fanīrira mato yoikakī nō ato anori yoiyamafekē fanīrira mato yoiaifono mā ato tāpipai. <sup>25</sup> Nāskakē ichanāxō nō shinā feronāfake fetsafo katoxiki noko anoax fokaxō mato ōitanōfo. A nō ato noiai Bernabé yafi Pablo nō katoa. <sup>26</sup> Nā Bernabé feta Pablo nōko Ifo Jesucristoōnoa ato yoipafiaifono ato retepaimisfo ato nikakaspakakī. <sup>27</sup> Nāskakē Judas yafi Silas nō nīchia mā fokaxō mato yoisharakōinōfo nā nō mato kenexona keskafakī. <sup>28</sup> Nā Niospa Yōshi Sharapa shināi keskafakī nānorikōi nō shināi. Afaa fetsa nō mato yoipaima.

Akka nã sharafinakõia nõ mato yoipai mã nikanõ: <sup>29</sup> Na nõko niosra ikaxõ afara onifakaxõ yoinã retexõ inãfo piyamakãfe. Askatari ãfe imi ayayamakãfe. Yoinã ina fakaxõ tetoxakaxõ ãfe imi foyamaito piyamakãfe. Askatari mãto ãfima chotayamakãfe, kērofãferi ãto fenema chotamayamanõfo. Akka nã nõ mato yoiai anori mã nikasharakõiax, mã isharakõikai. Nã tii nõ mato yoi na kirikaki kenexõ, ixõ ato yoinifo.

<sup>30</sup> Nãskakaxõ Jerusalén anoxõ ato nĩchiafono Antioquía ano fonifo. Mã fokaxõ a Nios Ifofaafõ ato ichanãfakaxõ kirika ke-nea ato inãnifo. <sup>31</sup> A Nios Ifofaafãfe kirika anexõ õikani, inimainakõinifo, “Aicho, noko kirika kenexõ manamakakĩ noko inimamasharakõikani,” ikanax. <sup>32</sup> Judas yafi Silas Niospa ato shinãmanaino Niospa meka tãpikaxõ Niosnoa meka shara ato yoikakĩ ato inimakõiyã ato nikamasharakõinifo ãto mekapa a Nios Ifofaafõ. <sup>33</sup> Nã Antioquía ano ato fe iyopaonifo. Nãno ato fe ikafono nã Nios Ifofaafãfe ato nĩchinifo iskafakĩ ato yoiyã: “Tanaima fosharatakãfe,” ato faifono, tanaimakõi fosharakõinifo a anoxõ ato nĩchiameafo ano. <sup>34</sup> Akka Silas anã Jerusalén ano kanima nãno ato fe nēteni. Judas fisti kani. <sup>35</sup> Akka Pablo fe Bernabéri fonifoma, Antioquía ano nētenifo anoxõ fetsafo feta nõko Ifoõnoa meka shara yoixikakĩ.

*Pablo afianã kani Jesúsnoa meka shara pexefo tii ari ato yoikai*

<sup>36</sup> Mã askakãta Pablo Bernabé yoini iskafakĩ: “A Nios Ifofaafõ nõ anã ato õikanõ fokãfe pexe rasi anoafõ a nõko Ifoõnoa meka shara nõ ato yoikĩ taefaniano afeskax ikafomãki.” <sup>37</sup> Bernabé Juan iyopaini ato fe kanõ, nã Juan ãfe ane fetsa Marcos ipaoni. <sup>38</sup> Akka Pablo iyokaspani. Nã Marcosmãi Panfilia anoax ato makinoax nēteyameano, ato feta yonokaspakĩ. <sup>39</sup> Askai feratenãkanax anoax paxkanãfainifo. Bernabé Marcos Chipre ano iyoikai kanõanãfãne nanekaini. <sup>40</sup> Akka Pablo Silas ifini afe kaxiki, afeta Niospa meka shara ato yoi axiki. Askaito õikakĩ a Jesús Ifofamisfãfe ato Nios kĩfixonifo fosharakõitanõfo Niospa ato kexesharanõ. <sup>41</sup> Mã fokakĩ Siria yafi Cilicia anoafõ Jesúsnoa meka shara ato yoifofãsafainifo, a Nios Ifofaafãfe Jesúsnoa tãpisharakõinõfo inimasharaxikakĩ.

## 16

*Timoteo ato fe kani Pablo feta Silaspa Niospa meka sharaõnoa ato yoikai foaifono*

<sup>1</sup> Pablo fe Silas pexe rasi Derbe ano nokonifo, nãnoax Listra ano fonifo. Nãnoa Nios Ifofaa fetsa ãfe ane Timoteo fichinifo. ãfe afa Judea kēro ini, Nios Ifofa, akka ãfe apa griego ini. <sup>2</sup> Nã Nios Ifofaafãfe Listra anoxõ Iconio anoafãferi,



“Na Timoteo feronāfake sharakōira,” fanifo. <sup>3</sup> Pablo Timoteo iyopaini afe kanō. Akka iyoyoxoma āfe foshki repa xatemani, judeofāfe mekafoyamanōfo, māmāi tāpikaxō Timoteo āfe apamāi griegokē. <sup>4</sup> Askata mā fokakī a pexe rasi anoafo a Jesús Ifofamisfo ato yoifainifo, nā Jesúsxō āfe meka yoimisfo feta, a Jesús Ifofamisfo ato kexemisfāfe Jerusalén anoxō ato yoitafo anori. <sup>5</sup> Ato yoiaifāfe nikakani a Jesús Ifofamisfāfe Jesús chanīmara fakī finasharakōinifo. Askatari a Jesús Ifofaifo ichapakōi kainifo pena tii.

*Pablo namakē ōia keskara fani feronāfake Macedonia anoa*

<sup>6</sup> Akka Niospa Yōshi Sharapa, Asia mai ari ato nīchikaspani, arixō Jesúsnoa meka shara ato yoipaifiaifono. Nāskakē Frigia yafi Galacia finōfainifo. <sup>7</sup> Fokanax Misia mai xatea ano nokonifo. Nānoxō Bitinia ano fopaikakī shinānifo, ari fopaiyaifono Jesús āfe Yōshi Sharapa ato nīchikaspani. <sup>8</sup> Nāskakē Misia finōfaini fokanax Troas ano nokonifo. <sup>9</sup> Nānoxō Pablo fakishi namakē ōia fani, feronāfake Macedonia anoato nīxō yoikī iskafaito: “Nono Macedonia ano ofe noko tāpimaxiki,” ixō yoiaito ōini. <sup>10</sup> Nāskara ōixō Pablo ato yoini iskafakī: “Itipinīkāfe nō Macedonia ano kanō, Niospa ari noko nīchipai kiki arixō Jesúsnoa meka shara nō ato yoinō,” noko fani.

*Pablo fe Silas Filipos ano inifo*

<sup>11</sup> Nā Troas anoax nō kanōanāfānē nanekaini ĩamāfā nakirafe mai toomāfā ano kai āfe ane Samotracia ano. Nānoax kaax pena fetsa Neápolis ano nō nokoni. <sup>12</sup> Nānoax nō anā kani Filipos ano. Nā Filipos ano romanō xanīfokōifo ipaonifo nānoa āto pexe rasi sharafinakōia ini, nā Macedonia mai ano. Nāno nō oxa ranāyoni. <sup>13</sup> Nānoax pena tenetitīa pexe rasi anoax nō tsekekainikax faka ketokonō nō kani, nō shinā anoxō judeofāfe Nios kīfikanira ixō. Nāno tsaioxō Niosnoa meka shara kērofo nō yoini ano ichanāfono. <sup>14</sup> Nānoa fetsa āfe ane Lidia ini pexe rasi Tiatira anoa. Nā kēromā sama fexta nana sharakōi ato minimis ini. Askatari Nios shinākōimis. Nāskaxō Pablo Jesúsnoa yoiaito nikakōisharaito ōikī nōko Ifāfe āfe ōiti fepeaxosharakōini. <sup>15</sup> Nāskaito ōikī afe yorafoya maotisafanifo faka mēra ikimakī. Nāskaxō noko yoini iskafakī: “Mā ea iskafaikai, mī nōko Ifo ifofaki mā ea faikai, ēfe pexe ano oxai fekāfe,” noko fani. Noko askafaino nō nēteyoni.

<sup>16</sup> Nāskata pena fetsa a Nios kīfimisfo ano nō kaino nāno nokoki xomaya nokoni niafaka chaka a mēra naneano. Nāato ato ōnāxomis ini. Āto inakōima ini, āa ato onāxomis. Aōxō kori ichapa fimisfo ini. <sup>17</sup> Nā xomayato noko chīfafaini Pablo fe nō kaino fāsikōi mekayanā noko yoifoni iskafakī: “Na

feronāfakefofi Nios nā keyokōi finōato āfe inakōifoki. Afeskax nō Nios fe ipaxatiromāki noko yoi feafo,” ixō yoini.

<sup>18</sup> Pena tii noko askafafofāsa fani. Noko askafaito Pablo mā fekaxtexō anā teneyamakī, iflakekafā nā niafaka yōshi chaka xomaya mēra nanekē iskafani: “Jesucristoōxō ē mia yoikai na xomaya makinoax tsekekaitāfe,” fani. Askafaino a makinoax niafaka chaka tsekekaini.

<sup>19</sup> Pablo askafaito ōikakī, akka a xomayato āfe ifofāfe shināchakakōinifo anā afaakema, anākairoko aōxō kori fikani. Nāskakaxō akiki ōitifishkikakī Pablo yafi Silas achikaxō xanīfo finakōia ano iyonifo. <sup>20</sup> Nāskakaxō xanīfofo ano ato iyokaxō iskafakī ato yoinifo: “Na judeo rafeta nōko pexe rasi anoa ato chakafakī mekafakani. <sup>21</sup> Nō mato yoisharaira ikaxō nā imisfo keskapaikī anori ato yoipaikani. Akka nōa nō chanīpaima, askara yoikī nō feyafaima nōmāi romanōfoxō,” ixō ato xanīfofo yoinifo.

<sup>22</sup> Ato askafaiāfe nikakani yorafā rasi atoki ōitifishkinifo Pablo yafi Silaski. Nāskakaxō āto xanīfofofafē ato yoinifo ato rapati fiakaxō ato chati koshanōfo. <sup>23</sup> Ato koshakī finakaxō karaxa mēra ato ikimanifo. Nāskakaxō a karaxa kexea yoinifo ato kexesharakōinō tsekeyamanōfo. <sup>24</sup> Yoikī askafaiāfe nikakī, a karaxa kexemisto oke mēra chaikōi ato ikimaxō tafara rafe oyatamaxō ato tsāoni.

<sup>25</sup> Ato askafafono Pablo fe Silas yamenakekafanaino Epa Nios kīfiyanā fanāinifo. Askaifono a ato fe karaxa mēra ikafāfe ato nikanifo. <sup>26</sup> Nāskaifono fāsikōi mai naya naya ikī, nā karaxa pexe simīto posa posa akōini. Nāskafaino āfe fepotifo fepekemei fetseni. Nāskaino a karaxa mēra ikafo cadenās mepekemei fetsenifo. <sup>27</sup> Askaino a karaxa kexea moināka fā ōia mā karaxa āfe fepoti fepekemei fetsea ōini. Askaito āfe espada tsekata āa retemepaini, mā tsekeafora ixō shināi. <sup>28</sup> Askaito Pablo fāsikōi yoini iskafakī: “Mīa retemeyamafe. Nō faki kaamaki,” faito nikakī.

<sup>29</sup> A karaxa kexeato āfe soraro fētsa, “Ea kirosī otaxō fexōfe,” fani. Mā fexoano koshekōi ichoni choayanā ratei, nāskax Pablo fe Silas niafono ato nāmā ratokonō mai chachipakefōfāni. <sup>30</sup> Nāskata fininākāfe mā ato kaimaxō ato yōkani iskafakī: “¿Afeskaxō ēfe chaka ē soatiromē Nios fe ipaxakī?” ixō ato yōkani.

<sup>31</sup> Ato askafaito nikakakī kemanifo iskafakakī: “Nōko Ifo Jesucristo chanīmara fafe Ifokōi faax mefe yorafo fe mī afe nīpanakakī,” fanifo.

<sup>32</sup> Nāskakaxō nōko Ifoōnoa meka shara yoinifo, a afe ikafori āfe pexe mēranoa ato yoinifo. <sup>33</sup> Ato askafafono nā fakish fistichi nā karaxa kexemisto a ato koshafo ano ato fāka

chokani. Ato askafaino āfe āfiyafi āfe fakefoya ato maotisafanifo, ato faka mēra ikimapakekakī Jesús chanīmara faifono. <sup>34</sup> Nāskaxō āfe pexe ari ato iyoxō ato pimani. Nāskax āfe āfi fe āfe fakefo fe inimakōini Nios chanīmara fakōikanax.

<sup>35</sup> Nāskata penama xanīfofōfāfe āto sorarofō nīchinifo a karaxa kexeafō ato yoitanōfo Pablo yafi Silas ato kāimanōfo.

<sup>36</sup> Nā karaxa kexeato Pablo yoini iskafakī: “Xanīfofōfāfe ea yoiāfo ē mato kāimanō. Mā mā tanaima kasharatiro,” faino,

<sup>37</sup> Pablo a ato kexeafō yoini iskafakī: “Nōri romanōfōfiano noko koshaketsafo yorafāfe ferotaifi, noko yōkasharakaxoma. Nāskakaxō noko karaxa mēra ikimanafō. Akka, ¿afeskakī one mā noko kāimapaimē? Āakōi noko kāimani fenōfo ato yoitakāfe,” Pablo ato fani.

<sup>38</sup> Ato askafaito nikakakī mā fokaxō sorarofāfe ato xanīfofo yoinifo. Ato yoiāifono nikakani ratenifo: “Nōri romānōfora,” ato faifāfe nikakanax. <sup>39</sup> Ato askafaiyono xanīfofo mā fokaxō ato iskafanifo, Pablo yafi Silas: “Nō mato tāpiama māri romanōfo fekē nō mato koshaketsaxō karaxa mēra nō mato ikimanaki. Na karaxa mēranoax kāikāfe, nōko pexe rasi anoax fōtaxikakī,” ato fanifo. <sup>40</sup> Mā karaxa mēranoax kāikanax Pablo fe Silas Lidia pexe ano fonifo. Nānoxō a Nios Ifofaafō Jesúsnoa meka shara ato yoikakī ato inimamakōinifo. Nāato yoikī askafakanax ato makinoax fonifo.

## 17

### *Tesalónica anoax mekai fetsenifo*

<sup>1</sup> Pablo fe Silas mā fokakī, Anfípolis yafi Apolonia finōfāikanax, Tesalónica ano nokonifo. Nā Tesalónica ano judeofāfe ichanāti pexe ini. <sup>2</sup> Pablo nā imis keskai pena tenetitīa ichanāti pexe mēra kapaoni. Tres simānā anoxō ani, anoax ato fe feratenāyanā a kirika ano Niospa meka kenenifoōnoa ato yoiyāna. <sup>3</sup> Anoxō ato yoini: “A Cristo omiskōiax nani. Mā nafiakē anā Epa Niospa otoani. Nā Jesúsnoa ē mato yoikai nāfi Cristoki,” ixō Pablo ato yoini.

<sup>4</sup> Ato askafaiāfe nikakakī atiri judeofāfe Jesús chanīmara fanifo. Mā Jesús chanīmara fakanax ato fe rafenifo. Askatari griegofāferi Nios chanīmara fakaxō Nios fāsi sharakōi fanifo, nā kērofo xanīfofo feta. <sup>5</sup> Askaifāfe ōikani judeofo noko anā nikakanimaraka ikanax, Pablo yafi Silas mepaikani ōititishkinifo. Nāskakaxō a yora xani chakafo ato fenaifokani fonifo, Pablo yafi Silas chakafakakī mekafanōfo, fetsafāfe pexefo tii anoxō ato nikanōfo. Nāskakanax Jasón pexe ano fonifo Pablo yafi Silas fenaifokani, ato kāimaxikakī yorafāfe ato omiskōimanōfo. <sup>6</sup> Akka Pablo yafi Silas anoa ato fichikaxoma, Jasón yafi a Nios Ifofamis fetsafo ato achikaxō āto xanīfofo ano ato iyonifo. Mā ato iyokaxō fāsikōi ato iskafanifo:

“Na feronāfakefāfe fanīma mīstixō ato chakafafofāsafamisfo. Akka mā noko ano feafo. <sup>7</sup> Na Jasón āfe pexe mēra ato ikimana. Nafāfe a romanō xanīfāfe yoimis anori anā nikakanima. Akka nāno nōko xanīfo fetsa āfe ane Jesús ikani,” ixō ato yoinifo.

<sup>8</sup> Ato askafaifāfe nikakani xanīfofo ōitifishkikī metsamanifo, noko anā nikakanimara ikanax. <sup>9</sup> Akka Jasón feta fetsafāfe a xanīfofo ato kori ināfono ato kāimanifo.

### *Pablo fe Silas Berea ano fonifo*

<sup>10</sup> Nāskakata fakishi Pablo fe Silas Berea ano fotanōfo koshikōi ato nīchinifo. Mā Berea ano nokokanax judeofāfe ichanāti pexe mēra ikifainifo. <sup>11</sup> Nā judeofāfe Pablo feta Silaspa ato yoiaifono ato nikakōipainifo, Tesalónica anoafu keskara inifoma. Ato nikasharapaikōikakī Niospa meka shara nikakōinifo. Nāskakata pena tii kirika fepekaxō ōinifo a ato yoiafo keskara chanīmamākī. <sup>12</sup> Nāskakē judeofāfe Jesúsnoa chanīmara fakōinifo. Askatari griegofāferi chanīmara fakōinifo. Kērofāferi nikakōinifo a feronāfakefāfe nikaifo keskafakī.

<sup>13</sup> Akka judeofāfe Tesalónica anoxō nikanifo Pablo Niosnoa meka shara Berea anoafu ato yoiaito. Nāskakanax Berea ari fonifo, mā ari fokaxō ato yoinifo Pablo mekafakī chakafanōfo. <sup>14</sup> Ato askafaifono, akka a Jesús Ifofamisfāfe Pablo koshikōi katanō nīchinifo fakafā kesemē ano. Akka Timoteo fe Silas fonifoma. Berea ano nētenifo. <sup>15</sup> Akka a Pablo fe fofaifo, afe fonifo pexe rasi Atenas ano. Nānoax anā feaifono Pablo ato yoini iskafakī: “Timoteo yafi Silas ea ato yoixotakāfe koshi ekeki fenōfo,” ixō ato yoini.

### *Pablo Atenas ano ini*

<sup>16</sup> Pablo Timoteo yafi Silas Atenas anoxō ato manayanā ōia Atenas anoxō afarafo ichapakōifo onifakaxō, “Na nōko niosra,” faifāfe ōi. Āfe ōiti mēraxō shināchakakōini. <sup>17</sup> Nāskakē Pablo nā judeofāfe ichanāti pexe mēranoax judeofo fe a judeofoma fe a Nios sharara faifo fe yoināni. Nāskatari a pexe emāiti niax yoināifo mēxotaima Pablo Jesúsnoa ato yoini. <sup>18</sup> Ato yoiaino yora fetsafo akiki fenifo afe feratenāxikaki. Nāfāfe shinānifo iskakakī: “Nā nō apaiyai keskafakī nō atiro noko inimamanō,” ixō shinānifo. Nāfāfe āto anefo epicureofo. Ranāri iskanifo: “Afara afeskara afiaino nō tenetiro,” ixō shinānifo. Nāfāfe āto anefo estóicofo. Nāfo epicureofo fe estóicofo Pablo fe feratenānifo. Iskafakī yoinifo: “Na mekakī finamisto ¿afaa noko yoipaimē?” ixō yoiaifono, fetsafāferi iskafanifo: “Nios fetsafoōnoa noko yoipai rakikīa,” ixō yoinifo. Nāskafakī fetsanifo. Pablo Jesúsnoa meka shara ato yoifiato, mā Jesús nafiax anā otoyamea ixō ato yoifiato nikakaspakakī. <sup>19</sup> Nāskakaxō Areópago ano Pablo iyonifo a anoax mēxotaima ichanākaxō

afarafo yoimisfo ano. Nānoxō yōkanifo iskafakakī: “Nō tāpinō na mī yoiai anori meka fenakōiki noko yoife. <sup>20</sup> Na mī noko yoiai anori nō nikamismaki. Afaa ikamākī noko yoife nō tāpinō,” fanifo. <sup>21</sup> Nā Atenas anoafō feta yora fetsafāfe anoxō ōikakī nikapaikōinifo a nikaifo keskara ato yoixikakī.

<sup>22</sup> Nāskaxō nā ichanāmisfo āfe ane Areópago anoxō Pablo ato nēxpakīa niinākāfe ato yoini: “Atenas anoafāfe, ea nikakapo, mē mato ōi mā Niosnoa nikapaikōiaito tāpipaikōiyanā. <sup>23</sup> Nā mā nios kīfimis ano kafasakī mē ōia. Nānoa ē fichia na nōko niosra ixō mā afara onifanixakī mā akiki kenekī iskafakē: ‘Nō na nios ōimisma,’ ixō mā aōnoa yoikī keneni. Nā nios ōikatsaxakīma mā kīfimis, nāōnoa ē mato yoi.

<sup>24</sup> “Nā Niospa keyokōi onifani, afama mīshtifo nai mēranoafōya mai anoafō onifani ato Ifo ixikī. Nā Nios yorafāfe peXe faafō mēra ikama. <sup>25</sup> Askatari ea afaa axokāfe ikima. Akka nāato keyokōi noko nima. Nō xakainō noko nefefaxoni, afara fetsafori ani.

<sup>26</sup> “Askata feronāfake fisti onifakī taefani, nānoax nā manifo tii kainōfo, nā mai tio ano ipaxakakī. Nāskaxō ato yoini, afe tii xinia akanimākai fanīra ikaxō. <sup>27</sup> Nāskakē Niospa yorafo onifani keyokōichi fenanofo tāpipaikakī. Akka fenakī fichitirofo. Chanīma, Nios chai ikama, noko chai faama. <sup>28</sup> Akka Niosnoax nō nia. Akka Niosyamakēkai nō nikeranama. Akka nā mato tāpimamisfāfe kenenifo iskafakakī: ‘Nō Niospa fenakōifo,’ ixō yoinifo. <sup>29</sup> Akka nō Niospa fenafōiaxō, nō shinātiroma Nios na yorafāfe afarafo onifaafō keskara inō, āa shināxō yorafāfe onifaafō keskara. <sup>30</sup> Askafiaifonokai Niospa ato afeska fanima. Akka iskaratīa keyokōi ato yoi āto chaka xatekaxō chanīmara fanōfo. <sup>31</sup> Nāskakē Niospa tāpiyoni afetīa ato ichanāfaimākai, a ato omiskōimanaitīa, fatofō sharafomākī askayamai fatofori chakafomākī. Nā feronāfake katonioxō ato askafaxii. Akka mā nafiakē Āpa otofaito keyokōichi ōinifo,” ato faito,

<sup>32</sup> a Jesús naax otoita nikakani, akiki kaxemetsamanifo. Ranārīto yoikī iskafanifo: “Mā nō nikakī a mī noko yoiaito, anā pena fetsa noko yoifaixāfe,” fanifo.

<sup>33</sup> Askafaifono a ichanāfo anoax Pablo kani. <sup>34</sup> Akka Pablo mā kaino atiri afe fonifo Jesús chanīmara fakanax. Dionisiori nāno ato fe ini, nā Dionisio Areópago anoxō ato fe ichanāxō ato yoimis ini. Kērori nāno ato fe ini, āfe ane Dámaris, kēro fetsafori ano ato fe inifo.

## 18

### *Pablo Corinto ano ini*

<sup>1</sup> Nāskata Pablo Atenas anoax kaax Corinto ano nokoni.  
<sup>2</sup> Nānoa feronāfake āfe ane Aquilaki nokoni. Nā feronāfake

Ponto pexe rasi anoa ini. Rama Italia anoax âfe âfi Priscila fe nokoita ini, nã Italia anoa âto xanĩfãfe âfe ane Claudio ato potaitano. Ato iskafayanã na judeofo Roma anoax fõtanõfo ixõ. Nãskakẽ Pablo ato õikai kani. <sup>3</sup> Nã Pablo nã akaifo keskafakĩ akairi pexe fakãki tãpia ini, karapa pexe fakĩ. Nãskakẽ nãno ato fe nẽteni, ato feta yonoxiki. <sup>4</sup> Nãskakẽ nãnoax mẽxotaima pena tenetiã ichanãti pexe mẽra kapaoni. Anoxõ judeofoya a judeofoma ato Jesúsnoa meka shara nikamapai chanĩmara fanõfo.

<sup>5</sup> Akka Silas fe Timoteo mã Macedonia anoax akiki nokoafono Pablo Jesúsnoa meka shara judeofo ato yoifofãsafani: “Jesúsfi Cristoki Niospa katonĩ âfe Fakekõi inõ,” ixõ ato yoini. <sup>6</sup> Ato askafaito nikakakĩ judeofãfe Pablo iskafanifo: “Jesúscai Cristoma. Mĩa mĩ chanĩ,” fakaxõ Pablo Ichaketsanifo. Askafaiãfe nikakĩ Pablo âfe rapatiõnoa atoki mapo taa taani mã anoax kakĩ ori fetsa ari ato iskafafãini: “Ë Niospa meka mato yoipafiaito mã ea nikakaspai. Mãto shinãmã mã iki. Nãskax naax mã Nios fe nĩpanakama. Ë mato yoisharapafiaito mã ea nikakaspai. Nãskakẽ na judeofoma ari ã kai ariafo ato yoixiki,” ixõ Pablo ato yoini.

<sup>7</sup> Nãato askafata âto ichanãti pexe anoax kãikaini feronãfake âfe ane Ticio Justo pexe ano kani. Nãato Epa Nios shinãkõikĩ kifipaoni. Nã ato ichanãti pexe chaima ika ini. <sup>8</sup> Feronãfake Crispa ichanãti pexe anoa âto xanĩfo ini. Nãato âfe âfi feta âfe fakefoyxõ nõko Ifo nikakõiyã chanĩmara fani. Askatari nã Corinto anoafãferi chanĩmara fakõinifo, Pablo Jesúsnoa meka shara ato yoiaito. Nãskakẽ chanĩmara faifono ato maotisafakĩ faka mẽra ato ikimapakenifo. <sup>9</sup> Nãskano fakish fetsa Pablo namakẽ õia fani, nõko Ifãfe yoiaito iskafakĩ: “Ratekima mẽxotaima ãfe meka sharaõnoa ato yoi xateyamafe. <sup>10</sup> Ë mefe ikaki mia tsõa afeska faima kiki. Na pexe rasi ano efe yorafo ichapa ikafokĩ,” ixõ yoini. <sup>11</sup> Nãskakẽ Pablo Corinto ano nẽteni. Anoxõ xinia fisti finõmata oxe seis ani. Nãnoxõ mẽxotaima Niospa meka ato yoipaoni.

<sup>12</sup> Akka Acaya mai anoax Galiõn xanĩfo finakõia ini. Nãnoax judeofo ichanãnifo Pablo achixikãki. Mã achikaxõ âto xanĩfo finakõia ano iyonifo. <sup>13</sup> Iskafakĩ âto xanĩfo yoinifo: “Na feronãfake ato pãrafofãsafai, yoipai mã Nios kifiki iskafatiro ixõ. A Moisés yoini anori ato yoima, fakirira ato yoi,” ixõ yoinifo.

<sup>14</sup> Pablo mã ato kemapaiyaito nã xanĩfo Galiõn judeofo yoini iskafakĩ: “Na feronãfake afara chakafakẽ, askayamakĩ ato retekẽ mã ea yoiaito ã mato nikakerana. <sup>15</sup> Akka nã mãto xinifãfe yoipaonifo keskaraõnoa mã yoita, a mãto kaifãfe ãfe aneõnoa yoita, a Moisés yoini keskaraõnoa mã yoi. Akka nã

mã apaiyai keskafakãfe, ã aõnoa afaa tãpipaimakai. <sup>16</sup> Nãskakẽ nonoax fotakãfe,” Galiõn xanĩfãfe ato fani. <sup>17</sup> Ato askafa fokaxõ Sóstenes achinifo nã ichanãti pexe anoa xanĩfo. Mã achikaxõ nãri seteketsanifo xanĩfãfe ferotaifi. Akka nã xanĩfo Galiõn aõ rafanã inima.

*Pablo anã Antioquia ano kani Niosnoa meka shara ato yoikai. Taeyoi kai rafenixakĩ anã kai fistini*

<sup>18</sup> Pablo Corinto ano oxaranãyoni. Nãnoax a Nios Ifofaafo makinoax kani Priscila fe Aquila afe fonifo. Nãskakata kanõnãfãfã nanefainifo Siria mai ano fokani. Mã fokanax akka Cencrea anoax kanõnãfãfã mẽra nanexoma Pablo ato testemayoni. Akka Pablo Nios yoiyoni: “Ë mĩõxõ afara axii, mĩ ea õiaino,” ixõ yoini. Akka mã axõ ato testemani tãpinõfo. Ë Nios afara afeskarafaxõara ikax. <sup>19</sup> Nãskata mã fokanax Efeso ano nokonifo. Nãno Pablo ato nĩchifaini Aquila yafi Priscila, ichanãti pexe mẽra kakĩ nãnoax judeofo ichanãfono ato fe yoinãxiki. <sup>20</sup> Nãnoxõ nẽtefapainifo. “Kayamafe nono nofe iyofe,” fanifo. Askafaifono akka Pablo nẽtekaspani. <sup>21</sup> “Maa, ã nẽtetiroma, mẽ kai,” ato fani iskafakĩ ato yoiyanã: “Epa Niospa ea nĩchiaino anã oxõ ã mato õiyoxii.”

Nãato askafata Pablo kanõnãfãfãfã nanekinãkafani Efeso anoax mã kai. <sup>22</sup> Mã Cesarea ano nokoax, Jerusalén ano kani a Nios Ifofaafo ato yoisharaikai. Mã ato yoita anã kani Antioquia ano. <sup>23</sup> Nãno ato fe ikatsaxakĩ, nãnoax anã kani Niospa meka sharaõnoa ato yoifofãsafaikai. Galacia anoxõ ato yoikĩ taefata, Frigia anoxori ato yoini. A Nios Ifofaafo ato inimamakõini, Niosnoa meka shara ato yoikĩ.

*Apolos Efeso anoafo Niosõnoa meka shara ato yoini*

<sup>24</sup> Nãskaifono Efeso ano judeo fisti nokoni ãfe ane Apolos pexe rasi Alejandría anoa ini. Nãato Niospa meka yoikĩ kirika kenenifo tãpikõia ini, xafakĩakõi ato yoimis. <sup>25</sup> Nãato nõko Ifo Jesúsnoa tãpikõixõ ato yoini, inimakõikai nã tãpia anori xafakĩakõi Jesúsnoa ato yoini. Askafixõ Jesúsnoa tãpisharaxõ nã Juan ato maotisafakĩ faka mẽra ato ikimani nã fisti tãpia ini. <sup>26</sup> Nãskata Apolos ichanãti pexe mẽraxõ ranotamakõi ato yoiaito nikakĩ. Aquila feta Priscila kenakaxõ ori iyokaxõ Niospa meka tãpimasharakõinifo nikasharakõinõfo.

<sup>27</sup> Nãskakẽ Apolos Acaya mai ano kapaiyaito nikakĩ a Nios Ifofaafãfe iskafanifo: “Nõ a Jesús Ifofamisfo kirika kenexõ fomanõ mia ifisharakõinõfo,” ixõ yoinifo. Apolos mã Acaya mai ano kaxõ, ato yoisharakõini. Ato askafaito nikakani Niosnoax inimasharakõinifo. <sup>28</sup> Nãnoxõ õiaifo judeofo Apolos yoini: “Jesús Niospa Fakemara,” faifono. Akka nã kirika keneaõxõ Apolos ato yoini iskafakĩ: “Nã nõ manai Cristofi Niospa Fakeki,” ixõ xafakĩakõi ato yoiaito tsõa kemanima.

## 19

*Pablo Efeso ano oni*

<sup>1</sup> Apolos Corinto ano iyoano, māchi keya ari fai tāpiato kaax Efeso ano Pablo nokoni. Nānoa Nios Ifofamisfo fichi-toshini. <sup>2</sup> “¿Mā Nios Ifofaxō Niospa Yōshi Shara mato mēra mā nanenimē?” ixō Pablo ato yōkaito, kemanifo iskafakakī: “Maa, nōkai aōnoa afaa nikayomisma, Niospa Yōshi Sharakai nō nikamisma,” fanifo.

<sup>3</sup> Askafaifāfe nikakī anā Pablo ato yōkani: “¿Afeskai mā maotisanimē?” ato faito, kemanifo iskafakakī: “Juan noko yoinino nō ini,” ixō yoinifo.

<sup>4</sup> Askafaifono anā Pablo ato yoini iskafakī: “Juan ato maotisafani afara chakafakatsaxakakī āto chaka xatepaiyai-fono Nios Ifofapaikakī. Iskafakī ato yoiyanā a chipo oxiai nikakōisharaxikāfe ixō ato yoini, Jesúsnoa yoikī,” ato Pablo fani.

<sup>5</sup> Pablo ato yoikī askafaino, nikakani nōko Ifo Jesús āfe aneōnoax maotisanifo fetsafāfe tāpinōfo. <sup>6</sup> Askafaifono ōikī Pablo ato māmāpakeaino Niospa Yōshi Shara ato mēra naneni. Nāskakanax meka fetsapa mekai fetsenifo. Niosnoa meka shara nikakaxō ato yoinifo. <sup>7</sup> A ato mēra Niospa Yōshi Shara nanea, doce feronāfake ini.

<sup>8</sup> Nāskaifono Pablo nāno ato fe ikax mēxotaima ichanāti pexe mēra kapaoni. Anoxō tres oxe ani. Niospa meka sharaōnoa ato yoiyanā ranotama, anoxō Nios xanīfoōnoa ato tāpimapaikōikī. <sup>9</sup> Ato askafafiaino atirifāfe nikakaspakakī yorafāfe ferotaifi mekafakī chakafanifo iskafakakī: “Nōkai Jesús chanīmara faima. Aōnoaxkai Epa Nios ari nō katiroma,” ixō yoiaifono, Pablo ato makinoax kakī a Nios Ifofafo ato iyonī, feronāfake āfe ane Tirano a anoxō ato tāpimamis ano. Nānoxō a chanīmisfo anoxō pena tii Pablo Jesúsnoa meka shara ato yoipaoni. <sup>10</sup> Anoxō Pablo Niospa meka sharaōnoa ato yoikī xinia rafe ani. Nā Asia mai ano ikafāfe nikasharakōinifo Niospa meka sharaōnoa. Judeofo feta a judeofofāfema nōko Ifo Jesúsnoa meka shara nikapaonifo. <sup>11</sup> Nāskakē Niospa Pabloōxō afama mīshtifo fakī ato ispani. <sup>12</sup> Nāskakē yorafāfe āto payōiro iyamata āto sama faxte pishta Pablo āfe yora ramākanifo. Nāskafata mā fokaxō a isinī ikaifoya a niafaka chaka naneafo ato ramānifo. Ato askafaifono a isinī ikaifo fe a niafaka chaka naneafo sharai fetsenifo.

<sup>13</sup> Nāskaifono atiri judeofāfe fofāsakakī niafaka chakafo yorafo makinoa pōtanifo pexefo tii fofāsakakī. Jesús āfe aneōxō niafaka chakafo yorafo makinoa ato pōtapainifo. Iskafanifo: “Niafaka chakafāfe, Jesús aneōxō Pablo noko yoimiski, akka nō mato yoikai ato makinoax tsekefaitakāfe,” ato fanifo.

<sup>14</sup> Nāskafapaonifo nā judeo āfe fake sietipa, nā judeo āfe ane Esceva ini. Nā ato Nios kīfixomisfāfe āto xanīfo ini. <sup>15</sup> Ato



askafaifono a niafaka yōshi chaka yora mēra naneato ato kemani iskafakī: “Ē Jesús ōimis, askatari Pablori ē tāpia. Akka, ĵmā tsoamē?” ato fata, <sup>16</sup> nā niafaka yōshi chakayato ato rapati faxteyanā, fāsikōi ato achixō ato seteketsayanā ato imi tofeni. Nāato askafakī fetsaino peXe mēranoax yorioma ichonifo. <sup>17</sup> Nāato askafaano Efeso anoxō judeofāfe yora fetsafo feta nikakani ratenifo. Nāskakaxō, “Nōko Ifo Jesús fāsi sharakōi,” fanifo.

<sup>18</sup> Nāskakaxō a Jesús chanīmara famisfāfe fēkaxō a afara chakafapaoni xakakī yorafāfe ferotaifi yoinifo. <sup>19</sup> Askatari a yōfe tāpiafāfe āto kirika fēkaxō yorafāfe ferotaifi koanifo, mā Jesús Ifofakaxō. Nā kirika kene ōiafo kopikōi ini, como cincuenta mil ini. <sup>20</sup> Nāskakē nōko Ifāfe āfe mekashara nikaket-sanifo Jesús Ifofamisfāfe ato yoiāifāfe, āfe kerex sharaōxō afama mīshtifo fakakī.

<sup>21</sup> Nāskafata Pablo shināni Macedonia yafi Acaya ano kaxiki. “Nānoax Jerusalén ano ē kaikai, Jerusalén anoax Roma ano ē kaikai,” ixō shināni. <sup>22</sup> Nāskaxō a afeta yonomisfo rafe Macedonia ano ato nīchini Timoteo yafi Erasto. Akka Pablo Asia ano nēteyoni.

### *Efeso anoax yorafo mekai fetsenifo*

<sup>23</sup> Nāskaifono nā Efeso anoafō mekai fetsenifo: “Jesúsfi Niospa Fakekī aōnoax nō Nios ari katiro,” Pablo ato faino, <sup>24</sup> nāno feronāfake āfe ane Demetrio ini. Nāato yonokī afarafo kori exe keskara oxokōi onifapaoni. Nā feronāfake afara onifakī tāpikōia ini. Nāskaxō kēro ōitsa onifani, na nōko niosra ixō āfe ane Artemisa. Ranāfaxō kēro ōitsa fakī kafāshara mīshtifo onifani. Nāskakē a afeta yonofaifāfe aōxō kori ichapa fipaonifo. <sup>25</sup> Nāskaxō Demetrio ato ichanāfani, a afeta yonomisfo ato iskafayanā: “Efe yora mīshtichi, mā mā tāpia kī nōko nios Artemisa yora keskara onifaxō, aōxō nō kori ichapa fimiski. <sup>26</sup> Akka mā mā ōimis nikayanā, na Pablo ato yoifofāsafamis iskafakī: ‘Na yorafāfe niosra ixō onifaafo, akai niosma,’ ixō ato yoi. Mā yora ichapafāfe chanīmara fakōinafo ato yoiāito nikakakī. Na Efeso anoafos ato yoiama, Asia mai anoafori ato yois. <sup>27</sup> Na Pablo yoiāi keskara mesekōi, ē shināchakakōi. Anā noko tsōa kori ināyamaino nō fenotiro, na nōko nios Artemisa anā tsōa kīfitiroma, nā maitio ikafāfe Asia mai anoxō kīfimisfo. Askatari a nōko nios kīfiti pexefā mēranoax anā ichanātirofoma,” ixō Demetrio ato yoini.

<sup>28</sup> Demetrio ato askafaito nikakani Pablori ōitifishkiyanā fāsikōi yoinifo iskafakakī: “¡Na Artemisa Efesio anoafō nā sharafinakōiafo, tsoa keskarama!” ikanax fāsikōi mekai fet-senifo.

<sup>29</sup> Nāskakanax peXe rasi anoax fekaxtei fetsenifo. Nāskakaxō Gayo yafi Aristarco achinifo. Nā rafe Macedonia anoa inifo, Pablo fe feitafo. Nāskakaxō a yora kaya ichanāfo ano ato iyonifo. <sup>30</sup> Ato askafaifono Pablo ato mēra ikipaini arixō yorafo yoixiki. Akka a Jesús Ifofaafāfe Pablo nīchikaspanifo, “Mia retetirofoki,” ikaxō. <sup>31</sup> Askatari a Pablo fe rafemisfāfe, xanīfofofāfe Asia mai anoxō ato yoinifo, Pablo yoitanōfo ato mēra ikiyamanō. <sup>32</sup> Nāskakē āa ranā ichanākanax fāsikōi mekanifo. Atirifāfe fetsa anori yoinifo. Nāskaifono ranārīto tāpinifoma afeskai ichanāfomākī. <sup>33</sup> Nāskaifono judeofāfe shinānifo, na yorafo chakai mekai taeafora noko fakanira ikaxō. Nāskakaxō Alejandro pītsikinifo ōiaifono ori nīxō ato yoitakāfe ikaxō. Nāskafaifono Alejandro niinākafā mēshaxō ato yoini iskafakī: “Mekayamakāfe, ē mato yoisharanō,” ixō Alejandro ato yoini. <sup>34</sup> Akka mā tāpikaxō Alejandro judeokē, fāsikōi āa ranā mekai fetsenifo, iskakani: “Na Efeso anoafāfe āto Artemisa sharafinakōia,” ikaxō.

<sup>35</sup> Askaifāfe ōikī a xanīfo kenexomisto, “Mekayamakāfe,” ato fani. Ato askafaito anā tsoa mekanima. Nāskaxō ato yoini iskafakī: “Efesofo anoafāfe ea nikasharakāfe. Keyokōichi tāpiafo nōfi Efeso anoafokī, nā āto nios Artemisa āfe kīfiti pexefā nō kexemis. Nā onifafo nai mēranoax pakeafori nō kexemis. <sup>36</sup> Nāskakē āa chanīkanira tsoa itiroma. Nāskakē anā mekayamakāfe, afaa afeskafapaiyamakāfe shināsharaxoma. <sup>37</sup> Akka na feronāfakefo mā ato efea afaa chakafayamafiafono, askatari na pexefā mēranoa tsōa afaa oneyamafiano, askatari na nōko nios Artemisa tsōa chakafakī mekafayamafiano mā ato efea. <sup>38</sup> Akka na Demetrio afeta yonomisfo feta, a ato chakafapai xanīfofo ano ato iyotiro, anoxō ato yōkanō afaa chakafafomākī. <sup>39</sup> Nāskaxō afara fetsa mā yoipaikī nā ichanāfo anoxō mā yoitiro. <sup>40</sup> Mā iskaratīa ato chakafai keskafakī xanīfofofāfe nikaxō nokori askafatirofo. Na yorafāfe afaa chakafayamafiamisfono, afeskakī mā yōachepeimē xanīfofofāfe noko faifono nō ato kematiroma,” ixō a xanīfo kenexomisto ato yoini.

<sup>41</sup> Ato yoikī askafata ato nīchiaino fonifo.

## 20

### *Pablo Macedonia ano kata Grecia ariri kani*

<sup>1</sup> Mā mekakani nishpafono Pablo a Nios Ifofaafō kenani ato yoisharaxiki. Mā ato yoisharata, ato makinoax kani Macedonia ari kai. <sup>2</sup> Mā kaxō nāriafo Jesúsnoa meka shara ato yoifofāsafakī a Nios Ifofaafō ato inimamakōini. Nāskata Grecia ano nokoni. <sup>3</sup> Nānoxō tres oxe ani anoax kanōanāfānē Siria ano kapaikī, nikani judeofāfe kexeafono retepai kakī.

Nāskakē fāi kakī, Macedonia anā finōfaini. <sup>4</sup> Mā kaino feronāfake ranāri afe fonifo. A feronāfake fetsa āfe ane Sópater Berea anoa ini. Āfe apa ane Pirro ini, Aristarcori ini, Segundori ini, nā Segundo Tesalónica anoa ini. Fetsari Gayo, Derbe anoa ini. Fetsari Timoteo ini. Askatari Tíquico fe Trófimo Asia mai anoa inifo. Nā tii Pablo fe fonifo. <sup>5</sup> Nā tii rekē fokaxō Troas anoxō noko mananifo. <sup>6</sup> Akka mā fista senēano chipo nō kani. Nā fistaŧia pāa faraxaxoma pimisfo ini. Nāskata Filipos anoax kanōanāfānē nō kai cinco nia mā nō oxax Troas ano nō atoki nokoni. Nāno nō siete nia oxayoni ato fe.

*Troas ano ōikai Pablo kani*

<sup>7</sup> Nāskata mā pena nomīkoaino nō ichanāni pāa kaxke mīshtixō pixiki a Jesús noko nāxoyamea shinākī. Anoxō Pablo a Nios Ifofaafō yoini, mā penama kaxiki yamenake kafanaino ato yoikī xatani. <sup>8</sup> Nānoax pexe kene keya fomākīa anoax nō ichanāni, a rāpari ichapa ōtai fetsea anoax. <sup>9</sup> Nāskaino naetapa āfe ane Eutico pexe kene fomākīa āfe naisti anori tsaoni. Pablo ato chaikōi yoiaino nā naetapa oxakatsaini. Nāskax mā oxachāi kaax pexe kene fomākīakōinoax pakeax nakē chishtoinīfōfānifo. <sup>10</sup> Nāskakē Pablo fotopakekafā chishtoinīfōfā nā naetapa ikōni, ato iskafakī yoiyanā: “Rateyamakāfe, naamaki,” ato fani.

<sup>11</sup> Nāskafata anā pexe fomākīa Pablo māpeinīfōfāxō ato pāa kaxkeketsaxoni ato feta pixiki. Nāskaxō ato yoikī pena fani. Mā penano Pablo kani. <sup>12</sup> Ato askafaino nā naetapa nafiax mā otokē afe yorafāfe xanēnē iyonifo. Askafakī Pablo ato inimamakōini.

*Troas anoax Pablo Mileto ano kani*

<sup>13</sup> Akka nō kanōanāfānē rekē kani, Aso anoxō Pablo ifixiki. Akka noko iskafakī yoini: “Ē fāi kaikai rekē fokāfe,” ixō noko yoini. <sup>14</sup> Nā Aso anoa noko fichiax nofe feronāfake kani. Nāskax Mitilene ano nō nokoni. <sup>15</sup> Nāskata nānoax nō tsekekainax pena fetsa Quío mai nō finōfaini kaax pena fetsa Samos fai fototai nō nokoni. Anā anoax kaax pena fetsa pexe rasi Mileto ano nō nokoni. <sup>16</sup> Akka Pablo Asia ano samarakapainima. Efeso anori kakaspani, Jerusalén ano koshi nokopai ato feta fista Pentecostés apai.

*A Nios Ifofaafō ato kexemisfo Efeso anoafō meka shara Pablo ato yoini*

<sup>17</sup> Mileto anoxō Pablo ato kenamani, Efeso anoxō Nios Ifofaafō ato kexemisfo. <sup>18</sup> Mā feafono ato iskafani: “Mā mā ea ōimis ē isharakōiaito nā ē oitachāi. Na Asia mai anoxō ē afaa afeska fama ē isharakōia Jesúsnoa meka shara mato yoi. <sup>19</sup> Mēxotaima ē mato mēra itiani, nōko Ifo yonoxoni. Ē mato yoi ē oiatiani Nios mato Ifo sharafamapai. Askatari

ea omiskōimanaifono ĕ omiskōimis judeofāfe ea askafaifono.  
<sup>20</sup> Akka ea askafafiaifono Jesúsnoa meka shara ĕ mato yoikī xateima. A meka sharakapafō ĕ mato yoimis. Ranotamakōi ĕ mato yoimis, ichanāti pexe anoxō yoita a mātō pexekōifo anoxori ĕ mato yoimis. <sup>21</sup> Judeofo yoita a judeofomari mē yoimis āto chaka xatekaxō Nios Ifofanōfo nōko Ifo Jesucristori chanīmara fakōinōfo.

<sup>22</sup> “Akka iskaratīa Jerusalén ano ĕ kai, Niospa Yōshi Sharapa ea nīchiaino. Ĕ tāpiama arixō ea manafo ea afeskarafakani. <sup>23</sup> Akka mē tāpia Niospa Yōshi Sharapa ea yoiaito, pexe rasi anoxō ea karaxa mēra ikimakaxō ea omiskōimakani. <sup>24</sup> Akka ea askafafiaifono ĕ shināchakaima. Nā Epa Niospa ea amapaiyai keskara fisti ĕ shināi. Epa Niospa keyokōi yorafo noikōi na meka shara ato yoitāfe ea fani. Nā ea yoini keskara ĕ apai.

<sup>25</sup> “Ĕ mato mēraxō Nios xanīfoōnoa ĕ mato yoimis. Akka mē tāpikōia anā mā ea ōinakama. <sup>26</sup> Nāskakē ĕ mato yoipai. Na fetsafāfe ea nikakaspamisfo ĕ ato yoipaifaiito tsōa ea nikamisma. Nāskax omiskōixikani. Nāskakē ĕ ato afeskafatiroma, mē ato yoimis. <sup>27</sup> Mē mato yoimis a Niospa fichipaiyai keskafakī ĕ mato yoikaspamisma. <sup>28</sup> Nāskakē kexemesharakāfe, a Nios Ifofaafori ato kexesharakāfe. Niospa Yōshi Sharapa mato īkināki, a Nios Ifofaafo mā ato kexesharanō. Jesús nokoōnoax nai āfe imi foniki. <sup>29</sup> Mē mato makinoax kaano, chipo a fanīrira yoimisfo chakafo fekani mato fanīrira yoipaikani. Oa poomānā chaxo fichixō pitiro keskafakī mato pārapaikani mā anā Jesús shinānōma. <sup>30</sup> Afianofi mā fetsa mā ranā mā pārānōnāxii nō Niospa meka tāpiara ixō mā ato pārāxii, a Nios Ifofaaafāfe mato nikanōfo. <sup>31</sup> Kexemesharakōikāfe, akka shinākapo. Tres xinia ĕ ani Niospa meka sharaōnoa mato yoikī. Penata yoita, fakishi yoikī ĕ mato famis, Niospa meka sharaōnoa ĕ mato yoi ĕ oiamis.

<sup>32</sup> “Akka efe yora mīshtichi, iskaratīa ĕ Epa Nios kīfi mato kexesharanō, a mato noiai keskafakī āfe meka shara mato mēra nanenō. Nāato āfe kerex sharaōxō āfe meka shara mato inātiro mato mēra nanesharanō askatari a yoiyoni keskafakī afe yorakōifo ato afara ināsharakōitiro afe ĩpaxanōfo. <sup>33</sup> Ĕakōi ĕ afaa fipaimisma, askatari ĕ mato kori yōkamisma, rapatiri ĕ tsoa yōkamisma. <sup>34</sup> Askatamaroko ĕfe mifikōichi ĕ yonofaito mā mā ōimis, a ĕ fichipaiyai fixiki, a efe ikafori ato ināxiki. <sup>35</sup> Mē mato ōimamiski afeskaxō mā yonotiromāki, a omiskōiaifo ato axosharayanā. Nōko Ifo Jesús āfe meka sharaōnoa shināyanā fetsafāfe noko afara ināino nō inimatiro keskai, ‘Nōri fetsafo afara ināsharai nō inimaifinakōitiro,’ ixō nōko Ifāfe noko yoini,” Pablo ato fani Efeso anoafō.

<sup>36</sup> Mā ato yoikī askafata ratokonō mai chachipakefofā Pablo ato Epa Nios kīfixoni. <sup>37</sup> Anoax keyokōi oiayanā Pablo ikōketsayanā kokoketsanifo. <sup>38</sup> Shināmitsakōinifo: “Ē anā mato ōinakamara,” ato faino, askakāta afe fakafā kesemē fonifo Pablo kaito ōifokani. Nāskax Pablo kanōanāfānē nanekaini mā kai.

## 21

### *Pablo Jerusalén ano kani*

<sup>1</sup> Anoa a Nios Ifofaafo nō ato ōifaini, kanōanāfānē nō nanekaini kaax Cos ano nō nokoni. Anoax kaax pena fetsa Rodas ano nō nokoni, anā anoax kaax Pátara ano nō nokoni. <sup>2</sup> Nā Pátara anoxō kanōanāfā nō fichini Fenicia ano kaino, nāno nō nanekaini. <sup>3</sup> Kakī fakafā nakirafe Chipre mai toomāfā nō ōifaini. Nā Chipre mai nōko pōya mishkiori ini. Nā finōfaini kaax Siria ano nō nokoni. Nānoxō pexe rasi Tiro fai fototai nokoxō kanōanāfā mēranoa afama mīstiffo māpemanifo. <sup>4</sup> Nānoa a Nios Ifofaafo nō ato fichini, nāno nō ato fe siete nia oxani. Nāfāfe Pablo yoinifo Niospa Yōshi Sharapa ato shināmanaino iskafakakī: “Jerusalén ano kayamafe. Anoxō mia retepaikani kiki,” ixō yoinifo. <sup>5</sup> Askafaifono mā siete nia finōta nō anoax kaino, keyokōi āto āfiffo fe āto fakefo fe nofe fonifo pexe rasi pasotai. Nānoxō nā māshifā anoxō ratokonō mai chachipakefofā nō Epa Nios kīfini. <sup>6</sup> Nāskata mā nō kakī nō ato yoisharaketsata, kanōanāfā mēra nō naneinākafani, akka atii anā fenifo āto pexe ano.

<sup>7</sup> Nāskata kanōanāfānē nō kai Tiro ano nō nokoni, nānoax kaax Tolemaida ano nō nokoni. Nānoax a Nios Ifofaafo fe nō ato fe yoināsharakōini, askatari nāno nō ato fe oxa fishtiyoni. <sup>8</sup> Nāskata nānoax kaax pena fetsa Cesarea ano nō nokoni. Nānoax Felipe pexe ano nō kani. Nā Felipe Niospa meka shara yoisini. A Jesús Ifofaafāfe afetiāma Felipe ifinifo Jerusalén anoxō a piaifo ato paxkaxonō. Seis feronāfake fetsafoya Felipe ifinifo ato feta yononō. Nāato pexe ano nō nēteni. <sup>9</sup> Felipe fake xotofake cuatro inifo fenemais. Nāfāfe Niospa Yōshi Sharapa ato shināmanaino ato yoipaonifo. <sup>10</sup> Nāno nō oxa ranāni, nāno Judea anoax feronāfake āfe ane Agabo nokoki nokoni. Nāato Niosnoa yoisini ini, a inōpokoai yoikī. <sup>11</sup> Mā noko ano nokoxō, Pablo āfe nanexemeti fiāta, aō metexkere ita aō otxekere ini. Nāskaxō ato yoini iskafakī: “Niospa Yōshi Sharapa ea yoi Jerusalén anoxō judeofāfe na nanexemeti ifo iskafaxikani. Nāskaxō yora fetsafo ināxikani,” ixō Agabo ato yoini.

<sup>12</sup> Noko askafaito nikakī Cesarea anofo feta, “Jerusalén ano kayamafe,” nō Pablo fani. <sup>13</sup> Askafaifono Pablo noko kemani iskafakī: “¿Afeskakī mā oiayanā mā ea

shināmitsamanimē? Mē itipinīshara ea nexayamakakī ea retekani Jerusalén anoxō, nōko Ifo Jesúsxō ea askafakani,” Pablo noko faito, <sup>14</sup> nō anā afaa fanima noko nikayamaito. Nāskaxō nō yoini iskafakī: “Nōko Ifāfe nā mia apaiyai keskafanō,” ixō nō yoini.

<sup>15</sup> Mā askata nō itipinī fani, nāskax nō Jerusalén ano kani. <sup>16</sup> Nō kaino a Nios Ifofaafo ranāri nofe fonifo Cesarea anoax. Nāfāfe noko iyonifo feronāfake āfe ane Mnasón peixe ano, nā Mnasón Chipre anoa ini. Nāato afetiama Nios Ifofakī taefani. Nāskaxō āfe peixe anoxō noko ifini ano nō oxanō.

### *Pablo Santiago ōikai kani*

<sup>17</sup> Mā nō Jerusalén ano nokoano a nofeta Jesús Ifofamisfāfe noko ifinifo nokoki inimakōiyanā. <sup>18</sup> Askata pena fetsa Pablo nofe kani Santiago ōikai. A Nios Ifofaafo ato kexemisfori nāno inifo. <sup>19</sup> Mā atoki nokoxō Pablo ato yoisharakōini. Nāskaxō ato yoipakeni a Niospa aōxō a judeofoma ato chanīmara famakōikē.

<sup>20</sup> Ato yoiaito nikakakī, “Nios fāsi sharakōi,” fanifo. Nāskaxō Pablo yoinifo iskafakakī: “Nofe yorashta, nō mia yoisharapai, mā mī ōimiski na judeofāfe ichapakōichi mā nōko Ifo Jesús chanīmara fafiakaxō, nāfāfe a Moisés yoini keskara nika-paikōimisfo. <sup>21</sup> Nāfāfe yoiafo judeofo a yora fetsafo mēra ikafo mī ato yoikē iskafaki: ‘A Moisés yoini keskara nikayamakāfe,’ ixō mī ato yoikē, ‘Askatari mātō fakefo foshki repa xateyama-kāfe, askatari a mā imis keskai anā askayamakāfe,’ ixō mī ato yoimiskē. <sup>22</sup> Akka, ¿nō afeskaimē, yorafāfe nikakani mā mī nono oano? <sup>23</sup> Akka nā nō mia yoiai keskafe. Na cuatro feronāfakefāfe Nios yoiafoki iskafakakī: ‘Epa Niosi, mī noko yoia keskai nō askakōikai,’ ixō yoiafoki. <sup>24</sup> Akka na cuatro feronāfake fe Nios yoiti pexefā mēra katāfe, nō imis keskai ato fe ife mātō chaka soaxikakī. Mī ato kopifaxōfe mato testeaifono. Mī ato askafaito ōikakī keyokōichi tāpitirofo a mīōnoa yoiaifo āa chanīkani. Askatamaroko mīri a Moisés yoini keskara mī nikakōimis. <sup>25</sup> Akka a judeofofāfema a Jesús Ifofaafāfe mā chanīmara fakōinafo. Akka mā nō ato kirika kenexona iskafakī: ‘Nō nami pitiroma na nōko niosra ixō afara onifakaxō fetsafāfe ināfono. Askatari yoināfo āfe imiri nō ayatiroma. Askatari yoinā ina fakaxō tetoxakafo āfe imi foyamaitori āfe nami nō pitiroma, askatari nōko āfima nō chotatiroma, kēromāri āfe fenema chotamatiroma,’ ixō nō ato yoia,” Pablo fanifo.

### *Nios kīfiti pexefā mēraxō Pablo achinifo*

<sup>26</sup> Nāskafaifono nā cuatro feronāfake Pablo ato iyonī. Nāskata pena fetsa ato fe Nios kīfiti pexefā mēra ikini, āto chaka soaxikakī. Nāskata a Nios kīfiti pexefā mēra ikikaini xanīfo

yoixiki a Epa Niospa yoini keskara afetia keyoimakai, na tiitori yoina retexo Epa Nios inapaikaki.

<sup>27</sup> Ma siete nia ikano judeofo Asia mai anoax fokaxo Nios kifiti pexefa anoa Pablo oikaki yorafo yoinifo Pablo chakafaki mekafanofo. Ato askafaifono Pablo achinifo. <sup>28</sup> Ma Pablo achikaxo fāsikoi ato yoinifo iskafakaki: “Israelifafe, nofeta nakifekape, a na feronafake kafasaki yorafo ato parafofasa famiski. Noko maifo tii anoa ato chakafaki yoimiski. Askatari a Moisés noko yoini anori nikayamakafe ato fai. Askatari noko Nios kifiti pexefa chakafaki mekafai. Askatari noko Nios kifiti pexefa sharafinakōifiano chakafaa, a mera noko kaifoma griego yorafo ikimana,” fanifo. <sup>29</sup> Akka taeyoi Pablo oinifo pexe rasi ano na Tróximo fe kafasaito. Na Tróximo Efeso anoa ini. Na Pablo noko Nios kifiti pexefa mera Tróximo ikikinaki ixo shinanifo aa yamafiano.

<sup>30</sup> Naskake pexe rasi anoax mekai fetsenifo, naskaifono yorafo nikaferakani ichonifo. Naskakaxo Pablo achikaxo Nios kifiti pexefa meranoa kaimanifo. Naskata Nios kifiti pexefa koshikoi feponifo. <sup>31</sup> Naskaxo ma chaima reteaifono, romanō anoa sorarofafe ato xanifafe nikani pexe rasi Jerusalén anoafafe yōachēpeaifafe. <sup>32</sup> Naskaifafe nikaki a soraro xanifafe a afe rafeafoya afe sorarofa ichanafani. Naskaxo ato fe koshikoi ichoni yorafo mera, a soraro xanifo afe sorarofa fe kaito oikaki ana tsōa Pablo seteketsanima enerisafanifo.

<sup>33</sup> Naskata a soraro xanifafe ma Pablocki kaxo ma achixo, cadenās rafeta ato metexkere amani. Naskaxo chipo yokani tsoamaki, askatari afaa afeska faamaki. <sup>34</sup> Akka askafaino yorafo fanirira mekai fetsenifo anoris yoinifoma. Naskai mekai fetseaifono soraro xanifafe tapitiroma ini. Naskaxo sorarofa mera ato iyomani. <sup>35</sup> Ma chaima sorarofa mera nokoikaino, anoxo yorafafe retepaiyaifono, sorarofafe Pablo chishtokaxo iyonifo yorafafe afeska fanofoma. <sup>36</sup> Naskake keyokoi aho fokani fāsikoi mekafonifo. “Aa chaka reterisafakafe,” ato faafonifo.

### *Askafaifono yorafafe ferotaifi Pablo ato yoini*

<sup>37</sup> A sorarofa ika mera ma ikimaino, a sorarofafe ato xanifo Pablo yokani: “¿E mefe pishta mekatimō?” faito soraro xanifafe kemani iskafaki: “¿Griego mekapa mi mekatimō?” <sup>38</sup> Akka, mimamē a Ejipto anoa afetiana xanifo potapaiyana cuatro mil yorafo tsōa istoma iyonifo?” ixo xanifafe yokani.

<sup>39</sup> Askafaito nikaki Pablo kemani iskafaki: “Maa, ēma. Efi judeoki. Efi Tarso anoax fakeaki na pexe rasi Cilicia meranoax. Akka na yorafo ē ato yoino ea yoife,” faito, <sup>40</sup> na soraro xanifafe, “Mi ato yoitiro,” fani. Naskafaino Pablo kipiti ano

niinākafā mēshainākafā, “Mekayamakāfe,” oinoma ato fani. Mā ato nishpafaxō hebreo mekapa iskafakī ato yoini:

## 22

<sup>1</sup> “Efe yora mīshtichi, ea nikakāfe ē mato yoinō ea chakafafo keskara, ea anā chakafayamanōfo,” ixō ato yoini.

<sup>2</sup> Hebreo mekapa ato yoiaito nikakani, tsoa pishta tooxinima. Askaifono Pablo anā ato yoini, <sup>3</sup> “Ēri judeo. Tarso anoax ē fakea, Cilicia mai anoax. Akka ē nono Jerusalén anoax yosia, ēfe maestro Gamalielxō ē tāpia. Na Moisés nōko xinifo yoipaoni anori ē yoimis. Mēxotaima ē shinākōimis ēfe ōitifoyaxō ē Nios Ifofapaikī. Nā mā Nios Ifofapaiyai keskafakī ēri askafapaoni. <sup>4</sup> Taefakī a Jesús Ifofaifo ē ato omiskōimakī ē ato retepaipaoni. Nāskaxō ē ato achixō karaxa mēra ē ato ikimapaoni, feronāfakefoya kērofo. <sup>5</sup> A ato Nios kīfixomisfāfe āto xanīfofo feta a xanīfo fetsafāfe mato yoitirofo nā ē mato yoiyai keskara. Nāfāfe ea kirika kenexō inānifo, nofe yorafo judeofo Damasco anoafō ē ato foxotanō. Nāskax ē ari kani a Nios Ifofaafo ato fenaikai, ato achixō Jerusalén ano ato efexiki anoxō ato omiskōimaxiki,” ixō Pablo ato yoini.

*Pablo afeskaxō Jesús Ifofamāki ato yoini  
(Hch. 9.1-19; 26.12-18)*

<sup>6</sup> Anā Pablo ato yoini iskafakī: “Akka fāi kaikī mē chaima Damasco faikaino, nānoxō xini keya oa luz keskarato nai mēraxō ea chaxakōitani. <sup>7</sup> Ea askafaino ē nāmā pakeni. Nāskaxō mekaito ē nikani, ea iskafaito: ‘Saulo, Saulo, ¿afeskakī mī ea omiskōimanimē?’ ea faito. <sup>8</sup> Ea askafaito ē yōkani iskafakī: ‘¿Mī tsoamē, Ifo?’ ē faito ea kemani iskafakī: ‘Ēkīa Jesús Nazarete anoa, nā mī ea omiskōimanai,’ ea fani. <sup>9</sup> A efe foaifāfe luz keskarato ea chaxatanaito ōikani ratenifo. Akka a ea yoi mekaito tsōa nikanima. <sup>10</sup> Ea askafaito ē yōkani iskafakī: ‘¿Ifo, ē afeskatiromē?’ ē faito, nōko Ifāfe ea iskafani: ‘Fininākafāta Damasco ano katāfe. Anoxō ē mia yoi kaikai mī afaa afeskafaimākai,’ ea fani. <sup>11</sup> Akka anā ē fēro ōitiroma ini, nā luzpa ea fechaxki mā ea fēxoano. Nāskakē a efe foaifāfe ea mētsoxō Damasco ano iyonifo.

<sup>12</sup> “Nāno feronāfake āfe ane Ananías ika ini. Nāato Nios nikakōixō a Moisés yoini keskara nikakōipaoni. Nānoxō judeofāfe Damasco ano ikaxō aōnoa yoisharapaonifo. <sup>13</sup> Ē Damasco ano nokoano ekeki Ananías oni ea ōiyoi. Mā ekeki oxō ea iskafani: ‘Efe yorashta Saulo, anā ōife,’ ea faino koshikōi ē anā fēro ōini. Nāskaxō ē ōisharakōini. <sup>14</sup> Anoxō ea yoini iskafakī: ‘Nōko xinifāfe āto Niospa mia katoa, a mia amapaiyai keskara mī tāpinō. Askatari āfe Fake sharafinakōia mī ōinō, āfe meka sharafinakōia nikayanā. <sup>15</sup> Nāskaxō mī



ato yoixii Niosnoa, nã maniafo tii anoa, nã mĩ õiaifoya, nã mĩ nikaifo. <sup>16</sup> Nãskakẽ samarakakima koshikõ: fininãkafãta maotisafe faka mēra ikipakekafãfe nõko Ifãfe ãfe aneõxõ mia chaka soaxonõ, ea fani” ixõ Pablo ato yoini.

*Pablo ato yoini a judeofoma mēra Epa Niospa nĩchini*

<sup>17</sup> Anã Pablo ato yoini iskafakĩ: “Mẽ Jerusalén ano anã oax, Nios kĩfiti pexefã mēra ẽ kani anoxõ Nios kĩfikai. Nãnoxõ ẽ õia oa namakẽ õia ẽ fani. <sup>18</sup> Ẽ nõko Ifo õini ea iskafaito: ‘Nã Jerusalén anoax koshi tsekekaitãfe, mĩ eõnoa yoiaito mia tsõa nikaima kiki,’ ea fani. <sup>19</sup> Ea askafaito ẽ kemakĩ iskafani: ‘Ifo, mã ea tãpiafo nã ichanãti pexe mēranoafo kaxõ ẽ ato achixõ karaxa mēra ẽ ato ikimapaoni a mia Ifofaifo. Askatari ẽ ato koshaketsapaoni. <sup>20</sup> Askatari a mĩ inakõ Esteban reteaifono, ẽri nãno ato fe ini reteaifono. Nãskaxõ ẽ ato rapati kexexoni.’ <sup>21</sup> Ẽ askafaino nõko Ifãfe ea yoini: ‘Fininãkafãta fãi katãfe, mai fetsafo ari chaikõ ẽ mia nĩchikai a judeofoma ari,’ ea fani,” ixõ Pablo ato yoini.

*Soraro xanĩfãfe Pablo kexeni*

<sup>22</sup> Ato askafaito nikakani, akka fãsikõ yorafo mekainĩfõfãnifo: “Na feronãfake chaka retefe anã niyamanõ,” fayanã chakafakĩ mekafanifo. <sup>23</sup> Nãskakakĩ õitifishkikĩ finayanã fãsikõ mekakakĩ ãto rapati taa taa ayanã fomãkĩa mapo saakĩ fetsanifo. <sup>24</sup> Askafaiãfãfe nikakĩ a soraro xanĩfãfe ato yoini Pablo karaxa mēra ikimanõfo, koshaketsakaxõ, nãskafaiãfono ato yoinõ afeskai a yorafo akiki chakai mekakanimãkai. <sup>25</sup> Akka mã metexkereakaxõ koshapaiyaifono, a soraro xanĩfo fẽtsa Pablo yoini iskafakĩ: “¿Tsõa mia yoiamẽ mã romanõ koshanõ xanĩfo yõkaxoma?”

<sup>26</sup> Askafaito nikai a soraro xanĩfo ãfe xanĩfokõ yoikai kani iskafakĩ: “¿Mĩ afeska faimẽ, na feronãfakari nofe romanõ?”

<sup>27</sup> Askafaito nikakĩ soraro xanĩfokõ Pablo ano kani yõkai. “¿Mĩ chanĩmamẽ mĩ romanõmẽ?” ixõ yõkaito, “Ẽje, ẽri romanõki,” Pablo fani.

<sup>28</sup> Askafaito nikakĩ a xanĩfãfe yoini iskafakĩ: “Ẽ romanõ ixiki kori ichapa ẽ ato inãni, akka taeyoi ẽ romanõ iyopaonima,” faito nikaki, Pablo kemani iskafakĩ: “Akka ẽfi romanõkõiki,” fani.

<sup>29</sup> Ato askafaito nikakani a koiro fichi koshapaiyaifo a makinoax fonifo. Nã soraro xanĩfãfe mã tãpiax Pablo romanõkõikẽ nikai ratekõini cadenãnã ato metexkerekamax.

*Judeofãfe ãto xanĩfãfe ferotaifi Pablo yoini*

<sup>30</sup> Nãskata pena fetsa soraro xanĩfokõichi tãpipaikõikĩ judeofãfe aõnoa afaa yoiafomãkĩ, a cadenãnã menexafo mēpeni. Nãskaxõ ato ichanãfani a Niosnoa ato yoimisfo ato kexemisfoya, a xanĩfokõifo. Nãskaxõ Pablo kãimaxõ ãto ferotaifi nĩchini.

## 23

<sup>1</sup> A xanĩfofo õikĩ Pablo ato yoini iskafakĩ: “Efe yora mĩshtichi, nã Epa Niospa ea yoikĩ taefani keskai, nẽ askakõimis. Ëfe õiti mẽraxõ ã Nios shinãkõiyana ã sharakõimis,” ixõ ato yoini.

<sup>2</sup> Akka Ananías ato Nios kĩfixomis ãfe xanĩfo ini. Nãato a Pablo ketaxamei nia yoini Pablo apasnõ. <sup>3</sup> Askafaito õikĩ Pablo kemani iskafakĩ: “Epa Niospa mia koshai mĩkai afaa tãpiama. Mĩ ano tsaõxõ mĩ ea pãrai a Moisés yoini keskara nikaimara ixõ. Akka mĩroko a Moisés yoini keskara nikakapakĩ, mĩ ea ato apasmana,” ixõ Pablo yoiaino, <sup>4</sup> a anoxõ õiaifãfe Pablo iskafanifo: “¿Afeskakĩ a ato Nios kĩfixomis xanĩfo mĩ chakafakĩ mekafaimẽ?” faifono, <sup>5</sup> Pablo ato yoini: “Efe yora mĩshtichi, ã tãpiama nato ato Nios kĩfixomis xanĩfofiano. Akka kirika ano kenekĩ iskafanifo: ‘Mãto xanĩfo chakafakĩ mekafayamakãfe,’ ixõ yoinifo,” ixõ Pablo ato yoini.

<sup>6</sup> Nãskaxõ mã tãpixõ ano fisti ichanãfono saduceofoya fariseofo fãsikõĩ Pablo ato yoini: “Efe yora mĩshtichi, ãri fariseo, ãfe kaifofori fariseofo. Akka ea chakafakĩ mekafakani, yora naax ana ototirora ixõ ã chanĩmara faino.”

<sup>7</sup> Pablo ato yoikĩ askafaito nikakani, fariseofo fe saduceofo ãa ranã feratenãnifo. Nãskakanax ichanãkanax paxkanãnifo. <sup>8</sup> Akka saduceofãfe yoimisfo: “Naax nõ ana ototiroma,” famisfo. Askatari anokai ãjirima anorikai nõko yõshima famisfo. Akka fariseofãfe keyokõĩ chanĩmara famisfo. <sup>9</sup> Nãskakanax fãsikõĩ mekainĩfõfãnifo, akka nãno ranãri inifo a Moisés yoikĩ kirika keneni keskara ato tãpimamisfo. Nãfo fariseofo inifo, nãfãfe niinĩfõfãkaxõ yoinifo iskafakakĩ: “Na feronãfakekai afaa chakafama. Õitsai, yõshi sharapa yoyamãki Niospa ãjirinĩ yoia rakikã,” ixõ yoinifo.

<sup>10</sup> Ato askafaino fãsikõĩ mekai xatenifoma. Nãskakaxõ Pablo achikaxõ nini nini akanaifono nã soraro xanĩfo ratekõini. Nãskakẽ ãfe sorarofõ kenamani, ato anoa ifixõ ana ãfe pexe ano iyoikaxiki.

<sup>11</sup> Nã fakishi Pabloki nõko Ifo nokoxõ iskafakĩ yoini: “Pablo, inimafe. Na Jerusalén anoafõ eõnoa mĩ ato yoimis keskafakĩ na Roma anoafõri ato yoife,” fani.

*Pablo retexikakĩ itipinĩsharanifo*

<sup>12</sup> Nãskata pena fetsa ranãri judeofo yoinãnifo Pablo retexikakĩ. “Nõ Pablo retexoma nõ foni tenekĩ taefanõ, afaa piamata afaari nõ ayaimakai, noko Niospa retetiroki. Akka mã Pablo retexõ chipo nõ pixikai,” ikanax yoinãnifo. <sup>13</sup> Cuarenta feronãfakefo anori yoinãnifo. <sup>14</sup> Nãskakata nã feronãfakefo fonifo a ato Nios kĩfixomisfãfe ãto xanĩfofo fe a judeofãfe ãto xanĩfofo ikafo ano. Iskafakĩ ato yoifokani: “Nõ yoia iskafakĩ: ‘Pablo reteyoxoma, nõ foni teneyoi nõ afaa piyamata afaari

nõ ayaima. Nõ askayamaino Epa Niospa noko retetiro,' ixõ nõ yoia," fanifo. <sup>15</sup> "Akka iskaratĩa mã na xanĩfo fetsafo feta, na soraro xanĩfo yoikãfe mato ano penama Pablo efenõ. Feparaxõ yoikĩ iskafakãfe: 'Nõ Pablo yõkasharapaikai noko nĩchixõfe nõ yõkanõ afaa aõnoa yoiafomãkĩ,' ixõ yoikãfe. Oaito õikĩ nõ achixõ reterisafanõ," fanifo.

<sup>16</sup> Nãskaifono Pablo ãfe pĩaka nikani nõ Pablo retenõ ikai-fono. Nãskax sorarofõ mẽra kani anoa ãfe koka Pablo yoikai. <sup>17</sup> Mã Pablo nikaxõ, soraro xanĩfo fetsa kenaxõ yoini iskafakĩ: "Na naetapa xanĩfokõi ano iyotãfe, afara yoipai kiki," fani.

<sup>18</sup> Nã soraro xanĩfãfe ãfe xanĩfokõi kenaxõ yoini iskafakĩ: "Na karaxa mẽra ikato Pablo ea kenaxõ ea yoia na naetapa ã mikiki efenõ afara mia yoipai kiki," faito, <sup>19</sup> nã xanĩfokõichi nã naetapa mêtsofaixõ a fisti iyoxõ orixõ yõkani: "¿Afaa mĩ ea yoipaimẽ? Ea yoife," faito, <sup>20</sup> nã naetãpa yoini iskafakĩ: "Mã judeofo yoinãfo, mia yoixikakĩ mĩ penama a xanĩfofo ichanãfo ano mĩ ato Pablo iyoxonõ. Mia feparapaikani nõ Pablo yõkasharapai aõnoa nõ nikasharapai mia fai fekani. <sup>21</sup> Akka mia askafaifono ato nikayamafe. Cuarenta feronãfakefo fai nẽxpakĩa kexekaxõ ãfe koka manafoki achikaxõ retexikakĩ. Nõ Pablo retexii nõ foni tenekĩ taefanõ afaa piyamata afaari nõ ayaimakai. Nõ askayamaito Epa Niospa noko retetiroki. Akka mã Pablo retexõ chipo nõ pikai ikax yoinãfo, mã itipinĩkõikaxõ mia manafo mĩ ato afaaimãkai," ixõ nã naetãpa yoini.

<sup>22</sup> Askafaito nikakĩ a soraro xanĩfãfe nã naetapa nĩchini, "Na ea mã yoiai anori tsoa yoiyamafe," fayanã.

### *Pablo xanĩfo Félix ano nĩchinifo*

<sup>23</sup> Nãskaxõ a soraro xanĩfokõichi afe xanĩfo rafe kenaxõ ato yoini dos cientos sorarofõ yoixõ nĩchinõfo, askatari setenta kamayonõ fotanõfo, askatari dos cientos sorarofõ ashifoya fotanõfo Cesarea ari fõkani fakishi. <sup>24</sup> Nãskata kamayori ato itipinĩfamani a kamaki Pablo tsaoax kanõ. Nãskaxõ ato yoini kexesharata iyotanõfo xanĩfo Félix ano. <sup>25</sup> Nãskaxõ kirika kenexõ ato inãni a xanĩfo Félix foxotanõfo iskafakĩ kenexõ:

<sup>26</sup> Efe xanĩfo Félix, ãkĩa Claudio Lisias, ã mia kirika kenexõ fomai mia yoisharayanã. <sup>27</sup> Na feronãfake judeofãfe achixõ retepaiyaifono, akka ã nikaita ãri romanõki ikaito, nãskaito nikakĩ ãfe sorarofõ fe kaxõ ã ifita. <sup>28</sup> Afaa chakafaamakĩ ã tãpapaikĩ, judeo xanĩfofo ichanãfo ano ã iyoita. <sup>29</sup> Anoxõ ea yoiaifãfe ã nikaita, na Pablo a Moisés yoini keskara shinãima ea faifãfe. Akka afaakai chakafama retepanãfãfe, askatari karaxa mẽra ikimapanãfãfe. <sup>30</sup> Akka mẽ tãpia judeofãfe ea feparapaiyaifãfe Pablo retepai kakĩ. Nãskakẽ ã mikiki

nīchi. A Pablo chakafaifori nāfori ē mia ari nīchi, afaa Pablo chakafamākī mia yoinōfo. Nā tii ē mia yoi efe xanīfāfe, ixō kenenī.

<sup>31</sup> Āto xanīfāfe ato yoia keskafakī kexesharakōixō, fakishi Pablo iyonifo Antípatris ano. <sup>32</sup> Askata pena fetsa sorarofa atiri nēteferakani āto pexe ano fenifo a tãe foaifo. Akka a kamayonō foaifo Pablo fe fonifo. <sup>33</sup> Mā Cesarea ano nokokaxō xanīfo ano Pablo iyonifo, a āto xanīfāfe kirika kenexō manamana, nā xanīfo Félix inānifo. <sup>34</sup> Mā a kirika kene anexō, nā xanīfāfe Pablo yōkani: “¿Mī fanīamē?” faito, “Ē Cilicia anoa,” Pablo faito nikakī, <sup>35</sup> anā yoini iskafakī: “A mia mekafakī chakafaifo mā fēkaxō mīōnoa yoiaifāfe ē nikanō mia afaa fakanimākai ē ato manayonō,” ixō yoini. Nāskaxō sorarofa yoini Herodes xanīfo ika ano iyoxō Pablo kexesharakōinōfo.

## 24

### *Pablo xanīfo Félix yoini*

<sup>1</sup> Mā cinco nia oxata nā ato Nios kīfixomis xanīfokōi, āfe ane Ananías, Cesarea ano oni. Judeofāfe āto xanīfo fetsafo fe feronāfake fetsari ato fe kani, āfe ane Tértulo, nāato ato yoixomis ini. Nāfo xanīfo ano fonifo, Pablo chakafakī mekafaxikakī. <sup>2</sup> Mā nokoafono xanīfāfe Pablo ifitanōfo ato yoini. Mā efeafono nā Tértulo Pablo yōani. Iskafakī nā xanīfo Félix yoini: “Aicho xanīfo, mī noko ikinā nō isharakōiaki. Aicho mī tāpisharakōiaki nōko maitio anoafō mī ato yoisharakōimis noko chakafanōfoma. <sup>3</sup> Fanīmā mīshtixō mī askafaito nō nikamis. Nāskakē mī noko sharafamiskē nō mikiki inimasharakōimis. <sup>4</sup> Akka ē mia yoikī, ē mia chai samaratapaimakai. Nō mia yoiaito noko pishta nikayofe. <sup>5</sup> Na feronāfake mā nō ōimis ato fekaxtefamis, fakima mīshtifo kafāsakī ato pārafōsāfakī judeofāfe anoris shinānōfoma. Askatari āto xanīfo nazarenōfo ato mekamamis. <sup>6</sup> Askatari nōko Nios kīfiti pexefā chakafakī mekafaito nikakī nō achita. <sup>7</sup> Akka nā sorarofāfe āto xanīfo Lisias nomakinoa kerexkai ifita. <sup>8</sup> Anoxō noko yoikī iskafaita: ‘Māri Cesarea ano fotakāfe afaa Pablo chakafamākī, a xanīfo yoixikakī.’ Nāskakē nō mia ano oa. Yōkaxō mī tāpitiro nā afara chakafakē aōnoa nō yoiai keskara,” ixō yoiaifono, <sup>9</sup> judeofāferi ano fisti ichanākaxō, nānoriri yoinifo: “Chanīma,” fanifo.

<sup>10</sup> Askafaiifāfe nikakī xanīfāfe Pablo āfe mēkemā, “Mekafe,” faino, Pablo niinākaifā yoini iskafakī: “Inimakōikai ē mia yoi ē afaa chakafamisma. Mē tāpia na mai anoafāfe mī āto xanīfokōi, mā mī xini ichapa aka xanīfokī. <sup>11</sup> Akka mī ato yōkaxō mī tāpitiro ē oxa ichapama doce nia ē ika na Jerusalén ano ē oita anoxō Epa Nios kīfixikī. <sup>12</sup> Ē tsofe feratenāito ea ōimisfoma, Nios kīfiti pexefā mēraxori ē tsoa mekafamisma, ichanāti pexe mēraxori ē tsoa mekafamisma, askatari

a pexe rasi mēranoax ē tsofe feratenāito ea tsōa ōimisma. <sup>13</sup> Na yorafokai āa kaxpa chanītirofoma, ē afaa chakafaitokai ea ōiafoma. <sup>14</sup> Akka ē mia yoitiro nōko xinifāfe āto Nios ē shinākī ē kīfimis. Nōko Ifo noko yoipaoni keskafakī akka na yorafāfe āa chanīra ea famisfo. Akka a Moisés yoikī kirika keneni nāri ē chanīmara fakōimis. A Niospa ato shināmanaino yoipaonifori, nāfori ē chanīmara fakōimis. <sup>15</sup> Akka na ea yōaifāfe a yora sharafoya yora chakafo nafono Niospa ato otofaxii chanīmara famisfo keskafakī ēri nā akaifo keskafakī chanīmara famis. <sup>16</sup> Nāskakē mēxotaima ē isharapaikōimis, shināsharakōita. Niospa mā ea ōimis, yorafāferi mā ea ōimisfo.

<sup>17</sup> “Mai fetsa ari kafāsakī mē xini ichapa akatsaxakī, ēfe mai ano ē oita a afaamaisfo ato kori ināyoi, askatari a Nios kīfiti pexefā mēraxō Nios afara ināxiki. <sup>18</sup> Epa Niospa noko yoini keskarakōi ē faa. A nō imis keskai nē askakōikī Epa Niospa ferotaifi afaa chakafatama ē isharakōia. Akka yora ichapa ano efe ikafoma. Askatari anoax tsoa fāsi mekaitama. Akka atiri judeofo Asia mai anoax fenixakakī ea ōiafo. <sup>19</sup> Nāfāfe ē afara chakafaito ea ōifikaxō ¿afeskai afo feafomamamē, nonoxō ea yōaxikaki a ē afara chakafaito ōiafo keskara? <sup>20</sup> Akka afo feyamaifono, nā nonoafō mī ato yōkatiro ē afaa chakafaito ea ōiafomāki judeofāfe āto xanīfofofāfe ferotaifi. <sup>21</sup> Akka ē anoxō fāsikōi mekainākfā ē ato yoita iskafakī: ‘Yora naax anā ototiro,’ ixō ē chanīmara faito, mā ea chakafakī mekafai ixō ē ato yoita,” Pablo xanīfo fani.

<sup>22</sup> Akka na Félixpa Jesúsnoa tāpia ini. Nāskaxō shināni iskafakī yoianā: “Mā soraro xanīfo Lisias oxō ea yoisharaiy-onō ē tāpisharanō mī afaa chakafaamākī,” ixō yoini.

<sup>23</sup> Nāskaxō xanīfo Félixpa soraro xanīfo fetsa yoini anā Pablo karaxa mēra ikimayonō a āfe yorafāfe pimapaikakī ōipaiyaifāferi ato ikimanō.

<sup>24</sup> Mā oxa ranāta xanīfo Félix anā oni āfe āfi Drusila fe. Nā āfe āfi judeo kēro ini. Nāskaxō Félixpa anā Pablo kenamani. Mā oxō Pablo ato yoiaito nikanifo Jesús meka shara afeskaxō nō Jesucristo Ifofatiromākī. <sup>25</sup> Akka Pablo yoini afeskax nō isharatiromākī, askatari afeskax nōa nō kexemesharatiromākī. Jesús Ifofaxma naax omiskōipakenakafo ixō yoiaito nikai Félix ratekōini. Nāskaxō yoini iskafakī: “Iskaratīa katāfe ē mia anā kenaxikai afaa afeska fayamakī,” ixō yoini.

<sup>26</sup> Pablo askafaito nikakī Félixpa shināni ea Pablo kori ināno ē kāimatiro ixō. Nāskakī mēxotaima kenapaoni afe mekaxiki. <sup>27</sup> Nāskakī anoxō xinia rafe anifo. Nāskatari Félix tsekeni anā xanīfo inima, fetsa ini xanīfoi, āfe ane Porcio Festo. Akka Félixpa karaxa mēranoa Pablo kāimanima, judeofāfe aōnoa yoisharakōinōfo.

## 25

*Festopa ferotaifi Pablo yoini*

<sup>1</sup> Festo nokoni xanīfo ixiki. Mā tres nia ikax Cesarea anoax Jerusalén ari kani. <sup>2</sup> Nārixō a ato Nios yoixomisfāfe āto xanīfofōfāfe a judeo xanīfofo feta Pablo chakafakī mekafanifo. <sup>3</sup> Nāskaxō Festo yōkanifo Festopa ato yoinō Jerusalén ano Pablo iyotanōfo. Akka atiito shinānifo fai nēxpakīaxō nō Pablo retenōra ikaxō. <sup>4</sup> Askafaifāfe nikakī akka Festopa ato kemani iskafakī: “Pablo Cesarea ano karaxa mēra ika. Akka ari mē samama kai,” ato fani. <sup>5</sup> Nāskaxō ato yoini iskafakī: “Nāskakē mātō xanīfofo Cesarea ano efe fotirofo, na Pablo afaa chakafaamakī arixō yoixikakī.”

<sup>6</sup> Festo Jerusalén ano oxa ranāyoni. Nāskata Cesarea ano anā oni. Nānoxō pena fetsa a xanīfofo tsaomisfo anoxō tsoaxō ato yoini Pablo ifitanōfo. <sup>7</sup> Mā Pablo oano ōikakī, judeofāfe Jerusalén anoax fēkaxō, akiki fokaxō mekafakī chakakōi fanifo. Askafaifono, “Afaa Pablo chakafamākī ea yoikapo,” xanīfāfe ato faito, tsoa afaa inima Pablokairoko afaa chakafaito ōikanax āamāi noikaspakakī. <sup>8</sup> Askafaifāfe nikakī Pablo ato kemani iskafakī: “Ēkai afaa chakafama, a Moisés judeofo yoini keskarari ē chakafamisma, a anoxō Nios kīfiti pexefāri ē chakafamisma, askatari romanō xanīfori ē chakafakī mekafamisma.”

<sup>9</sup> Askafaito nikakī judeofāfe nōko xanīfo Festo sharakōira fanōfo Pablo yōkani iskafakī: “¿Mī Jerusalén ano kapaimē? Anoxō ē ōikanō mī afaa afeska famākī.”

<sup>10</sup> Askafaito nikakī Pablo kemani: “Ē ari katiroma mīrimāi romanōfāfe xanīfokē nonoxō ea yōkatirofo. Mā mī tāpia, ē judeofo chakafamisma. <sup>11</sup> Akka ē afara chakakōifaito ea ōikaxō ea retetirofo. Ea retekanira ikax ē meseima. Akka ē afaa chakafayamaito āa ea pārakaxō ea ari nīchitirofoma ea retenōfo. Akka ē xanīfo finakōia César ano ē kapai anoxō ea yōkanō.”

<sup>12</sup> Askafaito nikakī Festopa a afe rafeafo feta yoini: “Mā mī yoiaki xanīfo finakōi ari katāfe arixō mia xanīfāfe yōkanō,” fani.

*Xanīfo Agripa ano Pablo iyonifo*

<sup>13</sup> Mā ano ikatsaxakī pena fetsa xanīfo Agripa āfe chiko Berenice fe Cesarea ano fonifo Festo fe mekasharai fokani. <sup>14</sup> Nāri oxa ranāifono, Festopa Pabloōnoa xanīfokōi iskafakī yoini: “Na karaxa mēra feronāfake fisti ika Félixpa iki-mayameano. <sup>15</sup> Ē Jerusalén ano ikano a Nios ato kīfixomisfāfe āto xanīfofo fe judeofāfe āto xanīfofo ekeki fēkaxō Pablo chakafakī mekafaitafo iskafakī ea yoiyanā na feronāfake omiskōimafe ea faitafo.

16 “Ea askafaifono ĕ ato yoikĭ iskafaita: ‘Nō romanōfāfe askara feyafamisma nikasharaxoma nō tsōa retetiroma. A chakafakĭ mekaifaifo fe ato fe yoināmano, afeskakĭ aōnoa yoikĭ chakafakĭ mekafricanimākai.’ 17 Nāskakē mā nono Cesarea ano feafono, pena fetsa mē xanĭfoxō a xanĭfofo tsaomisfo ano tsoxō, ĕ ato manamayamea Pablo ifitanōfo. 18 Akka afaa chakafaamakĭ ea yoikapo ĕ ato fafiaino, tsōa aōnoa afaa chaka ea yoiaama. Afara chakafakĭ finakē ea yoikanira ixō ĕ shināfiaino. 19 Akka aōnoa yoikĭ iskafaifāfe ĕ nikaita: ‘Na Pablo Niosnoa yoimisfo anori yoima, a feronāfake Jesús mā nafianino, mā anā otoyamea,’ ixō yoimisfaifāfe ĕ nikaita. 20 Ē afeskaimē na yoiainoanokai ĕ tāpiama ixō ĕ shināita. Nāskaxō ĕ Pablo yōkaita, Jerusalén ano kapaimākai xanĭfāfe anoxō yōkanō a aōnoa yoiaino keskara.

21 “Ē askafaito ea Pablo yoikĭ iskafaita: ‘Ē anā Jerusalén ano kapaima. Nonoxō ĕfe xanĭfokōichi ea yōkatiro,’ ixō ea yoita. Ea askafaito ĕ ato yoita anā Pablo karaxa mēra ikimanōfo, nā ĕ nĭchiatĭa,” ixō Festopa yoiaino, 22 Agripa yoikĭ iskafani: “Ēri na feronāfake nikasharapaikōi,” ixō Agripa yoiaino, Festopa kemani iskafakĭ: “Mĭ penama nikatiro,” fani.

23 Nāskata pena fetsa Agripa āfe chiko Berenice fe rapati sharakōi safekanax xanĭfāfe pexe mēra ikinifo. Soraro xanĭfofo fe a pexe rasi anoa xanĭfofori ato fe ikinifo. Nāskaifono Festopa Pablo ifitanōfo ato yoini. 24 Mā Pablo efeafono Festopa xanĭfo Agripa iskafakĭ yoini: “Efe xanĭfo Agripa, a xanĭfo fetsafori nofe ichanāfāfe na feronāfakekĭa ōikapo. Judeofāfe ekeki efeafō aōnoa afara chaka yoianā. Jerusalén anoxō chakafamisfo, nono Cesarea anoxori chakafamisfo. Mēxotaima fāsikōi mekayanā retefe ea famisfo. 25 Akka afaa chakafakai ĕ ōima ĕ retepanā. Akka iskaito ĕ nika: ‘Ē xanĭfo yoipai ĕ afaa chakafamākĭ ea yoinō,’ ixō Pablo yoiaino ĕ nika. 26 Akka afaa chakafaitokai ĕ ōiama, aōnoa yoikĭ ĕfe xanĭfo ĕ kirika kenexō ĕ fomapanā. Nāskakē mato ano ĕ Pablo efeafō mĭmāi xanĭfo finakōikē. Efe xanĭfo Agripa, mĭ Pablo yōkaxō mĭ ea yoitiro nānori yoikĭ ĕ xanĭfo kirika kenexō fomanō. 27 Akka ĕ shinā askara sharama na feronāfake xanĭfo ari nō nĭchitiroma tāpixoma afaa aōnoa yoiaino.”

## 26

*Pablo xanĭfo Agripa ano kaxō yoini a aōnoa chakafakĭ yoiaino keskara*

1 Nāskakē xanĭfo Agripa Pablo yoini iskafakĭ: “Mĭ yoitiro afeskakĭ mia chakafakĭ mekafricanimākĭ,” faito Pablo mēshainākaifā ato yoini iskafakĭ: 2 “Xanĭfo Agripa, ĕ inimakōi mĭ ferotaifi yoi na judeofāfe eōnoa afara chaka yoiaino keskara

yoi, na eñoa yoiáfo keskara mĩ chanĩmara fanõma. <sup>3</sup> Akka mĩ xanĩfokõi mã mĩ õimis, nã judeofo imis keskai nõ yoinãito. Nãskakẽ ã mia yoi, fekaxtekima mĩ ea nikayonõ,” ixõ Pablo yoini.

*Pablo Jesús Ifofamax isharayopaonima*

<sup>4-5</sup> Anã Pablo ato yoini iskafakĩ: “Keyokõi judeofãfe tãpikõiafo a ã ato mẽranoax imis keskara, ãfe mai anoxõ tãpikãta, Jerusalén anoxori tãpiafo. Askatari mã tãpiafo, akka mia yoipaikakĩ mia yoitirofo, ãri fariseo. Nã nõko xinifãfe noko yoipaonifo keskara ã nikakõimis. <sup>6</sup> Epa Niospa nõko xinifo yoini keskafakĩ, a yora naax anã ototirora ixõ ã chanĩmara feito, ea chakafakakĩ mato ano ea efeáfo. <sup>7</sup> Ëfe kaifo judeofãfe nã doce xoko fetsafãfe, nã Epa Niospa yoiyoni keskara õipaikakĩ manamisfo. Nãskakẽ Epa Nios kĩfimisfo, penata kĩfita fakishi kĩfikĩ famisfo. Nãskarifiakĩ ãri õipaikĩ ã manaino, na judeofãfe ãa ea pãrakakĩ ea chakafakĩ mekafamisfo. <sup>8</sup> ¿Afeskakĩ mã chanĩmara faimamẽ, Niospa yora nakẽ otofafiatirono?” ixõ Pablo ato yoini.

*Pablo ato yoini a Jesús Ifofaafo ato omiskõimapaonixakĩ*

<sup>9</sup> Anã Pablo ato yoini iskafakĩ: “Ëa shinãxõ a Jesús Ifofaafo ã ato omiskõimapaoni. Nã Jesús Nazarete ano ikano, ãfe ane nikakaspakĩ ã chakafapaoni. <sup>10</sup> Jerusalén anoxõ ã ato askafapaoni. A Nios ato kĩfixomisfãfe ãto xanĩfofofãfe ea yoiáfono a Nios Ifofaafo ichapakõifo ã ato karaxa mẽra ikimapaoni. Ato reteáfonori nõ ato retenõ ã ato fapaoni. <sup>11</sup> Mẽxotaima ã ato omiskõimapaoni, anã Jesús sharara fayamakãfe ixõ. Nã ichanãti pexefo mẽraxõ ã ato askafapaoni. Ë atoki õitifishkikĩ finakõikĩ pexe rasi fetsafo mẽra kaxori ã ato omiskõimapaoni,” ixõ Pablo ato yoini.

*Pablo yoini afeskaxõ Jesús Ifofamãki*

*(Hch. 9.1-19; 22.6-16)*

<sup>12</sup> Anã Pablo ato yoini iskafakĩ: “Nãskakẽ achixõ ã ato omiskõimapai pexe rasi Damasco ano ã kani, a Nios ato kĩfixomisfãfe ãto xanĩfofofãfe ea yoikaxõ ea nĩchiafono. <sup>13</sup> Xanĩfo Damasco ari fãi kakĩ ã õini xini keya nai mẽraxõ chaxatanaito oa xinĩ chaxa keskara inima, chaxakĩ finakõini. Ea kemataima chaxakõia ini, a efe fofaifori ato askafani. <sup>14</sup> Noko askafaino nõ nãmã pakeni. Askata ãfe meka ã nikani hebreo mekapa ea yoiáito iskafakĩ: ‘Saulo, Saulo, ¿afeskakĩ mĩ ea omiskõimanimẽ? Ea mã iskafai, mãkõi mĩ chakamei oa fakka ifiki chachixõ pae meetiro keskai.’

<sup>15</sup> “Ea askafaito nikakĩ ã kemakĩ iskafaita: ‘¿Ifo, mĩ tsoamẽ?’ ã feito, nõko Ifãfe ea kemakĩ iskafaita: ‘Ëkĩa Jesús, ea mã



omiskōimamis. <sup>16</sup> Fininākfāfe ē mikiki nokoaki mī ea Ifofanō. Askatari na mī ōiai keskara mī ato yoinō, a ē mia chipo ōimanai keskarari. <sup>17</sup> Ē mia kexesharaxii judeofāfe mia retepaiyaifono, yora fetsafāferi mia askafaifono ē mia kexesharaxii. Nāskakē ato mēra ē mia nīchi. <sup>18</sup> Nāskakē ato mēra ē mia nīchi, eōnoa mī ato yoinō anā fakish mēra nia keskara inōfoma, askatamaroko penata nia keskara shara inōfo, Satanās chakata ato yoiaito anā nikayamanōfo, askatamaroko Nios Ifofanōfo. Nāskakaxō ea chanīmara fakaxō afara chakafakatsaxakakī āto chaka xatekanax Niospa yoini keskai efe ipaxanōfo, ixō Jesús ea yoini,” ixō Pablo ato fani.

*Jesucristo yoiaito namakē ōia keskarafaxō Pablo nikakōini*

<sup>19</sup> Anā Pablo ato yoini iskafakī: “Ēfe xanīfo Agripa, ē nikakaspanima a ē namakē ōia keskarafaxō nīi mēraxō ea yoiaito. <sup>20</sup> Damasco anoxō ē ato yoikī taefani Jesúsnoa meka shara ato yoikī. Nāskata Jerusalén anoafori ē ato yoini, Judea mai anoafori ē ato yoini. Askatari a judeofoma ē ato yoini iskafakī: ‘Māto chaka xatekāfe Nios Ifosharakōifaxikakī, askaxori afarafo shara fakī ato ōimakāfe mato chanīmara fanōfo mā Nios Ifofasharakē,’ ixō ē ato yoiaito, <sup>21</sup> judeofāfe ea achinifo Nios kīfiti pexefā mēraxō ea retepainifo. <sup>22</sup> Akka ea retepaiyaifono Epa Niospa ea kexesharani, iskaratīari ē ishakarōia Niosnoa ato yoianā. A xanīfokōifoya a afamafori ē ato yoimis. Afaa fetsa ē yoimisma. A ato Niospa shināmanaino Moisés feta yoipaonifo anori fisti ē yoimis. <sup>23</sup> Iskafakī ato yoipaonifo, na Niospa nīchia Cristo omiskōiax naxii. Mā nafiax anā otoxii, mā otoxō ato yoisharax afeskax Epa Nios fe ipaxatirofomākī, judeofoya a judeofoma,” ixō Pablo ato yoini.

*Pablo Agripa shināmapaini akairi Jesús Ifofanō*

<sup>24</sup> Pablo yoikī askafafiaino, Festopa mekatimafani iskafakī yoini: “Pablo, mā mī fekaxtekōia mēxotaima kirika fisti anekī tāpikōiax,” fani.

<sup>25</sup> Askafaito nikakī Pablo kemani iskafakī: “Ēfe xanīfo Festo, ē fekaxtemisma. Askatamaroko na ē yoiiai anori sharakōi, chanīmakōi ē mato yoi. <sup>26</sup> Na ē mato yoiiai anori nōko xanīfo Agripa mā tāpikōia a ē Jesúsnoa yoimis anori. Nāskakē xafakīakōi āfe ferotaifi ē yoi, akka mē tāpia na ē yoiiai anori nāatori mā tāpia. Nā ē yoiiai anori ē nikamisma mā itiroma onekai ē yoimisma. <sup>27</sup> Ēfe xanīfo Agripa, a Niospa ato shināmanaino yoipaonifo keskara, ¿mī chanīmara faimē? Akka ē tāpia mī chanīmara fai,” ixō Pablo Agripa yoini.

<sup>28</sup> Askafaito nikakī Agripa kemani iskafakī: “Mā mī ea chanīmara famakerana Jesús Ifofafa,” ixō yoini.

<sup>29</sup> Askafaito anā Pablo yoini: “Iskaratīa iyamai afetīara ea keskara mī inō ē fichipai, askatari nā mā ea nikaifo keyokōi

ea keskara mā inō. Nōko Ifo Jesús Ifofai nāskafiax karaxa mēra mā ikiyamanō ē imis keskai. Nānori ē mato Epa Nios kīfixomis,” ixō Pablo ato yoini.

<sup>30</sup> Ato askafaito nikai xanīfokōi fininākfani, xanīfo fetsa fe, Bereniceri ato fe askani, a ano tsaofori ato fe fininīfōfānifo. <sup>31</sup> Nāskakanax ori fokanax āa ranā yoinākani iskanifo: “Na feronāfākekai afaa chakafama afeskakīkai retetirofoma, askatari afeskai karaxa mēra itiroma.”

<sup>32</sup> Nāskaxō Agripa Festo yoini iskafakī: “Na feronāfake nō kāimakerana, ē xanīfo César ari kaimakai noko faino,” ixō Agripa Festo yoini.

## 27

### *Pablo Roma ari nīchinifo*

<sup>1</sup> Nāskakē shinākaxō Italia ano noko nīchinifo. Pablo yafi a afe karaxa mēra imisfo soraro xanīfāfe āfe ane Julio ato kexenō. Nā sorarofo, “Xanīfo finakōia kexemisfo,” ato famisfo. <sup>2</sup> Nānoax kanōanāfānē nō nanekaini. Nā kanōanāfā Adramitio fai fotoa anoax oaino mā itipinīkōiax Asia fai fotoa ano kaino. Aristarcori nofe ini, nā Aristarco Tesalónica anoa ini, Macedonia mai anoa. <sup>3</sup> Nānoax kaax pena fetsa Sidón fai fotoa ano nō nokoni. Nānoxō soraro xanīfāfe āfe ane Julio nāato Pablo noikōikī iskafani: “Mefe yorafo kaxō ōitāfe afāfe nā mī fichipaiyai keskara mia inānōfo,” ixō yoini. <sup>4</sup> Nāskata Sidón anoax nō anā kanōanāfānē kaino, nēfefanē noko akaino nā fakafā nakirafe mai toomāfā āfe ane Chipre aōri nō kani, takai fetsaxomāi noko nēfefanē katimafaino. <sup>5</sup> Askata mā nō kakī Cilicia yafi Panfilia fakafā kesemēkōi nō finōfaini. Askata pexe rasi Mira ano nō nokoni. Nā pexe rasi Mira Licia mai anoa ini.

<sup>6</sup> Nānoxō a soraro xanīfāfe kanōanāfā fetsa fichini Alejandria anoax okē. Nā kanōanāfā Italia anoax kaino, nāo noko naneni aō nō kanō. <sup>7</sup> Fenāmāshta kai nō oxa ranākōini, nō kanōanāfā tōfei nō xokenākōini. Nāskax pexe rasi Gnido okiri nō nokoni. Anoxō nēfefānē noko anā akaino, pexe rasi Salmona okiri nō finōfaini. Nā Creta anoa fakafā nakirafe mai toomāfā okiri nō kayakeni. <sup>8</sup> Nāskata nēfefānē noko katimafaino nō samarakakōi nō fekaxtekōini. Nāskata nō nokoni pexe rasi āfe ane Buenos Puertos ano. Pexe rasi Lasea chaima ini.

<sup>9</sup> Nāskai mā nō ano samarakōiano, mā mechakaino fakafā pooiki meseniaito ōikī anā katiroma meeki Pablo ato yoini <sup>10</sup> iskafakī: “Xanīfōfōfāfe, nō katiromaki mesekōi iki kiki mē tāpiaki. Na kanōanāfā yafi nōko afama mīshtifo nō fenotiro, askatari nōri nō āsai fetsetiroki,” <sup>11</sup> ato faino akka tsōa Pablo nikanima. Akka na kanōanāfānē ifāfe yoini: “Maa. Nō meseima, nō āsaima. Nō kanō fokāfe,” ato fani. Ato askafaino nā

sorarofãfe ãto xanĩfãfe nã kanõanãfãne ifo nikani. Nã rafeta Pablo nikanifoma. <sup>12</sup> Akka nã fai fototai shara inima anoxõ mechaka finõpaifiaifono nãskakẽ anoxõ shinãnifo: “Nõ nonoax kanõ Fenice ano,” ixõ shinãnifo. Nã pexe rasi Fenice Creta mai anoa ini.

*Nëfefanë fakafã anoxõ ato ani*

<sup>13</sup> Nãskaxõ shinãnifo: “Anã nëfefaima kiki, fenãmãshta nefei kiki na nëfe nõ kanõ,” ikax yoinãnifo. Nãskata nãnoax mã nõ kakĩ Creta ketokonõkõi nõ finõfaini. <sup>14</sup> Akka mã nõ kaino chipo nokoki nëfefãkerakĩ, fakafã pooiki kanõanãfã rafe rafe ani. <sup>15</sup> Noko askafaino fakafã ketokonõ nõ kapaifiaino, noko katimafani. Nãskakẽ nã nëfefanë nã iyopaiyai ari noko iyoni. <sup>16</sup> Noko askafaino nã fakafã nakirafe mai tõi eapama ãfe ane Cauda nõ finõfaini. Nãno nõ finõfainaino anã noko nëfe fãsi anima. Nãskakẽ a kanõa kafãshara chirotamea fãsi kerexkai kanõanãfã xaki mëra nanenifo. <sup>17</sup> Mã askafakaxõ risfi eapato kanõanãfã nexasharakõinifo ato nëfe toõxayamanõ. Nexakaxõ ãto sama poteti pekakaxõ kanõanãfã mëra rãtanifo, nëfe noko iyoyamanõ nã mashi ãfe ane Sirte ano ikaxõ, “Nëfe noko fakirira iyoikanõra,” ikaxõ. Nãskakaxõ kanõanãfãki nexakaxõ ãto afeskarafakafãnaki nõtanifo, nato nã noko iyopaiyai ari noko iyoikanõra ikaxõ. <sup>18</sup> Akka pena fetsa anã nokoki nëfefani, nãskakẽ nã kanõanãfã mëranoa ãto afama mĩshtifo fakafã naki potaketsanifo. <sup>19</sup> Askakãta mã tres nia ikano nëfefã nishpayamaito õi kakĩ ãto risfifoya ãto firofo, ãto fitifo, ãto samafo, fakafã naki potakĩ mitonifo. <sup>20</sup> Nãskai nëfefã nishpayamaino xini yafi fishifo nõ õitiroma ini, nëfefanë noko õitimafaino. Nãskatari anã afaa nõ shinãnima mã nõ ãsai fetseira ikax.

<sup>21</sup> Nãskakĩ mã nõ foni tenekĩ ranã faano, Pablo niinãkafã noko yoini iskafakĩ: “Efe yora mĩshtichi, nõ afeskakeranama na Creta anoax fena foyamakãfe ã mato fafiaino mã ea nikaitama. Nõko afama mĩshtifokai nõ fenokeranama, mãrikai omiskõikeranama. <sup>22</sup> Nãskakẽ rateyamakãfe. Mã ãsaimakai. Kanõanãfã fisti fakafã mëra iki kiki. <sup>23</sup> Na fakishi Niospa ãfe ãjiri ekeki nokoakĩ Niospa nĩchiano, nã Niosfi ëfe Ifokõikĩ, nã ã yonoxomis. <sup>24</sup> Ea iskafakĩ yoiakĩ: ‘Pablo, rateyamafe. Mĩ xanĩfo César ano kaikai ato mia yõkanõ mĩ afaa chakafamãkĩ. Mĩoxõ Epa Niospa na kanõanãfã mëra mefe foaifo ato kexesharai kiki afeskakanima kiki,’ ixõ ea yoiaki. <sup>25</sup> Nãskakẽ ã mato yoikai efe yora mĩshtichi, ratakakima inimakãfe. Epa Niospa ea yoiyai keskara ã chanĩmara fakõimiski. Më tãpiaki tosa ãsaima kiki mã ea ãjirinĩ yoiaki. <sup>26</sup> Akka fakafã nẽxpakĩa mai toomãfã anoax nõko kanõanãfã tooxai kiki,” ixõ Pablo ato yoini.

<sup>27</sup> Mã nõ catorce nia finõta fakafã ãfe ane Adriático ano nõ nokoni. Nãskakẽ nãnoxõ nëfefanë nã noko iyopaiyai ari noko iyoikaino, nã fakish fistichi yamenake kafanaino

a kanōanāfā mēra yonomisfo yoinānifo: “Mā nō mai ano nokoikaira,” ikanax. <sup>28</sup> Nāskakaxō āto tanātinī faka noamākī ixō meenifo. Mā meekaxō ōiafo treinta y seis metros ini, askata afianā ori fokaxō meeafō veintisiete metros ini. <sup>29</sup> Nāskakaxō mesekekī nō tokirinīfakī nokoi katirora ikaxō, cuatro faxō āto firopafāfo nexakaxō kanōanāfāki ch-enexti fakaxō fakafā naki potanifo, noko nēfefanē iyoyamanōra ikaxō. Nāskakaxō Epa Nios kīfinifo koshi penanōra ikaxō. <sup>30</sup> Nāskaifono akka a kanōanāfā mēra yonomisfo one-faipainifo kanōanāfā mēranoax. Nāskakē a kanōanāfā mēranoa a kanōa kafāshara fotomapainifo. Nō firopafāfo nexaxō kanōanāfā renexte faxō nō fakanaki potaira ikaxō ato feparapainifo. <sup>31</sup> Nāskaifono Pablo soraro xanīfo yoini, āfe sorarofoya iskafakī: “Nafō kanōanāfā mēra nēteyamaifono tsōa mato anā iyoyamaino, mā āsai mitokomei,” ato faino, <sup>32</sup> sorarofāfe a aō kanōa fotomapaiyaifo risfi xatenifo a kanōa fakanaki pakeano fāka fōtanō.

<sup>33</sup> Nāskata mā penaino Pablo shināxō ato yoini afara pishta pinōfo. Iskafakī ato yoini: “Mā nō nomīko rafe akaki nēfefā nishpaira ixō, manayanā a mā pimis keskafakī mā afaa piamakī. <sup>34</sup> Ē mato yoikai pikāfe. Nō piax shara nō itiroki anā mātō yora kerex inō. Nō afeskaimakai,” ixō ato yoini.

<sup>35</sup> Ato yoikī askafata pāa tsomainīfōfā āto ferotaifi, Epa Nios kīfīkī iskafani: “Aicho Epa Niosi, mī noko kexesharaki,” fata ato pāa pikīni. <sup>36</sup> Ato askafaino inimakōiyanā anā ratekakīma akairi pinifo. <sup>37</sup> Akka nā kanōanāfā mēra docientos setenta y seis yorafo nō ini. <sup>38</sup> Mā pii māyakōikāta ato trigofō fakafā naki potanifo, kanōanāfā xaka inō.

### *Kanōanāfā ikini*

<sup>39</sup> Mā penaino a kanōanāfā mēra yonomisfāfe, mā mai fichifikaxō tsōa tāpinima. Akka a fakafā chitotanā anoa mashi fichikaxō, “Ono nōko kanōanāfā nō rītiaki kanō,” inifo. <sup>40</sup> Nāskakata a aō kanōanāfā nexea āfe risfi xatekaxō nānoa ōifainifo. Nāskatari āto fitifo pekaketsanifo kanōanāfā mēstekōi iyoikanō. Nāskata afianā kanōanāfā rechokoki āto samapafā poteinīfōfānifo ato nēfe iyoikanō. Nāskax mā fōkakī mashi chaima fanifo. <sup>41</sup> Akka mā fofaifono kanōanāfānē mashi tsakax nāno rakani. Refokirixori mashi tsakakōia ini, pishta feroitroma. Nāskakē aō chipokirinoax toxai fetseni fāsikōi fākafā poo ikaino.

<sup>42</sup> Nāskaino sorarofāfe a karaxa mēra imisfo ato retepainifo, tsoa pishta ichoyamanō. “Keyokōi nō ato retenō,” ikax yoinānifo. <sup>43</sup> Akka a sorarofāfe āto xanīfāfe Pablo retepaikīma, “Ato reteyamakāfe,” āfe sorarofō fani. Nāskaxō ato yoini iskafakī: “Fatoto mā faka feakī tāpiamākī faka feafaitakāfe

mashi ano nokoxikakī. <sup>44</sup> Akka a faka feakī tāpiafoma tii na kanōanāfā kaxkē aō nonoax fonōfo,” ixō soraro xanīfāfe ato yoini.

Nāskakē keyokōi āsaxma mashi ano nokonifo.

## 28

### *Pablo mai toomāfā āfe ane Malta ano ini*

<sup>1</sup> Mā nō keyokōi fākafā kesemē nokoxō, nō tāpini nā fākafā nēxpakīa mai toomāfā āfe ane Maltakē. <sup>2</sup> Nānoxō keyokōi noko ifisharakōinifo. Nānoax nokoki oi ikaino, matsikōi ini. Nāskakē anoxō chii ketefakaxō, “Yoofēkāfe,” noko fanifo. <sup>3</sup> Pablo nānoxō karoya shano ikōferani chii ketefakī. Mā chii ketefaino chii xanamei shano kāikerani oxō mifiki chachini. Mā mifiki chachiax aō neetani. <sup>4</sup> Pablo āfe mifi shano ronokē ōikani āa ranā is kai fetsenifo: “A na feronāfāke ato retemis rakikīa. Fakafā anoax nokosharafiaino, mā Niospa shano chachimana nai rakikīa,” ikanax yoinānifo.

<sup>5</sup> Akka Pablo metashkiri itakī shano chii nēxpakīa potani. Shanopa chachifiano Pablo paemenima. <sup>6</sup> Nāskakē keyokōichi ōiketsanifo faraxinākafanax naira ikaxō. Akka faraxiyamaito ōikakī, iskafanifo: “Nakai retemitsamisma, nafi nioski,” ikanax yoinānifo.

<sup>7</sup> Anoxō shinā nā xanīfo Publio chaima ika ini. Nānori yorafo afe ikafo ini. Nā xanīfāfe āfe pexe anoxō noko ifisharakōixō noko pīchasharakōixononi, tres nia ano nō oxaino. <sup>8</sup> Nānoax Publio āfe apa isinī iki rakani, yonayanā chixoi. Nāskaino Pablo ōikai kaxō Epa Nios kīfixota āfe mīfi māmāsharani. <sup>9</sup> Pablo sharafaito nikakanax a isinī ikaifori nā ika anoax feafono Pablo ato sharafapani. <sup>10</sup> Ato askafaito ōi kakī anoxō afama mīshtifo noko ināketsanifo. Nāskata mā nō ato makinoax kai kanōanāfā mēra nō naneikainaino, anā afama mīshtifo noko inānifo a nō kakī pifoikai.

### *Pablo Roma ano nokoni*

<sup>11</sup> Nāskata anoxō mā nō tres oxe akax, kanōanāfā mēra nō naneinākafāni. Nā kanōanāfānē nā mai anoxō mechaka finōmani. Nā kanōanāfā Alejandría anoa ini. Nā kanōanāfā recho koki afarafo tsoaxō fonifo na nōko niosra ikaxō, fetsa āfe ane Castor ini, fetsari Pólux ini. <sup>12</sup> Nāskax nō nokoni Siracusa fai fotoa ano, nāno nō tres nia oxayoni. <sup>13</sup> Nānoax kanōanāfānē nō anā kai fakafā ketokonō pishtakōi nō kaax Regio ano nō nokoni. Nānoxō pena fetsa nēfefānē noko ani a xini oaikirinoaxma oxō. Nāskakē nānoax kaax pena fetsa nō nokoni Puteoli ano. <sup>14</sup> Nānoa a Jesús Ifofaafo nō ato fichini nāfāfe noko yoikī iskafanifo: “Nono nofe oxa ranāyokāfe,” noko fanifo. Nāskata nānoax ato makinoax kaax chipo Roma ano nō nokoni. <sup>15</sup> Mā nō kaino nō Roma ano nokoyoamano a Jesús Ifofamisfāfe Roma anoxō nikaketsanifo. Nāskakē

nokoki nokoifekani fenifo. Atiri pexe rasi Foro de Apio anoax fenifo, atiri pexe rasi Tres Tabernas anoax nokoki nokonifo. Askaifāfe ōikī Pablo Epa Nios kīfikī iskafani: “Aicho Epa Niosi, mī yorafo ekeki nīchiaki,” fani inimakōiyanā. <sup>16</sup> Mā nō Roma ano nokoano, xanīfāfe ato yoini pexe fetsa mēra ares Pablo inō, anoxō soraro fistichi kexenō.

### *Roma ano Pablo ini*

<sup>17</sup> Mā nokoitaxakakī ano tres nia ixō, Pablo judeofo xanīfofo Roma anoa ato kenamani fenōfo. Mā fekanax ichanāfono Pablo ato yoini iskafakī: “Efe yora mīshtichi, ea nikakapo ē mato yoinō. Ēkai judeofo chakafakī mekafamisma. A nōko xinifo ipaonifo keskarari ē chakafakī mekafayamafiakē, ea achikaxō Jerusalén anoxō romanōfo ano ea nīchinifo. <sup>18</sup> Nānoxō mā ea yōkakaxō, ea nīchipainifo, ēkairoko afaa chakafakē ea retexikakī. <sup>19</sup> Ea askafaifono, akka judeofāfe ea iskafayameafo: ‘A chaka kāimayamafe,’ ea faifono, ē xanīfofo yoini iskafakī: ‘Ē xanīfokōi César ano kapai ato ea yoinō, ē afaa chakafayamafiakē efe yorafāfe eōnoa yoiafo keskara,’ ixō ē ato yoini. <sup>20</sup> Ē mato kenamana mato fe yoināxiki. Akka mā mā nikai ēfe kaifo israelifāfe, nā noko nimamis Niospa Fake nō manamis. Nāskakē mā mā ea ōi nonoxō ea metexkere akafono,” ixō Pablo ato yoiaito, <sup>21</sup> nikakakī iskafanifo:

“Judea anoxō mīōnoa tsōa noko kirika kenexō femama. Nofe yorafo judeofori ariax fēkaxō mīōnoa afaa chaka noko yoiafoma. <sup>22</sup> A mī yoiai keskara nō tāpipai, akka mā nō nikamiski, a maniafo tii anoxō a Jesús Ifofamisfo chakafakī ato mekafamisfokī,” ixō ea yoinifo.

<sup>23</sup> Nāskakata, “Pena fetsa nō mefe ichanāfainakaki,” fanifo. Nāskakē yora ichapakōi a Pablo ika ano fenifo nikai fekani. Mā feafono Pablo ato yoikī yātafani, Nios xanīfoōnoa ato yoikī. Afeska faxoma Jesúsnoa ato nikamapaikōini, a Moisés keneniōnoa ato yoita, a Niospa ato shināmanaino kenenifoōnoari ato yoini. <sup>24</sup> Pablo ato yoiaito ranārīto nikanifo, akka ranārītori nikakaspanifo. <sup>25</sup> Nāskakē āa ranā fochishpanā faatanānifo ares shinākanima. Nāskakata mā fopaiyafono Pablo ato yoini iskafakī: “Isaías chanīmakōi ato yoipaoni Niospa shināmanaino. Nāōxō Niospa Yōshi Sharapa māto xinifo yoini, iskafakī:

<sup>26</sup> Kaxō mī kaifo yoitāfe iskafakī: ‘Mā mā nikakōifikī mā nikasharaima; mā mā afara sharafo ōifikī mā ōisharaima.’

<sup>27</sup> Mā na yorafāfe nikafikakī shināsharakanima, āto ōiti fēstokōi. Mā ōifikakī tāpipaikanima, na ē yoiai keskara chanīmakōi ōifikakī. Askatari nikakōiafoma ē ato chaka soaxopanā efe nīpaxanōfo,

ixõ Niospa Yõshi Sharapa Isaías yoini. <sup>28</sup> Na ã mato yoiai keskara tãpikãfe, Epa Niospa noko nimapaiyai keskara mã nikayamaino a judeofoma ã ato yoi afãfe ea nikakõixikani,” ixõ Pablo ato yoini.

<sup>29</sup> Pablo ato yoikĩ askafaino, judeofo mã fokani ãa ranã feratenãfonifo.

<sup>30</sup> Anoxõ Pablo xiniya rafe ani. A pexe ifo Pablo kori inãni a mēra ixiki. Nãnoxõ ato ifisharapaoni õikai fofaifono ato yoisharayanã. <sup>31</sup> Nãnoxõ ranotamakõi ato yoini afeskaxõ Epa Nios xanĩfãfe noko ĩkitiromãki. Nõko Ifo Jesucristoõnoari ato yoiaito tsõa xatematiroma ini. Nã tii.

## Pablo Roma Anoafo Kirika Kenexō Fomani

*Pablo Jesús Ifofaafa Roma anoafo kirika kenexō fomani*

<sup>1</sup> Roma anoafāfe, ē mato kirika kenexō fomai. Ēkīa Pablo, ē Jesucristo yonoxomis. Niospa ea nīchini ē aōnoa yoimis inō, āfe meka shara Jesúsnoa yoinō.

<sup>2</sup> Niospa āfe Fake nokoōnoax naiyonōpokoai tāpixō a Niospa meka yoimisfāfe meka kenenifo. Jesúsnoa meka shara yoinifo. <sup>3</sup> Niospa Fakeōnoa meka shara kenenifo a inōpokoai keskafakī. Jesús Niospa Fakekōifiax David āfe xini ini. Nā David nōko xinifāfe āto xanīfokōi ipaoni. <sup>4</sup> Niospa afama mīshti fatiroxakī nōko Ifo Jesucristo otofani. Otofaxō ato ōimani nāmāi Niospa Fakekē. Niospa āfe shināmā āfe Yōshi Sharaōxō āfe Fake otofani. Ato ōimani Jesúsmaī āfe Fakekē. <sup>5</sup> Jesucristoxō noko noi. Noko noikī āfe shinā noko ināni. Nāskaxō noko nīchini Jesúsnoa yoimis nō inō. A judeofomari a xoko fetsafori afāferi Jesús chanīmara fanōfo nō yoiaino. Jesús chanīmara fakaxō nikasharakōinōfo. <sup>6</sup> Māri mā mā Jesucristo chanīmara faito mato nīchini mā afe yorafo inō.

<sup>7</sup> Roma anoafāfe, ē mato kirika kenexō fomai. Niospa mato noixō mato ifini mato chaka soaxoxiki afe yorafo mā inō. Mato noikī mato shinā mēraxō mato shināsharamanō. Epa Nios feta nōko Ifo Jesucristo mato askafanō.

*Pablo a Jesús chanīmara faafa Roma anoafo ato ōipaini*

<sup>8</sup> Ē mato yoinō. Nikakapo. Keyokōichi a maitio anoafāfe mato yoimisfo, mā Jesús chanīmara faito ōikakī. Nāskakē, “Aichora,” ē Nios famis. Jesucristoxō, “Aichora,” ē famis. <sup>9</sup> Ēfi Nios yonoxokōikai. Chanīmakōi ē yonoxonikai. Ē feparanima. Āfe Fakeōnoa ē meka shara yoimis. Pena tiifi ē mato Nios kīfixōfafāini. Niospa tāpia. <sup>10</sup> Ē mato ōisharapai. Nāskaxō ē Nios kīfifafāini ē mato ano kapaikī. Akka ē kai, ē kayamai ē kaima. A Niospa ea nīchipaiyaino ē katiro. <sup>11</sup> Ē mato ōisharapai. Ōikaxō ē mato Niospa meka yoipai. Niospa āfe Yōshi Sharaōxō ē mato yoipai mā chanīmara fakī finakōinō Jesús Ifo sharakōi faxiki. <sup>12</sup> Nāskax Jesúsnoax nō inima faatanānō. Mā Jesús chanīmara faino ē inimatiro. Nāskarifiakī ē chanīmara faino mā inimatiro.

<sup>13</sup> Efe yorafāfe, ē mato tāpimapai mā tāpinō afeskaxma ē matoki kapai ē katiroma mei, ē kamisma. Mē kāta katamis ifiakeranax afara fetsa aki ē kamisma, mato ari kapaifi. Mai fetsa aria ichanāmisfo judeofoma nāfo ē Jesús ato chanīmara fama. Nāskari fakī ē matori askari famapai. <sup>14</sup> Jesús ea yoia



ẽ ẽfe meka keyokõi ato yoinõ. Nã kirika kenekĩ tãpiafo ita a kirika kenekĩ tãpiamafori ẽ ato yoikai. Nafafoya a nafamafori ẽ ato yoitiro. Ẽ ato yoiaito nikakakĩ Jesús chanĩmara fanõfo. <sup>15</sup> Nãskari fakĩ ẽ Jesúsnoa mato Roma anoari yoikapaimis.

<sup>16</sup> Jesúsnoa meka shara yoipaikai ẽ ranotiroma. Ẽfe meka xafakĩa shara. Noko Niosnoa tãpimatiro a tsõa atiroma keskara Niospa atiro. Nõ chanĩmara faito Jesucristoxõ Niospa noko chaka soaxotiro nõ afe ipaxanõ, nõ fenoyamaino. Tae-fakĩ judeofãfe nikakõinifo. Akka iskaratĩari judeofomafãferi nikakani afe ipaxakakĩ. <sup>17</sup> Nã Jesúsnoa meka sharaõxõ Niospa noko õimatiro. Nõ Jesús chanĩmara faito Niospa nõko chaka noko soaxotiro. Nãnori kenenifo iskafakakĩ: “A Jesús chanĩmara fakõinaifo Niospa ẽto chaka ato soaxõ afaa chakafamisma keskara ato õi. Nãskax shara ipanakafa Nios fe.”

### *Keyokõi yorafo chakamisfo*

<sup>18</sup> Niospa meka nikakaspafãfe a chakafamisfo Niospa ato õimani ato omiskõimakĩ. Niospa meka chanĩmakõifiano nikakaspakata yora fetsafori ato Niospa meka chanĩmara ato famakaspakani. <sup>19</sup> Nõko Nios afe keskaramãkĩ tãpipaikĩ nõ tãpitiro. Akka Niospa noko õimamis. <sup>20</sup> Nõ Nios õiyamafixõ nõ tãpitiro Niospa keyokõi onifani, nãmãi Nioskõi ixõ. Nã Niospa onifani õikĩ nõ tãpitiro tsoa fẽtsa keyokõi atiroma. Nios fistichi atiro, afama mĩshti. Nãskakẽ Nios nikakaspafãfe Nios chanĩmara fapaikanima, a onifani õifikakĩ. Nãskakẽ Niospa ato omiskõimani nãfãfe Nios tãpipaikanima. Akka tãpipaikĩ tãpikeranafo. <sup>21</sup> A Niospa onifani õifikakĩ iskafakĩ yoipaikanima: “Nios fistichi keyokõi onifani. Aicho, Nios finakõia,” ikaxõ shinãpaikanima. Nãskakaxõ ẽto shinã mẽraxõ afara shinãsharakanima. Afara chaka fisti shinãkani ẽto õiti fakish keskara ikaxõ. <sup>22</sup> “Nõfi tãpikõiaki,” ifiakaxõ tsõa shinãsharaima. <sup>23</sup> Niosfi sharakõikĩ shara enenakama. Nãfi isharapakenakakĩ. Isharakõifiaito Ifofapaikanima. Askata yorafo isharayamaino yora fetsafãfe afara yora keskara onifakaxõ, “Na nõko Niosra,” ikaxõ kĩfimisfo Nioskõi kĩfikaspakakĩ. Yoinã keskara onifakaxõ, peya keskara onifakaxõ, rono keskarari onifakaxõ, nãskarafo onifakaxõ, “Na nõko Niosra,” ikaxõ kĩfimisfo.

<sup>24</sup> Askafafãfe õikĩ Niospa anã ato Ifofamaima. Nã chakafapaiyaifo fisti akaifãfe õikĩ Niospa ato xatemanima. Nãskax ẽa ranã fekaxte faatanãkani. <sup>25</sup> Nios fistifi chanĩmismaki. Nã chanĩyamafimiskẽ tsõa Ifofapaima nã fisti nõko Nios sharakõifiano. Niospa keyokõi onifafianino tsõakai Ifofapaima. Akka nã Niospa onifanifo, “Nã nõko niosra,” ikaxõ

kĩfitaifamisfo. Tsõakai Nioskõi Ifofapaima, mēxotaima shara-finakõia ifiamiskē. Nāskakē, “Epa Niosi, mĩ sharafinakõia,” ikaxõ yoikani. Askapakexapainõfora.

<sup>26</sup> Askafaifāfe õikĩ Niospa ato chaka xatexonama, afara chakafapaiyaifo fisti akaifāfe. Niospa noko onifani feronāfake yafi kēro, kēro feronāfake fe inõ. Askafafianino kēro rafe fichināpaikani chaka ikani. <sup>27</sup> Askatari feronāfake rafe fichināpaikanax chotanākani, kēro tanatama. Askax chaka ikanax omiskõikani.

<sup>28</sup> Nāskakakĩ chaka fisti shināpaikani. Anã Nios shināpaikanima. Askaifāfe õikĩ Niospa ato potai nã apaiyai keskara fakĩ chaka fisti shinānõfo. <sup>29-31</sup> Chaka fisti feyafakanax chaka shinākani. Chaka faatanāi xatekanima. Feronāfakefāfe āto āfima fichipaikĩ chotamisfo. Kērofāferi āto fenema fichipaikĩ chotamamisfo. Nāskaxõ afara shara āa atonã fisti fipaikani. Fetsafo chakafakĩ xatekanima. Fetsafo xĩtipaimisfo. Yora retemitsamis ita, setemitsamis ita, feratenã faatanāmisfo. Ōitifishkikĩ feyafamisfo. Ato pārafofāsafamisfo. Ato noikaspamisfāfe fetsafonã fīapaikakĩ. Ato noikaspamisfo. Chanĩmisfo fetsafo pāramisfo. Nios noikaspayanã tsoa noimisfoma. Īchamitsamisfo. Kakapaimisfo, āa kakamepaimisfo. Afara fetsa chaka shināi iskakani: “Afaa chaka fetsa ě afeska faimēti,” ixõ shinākani. Āto apa yafi āto afa nikakaspakani. Afara shara shinākanima. A yoiyai keskara amisfoma. Āa chanĩmisfo. Tsoa noikanima. Ōitifishkikax fetsaki raemisfoma. <sup>32</sup> “Askakanax nakanax omiskõipakenakafo,” ixõ Niospa anori yoini. Niospa yoiyai keskara āto shinā mēraxõ tāpifikaxõ afara chaka xatemisfoma. Askata fetsafāfe afara chakafaifāfe õikani atoki inimamisfo.

## 2

*Niospa mēstekõi noko õixõ yoitiro: “Nãto afaa chakafamisma. Akka natori chakafamis,” noko fatiro*

<sup>1</sup> Ēfe kaifo judeofāfe, ě mato yoinõ. Mã fatorafāfe yoi iskakĩ: “Na keskara yorafāfe afara chakafaifo omiskõipakenakafo,” ixõ mã shināmis. Anori shināfikĩ mãri ato keskarari afara chakafamis. Nāskata, “Nõ afaa chakafamisma,” mã itiroma.

<sup>2</sup> Mã nõ tāpia, Niospa ato tāpikõia a yorafāfe chaka shināifo. Nāskakē ato omiskõimaxii. Niospa tāpikõixõ chanĩmakõi yoi.

<sup>3</sup> Mã, “Nato afara chakafara,” ixõ mãri mã aki. ¿Nāskakĩ mã shināimē: “Niospa noko omiskõimanima,” ixõ? Akka nāskakē ě mato yoi. Niospa matori omiskõimani mã afara chakafaito.

<sup>4</sup> Niospa mato noi. Mã chakafafaito mato omiskõimarisafaima. Mato noikikai mato omiskõimapaima. Nāskakē, “¿Nã ě ipaiyai keskara ě iki,” ixõ mã shināimē? Askara shināyamakāfe.

Niospa mato noikī mato shinā fetsafaxopai māto chaka mā xatexō āfe meka mā nikasharakōinō. <sup>5</sup> Niospa mato shinā fetsafaxopaifiaito mā nikayospakōi. Māto ōiti mā kerexfaxō mā Nios nikakaspai. Mākai mato shinā mā fetsafapaima mato chaka mā xatexiki. Mā askafiaino iskaratīa Niospa mato omiskōimayoima. Akka mā mai keyoaino mato omiskōimaxii mākairoko mato chaka xateano. Nā keyokōi yora chakafo ato omiskōimanaitīari nānori matori omiskōimaxii. Niospa mēstekōi noko ōi. Nāskakē nā yora chakafo ato omiskōimani. Nāskaxori nā yora chakafo ato omiskōimaxō noko ōimaxii. <sup>6</sup> Nā nō imis keskara Niospa tāpikōia. Nāskax nō naano keyokōi noko kopifaxii mā nōko mai keyoaino. <sup>7</sup> Yora fetsafāfe shara shināmisfo a Niospa ato amapaiyai keskara apaikī. Niospa ato inimamatiro. Askatari Nios fe ipaikani. Askara yorafo Nios fe ipanakafo. <sup>8</sup> Akka yora fetsafāfe nā apaiyai keskara shinākani. Niospa meka nikakaspakani. Chaka fisti shinākani. Askarafoki Nios atoki ōitifishkixō ato omiskōimani. <sup>9</sup> Nā chakafamisfo nāfo keyokōi omiskōixikani, judeofo, judeofomari omiskōixikani afara chakafakanax. <sup>10</sup> Nā Nios chanīmara faafo tii Niospa ato imasharaxii a keskara inōfo. Nāskaxō ato yoixii iskafakī: “Māfi sharaki. Mā ea nikasharakōia. Nāskax mā efe isharaapakenaka,” Niospa ato faxii. Nānori judeofo yoixii. A judeofomari ato yoixii askafakī. <sup>11</sup> Niospa ōia nāskarafos ōi yorafo, a judeofo ōita a judeofomari nāskarafos ōi.

<sup>12</sup> Akka a Moisés kirika keneni tāpiamato afara chakafaax omiskōipakenaka. Nios fe ipanakama. Askatari a Moisés kirika keneni tāpiato afara chakafaax nāri omiskōipakenaka. Nānori Moisés kenekī yoini: “A afara chakafamisfo omiskōipakenakafo,” ixō Moisés kirika keneni. <sup>13</sup> A Moisés kirika keneni keskara nikafikakī nikakaspai. Afokai Niospa shara ato ōima. Akka nā Moisés kirika keneni keskara nikakōiaifo, “Sharafora,” Niospa ato faxii. <sup>14</sup> Moisés Niospa meka a judeofoma ato kirika kenexonima. Askafekē a Moisés keneni keskara judeofomafāfe tāpiamafikaxō āa tāpikōikaxō shara shinākani. Nāskakaxō a Moisés keneni tāpiafo keskara ikafo tāpiamafikanax. <sup>15</sup> Moisés keneni tāpiamafikaxō shināsharaifono fetsafāfe ato ōitirofo Moisés keneni keskara Niospa ato shinā mēra ato shināmana. Akka sharafakaxō shinākakī iskafatirofo: “Ē afaa chakafama,” ixō shinātirofo. Akka afara chakafaxō shinākani iskatirofo: “Oashta, ē afara chakafaa,” ixō shinātirofo. Nāskaxō anā afaa chakafapaikanima. <sup>16</sup> Niospa nōko ōiti mēraxō nō shināito noko tāpikōia. Jesucristori noko tāpia. Akka yorafāfe nōko ōiti mēraxō nō shināito noko tāpiafoma. Nāskakē mā nōko mai keyoaino Niospa noko yoikī iskafaxii māmāi noko tāpixō: “Nāfo sharafo. Akka nafori chakafo,” noko faxii. Nāskara ē

yorafo yoimis.

*Moisés judeofo Niospa meka kenexoni*

<sup>17</sup> Ea nikakapo, efe yorafāfe. ¿Mā shinākī iskafatiromē? “Nōrifi nō judeofoki. Moisés keneni keskara mā nō tāpia. Nōfi Niospa afe yorafoki,” mā imis. <sup>18</sup> Moisés kenenioxō Niospa mato amapaiyai keskara mā tāpitiro. Askatari mā asharakōikī mā tāpitiro. <sup>19</sup> Akka mā shināmis iskafakī: “A Moisés keneni tāpiafoma yora fēxo keskarāfo. Nāskakē nō ato tāpimasharatiro āto ōiti xafa shara inōfo, anā fakish keskara inōfoma,” ixō mā shināi. <sup>20</sup> “Nā afara shara tāpiaiafori nō ato tāpimatiro,” mā iki. Nāskatari, “Nā rama tāpiaiafori nō ato yoitirora,” ixō mā shināi. Mā shināi iskafakī: “Mā nō Moisés keneni tāpikōia. Nāskaxō nō ato yoitiro noko chanīmara fanōfo,” ixō mā shināi. <sup>21</sup> A Moisés keneni keskara mā ato yoifikī, ¿afeskakīri māri mā nikakōimamē? “Atoki yometsoyamakāfe,” mā ato fafiāi māri mā yometsoi. <sup>22</sup> “Māto āfima fe iyamakāfe,” mā ato fafiāx māri māto āfima fe mā chotanāmis. Askatari yora fetsafāfe afara onifakaxō, “Na nōko niosra,” famisfo. Askafafiaifono mā ato yoimis: “Anā ano Nios fetsama. Nios fisti. Afara yora faxō, ‘Na nōko niosra,’ fayamakāfe,” mā askafamis. Mā ato askafafiai āto nios kīfiti pexefā mēranoax mā yometsomis. <sup>23-24</sup> Māfi yoikī iskafamis: “A Moisés Niospa meka kirika keneni nō tāpikōia,” nā kakapaimisfo keskara mā imis. Askafafiaxōkai a Moisés keneni keskara mā akama. Mā askayamaito ōikakī judeofomafāfe yoikī iskafamisfo: “Niospa afe yorafo judeofo ishara foma. Nāskakē Niosrikai sharama,” ixō yoimisfo. Askafakī matoōxō Nios chakafaifo. Nānori Niospa meka yōra kirika keneni.

<sup>25</sup> Moisés judeofo kirika kenexoni iskafakī: “Māto fake feronāfakefo foshki repa xatekāfe mato tāpinōfo mā judeofokē,” ixō Moisés kirika keneni. Māto fake foshki repa mā xatefixō nā Niospa mato yoini keskara mā nikayamaito Niospa mato ōi judeofoma keskara. Niospa yorafo mā itiroma mā judeofofiax. Nāskarari nā Epa Niospa noko yoini keskara mā ikaito Niospa mato ōi judeokōifo keskara. <sup>26</sup> Judeofoyamafixō Niospa meka nikaifono Niospa judeofo keskara ato ōi afe yorafo keskara. <sup>27</sup> Nā judeofoma foshki repa xateyamafikaxō a Moisés Niospa meka yoikī kirika keneni tāpiyamafikaxō nā Niospa yoini keskara chanīmara fakanax nāskarāfofi sharafoki mato keskarama. Akka māfi judeofofixō a Moisés kirika keneni tāpifixō mā nikakōima. Moisés mato Niospa meka yoikī kirika kenexofianino mā nikasharakōima. <sup>28</sup> Māfi judeofo kāinikī. Nāskaxō mā foshki repa xatemis. Akka mā judeofofixō a Niospa yoini keskara mā nikaima. Nāskax mā judeokōifo keskarama. Mā māto feyafatifixō māto chaka mā

xatemisma. Nāskaxkai mā Niospa afe yora ikima. <sup>29</sup> Moisés kirika kenekī yoini keskafakī judeofāfe āto fakefo foshki repa xatemisfo ato tāpinōfo judeokōifokē. Akka judeofo atirifāfe Nios shinākanima. Nāfofi judeomakōifo keskara. Nāfokai Niospa afe yorafoma. Akka judeofo atirifāfe Nios shinākani. Nāfofi judeokōifokī. Nāfofi Niospa afe yorafokī. Niospa Yōshi Sharapa noko ōiti fetsafaxōano Nios keskara shara ikafo. A Moisés kirika kenenito noko ōiti fetsafaxotiro. Niospa Yōshi Sharapa noko ōiti fetsafaxotiro. Akka yorafāfe, “Mīfi sharakī,” noko fayamafiaifono Niospa, “Mī sharakī,” noko fai.

### 3

<sup>1-2</sup> ¿Nō judeofoxō nōko fakefo nō foshki repa xatemiskē sharamē? Ēje, shara itiro. Akka nōfi judeofo fake kāiniki. Moisés Niospa meka yoikī noko kirika kenexoni. Nāskakē nō inimai nō judeofo. Efe yora mīshtichi, shinākapo. Epa Niospa nā yorafo tii yoipaiyai keskara nōko kaifo taeyoi ato yoiyoni. Noko tāpimanai keskarari nō yora fetsafori nō ato tāpimanō āfe meka. <sup>3</sup> Akka nōko kaifāfe atirifāfe Niospa meka ifo shara fayamaifono akka Niospa a yoiyai keskara amis. <sup>4</sup> Yorafo chanīmisfo. Akka Nios ramashara chanīmismo. Yorafāfe keyokōichi noko pārafiaifono akka Niospa noko pāramismo. Nā David Niospa meka yoikī kirika kenenī iskafakī:

Niospa āfe meka mēstesharakōi yorafāfe ōinōfo. A shara shināifo Niospa ato sharafaxōi. Akka a chaka shināifo Niospa ato tāpimakī omiskōimaxii, ixō David yoikī kirika kenenī.

<sup>5</sup> Nios fistifi sharakōiki. Nōkai a keskarama. Nāskakē nō chakafaito yorafāfe ōikakī shinātirofo iskafakakī: “Nios iskarama, Niosfi sharakōikī. Na yorafāfe afara chakafakani. Akka Niospa afaa chakafamismo,” ixō shinātirofo. Nāskaxō Nios sharara fakani. Akka nāskaxō āa yora fētsa shinātiro iskakī: “Ē afara chakafaito ōikakī yorafāfe yoitirofo: ‘Akka Nios iskarama, Nios shara.’ Nāskakē ē chaka shināi yorafāfe Nios sharakōi ōinōfo ea keskarama. Nāskakē Niospa ea omiskōimatiroma ē chakafafaito,” ixō yora fētsa shara shināima. Nāskara shinākī yōra shināi keskara shināi, Niospa shināi keskara shināima. <sup>6</sup> Nios chakama. Nios mēstekōi ika. Akka mēstekōi iyamaxō yorafo yoikeranama iskafakī: “Nafo sharakōifoki. Ē ato sharafaxōi. Akka nafori chakafo. Ē ato omiskōimani,” ixō Niospa yoikeranama mēstekōi iyamaxō. <sup>7</sup> Yora fētsa āa shināi iskatiro: “Yorafāfe ea yoitirofo ē chanāito ōikakī. Iskafakakī ea yoitirofo: ‘Mī Nios keskarama. Nios chanīmismo. Nios mēstekōi ika,’ ixō ea yoitirofo. Akka ē chanāito ōikakī fetsafāfe, ‘Nios sharakōi, mia keskarama,’ ea faxikani. Nāskakē ē shinātiro iskafakī, Niospa ea yoitiro

iskafakī: ‘Mī afara chakafafiaito ē mia omiskōimaxima,’ ea Niospa fatiro,” ixō āa yōra anori shināi. Anori Niospa yoyamafiano āa shināi askatiro. <sup>8</sup> Iskafakakī yoipaikani: “Nō afara chakafanōkāfe. Nō afara chakafaito ōikakī yorafāfe, ‘Nios sharara,’ fanōfo,” ixō yoipaikani. “Nā Pablori anori yoimiski nō afara chakafanō,” ixō yoikani. Āa chanīmiso. Ēkai anori yoimisma. Epa Nios chanīmisma. Nā keskara yorafo ato omiskōimaxii.

*Nō keyokōichi chakafamis*

<sup>9</sup> “Nō judeofo sharakōifo. Akka nā judeofoma sharafoma,” ē faima. Askatamaroko ē iskafakī yoimis: “Nōfi nā judeofoma ōitsa, nāskarafos nō. Nō keyokōichi afara chakafamis. Nāskakē Niospa ato yafi noko omiskōimaxii noko tāpimakī,” nānori ē yoimis. <sup>10</sup> Niospa meka yoikakī kirika kenenifo iskafakakī:

Tsoa pishtakai nā Niospa yoia keskara famisma.

<sup>11</sup> Tsoa pishtakai Nios shināpaikanima. Tsōakai Nios tāpipaisharakanima. <sup>12</sup> Tsoa pishtakai anā Nios

Ifofapaikanima. Afara chaka fisti fapaikani. Afara sharakai tāpiafoma. Tsōa pishtakai sharafamisma.

Fato fistichikai shara Ifofaima. <sup>13</sup> Yora naax maiax fepekemeax pisi kaitiro. Nāskarifiakī nōko axfapa meka chaka fisti nō yoimis. Mā nō ato pārakī feyafamis.

Nā rono paekapato noko chachiano nō paemetiro keskarari nōko meka chakaōnoax omiskōixikani. <sup>14</sup> Nō

ato fekaxtefapaikī meka mitsisipato fisti nō mekamis. Nō ato ičhari famis. <sup>15</sup> Tsoa afayamafekē nō ato retepaimis.

<sup>16</sup> Nōa kafāsakī nō ato omiskōimafofāsafamis. Nōa nō ato fekaxtefaafōfāsafaki. <sup>17</sup> Yora fetsafokai nō ato

raefapaimisma ato fe isharaxikima. <sup>18</sup> Nōko shinā mēranoaxkai Nioski nō rateima. Āfe meka nō nikapaima.

Nōko chaka nō xatepaima,

ixō nāskara yoikī kirika kenenifo.

<sup>19</sup> Mā nō tāpia a Niospa yoia keskara Moisés noko kirika kenexoni. Akka tsōakai Niospa meka nikakōimisfoma. Nāskaxō

tsōa yoitiroma iskakī: “Ēfi afaa chakafamismaki. Ē shara imis,” tsoa itiroma. Akka Niospa noko yoitiro iskafakī: “Māri

afara chakafamiski,” keyokōi noko fatiro. <sup>20</sup> Nāskakē Niospa meka a Moisés noko kenexoni nō nikapaifiaito, Niospa noko

yoikī iskafatiroma: “Mā shara imiski,” noko fatiroma. Akka tsōa āfe meka nikasharakōima. Āfe mekaoxō nō tāpitiro

keyokōichi nō chakafamisfo.

*Jesucristo chanīmara faax nō Nios fe ipaxatiro*

<sup>21-22</sup> Iskaratīa Niospa noko afara fetsa tāpimana. Noko xafakīa ōimana afeska faxō noko imasharatiromākī a keskara shara nō inō. Moisés kenenioxō noko shara imaima. Akka

nō Jesucristo chanĩmara fakē Niospa noko shara imatiro Jesúsmaĩ noko nãxonikē nōko chaka noko soaxoxiki. Nãnori Niospa meka Moisés yoikĩ kirika keneni. Niospa meka yoim-isfãferi nãnoriri kenenido. Nã keyokõichi Jesucristo chanĩmara faifo Niospa ato shara imai. Judeofo, judeofomafori Niospa shara imatiro Jesús chanĩmara faifãfe. <sup>23</sup> Keyokõichi mã nō chakafamis. Tsoa Nios keskarama. Nios sharakõ. Afaakai chakafamisma. A keskarakai tsoama. <sup>24</sup> Nãskakē Niospa noko noikĩ nōko chaka noko soaxotiro nō Jesucristo chanĩmara faino. Akka Jesucristo nōko chakaõnoax noko nãxoni. Nãskaxõ nōko chaka noko soaxoni. Nō afaa kopifatiroma Niospa noko shara imanõ. <sup>25</sup> Āfe Fake Jesucristo nĩchini āfe imi foax nõõnoax nanõ nōko chaka noko soaxoxiki. Nãskaxõ Niospa noko omiskõimانيا. Nō Jesús chanĩmara faino Niospa nōko chaka noko soaxoni nō shara inõ. Nãskaxõ nō õitiro Nios sharakõ. Jesús nayoamano chakafafiaifono Niospa teneyoni. Ato omiskõimayonima Niospamãĩ tãpixõ āfe Fãkemãĩ chipo ato nãxoxiaino Niosmãĩ mẽstekõĩ ixõ. <sup>26</sup> Jesús nōko mai ano oax noko nãxoni. Nãskakē nō chanĩmara faito Niospa nōko chaka noko soaxoni noko imasharai. Nãskaxõ Niospa noko õimasharai amãĩ mẽstekõĩ ixõ.

<sup>27</sup> Nãskaxõ tsõa yoitiroma iskafakĩ: “Ēfi sharaki, fetsafo keskarama. Nãskax ě Nios fe ipanaka,” ixõ tsõakai yoitiroma. Moisés kirika kenekĩ yoini keskara nikafixõ tsõa anori yoitiroma. Jesucristo noko nãxoni nōko chaka noko soaxoxiki nō shinãsharanõ. Nãskakē nō Jesús chanĩmara faino, “Jesús nōko chaka noko soaxoni nō afe ipaxanõ,” ixõ nō yoitiro. <sup>28</sup> Nãskakē anã nō mato yoi. Jesucristo nō chanĩmara fakēma a Moisés kirika keneni keskara nō ifofafiaito nōko chaka noko soaxonima. Akka nō Moisés meka nikaito Niospa, “Mĩ afara sharafamiski,” noko fatiroma. Akka nō Jesús chanĩmara faito, “Mĩ Jesúsnoax isharakõimis,” noko fatiro.

<sup>29</sup> Nãskakēri, ¿Niospa judeofo fisti ato ifitiromē afe yora inõfo? Maa, judeofomafori ato ifitiro Jesús chanĩmara faifono afe yora inõfo. <sup>30</sup> Niosfi fistiki. Judeofori, judeofomafãferi Jesús chanĩmara fakanax Nios fe nipanakafo ato chaka soaxonano. <sup>31</sup> ¿Nō Jesús chanĩmara faxõ a Moisés kirika keneni nō potatiromē? Maa, nō potatiroma. Jesús chanĩmara faxõ a Moisés Niospa meka yoikĩ kirika keneni nikakĩ nō chanĩmara fatiro.

## 4

*Abraham Nios chanĩmara fakõini keskara yorafãferi keyokõichi Nios chanĩmara fatirofo*

<sup>1</sup> Akka nōko xini Abraham ipaoni keskara ě mato yoinõ. <sup>2</sup> Abraham afara sharafaõxokai Niospa āfe chaka soaxonima.

Akka Nios chanĩmara faito Niospa ãfe chaka soaxoni. “Mĩ afara sharafaito nãskakẽ ã mia ifitiro mĩ efe yora inõ,” ixõ Niospa anori yoinima. Akka Niospa anori yoiano Abraham yoikerani: “Ë afara sharafaito ea Niospa chaka soaxona,” ixõ yoikerani ãa kakapaikĩ. Akka anori Niospa yoinima, nã Niospamãĩ mã ãfe chaka soaxonano chanĩmara faito. <sup>3</sup> Niospa meka yoikĩ Moisés kirika keneni iskafakĩ: “Abraham Nios chanĩmara faito Niospa ãfe chaka soaxoni. Nãskakẽ Niospa yoini iskafakĩ: ‘Mĩ afaa chakafamisma keskara ã mia õi,’ Niospa fani.” Nãskakẽ Moisés kirika keneni. <sup>4</sup> Akka feronãfãke yora fetsa yonomaxõ kori inãtiro, kaxpa inãtiroma. <sup>5</sup> Akka nõ afara sharafaõxokai Niospa nõko chaka noko soaxonima, nõ afaa chakafamisma keskara noko õixiki. Askatamaroko nõ Jesús chanĩmara faito Niospa nõko chaka noko soaxotiro. <sup>6</sup> Nãskarari David yoini iskafakĩ: “Mã Nios chanĩmara faito oa afaa chakafamisma keskara Niospa mato õitiro a Moisés keneni keskara mã nikakõiyamafiaito. Nãskax mã inimatiro.” David anã yoini iskafakĩ:

<sup>7-8</sup> Fatora yora Niospa ãfe chaka soaxonano inimatiro Niospamãĩ õiaino afaa chakafamisma keskara. Mã Niospa yora ãfe chaka soaxõ Niospa anã shinãchakaima a yõra afara chakafapaoniõnoa. Nãskax yora inimakõitiro Niospamãĩ mã ãfe chaka soaxonano, ixõ David yoini kirika kenekĩ.

<sup>9</sup> ¿Nã judeofo fisti Niospa ãto chaka ato soaxotiomẽ? Maa, anorima. Judeomafãferi Nios chanĩmara faifãfe ato chaka soaxotiro afori inimanõfo. Nãskakẽ Niospa meka yoimisto kirika keneni iskafakĩ: “Abraham Nios chanĩmara faito Niospa sharakõĩ õini,” ixõ a Niospa meka yoimisto kirika keneni. <sup>10</sup> Akka taeyoi Abraham foshki repa xateyomanõ Niospa yoini iskafakĩ: “Mĩ ea chanĩmara fai nã mĩ afaa chakafamisma keskara ã mia õi,” Niospa fani. <sup>11</sup> Nios chanĩmara faito Niospa Abraham ãfe chaka soaxoni afaa chakafamisma keskara õixiki. Nãskaxõ chipo Abraham foshki repa xatenifo fetsafãfe tãpinõfo Nios chanĩmara faino. Akka taeyoi Abraham Nios chanĩmara fani askayoxoma. Nãskaxõ chipo foshki repa xateni. Taefakĩ Abraham Nios chanĩmara fani Niospa fake ixiki. Nãskano a chipo Nios chanĩmara faifo Abraham ãfe fenafo. “Abraham nõko xini ipaoni,” fatirofo. Abraham keskara nõ foshki repa xateyamafixõ nõ Nios chanĩmara faito Niospa noko chaka soaxotiro afaa chakafamisma keskara noko õixiki. <sup>12</sup> Abraham askayoxoma Nios chanĩmara fani. Nãskaxõ foshki repa xateni. Nã Abraham judeofãfe ãto xini ipaoni. Judeofo a Nios chanĩmara faafãfe nãfãfe ãto xinikõĩ Abraham nafãferimãĩ Nios chanĩmara



fakanax.

*Niospa noko yoiai keskara noko axōi*

<sup>13</sup> Niospa Abraham yoini: “Ē mia yafi mī fenafo keyokōi ě mato mai ināikai,” fani. A Moisés kirika keneni Abraham nikaito Niospa mai inānima. Akka Nios chanīmara faito Niospa mai ināni. Nāskaxō Abraham Nios chanīmara faito Niospa āfe chaka soaxoni, afaa chakafamisma keskara shara ōikī. <sup>14</sup> Fetsafāfe anorima shinātirofo iskafakakī: “Nō Moisés kirika keneni nikaito Niospa a yoiai keskara noko axotiro. Akka Jesús fisti nō chanīmara faito Niospa noko axotiroma. Kaxpa nō Jesús shināi,” ixō anorima shinātirofo. Akka nōroko Jesús chanīmara faito Niospa yoia keskara noko axosharatiro Jesúsmāi nōko Ifoxō. <sup>15</sup> Akka Niospa meka a Moisés yoini keskara nō nikayamaito Niospa noko omiskōimatiro. Akka Niospa noko afaa yoyamanino nō nikayospa ikeranama. Akka iskaratīa nō nikayospakōifo mā nōmāi Moisés kirika keneni tāpiax.

<sup>16</sup> Taeyoi Niospa Abraham yoyoni Nios chanīmara faino. Nāskakē Niospa afama mīshti axoni a yoyoni keskafakī. Niospa Abraham afaa yōkanima afama mīshti axosharaxō. Akka Abraham āfe fenafori Niospa ato noikī nāskaxō afama mīshtiri ato axosharai a yoyoni keskafakī. A Moisés yoini keskara nikakōiaito Niospa afama mīshti axosharanima. Akka Nios chanīmara faito Niospa axosharani. Nāskarari a Abraham keskarrafo Nios chanīmara faifori Niospa ato shara faxōi. Akka Abraham nōko xinikī nōmāi Nios chanīmara fai Abraham ipaoni keskara. <sup>17</sup> Niospa Abraham yoini keskafakī, yora fētsa kirika kenekī iskafani: “Nā yora ichapakōifo āto apa keskarakōi mī inō,” ixō kirika keneni. Abraham Nios chanīmara fani. Askaxō Abraham nōko epa keskara Niospa ōi. Niospa nā namisfori anā otofatiro. Nāskaxō Niospa afama mīshti onifatiro tsōa ōimismafo. Nāskakē Abraham Nios chanīmara fani.

<sup>18</sup> Nāskax Abraham anifokōi ini anā fake atiromaxakī. Nios chanīmara faito Niospa yoini: “Mī chipo fake fixii. Mī fenafori ichapa rasi kaixikani,” ixō Epa Niospa yoini keskara Abraham chanīmara fani. Nāskax, “Yorafāfe āto xini mī iki,” Niospa fani. <sup>19</sup> Nāskax Abraham anifokōi ini. Cien xiniya aka. Sara āfe āfiri yōxafokōi ini. Anā yōxafoxō fake fitiroma ini. Nāskafixō Abraham Nios chanīmara fani. “Ē anifokōi, ě anā fake fitiroma,” ixō Abraham shinānima. “Akka Niospa tsōa atiroma keskara fatiro,” ixō Abraham shinākī Nios chanīmara fani. <sup>20</sup> “Mī āfi Sara fake nanexii,” ixō Niospa yoini. Niospa nāskara yoiaito nikakī Abraham Nios chanīmara fani. Niospa askafafiaino, “Ēfe āfi yōxafokōia. Anā fake nanetiroma,” ixō Abraham shinānima. “Niospa ea yoia keskara ea axotiro.

Aicho, Nios fāsi sharakōi,” fani. <sup>21</sup> Niospa axōai keskara fakī Nios chanīmara faxō Abraham afaa fetsakai shinānima. <sup>22</sup> Nāskakē Niospa yoini: “Mī ea chanīmara fai afaa chakafamisma keskara ē mia ōi,” Niospa fani.

<sup>23</sup> Niospa Abraham askafaniōnoa yōra kirika kenei iskakakī: “Nios chanīmara faifāfe afaa chakafamisfoma keskara Niospa ato ōi,” ixō Abrahamnoa fisti kirika kenenima. A Nios chanīmara faifo Niospa ato ōi afaa chakafamisfoma keskara māmāi āto chaka soafono. <sup>24</sup> Nokori askara kenexoni nō Nios chanīmara faito. “Nōko Ifo Jesús naafiakē Niospa otofani,” nōri chanīmara fakē, afaa chakafamisma keskara Niospa noko ōi. <sup>25</sup> Nōko chakaōnoax Jesús nani nōko chaka noko soaxoxiki. Askata mā otofaano aōnoax afaa chakafamisma keskarafō nō ixii.

## 5

*Nō Nios chanīmara faito afaa chakafamisma keskara Niospa noko ōi*

<sup>1</sup> Nōko Ifo Jesucristo nō chanīmara fakē nōko chaka noko soaxonano aōnoax nō Nios fe isharapakexatiro. <sup>2</sup> Nō Jesús chanīmara faito noko noikī Niosya noko rafemani. Nāskakē, “Ē Nios ikano kaax ē a keskara shara itiro,” ixō nō shināi nō akiki inimakōitiro. <sup>3</sup> Askatari Jesúsnoax omiskōi nōko shinā mēra nō inimakōitiro. Askax nō a keskara nō itiro. Omiskōifaito Jesús āfe shināmā nōko shinā mēra noko mitsisfamaxotiro nō tenenō. <sup>4</sup> Akka Jesúsnoax omiskōikī nō tenei nō yora finakōia ipainākafatiro anā chaka shināyamaxiki. Nāskakē Nios nokoki inimai. Nokoki inimaino nō tāpia nō afe ĩpaxanō. <sup>5</sup> Nō askara shināi nō rāfitiroma Niospamāi a yoia keskara noko axōaino. Akka noko Niospa noikōikī āfe Yōshi Shara nōko shinā mēra noko nanexotiro.

<sup>6</sup> Akka nōa nōko chaka nō soametiroma. Nāskakē Niospa āfe Fake nīchipaiyaitīa nai mēraxō nāmā nīchini yora chakafoōnoax naaxinō. <sup>7</sup> Tsōakai yora fetsa nāxopaitiroma sharafiano. Ētsa, itiro rakikīa yora nai yora sharafoōnoax. <sup>8</sup> Akka nō chakafokē Niospa āfe Fake nīchini noko nāxonō. Nāskakē nō tāpitiro Niospa noko noikōiai. <sup>9</sup> Askax nōōnoax naano āfe imi foni. Nō chanīmara fakē afaa chakafamisma keskara noko ōi noko chaka soaxō. Akka nō chakakē Jesús nōōnoax nani. Nāskakē iskaratīa mā nō chanīmara fakī finakōia. Anā nokoki Nios ōitifishkikī noko omiskōimaxima. <sup>10</sup> Askata nō Nios noikaspaino āfe Fāke noko nāxonī Nios fe nō rafenō. Nāskax nō iskaratīa Jesús afe yorafo nō afe rafekōia. Askaxō noko sharafakī finakōi. Jesús nakē Niospa anā otofani, nōri afe nīpaxanō. <sup>11</sup> Akka nō Nios noikaspayoni. Iskaratīa mā nōko Ifo Jesucristoōxō noko raefaa nō afe isharakōia. Nāskakē Jesús Nioski noko inimamasharakōia.

*Adáõxõ yorafãfe keyokõichi chakafamisfo. Akka Cristo nõko chaka noko soaxotiro*

<sup>12</sup> Niospa nã feronãfake Adán taefakĩ onifani. Nã Adán taefakĩ afara chakafani. Nãskakẽ aõxõ afara chakafapafõ. Nã Adán afara chakafaniõnoax keyokõi nõ natiro nõmãi keyokõichi afara chakafaax. <sup>13-14</sup> Mã Adán afetiama nani-ano Moisés Niospa meka yoini kirika keneni afe keskara nõ niimãkai. Akka Niospa Moisés yoiyoamano keyokõichi chakafayopaonifo. Nãskax mã nai keyonifo. Fetsafãfe chakafafiakaxõ Moisés kirika keneni tãpipaonifoma. Askafafi-aifãfe oa afaa chakafamisfoma keskara Niospa ato õini tsõakairoko ãfe meka tãpikẽ. Adán keskarafoma. Adán Niospa meka tãpifiãx nikayospani. Nãskaxõ Adán chakafakĩ taefani. Nãskarifiakĩ yorafãfe keyokõichi chakafamisfo. Akka nãskax mã nai keyokani, Adánmã taeyoi nanikẽ. Nãskarifiãi Cristo oni yora chakafoõnoax naiyoi. Nãskakẽ yorafo aõnoax nãpaxatirofo.

<sup>15</sup> Akka Jesucristo Adán keskarama. Adán Nios nikakaspax nani. Nãskakẽ nõri aõnoax natiro. Akka Jesúsxõ Niospa yorafo noikõikĩ ato imasharapakenaka afaa chakafamisma keskaramãi ato õikĩ. Akka nã Adán nai taeni afara chakafaax. Nãskax yorafo Adánnoax nãpanakafo. Akka Jesús Ifofakanax Jesús fistiõnoax keyokõi isharapakenakafo. Jesúsxõ Niospa ato raefatiro a chanĩmara faafo tii. <sup>16</sup> Adán afara chakafaniõnoax yorafo nai keyotirofo. Nãskatari ãto chakaõnoaxri nai keyotirofo. Akka nõ keyokõichi chakafakẽ Niospa noko omiskõimatiro. Nã Adán anĩ keskarakai Cristo afaa chakafamisma. Mã nõ keyokõichi afara chakafamiskẽ Jesucristoõxõ Niospa noko noikĩ nõko chaka noko soaxotiro afaa chakafamisma keskara noko õikĩ. Omiskõitamaroko nõ afe isharapakexanõ. <sup>17</sup> Adán ãfe chakafoõnoax keyokõi nakani. Akka Cristo fisti nokoõnoax nani nõ aõnoax Nios fe nãpaxanõ Niospamãi noko shara õiãito. Jesucristoõxõ Niospa noko noixõ noko nimapakenaka. Nãskakẽ noko askafaxõkĩ Jesús Adán finõkõia.

<sup>18</sup> Nãskakẽ ã mato yoiãi keskara nã feronãfake Adán ãfe chakaõxõ keyokõi Niospa noko omiskõimani. Akka Jesúskaĩ afaa chakafamisma. Nãskakẽ nã chanĩmara faafo tii Nios fe nãpanakafo. Nãskakẽ nã afaa chakafamisma keskara Niospa ato imai. <sup>19</sup> Akka nã feronãfake Adán Nios nikakaspakĩ taefani. Nãskax Adán nikayospakõĩ taeyoi ini. Keyokõichi aõxõ nõ chakafapamis. Akka nã Cristo fistichi ares Nios nikakõimis. Afaakãi chakafamisma. Nãskakẽ nã chanĩmara faafo tii aõnoax afaa chakafamisma keskarãfo ipanakafo.

<sup>20</sup> Moisés Niospa meka yoikĩ ato kirika kenexoni afara chakaõnoa tãpinõfo. Akka nã Moisés ato kenexoni mã õifikakĩ a Niospa ato yoia keskara tsõa nikakõikanima. Keyokõichi

afara chakafamisfo. Mā chakafakī finafiafono Niospa ato noisharakōixō āfe Fake atoki nīchini ato chaka soaxonō. <sup>21</sup> Afara chaka fisti shinākani namisfo. Akka Niospa noko noikōia. Nāskakē āfe Fake Jesús noko nāxoni nōko chaka noko soaxoxiki. Nāskakē nō Jesús chanīmara faito Niospa afaa chakafamisma keskara noko ōi. Noko chaka soaxonano nō afe ipanaka.

## 6

*Cristo nia keskara nōri afe nīpatiro*

<sup>1</sup> Akka yorafāfe atirito shinākakī iskakani: “Nō afara mēxotaima chakafafiaino Epa Niospa noko noikī nōko chaka noko soaxotiro. ¿Nāskakē nō afara chakafa fafafaītiro,” ixō anori shinākani sharamē? Maa, sharama. <sup>2</sup> Nāskakē afara chaka shināyamakāfe. Nō Jesús chanīmara faxō mā nōko chaka nō pota. A nō ipaoni keskara nō anā shināpaima. <sup>3-4</sup> Mā mā tāpia noko maotisafani nō fetsafo ōimanō. Nāskax nō a Jesús fe naa keskara nō chaka ipaoni keskara anā shināima. Nāskakē nōko chaka soapaikī nō Jesús chanīmara faino noko maotisafani. Jesús nokoōnoax naano maifanifo. Nāskax nō afe naa keskarax nōri maia keskara. Akka Jesús naax otoiñakafata Apa ari kani. Nōri nono mai anoax Jesúsnoax ari nō katiro. Askaxō Apa Niospa mā Jesús otofaxō noko ōimani nāatomāi afama mīshti fatiroxakī. Nōko ōiti noko fetsafaano a nō ipaoni keskara nō anā itiroma, a keskara sharakōi nō ipai.

<sup>5</sup> Cristo nōkoōnoax nani. Nā nō chanīmara faax nō afe rafetiro. Nāskakē Jesucristo nakē Apa Niospa otofani keskafakīri anā otofatiro, a keskara shara nō inō. <sup>6</sup> Jesús mastanifo nōko chaka noko soaxonō. Nōri Jesús fe masta keskarakōi anā chakafapaima. Nāskarifiāi nō Jesús Ifofaax nō afe naa keskara. Nāskaxō nō anā chaka shināima. Afara chakafo nōko ifoma. <sup>7</sup> Akka yōra nāxokai anā chaka shinātiroma. Nāskarifiāi nōri chaka shinātiroma afara chakakairoko nōko ifokē.

<sup>8</sup> Nō Cristo fe naa keskaraxō nō Jesús chanīmara faax nō afe isharapakenaka nāmāi nō chanīmara faax. <sup>9</sup> Mā nō tāpia Cristo mā nafiano Niospa otofani. Nāskax anā natiroma. Anākai afeskax Cristo natiroma. <sup>10</sup> Akka nai fistinixakī nōko chaka noko soaxoni anā afara chaka nōko ifo ifōma. Nāskakē iskaratiā Cristo mā nia. Nāskaxō nā Niospa apaiyai keskafai.

<sup>11</sup> Māri Cristo fe naa keskara. Nāskakē iskaratiā mā shinātiro iskakī: “Ē chaka ipaoni keskara anā shināpaima. Nāskax ē iskaratiā Jesucristoōnoax Epa Nios fe rafe kakaini ea amapaiyai keskara axiki,” ixō anori shinākāfe. <sup>12</sup> Nāskaxō afara chaka anā ifofayamakāfe afara chaka mato famapai kiki a keskara mā anōma. <sup>13</sup> Nāskax Niosnoax isharakāfe. Afara chaka mato famapaifaito nikayamakāfe. Afara chakafamis iyamakāfe. Nios Ifofakāfe mato sharafanō. Iskafakāfe: “Nios

ēfe Ifokōixō ea amapaia keskara ē aki sharafakī.”<sup>14</sup> Akka anā afara chakapa mato afeska fatiroma. Afara chaka anā mātō Ifo itiro ma mā Cristo chanīmara faano. Epa Niospa mato noikī ares fisti mato ifitiro mā afe ĩpaxanō. Akka nā Moisés kirika kenenīōnoaxkai mā Nios fe ĩpaxatiroma.

*Epa Niospa mato amapaiyai keskara mā nikakōiyanā mā yonoxokōitiro*

<sup>15</sup> Moisés yoini keskara nō nikaito Epa Niospa noko ni-masharaima. Akka Cristo nō chanīmara faito noko noikī noko nimasharatiro. Nā fisti nōko Ifo itiro noko chaka soaxonano. Nāskatari, ĩnō afara chakafa fafafaītiromē Niospa noko noikī nōko chaka soaxonō? Maa, nō afaa chakafatiroma. <sup>16</sup> Mā tāpia āfe yonomatixō mātō ifo nikakōiyanā mā yonoxotiro. Nāskarifiakī mā katotiro fatomākī mātō Ifo. Epa Nios mā nikakōitiro āfe yonomati ixii, askayamai chaka mā katoax mā āfe yonomati mā itiro. Chaka katoax mā naax mā omiskōixii, mā Nios fe nipanakama. Askatamaroko Epa Nios nikakōiax mā afe isharapakenaka. <sup>17</sup> Mā afara chaka ifofaax āfe yonomati mā ipaoni. Akka iskaratīa mā mā Epa Nios Ifofaa. Mato yoimis keskara mātō shinā mēraxō mā nikakōimis. ¡Aicho! Mā mā Epa Nios Ifofaano mato nimasharamis. <sup>18</sup> Nāskakēkai afara chaka anā mātō ifo itiro ma anā mato yonomatiroma. Akka iskaratīa afara shara fisti mātō ifo itiro. Māfi āfe inakōifoki. <sup>19</sup> Ē mato meka fekax yoima, mātō ifoōnoa ē mato yoinō mā tāpisharakōinō. Chaka fetsa fetsatapafo mātō ifo ipaoni. Nāskaxō mā afara chakafakī finakōipaoni. Akka iskaratīa Epa Niospa āfe inafō, mā. Anā afara chakafayamakāfe afara shara fisti mātō ifo inō.

<sup>20</sup> Taeyoi afara chaka mātō ifo ipaoni. Nāskakē afara shara mā shināpaonima mātō ifo ipanā. <sup>21</sup> ĩMā ipaoni keskara sharamē? ĩMato imasharapaonimē? Maa, a nō ipaoni keskarakai anā afokai nō shināpaima. Afo nō shināi nō rāfitiro. Nā chakafo xateyamax nā nō naitīa nā omiskōipakenakafo mēra nō katiro. <sup>22</sup> Nāskakē iskaratīa afara chaka anā mātō ifoma. Epa Nios mātō Ifo. Māfi āfe yonomatifoki. Mā āfe yonomatifokē mato sharafa fafafaīni a keskara shara mā inō mā afe ĩpaxanō. <sup>23</sup> Nā afara chaka nōko ifono, ĩafanā noko kopifaimē? Akka aōnoax nō naax nō omiskōipakenaka. Akka Jesucristo nō Ifofaino Epa Niospa noko afaa kopi yōkaima nō afe nipaxanō.

## 7

*Nō anā chaka ifofaxoma nō Cristo Ifofatiro*

<sup>1</sup> Efe yorafāfe, mā mā tāpia nōko xanīfokōichi noko yoia keskara nō nikatiro. Nō niyoxō nō nikatiro. Akka mā nō

naxō nō anā nikatiroma. <sup>2</sup> Nāskarifiāi kēromā āfe fene niyoano enetiroma. Akka mā fene naano fetsa fe fianātiro ixō anori Moisés yoini Niospa meka. <sup>3</sup> Akka fene niyoanokai kēromā fene eneta fetsa fe fianātiro. Askarafi chakakī. Chota feroma itiro. Akka fene naano kēro feronāfake fetsa fe fianā askara shara, ixō Moisés kenenī.

<sup>4</sup> Akka mā fenē naxō anā āfe āfi yonomatiroma. Nāskarifiakī mā Cristo fe naa keskarax a Moisés kirika kenenī anā mā nikatiroma. Akka mā Cristo fe naa keskarax mā yora fena sharakōi itiro Cristo mātō Ifono. Mā Cristo naax otoiñākafanax Nios fe ipanaka. Nāskaxō afara shara mato amatiro mā Nios yonoxonō. <sup>5</sup> Nō Cristo Ifofamatai afara chaka fetsa fetsatapafo nō ayopaoni. Moisés kenenī keskara atama nō chaka fisti shināpaipaoni. Nā chakaōnoax nō naxii. <sup>6</sup> Cristo noko nāxonī nōko chaka noko soaxoxiki nō fena shara keskara inō. Nāskakē nō Cristo Ifofaax mā nō afe naa keskarakōi. Nō afe naa keskarax nō yora fena shara iki. Afara chaka anā nōko ifoma. Askatamaroko āfe Yōshi Sharaōxō Niospa noko amapaiyai keskara noko amatiro. A fisti nō Ifofai, a Moisés kenenī keskara ifofayopaonixaki anā nō ifofatiroma.

### *Moisés kenenioxō nō tāpia nō chakafamis*

<sup>7</sup> Iskafakī shināyamakāfe. A Moisés noko kenexoni, chakara fayamakāfe. Akka Moisés Niospa yoini keskara keneyamanikēkai nō chakafamis nō tāpikeranama. Moisés kenenī iskafakī: “Yora fetsanā afara fiapaiyamakāfe. Nō yora fetsanā fiapaikī nō chakafai,” Moisés anori keneyamanikē nō tāpikeranama. <sup>8</sup> Moisés anori kenenī tāpifixō nōko ōiti chakakōikē nō shināsharaima. Nōkonāyamafeke nō fichipaimis. Afara chakafori nō fichipai. Akka Moisés Niospa meka keneyamanikēkai nō nikayospa ikeranama. <sup>9</sup> Niospa meka tāpixoma afara chakafafiakī nō shināma. Askata chipo nō āfe meka tāpifixō nō akama a noko yoia keskara. Nāskafaxō āfe mekaōxō a nō afara chakafamis nō tāpitiro. <sup>10</sup> Niospa yoia keskara akax nō nipaxatiro. Niospa yoiai keskara nō akima mā tāpifiāx, askax nō omiskōi. “Moisés kenenī keskara ayamax nō natiro,” ixō nō shināmis. <sup>11</sup> “Epa Niospa noko yoia keskara nō aki. Nāskai nō Nios fe nīpanaka,” ixō nō shināfikī nō afara chakafakī nō xateama. Akka chakapa noko pārai. Nāskakē nō tāpia nōko chakaōnoax nō omiskōi nō Nios fe nīpanakama.

<sup>12</sup> Moisés kenenī keskara sharakōi nāmāi Niospa meka. Niospa meka mēstekōi, chanīmakōi. <sup>13</sup> A Moisés kenenī sharafianokai a kenenī keskara nō nikasharamisma. Moisés kenenioxō nō tāpitiro nō chakafamis. Moisés kenenī ōifikī, ¿afeskafaxō nōko chaka nō potatiromē? Nāskax nō naax nō omiskōipakenaka. ¿Moisés kenenīōnoax

nō omiskōipakenakamē? Maa, askarama. Akka nō Nios nikakaspax nō omiskōipakenaka. A Moisés keneni sharakōi, Niospa meka. Moisés keneniōxō nō tāpia nō nikayospakōi. Nō Niospa meka nikakōimisma. Nāskax nō chakakōi.

*Nōakōi nōko chaka xatepaifikī nōko shinā mēraxō nō xate-tiroma. Nōko shinā mēra chakakōi*

<sup>14</sup> A Moisés Niospa Yōshi Sharapa shināmanaino noko kenexoni. Niospa meka nō shināyamai nō sharama. Afara chakafi nōko ifokī nō āfe yonomati. <sup>15</sup> ¿Afeskai nō iskamismē? Nōkai tāpiana. Nō sharafapaiyai keskara nō akima. Akka nō akaspafiakī nō aki. <sup>16</sup> Moisés keneni keskara nō nikapai, “Nā meka shara,” shinākī. Askara shināfiki nō akima. Nā afara chakafapaiyamafikī nō aki. <sup>17</sup> Nōakai nō afara chakafapaima. Akka nōko shināmā nō shinākī nō afara chakafamis. Afara sharafapaifikī nō shināsharaima, nōko shinā mēramāi chakakōikē. <sup>18</sup> Mā nō tāpia nōko shinā mēra sharama. Isharapai nō itiroma. <sup>19</sup> Akka a nō akai keskara sharama. Nā sharafapaifikī nō amisma. Nā afara chakafapaiyamafikī nāskara nō amis. <sup>20</sup> Nāskakī a nō akaspai nō aki. Nōakōi nō afara chakafapaima. Nō chaka potapaifikī nō potatiroma nōko shinā mēramāi chakakōikē. <sup>21</sup> Akka nō askamiski. Nō sharafapaifaito nōko shinā mēraxō afara chakapa noko fakirira shināmapai nō shara shinānōma. Nō keyokōi askamis.

<sup>22-23</sup> Nōa nō iskafai: “Aicho. Niospa noko yoiai keskara shara,” ixō nō shināfi nō nikayospamis afara chakapamāi noko fekaxtefaito. Niospa meka nō tāpifiax nō nikayospamis. Nōa nō sharafapaiyai keskara nō atiroma. Nō chaka xate-tiroma. <sup>24</sup> Nāskakēkai ē inimaima. Ē shināchakai. Ēfi feronāfake chakakī. Ē inimaima. Ēfe shinā mēraxō ē afara chakafaax ē omiskōixii. Ooa. ¿Tsōa nō Ifofatiromē nōko Ifokōi inō, afara chaka anā nōko ifo inōma? <sup>25</sup> Aicho Epa Nios. Ēfe Ifokōi Jesucristoōxō ēfe chaka ē xatetiroki. Iskaratīa ē tāpia Niospa meka nō ifofapaifikī afeska faxō nōa nō atiroma nōko shinā mēramāi chakakē. Akka Jesucristoōxō nō atiro.

## 8

*Niospa Yōshi Sharaōnoax nō ika*

<sup>1</sup> Akka Jesucristo nōko Ifono nō afe yora. Nāskakē Epa Niospa noko yoima iskafakī: “Mā chaka. Ē mato omiskōimanō. Emakinoax fotakāfe omiskōipakenakafo mēra nānoax mā omiskōipakenaka,” ixō noko yoipakenakama māmāi nōko chaka noko soaxō, <sup>2</sup> Jesucristoōxō Niospa āfe Yōshi Sharapa noko nimasharai anā chaka nōko ifo inōma, nō omiskōipakexanōma. <sup>3</sup> Moisés yoini keskara nō tāpifiano aato noko imasharatiroma nōko chaka noko soaxotiroma. Akka

Epa Niospa shināyoni āfe Fake nai mēraxō mai ano nīchixiki ari noko keskara yora inō. Noko keskara fiaxokai nō amis keskara afaa chakafamisma. Akka noko nāxoni anā afara chaka nōko ifo inōma. <sup>4</sup> Nāskata iskaratīa nō Niospa Yōshi Shara Ifofaax aōxō Moisés yoini keskara nō nikatiro. Nō Niospa meka ifofasharakōitiro.

<sup>5</sup> Akka nō chaka xateyamano afara chakapa noko amapaiyai keskara fisti nō atiro. Akka Niospa Yōshi Sharapa noko ikināno nā noko amapaiyai keskara fisti nō atiro. <sup>6</sup> Nā apaiyaifo keskara fisti shinākanax afo nakanax anā otokanax omiskōipakenakafo. Nios fe ipanakafoma. Akka Niospa Yōshi Shara ato mēra naneano nā apaiyai keskara Niospa Yōshi Sharaōxō atirofo. Nāskax isharapakenakafo shināsharakata. <sup>7</sup> Fetsafāfe Nios noikaspakani Niospa ato yoia keskara nika-paikanima. Āto shinā mēraxō afara chaka fisti shinākani. Nāskaxō Niospa ato yoia keskara nikatirofoma. <sup>8</sup> Nā āto shināmā shināifo keskara fisti shinākakī Niospa ato amapaiyai keskara atirofoma. Afara chaka ifofaifono Nios atoki inima.

<sup>9</sup> Akka māakai askarama. Māto shinā mēraxō afara chakapa mato shināmanima. Akka Niospa Yōshi Shara māto shinā mēra nanexō mato shināmasharamis. Akka Niospa Yōshi Shara māto shinā mēra naneyamaino mā Cristo fe rafetiroma. <sup>10</sup> Cristo mato fe rafefiaino afara chakaōnoax māto yora nai. Māto yora nafiano māto fēro mēsho naima Nios fe nipanaka Niospamāi afaa chakafamisma keskara mato ōiaino. <sup>11</sup> Mā Jesús naano Niospa otofani. Nāato āfe Yōshi Shara māto shinā mēra nanea. Nāskarifiakī māto yora naano āfe Yōshi Sharaōxō Niospa anā mato otofatiro māto yora fenasharakōi inō.

<sup>12</sup> Efe yora mīshtichi, Niospa Yōshi Shara nofe rafeaino Epa Niosnoa nō shinātiro noko amapaiyai keskara akī. A nō afara chakafamiskai anā nō shināpaitiroma noko Niospa amapaiyai keskara akī. <sup>13</sup> Akka a nō apaiyaifo keskara fisti shināx nō omiskōipakenaka nai. Akka nāskafixō Niospa Yōshi Sharaōxō afara chakafakī nō xatexō anā chaka nō shinātiroma. Nō Epa Nios fe nisharapakenaka.

<sup>14</sup> Niospa Yōshi Sharapa noko shināmanaino nō Niospa fakefo iki. <sup>15</sup> Āfe Yōshi Sharapa noko shināmasharapai nō anā mesenōma. Mā nōfi Niospa Yōshi Shara fiaki. Nā āfe Yōshi Sharaōxō āfe fakefo noko ima. Aōxō nō yoitiro iskafakī: “Epa Nios, mī ēfe Epa,” ixō nō yoitiro. <sup>16</sup> Nōko shinā mēraxō Niospa Yōshi Sharapa noko yoi iskafakī: “Mī Epa Niospa Fakekōi,” ixō noko yoi. <sup>17</sup> Nō Niospa fakekē nā noko yoia keskara noko inātiro. Nōfi nō Niospa fakekē nā āfe Fake Cristo ani keskara nokori inātiro. Nōōnoax omiskōifinixakī iskaratīa nai mēranoax



Apa Nios fe xanĩfokõi. Nãskarifiai nõri aõnoax omiskõiax nõ nai mẽra Epa Nios ano nokoano noko sharafinakõia imaxii nõ afe isharaapakexanõ, a keskara shara nõ inõ. Akka afe yorafo Niospa ato sharafaxõi nãfomãĩ ãfe fakefokẽ.

### *Niospa fakefo Jesús fe isharaipakenakafo*

<sup>18</sup> Nõ iskaratĩa omiskõiyofiax nõ chipo Jesús fe isharaipakenaka. A keskara sharafinakõi noko imai. Tsõa õimisma keskara sharafo noko õimaxii. A nõ omiskõipaoni anã nõ shinãima. <sup>19</sup> Epa Niospa ãfe fakefo otofaxii a keskara sharakõi ato imaxii. Akka nã Niospa onifanifãfe manakani õisharapaikõikakĩ afe keskarafo ato imaimãkai. <sup>20-21</sup> Niospa ãfe fakefo sharakõi ato õimaxii. Nãskatari a onifanifori sharakõi ixii. Anã afaa chaka ixii. Afarafo anã payokomepakena-kama. Akka iskaratĩa nã Niospa onifanifo payokomepakena-kafo askayamapaiiafono. Nãskaxõ Niospa yoini: “Adán afara chakafaõnoax keyokõi payokomepakena-ka.” Akka Niospa ãfe fakekõifo akiki nokoafono ato yora fetsafaxoxii anã payokomenõfoma, afara chakafãfe ato fekaxtefanõma. Nãskarifiai Niospa onifanifori nã Niospa fakekõifo keskara shara ixii, anã payokomepakena-kama.

<sup>22</sup> Kẽromã fake kãikĩ pae meyotiro. Mã kãixõ anã pae metiroma. Nãskarifiai a Niospa onifanifo omiskõiyokani. Akka mã Niospa ato fetsafaano anã omiskõixikanima. <sup>23</sup> Akka nõ Niospa fakefo ãfe Yõshi Shara nofe rafeaino nõ tãpitiro nõ Nios ikano kaax nõ isharakõixii. Akka iskaratĩa nõ isinĩ iki fekaxtei. Nãskakẽ nõ manasharai Epa Nios ika ano noko ifinõ nõ ãfe fakefokẽ a keskara shara noko imanõ. Nãskatari nõko yora fena sharakõi noko imai anã nõ isinĩ inakama. Anãkai nõ nanakama. <sup>24-25</sup> Nãskara nõ shinãĩ nõ akiki nokoaito noko fetsafaxii a keskara shara nõ inõ. Nãskax nõ afe ipanaka. Chanĩmara faxõ inimayanã nõ manasharatiro fena fenakima nã nõ akiki nokoaitĩa. Akiki nokoxõ nõ anã manatiroma mãmãĩ nõ õikĩ.

<sup>26</sup> Nãskarifiakĩ Epa Niospa ãfe Yõshi Sharapa noko axosharafafãini. Afeskaxõ nõ Epa Nios kĩfisharatiromẽ nõkai tãpiana. Akka ãfe Yõshi Shara nõ mẽra nanexõ noko shinãmanaino nõ kĩfisharatiro. Noko noikĩ nõko kĩfixoni. Noko kĩfixonai keskarakai tsõarikai kĩfitiroma. <sup>27</sup> ãfe Yõshi Sharapa shinãĩ keskara Epa Niospa tãpikõia. Keyokõi nõko shinã mẽrari nõ shinãĩ keskara tãpikõia. Epa Niospa noko amapaiyai keskara nãnori ãfe Yõshi Sharapa a chanĩmara faafo tii ato kĩfixomis.

*Jesúsxõ nõ keyokõi finõkõitiro*

<sup>28</sup> Akka nō tāpia Epa Niospa noko katonī a apaiyai keskara nō anō. Nō Epa Nios noiaino afarafāfe noko afeskarafafai-aino afoxō Epa Niospa noko axosharai. <sup>29</sup> Nō Jesús Ifofayoamano Epa Niospa tāpiyoni fatofomākī a chanīmara faifo. Akka chanīmara fayoafo mano shināni iskafakī: “Nafo ēfe Fake keskara ē ato imaxii,” ixō shināyoni. Niospa āfe Fake iyoa Jesús. Nāskaxri nōri āfe fake chipoko ixii. <sup>30</sup> Tāpiyoni nō āfe fakefo ixinō. Askano nōko shinā mēraxō noko yoini: “Ēfe Fake chanīmara fakāfe,” noko fani. Fatora anori yoixō ato chaka soaxoni isharanōfo, afaa chakafamisma keskara ato ōixii, ato chaka soaxonano āfe Fake sharakōi keskara inōfo.

<sup>31</sup> Noko askasharafaino ĵnō fakiri yoitiromē? Epa Niospa noko sharafakōinaino afara chakafāfe noko chakafamatiroma. <sup>32</sup> Epa Niospa noko noikī āfe Fake Jesús timamanima noko naxonō. Nāskanixakī noko axosharatiro nā apaiyai keskara nō anō. <sup>33</sup> Epa Niospa noko katonī nō afe yora inō. Nāskaxō nōko chaka noko soaxonano afara chakafamisma keskara noko ōixiki. Askano fetsafāfe mī chakara noko faifono nō ato ifofaima. <sup>34</sup> Jesucristo noko nāxokē Āpa otofani. Iskaratīa Apa Nios ika ano ika Apa feta ato keyokōi ĩkinā. Epa Nios noko kīfixōfafāini. Nā chanīmakōikē tsōa, “Mī afara chakafamiski. Nāskax mī omiskōipakenaka,” noko tsōa fatiroma. <sup>35</sup> Tsōakai Jesucristo nomakinoa potatiroma noko noiyamanō. Nō omiskōikāi, nōko shinā mēra fekaxtekāi, nō Jesúsnoa yoiaito noko omiskōimafāi, noko fonāimafāi, nō rapati yopafāi, noko mesemafāi noko retepaifāi, keyokōi afāfekāi Cristo nomakinoa potatirofoma noko noiyamanō. <sup>36</sup> Niospa meka yoikī David kirika keneni iskafakī:

Epa Nios, pena tii mīōxō noko retepaikani. Nō oveja keskara. Ifāfe nā oveja itipinīfasharai retextiki. Nāskarifiakī a mīōxō noko chakafaifāfe noko retepaitirofo, ixō kirika keneni. <sup>37</sup> Noko askafafiaifono keyokōi nā chakafo nō finōkōitiro Jesús noko noiaino. <sup>38-39</sup> Jesucristo nōko Ifonokai afanā Epa Nios nomakinoa potatiroma anā noko noinōma. Nā ē chanīmara fakōini. Epa Niospa noko noiaino afanā noko afeska fatiroma anā noko noinōma. Nō nafiakēkai nomakinoa afanā Nios potatiroma. Nō niyoanori nomakinoa tsōa paxkatiroma. Āfe ājirifāferikai nomakinoa paxkatirofoma. Yōshi chakafāferikai nomakinoa paxkatirofoma. Afarafo iskaratīa ikaifāferikai nomakinoa paxkatirofoma. Inōpokoiaifāferikai nomakinoa paxkatirofoma. Afara chakafāfe āto xānifofofāferikai nomakinoa paxkatirofoma. Nā nai ari ikafāfe, mai ano ikafāferikai nomakinoa paxkatirofoma. Epa Niospa nōko Ifo Jesucristoxō noko noi. Nāskakē keyokōi onifanifāferikai nomakinoa paxkatirofoma anā noko

noinōma.

## 9

### *Niospa judeofo katoni afe yora inōfo*

<sup>1</sup> Ē Cristo fe rafexō ē mato mēstekōi yoi. Ē mato pāraima. Niospa Yōshi Shara ē mēra naneano ēfe shināmā shinākī chanīma ē mato yoi. <sup>2</sup> Ē mato yoi iskafakī, ēfe kaifo atirito Cristo Ifofaafoma. Nāskakē ēfe shinā mēra ē atoōnoax omiskōi kakaini. Ē ato shinākōikī finamis afomāi efe yorafokē. <sup>3</sup> Nāskakē ē shināmis iskafakī: “Epa Niospa, ēfe kaifo nā israelifo ē ato axopai fenoyamanōfo, mefe nipaxanōfo omiskōipakenakafo mēra fonōfoma. Nāskaxō Cristo makinoa ea potāfe ato potakima ē ato omiskōixonō afo omiskōipakexanōfoma. Nā ē fichipai ēfe kaifo judeofo Cristo fe ĩpaxanōfo,” ixō ē shināmis. <sup>4</sup> Nō judeofo, Jacobo āfe fenafo. Epa Niospa noko ifini āfe fakefo nō inō. Nāa Nios sharafinakōixō nōko kaifo israelifo ato ōimapaoni. “Ē mato afara sharafaxōikai. Cristo nā oxiai judeokōi ixii. Aōxō ē mato sharafaxōikai,” ixō Niospa yoini. Nāskara Moisés Niospa meka yoikī israelifo ato kirika kenexoni nikanōfo. Nāskaxō ato tāpimani afeskaxō Nios kīfitirofomāki ichanāxō. Nāskata afara sharakōi ato axoxiai keskara ato yoiyoni. <sup>5</sup> Judeofāfe xinifāfe Epa Nios Ifofasharapaonifo. Cristori judeo fake kāini, Niospa Fakekōifiax. Nāskax arifi nōko xinifāfe āto fena. Nāfi yorafāfe āto Ifokī, nāatomāi keyokōi ato ĩkikē. Nāskakē, “Nios fāsi finasharakōia,” nō fapaxanō. Askapainō.

<sup>6</sup> Epa Niospa noko yoisharayoni keskara judeofo atirito chanīmara fayamafiaifono āfe meka chanīmakōi. Afe yorafo yoiyoni keskara axii. “Nā judeofo Israelifāfe āto fenafo ē katoa efe yora inōfo,” ixō Niospa yoini. Askafafiano atirito Nios chanīmara famisfoma. Nāskakē afe yorakōi keskara Niospa ato ōima. <sup>7</sup> Nāskarifiakakī Abraham apaoni keska fakī āfe fena atirifāfe Nios chanīmara famisfoma. Afokai Niospa yorakōifoma. Akka Niospa Abraham yoini iskafakī: “Mī fakekōichi Isaaca āfe fakefo mī fenakōifo ixii, mī fake fetsafāfe āto fakefori mī fenakōifo ixiima,” ixō yoini. <sup>8</sup> Nāskano nō tāpitiro Abraham āfe fenafo atiri āfe fakekōifo Niospa ato ōima. Akka Niospa Abraham yoiyoni āfe āfinī Sara fake fixiai. “Nā fakefi mī fakekōi ixii. Mī fakē āfe fakefori mī fenakōifo ixii,” fani. Nā yoini keskara Abraham Nios chanīmara fani. Nā Abraham Nios chanīmara fai keskafakīri Nios chanīmara faifono nāfofi Niospa fakekōifoki. <sup>9</sup> Abraham āfe āfinī Sara fake naneamatai Epa Niospa yoiyoni iskafakī: “Xinia fētsa ē anā mikiki nokoxii. Nāskano mī āfi Sara fake kāixii feronāfake,” ixō Niospa Abraham yoini.

<sup>10</sup> Nāskata Sara āfe fake kāini. Nāskaxō aneni, Isaaca fakī. Nāskakē nā Isaaca nōko xini. Isaaca naetapaxō Rebeca fini āfe āfi inō. Rebeca fake rafe naneni. Nā fake rafeta āto apakōi Isaaca ipaoni. <sup>11-12</sup> Rebeca fake kāini fake rafe naneax. Esau kāi taeni. Chipo Jacobo ini. Akka kāiyoafomano tsōa tāpiyonima fatoto shara shināimāikai, fatotori chaka shināimāikai. Nāskano Niospa fisti katonni afe yora inō. Kāiyoafomano Niospa āto afa yoiyoni iskafakī: “Mī fake chipokoto āfe ochi yonomaxii,” fani. Akka Niospa nā apaiyai keskara fatiro, yorafāfe apaiyai keskara Niospa faima. Askano nō tāpitiro Niospa a inōpokoai keskara shināyoni nāskarākōi aki. <sup>13</sup> Nāskara Niospa meka yōra kirikaki keneni iskafakī: “Ē Jacobo ifipai efe yora inō. Esau ē fichipaima,” fani.

<sup>14</sup> Nāskakē ĵiskara nō yoitiromē, “Niospa mā fake fisti katoa kāiyoafomano, afaa chakafayoafomano fisti mā katoa akka fetsa katoama ōixoma. Nāskakē Niospa shināsharaima,” ixō nō shinātiromē? Maa, anori nō shinātiroma. Akka Niospa tāpisharakōia. Nā apaiyai keskara fatiro. Nā fichipaiyai katotiro. <sup>15</sup> Niospa Moisés yoini iskafakī: “Nā ē axopaiyai ē axosharāikai. Nāskarifiakī nā ē noipaiyai ē noisharāikai,” ixō Niospa yoini. <sup>16</sup> Askatari nō Nios nikasharatama nōakōi nō afe yora isharapaiyaito askara noko axōima. Askatamaroko Niospa noko noikī noko ifitiro afe yora nō inō, nāatomāi noko ōiti tāpikaxō. Nāskaxō noko noikī nā apaiyai keskara shara axōi. <sup>17</sup> Moisés kirika keneni iskafakī: “Epa Niospa Egipto anoa āto xanīfo yoini iskafakī: ‘Ē mia xanīfo imapaikī ē mia xanīfo imani mīoxō nā maitio ikafāfe tāpinōfo ē afama mīshti faito. Akka mī afara chakafaito ē mia potai mī anā xanīfo inōma. Ē mia askafaito ōikakī eōnoa ato yoitirofo nā maitio ikafāfe: ‘Nios tsoa keskarama āfe shināōxō mā Faraón pota,’ ixō eōnoa yoitirofo,’ ixō Niospa Faraón yoini.” <sup>18</sup> Akka shinākapo. Nā Niospa ato noipaiyai ato noikī axosharatiro. Nāskarifiakī fētsa afara chakafakī xateamano Niospa āfe ōiti nikayospakōi imatiro afaa shināpaiyamai keskara imatiro.

<sup>19</sup> Nāskakē fētsa shinātiro iskafakī: “Ĵafeskakī Niospa noko yoitiromē afara chakafamisfora fakī? Akka nāato noko amai nā apaiyai keskarafakī. Nāskakē noko omiskōimatiroma nō nikayospaito,” ixō fētsa yoitiro. <sup>20</sup> Askafayamafe. Ĵafeskakī mī Epa Nios kemapaimē? Mīfi yoraki. Aafi Nioski nā apaiyai keskara atiro. Akka a Niospa onifatokai yoikī iskafatiroma: “Ĵafeskafakī mī ea iskara onifaamē?” ixō yoitiroma. <sup>21</sup> Kēromā kesho rafe faxō nā apaiyai keskara fatiro. Kesho fetsa mēra afara shara nanetiro, fetsa mērari afara chaka nanetiro. Akka na kēsho iskafatiroma: “Ĵafeskakī mī ea iskara faamē?” ixō yoitiroma.

<sup>22</sup> Nāskarifiakī Epa Niospa keyokōi yorafo onifafiāxō atiri ato potatiro āfe meka nikakaspaifāfe. Fenāmāshta ato yoiyofiaito nikayospamisfo. Nāskakē anā teneima, mā atoki ōitifishkikī ato omiskōimaxii. Nāskaxō yorafo ato ōimapai ato potakī omiskōinōfo chaka fisti shināifāfe. <sup>23</sup> Akka nōfi ato keskarama. Noko Niospa noikī noko tāpimamis. Nāskatari noko itipinīsharafamai inimakōikai nō nai mēra shara afe ĩpaxanō. Noko askafamakī yorafo ōimani nā noiaifo Niospa ato noikōia. <sup>24</sup> Noko judeofo fisti Niospa katonima nō afe ĩpaxanō. Akka judeofomafori ato katoni. <sup>25</sup> Nānori Oseas Niospa meka yoikī kirikaki keneni iskafakī:

Fetsafo judeofomari ē katoxii efe yorafori inōfo. “Ē mato noi,” ē ato yoiyamafikatsaxakī, ē ato yoixii iskafakī: “Ē mato noikōi,”

ixō Epa Niospa yoini keskara Oseas kirikaki keneni. <sup>26</sup> Askata anā keneni iskafakī:

Niospa judeofoma ato iskafani: “Mā kai efe yorafoma,” ato fayoni. Nāskata chipo anā Epa Niospa ato ifixii afe yora inōfo. Nāskakē yorafāfe ato yoixikani iskafakakī: “Nafō Niospa fakefo. Epa Nios finakōia afama mīshti fatiro,”

ixō yoixikani. <sup>27</sup> Isaías israelifoōnoa yoini iskafakī: “Na Israel āfe fenafo ichapakōifo ixii oa makex mīshtifo nō tanātiroma tiikōi. Nāskarifiāi judeofo ichapakōi kaixikani. Askafikaxō fisti rasichi Nios Ifofaxikani Nios fe ipaxakakī. <sup>28</sup> Nāskaxō nā yoiyoni keskara nā maitio ikafāfe nā chanīmara faafoma. Nōko Ifāfe ato omiskōimaxii anā ato manayoima āto chaka potayonōfo,” ixō Isaías yoini. <sup>29</sup> Isaías yoiyoni keskara nāskakōi. Nāskata anā yoini iskafakī:

Nōko Ifo finasharakōia nōko fenafo fetsafo ifini afe ĩpaxanōfo. Askafayamafiano anā judeofo ikeranama. Akka nō nai keyokerana Sodoma anoa fe Gomorra anofo ini keskai,

ixō Isaías kirika keneni.

### *Nā judeofoma na meka shara Jesúsnoa Pablo ato yoini*

<sup>30</sup> Nāskakē ē mato yoi. Nā judeofomafāfe shināyonifoma iskafakakī: “Nōko chaka nō soapai,” ixō shināyonifoma. Akka iskaratīa Cristo chanīmara faifāfe Epa Niospa mā ato chaka soaxona afaa chakafamisma keskara ato ōixiki. <sup>31</sup> Akka ēfe kaifo israelifāfe Epa Niospa Moisés yoini keskara ifo sharafapainifo. Nāskaxō shinānifo iskafakakī: “A Moisés keneni nō ifofasharaito Niospa noko shara ōitiro,” ixō shināfiaifono Moisés kenenioxō Niospa ato chaka soaxotiro ma ato shara ōixiki. <sup>32</sup> ¿Afeskakī Niospa ato shara ōimamē? Ē mato yoinō. Afāfekairoko Jesucristo chanīmara faifono ato chaka soaxopanā. Askatamaroko Moisés ato yoini keskaraōnoax ishara-

paikī āto chaka soapaikani Niospa ato shara ōinō. Akka Moisés yoinioxō Niospa ato chaka soaxotiroma. Ē mato afara fetsa anā yoinō. Tokiri fai nēxpakīa rakano finōpai akiki nō otisikaināi nō paketiro. Nāskarifiakī Jesús finōpaiyafāfe chanīmara fakanima afe nīpāxakakīma. Akka nā yorafo oa nō tokiriki otisikai paketiro keskarafa. Nāskakī Jesús finōpaikakī shināchakatirofo. Akka tsōa Jesús finōtiroma. <sup>33</sup> Nānori Isaías Niospa meka yoikī kirika keneyoni iskafakī:

Nikakapo, judeofāfe āto pexe rasi ano Niospa tokiri keskara nīchixii yorafo akiki otisikī shināchakaxinōfo. Nā tokiri efapaki yorafo otisikani paketirofo. Akka nāskarari nā Jesucristo chanīmara faafo tiikai paketirofoma. Anā shināchakakanima, ixō Jesúsnoa Isaías kirika keneni. Akka Jesús nā tokiri efapa keskarakōi.

## 10

<sup>1</sup> Efe yora mīshtichi, ēfe kaifo ē shinākī finakōi. Ē ato Nios kīfixōfafāini Jesús chanīmara fanōfo, Nios fe ĩpaxanōfo. <sup>2</sup> Mē tāpia nāfāfe Epa Nios tāpisharapaikani. Nāskafikakī a Niospa ato tāpimapaiyai keskara shinākanima. Āa āto shināmā fisti shināxō akani. <sup>3</sup> Jesúsxō Epa Niospa āto chaka ato soaxotiro afaa chakafamisfoma keskara ato ōixiki. Akka nā Jesús ato chaka soaxotiro nikakaspakani. Āakōi shinākanax shara ipaikani. <sup>4</sup> Iskakakī shinākani: “Moisés keneni keskara nō nikakōiaito Niospa noko chaka soaxotiro afaa chakafamisma keskara noko ōixiki. Nāskax nō afe ĩpaxanō,” ixō āakōi shinākani. Akka Moisés kenenioxō nōko chaka nōa nō soametiroma afaa chakafamisma keskara ixii Niospa noko ōinō. Askatamaroko Moisésxō nō Cristoōnoa tāpitiro. Nāskakī nō Jesucristo chanīmara faax aōnoax nā afaa chakafamisma keskarakōi nō itiro nō Nios fe ipaxakī. Nāskakī nō Cristo fisti Ifofatiro. Nō anā Moisés keneni nikatiroma.

### *Jesús yorafoōnoax ato nāxoni*

<sup>5</sup> Moisés kirika kenekī iskafani: “Epa Niospa noko yoini keskara ē kirika keneni. Fatora fētsa nā meka ifo sharakōi fai isharakōixii, afaa chakafaamax. Akka māfi Nios fe ikōisharapakenakaki. Akka nā Niospa yoini keskara nō ifo sharakōi fatiroma. Askakimaroko nō Cristo chanīmara fai Niospa noko shara ōinō, nō afe ĩpaxanō.” <sup>6-8</sup> Askata anā kirika kenekī iskafani: “Niospa noko yoini afeskax nō shara itiomākī. Nō Cristo chanīmara faito nōko chaka noko soaxotiro afaa chakafamisma keskara noko ōixiki. Nā Cristo meka shara nōko shinā mēra ikakī. Nō aōnoa tāpixō nō ato yoimis. Akka iskara shināyamakāfe: ‘¿Tsoa nai mēra katiromē Cristo fotomaxiki nō chanīmara fanō?’ Akka tsoakai nai mēra

katiroma Cristo fotomaxiki. Askatari iskafakī shināyamakāfe: ‘¿Afeskaxō mā Cristo naafianikē mai mēranoa nō ifitiromē?’ ixō shināyamakāfe. Akka iskaratīa Niospa meka nō mēra ikakī,” ixō kirikaki Moisés keneni. Nānori nō mato yoimis. <sup>9</sup> Akka, “Jesús ēfe Ifoki,” nō ato fakī nō shinātiro iskafakī: “Chanīma, Jesús nafianikē Apa Niospa otofani,” ixō nō shināito nōko chaka noko soaxotiro nō afe ĩpaxanō. <sup>10</sup> Akka nōko shinā mēraxō nō chanīmara fakē Epa Niospa nōko chaka noko soaxotiro afaa chakafamisma keskara noko ōixiki. Askatari, “Jesucristo ēfe Ifoki,” ixō nō ato yoiax nō afe ipanaka.

<sup>11</sup> Nānori Niospa meka yoikī yōra kirika keneni iskafakī: “A Jesucristo Ifofakanax anā āto ifo fetsa fenakanima. Cristo fistichi ato nimasharatiro afe ĩpaxanōfo,” ixō kirikaki keneni. <sup>12</sup> Judeofo feta judeofomafāferi Cristo chanīmara faifono āto Ifo itiro. Niospa ato ōia nā yora fisti keskarafo, nāskarafos ato ōi. Nāskaxō fatotora yōkaito Niospa axosharakōifafāini aō noikōikī. <sup>13</sup> Nānorikōi Joel yoikī kirika keneni iskafakī: “Fatotora nōko Ifo chanīmara faxō yoikī iskafaito: ‘Mī ēfe Ifoki, ea ifife ēfe chaka ea soaxoxiki,’ faito āfe chaka soaxotiro afe ĩpaxanō,” ixō Joel kirika keneni.

<sup>14</sup> Akka tsōa Jesús Ifofaxoma, “Ea ifife ēfe chaka ea soaxoxiki,” ixō tsōa yōkatiroma chanīmara faxoma. Akka Jesúsnoa nikakatsaxakīma afeska faxō chanīmara fatirofoma. Tsōakairoko Jesúsnoa ato yoimiskē nikapanāfāfe. <sup>15</sup> Akka Niospa ato nīchiyamaino tsoa katiroma Niospa meka shara ato yoixikakī. Ākai fotirofoma. Nānori Isaías kirika keneni iskafakī: “A meka shara yoi feai sharakōi,” ixō yoini.

<sup>16</sup> Ē mato yoinō Niospa mā yorafo nīchini Cristoōnoa meka shara ato yoitanōfo. Niospa meka yoisharafiaifono judeofo atirifāfe ato nikapaikanima. Nānori Isaías kirika keneni iskafakī: “Ēfe Ifāfe, nō ato yoiaito tsōa chanīmara faima,” ixō yoini. <sup>17</sup> Nāskano Cristoōnoa meka shara yoiaito nikakakī fetsafāfe chanīmara fatirofo.

<sup>18</sup> “Akka, ¿judeofāfe nā meka shara Jesúsnoa nikamisfo-mamē?” ixō fētsa ea yōkaito, ē kematiro iskafakī: “Ēje, mā nikamisfo.” Nānori David yoini kirika kenekī iskafakī:

Nā maifo tii anoafāferi nā meka shara mā keyokōichi nikamisfo, ixō David kirika keneni. <sup>19</sup> Mā shināiraka iskafakī: “Akka judeofāfe na meka shara Jesúsnoa mā nikafikakī nikasharamisfomara,” ixō mā shināi rakikīa. Akka ē mato yoi iskafakī, mā nikamisfo nā meka shara Jesúsnoa. Mēxotaima mā nikafikakī chanīmara faafoma. Akka israelifomafāfe Nios nikakatsaxakakīma mā rama aōnoa nikafo. Moisés Niospa meka yoikī kirika keneni iskafakī:

Nā judeofoma efe yora iyopaonifoma. Akka iskaratīa ē ato noikōikī ē ato ifi efe yora inōfo. Ē ato askafaito ōikakī judeofāfe ato noikaspaxikani ato xītipaikakī. Askatari, “Na judeofomafāfe afaa tāpiafoma, judeofāfe ato fafiaifono ē ato ifi efe yora inōfo. Nāskakanax judeofo atoki ōitifishkixikani,” ixō Niospa yoini, ixō Moisés kirika keneni. <sup>20</sup> Chipo Isaíasri Niospa meka yoikī kirikaki keneni iskafakī:

A judeofomafāfe akōi ea fenayamafikatsaxakakī chipo ea fichixō ea chanīmara fakanax efe ipanakafo. Askatari, “Niosnoa noko tāpimafe,” ixō ato yoyamafikatsaxakakī. Akka chipo ē ato tāpimaxii, ixō Niospa yoini keskara Isaías keneni. <sup>21</sup> Askafiaifono ēfe kaifoōnoa Niospa yoini iskafakī: “Nā pena tiixō āto shinā mēraxō ē ato yoimis iskafakī: ‘Ekeki fekāfe,’ ixō ē ato shināmafiaino ekeki fepaikanima. Nikayosпамisfo,” ixō Niospa yoini keskara Isaías kirika keneni.

## 11

### *Niospa israelifo noikōi*

<sup>1</sup> Mā iskafakī shināiraka: “Epa Niospa afe yorafo israelifo mā pota,” ixō mā shināiraka. Mā askaito ē mato kematiro iskafakī: “Maa, ato keyokōi potama. Nāskaxō eari potama ēri israeli. Akka Abraham fe Benjamín ēfe xini. Nāskax ē israelikē ea Niospa potama,” ixō ē mato kematiro. <sup>2</sup> Epa Niospa afe yora inōpokoai fo israelifo ato katoyonixakīkai ato potamisma. Shinākapo. Nōko xini Elías israelifoōnoa yoikī kirika keneni iskafakī: <sup>3</sup> “Ēfe Ifāfe, a mī meka shara yoimisfo mā ato retemisfo. Askatari a mīsa kamakixō mia kīfimisfo mā potafo. Iskaratīa ē fistichi mia Ifofai. Anā ano tsoama. Eari retepaikani,” ixō Elías Nios yoini. <sup>4</sup> Nāskafaito nikakī Epa Niospa ¿afaa fanimē, Elías? Iskafakī kemani: “Maa. Meres fistikai mī ea chanīmara faima. Akka nāno mī kaifo siete mil yorafāfe ea chanīmara fakaxō afaa fetsakai ifofaafoma. Akka yorafāfe onifanifo āfe ane Baal, ‘Akai nōko niosra,’ famisfoma,” ixō Niospa Elías yoini. <sup>5</sup> Nāskarifiakī iskaratīari ēfe kaifo fisti rasichi mā Nios Ifofafo, Niospamāi afetiama ato noikī ato katoyonino afe yora inōfo. <sup>6</sup> Niospa noko noikōisharakī noko ifi nō afe yora inō. Akka nō afara sharafaōxokai noko ifima. Niospa noko afaa kopi yōkaima noko ifixiki. Akka āakōi noko ifi noko noisharakī. Nāskakē nō afara sharafatiroma noko ifinō. Akka a nō kopifa keskara noko ōikī āakōi noko ifikeranama. Nāskakē noko afaa kopi yōkaima āakōimāi noko ifixō.

<sup>7</sup> Akka ēfe kaifo israelifo fisti rasichi Nios fenapaonifo afe rafexikakī, nāfomāi Niospa katoyonino afe yora inōfo.



Akka israeli fetsafāfe Nios nikakaspapaonifo Nios fe rafekaspakakī. Akka a Nios nikakaspaiḡāfe āto ōiti kerexkōifakaxō nikakaspakani. <sup>8</sup> Nānori Niospa meka kirika kenekakī iskafanifo: “Epa Nios nikakaspakani nā oxafō keskarafō afaa shinākanima. Askatari oa yora fēxo keskara ipaikani. Nāskaxō Nios nikakōipaikanima. Askafaifāfe Epa Niospa āfe meka shara ato tāpimanima. Iskaratīari nāskakani,” ixō yōra kirikaki keneni.

<sup>9</sup> Askatari David kirika keneni iskafakī:

A Nios nikakaspaiḡāfe shinākani iskafakakī: “A nō piā ichapa ita nōko afama mīshtifori ichapa. Nāskakē Niospa noko shara ōi,” ixō shinākani, Nios nikayamafikakī. Akka nōko afama mīshtiōxō Niospa noko shara ōima nō afe ipaxanō. A Nios nikakaspaiḡō āto afama mīshtiōnoax fenoxikani afama mīshtifo shināifāfe. Niospa ato omiskōimaxii. <sup>10</sup> Oa yora fēxo keskara inōfo. Askarafāfe Nios nikayamaifono oa yora afara efekōi pefea keskara Niospa ato imanō, ixō David kirika keneni a Nios nikakaspaiḡōnoa yoikī.

*Judeofomafēferi Jesús chanīmara fakanax afe ipanakafo*

<sup>11</sup> Akka, ¿Niospa afe yorafo israelifo ato potapakenakamē? Maa, ato keyokōi potaima. Akka nā israelifāfe Cristo chanīmara famisfomano a israelimafāferi mā Jesucristo chanīmara fakani. Ifofaifono Niospa ato ifi afe yora inōfo. Akka nā israelifomafāfe mā Cristo chanīmara faifono israelifāfe ato ōikakī akairi Jesucristo chanīmara fapaikani afe ipaxakakī. <sup>12</sup> Ēfe kaifāfe, afara chakafamisfo Jesucristo Ifofapaimisfoma. Akka Epa Niospa nā maitio anoafō Jesucristoōnoa ato tāpimanano chanīmara fakanax afe ipanakafo. Nāskaxō Niospa ato shara faxōi, inimakōinōfo. Askatari ēfe kaifo judeofāferi chipo Jesucristo chanīmara fakanax inimai finakōixikani Niospa ato sharafaxōano.

<sup>13</sup> Akka mā ēfe kaifoyamafiano Epa Niospa ea mato mēra nīchini Jesúsnoa ē mato yoinō. Ē inimakōi Epa Niospa ea katonī ē mato ano onō. <sup>14</sup> Ē mato yoiaino mā Cristo chanīmara fayana mā inimakōiaito mato ōikakī ēfe kaifāferi Jesucristo chanīmara fapaikani, mato keskara ipaikakī. Nāskarākōi ipainōfora. <sup>15</sup> Shinākapo. Ēfe kaifo judeofāfe Jesucristo chanīmara fayamaifono Niospa ato potani anā afe yorakōi inōfoma. Akka nā maifo tii anoafāfe Cristo chanīmara fakanax Nios fe rafekani. Nāskakē ēfe kaifāferi Cristo chanīmara faifono Niospa anā ato ifi afe yora inōfo. Nāskakanax sharakōi ixikani. Nā yora naax otoa keskara itirofo, inimakōikani. <sup>16</sup> Nāskaxō ē anā mato yoinō pākiri keparanākī iskafakī: Pāa kaxke pishta Niosnā ikano keyokōi āfenā itiro. Nāskatari ifi āfe tapo āfenā ikano āfe teshpafori keyokōi Niosnā itiro. Nāskarifiakī ēfe kaifāfe

Jesucristo chanĩmara fakakĩ taefanifo fisti rasichi. Nāskakē āto fenafāfe Nios Ifofakanax chipo afe yora ixikani chanĩmara fakanax.

<sup>17</sup> Ē mato afara fetsa anā yoinō mā tāpinō. Ēfe kaifo judeofo ifi olivo āfe pōya keskarafō. Nā ifi pōya fimio ma ifāfe mextexō potatiro. Nāskaxō ifi olivo fetsa nā nii mēra nia āfe pōya fetsa fīaxō tichixotiro nā olivo kayakōiki. Nāskarifiakĩ judeofāfe Jesucristo chanĩmara fayamaito Niospa mā ato pota. Akka mā judeofoma. Māfi nā ifi olivo nii mēra nia keskarafokĩ. Nā ifi ifoyama keskarafō, mā. Nāskax mā Epa Niospa yora ipaonima. Akka Jesucristo mā Ifofaito Niospa mato ifi afe yora mā inō. Nāskata nā ifi olivo mā āfe pōya tichiax āfe tapo mēranoax yosiaino foaisharatiro. Nāskarifiakĩ nā judeofāfe āto xinifāfe mekaōxō mā Niosnoa tāpisharakōiafo nā ifi olivo yosiai keskaraxō. <sup>18</sup> Iskara shināyamakāfe: “Nō sharakē noko Niospa ifia. Akka judeofo chakafokē Niospa mā ato pota,” iyamakāfe. Shinākapo. Māfi ifi āfe pōya keskarafō. Ifi pōyakai āfe tapomais nitiro ma, xanatiro. Ifi pōyafō aō tapoōnoax nia. Nāskarifiakĩ judeofo āto xinifāfe Nios tāpinifo taefakakĩ. Atoōxō māri Nios tāpitiro.

<sup>19</sup> Mā shināiraka iskakĩ: “Ifi pōya chakakē, ifāfe mextexō pōtatiro. Nāskarifiakĩ judeofāfe Jesucristo chanĩmara fayamaito Niospa ato potani. Akka nō judeofo keskarama nō Jesucristo chanĩmara faax nō afe ipanaka,” ixō mā shināiraka. <sup>20</sup> Nā mā yoi ai keskara chanĩmakōikĩ kexemesharakāfe. Akka judeofāfe chanĩmara fayamaifāfe Epa Niospa ato potani. Nā judeofo potani keskafakĩ Epa Niospa matori potatiroki. Kexemesharakāfe, mā anā Jesús chanĩmara fayamaito matori potatiroki. Nāskakē kakapaiyamakāfe. Mā Jesús chanĩmara fayamax mā fenotiroki. <sup>21</sup> Judeofāfe Nios chanĩmara fakĩ taefafianifono chipo āto fenafāfe chanĩmara fayamaifāfe Niospa ato potani. Māri mā chanĩmara fayamaito matori potatiroki.

<sup>22</sup> Akka shinākapo. Niospa noko noifiaino nō nikayamaino noko tāpimatiro omiskōimakĩ. Nāskakē judeofāfe chanĩmara fayamaifāfe ato omiskōimakĩ ato potai. Akka Niospa mato noikĩ afe yora mato imai. Nāskakē mato noiai keskara shināfafāikāfe. Chanĩmara fafāfāikāfe. Mā askafayamaino matori potatiro. <sup>23</sup> Ēfe kaifo judeofāfe anā chaka shinākakima, Jesús chanĩmara faifono anā afe yora Epa Niospa ato imatiro. Ifi mextexō anā āfe pōya tichixotiro anā foainō. Nāskarifiakĩ Epa Niospa anā ato ifitiro afe yora inōfo. <sup>24</sup> Mākai judeofoma. Judeofo ifi olivokōi keskarafō. Akka mā judeoma. Mā nā olivo nii mēra nia keskara. Olivokōi āfe ifāfe nā nii mēra olivo āfe pōya xatexō olivokōiki tichitiro foaisharanō. Nāskarifi ai mā Niospa yora ipaonima. Akka iskaratīa Epa Niospa mato

ifia mã afe yorafo inõ. Nãskakëri êfe kaifo anã Niospa ato ifipaisharakĩ ifitiro afe yora inõfo. Jesús chanĩmara faifãfe afe yorafo ato imatiro.

*Epa Niospa judeofo anã ato ifixii afe yora inõfo*

<sup>25</sup> Efe yora mĩshtichi, mãfi israelifoma. Meka fetsaõnoa mã nikamisma ã mato tãpimanõ mãto shinã mëraxõ mã shinãnõ, nã ã mato yoiãi keskara mã tãpiãx kakapaimis mã inõma, mã iskanõma: “Nõ israelifo keskarama, nõ sharafinakõia,” mã inõma. Chanĩma, iskaratĩã ãfe kaifo israelifãfe ãto õiti kerexkõixõ Niospa meka shara Jesúsnoa nikakaspakani. Akka israelifãfema Jesús chanĩmara faafono Niospa ato ifini afe yora ato imaxii. Nãskatari ãfe kaifãferi anã Nios chanĩmara faifãfe Niospa anã ato ifixii afe yora inõfo. <sup>26</sup> Akka keyokõichi israelifãfe Jesús chanĩmara faifãfe Epa Niospa ato ifixii afe yora inõfo. Nãnori Isaías kirika keneni iskafakĩ:

Nõko Ifo Siõn anoax oxii nõko chaka nõko soaxoxiki nõ afe ãpaxanõ. Nã nõko Ifo israeli yora ixii. Nãato israelifo ifiyoi anã afara chaka ãto ifo inõma, ixõ Isaías kirika keneni. <sup>27</sup> Askata Isaías Niospa meka anã yoini iskafakĩ:

Ë ato yoiyoni keskara ã ãto chaka ato soaxoxii, ixõ Niospa yoini Isaías kirikaki keneni.

<sup>28</sup> Jesúsnoa meka shara judeofãfe nikakaspakani, noikaspakakĩ. Akka mã judeoma. Nãskakë Epa Niospa mato sharafaxõã ãfe meka shara Jesúsnoa mã chanĩmara fanõ. Akka judeofãfe ãto xinifo Niospa yoini iskafakĩ: “Ë mato ifi mã efe yora inõ,” ixõ ato yoini. Nãskakë ãto xinifoõxõ Niospa ato noi, ãfe fenãfori noikõi. <sup>29</sup> Epa Niospa ãfe kaifo ãfe afama mĩshti inãxixakĩ yoiyoni keskara anã fetsafaima afetĩamamãi ato ifiyonixakĩ. Nãskakĩ ato potapakenakama. <sup>30</sup> Akka mã judeoyamafixõ mã Epa Nios nikayopaonima. Akka iskaratĩã mã anã nikayospa ipaima. Nãskakë Niospa mato sharafaxopai mã chanĩmara faito. Akka ãfe kaifo judeofo ato sharafaxopaiãfãito nikakaspapaonifo. Nãskakë mã chanĩmara faito Epa Niospa mato noikĩ mato sharafaxõi. <sup>31</sup> Nã mã Nios nikakaspayopaoni keskakani ãfe kaifofo. Nãskafiaifono nã mato noiaĩ keskari fakĩ atori Niospa noikõi. Nãskakë chipo Epa Nios anã shinãxikani. <sup>32</sup> Epa Niospa yoini tãpixõ iskafakĩ: “Yora keyokõichi chakafamisfo, nikayospafo,” ixõ yoini. Askafiaifono ato noikĩ ato chaka soaxoxii afe ãpaxanõfo.

*Nios sharafinakõia*

<sup>33</sup> ¡Aicho! ¡Nõko Nios sharakõi! Afama mĩshti tãpikõia. Shinãsharakõia. ãfe shinã mëraxõ yorafoõnoa shinãi keskara tsõã tãpitiroma. Aato akai keskara tsõã tãpitiroma. <sup>34</sup> Tsõã nõko

Ifāfe shināi keskara tāpitiroma. Tsōarikai nōko Ifo tāpimatiroma.  
<sup>35</sup> Tsōarikai nōko Ifo afaa ināma noko niminō. <sup>36</sup> Ares āfe  
 shināmā shināxō afama mīshti onifani. Keyokōi āfenā. Aōnoax  
 nipanaka. Nāskakē, “Nios sharakōira,” fapanakafo. Aska-  
 painō.

## 12

### *Afeskax Niospa āfe yonomati nō itiromākī*

<sup>1</sup> Efe yora mīshtichi, ē mato yoisharapaiyai keskara akāfe. Epa Niospa mato noikī mato sharafamiski. Nāskakē māri ināmekāfe mātō Ifo inō, āfe yonomati ipaxakakī. Mā askaino anā afara chaka mātō ifo itiroma, Nios mātō Ifo iki. Shinākapo. Mā mēste shināsharakōikī Nios noiyanā sharafakāfe. Mā askafaino Nios matoki inimakōitiro. <sup>2</sup> Nios Ifoafāfema shināi keskara shināyamakāfe. Mā shināpaoni keskara anā shināyamakāfe. Iskaratīa Niospa mātō shinā mēra fetsafapaiyai keskara shinākāfe. Afaa fetsakai mā shinātiriroma. Mā askakī mā tāpitiroma Niospa mato imapaiyai keskara sharafinakōi. Mato imapaiyai keskara mā ikaino matoki inimatiro.

<sup>3</sup> Epa Niospa ea noikī ea yoia ē mato tāpimanō. Nāskakē ē keyokōi mato yoisharapai. Kakapaimis iyamakāfe. Niospa mato imapaiyai keskara fisti shinākāfe. Afaa fetsa shināyamakāfe. Niospa mato shināmana keskara fisti matoōnoa shinākāfe. Mēstekōi matoōnoa shinākāfe. Mā Nios chanīmara fakī shinākāfe iskakī: “Ea Niospa imapaiyai keskara ē ipai,” ixō shinākāfe. <sup>4</sup> Ē mato afara fetsa ēa yoipai. Nōko yora fistifiano nō pōyayai fetsea. Askata nō feroyata, pachoyata, nā nō fisti askai fetsea. Nāskaxō nāfāfe nō afara fetsafo atiro. <sup>5</sup> Nāskarifiāi nōko Ifo Cristo fistikōi. Akka nōfi āfe pōya keskarata, āfe fero keskarata, āfe tae keskarata nō iki fetsea yora fisti fiāx.

<sup>6</sup> Epa Niospa noko amapaiyai keskara nō aōxō fetsafo axosharatiroma. Mā nō Nios Ifoafaano a noko imapaiyai keskara noko imaketsai fētsa āfe meka ato yoinōfo, fētsari ato tāpimanō, fētsari afaamaisfori ato inānō. Nāskarafo noko imaketsai. Mā nō Nios Ifoafaano noko noikī noko katoa noko amai keskara nō anō. Noko fetsafo katoa āfe shināōxō fetsafori āfe meka nō ato yoinō. Nāskakē mā mato katoano mā chanīmara faxō mato yoiaī keskara fetsafori ato yoisharakāfe. <sup>7</sup> Mā mato fetsafo katokē āfe shināōxō fetsafori axosharafafāikāfe. Mato fetsafo katokē āfe shināōxō āfe meka ato tāpimasharakāfe. <sup>8</sup> Mato fetsafo katokē aōxō fetsafo ōiti ato fepeaxōfāfāikāfe. Mato fetsafo katokē afara yopaifo inimayanā ato ināsharakāfe. Mato fetsafo katokē āto xanīfo mā inō. Nāskakē Niospa shināmana keskara ato yonomasharakāfe. Xanīfo mēsteshara ikāfe. Nā

mato katokē āfe shinãõxõ omiskõiaifo ato noikĩ inimayanã ato axosharakāfe.

*AfeskaX Nios Ifofaafõ itirofomē*

<sup>9</sup> “Ē mato noira,” ifiata ato pārayamakāfe. Yorafo noikõikāfe. Afara chakafo noikaspakāfe. Afara shara noisharakāfe. Afo potayamakāfe. <sup>10</sup> Nã mã Nios chanĩmara faafo tii noinãkāfe. Mato fe yorakõifo fe mã noinãmis keskariai noinõnãkāfe. A mã mã nõimeai keskariai fetsafori ato noisharakāfe. “Fetsafo finakõiaki, ē finakõiyamaki,” ixõ ato sharafakāfe. <sup>11</sup> Nõko Ifo yonoxoni xaniyamakāfe. Niospa Yõshi Sharaõxõ inimakāi yonosharaxokāfe. <sup>12</sup> Epa Niospa mato sharafaxoxiai keskara shinãkāfe. Nãfo shinãi inimakāfe. Akka omiskõifi fena fenayamakāfe. Epa Nios kĩfikĩ xateyamakāfe. <sup>13</sup> Nios Ifofaafāfe afara yopaifono ato inãkāfe. Fetsafo pimasharakāfe. PeXe yopaifāfe mātõ peXe mēra ato ikimakāfe. Ato kexesharakāfe.

<sup>14</sup> Mato omiskõimanaifāfe ato kopiyamakāfe. Nios kĩfikāfe iskafakĩ: “Epa Niospa ato chakafayamafe ato sharafafe,” ixõ Epa Nios kĩfikāfe. Nãskaxori ato ĩchayamakāfe. Askatamaroko ato sharafaxokāfe. <sup>15</sup> Inimaifono mãri inimakāfe. Ato sharafaifono aõnoax inimakāfe. Oiaifono mãri shinãmitsayanã ato shinãkāfe. Omiskõiaifono mãri atoõnoax omiskõikāfe. <sup>16</sup> Afe feratenãkakĩma Epa Niospa mato shinãmapaiyai keskara fisti anori shinãkāfe. “Ē ato keskarama,” iyamakāfe. Xanĩfofo fisti fe rafepaimis iyamakāfe. Afaayamafo feri rafekāfe. “Ē tãpia keskarakai fetsafāfe tãpiafoma,” ixõ anori shinãyamakāfe. Kakapaiyamakāfe.

<sup>17</sup> Mato chakafafiaifāfe ato kopiyamakāfe. Āto ferotaifi isharakāfe, “Nios chakara,” fayamanõ. <sup>18</sup> Keyokõi yorafo fe rafepaisharakāfe. Mã aska sharafapaifiaino fetsafo mato fe rafesharapaikania. <sup>19</sup> Efe yora mĩshtichi, fētsa mato chakafafiaito ato kopiyamakāfe. Epa Niospa meka yoikakĩ kenenifo iskafakakĩ: “Mato chakafaifo ē ato omiskõimanikai,” ixõ kirika kenenifo. Epa Niospa yora chakafo ato omiskõimaxii. Mākai ato omiskõimatiroma. <sup>20</sup> Ato kopitamaroko nã mato noikaspaifo fonãikaifāfe ato pimakāfe. Nõamã ikaiifāfe ato ayamakāfe. Ma askafaito õikani, “Noko kopikanimara,” ikanax rãfipainõfo. <sup>21</sup> Askata fetsafāfe mato chakafapaifiāifāfe mãri kopikiri ato chakafayamakāfe. Chaka ifofayamakāfe. Askatamaroko afara sharafatitaifakāfe. Askafakĩ mã chaka potatiro.

## 13

*Nõ xanĩfofo nikakõitiro*

<sup>1</sup> Epa Niospa yoini keskara nã maitio ikafāfe xanĩfofo katotirofo. Akka xanĩfo finakõia nikata afe rafeafori nikakõikāfe

Niospa ato xanĩfo imaino. Akka Niospa xanĩfo ato imayamaino itirofoma. <sup>2</sup> Niospa noko yoini iskafakĩ: “Mãto xanĩfofo nikakõikãfe.” Akka mãto xanĩfo mã nikakaspakĩ Niosri mã nikakaspai. Mã nikakaspaito mato omiskõimaxii. <sup>3</sup> Akka nõ isharaxkai nõ xanĩfoki mesetiroma. Akka nõ isharayamax nõ xanĩfoki mesetiromo. Xanĩfoki mesexikima isharakãfe. Mã askaito mato chakafatama matoõnoa yoisharanõfo. <sup>4</sup> Xanĩfofo Epa Nios yonoxomis keskarafoma mato axosharakani. Akka mã afara chakafaax xanĩfoki mã mesetiromo. A xanĩfofo afokai kaxpa xanĩfoafoma, mato omiskõimatirofo. Nãfofi Niospa õimati keskarafokĩ afara chakafaiãfe ato omiskõimatirofo. <sup>5</sup> Akka mãto xanĩfofo nikakõikãfe mato omiskõimayamanõfo. Mãto shinã mēraxõ shinãsharaxikakĩ. Ato nikayamakĩ mã shinãtiromo iskafakĩ: “Ooa, ẽ nikayospakõi. Nãskax ẽ shinãmitsaito ẽ mei,” ixõ mã shinãtiromo xanĩfofo nikayamax.

<sup>6</sup> Mãto xanĩfofo Nios yonoxomisfo keskarafoma pena tii mato yonoxokani mã isharanõ. Nãskakẽ mato kori yõkaifãfe ato inãkãfe aõxõ mato axosharanõfo. <sup>7</sup> Mã ato nimixõ ato kori inãkãfe. Askatari ato noisharata ato noisharakãfe.

### *Nõ nõinõnãtiromo*

<sup>8</sup> Tsoa nimiyamakãfe. Askatamaroko noinãkãfe. Noinãi eneyamakãfe. Nã nõ yorafo noiaiõxõ Epa Niospa yoini keskarakõi nõ amis. <sup>9</sup> Noko yoikĩ iskafani: “Mãto ãfima fe iyamakãfe. Kērofori mãto fenema feri iyamakãfe. Retemit-sapaiyamakãfe. Yometsoyamakãfe. Fetsa pārayamakãfe. Fetsa fiapayamakãfe,” ixõ noko yoini. Afara fetsafori noko yoini. Nõ yorafo noikĩ na Epa Niospa yoini keskara nõ ato chakafaima. Nãskakẽ a mã mĩ noimeĩ keskari akĩ fetsafo ato noife. <sup>10</sup> Nõ fetsafo noikõixõ nõ ato chakafatiroma. Akka nõ ato noikõikĩ Niospa yoini keskara nõ aki. Nõ ãto ãfi fe nõ ipaima. Askatari nõ ato noikõixõ nõ atoki yometsoima. Askatari nõ ato pāraima. Akka nõ ato noiaiõxõ Niospa noko yoia keskara nõ atiro.

<sup>11</sup> Nã Jesús fena oyoaima chãĩ ẽ taefakĩ Jesús Ifofani. Akka iskaratĩa nõko Ifo Jesús mã chaima oi. Nãskakẽ ẽ mato yoiai keskara akãfe. Oxakatsa ikai keskara iyamakãfe. Oxakatsa ikĩkai nõ yonosharatiroma. Nãskakẽ xanikakĩma Jesús yonosharaxokãfe itipinĩsharaxikakĩ. <sup>12</sup> Mã penaino samamakõĩ penatiromo. Nãskarifiakakĩ mã nõko Ifo chaima oaino fakish mēra ika keskara iyamakãfe. Mãto chaka xatekõikãfe. Jesús ika keskara mãri xafakĩa ikãfe afara chakafaxikakima. <sup>13</sup> Isharakõikãfe penano nõ õisharatiromo pakexikima. Nãskarifiakĩ Jesús Ifofaax nõ isharakõitiromo afaa chakafatama. Akka fetsafãfe monokakĩ afara chakafaifo mēra foyamakãfe. Chaka fetsa fetsatapafoma ayamakãfe. Pāeyamakãfe. Askatari mãto ãfima chotayamakãfe. Kēromãri mãto fenema chotamayamakãfe. Afara chaka fetsafo

shināyamakāfe. Feratenā faatanāyamakāfe. Fetsa xītipaimis iyamakāfe. <sup>14</sup> Askatamaroko nōko Ifo Jesucristo fe rafekāfe. Jesús ika keskara māri ikāfe afara chakafakīma. Afara chaka mā shināpaiyai keskara ayamakāfe.

## 14

### *Mato fe yorafo a Nios Ifofaafō mekafakī chakafayamakāfe*

<sup>1</sup> Meka fetsa ē mato yoinō. Fetsafāfe Jesús Ifofafiakaxō āfe meka tāpisharakanamax mato fe ichanāifono, “Aicho, nofe ichanāi fekāfe,” ato fakāfe. Mā shināi keskara anori shināyamaifono ato fe feratenāyamakāfe. Ato mekafakī chakafayamakāfe. <sup>2</sup> Mato mēra ixō fētsa yoitiro iskafakī: “Ē Jesús chanīmara faxō keyokōi ē pitiro,” ixō yoitiro. Akka fētsa yoikī iskafatiro: “Ēfi Jesús chanīmara fakī ēkai nami pitiro. Ē fanafo fisti pitiro,” ixō yoitiro Jesús meka tāpisharaxoma. <sup>3</sup> Fētsafāfe nami pikī a nami pimisfoma ato mekafakī chakafatiroma. Ato yoikī iskafatirofoma: “Mā afaa tāpiama. Nō nami pia shara, noko chakafatiroma. Nami shara,” ato fatirofoma. Nāskarifiakī nā nami pimismato a nami pimisfo ato mekafakī chakafatiroma. Ato yoikī iskafatiroma: “Nafāfe nami pikakī chakafakani,” ixokai atoōnoa yoitirofoma. Akka Epa Niospa keyokōi nāskarafo noko ifi nō āfe fakefo inō. Nāskakē fetsafo mekafakī chakafayamakāfe. <sup>4</sup> Jesús Ifofaafokai māto inafoma. Akka afāfe Epa Nios yonoxomisfo. Nāskakē ato mekafakī chakafayamakāfe. Epa Niospa ato yoitiro. A chakafaifo ato iskafatiro: “Mā chakafai,” ixō ato yoitiro. Askatari a sharafaifo, “Mā sharafai,” ato fatiro. Akka a chaka shināifo Niospa ato tāpimatiro isharanōfo anā chaka shinānōfoma.

<sup>5</sup> Akka a Nios Ifofaafō fetsafāfe shinākani iskafakakī: “A judeofāfe tenetitīa nō ichanātiro Jesús shināi,” ixō anori shinākani. Akka fetsafāferi shinākani iskakakī: “Nā pena keyokōi shara nō ichanātiro Jesús shināi,” ixō shinākani. Nāskaxō nā āto shināmā shināifo keskara shara. Nā shināifo penata ichanātirofo Jesús shinākani. Akka mā shināi keskara shināyamaifono ato mekafakī chakafayamakāfe. <sup>6</sup> “Na judeofāfe tenetitīa nō ichanātiro Jesús shināi,” ixō shināifāfe, nāfāfe nōko Ifo Jesús Ifofasharapaikani. Akka a nā fatora penata nō ichanātiro Jesús shināi ikaifāferi, nāfāfe nōko Ifo Jesús Ifofasharapaikani. Askatari fetsafāfe shinākani: “Nō nami pitiro. Aicho, Epa Niospa mī noko nami inā nō pinō,” ixō shinākani. Nāfāferi nōko Ifo Jesús Ifofasharapaikani. Akka fetsafāferi nā nami piyamaifāfe nāfāferi nōko Ifo Jesús, “Aicho,” fatirofo. Nāskaxō nāfāfe Nios shināsharapaikani. <sup>7-8</sup> Nō niyoxōkai nōa nō apaiyai keskara fisti nō shinātiroma. Epa Niospa noko

amapaiyai keskara nõ shinãtiro. Nõfi ãfenãfoki. Nãfi nõko Ifokĩ. A nõ naitĩari nõko Ifo Jesús niyoxõ nõ Ifofasharapai nokoki inimanõ. A nõ naitĩari nõko Ifo nõ shinãtiro nõmãĩ ãfenãkõixõ.

<sup>9</sup> Cristo noko nãxoni. Mã maifafono otokainixakĩ. Iskaratĩa mã nia. Nãskakẽ nõ nayoamax nõko Ifo iki. Mã nõ naaxri nõko Ifo ixii. <sup>10</sup> ¿Afeskafakĩ mato feta chanĩmara faafo mã mekafakĩ chakafaimẽ? ¿Afeskafakĩ mã fetsaõnoa mã shinãchakaimẽ? “Aakai afaamara,” ixõ mã shinãi. Shinãkapo, keyokõi nõ chipo Nios ikano nõ akiki nokoi kaikai. Askatari noko yoixii nõ afara sharafayamakẽ nõ chakafamiskẽ. <sup>11</sup> Isaías Niospa meka yoikĩ kirika keneni.

Niospa yoini iskafakĩ: “Chanĩmakõi ẽ nia. Chanĩmakõiri keyokõi maifo tii anoafõ ekeki nokoxikani. Ekeki ratokonõ mai chachikaxõ yoixikani: ‘Epa Niospa, mĩ chanĩmakõi, mĩ Nioskõi,’ ixõ ea keyokõichi yoixikani.”

<sup>12</sup> Akka keyokõichi Epa Niospa ferotaifi nõ amis keskara nõ yoixii. Nõ shinãmis keskarari nõ yoixii.

### *Fetsafo afara chakafamayamakãfe*

<sup>13</sup> Nãskakẽ a mato feta Jesús chanĩmara faafo mekafakĩ chakafayamakãfe. Iskafakĩ shinãkãfe: “Nõ afara chakafaito õikaxõ akairi chakafatirofo. Nãskakẽ nõ afaa chakafapaima akairi afaa chakafayamanõfo.” <sup>14</sup> Jesús ẽfe Ifokẽ ẽ mato yoisharapai. Keyokõi a nõ piaifo shara nõ pitiro. Nã ẽ chanĩmara fakõini. Nãskafiano fetsafãfe shinãkani iskafakakĩ: “Na piaifo nõ pixõ nõ chaka shinãtiro,” ixõ shinãkani. “Nõ nami pitiroma,” ixõ shinãfikakĩ mã nami pikani. Nãskaxõ chaka shinãkani. <sup>15</sup> Mato feta fẽtsa Jesús chanĩmara faito ãfe ferotaifi a nami pitiroma piyamakãfe ãfe shinã mẽraxõ shinãchakanõma. A noikõixõ mã ãfe ferotaifi pitiroma. Nõko Ifo Cristo aõnoaxri nani. Nãskakẽ a pitiroma pikĩ mã fetsa shinãchakamatiro. Nãskakẽ ãfe ferotaifi piyamakãfe Jesús kachikiri faax fenoyamanõ. <sup>16</sup> “A ẽ akai keskara chakama,” ixõ mã shinãfiaino fetsafãfe askara shinãkanima. Iskafakĩ shinãkani: “Na mã akai keskara chaka,” mato faifono mã xaterisafatiro matoxõ shinãchakayamanõfo. <sup>17</sup> A nõ piaito Niospa yora noko imatiroma. Askatari a nõ ayaito Niospa yora noko imatiroma. Akka Nios nõko xanĩfokõino ãfe Yõshi Sharaõnoax nõ sharakõi. Nõko õiti fekaxteima nõ inimakõitiro. <sup>18</sup> Nõko Ifo Cristo nõ nikasharaino Epa Nios nokoki inimasharatiro. Yorafãferi nokoõnoa shinãsharatirofo.

<sup>19</sup> Nãskakẽ Jesús chanĩmara fai fetsafo fe isharakõikãfe. Jesúsnoa yoinõnãkãfe a keskara shara ixikakĩ. <sup>20</sup> Niospa yoini keyokõi a nõ piyai shara. Nãskafekẽ fetsafãfe, a Nios tãpisharafãfema shinãkani iskafakakĩ: “Afara fetsa nõ



pixõ nõ chakafai,” ixõ shinãifono ãto ferotaifi afara piyamakãfe. Akka mã ãto ferotaifi piaino mato õikakĩ ãto shinã mēra shinãchakatirofo. Nãskaxõ anã Jesús Ifofasharatirofoma. <sup>21</sup> Mã nami piaito fetsafãfe mato õikĩ shinãchakatirofo. Nãskaxõ anã Jesús Ifofatirofoma. Nãskakē ãto ferotaifi afaa piyamakãfe. Askatari mã mãmã ayaito õikakĩ fetsafãfe shinãchakatirofo. Nãskaxõ anã Jesús Ifofatirofoma. Nãskakē anã ayayamakãfe. Afara fetsafori akĩ mã ato shinãchakamatiro, nãskakē xatekãfe Jesús Ifofanõfo. <sup>22</sup> Nãskaxõ mã shinãi keskara mares shinãkãfe. Epa Nios fisti mã yoitiro. Mã Nios chanĩmara faxõ mãto shinã mēra shinãsharakĩ mã iskafatiro: “Chanĩma, ē akai keskara chakama,” ixõ shinãkĩ mãto shinã mēra mã inimatiro. <sup>23</sup> Nãskaxõ fētsa Niospa meka tãpisharaxoma shinãtiro iskafakĩ: “Nafõ pikĩ ē chakafairakaiti,” ixõ shinãfikĩ akairi pikĩ chakafatiro. Afara fetsafori shinãkĩ iskafakĩ: “Nafõ akĩ ē chakafairakaiti,” ixõ shinãkĩ akairi akĩ chakafatiro.

## 15

*Nã mã apaiyai keskara fatama fētsa apaia keskara axokãfe*

<sup>1-2</sup> Jesús chanĩmara fakõixõ a Niospa meka tãpisharafoma nõ ato fenãmāshta yoitiro ato fe feratenātama. Nõa nõ apaiyai keskara fisti nõ atiroma. Nã Jesús chanĩmara faa fetsafori noikĩ nõ ato axotiro ãto shinã mēra inimamakĩ shara inõfo Jesús Ifo sharafakõinõfo. <sup>3</sup> Shinãkapo. Nõko Ifo Cristo aafi apaiyai keskara fisti shinãpaonima. Aõnoa Nios yoimisto kirika keneni iskafakĩ: “Epa, ē mia nikakõia. Akka mia chakafakakĩ eari chakafakani,” ixõ kirika keneni Cristoõnoa yoikĩ. <sup>4</sup> Niospa meka kenepakenifo noko tãpimaxikakĩ. Āfe meka nõ chanĩmara faxõ afara chaka finõkõixõ nõ tenekõinõ. Āfe mekaõxõ nõko õiti nõ fepeaxõ nõ tãpitiro nõko Ifo fe nai mēra chipo nõ afe ipanaka anã afara chakapa noko omiskõimanõma. <sup>5</sup> Noko afara chakapa afeskarafafiaito Epa Niospa noko mitsisfamatiro nõ tenenõ nõko õiti fepeaxokĩ. Nãskakē mã Jesús Ifofasharaino mato nãnori fisti shinãmati-ro. <sup>6</sup> Nãskakē nõko Ifo Jesucristo āfe Apa nõ yoisharai. Nãskax nõ meka fistipa nõ mekai keskarakõi Epa Nios yoisharakĩ nõ yora fisti keskara.

*Niospa meka shara judeofoma yoinifo*

<sup>7</sup> Cristo nokoki inimakĩ noko ifini afe yorafo nõ inõ. Nãskakē mãri fetsafo fe yõra faatanãkãfe. Mã askaino Niosnoa shinãsharatirofo. <sup>8</sup> Ē mato yoinõ Jesucristo mai ano oni judeofo ato yonoxomis keskara ikiyoi. Niospa nõko xinifo yoiyoni keskara Cristo oni. Nãskakē Niospa nõko xinifo yoini keskara chanĩmakõikē nõ tãpitiro. <sup>9</sup> Akka judeofomaõnoaxri Jesús oni.

Nãfãferi chanĩmara faxõ yoixikani iskafakakĩ: “Aicho, Epa Niospa noko noikĩ ãfe Fake nokoki nĩchini. Epa Nios shara,” ixõ yoixikani. Nãnori David kirika keneni iskafakĩ:

Epa Niosi, ã mĩõnoa ato yoisharaxii, a judeofoma. Ë mia fanãki, “Aicho, Nios shara,” ã mia faxii, ixõ kirika keneni. <sup>10</sup> Anã Niospa meka yoikĩ kirika keneni iskafakĩ:

Judeofoma nã judeofo fe inima faatanãkãfe. Mãri ato fe Niospa yora ixii, ixõ kirika keneni. <sup>11</sup> Anã kirika keneni iskafakĩ:

Maitio anoafãfe, nõko Ifoõnoa yoisharakãfe. Keyokõi nã maifo tii ikafãfe nõko Ifo fanãkãfe, ixõ kirika keneni. <sup>12</sup> Isaiás aatori iskafakĩ kirika keneni:

Nõko xini Isai ãfe fena na maitio ikafãfe ãto xanĩfo ixii. Shinãxikani iskafakakĩ: “Nã fistichi Nios ika ano noko ifitiro nõ afe ãpaxanõ, nõ anã nanakama,” ixõ shinãxikani, ixõ Isaiás kirika keneni Cristoõnoa yoikĩ.

<sup>13</sup> Epa Nios chanĩmara faxõ nõko Ifo oxiano nõ manai. Epa Niospa noko shinãmani iskafakĩ: “Chanĩma, nõko Ifo oxii noko ifixiki nõ afe ãpaxanõ,” ixõ noko shinãmani. Nãskakẽ ã mato kĩfixomis Niospa mato inimamanõ. Askatari mãto shinã mẽra mato shinãmasharai mã afeskatama mã isharanõ mato axosharai. Mã Nios chanĩmara faano ãfe Yõshi Sharapa mato axosharai mã isharanõ.

### *Pablo Jesucristoõnoa judeofoma ato yoini*

<sup>14</sup> Efe yora mĩshtichi, mẽ tãpia mã noinã faatanãito Jesúsnoa mã tãpisharai mã yoinõnãsharatiro. <sup>15-16</sup> Niospa ea noikĩ ea katonĩ Jesucristo ãfe yonomati ã inõ, ãfe meka shara ã mato tãpimanõ. Nãskakẽ ã ranotama anã aõnoa ã mato shinãmasharai kirika kenekĩ. Akka Niospa ea nĩchini judeofoma ã ato Jesús Ifofamanõ. Mã Jesús Ifo sharafaxõ, mãto chaka mã soax a keskara shara mã inõ. Nãskax Epa Nios matoki inimakõi.

<sup>17</sup> Nãskakẽ ã inimakõi nõko Ifo Jesucristomãi ea katonikẽ Epa Nios ã yonoxonõ judeofoma Niospa meka ã ato yoinõ.

<sup>18</sup> Ëa ã ato yoima. Cristo ea shinãmanaino ã ato yoimis. Nãskakẽ a ã ato yoimis keskara Epa Niosnoa nikakõimisfo. <sup>19</sup> ãfe Yõshi Sharapa ea shinãmanaino a tsõa atiroma keskara ã ato õimana. Nã maitio Jerusalén anoafõ yoita Ilĩrico anoafõri ã ato yoini. Keyokõi nã meka shara Cristoõnoa ã ato yoifofãsafamis.

<sup>20</sup> Ëkai a yora fetsafãfe Cristoõnoa yoimisfo ari ã kapaimisma. A Cristoõnoa nikamisfoma ano ã kapaimis ato tãpimaxiki.

<sup>21</sup> Nãnori Isaiás Niospa meka keneni iskafakĩ:

Tsõa aõnoa nikayomisma chipo nikakaxõ tãpinõfo, ixõ keneni.

### *Pablo Roma ano kapaikĩ shinãni*

<sup>22</sup> Akka ě mato ari kapaimis. Ĕ mato ōikapaifi ě kamisma. Afara fĕtsa ea katimafamis. <sup>23</sup> Nāskafixō iskaratĭa Jesŭsnoa mĕ ato yoikĭ mĕ mitoa. Nāskax mĕ itipinĭa mato ari kaxiki. Mĕ xini ichapa amis mato ōikapaikĭ. Mĕxotaima ě mato ari kapaimis. <sup>24</sup> Ĕ Espaĭa ari kai ě mato ano nĕteyoxii mato fe mekaxiki nō yoinōnāsharaxiki. Mato anoax ě kaito a ě yopai ea ināxikāfe ě Espaĭa ari nokosharanō. <sup>25</sup> Akka iskaratĭa ě Jerusalĕn ano kayoikai. Jesŭs chanĭmara faafāfe ea nĭchikani a Jerusalĕn anoxō Jesŭs chanĭmara faafo ě ato kori inānō. <sup>26</sup> Macedonia anoxō a Jesŭs chanĭmara faafāfe Jerusalĕn anoafo a Jesŭs chanĭmara faafo ato kori ināpainifo. Acaya anoxori Jesŭs chanĭmara fakaxō ato kori ināpainifo a afaamaisfo. Nāskakĕ ea kori inānifo ě ato inātanō. <sup>27</sup> Inimayanā ato ināpaikakĭ ato yoinifo iskafakakĭ: “Jerusalĕn anoax Jesŭsnoa yoimisfo nokoki fenifo Jesŭsnoa meka shara noko yoi fekani. Akka nokoki feyamanifono na meka shara nō nikakeranama. Nāskaxō nō afarayaxō nō ato ināpai ato sharafakĭ,” ixō yoinifo. <sup>28</sup> Nāskata ě ato kori ināfainikai Jerusalĕn anoax Espaĭa ari kakĭ. Nāskaxori ě Roma anoax ě mato ōifainikai. <sup>29</sup> Mĕ tāpia ě mato ano nokoxō nōko Ifoxō ě mato yoisharaxii mĕto shinā mĕra mā inimanō.

<sup>30</sup> Efe yora mĭshtichi, meka fetsari ě mato yoipai. Mā nōko Ifo Jesucristo noixō āfe Yōshi Sharaōxō ea noikāfe. Ea Nios kĭfixokāfe ě yonosharaxonō afanā ea afeska fanōma. <sup>31</sup> Ea kĭfixokāfe Epa Niospa ea kexenō Judea anoafāfe a Jesŭs chanĭmara faafāfema ea afeska fanōfoma. Ea kĭfixokāfe a Jesŭs chanĭmara faifo Jerusalĕn anoafo ě ato kori ināino inimakōikai finōfo. <sup>32</sup> Mĕ ato inākĭ mitoano Epa Niospa ea nĭchiano ě inimayanā matoki nokoxinō. Nāskata nō yoinōnāsharaxinō nōko ōiti mĕra inimayanā. <sup>33</sup> Epa Nios mato fe inō. Akka Niospa noko imasharatiro nō isharanō.

## 16

### *Pablo ato meka fomani*

<sup>1-2</sup> Nofe yora Febe, Cencrea anoax matoki nokokĕ sharafakāfe. Nā kĕromā nōko Ifo Ifofasharakōimis. Cencrea anoxō a Nios Ifofafo ato sharafaxomis. Yora fetsafori ato afara yopaito axokāfe.

<sup>3</sup> Aquila āfe āfi Prisca nā rafe efeta Jesucristo yonosharaxomisfo. Ea ato yoisharaxokāfe. <sup>4</sup> Yorafāfe ea retepaiyaiifāfe nā rafeta ea kexesharamisfo ea reteyamanōfo. Ĕfe kaifomari nā Jesŭs chanĭmara faafāfe ichanākaxō yoimisfo iskafakĭ: “Aquila yafi Prisca nō atoki inimasharakōi,” ixō yoimisfo. <sup>5</sup> Āto pexe anoaxri ichanākaxō ea ato yoisharaxokāfe. Efe yorakōiri Epeneto ea yoisharaxokāfe. Nāatofi Asia anoxō

Cristo chanĩmara fakĩ taefaniki. <sup>6</sup> Mariari mato yonosharaxomiski aari ea yoisharaxokãfe. <sup>7</sup> Efe yora raferi Andrónico yafi Junias ea ato yoisharaxokãfe. Nã rafe efe karaxa mēra ikinifo. A Jesúsnoa yoimisfãfe a rafeõnoa yoisharamisfo. Ë Jesucristo chanĩmara famatai nã rafeta chanĩmara fakĩ taefanifo.

<sup>8</sup> Ampliatori ã noishara nãatomãĩ nõko Ifo Ifofasharakõiaito. Aari ea yoisharaxokãfe. <sup>9</sup> Urbano efeta Jesucristo yonoxomis. Nãrifi ea yoisharaxokãfe. Efe yorashtari Estaquis nãri ea yoisharaxokãfe. <sup>10</sup> Apeles feronãfake sharakõĩ. Epa Nios akiki inimamis. Nãatori Jesucristo yonosharaxomis. Nãri ea yoisharaxokãfe. Aristóbulo yafi afe yoraforti ea ato yoisharaxokãfe. <sup>11</sup> Efe yorashtari Herodión ea yoisharaxokãfe. Narciso yafi afe yorafãferi nõko Ifo chanĩmara faafo, aforti ea ato yoisharaxokãfe. <sup>12</sup> Trifena yafi Trifosari ea ato yoisharaxokãfe. Nã kēro rafeta nõko Ifo yonosharaxomisfo. Nofe yora Pérsidari ea yoisharaxokãfe. Nã kēromãri nõko Ifo yonosharaxomiski. <sup>13</sup> Nõko Ifãfe Rufori katonĩ afe yora inõ. Nã Rufo ãfe afa ãfe efakõĩ keskara. Ea kexesharamis. Nã raferi ea ato yoisharaxokãfe. <sup>14</sup> Asíncrito ikaino Flegonte ikaino Hermas ikaino Patrobas ikaino Hermes ikaino nãfãfe nõko Ifo chanĩmara faafo. A fetsafãferi nõko Ifo chanĩmara fakanax ato fe ikaforti ea ato yoisharaxokãfe. <sup>15</sup> Filólogo ikaino Julia ikaino Nereo ikaino ãfe poi Olimpasi ikaino keyokõĩ a nõko Ifo chanĩmara fakanax ato fe ikaforti ea ato yoisharaxokãfe.

<sup>16</sup> Keyokõĩ ichanãkanax yoinõnã faatanãsharakãfe noinõnãsharaxikakĩ. Nã maitio ikafãfe a Cristo Ifofaafãfe mato yoisharapaikani.

<sup>17</sup> Efe yora mĩshtichi, ã mato yoinõ nikakapo. Mato fe ichanãmis fetsafãfe mato afara chakafamapaikani anã mã Jesúsnoa shinãnõma. Akka nõ mato mēstekõĩ tãpimanai keskara nãfãfe mato anori yoikanima. Akka fakirira mato yoipaikani anã mã Jesús shinãnõma. Nãskax ato fe rafeyamakãfe, mato pãratirofokĩ. <sup>18</sup> Afãfekai nõko Ifo Cristoõxõ yoimisfoma. Nãfãfe afara fipaiyaifo fistis shinãmisfo. Niospa meka tãpisharafoma ãto meka fistiõxõ ato pãrapaikani ato anorima shinãmaxikakĩ. <sup>19</sup> Keyokõichi mã nikafo nõko Ifo mã Ifofasharakõikē. Nãskakē ã matoki inimakõini. Afara sharafoõnoa tãpikõikãfe. Mã afara chakaõnoa tãpiyamakãfe. Afoõnoa shinãyamakãfe. <sup>20</sup> Epa Niospa mato imasharatiro mã isharanõ. Nãato Satanás mato nãmã potai anã mato afeskafanõma. Nõko Ifo Jesucristo mato sharafaxopainõ.

<sup>21</sup> Nã Timoteo efeta Jesús yonoxomisto mato mekashara fomai. Askatari Lucio ikaino Jasón ikaino Sosípater ikaino nãfãferi mato mekashara fomakani. Nãfo efe yorakõifo.

<sup>22</sup> Nã Terciori mato mekashara fomai. Nãato ea kirika kenexona.

<sup>23</sup> Gayopa peXe mēra ē ikē ea kexemis. Jesús chanĩmara faa fetsafori Gayopa peXe mēranoax ichanāmisfo. Nāfāferi mato mekashara fomakani. Na Erasto peXe rasi anoa ato kori kexexomisto mato mekashara fomai. Askatari nofe yora fetsari Cuarto nāatori mato mekashara fomai.

<sup>24</sup> Nōko Ifo Jesucristo mato noikĩ mato sharafanō. Askapainō.

*Mã ato yoikĩ enekĩ Niosnoa ato yoisharani*

<sup>25-26</sup> Epa Niospa mato kexesharanō. Ē Jesucristoōnoa mato yoimis keskara āfe shināmā mato shināmatiro mā Ifofasharanō. A iyopaonifāfekai tsōa Jesucristoōnoa tāpiyopaonifoma. Akka iskaratĩa keyokōichi mā tāpiafo. Epa Niospa nā nipanakato noko nĩchini Jesucristoōnoa nō ato yoinō. A ixiainoa Ēpa Niospa ato yoini nānorikōi kirika kenenifo. Nā maitio ikafāfe Jesús chanĩmara fayanā nikasharatirofo.

<sup>27</sup> Nōko Ifo Jesucristoxō keyokōichi Niosnoa yoisharapakenakafo. Nōko Nios fistichi keyokōi tāpikōia. Askapainō.

Nā tii ē mato yoi.

## Pablo Corinto Anoafo Kirika Kenexō Fomani

*Pablo Jesús chanĩmara faafo Corinto anoafo kirika kenexō ato fomani*

<sup>1</sup> Ēkĩa Pablo, ě mato kirika kenexō fomai. Nofe yora feta nã Jesús Ifofamis feta, ãfe ane Sóstenes, efeta mato kirika kenexoni. Epa Niospa ea katopaikĩ ea katonĩ ãfe meka shara Jesucristoõnoa ě yoifofãsafanõ. <sup>2</sup> Akka Jesucristo ea nĩchini ě ãfe meka shara keyokõĩ maifo tii ě ato yoifofãsafanõ. Corinto anoafãfe mãfi Niospa fakefoki. Nãskakē ě mato kirika kenexō fomai. Mã mēxotaima ichanãmis Niospa meka shara tãpisharakõixikĩ. Niospa mato katonĩ Jesucristoõnoax mã afe yora shara inõ. Mato fisti katonĩma, a shinãifori keyokõĩ ato katonĩ mato fe Niospa yora inõfo. Nã mai fetsa anoafãfe nõko Ifo ãto Ifori. <sup>3</sup> Mato noikĩ mãto shinã mēraxõ mato shinãmasharanõ. Epa Nios feta nõko Ifo Jesucristo mato askafanõ.

*Jesucristo afara sharafo noko axotiro*

<sup>4</sup> Mē tãpia Jesucristo mato noikĩ afarafo mato tãpimani ãfe õiti keskara mã inõ. Nãskara tãpixõ ě Epa Nios kĩfikĩ iskafa fafãfãini: “Aicho Epa Niosi, mã Corinto anoafo afara sharafo Jesucristoõxõ mã ato tãpimanaki,” ixõ ě kĩfifãfãini. <sup>5</sup> Chanĩma, Jesucristo mato fe rafesharaino aõxõ mã Niosnoa tãpisharakõitiro. Akka ãfe shinãõxõ xafakĩa mã yorafo mã yoisharatiro. Jesucristoõnoa mã ato yoisharatiro. <sup>6</sup> Nõ mato Jesúsnoa yoini keskara nikakĩ mãto õiti fetsafaxõ a keskara shara mã ixii. Nãskakē mã Jesús chanĩmara faxõ mã mã ato õimana. <sup>7</sup> Nãskakē Epa Niospa ãfe Yõshi Sharaõxõ mato imapaiyai keskara mã iki. Nios chanĩmara faa fetsafo nãskarifiakani Niospa mato shinãmasharaino. Nãskakē mã nõko Ifo Jesucristo fe ipaikõikĩ mã manasharai nã nokoaitĩa õixikĩ. <sup>8</sup> Oyoxoma mato kexesharayoi. ãfe kerex shara mato inãyoi mã Ifofasharano. Nãskakē nokoõxõ yoixii iskafakĩ: “Mãfi efe ipanakaki, ě mato chaka soaxonano. Nãskakē tsõa mato iskafatiroma: ‘Mã chakakõifoki,’ mato tsõa fatirofoma,” ixõ mato Jesús yoixii. <sup>9</sup> Epa Niospa mato katonĩ ãfe Fake nõko Ifo Jesucristo fe mã rafenõ. Epa Nios chanĩma, noko yoiai keskara aki.

*Corinto anoxõ Jesús chanĩmara faafãfe anoris shinãnifoma*

<sup>10</sup> Efe yora mĩshtichi, ě mato yoisharapai. Nõko Ifo Jesucristo ea yoiaino ě mato yoi nãnorifos mã shinãnõ, mã fetsa shinãnõma. Jesucristo mato shinãmapaiyai keskara fisti

shinākāfe. <sup>11</sup> Efe yora mīshtichi, mē nika a Jesucristo mato shināmapaiyai keskara fisti mā shināima. Cloépa afe yorafo nono fēkaxō ea yoiāfo mā feratenā faatanāito. <sup>12</sup> Akka mā atiri isakai fetsei: “Nōfi Pablo ifofamiski. Noko tāpimanai keskara kayakai kōi nō nikamis. Fetsafāfekai kayakai shinākanima,” ixō mā yoimis. Askatari fetsafori iskakani: “Nōfi Apolos ifofamiski,” ixō mā yoimis. Askatari fetsafori mā iskamis: “Nōfi Pedro ifofamiski,” ixō mā yoimis. Askatari fetsafori mā iskamis: “Nōfi Cristo Ifofai,” ixō mā yoiketsamis.

<sup>13</sup> Efe yora mīshtichi, ¿afeskai mā feratenāimē? Askarakai sharama. Cristokai anori noko shināmanima feratenāyanā anorima nō shināketsanō. Cristokai āfe shinā ranāyama. Mēstekōi fisti noko yoimis. Akka, ¿afeskakī “Nō Pablo ifofaira” mā ato faimē? Ēkai mato ifi cruz ikakīnoax nāxonima. Cristo fistichi mato ifi cruz ikakīnoax nāxoni mā Ifofanō. Askatari ēkai tsoa faka mēra ikimakī maotisafama ea ifofanōfo. <sup>14</sup> Nāskakē ē inimai. Ēkai tsoa maotisafama. Akka Crispo yafi Gayo nā rafes ē maotisafa Cristo Ifofaifāfe ōikī. <sup>15</sup> Nāskakē tsōa yoitiroma iskafakī: “Pablo āfe aneōnoax ē maotisameni. Nāskakē ē Pablo ifofai,” ixō tsōa shinātiroma. <sup>16</sup> Chōō, iskaratīari ē rama shināi. Estéfanas yafi afe yorafori ē ato maotisafani. Ē shināyoama ē tsoa fetsa maotisafamara ē ika. <sup>17</sup> Cristokai ea yoiama ē yorafo maotisafapanō. Akka ea yoiā ē aōnoa meka shara ē mato yoinō. Ēa shināxō ē mato yoima. Ēa shināxokai ē mato Jesucristo chanīmara famatiroma. Jesucristo mato ifi cruz ikakīnoax nāxoni mato chaka soaxoxikī. Cristo mekaōxō Niospa mato chanīmara famatiro.

*Epa Niospa keyokōi tāpikōia afara fetsa apaikī atiro. Cristoōxō noko ōimayopaoni*

<sup>18</sup> Nāskakē Jesús ato nāxoni nikakanax a chanīmara faafāfema yoikī iskafakani: “Jesús ifi cruz ikakinoax noko nāxoni nōko chaka noko soaxoxikī, ixō noko yoipaiyaiāfāfe nōkai chanīmara fatiroma. Āa chanīkani,” ixō shināmisfo. Nāskakanax nāfo fenokōikani. Omiskōipakenakafo mēra fokani. Akka nō Jesús chanīmara feito noko nimapakenaka nō afe ipaxanō. Niospa āfe shināōxō Jesús noko nāxoni nōko chaka noko soaxoxiki. Afara fētsakai noko nimatiroma nō afe nīpaxanō. <sup>19</sup> Akka Niospa meka kirikaki kenekī iskafanifo:

Fētsa yoikī iskafatiro: “Nō tāpikōia. Nōko māpo shināsharafāi nō afara fetsafo fatiro nōfi tāpisharakōiakī,” ixō shināfikakī afaa tāpiafoma. Askarafofi ē ato ōimanikai afāfe shināifo keskarakai ē ato shināmanima. Nāfāfekai afaa tāpimisfoma. Āa shināmisfo, ixō Niospa yoini.

<sup>20</sup> Akka, ¿fanĩmẽ a nõ kirika kenekĩ tãpiakõiara imisfo? Akka tãpifikaxõ a Niospa shinãi keskara shinãkanima. Nãfofi Niospa ato õimaxii afaa tãpiafoma keskara fakĩ. “Nõfi afama mĩshti tãpikõiaki,” ifiaifãfe Niospa afaa tãpiama keskarafo ato imai. <sup>21</sup> Tsõa pishtakai ãto shinãmã Nios tãpitirofoma. Nios fistichi keyokõĩ tãpisharakõia. Nãskakẽ nõ ato yoimis iskafakĩ: “Niospa tãpikõixõ ãfe Fake Jesucristo nĩchini noko nãxonõ nõko chaka noko soaxoxikĩ,” ixõ nõ ato yoimis. A Nios chanĩmara faafãfema yoikĩ iskafamisfo: “Jesús chanĩmara faifãfe aõnoa anorima yoimisfo,” ato famisfo. Akka nã Jesús chanĩmara faifo Niospa ato chaka soaxoni afe nipaxanõfo. Nã nõ mato yoimis.

<sup>22</sup> Akka ãfe kaifo judeofo iskamisfo: “Niospa nai mẽraxõ afama mĩshti noko õimanaito chipo nõ Jesús chanĩmara fatiro,” ixõ shinãmisfo. Akka nã judeofomafãferi afama mĩshti tãpipaikani. Afeskaxõ Niospa yorafo imasharaimãkai tãpipaikani. Askatari afeskaxõ Jesús yorafo ãto chaka soaxonamãkĩ nãri tãpipaikani. Afama mĩshti ãa shinãkakĩ tãpipaikani. Akka tãpitirofoma. Nãskakẽ iskamisfo: “Noko Jesucristoõnoa yoiaifono nõ tãpitiroma, fekaxkõi. Nãskakẽ nõ Jesús chanĩmara faima. Nã afara nõa nõ shinãi nã nõ chanĩmara fai,” ixõ yoimisfo. <sup>23</sup> Nãnori shinãfiaifono nõ yoikĩ iskafamis: “Jesucristo ifi cruz ikakinoax noko nãxonĩ noko chaka soaxoxikĩ,” ixõ nõ yoimis. Akka ãfe kaifãfe judeofãfe yoikĩ iskafamisfo: “Ifi cruz ikakĩ mastafa askarakai nõko Ifo itiroma. Akka Cristokai afeskax natiroma,” ixõ judeofãfe shinãmisfo. Nãskatari yora fetsafo Cristoõnoa nikakani akiki kaxepaikani iskamisfo: “Tsõakai askara chanĩmara faima. Akka tsoa fẽtsakai noko nãxotiroma,” ixõ yoimisfo. <sup>24</sup> Askafiaifono nã chanĩmara faifo tii Niospa ato katonĩ afe ipaxanõfo. Judeofo yafi judeofomari Cristoõxõ Epa Niospa ato katonĩ chanĩmara faifãfe. Nãskakẽ ãfe shinã sharaõxõ ato nima. Atofi keyokõĩ tãpikõiaki Cristoõxõ noko nima nõ afe nipaxanõ. <sup>25</sup> Jesús chanĩmara faafãfema yoikĩ iskafamisfo: “Jesucristo noko nãxonĩ,” ixõ yoifikakĩ anorima shinãmisfo, ãa chanĩkakĩ. “Akka yora mapo sharayato Cristo chanĩmara fatiro,” ixõ yoimisfo a Jesús chanĩmara faafãfema. Akka anorima yoifiafono Niospa ãfe Fake Jesús noko nĩchixonĩ noko nãxoyonõ. Nãskax Niospa ãfe shinã a chanĩmara faafãfema ãto shinã keskarama. Aatoifi mẽstekõĩ shinãmis. Akka nã chanĩmara faafãfema yoimisfo iskafakakĩ: “Nõ tãpikõia,” ixõ yoifikakĩ yoisharamisfoma. Anorima shinãmisfo. “Nõ afama mĩshti fatiro,” ifiakakĩ fetsafo nimasharatirofoma. Askafikata aforikai ãa chaka soametirofoma. Akka Epa Nios fistichi afama mĩshti fatiroxakĩ noko chaka soaxotiro.

<sup>26</sup> Efe yora mĩshtichi, Niospa rama mato katoano afe keskara



mã iyopaonimãki. Shinãkapo. Mã fisti rasichi mã kirika kene tãpia mã ipaoni. Askatari mã xanĩfo ipaonima. Nãskax mã finakõia mã ipaonima. Akka nã Jesús chanĩmara faafãfema yoikĩ iskafamisfo: “Afãfekai afaa tãpiafoma,” ixõ mato yoimisfo. <sup>27</sup> Mato askafafiaifono Epa Niospa mato katonni afe yora mã inõ. Matoõnoa yoimisfo iskafakakĩ a Jesús Ifofaifãfema: “Afãfekai afaa tãpiafoma. Shinãsharakanima,” ixõ yoimisfo. Askatari shinãmisfo iskakakĩ: “Nõfi afama mĩshti fatiroki. Akka a Jesús chanĩmara faifo pachikõifo, kerexkai shinãtirofoma. Nõ atiro keskara atirofoma,” ixõ shinãmisfo. Mato askafafiakakĩ chipo mato tãpitirofo. Niospa mato afara shara tãpimanaino õikani rãfipaitirofo. <sup>28</sup> Nãskakẽ shinãkani iskakakĩ: “Jesús chanĩmara faifo afãfekai afaa tãpiafoma. Nãskakẽ nõ ato õipaima,” ixõ matoõnoa mato yoifiaifono Niospa mato katonni afe yora mã inõ. “Mãkai afaama,” mato fafiaifono Niospa mato katonni mã ato õimanõ akka afãfekairoko afaa tãpiafoma. <sup>29</sup> Akka tsõa pishtakai Niospa ferotaifi yoitiroma iskafakĩ: “Ë tsoa keskarama. Ë shara shinãi fet-safo keskarama,” ixõ yoitiroma. <sup>30</sup> Niosnoax Jesucristo afe yorafo mã inõ. Jesucristoõxõ noko mẽstekõi tãpimani ãfe õiti keskara noko imaxii. Noko nãxonni noko chaka soaxoxiki nõ afe nĩpaxanõ. <sup>31</sup> Nãskakẽ nõ Jesús chanĩmara faaxkai nõ kakapaimis itiroma. Niospa meka yoikĩ yõra kirika keneni iskafakĩ: “Akka tsoakai ãa yoimesharatiroma iskai: ‘Ë afama mĩshti tãpikõia,’ ikax ãa kakapaitiroma. Askatamaroko nõ yoisharatiro nã afara sharafo nõko Ifãfe aka,” ixõ kirika ano yõra keneni.

## 2

*Jesucristo ifi cruz ikakĩ mastanifo Pablo ato yoini Corinto anoafu*

<sup>1</sup> Efe yora mĩshtichi, ã matoki nokofenaxõ yõra shinãõxõ ã mato Niospa meka yoiyameama. Niospa ãfe shinã fistiõxõ ã mato yoiyamea. Ëa shinãxõ ã mato yoiyameama. Niospa ea shinãmanaino ã mato yoiyamea. <sup>2</sup> Ë matoki oyoxoma ã shinãkĩ iskafani: “Jesucristo ifi cruz ikakinoax noko nãxonni, nã fisti ã ato yoixikai. Afaa fetsa ã ato yoitiromaki,” ixõ ã shinãyamea. <sup>3</sup> Askata mẽ nokoax ã matoki ratekõiyamea. Nãskakĩ rateyanã ã shinãyamea iskafakĩ: “Ë mitsisipama ea õikakĩ ea nikakas-patirofo,” ixõ ã shinãyamea. <sup>4</sup> Nãskakẽ ã mato Jesucristoõnoa yoimis ãfe shinãmã shinãxõ ã mato yoitamaroko Niospa Yõshi Sharapa ea shinãmanaino ã mato yoiyamea. Ë mato yoianino aõxõ mã Jesús chanĩmara fayamea. <sup>5</sup> Akka yõra shinãõxõ mã

Jesús chanĩmara fayameama. Niospa shinãõxõ mã chanĩmara fayamea.

*Niospa Yõshi Sharapa noko shinãmasharatiro*

<sup>6</sup> Nãskakẽ a Niospa meka nikasharaifãfe mã tãpiafo nõ Niospa Yõshi Sharaõxõ xafakĩakõi nõ ato yoiaito. Nãskaifono fetsafãferi kirika kene tãpisharakõifikaxõ Niospa shinãi keskara tsõa anori shinãima. ãto shinãõxõkai Niospa meka nõ mato yoima. ãto xanĩfofofãfe shinãifo keskararikai nõ mato yoima. Akka ãto xanĩfofo mã chaimashta tsekekani. Anã afo xanĩfo ikanima. Nã xanĩfofofãfe shinãifo keskara mã keyoi. A shara shinãifo keskara shinãkanaxma. <sup>7</sup> A nõ mato iskaratĩa Niosxõ yoia tsõa tãpiyopaonima. Niospa mai onifayoxoma shinãkĩ iskafani: “Èfe Fãke ato chipo nãxoxii nã chanĩmara faafo tii ato nimapakexixakĩ,” ixõ shinãni. <sup>8</sup> È na meka mato yoiai keskarakai xanĩfofofãfe tãpiyopaonifoma. Nãskaxõ Jesús retenifo. Akka tãpikaxokai tsõa nõko Ifo Cristo ifi cruz ikaki mastakeranifoma. Nã nõko Ifo Cristo sharafinakõia. <sup>9</sup> Akka yõra kirika kenekĩ iskafani:

Afama mĩshti shara Niospa ato axoxii. Tsõa õiyomisma sharafo ato axoxii. A tsõa nikayomisma ato axõfãi a tosa pishta ãto shinã mẽraxõ shinãyomisfoma nãfo ato axosharaxii. A ato noiaifo ato itipinĩshara faxoxii, nãskara yoikĩ Niospa meka yõra kirikaki keneni. <sup>10</sup> Nã kirika kenekĩ yoinifo keskarakõi Epa Niospa ãfe Yõshi Sharapa noko õimani. ãfe Yõshi Sharapa keyokõi tãpikõia. Epa Niospa shinãi keskarari ãfe Yõshi Sharapari tãpikõia.

<sup>11</sup> Yõra ãfe shinã mẽraxõ ãa shinãitokai tsõa tãpitiroma. Akka ares fisti tãpitiro. Nãskarifiãi Epa Niospa shinãi keskara ãfe Yõshi Shara fistichi tãpikõia. <sup>12</sup> Epa Niospa ãfe Yõshi Shara nokoki nĩchini noko tãpimapaiyai keskara noko tãpimanõ. Akka nã chanĩmara faafãfema Niospa meka nikakanima. Nãfãfe shinãi keskarakai Niospa noko shinãmanima.

<sup>13</sup> Nãskakẽ yorafãfe noko tãpimanifo keskara nõ mato yoitamaro Niospa Yõshi Sharapa nõko shinã mẽraxõ noko shinãmana keskara nõ mato yoimis. ãfe meka chanĩmakõi fisti. Nãskakẽ nõri aõxõ nõ mato chanĩmakõi Niospa mekakõi tãpimani. Nã meka shara mã nikamis mãmãi Niospa Yõshi Shara mato fe rafeano.

<sup>14</sup> Akka fetsafõ Niospa Yõshi Shara fe rafeyamano nãfãfe Niospa Yõshi Sharapa yoiai keskara nikakaspakani. Nãskaxõ iskafatirofo: “Tsõakai nã meka chanĩmara faima. Akka nã shara shinãifãfe chanĩmara fakanima,” ixõ shinãkani. Akka Niospa Yõshi Sharapa shinãi keskara tsõa tãpiama. Nãskakẽ Niospa Yõshi Shara ato fe rafeyamano a yoiai keskara tãpiafoma. Akka Niospa Yõshi Shara fistichi ato tãpimatiro

chanĩmara faifono. <sup>15</sup> Akka fatora fetsa Niospa Yõshi Shara afe ikano Niospa tãpimapaiyai keskara tãpitiro. Fatoformãkĩ chaka shinãifo, askatari fatoformãkĩ shara shinãifo Niospa Yõshi Sharapa ato tãpimatiro. Nãskakẽ a Niospa Yõshi Shara fe rafeyamato a Jesús chanĩmara faifo ato tãpitirofoma. <sup>16</sup> Akka Isaias kirika keneni iskafakĩ:

Tsõakai nõko Ifãfe ãfe shinã mẽraxõ shinãi keskara tãpitiro. Tsõakai nõko Ifo tãpimatiro, ixõ kirika keneni. Askafiaifono nã nõ Cristo chanĩmara faifãfe a shinãi keskara nõ tãpitiro nõ afe rafexõ.

### 3

#### *Corinto anoafo Niospa Yõshi Shara fe rafeafoma*

<sup>1</sup> A fake rama kãiatokai afaa tãpitiro. Mã yosixõ tãpitiro afara fetsa. Nãskarifiyai a rama Jesús Ifofaifãfe Niospa meka tãpisharafoma a fake yome rama kãia keskarafo. Nãskarafo mã Jesús mãto Ifo fiano ranãrito ãfe meka mã tãpisharama. Mã rama Jesús Ifofayamafiyai oa rama Jesús Ifofaifo keskarafo, mã. Niospa meka mã mã nikafikatsaxakĩ a yoiyai keskara mã nikasharama. Ooa efe yora mĩshtichi, mãfi Niospa meka nikamisma keskarafo, rama Jesús Ifofaifo keskara. Mãfi nã Niospa Yõshi Shara fe rafeama keskarafo. Nãskakẽ ẽ mato Niospa meka tãpimasharatiroma mãkairoko itipinĩsharakẽ nikasharaxikima. <sup>2</sup> Fake yome rama kãiato chocho fisti atiro, afaakai pitiroma. Nãskarifiakĩ Niospa meka mã nikapaifikĩ ãfe meka mã nikasharatiroma. Nãskakẽ ãfe meka ichapa ẽ mato yoiyotiroma. ãfe meka fetsafori ẽ mato yoipaiyai mã nikasharaima. Nãskax mãkai itipinĩsharapaima Niospa meka nikasharaxikima. <sup>3</sup> Mãfi nã Niospa Yõshi Shara fe rafeama keskarafo. Nãskaxõ fetsafo mã ato xĩtipai mã ato keskara ipaikĩ. Nãskax mã fochishpanã faatanã mã ika. Nãskaxõ yõra shinãi keskara mã shinãi. Akka Niospa Yõshi Sharapa mato shinãmapaiyai keskara mã shinãima. <sup>4</sup> Mã fatora fetsafãfe yoikĩ iskafai: “Nõfi Pablo ifofakĩ. Pablo fistichi noko tãpimasharatiroma,” ixõ mã yoimis. Akka fetsafãferi mã yoikĩ iskafai: “Nõfi Apolos ifofakĩ. Apolos noko shara yoitiro,” ixõ mã yoimis. Nãskax mã fochishpanã faatanãpai. Nãskaxõ yõra shinãi keskara mã shinãi. Askarafokai Niospa Yõshi Sharapa mato shinãanima.

<sup>5</sup> Akka askayamakãfe. Nõ afaama. Akka Apolos fetakai nõ afaa tãpiama. Nõkai Nios keskarama. Akka nõfi ãfe inaki. Nãskaxõ nõ mato Jesús chanĩmara famani. Nõko Ifo Niospa noko katonni noko yonomapaiyai keskara nõ yonoxonõ. <sup>6</sup> Ẽ mato iskafakĩ yoipai. Yora fẽtsa taefakĩ xiki fanatiroma. Fetsafãfe a nãmã orometirofo foaisharanõ. Nãskafixokai nã rafeta xiki foaimatiroma. Nios fistichi xiki foaimasharatiroma.

Nāskarifiakī ē mato taefakī Jesucristo chanīmara famani. Chipo Apolos Cristoōnoa mato yoini āfe meka mā nikasharakōinō. Nō mato yoiaino Nios fistichi mātō shinā mēraxō mato shināmasharatiro āfe meka mā tāpisharakōinō. <sup>7</sup> Nā ē mato yoiaito mā nikai keskara Apolos feta nō afaa tāpiama. Akka Nios fistichi yorafo shināmasharatiro āfe meka tāpisharakōinōfo. <sup>8</sup> Akka taefakī fetsafo Jesús chanīmara famano, a chipo ato yoiaitori nānorikōiri ato yoi. Nā rafetamāi nānorikōi shinākakī Niospamāi ato shināmanaino. Nāskakē ato Jesúsnoa yoixikani a Ifofasharanōfo. Nāskatari Niospa a yonoxonafo ato afara ināxii. Fetsa ichapa ināta fetsafori ichapama ināxii yonoxosharafomano. <sup>9</sup> Efe yora mīshtichi, ē meka fetsa mato yoipai. Tarepa ifo fistifiano fetsafāferi yonoxotirofo. Askatari pexe ifo fistifiano fetsafāferi yonoxotirofo. Nāskarifiāi māfi Niospa āfe tare keskarafokī. Askatari mā āfe pexe keskara. Nios fisti mātō Ifo. Akka nōri Apolos feta yonoxomiski. Noko yoiāi keskara nō mato tāpimasharani āfe meka mā nikasharakōinō.

<sup>10</sup> Ē mato yoinō afeska faxō pexe fatirofomāki. Taefakī āfe kishi kerexkōi fikaxō nīchitirofo. Mā kishi nīchikaxō aōxō yonotirofo. Nāskarifiāi māfi pexe keskaraki. Akka nō mato Niospa meka tāpimani nā pexe faifo keskara. Cristofi pexe kishi keskaraki. Nā āfe kishiōnoax pexe nitiro. Nāskarifiakī Cristo mato nimai. Ea Niospa tāpimashara keskarari taefakī ē mato yoiāito mā Cristo Ifofani. Askatari fetsafāferi nānorikōi mato yoikani mā Cristo Ifofasharanō. Nāskata nā fetsafo ē ato yoimis iskafakī: “Shināsharata ato mēstekōi yoisharakāfe,” ixō ē ato yoimis. <sup>11</sup> Ē mato taefakī Cristoōnoa yoini mā Ifofanō. Akka tsōakai mato yoikī iskafatiroma: “Ē mato meka fetsa tāpimanō mā chanīmara faax Nios fe ĩpaxanō,” ixō tsōa mato anori yoitiro. Jesucristo fistichi noko nimasharatiro nō Nios fe ĩpaxanō. <sup>12</sup> Afara fetsa anā ē mato yoinō, ea nikakapo. Fētsa pexe fakī kishi kerexkōi nīchitiro. Akka fētsari akiki rofetaxō kerexkōi kenetirofo. Fētsari akiki oro kenetiro. Fētsari akiki tokiri sharakōi kenetirofo. Askatari fētsari akiki ifi kerexma kenetirofo. Fētsari xepa pei akiki kenetirofo. Fētsari tafa akiki kenetiro. Nāskakē nā pexe kooaino pexe ano ikafo ichotirofo kooyamaxikakī. Akka pexe kishi kerexkōi akiki keneafō oro akiki keneta, roe taxo akiki keneta, tokiri sharari akiki keneafono kootirofoma. Akka nā ifi kerexma kootiro. Xepa peifori kootiro. Tafari kootiro. <sup>13</sup> Nāskarifiāi Nios nā pēxe ifo keskara. Niospa meka yoimisfo nā pexe ifo pexe faxōaifo keskarafō. Fetsafāfe shara faxomis, fetsafāferi shara faxomisma. Nāskaxō anā oaitīa Cristo noko ōimaxii nā nō axomis keskara fatofō keyonakamakī. Akka fatofori nīpanakafomākī. Noko ōimaxii afesaxō nō Nios yonoxonamāki. Fētsa Jesús Ifofasharaxoma āa shināxō Niospa

meka ato yoisharaima, tãpisharaxoma ato yoisharatiroma. A yoi ai keskara sharama, ifi kerexma keskara, samama keyotiro. Akka fẽtsa Niospa mekakõi ato yoi. Niospa shinãmanaino ato tãpimani. Nã tokiri kerexkõi keskara keyotiro. <sup>14</sup> Nãskatari fatotora Nios yonosharaxonano Niospa afara shara inãsharaxii nã Jesús oaitã. <sup>15</sup> Akka fatotorari Nios yonosharaxonamano Niospa afara shara inãima. Nãskafix Nios fe ipanaka. Æa kaxpa yonokatsaxakĩ akka ãfe yono keyoxii.

<sup>16</sup> Akka, ¿mã tãpimamẽ mã Niospa pexe keskarakõi? Æfe Yõshi Shara mato mẽra ika. <sup>17</sup> A Nios ika anokai afaa chakama. Nãskakẽ ãfe Yõshi Shara mato mẽra ikano õisharakãfe chaka shinãi iyamakãfe. Mã afe nĩpaxanõ Niospa mato katonĩ afe yora mã inõ. Nã Ifofaafo tii ato shara imai. Akka fatotora ato anorima yoikĩ ato afara chakafamaino Niospa kopikiri omiskõimaxii.

### *Cristo noko tãpimasharatiro*

<sup>18</sup> Efe yora mĩshtichi, iskafakĩ shinãyamakãfe: “Nã Jesús chanĩmara famafãfe kirika raiskakĩ afama mĩshti tãpisharakõiafo. Nõri ato keskaraxõ anori shinãkĩ tãpikõia,” ixõ anori shinãi mã pãrameyamakãfe. Jesús chanĩmara famafãfe shinãkakĩ iskafakani: “Nã Jesús chanĩmara faafãfe shinãsharakanima,” ixõ nokoõnoa yoimisfo. Matoõnoa anori yoifiaifono Niospa mato mẽstekõi shinãmasharapai mã shinãtiro. <sup>19</sup> Nã Jesús chanĩmara famafãfe shinãkani iskafakakĩ: “Nõfi mẽstekõi shinãsharakĩ,” ifiaifãfe Niospa ato õia mẽstekõi shinãsharakanima. Tatima keskarafõ ato õi. Nãnorĩ yõra Niospa meka yoikĩ kirika keneni iskafakĩ: “Nã Jesús chanĩmara famafãfe ãa shinãkani iskakakĩ: ‘Nõfi tãpikĩ finakõiaki,’ ixõ shinãkakĩ Nios pãratirofoma. Æakõĩ anori pãramekani. Nãskakanax fenoafõ,” ixõ Niospa meka yõra kirikaki keneni. <sup>20</sup> Anã David kirika keneni iskafakĩ: “‘Nõfi tãpisharakõiaki,’ ifiaifãfe nõko Ifõ Niospa ato tãpikõioxõ yoikĩ iskafatiro: ‘Nafãfekai mẽstekõi shinãsharafoma, tatima keskarafõ,’” ixõ David kirika keneni.

<sup>21</sup> Nãskakẽ anã yoi iskayamakãfe: “Na feronãfãke a noko tãpimamisto ãfe meka fisti mẽstekõi, sharakõi,” ixõ anori anã shinãyamakãfe. Niospa ato shinãmayamainokai tsõa mẽstekõi shinãkeranama. Nios fistioxõ nõ mato mẽstekõi yoitiro mã tãpisharakõinõ. Keyokõĩ Niosnã, nã Niosnãri mãtonã. Nãskakẽ aõxõ mato shara faxõi. <sup>22</sup> Ë ikaino, Apolos ikaino, Pedro ikaino nõ Nios yonoxomis. Æfe meka nõ mato yoimis mã nikasharanõ. Askatari naax mã afe ipaxanõ. Keyokõĩ Niosnã, askatari nã Niosnãri mãtonã. Iskaratã afara sharafo ikai aõxõ Niospa mato shara faxõi. Nã chipo ixiaifori aõxori Niospa

mato shara faxoxii. Keyokōi a Niospa onifanifo mātonāri. Nāskakē māri āto ifo ixii. <sup>23</sup> Akka Cristofi māto Ifokī. Cristori āfe Ifori Nios.

## 4

### *Cristo yonoxomisfāfe afeskaxō yonoxotirofomāki*

<sup>1</sup> Akka mā nokoōnoa shinākī iskafatiro: “Nafāfepi Cristo yonoxomisfokī,” ixō nokoōnoa yoikāfe. Cristoōnoa meka shara tsōa nikayomisma Epa Niospa nōko shinā mēraxō noko shināmanaino nō atori tāpimani. <sup>2</sup> Akka āfe inafāfe āfe ifo nikakōitirofo. Āto ifāfe ato yoia keskara axosharatirofo. Akka nōfi Cristo āfe inafoki. Niospa noko yoini iskafakī: “Ē mato yoia keskara ato yoikāfe ato fomākakīma. Ato yoikāfe xanikakīma,” ixō noko yoimis. <sup>3</sup> Nios fistichi tāpikōiakī nā ea yoia keskara ē aki. Akka yorafāfe ea mekafakī chakafakani. Akka fetsafāferi ea yoisharakani. Nāskanōki āa ea mekafanōfo. Ē āto yonomatimaki. Akka ē Niospa yonomatiki. Akka Nios fistichi tāpia ē yonoxosharakōiaito. Yorafāfekai tāpiafoma. Ērikai tāpiana. <sup>4</sup> Ēfe shinā mēraxō ē shināi iskafakī: “Ea Niospa yoiai keskara ē aki,” ixō ē anori shināfiaino nōko Ifo fistichi ea tāpikōia a ea yoia keskara ē ayamakī ē akima. <sup>5</sup> Cristo anā oyoamano iskafakī yoyimakāfe: “Nāfāfekai Nios yonosharaxokanima,” ixō anori yoyimakāfe. Akka yora fētsa shināi keskara tsōa tāpiana. Shinākapo. Nōko Ifo anā oaitīa keyokōichi noko ōiaifono nōko shinā mēraxō nō shināmis keskara nōko Ifāfe ato ōimaxii. Anākai nō afaa pishta nō fomāxiima, Niospamāi keyokōi tāpikōikē. Nā nō afara shara nō one axomis tsōa ōiyamaino, askatari nā nō afara chakafamis nāfo keyokōi Niospa noko kaimaxoxii. Askatari nō afara shara faino Niospa noko yoikī iskafaxii: “Aicho. Ē mato yoia keskara mā amis. Mā sharakōi,” ixō noko yoixii.

<sup>6</sup> Efe yora mīshtichi, nānori ē mato yoi mā isharanō. Yōra kirika keneni keskara a Niospa yoiai nā fisti ē aki. Nā Apolosri Epa Niospa yoia keskara fisti aki. Nō askafaito mā noko ōixō nō akai keskara māri akāfe. Nāskakē iskayamakāfe: “Nā noko yoimisto āfe meka sharafinakōia, fetsafo keskarama. Akka nō fetsafo nikapaima,” ixō anori shināyamakāfe. <sup>7</sup> Akka Niospa keyokōi noko onifani. Nō Nios fistiōxō afara fetsa nō ato sharafaxonō. Nāskaxō, “Nā ē akai keskarakai tsōa atiroma,” ixō shināyamakāfe. Nāskax kakapaimis iyamakāfe.

<sup>8</sup> Mā shinākī iskafamis: “Nō Niospa meka tāpikōia. Nō fet-safo finōkōia. Nāskaxō nō anā tsoa fichipaima noko tāpimanō. Nōfi Cristo fe xanīfo keskaraki. Nō yorafāfe āto ifo keskarakī,” ixō mā shināi. Nāskapainōra mā xanīfokōifo iki. Mā xanīfokōifo ikaino nōri mato fe xanīfo ikerana. Akka nō xanīfoma. Noko

tsõa ifofaima. <sup>9</sup> Ë afara fetsa mato yoipai, nikakapo. Karaxa mēra ikiafo ato retematirofo. Yora ichapafāfe õiaifono ato retematirofo. Nāskarifiakī nōri ato keskara. Noko Jesús nīchini nō aōnoa meka shara nō ato yoinō. Nō Jesúsnoa yoiax nō Jesúsnoax omiskōiaino keyokōi yorafāfe noko õikani. Niospa āfe ājirifāferi noko õikani. Nō yora mitsisipama noko õikani, nōkairoko xanīfofo keskarakē. Nō āto nāmā rakakōia noko õikani.

<sup>10</sup> Nāskakē ã Jesucristo Ifofamis. Akka mā ea yoimis: “Pablo afaa tāpiamara,” mā ea famis. Askatari, “Nō Jesús Ifofakī nō tāpisharakōia,” mā imis. Askafixō mā tāpisharakōiama. Nāskaxori mā ea yoimis, “Na Pablo afaa afeska fatiroma. Akka nō afarafo nō atiro,” mā imis. Askafixō mā askafatiroma. Mā shinākī sharakōi mā meei. Akka ea mā õia ã afaamakōi mā ea õimis. <sup>11</sup> Akka iskaratīari nōfi fonāiyanā nōamaikiyanā rapati shara safeyamata nō imis. Askatari noko koshamisfo. Akka pexemais ixō Niospa meka fisti nō ato yoifofāsafamis. Nāskax nō omiskōi. <sup>12</sup> Nāskaxō nō kerexkai yonotiro a nō piai fixiki. Nāskatari yorafāfe noko mekafakī chakafai-fono ato kopitamaroko nō tenemis. “Jesús mato shara fax-opainō,” ixō nō yoimis. Noko omiskōimafiaifono nō tenemis. <sup>13</sup> Askatari noko īchaifāfe ato kopitamaroko Niospa meka shara nō ato yoimis. Nāskakē iskaratīa noko chakafakani, “Māfi nā afamafo keskarakī, nā afara chaka potafo keskara,” ixō nokoōnoa yoimisfo.

<sup>14</sup> Nāskakē ã mato nānori yoikī kirika kenexō ã mato rāfimapaima. Askatamaroko ã mato shināmasharapai. Akka māfi ēfe fakekōifo keskarafoki. Ë mato noikōi. Nāskakē ã mato yoisharapai anā mā anorima shināyamanō. <sup>15</sup> Yora ichapato mato Cristoōnoa tāpimakani. Akka ã taefakī mato Cristoōnoa tāpimayoni. Nāskakē mā Cristo chanīmara fani. Eōnoax mā Niospa fakekōifo. Nāskatari ã mato epa keskarakōi. Fetsafāfe Cristoōnoa mato tāpimafiaifono afokai mato epa keskarama. Akka ã fisti mato epa keskarakōi. <sup>16</sup> Nāskakē nā ã ikai keskakāfe. Ë Nios Ifofasharai keskafakī māri askafakāfe. <sup>17</sup> Nāskakē ã Timoteo matoki nīchikai. Ë Timoteo Cristo chanīmara famaki taefani. Nāskax ēfe fake keskarakī. Ë aō noikōi. Nōko Ifo Jesús yoiai keskarakōi nikakōi. Ë Jesucristo Ifofai keskara Timoteo mato shināmaxii mā shināmakinōma. Nā chanīmara faafo pexe rasi tii anoafō ã ato tāpimani keskara Timoteori mato tāpimaxii.

<sup>18</sup> Mē tāpia mā ranārīto shinākī iskafai: “Pablo Timoteo nokoki nīchi nokoki mesekī. Āakai nokoki opaima. Akka nō keyokōi tāpikōia. Nō Pablo yopaima,” ixō mā shināi. Askai mā kakapaimis. <sup>19</sup> Anori mā shināfiaino ã samamakōi ã mato ari kaikai. Niospa ea yoiaino ã samamakōi mato ari kai.

Mê mato ano nokoõxõ ã tâpixii nã kakapaimisfãfe Niospa Yõshi Sharaõxõ yoikanimãkai, ãakõi yoimisfomãkĩ. <sup>20</sup> Nios nõko Ifono nõ meka fisti yoitamaro ko ãfe shinã sharaõnoax nõ ishataro. <sup>21</sup> Nãskakẽ nã ã matoki nokoaitĩa ãfe shinã sharaõnoax ã matoki nokoxii. Mẽ nokoxõ ã tâpixii afeskax mã ikamãkĩ. Mã chaka xateyamakẽ Niosxõ ã mato tâpimaxii omiskõimakĩ. Akka mãto chaka mã xatekẽ ã mato noikõikĩ fenãmãshta ã mato yoisharaxii. Nãskakẽ ã matoki nokoxõ ã mato omiskõimayamano fenãmãshta oi tsii faxõ ã mato yoixii ea yoikãfe fato mã fichipaimãkai.

## 5

### *Jesús chanĩmara fafiakaxõ afara chakafakani* (Hch. 9.1-19; 22.6-16)

<sup>1</sup> Mẽ nika mato mẽraxõ feronãfake fistichi afara chakafaito. Akka, ¿afeskakĩ mã yoimamẽ anã afaa chakafayamanõ? Nã feronãfake ãpa ãfi fe oxakĩ chakafai. Askara chakakõi. Nã Nios chanĩmara faafoma tsoa askamisma. <sup>2</sup> Ooa. Nã feronãfake mato mẽraxõ afara chakafai aõnoa rãfipaikanima, “Nõ sharakõifora,” ixõ mã yoimis kakapaiyanã. Akka, ¿afeskakĩ nã feronãfakeõnoa mã shinãchakaimamẽ? Akka nãskaxõ ãfe chaka xateyamax anã mato fe ichanãito potakãfe anã mato fe ichanãyamanõ. <sup>3-5</sup> Ë mato fe iyamaflaxõ ã mato shinãkõi. Ë ano mato fe iyamaflaxõ nã feronãfake afeskaimãkai mẽ tâpikõia. Ë mato anoxõ yoikĩ iskafakerana: “Mã Jesucristo shinãyanã ichanãino Niospa ãfe Yõshi Sharaõxõ nã feronãfake ãpa ãfi fe imiskẽ mato makinoa potakãfe Satanás ifofaafo mẽra inõ. Nãskakẽ Satanás nã feronãfake omiskõimanõ. Nãskaxõ Satanás nã apaiyai keskara faxii nã feronãfake. Nãskafaino omiskõixii. Satanás omiskõimanaino ãfe chaka xatepaixii Jesús anã Ifofapaikĩ anã omiskõiyamaxiki. Mã ãfe chaka xateano nõko Ifo Jesucristo anã oaitĩa nã feronãfake ifixii afe ipaxanõ anã omiskõinõma,” ixõ ã mato yoikerana ã mato fe ixõ.

<sup>6</sup> Ooa, mã iskamis: “Nõ sharakõi,” ixõ mã shinãfikĩ mãkai nã feronãfake mato mẽranoa mã potapaima afara chakafafaito. ¿Mã tâpiamamẽ, yora fistichi mato mẽra ixõ afara chakafaito mã xatemayamax aõnoax keyokõi mã chaka itiro? <sup>7</sup> Ë mato afara fetsa yoipai. Nikakapo. Kẽromã pãa fakĩ levadura aya osiano keyokõi faraxitiro. Pishta aya osiano keyokõi faraxitiro. Nãskarifiakĩ fẽtsa mato mẽraxõ afara chakafaito mã xatemayamax aõnoax keyokõi mã chaka itiro. Nãskakẽ nã yora fistichi afara chakafaito potakãfe mato mẽraxõ anã afara chakafayamanõ, mã fena keskara ixikakĩ. Akka Niospa Fake, Jesucristo, noko nãxoni nõko chaka noko soaxoxiki. Nãskakẽ mã afaa chakafamisma keskara. <sup>8</sup> Nãskaxõ a nõ chakafapaoni



anã nõ shinãpaima. Fetsafo fekaxtefayamata ato pãrayamata meka chanĩmakõi fisti nõ ato yoitiro.

<sup>9</sup> Ë mato kirika kenexoyoni iskafakĩ: “Feronãfakefo ãto ãfima fe imisfo. Askatari kãrofori ãto fenema fe imisfo. Askarafo yorafo fe rafeyamakãfe.” <sup>10</sup> Akka a Jesũs Ifofaafoõnoama ã mato kenexoyonima. Nã Jesũs Ifofaifoõnoa ã mato kenexoni. Akka faki pishtakai iyamafoma a Jesũs Ifofaifoma. Nãskakẽ nõ ato fe imis. Fakira kaxõ nõ õimis nãriri ikafo a Jesũs Ifofaafoma. Nõ ato fe ifiaxõ afãfe akaifo keskarakai nõ amisma. Afãfe ãto ifo Satanãs. Nãskaxõ ãto chaka xateafoma. Chaka fetsa fetsatapafafo amisfo. Nãskaxõ ãto ãfimafo chotamisfo. Kãrofori nãskarifiamisfo ãto fenema fe chotanãkani. Afama mĩshti fipaikata ãfenãfoma fipaimisfo. Nãskatari yometsokõifo imisfo. Nãskakata nioskõiyamafekẽ, “Na nõko niosra,” ikaxõ afara kĩfimisfo. Nãskafaifono nõ ato feta afaa chakafamisma. Nãskafikẽ nõ ato fe imis. Nõ ato makinoax faki paxkatiroma. <sup>11</sup> Akka mã efeta Nios Ifofaino ã mato kirika kenexoyoni. Nãskakẽ fatatora yoikĩ iskafatiro: “Ëri mato feta Jesucristo Ifofai,” ixõ yoifixõ ãfe ãfima chotamis. Kãrofori askari amisfo ãfe fenema fe chotanãmisfo. Askatari afama mĩshti fichipaimisfo. Atonãma fipaimisfo. Nioskõiyamafekẽ afara kĩfimisfo. Yora fetsafo chakafamisfo. Pãemisfo. Yometsomisfo. Askarafo fe rafeyamakãfe. “Nõ Jesũs Ifofaira,” ifiakaxõ afara chakafamisfokĩ. Askarafo fe rafeyamakãfe.

<sup>12-13</sup> Nã Jesũs Ifofaifãfema afara chakafaifãfe nõ ato yoitiroma omiskõinõfo. Akka Nios fistichi ato yoitiro iskafakĩ: “Mã afara chakafamis. Nãskaxõ mãto chaka mã xateyamaito ã mato omiskõimaxii,” ixõ Niospa ato yoitiro. Akka nõ ato yoitiroma. Nãskakẽ Niospa noko yoia nã Nios Ifofaa fetsafãfe afara chakafaifono nõ ato yoitiro ãto chaka xatenõfo omiskõixikakima. Akka Niospa meka yõra kirikaki keneni iskafakĩ: “Nã feronãfãke mato mẽraxõ afara chakafamis yoikãfe anã mato fe ichanãyamanõ ãfe chaka xateyamax,” ixõ kirika keneni.

## 6

*A Nios Ifofamisfo rafeta fẽtsa chakafaino fẽtsa chakafayamaftaito, askara achixõ a xanĩfo Nios Ifofaama ano iyotiroma ato yoinõ*

<sup>1</sup> A mato feta Nios Ifofafo ato yõayamakãfe xanĩfofo yoikĩ a xanĩfofofãfe Nios Ifofaafomakĩ. Askatamaroko nã Nios Ifofafo ano ato iyokãfe ato yõkanõfo mato chakafafo-makĩ. <sup>2</sup> Akka, ¿mã tãpiamamẽ mã Nios Ifofaxõ mã nõko Ifo nokoaino mã xanĩfo keskara mã ixii? Nãskaxõ mã ato yoixii fatofomãkĩ shara imisfo. Askatari mã yoixii fatofomãkĩ chaka imisfo Niospa ato omiskõimanõ. Nãskakẽ iskaratĩari

fětsa pishta chakafaano mǎ ranǎ yoinōnǎsharakǎfe xanĩfofoki chanikakĩma. <sup>3</sup> Askatari mǎ Nios feta yoixii ǎfe ǎjirifo fatofǎfe sharafafomǎkĩ, askatari fatofǎferi chakafafomǎkĩ Niospa ato omiskōimanō, a chakafamisfo. Nǎskakē iskaratĩa mǎ mǎ ato ōi fatofomǎkĩ chakafo fatoforimǎkĩ sharafo. Nǎskakē mǎ ranǎ mǎ yoinōnǎsharakǎfe xanĩfofoki chanikakĩma a xanĩfofǎfe Nios Ifofaaafomaki. <sup>4</sup> A mato feta shara shinǎifo mǎ ato ifitiro mato yoisharanōfo, mǎ fochishpanǎ faatanǎino. Akka a Jesús Ifofaaafoma mǎ ato ifitiro. <sup>5</sup> Afaa tǎpiafoma mǎ ato ifiax mǎ rǎfitiro. Akka, ¿a shara shinǎifo mato fe ikafomamamē? Ēje, nǎno ikafo a shara shinǎifo. Nǎskakē ato ifikǎfe mato yoisharanōfo mǎ fochishpanǎ faatanǎino. <sup>6</sup> Akka mǎ fochishpanǎ faatanǎx, mǎ raenǎ faatanǎsharamisma. Askakimaroko mǎ ato yōaxō nǎ Nios Ifofaaafoma ano mǎ ato iyomis xanĩfofofǎfe ato yōkanōfo.

<sup>7</sup> Mǎ ranǎ mǎ fochishpanǎ faatanǎx nǎ Nios Ifofaaafomaki mǎ atoki chanimis. Akka askarakai sharama. Nǎskakē Jesús Ifofaa fětsa mato chakafaito kopitamaroko a Jesús Ifofaaafomaki mǎ chanitiro. Nǎskax mǎ shara itiro. Askatari a Jesús Ifofaa fětsa matoki yometsoano nǎ Jesús Ifofaaafomaki mǎ chanitiro ǎa matoki yometsonōfo. Nǎskax mǎ shara itiro. <sup>8</sup> Akka mǎ ranǎ mǎ yometso faatanǎmis chaka faatanǎyanǎ. Askatari mato fe yorafori mǎ ato chakafamis.

<sup>9</sup> ¿Mǎ tǎpíamamē a yora afara chakafamis Nios xanĩfo ano katiroma? Nǎskakē mǎri mǎ pǎrameyamakǎfe. Mǎ afara chakafaax Nios xanĩfo ano mǎ katiromaki. Akka nǎ ǎto ǎfima chotamisfo Nios xanĩfo ano fotirofoma. Askatari kērofori ǎto fenema chotamamisfo Nios xanĩfo ano fotirofoma. Nǎskatari nioskōiyamafekē afara fetsa fichipaikĩ, “Na nōko niosra,” ixō fichipaimisfo. Afokai Nios xanĩfo ano fotirofoma. Askatari feronǎfakefo aa ranǎ chotanǎpaimisfo. Kērofori nǎskari amisfo aa ranǎ chotanǎpaikani. Afokai Nios xanĩfo ano fotirofoma. <sup>10</sup> Askatari yometsomisfo, atonǎma fipaimisfo, pǎemisfo, ĩchamitsamisfo, nikayospamisfo, afara fětsa fĩatíaxō ato pǎraxō afara fetsa fĩamisfo. Nǎskarafokai Nios xanĩfo ano fotirofoma. <sup>11</sup> Mǎ askapaonixakĩ iskaratĩa mǎ mǎ Niospa afe yorafo. Niospa ǎfe Yōshi Sharaōxō mǎto chaka mato soaxona nōko Ifo Jesucristo mǎ Ifofaito. Mǎto chaka mato soaxoyanǎ ǎfe ōiti keskara shara mato imai. Askafaxō afaa chakafamisfoma keskara mato ōi.

### *Nō Cristo fe rafexō nō chakafatiroma*

<sup>12</sup> Akka mǎ yoiraka iskafakĩ: “Cristo ěfe Ifo. Nǎskakē a Niospa yoiyamano nǎ ě apaiyai keskara ě atiro, afaa chakama,” ixō mǎ yoiraka. Ēje, nǎnorikōi. Askatamaroko afara shara fetsa fekē ě aki ě ifofatirora ixō ě apaima.

<sup>13</sup> Askatari mā yoiraka iskafakī: “Niospa nōko xāki noko onifaxoni a nō piai nō pinō. Nāskaxori a nō piai noko onifaxoni,” ixō mā yoimis. Akka chipo Niospa a nō piai yafi nōko xāki yamafaxoxii nāatomāi a nō piai noko onifaxonixakī. Chanīmakōi Niospa noko onifani nō afe rafepakexanō. Niospakai nōko āfima fe nō inō noko onifanima. Kērofori āto fenema fe inō ato onifanima. Askatamaroko Niospa nōko yora noko onifaxoni nō nōko Ifo fe nō rafepakexanō, Jesús āfe ina nō inō, nāskata Jesús nōko Ifo inō. <sup>14</sup> Nōko Ifo Jesús mā nafianikē Epa Niospa āfe shinā sharayaxō otofani. Nāskarifiakī āfe shinā sharayaxō nokori otofaxii.

<sup>15</sup> ¿Mā tāpiamamē nō Cristo Ifofaax nō āfe yorakōi? Nāskaxō nō nōko āfima chotatiroma nōmāi Jesús afe yorakōixō. <sup>16</sup> Niospa meka yoikī yōra kirika kenekī iskafani: “Feronāfake kēro fe ikaino nā rafe yora fisti keskarakōi itirofo,” ixō keneni. ¿Mā tāpiamamē, nā mātō āfima fe mā ikī yora fisti keskara mā itiro? Nāskakē mātō āfima fe iyamakāfe mā chakanatiroki. Askatari kērori fene fetsa fe itiro. <sup>17</sup> Nāskax nō nōko Ifo Jesús fe rafeax nā yora fisti keskara nō ixii. Niospa āfe Yōshi Shara nokoya rafemaxii. Nāskax nōko fero mēsho nā fisti keskara ixii Niospa Yōshi Shara fe rafeax.

<sup>18</sup> Nāskakē mātō āfima fe ipaiyamakāfe. Askatari kērofori mātō fenema fe ipaiyamakāfe. Askara shināyamakāfe. Aska-paikakīma ato makinoax ichotakāfe mātō āfima fe ixikakīma. Mā chakanatiroki. Askatari kērofori ichotakāfe mātō fenema fe ipai kakīma mā chakanatiroki. Akka mātō āfima mā chotakī mātō yora mā chakanafatiro. Askatari afara chaka fetsa akī mātō yora mā chakanafatiroma, afara chaka afiafikī mā chakanatiroma. <sup>19</sup> ¿Mā tāpiamamē Niospa Yōshi Shara nofe ika? Nōko yora āfe pexe keskarakōi. Nāskakē Niospa Yōshi Shara nōmēra ika nāmāi nōko Ifofaax. Nāskax mākōi mā ifofametiroma. Akka Nios mātō Ifo. <sup>20</sup> Jesucristo mato nāxoni mātō Ifo ixikī. Nāskax mā āfe inakōifo. Nāskatari Nios mātō Ifokōi. Nāskax mātō yora Niosnā. Nāskakē Niosnā ixosharakāfe Niospa mato imapaiyai keskara. Mā askafaito ōikakī fetsafāfe, “Nios sharara,” fatirofo.

## 7

### *Afeskax feronāfake āfi fe isharatirofomē*

<sup>1-2</sup> Mā ea kirika kenexō femakī mā ea yōkaita. Nāskakē nā mā ea yōkai keskara ē mato yoisharapai mā tāpinō. Feronāfake kēromaisax shara itiro. Askafiax āfiyapai āfiyatiro chakafaxikīma. Nāskax feronāfakefo āfiyatirofo. Xotofakefori feneyatirofo. Nāskara shara. <sup>3-4</sup> Feronāfake mā āfiyax āfe yora anā āfenā fistima. Āfe āfināri itiro. Nāskarifiyai kēro mā feneyax anā āfe yora āfenā fistima. Āfe fenenāri itiro. Nāskakē

āfinī āfe fene afe ipaiyaito fene ranītiroma. Nāskatari fenēri āfe āfi afe ipaiyaito ranītiroma. <sup>5</sup> Nāskakē ranīnōnāyamakāfe. Akka nāskaxō mā shinātiro iskafakī: “Nō Epa Nios kīfiyonō, nō paxkanōnāx oxa ranāyoxikī. Chipō anā nō kemānāxikī,” ixō mā yoitiro. Nāskafīax chai samarakayamakāfe. Mā samarakaino Satanās mato chakafamatiro mā kēro fetsa fe ipaitirokī. Nāskarīfai kērori feronāfake fetsa fe ipaitiro. Afe ipaikī chakafatiro.

<sup>6</sup> Ē mato, “Fianākāfe,” ixō ē mato yoima. Akka mā fianāpai mā fianātiro. <sup>7</sup> Askata ē shinākī iskafai: “Feronāfakefo ea keskara kēromais ikanax shara itirofo. Niosnoax ē āfiyamax ē isharaī. Ē shināchakaima. Ē inimakōi. Akka Niospa ea kēromais ima keskarakai ato askafaima. Fetsafo Niosnoax āfiyafo. Fet-safori kēromaiskanax nā ē ikai keskariai inimatirofo.”

<sup>8</sup> Akka iskaratīa nā kēromaisfo yafi fenemaisfo ē ato yoinō. Feronāfakefo ea keskara kēromais itirofo. Askatari kērofori fenemais itirofo. Askara shara. Askatari āto fene ato makinoax namis, afo anā feneyatirofoma. Ea keskara shara itirofo.

<sup>9</sup> Akka feronāfake ares ixō teneyamai kēro fe ipaikī fatora kēro fe oxatiro. Askara sharama. Askatamaroko āfiyatiro tanaima shara ixikī, anā kēro fetsafo fe ipaixikīma.

*Feronāfake āfe āfi potatiroma, nāskarari kēromāri āfe fene potatiroma*

<sup>10-11</sup> Askata iskaratīa feronāfake āfiya ē yoipai, xotofāke feneyari ē yoisharapai. Ēa ē mato yoima. Nōko Ifoōxō ē mato yoi iskafakī, kēromā fene enetiroma. Mā fene eneax fetsa fe fianātiroma. Ares itiro. Akka askayamai anā feneki kematiro. Askara shara itiro. Askatari feronāfake āfi enetiroma.

<sup>12</sup> Nāskakē iskaratīa keyokōi ē mato yoisharapai. Na meka ē mato yoiai Niospa ea yoiyamafekē ēa mēstekōi shinākī ē mato yoi. Feronāfake Jesús Ifofaino āfe āfinī Jesús Ifofaxoma fene noikī fene enepaiyamaino fenē āfe āfi potatiroma.

<sup>13</sup> Askatari āfe āfinī Jesús Ifofaino fenē Jesús Ifofaxoma āfe āfi enepaiyamaino āfinī fene enetiroma. <sup>14</sup> Feronāfake Nios chanīmara faimano āfe āfinī Nios chanīmara faino āfe āfiōxō Niospa nā feronāfake shara faxotiro. Nāskaxō āfe āfinī Jesús Ifofaito ōikī āfiōxō fenē Jesús Ifofatiro. Nāskatari kēromā Jesús Ifofayamaino fenē Jesús Ifofaino feneoxō Niospa nā kēro shara faxotiro. Akka feronāfake fe āfi enenāifono āto fakefo shara itirofoma. Akka enenāyamaifono Niospa āto fakefo shara ōitiro. <sup>15</sup> Akka feronāfake Jesús Ifofayamakē āfinī Jesús Ifofaito fenē enepaikōikī enetiroma. Nāskax kapaiyaito nētefayamafe. Katanō. Mā nētefaino fekaxtetiroki. Askatari kēromā Jesús Ifofayamakē fenē Ifofaito kēromā enepaikōikī enetiroma. Kapaiyaitori nētefayamafe. Katanō. Mā nētefaino fekaxtetiroki. Niospa noko katonī nōko shinā mēraxō afanā

noko fekaxtefanōma nōko ōiti tanaimakōi shara inō. <sup>16</sup> Kēromā Jesús Ifofaxō āfe feneri Jesúsnoa tāpimatiro āfini fene yoiaino fenē Ifofai rakikīa nō tāpitiroma. Feronāfākeri Jesús Ifofaxō āfe āfiri Jesúsnoa tāpimaino Ifofai rakikīa, nō tāpitiroma.

<sup>17</sup> Nā nōko Ifo Jesús mato ima keskara nāskara ikāfe. Akka Niospa mato ifini nā Jesús mato ima keskara mā inō. Askatari nā Nios Ifofaafo tii Nios kīfiti pexefā anoafoya nā maitio anoafori nānorikōi ē ato yoimis. <sup>18</sup> Iskafakī ē ato yoimis. Judeofo Niospa ato yoini keskarakōi āto fake feronāfakefo foshki repa xatepaonifo. Akka mato foshki repa xatenifono Jesús Ifofaxō shinākī mā iskafatiroma: “Iskaratīa ē Jesús Ifofai. Nā fistichi ēfe chaka ea soaxonano ē afe ĩpaxanō. Ooa, ųafeskakī ea foshki repa xatenifomē, ē askayamapaifino? Aatokai ēfe chaka ea soaxotiroma. Nāskakē ē foshki repa xateama keskaraxō ē ato fomāi,” ixō shināyamakāfe. Akka māto foshki repa mā mato xatenifono shināchakayamakāfe. Askatari mā Jesús Ifofaxō iskakī shināyamakāfe: “Judeofo āto xinifāfe ato yoini keskara ē ipai. Ē foshki repa xatepai nā Moisés yoini keskara ē ixikī,” ixō anori shināyamakāfe. Nō foshki repa xate-tiroma Niospa noko ifinō. <sup>19</sup> Akka nō foshki repa xatemisma askatari nō foshki repa xatemis nāskara shara. Akka nō askanokai, “Mā chakafaa,” noko Niospa faima. Askatari nō askamanori, “Mā chakafaa,” noko Niospa faima. Nā judeofo imis keskarakai nō itiroma noko Niospa ifinō. Askatamaroko Niospa noko yoini keskara nā fisti nō atiro. <sup>20</sup> Akka nā Niospa mato ifini keskarakōi ikāfe. <sup>21</sup> Mā fētsa yonomati ikatsaxakī shināchakayamakāfe. Nāskarakōi ikāfe. Akka māto ifāfe mato nīchipaiyaino, “Fotakāfe anā yonoxoxikakīma,” mato faino mā katiro. <sup>22</sup> Akka nōko Ifo Jesús mato ifini. Mato ifiyoamano ranāri mā āto yonomati iyopaoni. Iskaratīari mā āto yono-mati mā ato yonoxomis. Mā askafixō mā Jesús Ifofaano, Jesús māto chaka mato soaxonano, āfe yonomatikōifo mā iki. Nāskaxō tsōa mato iskafatiroma: “Mākaī Jesús afe yorafoma,” tsōa mato fatiroma. Akka ranāritokai mā tsōa yonoxomisma. Askafiax māri Jesús Ifofaax māri āfe yonomatikōifo. <sup>23</sup> Epa Niospa āfe Fake Jesucristo noko nīchixononi noko nāxoyonō nāskax nōko Ifo inō. Nāskax mā afe yorakōifo. Nā fisti māto Ifokōi. Nā fistichi mēstekōi mato shināmasharatiro. Askaxō fetsafo ifofayamakāfe mato shināmasharatirofomaki. <sup>24</sup> Efe yora mīshtichi, Niospa mato ifiano nā mā ipaoni keskara ikāfe Epa Nios mato fe ikaino.

*Feronāfake āfimaisfoya kērofo fenemaisfoōnoa Pablo yoini*

<sup>25</sup> Akka iskaratīa afara fetsa anā ē mato yoipai mā ea yōkaita. Feronāfakefo āfimaisfoya kērofo fenemaisfoōnoa ē mato yoi. Ē mato yoiai keskara nōko Ifāfe ea yoiyamafixō

ea noikĩ ea nĩchini ẽ ẽfe ina inõ. Nãskakẽ ẽ mato yoiai keskara mã chanĩmara fatiro. <sup>26</sup> Iskaratĩa afara mesekõikĩ noko omiskõimani. Nãskakẽ mã ẽfimais ika shara. Nios Ifofaafãfema noko omiskõimapaikani nõ Jesús Ifofakẽ. <sup>27</sup> Akka ẽfiyakaxõ mãto ẽfi eneyamakãfe. Askatari ẽfimaisxõ kẽro feneyamakãfe. <sup>28</sup> Akka mã kẽroyaxõ mã chakafatiroma. Kẽrofori feneyakatsaxakĩma mã feneyaxõ mã chakafatiroma. Askata mã feneyax askatari feronãfake mã ẽfiyax mato omiskõimanaifono mã omiskõitiro. Nãskaxõ mato omiskõimatirofo mã Jesús chanĩmara faino. Nãskakẽ ẽ mato yoisharapai mã omiskõiyamanõ.

<sup>29</sup> Askatari ẽ mato iskafakĩ yoipai, efe yora mĩshtichi. Nõko Ifo Jesús mã chaima oi kiki. Nõko Ifo nõ yonoxokĩ nõ chai faima. Nãskakẽ nõ nõko Ifo yonoxosharakõipai. A ẽfimaisfãfe nõko Ifo yonoxosharakõitirofo kẽro shinãkima. Askatari nã ẽfiyatori nõko Ifo yonoxosharatiro nã ẽfimaisfãfe yonoxonaifo keskafakĩ. <sup>30</sup> Askatari nã shinãchakaifãfe nõko Ifo yonosharaxotirofo nã shinãchakaifãfema yonoxonaifo keskafakĩ. Nãskatari nã inimaifãfema nõko Ifo yonoxosharatirofo nã inimaifãfe yonoxonaifo keskafakĩ. Askatari nã afara fiaifãfe shinãtirofo iskafakĩ: “Na nõkonãma, akka na nõko Ifonã,” ixõ shinãtirofo. Akka nõko Ifo shinãkõikĩ nõ yonotiro. <sup>31</sup> Nõko Ifo Jesús mã chaima oi kiki. Nãskakẽ nõko mai anoxõ nõ yonosharafafãinõ nã nõ yopai fixiki. Nãskafixõ afama mĩshtifos shinãkima nõko Ifokõiroko nõ shinãkõinõ. Keyokõi mai anoafõ keyoxikani. Nãskakẽ Jesús nõ shinãkĩ finakõikĩ afama mĩshti fipaikĩ nõ shinãtiroma.

<sup>32-35</sup> Ẽ mato anori yoi mãto shinã mẽraxõ afaranã mato fekaxtefanõma. Ẽ mato, “Ẽfiyayamakãfe,” faima. Askatari xotofakefori, “Feneyayamakãfe,” ẽ ato faima. Ẽ mato mẽstekõi imapai nõko Ifo fisti mã shinãkĩ finakõinõ, mã afara fetsa shinãnõma. Askaxõ ẽ mato yoia keskara feronãfake ẽfimaisto ẽfe Ifo inimamapai. Akka feronãfãke ẽfiyaxõ ẽfiri inimamapai. Ẽfinĩ afara yopaito fenẽ shinãchakakĩ ẽfi fixotiro. Nãskakĩ ẽfe Ifo fistikai shinãtiroma. Nãskaxõ ẽfe Ifo inimamapaikĩ ẽfiri inimamapai. Askatari xotofake fenemaisto ẽfe Ifo Jesús fisti yonoxosharapai. Afara fetsakai shinãima ẽfe Ifo fisti shinãi. Niospa amapaiyai keskara fisti aki. Akka xotofake feneyaxõ ẽfe feneri inimamapaikĩ afara fetsafori shinãtiro ẽfe Ifo Jesús fisti shinãkĩma.

<sup>36</sup> Nãskakẽ meka fetsari ẽ mato yoi. Feronãfãke tafakĩ xotofake yoiyoxõ fichisharapaikĩ chipo fitiro ẽfe ẽfi inõ. Shinãkĩ iskafatiro: “Mẽ afetiama afe mekaitakĩ, mia fipa,” shinãchakayamaxiki ixõ fitiro, chaka shinãyamaxiki. Nãskafakĩ afaa chakafaima. <sup>37</sup> Askatari feronãfake fetsa shinãkĩ iskafatiro: “Ẽfe Ifo ẽ yonoxosharapaiyai keskara ẽ

ãfiyaxõ ã axotiroma. Nãskakẽ ã ãfiyaima mẽ yoifixõ,” ixõ anori shinãkĩ afaa chakafaima. Tsõa kerexkai, “Ãfiyafe, mã mẽ yoiaki,” fayamaino nã feronãfãke xotofake fe fianãtiroma Nios yonoxosharaxii. <sup>38</sup> Akka feronãfãke nã xotofake fe fianãsharatiro. Akka nã xotofake fe fianãima nõko Ifo yonoxosharatiro. Nãskarari shara itiro.

<sup>39</sup> Askata meka fetsari ã mato yoi. Æfe fene naamanokai kãromã fene enetiroma fetsa fe fianãxiki. Akka mã fene naano fetsa fe fichinãpai afe fianãtiro nã Nios Ifofaa fe. Askara shara. <sup>40</sup> Nãskatari ãa ã shinãkĩ iskafai. Mã fene naano fetsa fe fianãmax nãskarari sharakõi itiro. Ë shinãi Niospa Yõshi Sharapari nonorikõi mato yoipai.

## 8

*Nioskõima onifakaxõ yorafãfe kãfipaonifo. Nãskaxõ nami inãpaonifo atoõnoa Pablo yoini*

<sup>1</sup> Mã ea yõkaito ã mato yoisharatiro. Yora fetsafãfe afara onifakaxõ, “Na nõko niosra,” ikaxõ nami inãmisfo. Askata anã nã nami fikaxõ ato inãmisfo yorafãfe pinõfo. Akka yorafãfe ãto niosnã nõ nami pia, shara. Nõ piamari, shara. Nãskaxõ nõ afaa chakafaima. Akka mã yoikĩ iskafamis: “Mã nõ tãpia nõ ãto niosnã nami pia, shara. Akka nõ piamari, shara,” mãmãi shinãkĩ Nioskõimara ixõ. Akka mã fatora fetsafãfe shinãkĩ iskafamis: “Ëfi tãpikõiaki. Nã ã shinãi keskara ã mẽstekõi shinãi. Ë fetsafo keskarama. Ë apaiyai keskara ã atiro,” ixõ mã yoimis. Askara yoi kakapaimis mã itiro. Askara shinãkĩkai nõ fetsafo inimamatiroma. Askakimaroko nõ yorafo noixõ nõ ãto õiti fepeaxosharakõitiro Jesús Ifofasharanõfo. Nãskakẽ nõ ato inimamatiro. <sup>2</sup> Askatari fatora fẽtsa shinãkĩ iskafamis: “Ëfi afama mĩshti tãpiakĩ,” ixõ anori yoifikĩ atiri afaa tãpiama. <sup>3</sup> Akka fatora fẽtsa Nios noiaino nãskarifikĩ Niospa aõnoa yoitiro iskafakĩ: “Nã ea noiãi mẽ tãpikõia. Nãfi efe yoraki,” ixõ yoitiro.

<sup>4</sup> Nãskaxõ yorafãfe afara fetsa onifakaxõ, “Na nõko niosra,” ikaxõ nami inãifo. Nã nami nõ pitiro. Nã shara. Nõ chakafaima. Akka nõ piamari, shara. Akka mã nõ tãpia a afara fetsa yorafãfe onifafo akai afama. Nã onifafotokai afaa tãpiama. Akai õitiyama. Æfe mãporikai afaa shinãtiroma. Akai Niosma. Akka Nioskõi fisti. <sup>5</sup> Jesús Ifofaafãfema yoikĩ iskafamisfo: “Nios ichapa. Nai mẽranoafoya mai anoafoya nios ichapakõi,” ixõ yoimisfo. Akka nã ãto nios ichapafix Nioskõifoma. <sup>6</sup> Mã nõ tãpia Epa Niosfi fistiki. Fetsakai anoma. Nãato keyokõi onifani. Nokori onifani nõ ãfe fakefo inõ. Nãskatari nõko Ifo Jesucristori fisti. Anã ano fetsama. Nãskaxõ Niospa ãfe Fake feta keyokõi onifani. Aõnoax nõ nitiro.

<sup>7</sup> Nã ě mato yoiai keskara fisti rasichi Jesús chanĩmara faifãfe tãpiafoma. Shinãmisfo iskafakakĩ: “A fetsafãfe afara onifafo, nã ģto nioskĩi nia,” ixõ yoimisfo niyamafiakẽ. Akka ģto xinifãfe nãnori ato yoipaonifo. Nãskakẽ shinãkani iskakakĩ: “Nã ģto niosnã nõ nami pixõ nõ Nioskĩi chakafatiro,” ixõ shinãtirofo. Akka mã pikaxõ ģto shinã mẽraxõ shinãchakatirofo: “Mã nõ chakafara,” ikaxõ. <sup>8</sup> Anori shinãfiaifonokai a nõ afara piatokai Nios yafi noko rafemasharatiroma. Nios makinoa noko potatiroma. Afara onifakaxõ, “Na nõko niosra,” ikaxõ nami inãfo nã nami nõ piamanokai noko shara imatiroma. Askatari noko chakafatiroma. Nãskatari mã nõ pianori noko chakafatiroma. Nãskatari noko shara imatiroma.

<sup>9-12</sup> Nãskakẽ mato feta Nios Ifofaafõ afaa chakafamaya-makãfe. Mã shinãi iskafakĩ: “Nõ keyokĩi pitiro. Afara onifakaxõ, ‘Na nõko niosra,’ ikaxõ nami inãfo. Nã nami nõ pitiro nã onifafokairoko Nioskĩikẽ. Akka mã nõ na nami pixokai nõ ģto nios chanĩmara faima. Akka mã nõ tãpia Nioskĩima. Akka pixõ Nioskĩi nõ chakafaima. Jesúsri nõ kachikirifaima,” ixõ mã shinãi. Mã anori shinãfiaino Jesús Ifofaa fetsafãfe anori tãpiafoma. Tãpiamaifono nã nioskĩimato kĩfiti pexefã anoxõ mã piai fisti mã pipai mãkai ģto nios ifofapaima, nãskakĩ mato õikakĩ akairi apaikani. Akka mã mã tãpia yorafãfe ģto niosnã nõ nami pia shara, chakama. Akka fetsafãferi Nios Ifofafiakaxõ yoimisfo iskafakakĩ: “Ģto niosnã nõ nami pia sharama, nõ chakafatiro,” ixõ yoimisfo. Nãskaxõ mã nami piaito fetsafãfe mato õikakĩ akairi afãfe nami pitirofo. Nãskaxõ mã nami pikaxõ chipo shinãtirofo iskafakakĩ: “Ooa, mẽ nami pixõ ěfe Ifo Jesús ě chakafaa ěmãi ģto niosnã nami pixõ. Nã nami pikĩ ě ģto nios sharafai. Ē ģto nios ifofai õitsai. Ooa, ě chakafaa,” ixõ shinãtiro. Askaxõ ģfe shinã mẽraxõ shinãchakakõitiro mã nami piaito õikakĩ akairi pikaxõ. Nãskakẽ mã chakafamatiro. Askafakĩ Cristori mã chakafai. Mã mã tãpia afara onifakaxõ, “Na nõko niosra,” ikaxõ nami inãifo nã pixokai mã chakafaima nã onifafokairoko Nioskĩikẽ. Akka fetsafãfekai tãpiafoma. Afãfe shinãkani: “Nã nami pixõ nõ chakafatiroki,” ixõ shinãmisfo. Akka mã piaito õikakĩ akairi pikaxõ shinãchakatirofo. Mã akai keskafakĩri shinãkani. Akka mã nã nami piyamainokai akairi pikeranafoma. Shinãchakakeranafoma. Nãskakẽ mato fe yorafo noikõixõ mã nã nami pitiroma ato chakafamaxikima. Akka atoõnoaxri Cristo naniki. <sup>13</sup> Nãskakẽ nõ nami pixõ Jesús Ifofaa fetsafo nõ ato chakafamatiro. Nãskakẽ ģto niosnã nõ nami pitiroma fetsafo chakafamayamaxikĩ. Nãskakẽ nõ fetsafo chakafamapaima. Nofeta Jesús Ifofaa fetsafo noikĩ nõ afaa chakafamapaima.



## 9

*Niospa Pablo nīchini āfe meka ato yoinō*

<sup>1</sup> Nios fistifi ēfe Ifokī. Nā ea yonomapaiyai keskara ē atiro. Tsōakai ea yonomatiroma. Jesús ea nīchini ē aōnoa yorafo yoinō. Akka nōko Ifo Jesús mē ōisharakōini. Aōnoa ē mato yoiaito mā chanīmara fani. Nāskakē nōko Ifo Jesús ē yonoxonaōxō Jesús mā Ifofai. <sup>2</sup> Fetsafāfe shinākakī iskafamisfo: “Niospakai Pablo nīchiama Jesúsnoa noko tāpimanō,” ixō anori yoimisfo. Fetsafo mekaino anori shināyamakāfe. Ē mato yoiaito mā nōko Ifo Jesús chanīmara fai. Nāskakē mā tāpitiro chanīma Niospa ea nīchini ē mato Jesúsnoa yoinō.

<sup>3</sup> A ea īchakakī mekaifaifono iskafakī ē ato kematiro: <sup>4</sup>Fetsafāfe Jesúsnoa yoiaito nikakakī afaa kopi yōkaxoma kaxpa ato pimamisfo. Akka ē mato Jesúsnoa yoiaito nikakakī, ¿eari afaa kopi yōkaxoma kaxpa eari pimatirofomamē? <sup>5</sup> Ē akai keskafakī Pedrori Jesúsnoa yoifofāsafamis. A Jesús nīchiafāfe fetsafāferi Jesúsnoa ato yoifofāsafamisfo. Jesús āfe extofāferi ato yoifofāsafamisfo. Nāfo kēro Jesús Ifofaafo fe fianākaxō Jesúsnoa ato yoifofāsafaiyono āto āfifori ato fe fofāsamisfo. ¿Nāfāfe āto āfifāfe Jesús Ifofaafo fe fianāfo keskari ēri nā kēro Jesús chanīmara faa fe ē fianātiromamē eferi kafāsanō? <sup>6</sup> ¿Afeskakī ē Bernabé feta nō mato Jesúsnoa yoifikī nō yonoimē, a nō yopai yafi a nō piai fixikī? Akka fetsafāfe Jesúsnoa mato yoifikakī yonokanima nō akai keskafakī. Akka afara yopaifono mā ato ināmis. Akka a nō yopai kaxpa nō fimisma, yonoxō nō fimis. <sup>7</sup> Anā meka fetsari ē mato yoinō. Sorarofāfe kaxpa yonokanima. Āto xanīfāfe a piaifo ato inākani. Askatari ato kori inākani. Nāskarifikā yora tare fanamisto āfe tare foaisharano āfe yono pitiro. Askatari fakka kexemistori āfe fakka chocho fīaxō ayatiro. Nāskarari a Jesúsnoa yoimisfāfe a piaifo fitirofo pixikakī tsōa kopifaxoma.

<sup>8</sup> Nā ē mato yoiyai keskara yōra mekama. Akka Moisés nānori kirika keneyoni Niospa meka yoikī. <sup>9-10</sup> Moisés Niospa meka kenekī iskafani: “Nā fakka keskara nexakaxō xiki peama peama amamisfo āfe xaka potaxikakī. Nāskakē ifāfe renextiroma xiki xaka pinō ifomāi yonoxokī,” ixō Moisés Niospa meka yoikī kirika kenenī. Akka fakkaōnoa Niospa yoinima. Yorafoōnoari yoini. Nā Jesús yonoxomisfoōnoa yoini. Nāskaxō afaa kopifaxoma fitirofo yopaifo Niosnoa ato yoikakī. Askatari fetsafāfe tare kexexō shinātirofo iskakakī: “Ē na tare kexeakī nāskakē ē tarepanoa afama mīshti fīpa,” ixō shinātirofo. Nāskarifikā a Niospa meka ato yoimisfāfe a piai fitirofo. <sup>11</sup> Nāskarifikā nokori kopikiri a nō yopai mā noko kaxpa inātiro afaa kopi yōkaxoma. <sup>12</sup> Fetsafāfe Jesúsnoa mato yoiiaifono nikakī nā yopaifo mā ato ināmis.

Akka nō mato taefakī yoiyoni. Nāskakē mā noko afama mīshti inātiro fetsafo finōmainīfofā. Mā noko afama mīshti ināfitirokē nō mato afaa yōkamisma. Nāskaxō nō tenemis. “Nō ato kori yōkaito anā noko nikapaitirofoma,” ixō nō shināmis. Nāskakē nō mato afaa yōkapaimisma. <sup>13</sup> ¿Mā tāpiamamē? Nōko kaifo judeofo na Nios kīfiti pexefā mēra femisfo a pi-aifo. Nā piaifo Nios ināxikakī. Nāskakē a Nios kīfiti pexefā mēra yonomisfāfe a piai kaxpa pimisfo tsōa kopifaxoma. <sup>14</sup> Nāskarīfakī nōko Ifāfe yoini iskafakī: “Fētsa ēfe meka shara fetsafo yoiāito nikakakī nā nikaifāfe a yopaifo ato inātirofo,” ixō nōko Ifāfe yoini. <sup>15</sup> Nānori nōko Ifāfe yoifinikē ē mato afaa pishta yōkamisma. Mato Niospa meka yoifikī ē mato kirika kene fomaima: “Ea kori inānōfora,” ixō. Nāskakē tsōa ea yoikī iskafatiroma: “Pablo ato kori fīapaikī ato Jesucristoōnoa yoimis,” ixokai tsōa eōnoa anori yoitiroma. “Akka Pablo ato kori fīamiski ato Jesucristoōnoa yoikī,” ea mā faito ē rāfipaitiro. Nāskaxō ē mato afaa pishta yōkamisma: “Pablo kori fia,” mā ea fanōma. <sup>16</sup> “Ē mato afaa yōkatama Jesúsnoa ē mato yoimis. Nāskakē ē sharafinakōiakī,” ixokai ē yoitiroma kakapaiyanā. Akka Niospa ea katōxō ea nīchini ē Jesúsōnoa ē yoifafāinō. Akka ē Jesúsōnoa yoiyamaito Niospa ea omiskōimatiro. <sup>17</sup> Ē yoikī iskafamis: “Epa Niosi, mī Fakeōnoa ē yoipai,” ixō ē yoikē Epa Niospa ea afara inātiro. Akka ēa ē yoima. Niospa ea nīchini Jesúsnoa ē ato yoinō. Nāskakē nā ea yoini keskara ē ato yoimis. <sup>18</sup> Akka ē Niospa meka shara yoimiskē, ¿afaa ea Niospa ināimē? Ato Niospa meka yoixokai ē afaa ato yōkamisma. Askaxorikai ē ato yoimisma iskafakī: “Niospa mato yoikē Jesúsnoa ē mato yoifafainaito a ē yopai ea inānōfora,” ixokai ē ato yoimisma. Akka ē Niospa meka ato yoipai afaa yōkaxoma. Nāskax ē inimasharakōi Epa Niospa ea inimamaino.

<sup>19</sup> Ēkai tsōa yonomatima. Nāskafīax ēakōi ē mātō yonomati keskarakōi. Nāskakē keyokōi yorafo ē axosharapai ato Jesús chanīmara famaxikī. Nāskax ē yorafāfe āto yonomati keskarakī. Akka nā Nios Ifofaaafoma ē ato fe rafemis āto feyafati shara keskara ixō ē ato yoiāito, Jesús Ifofanōfo ē Niospa meka yoiāito. <sup>20</sup> Ēfe kaifo judeofo fe ē ikax nā ikaifo keskari ēri ato keskara ipai. Ē ato keskara ikaito ea ōikakī Jesús chanīmara fatirofo. Nōko xini Moisés nōko kaifo yoipaoni keskarakai iskaratīa anā ē nikaima. Akka ē nikayamafikī a Moisés yoipaoni keskara nikamisfo fe ēri ato fe ixō Moisés yoini keskara ēri askai ato Jesús chanīmara famaxikī. <sup>21</sup> Nāskakēri nā Moisés yoini keskara nikaifoma fe ē ato fe ixō nā Moisés yoini keskara ē akima ato Jesús chanīmara famaxikī. Ē nāskafafiamiskē Cristo ea yoini keskara ē amis. Ē nikasharaxō nā fisti ē kachikiri fatiroma. <sup>22</sup> Jesús

chanĩmara faafãfe ranãrito Niospa meka tãpisharayokanima. Ë nã keskarafõ fe ikax ãri ã ato keskara ipai eari Jesũs tãpimasharanõ. Nã ea tãpimana keskara ãri ato tãpimasharanõ. Nãskatari fatora fetsafõ fe ã ikax ã ato keskarari ã ipai. Eõxõ Jesũs chanĩmara fakanax afe isharapakexanõfo. <sup>23</sup> Nãskakẽ ã askafakĩ ã ato Jesucristoõnoa tãpimasharai nã chanĩmara faifono ãri ato fe inimai finakõitiro.

<sup>24-25</sup> Akka mã mã tãpia nã naetapafo xonõnõnãxikakĩ ichotirofo yora ichapafãfe ato õiaifono. Akka nã koshi fistichi ato xonõtiro. Nãskakẽ akiki xanĩfo inimakĩ afara shara fetsa inãtiro. Nãskakẽ kerexkai ichotirofo fetsafõ xonõpaikani. Akka ichoyokanaxma tae fenai ichoyofõfãfõfãitirofo feyafaxikakĩ xokenãxikakima. Nãskarifikĩ nõko Ifo Jesũs kerexkai yonosharaxokãfe afara chakafo fayamaxikakĩ. Akka Niospa mato yoiaito nikakĩ akãfe Jesũs feyafaxõ Ifofaxikakĩ mã akiki nokoaitĩa mato afara shara inãnõ. Akka nã ichokĩ ato xonõa xanĩfãfe afara shara inã keyotiro. Akka Niospa noko afara inã keyonakama. <sup>26</sup> Nãskakẽ ã Jesũs fisti yonoxoni afaa fetsa shinãtama. Akka ãa ã kaxpa mato yoimisma. Niospa ea shinãmanaino ã mato yoimis. Naetapafo xonõnõnãpaikani mẽstekõi ichotirofo. Nãskarari ã mẽstekõi ika. Ëfe Ifãfe ea yoiai keskarakõi ã iki akiki nokosharaxiki. <sup>27</sup> Ëa ã apaiyai keskara ã akima. Ëfe Ifãfe ea amapaiyai keskara ã aki. Ë tenepaifikĩ ã tenetiroma Jesũs Ifofasharaxikĩ. Ë xokenãfiakĩ ã tenetiroma Jesũsnoa yoikĩ. Jesũs fistichi ea yonomatiro. Nãskakẽ ã fetsafori yoifafãini Jesũs Ifofaxõ yonosharaxonõfo. Nãskakẽ Niospa ea yoia keskara ã ayamax ã fenotiro, afianã ã Nios yonoxotiro. Niospa anã ea yonomatiroma. Ë fenopaima. Nãskakẽ nã ãa ã apaiyai keskara ã akima. Ëfe Ifãfe ea amapaiyai keskara, nã fisti ã aki.

## 10

### *Judeofãfe Nios chakafapaoni keskara iyamakãfe*

<sup>1</sup> Efe yora mĩstichi, tãpikãfe. Nõko xinifo Egipto anoax fonifo. Akka Niospa nai kõi nãmã pishta ato fotomaxoni a õiax nõko kaifo judeofo acho fonifo. Niospa nã nai kõiõxõ ato iyopaiyai ari ato iyoni. Ato iyoikaino nã ãamãfããfe ane Õshi ano nokonifo. Nãnoxõ nõko kaifo judeofo Niospa ato ãamãfã nẽxpakĩa rafe ato paxkaxotani anori pokefainõfo. <sup>2</sup> Moisés ato rekẽ tanaxoni. Akka nõko kaifo judeofo Moisés acho fonifo. Nã Moisés chanĩmara fakanax afe rafepaonifo. Nãskakẽ nai kõi nãmã pishta kaino Moisés nãmã ato iyoni. ãamãfã pokefokani mã ãamãfã nakirafekõi shinãtanano. Nãskakẽ pokefainifo ãamãfã nẽxpakĩa. Mã ãfe kaifo ato ififani Moisés kani. <sup>3</sup> Askatari Niospa nai mẽraxõ

a piaifo ato potaxoni fikaxō pinōfo. <sup>4</sup> Nāskatari ano fakamano Moisés tokirinifā āfe mēstetini ramāino faka sharakōi tsekeni keyokōichi ayanōfo. Cristoōnoax faka sharakōi tsekeni judeofāfe ayanōfo. Akka fakirira fofāfofāipaonifo Cristo ato fe kaino, tsōa Cristo ōinima. ato fe kakī ato axopaoni ato kexexō. <sup>5</sup> Askafafiaifono Epa Nioskai atoki inimanima āfe meka nikayamaifono. Nāskakanax tsōa istoma anoax fofāfofāikani nikayospakanax nai keyonifo. Nā tsōa istoma ano ato maifakī fetsanifo Niospa ato namakī keyoano.

<sup>6</sup> Akka afāfe afara chakafapaonifo. Nāskakē atoōnoa noko tāpimani afara chakafo fapaonifo keskara nōri ayamanō inifo keskai omiskōixikima. <sup>7</sup> Afāfe afara chakafapaonifo keskara ayamakāfe. Akka nāfāfe afara fetsa onifakaxō, “Na nōko niosra,” fapaonifo. Nāskakaxō kīfipaonifo. Kīfikaxō āfe ferotaifi piyanā ayata ikaxō afara fetsafo chakafapaonifo. Pāeyanā monopaonifo. “Nōko nios nokoki inimaira,” ikanax askapaonifo. Nāskakē māri ato keskara iyamakāfe. <sup>8</sup> Nāskakanax āto āfima fe ipaonifo. Askatari kērofori āto fenemafo fe ipaonifo. Askafāfe ōikī Niospa veintitrés mil yorafo ato namarisafatani nā pena fisti. <sup>9</sup> Māri ato keskara chaka iyamakāfe. Akka, “Nioskai nokoki fena ōitifishkiyotiroma. Nāskakē ē afara chakafafaiato ea Niospa omiskōimanimi,” ixō shināyamakāfe. Akka nōko xinifāfe chakafafāfe ōikī anā teneyamakakī Niospa ato omiskōimani. Nāskakē ato mēra rono paekōifo nīchini ato chachinōfo. Ato chachiano ranāri nanifo. Nāskakē noko tāpimai nōri Nios chakafaito nokori omiskōimatiro. <sup>10</sup> Askatari mēxotaima mekaifāfe ōikī Niospa āfe ājirinī ranāri ato namani. Akka māri ato keskara iyamakāfe mato omiskōimayamanō.

<sup>11</sup> Nā nōko xinifāfe afara chakafapaonifoōnoa noko kenexonifo noko yoisharanō nōri ato keskara iyamanō omiskōixikima. Akka nōko Ifo Jesús oyoamano chaima nō itipinīsharayoi mā nōko Ifo nokoaino anā nō keskara chaka nō ixikima. <sup>12</sup> Akka fētsa shinākī iskafai: “Ēkai ato keskarama. Ē afaa chakafatiroma. Akka afara sharafo fisti ē amis,” ixō anori shinātiro. Nāskakē kexemesharakāfe ato keskara iyamaxikakī afara chakafai. Akka māri Jesús Ifofasharamax mā ato keskarari mā itiro afara chakafai. <sup>13</sup> Satanás mato afara chakafamapaikī mato fisti chakafamapaimisma. Keyokōi nā Nios Ifofaafori ato chakafamapaimis. Mato chakafamapaifiaino Niospa mato yoia keskara mato kexesharatiro mā afaa chakafanōma. Akka mato yoimis keskara mato axōi mā chanīmara faito. Nāskakē Niospa Satanás mato ichapama fekaxtefatimafai mā chakafanōma. Mato Niospa amatiro mā tenenō mato fekaxtefafiaino. Māto ōiti mato kerexfaxotiro mā Satanás nikanōma. Askatari afara

afe keskararafāfe mato fekaxtefaino Niospa mato amatiro mā tenenō mā Nios kachikirifaxikima.

<sup>14</sup> Efe yora mīstichi, fetsafāfe afara onifakaxō, “Na nōko niosra,” ikaxō chanīmara faifono ato makinoax paxkafaitakāfe. <sup>15</sup> Nāskakē shināsharakōikāfe nā ē mato yoiai keskara ōitsai ē mato pāairaka. Akka ea yoikāfe ē mato pāaimākai. <sup>16</sup> Mā mā tāpia Niospa meka nikai nō ano fisti ichanāmis. Nāskaxō nō fimi ene ayamis Jesús noko nāxoni shināyanā. Nā nō ayamis, “Fimi ene Jesús āfe imira,” ixō nō shināmis. Nāskaxō nō shinātiro Jesús noko naxōi āfe imi foni nō afe nīpaxanō. Nāskakē nō yoitiro iskafakī: “Aicho Epa Niosi, mī Fāke noko nāxoni nō afe īpaxanō,” ixō nō yoitiro. Nāskatari pāa torepakexō Jesús noko nāxoni shinākī nō pimis. “Nā pāa Jesús āfe namira,” ixō nō shināmis. Nāskaxō nō shinātiro Jesucristo noko omiskōixoni mastafono ifi cruz ikakinoax. Nāskakē nō afe rafepakenaka Ifofaax. <sup>17</sup> Akka pāa fisti torepakexō keyokōichi nō pimis. Nāskarifakī Jesucristo fisti keyokōichi nō chanīmara faax fisti keskara nō ixii.

<sup>18</sup> Nāskatari nōko kaifo israelifo shinākāfe. Nāfāfe āto inafō retekaxō Nios ināmisfo āto chaka soapaikakī. Nāskatari nā israelifāfe Nios kīfiti pexefā mēraxō Nios yonoxomisfāfe nā nami pimisfo. Nāskakanax nā fisti keskara imisfo ano fisti ichanānākaxō pikani Nios shināyanā. <sup>19</sup> Nāskakē ē mato yoi nā afara fetsa onifafo akai afama. Askatari afara fetsa onifakaxō nami ināfo nā namikai afama a onifafokairoko Nioskōikē. <sup>20</sup> Akka nā Jesús Ifofaafāfema Nioskōi nami inātamaro ko afara fetsa onifakaxō, “Nā nōko niosra,” ikaxō niafaka chaka nami ināmisfo. Nāskakē māri nami ināyamakāfe. Niafaka chaka fe mā rafeaito ē mato ōipaima. <sup>21</sup> Mā nōko Ifo Jesús fe rafepai a niafaka chakafo fe rafeyamakāfe. Askaxō nā rafe mā ifofatiromaki. Nā Jesús Ifofaafō fe mā ato fe ichanākaxō pāa torexō mā ato feta pimis Jesús noko nāxoni shināyanā. Nāskakē nā Jesús Ifofaafoma fe ato fe mā ichanātiroma niafaka chakafo nikaxikīma. <sup>22</sup> Nōko Ifo Jesús fe rafepaikī nō niafaka chaka fe rafepaikī nō nōko Ifo Jesús nō ōitifishkimatiro. Nō askafaito noko omiskōimatiro. Akka, nō Jesús kerexkai finōtiromē noko omiskōimayamanō? Maa, nō Jesús finōtiroma. Jesús noko omiskōimanaito tsōa noko timamatiroma.

*Nā Jesús Ifofaafō nō ato noikōixō nō ato shināchakamatiroma*

<sup>23</sup> Akka mā shināiraka iskafakī: “Cristo ēfe Ifo. Nāskakē nā ē apaiyai keskara ē atiro, afaa chakama,” ixō mā shināiraka. Ēje, nānorikōi mā shināmis. Nāskakē afara shara shinākī: “Nā chakama nō atiro,” ixō mā shināfiaino akka fetsafāfe anori shinākanima: “Chakara,” famisfo. Nāskakē fētsa ferotaifi nō afara pitiroma ato shināchakayamaxikī. Chanīma, nō Jesús Ifofaxō Niospa noko yoini keskara keyokōi nō pitiro. Keyokōi

nami shara nõ pitiro. Chanĩmakõifiano, Jesús Ifofaa fetsafãfe shinãmisfo iskafakakĩ: “Ë nami pitiro. Ë nami pixõ ã Jesús chakafatiro,” ixõ shinãtirofo. Nãskakẽ nõ ato ferotaifi nõ nami pitiro. shinãchakanõfoma. Akka nõ ato shinãchakamatama Jesús fisti nõ ato shinãmapai. <sup>24</sup> Nãskakẽ nõ mã apaiyai keskara fisti shinãyamakãfe. Fetsafoõnoari shinãkãfe. Ato axosharakãfe.

<sup>25</sup> Fatora fẽtsa mato nami inãpai mato kori fĩaxikĩ akka pipaiki mã fitiro pixiki. “¿Fanĩa mĩ na nami feamẽ?” ixõ yõkayamakãfe mã pixõ shinãchakaxikakĩma: “Nã nami nõ mĩ niosnãraka,” ixõ yõkayamakãfe. Akka noko Niospa yoini iskafakĩ: “Keyokõi mã nami pitiro,” ixõ noko yoini. <sup>26</sup> Nõko Ifãfe keyokõi onifani. Keyokõiri ãfenã. Nã onifani tii noko inãpai nõkonã keyokõi inõ.

<sup>27</sup> Akka nõ Jesús chanĩmara famato mato pimapaiyaito mã a feta pipaiyai afeta pikãfe. Nãskaxõ iskafakĩ yõkayamakãfe: “¿Fanĩa na nami mĩ feamẽ? Nã mĩ niosnãraka,” ixõ yõkayamakãfe. Yõkaxoma mã pitiro shinãchakaxikima. <sup>28-29</sup> Askatari fẽtsa mato yoiki iskafatiro: “Ë mato nami pimai nõ ãfe niosnã,” ixõ mato yoiaito nõ nami piyamakãfe. Akka mã piaito õiki ãfe shinã mẽraxõ shinãtiro iskafakĩ: “Ajaa, na feronãfãke Jesús Ifofaflaxõ nõ ãfe niosnã mã nami pii. Na feronãfãkekai Jesús Ifofasharama,” ixõ ãfe shinã mẽraxõ shinãtiro. Nãskakẽ mãri mã nami pixõ mãto shinã mẽraxõ mã shinãchakatiro: “Mã nõ chakafara,” ixõ. Akka mã mã tãpia keyokõi nõ nami pitiro. Nãskakẽ fetsafãfe tãpiamano ato ferotaifi nõ nami piyamakãfe shinãchakayamanõfo. <sup>30</sup> Mã yoiraka iskafakĩ: “Ë keyokõi nami pikĩ ã Nios, ‘Aichora,’ fafafafãini. ¿Akka afeskakĩ fẽtsa eõnoa shinãchakatiromẽ?” ixõ mã shinãiraka.

<sup>31</sup> Ë mato yoinõ afara mã akai shara shinãkĩ akãfe. Niospa mato shara õinõ akãfe. Niosnoa shinãsharanõfo akãfe. <sup>32</sup> Nã mã akai keskafakĩ fetsafo shinãchakamayamakãfe. Nõko kaifo judeofo iyamai mani fetsafo Nios Ifofaafoya ato shinãchakamayamakãfe matoõxõ nõko Ifoõnoa shinãchakanõfoma. <sup>33</sup> Nãskari fakĩ ãri keyokõi yorafo ã ato shara faxopai inimanõfo. Akka nõ ã apaiyai keskara fisti ã akima. Fetsafãfe afara apaiyaifo keskafakĩ ã ato axopai Jesucristo Ifofakaxõ ato chaka xatekanax afe ãpaxanõfo.

## 11

<sup>1</sup> Akka na Cristo akai keskara ãri aki. Akka mãri nõ ã akai keskara akãfe.

*Ichanãxõ nõ Nios shinãino feronãfake fe kẽro afeskax itirofomãki Pablo ato yoini*

<sup>2</sup> Mā ea shināmiskē ē mato aicho fai matoki inimakī. Nā ē mato yoimis keskara mā nō feyafamiski. Nā mā nikafafāini. <sup>3</sup> Efe yora mīshtichi, ē afara ē mato yoipai mā tāpinō. Cristofi keyokōichi nōko Ifokī. Nāskarari kērofāfe āto ifo āto fenefo. Akka Cristo āfe Ifokī Epa Nios. <sup>4</sup> Nāskakaxō feronāfake Nios yoiti pexe anoxō yoivanā kīfikani marakometirofoma Cristo shinākani. Nō marakomexō nōko Ifo nō noima. Nāskakē nōko Ifo nō rāfimatiro. <sup>5</sup> Askatari kērofāfe Nios kīfipaiyanā Niospa meka yoipaikani marakometirofo fetsafāfe tāpinōfo āto fenefo āto ifokē. Nāskara mā nō feyafamis. Āto marakometimaisax maxko ika keskara itirofo. Nāskaxō āto fenefo rāfimatirofo. <sup>6</sup> Akka kērofāfe Nios kīfipaikani marakomekas-pakani feronāfakefo keskara maxko itiro. Nāskakanax kērofo maxko ikanax rāfipaitirofo. Nāskakē ato iskafatirofo: “Nā kērofo chakafora,” ikaxō yoitirofo. Nāskakē kērofāfe Nios kīfipaiyanā āfe mekari yoipaikani marakometirofo. <sup>7</sup> Akka feronāfakefāfe Nios kīfipaikani askayamai āfe meka yoipai marakometirofoma Nios keskara sharamāi ikanax. Askatari Nios nikakōikanax āfe ōiti keskara shara ikafo. Nāskafakīri kērofāfe āto fene nikakōikanax shara itirofo. Nāskakē āto fenefo atoki inimatirofo. <sup>8-9</sup> Niospa feronāfake onifakī taefani. Chipō xotofake onifani. Feronāfakeōnoa Niospa xotofake onifani. Kēronoakai Niospa feronāfake onifanima. Akka feronāfakeōnoa xotofake Niospa onifani fene afara axosharanō. <sup>10</sup> Nāskakē feronāfāke kēro ikitiro. Kērofāferi āto fene nikakōitirofo. Nāskax Nios Ifofaafo ichanāifono kērofāfe āto marakometi maitirofo āto fenefo nikakōikaxō fetsafāfe ato ōinōfo āto fenefo nikakōiaifono. Askaifono Niospa āfe ājirifāfe ato ōikakī yoitirofo iskafakakī: “Niospa yoini keskara na kērofāfe āto fenefo nikakōisharakani,” ixō yoitirofo. <sup>11</sup> Nāskax nōko Ifo fe nō rafeax feronāfakefo fe xotofakefo nō axō faatanāsharatirofo. Akka xotofakefo iskatirofoma: “Nō feronāfakefo nō yopaima,” itirofoma. Askatari feronāfakefo iskatirofoma: “Nō xotofakefo nō yopaima,” itirofoma. <sup>12</sup> Niospa taefakī feronāfake onifani, āfe ane Adán. Nāskaxō xotofakeri onifani, āfe ane Eva. Adán āfe pishi tsēkaxō Niospa onifani. Nāskatari xotofake fake feronāfake kāipakemis. Akka xotofakefoya feronāfakefo Niospa onifani.

<sup>13</sup> Efe yora mīshtichi, shinākāpo. Xotofakefāfe mato fe ichanākaxō Nios kīfipaikakī marakomexoma Nios kīfikī, ¿askara sharamamē? Mā ea yoitiro. <sup>14</sup> Mā mā tāpia feronāfake foo chainipaya nō shara ōitiroma. Akka nōkai askara feyafamisma. Nāskakē feronāfāke foo chainipa fatiroma. Foo chainipayax rāfitiro. <sup>15</sup> Akka xotofakefāfe āto foo chai faafo nā marakometi shara ōitsa itirofo. <sup>16</sup> Akka na ē mato yoiai keskara ea nikakaspai fetsa efe feratenāito ē afaa yoipaima. Akka nā fisti ē mato yoimis. Xotofakefo marakometiro ē

mato yoimis. Nã ã mato yoimis keskarari Nios Ifofaa fetsafãfe nãnorikõiri yoimisfo nã ichanãifotã.

*Nios yoiti pexe anoax ichanãkaxõ Corinto anoafãfe afarafo chakafafono Pablo ato yoini anã askanõfoma*

<sup>17</sup> Akka afara fetsari ã mato yoipai. Mẽ nika Nios yoiti pexe anoax ichanãxõ mã afara chakafaito. Nãskaxõ afara shara fatama mã afara chakafakõini. Nãskakẽ, sharafora ã mato faima. <sup>18</sup> Akka mẽ nika mato anoax fẽkaxõ ea yoiaifono nã mã ichanãitã fetsafo fe mã osinãxma ato fe ichanãkaspaito. Nãskax mã ato ketaxamei tsaopaitiroma. Mã ichanãxõ nã nõko Ifo Jesús mato nãxoni shinãpaifi mã ranã mã noikaspa faatanã. Nã ã matoõnoa nikai keskara ã chanãmara fai rakikã. <sup>19</sup> A mã shinãi fisti anori mã shinãima. Nãskarafo yorafo a shinãi fisti anori shinãkanima. Nãskakẽ mã ranã feratenãkakãima yoinãnãsharakãfe tãpisharaxikakã. Fetsafãfe anori mã shinãino, nãskakẽ fetsafãferi anorima shinãi. Nãskakẽ yoinãsharakãfe fato sharamãkã. <sup>20</sup> Ë anã mato yoisharapai. Mã Nios yoiti pexe anoax ichanãxokai mã pãa piyanã ayayanã a noko Jesús nãxoni mã shinãima. Askatamaroko mã piyai yafi a mã ayai fisti mã shinãmis. <sup>21</sup> Mẽ nika a mã piyai mã feaito mares pixikã ichanãxõ ato manayoxoma. A fonãikaifokai mã ato inãima. Nãskakẽ fonãikani. Askatari mã pãemis. Askarakai sharama. <sup>22</sup> Akka pipaikã ichanãti pexe ano kayoxoma ãkisi mãto pexe anoxõ piyokãfe. Akka mãto pexe anoxõ piyoxomaroko nã Nios yoiti pexe ano mã femis anoxõ mares pixikã a fonãikaifo ato akãxikima. Nãskakẽ a fonãikaifo rãfitirofo. Mã askafakã a mato fe ichanãfo mã chakafai. Mã ato noima. ¿Ë matoõnoa yoisharaimẽ? Maa. Ëkai matoõnoa yoisharaima mãmãi ato chakafaito.

*Jesús noko nãxoni shinãyanã nõ piyanã nõ ayatiro*  
(Mt. 26.26-29; Mr. 14.22-25; Lc. 22.14-20)

<sup>23-24</sup> Nãskakẽ nõko Ifo Jesús ea yoini keskara ã anã mato yoini. Ea tãpimani keskara ãri mato tãpimapai. Nõko Ifo Jesús Judaspa ato achimayoamano nã fakish fisti aõxõ tãpimisfo fe ichanãyoni. Nãskaxõ ato feta pikã pãa tsomaxõ Apa Nios yoini iskafakã: “Epa Niospa, mã sharafnakõia. Mifi keyokõi tãpiaki. Aicho,” fata pãa torepakexõ ato tii inãni. Nãskaxõ ato anã yoini iskafakã: “Na pãafi ãfe yoraki. Ëfi matoõnoax chipo naikai mato noikõiax. Mẽ naano nã mã ichanãitã nã mã pãa piaitã ea shinãfafãikãfe,” ixõ ato yoini. <sup>25</sup> Nãskaxõ mã piaifono anã kecho tsomaxõ ato yoini iskafakã ato ayamayanã: “Afara fena shara ã mato yoinõ. Nã mã ayai ãfe imi. Nãskakẽ mã ea shinãtiro. Ëfe imi foyanã ã matoõnoax nai mã efe Epa Nios ari ãpaxanõ. Nã nõ akai keskara chipo akãfe mẽ naano nã mã ichanãitã ea shinãkã,” ixõ ato Jesús yoini. <sup>26</sup> Nãskakẽ nã



mã ichanãitĩa pãa piyanã ayayanã Jesús shinãfafaikãfe: “Nõko Ifãfe noko nãxoni,” shinãyanã. “Nã pãa Jesús ãfe yora,” ixõ shinãfafaikãfe pãa piyanã. Jesús anã oaitĩa nã chanĩmara faifo askapakexanõfo. Ë anã oaitĩa nãskarar akãfe.

*Ichanaifo anoxõ pãa pikĩ nõ Jesús shinãtiro*

<sup>27</sup> Nãskakẽ nã mã ichanãi anoxõ mã pãa piyanã ayayanã mã Jesús shinãtiro. Askafafiakĩkai mãto chaka xatekaspaxõ mãri mã chakafai pãa pixõ. Akka nõko Ifãfe noko nãxoni ãfe yora omiskõiyana ãfe imi foyana noko nãxoni. Nãskakẽ nõ ichanãi anoxõ pãa piyanã ayayanã nõko Ifoõnoa shinãkima nõ nõko Ifo nõ chakafai. <sup>28-32</sup> Nãskakẽ nõ ichanãyanã nõ pãa piyanã nõ ayatiro nõko Ifo shinãyanã. Akka taefakĩ nõ shinãtiro iskafakĩ: “Ë afara chakafamis,” ixõ nõ shinãtiro. Akka nõ afara chakafafiaxõ Epa Nios nõ yõkayotiro nõko chaka noko soaxonõ. Nãskaxõ Jesús noko nãxoni nõ shinãkõitiro pãa piyanã. Akka nõ askafayamaito Epa Niospa noko omiskõimani. Akka nã ã mato yoiai keskara atiri mã askaima. Nãskakẽ mã iramanai. Ranãri mã isinĩ iki. Nãskatari ranãri mã mã nai. Nãskakẽ nã mã ichanãitĩa pãa piyoxoma afara chakafaxõ ikisi Epa Nios yoiyokãfe mato chaka soaxonõ matori omiskõimayamanõ. Akka noko omiskõimafiakĩ a Jesús Ifofaafoma Niospa ato omiskõimanai keskafakĩ noko omiskõimasharaima. Akka afokai ãfe fakefoma. Nãskaxõ omiskõipakenakafo mẽra ato potaxii. Akka nõfi ãfe fakekõifokĩ. Nõko Ifãfe noko omiskõimafiakĩ a omiskõipakenakafo mẽra noko potatamaroko noko omiskõimakĩ noko tãpimani nõ anã chakafanõma.

<sup>33</sup> Akka mã ichanãxõ pãa pixikĩ ranãrito mã taefakĩ piimis. Nãskakẽ fetsafãfe akairi pipaikani afaa pitirofoma. Akka piyoxoma ato manayokãfe fetsafo feta pixikakĩ. Nãskakẽ mã ato manayotiro keyokõichi pitirofo. <sup>34</sup> Akka fatora fetsa mã fonãiki ichanãyoxoma mãto pexe anoxõ mã piyotiro. Nãskaxõ mã ichanãxõ mã ichapa piyamaino fetsafãferi pitirofo. Nãskaxõ mã ichanãxõ Jesús shinãkĩ ato feta mã pisharaino Niospa mato omiskõimanimã. Afara ichapakõi ã mato yoipai. Nãskaxõ ã matoki nokoxõ atoõnoa ã mato yoisharapai.

## 12

*Jesús Ifofaafãfe Niospa Yõshi Sharaõxõ afarafo atirofo fet-safo fe axõ faatanãsharaxikaki*

<sup>1</sup> Efe yora mĩshtichi, afara fetsa anã ã mato yoisharapai. Niospa Yõshi Sharaõxõ afarafo nõ atiroõnoa ã mato tãpimapai aõnoa mã tãpisharakõinõ. <sup>2</sup> Shinãkapo. Mã Jesús Ifofaamano afara fetsa onifakaxõ, “Na nõko niosra,” ikaxõ

mato chanĩmara famapaonifo. Mã chanĩmara fafiaino a onifafotokai afaa shinãtirofoma. Askaxorikai afaa pishta mato yoitiro. Nãskakẽ mã anorima shinãyopaoni. <sup>3</sup> Askata yora fetsafãfe matoki nokoxõ yoitirofo iskafakakĩ: “Ë mato Niospa meka yoinõ. Niospa Yõshi Sharaõxõ ã mato yoi,” ixõ matõ yoiaito, ¿afeskaxõ mã tãpitiromẽ Niospa Yõshi Sharaõxõ mato yoiimãkĩ? Ë mato tãpimanõ afeskaxõ mã tãpitiromãkĩ. Fatora yora fẽtsa Jesús mekafakĩ chakafai, akai Niospa Yõshi Sharaõnoax mekaima. Akka, “Jesúsfi nõko Ifokĩ,” ixõ yoi Niospa ãfe Yõshi Sharaõxõ yoitiro.

<sup>4</sup> Nã nõ Epa Nios Ifofa tii ãfe Yõshi Sharapa noko amapayai keskara noko amai. Ares fisti noko shinãmatiro aõxõ nõ Nios Ifofaafõ fetsafo nõ ato asharaxonõ. <sup>5</sup> Aõxõ fetsa fetsafakĩ afo akĩ nõko Ifo nõ axotiro. Nã keyokõi Nios chanĩmara faifo tii nõko Ifo fisti. <sup>6</sup> Nãskakẽ Niospa nõ nõ Ifofa tii noko shinãmani aõxõ nõ fetsafo afara axosharanõ. Askatari Niospa keyokõi noko tãpimani a noko axopayai keskara noko axõi. Nã nõko Nios fisti anã ano fetsama. <sup>7</sup> Askatari nõ Nios Ifofaito noko tãpimani ãfe Yõshi Shara nofe iki. Nofe ixõ noko amatiro nõ Nios Ifofaifo nõ ato axosharanõ. <sup>8</sup> Fetsafãfe Niospa Yõshi Sharaõxõ mẽstesharakõi noko yoitiro. Askatari fetsafãfe Niospa Yõshi Sharaõxõ tãpisharakõikĩ noko tãpimasharatiro. <sup>9</sup> Askatari fetsafori Niospa Yõshi Shara fistiõxõ Nios chanĩmara fakanax finakõia ikafo. Askatari fetsafãferi Niospa Yõshi Sharaõxõ yorafo sharafakani. <sup>10</sup> Askatari fetsafãferi Niospa Yõshi Shara fistiõxõ tsõa atiroma keskara faino, fetsafãferi Niospa Yõshi Sharaõxõ nõ Niospa yoiã keskara noko yoiãifono, fetsafãferi Niospa Yõshi Sharaõxõ tãpitiro fẽtsa niafaka chakaõxõ yoiimãkai askayamai Niospa Yõshi Sharaõxõ yoiimãkai. Askatari fetsafãferi Niospa Yõshi Sharaõxõ meka fetsa nikayomisma yoitiro. Askatari fetsafãfe meka fetsafãfe noko yoiãito nikafikĩ nõ tãpiyamaito fetsafãferi Niospa Yõshi Sharaõxõ noko yoisharatiro tãpinõfo. <sup>11</sup> Nã nõ Nios Ifofatifi Niospa Yõshi Shara fistichi noko amapayai keskara nõ atiro. Nã noko amapayai keskara noko amatiro.

### *Nõfi yora fisti keskaraki*

<sup>12</sup> Nõko yora fistifiano nõ põyayai fetsea. Askata nõ feroyata, pachoyata nõ nõ fisti askai fetsea. Nãskarifiã nõ keyokõichi Cristo Ifofaano nõ fisti keskarakõi. <sup>13</sup> Cristo fistifiano nõfi ãfe põya keskarakĩ. Atiri nõ judeofo ikaino manĩ fetsafori judeofoma ikaino yorafãfe ãto yonomatifo ikaino askatari yorafãfe ãto yonomatifoma ikaino nõ askai fetsea. Nã nõ Cristo chanĩmara faafo tii nõ afe yora ika. Niospa Yõshi Sharapa noko õiti fetsafaax nõ mẽra iki.

14 Nōko yora fistifiano nō pōyayai fetsea. 15 Nāskakē nōko tākai yoikī iskafatiroma: “Ēkai mēkema. Nāskakē ēkai āfe afaama,” ixō yoifi nā nōko tāeri nōko yoraō nea. 16 Nāskatari nōko pachori yoikī iskafatiroma: “Ēkai feroma. Nāskakē ēkai āfe afaama,” ixō yoifi nā nōko pachori nōko yoraō nea. 17 Akka nōko yora nōko fero fistikē afeskaxō nō nikakeranama. Nāskatari nōko yora nōko pachō fistikē afeskaxori nō xetekeranama. 18 Akka Niospakai askara noko onifanima. Nā apaiyai keskara fakī noko onifani. Mapoya fāta feroya fāta pōyaya fāta pachoya fata kishiya fāta noko fani. 19 Akka nōko yora afara fistiya ikanokai shara ikeranama. 20 Akka nōko yora fistifiano nō pōyayai fetsea.

21 Nāskakē nōko fērokai mēke yoikī iskafatiroma: “Ē mia yopaima,” ixō yoitiro. Māporikai tae yoikī iskafatiroma: “Ēkai mia yopaima,” ixokai yoitiro. Nāskafakīri a Nios Ifofaa fetsafo iskafakī yoiyamakāfe: “Ē mia yopaima,” ixō yoiyamakāfe. Niospa nā Ifofaafō tii noko noikōia. Nāskakēri nōa ranā noinākāfe. 22 Nōko yora āfe afara fetsafo mitsisipayamafekē nāfori nō yopakōi. 23 Nōko yora āfe afara fetsafo, sharamara, nō fafiakī nāfori nō kexesharai. Nōko afara fetsafori nō onesharatiroma nō rāfixikīma. 24 Akka nōko yora āfe afara fetsa sharano nō onetiro. Niospa noko yora onifaxoni nō kexesharanō. Nāskaxō nō yoitiro iskafakī: “Ēfe afara ē yopakōi,” ixō nō yoitiro. Nāskafakīri fētsa a Nios Ifofaa fetsa yoikī iskafatiroma: “Nakai afama,” ixō yoifiaino Nios aō noikōi. Nāskakē noko onifani nā Ifofaafō tii keyokōi nō yopakōi. 25 Niospa noko onifani nā Ifofaafō tii keyokōi nō kexenōnāsharatiroma isharaxikī nānori fisti shināxikī. 26 Akka nō fanīra moxaki chachixō nō pae meetiro keyokōi nōko yora pāei fetsetiro. Nāskarīfakī Jesús Ifofaa fetsa omiskōiaito keyokōi nōri shināmitsatiroma. Nāskafakī yorafāfe Jesús Ifofaa fetsa sharafakē keyokōi nō afe inimakōitiro.

27 Akka nō Cristo yora keskarakōi. Nāskax nō āfe pōya keskarafō. Nō ichapafīax nō yora fisti keskarakōi. 28 Nāskaxō keyokōi nā nō Jesús Ifofaa tii Epa Niospa noko katoni aōxō afara fetsa nō anō. Akka fetsafori taefakī ato katoni Jesucristoōnoa ato yoifofāsafanōfo. Askatari fetsafori katoni āfe meka yoimis inōfo Niospa ato shināmanaino. Askatari ato katoni ato tāpimamisfo inōfo. Askatari aōxō tsōa atiroma keskara amisfo ato katoni. Askatari Niospa Yōshi Sharaōxō a isinī ikaifo ato sharafamisfo ato katoni. Askatari fetsafo ato axomisfo ato katoni. Askatari fetsafo shara yonomamisfo ato katoni. Askatari fetsafāfe āfe Yōshi Sharaōxō meka fetsapa yoiyomisma ato katoni ato yoinō āfe mekapa. Noko keyokōi katoni aōxō yorafo nō axosharanō. 29 Niospa keyokōi noko

katoni a apaiyai keskara nō anō. Akka noko askafafianino keyokōichi Jesucristoōnoa nō ato yoifofāsafamisma. Askaxori keyokōi noko katonima āfe meka yoimisfo nō inō. Askaxori keyokōi noko katonima aōxō ato tāpimamisfo nō inō. Askaxori keyokōi noko katonima tsōa atiroma keskara aōxō afama mīshti nō fanō. <sup>30</sup> Keyokōi noko katonima Jesúsxō isinī ikaifo ato sharafamisfo nō inō. Keyokōi noko katonima nā meka fetsapato āfe Yōshi Sharaōxō nō ato yoinō. Keyokōi noko katonima nā meka fetsa nikaxō nā yoia keskara nō ato tāpimanō. <sup>31</sup> Nāskakē Niospa mato imapaiyai keskara ixō nā Jesús Ifoafafo mā ato shara faxotaifai. Niospa Yōshi Sharapa mato amapaiyai keskara nāfo fichipaikāfe. Akka nāfo sharafiano ē mato afara fetsa sharafinakōia iskaratīa ē mato yoinō. Ea nikasharakapo. Shara finakōia Niospa noko imapaiyai keskara ē mato tāpimanō, a noko Niospa noiai keskari fakī nōri fetsafo noisharakōinō.

## 13

### *Nō fetsafo nōisharakōitiro*

<sup>1</sup> Ēfe mekapa ē yoifitiroxakī, yora fetsafāfe mekapari ē yoifitiroxakī, Niospa āfe ājirifāfe mekapari ē yoifitiroxakī ē Niosxō yorafo noiyamax ēkai afaa itiroma. Nāskax ē mekai achakōi itiro, fetsafo fekaxtefai keskara ē itiro. Nāskafakī ēa ē fetsafo axomis keskara ē itiroma. <sup>2</sup> Niospa meka ē ato yoifikī ē ato noiyamax ēkai afaa itiroma. Askatari fetsafāfe Niospa meka tāpiyamaino akka ē tāpikōifixō ē ato noiyamax ēkai afaa itiroma. Askatari ē Nios chanīmara fakī finakōixō ē Niosxō ē nā machi xekafitiroxaki ē yorafo noiyamax ēkai afaa itiroma. Ē ato noiyamaino Niospa ea shara ōima. <sup>3</sup> Nāskatari ē afama mīshti nā afaamaisfo keyokōi ē ato ināfixō ē ato noiyamax ēkai afaa itiroma. Askatari Niospa meka shara ē ato yoiaito ea nikakaspapakī ea koaifono ē atoōnoax nafiakī ē ato noiyamax ēkai afaa itiroma. Ē ato noiyamaino Niospa ea shara ōima.

<sup>4</sup> Nō yorafo noikōiaino noko fekaxtefaifono nō atoki ōitifishkitiroma, nō tenetiro. Nāskaxori nō ato noikōikī nō ato axosharatiro. Askaxori nō ato noikī nō xītipaitiroma. Askatari kakapaimis nō itiroma. Nō yorafo noikōikī nō iskatiroma: “Ē tāpikōiaki. Ē fetsafo keskarama,” ixō nō yoitiroma. <sup>5</sup> Nāskaxori nō ato noikōikī nō ato rāfinīfaima. Askaxori nōa apaiyai keskara fistis nō shinātiroma. Akka nō fetsafori nō ato axosharatiro. Askaxori nō ato fena feratemisma nō itiro. Nāskaxori noko fētsa chakafakī mekafino nō shinātaifatiroma. Afo shinātamaroko nō aō noisharatiro. <sup>6</sup> Askaxori nō ato noixō fetsafāfe afara chakafaito ōi nō inimatiroma. Akka afara chanīmakōi shara nikai nō inimakōitiro. <sup>7</sup> Askaxori afara afe keskararafiaino nō Nios noikī nō shināchakatiroma. Nō

tenetiro. Askatari ato noikõikĩ atoõnoa afara chaka yoiiaifono nikakĩ nõ chanĩmara fatiroma. Akka fetsafoõnoa chaka nikafixõ nõ tãpixoma, “Afaa chakafayamapainõfora,” ixõ nõ shinãtiro ato noikĩ. Askatari a mēxotaima chakafaifoõnoa atoõnoa nõ yoitiroma iskafakĩ: “Nãfãfe mēxotaima afara chakafaifono Niospa ato chaka soaxotiroma,” ixõ nõ yoitiroma. Askatamaroko nõ iskafatiro: “Nios Ifofakakĩ ãto chaka xatetirofo,” ixõ nõ shinãtiro ato noikĩ. Nãskaxori afara afe keskararafiaino nõ Nios noikĩ nõ kachikiri fatiroma.

<sup>8</sup> Nã Jesús Ifofaafãfe Epa Nios yafi yorafo ato noipakenakafo. Askafiaino nõko mai keyoaino Niospa meka yoimisfãfe anã ato yoixikanima. Askaxori a yõra mekapama meka fetsapa yoimisfãfe anã meka fetsapa yoixikanima. Askaxori nã tãpimamisfãferi anã noko tãpimaxikanima. Mã nõko Ifo nokoaino nõ anã ato yopaxiima noko axonõfo. <sup>9</sup> Nãskakẽ iskaratĩa Niospa noko tãpimanai keskara nõ tãpisharayoama. A Niospa meka noko yoimisfãfe keyokõi tãpisharafoma. <sup>10</sup> Mã Jesucristo nokoaino nõ a keskara shara ixii. Aatofi keyokõi tãpiakĩ. A tãpia keskara nokori tãpimaxii.

<sup>11</sup> Akka ẽ yomeax ẽfe meka fãke meka keskara ẽ iyopaoni. Fakefãfe metiro keskarari ẽ meyopaoni. Fakefãfe shinãtiro keskarari ẽ shinãyopaoni. Iskaratĩa mē yosixõ fakefãfe shinãi keskara ẽ anã shinãima. Fakefãfe ichapa tãpiama. Akka ẽ iskaratĩa mē yosiax fakefo keskara anã ẽ ikima. Iskaratĩa ẽ feronãfakekõi ẽ anã fakefo keskarama. <sup>12</sup> Feisiti fetakõikẽ nõko femãnã nõ õisharatiroma. Nãskarari Jesús nõ õitiroma afe keskara ikamãkĩ. Akka nã oaitĩa nõ õixii afe keskaramãkĩ. Akka iskaratĩa nõ tãpisharayoama. Akka Jesús oaino nõ tãpisharakõixii. Jesús noko tãpikõia keskarari nõri tãpikõixii. <sup>13</sup> Iskaratĩa nõ Nios chanĩmara fai. Nõ Nios chanĩmara faxõ nõ manai nã oaitĩa afe ipaxakĩ. Nõ Nios chanĩmara fai nã shara. Askatari afe ipaxakĩ nõ manaino nãri shara. Askatari nõ fetsafo noikõia nãfi sharafinakõiaki.

## 14

*Niospa Yõshi Sharapa noko amapaiyai keskara anã Pablo yoini*

<sup>1</sup> Nã Niospa noko noiai keskafakĩ fetsafori noitaifakãfe. Nãskara sharakõi. Nãskara fichipaikãfe askaxikakĩ. Askatari Niospa Yõshi Sharapa afara fetsa mato amapaiyai keskara nõ fetsafo fe axoshara faatanãno, afori fichipaikãfe. Niospa Yõshi Sharaõxõ nã Niospa meka mã ato yoinõ fichipaikõikãfe. <sup>2</sup> Askatari fẽtsa Niospa Yõshi Sharaõxõ meka fetsapato yoikĩ yorafo yoitama Niosroko yoitiro. Niospa Yõshi Sharaõxõ yoifiaitokai tsõa tãpitiroma. <sup>3</sup> Askatari fẽtsari Niospa meka shara noko yoikĩ noko tãpimasharatiro nõ Jesús Ifofasharanõ.

Askata nõko õiti noko fepeaxosharatiro nõko õiti mēra nõ inimanõ afara afeskarafiaino. <sup>4</sup> Askatari fētsa Niospa Yōshi Sharaõxõ meka fetsapato yoikī ãa metiro ãfe õiti fepeaka keskara. Askatari fētsa nõko mekapa Niospa meka shara noko yoisharaito nõ keyokõichi nikatiro. Nāskakē Niospa noko yoiai keskara nikasharax nõko õiti fepeaka keskara shara nõ itiro.

<sup>5</sup> Mā keyokõichi nã meka fetsapato Niospa Yōshi Sharaõxõ mã yoipainõ. Nāskara sharafiano akka fētsa mãto mekapa mato tãpimasharai nãfi sharafinakõiyaki. Akka fētsari meka fetsapato mato yoiaito mã nikatiroma tsõa mato yoiyamaino. Akka nã mato yoiai keskara fētsari mato tãpimatiro mã tãpinõ. Nikai mãto õiti fepeaka keskara shara itiro. <sup>6</sup> Efe yora mīshtichi, meka fetsapato ē mato yoiaito mã nikayamax nã mekakai mãtonã afama. Nāskakē nã ē mato yoiai keskara Niosxõ mãto mekakõichi ē mato tãpimatiro Niospa mato yoipaiyai keskara mã tãpinõ.

<sup>7</sup> Shinākãpo, meka fetsa ē mato yoinõ. Xãiti anorima maneaito nõ nikasharatiroma fatomākī xafakīa maneaifo. <sup>8</sup> Askatari soraro fētsa nã kexemisto ãfe põõiti põõatiro ãfe sorarofo itipinīsharanõfo ato reteifoxikakī. Askafafiakī põõasharamano tsõa tãpitiroma. Nāskakē tsoa itipinīsharatiroma ato reteifoxikakī. <sup>9</sup> Askatari meka fetsapa mã fetsafo yoiaino afeska faxõkai mã yoiai keskara tsõa tãpitirofoma. Mã askara mekapa mekai mãakõi mã mekai tsõa mato nikayamafiaino. <sup>10</sup> Akka nã maitio ikafo meka fetsapa mekakani. Akka nõ ato nikatiroma. ãto kaifãfe meka fisti nikatirofo. Nāskax keyokõi meka shara. <sup>11</sup> Akka ēfe mekapa ē ato yoiaito yora fetsafãfe tãpitirofoma. Ēkairoko ãto kaifãfe mekapa yoiaito ea nikafo. Akka ē ãto meka tãpiamax ē ãto kaifo keskara itiroma. <sup>12</sup> Nāskakē Niospa Yōshi Sharapa mato afara fetsa amapaiyai keskara nãfo mã fichipaikõitiro. Mato askafaino aõxõ nã Jesús Ifofaafo mã ato õiti fepeaxosharakõitiro Jesús Ifofasharanõfo. Nāskara fichipaikãfe Nios yonosharaxoxikakī.

<sup>13</sup> Nāskakē Niospa Yōshi Sharaõxõ meka fetsapato yoikī Epa Nios kīfikãfe nã mã yoiai keskara mato tãpimanõ. Mã tãpisharaxõ atori mã ato tãpimatiro akairi nikakõisharanõfo. <sup>14</sup> Nāskakē Niospa Yōshi Sharaõxõ meka fetsapato nõ Nios kīfikī nõko shinãmã shinãxõ nõ kīfima. <sup>15</sup> Akka Niospa Yōshi Sharaõxõ meka fetsapato ē Nios kīfitiro. Askatari yorafãfe mekakõichiri ē Nios kīfitiro keyokõichi nikanõfo. Askatari meka fetsapa fanãitiro. Askatari yorafãfe mekapari ē fanãitiro keyokõichi nikanõfo. <sup>16</sup> Mã Niospa Yōshi Sharaõxõ meka fetsapa Epa Niosnoa mã yoifiaito afeskaxokai a mato fe ichanãfãfe yoitirofoma iskafakakī: “Chanĩmakõi mã yoi,” mato fatirofoma tsõakairoko mãto meka tãpixõ. <sup>17</sup> Mã meka

fetsapato Nios aicho fafiakī fetsafo mā ato ōiti fepeax-osharatiroma mato nikafiaifono māmāi meka fetsapato yoikī. <sup>18</sup> Efe yora mīshtichi, Niospa Yōshi Sharaōxō yōra mekapama meka fetsapa mato finōinīfōfāta ē yoimiskī. Nāskakē ē Epa Nios aicho fai. <sup>19</sup> Askafia a Jesús Ifofaafoya fetsafori ē āto yoipai ea nikanōfo. Ichanāti pexe anoxō ato ichanāfaxō āto mekakōichi ē ato yoipai meka ichapama ē yoifiaito. Nāskarafi sharakī. Akka yōra mekapama meka fetsapa ē ato yoiaito ea nikatirofoma meka ichapa ē ato yoifiaito. Nāskakē mekakōichi ē ato yoipai ea nikanōfo.

<sup>20</sup> Efe yora mīshtichi, ē mato tāpimapaiyai keskara tāpisharakāfe. Fake yomē tāpisharayoxoma, shināsharatiroma. Nāskarifikī fake yomē shināi keskara shināyamakāfe. Mēstekōi shinākāfe. Akka yora xinifāfe chaka shinātirofo. Akka fake yomefāfekai chaka shinātiroma. Nāskakē fake yome keskara ikāfe. Afara chaka tāpipaiyamakāfe. <sup>21</sup> Isaías Niospa meka yoikī keneni iskafakī:

Nā israelifo ē ato yoifiaito ea nikakaspamisfo. Nāskakē ē ato kaxpakōi yoimis. Nāskaifāfe ōikī āto kaifoma ē atoki nīchikē, āto mekapa ato yoiaifāfe ato nikakanima meka fētsapamāi yoiafona. Ato yoifiaifonokai ato nikakanima, ixō Isaías kirika keneni Niospa meka yoikī. <sup>22</sup> Nāskakē yōra mekapama nō meka fetsapa ato yoiaito a Nios Ifofaafāfema noko nikatirofoma. Nāskakē Niospa ato ōimani afāfekai Niospa meka tāpitirofoma Nios chanīmara fayamakaxō. Akka Nios Ifofaafāfe Niospa meka tāpitirofo. Askata ichanāxō āto mekakōichi nō ato Niospa meka yoiaino Niospa Yōshi Sharaōxō nikasharatirofo. Akka nā chanīmara faafāfema nikasharakanima āto mekakōichi nō ato yoifiaino. <sup>23</sup> Nāskakē ichanāx yōra mekapama meka fetsapa mā mekaino a Nios chanīmara faafoma fe a mato fe yoramafori mato fe ichanāxō mato nikakakī shinātirofo iskafakakī: “Ōikapo, nā yorafo nā afaa shināifoma keskarafō,” ikanax yoinātirofo. <sup>24-25</sup> Nāskata mā ichanāxō Niospa meka mā yoisharaito a Nios chanīmara faafoma fe a nofe yoramafori mato nikakaxō āto ōiti mēraxō shinātirofo iskakakī: “Ooa, nōri Niospa yoiai keskara nō amisma. Niospa keyokōi tāpikōia. Nōko shinā mēraxō nō afara pishta fomāpaimisfo Niospa tāpikōia. Chipō noko kāimaxoxii,” ixō shinātirofo. Nāskaxō shinātirofo Niospa meka mēstesharakōikī. Anori shinākakī ratokonō mai chachixō Epa Nios kīfitirofo iskafakakī: “Epa Niospa, mī sharafinakōia. Na mia chanīmara faafō fe mī ika keskai nōri mefe ipai,” ixō kīfitirofo.

*Pablo ato yoini nō ichanāx nō afeskatiromāki*

<sup>26</sup> Efe yora mĩshtichi, ě mato yoipai iskafakĩ ě mato tãpimapai. Mã ichanãino fĕtsa mato fanãixotiro. Fĕtsari mato Niospa meka yoitiro. Fĕtsari Niospa Yõshi Sharaõxõ meka fetsapa mato yoitiro. Fĕtsari Niospa Yõshi Sharaõxõ a meka fet-sapato mato yoiaifo mato tãpimatirofo. Nãskakĕ nã ě yoiai keskara asharakãfe. Nãskax mã ranã mã õiti fepeasharatiro. <sup>27</sup> Mã ichanãino yora ichapama a yõra mekapama meka fetsapa mekapai mekatirofo. Nãskakĕ fetsa mekai taetiro. Askatari fetsari chipo mekatiro. Akka meka fetsapato mato yoiaito fĕtsari mato mekapa xafakĩa mato tãpimatiro a mato yoiai keskara mã nikasharanõ. <sup>28</sup> Akka yõra mekapama meka fetsapato mã yoipaiyaito tsõa nikatiroma. Akka a ato tãpimatirofo ano ikafomano meka fetsapa mã ato yoitiroma. Akka mato pexe anoax mares fisti mã mekatiro yõra mekapama Epa Nios fe.

<sup>29</sup> Mã ichanãino nã Niospa meka yoimis rafeta Niospa meka mato yoitirofo. A yoiai keskara nikakaxõ nã Jesús Ifofaifãfe shinãtiro iskafakakĩ: “Niospa Yõshi Sharaõxõ noko yoi,” askayamai, “Ãa shinãxõ noko yoirã,” ixõ shinãtirofo. <sup>30</sup> Askaxõ fĕtsa Niospa meka mato yoiyoaino fetsari tsoano Niospa Yõshi Sharapa shinãmanaino mato yoipaikĩ yoitiro. Akka a taefakĩ yoiato tsoaxõ nikatiro. <sup>31</sup> Nãskakĕ Niospa Yõshi Sharapa mato shinãmanai keskara fĕtsa yoikĩ taefatiro fĕtsari chipo yoitiro. Askatari fĕtsari yoitiro. Nãskaifono nã ichanãfãfe keyokõichi ato nikatirofo. Nãskaxõ ato õiti fepeaxosharakani. <sup>32</sup> Nã Niospa meka ato yoiaito ãfe shinã mĕraxõ shinãtiro iskafakĩ: “Fĕtsari ato yoipai kiki ikax xatetiro.” <sup>33</sup> Askaxõ ichanãxõ rafekaita ato yoiaifono tsõa ato nikasharatiroma. Nãskakĕ ãto õiti fekaxtefatirofo. Askarakai Niospa fichipaima. Akka Niospa fichipai nã ichanãfo anoxõ rafekaita ato yoiyamaino fistichi ato yoinõ nikasharakõinõfo.

<sup>34</sup> Askatari afara fetsari ě mato yoisharapai. Nios Ifofaafõ ichanãifo anoax xotofakefo mekatirofoma. Niospa meka yoimisto yoiaino xotofakefãfe nikakõitirofo. Mekatamaroko nã Niospa meka yoiai keskara nikasharaxikakĩ. Nãnori taeyoi Niospa meka yoikakĩ kirikaki kenenifo. <sup>35</sup> Nã ichanãkaxõ nikafo keskara xotofakefãfe tãpisharaxoma ãto fene yõkapaikakĩ manayotirofo. Akka ãto pexe ano nokokaxõ ãto fenefo yõkatirofo ãto fenefãfe ato tãpimanõ. Nãskakĕ mã ichanãino xotofakefo mekaifokai sharama.

<sup>36</sup> Akka Epa Niospa yoipaiyai keskara mato fisti taefakĩ tãpimanima. Niospa meka yoimisfo matoki fisti fenifoma Niospa meka yoifekani. Fetsafori yoifekani fenifo. <sup>37</sup> Akka fatora fĕtsa mã yoikĩ iskafatiro: “Nõ Niospa meka ato yoimis. Askatari nõ Niospa Yõshi Sharaõxõ nã Nios Ifofaafõ nõ afara



fetsa ato axosharatiro,” ixõ mã yoikĩ mã tãpitiro nã ã mato kenexonai keskara nõko Ifãfe mato yoia mã anõ. <sup>38</sup> Fẽtsa anorima mato yoiaito nikayamakãfe. <sup>39</sup> Nãskakẽ efe yora mĩshtichi, nã mã ichanãino anoxõ Niospa meka ato yoipaikãfe. Nã sharakõikĩ. Akka fẽtsa yõra mekapama meka fetsapa Niospa Yõshi Sharaõxõ mato yoipaiyaito xatemayamakãfe. <sup>40</sup> Akka mã ichanãino fẽtsa taefakĩ yoitiro. Askatari fẽtsari chipo yoitiro nã yoiaifo keskara mã nikasharakõinõ. Mã askaino mãto õiti fekaxteima.

## 15

### *Cristo nafiãx anã otoni*

<sup>1-2</sup> Efe yora mĩshtichi, iskaratĩa meka shara Jesúsnoa ã mato yoimis keskara ã anã mato shinãmapai. ã mato Jesúsnoa yoiaino mã chanĩmara fani. Mã chanĩmara faito Jesús mato chaka soaxoni mã afe ãpaxanõ. Akka ã mato yoini keskara mãkai kachikiri famisma. Akka mã kachikiri faino ãa kaxpa mato yoikerani.

<sup>3-7</sup> Yorafãfe ea meka sharafinakõia yoionifo. Nãskakẽ ãri mato yoini iskafakĩ: Cristo noko nãxononi nõko chaka noko soaxoxiki. Akka Cristo tres nia maiyoni. Askata anã otoni. Mã otoax Pedroki nokoi taeni. Nãskatari chipo a aõxõ tãpimisfokiri nokoni. Askatari nã chanĩmara faafoki yorafã rasifokiri nokoni. Akka fisti rasi nãpaifono, akka ranãri nanifoma. Nãskatari chipo Santiagoki nõko Ifo nokoni. Askatari a aõnoa ãfe meka yoimisfoki nokoni.

<sup>8</sup> Akka chipokõi ekeki Jesús nokoni. ãkai aõnoa afaa tãpiyopaonima. Akka fetsafãfe mẽxotaima nikayopaonifo. Nãskakẽ chanĩmara fakĩ taefanifo. Akka ã afe niyopaonima taeyoi a fetsafo ikai keskai. ã askafiaino ea Jesús katonni chipo. Ekeki nokoxõ ea yoiaito ã koshi Ifofani. <sup>9</sup> Akka ã chakafayopaonni keskara Jesús Ifofaa fetsafãfe chakafamisfoma. Akka ã afara chakafakĩ finayopaonni. A Jesús Ifofaafo ã ato omiskõimayopaonni. A afe yorafo ã chakafayopaonifikẽ Jesús ea noikĩ ea nĩchini aõnoa ã ato yoinõ. <sup>10</sup> Niospa ea noixõ ea katonni a apaiyai keskara ã anõ. Nãskakẽ nã ea amapaiyai keskara mẽ amis. Akka ea kaxpakõi katonnima. Nã aõxõ yonoxomisfo keskafakĩ ã yonoxokĩ finakõimis. Akka ãakõi ã yonoxomisma. Ea noikĩ Niospa ea katonni ã Jesús yonoxomis inõ. <sup>11</sup> Akka ã Jesúsnoa yoimis iyamai fetsafãfe mato Jesúsnoa yoimis itirofo nãnori fisti nõ mato yoimis. Nãskakẽ nã Jesúsnoa fisti nõ mato yoimis keskara nikakĩ mã mã Jesús chanĩmara faa.

### *Namisfo otoxikani*

<sup>12</sup> Nõ mato yoimis iskafakī: “Cristo noko naxõfinixakī mā anã otoni,” ixõ nõ mato yoimis. Akka, ¿afeskakī atirito mā yoikī iskafamismē? “Yora naax anã ototiroma,” ixõ mā anorima yoimis. <sup>13</sup> Akka yora naax ototirokēma Cristori otokeranima. Akka nõ tãpia yora naax ototirokē nãskakē Cristo otoni. <sup>14</sup> Akka Cristo otoyamanikē kaxpa aõnoa nõ mato yoikerana. Nãskakē kaxpakõi mā chanĩmara fakerana. Akka chanĩma Cristo naax otoni. <sup>15</sup> Akka Cristo otoyamanikē nõ mato pãrakerana. Akka nõ mato yoimis iskafakī: “Epa Niospa Fake Jesús ofofani,” ixõ nõ mato yoimis. Yora naax ototirokēma Epa Niospa Cristo ofofakeranima. <sup>16</sup> A naafo otoyamaino Cristori otokeranima. <sup>17</sup> Cristo otoyamanikē kaxpakõi mā chanĩmara fakerana. Mãto chaka mato soax-okeranama. <sup>18</sup> Akka Cristo otoyamanikēkai nõri naax nõ otokeranama. Askax nõ afe nĩpakeranama. <sup>19</sup> Nono mai anoxõ niyoxõ nõ shinãkī iskafakerana: “Ë naax Cristo otoni keskai ěri otoxii ea Niospa ofofaano,” ixõ nõ shinãfiãx Cristo otoyamanikē nãskakē kaxpa nõ chanĩmara fakerana. Akka Cristo otoyamanikē chanĩmayamakē, “Afaa tãpiafoma,” noko fakeranafo nokoõnoa shinãchakakõikeranafo.

<sup>20</sup> Akka chanĩmakõi, Cristo otoi taeni. Anã naxiima. Nãskakē Cristo otonino nã chanĩmara faafo nakanax otoxikani afe ipaxakakī. <sup>21-22</sup> Akka Adán Niospa onifakī taefani. Adán taefakī afara chakafani. Nãskakē afara chakafaax nani. Akka nã feronãfakeõnoax keyokõi nãpamisfo. Nãskarifiãi nã feronãfake Cristoõnoax nã chanĩmara faafo ototirofo afe nĩpaxikakī. <sup>23</sup> Cristo otoi taeni nĩpaxakī. Nã anã oaitia keyokõi afe yorafo ofofaxii afe nĩpaxanõfo. <sup>24</sup> Nãskatari nono mai anoafo keyoxikani. Nãskatari Cristo keyokõi xanĩfofo potaxii anã xanĩfo inõfoma. Askatari niafakafãfe ãto xanĩfofori potaxii. A niafakafãfe ãto xanĩfo finakõiari potaxii. Cristo ato potano anã ato yonomapakenakafoma. Nãskaxõ Cristo Apa Nios yoikī iskafaxii: “Mã yorafo keyokõi ãto xanĩfo mĩ itiro. Ë anã ãto xanĩfo ikima,” ixõ Apa yoixii. <sup>25</sup> Akka iskaratĩa Cristo nõko xanĩfo iyoa. Nã xanĩfo fetsafo a Cristo nikakaspaifo Niospa anã ato afaa imaxiima. Cristo nãmãri ato nĩchixii. Nãskatari Epa Nios xanĩfokõi ipanaka. <sup>26</sup> Akka Niospa Satanás omiskõipakenakafo mēra potaxii. Akka nã Satanás Adán afara chakafamanino keyokõichi nõ afara chakafaax nõ napanaka. Nãskakē Niospa Satanás omiskõipakenakafo mēra potano anã tsoa nanakama. <sup>27</sup> Nãskaxõ Niospa ãfe Fake Cristo nãmãri keyokõi ato nima. Akka mã nõ tãpia Apa Nios fisti ãfe Fake nãmã ikama nãatomãi nãmã keyokõi ato nimax. <sup>28</sup> Keyokõi Niospa Fake nãmã ikafono Apaõxõ ato yonomatiro. Nãskaxõ ãfe Fãke Apa yoixii iskafakī: “Epa mĩri ea yonomatiro,” ixõ yoixii. Nã Apa yoiai keskara nikasharakõi. Nãskakē Apa Nios

fistichi keyokōi yonomaxii āto xanīfo finakōimāiaxō.

<sup>29</sup> Akka yora maotisamisma naano fētsa maotisaxotiro. Nāskara mā feyafamisfo. Akka yora naax otoyamanikēkai tsōa ato maotisanoxokeranama. Tsoa otoyamanikē nōri ototiro. Akka, ¿afeskai nō maotisaxonimē nō otoyamafi? Akka nō tāpia mā nō naax nō anā otoxiai. <sup>30</sup> Akka tsoa otoyamanikēkai ēri otokeranama. Nāskakē, ¿afeskai mēxotaima Cristoōnoax mesekōi mēra ē kafāsaimē ē otoyamafi? Akka ē tāpia a ē otoxiai. Nāskakē mēxotaima ē Cristoōnoax mesekōi mēra kafāsai Cristoōnoa ato yoifofāsafai. <sup>31</sup> Nāskakēri ē fet-safo matoōnoa yoisharamis māmāi eōxō nōko Ifo Jesucristo mā Ifosharafaino. Efe yora mīshtichi, chanīma ē mato yoi mēxotaima Cristoōxō ea retepaikani. <sup>32</sup> Poomānā noko pipaiyai keskara nā Efeso anoafāfe ea retepainifo, a Cristo nikakaspaiāfe. Akka Cristoōnoax ē naax ē otoyamax kaxpa ē aōnoax nakerana. Askatari ē ato Cristo Ifofamano nakanax tsoa otoyamaino kaxpa ē ato Cristo Ifofamakerana. Nō naax anā otoyamafixixakī nā nō apaiyai keskara nō anōkāfe. Nāskakē fetsafāfe yoikakī iskafakani: “Nō nayoxoma nō piyanā nō ayayoi inimayanā. Nō Nios shinātama nā nō apaiyai keskara nō ayoi,” ixō shinākani anorima. Akka nō naax nō anā otoxii. Nāskakī nō nayoxoma Niospa noko amapaiyai keskara nō anōkāfe.

<sup>33</sup> Niosnoa yora chakafāfe mato pāramisfo. ato fe rafeyamakāfe. Yora chakafo fe mā rafeaito matori afara chakafamatirofoki. <sup>34</sup> A mā anorima shināmis anā shināyamakāfe. Chakafakī xatekāfe. Atiritokai mā Nios tāpisharama. Nāskax mā rāfipaitiro.

### *Nō naax anā nō otoaitīa nōko yora fetsa keskara ixii*

<sup>35</sup> Akka yoikī iskafakani: “¿Afeskaxō Niospa naafo otofaxi-imē? ¿Anā nō otonō afe keskara yoraya noko imaimē?” ixō yoikani. Anori yoikakī afaa shinākanima. Akka shara shināsharakakī tāpitirofo. <sup>36</sup> Nō ifi exe fanano āfe xaka payokometiro. Akka āfe exe oke mēranoa pishta payokometiro. Akka āfe exe oke mēranoa pishta payokometiro. Maiax āfe exe xaka naamax āfe exe pishta foaitiro. <sup>37</sup> Akka nō afara fanakī nō āfe kayafoya fanatiroma. Āfe exe fisti nō fanatiro. Mā āfe xaka payokomeaino āfe exe foaitiro. Nāskax mā foaikax anā āfe exe keskara itiro. Fetsa keskara itiro. <sup>38</sup> Nā ifi exe nō fanano Niospa foaimasharatiro. Nā apaiyai keskafakī fanafo fetsa fetsatapafai.

<sup>39</sup> Akka nōko yorari yoināto yora keskarama. Nōko yora fetsa keskara. Yoinānā fetsa keskarafono peyafonāri fetsa keskarafō. Foenāri fetsa keskarafō. Akka nā yora fisti keskara

Niospa noko onifanima, fetsa fetsatapafo Niospa noko onifani. <sup>40</sup> Akka nõko mai anoafãfe ãto yorafo fetsa keskarrafo. Askatari Epa Nios ari anoafori nai mẽranoafãfe ãto yorafori fetsa keskarrafo. Keyokõi sharafiax askarafoma. <sup>41</sup> Akka xini ikaino oxe ikaino fishifo ikaino nã yora fisti keskarama fetsa keskarrafo. Nãfo sharafiax askarafoma.

<sup>42</sup> Nãskarifiã yora naino ãfe yora payokometiro. Anã nõ otoaxkai nõko yora payokomenakama. Nãskara shara nõ ipanaka anãkai nõ nanakama. <sup>43</sup> Nõko yora maia anoax chakakõi ixii. Akka nõ otoax sharakõi nõ ipanaka. Nõ nono mai ano niyoax nõ iramanapakeax nõ natiro. Nõ anã otoaxkai nõ anã nanakama, mitsisipa shara nõ ipanaka. <sup>44</sup> Nõ naano noko maifafono nõko yora payokomei. Akka nõ otoano Niospa noko nimaxii afe ãpaxanõfo. Akka nõ mai ano niyoax nõ natiro. Akka mã nõ naax anã nõ otoax nõko yora fetsa keskara ixii. Nõ anã nanakama. <sup>45</sup> Niospa meka yõra kenekĩ iskafani: “Feronãfake Adán Niospa onifakĩ taefani. Onifaxõ xãka ikai fani,” ixõ yõra kirikaki keneni. Akka Cristori Adán keskara feronãfake. Feronãfakekõixõ noko nimapakenaka. Nõ naax anã otoax nõ anã natiroma. <sup>46</sup> Niospa feronãfake Adán onifakĩ taefani. Chipõ Cristori kãini noko nimapakexakĩ. <sup>47</sup> Niospa nã feronãfake Adán onifakĩ taefani. Mai yorafaxõ onifani. Akka Cristo nai mẽranoax nokoki fotoni. Tsõakai Cristo onifanima. <sup>48</sup> Akka nono mai anoax nõ kãiax nõko yora Adán yora keskara. Nõ Jesús Ifofaax nã keskara nõ ixii. <sup>49</sup> Nõ nono mai anoax fake kãini. Nãskax nõ Adán keskarakõi. Askatari nõ Niospa yora ikax nõ Jesucristo keskarakõi ixii.

<sup>50</sup> Efe yora mĩshtichi, ã mato yoinõ nõ afeskax iximãkai. Nõ iskaratĩa namiya. Askatari nõ imiya. Nãskara yorayax Nios fe nõ ipanakama. Akka nõko yora natiro nõ anã otoaxkai. Nõ anã otoax nõko yora fetsa keskara ixii. Nãskakẽ nõ anã nanakama. <sup>51</sup> Tsõakai nikayomisma na meka shara ã mato yoi. Tãpipaikĩ ea nikasharakãfe. Akka nõkai atiri naima. Askafiax nõ keyokõi fetsa keskara iki fetsexii. <sup>52</sup> Jesús anã oaino ãfe ãjirinĩ ãfe maneti manaino Jesús chanĩmara faafo, a nayoamafo, fetsa keskara ãtaxikani. Fetsoitanai keskarataxikani fetsa keskara ãtaxikani. Askatari Jesús chanĩmara faax namisfori otorisataxikani. Nãskakẽ keyokõi Jesús chanĩmara faafo tii fetsa keskara ixikani. Askax anã nanakafoma. <sup>53</sup> Nõ iskaratĩa naino nõko yora payokometiro. Askafiano Niospa nõko yora noko fetsafaxoxii nõ anã nanõma, nõ afe nãpaxanõ. <sup>54</sup> Nãnori Niospa meka yoikakĩ kirika kenenifo. Nã yoinifo keskara chanĩmakõi ixii. Iskafakakĩ kirika kenenifo yoikakĩ: “Aicho. Anãkai Niospa yorafo nanakama. Cristoõnoax nõ afe isharapakenakaki,” ixõ kirika kenenifo. <sup>55</sup> Askatari kenenifo iskafakĩ: “Anãkai afanã noko

namatiroma. Anākai nō nai omiskōinakama,” ixō kirika kenenifo. <sup>56</sup> Nō afara chakafamisnoax nō nai nō omiskōitiro. Nāskakē nā Moisés noko yoinioxō nō tāpitiro afara chakafaax nō natiro. Naax nō omiskōixii. <sup>57</sup> Akka Jesucristo noko nāxoni noko chaka soaxoxiki. Nāskakē nō Jesucristo Ifofaax nō nafiax nō anā otoax nō anā nanakama. Nō afe nīpanaka. Nāskakē nō Epa Nios aicho fai.

<sup>58</sup> Akka efe yora mīshtichi, afara fetsa shināyamakāfe. Niospa noko imapaiyai keskara nā fisti shināsharakāfe. Jesús Ifofasharakāfe. Nōko Ifo Jesús yonoxosharafafāikāfe. Mā mā tāpia nōko Ifoōxō nō yonoai kaxpa nō yonomisma, nōko Ifomāi noko amakē. Nāskakē nō aōxō ato axosharatiro nō kaxpa ato axōima.

## 16

*Nā Nios Ifofaafāfe kori ichafaxō Nios Ifofaafō fetsafō fomani*

<sup>1</sup> Iskaratīa mā ea yōkaita, afara fetsa kirikaki kenexō ē mato yoi. Nios Ifofaafō Jerusalén anoafō afaamais. Ato noikī mā ato afara fomatiro. Akka nā Nios Ifofaafō Galacia anoafō ē ato yoia keskara ē matori yoipai nā afaamaisfo afarafo mā ato ināsharanō. <sup>2</sup> Nomīkotīa ichanāi mā kori ichafaxō chipo Jerusalén anoafō mā ato fomatiro. Yonoxō kori fīta atiri mā ato inātiro. Akka mā kori ichapama fixō ichapamari mā ato inātiro. Akka mā ichapa fixō ichapari ato inākāfe. Nomīkotīa ichanāi mā kori ichafatiro, ea manakima kori ichafayokāfe. Nā ē matoki nokoaitīa mā anā kori meketiroma. Nā kori mā ichafaa nā Jerusalén anoafō afaamaisfo mā ato fomatiro mē Corinto ano matoki oano. <sup>3</sup> Nāskano feronāfake sharakōifo katokāfe afāfe nā afaamaisfo ato kori foxotanōfo Jerusalén anoafō. Nāskatari ē Corinto ano nokoxō Jerusalén anoafō ē kirika kenexō ē ato fomanō. Nā feronāfake sharakōifāfe ato foxotanōfo. Akka nā feronāfakefāfe nofeta Jesús Ifofaafō. Nāskakē ato ifisharakāfe ixō ē kirika kenei nā feronāfakefo sharakōifāfe foxonōfo Jerusalén anoxō Jesús Ifofaafāfe ato tāpinōfo. <sup>4</sup> Niospa ea nīchipaiyaino nā feronāfakefo mā katoa efe fotirofo.

*Pablo Corinto ano kapaikī ato yoini*

<sup>5</sup> Ē Macedonia finōfainikai ē matoki Corinto ano nokoikai. <sup>6</sup> Ētsa, ē ano mato fe samaraka pishtayotiro rakikīa. Askayamai ē mato feta mechaka fisti finōyotiro rakikīa. Nāskakē ē matoki nokoaino mā ea axosharayotiro. Askatari mē kaino mā ea nīchitiro ē kasharatanō. <sup>7</sup> Ēkai mato finōfaipaima. Niospa ea nētefayopaiyaino ē mato ano nēteyotiro.

<sup>8</sup> Askafiax ē nono Efeso ano iyoi nā nōko fista āfe ane Pentecostés ikaitīa. <sup>9</sup> Nonoxō yorafāfe nōko Ifoōnoa nikapaikani. Nāskakē ē nonoxō nōko Ifoōnoa ē ato yoisharayoi chanīmara

fanõfo. Ë nõko Ifoõnoa ato yoifiaito atirifãfe ea xatemapaikani ã Jesúsnoa yoiyamanõ.

<sup>10</sup> Akka ã nõko Ifo yonoxomis keskafakĩ Timoteori nõko Ifo yonoxomis. Nãskakẽ matoki Timoteo nokoaino kexesharakãfe akiki inimayanã. <sup>11</sup> Nãskakẽ, “Mĩ afaamara,” fayamakãfe. Nãskax mato anoax ekeki oaino nĩchisharakãfe inimayanã ekeki nokonõ. Nios Ifofaa fetsafo fe ekeki nokoyonõ ã anã ato fe rafesharanõ.

<sup>12</sup> Askatari iskaratĩa nofe yora Apolosõnoa ã mato yoi. Ë Apolos yoia iskafakĩ: “Corinto anoafo õiyotãfe,” ã feito ea yoia iskafakĩ: “Ë iskaratĩa kayotiroma. Niospa ea nĩchipaiyaitĩa ã katiro,” ixõ ea yoia.

*Pablo mã mekai xatekĩ Corinto anoafo ato meka fomani*

<sup>13</sup> Jesús shinãfafãikãfe chakafakakĩma. Jesús Ifofasharakãfe. Jesús chanĩmara faax afara afeskarafiaito rateyamakãfe. Kachikirifayamakãfe. <sup>14</sup> Afarafo mã akai keskara Nios yafi yorafo noikĩ axosharakãfe.

<sup>15-16</sup> Estéfnas afe yorafo fe Acaya ano ixõ nãnoxõ Jesús chanĩmara fakĩ taefanifo. Mã mã ato õimiskĩ. Mã mã tãpia nãfãfe Nios Ifofafo sharafamisfo. Nã keskarafo nikasharakãfe. Nã ato feta yonoaifori nikasharakãfe.

<sup>17</sup> Ë inimasharakõi Estéfnas, Fortunato, Acaicori afo ekeki nokoafono. Akka mã ea axopaiyai keskara nãfãfe mã ea axõafo. Mã ea axotiroma mã chaikõi ika. <sup>18</sup> Nã tiito ea inimamamisfo. Mato inimamamisfo keskafakĩ eari inimamamisfo. Nãskakẽ atoõnoa yoisharakãfe.

<sup>19</sup> Nã nõko Ifo chanĩmara famisfãfe Asia anoafãfe mato yoisharapaikani. Aquila feta ãfe ãfi Priscila mato yoisharapaikani. Mato shinãkõikani. ãto pexe mẽranoax ato fe ichanãmisfãferi mato yoisharapaikani. <sup>20</sup> Keyokõi nõko Ifo chanĩmara faafãfe nono efe ikaxõ mato yoisharapaikani. Nãskakẽri mã ranã yoinõnãsharakãfe.

<sup>21</sup> Ëfi Pablocki mẽ mekai xatekĩ meka rafes ã mato kenexonõ. Akka taefakĩ nofe yora Sóstenes ea kirika kenexona. Akka iskaratĩa ãkõi kirika mato kenexoni mã tãpinõ.

<sup>22</sup> Fatatora nõko Ifo noiyamaino Niospa omiskõimapainõ omiskõipakenakafo mẽra potakĩ.

Nõko Ifo Jesús chaima nokopainõ.

<sup>23</sup> Nõko Ifo Jesucristo mato noikĩ mato inimamasharakõinõ.

<sup>24</sup> Ë nõko Ifo Jesucristoõxõ keyokõi ã mato noi. Nã tii.

## Pablo Corinto Anoafu Afianā Kirika Kenexō Fomani

### *Pablo Corinto anoafu yoisharani*

<sup>1</sup> Ēfe yora mīshtichi, ēkīa Pablo. Ē kirika kenexō mato fomai mā tāpinō. Nofeta Jesús Ifofamis Timoteo feta ē mato kirika kenexō fomai. Epa Niospa ea katopaiyaito Cristo Jesús ea katonī āfe meka ē mato yoifofāfōfāinō.

Nios chanīmara faafo Corinto anoafu, Acaya mai anoafori ē mato keyokōi yoisharai. <sup>2</sup> Ē nōko Nios mato kīfixomis iskafakī: “Epa Niospa, nōko Ifo Jesús feta ato noikōikī āto ōiti inima-masharaxōfe. Askatari ato shara fafe,” ixō ē matoōnoa yoimis.

### *Pablo omiskōini*

<sup>3-4</sup> Nō Epa Nios yoisharanō iskafakī: “Epa Niospa, mī noko sharafa fafāfāini. Mī sharafinākōia. ¡Aicho!” ixō nō Epa Nios yoinō. Nāfi nōko Ifo Jesucristo āfe Apaki. Nāatori noko noisharakōi. Askatari nō omiskōiaito noko inimamatiro. Akka nā nō meemis keskara mei, fetsa omiskōiaito nō inimamatiro, nā Epa Niospa nō omiskōiaito noko inimamamis keskafakī. <sup>5</sup> Cristo omiskōimakīfinakōinifo. Nāskakēri nōri Cristoōnoax omiskōikōi, Akka Cristo omiskōiaito Niospa axosharakōini. Nāskakē Cristoōxori nokori Niospa axosharakōi. <sup>6</sup> Akka nō Niospa meka mato yoi nō omiskōiaito mā noko nikakōixō mā nōko Ifo Jesús chanīmara faax mā afe isharakōitiro. Nāskax mā inimakōitiro. Akka nō mato yoi nō omiskōifiaito nōko ōiti Epa Niospa noko inimamaxomis. Akka mā mā noko ōimis nō omiskōiaito Epa Niospa noko axosharaito. Nāskarifiāi māri omiskōiaito Epa Niospa matori axosharakōixii mā tenesharakōinō. <sup>7</sup> Mā nō tāpia nō omiskōiai keskai māri nofe omiskōiaito Epa Niospa nōko ōiti inimama keskafakī matori inimamasharai.

<sup>8-9</sup> Efe yora mīshtichi, Asia mai anoax nō omiskōita ē mato yoi mā tāpinō. Nō omiskōifinakōita tenetiroma mei nai keskarakōi nō meita. Nāskakē nō tāpitiro nāskara Epa Niospa noko tāpimana nōa nō ifimetiroma nō omiskōiyamanō. Epa Nios fistichi noko ifitiro. Akka nō omiskōiaino nō naano, nāatofi yorafo otofatirokī, ixō nōko shinā mēraxō nō shināita. <sup>10-11</sup> Akka nō fāsi omiskōi nakerafiaino Epa Niospa noko ifita. Anā afetīara noko ifixii. Askatari nō chanīmara fakōini nokomāi ifitaifamiskē, māmāi noko Epa Nios kīfixomiskē. Mā noko askafaino nā Nios chanīmara faa fetsafāfe shinākī iskafaxikani: “Aicho Epa Niospa, mī Pablo yafi afe rafemisfo mī ato ifisharakōia. Mī fāsi sharakōi,” ixō yora ichapafāfe yoixikani.

### *Afes kai Pablo kanimamē Corinto ano*

12 Nā nō fakira kafāsai ariax nō isharakōimis, nō afaa chakafamisma. Niospa fichipaiyai keskara nō amis. Askatari mato mēranoax nō isharaifinakōimis. Nāskakē nō shināchakaima nō inimasharakōi. Akka nōkai nō mato pāramisma, chanīma fisti nō mato yoimis. Niospa noko noikī noko shināmanaino nō isharanō mato mēranoax. Askatari nā nō fakira kafāsai ariax nō isharakōimis. <sup>13-14</sup> Ē mato kirika kenexō manamani tāpitiropinī shara faxō fekaxma mā tāpitiro xafakīa sharakōi. Nāskafekē atirifāfe tāpisharafoma ē afe keskaramāki. Nāskafixō mā tāpisharai, nāskara shara ē fichipai. Nāskakē nōko Ifo Jesús anā oaino mā nokoki inimasharaxii, nōri matoki inimasharanō.

<sup>15-16</sup> Nāskakē ē shinā ē Macedonia ano kaitīa ē mato ano māpefaixii anā ē mato yoisharaxiki māto ōiti mēra mā ini-manō. Askata nā Macedonia anoax ē oaitīa anā ē mato ano māpetiro mato fe iyoxiki. Chipō Judea ano ea nīchitirofo, ixō ē shināni. <sup>17</sup> Nānori ē shināfiāx ē mato ari ē kayoikaima. Akka mā iskafakī shināiraka: “Pablo ē kaira ifiax kaima, ¿afeskakī noko pāramē?” ixō mā shināiraka. Akka ēkai ōiti ranāyama fetsa yoikī, fetsa yoikī ē fapanā. Nā yōra Jesús Ifo faamato shināi keskara ē shināima. <sup>18</sup> Nā Niospa noko pāramisma keskafakī nōrikai mato pāramisma. Nāskakē tāpisharakōia nō mato pāramisma. <sup>19</sup> Akka Timoteo ikaino Silvano ikaino ē ikaino Jesucristo Niospa Fakeōnoa nō mato yoimis. Jesucristo mekakai rafema, āfe meka mēstekōi. Chanīma fisti. <sup>20</sup> Epa Niospa noko yoiyōa keskara keyokōi Cristo mā noko axomis. Nāskakē nō keyokōichi yoimis iskafakī: “Epa Niosi, mī fāsi sharakōi. Jesúsxō keyokōi mī afama mīshti famis nā mī yoiyōa keskafakī. Nāskakē Jesús aneōxō nō mia aicho fai,” ixō nō yoimis. <sup>21</sup> Askatari Epa Niospa mato yafi noko Jesús Ifosharakōifama. Nāskatari noko katoxō noko nīchini āfe meka yoimis nō inō. <sup>22</sup> Akka fētsa āfe afarafo marakka fatiro fetsafāfe tāpinōfo āfenākē. Nāskafakīri Epa Niospa āfe Yōshi Shara nō mēra nanea aōxō nō tāpinō nō afe yoraxō. Nāskakē nō tāpitiro afara fetsa nā noko yoiyōa keskara chanīmakōi noko ināxii.

<sup>23</sup> Ē mato ari kaira ixō ē shināfiitaxakī ē kaama. Epa Niospa ea tāpikōia ē chanīkēma. Ē mato ari kakerana. Nāskafiax ē kaama ē mato shinākī. Ē ato ari kaxō ē ato fasi yoikī ē ato shināmitsamatirora ikax nāskax ē mato ari kaama. <sup>24</sup> Ē mato askafatama ēroko mato inimamapaisharai. Ēkai māto ifo ipaima. Akka Jesús fisti nōko Ifo. Akka mā mā Jesús chanīmara faxō mā mā Jesús Ifo sharakōifai. Nāskakē ē mato feta Jesús yonoxopai mā inimai finakōinō, askatari mā Jesús Ifo sharakōifanō.



## 2

1-2 Nāskakē ēfe shinā mēraxō shinākī ē iskafayamea: “Ē Corinto ari kapaifi ē kaima. Akka ē kaxō ē ato yoikī iskafapaima: ‘A mā afara chakafamis keskara xatekāfe,’ ixō ē ato yoikī ē ato inimamatiroma. Askakimaroko ē ato shināmitsamatiroma. Ē ato shināmitsamanaino, ĵtsōa ea inimamatiromē? Akka ares fisti ea inimamatirofo,” ixō ē shināyamea. <sup>3</sup> Nāskakē ē mato kirika kenexona, mato ari kakīma. Akka ē shinā, “Ē ato ari kaxō ē ato iskafaino: ‘Mā isharakōiyama māto chaka xatekāfe,’ ē ato faino shināmitsakōitirofo,” ixō ē shināyamea. Akka mā ea nikayamaino ēri shināmitsakōitiro. Akka mā anā Nios nikakī anā isharakōiaino, mā ea inimamasharakōitiro. Akka mē tāpikōia ē inimakōiaino māri inimakōitiro. <sup>4</sup> Ē mato kenexokī ē meyamea ēfe ōiti shināmitsakōiaito oiayanā. Ēkai mato shināmitsamapainima. Askatamaroko ē mato kenexoni a ē mato noikōiai keskara mā tāpinō.

*Fētsa noko chakafaito nō rae fatiro*

<sup>5</sup> Akka nā feronāfake fētsa ea chakafakī mekafakī ea fisti shināchakamanama, nā mā Nios Ifofaafari keyokōi mato shināchakamana. Nāskakē noko keyokōi chakafakī mekafaa. Noko askafafiaino ēkai na feronāfake omiskōimaki finapaima. <sup>6</sup> Akka mā ranārito omiskōimanakī nāskanōkāfe. <sup>7</sup> Akka a mā aka keskafakī anā askafakīma rae fakāfe. Nāskaxō yoisharakāfe inimamasharakōiaino anā omiskōinōma. Akka mā askafayamaino āfe shinā mēra shināmitsakōitiro anā shināsharatiroma anā Nios Ifofapaima. <sup>8</sup> Nāskakē ē mato yoiai keskafakī ea nikasharakāfe. “Nō miā noikōi. Mī anā nofe isharakōitiro,” ixō yoikāfe tāpinō. <sup>9</sup> Ē mato kirika kenexō manamayamea tāpipaikī mā mēxotaima ea nikakōimākai. <sup>10</sup> Mā fetsa raefakē ēri nā raefatiro. Fētsa ea chakafaito ē mato shinākī Cristo ea ōiaino ēri nā raefatiro. <sup>11</sup> Nō fetsa raefasharakōiaino Satanás noko feparatiroma. Nō tāpisharakōia Satanás noko kexepaikōi. Akka a Nios Ifofaafoma itito chakafakī mekafatirofo Satanás fichipaiyai keskara. Akka nō fetsa raefaino Satanás noko afeskafatiroma.

*Pablo pexe rasi Troas ano nokoax ininima*

<sup>12</sup> Akka ē mato eōnoa tāpimapai. Ē pexe rasi Troas ano kani meka shara Cristoōnoa ato yoikai. Cristoōnoa nikapaikōinifo. Nāskano nōko Ifāfe ea atoki nīchini ē āfe meka ato yoinō. <sup>13</sup> Akka ē shināni nofe yora Tito Troas anoa ē fichikaira ixō. Akka fichiyamax ē ininima. Nāskaxō ē fāsi shinākōini. Nāskata, “Mē kai,” ixō Troas anoafoma nā nōko Ifo chanīmara fafo ē ato yoita ē oni nono Macedonia ano.

*Cristoōxō nō keyokōi finōtiro*

<sup>14</sup> Aicho Epa Niosi, mĩ Cristo Jesús afara chaka potamana anã afeskafanõma. Nãskakẽ nõri afe inimai nõmãĩ aõxõ ãfe meka yoikatsaxakĩ yorafãfe tãpinõfo. Akka pirofomã nakas shara nachikomea nõ keyokõichi xetetiro keskafaki, nãskafakĩri Niospa noko nĩchiano nokoõxõ keyokõichi tãpitirofo ãfe meka shara. <sup>15</sup> Akka nõ meka shara Cristoõnoa yoimis keyokõichi nikanõfo. Akka atirifãfe chanĩmara fakõikani, Nios fe ipaxakakĩ. Akka atirifãfe nikasharakanamax Jesús Ifofakanamax nakanax omiskõipakenakafo. <sup>16</sup> Akka na meka shara nikaifoma mã nakanax omiskõipakenakafo mẽra fokanax omiskõixikani, nãfãfemãĩ na meka shara nã nõ afara pisikõĩ xetemis keskara xetekatsaxakakĩ. Akka nã meka shara nikaifãfe nã nõ pirofomã nakas shara xetemis keskara xetemisfo. Nãskakanax Nios fe nĩpanakafo. Akka, ¿tsõa Niospa meka Jesúsnoa yoisharatiromẽ? Akka tsõa atiroma. <sup>17</sup> Akka fetsafãfe Niospa meka ato yoikakĩ kori fipaikani ãa ato pãrakaxõ. Nõ mato Niospa meka yoikai noko kopifakãfe ikaxõ ãa ato pãrakaxõ ato kori fãifo keskafakĩ nõkai mato askafamisma. Mã nõ tãpia nõ ãfe meka yoiaito Epa Niospa noko õisharakõĩ, nãatomãĩ noko nĩchinixakĩ. ãfe meka yoikai nõ kaxetiroma, Niospamãĩ noko õiaino nõmãĩ Cristo ãfe inaxõ.

### 3

#### *Jesús ato meka fena yoimis Pablo ato yoini*

<sup>1</sup> Askara nõ yoiaino, mã shinãiraka nã nõa nõ yoimesharai keskara. Maa. Nõa nõ yoimesharaima. Mã chaka shinãĩ. Akka fẽtsa yonopaiyaito fẽtsari fetsa kirika kene fomaxotiro fetsafãfe õinõfo yonosharamiskẽ. Akka, ¿mã shinãimẽ fetsafãfe nokoõnoa kirika kenenõfo noko yoisharakakĩ nõ yonosharamiskẽ Niospa meka yoikĩ? Akka nõ askara fichipaima. Akka, ¿mã shinãimẽ nõ mato kirika kene yõkaito kirika kenexõ mã noko inãnõ nõri fetsafo inãnõ noko tãpinõfo nõ mato mẽraxõ yoisharamiskẽ? Maa. Askara nõ fichipaima. <sup>2</sup> Akka nã kirika kenea keskara nõ fichipaima mãmãĩ nã kirika kenea keskarakẽ, fetsafãfe mato õitirofo mãmãĩ Nios Ifofasharakẽ. Mato õikakĩ nokori tãpitirofo nõ Niosxõ yonosharamiskẽ. <sup>3</sup> Akka mã mã isharakõia anã mã imis keskarama a Niospa fichipaiyai keskaraino. Nã noko õimana Cristo mãto õiti fetsafaa fena keskara mã inõ. Nãskakẽ mã kirika kenea keskara. Mato õixõ fetsafãfe tãpitirofo nõ Niospa meka mato tãpimasharamiskẽ. Akka na kirika kene lapisi kenemeama, askatari tokiri sapaki kenemeama; Epa Nios nĩpanakato ãfe Yõshi Sharapa mato imashara mã isharakõinõ.

<sup>4</sup> Iskafakĩ nõ yoia, mã nõmãĩ tãpixõ Niospamãĩ noko nĩchinikẽ nõ ãfe meka mato yoinõ Cristo ãfe sharaõxõ nõ mato

yoisharamis. <sup>5</sup> Akka nōa nō afara shara nō mato yoitiroma mā isharanō. Askatamaroko Epa Niospa āfe Yōshi Sharaōxō nō fetsafo tāpimatiro isharanōfo. <sup>6</sup> Niospa Yōshi Sharaōxō na meka fena nō ato yoimis Jesúsnoa nō Nios fe nīpaxatiro. Akka a Moisés keneniōnoa nō ato tāpimamisma, sharafiano keyokairoko nikanōfo nō ato yoipanā. Akka a Moisés yoini keskara keyokōi nikakanamax Nios ika ano katiroma. Askatamaroko Niospa Yōshi Sharapa noko imasharapake-naka Nios ika ano nōmāi Cristo Ifofakē.

<sup>7-8</sup> Epa Niospa nōko xinifo israelifo nā ato yoipaiyai keskara ato yoini nikanōfo. Tokiri pāraki kenexō ato yoini. Epa Niospa Moisés tokiri kene ināino luz keskara fafekōini. Nāskatari Moisés femānā fafekōini. Nāskakē mā Moisés māchi keya ariax fotokē nōko xini israelifāfe ōitiroma inifo. Nāskax fafekōifiax fenāmāshta matapakeni. Akka Epa Niospa Moisés yoini keskara sharakōifixō noko imapakexatiroma. Sharakōifixō, akka iskaratīa Niospa Yōshi Sharapa noko yoiai keskara nāroko sharafinakōia. <sup>9</sup> Akka nā Moisés yoini keskara sharafi-ano nikakanamax nakanax Nios ika ano katiroma. Akka iskaratīa Niospa āfe Fake Jesúsxō noko chaka soaxotiro nō afe isharapakexanō. Nā sharafinakōia afaa fetsakai askarama. <sup>10</sup> Epa Niospa Moisés yoini keskara sharafiax, akka Epa Niospa Jesúsxō noko axoni keskara nāroko sharafinakōia. <sup>11</sup> Niospa meka shara Moisés fiaino fafesharakōini. Mā fiax āfe femānā fafesharakōini, Moisés. Āfe femānā fafesharakōifiax fenāmāshta matapakeni. Epa Niospa Moisés yoini keskara sharafiax, akka Epa Niospa Jesúsxō noko axoni keskara keyonakama nāroko sharafinakōia.

<sup>12</sup> Nāskakē mā nō tāpikōia Epa Niospa Jesúsnoa yoini keskara keyonakama. Nāskakē ranotama nō Jesúsnoa yorafo yoitiro. <sup>13</sup> Nōkai Moisés keskarama. Moisés āfe femānā fafeaino samapa feopomeni israelifāfe ōinōfoma nāskax fenāmāshta matapakeni. <sup>14</sup> Akka nōko xinifāfe nikasharapaonifoma, āto ōitimāi fēstokōi keskarakē. Iskaratīari nōko kaifo nāskaraforti. A Moisés ato yoini keskara ato kirika anexonaifono ato nikakaspakanax. Nāskakaxō Epa Niospa meka tāpisharatirofoma. Akka Cristo fistichi ato shināmatiro nā ōiti fēstoa keskara inōfoma. <sup>15</sup> Iskaratīari nā Moisés yoini keskara ato anexonaifono āto ōitimāi fēstokōiano shināsharapanāfāfe. <sup>16</sup> Askafikaxō iskaratīa a Moisés keneni keskara anā shinākaxoma nōko Ifo chanīmara fakaxō aōnoa fisti shinātirofo. Nāskakē anā feopomea keskara ixikakima. <sup>17</sup> Niospa Yōshi Shara nō Ifofaax nofe ikaino afaa fetsa nōko ifo itiroma, noko ikixikī. <sup>18</sup> Akka nōko ōitikai fēstoa keskarama. Nōko Ifāfe āfe meka nō nikasharakōitiro. Āfe Yōshi Sharapa noko ikixō noko fetsafatiro a keskara shara nō inō. Akka mā

noko fetsafaano nõ sharakõi ixii. Nãskakẽ fetsafãfe noko õikakĩ tãpitirofo nõ shara isharakẽ. Nã feisiti xinĩ chaxaino fafeai keskara noko õikakĩ nõko Ifo Jesús tãpitirofo afe keskaramãki.

#### 4

<sup>1</sup> Akka Epa Niospa noko shinãkĩ noko yoini ãfe meka shara Jesucristoõnoa nõ yoifofãfofãinõ. Nãskakẽ nõ shinãchakaima, nõ Niospa meka yoiki xateima. <sup>2</sup> Nãskakẽ nõ afaa one chakafamisma rãfixikima, a afara one chakafamisfo keskafakĩ. Askatari nõ tsoa pãramisma. Askatari nõa nõ Niospa meka fetsafaxõ yoimisma. Akka Niospa tãpia meka chanĩma fisti nõ yoimiskẽ. Nãskakẽ mã nokoki inimasharapainõ, nã nõ afarafo shara faito õi. <sup>3</sup> Na meka shara Jesúsnoa nõ yoimis nikakaspaifono nã onea keskara. Nãskakẽ tãpikanamax oa fẽstoa keskarafo. Nãskakanax omiskõipakenakafo. <sup>4</sup> Nãfofi nã niafaka chaka ãto ifoxõ ato yoimis. Nãskaxõ nã õiti fẽstoa keskara ato faano na meka shara Jesúsnoa tãpitirofoma. Nã yora fẽxõ luz ota sharafiano õitiroma keskarafo. Nãskaraxori Jesús finakõia tãpitirofoma. Nãskatari tsõa tãpitiroma Jesús Apa keskara sharafinakõifiano. <sup>5</sup> Akka nõkai nõa nõ nokoõnoa nõ mato yoimisma mã noko ifofanõ. Askatamaroko nõ mato yoimis Jesucristo mãto Ifo inõ. Nõko Ifokẽ aõ noixõ nõ yonoxosharapai. Akka nõ mato axosharapai Cristoõnoa mã tãpinõ. <sup>6</sup> Niospa pena onifayoxoma fakishkẽ yoini pena inõ. Nãskarari nõ Jesús Ifofayamax nõko õiti nã fakish keskara chakakõi ipaoni. Akka Niospa Jesucristoõxõ nõko õiti mẽra noko chaxamashara aõxõ nõ tãpinõ afe keskara sharakõimãki.

#### *Pablo yoini nõ Jesús chanĩmara faax nõ isharatiro*

<sup>7</sup> Akka nõ afaayamafekẽ Niospa ãfe sharakõi noko mẽra nanea nõ ãfe meka shara Jesúsnoa ato yoinõ. Akka nã kesho noko keskarrari akai afaama. Samama moshitiro. Moshifitirokẽ a mẽra afara sharakõi nõ nanetiro. Nãskarifiai nõ afaayamafiano Jesús nofe rafea. Nãskakẽ yorafãfe tãpitirofo Niospa Yõshi Shara nõmẽra nanea. <sup>8</sup> Nã nõ imis keskara iskaratĩa ẽ mato yoinõ mã tãpinõ. Noko chakafafiakakĩ noko xatemakanima. Nãskafixõ nõ afeskaimëti ixõ, nõ shinãchakafikĩ mã nõ tãpia Epa Niospamãi noko axosharafafainaito. <sup>9</sup> Noko noikaspakakĩ noko chakafapaimisfo. Nãskakaxõ noko chĩfafofãsafamisfo. Noko askafafiaifono Epa Niospa noko potaima. Nãskakatari noko retepaikakĩ noko tsefeya fafiafono Epa Niospa noko kexesharamis nõ nayamanõ. <sup>10</sup> Jesús niyoano retepaipaonifo keskafakĩ nokori nãskari fakani retepaikakĩ. Noko retepaifiaifono nõko Ifo Jesús noko kexesharai noko retenõfoma. Nãskakẽ yorafãfe tãpitirofo mã Jesús nafianixakĩ

anã otoax nikē. <sup>11</sup> Nō Jesús yonoxonaito mēxotaima noko retepaikani. Akka noko retepaifiaifono nōko Ifo Jesús noko kexesharai noko reteyamanōfo. Akka nōa nō ifimetiroma nayamaxiki. Nāskakē tāpitirofo mā Jesús nafianixakī anã otoax nofe ikē. <sup>12</sup> Nāskakē Jesúsnoa nō mato yoimis fetsafāfe noko retepaifiaifono mā chanīmara faax mā afe ĩpaxanō.

<sup>13</sup> Akka Epa Niospa meka kirika ano yōra keneni iskafakī: “Ē Epa Nios chanīmara fakōini. Nāskakē Niosnoa ě ato yoi,” ĩxō kirikaki Niospa meka keneni yōra. Nāskarifiakī nōri Niospa meka chanīmara fakōixō nō mato yoi. <sup>14</sup> Akka mā nō tāpia nōko Ifo Jesús mā nafiakē Ēpa Niospa anã ōtofani afe ĩpaxanō. Nāskakē Apa Jesús ōtofani keskafakī mato yafi nokori ōtofaxii nō afe ĩpaxanō. <sup>15</sup> Akka nō omiskōikōi mato Epa Niospa meka yoi mā āfe meka chanīmara fakōinō. Nāskakē yora ichapafāferi Epa Nios nikakōikaxō, “Aicho, Epa Niosi, mī fāsi sharakōi,” faxinōfo.

<sup>16</sup> Nāskakē nō omiskōifikī nō shināchakaima. Nōko Ifokai nō kachikiri faima. Akka nōko yorari anã kerexma nō omiskōiaino. Askafixō nōko shinā mēra mēxotaima noko kerex fafafaīni. <sup>17</sup> Akka a nō niyoax nō omiskōiyoai akai afaama, samamashta keyoi. Akka nō Jesúsnoax omiskōiaito a noko sharakōi imai a keskarakai tsōa ōiyomisma. Nāfori keyonakama. <sup>18</sup> Akka nā nō omiskōiai shinātamaroko nā nō ōiyomisma nō shināi. Nios ika anoxō noko inimamapakenaka. Nāa nō shināi. Akka nā afaranā noko omiskōimanai samama keyoxii. Akka a Niospa noko chipo imai keskara keyonakama.

## 5

<sup>1</sup> Akka ě mato yoinō nikakapo. Pexe xiniax pāo ikax keyotiro. Nāskarifiāi nō naino nōko yora keyotiro anã nōko fero mēsho nō mēra inōma. Akka tsōakai noko yora fenafaxotiroma. Epa Nios fistichi noko yora fena onifaxotiro. Akka mā nō nai mēra kaax nōko yora fena shara ĩxii. Epa Niospa noko yora fena shara faxōano a anã keyonakama. <sup>2</sup> Akka nō fekaxtemis nōko yora fekaxkōimei. Nōko yora fenashara fapai nai mēraxō. <sup>3</sup> Akka nō naax, ĩnōko fero mēsho yoraya itiomamamē? Maa. Epa Nios fisti nō Ifofamiskē noko yora fena shara faxotiro nō afe ĩpaxanō. Nāskakē nōko fero mēsho yoramais nai mēranoax itiroma Epa Niospamāi noko yora fena faxōano. <sup>4</sup> Iskaratīa nono mai ano niyoax nōko yora omiskōiyoi. Askafiax nō nayopaima. Nō nayoamano Cristo onō noko yora fetsafaxoxiki nō isharapakexanō. <sup>5</sup> Nā Epa Nios fistichi noko onifani nō afe ĩpaxanō. Nāskakē āfe Yōshi Shara nō mēra nanea nō tāpinō noko yora fetsa faxoxiaino.

<sup>6</sup> Nāskakē nō shināsharafafāini nono mai ano niyoxō, nayoxoma, nōko Ifo Jesús ari kayoxoma mā nō tāpia. <sup>7</sup> Nāskakē nā Jesús ika ano ōiyamafikī nono mai anoxō nō chanīmara fafafafāini. Nāskaxō chipo nō ōixii Epa Niospa noko fet-safaano. <sup>8</sup> Akka mā nō tāpisharakōia Epa Niospamāi noko yora fetsa ināino. Akka mā nō nakī nōko yora nō ratafainikai nō sharafinakōia ikikakī. Nāskakē nō inimasharakōi mā nō nai nōko Ifo Jesús femāi nō ikikai. <sup>9</sup> Akka nono mai ano nō niyoxō nōko Ifo nō yonoxosharayopai nokoki inimanō. Nāskatari nai mēraxori na fischisharapaiyai keskafakī nōko Ifo nō inimamapaisharakōi. <sup>10</sup> Akka nā chanīmara faafo tii Cristoki nokoxikani. Nāskatari noko yoipakexii nono mai ano niyoxō nō shara famismākī, askayamakī nō chakafamismāki. Akka nō afara shara famiskē afara sharakōi noko ināxii. Akka nō afara chakafamiskē afara shara noko ināpaifikī noko ināxima. Nāskakē nō fixiima. Nāskakē Jesúsxō nō yonopai sharakōi.

### *Pablo yoini Cristoōnoax nō Nios fe rafetiro*

<sup>11</sup> Akka Niospa noko yoia keskara nō ayamax nō rāfitiro. Nāskatari fetsafori nō ato yoipai nā Niospa ato yoiai keskara anōfo. Niospa noko tāpikōia nōmāi mēstekōi yoiaito. Nōkai ato feparapaima. Māri mā mā noko tāpikōia nō mato pāramisma. Nōko meka mēstekōi fisti nō mato yoimis. Nānori fisti māto shinā mēraxō mā shināpainō. <sup>12</sup> Akka kakapai nōa nō yoimesharapaima. Akka mēstekōi fisti nō mato yoimis, mā mā tāpia. Akka fetsafāfekai mato yoikōikanima mato feparapaikani. A yoiaifo anorikai yoimisfoma āa āto shinā mēraxō shinākaxō yoimisfo kakapaiyanā. Akka nōfi mato pāramisma, chanīma fisti nō mato yoimis. Nāskakē mā nokoki inimakōimis. Nāskaxō mā nokoōxō ato yoikī nokoōnoa mā ato yoisharatiro. <sup>13</sup> Chanīma, nō Nios noikī kerexkai nō yonoxofafāimis aōnoa fetsafāfe nikasharanōfo. Akka yorafāfe nokoōnoa yoimisfo iscafakakī: “Na Pablo feta yonomisfāfe shināsharamisfoma mēxotaima ato Niospa meka yoifofāsafamisfo omiskōifināfikakī,” ixō noko yoimisfo. Āa noko askafanōfokī mā nō tāpiakī Niosxō nō yonofikai mā āfe meka tāpinō. Akka nō mēstekōi shināsharakī nō mato yonoxosharamis. <sup>14</sup> Cristo noko noikī noko yoini nō āfe meka shara mato yoinō. Cristo keyokōi yorafoōnoax naani. Nāskakē mā nō naa keskara a nō iyopaoni keskara ixikima. <sup>15</sup> Akka mā Jesús nayoni yorafoōnoax keyokōi a keskara shara ixiki. Nāskakē a nō chaka ipaoni keskara ixiima. Nāskakē nā nō apaiyai keskara fisti anā nō shinātiroma. Cristoōnoax nō yonosharaxotiro. Cristo āa nokoōnoax nayoni. Nafiano Epa Niospa āfe sharaōxō anā otofani.

<sup>16</sup> Akka nã Jesús chanĩmara faafãfema fetsafoõnoa shinãifo keskarakai nõ anã atoõnoa anori shinãpakenakama. Nõri anori shinãyopaoni nõ anã askapaima. Cristoõnoari nõ chakakõi shinãyopaoni. Nõkai anã aõnoa anori shinãima. <sup>17</sup> Nãskakẽ Cristo nã Ifofaafo ato shinã fetsafaxõa anã shinãyopaoni keskara inõfoma, fena keskara shara inõfo. A Niospa fichipaiyai keskara fena keskara nõ ixii. Keyokõi fena keskara ixii. <sup>18</sup> Epa Niospa Cristoõxõ noko fetsafaa anã nõ noikaspanõma, nõ afe rafenõ. Askatari noko yoini aõxõ ãfe meka nõ ato tãpimanõ Epa Nios fe rafenõfo. <sup>19</sup> Epa Niospa Cristoõxõ keyokõi yorafo afe rafemapai anã noikaspanõfoma. Cristomãi noko nãxonikẽ Epa Niospa a nõ afara chakafamisnoa anã shinãima. Nã Epa Niospa noko yoia keskafakĩ nãnorikõi nõ mato yoimis.

<sup>20</sup> Akka Cristo noko nĩchini nõ ãfe meka mato yoinõ. Nõ ãfe meka mato yoi nã Epa Niospa mato yoiai keskara. Epa Niospa nokoõxõ mato yoi nã Cristo mato yoipaiyai keskafakĩ. Nãskakẽ nikakõikãfe Cristo mato nãxonikĩ mato chaka soaxoxiki. Nãskakẽ Cristo Ifofaxõ mato chaka xatekãfe Epa Nios fe rafexikakĩ. <sup>21</sup> Akka Cristo afaa chakafapaonima. Nãskafikẽ Apa Niospa nõko chakafo akiki nĩchini. Cristo afaa chakafayamafiakatsaxakĩ noko nãxoni Epa Niospa noko omiskõimayamanõ. Nã yora chaka keskarax nõko chakafoõnoax Jesús nani. Nãskakẽ nõ Jesús Ifofaino Niospa noko õitiro sharakõi nã nõ afaa chakafamisma keskara, nokoki inimakõikĩ.

## 6

<sup>1</sup> Akka nõ Nios feta yonomis ãfe meka mato yoikĩ. Nãskakẽ nõ mato yoisharapai Epa Niospa mato noisharakõiaino, mã shinãmakiyamanõ, ãfe meka mã kachikiri fayamanõ. Fetsafãfe anorima mato yoiaito nikayamakãfe. Askatamaroko Jesús meka shinãmakiyamakãfe. <sup>2</sup> Taeyokĩ Niospa meka yoimisto kirika keneni iskafakĩ Niospa yoiaino:

Ë mato shinãito, mã ea yoiaino ë mato nikai mã omiskõiaino. Ë mato ifinõ, ë mato axosharaxiki, ixõ yoini Epa Niospa. Nãskakẽ nikasharakãfe iskaratĩari Epa Niospa noko axosharapai noko ifixii.

<sup>3</sup> Nõkai mato afaa chaka yoipaima tsõa noko chakafayamanõfo. Akka nõ chaka niaito õikaki a Nios chanĩmara faamafãfe noko mekafatirofo. Nãskakẽ nõ afaa chakafapaima. <sup>4</sup> Akka nã nõ keyokõi Niosxõ aka keskara nõ mato õimamis nõmãi yonoxokatsaxakĩ. Noko omiskõimafiaifono nõ tenekõimis. Askatari fekaxteifinakõita nõ tenekõimis. Noko chakakõi famisfo, noko askafafiaifono nõ tenekõimis. <sup>5</sup> Nãskakaxõ noko koshamisfo, askatari karaxa mẽra noko ikimamisfo. Nãskatari yora chakafãfe noko noikaspakakĩ fãsi

noko mekafamisfo. Noko askafafiaino fekaxtekōiyanā nō yonomis. Askatari nō oxa tenekōimis. Nāskaxri nō fonāikōimis. <sup>6-7</sup> Noko askafafiaifono afaa chakafatama nōko ōiti mēraxō nō afaa chaka shināima. Nō Cristo fe rafeaito nā noko yoimis keskara mā nō tāpia. Noko chakafafiaifono nō atoki ōitifishkitama. Fena fenakima nō tenekōimis. Nāskax fetsafo fe rafepaikī nō ato sharafa fafāfāimis Niospa Yōshi Sharaōxō nō ato askafamis ato pārakīma nō ato noikōimis. Nō askakī keyokōi nō mato ōimatiro nōmāi Niospa yonomatixō. Satanás noko afara chakafamapaifiaito Niospa Yōshi Sharapa nā Nios keskara shara noko imaino āfe Yōshi Sharaōxō nō afara chaka potatiro. <sup>8</sup> Akka fetsafāfe nokoōnoa meka shara yoifiaifono fetsafāferi nokoōnoa meka chaka yoimisfo. Akka fetsafāferi na yorafo sharakōira noko fafiaifono fetsafāferi noko īchamisfo. Nō chanīmakōi yoifimiskē noko feparamisfo ixō nokoōnoa fetsafāfe yoimisfo. <sup>9</sup> “Pablo fe rafeakai tsoama. Nōkai ato ōimisma,” noko fafiaifono akka fetsafāfe Nios Ifofakōikaxō noko noikani. Nāskatari nō napaiifax nō nia. Noko omiskōimafiakakī noko tsōa reteama. <sup>10</sup> Akka nō shināmitsafiaito nōko Ifo Niospa noko inimamamis. Akka afaamaisfixō nō Niosxō nō fetsafo imasharakōimis, Nios Ifo shara faifono. Nō afaamais keskarafix nō aya a Niospa noko ināi. Akka nā keyokōi Niosnā nōkonāri.

<sup>11</sup> Efe yora mīshtichi Corinto anoafāfe, nā nōko ōiti mēraxō nō shināi keskara nō mato yoimis. Nō mato fomāmisma. Keyokōi nōko shinā mēraxō nō shināi keskara nō mato yoimis mā tāpinō. <sup>12</sup> Akka nō mato noikaspamisma. Akka māroko noko noisharamisma. <sup>13</sup> Akka iskaratīa ē mato yoi āpa fake noisharakī yoitiro keskafakī, nokori noisharakāfe nā nō mato noiai keskafakī.

*Nā Nios chanīmara faafāfema akaifo keskara ayamakāfe*

<sup>14</sup> Nā Jesús chanīmara faafoma fe rafeyamakāfe. Akka na yora Nios Ifofaafāfe shināifo keskarakai nā yora chakafāfe shinākanima. Nāskarifiai pena fe fakish osinātiroma. <sup>15</sup> Nāskarifiakī Cristo feta Satanás anoris shinātirofoma. Akka nā Cristo Ifofaafāfe fichipaiyaifo keskara nā Cristo Ifofaafāfema askara fichipaikanima. <sup>16</sup> Nā Cristo chanīmara faafāfe ichanāmisfo Epa Nios kīfinōfo. Akka nā Ifofaafoma ato fe ichanātirofoma afara nimofa fakaxō kīfitirofo na nōko niosra ikaxō. Nāskakē nā rafe osinātiroma. Akka afāfekai Epa Nioskōi kīfipaikanima. Akka Epa Nios nō mēra ika. Nāskakē nō Niospa pexe keskara. Nōko Nios nia. Epa Niospa yoini iskafakī:

Ēfi ato fe ikikai, ato fe rafexikī. Ē āto Nios ikaino afo efe yora ikani,  
ixō yoini. <sup>17</sup> Askatari Epa Niospa yoini iskafakī:



Akka nã Cristo chanĩmara faamafãfe akaifo keskara aya-  
makãfe. Ato fe rafeyamakãfe afaa chakafaxikãkima. Mã  
askaino ã mato ifikai,  
ixõ yoini. <sup>18</sup> Askatari nã afama mĩshti atiroto ato yoini  
iskafakĩ:

Akka ã mãto Epa ixii. Akka mã ãfe fakefo ixii,  
ixõ nõko Ifo Niospa yoini.

## 7

<sup>1</sup> Ëfe yora mĩshtichi, Epa Niospa nã noko yoiyoni keskara  
shara. Nãskakẽ nõ isharanõ keyokõichi nõko chaka nõ  
xatenõ. Afarafãfe nõko yora iyamai nõko õiti mẽraxõ noko  
chakafamatiro nãfo nõ xatekõinõ sharakõi ixiki. Nõ Epa Nios  
noikõiax a keskara shara nõ ipai.

*Corinto anoxõ chaka shinãyopaonifo. Akka iskaratĩa mã  
shara shinãkani*

<sup>2</sup> Akka nã yora fisti keskara nõ inõ noko noisharakãfe.  
Nõkai mato chakafamismaki. Askatari nõ mato afaa  
chakafamamisma, askatari nõ mato pãramisma. <sup>3</sup> Ëkai nã  
ã mato yoiyai keskafakĩ mekakĩ chakafakĩ ã mato yoimisma.  
Akka ã nayoxoma ã mato mẽxotaima noikõifafãini. Nãskatari  
mẽ nafiaxõ mẽxotaima ã mato noikõixii. Nãskakẽ tsõa noko  
paxkanã fatiroma nã yora fisti keskaramãi nõ ikẽ. <sup>4</sup> Mã  
nõ tãpikõia mã noko noikõiyana, mã Jesús Ifo sharakõi fakẽ.  
Nãskakẽ nõ yorafo yoimis mã isharakõimiskẽ. Nãskatari nõ  
omiskõifi nõ inimakõimis.

<sup>5</sup> Akka nã nõ Macedonia ano nokoitatĩa nõ teneama,  
mẽxotaima fanĩma mĩshtinoax fekaxteifãfe õi. Akka nõ  
shinãchakakõimis. Askatari a Nios Ifofaa fetsafori nõ ato  
shinãkõimis, mã nõko Ifo Jesús kachikiri faafora ixõ. <sup>6</sup> Akka  
nã shinãmitsaifo Niospa ato inimamamis. Nãskakẽri nokoki  
Tito nĩchiano nõ inimakõimis. <sup>7</sup> Akka mã nokoki Tito nokoxõ  
noko inimama noko yoia iskafakĩ: “Corinto anoafãfe ea in-  
imamakõiafo,” ixõ Titopa noko yoia. Askara nõ nikai nõ  
inimakõia. Askatari noko yoia mã eõnoa yoikĩ iskafakĩ: “Nõ  
Pablo shinãkõi nokoki samamashta nokopainõ,” ixõ mã yoikẽ:  
“Nãskaxori nõko õitinĩ nõ shinã chanĩma nõ afara chakafamis.  
Akka nõkai anã askapaima. Nõ Pablo shinãi,” ixõ mã yoiaino  
Titopa ea yoia. Nã keskara nikai ã inimai finasharakõi.

<sup>8</sup> Akka ã mato kirika kenexõ manamakĩ ã mato  
shinãmitsamana. Nãskax ãri shinãmitsakõiyoa. Akka anã ã  
shinãmitsaima. <sup>9</sup> Akka iskaratĩa ã inimakõi. Akka ã mato  
shinãmitsamanax ã inima. Akka mã shinãmitsayanã mã  
Epa Nios kĩfiti iskafakĩ: “Epa Niosi, nõ afara chakafakĩ noko  
raefafe nõ afara chakafamiski,” ixõ mã yoikĩ. Nãskakẽ  
ã inimasharakõimis. Mã askafaino Epa Niosri matoki  
inimasharakõi. Akka ã mato kirika kenexõ manamakĩ ã

mato yoikī chakafaama. Askatamaroko ě mato yoisharakōia mato axosharayanā. <sup>10</sup> Akka nō shinākī iskafatiro: “Ooa, ě afara chakafakī, Niosri ě chakafaa,” ixō shinākī nōko chaka nō xatepaitiro Epa Nios Ifofapaikī. Nō askaito ōikī Epa Niospa noko ifitiro nō afe ĩpaxanō. Nāskaxō nō shinātiroma iskafakī: “Ooa, ěfe chaka ě xateama shara ě ikerana. Niosri ě Ifofaama ě shara ikerana,” ixō anori nō shinātiroma. Akka nā chanīmara faamafāfe nō shināi keskara shinākanima. Iskafakī shināmisfo: “Ooa, nō afara chakafaa,” ixō shinākani āto ōiti mēra shināmitsakanima Nioskai shināpaikanima. Nāskax nakanax Epa Nios fe ipanakafoma. <sup>11</sup> Akka mā kai askarama. Shinākapo. Mā mātō ōiti mēraxō mā mā shinā anā mā Nios Ifofai mātō chaka xatepaikī nā Niospa fichipaiyai keskafakī. Nāskax mā ratekōia Niospa keyokōi noko omiskōimaxira ikax. Nāskakē mā mā itipinīkōia ika a afara chakafaifo ato omiskōimaxiki. Nāskaxō mā fāsikōi ato yoia āto chaka xatenōfo. Nāskakē mā mā noko ispanākai ato keskarama. Nāskakē mā ea fichisharapaikōi ě mato ōikanō mā isharakōiyamākī. <sup>12</sup> Akka ěfe kirika kene fixō mā ea noiyanā mā ea nikakōisharamis. Akka ě kirika keneama, nā feronāfāke afara chakafaaōnoa omiskōimakāfe ixō. Askatari nā feronāfāke omiskōimanafoōnari ě kirika keneama. Akka ě mato kirika kenexona mā tāpinō mā ea noimākai. Akka mā ea nikakōimis. Nāskaxō mā tāpitiro māmāi ea noikī Niospa ferotaifi.

<sup>13</sup> Nāskakē nō inimasharakōi, māmāi noko noisharakōiaino nikakōisharayanā. Akka Titori matoōnoax inimasharayamea. Nā Tito inimaito ōi nōri inimaifinasharakōiyamea. <sup>14</sup> Akka Tito kayoamano ě yoiti iskafakī: “Na Corinto anoafō sharakōifo,” ixō ě yoiti. Nāskakē Tito mato mēra kaano mā ifisharakōiyamea. Nāskakē ě matoōnoax rāfiyameama. Akka chanīma fisti nō mato yoimis. Nā ě matoōnoa Tito yoia keskara chanīmakōi Titopa mato ōia. <sup>15</sup> Tito matoki nokoxō ōia mā rateaito mato ōita noko Titopa ferateneira ikax. Nāskakē pishta rateyanā mā Tito nikakōita. Nāskakē Titopa mato shinākī, mato noikī finakōi. <sup>16</sup> Ĕri matoki inimakōi. Akka iskaratīa mē tāpia nā ě mato yoiai keskara mā amiskē.

## 8

*“Afarayaxō fetsafo ināsharakāfe,” ixō Pablo Corinto anoafō yoini*

<sup>1</sup> Akka meka fetsari ě mato yoinō mā tāpinō. Mā Epa Nios Macedonia anoxō chanīmara faafono Epa Niospa ato noikī āto shinā mēraxō ato shināmashara fetsafori kori ināsharakōinōfo. <sup>2</sup> Akka Macedonia anoax omiskōifikakī Niosnoax inimakōikakī, afaayayamafiakaxō nā yora

afaamaisfo ato afara fetsa ināsharakōiafo. <sup>3</sup> Akka nā ē ōia keskara ē mato yoinō. Fetsafāfe afaayayamafiakaxō fetsafori ato afara ato ināsharakōiafo. Ato afaa fīshkofafoma. Nāskakē atonā afaa ichapa nēteama. <sup>4</sup> Iskafakī ea yoiāfo ato ināsharapaikī: “Nā Jesús chanīmara faa fetsafāfe kori yopakani. Nāskakē nōri ato afara fomasharapai,” ea faāfo. <sup>5</sup> Nō shināyamea kori fistis noko inākanira ixō, Jerusalén anoāfo a Nios Ifofaāfo ato foxopaikī. Akka noko kori ināyokaxoma taefakī Nios ināyameāfo, iskafakī yoiyanā: “Ifo, nōfi mefe yorakī nā mī noko afara amapaiyai keskara mī noko yoitiro,” ixō yoiyameāfo. Nānori yoikāta nokori yoiyameāfo iskafakakī Niospa fichipaiyai keskafakī: “Nōri nō mato nikakōinō,” ixō noko yoiyameāfo. <sup>6</sup> Titopa taefakī mato yoiyoni iskafakī: “Māto korifo ichafakāfe a afaamaisfo Jerusalén anoāfo ato ināxikakī,” ixō mato yoiyoni. Nāskakē nō Tito yoiyamea iskafakī: “Nā mī yoimis keskafakī anā ato yoife nā afaamaisfo Jerusalén anoāfo ato kori inānōfo. ‘Mā ato noikī mā ato kori inātiro,’ Corinto anoāfo ato yoife,” ixō nō Tito yoiyamea. <sup>7</sup> Akka mā Jesús chanīmara fakī finakōiyanā mā Niospa meka mēstekōi yoimis, āfe meka tāpisharakōiyanā. Chanīmakōi mā Jesús yonoxosharakōiyanā mā noko noisharakōi. Nāskakē nā mā afarafo shara faa keskafakī nā afaamaisfori mā ato ināsharatiro. Niosxō mā ato noikōikī inimasharakōikai mā ato inātiro, fetsafo finōkōinīfofā nā mā imis keskayanā.

<sup>8</sup> Akka ēakōi ē mato yoima nā afaamaisfo mā ato kori inānō. Akka ē tāpipai fetsafāfe ato kori ināpaiyai keskafakī māri ato ināpaimākai. Askayamakī māto meka fistichi mā yoiaraka nō ato ināira ixō. Akka askakīma mā ato noikōiyanā mā ato ināsharatiro. <sup>9</sup> Mā mā tāpia nōko Ifo Jesucristo nai mēranoax nāmā fotoyoamax afama mīshtifoya iyopaoni. Afaakai yopa-paonima. Nāskafixō noko noikōikī āfe afama mīshtifo keyokōi potāferani. Nāskax nokoōnoax afaamais iyopaoni nō aōnoax isharpakexanō.

<sup>10</sup> Akka nā ē shināinoa ē mato yoinō mā tāpinō. Akka mā xinia fisti finōa mākai inimakōiyanā kori ichafaxō mā ato ināma. Akka taefakī nā afaamaisfo mā ato noikī mā ato kori ināpaikī mā fiyamea mā mekea ato chipo ināxiki. <sup>11</sup> Nāskakē inimakōikī mā kori ichafakī taefati keskafakī iskaratīari in-imayanā ato ināsharakāfe anā afaa yopanōfoma. Nā mā ato ināpaiyaiti ato inākāfe. <sup>12</sup> Akka mā ato ināpaikī mā ato inātiro. Askatari mā afarayaxō mā ato ināsharaito Epa Niospa tāpia. Askatari mā afara ichapayaxoōma mā ato ināitori nāri Epa Niospa tāpia. Nāskakē inimakōi.

<sup>13-14</sup> Akka ē mato iskafakī yoima: “Ichapakōi ato inākāfe,” ixō ē mato yoima. “Askatari keyokōi mā ato ināx mā afayaima,” ixō ē mato yoima. Akka iskaratīa mā afara

ichapaya. Nāskakē nā afara yopaifo mā ato inātiro. Akka māri afara yopaito nāfāfe afara ichapayakaxori matori inātirofo. Mā askai mā ranā mā kexenōnāsharax mā isharakōitiro afaa yopaxikima. <sup>15</sup> Akka kirika ano Niospa meka kenea is kai: “Akka nōko xinifo tsōa istomaxō a piaifo Niospa ato ināpaoni. Akka nā ichapa fiato texefapaonima. Akka nā ichapama fiatori afaa yopapaonima,” ixō kirika ano Niospa meka yōra kenenī. Nāskakē yora fetsafo nō afara ināito, Niospari noko afara fetsafo noko inātiro nō afaa yopayamanō.

### *Tito fe rafeafo*

<sup>16</sup> Ē matoōnoa shinākōiai keskafakī Titopari āfe ōiti mēraxō mato shinākōi, Epa Niospa shināmanaino. Nāskakē nō Epa Nioski inimakī nō aicho fai. <sup>17</sup> Akka iskafakī nō yoiyamea: “Corinto anoafo anā ato ōitāfe ato yoisharaxikī,” ixō nō Tito yoiyamea. Nānori nō yoiaino inimayamea. “Aicho, ē ato ari kaikai ē ato yoisharai kaikai,” ixō noko yoiyamea. Akka ē shināi nō yoiyai fistiōnoax kaima. Āari matoki kasharapai kai. <sup>18</sup> Akka nā nofeta Nios Ifofamis fetsa nō Titoya nīchi. Nā nofe yora, nāatori Jesúsnoa ato yoisharamis. Nāskakē aōnoa keyokōichi meka shara yoimisfo. <sup>19</sup> Akka nā Nios chanīmara faafo tiito ichanākaxō na feronāfake katonifo, nofeta nā kori yopaifo foxōikanō. Nios shinākī na kori nō ato ināyanā nōko Ifo sharara fanōfo. Askatari nō mato feta nō ato ināpai tāpinōfo nō ato axosharapai.

<sup>20-21</sup> Nā afaamaisfo nō ato kori foxosharapai. Nāskakē yorafāfe ferotaifi nō ato ōimasharapai noko chakafakī mekafayamanōfo. Na kori ichapa nō ato foxosharapai noko iskafanōfoma: “Nōko kori ranāri oneafo,” noko fanōfoma. Nāskakē nōko Ifāfe ferotaifi nā yorafāfe ferotaifiri nō ato ōimapai nō isharakōixō.

<sup>22</sup> Akka nā nofe yora nā Jesús Ifofamis fetsa Tito yafi nō mato nīchi. Nā feronāfake mā nō ōimis nāato Jesús chanīmara fakōimis. Nofeta Jesús yonoxosharakōimis. Akka nāato mato nikamis mā Jesús Ifofasharakōixō nā afaamaisfo mā ato ināsharakōiuito. Nāskakē mato ari kapaimis mato feta ato shara faxiki. <sup>23</sup> Akka mā mā Tito ōimiski. Nāato efeta mato yonoxosharamiski. Nā efe rafemis Jesús yonosharaxoxiki. Nā Jesús chanīmara faafo raferi afe mato ari fokani. Akka nā Jesús chanīmara faafāfe ichanākaxō ato katonifo mato ari fonōfo. Nā rafeta Nios Ifofasharakōimisfo. Nāskakē ato katonifo mato ari fonōfo. <sup>24</sup> Akka mato ari nokofaifāfe ato ifisharakōikāfe nā Nios Ifofafo ato katonifo ato tāpinōfo mā ato ifisharaito. Mā ato askafaino nā ē matoōnoa yoisharamis keskara tāpitirofo chanīmakōikē.

## 9

*Nā Nios Ifofaafāfe Corinto anoafō feta Macedonia anoxō nā Nios Ifofaa fetsafori ato kori manamanifo*

<sup>1-2</sup> Akka nono Macedonia anoxō ē kirika kenexō ē mato fomakī ē mato yoikī iskafapaima: “Ato kori fomakāfe,” ixō ē mato yoipaima. Akka mē tāpia mā xinia fisti aka nā Jesús chanīmara faa fetsafāfe afara yopaifāfe mā ato ināpaiyaito. Akka ē Macedonia anoafō ē yoikī iskafaa: “Acaya anoxori ato kori fomapaikani Judea anoafō,” ixō ē yoia. Ē ato askafaito nikakaxō akairi ato kori fomasharapaikani. <sup>3</sup> Nāskakē ē Tito yafi nā afe rafeafo ē matoki nīchi nā ē matoōnoa yoisharai keskara chanīmakōikē tāpinōfo. Ē Macedonia anoafō ato yoimis iskafakī: “Nā Corinto anoafāfe mā itipinīshara faafo ato kori fomaxikakī,” ixō ē ato yoia. Akka ē Tito yafi a afe rafeafo ē nīchi mato ano nokokaxō ōinōfo nā ē matoōnoa ato yoia keskara chanīmamākī. <sup>4</sup> Akka Macedonia anoafō efo foaifono ē ato fe mato ano nokoxō ōia mā kori ichafayamano ē mātō rāfiaino māri mā rāfipaitiro. <sup>5</sup> Nāskakē ē shinā Tito yafi afe rafeafo rekē mato ari nīchixiki mato feta kori itipinīfanōfo ato fomaxikakī nā afaamaisfo. Akka afetiama mā mā shināxō yoiyoni: “Nā afaamaisfo nō ato kori fomanō,” ixō. Akka ē mato yoia: “Ato kori inākāfe,” ixō. Māakōi mā ato ināi. Akka nāskara shara mā ato ināpaiiki mā ato inātiro.

<sup>6</sup> Nāskakē shināsharakāfe. Akka nō fimi exe fisti fanaxō ichapa fitiroma. Akka nō fimi exe ichapa fanano nō fimi exe ichapa fitiro. Nāskarifiakī nō fetsafo afara ichapama inākē nokori Niospa ichapama ināxii. Akka nō inimayanā fetsafo ichapa ināito nokori Niospa ichapa inātiro. <sup>7</sup> Nā āto shinā mēraxō shināifo keskafakī fetsafo inātirofo. Nāskakē iskafakī shinātirofoma: “Ooa, ē ichapama ināpaifaito ea yōkarifaito ē inā.” Askatari iskafakī shinātirofoma: “Akka ē ināyamaino ekeki ōitifishkitiro. Akka ē ināi ekeki ōitifishkiyamanō,” ixō anori shināyamakāfe. Askatamaroko inimayanā inākāfe. Nā fetsafo ato afara ināi inimamis nā Niospa noikōi. <sup>8</sup> Akka nā mā fichipaiyai tii keyokōi Niospa mato inātiro afara sharafo fetsa fetsatapafo mā afaa yopanōma. Askatari nā afara yopaifo mā ato ināno, Niospa keyokōi tāpia mato sharafa fafafaītiro māri fetsafo shara fanō. <sup>9</sup> Niospa meka aōnoax kirikaki kenea iskai:

Feronāfake sharapa nā afaamaisfo afara ichapa ato ināsharamis. Nāskakē Epa Niospa nā feronāfake axosharaino mēxotaima ato afara ināsharatiro, ixō kenenī. <sup>10</sup> Niospa fimi exefo onifani. Nāskakē nō fimi exe fanatiro. Chipō Niospa āfe fanafō foaimasharaxotiro pisharanō. Nāskarifiakī mā afara yopaito Niospa mato ināsharatiro. Afara ichapakōi mato ināno mā inimayanā nā Nios Ifofafo

Jerusalén anoafo mā ināsharafafāitiro. <sup>11</sup> Chanīma, Niospa mato afaa fīshkoima afara ichapa mato ināi māri ato afara ichapa inānō. Akka nā afara yopaifo mā ato ināi nāfo nō ato foxoxii. Nāskakē inimayanā yoixikani iskafakī: “Aicho Epa Niosi, mī fāsi sharakōi,” ixō yoixikani. <sup>12</sup> Akka mā ato afara ināsharaino nā afaamaisfāfe fixikani. Nāskakē mā fīkaxō inimayanā Epa Nios yoixikani iskafakakī: “Aicho Epa Niosi, mī noko shara famis,” ixō yoixikani. <sup>13</sup> Mā ato afara ināsharano nā afaamaisfo inimakōixikani mā ato ināsharano. Nāskakē yoikī iskafaxikani: “Aicho Epa Niosi, nā noko afara ināifāfe mī meka nikasharakōimisfo. Jesús nōko Ifo mia famisfo. Mī ato yoia keskafakī noko ināsharafa. Fetsafori nāfāfe afara ato ināsharafa. Nāskakē mā nō ato tāpikōia chanīmakōi mī Fake Jesús āto Ifokōi,” ixō nā afaamaisfāfe yoixikani. <sup>14</sup> Nāskakē mato Epa Nios kīfixoxikani. Mā Niosxō ato afara ināsharakē, yoikī iskafaxikani: “Epa Niosi, mīōxō na yorafāfe noko afara ināsharafa. Aicho Epa, nō ato fāsi noikōi. Atori shara fafe,” ixō mato Epa Nios kīfixoxikani. <sup>15</sup> Aicho Epa Niosi, mī Fake Jesucristo mī noko ināsharakōini nofe rafesharapakexanō. Nāfi sharafinakōiakī aōnoa nō yoisharapaikōi nōkai tāpiama afeskaxomāi nō yoisharakōinō.

## 10

*“Niospa ea nīchini Jesúsnoa ē mato yoinō” ixō Pablo ato yoini*

<sup>1</sup> Iskaratīari meka fetsari ē mato yoisharapai. Efe yora mīshtichi, ea nikasharakāfe. Jesucristokai meka mitsisipato noko yoimisma. Noko yoikī fenāmāshta noko yoisharamis nō āfe meka nikasharakōinō. Nāskarifiakī ēri Cristoōxō mato fenāmāshta yoisharapai mā tāpinō. Akka eōnoa yoikī iskafamisfo: “Pablo nofe ixō fenāmāshta noko yoiaito nō ōimis. Nāskafixō noko kirika kenexoni mitsisipakai noko kirika kenexonaito nō ōimis,” ixō ea yoimisfo. <sup>2</sup> Ē matoki nokoxō fāsi mekakai ē ato yoipaima ea nikanōfo. Askafixō ea nikayamafiaifono fāsi kerexkai ē ato yoitiro. Akka nā ea chakafakakī mekaifaifo ato nikayamakāfe. Akka eōnoa yoi iskafamisfo āa chanīkani iskakani: “Pablo noko yoi nā Nios Ifofaamafāfe yoiaifo keskara. Niospa shināōxōkai noko yoima,” ixō yoimisfo. Akka ē matoki nokoxō ē mato yoitiro nā Nios Ifofaamafāfe shināifo keskara ē mato yoimisma. Niospa shināi keskara fisti ē mato yoimis. Akka mē nokoxō fāsi mekakai ē ato yoixii tāpinōfo. <sup>3</sup> Chanīma, nono mai ano nō ika nā Nios Ifofaafoma fe. Akka nā Nios chanīmara faamafāfe fetsafo finōpaiyaifo keskai nōkai askamisma nā noko noikaspaifo ato finōxiki. <sup>4</sup> Akka a Nios Ifofaafoma a Satanás nikakī mato chanīkī tāpimapaikani mā anā Jesús Ifofayamanō. Mato pārapaikani. “Nō Nios Ifofara,” ikani. Askatamaroko

nō Nios nikakī nō mēxotaima yoimis chanīmakōi. Nāskaxō Nios āfe sharaōxō nō ato xatematiro afara chaka anā yoiyamanōfo. <sup>5</sup> Epa Niospa noko yoiaino nō fetsafo tāpimatiro āa chanāifo, “Nō Niospa meka tāpisharakōiakī,” ikanaifo, kaka-paiyaifo. Akka nō Niospa sharaōxō fetsafo nō ato tāpimatiro nā chanīmisfo Niospa meka tāpisharafoma. Shara shināfoma. Epa Nios Ifofaima. Niosxō nō ato yoimis Nios Ifofanōfo. <sup>6</sup> Akka ea Jesús nīchini āfe meka ē mato yoinō. Nāskakē mā Jesús yafi ea nikakōixō mā anā afaa chakafayamaino ē mato afeskafatiroma. Akka mā noko nikakaspaito ē mato omiskōimatiro.

<sup>7</sup> Akka mā ōikī shināi oa shara keskaraxō fetsafāfe yoiaifono iskafakī: “Cristo ea nīchini āfe meka ē mato yoinō. Akka Pablokai ea keskarama,” ixō mato yoimisfo. Akka nāfāfe shināsharakaxō tāpitirofo eari Cristo nīchinikē āfe meka shara ē mato yoinō. <sup>8</sup> Nōko Ifo Jesús ea yoimis keskara ē mato yoitiro. Mato afaa chakafamatama nōko Ifo ē mato Ifofamasharapai mato ōiti fēpeaxosharaxiki. Ē anori mato yoi ēa kakapaitama, ēroko mato yoisharapai. Ē anori mato yoikai ē rāfima. <sup>9</sup> Akka ē mato kirika kenexō ē mato ratepaima mā mesenōma. <sup>10</sup> Akka fetsafāferi eōnoa yoikī iskafamisfo: “Pablo noko kirika kenexokī noko feratekōiaito nō ōimis. Akka askafiax nofe ikē nō ōia afaamakōi nō ōimis. Āfe mekakai mitsisipama,” ixō eōnoa yoimisfo. <sup>11</sup> Nānori eōnoa yoifimisfono ē mato ari samama kaxō ē ato tāpimaxii. Nā ē mato kenexona keskafakī nānorikōi ē mato yoixii.

<sup>12</sup> Fetsafāfe mato yoimisfo iskafakī: “Nōfi afara tāpikōiakī nō mato tāpimasharakōitiro,” ixō mato yoimisfo. Nāskarafo ichanākanax āa ranā yoinākani iskakani: “Noko keskarakai tsoama. Nores fisti nō tāpisharakōia,” ikanax kakapaimisfo. Nāfo tatimakōifo afaakai tāpiafoma. Nāskakaxō nāfāfe anorima afara chaka yoimisfo. Akka ēkai ato keskarax ē sharakōi ē itiroma ēroko ato keskarax. <sup>13</sup> Akka nōkai anori yoipaitiroma. Nā Niospa noko yoiai keskara fisti nō mato yoitiro. Noko yoini āfe meka shara fisti nō mato yoinō. Nā fisti nō mato yoimis. Akka mā ika nā Niospa ea nīchini ano. Akka ē kani Corinto anoxō mato Niospa meka tāpimaxiki. <sup>14</sup> Nāskakē ori fetsa ari ē kanima, nā ea nīchini ano ē kani. Akka nā nō mato yoiai keskara chanīmakōi. Nōkai kakapaimisma. Nā Niospa noko yoiai keskara fisti nō mato yoitiro. Akka nō mato Niospa meka yoikī taefatani Jesucristoōnoa meka shara mā nikamiskēma. <sup>15</sup> Akka nā ē kamisma anoxō fetsafāfe ato yoiafono nō ato yoia ixō nō ato yoimisma. Akka nō mato yoi nā nō mato afara axosharamis fistiōnoa. Akka nā fetsafāfe mato axomisfoōnoa nō yoimisma. Akka mā mā Jesús

nikasharai. Nāskapainō. Mēxotaima mā nikasharakōifafāinō. Akka mā ea ifisharakōiano mēxotaima ē mato yoisharatiro nā Niospa fichipaiyai keskafakī. <sup>16</sup> Nāskakē mai fetsa ari chaikōi mato finōfāi ē kapai Jesúsnoa ato yoixiki nā Niospa meka nikamisfoma ari. Akka nārixō mā fetsafāfe ato yoiafono nō ato yoia, nō ipaima fetsafo imis keskai. Nōkai fetsafo ato yono xītikapaima. <sup>17</sup> Akka kirika ano Niospa meka ke-neia iskai: “Akka tsōakai āa yoimesharatiroma iskai ē afama mīshti tāpikōiakī ikax āa kakapaitiroma. Askatamaroko nō yoisharatiro nā afara sharafo nōko Ifāfe aka,” ixō kirika ano yōra keneni. <sup>18</sup> Akka fetsa āa yoimesharai akai afaama. Akikikai Nios inimatiro. Akka Niospa fetsa na feronāfake sharakōi faax akiki inimakōitiro.

## 11

*Pablo ato yōani āa chanīkani noko Niospa nīchiaki nō Niospa meka mato yoinō imisfoōnoa*

<sup>1</sup> Iskaratīa ē mato yoinō, nā yora shināsharayamaito yoiai keskara nānorikōi ē mato yoifikīkai askarakōi ē mato yoima. Nā mā ea nikamis keskafakī iskaratīa ea nikasharakāfe. <sup>2</sup> Feronāfāke kēroyapai kī āfe apa yōkatiro, nā kēro fixiki āfe āfi inō. Nāskakē apa āfe fake xotofake kexesharatiro feronāfake fetsa fe oxayamanō. Nāskax mā fianākanax fene fes fianātirofo feronāfake fetsafekairoko oxakatsaxakī. Nāskarifiakī ē mato Nios Ifofamakī ē mato kexesharani. Nāskaramāi Epa Niospa fichipaiyaino. Nāskakē mēxotaima ē mato kexesharai mā fetsafo nā chanīmisfo mā ato nikayamanō. Nāskakē mā nai mēra Nios ano kaax Cristo afe yorakōi mā ixii. <sup>3</sup> Nāskakē ē shināchakakōi Satanās Eva anī keskafakī fetsafāfe matori pārayamanōfo, mato pāraifono mā anā Cristo noinōma. <sup>4</sup> Ooa. Fetsafāfe mato pārapaikani. Nō Jesúsnoa mato yoimis keskara anori mato yoikōiyamafiaifono mā kai ato xatematama mā ato chanīmara fai. Nō Niospa Yōshi Sharaōxō meka shara Jesúsnoa nō mato yoimis keskara anorikai afāfe yoikanima. Jesúsnoa anorima mato yoifiaifono mā ato xatemanama. Mā ato nikayanā mā yoimis iskafakī: “Aicho, mā nofe ishara-painō,” ixō mā ato yoimis. <sup>5</sup> Akka mā shināi nāfāfe Niospa meka yoisharakōimisfoma ixō. Akka askafikaxō ea finōfafoma. <sup>6</sup> Akka, ¿mā shināimē ē yoisharatiroma? Akka ē Niospa meka tāpisharakōia. Nā ē mato yoiai anori mēstekōi. Mā mā ea tāpikōia ē mato Niospa meka xafakīakōi yoimis. Nā keskara ē mato ōimafafāini.

<sup>7</sup> Nā ē mato Niospa meka yoimis chāikai ē mato afaa yōkamisma. Ēkai mato afaa fīamisma, koriri ē mato yōkamisma. Ōitsai, ē mato chakafairaka ē mato kori fīakīma. Akka ē Niospa meka shara Jesúsnoa ē mato yoimis Niospa fakefo mā inō.



Ĕ mato askafai afaamais keskara ĕ imis mĕ Niospa meka tĕpisharakĕinĕ. <sup>8</sup> Akka ĕ mato fe ikano nĕ Nios chanĕmara faa fetsafĕfe ea kori inĕnifo aĕ nĕ ĕ fichipaiyai keskara ĕ finĕ. Őitsai, ĕ atoki yometsoa keskararaka nĕ kori fii mato Niospa meka yoi, ĕ mato yonoxomis keskaraxĕ. <sup>9</sup> Ĕ mato fe imis chĕikai ĕ afara yopafikĕ ĕ mato fekaxtefamisma. Akka Macedonia anoafĕfe Nios chanĕmara faafo fĕkaxĕ ea afarafo inĕnifo. Akka ĕ mato fe imis chĕikai ĕ tsoa afaa yĕkamisma. Askatari ĕ tsoa afaa yĕkapakenakama. <sup>10</sup> Cristo ĕfe meka chanĕmakĕi. Nĕskarari nĕ ĕ mato yoiari chanĕmakĕi. Nĕskakĕ Acaya mai anoxĕ nĕ ĕ mato yoiari keskara ea tsĕa xatematiroma. <sup>11</sup> Ĕ mato anori yoikĕ, ĕ mato noimamĕ? Maa. Anorikaima Niospa tĕpikĕia ĕ mato noikĕi.

<sup>12</sup> Nĕ ĕ mato yonoxomis chĕi ĕ mato afaa fĕapaimisma. Iskaratĕari ĕ mato afaa yĕkaima. Nĕskaxos ĕ mato yonoxoni nĕ chanĕmisfo mĕ anĕ ato chanĕmara fanĕma. Nĕ ĕ yonoaito ŕikaxĕ fetsafĕfe yoimisfo iskakakĕ: “Nĕri Pablo yonoai keskafakĕ nĕ yonoi,” ifiakaxĕ afĕfekai ĕ yonoai keskafakĕ tsĕa yonomisma. <sup>13</sup> Akka nĕfo chanĕmisfo. Ĕ ikai keskara ipaifikani tsoa askakĕimisma. “Cristo noko nĕchia aĕnoa ĕfe meka nĕ mato yoinĕ,” ixĕ mato yoifikani afokai Cristo fe rafemisfoma. <sup>14</sup> Chanĕma, Satanĕs nokoki nokotiro nĕ Niospa ĕfe ĕjiri fafeai ŕitsa. Nĕskarato noko yoitiro iskafakĕ: “Ĕfi mato xafakĕia yoikai,” ixĕ noko feparapaitiro. <sup>15</sup> Akka nĕ Satanĕs yonoxomisfori nĕ keskara itirofo. “Nĕri nĕ Nios yonosharaxomis,” ixĕ noko pĕrapaikani. Nĕskaifĕfe ŕikĕ Niospa ato omiskĕimakĕ finakĕixii. Nĕskakĕ nĕfĕfe afara chakafakanax omiskĕipakenakafo.

### *Pablo omiskĕini Niospa meka yoikatsaxakĕ*

<sup>16</sup> Ĕ mato yoiari keskara anĕ ĕ mato yoinĕ: “Pablo afaa tĕpiama,” ixĕ eĕnoa shinĕyamakĕfe. Akka ea nikapaikĕ ea nikayokĕfe. Nĕ yora fetsa afaa tĕpiama mĕ nikamis keskafakĕ eari nikasharayokĕfe. Ĕari ĕ pishta yoimeyonĕ. <sup>17</sup> Nĕ ĕ mato yoiari keskara a ĕa ĕ yoimesharai ĕfe Ifĕfe ea anori yoiama. Akka nĕ afaa tĕpiamafĕfe anori yoimisfo. <sup>18</sup> Akka nĕ nĕko Ifo chanĕmara faafoma ĕa yoimesharaifo keskara nĕnori fetsafĕfe mato yoimisfo. Akka iskaratĕari ĕ mato yoi a ĕari ĕ yoimesharai keskara. <sup>19</sup> Akka mĕ shinĕi mĕ tĕpikĕia. Nĕskaxĕ nĕ afaa tĕpiamafo mĕ ato nikamis. Akka afeskakĕ mato anorima yoifiaifono mĕ ato xatemamisma. <sup>20</sup> Mato yoimisfo ĕto yonomati keskarakĕi mato fakaxĕ, askatari mato kaxpa yonomamisfo. Nĕskatari mato pĕramisfo, askatari mato chakafamisfo, askatari mato ĕchamisfo. Mato askafaifono mĕ tenekĕimis. <sup>21</sup> Mato askafakakĕ shinĕkaniraka nĕ mĕsisipakĕira ikaxĕ. Ooa. Nĕkai mĕsisipama oa ato akaifo

keskafakī nōri mato askafapanā. Akka nōkai mato askafamisma nōkairoko ato keskaraxō.

Akka nāfo āa yoimesharakakī mato afara yoimisfo keskafakī ēari ē yoimesharatiro. Ooa. Nā afaa tāpīamafo keskaraxō anā ē mato yoi. <sup>22</sup> Akka nāfo, “Nō hebreos yorafo,” ikani. Akka ēri hebreo yora. Askatari, “Nō israeli yorafo,” ikani. Akka ēri israeli yora. Askatari, “Nō Abraham āfe fena,” ikani. Akka ēri Abraham āfe fena. <sup>23</sup> Akka, ŷnāfo fistimē Jesucristo yonoxomisfo? Maa. Akka ēroko yonoxokī finakōimis. Ooa. Ē iskafakī ē mato yoi oa shināsharayamaito yoi ai keskaraxō ē me kai askayamapaifi. Akka nā chanīmisfāfe mato yoikī iskafakani: “Nō Jesús yonoxokōimis. Askatari Jesúsxō noko karaxa mēra ikimanafo,” imisfo. Akka ēroko yonokī finakōimis. Nāskakē earoko karaxa mēra ikimakī finakōimisfo. Askatari ea koshakī finakōimisfo. Ea askafakī fetsaifono mē nakerakōimis. <sup>24</sup> Efe yora judeofāfe ea koshakakī cinco veces fakī ea koshamisfo. Nā ea koshai fo tii treinta y nueve ea famisfo. <sup>25</sup> Romano xanīfofōfāferi āto chāti ea koshanifo tres veces fakī. Askatari ēfe kaifāferi tokirifāfe ea tsakakī fisti fanifo. Askatari kanōanāfānē ē pokefainaino kanōanāfā fakafā fospia ikiaino mē āsakerani. Mā kanōanāfā fakafā mēra ikiano nā kanōanāfā āfe kaxke ē fakafā mānāo ē nononi āsaxikima. Fakish fisti ita pena fistiri ē ini. <sup>26</sup> Mē kafāsamis, faka faiyaito mesekōi ē ōimis; askatari yometsoafāfe ea achikaxō ea mesenifaifono mē ōimis; askatari ēfe kaifokōifāfe ea mesenifaifono mē ōimis; yora fetsafāferi ea mesenifaifono mē ōimis; pexefā rasi anoxori ea mesenifaifono mē ōimis; tsōa istomaxori ea mesenifaifono mē ōimis; fakafā anoari mesekōi mē ōimis; “Nōri Nios Ifo sharakōifamis,” ikax a chanīmisfāfe ea mesenifaifonori mē ōimis. <sup>27</sup> Ē omiskōiyanā ē yonomis xokenākōiyanā; askatari ē oxa tenekōimis; askatari ē fonāiyanā nomi tenekōimis; askatari ē pimisma; askatari matsi mei ē omiskōikōimis rapatimais ikax.

<sup>28</sup> Nāskarafo ē mei ē omiskōikōimis. Askatari afara fetsafoōnoaxri ē omiskōimis. Askatari mēxotaima ē mato shinākōimis nā mā ichanāxō keyokōichi mā nōko Ifo Jesús Ifofamis tii mā kachikiri fayamanō. <sup>29</sup> Akka ē nika fētsa Jesús Ifofasharapaifi rateaino ē aōxō shināchakakōitiro. Akka fētsa a Nios Ifofaa afara chakafamakē ē akiki ōitifishkikī rāfikōitiro. <sup>30</sup> Akka nā ē mato rama yoi ai keskara kakapaikī ē mato yoima. Ē mato yoi mā tāpinō ēa ē afaa atiroma. <sup>31</sup> Nā Nios fisti nōko Ifo Jesucristo āfe Apa, nāato tāpikōia ē kai chanīmisma. Iskafakī nō yoinō: “Epa Niospa, mī sharafinakōia,” ixō nō yoipakexanō. <sup>32</sup> Akka Aritas xanīfokōi iyopaoni. Nā Aritas fetsa nīchini Damasco anoax xanīfo inō. Damasco ano ē ikano, nāato āfe sorarofō yoini nā pexe rasi anoxō āfe kāiti anoxō ea

kexenõfo ea achixikakĩ. <sup>33</sup> Akka anoxõ ea achipaiyaifono, nã nõko Ifo Jesús Ifofaafãfe fẽta efapa mẽra ea onekaxõ pexe rasi kene fomãkĩaxõ ea fotomanifo ẽ katanõ.

## 12

*Pablo ãfe namapa õiai keskara õini Niospa tãpimanaino*

<sup>1</sup> Akka ẽa ẽ yoimesharai. A ẽa ẽ yoimesharai keskarakai akai afaama. Nãskafekẽ nõko Ifo Jesús ea õimana keskara ẽ mato yoinõ. Nã ẽfe namapa ẽ õiai keskara ea õimana. Nã tsõa nikamisma ea tãpimani. Nãnori ẽ mato yoi. <sup>2</sup> Mã catorce xinia finõa a Niospa ea ifirisafayoni, ẽ Cristo fe rafeaito õikĩ. Ẽkai tãpiama ẽfe fero mẽsho fisti nai mẽra kani rakikĩa, askayamai ẽfe yora kani rakikĩa. Nios fistichi tãpia a ẽ ini keskara. <sup>3-4</sup> Niospa nã ika ano ea ifirisafayoni. Nã ẽ mato yoiyoa keskara anã ẽ mato yoi. Ẽfe yora iyamai ẽfe fero mẽsho fisti kani rakikĩa ẽkai tãpiama. Nios fistichi tãpia nã ẽ ini keskara. Nã ika anoxõ ea afara nikamani keskara ẽ tsoa yoitiro. Akka ea yoikĩ iskafani: “A mũ nika keskara tsoa yoiyamafe,” ixõ ea Niospa yoini. <sup>5</sup> Ẽ nã õia keskara ẽ fetsafo yoipaima iskafakĩ: “Niospa ea fisti nã ika ari ea õimani,” ixõ ẽ yoitiro. Ẽ anori yoipaima. Anori ẽ yoi kakapaimis ẽ itiro. Ẽkai ẽa ẽ yoimesharapaima. Ereskai ẽ afaa fatiroma. Nãskakẽ nã fisti ẽ yoimis inimakĩ. <sup>6</sup> Akka ẽa ẽ yoimesharai ẽ yoimetiro. Ẽ anori yoi nã yora afaa tãpiamafãfe yoimisfo keskara ẽ yoima. Chanĩmakõi eõnoa ẽ yoimesharatiro. Akka ẽakai eõnoa ẽ yoimesharapaima eõnoa shinãkĩ finakõinõfoma. Mã ea õimis ẽ afe keskaramãkĩ, askatari mã ea nikamis ẽ afe keskara yoimismãkĩ.

<sup>7</sup> Akka Epa Niospa a ika ari ea õimani keskara tsõa õimisma. Akka Niospa ea õimaniõnoax ẽa ẽ yoimesharapaitiro ẽ tãpikõiara ikax. Nãskakẽ Niospa nẽtefayamano Satanás ea isinĩ imani nã nõ moxaki chachiano noko mõxa fekaxtefai keskafakĩ ẽa ẽ yoimesharayamanõ. <sup>8</sup> Nãskakẽ ẽ kifikĩ iskafani: “Ifo, ea sharafafe,” ixõ tres ves fakĩ ẽ yõkani. <sup>9</sup> Ẽ askafaito nõko Ifãfe ea kemakĩ iskafani: “Ẽ mia noi. Askafixõ ẽ mia sharafaima. Cristo mia axotiro na pae mũ tenenõ ẽ mefe rafekakaini. Mĩ mitsisipayamafikẽ ẽ mũõxõ ẽ ato õimatiro ẽ afama mĩshti fatiro,” ixõ ea kemani. Nãskakẽ ẽ isinĩ ifiai ẽ inimasharakakaini. <sup>10</sup> Nãskakẽ ẽ mitsisipayamafix Je-sucristoõnoax ẽ inimakõi. Nãskaxõ ea ãchaifono ẽ tenemis, afaayayamaxri ẽ inimakõimis ea omiskõimanaifonori ẽ tenemis. Nãskatari afarafo fekaxkõifekẽ ẽ tenemis. Ẽ askafakĩ ẽ mitsisipayamafixõ Jesucristoõxõ ẽ afama mĩshti fatiro.

*Pablo nã Nios chanĩmara faafo Corinto anoafõ ato shinãkõini*

<sup>11</sup> Akka nã yora afaa tãpiamafo ãa yoimetrofo keskarax ãa ã yoimea. Akka mã eõnoa afaa yoisharama. Akka mã ea õisharakĩ, “Nã Pablo sharakõi,” ixõ mã eõnoa yoiano nã sharakõi ikerana. Nãskakẽ ãa ã yoimesharakõi fetsafãfe ea tãpinõfo ã afe keskaramãki. Akka ãakai ã afaa asharatiroma. Ëkai afaama. Nãskafekẽ nã eõnoa afara chaka mato yoimisfãfe ea finõkanima. <sup>12</sup> Jesucristo ea nĩchini aõxõ ãfe meka ã mato yoinõ. Nãskakẽ tanaimakõi ã yonomis fena fenakima. Nãskara ã yonofaino Niospa afama mĩshti amis eõxõ mã tãpinõ Jesucristo ea nĩchinikẽ. <sup>13</sup> Akka, ¿afeskakĩ mã iskafakĩ shinãimẽ? “Pablo nã Nios chanĩmara faa fetsafo ato shara fai keskafakĩ nokori shara faima,” ixõ mã eõnoa yoitiroma. Akka nã Nios chanĩmara faa fetsafori ã ato shara fai keskafakĩ, nãskarifikĩ ã mato sharafa fafãfãini. Ëkai mato afaa fĩapaimisma. Askatari ã mato fekaxtefamisma. Ea pimakape ea rapati safemayanã ã mato famisma. Õitsai, ã mato afaa fĩapaikima ã mato chakafaa-makĩ ea raefakãfe.

<sup>14</sup> Mẽ mato ari kai rafea. Akka iskaratĩa mẽ itipinĩsharax anã ã mato ari kai. Ë mato amis keskafakĩ anã ã mato yõkakĩ fekaxtefaima. Ë mato afaa fĩapaitama ëroko mato shinãfãfãini. Shinãkapo. Fakefãfekai apa yafi afa pimatiro. Akka afa fetaroko apa fakefo pimatiro. Akka mãfi ëfe fakekõifo keskarakĩ. Akka ã mato Niospa meka tãpimasharakõia eõnoax mã isharanõ. <sup>15</sup> Akka ã afarafo fikĩ mẽ kori potakĩ keyokõia, askafafaxõ ã shinãchakaima, askatari ãakõi ã inãmei mã Niosnoax isharakõinõ. Akka ã mato noikĩ finasharakõifianokai õitsai mã ea noikĩ finasharakõimisma rakikĩa.

<sup>16</sup> Akka ã mato afaa yõkamisma. Akka fetsafãfe mã Corinto anoafãfe eõnoa yoimisfo iskafakakĩ: “Akka mã nõ tãpia Pablo mato afaa yõkamisma. Askafixõ mato pãraxõ mato kori fiamis, Judea anoafõ ã ato foxotanõra,” ixõ. <sup>17</sup> ¿Nã feronãfakefo ã matoki nĩchinioxõ ã mato pãramẽ ã mato kori fĩaxiki? Maa. <sup>18</sup> Ë Tito yoini iskafakĩ: “Corinto ano katãfe,” ixõ ã yoini. Nã nõko Ifo chanĩmara faa fetsafori ã matoki nĩchini. Akka, ¿Titopa mato pãramẽ mato afara fĩaxiki? Maa. Mẽ tãpia Titopakai mato afaa fĩapaimisma. Nã ã mato fe imis keskai ari mato fe imis. Noko rafeta nõ mato yoimis. Nãskara fisti nõ mato afara shara faxapai noko rafe nõ mato fe imis.

<sup>19</sup> Mã shinãiraka ã mato yoiai keskara mã eõnoa shinãsharanõ. Maa. Anorikaima. Epa Niospa nã ã yoiai keskara ea nikamis Cristo ea shinãmanaino. Efe yora mĩshtichi, nã ã mato yoiai keskafakĩ ã mato shara fapai Jesús shinãi keskafakĩ mãri mã shinãsharanõ. <sup>20</sup> Akka ã tãpiama, õitsai, ã ari nokoxõ õia a ã yoiai keskai mã isharayamakẽ ã mato fichikai. Askatari ã matoki nokoaino õitsai, mã ekeki

inimaima rakikīa nã mã shinãi keskai. Akka ã matoki nokoxõ õipai mã mã chaka xatexõ mã Jesús Ifofasharaino. Akka ã matoki nokoxõ õia mã chaka xateyamano ã shinãmitsatiro. Mã fochishpanã faatanãta, fẽtsa fiaiti mãrifi mã fipaita, fetsa mekafata, õitifishkita, mares fisti mã fipaita, mã chanĩta, fetsafo mekafata, nõ tsoa keskarama ita, isharayamata, mã askaito ã mato õipaima. <sup>21</sup> Nãskatari ã shinãchakakõi, shinãyanã õitsai Niospa atoõxõ ea rãfimaniraka ixõ ã shinãi mã isharayamaino. Mã askaino ã matoki nokoax ã rãfikõixii mã afara chakafaino. Akka ranãri mã isharapaonima. Mãto ãfima fe mã oxapaoni. Askatari kẽrofori ãto fenema fe oxapaonifo. Nãskatari afara chakafo fetsa fetsatapafo mã apaoni. Akka mã xateyamaino ã nokoax ã mato õi ã shinãmitsakõixii, rãfikõiyã.

## 13

*Pablo iskafakĩ ato yoini: “Anã afaa chakafayamakãfe,” ixõ ato yoini*

<sup>1</sup> Mẽ mato õikĩ rafe faa. Iskaratĩari anã ã mato õikaikai. ã anã mato õikaikai mã mãto chaka mã xateamãkĩ. Akka kirika ano Epa Niospa meka kenenifo iskafakĩ: “Fẽtsa afara chakafaito õixõ yõfaito, ‘Nato afara chakafaa,’ ixõ rafeta yoiãifono, askayamakĩ trespa yoiãino askayamakĩ ranãfai yoiãifono chanĩmara nõ fatiro,” ixõ kirika ano Niospa meka kenenifo. Nãskafakĩri ã mato ano nokoxõ ã nikai mã afara chakafaito mã afara chaka xateyamaito. Akka ã mato õitiro mã chaka ikamãki, askayamai shara mã ikamãki. <sup>2</sup> Akka anã ã mato ano kayoxõ mẽ mato yoiyoni mã afara chakafanõma. “Mã afara chakafakĩ xateyamaino ã mato omiskõimaxii,” ixõ ã mato yoiyoni. Anã iskaratĩari chai ixõ ã mato yoi kirika kenexõ iskafakĩ: “Ë anã kaxõ ã mato õikai mã mã chaka xateamãki. Akka mã chaka xateyamaito ã mato omiskõimaxii. Akka tsoa pishtakai ã finõmaxima.” <sup>3</sup> Akka mã tãpipai Cristo eõxõ mato yoiãino. Chanĩma, mã samama tãpinõ xafakĩakõi ã mato õimani. Akka ãakai ã mato yoima, Cristoõxõ ã mato yoi. Jesucristo mitsisipakõikai mato tãpimani mãto chaka mã xatenõ. <sup>4</sup> Chanĩma, Jesucristo nokoõxõ ifi cruz ikakĩ mastãifono mã feronãfake pachikõi keskara ini. Nokoõnoax nai ãakai ifimenima. Nãskafinixakĩ iskaratĩa Niospa sharaõnoax nia. Nãskarifiã nõri mitsisipama. Nãskafixõ Jesús feta mã Niospa apaiyai keskara nõ atiro Epa Niospa sharaõxõ.

<sup>5</sup> Akka mãto shinã mẽraxõ shinãsharakãfe chanĩmamãkĩ mã mã Jesús Ifofasharamãkĩ. Mãa tãpimesharakãfe. Akka, mã mã tãpãmẽ Jesucristo mato fe ikano? Askayamai mã mã chanĩmis rakikĩ nõ Jesús Ifofaira ifiaxõ mã Ifofaama.

<sup>6</sup> Akka mã mã ea õikĩ tãpia ã Jesucristoõxõ yonosharakõimiskẽ

mato mēraxō. Nā mā chanīmara fakōipainō. <sup>7</sup> Ē mato Epa Nios kīfixomis mā afaa chakafanōma. Nokoōnoa shinānōfo ixokai ē Epa Nios kīfimisma. Iskafakī fetsafāfe nokoōnoa shinākani rakikīa: “Pablo fe rafeafāfe ato yonoxosharafoma,” ixō nokoōnoa yoikani rakikīa. Akka noko askafafiaifono mā Jesús Ifosharakōifai nāskara nō fichipai. <sup>8</sup> Akka Niospa meka shara fistiōnoa nō yoitiro. Aōnoakai meka chaka nō yoitiro ma āfe mekamāi sharakōikē. <sup>9</sup> Akka fetsafāfe nō afama noko askafakī shināfiaifono nō shināchakaima. Akka mā Jesúsnoax isharakōikē nō fāsi inimakōitiro. Akka nō mato Epa Nios kīfixona mā a keskara sharakōi inō. <sup>10</sup> Akka ē mato kirika kenexona mato ari kayoxoma mā ea nikanō. Mē mato ari nokoxō ōia mā Cristo Ifo sharakōifaino ē mato ōitoshinō. Nāskakē mā isharakōiaino Niosxō fāsi mekakai ē mato yoima mā isharakōinō. Epa Niospa ea yoia ē mato yoisharanō mā Nios Ifo sharakōifanō isharakōixō.

*Mā Pablo āfe meka xatekī ato yoisharani*

<sup>11</sup> Mē mekai xatekī ē mato yoisharai. Jesús keskara isharakāfe. Ea nikasharakāfe. Nānori fisti shinākāfe. Isharakāfe. Mā askaino Niospa mato noikōikī mato inimamasharai āfe Yōshi Sharaōxō mato fe ixō. <sup>12</sup> Keyokōi nā mā Nios Ifofaa tii yoinōnāsharakāfe. <sup>13</sup> Keyokōi nōko Ifo Jesús chanīmara faafāfe nā efe ikafāfe mato yoisharapaikani.

<sup>14</sup> Nōko Ifo Jesucristo mato axosharapai. Epa Niospari mato noikōi. Niospa Yōshi Shara mato fe rafepakexanō. Nā tii.

*Ēkīa Pablo*

## Pablo Galacia Anoafu Kirika Kenexō Fomani

*Galacia anoxō Nios Ifofaafo Pablo ato kirika kenexō fomani*

<sup>1</sup> Ēkīa Pablo, ē mato kirika kenexō fomai. Niospa ea nīchini aōnoa meka shara ē ato yoinō. Yorafāfe ea nīchinifoma, Jesucristo feta Epa Niospa ea nīchini. Nā Niospa Jesucristo otofani mā nakē.

<sup>2</sup> Mā Galacia anoxō Nios Ifofakē, na nono efe ikafāfe, akairi Nios Ifofakaxō efeta mato kirika kenexō fomakani. <sup>3</sup> Epa Niospa nōko Ifo Jesucristo feta mato noikī mato sharakōi fanō. Askatari māto ōiti mēranoax mā anā fekaxtenōma. <sup>4</sup> Nō afara chakafamisno nokoōnoax Jesús nani nōko chaka noko soaxoxiki, askatari nā yorafo chakafo mēranoa noko ifixiki Epa Niospa fichipaiyai keskafakī. <sup>5</sup> Nāskakē Nios sharakōi mēxotaima fapanakafo. Nāskapakexapainō.

*Anā ano meka fetsama a nikax Epa Nios fe nō ipaxanō. Akka Epa Nios fistichi noko nimapakenaka*

<sup>6</sup> Ooa. Epa Nios potakanimara ixō ē shināmis, koshikōi kachikiri fayanā mā potafiaino, Cristo mato noiaino Epa Niospa mato katofinino. Epa Nios fe ipaikakī āfe meka shara nikafiyānā, meka fetsa fetsatapafo nikakakī kachikiri famisfo. <sup>7</sup> Akka anā anokai meka fetsama, a nikax Nios fe nō ipaxatiro. Akka nā Nios Ifofaafāfema mato fekaxtefakani. Meka fetsafaxō anorima mato yoipaikani, Cristoōnoa meka shara mā nikapaifiaito a nikax afe ipaxakī. <sup>8</sup> Akka fetsafāfe Nios fe mā ipaxanō Niospa mekaōnoa mato yoifikakī, meka fetsafaxō anorima mato yoikani, mā nō mato yoifimisno. Nā keskara yorafo nā omiskōipakenakafo mēranoax omiskōipakenakafo, ē iyamai Niospa ājiri itiro nai mēranoax oax. <sup>9</sup> Nā ē taefakī mato yoiyoni keskafakī, iskaratīa anā ē mato yoi. Fetsafāfe Nios fe mā ipaxanō Niospa mekaōnoa mato yoifikakī anorima mato yoikani, mā nō mato yoifimisno. Nānori mato yoikanax nā omiskōipakenakafo mēranoax omiskōipakenakafo.

<sup>10</sup> Ē yoiki iskafaino, yorafāfe eōnoa yoisharanōfora ixō ē shināima, askatamaroko Niospa eōnoa yoisharanō. Ēkai yorafo eōnoa shināmasharapaima. Akka yorafo eōnoa shināmasharapai, ēkai Cristo yonoxomis itiroma.

*Jesucristo ea nīchini āfe meka sharaōnoa ē ato yoinō*

<sup>11</sup> Efe yora mīshtichi, xafakīakōi ē mato yoipai. Na meka shara Jesucristoōnoa ē mato yoimis nō afe ipaxanō. Na keskarakai yorafāfe āto shināmā shināmisfoma. <sup>12</sup> Na

meka shara ě mato yoimis keskara yorafãfe ea tãpimanifoma. Tsõarikai ea tãpimanama. Askatamaroko nõko Ifo Jesucristo ea tãpimana keskara ě mato yoimis.

<sup>13</sup> A ě ipaoni keskara mã mã nikapaoni. Ĕmãĩ judeoxõ a nõko xinifãfe yoipaoni keskara ě nikayopaoni. Mã mã tãpia mitsisipakõikai a Nios Ifofaafo ě ato omiskõimapaoni, anã Nios Ifofayamanõfora ixõ. <sup>14</sup> Nõko xinifo judeofãfe yoipaonifo keskara ě nikakõini, ěfe kaifofo ě ato finõkõini, efe yosifinifono. Ĕ nikakõikĩ a ěfe xinifãfe yoipaonifo keskara ě nikakĩ finakõini.

<sup>15</sup> Akka taefakĩ Epa Niospa ea katonĩ ě fakeyoamano. Ea noikõikĩ ea katonĩ. Nãskakẽ ea tãpimapaikĩ ea askafani. <sup>16</sup> Nãskaxõ ãfe Fake ea tãpimani ãfe meka shara a judeofoma ě ato yoinõ afe ipaxanõfo. Nãskakẽ ě rama Jesús Ifofakĩ ě tsoa yõkaikai kanima ea tãpimanõ. <sup>17</sup> Nãskakẽ Jerusalén ano ě kayonima a taefakĩ Jesúsnoa meka sharaõnoa yoimisfo ato õikai. Askatamaroko Arabia mai ano ě kani. Nãskata Damasco ano anã ě oni.

<sup>18</sup> Nãskata Jerusalén ari fena ě kayonima, mã xinia tres akax ě kani. Nãnoxõ ě Pedro tãpini, nãno ě afe oxa ranãyoni quince nia ě ini ano oxai. <sup>19</sup> Akka nã Jesús fe rafemisfo fetsafori ě õinima. Nõko Ifãfe ãfe exto Santiago fisti ě õini. <sup>20</sup> Niospa ferotaifi ě mato yoikõĩ, na ě mato kirika kenexokĩ chanĩmakõĩ ě mato yoi.

<sup>21</sup> Nãskata chipo Siria yafi Cilicia mai ano ě kani. <sup>22</sup> Akka Judea mai anoxõ Cristo Ifofafiakaxõ ea tãpiayonifoma. <sup>23</sup> Ea õiyamafikatsaxakakĩ eõnoa iskafakĩ yoiãifãfe nikapaonifo: “A na feronãfãke taefakĩ noko omiskõimapaofinixaki, iskaratĩa Jesúsnoa meka shara ato yoifofãsafai. Askatari noko keyokõĩ omiskõimakĩ noko xatemapaipaoni nõ anã Jesús nikanõma,” ixõ eõnoa yoinifo. <sup>24</sup> Nãskaxõ eõxõ Epa Nios aicho fakani, mã Pablo Nios Ifofara ikaxõ.

## 2

*“Na Pablori noko ani keskafakĩ Jesús katoa aõnoa ãfe meka shara ato yoinõ,” fanifo*

<sup>1</sup> Mã catorce xinia finõta Jerusalén ano anã ě kani Bernabé fe. Titori ě iyoni. <sup>2</sup> Ĕ ari kani Niospamãĩ ea yoiano. Nã Jerusalén anoxõ xanĩfofo fes ichanãxõ ě ato yoini a judeofoma Niospa meka sharaõnoa afe ipaxanõfo ě ato yoimis keskara. Nãskakẽ ě ato yoini: “A ě ato yoimis keskara sharamamãkĩ, mĩ shara yoimiski ea fakanimãkai,” ixõ ě ato yoini. <sup>3</sup> Nãskakẽ tsõakai Tito afaa fanima efe oiano. Tito judeoyamafiano foshki repa xatefe tsõa fanima. <sup>4</sup> Nãnoa fetsafo nõ Nios Ifofara ikanax one ikikanax nofe ichanãnifo,



Nios Ifofayamafiakanax. Nãfãfe yoinifo iskafaki: “Titopari foshki repa xatetiro,” ixõ yoinifo. Nãfãfe noko õipaikani iki-afo ini, chanĩmamãkĩ tãpipaikakĩ afeskax Cristo Jesús Ifofaax nõ ikamãki. Noko anã yonomapaikani nõ Jesucristo Ifofanõma a Moisés yoini keskara fisti nikanõfora ixõ noko anã yonomapaikani. <sup>5</sup> Akka nãfãfe noko yoipaiyaifono nõ ato nikamisma. Akka nõ fichipaimis nã meka shara chanĩmakõ Jesucristoõnoa mã nikakõinõ afe ipaxaki.

<sup>6</sup> Akka a xanĩfofõfãfe ã ato fe ichanãino, “Nã mã ato yoiai anori sharamaki, meka fetsa shara ato yoife,” ea tsõa fanima. Akka afo xanĩfofõfiano ã atoõnoa shinãchakaima. Nãskarifiakĩ Niospa nõko femãnãõxõ noko onãima, akka Niospa noko tãpikõia. <sup>7</sup> Meka fetsa shara ea yoitamaroko, afãfe tãpinifo a Niospa ãfe meka ea yoini keskara a judeofoma ãfe meka sharaõnoa ã ato yoinõ afe ipaxanõfo. A Pedro yoini keskafakĩ judeofo na meka sharaõnoa ã ato yoinõ. <sup>8</sup> Nã Nios fistichi Pedro nĩchini judeofo mẽra ãfe meka sharaõnoa ato yoinõ. Nãatori ea nĩchini a judeofoma mẽra ãri a judeofoma ãfe meka sharaõnoa ã ato yoinõ.

<sup>9</sup> Nãskakẽ Santiago ikaino Pedro ikaino Juan ikaino, afãfe a Nios Ifofaafo ato ikikaxõ ea tãpinifo Niospa ea nĩchinino nã meka sharaõnoa a judeofoma ã ato yoinõ. Nãskakaxõ ea yafi Bernabé noko metakaxanifo. Noko askafakãta nokoki inimakaki noko yoikĩ iskafanifo: “Aicho, judeofoma mẽra kaxõ Niosnoa meka shara mã ato yoitiro,” noko fanifo, judeofoma mẽra kaxõ Niospa meka sharaõnoa nõ ato yoikanõ, akka afãfemãi nã judeofo Niospa meka sharaõnoa ato yoikakĩ. <sup>10</sup> Akka noko yoikĩ iskafanifo: “A afaamaisfo ato shinãmakiyamakãfe. Afarayaxõ ato inãkãfe,” ixõ noko yoinifo. Askara yoikĩ ea inimamanifo ãrimãi a afaamaisfo ã ato inãsharamiskẽ.

*“Na mã akai keskara sharama,” Pablo Pedro fani Antioquía anoxõ*

<sup>11</sup> Akka Pedro Antioquía pexe rasi ano kaxõ afara chakafaino ãfe ferotaifi ã yoikĩ iskafani: “Na mã akai keskara sharama, mã chakafai,” ixõ ã yoini. <sup>12</sup> Akka taeyoi a judeofoma feta pipaonifo. Nãskaifono chipo a Santiago fe rafeafo fenifo. Mã feafono judeofoma makinoax Pedro paxkani anã ato feta pinima a rama feafoki atoki mesekĩ mã chakafai na judeofoma feta mã pii ea fatirofora ixõ. Nãskakẽ anã a judeofoma feta pinima. Akka a judeofo rama feafãfe ato yoikĩ iskafanifo: “Mã Nios ari kapaikĩ mãto foshki repa mã xatetiro,” ixõ mẽxotaima ato yoinifo. <sup>13</sup> Nãskakẽ a judeofori Nios Ifofakanax nã Pedro ikai keskanifo. Nã Bernabéri ato fe askani. <sup>14</sup> Akka nõko xinifãfe Niospa meka sharaõnoa

noko yoinifo nõ afe ipaxanõ anori Pedro nikayamaito õikĩ yorafãfe ferotaifi ẽ Pedro yoikĩ iskafani: “Mĩ judeo. Akka a judeofoma fe mĩ imis, nõskax judeoma keskara mĩ imis. Akka, ẽafeskakĩ a nõko xinifãfe yoipaonifo keskara a judeofoma mĩ ato yoipaimẽ, judeofo keskara ixõ?” ẽ Pedro fani.

*Judeofo a judeofoma feta Nios Ifofakanax Nios fe ipaxatirofo*

<sup>15</sup> Akka nõ judeokõifo nõ sharakõifo nõ afaa chakafakĩ finakõimisma na yora fetsafãfe amisfo keskafakĩ. <sup>16</sup> Askatamaroko mã nõ tâpia a Moisés noko yoini keskaraõxõ nõko chaka nõ soatiroma Niospa noko omiskõimanõma. Akka nõ Jesucristo Ifofaito nõko chaka noko soaxotiro, nõ askainokai noko omiskõimaxima. A Moisés yoini keskara nõ shinãito nõko chaka noko soaxotiroma. Akka Jesucristo fisti nõ Ifofaito noko omiskõimaxima.

<sup>17</sup> Nõfi Cristoõxõ nõko chaka nõ soatiroki noko omiskõimanõma. Nãskara mã nõ tâpifixõ nõ afara chakafamis. Akka nõ afara chakafaito, ẽCristo noko afara chakafapaimẽ? Maa, askarama. Noko afaa chakafamatiroma. <sup>18</sup> A Moisés noko yoini keskara mã nõ tâpia, aõnoaxkai Nios fe nõ nipaxatiroma. Jesús fistichi nõko chaka noko soaxotiro nõ afe nipaxanõ. Nã nõ chanĩmara fai. Akka a Moisés keneni keskara afianã nõ nikapai nõ fenotiro Nios fe nõ ipaxatiroma. <sup>19</sup> Akka a Moisés yoini keskara ayamakĩ mẽ tâpia ẽkai aõnoax isharatiroma. Ẽ askaino Epa Nios ekeki inimatiroma. Nãskakẽ nãfoõxõ mẽ tâpia Cristo fisti ẽ chanĩmara faino Epa Nios ekeki inimatiro. Nãskax ẽ afe yora itiro. Akka iskaratĩa a Moisés yoini keskaraõnoa anã ẽ shinãpakenakama, atokai ea ãkipakexatiroma. Askara shinãtamaroko Nios fisti fe ẽ rafei afe isharaxiki. <sup>20</sup> Nõko Ifo Cristo ifi cruz ikaki mastaifono nani keskai ẽri ẽ afe naa keskarakõi ini. Nãskakẽ iskaratĩa a ẽ ipaoni keskara anã ẽ ikima. A ẽ Jesús Ifofayamax ẽ ipaoni keskara anã ẽ shinãima. Niospa Fake Cristo ea noikõi nã ipaiyai keskakĩ ea nãxoni. Nãskakẽ ẽ chanĩmara faino iskaratĩa Cristo efe ika a keskara shara ea imaxiki. <sup>21</sup> Akka Epa Niospa afe Fakeõxõ ẽfe chaka ea soaxoni ẽ afe nipaxanõ. Ẽkai afaa fetsa shinãmisma nisharapakexakĩ, Nios fisti ẽ shinãkõimis Nios fe nipaikĩ. A Moisés kenenioxõ nõko chaka nõ xateax Nios fe nõ nipaxafiatirono Cristo noko nãxokeranima. Ẽakõi Cristo noko nãxokerani.

### 3

*A Moisés yoini keskara nõ nikayamakĩ nõ Jesús chanĩmara fakõinaito nõko chaka noko soaxotiro*

<sup>1</sup> Efe yora mīshtichi Galacia anoafāfe, māfi oa yōra shināsharaima keskarafoki. Akka, ¿tsōa mato paraimē oa mato parakani afianā mā shināsharanōma? Akka nō xafakīakōi mato yoimis Jesucristo ifi cruz ikaki mastafono matoōnoax nani. Nō mato yoisharafimisno meka fetsa nikakī mā anorima shināmis. <sup>2</sup> Akka ē mato yōkapai mā ea yoinō a Moisés noko yoini keskara tāpixō mā Niospa Yōshi Shara fiamāki, askayamaki Jesucristoōnoa meka shara nikaxō mā fiamāki. <sup>3</sup> Niospa Yōshi Sharaōxō Jesús mato amapaiyai keskara mā ayopaoni. Akka iskaratīa mā shinākī iskafai: “A Moisés noko yoini keskara nikax nō isharatiro,” ixō mā shināmis. Ooa. ¿Afeskakī oa yorafāfe shināsharaifoma keskara mā shināimē? <sup>4</sup> Mā Jesús Ifofaino mato omiskōimapaonifo, askafikī Niospa Yōshi Sharaōxō mā Jesús Ifofasharamis. Akka afianā mā Jesús Ifofayamai mākōi kaxpa mā Jesúsnoax omiskōipaoni. Mā askayamapainō. <sup>5</sup> A mā nikamis keskara mā mā chanīmara fakōina. Nāskakē āfe Yōshi Shara mato mēra naneyanā, tsōa atioroma keskafakī afama mīshti mato faxōfa. Moisés kenenioxokai mato askafaxōama.

<sup>6</sup> Shinākapo. Abraham Nios chanīmara faito Niospa yoiyoni iskafakī: “Mī ea chanīmara faito mī chaka ē mia soaxoni mī efe ipaxanō,” ixō yoini. <sup>7</sup> Nāskakē tāpisharakāfe nā Abraham āfe fenafāfe nā Nios chanīmara faifāfe, nāfāfe chanīmara fakōinafoki. <sup>8</sup> Epa Niospa a inōpokoai keskaraōnoa tāpiyoni a nōko kaifofofāfemari Ifofaifono āto chaka ato soaxota ato imasharaxixakī. Askaifono atoki inimakōini, akka Niospa Abraham yoiyoni iskafakī: “Ē mīōxō keyokōi nā maifo tii anoafō ē ato sharafaxii,” ixō Niospa yoinino kenenifo. <sup>9</sup> Nāskakē Abraham chanīmara fani keskafakī, akairi chanīmara faifono Epa Niospa ato sharafaxōi, Abraham sharafaxoni keskafakī.

<sup>10</sup> Akka fētsa shinākī iskafai: “Moisés yoini keskara ē nikai ē isharakōi,” ixō shināi afi āfe chaka aō nepakenaka. Akka kirika kenekī yoikī iskafanifo: “Moisés yoikī kirika kenekī iskafakī yoinino: ‘A Moisés yoini keskara nikayamakani āto chaka āto nepakenaka,’ ” ixō yoinifo. <sup>11</sup> Akka fētsa Epa Nios chanīmara faino āfe chaka soaxota imasharakōitiro. Akka fētsa a Moisés yoinioxō āfe chaka soapaikī iskafakī shinātiro: “Moisés noko yoini keskara nō nikaito Epa Niospa noko imasharatiro,” ixō shināfiafonokai Epa Niospa a Moisés yoini keskaraōxō ato imasharatiroma. <sup>12</sup> Akka mā nō tāpia Jesús fisti nō chanīmara faax Epa Nios fe nō ipaxatiro. Akka a Moisés noko yoini keskaraōnoax nō askatiroma. Akka Moisés noko yoini iskafakī: “Nā Niospa noko yoini keskafakī mēxotaima nō nikayamax Nios fe nō ipaxatiroma,” ixō noko yoini.

<sup>13</sup> Akka a Moisés noko yoini keskara: “Nō nikayamaito Epa Niospa noko omiskōimaxira,” ixō kenefinifono, noko

omiskōimatama, āfe Fake omiskōimani. Niospa meka kenenifo iskafakī: “Fatora fetsa ifi cruz ikaki mastaifono, atori Epa Niospa omiskōimaxii akairi omiskōinōfo,” ixō kenenifo. Akka nō afara chakafamisno Cristo nokoōnoax ifi cruz ikakinoax nani. Noko nāxoyamanikē nō omiskōipakexakerana. <sup>14</sup> Akka Epa Niospa Abraham sharafani keskafakī, judeofori Jesu-cristoōxō ato sharafaxii. Nāskakē a chanīmara faifo tii ato yoiyoni keskafakī āfe Yōshi Shara atoya rafematiro. Akka Cristo nokoōnoax nani Apa Nios fe nō ipaxanō. Nāskatari Niospa Abraham yoiyoni keskafakī chanīmara faifono a judeofomari ato imasharaxii.

*Niospa Abraham yoiyonino Moisésri ato yoini nikanōfo*

<sup>15</sup> Efe yora mīshtichi, iskaratīa nā nō amis keskaraōnoa ē mato yoi mā tāpinō. Feronāfake mā afe feronāfake yoiyoxō anā shinākī fetsafatiroma māmāi āfe ane kenexō. <sup>16</sup> Nāskarifiakī Epa Niospa Abraham yoiyoni āfe fena fistiōnoa yoikī. Āfe fena Cristo fistiōnoa yoini. <sup>17</sup> Ē mato xafakīa yoinō Epa Niospa Abraham yoiyoni keskara cuatro cientos treinta xinia finōta Epa Niospa Moisés yoiniki. Niospa Moisés yoinino akka Abraham yoini keskara anā fetsafatiroma. Nā yoiyoni keskakōimis. Nāskaxō Epa Niospa anā shinākī fetsafanima, nā yoiyoni keskara amiski. <sup>18</sup> Epa Niospa Abraham yoiyoni keskara Abraham chanīmara faito, chipo Epa Niospa Abraham noikī āakōi axosharakōini.

<sup>19</sup> Akka, ¿afeskai a Moisés yoini keskara sharamē? Ē mato yoinō, ea nikakapo. Niospa yoiaino Moisés kenei yorafāfe tāpinōfo afeskax ishariatirofomāki, Niospa fichipaiyai keskai. Askatamaroko tosa askamisma, nikayospakōimisfo. Nāskakē Epa Niospa āfe ājirifo yoini afāferi Moisés yoinōfo Moisésri yorafo yoinō yorafāfe nikakōinōfo Abraham āfe fena Cristo oyoamano. <sup>20</sup> Akka Epa Niospa Abraham anori yoinima. Āfe ājiriōxō yoiyamata, yorafoōxori yoinima. Epa Niospa āakōi yoipaiyai keskafakī Abraham yoini.

*¿Afeskakī Epa Niospa Moisésxō ato yoinimē?*

<sup>21</sup> Akka, ¿Epa Niospa a inōpokoai fo yoiyoni keskara yafi a Moisés yoini keskarakōiri mā shināimamē? Maa. Epa Niospa mekakai rafema. A Moisés yoini keskaraōxō noko nima-pakexatirokē Epa Niospa nāfoxō nōko chaka noko soaxok-erana nō a keskara shara inō. <sup>22</sup> Akka Niospa meka yoikī kirikaki kenekī iskafanifo: “Keyokōichi nō afara chakafakat-saxakī nā nō karaxa mēra ika keskarakōi,” ixō kenenifo. “Akka Jesucristo nō chanīmara faito ares fisti noko kāimatiro afara chaka nōko ifo inōma.” Nāskarakōi yoikī kenenifo.

<sup>23</sup> Nāskakē nō chanīmara fayopaonima. Akka Cristo oyoa-mano a Moisés noko yoini keskaraōnoax oa karaxa mēra ika

keskarafo nõ iyopaoni. Akka mã Cristo oano nõ chanĩmara faino noko kaimanano anãkai oa karaxa mẽra ika keskara nõ itiro. <sup>24</sup> Nãskakẽ nõ tãpitiro Epa Niospa apaiyai keskafakĩ Moisés noko yoini. Nãskakẽ nõko ifo keskara iyopaoni. Akka Cristo oaino nõ chanĩmara faino nõko chaka noko soaxota noko imasharaxiki. <sup>25</sup> Nõ askafipaonixakĩ mã Cristokõi nokoano a Moisés yoini keskara afianã nõko ifo itiro. anãkai aato noko ìkitiro.

<sup>26</sup> Akka mã chanĩmara faax Niospa fakekõifo mã iki mãmãi Cristo Jesús Ifokõi faxõ. <sup>27</sup> Keyokõi mãfi mã mã Cristo fe rafekõiakĩ mã maotissimeax keskarax Niospa Yõshi Shara mato mẽra naneano. Nãskax oa rapati fena shara safea keskarakõi mã. <sup>28</sup> Epa Niospa Cristoõxõ keyokõi mã maifo tii anoafõ keyokõi nãskarafos noko õi. Judeofoya a judeofoma, a ato yonomatifoya a yonomatifoma, feronãfakefoya kẽrofo, nãskarafos noko õi. Jesucristo nõko Ifo ikano aõnoax yora fisti keskara nõ itiro. Akka keyokõichi nõ Ifofaax nõ afe yorafo. <sup>29</sup> Akka mã Cristo afe yorax Abraham ãfe fenafori mã iki. Nãskakẽ mã keyokõi Epa Niospa Abraham yoyoni keskara mãtonãri iki.

## 4

<sup>1-2</sup> Akka ã mato iskara yoipai. Apa naano ãfe fãke ãfe apanãfo fitiro. Nãskakẽ mã fake yomekẽ, fetsafãfe ãfe afama mãshtifo kexesharaxoyokaxõ, mã fake yome yonomayotirofo. Nãskakẽ ãpa yoini keskafakĩ ãa yosiyonõ, yora fetsafãfe ãfe afama mãshti kexexoyotirofo. <sup>3</sup> Nãskarifiakĩ nõ Cristo Ifofayoa-mano nõ oa fake yome keskarakẽ nõko xinifãfe noko yoipaiyai keskafakĩ noko yoipaonifo. Nãskakẽ ato yonoxomis keskara nõ iyopaoni. Nã Cristo chanĩmara faafãfema amisfo keskara noko amapaonifo nõ ato yonoxomis keskara inõ. <sup>4</sup> Akka Epa Niospa mã yoinitã, ãfe Fake nõchini, kẽromã xakĩ mẽranoax kãini judeokõi mã Moisés noko yoini keskara nikakõipaoni. <sup>5</sup> Akka nono mai ano oni, noko imasharaxii a Moisés yoini keskara nikapaimisfono, nãskax Niospa fakekõi keskara nõ inõ.

<sup>6</sup> Chanĩma, mãfi iskaratã Niospa fakefoki. Nãskakẽ Epa Niospa ãfe Yõshi Shara nõ mẽra naneano aõxõ nõ yoitiro iskafakĩ: “Epa Niosi, mãfi ãfe Epakõi,” ixõ nõ yoitiro. <sup>7</sup> Nãskakẽ iskaratã mã Niospa fakefo, a Moisés yoini keskara nõ anã nikaima nõko ifo inõ. Nãskakẽ afe fakefo afara inãsharai keskafakĩ matori afara inãsharaxii Jesucristoõxõ.

### *Pablo a Jesús Ifofaafõ ato shinãkõini*

<sup>8</sup> Akka taeyoi mã Nios tãpiyoamax mã nioskõimafo mã ato nikaito mato yonomayopaonifo. <sup>9</sup> Mã mã askapaonixakĩ, akka iskaratã mã mã Nios tãpikõia. Epa Niospari mato tãpikõia. Mã mã Nios tãpikõifiax, çafeskakĩ a mã apaoni

keskafakī afianā mā ato yonoxopaimē? Afāfekai Epa Nios xanīfo ika ari mato iyotirofoma. <sup>10</sup> Nā māto xinifāfe yoinifo keskai mā askakōimis. Nāskakē pena safaronō mā tenemis, askatari rama oxe kāiyaino mā fista amis, askatari rama xiniaino mā fista amis, askatari seis xinia finōmata māto tare mā fanamisma. Mā shinākī iskafamis: “Nā fistaŋa nō ato fe inimaino Epa Nios nokoki inimatiro, nāskaxō nōko chaka noko soaxotiro,” ixō mā anorima shināmis. <sup>11</sup> Ē mato shinākōimis ē mato yonoxopaoni. Ē mato Jesúsnoa yoikī kaxpa ē mato yoipaoni rakikīa mā shināyamafiaino.

<sup>12</sup> Efe yora mīshtichi, ē mato yoisharapai ē akai keskafakī anā mā Jesús Ifofanō. Mā Jesús Ifofai keskafakī ėri Ifofaaki. Ē mato fe ikano mā ea chakafapaonima, askatamaroko mā ea sharafapaoni. <sup>13</sup> Akka mā mā tāpia Epa Niospa ea nētefani taefakī Niospa meka sharaōnoa ē mato yoinō nō afe ipaxanō. Akka ē isinī iki ē anā katiroma ini. Nāskakē ē mato ano nēteni. <sup>14</sup> Ē isinī iki ē omiskōifiaino mā ea iskafanima: “Pablo isinī iki mesekōi nō afe ichanātiroma,” mā ea fanima. Askatamaroko mā ea ifisharakōini oa Niospa āfe ājiri keskara ōikī, askatari oa Jesucristo keskara ea ōikī mā ea ifisharakōini, askatari mā ea kexesharakōipaoni. <sup>15</sup> Ē mato yoiaino mā inimapaoni. Akka, ħafeskai iskaratīa a mā ipaoni keskai anā mā inimaimamē? ħMā shināimamē a mā ea noikōipaoni keskara? Ē afara yopaito mā ea ināpaoni ea noikōiyānā. Akka māto ferori tsekatiro pinīkē mā ea inākerapaoni. <sup>16</sup> Akka, ħmā shināimē na meka chanīmakōi yoikī ē mato noikaspai keskara?

<sup>17</sup> A Moisés yoikī kenenī keskara yora fetsafāfe mato tāpimapaikani. Nāfāfe a shināifo keskara mato tāpimapaikani mā ato keskara inō. Akka a akaifo keskara mā ato feta aka a keskarakai sharama. Nāskaxō nāfāfe noko paxkanā fapaikani afianā mā ea nikatama afāfe mato yoiaifo keskara mā ato nikanō. <sup>18</sup> Akka fetsafāfe mato sharafaifono shara itiro. Ē mato fe iyamafiano mato sharafaifono, nāskarari sharakōi itiro. Jesucristoōxō mato sharafaifonori sharakōi itiro. <sup>19</sup> Ēfe fakefāfe, afianā ē matoōnoax omiskōikī ē pae meekōi. Nā kēromā fake kāikī pae meetiro keskarakōi ē mei. Akka mā fake kāixō anā pae meetiroma. Nāskarifiakī mā Jesús Ifofayamaino ē matoōxō pae meekōitiro. Akka Cristo āfe Yōshi Shara māto ōiti mēra naneano afianā ē mātoōxō pae meetiroma. <sup>20</sup> Ooa. Iskaratīa ē ano mato fe ipainō afianā ē mato yoisharaxiki. Akka ē tāpiama a mā shināi keskara mā anorima shināi. Akka ē ano mato fe ixō ē mato yoisharakōikerana.

*Agar fe Sara ipaonifo keskaraōnoa noko yoi*

<sup>21</sup> Niospa shināmanaino a Moisés kirika kenenī keskaraōnoa mā anā nikapaimākai Nios Ifofakaspakī ea yoikapo ē mato

yoinō. Akka, ¿a Moisés yoini keskara mā nikamismamē?  
<sup>22</sup> Iskafakī yoikī kenenifo: “Abraham fake rafeya ini. Fetsa  
 āfe āfinī yonomati feta fake ani, fetsa āfe āfikōi feta ani. Nā āfe  
 āfikōi tsōa yonomati inima,” ixō keneni. <sup>23</sup> Nā Abraham āfe  
 āfinī yonomatinī fake fini, nā kērofāfe fake fimisfo keskarari  
 fake fini. Akka Abraham āfe āfikōi yōxafokōi ini fake fitiroma.  
 Nāskafekē Epa Niospa Abraham yoiyoni iskafakī: “Mī āfinī  
 fake feronāfake fixii,” ixō yoinino, nāskakē Abraham āfinī  
 fake feronāfake fini. <sup>24-25</sup> Nā xotofake rafeoxō Niospa afara  
 fetsa noko shināmani. Niospa yoiyoni afeska faxō yorafo  
 ifitiromākī. Nā kēro Agar nō shināino machi Sinai noko  
 shināmani, Arabia anoa. Nā machi āfe ane fetsa Agar. Nā  
 machi arixō Niospa Moisés yoini Moisésri nā israelifo ato  
 yoinō nikakōinōfo. Askatari nā kēro Agar nō shināino noko  
 Jerusalén shināmatiro. Nā Jerusalén ano ikafo nō shināino nā  
 Agar āfe fakefo noko shināmatiro. Nāfāfe Moisés yoini keskara  
 nikakanax nāfo āto yonomati keskarafa. <sup>26</sup> Akka nāno kēro  
 fetsa Abraham āfe āfikōi. Āfe ane Sara, nā nōko efakōi keskara.  
 Nō Sara shināino Jerusalén fetsa nai mēranoa noko shināmatiro  
 Epa Nios ika aria. Nāskakē chipo nō ari ixii. Nōri Sara keskara  
 nō āto yonomatima, āfe fakefori āto yonomatifoma. A Moisés  
 yoini keskarakai nōko ifo itiroma. <sup>27</sup> Akka kirika kenekī  
 iskafanifo:

Kēromā, mī fake fimismakī inimafe, askatari mī fakeya-  
 makī inimayanā tai tai ife mī fake pae meemismakī. Akka  
 nā kēro fenē eneyoa nāfi chipo āfe fena ichapayakōi ixii kiki,  
 a kēro feneya finōmainīfofā,  
 ixō yoikī kirika ano kenenifo.

<sup>28</sup> Efe yora mīshtichi, nōfi Isaaca keskaraki. Epa Niospa  
 Abraham yoiyoni keskai āfe fake Isaaca chipo kāini. Nāskarifiakī  
 Epa Niospa yoiyoni keskai nōri āfe fakefo. <sup>29</sup> Nā  
 āto yonomati Agar yōxafoxoma āfe fake fikī taefani āfe ane  
 Ismael. Akka nā fake fimismato Sara chipo yōxafoxō fake  
 fini Niospa Yōshi Sharaōxō. Nāskano Agar āfe fake Ismael  
 iyoaxō āfe exto omiskōimapaoni. Nāskarifiakī Niospa Yōshi  
 Sharaōnoax nō Niospa fake ikaino, fetsafāfe Nios Ifofakaxoma  
 noko omiskōimatirofo. <sup>30</sup> Akka kirika kenekī, ¿afaa fanifomē?  
 Kenekī iskafanifo: “Mī fake Isaaca ē ināxiai keskara, akka  
 nā mātō yonomati Agar āfe fāke afaa fixiima. Nāskakē mato  
 anoxō āfe fakeyafi ato nīchikāfe afianā mato fe inōfoma,”  
 ixō Epa Niospa Abraham yoini. <sup>31</sup> Nāskakē ē mato yoi efe  
 yora mīshtichi, nōkai a āto yonomatinī fake keskarafoma.  
 Askatamaroko nōfi Abraham āfe āfikōichi fake keskarafa.  
 Nāskaxō nō Nios Ifofaax nō tsōa yonomati itiroma, nō Niospa  
 fakekōifo itiro.

## 5

*Cristoõnoax isharakãfe a mã ipaoni keskara chaka anã shinãkakima*

<sup>1</sup> Akka Cristo nokoõnoax nani a Moisés yoini keskara nõ anã nikanõma, nãskax anã ãto yonomati nõ inõma. Cristo fistiõnoax nõ isharatiro, nãskakẽ Cristo kachikiri fayamakãfe. Mã ipaoni keskara anã iyamakãfe, nõko xinifãfe yoinifo keskara afianã nikayamakãfe ãto yonomatifo ixikakĩma.

<sup>2</sup> Ë mato yoinõ, ea nikasharakapo. Iskafakĩ shinãyamakãfe: “Ë foshki repa xatekema Epa Niospa ãfe chaka ea soaxotiroma,” ixõ shinãyamakãfe. Anori mã shinãito Jesús mãto chaka mato soaxotiroma Epa Nios fe mã ipaxanõ. <sup>3</sup> Afianã xafakĩakõĩ ã mato yoipai. Fatora fẽtsa mã foshki repa xatepai Nios fe ipaikĩ, anori shinãfikĩ nã Moisés yoini keskara nikakõiamax, anorima shinãx Nios fe mã nipaxatiroma. <sup>4</sup> Moisés yoini keskara fisti mã nikaito mãto chaka mato soaxotiroma. Nãskax mã Cristo fe rafeima, akka Epa Niospa mato noifiaino mã Cristo fe rafeima, akka Epa Niospa mato noifiaino mã Cristo kachikirifai. Nãskafekẽ mato afeska fatiroma mãto chaka mato soaxona mã afe ipaxanõ. <sup>5</sup> Akka Niospa Yõshi Sharaõxõ mã nã tãpia, Cristoõxõ nõko chaka noko xoaxotiro Niospamãĩ noko noikõikĩ. Nãskakẽ nõ manasharai. <sup>6</sup> Nõ foshki repa xateano, askayamãkĩ nõ xateamano, afãfekai nõko chaka noko soaxotiroma. Akka nõ Jesucristo Ifofakõinaino fetsafo noko ato noimasharakõitiro nõ ato noisharakõinõ. Nã fisti nõ fichipai, chanĩmara fasharakõixii.

<sup>7</sup> Mã Jesús Ifofasharayopaoni. Akka, ¿tsõa mato yoiamẽ, na meka sharakõĩ kachikirifayanã mã anã nikanõma? <sup>8</sup> Akka Niospakai anori mato yoiaia. Æfe Fake fisti mã chanĩmara fanõ mato yoia. <sup>9</sup> Akka mato mẽraxõ yora fistichi chaka shinãkĩ, nã fistichi keyokõĩ mato afara chaka shinãmatiro, aõxõ chakakõĩ mã shinãno. <sup>10</sup> Ë Nios kĩfiyanã nõko Ifo ã chanĩmara fakõini, ã akai keskafakĩ mãri chanĩmara fanõ. Akka nã mato fanĩrira chaka shinãmanaifo Niospa ato omiskõimaxii.

<sup>11</sup> Efe yora mĩstichi, akka eõnoa yoikĩ mã iskafamis: “Na Pablo yoimis nõ foshki repa xateamax nõ Nios ari katiroma ixõ yoimis,” mã ea famis. Maa, ãkai anori yoimisma, ã anori yoiaito ea omiskõimakeranafo. Akka ã yoimis: “Jesucristo ifi cruz ikaki mastafono noko nãxonĩ, nõko chaka noko soaxoxii Epa Nios fe nõ ipaxanõ,” ixõ ã yoimis. Nãnori ã yoiaito nikakĩ nã Jesúsnoa nikakaspamisfãfe ea omiskõimamisfo. <sup>12</sup> Akka fet-safãfe mato yoimisfo iskafakakĩ: “Mã foshki repa xatexoma mã Nios chanĩmara faima,” ixõ fanĩrira mato shinãmamisfo. Nãnori yoikakĩ mato fekaxtefamisfo, nãfo anã mato fe iyama-painõfo.



<sup>13</sup> Efe yora mīshtichi, Jesucristoõxõ iskaratĩa ãfe meka fisti nikakõikãfe. Afaa fetsa mato yonomayamafiaino chakafayamakãfe. Jesucristo mato imasharakĩ iskaratĩa nã nõ apaiyai keskara nõ atiro iyamakãfe. Akka fetsafo fe axõ faatanãkãfe noinãkõiyana. <sup>14</sup> Akka Niospa Moisés yoini iskafakĩ: “Nã mã noimeai keskariakĩ fetsafori noisharakãfe,” ixõ yoini. Mã askafakĩ nã Niospa Moisés yoini keskara, keyokõi mã aki. Mã askafakĩ keyokõi a Niospa Moisés yoini keskara mã aki. <sup>15</sup> Akka mã chakafaatanax mã keyotiro, oa paxta rafe keyonãkanax retenãtirofo keskai. Nãskakẽ kexemesharakãfe askaxikakĩma, a mato feta Nios nikamisfo anã mato fe ichanãtirofomaki. Askatari Nios kachikiri fatirofoki.

*Nõko shinã mēraxõ nõ afara chakafapaimis keskara yafi a Niospa Yõshi Sharaõnoax nõ isharatiro Pablo ato yoini*

<sup>16</sup> Akka ẽ mato yoi Niospa Yõshi Shara nikasharakãfe aõnoax isharaxikaki. Nãato mato yoitiro mã afeskaimãkai. Nã nikakõixõ afianã a mã apaoni keskara mãto shinã mēraxõ afara anã mã atiroma. <sup>17</sup> A nõko shinã mēraxõ nõ afara chakafapaiyai keskarakai Niospa Yõshi Sharapa shinãima. Nãskaxõ ãfe Yõshi Sharapa noko amapaiyai keskara nõko shinã mēraxõ nõ shinãfikĩ nõkai askafapaimisma. Nõko shinã mēraxõ nõ shinãpaoni keskarakai Niospa Yõshi Sharapa anori shinãmisma. Akka nã nõ apaiyai keskafakĩ nõ atiroma. A nõ afara chakafapaoni keskara nõ anã ayamakĩ Niospa Yõshi Sharapa nõko shinã mēraxõ noko yoiyai keskara nõ nikakõitiro. <sup>18</sup> Nãskakẽ Niospa Yõshi Shara nofe rafeaino a Moisés yoini keskara anã nõko ifo itiroma noko yonomaxiki.

<sup>19</sup> Fetsafãfe Nios nikakaspakakĩ afarafo chakafakani. Mã mã tâpia afe keskarafo ikafofãki. Nãskakẽ feronãfakefãfe ãto ãfimafo chotamisfo. Nãskakata afara fetsa fetsatapafo chakafamisfo. <sup>20</sup> Nãskakaxõ afara yora fakaxõ na nõko niosra ixõ kifimisfo. Askatari koshoiti tâpiafo, askatari ato noikaspamisfo, askatari isharakõtama õitifishkimisfo. Nãskakaxõ atonã fisti afara apaimisfo, askatari noikaspafaanãmisfo nores fisti nõ tâpikõia a nõ tâpia keskara tsõa tâpiama ikanax. <sup>21</sup> Nãskaxõ fetsafo afara fiapaimisfo, askatari pãemisfo, askatari pikĩfinapaikõimisfo. Nãskakaxõ afara fetsa fetsatapafo chakafamisfo. Ẽ mato yoimis a keskara chakafo Epa Niospa keyokõi ato ikinã ano tsoa katiroma afe ipaxakakĩ.

<sup>22</sup> Akka Niospa Yõshi Sharapa noko ikinãno fetsafo nõ noikõitiro inimakõiyana, askatari nõ isharakõita nõ fekaxtetiroma, askatari fena fenakima nõ manasharakõiyotiro, askatari nõ fetsafo chakafamisma itiro, askatari nã nõ yoimis keskara nõ atiro isharakõita. <sup>23</sup> Askatari isharakõita, fetsafo fe feratenõtama oi tsifaxõ ato yoimis ita, askatari a Niospa

fichikaspai atama nōa nō kexemetiro afaa chakafaxikima. Nāskaxō Niospa āfe Yōshi Sharaōxō noko yoia keskara nō atiro isharaxiki. Nāskakē anā meka fetsa nō yoipaima Niospa Yōshi Sharaōnoax isharaxiki. Nāskakē anā noko tsōa yonomatiroma. <sup>24</sup> Nā Cristo chanīmara faifo tii afe yorakōifo. Jesús cruznoax noko nāxoni nōko chaka noko soaxoxiki. Akka nō naa keskaraxō anā afaa nō chakafatiroma a nō apaoni keskara. Nāskakē nā noko Niospa amapaiyai keskara fisti nō atiro. <sup>25</sup> Nāskakē Niospa Yōshi Shara fe nō rafekī nā noko yoiai keskara nō nikakōitiro. Nāskaxō nā noko amapaiyai keskara nō atiro.

<sup>26</sup> Nāskakē Niospa Yōshi Shara fe nō rafeax kakapaimis nō itiroma, fetsafāfe nokoōnoa yoisharanōfora ixō ē mato finōkōiara iyamakāfe. Mā askakī fetsafo mā shināchakamatiroki. Mā askara chakafo shinākī mā shināsharatiroma, askara chakakōiki.

## 6

### *Mā ranā axosharanōnā faatanākāfe*

<sup>1</sup> Efe yora mīshtichi, fētsa afara chakafaito ōikī, Niospa Yōshi Sharayaxō aō noikī oi tsii faxō yoisharakāfe, afara chakafakī xatenō. Meka mitsisipato yoyimakāfe. Nāskakē māri kexemesharakāfe afara chakafayamaxiki. <sup>2</sup> Nāskakē fetsafo fe afara axonōnā faatanāsharakāfe. Mā ranā Nios kīfinōnā faatanākāfe. Fetsa omiskōiaito aō noikī inimamakāfe, nāskakē kexenōnā faatanāsharakāfe. Fetsa omiskōiaito Nios kīfixokāfe Jesúsnoa shināmasharayanā Ifo sharafanō. Mā askakī nā Cristo yoini keskara keyokōi mā akikai.

<sup>3</sup> Akka fētsa shinākī iskafai: “Ē sharakōi. Ēkai tsoa yopaima ea Nios kīfixonō,” ixō shināi. Nā keskara yorakai afama, āakōi pāramei. <sup>4</sup> Akka nō nōko shinā mēraxō nō shinātiro nō Jesús yonoxōsharaimākai. Akka nō yonoxōsharai mā nō tāpiax nō inimasharatiro. Nāskakī nō shinākī iskafatiroma: “Na fetsafāfe afara chakafaito keskafakī ē afaa chakafamisma,” ixō nō shinātiro. <sup>5</sup> Akka keyokōichi nō afara chakafamis. Nāskaxori keyokōichi nōko shinā mēraxō nō shinātiro a nō afara chakafamis keskara. Tsōakai a Niospa noko amapaiyai keskara noko amatiroma, nōakōi nō atiro.

<sup>6</sup> A Niospa meka mato yoimisto afara yopaito ināsharakāfe.

<sup>7</sup> Mārifi anofi pārameyamakāfe, tsoari Nioski kaxemetsamapaitiroma. Akka akikī kaxemetsamapaiyaifono Niospa ato omiskōimatiro. Akka afara nō fanaxō mā fimiano āfe fimi nō fitiro. Nāskarifiakī Niospa meka nikayamata nō afara chakafaax nō omiskōitiro. Akka nā Niospa noko yoia keskara nō akax nō isharakōitiro. <sup>8</sup> Akka fētsa āfe shinā mēraxō afara shinākī afara chakafaax omiskōifinakōitiro. Akka Niospa Yōshi Sharapa amapaiyai keskara fētsa afafāini, nāfi Niospa Yōshi

Sharaõnoax nisharapakenakaki. <sup>9</sup> Nāskakē afara sharafakī eneyamakāfe. Nāskaxõ iskafakī shināyamakāfe: “Mē fet-safo sharafayomiski iskaratīa ē anā askaimakai, ē anā fet-safo sharafatiromaki. Nāskanõ,” ixõ anori shināyamakāfe. Akka nõ askatama nõ inimakõikē nõ noko ināpaiyai keskara shara Niospa noko ināsharaxii. <sup>10</sup> Nāskakē afeskaraifāfe õikī keyokõi ato axosharafafāikāfe. Nāskatari a Nios Ifofaafõ ato noisharayanā ato axosharafafāikāfe.

*Pablo mā mekai xatekī ato yoisharani*

<sup>11</sup> Akka iskaratīa ēkõi mato kirika kenexoni. Ēfe kene efa-pakõikī õikapo. <sup>12</sup> Akka fetsafāfe mato yoipaikani iskafakakī: “Māto foshki repa xatekāfe nõri askaraki,” ixõ mato yoimisfo. Akka mato yoipaikanima a Jesucristo ifi cruz ikaki-noax noko nāxoni nõko chaka noko soaxoxiki. Askara mato yoimisfoma, askara nõ ato yoiaito noko omiskõimatirofora ikaxõ. <sup>13</sup> Nāfāfe mā foshki repa xatefikaxokai a Moisés kene-neni keskara tsõa nikakõimisma. Nāskakaxõ matori yoipaikani māto foshki repari mā xatenõ. Māri nõ imisfo keskai mā ato fe askaito, nāfāfe fetsafo yoitirofo iskafakakī: “Nafāfe noko nikakõimisfo,” ixõ ato yoitirofo. <sup>14</sup> Akka ēkai anori shināpaima, nõ meka shara fistiõnoa ē yoipaifafāini. Nā meka shara fistiõnoa ē yoipaikī ē iskafai: “Aicho, Jesucristo ifi cruz ikakinoax ea nāxoni, aõxõ a ē chaka shināpaoni keskara anā ē shinātiroma. Jesús nā ea nāxofaitīa nā ē afarafo chakafapaonifo mā Jesús fe naa keskarakõi. Nāskakē anākai ea afeska fatiroma,” ixõ ē shinātiro. <sup>15</sup> Nõ Jesucristo Ifofaxõ nõ foshki repa xatea askarakai sharama atokai nõko chaka noko soaxotiro-ma. Akka nõ Ifofaito Niospa nõko chaka noko soaxotiro fena keskara shara nõ inõ. <sup>16</sup> Niospa Yõshi Sharapa Jesúsnoa noko yoia keskara mā akē Epa Niospa mato inimamakõiyanā mato noikõi. Nāskax Niospa fakekõifo mā iki.

<sup>17</sup> Akka mē mekai xatekī ē mato yoinõ. Ēfe Ifo Jesúsnoax ē omiskõimis, ēfe yora toafo õikī mā tāpitiro ē Jesús yonosharaxonaito ea iskafamisfo. Nāskakē anā ea fekaxtefayamakāfe.

<sup>18</sup> Efe yora mīshtichi, nõko Ifo Jesucristo keyokõi mato noikī mato sharafa fafāfāini. Nāskapainõ. Nā tii.

*Pablo*

## Pablo Efeso Anoafo Kirika Kenexō Fomani

*Pablo ato yoisharani, Efeso anoafo*

<sup>1</sup> Ēkīa Pablo ē mato kirika kenexō fomai. Ea Jesucristo nīchia ē aōxō āfe meka yoimis inō, Niospa fichipaiyai keskafakī. Ē na kirika mato fomai a Nios Ifofafo, Jesucristo chanīmara fafo, Efeso anoafo. <sup>2</sup> Nōko Epa Nios feta nōko Ifo Jesucristo mato shināsharanō mato noikī māto shinā mēra mato shināmasharanō, māto ōiti fekaxtenōma.

*Nō Cristo chanīmara faito afara sharafo noko amatiro*

<sup>3</sup> Nōko Ifo Jesucristo āfe Apa Niospa noko afara sharafo noko shara famai, nai mēraxō nō ōiamafiaito nōko ōiti mēra noko inimamasharai nōmāi āfe fakefokē. Nāskakē nō yoisharai nō inimasharakōi Epa Nioski. <sup>4</sup> Epa Niospa mai yafi nai onifayoxoma noko katonī nō afe ĩpaxanō āfe Fake Cristo keskara afaa chakafamisma keskara sharakōi nō inō. Niospa noko noikī, <sup>5</sup> āfe fakefo noko fani. Anori shināni Niospa a Jesucristo noko nāxoyoxiai. <sup>6</sup> Nāskakē Niospa āfe Fake noikōikī nokori nāskarifai noikī. Nāskaxō noko nimasharapakenaka. Nāskakē Nios sharaḡinakoikē nō aicho fai akiki inimakī nokomāi afama mīshti sharafo famaito Jesúsxō. <sup>7</sup> Niospa noko noikī ḡinakoikī āfe Fake Jesús noko nāmā nīchixonī nokoōnoax āfe imi foax ifi cruz ikakinoax noko nāxonō nō sharakōi afe inō, askatari nōko chaka nokoōnoa noko soxonō. <sup>8</sup> Nāskaxō Niospa noko ōimana noko noisharakōikī noko tāpimasharakōikī, askatari noko shināmakī ḡinakoikī. <sup>9-10</sup> Nāskakē Epa Niospa yoini afama mīshti onifayoxoma āfe Fake xanīfo imaxikī, keyokōi, nai mēranoafoya, nāmānoafoyari āto xanīfo ḡinakoikī inō. Tsoa pishta anori meka nikayomisma Niospa onāxō yoini a shināi keskafakī, anori noko tāpimani nō tāpisharanō aōxō. Nāskakē Niospa āa shinākī iskafani: “Nā ēfe Fake ē nīchipayaitīa ē nāmā nīchixii keyokōi nai mēranoafoya, nāmānoafori āto xanīfokōi inō,” ixō Niospa shināni. Nāskaxō nānori iskaratīa noko tāpimana.

<sup>11</sup> Nōfi Cristo fakekōifokī. Nō afe yorakōifo ikaito, Epa Niospa noko katonī noko onifayoxoma āa shinākī taefani. Epa Niospa nonori iskafakī shināni: “Na ēfe Fake Jesús ē ināi keskari fakī nā ēfe Fake Jesús Ifofaifori ē ato ināira,” ixō Epa Niospa shināni. A Niospa shinākī yoini keskara, nāskarifakī iskaratīa mā askafaa. <sup>12</sup> Akka nō Cristo Ifofakī taefaxō nō yoikī iskafanō: “Epa Niosi, mī fāsi sharakōi. Mī noko sharaḡamis keskara sharakōi. Tsoa fetsakai mia keskara sharama,” ixō nō yoinō.

13-14 Nāskakē ē mato yoi mā kai judeofoma. Nāskafixō Niospa meka shara Jesúsxō mā nikakī māri chanīmara fai. Mā askaito Niospa mato chaka soaxona mā afe nipaxanō. Nāskakē māri iskaratīa Cristo afe yorafokī. Anorī Niospa yoikī tae-fani keskafakī, āfe Yōshi Shara nō mēra nanea noko īkinō. Noko askafaito nō tāpitiro āfe shara noko ināxii. Nāskaxfi nō Niosnoafoki. Nāskakē nō tāpiama afetiara nai mēra noko ifi. Taekōifakī anori noko yoini. Nāskakē nā chanīmara fakī nō yoipakenaka: “Nōko Nios fāsi sharakōi,” ixō nō yoipakenaka.

*Pablo Epa Nios yōkani iskafakī: “Epa Niosi, mī Fake chanīmara faafo ato tāpimasharafe,” fani*

15-16 Nāskakē nirixō ē mato nikai mā Jesús Ifo sharafata, a fetsafo ferī a mato feta Nios Ifofamisfo fe mā rafe-sharakōiaito ē nikakī inimayanā ē nirixō ē mato Epa Nios kīfixōfafāini. Nāskakē ē iskafa fafafāini: “Epa Niosi, na Efeso anoxō mia noisharakata fetsafo ferī rafesharakōiafo,” ē fai yoikī. <sup>17</sup> Niospa āfe Fakekōikī Jesucristo. Nāskax shara-finakōia. Nāskakē ē mato kīfixokī iskafamis: “Epa Niosi, mī Yōshi Sharapa na Efeso ano ikafo ato tāpimasharakōife mia xafakīakōi tāpisharakōinōfo. <sup>18</sup> Oa xini peisharaino nō fomākīa foiski nō nai xafakīakōishara nō ōitiro keskara, mī Yōshi Sharapa ato ōimafe Epa Niosi, mia tāpisharakōinōfo āto ōiti mēraxō. Askatari ato tāpimafe a nō oniyamatai mī noko shināni nono nāmāxō mī Fake Jesús nō Ifofaax nō mefe īpaxanō nai mēra. Askatari a nō ōimismafo mī noko ināxiai ato ōimafe. <sup>19-20</sup> Epa Niosi, mī Yōshi Sharaōxō mī afama mīshti famis. Nāskaxō mī Fake Cristo mī anā nimanī mī Yōshi Sharaōxō mefe pataxamei niāx mefe xanīfokōi inō. Nāskax mī pōya kayakai aōri mefe tsoa. Afia mī Yōshi Shara nō mēra nanexō a nofeta mia chanīmara faafo tii afara fetsafo mī noko ispasharakī mī noko amasharakī.” <sup>21</sup> Āfe Yōshi Sharaōxō Cristo ato mānāo nīxō, nā nāmānoafo āto xanīfo tii finōkōia. Askatari nai mēranoafori āto xanīfofo Cristo ato finōkōia keyokōi. Nāskax āto xanīfo finakōia. Tsoa pishta finōtiroma. <sup>22-23</sup> Akka Epa Niospa āfe Fake yoini keskafakī keyokōi mai anoafoya nai mēranoafo ato īkinā. Nāskaxō āfe Fake katonī nā chanīmara faafo tii āto Ifo inō. Nā chanīmara faafofi āfe yorakōi keskarafoki. Cristo āto mapo keskara. Akka nōko māpo nō shinātiro. Nā fistichi nā chanīmara faifo yoitiroki, noko īkināno afeskaxō nō atiomāki. Akka nō mapo-maisax nō nitiroma. Nāskarīfiai nōko Ifo Jesúsmaisax tsoa nitiroma. Keyokōi nā chanīmara faafo nofe ikafo. Nāskax nofe rafe kakāini nā noko amapaiyai keskara nō anō.

## 2

*Niospa noko noikī noko ifia nō afe īpaxanō*

<sup>1</sup> Taeyoi mā iyopaoni oa naa keskara mātō chaka soaxma.  
<sup>2</sup> Nāskakē mā afara chakafamis, a yora chakafāfe akai keskafakī. Askata a nai mēra ikafāfe a niafaka chakafāfe āto xanīfāfe Satanās mato amapaiyai keskafakī mā amis, Satanās ifofakī. <sup>3-4</sup> Nōri askafapaoni, nā nō afara chakafapaiyaifo keskara nō apaoni. Afara chaka shināmiskōifo nō ipaoni. Epa Niospa nā nikayospamisofo ato omiskōimanaitīa ato omiskōimakōixii. Nōri ato keskaraxō nō afara chakafaito nā ato akai keskafakī nokori omiskōimakerana. Akka nō afara chakafafiato noko omiskōimatama. Niospa noko fāsi noisharakōimis, noko shinākōikī noko omiskōimapaima. Noko chakafapaimisma. <sup>5-6</sup> Nō Nios Ifofayoxoma nō shināyopaonima, chaka fistis nō shināyopaoni, nō chakafayopaoni. Niospa noko noikōifiato, nō oniyamatai ares noko Niospa ōikī yoini: “Na ēfe Fake Jesús Ifofaifo ē ato nāmā nīchixonī mā reteafono, ē otifaxō, ato yafi ifixii niri nai mēra afe īpaxanōfo,” ixō Niospa yoini ares ōikī afe ikaifono ato omiskōimayamaxii. Nāskakē nō nāmānoax oa nō afe nai mēra ika keskara nō nono ika nāmā. <sup>7</sup> Epa Nios xanīfokōixō Jesús yafi noko otoani noko noikōikī nō afe nai mēra īpaxanō, nā chipo fakeaifāferi tāpinōfo Epa Niospa noko noikōiaito. <sup>8-9</sup> Nios sharafinakōia. Nō Jesús chanīmara fakē noko ifi nō afe īpaxanō. Akka nōa nō ifimetiroma, Nios fistichi noko ifitiro noko noisharakōikī. Akka nō afarafo shara fatokai noko ifitiro nō afe īpaxanō. Akka fetsafo āa chanīkani iskatirofoma: “Ē afama mīshti famis. Nāskakē ē tanaima sharakōi Nios ano kai,” ixō yoiflax askara yorakai Nios ano katiroma āamāi chanī Jesús Ifofaamax. <sup>10</sup> Nāskakē Epa Niospa taeyoi shināyoni Jesucristoōxō yorafetsafo nō axosharakōinō. Nāskakē aa fistichi noko onifani afara fetsafo nō sharafanō aōxō. Akka nores fisti nō afaa sharafatiroma. Cristo Jesús Ifofaxō nō afama mīshti sharafatiro. Nāskakē taeyokī Epa Niospa ares ōikī yoini.

*Jesucristoōnoax nō ōiti sharakōiya ipanaka anā nōko ōiti chaka neenōma*

<sup>11</sup> Nāskakē shināmakiyamakāfe. Mā chanīmara fayopaonima. Nā judeofāfe yora fetsafo ato yoikī iskafanifo: “Nā yora fetsafo nōko kaifoma. Akka nōfi Niospa yorafokī. Akka na yora fetsafokai Niospa yorafoma. A Niospa noko yoimis keskafakī keyokōi nōko foshki repa nō xatepakemis na nō judeofāfe. Nāskakē nō ōimani afe yorakōifoxō. Akka a yora fetsafāfe āto foshki repa xatemisfoma. Nō ato tāpitiro afokai Niospa āfe yorafoma,” ixō judeofāfe mato yoimis mā judeofokēma. <sup>12</sup> Akka shinākapo. Taeyoi māakai Cristo fe iyopaonima. Epa Niospa israelifo ato katonī keskafakī matorikai katoyonima mā ato fe afe yorafo ipanā. Afe yorafo yoiyoni keskafakī

matorikai yoyonima. Mā shinākī iskafani: “Ooa. ¿Nō afeskatiromē nōko chaka noko soaxonō nō Nios fe ipaxanō?” ixō mā shināpaoni. Nāskatari nā Nios chanīmara faafoma mēra mā iyopaoni. Mā Nios fe rafexoma mā tāpiyopaonima. <sup>13</sup> Nāskaxō mā Niosnoa shināyopaonima. Nāskafiano Cristo Jesús matoōnoax naino, āfe imi foni mā afe ipaxanō. <sup>14</sup> Nāskakē Jesucristoōnoax nō noinātiro, ēfe kaifo israelifo fe yora fet-safo. Nāskakē nāskarafos noko shināmasharatiro nō aōnoax noinā faatanāx afianā nō noikaspa faatanānōma. Nāskakē afanā noko anā afeska fatiroma. Iskaratīa nō Cristoōnoax yora fisti keskarafō. <sup>15</sup> Nāskakē Jesús nokoōnoax nani. A Moisés Niosxō keneni keskara anā noko tsōa yoitiro. Jesucristo keyokōi noko nāxoni nō afe yorafo inō. Nāskakē māri judeofoyamafekē, mato yafi noko ifini. Nāskax a yora fisti keskarafō nō inō. Mā nō fetsa keskarax ōitisharayaōkōifo nō inō noināsharakōi. <sup>16</sup> Nāskakē Jesús ifi cruz ikakinoax noko nāxoni. Na ēfe kaifo judeofo yafi a judeofomari Jesúsxō Niospa noko a yora fisti keskara noko fani. Noko noisharakōikī nō nikayospafo iyopaofinikē, Jesús nokoōnoax nani. Nāskakē Niospa noko yora fetsafoya rafema sharakōia afe yorafo nō inō.

<sup>17</sup> Nāskakē Jesús nāmā fotoxō noko yoini āfe meka shara Niospa noko ifinō. Noko judeofo akai keskafakīri, matori ifia mā judeofoyamafekē mā Nios shināyopaoni. Nāskakē iskaratīa nō anā noikaspa faatanātama nō nōināsharakōi. <sup>18</sup> Jesús noko nāxoni nōko chaka noko soaxoxiki nō Nios fe rafesharakōinō afe ipaxakī. Nāskakē Niospa āfe Yōshi Shara nokoya rafemana na nōko kaifomafo fe nō rafesharakōinō. Nāskax Epa Nios fe nō ipaxanō.

<sup>19</sup> Nāskakē iskaratīa mā anā Nios chaifaama mā afe yorakōifo. Nāskakē iskaratīa a Jesús Ifofamisfo fe a rama Jesús Ifofaifo Niospa yorakōifo. <sup>20-22</sup> Nāskax mā oa pexe sharakōi keskarafō. Oa tokiri nō pexe shara faa, afeskax paketiroma keskara. Taefakī nō mai pōkita a mēra tokiri nanexō, nō pexe fatiro pakeyamanō. Tokiri kerex sharakōiki nō atiro pexe fakī. Nāskarifiakī taefakī a Niospa mekaōnoa ato yoipaonifāfe ato yoipaonifo Niospa ato shināmanaino. Akka chipo mā Jesús nāmā fotoxō, aōxō tāpimisfo ato ifini aōxori a fetsafo tāpimanōfo, oa pexe fisti mēra nō imis keskaraxō, akairi ato tāpimanōfo Niospa meka sharaōnoa ato yoikakī, atoōxori yorafāfe chanīmara fanōfo. Askaxori a rama fakeaifāferi Jesús Ifofakanax, oa nō pexe mitsisipakōi faano, anā paketiroma keskarakōi inōfo Jesucristo Ifofakanax. Nāskakē nōri Ifokōi faax, nōri anā paketiroma nō keyokōichi Ifofaax. Oa pexe sharakōi mēra nō ika keskara, nō ixii, Niospa āfe Yōshi Shara

nō mēra naneano.

### 3

#### *Niospa Pablo yoini a judeofoma Jesúsnoa yoinō*

<sup>1</sup> Nāskakē ē mato Epa Nios yoixonī. Ēfi judeokī mā ēfe kaifoyamafekē ē mato noi. Mato noixō, ē mato Jesucristoōnoa yoi. Nāskakē ea achixō karaxa mēra nīchitifo. <sup>2-3</sup> Niospa ea nīchini ē aōnoa ē mato yoinō. Niospa keyokōi yorafo ato noi, judeofo fisti ato noima. Akka a iyopaonifāfekai tsōa tāpiyopaonima Niospa ares ato noifiaito. Nāskakē ē aōnoa ē mato kenexona, pishta fakī. <sup>4</sup> Na ē mato kenexona ōixō, mā tāpitiro nā ē tāpia keskafakī Cristoōnoa. Akka a nōko xinifo iyopaonifāfekai tsōa tāpipaonima. <sup>5</sup> Niospa taefakī tsoa tāpimayonima. Mā iskaratīa Niospa āfe Yōshi Sharaōxō a aōnoa yoimisfo mā ato tāpimana. Askatari a āfe mekaōnoa yoimisfori mā ato tāpimana. <sup>6</sup> Akka na meka sharakai tsōa Jesúsnoa tāpiyopaonima. Akka yora fetsafori Epa Niospa afe yorafo itirofo. Nāskakē iskaratīa matori Niospa tāpimani, judeofoya yora fetsafo Jesúsnoax Niospa fakefo mā inō. Nāskakē Epa Niospa āfe kaifo judeofo yoiyoni keskafakī Jesucristoōxō akairi fitirofo.

<sup>7</sup> Nāskakē a Jesús Ifofaafō ē ato chakafafiaito, ea noisharakī Epa Niospa ea nīchini ē āfe meka shara ato yoinō āfe Yōshi Sharaōxō. <sup>8</sup> Ē fāsikōi Jesús chakafakī finakōipaoni, na fetsafāfe chakafakī finayamafiaifono. Ē askafafiaito, ares fisti Niospa ea noikī ea nīchini aōxō na yora fetsafo judeofoma ē āfe meka shara ato yoikī tāpimanō Niospa ato noisharakōiaito. Ato noikī ato shināmakōipai. Nios fisti tsoa keskaramakōi. Āfe Fake Jesúsnoa keyokōi nō tāpitiroma. <sup>9</sup> Niospa keyokōi onifaxō, ea nīchini ē ato mēstesharakōi tāpimanō. Tsoa pishta tāpiamano ares fisti tāpini Jesús noko nāxoyoamatai ato tāpimanima. <sup>10</sup> Nāskakē Niospa ea nīchini āfe meka sharaōnoa ē ato yoinō akairi Nios tāpinōfo. Tāpikanax oa ato fe yorakōifo keskara ixikakī Jesúsnoax. Mā askaito nai mēraxō a xanīfo tiito askara ōikī tāpisharatirofo. “Chanīma, Niospa tāpikīfinakōia,” fatirofo. <sup>11</sup> Afaa pishta onifaataima nānori shināni: “Na ēfe Fake Cristo Jesús Ifofaifo efe yorakōifo ixikani,” ixō yoini keskara mā iskaratīa askakōia. <sup>12</sup> Jesúsmai noko nāxonikē, nō Ifofaax, nō Nios fe rafesharatiro mesetama noko potayamanō. <sup>13</sup> Ē mato yoinō, ea nikakāfe. Ē mato yoiaito ea nikakakī ea karaxa mēra ikimatifo. Ē omiskōifiaino eōnoa shināchakayamakāfe. Ea karaxa mēra ikimanafoki ē Cristoōnoa mato yoiaino. Nāskafekē inimasharakāfe, mā Niospa yorafokī.

*Cristo noko noi*



<sup>14</sup> Nāskakē nāfo shinākī ē ratokonō mai chachipakefofā ē Epa Nios kīfimis. <sup>15</sup> Nāmāi nai mēranoafo feta nono mai anoxō nā Ifofaafāfe āto Epakē, nāato ēfe fakefora noko famis. <sup>16</sup> Nānori ē mato Epa Nios kīfixokī iskafamis: “Epa Niosi, mī fāsi sharakōi. Maitiofo yafi nai mēranoafo mīnākōifo. Mī afama mīshti fatiro. Mī Yōshi Sharaōxō mia chanīmara faafo Efeso anoafo mī kerex shara ato ināfe. <sup>17-19</sup> Nā Jesús Ifofaafo mī Yōshi Shara atoya rafemafe. Mia tāpikī finakōinōfo. Askaxō tāpinōfo mī fāsi ato noiaito. Mī Fake Cristori fāsi ato noi. Cristo noko noiai keskara tsōa tāpitiroma. Askafikē ato tāpimafe, Epa. Akka tāpikanax, mī ato fe rafekōiaito mia keskara inōfo,” ixō ē matoōxō Epa Nios kīfifafāini.

<sup>20</sup> Akka Epa Niospa afama mīshti fatiro a nō yōkai tii noko axotama finōmata noko axotiro. Nāato āfe sharaōxō noko axotiro afama mīshtifo. Noko axopaiyai keskafaito nō tāpitiroma. Finōmainīfofāta noko shara fatiro. <sup>21</sup> Nāskakē nō Epa Nios yoikī iskafatiro: “Epa Niosi, mī sharafinakōia. Mī Fake Jesucristoōxō mī noko sharafamis,” ixō mēxotaima nō yoifafāini. Keyokōichi nā chanīmara faafo feta a inōpokoiaifāferi yoisharapakenakafo. Nāskapakexapainō.

## 4

### *Niospa Yōshi Sharaōnoax oa yora fistikōi keskara nō itiro*

<sup>1</sup> Ē mato yoisharakōi. A Jesucristoōnoa ē mato yoimis. Ē ato yoiaito a Jesucristo nikakaspaifāfe ea karaxa mēra nīchiafo. Ē mato yoisharanō, ea nikasharakōikāfe. Niospa mato katonī Jesucristo mā Ifosharakōi fanō. A ē mato yoiai keskai isharakōikāfe. <sup>2</sup> Nāskax, “Ē finakōia,” iyamakāfe, anori shinātama. Yora fetsafo noisharakāfe ato shinākī. A fētsa tāpisharamato mato afeskarafaito, shināchakatama ato noisharakāfe, ōitifishkitama, isharakōita. <sup>3</sup> Niospa Yōshi Sharaōnoax nō isharakōinō a yora fistikōiax itikini. Tanaimakōi ikāfe, ōitifishkiki faatanākakīma. <sup>4</sup> Niospa noko yoimis keskai: “Isharakōikāfe, nōko Ifo ifofasharax, mā chaima anā fotoiyoi kiki,” shināi isharakāfe. A Nios Ifofaafari oa nofe naneafo keskarakōifoki. Nāskax isharakāfe. Niospa āfe Yōshi Shara askarakī. <sup>5</sup> Nōko Ifokōi Jesucristo. Nā fisti nō chanīmara fai Epa Nios fe ipaxakī. Nāskakē āfe Yōshi Shara nō mēra nanei. <sup>6</sup> Anā fato fetsa nōko Niosma. Nā fistikōi āfe Fake fe a chanīmara faafo tiito āto xanīfokōi. Nāskaxō keyokōi onifani. Nāskakē a Ifofaafo āfenākōifo. Nāskaxō afara sharafo noko amai nōko shinā mēraxō afe keskararafo noko amatiro. Āfe Yōshi Sharaōxō keyokōi a fichipaiyai keskara nō anō āfe shinā noko ināi.

<sup>7</sup> Nō Jesús Ifo sharafaito ōikī āfe shara noko minia fisti rasi chanīmara faifo nō ato axonō Jesús Ifofasharakōinōfo. Keyokōi

āfe sharaōxō afara fetsa nā Jesús apaiyai keskara anōfo ato ināi. Nō fisti keskarafiakē nā noko imapaiyai keskara noko ima nō afara axonō. <sup>8</sup> Nāskakē Niospa meka Cristoōnoa yoikī David kirika kenekī iskafani:

Nono mai anoax Apa Nios ari kaitīa nā Ifofaafo tii āto chaka ato soaxoni afianā Satanās āto ifo inōma, askatamaroko Ifo sharakōi fanōfo. Nāskatari keyokōi nā afe yorafo ato imapaiyai keska fakī ato imani aōnoax ishara faatanānōfo, ixō keneni.

<sup>9</sup> Nāskaxō kenekī iskafani: “Nono mai anoax Cristo afianā Apa Nios ari kani,” ixō keneni. Nānori kenenino nō tāpitiro Apa Nios ari kayoamano na mai ano fotoyonino nai mēranoax noko keskara ixiki. <sup>10</sup> Niospa yoiaino, fotoni. Mā reteafono āfe Apa Niospa otoani. Nāskaxō ifini afe nai mēra ixii. Nāskakē keyokōi nai mēranoafofāfe nono nāmānoafāferi āto xanīfo ixii. <sup>11</sup> Nāato noko katoni noko imapaiyai keskai aōnoax nō shara faatanānō. Nāskaxō fetsafo afe rafemisfo ato imata, nokori nīchi aōnoa fetsafo nō ato yoisharanō. Fetsafori katoni nā meka shara aōnoa ato yoinōfo Jesús Ifofanōfo. Fetsafori katoni āfe meka shara chanīmara faifono ato tāpimayanā ato kexesharanōfo āfe meka nikasharakōinōfo. <sup>12</sup> ¿Afeskakī ato Niospa katonimē? Aōxō yoinōfo Niospa ato katoni a yora fetsafo ato yoisharanōfo, a Jesús chanīmara faafo aa yora fisti keskara inōfo Jesús tāpikōikanax. <sup>13</sup> Afāfe Niospa Fakeōnoa noko tāpimasharakōiaifono, aōxori fetsafori nō ato yoikī tāpimasharanō. Askax keyokōi oa yora fistikōiax itikini nō inō. Askaxori Jesús afe keskaramāki nō tāpisharakōinō. Askax oa Jesús ōiti keskara sharakōi ixiki. <sup>14</sup> Nāskax anā oa fakefo keskara nō itiroma mā nōmēra Niospa meka yosiano. Oa nefe onori kai, anā onori kai imis keskai, fakefo askatirofo afaa shināsharaima. Askaxō a Niospa meka tāpisharafāfema ato yoiāifāfe nikafofāsa fatirofo. Askaxō tāpisharaxikakīma Niospa mekakōi. Askatari a yora āa chanīki fanīrira ato yoimis nō nikatiroma. <sup>15</sup> Fanīrira ato yoitama nō nōināsharakōixō Niospa meka mēstesharakōi nō ato tāpimasharakōitiro. Nō askai nōko Ifo Jesucristo āfe ōiti keskara sharakōi nō itiro. <sup>16</sup> Jesús nōko mapo keskaraxō noko shināmākī noko yonomanaino, oa afe yora keskara nō itiro. Akka nōko yora meemafīax nō mifimais ita, nō kishimais ita, nō pachomais ita, nō feromais ita, ixō nō afaa yonotiroma, afaakairoko shinākī. Akka nō mifi rafeyata, nō tae rafeyata, nō fero rafeyata, askai fetsexō nō meemasharakōixō nō yonosharakōitiro shināfāi, nōko yoramāi meemasharakōikē. Nāskafakīri keyokōichi nō Jesús Ifokōi faax nofe yorafo fe nō isharakōitiro noināsharakōikai, Jesúsnoax mā noko āfe Yōshi Shara ināno oa āfe yora keskara

sharax.

*Cristo nōko ōiti noko fetsafaxōano a keskarakōi nō itiro, anā nō ipaoni keskara ixikima*

<sup>17</sup> Jesucristo ea ikinā aōxō ě mato yoinō. Ea nikasharakōikāfe a Jesús Ifofamisfāfema fanīrira chaka fisti yoimisfo fanīrira shinā kakī. Nāskakē tsōa shināsharaima. Nāskakē ato keskara iyamakāfe. <sup>18</sup> Tsōa shināima oa fakishifā mēra niafo keskarafō. Askatari oa feromais keskara ikafo chai ōima. Nāskakē tsōa tāpifāi shināmisma. A Niospa shināi anori shināmisfoma. Nāskakē tsōa Nios Ifofapaimisma. <sup>19</sup> Āto ōiti kerexkōi. Askakaxō afarafo chakafakani tsoa rāfitiroma. Nikayospakōimisfo, nō finakōiara ikani nikayospakani. <sup>20</sup> A Jesús noiaifāfema shināifo anori mato Jesús tāpimamisma fanīrira chaka. <sup>21</sup> Jesús mato tāpimamis chanīkī mato yoimisma. <sup>22</sup> A Nios tāpiamax mā iyopaoni anori anā shināyamakāfe. Fanīrira mato Satanás shināmayopaoni mā chaka inō. <sup>23</sup> Anā anori shinātama, iskaratīa Niospa Yōshi Sharapa mato shināmapaiyai anori shinākāfe a mā iyopaoni shināmakikāta, isharakāfe. <sup>24</sup> Ōiti fenashara fichipaikāfe. Oa nō rapati chapokōi potaxō nō rapati fenasharakōi nō safemis keskafakī, ōiti fena sharaya ikāfe Niospa fichipaiyai keskai.

<sup>25</sup> Nāskax nō Cristo yorafo. Nāskakē anā fanīrira chanī yoyamakāfe. Afara ōixō yoikōikāfe chanīmakōi.

<sup>26</sup> Mā ōitifishkikī anā afarafo chakafayamakāfe. Askata aa chai ōitifishkiyamakāfe. Ōitifishkipai samama raekāfe xini ikiyamano. <sup>27</sup> Mā ōitifishkiriaito koshikōi Satanás mato chakafamarisafai. Askayamakāfe Satanás nō mēra ikiyamanō.

<sup>28</sup> Mā yometsoyopaoni anā askayamakāfe. Iskaratīa yonokāfe a mā fichipaiyai fixikakī, a yora afaamaisfo ato ināxikakī afara sharafo.

<sup>29</sup> Askata anā fanīrira chaka yoyamakāfe. Shināsharata yoisharakāfe. Mā askaito mato nikakanax āto ōiti mēra inimanōfo. Askatari Jesús Ifofasharanōfo. <sup>30</sup> Askata Niospa āfe Yōshi Shara nōko ōiti mēranoa omiskōimayamakāfe afara chakafakī. Askatamaroko nōko Ifāfe āfe Yōshi Shara nokoōnoa inimamasharakōikāfe. Āfe Yōshi Shara nō mēra naneakī, oa koxa marakka faa keskarafakī Niospa noko askafaa nā Jesús anā fotoaitīa.

<sup>31</sup> Māto yora mēraxō mato ōiti fishkimamis a chaka shināmakikāfe. Ato noikaspai ōitifishkikī finakōimis iyamakāfe. Afaa shināima oa ōitimais keskara āakōi mekai keskara iyamakāfe. Fāsikōi yōachepemis ato ferateni iyamakāfe. Ato noikaspakī ato ičhayamakāfe. Mā chakara ato fayamakāfe. Mākōi chakafakī ato noikaspayamakāfe. <sup>32</sup> Askatamaroko ato

fe raenā faatanāsharakōikāfe, a mato Niospa aka keskakafakīri Jesúsxō ato raefakāfe.

## 5

### *Afeskak Niospa fakefo itirofomē*

<sup>1</sup> Mā Niospa fakefokē mato noisharakōi. Nāskakē a keskara ikāfe, Ifofasharakōi. <sup>2</sup> Cristo noko shinākī finakōi nokoōnoax nani. Nōko chaka noko soaxoni. Nāskakē noko nāxoni, aakōi nanima. Nāskaito xafakīa Epa Niospa ōini nōko chakaōnoax nani, anā nōko chaka nokoō neenōma. Nāskakē mā ranāri nōināi finasharakōikāfe.

<sup>3</sup> Mā Niospa fakefokī ōisharata ikāfe. Isharakāi afarafo chaka shinātama. Māto āfimafo chotayamakāfe. Kēromāri māto fenemafo chotamayamakāfe. Askatari mares fisti afama mīshti a mā fichipaiyaifo fiyamakāfe. <sup>4</sup> Askatari fanīrira meka chaka yoiyamakāfe. Anori shinātama a Niospa fakefo isharakōikaxō, mēstekōi yoisharatirofo iskafakī: “Aicho Epa Niosi, mī noko ikisharakōiaki,” ixō mā yoimis. <sup>5</sup> Mā mā tāpimis yora fetsafāfe fanīrira shināmisfo āto āfimafo chotamisfo ato fe oxakaxō, kēromāri āto fenemafo chotamamisfo, askara yorafo Nios ano fokanima. A afarafo noikakī fichipaimisfo, askara yorafāfe afama mīshtifo noikani Nios shinātama, askara yorafo a Nios xanīfo ano fokanima.

<sup>6</sup> Ōisharakakī yora fetsafāfe anorima mato yoipaikani fanīrira āa mato pāarakakī. Askara yorafāfe Nios nikakaspakakī chakafakani. Askaito ōikī Niospa ato kopikiri chakafaxii atoki ōitifishkikī. <sup>7</sup> Nāskakē nā ikaifo keskara mā iyamakāfe. Afarafo ato feta chakafakī, anori shināyamakāfe.

<sup>8</sup> Mā fanīrira shināyopaoni māto ōiti oa fakish keskara ikax, akka iskaratīa mā Cristo fe rafeax a mā iyopaoni keskara anā mā shināima. Māto ōiti xafasharakōia mā ika. Nāskara shara. Mēxotaima isharakāfe. <sup>9</sup> Nāskax mā isharakōimis. Cristo mato ikināno māto ōiti xafasharakōi mā imis. Mā isharakōiax shara mā itiro. Māto ōiti mēraxō mēstesharakōi mā shinākōitiro. Mā anori shināxō anā fanīrira mā yoima. <sup>10</sup> A Niospa fichipaiyai keskakafakī tāpisharakōikāfe. Nāskakōi fakāfe. <sup>11</sup> Nā Nios Ifofakaspamisfāfe, afaa tāpiamafāfe afarafo chakafaifāfe ōiki māri ato feta chakafayamakāfe. Ato ōitamaroko ato yoisharakōikāfe: “Anā afaa chakafayamakāfe,” ixō ato yoikāfe. <sup>12</sup> Askatari a yora fetsafāfe one afama mīshti chakafafiakī onepaimisfo. Askarayakai nō mekaima nō yoi nō rāfitiro. <sup>13</sup> Akka mā fakishano nō rāpari otaxō, keyokōi nō ōisharakōitiro. Nāskarifiāi a yorafāfe afarafo chakafakaxō onepaifiaifāfe, Niospa meka ōikī tāpitirofo a chakafamisfo. <sup>14</sup> Nāskakē Niospa yoimis iskafakī:

Afarafo mā chakafamiski moinīfofākāfe oa mā naa keskara ikax fininīfofākāfe Cristo mātō ōiti mēra oa fafeai keskara mato fasharanō, ixō yoimiski.

<sup>15</sup> Nāskax isharakōikāfe. Oa Niospa meka tāpiama keskara iyamakāfe. A Niospa mekaōnoa yoikī kenenifo anori isharakōikāfe. <sup>16</sup> Nāskakē a Nios Ifofaafomafo iskaratīa chakafinakōiafo. Nāskakē māri isharakōikāfe ato keskara ikakīma. A Niospa apaiyai keskara akāfe mēxotaima. <sup>17</sup> Nāskakē fanīrira chaka shināpaiyamakāfe a Niospa mato amapaiyai anori tāpisharakōikāfe. <sup>18</sup> Askatari anā pāeyamakāfe. Mēxotaima pāeriai mā chakakōifo itiroki. Askaxō mā afaa shināsharaima. Askatamaroko Niospa Yōshi Shara mato mēra naneano afe rafesharakāfe mato yonomasharanō. <sup>19</sup> Nāskakē mā ranā Niosnoa yoinōnākāfe isharakōikai. Nōko xini David mēxotaima fanāipaoni keskariai māri Nios Ifofaax aōnoax fanāikāfe mā ranā mātō ōiti mēraxō nōko Ifo shināi inimayanā. <sup>20</sup> Pena tii aichora fakāfe Epa Niospa noko afama mīshti faxōfaino, nōko Ifo Cristo shināyanā nō Ifo sharafanō.

### *Afe keskara nō itiromē Cristo yorafo*

<sup>21</sup> Cristo nikasharapai, mā ranā nikanōnāsharakōikāfe.

<sup>22</sup> Kēromāri a mātō Ifo Jesús mā nikasharai keskafakī, mātō fenefo ato nikasharakōikāfe mato yoisharaifāfe, mātō Ifo Jesús mā nikai keskafakī. <sup>23</sup> Cristo nōko xanīfofinakōia nō nikasharai keskafakī, kērofāferi āto fenefo nikasharakani āto xanīfomāiyakē. Askatari Cristo noko ifimis nō nikasharakōitiro oa nō afe yorakōifo keskaraxō. <sup>24</sup> Nāskakē kēromā āfe fene nikasharatiro āfe xanīfomāiyakē a nōko Ifo Jesús chanīmara faafo tiito nikasharaifo keskafakī.

<sup>25</sup> Nō Cristo Ifofaano noko noikōiax aakōi nokoōnoax nani. Nāskarifikī feronāfakefāfe, mātō āfīfo noisharakōikāfe. <sup>26</sup> Mā āfe meka chanīmara faito, oa noko fāka choka keskara faxō noko katonī, oa nō afaa chakafamisma keskara noko imaxii. <sup>27</sup> Mā noko ifiax, nāskax nokoōnoax nani nōko chaka noko soaxoxiki nō isharanō. Nā anā nōko Ifo Jesús oaitīa a chanīmara faafo tii noko ifixō sharakōi noko ōixii, oa nō afaa chakafamisma keskara noko ōixii. <sup>28</sup> A feronāfakefo āa noimesharaifo keskafakī, mātō āfīfo noisharakāfe. <sup>29-30</sup> Akka shinākapo. Tsōa pishtakai ato yora chakafamisma. Nōko yora nō mesefakī fonāikī nō pimis shara nixiki. Nāskafakīri Cristo a afe yorafo ato kexesharamis māmāi nō afe yorakōifokē. <sup>31</sup> A Niospa meka yoimisto kenenī iskafakī: “Nāskakē feronāfake kēro fiax anā apa fe afa ikano anā ano itiroma. Paxkatiro, āfi fe ixiki. Askax oa fisti keskara ixiki anā rafema,” ixō yoikī kenenī. <sup>32</sup> A Niospa meka yoimisto kenenī anori taefakī tsōa tāpinima. Mā iskaratīa noko Niospa

tāpimasharai a nōko Ifo Cristo Ifofaafo tii afe yorafokanax, oa fisti keskara afe yorafo ixō keneni. <sup>33</sup> Ē mato yoi fisti rasichi mātō āfifō noisharakōikāfe. Mēxotaima aa mā mā noimeai keskafakī mātō āfifō noisharakāfe. Askatari kērofāferi āto fenefo noisharakōikaxō nikasharakōinōfo.

## 6

<sup>1</sup> Fakefāfe, mātō epa nikasharakōikāfe mātō efa yafi, nōko Ifo Jesús noikī. Nāskara sharakōi. <sup>2-3</sup> Epa Niospa Moisés shināmanaino kirika keneni iskafakī askara nō nikanō: “Mātō epa yafi mātō efa noisharakōiyanā ato nikasharakōikāfe. Mā askafakī nono mai anoxō xinia ranā mā aki inimayanā,” ixō Niospa shināmaino Moisés kirika keneni.

<sup>4</sup> Iskaratīa āto apafari ē yoisharai. Mātō fakefo ferateyama kāfe matoki ōitifishkiyamanōfo. Ato askafatamaroko a nōko Ifāfe noko noiai keskafakī, mātō fakefo tāpimasharakōikāfe. Fenāmāshta ato yoisharakōikāfe akairi Jesús tāpisharakōinōfo.

<sup>5</sup> Askatari ato yonoxomisfāferi mātō xanīfo tii ato nikasharakōikāfe, nono mai anoxō mato yonomanai fāfe mātō xanīfo tiito. Nāskakē mato yoiaifāfe ato nikasharakōikāfe, nā nōko Ifo Jesús fichipaiyai keskafakī mā samama ato axorisa fai. Askatari mātō xanīfāfe mato yonomanaito mā axosharatiro. Nāskakē, “Ē Cristoōxō yonosharai,” ixō nō yonosharatiro. Nāskarifakī ēfe xanīfori ē yonosharaxotiro.

<sup>6</sup> Mātō xanīfāfe mato ōiainos yonoxosharakakima, mato ōiyamafaiainori yonosharaxokāfe inimakōiyanā. Mā askaito ōi inimanō. Mā mātō xanīfo yonosharaxokī, nā nōko Ifo Cristo yonoxona keskara mā faikai. Akka nono mai anoxō mātō xanīfo mā inimama keskafakī, nōko Ifo Niospa mato amapaiyai keskara mā axikai. Nāskax nōko Ifo Jesús āfe yonomati ixikakī. <sup>7</sup> Inimasharakī yonosharaxokāfe. A mā nōko Ifo yonosharaxonai keskafakī mātō xanīfori yonosharaxōkāfe inimayanā. <sup>8</sup> Mā mā tāpia yorafāfe yonosharaifāfe ōikī, Cristo afara sharakōifo ato ināxii, a xanīfomais ināta a xanīfoyari ināxii.

<sup>9</sup> Nāskakē mā xanīfofōfāferi, a mato yonoxomisfo ato shara fakāfe. Nō mato chakafaira ixō ato ferateki koshapaiyama kāfe. Shinākāfe, māri Ifoyakī a nai mēra ika. Nōko Ifo Cristo keyokōi nāskarafos noko ōi kiki.

*Afeska x nā nō chanūmara faafo tii nō mitsisipasharakōi itiromē fetsafāfe noko afara chakafamapaiyaifono nō afaa afeska fanōma*

<sup>10</sup> Ē mato yoisharanō, ea nikasharakōikāfe, efe yora mīshtichi. Nōko Ifo Niosnoax nō mitsisipakōi itiro āfe Yōshi Shara no mēra naneano. <sup>11</sup> Ē afara fetsaōnoa mato yoinō

mã tãpinõ. Sorarofõ ato xanĩfãfe ato yoitiro itipinĩsharanõfo fetsafãfe ato afeska fanõfoma. Nãskaxõ a aõ xorakomeaifo kerexkõi ato inãtiro, maiti kerexkõiri ato inãtiro, sĩtora kerexkõiri ato inãtiro fetsafãfe ato retenõfoma. Nãskarifiakĩ Epa Niospa ãfe Yõshi Shara mato inãpaiyaito fikãfe, Satanás chakata mato afara chakafamapaiyai keskara axikakĩma. <sup>12</sup> Akka nõkai yorakõifo fe mēenãima. Askatamaroko nã niafaka yõshi chakafo fe nõ iki, kerexkai noko afara chakafamapaiyaifono. Nãfãfe nõ õiamafiaino noko afara chakafamapaikani. Nã niafaka yõshi chakafo ichapakõifo. <sup>13</sup> Nãskakẽ Epa Niospa ãfe kerex shara mato inãpaiyaito fikãfe aõnoax mitsisipakõi ixikakĩ, niafaka yõshi chakafo matoki nokoxõ, mato afeska fanõfoma. Nãskaxõ nã niafaka yõshi chakafãfe mato afara chakafamapaiyaito Niospa kerex sharaõxõ mã finõtiro mato afaa chakafamanõfoma. Akka Niospa nã mato amapaiyai keskara mã akõinax mã isharakõitiro, niafaka chakafo mato makinoa potax. Nãskax Jesús fe rafexõ mã afaa chakafaima.

<sup>14</sup> Ë mato yoiái keskai sorarofõ itipinĩ sharatirofo keskai. Mãri itipinĩ sharakãfe niafaka yõshi chakafo matoki nokoxõ mato afara chakafamapaiyaifo keskara axikakĩma. Epa Niospa mato amapaiyai keskara fisti akãfe isharaxikakĩ. Sorarofãfe ìkisi ãto sĩtora kerexkõi itipinĩ fatirofo ayaxõ ãto rapati safexikakĩ. Nãskarifiái mã isharakõiaino niafaka yõshi chakata mato afeska fatiroma. Askatari sorarofõ ãto safeti kerexkõichinĩ xorakometirofo, nã ato noikaspaifãfe ãto õitiki ato pĩanõfoma. Mãri Niosnoax isharakõikãfe, nikafaka yõshi chakafãfe mãto õiti mēraxõ mato afaa chakafamanõfoma. <sup>15</sup> Oa sorarofãfe ãto sapato shara safekanax ichotirofo keskariai, mãri nãskari akãfe. Nãskarifiái mã ato Niospa meka yoisharaikai mã katiro a Niospa meka nikamisfoma mēra. Itipinĩ sharakãfe fetsafoki nokoxõ Niospa meka sharaõnoa mã ato yoiaito nikai inimakõinõfo. <sup>16</sup> Akka sorarofãfe ãto xĩtimati nã kerexkõi tsomatirofo a ato noikaspaifãfe ato pĩanõfoma. Nãskarifiakĩ a mato xĩtixonai mã fenai. Mã nõko Ìfo Jesús chanĩmara faino nã niafaka chakafãfe mato afara chakafamapaiyaito mã atiroma. Nãskakẽ nõ Jesús chanĩmara fakõinaino nã nõko xĩtimati keskara itiro. <sup>17</sup> Sorarofãfe ãto maiti kerexkõi safekaxõ ãto mapo kexesharatirofo, a ato noikaspaifãfe ato mapoki afeskafanõfoma. Nãskarifiakĩ mã Jesús chanĩmara fakõinax mã Epa Nios fe nipaxatiro. Mã askaito niafaka chakata mato afeska fatiroma. Sorarofãfe ãto keno fitirofo a ato noikaspaifo fe aõ ato fe retenãxikaki. Nãskarifiakĩ Niospa Yõshi Shara oa keno keskaraki fikãfe. Nã keno keskaraki Niospa meka shara nã mã fichipaikõi niafaka yõshi chaka matoki nokopaiyaito otimafaxikakĩ. <sup>18</sup> Shinãmakiyamakãfe. Mēxotaima kifikãfe Niospa ãfe Yõshi

Sharaõxõ mato tãpimasharai. Shinãmakixoma mato shinãkõi. Nãskakẽ shinãchakayamakãfe. Mẽxotaima ato Nios kãfixokãfe a Ifofaafõ ato axosharanõ. <sup>19</sup> Nãskaxõ eari kãfixokãfe Niospa Yõshi Sharaõxõ ãfe meka shara mesetama ã ato yoinõ. Nã ãfe kaifomafoõnoaxri Jesús ato nãxoni ã yoinõ tsõa tãpiyonifoma. <sup>20</sup> Ea Niospa nĩchini anori ã ato yoinõ ãfe meka shara. Nãskakẽ ea karaxa mẽra ikimanifo. Nãskakẽ ea kãfixokãfe ã Niosxõ ato yoinõ mesetama.

*Pablo mã mekai xatekĩ Efeso anoafõ meka shara fomani*

<sup>21</sup> Nofe yora Tíquico ã aõ noisharakõi. Efeta nõko Ifo Jesús yonoxomiskẽ. Ë Tíquico mato ari nĩchixii, ã afe keskara ikamãkĩ mato tãpimanõ. <sup>22</sup> Nãskakẽ ã a mato ano nĩchikai nõ afe keskaramãki a Tíquico mato tãpimanõ. Nãskakẽ mãto õitinĩ shinãsharai mã inimanõ mã mã tãpiax.

<sup>23</sup> Nõko Epa Nios feta nõko Ifo Jesucristo mãto õiti mẽra mato shinãsharamanõ mã fekaxteyamanõ. Jesús chanĩmara faax, keyokõi mã nõinãi fetsenõ. <sup>24</sup> Nã nõko Ifo Jesucristo noipakenakafo Nios sharakõi mato noikõipakenaka. Aska-pakexapainõ. Nã tii.

Ëkĩa Pablo ã mato kenexoni.



## Pablo Filipos Anoafu Kirika Kenexō Fomani

*Pablo karaxa mēraxō a Nios Ifofaafu Filipos anoafu ato kirika kenexō fomani*

<sup>1</sup> Ēkīa Pablo, Timoteo feta nō Jesucristo yonoxomis. Nāskakē nā Epa Nios Ifofaafu nā mātō xanīfofoya a mato kexemisfo nō kirika kenexō fomai mā tāpinō. Nā pexe rasi Filipos anoafu nō fomai, nāfofi Jesucristo afe yorafoki. <sup>2</sup> Nōko Epa Nios feta nōko Ifo Jesucristo mato noikī mato sharafai kiki mato inimamakī mā anā fekaxteyamanō mā isharakōinō.

*A Nios Ifofaafu Pablo ato kīfixopaoni*

<sup>3</sup> Nā ē mato shināitīa, ē Epa Nios aichofa fafafāini. <sup>4</sup> Ē Epa Nios kīfikī mēxotaima inimakōikai keyokōi ē mato kīfixōfafāini. <sup>5</sup> Mā efeta Jesucristo chanīmara fakī taefanitīa, iskaratīari mā efeta Niospa meka shara Jesucristoōnoa mā ato yoimis. <sup>6</sup> Chanīmakōi ē yoi, nā Epa Niospa mātō ōiti mato shara faxoni keskafakī nē askakōifa fafafāini nā Jesucristo oaitīa. <sup>7</sup> Nāskakē nānori shinākī ēfe ōiti mēraxō ē matoōnoa shināfafāini, ēmāi mato noikōikī nā Epa Niospa ea sharafai keskafakī mārīmāi efeta meemiskē. Akka ea karaxa mēra ikimanifo. Nāskakaxō xanīfofofāfe ferotaiifi ea iyomisfo anoxō ē ato yoisharanō Niospa meka sharaōnoa afe ĩpaxanōfo. Iskafakī ē ato yoimis: “Jesús noko nāxoni nōko chaka noko soaxoxiki nō afe ĩpaxanō,” ixō ē ato yoimis. <sup>8</sup> Epa Niospa tāpia keyokōi ē mato noikōiatio a nōko Ifo Jesucristo noko noikōiai keskafakī. <sup>9</sup> Ē mato Nios kīfixokī iskafaxōfafāini, mā nōināi finakōinō, askatari mā tāpisharakōixō nikakōisharayanā mā tāpikōinō. <sup>10</sup> Nāskaxō afara sharakōifo tāpixō katonōfo. Nāskakanax isharakōitirofo, afaa chakakai matoō netiroma, matoōnoari afara chaka yoitirofoma mā Cristo oaino. <sup>11</sup> Nāskaxō nā Jesucristo mato sharafai keskafakī, māri askafatiro. Mā askaito mato ōikī fetsafāfe mato yoikī iskafatirofo: “Aicho, nāfo isharakōiafo Epa Niosnoax. Nios fāsi sharakōi,” ixō yoixikani. Nānori matoōxō ē Epa Nios kīfifafāini.

*Ē shināi ē Cristo fe rafepakenaka*

<sup>12</sup> Efe yora mīshtichi, mā tāpinō ē mato yoinō. Ea karaxa mēra ikimafafono, akka ē mēxotaima Niospa meka sharaōnoa ē ato yoifafāini afe nīpaxanōfo. <sup>13</sup> Nāskakē sorarofāfe xanīfāfe pexe anoxō fetsafo feta mā tāpiafo ē karaxa mēra ikē Cristo Ifofai. <sup>14</sup> Ē karaxa mēra ikano nā nōko Ifo Jesús Ifofaafāfe

atirifãfe Niospa meka sharaõnoa ato yoikakĩ mesetamakõi inimakõikai nõko Ifoxõ ato yoikani.

<sup>15-17</sup> Chanĩma, fetsafãfe Cristoõnoa meka shara yoifikakĩ ea finõpaikani, ea shinãchakamapaikakĩ. Akka fetsafãfe ea noikakĩ eõnoa shinãmisfo iskafakakĩ: “Pablo karaxa mēra ikimafiafono Epa Niospa meka yoiaito tsõa xatematiroma Jesúsnoa ato yoiaito nikakõinõfo,” ixõ Jesúsnoa yoisharatirofo. Akka fetsafãfe Cristoõnoa yoikakĩ: “Noko nikakõinõfora,” ixõ ato yoipaikani ea finõpaikakĩ ē karaxa mēra ikano. Akka fetsafãfe ato noikakĩ ato yoisharamisfo, māmāi tãpikaxõ nonoxõ ē Cristoõnoa meka shara yoimiskē afe nĩpaxanõfo. <sup>18</sup> Akka nãskanõ, nã yoipaiyai keskafaxõ Cristoõnoa ato yoinõfo. Nãskafakĩ ato yoiaifono nikai ē inimakõini.

<sup>19</sup> Akka mē tãpia ē inimakõi, mã ea Epa Nios kĩfixonaito nikai Jesucristo ãfe Yõshi Sharapari ea axõfaino. <sup>20</sup> Epa Niospa ea amapaiyai keskara akiki ē rãfitiroma. Ranotamakõi ē yoitiro. Ē askafakĩ yoiaito õikakĩ fetsafãfe Cristoõnoa shinãkõinõfo. Nãskakē ē nayoamax ē niyoa sharakĩ. <sup>21</sup> Akka Cristo fistiõnoax ē ĩpanaka, akka ē nairi sharafinakõia, ē inimakõi ěmāi Cristo fe nĩpaxakĩ. <sup>22</sup> Akka ē niyoxõ fetsafo Cristo ē ato chanĩmara famatiro afe nĩpaxanõfo. Akka ē fato katotiro, nia rakikĩa shara, askayamai naa rakikĩa shara. Ēkai tãpiama. <sup>23</sup> Akka fekaxkõi. Nã rafe sharafiax fato ē katotiro. Akka ē napai Cristo ari kaax afe ĩpaxakĩ, nã sharafinakõia ē mei. <sup>24</sup> Akka fetsari nã sharafinakõia ē shināi, mã ea yopai Niospa meka shara ē mato yoinõ. <sup>25</sup> Mē tãpia māmāi ea yopakõiaito, askatari mē tãpia ē nayoamax ē mato fe iyoikai. Niospa meka shara ē mato yoiaimo mã inimayanã chanĩmara fakĩ mã finakõinõ. <sup>26</sup> Nãskakē ē anã mato fe ikaino mã inimaifinakõixii Cristo Jesúsnoax.

<sup>27</sup> Akka shinãsharata isharakãfe. Nãskaxõ na meka shara Jesucristoõnoa chanĩmakõi yoixikakĩ. Mã askaito ē mato õikanõ, askayamai chai ixõ ē matoõnoa nikakĩ ē tãpitiro mã Jesús Ifofasharaino nãskara fisti shinãkaxõ. Nãskaxõ keyokõi Niospa Yõshi Sharaõxõ fetsafo mã ato Jesús chanĩmara famaxikãki. <sup>28</sup> Mã askafakĩ yoiaito a mato noikaspaifãfe mato mekakĩ xatemapaiyaifono rateyamakãfe. Nãskakē mã atoki rateyamaito õikakĩ tãpitirofo akka nãfo fenokõikani, akka mã fenotama Nios fe mã nĩpanaka. <sup>29</sup> Epa Niospa mato sharafaxõa mã Cristo chanĩmara fata aõnoa mãri mã omiskõinõ. <sup>30</sup> Ē ikai keskai mã efe omiskõimis. Mã mã ea õipaoni ē omiskõiaito, iskaratĩari mã mã ea nika Cristoõnoa ē omiskõiaito nãskafixõ ē eneima Niospa meka ato yoikĩ.

*Cristo nono mai anoax afama iyopaofinixakī iskaratīa xanīfo finakōia*

<sup>1</sup> Nāskakē Cristo mato inimama mato noikī mato inimamashara āfe Yōshi Shara mato fe ika. Chanīma, Cristo mato noikī mato inimamashara mā mā meemis. <sup>2</sup> Nāskakē ea inimamakōikāfe. Isharakōita keyokōichi nānorifos shinākāfe. Mā ranā nōināsharakōikāfe. Nāskakē Jesús mato amapaiyai keskara fisti axikakī. <sup>3</sup> Akka fetsafo afara axotama a mā mā afara apaiyai keskara fisti shināyamakāfe, askatari fetsafāfe eōnoa yoisharakōinōfora ikax kakapaimis iyamakāfe. Askatamaroko isharakōita fetsafoōnoa yoikī iskafakāfe: “Nafāfe ea finōtirofoki. Akka ēkai afama. Jesús fistichi ea imasharatiro,” ixō fetsafo finōpaiyamakāfe. <sup>4</sup> Askatari a mā mā fichipaiyai keskara fisti shināyamakāfe, askatamaroko a fetsafāfe fichipaiyai keskarafori shinākāfe.

<sup>5</sup> Nāskaxō nōko Ifo Jesucristo shināi keskafakī māri nānori shinākāfe. <sup>6</sup> Nāfi Nioskōikī Apa Nios keskara ari onifafianino yoikī iskafapaonima: “Ēri ē Nioskōi nā ēfe Epanāfori ēfenā. Nāskakē ēfe Epa nai mēra ika keskariai ē nono mai ano itiro. Ē askaito afanā ea afeska fatiroma,” ixokai anori Jesús shināpaonima. <sup>7</sup> Askatamaroko Jesús āfe sharafoya āfe afama mīshtifo potayoni, nono mai ano oax ato yonoxomis keskara ixiki. Nāri fake feronāfake kaitiro keskai, feronāfakekōi kāini. <sup>8</sup> Feronāfakekōi ixō isharakōixō Apa Niospa yoiai keskara nikakōiax nani. Afara chakafamis keskarax ifi cruz ikakinoax omiskōikai nani. <sup>9</sup> Nāskakē Epa Niospa xanīfo finakōia imani, nāatofi keyokōi finōinīfofanakī. <sup>10</sup> Nāskakē Jesús keyokōi ato finōano āfe ane nikakakī keyokōichi akiki ratokonō mai chachikaxō yoikī iskafaxikani: “Jesús, mīfi xanīfo finakōiakī,” ixō yoixikani keyokōi nā nai mēranoafoyaxō nono mai anoafāfe. Askatari nā Ifofax namisfāferi askafaxikani, ni-afakafāferi askafaxikani. <sup>11</sup> Nāskafaifono keyokōichi tāpaxikani, “Jesucristo nōko Ifora,” faifono. Askafakāki Apa Niosri inimakōixikani.

*Jesús Ifofaafāfe ato ōimasharatiro afeskax isharatirofomāki, a Jesús Ifofaafoma*

<sup>12</sup> Nāskakē ēfe yora mīshtichi, ē mato fe ixō ē mato yoiaito mēxotaima mā ea nikapaoni keskafakī, ea nikakī finakōikāfe iskaratīa ē chai ikakī nono karaxa mēra. Jesús māto chaka mato soaxonō isharakōita shināsharakōikāfe afe ĩpaxakakī kachikiri fakakīma. Nāskakē meseyanā nikakī finakōifafāikāfe Niospa māto chaka mato soaxonō. <sup>13</sup> Niospa māto shinā mēraxō mato shināmafafāini a mato amapaiyai keskara mā anō. Nā apaiyai keskafakī, nānori mato shināmapai.

14 Nāskatari nā mato amapaiyai keskara akāfe, yōachēpekakima, askatari feratenāyamakāfe, 15 mā isharakōiano tsōa matoōnoa afaa chaka yoiyamanō. Askatamaroko yora chakafo mēra ikax mā isharakōiaito mato ōitirofo māmāi Niospa fakekōiax afaa chakafamisma. Akka mā ato mēra ixō ato ōimasharakāfe, oa fakishi fishifāfe chai chaxatiro keskafakī. 16 Nāskaxō Niospa meka sharaōnoa ato yoifofāfōfāikāfe afe Ipaxanōfo. Nāskakē mā Cristo oaino ē matoōnoax inimaifinakōitiro, ēakairoko kaxpa Niospa meka ē mato tāpimanax, askatari ēa ē kaxpa yonomisma. 17-18 Ē mato yoisharamis mā Jesús chanīmara fakōinō. Akka Epa Nios ē yoitiro iskafakī: “Epa Niospa, ea mīa yoini keskafakī Filiposo anofo mī Fake Jesúsnoa ē yoimis. Nā chanīmara fakōinōfo, a mī ato yoiyai keskara akōixikani. Ē mia ato chanīmara famaōxō ea retexikani rakikīa,” ixō ē Epa Nios yoitiro. Akka ea retefafono eōxō mā Jesús Ifofaano ē inimatiro. Nāskakē māri efe inimakāfe Niospa ea sharafaino matoōnoax ē natiro.

### *Timoteo fe Ipafrodito*

19 Nōko Ifo Jesucristo nīchipaiyaino ē matoki samamashta Timoteo nīchipai mato ōikanō. Mā anā oxō matoōnoa ea yoiaito nikai ē inimakōixii. 20 Akka tsōakai efeta iskafakī shināima, Timoteo fistichi shināi ē shināi keskara. Chanīma, na Timoteo mato noikōikī matoōnoa tāpipai mā Jesús Ifo sharafaamāki. Akka tsoakai na Timoteo keskarama. Nāskaxō ē mato noiai keskafakī nāatori mato noikōi. 21 Akka fetsafāfe āakōi apaiyaifo keskara fisti shināmisfo. Cristo Jesús ato amapaiyai keskara amisfoma. 22 Akka mā mā tāpia na Timoteo isharakōixō mato ōimamis efeta Niospa meka sharaōnoa ato yoimis. Nā fāke āfe apa feta yonotiro keskafakī na Timoteo efeta yonosharamis. 23 Nāskakē Timoteo, ē mato ano nīchipai mato ōikanō. Mē tāpixō ē afeskaimākai, akka mē tāpixō mato ari ē Timoteo nīchi eōnoa mato tāpimanō. 24 Akka ē nōko Ifo chanīmara fai, ea mato ari nīchiaino samamashta kaxō ē mato ōikai.

25 Akka ē shinā nofe yora Ipafrodito mato ari nīchipaikī. Fekaxfiano nāato efeta yonokōimis na Ipafrodito mā ekeki nīchini, ē afara yopaito ea axonō. 26 Na Ipafrodito mato ōisharapaikōi, mato shinākōi māmāi nikamiskē isinī ikaito. 27 Chanīma, na Ipafrodito isinī ikōini, mā nakerati. Nāskaino akka Nios aō noikōikī mā sharafaita, eari noikōiyanā. Akka mā naano ē shināmitsaifinakōikeraita. 28 Nāskakē ē mato ari nīchipaikōi mā inimakōinō matoki anā nokoaino, ēri shināmitsakōiyamaxiki. 29 Nāskakē matoki nokoaito inimayanā ifisharakōikāfe nōko Ifoōxō. Nāskakē nā mā Ipafrodito noiai keskafakī nā keskarafori fetsafo noikōikāfe. 30 Akka na

Ipafrodito Cristo yonoxoni mā nakeraita. Akka mā chai ikax ekeki oyamaino matoōnoa omiskōinixakī nā Ipafrodito ekeki oyamea ea axosharaxiki.

### 3

*Jesús chanīmara faafo a chanīmara faafoma mēra ikaxō ato ōimatiro afeskax isharatirofomākī*

<sup>1</sup> Efe yora mīshtichi, iskaratīa nōko Ifoōnoax inimakāfe. Mē mato kirika kenexokatsaxakī, anā ē mato yoi. Akka mā nikakōisharanō ē mato yoi. <sup>2</sup> Kexemesharakāfe, a yora chakafo fishtayamakāfe, nā paxta pōfe keskarafoki. Nāfāfe afara chakafamisfoki. Iskafakī mato yoipaikani kiki: “Mā foshki repa xateyamax mā Nios ari kaima,” ixō mato yoipaikani kiki. <sup>3</sup> Akka nō foshki repa xatexokai nōko chaka nō soatiroma. Cristo Jesús noko nāxoni nōko chaka noko soaxoxiki. Niospa āfe Fakeōxō āfe fakefo noko imatiro. Āfe Yōshi Sharaōxō nō Nios yoitiro iskafakī: “Nō mia noi. Mī sharakōi,” ixō nō yoitiro. Nāskakē nō akiki inimakōi ares fisti noko ni-matiro. Mā nō tāpia nō foshki repa xateaōxokai noko afeska fatiroma. <sup>4</sup> Fetsafāfe yoikī iskafakani: “Ē shara famis. Nāskax ē Nios fe İpanaka,” ixō shināifono, ēri anori shināpaiki ē shinākī finapaoni. <sup>5</sup> Mē kāiax ocho nia ē oxano ea foshki repa xatenifo. Ēfi israelikōikī, ēkai osiama. Benjamín ēfe xini ipaoni, ēfi āfe fenaki. Ēfe epa feta ēfe ēfa hebreoxomāi ea fake fiafono, nāskakē ēri hebreo. Askatari fariseo ē iyopaoni, nāskaxō Niospa Moisés yoipaoni keskara ē nikakōipaoni ēmāi fariseoxō. <sup>6</sup> Askatari Niospa meka nikasharapaikōikī a Nios Ifofafo ē ato chakafapaoni. Askatari ē isharapaikōikī Moisés yoini keskara ē nikasharakōipaoni. Nāskakē eōnoa yoikī tsōa iskafatiroma: “Na Pablokai Moisés yoini keskara nikakōipaonima,” ixō tsōa yoitiro.

<sup>7</sup> Akka nāfo taeyoi ē ōia ēfenā sharafinakōia iyopaoni. Akka iskaratīa ē ōia afokai anā afama. Cristo Ifofakī afo ē anā shināima mē shināmakikōia. Cristo fisti Ifofakī afe İpaxakī. <sup>8</sup> Akka a ē ipaoni keskara anā ē shināima. Nāfo mē shināmakikōia, afo shināi ē finakōia ipaoni. Akka ē shināi afokai afama, nā afara chaka potamea keskarafō. Akka ēfe Ifo Jesucristo fisti ē tāpipaikōi, nāfi sharafinakōiaki. Ares fisti ea imasharatiro, a Moisés yoini keskarakai ē anā nikatiroma ea imasharanō. <sup>9</sup> Askatamaroko ē Cristo chanīmara faino Epa Niospa āfe Fakeoxō ea imasharatiro a keskara shara ē inō. Akka ē Nioski nokoaino ekeki inimatiro, ē Cristo fisti chanīmara fakē ea imasharanō. <sup>10</sup> Ē Cristo tāpipaikōi afe rafesharaxiki. Niospa āfe kerex sharayaxō Cristo anā otofani keskai, ēri āfe kerex shara mepai a keskara shara ea imanō.

Jesucristo omiskōini keskai ěri aōnoax omiskōipai. Jesús naani keskai ěri askapai a keskara ixiki, afaa chakafaxikima, askatari afaa chaka shināxikima. <sup>11</sup> Nāskakē a chakafo kachikiri fata, nā Jesús keskara sharakōi ě ipai, oa yora naax anā otoa keskara shara.

*Ĕ Jesús Ifokōi fai nā ě akiki nokoaitā*

<sup>12</sup> Ĕ isharakōira ě ifiax ěkai isharakōiama. Askatari Jesús keskara ě ipaifi ě askakōima. Jesucristo ea Ifofamani ě a Ifofanō. Nāskakē ě Jesús Ifofakōini a keskara sharakōi ixiki. <sup>13</sup> Efe yora mīshtichi, ě Jesús keskara iyamafiai a ě ipaoni keskara ě anā shināima. Akka ě Jesús fisti Ifofai. Nā feronāfakefo ichokani xonōnōnākī texkeakekafā ōtirofoma. Nā ifi nīchiti nia ari fisti ōiax ichotirofo keskariakī afara chaka shinākima Jesús fisti ě shināmis a keskara sharakōi ixiki. <sup>14</sup> Nāskaxō afaa fetsa ě shināima. Nā Cristo Jesús ě shināmis Ifofapaikōikī. Akka Niospa ea katonī ě afe ĩpaxanō, Cristo Jesúsōnoax Epa Nios ari ě nokotiro, ariax a keskara sharakōi ixiki.

<sup>15</sup> Mā Jesús Ifofakī nā ě mato yoimīs keskafakī nānorikōi shinākāfe. Akka fetsafāfe a ě shināi keskara shināyamaifono, Niospa ato tāpimakī mēstekōi shara ato yoixii. <sup>16</sup> Akka nāfo nō tāpiax, shināsharakōita nō isharakōitiro, mā nōmāi Jesucristoōnoa tāpiax.

<sup>17</sup> Efe yora mīshtichi, ě Jesús Ifofaa keskafakī māri Ifofakāfe. Mā nō mato ōimamiskī, nō ikai keskai māri askakāfe. <sup>18</sup> Mē mato mēxotaima yoitaifamis, nāskafekē afianā ě mato yoi oiayanā. Akka fetsafāfe na ě mato yoiai keskara nikakaspakani. Āto chaka xatekaspakakī Jesucristo ifi cruz ikakinoax noko nāxoni nikakaspakani. Nāskakanax Jesús noikaspayanā ikafo. <sup>19</sup> Jesús ato amapaiyai keskara shinātama āa apaiyaifo keskara fisti shināmisfo. Nā piyai fisti shinākata, a ayai fisti shināmisfo. Feronāfakefāferi kērofo shināmisfo, āto āfifoma. Kērofāferi feronāfake fetsafo shināmisfo āto fenefoma. Nāskara chakafos shinākī, nā keskara fisti tāpiafo. Akka nō chakama, nō isharakōimis imisfo. Nāskakanax rāfitirofoma, nā keskarrafo mā keyokani. Askatari nā omiskōipakenakafo mēra fokani. <sup>20</sup> Akka nōfi askaramakī, nō Niospa fakefokī nō afe nai mēra ĩpanaka. Akka nō manai a noko Ifimis nai mēranoax oxō noko ifiyonō, nōko Ifo Jesucristo. <sup>21</sup> Nāato nōko yora chakakē noko fetsafaxoxii afe yora keskara sharafinakōia nō inō. Nāskaxō āfe kerex sharaōxō nōko yora noko fenasharafaxoxii afara chakafo nō finōinīfofanō.

## 4

*Nōko Ifo Jesúsnoax mēxotaima inimafafāikāfe*

<sup>1</sup> Nāskakē efe yora mīshtichi, ě mato noikōikī ě mato ōisharapai. Nā ě mato shināitā ě mea ě inimakōikakāini.

Nāskakē ěfe fakefāfe, Jesús kachikiri fayamakāfe. Ifo sharakōi fakāfe.

<sup>2</sup> Akka a xotofake rafe Evodia yafi Síntiqui ě ato yoisharapai mēnāpaikakīma isharakōinōfo nā yora fisti keskarakanax nōko Ifoōnoax. <sup>3</sup> Yamā, mī efeta Nios yonoxomiskī, ě mia yoinō nā kēro rafe ato yoisharafe isharanōfo. Nā rafeta efeta Niosnoa meka shara yoimisfoki afe ĩpaxanōfo. Clementeri nofeta yoimis. Fetsafāferi efeta Niosnoa yoipaonifo. Nāskakē āto anefo Niospa mā kirikaki kenea afe ĩpaxanōfo.

<sup>4</sup> Nāskakē Jesús māto Ifokī mēxotaima inimakāfe. Afi-anā ě mato yoi, inimaifinakōikāfe. <sup>5</sup> Nāskakē isharakōikāfe keyokōichi mato ōinōfo, isharakōiafora mato fanōfo. Mā chaima nōko Ifo oi kiki.

<sup>6</sup> Nāskakē afara afeskara afiaino shināchakayamakāfe, askatamaroko mēxotaima Epa Nios kīfiki. A mā fichipaiyai keskara yōkakāfe iskafakī kīfikī: “Aicho Epa Nios, mī ea nikasharakōimis. A ě yopai keskara tāpixō mī ea axosharamis,” ixō kīfikāfe. <sup>7</sup> Nāskakē mā ratepaiyaito Niospa mato inimamasharakōixii. Afara afeskara ifiaino Niospa nōko ōiti noko inimamaxotiro. Nāskakē nō tāpitiroma afeskaxora nōko ōiti noko inimamaxotiro. Askafiano Cristo Jesús nō chanīmara faino noko shināmasharatiro. Afara sharafoōnoa shinākāfe.

<sup>8</sup> Efe yora mīshtichi, ě kirika kenekī keyokerana. Afara nā chanīmakōi fisti shinākāfe, askatari afara sharafos shinākāfe, askatari nā noko mēstekōi shināmatiroma shinākāfe, yorafāfe a afara sharafaifo keskarari shinākāfe, a Niospa noko axōai keskarafori shinākāfe. Askaxō nōko Ifo aicho fakāfe.

<sup>9</sup> Afara a ě mato yoiai keskara yafi a ě mato tāpimana keskara akāfe. Nāskaxō afara fetsa ě akaito mā ōia keskafakī, māri askafakāfe. Mā askaito ōikī Niospa māto ōiti mēra mato inimamasharakōitiro. Nāskax mato fe isharapakenaka.

### *Filipos anoafāfe kori ichanāfakaxō Pablo fomanifo*

<sup>10</sup> ě nōko Ifoōnoax inimakōi, taeyoi mā ea kori manamayopaofinixakī anā mā ea manamamisma. Akka iskaratīa ea shinākī mā mā ea manamana ě aō pinō. Akka ea shināmakiafora ě mato faima, ea manamatiroma meekī mā ea manamamisma. <sup>11</sup> ě afaayayamafixō ea afaa ināfoma ě mato famisma. ě shināchakaima, Niospa anori ea tāpimana. ě afaamais fiax ě inimatiroma, askatari afara ichapayax ě inimatiroma. <sup>12</sup> Akka mē tāpia afaamaisax afeskax ě itiomāki. Askatari mē tāpia a afara ichapayax ě itiro. Askatari mē tāpia afara afeskara ifiaino ě inimatiroma. Nāskakē ě shināchakaima. Askatari māyaxri ě inimatiroma, fonāfiiairi ě inimatiroma. Afara mekefaxri ě inimatiroma, afaa meke fayamafixri ě inimatiroma. <sup>13</sup> Afara fetsafo ě atiro Cristo āfe kerex shara ea ināno.

<sup>14</sup> Nāskafekē mā ea shinākī mā ea sharafa ē omiskōiaito.  
<sup>15</sup> Akka Filipos anoxō mā mā tāpia, nā ē Jesúsnoa meka shara yoikī taefanitīa noko ifipakexanō. Akka ē Macedonia anoax kaino, mā Nios Ifokōifaxō, mā ea kori manamani, ēmāi Niosnoa mato tāpimanano. Akka fetsafāfe ea afaa manamanifoma.  
<sup>16</sup> Ē Tesalónica ano iyoano, ē kori yopaito mā ea femayopaoni.  
<sup>17</sup> Akka ē shināima a ē afara fiafi fisti. Askatamaroko ē shināi mā ea sharafaino Niospa mato sharafa fafāfāinō, mato noikī. <sup>18</sup> Nāskakē iskaratīa ē anā afaa yopaima, mēmāi ayaxō. Ipafrodito ea fexoyamea a mā ea manamayamea tii. Nā ē fichipaiyai tiimaroko finōmainīfofā mā ea femayamea. Nā mā Nios noiai keskafakī eari noikī mā ea femayamea. Mā ea askafaito ōi matoki Nios inimakōixii. <sup>19</sup> Ēfe Niospa nā mā fichipaiyai tii mato ināxii. Epa Niosnā āfe afara sharakōifo nā ichapakōifo keyonakama, āfe Fake Cristo Jesúsxō mato ināsharaxii. <sup>20</sup> Akka nōko Epa Niosfi nōko Epakōikī nā fāsi sharakōi, tsoa keskarama. Ares fisti sharakōi. Tsōakai a finōtiroma. Nā nōko Ifokōira nō fapanaka. Askara ipainōra.

*Pablo mā mekai xatekī Filiposo anoafō meka shara ato fomani*

<sup>21</sup> Eōxō keyokōi a Cristo Jesús Ifofaafo ea ato yoisharaxokāfe. Askatari na nono efe ikafāferi nā Jesús Ifofaafāfe mato yoisharakani kiki. <sup>22</sup> Na nono ikafāfe Nios Ifofakanax, xanīfo César āfe pexe ano yonomisfāfe afāferi mato yoisharakani. <sup>23</sup> Nōko Ifo Jesucristo mato noikī mato sharafanō. Nā tii ē mato yoi.

*Pablo*



## Pablo Colosas Anoafu Kirika Kenexō Fomani

*Pablo Jesús Ifofaafu kirika kenexō fomani, Colosas anoafu*

<sup>1-2</sup> Ēkīa Pablo, Niospa ea nīchini, aato apaiyai keskafakī ē yorafo yoinō Jesucristoōnoa. Nofe yora Timoteo feta nō mato kirika kenexō fomai. Mā Cristo Ifofakōikē, pexe rasi Colosas anoxō Nios nikakōiyanā. Nōko Epa Niospa mato noikī mato shināfafāinō afanā mato fekastefanōma mā isharakōinō.

*Pablo a Jesús Ifofaafu ato kīfixōfafāini*

<sup>3-4</sup> Nā nōko Ifo Jesucristo āfe Apa Nios nō mato kīfixōfafāini. Nō mato kīfikī iskafaxokī aicho fakī māmāi nō nikax mā Cristo Jesús Ifofakōikē. Nāskaxō nā Jesús Ifofaa fetsafori mā ato noikōimiskē mā nō nikamis. <sup>5</sup> Na meka shara chanīmakōi Jesucristoōnoa mā mā nikamis. Jesucristo chanīmara faax Nios ika ari mā afe ipaxatiro ixō yoinifo mā mā nikamis. Na meka chanīmara fakōixō fetsafo mā ato noikōimis. <sup>6</sup> Na meka shara Jesucristoōnoa mā nikakī taefakī mā chanīmara fakī finakōini. Nāskaxō nikakī mā tāpini chanīmakōi, Niospa mato noikī Jesucristoōxō mato chaka mato soaxoni mā chanīmara faino. Nāskakē na meka shara, nikakani maifo tii anoafori nāskarifiamisfo. <sup>7</sup> Nonori nofe yora Ipafras mato yoini. Akka nā Ipafras nofeta Cristo yonosharaxomis, nāskakē nāato Jesucristoōnoa mato yoipaoni. <sup>8</sup> Nā Ipafras matoōnoa iskafakī noko yoiaito nō nikamis: “Na Colosas anoafu Niospa Yōshi Sharaōnoax isharakōikaxō fetsafo noikōikani,” ixō noko yoiaito nō nikamis.

<sup>9</sup> Nāskakē nā ē matoōnoa nikakī taefanitīa, ē mato Epa Nios kīfixokī xatemisma. Kīfikī ē iskafa fafafāini: “Epa Niospa, Colosas anoafu mī Yōshi Sharaōxō mī ato amapaiyai keskafakī ato tāpimafe, mī ato tāpimanai keskafakī ato ōiti mēraxō mia tāpikaxō mia Ifokōi fanōfo,” ixō ē mato kīfixōfafāini. <sup>10</sup> Nāskaxō nā mato amapaiyai keskara mā akaino ōi Nios matoki inimakōixii. Nāskax āfe Fake keskarakōi mā itiro. Nāskaxō mā fetsafo sharafa fafafāikī mā Nios tāpiki finakōitiro. <sup>11</sup> Akka Epa Niospa afama mīshtifo shara fatiroki, āfe kerex shara mitsisipakōi mato inātiro afara afeskarafiaino aōxō mā tenekōinō. Nāskafikī mā tenetiro fena fenakīma inimasharakōikai. <sup>12</sup> Nāskakē mā inimakōi. “Aicho Epa Niospa,” mā fatiro nāatomāi noko imasharata afe yorafo ināpaiyai keskafakī nokorimāi ināito. Nōri afe yorafokē noko inimaxii, a ika anokai fakishma penasharakōi. <sup>13</sup> Nāskakē noko imasharakōia anā fakish mēra nō inōma. Akka nā Satanās ika ano fakishifākōi. Nānoa Epa Niospa noko ifia, āfe Fake fe nō

Īpaxanō. Nāato āfe Fake noikōi. <sup>14</sup> Āfe Fāke noko nāxonikē aōxō Epa Niospa noko ifia, nōko chaka noko soaxoyanā.

*Jesús noko nāxoniōnoax Nios fe nō isharapakenaka*

<sup>15</sup> Akka nō Epa Nios ōiyamafitirono āfe Fake Jesús mai ano oni. Nāskaxō āfe Fāke noko tāpimani afe keskaramākī Apa Nios. Nā āfe Fake Jesús Apa Nios keskarakōi, āfe ōiti keskarakōiri. Afaa oniataima Apa Nios fe nai mēra iyopaoni. <sup>16</sup> Āfe Fake Jesucristoōxō Niospa keyokōi onifani, nai mēranoafoya nono mai anoafō. Nā nō ōitiromafoya, a nō ōitirofo onifani. Askatari āfe ājirifo nā afe ikafo onifata, niafakafāferi āto xanīfori onifani. Epa Niospa āfe Fake Jesucristoōxō keyokōi onifani. <sup>17</sup> Afaa oniataima Cristo iyopaoni. Āfe kerex sharaōxō keyokōi kexesharakōimis. Nāskaxō fishifo kexeta, xini kexeta, oxe kexeta, nōko mai kexeta famis. Akka nāfo kexeyamaino, chakanai fetsekerana. Nai fe mairi chakanakerana. <sup>18</sup> Tsōakai Jesús finōtiroma, afaa oniataima keyokōi finōyopaonixakī, iskaratīari keyokōi finōa. Nāfi nā chanīmara faafāfe āto Ifokōiki. <sup>19</sup> Nāskaxō Epa Niospa yoikī iskafani: “Ē imis keskai ēfe Fakeri nāskakōimis, nāskax nāri efe Nioskōi, nō nāskara rafekōi,” ixō inimakai Epa Niospa yoini. <sup>20</sup> Jesús ifi cruz ikaki maštaifono āfe imi foax noko nāxoni nōko chaka noko soaxoxiki. Nāskakē aōnoax Epa Nios fe nō anā isharatiro. Aōnoax keyokōi mai anoafōya nai mēranoafō afe isharatirofo.

<sup>21</sup> Māto ōiti mēraxō mā Nios noikaspayanā, mā chakakōi fapaoni. Nāskata mā Nios fe rafeyamata, afe yorarikai mā ipaonima. <sup>22</sup> Nāskafikē āfe Fake Jesucristo nai mēraxō mai ano nīchini feronāfakekōi ikiyonō. Nāskax ifi cruz ikakinoax noko nāxoni, aōnoax Epa Nios mato fe rafexō māto chaka mato soaxotiro a keskara shara mā inō. Nāskax mā akiki nokoaito matoōnoa afaa chaka yoitiroma. Nāskaxori mā yoitiroma iskafakī: “Mī afara chakafamis,” ixō aōnoa mā afaa yoitiroma. <sup>23</sup> Nāskano na meka shara Jesucristoōnoa mā chanīmara faxō afara fetsa mā shināyamaino Epa Niospa matoōnoa yoipakenakama iskafakī: “Mī afara chakafamis,” ixō matoōnoa afaa yoipakenakama. Askatamaroko mā chanīmara faax mā inimakōiaito mato ifixii mā afe Īpaxanō. Mā Jesucristo āfe meka shara nikakī taefani keskafakī nānorikōi keyokōi ē ato tāpimani. Ēkīa Pablo, ē Epa Niospa āfe meka yoifafāini Jesucristoōnoa ato yoikī.

*Niospa Pablo yoini a Jesús chanīmara faafō ato yonoxonō*

<sup>24</sup> Nāskakē ē inimai ē matoōnoax omiskōifi, māri afara afeskaraino mā Cristo Ifosharakōi faano. Cristo nokoōnoax omiskōini keskai, ēri nā afe rafemisfoōnoax nā Niospa fakefo atoōnoax ē omiskōimis. Ē matoōnoax omiskōita iskaratīari ē Cristoōnoax omiskōimis. <sup>25</sup> Akka Epa Niospa ea katonī, a

mato yonoxomis keskara ě inō, āfe meka shara ě mato yoinō. Nāskaxō ea yoikī iskafani: “Na maniafo tii anoa ěfe meka shara Jesucristoōnoa ato yoifofāsafafe,” ixō ea yoini. Nāskaxō āfe kaifoma mēra ea nīchini. <sup>26</sup> Na meka shara Jesucristoōnoa nōko xinifāfe tāpiyopaonifoma. Niospa ato tāpimayopaonima. Akka iskaratīa Niospa noko tāpimani nō afe yorafokē. <sup>27</sup> Epa Niospa Cristoōnoa mato yoiyomis keskafakī keyokōi mato tāpimaxii, mato fisti tāpimatama, nā yora fetsafori ato tāpimaxii. Iskafakī ato yoixii: “Ěfe Fake Cristo mato fe rafekakāini, nāskakē mā chanīmara fatiro a ě ika ano efe ipaxakī. Nā Cristo isharakōiai keskafakī ěri mato askafatiro māri isharakōinō,” ixō mato yoini.

<sup>28</sup> Nō Cristoōnoa yoimis, keyokōi nō ato yoifofāsafamis keyokōi nō ato yoimis nikakōinōfo. Mā isharakōiano nō keyokōi Niospa ferotaifi nō ōimasharapai a keskara shara ixii. <sup>29</sup> Nāskakē ě mato yonoxokī finakōifafāini, Cristo āfe kerex shara ea ināno.

## 2

<sup>1</sup> Akka ě mato yoipai mā tāpinō, ě mato Epa Nios kīfixōfafāini. Laodicea anoafō yafi fetsafori a ea ōimisfoma nāfori ě ato Epa Nios kīfixōfafāini. <sup>2</sup> Nāskaxō ě mato kīfixōfafāini māto ōiti mēranoax mā inimakōiyanā, mā ranā mā nōinākōinō. Nāska faatanāxō Epa Niosnoa xafakīakōi mā tāpitiro, akka a iyopaonifāfe Cristoōnoa tsōa tāpiyopaonima. Nāskakē iskaratīa xafakīakōi mato tāpimapai aōnoa mā tāpisharakōinō. <sup>3</sup> Nāato keyokōi tāpikōia, Apa Niospa tāpia keskafakī āfe shinā mēraxori tāpikōia. Akka Epa Nios afarafo sharafoyakē, Cristoōxō mā tāpitiro. <sup>4</sup> Nānori ě mato yoi, tsōa mato pārayamanō, meka fetsafaxō fanīrira mato yoipaikani kiki. <sup>5</sup> Ě mato fe iyamafixō pena tii ě mato shināi. Akka matoōnoa nikai ě inimakōi, mā chanīmara fakōixō mā Cristo nikakōiaito.

*Jesucristo nōko ōiti fetsafaxōfaano a keskara shara nō inō*

<sup>6</sup> Nāskakē mā nōko Ifo Jesucristo chanīmara fakōixō, mā Ifofakōina. Nāskakē pena tii afe rafefafāikāfe. <sup>7</sup> Oa afara fanafono āfe tapo mai mēra chaikōi kaax feroitiro ma keskara, Jesúsri nāskarakōikī, afe rafefafāikāfe afaa chakafatama a keskara shara ixikakī. Ipafras mato yoini keskafakī pena tii nikakōikī Jesús chanīmara fafafafāikāfe. Nāskaxō pena tii Epa Nios aichofa fafafāikāfe.

<sup>8</sup> Nāskakē kexemesharakāfe, fetsafāfe mato pārayamanōfo. Mā Jesús nikakōiai keskafakī anori mato yoipaikanima. Akka nā mato yoiaifo keskara mā ato nikakī kaxpakōi mā ato chanīmara fatiro. Nāfāfe Cristoōnoa yoikōikanima, nāskaxō nā

imisfo keskakakī mato yoipaikani. Nā chanīmara faafāfema shināifo anori fisti mato shināmapaikani.

<sup>9</sup> Akka Cristo fe Apa Nios nāskara rafe, Cristo noko keskara feronāfakekōifiax Apa Nios imis keskara nā nāskakōini. <sup>10</sup> Nāfi keyokōichi āto xanīfokōiki, xanīfo fetsafoya, a niafaka chakafāfe āto xanīfofo finōkōinīfofāna. Nāskakē mā Jesús fe rafexō mā afaa fetsa yopaima. <sup>11</sup> Askatari mā Cristo Ifofai akka feronāfakefāfe āto foshki repa xatepaonifo, nāskaramāi feyafakatsaxakakī. Akka mā foshki repa xatefiafono mātō chaka mato soaxotiroma. Cristo fistichi mātō ōiti mato fet-safaxotiro, mātō chaka mato soaxotiro afianā a mā chaka apaoni keskara mā anā atama a keskara shara mā inō. <sup>12</sup> Akka mā maotisasi faka mēra mā ikinitīa, nā mā chakafapaonifo oa maia keskara, askatari nā Jesús maifanifotīa a mā afara chakafapaonifo oa maia keskarrafo. Mā faka mēra iki maotissimeax mā fininākfāni oa Jesús fe fininākfāni shinātsatiro mā a keskara sharakōi ixiki. Niospa āfe kerex sharaōxō afianā Jesús otofani nā nō chanīmara fai. Askatari mai mēranoax Jesús otonitīa, māri afe otoni keskara itiro, a keskara sharakōi ixiki. <sup>13</sup> Mā Jesús Ifoamax nā yora naa keskara mā iyopaoni. Nāskaxō mā afara chakafapaoni mātō chaka xatexoma. Nāskafikē Epa Niospa Cristo otofani afe nipaxanō. Nāskarifiakī matori aōxō nimapakexatiro, nāskaxō nōko chakafo mā noko soaxona. <sup>14</sup> Shinākapo. Keyokōi nō chakafamis keskara nōko chakafo Epa Niospa noko soaxoni, anā afoōnoa shināyamaxii. Nāskano Niospa yoini keskara nō nikatama afara fetsa nō chakafapaoni. Nāfo keyokōi nō chakafamisfo keskara kenepakea. Askafixō ifi cruz ikakinoa Jesús mastanifoxō nāo nōko chaka noko soaxoni. <sup>15</sup> Akka Cristo ifi cruz ikakinoax noko nāxonixakī, Satanás yafi keyokōi niafaka chakafo finōkōia. Nāskakē noko anā afeskafatiroma, anā nōko ifo ixō noko ĩkitirofoma. Nāskakē Jesús ifi cruz ikakinoax naino Niospa keyokōi maifo tii anoafō ato ispani na niafaka chakafo anā kerexfoma.

*Jesús ika ari nai mēra sharakōi nā fisti fichipaikāfe*

<sup>16</sup> Akka mātō xinifāfe āto feyafati ipaoni xinia fena ikaino fista apaonifo. Askatari oxe rama kāiyaino fista apaonifo. Akka mato yoitirofo iskafakakī: “Afaa mā pitiroma askatari afaari mā ayatiroma. Askatari nōko pena tenetitīa māri tenetiro,” ixō mato yoitirofo. Akka mā askayamaino fet-safāfe mato mekafakī ĩchatirofo. Mato askafaifono ato nikayamakāfe. <sup>17</sup> Akka nā mātō xinifāfe āto feyafati noko ōimatirofo afe keskara iximākai a Cristo oaino. Akka mā Cristo oano nā fisti nō Ifofatiro. Nā nō feyafamis keskara nō anā atiroma. Cristo fisti nō nikatiro a nō ayopaoni keskara nō anā axikima.

18 Ōisharakāfe fetsafāfe mato pārapaikani kiki iskafakakī: “Nō afaa tāpiama. Ājirifo nō kīfitiro,” ixō mato pārapaikani. Afāfe afaa ōiyamafikatsaxakakī afama mīshtifo yoipaimisfo. Āto shināmā shinākata kakapaikōimisfo, Niospa shināi keskarakai shināmisfoma. 19 Afokai Cristo fe rafepaikanima. Akka Cristo nōko mapo keskara askatari nō āfe yora keskara. Nāskaxō nōko yora nō kexesharax nō mitsisipakōi itiro. Nāskatari nōko pono efapayafo, nōko pono mīshti, nōko nami mēranoax ichanātirofo. Afeskatama nō isharakōinō. Akka nō Cristo fe rafekōiaito Epa Niospa āfe Fākeoxō āfe kerex shara noko inātiro a keskara shara nō inō. Nāskarakōi noko axopai.

20 Mā oa Cristo fe naa keskara mā ini. Nāskakē iskaratīa a mā chakafapaoni keskara mā anā akima. Askatamaroko mā isharakōimis. Mā askaito nā chanīmara faafāfema mato afaa yoitirofoma. Nāskafekē, ſafeskakī mā ato nikaimē, mā ato nikaxō nā mato yoiaifo keskara ma apai? Nāskakē ato nikayamakāfe. 21 Nāskakē mato yoiki iskafapaikani: “Na afarafo meyamakāfe, afori piyamakāfe, mato ināifonori mātō mēkemā achiyamakāfe,” ixō mato yoipaikani. 22 Akka na mato yoipaiyaifo keskara Niospa anori ato yoiaima. Āa shinākaxō mato yoipaikani. Akka nā mato yoipaiyaifo keskara nāfo mā keyoxii, anākai afo inakama. Nāskakē ato nikayamakāfe. 23 Chanīma, yora fetsafāfe shinākī iskafakani. Na ato yoiaifo keskara shara, nafāfe tāpikōiafo, a Niospa noko yoini keskarari tāpikōiafo. Nāskakē Niospa āfe ājirifo kīfifafāikani. Nāskakatari ato fanīrira mekafamisfoma, askatari āto yorari mese famisfoma āa koshamemisfo. “Nafō sharakōifo,” ixō atoōna yoipaikani. Akka afokai isharakōimisfoma. A afarafo chakafaifo keskarakai xateafoma, chanīma nāfo kaka-paikōimisfoki.

### 3

1 Akka Cristo naax anā otoiñākafani keskai māri nāskariai afe otoiñākafani keskara mā itiro mā isharakōiax afe ipaxakī. Cristo iskaratīa Apa Nios fe ika afeta keyokōi īkinā. Nāskakē aōnoa shināta nā mato amapaiyai keskara aōnoa shināfafāikāfe. 2 Nāskakē nā Niospa fichipaiyai keskara fisti shinākāfe, nāskakōixikakī. Akka nono mai anoxō yorafāfe afara chakafapaiyaifo keskafakī māri askafayamakāfe. 3 Anā ē mato yoi Cristo noko nāxoni. Akka mā oa Cristo fe naa keskara iyoni, nāskakē iskaratīa mā afe rafekakaini, Epa Nios feri mā askakakāini. Nāskariai Epa Niosri mato fe rafekakaini. Mā askaito tsōa mato tāpitiroma, a mā Cristo fe rafeai keskai ari askaxiki. 4 Cristo anā mai ano fotofaino māri afe ixii. Nāato noko īkipakenaka. Nāskakē a keskara sharakōi nōri afe ixii, keyokōichi yorafāfe noko ōixikani.

*Nō chaka iyopaonixakī iskaratīa nō ōiti fena sharayakōi*

<sup>5</sup> Nāskakē a mā afarafo chakafapaoni keskafakī anā askafayamakāfe. Askarafo anā shināyamakāfe. Askatari mātō āfimafori chotayamakāfe, kērofāferi mātō fenemafori chotamayamakāfe. Nāskaxō ato chaka shināmayamakāfe. Afarafori noiyamakāfe feronāfakefāfe mātō āfima fichipaiyamakāfe, kērofāferi mātō fenemafo fichipaiyamakāfe. Afara chakafori fichipaiyamakāfe, nā mā fichipaiyai fisti fichipaiyamakāfe. Mā askakī Nios mā noima, nā afarafo fisti noikī. <sup>6</sup> Askara chakafo Niospa ōipaima, nāskakē ato omiskōimakī finakōixii nikayamaifono. <sup>7</sup> Nāskakē taeyoi chakakōi mā iyopaoni Nios nikamax. <sup>8</sup> Mā mā askapaoniki. Akka iskaratīa a chakafo shināmāmakāfe. Anā ōitifishkiyamakāfe, anā chaka shināyamakāfe, ato chakafayamakāfe, ato ūchayamakāfe, askatari mātō axfapa meka chaka yoiyamakāfe. <sup>9</sup> Nāskakē mā ranā pāranōnāyamakāfe, mā taeyoi ipaoni keskara a chakafo mā mā potakōiakī. <sup>10</sup> A mā apaoni keskara anā atama iskaratīa, mā mā Jesucristo fe rafekōia a keskara shara ixiki. Akka Epa Niospa mātō ōiti mēra fena sharakōi mato ōi. Nāskakē a keskara sharakōi mato imafafāini, aōnoa mā tāpisharakōinō. <sup>11</sup> Nō Cristo Ifofakē Niospa keyokōi nāskarafos noko ōi. Judeofo yafi a judeofoma, a kene tāpiafoya a kene tāpiafomari, yorafoya nafafo āto yonomatifoya a āto yonomatifomari Niospa nāskarafos noko ōi. Keyokōi nō afe yoraxō nō Jesucristo fisti yopakōi.

<sup>12</sup> Niospa mato noikī mato katoni afe yorafo mā inō. Aa keskara shara mato imaxiki. Nāskakē fetsafo noikī ato sharafa fafāfāikāfe. Nāskakē fetsafo shināki nā mā apaiyai keskara fisti shinātama, fetsafāfe apaiyaifo keskarari shinākāfe, oi tsii faxō ato yoifafāikāfe. <sup>13</sup> Nāskakē fetsafo fe mēnāpaitama ato yoisharakāfe raenāsharaxikāki. Nōko Ifāfe mato raefa keskafakī fetsafo fe raenā faatanāsharakāfe. <sup>14</sup> Nāskakē nā ē mato yoiāi keskai, keyokōi noinākāfe, nō noināsharāfinakōiaki. Nāskai nō noināx nō isharakōitiro, nā nōko Ifāfe noko yoini keskai nō noināsharakōiax nō nāskasharakōitiro. <sup>15</sup> Nāskakē Cristo nikasharakōikāfe mātō ōiti sharanokai mā fochishpanā faatanātiroma. Askatamaroko aōnoax isharakōiax nā yora fisti keskara shara mā itiro. Nāskakē Epa Niospa mato katoni aōnoax mā isharakōita fetsafo mā afeska fanōma. Nāskakē mā Epa Nios yoitiro iskafakī: “Aicho Epa Niosi, ēfe ōiti mā sharafaxōa,” ixō mā yoitiro.

<sup>16</sup> Cristo noko tāpimani keskafakī mātō ōiti mēra nanekōikāfe. Nāato mato ūkinākī āfe meka tāpisharakōixō fetsafori yoisharakāfe isharaxikakī. Mātō ōiti mēraxō Nios aicho fata David fanāini keskai māri fanāixota āfe mekaōnoari

fanãixokãfe. <sup>17</sup> Nãskaxõ nã mã apaiyai keskafakĩ yoikãfe iskakakĩ: “Aicho, Epa Niosi. Nõko Ifo Jesucristoõxõ nã nõ apaiyai keskafakĩ keyokõi mĩ noko axõfafãimis,” ixõ yoifafãikãfe.

*Nõ Jesús Ifofakõinax aõnoa nõ afeskatitromãki*

<sup>18</sup> Kẽrofãfe, mãto fenefãfe mato yoiaifãfe ato nikasharakõikãfe. Nãskax mã isharakõikai nõko Ifãfe mato yoiai keskai. <sup>19</sup> Feronãfakefãfe, mãto ãfiffo noikõikãfe ato fe feratenãyamakãfe.

<sup>20</sup> Fakefãfe, mãto epa yafi mãto efa nikakõikãfe. Mã askaino nõko Ifo matoki inimakõi kiki. <sup>21</sup> Epafo feta efafãfe, mãto fakefo ferateyamakãfe, mãto fakefãfe shinãkĩ iskakafayamanõfo: “Ooa, ãfe epa feta ãfe efa ea feratenafo,” ixõ shinãyamanõfo.

<sup>22</sup> Æto yonomatifãfe, mãto ifofo ato nikakõikãfe nono mai anoxõ. Akka mato õiaifonos ato yonoxokakĩma, mato õiamai fonori ato yonoxokãfe. Nã mãto Ifo Jesucristo mã noiaino, matoki inimanõ ato yonoxosharakãfe. <sup>23</sup> Afara yonokĩ inimayanã axosharakõikãfe. Nõko Ifo shinãkĩ ato yonoxosharakãfe. <sup>24</sup> Nãskakẽ shinãmakiyamakãfe mã mã tâpiaki nõko Ifo chipo afara sharafo mato inãxii kiki. Mã nõko Ifo Jesucristo yonoxosharamiski, nãfi mãto Ifokõikĩ. <sup>25</sup> Akka nã afara chakafamisfo, nãfo omiskõi finakõixikani afara chakafakatsaxakakĩ. Nãskakẽ Niospa fetsa keskarafano noko õima, nãskarafos noko õi.

## 4

<sup>1</sup> Ato yonomamisfãfe, mãto yonomatifo ato paraxõ yonokakĩma ato noisharayanã afara sharafo ato inãsharakãfe ato parakakĩma. Mã mã tâpiakĩ mãri Ifoyakĩ, mãto Ifãfe nai mẽraxõ mato õifafaini kiki.

<sup>2</sup> Nãskakẽ Epa Nios kĩfiki xateyamakãfe, kĩfikĩ afara fetsa shinãkakĩma, Epa Nios fisti kĩfikĩ iskakafãfe: “Aicho Epa Niosi, mĩ ea sharafa fafafãini,” ixõ kĩfikãfe. <sup>3</sup> Nãskakẽ nokori kĩfixokãfe, Epa Niospa fetsafo mẽra noko nĩchiano Cristoõnoa nõ ato yoisharanõ. Afãfe Cristoõnoa nikamisfomaki. Akka ã Cristoõnoa meka shara yoiaito yorafãfe ea karaxa mẽra iki-manifo. <sup>4</sup> Ea Epa Nios kĩfixõfafãikãfe xafakĩakõi Jesucristoõnoa anã ã ato yoinõ.

<sup>5</sup> Akka nã Jesús Ifofaafoma mẽra mã ikaki ato õimakãfe mã isharakõixõ. Nãskaxõ nã mã atoki nokoaitĩa Jesucristoõnoa ato yoisharakãfe. <sup>6</sup> ato fe mekakĩ meka shara fisti ato yoifafãikãfe, ato kaxemetsama fakakĩma ato yoisharakõikãfe, ãto õiti mẽraxõ shinãchakanõfoma. Mã askakĩ nã yorafo mã ato kexesharatiro.

*Pablo mã mekai xatekĩ Colosas anoafo ato meka shara fomani*

<sup>7</sup> Nofe yora Tíquico, ã aõ noikõĩ. Nãato efeta nõko Ifo Jesús yonoxomis. Nãskakẽ aato eõnoa mato yoi kiki ã afeskax nono ikamãkĩ. <sup>8</sup> Nãskakẽ ã mato ari nĩchia, aato mato yoinõ afeskax nono nõ ikamãkĩ, askatari mato inimamasharakõixiki. <sup>9</sup> Nã nofe yora Onĩsimõri afe kai, nãri ã noikõĩ. Nã mato fe iyopaoni, nofeta nõko Ifo Jesúsnoa yoi inimakõimis. Nã rafeta matoki noko kaxõ mato yoikani nono afe keskaramãki.

<sup>10</sup> Akka na efe karaxa mẽra imisto Aristarcori mato meka shara fomai. Marcosri mato meka shara fomai, nã Marcos Bernabé ãfe chai. Nãskakẽ nã Marcos matoki nokoaito ã mato yoia keskafakĩ ifisharakãfe kexesharayanã. <sup>11</sup> Na feronãfake ãfe ane Jesús nãatori mato meka shara fomai, ãfe ane fetsa Justo. Nãfãfe judeofo mẽraxõ Nios Ifokõĩ fakaxõ efeta Nios xanĩfoõnoa yoikĩ yonomisfo. Nãskafakakĩ ea inimamakõimisfo. Akka ãfe kaifãfe nonoxõ efeta Nios yonoxomisfoma, nã ã mato yoiaifo feta ã Niosnoa yoimis. <sup>12</sup> Na feronãfake Ipafrasri meka shara mato fomai, nãatori Cristo yonoxomis, nã mato mẽra iyopaoni. Nãato mẽxotaima matoõxõ Epa Nios kĩfikĩ iskafa fafafãini: “Epa Niosi, mĩ ato amapaiyai keskafakĩ ato amafe afaa fetsa shinãnofoma. Nãskakanax mĩ Fake Jesús õiti keskara shara inõfo,” ixõ mato kĩfixõfafãini. <sup>13</sup> Akka mẽ õia na Ipafras matoõxõ shinãchakakõiaito. Askatari nã pexe rasi Laodicea anoafo yafi Hierápolis anoafo ato Epa Nios kĩfixõfafãini. <sup>14</sup> Na Lucas ato sharafamis, ã aõ noikõĩ. Nãato Demãs feta mato meka fomakani.

<sup>15</sup> A Jesús Ifofaafo Laodicea anoafo ea ato yoisharaxõfe. Nĩnfasri ea yoisharaxõfe, a ãfe pexe anoax Nios Ifofakanax ichanãmisfori ea ato yoisharaxõfe. <sup>16</sup> Akka na kirika kene ã mato fomai mã mã õixõ, nã Nios Ifofaafo Laodicea anoafori ato fomakãfe akairi õinõfo. Mãri na kirika kene õikãfe Laodicea anoxõ mato mana manafono. <sup>17</sup> Nãskakẽ Arquipori ea yoikĩ iskafaxokãfe: “Epa Niospa mia yoia keskafakĩ axosharakõife,” ixõ ea yoisharaxokãfe.

<sup>18</sup> Ëkĩa Pablo, ã mato kirika kenexoni. Mato yoisharakĩ, ãfe mifikõichi ã kenei. Nãskakẽ ea shinãmakiyamakãfe ã karaxa mẽraxõ ikakĩ. Niospa mato noikĩ matoõnoa shinãfafãinõ. Nã tii.



## Pablo Tesalónica Anoafo Kirika Kenexō Fomani

*Pablo a afe rafeafo feta a Tesalónica anoxō Nios Ifofaafo ato kirika kenexō fomani*

<sup>1</sup> Ēkīa Pablo, nō mato kirika kenexō fomai, Silvano ikaino Timoteo ikaino nā tiito nō mato fomai. Nā pexe rasi Tesalónica anoxō Nios Ifofaafo nō fomai, anoxomāi Epa Nios yafi nōko Ifo Jesucristo mā Ifokōi faafono. Epa Nios feta nōko Ifo Jesucristo mato noikī mato sharafanō fekaxtetama mā isharakōinō.

*Tesalónica anoafāfe Jesús Ifokōi fakaxō ato ōimanifo*

<sup>2</sup> Mēxotaima nō matoōxō Epa Nios aicho fakī nō kīfikī iskafa fafāfāini. <sup>3</sup> “Epa Niosi, na Tesalónica anoafāfe, mia noikakī mia yonoxosharamisfo, nāskakaxō fena fenakākima nōko Ifo Jesús manasharamisfo nokoki anā oi kiki,” ikaxō. Nānori pena tii ē mato kīfixōfāfāini. <sup>4</sup> Efe yora mīshtichi, Niospa mato fāsi noikī mato katonī afe yorafo mā inō. <sup>5</sup> Nō mato Niospa meka sharaōnoa yoimis afeskax nō afe ĩpaxatiromāki. Akka nōko mekapas nō mato yoimisma, askatamaroko Niospa Yōshi Sharayaxō āfe kerex sharafoyaxō nō mato Jesúsnoa nā meka chanīmakōi nō mato yoimis. Akka mā mā tāpia nō mato fe isharapaoni. Nō askaino mā Jesús Ifofakōini.

<sup>6</sup> Akka nō Jesús Ifofai keskafakī māri Ifofani. Nāskakē Niosnoa meka shara nō mato yoiaito inimakōiyanā mā nikakōini, Niospa Yōshi Sharapamāi mato inimamakōiaino fetsafāfe mato omiskōimafiaifono. <sup>7</sup> Nāskakē mā isharakōixō mā ato ōimakōia nā Nios Ifofaafo Macedonia anoafo yafi Acaya anoafo. <sup>8</sup> Matoōxō nōko Ifāfe meka shara nikakī tae-fanifo Macedonia anoafo feta Acaya anoxō. Akka anoxos nikanifoma. Nā pexe fetsafo anoxori nikanifo. Nāskaxō mā tāpiafo mā Nios Ifokōifakē. Nāskakē nō anā matoōnoa ato yoitiroma, māmāi matoōnoa tāpikōiafono. <sup>9</sup> Askatamaroko fetsafāfe nokoōnoa ato yoimisfo iskafakāki: “Tesalónica anoafāfe nōko Ifo Nios Ifofakōinafo, nāskaxō Pablo yafi a afe rafeafo ato sharafayanā a yoiaifo keskara ato nikakōimisfo. Nāskakaxō afara fetsa onifakaxō, ‘Na nōko niosra,’ ikaxō anā kīfimisfoma, Nioskōi Ifofakakī. Nāskakaxō nā nipanaka Nioskōi yonoxomisfo. <sup>10</sup> Akka nā Niospa Fake Jesús mā manakōi nai mēranoax anā oaitīa. Akka Niospa āfe Fake otofani. Nāato noko ifitiro a omiskōiaifo mēranoax nō omiskōinōma.”

## 2

*Pablo Tesalónica anoxō Jesúsnoa ato yoini*

<sup>1</sup> Efe yora mīshtichi, mā mā tāpia kaxpa nō mato ōikai kanima. Jesúsnoa nō mato yoikai kani nikakī mā Ifofakōinō. <sup>2</sup> Mā mā tāpia nō matoki kayoamano na Filiposo anoafāfe noko ĭchayanā noko omiskōimapaonifo. Nāskaxō noko xatemapaiyaifono, Epa Niospa āfe kerex shara noko ināno, nō ratetama na meka sharaōnoa Jesúsnoa nō mato yoimis keskara tsōa noko xatematiroma. <sup>3</sup> Akka nō mato yoiki fanīrira nō mato yoimisma, nō mato yoisharakōimis. Askatari nō mato chakafakī yoimisma, askatari nōa nō mato paramisma. <sup>4</sup> Askatamaroko Epa Niospa noko katonī āfe meka shara Jesúsnoa nō mato yoinō. Akka nōkai yorafo nokoōnoa shināmapaitiroma. Askatamaroko nokoōnoa Nios fisti nō inimamapai, nā fistichi nōko shinā mēraxō nō shināi keskara tāpikōia. <sup>5</sup> Mā mā tāpia nōkai matoōnoa meka shara yoimisma, māri nokoōnoa yoisharanō. Ēkai mato feparamisma, “Noko afara shara inānōfora,” ixō. Akka a ē mato yoimis keskara Epa Niospa tāpikōia, nāato ea ōifafaini. <sup>6</sup> Nōkai fetsafo nokoōnoa yoisharakāfe nō ato famisma. <sup>7</sup> Akka nō aōnoa yoinō noko nīchini āfe meka shara nō mato yoinō. “Akka noko afara afeskarafaxokāfe,” ixō nō mato yoikerapaoni. Akka āfa āfe fake yome kexesharamis keskafaki nō mato kexesharapaoni. <sup>8</sup> Nō mato noikōikī inimakāi nō mato Niospa meka shara yoianā nōa nō ināmpaikōini, mā Nios tāpisharakōinō. Nāskaxō nō mato noipaoni keskafaki, iskaratīa nō mato noikī finasharakōimis. <sup>9</sup> Efe yora mīshtichi, mā mā tāpia nō mato mēraxō yonomiski omiskōikōiyanā, a nō fichipaiyai fixiki, penata yonota fakishchāiri nō yonomis. Akka nō mato afaa kaxpa fīapaimisma, Niospa meka sharaōnoa mato yoianā.

<sup>10</sup> Akka mā mā noko ōimis, Niospari tāpia nō tanaima isharakōimiskē mato fe a mā Nios Ifofaafo fe. Nāskakē nokoōnoa tsōa afaa chaka yoitirofoma. <sup>11</sup> Askatari mā mā tāpia nō mato inimamakōimis, mā shināmitsaitori nō mato askafamis inimamamis oa āpa āfe fake inimamatiro keskafakī. <sup>12</sup> Akka nō mato yoimis mā isharakōinō a Nios Ifofaafo imis keskai. Akka nāato mato katonī Jesús keskara shara mā ĭpaxanō.

<sup>13</sup> Nāskakē mēxotaima nō Epa Nios aicho fatitaifaa māmāi noko nikasharaito, nō mato Niospa meka sharaōnoa yoiaito. Nāskakē mā yoikī iskafani: “Na meka shara mā noko yoiai yōra mekama, Niospa meka shara,” ixō mā yoini. Chanīma, Niospa mekakōi nō mato yoimis. Nāskakē mā āfe meka nikakī mā chanīmara faino mato shināmasharai Jesús keskara

shara mā inō. <sup>14</sup> Efe yora mīshtichi, māri omiskōini mātō kaifāfe mato omiskōimanaifono. Nāskarifiāi nā mā ikai keskai a Nios Ifofaafo Judea anoxō Cristo Jesús Ifofakanax omiskōikani āto kaifo judeofāfe ato omiskōimanaifono. <sup>15</sup> Nā judeofāfe nōko Ifo Jesús retenifo, taefakī a ato Niospa meka sharaōnoa yoimis ato retepaonifo, nāskaxori noko omiskōimayanā noko potanifo. Nāskaxori Nios aicho fayamata yorafo chakafakī mekafamisfo. <sup>16</sup> Askatari a judeofoma Nios fe ĩpaxanōfo nō ato yoisharapaiyaino, noko ato yoitima famisfo. Nāskakē afaa chakafakī finayamafikatsaxakakī mā afara chakafakī finakōimisfo. Akka iskaratīa anā tenetiromameki Niospa ato omiskōimaki finakōi.

*Pablo Tesalónica anoafō anā ato ōipai kapaini*

<sup>17</sup> Efe yora mīshtichi, mā nō mato fe paxkanāifinixakī, nōa nō shināki mato ōiamafikī mēxotaima nō mato shinātaifai nōko ōiti mēraxō. Akka nō kaxō nō mato ōisharapaikōi. <sup>18</sup> Akka mā nō mato ari kapaitaiamis, nāskaifi ēroko mēxotaimakōi mato ari kapaikōimis. Nō askafiaino, akka Satanás noko katimafamis. <sup>19</sup> Nō mato yoimis Jesús keskara shara mā inō. Nāskakē Jesucristo oaino keyokōichi tāpitirofo Jesúsmāi Ifokōi fakaxō. Nāskakē Jesús ōiaino matoōnoax nō inimakōixii, nō mato yoipaoni keskaramāi mā nikakōimiskē. <sup>20</sup> Chanīma, nokoōxō mā Jesús Ifofakōinafono nō inimakōi. Nāskakē Epa Nios nokoki inimakōi.

### 3

<sup>1-2</sup> Nāskakē nō anā tenetiroma meekī nō shināita nono Atenas ano nores nētexiki, nāskaxō nofe yora Timoteo nīchixiki mato ōikanō. Na Timoteori Nios yonoxomis, nāato nofeta yonomis Jesucristoōnoa meka sharaōnoa ato yoikī. Nāato mato yoikī mato inimamasharakōitiro. <sup>3</sup> Nāskakē ē matoki Timoteo nīchini: “Omiskōikāki anā Niospa meka nikatirofomara,” ixō. Akka mā mā tāpia na nō omiskōiai keskara. <sup>4</sup> Akka nō mato fe iyoxō, nō mato yoifafāiyamea, nō omiskōixiira fakī. Nō mato yoifafāiyamea keskai mā askakōia, nāskakē mā mā tāpia. <sup>5</sup> Nāskakē ē anā tenetiroma meekī, ē Timoteo nīchiyamea mato yōkatanō, a mā Jesús Ifofapaoni keskafakī ai mā Jesús Ifofamākī ē tāpipaikī. Akka ē ratekōiyamea, “Niafaka chakata ato afara chakafamaira,” ikax. Akka nōakōi kaxpa Niospa mekaōnoa nō mato yoiyamea ikerana.

<sup>6</sup> Akka Timoteo mā Tesalónica anoax anā oa mato ōitani. Meka shara matoōnoa noko yoitoshia, mā Jesús Ifofasharayanā mā noināsharakōiāito. Noko yoia mā noko shināyanā mā noko noikōiāito, askatari mā noko ōisharapaikōiāito, nā nō mato ōipaiyai keskafakī mā noko ōisharapai. <sup>7</sup> Nāskakē efe yora mīshtichi, noko Jesúsxō

omiskōimayanā noko fekaxtefaifono mā Jesús Ifo sharafakī mā noko inimamakōimis. <sup>8</sup> Akka mā mā Jesús Ifofashara, mā anā afaa fetsa shināima. Mā nō tāpiax nō inimasharakōi nō isharakōitiro. Nāskakē afara afeskaraino nō tenetiro. <sup>9</sup> Nō matoōnoa shināki nō Epa Nios kīfikī, nōko ōiti mēranoax nō fāsi inimakōi. Nāskakē nō matoōxō Epa Nios kīfiki nō aichofa fafafāini. <sup>10</sup> Nāskakē penata yoita fakishi yoita nō Nios kīfifafāini matoōxō, noko mato ari nīchiaino nō mato ōikanō a mā tāpiamafo nō mato yoixiki mā Jesús Ifofakōinō.

<sup>11</sup> Nāskakē Epa Nios feta nōko Ifo Jesucristo mato ari noko nīchipainō nō mato ōikanō. <sup>12</sup> Nōko Ifāfe mato shināmasharaino mā noināi finakōinō, fetsafori mā noisharanō, nō mato noiai keskafakī māri keyokōi yorafo noisharakōinō. <sup>13</sup> Mā askaino Epa Niospa mato ōiti mēraxō mato shināmasharai, Jesús Ifo sharafayanā mā afaa chakafayamanō. Mā askaino nōko Ifo Jesús afe yorafoya oaitīa māri a keskara shara ixii, Epa Niospa ōiaino.

## 4

*Afeska x isharaxō nō Nios inimamatiromē nokoki inimanō*

<sup>1</sup> Efe yora mīshtichi, mē mekai xatekī ē mato yoinō. Nō mato yoipaoni afeskax mā itiomākī Nios matoki inimanō. Akka nā nō mato yoipaoni keskai mā mā askakōia. Nāskakē anā nō mato yoi noko nikakapo. Mā Nios Ifofaa keskafakī nōko Ifo Jesucristoōxō Ifofakī finakōikāfe.

<sup>2</sup> Akka mā mā tāpia nōko Ifo Jesús noko yoini keskara, nānorikōi nō mato yoimis. <sup>3</sup> Akka Niospa fichipai a keskara shara mā inō. Nāskakē tsōa āfe āfima chotatiroma. Kērofāferi āto fenemafo chotamatirofoma, <sup>4</sup> Askatamaroko āfiyatirofo āfe āfi noiyanā āfe āfifex ixiki. <sup>5</sup> Nāskata afara chakafapaimiskōi iyamaxikakī, a Nios tāpiamafāfe amisfo keskara axikakima. <sup>6</sup> Akka Epa Niospa yoini iskafakī: “Fētsa āfi fe ipaiyamakāfe. Tsoa fomāyamakāfe fetsa āfi fe ixiki,” ixō Niospa yoini. Akka nō mato yoini keskai, tsoa askayamakī afara chakafaifono Epa Niospa ato omiskōimaxii. <sup>7</sup> Epa Niospa noko katonima nō afara chakafanō. Askatamaroko noko katoni a keskara shara nō inō. <sup>8</sup> Nāskakē a ē mato yoimis keskara tsōa nikayamakī atokai yora fisti nikakaspaima. Niosri nikakaspai, nāato āfe Yōshi Shara mato ināfiano a mato amapaiyai keskara mā anō.

<sup>9</sup> Ēfe mekakai mā fichipaima mā ranā noināxiki. Epa Niospa mato tāpimani mā noinānō. <sup>10</sup> Mā nō tāpia nā Nios Ifofaafo Macedonia anoxō mā ato noikōiaito. Nāskakē nō mato yoisharapai, mā ato noiki finakōinō. <sup>11</sup> Nāskakē isharakāfe mato ōiti mēraxō afanā mato fekaxtefanōma. Fētsa afara afeskarafaino aōnoa shināchakayamakāfe. Nā Niospa mato amapaiyai keskara fisti akāfe. Askatari mā yonotiro

xanikima. Nānori nō mato yoimiski. <sup>12</sup> Nāskafakī mā yonotiro a mā fichipaiyai fixiki. Kaxpa afaa ato yōkayamakāfe. Mā askaito a Nios Ifofaafāfema matoōnoa shinākōitirofo.

*Nōko Ifo Jesús anā oaino, ¿afe keskara ixiimē?*

<sup>13</sup> Efe yora mīshtichi, ē mato yoiai keskara nikasharakāfe. Jesús Ifofaafō nakanax afeskakanimākai ē mato yoinō, akka a Ifofaafoma ato fe yorafo naafono, manomitsakani omiskōikani. Akka mā askaima māmāi Nios Ifofaax, māmāi anā ōinōnāxixakī. Akka a Nios Ifofaafoma anā ōinōnākanima. <sup>14</sup> Mā nō tāpia Jesús nafiax afianā otoni. Nāskarifiakī mā nō tāpia Niospa atori otofaxii. Jesús anā oaino, a Ifofakanax namisfo.

<sup>15</sup> Nāskakē nō mato yoimis nōko Ifo Jesús noko tāpimamis keskara. Akka nō nayoamax nōko Ifo Jesús oaino nō rekē nai mēra kaima, nā naitaenifo rekē fokani. <sup>16</sup> Akka nōko Ifo nai mēranoax fotopakekafāni fāsikōi mekakeraxii xanīfo finakōimāiax. Askatari nā ājiri xanīfo finakōiafāfe āto mekari nō nikaxii. Askatari Niospa āfe maneti chāi chāisaito nō nikaxii. Nāskakē a Cristo Ifofakanax namisfo otoi taexikani. <sup>17</sup> Nāskata a nō namisfoma Niospa atoya noko iyoxii, nāskakē nai kōi mēranoax nō fichināxii. Nōko Ifori nofe ixii nai kōi mēra. Nāskakē nōko Ifo fe mēxotaima nō ipanaka. <sup>18</sup> Nāskakē mā ranā inima faatanāsharakāfe, na meka sharaōnoax.

## 5

<sup>1</sup> Efe yora mīshtichi, nōko Ifo Jesucristo anā oaino anā nō mato yoitiroma. <sup>2</sup> Akka mā mā tāpikōia nā oaitīa tsōa manasharayamaino nōko Ifo nokotiro. Nā afaa shināima tanaima oxafono, fakishi oax yometso atoki yometstiro keskai. <sup>3</sup> Yorafo iskaifono: “Nōkai afaa chakafamisma nō isharakōia,” ikaifono Epa Niospa ato omiskōimanaino pae meexikani. Oa kēromā fake nanexō mā fake kākī pae meetiro keskara meexikani. Nāskakē nā omiskōiai nokoaino tsoa faki onetiroma.

<sup>4</sup> Akka efe yora mīshtichi, mā kai oa fakish mēra nia keskarama, askatamaroko mā oa penata nia keskara. Nāskakē mā manasharaito nōko Ifāfe mato fichitoshitiro. Akka nā Ifofaafoma oa fakish mēra nia keskarafono, atoki yora yometso oax atoki yometsoaino tsōa tāpitiroma keskarafō. Nāskarifiakī nōko Ifo oaino afaa shinātirofoma, Ifokairoko fakaxō. <sup>5</sup> Akka māfi nā penata nia keskara sharakōifokī. Mākai oa fakish mēra nia keskarafoma. <sup>6</sup> Nāskakē nā Satanās ifofamisfo keskara nō imisma, afāfe afarafo chakafaifo fisti shināmisfo. A Jesús fotoaino tsōa shināmisma. Akka nō anā Jesús oaitīa nō shināi, oa yora oxa keskara nō imisma. Oa yora moia keskara nō imis Jesús oaitīa manai xafakīakōi isharaxō. <sup>7</sup> Nā afaa shināifoma a Satanās

ifofaafo nã fakishi oxafo keskarafo. Nãskarifiyai a Satanás ifofaafo a afaa shinãifoma fakishi pãemisfo keskarafo. <sup>8</sup> Akka nõkai ato keskarama, nõfi oa penata nia keskara sharafoki. Nãskakẽ Jesús Ifokõi fata nõ yorafo noikõita nã Jesús oaino nõ manakõitiro, nõ askaito Satanás noko afaa chakafamatiroma. Māraki sorarofãfe āto rapati kerexkõi safeafono tsõa ato retetiro, āto maiti kerexkõi safeafonori tsõa ato retetiroma. Nãskarifiakĩ nõ Jesús Ifofaano, āfe Yõshi Shara nõ mēra naneano Satanás noko afeska fatiroma. <sup>9</sup> Akka Niospa shinãnima a omiskõipakenakafo mēranoax nõ omiskõipakexanõ. Askatamaroko noko ifini Jesucristoõxõ nõko chaka noko soaxoxiki nõ afe ĩpaxanõ. <sup>10</sup> Akka Jesucristo nokoõnoax nani nõ afe ĩpaxanõ. Nayamafix mã naaxri nõ afe nĩpanaka. <sup>11</sup> Nãskakẽ inimayanã fetsafo ato inimamasharakãfe. Mē tãpiaki mã ato askafaino. Nãskakẽ ato fe mēxotaima aska faatanãkãfe.

*Pablo A Nios Ifofaafo ato yoisharani*

<sup>12</sup> Efe yora mĩshtichi, ě mato yoisharapaikai, ea nikasharakãfe. Epa Niospa nã Ifofaafo katonĩ āfe meka shara mato yoinõfo. Nãfãfe nõko Ifoõnoa mato yoisharamisfo nõko Ifo mã Ifo sharafanõ. Nãskakẽ ato noiyanã ato nikasharakãfe. <sup>13</sup> Nõko Ifoõxõ mato yoisharamisfo, nãskakẽ ato nikasharakãfe, ato noisharayanã. Mato fe yorafo fe isharakãfe, mēenãpaitama isharakõikãfe.

<sup>14</sup> Askatari efe yora mĩshtichi, nõ mato yoisharamis iskafakĩ: A xanimisfori ato yoisharakãfe yonosharanõfo, askatari a shinãmitsaifo ato inimamakãfe. Nãskaxõ a Nios Ifofasharafoma ato yoisharakãfe chanĩmara fakõinõfo. Nãskaxõ ato noiyanã fenãmãshta mã ato yoisharatiro.

<sup>15</sup> Nãskakẽ kexemesharakãfe, fetsafãfe mato noikaspaifono ato kopiyamakãfe. Askatamaroko noinã faatanãsharakãfe, keyokõi yorafo sharafakãfe.

<sup>16</sup> Mēxotaima inimaafafãikãfe. <sup>17</sup> Pena tii Epa Nios kĩfifafãikãfe. <sup>18</sup> Afara afeskara afiaino, Epa Nios aicho fakãfe. Nãskara Niospa matoõnoa fichipai kiki mã Cristo Jesús Ifo shara fakẽ.

<sup>19</sup> Niospa Yõshi Sharapa mato amapaiyai keskara xateyamakãfe. <sup>20</sup> Fetsafãfe Niosxõ mato yoiaifono a yoiaifo keskara, “Na afamara,” ixõ ato nikakaspakakĩma, ato nikasharakõikãfe. <sup>21</sup> Akka fẽtsa mato yoipaiyaito Niospa Yõshi Sharaõxõ yõkakãfe nã mato yoiai keskara chanĩmamakĩ askayamai chanĩ itiroki. Akka nã meka chanĩmakõi nikafafãikãfe, a meka chanĩ nikakakima. <sup>22</sup> Afara chaka fishtayamakãfe.

<sup>23</sup> Niospa mãto yorafoya, mãto fero mēshofoya mãto yõshi sharafoya Niospa mato sharakõi fatiro mã fekaxtenõma.

Nãato shara mato imatiro ãfe õiti keskara shara mã inõ. Mato kexesharata mãto õiti mēraxori mato shinãmasharatiro. Askax mã sharakõi inõ. Epa Niospa mato askafaino nõko Ifo Jesucristo afianã oaitĩa mato shinãmasharaxii. <sup>24</sup> Niospa mato katonĩ mã Ifofanõ. A noko yoiai keskara Niospa noko pãratiroma, noko axotiro.

*Mã mekai xatekĩ Pablo ato yoisharani*

<sup>25</sup> Efe yora mĩshtichi, noko Epa Nios kĩfixokãfe.

<sup>26</sup> Keyokõi a nõko Ifo Jesús Ifofaafõ fe yoinõnãsharakãfe.

<sup>27</sup> Nãskaxõ Epa Niospa mato yoia keskara nikasharakãfe.

Nã mã Ifofa tii ã mato kirika kenexõ fomaikai ato nika-masharakãfe.

<sup>28</sup> Nõko Ifo Jesucristo mato noikĩ mato sharakõifanõ. Nã tii ã mato yoi.

*Pablo*

## Pablo Tesalónica Anofo Afianã Kirika Kenexõ Fomani

*Pablo afe rafeafo feta Tesalónica anoxõ Nios Ifofaafono ato kirika kenexõ fomani*

<sup>1</sup> Ëkĩa Pablo. Silvano ikaino Timoteo ikaino nõ mato kirika kenexõ fomai. Efe yora mĩshtichi, mã Epa Nios Ifofaano pexe rasi Tesalónica anoxõ, mãfi nõko Epa Nios fe rafekõiakĩ nõko Ifo Jesucristo ferĩ mã askakõia. <sup>2</sup> Nãskakẽ Epa Nios feta nõko Ifo Jesucristo mato noikĩ mato sharakõifanõ, askatari mato imasharakõinõ mãto õiti mẽranoax mã anã fekaxtenõma.

*Epa Niospa a yora chaka omiskõimaxii mã Cristo anã oaino*

<sup>3</sup> Efe yora mĩshtichi, mã taefakĩ mã Nios chanĩmara fani. Nãskakẽ iskaratĩa mã chanĩmara fakĩ finakõia. Askatari mã rama Nios Ifofaax mã nõinãsharakõini. Nãskakẽ iskaratĩa mã nõinãifinakõi. Nãskakẽ nõ matoõxõ Nios kifikĩ iskafa fafafaĩni: “Aicho Epa Niosi, mefe yorafãfe Tesalónica anoafãfe mia Ifokõi faafoki,” ixõ ã mato kifixõfafãini. <sup>4</sup> Nãskakẽ Niospa mekaõnoa nõ ato yoifofãsafakĩ nã Nios Ifofaafono fe nõ ato fe ichanãitĩa nõ matoõnoa ato yoimis iskafakĩ: “Nã Nios Ifofafo Tesalónica anofo ãto kaifo fetsafãfe ato omiskõimamĩsfo. Nãskakẽ afara chakafãfe ato afeskarafafiaino a shinãtamaroko Jesús Ifokõi fakaxõ tenekõimĩsfo,” ixõ nõ matoõnoa ato yoixomis. <sup>5</sup> Nãskakẽ mã Jesucristoõnoax omiskõifixõ mã tãpitiro Niospa isharakõixõ mato yoikĩ iskafaino: “Nafo isharakõiafo,” mato faino mã afe ipaxatiro. Nãskax mã mã omiskõifixax chipo mã afe isharapakenaka.

<sup>6</sup> Niospa mẽstekõĩ fisti shinãmis, a mato omiskõimamĩsfo kopikiri chipo Niospa ato omiskõimaxii. <sup>7</sup> Nãskakẽ nõko Ifãfe mato tenemasharaxii mã anã omiskõinõma a noko akai keskafakĩ mã nõko Ifo fotoxõ. Akka nõko Ifo nai mẽranoax fotoi oa chii xoisai itikikeraxii ãfe ãjiri finakõiafo fe oi. <sup>8</sup> Akka nõko Ifo oxii a Nios Ifofamĩsfoma ato omiskõimaniyoi, askatari ãfe meka sharaõnoari nikamĩsfo-mano ato omiskõimaxii. <sup>9</sup> Nãfo omiskõipakenakafo, anãkai nĩpanakafoma. Nõko Ifokai õipakenakafoma, askatari ãfe shara yafi ãfe kerex shara õipakenakafoma. <sup>10</sup> Akka nõko Ifo oaino, nã penata a Ifofamĩsfãfe aõnoa yoisharaxikani. Nãskafaifono nã Nios Ifofamĩsfãfe õiketsaxikani, akka mã mã nikamĩs nõ mato yoiaito.

<sup>11</sup> Nãskakẽ nõ matoõxõ Nios kifikĩ iskafa fafafaĩni: “Epa Niosi, mĩ ato imapaiyai keskafakĩ ato imasharafe mia Ifofakaxõ fetsafo sharafapaikani kiki mĩ kerex shara ato inãfe,” ixõ ã matoõxõ Epa Nios kifikĩ. <sup>12</sup> Nãnori nõ mato Epa Nios



kĩfixomis, fetsafāfe mato òikakĩ nõko Ifo Jesúsnoa yoisharanõfo iska fakakĩ: “Jesús afama mĩshti fatiro, nāskaxõ afe yorafo a keskara sharakõi ato ima,” ixõ aõnoa yoisharanõfo. Nāskakē Epa Nios feta nõko Ifo Jesucristo mato noiyanā a keskara sharakõi mato imatiro.

## 2

### *Nā feronāfake afara chakafamisnoa ato yoini*

<sup>1-2</sup> Akka nõko Ifo Jesucristo anā fotofaino nā Ifofaafu tii akiki nokoxikani afe ipaxakakĩ. Nāskafekē fetsafāfe mato parapaikani iska fakakĩ: “Jesús mã oxõ a inõpokoai fo keskara ea tãpimana,” ixõ mato yoikani. Nāskatari fetsafāferi mato yoikĩ iska fakani: “Mã nõ nika Jesús mã oa,” ixõ mato yoiiaifono, fetsafāferi yoikĩ iska fakani: “Pablo noko kirika kenexõ fema, ‘Jesús mã oa,’ ” ixõ mato yoipaikani, āa chanĩkakĩ. Nāskakē rateyamakāfe. Ē mato yoinõ. Jesús oaino nā Ifofaafu afe ichanāxikani, nāskax afe ipanakafo. Akka mato yoisharapaiyaito nikasharakāfe. <sup>3</sup> Nā chanĩmisfo ato nikayamakāfe. Jesús oyoamano keyokõichi Epa Niospa meka kachikiri fakani anā nikaxikakima. Nāskakanax nikayospakõi ixikani. Nāskaifono a feronāfake chakafinakõia oxii. Nāato a Niospa yoini keskara nikakaspakõimis. Nāato Satanás ifofakõimis. Askafiax chipo a omiskõipakenakafo mēra kaxii. <sup>4</sup> Akka a feronāfake niyoxõ iska fakĩ yoixii: “Ē keyokõi finõa. ‘Na nõko Niosra’ ixõ mã kĩfimis, nāri ě finõa. Akai Niosma,” ixõ ato yoita, nā Nios kĩfiti pexefā mēra ikikaixõ ato yoixii iska fakĩ: “Afaa fetsa kĩfiyamakāfe. Askatari afaa fetsari noiya makāfe. Ēfi Nioski,” ixõ ato pāraxii.

<sup>5</sup> Akka, ¿mã shināimamē a ě mato fe iyoxõ a ě mato yoipaoni keskara? <sup>6</sup> Akka mã mã tãpia nā chaka finakõia Epa Niospa nētefayoa, fena oyoyamanõ. Nāskafiax chipo oxii Epa Niospa anā nētefayamaino. <sup>7</sup> Nā noikaspamis Epa Niospa nētefayoano fena oyoima. Chipo oxii Epa Niospa anā nētefayamaino. Akka oyoamano nā aõxõ afara chakafamisfāfe fomāpaiyoxikani. <sup>8</sup> Nāskakē nā chakafinakõia mã oano, nõko Ifo Jesús āfe axfapa xoõ atakĩ reteskĩ mapokõi fataxii. <sup>9</sup> Nõko Ifāfe reteyoamano nā yora chakafinakõiato Satanāõxõ afama mĩshtifo faxii afarafo afeskarafakĩ ato parayanā. <sup>10</sup> Nāskaxõ afarafo afeskarafakĩ ato pāraxii a nikaifo, nāskakē nā nikakanax afe nā omiskĩskõipakenakafo mēra foxikani. Nāfāfe Niospa mekakõi nikayamakāta, āfe meka sharari noimisfoma Nios fe ipaxakakĩma. Nāskakē nā omiskõipakenakafo mēra foxikani. <sup>11</sup> Nāskakē Niospa anā ato yoipaima āa ato paranõfo, a ato paramisfāfe ato yoiiaifo keskara nikakõiaifono. <sup>12</sup> Nāskakē nāfāfe Niospa mekakõi nikayamakāta, tsoarikai aõ noimisma.

Askatamaroko afara chaka fisti fichipaiyaifono Epa Niospa nã omiskõipakenakafo mëra ato potaxii nã ato paramisfo fe omiskõipakexanõfo.

*Niospa noko katonni nõko chaka noko soaxoxiki nõ afe ipaxanõ*

<sup>13</sup> Efe yora mĩshtichi, taekõifakĩ Epa Niospa mato noikĩ mato katonni afe mã ipaxanõ. Nãskakẽ ãfe Yõshi Sharaõxõ mato ifini afe yora mã inõ, Jesũsnoa mã chanĩmara faino. Nãskakẽ mẽxotaima nõ Nios aicho famis mato shinãkĩ. <sup>14</sup> Nãskakẽ ãfe meka shara nõko Ifo Jesucristoõnoa nõ mato yoiaino nokoõxõ mã mã tãpikõia. Nãskaxõ mã chanĩmara faino ãfe Fake Jesucristo ofofani keskafakĩ matori õtofaxii a ika ano mã afe ipaxanõ.

<sup>15</sup> Nãskakẽ efe yora mĩshtichi, nã nõ mato yoimis anorikõi nikafafãikãfe. Akka anoriyamakẽ afo nikayamakãfe. Nã nõ mato yoipaoni keskara nã fisti chanĩmara fayanã, a nõ mato kirika kenexoki nõ mato yoini keskarari shinãfafãikãfe.

<sup>16</sup> Nõko Ifo Jesucristo feta nõko Epa Niospa noko noikĩ, nõko õiti mëraxõ noko inimamakõinõ. Nãskakẽ nõ tãpitiro noko potanakama nõ afe ipaxanõ. <sup>17</sup> Mãto õiti inimamakõikãfe mato imasharakõiaino. Nãskaxõ afara afeskara afiaino ato yoisharakõita mã ato axosharafafãixakĩ.

### 3

*“Noko Epa Nios kĩfixokãfe,” ixõ Pablo ato yoini*

<sup>1</sup> Akka efe yora mĩshtichi, mẽ mekai xatekĩ ã mato yoi. Noko Epa Nios kĩfixokãfe, nõko Ifãfe ãfe meka shara mã nika keskafakĩ nõko Ifoõnoa keyokõichi nikanõfo. <sup>2</sup> Askatari noko Epa Nios kĩfixokãfe na yora chakafo feta a shinãsharaifãfema noko afeskafanõfoma. Nãkakẽ Jesũsnoa nõ ato yoiaito noko nikakatama noko xatemapaimisfoki. <sup>3</sup> Akka nõko Ifo sharakõi, nã noko yoimis keskara noko axomis. Nãato mato imasharapakenaka, afara chakatari mato fekaxtefanõma.

Askatari nãato mato kexesharapakenaka. <sup>4</sup> Nãskakẽ nõko Ifoõxõ nõ chanĩmara fai, nã nõ mato yoimis keskara mã akaito. Nãskakẽ mẽxotaima mã askafa fafãfãini a nõ mato yoimis keskafakĩ. <sup>5</sup> Epa Niospa mato noiai keskafakĩ nõko Ifãfe mato tãpimapainõ. Cristo omiskõifikĩ teneni keskafakĩ, aõxõ mãri mã tenesharakõifafãinõ.

*Keyokõichi nõ yonosharakõitiro*

<sup>6</sup> Efe yora mĩshtichi, nõko Ifo Jesucristoõxõ nõ mato yoimis. A Epa Nios Ifofaa fetsafãfe yonokaspaifono mã ato makinoax paxkanõ a nõ mato yoimis keskara nikakaspaifono. <sup>7</sup> Akka mã mã tãpia a nõ imis keskara mã askapai mã isharakõitiro. Nõ mato mëra ixõ nõ yonokaspaaponima. Askatamaroko

nō yonokōipaoni. <sup>8</sup> Askatari nō tsoa afaa kaxpa pīapaonima. Askatamaroko nō yonopaoni, penata yonota, fakishi yonota nō fapaoni a nō piai fīxō pixii mares fisti mātō kori ichapa mā potanōma. Nō yonokī askafapaoni. <sup>9</sup> Niospa mekaōnoa yoinifo iskafakī: “Nā mato Niospa meka yoimisfāfe afara yopaifāfe ato inākāfe,” ixō kenenifo Niospa ato shināmanaino. Nāskakē, “Noko afara inākāpe,” ixō nō mato yōkakerapaoni. Askatamaroko nō yonopaoni nō mato ōimakī a nō akai keskafakī māri mā yononō. <sup>10</sup> Akka nō mato mēra ixō nō mato yoipaoni iskafakī: “Akka nā yonoyamaito afaa pitiroma,” ixō nō mato yoini. <sup>11</sup> Akka matoōnoa noko yoiāfo iskafakakī: “Na ranārīto yonokaspata ikafo, nāskakanax afaa meekatama āa fofāsakaki ato parafofāsa famisfo,” ixō noko yoiāfo. <sup>12</sup> Nāskakē nō mato yoi iskafakī, nōko Ifo Jesucristoōxō mā tanaima yonosharakōinō anā xanikima a mā fichipaiyai keskara fixiki.

<sup>13</sup> Efe yora mīshtichi, a mā afarafo sharafamis keskafakī xateyamakāfe. <sup>14</sup> Akka na kirika kenexō nō mato yoiāi keskara nikakaspai, aōnoa shinākāpo. Nāskakē afe rafe-paiyamakāfe, mā askafaino rāfinō. <sup>15</sup> Nāskafiaito noikaspayamakāfe. Askatamaroko yoisharakāfe mato fe yora keskara fakī.

*Mā mekai xatekī Pablo ato yoisharani*

<sup>16</sup> Nōko Ifāfe nōko ōiti noko inimamaxotiro. Pena tii afara afeskara afiaino mato inimamatiro. Nōko Ifo keyokōi mato fe isharanō.

<sup>17</sup> Ēkīa Pablo, ēkōi ēfe mēkemā kirika kenexō ē mato fo-mai yoisharakōiyanā. Akka nā ēfe kirika kenefo ē iskafamis kenekī. <sup>18</sup> Nōko Ifo Jesucristo mato noikī keyokōi mato sharafanō. Nā tii ē mato yoi.

## Pablo Timoteo Kirika Kenexō Fomani

### *Pablo Timoteo yoisharani*

<sup>1</sup> Ēkĩa Pablo. Iskaratĩa ě mia kirika kenexō fomai Timoteo, ě mia yoikĩ. Epa Niospa ea katonĩ ě āfe meka Jesucristoōnoa ě ato tãpimanō. Epa Nios noko ifimis, Jesucristo nõko Ifo feta ea yoinĩ ě ato tãpimanō. Jesucristo nokoōnoax nani ares noko Epa Nios ari iyoxii kiki. <sup>2</sup> Nãskaxō ě mia Jesucristo chanĩmara famaxō, ě mia fakekōi faa, Timoteo. Nãskaxō ě mia yoixō Epa Nios, Cristo Jesús nõko Ifo feta mia shinãsharanō mĩo noikĩ, mĩ shinã mēra mia shinãmasharanō, mĩ õiti fekaxtenōma.

*Pablo Timoteo yoini: “Õisharakõife, ato anorima tãpimapaikõikani kiki”*

<sup>3-4</sup> Ē Macedonia ano kayamea taefakĩ, ě mia yoifaini kati. Ē mia anã yoiaito nikasharafe. A Efeso anoax fena kayamafe. Nãno ixō mĩ efesofo ato yoisharafe. Atiixori Niospa meka anorima yoimifokĩ. Niospa meka yoitamaroko ãto xinipao ipaoni fisti ato yoifafãikani. Askakani feratenãkani. Nãskakē ě mia yoi mĩ ato yoisharanō iskafakĩ: “Niospa meka mēstekõĩ yoisharakõikãfe. Mãto xinipaofãfe afesfax Epa Nios ari nõ nokotiomãki noko tãpimapaonifoma. Jesucristo noko nãxonĩ nõko chaka noko soaxoxiki. Epa Nios ano noko imaxiki nõ Jesús chanĩmara fakē. Nã fisti chanĩmara fakãfe, a fisti ato yoikãfe. A mãto xinipao ipaoni anori mã anã shinãnōma. Anorima chaka ato yoiyamakãfe. Niospa meka yoisharakãfe mēstekõĩ,” ixō ato yoife.

<sup>5</sup> Niospa meka ato yoisharafe noinãnōfo. Mĩ ato yoiaito nikakĩ ãto õiti sharafanōfo. Askatari ãto chakafo Jesús ato soaxonō, anã afaa pishta chaka shinãifomano, askatari Jesús chanĩmara fakõinōfo. Nãskax keyokõĩ shara faatanãkõinōfo. <sup>6</sup> Mã askafiax atiri yorafãfe anã shinãsharakanima. Anã ato noisharakanima. Nãskakĩ mēxotaima ato mekafafofãsa fakani. Nãskakĩ anã ato tãpimasharatiroma, fanĩrira yoitiro. <sup>7</sup> Nãskaxō a Moisés yoikĩ kirika keneni keskara ato tãpimapaikakĩ nãfãfe yoimisfo iskafakĩ: “A Moisés yoini keskara nõ fãsi tãpikõia,” ixō yoifikatsaxakakĩ a yoiaifo keskara tãpikõiafoma.

<sup>8</sup> Akka mã nõ tãpia nã Moisés yoini keskara shara. Mēstekõĩ ato yoiaifono nikasharatirofo isharaxikakĩ. <sup>9</sup> Mã nõ tãpia a yora sharafoōnoa yoikĩ Moisés keneni. Akka nã yora chakafoōnoa yoikĩ keneni. A nikayospafoōnoa yoikĩ, askatari

a yora chakafoõnoa yoikĩ, askatari a Niospa meka nikamisfoõnoa yoikĩ, askatari ãto apa yafi ãto afa retemisfoõnoa yoikĩ, askatari a ato retemisfoõnoa yoikĩ, <sup>10</sup> askatari a ãto ãfimafo chotamisfoõnoa yoikĩ, kērofāferi ato fenemafo chotamamisfoõnoa yoikĩ, askatari feronāfakefori aa ranā chotanāmisfoõnoa yoikĩ, nāskakākĩ ãto ãfifo anā tanamisfoõnoa yoikĩ, askatari yora fetsafo achikaxō onemisfo ato yonomaxikakĩ, askatari ãa chanĩmisfo, Niospa meka fanĩrira yoimisfo, askatari afarafo chakafamisfo, afāfe Niospa meka tāpiafoma, nāskara yorafoõnoa Moisés ato kenexoni tāpinōfo afeskax isharatirofomākĩ a Niospa noko imapaiyai anori. <sup>11</sup> Nāfāfe Niospa meka tāpisharafoma, nikakanima. Epa Niospa ea yoia ã ãfe meka mēstesharakōi ato tāpimanō. Āfe Fake Jesucristo fāsi shara nokoõnoax nani nōko chaka noko soaxoxiki nō afe nipaxanō. Aicho, Nios fāsi sharakōi.

*“Aicho, mĩ ea õia mĩ ea shinākõia,” Pablo Nios fani yoikĩ*

<sup>12-14</sup> Ē anorima shināyopaoni Niospa Fake tāpiaxma. Ē fāsi anorima shināpaoni iskafakĩ: “Jesús Niospa Fakekēroko. Āa pārakaninō, yorakōifekē,” ixō ã chakafapaoni, ã anorima shinākĩ. Anori shināki a Jesús Ifofamisfo ã fāsi ato chakafapaoni. Ē fāsi feronāfake mesekōi ipaoni ea omispaonifo ã tāpisharaxma. Anorima ã shinākĩ ã noikaspapaoni, ares ea shināfiato Niospa ea noikĩ. Nāskaxō ea ifisharani. Ē fāsi chakafafiamiskē ea noisharai. Nāatofi ea shināmamiskĩ ã aõ noinō. Ea askafaito ã nikasharakē nōko Ifo Cristo Jesús ea yora fetsafo fāsi noimasharai. Aicho, ã Jesúski inimasharakōi ea noisharaito. Jesucristo ea shināmani iskafakĩ: “Mĩ ea noikĩ, ea shināsharafe, mĩ ea tāpisharaxō eõxō mĩ yonoi ato tāpimakĩ,” ixō ea yoia.

<sup>15</sup> Timoteo, na ã mia yoiai chanĩma. Keyokōichi chanĩmara fanōfo. Jesucristo nai mēraxō Apa Niospa nāmā nĩchini nōko chakafoõnoax noko nāxoyonō nō afe ĩpaxanōfo. Askafiaino na fetsafāfe chakafakĩ finayamafiaifono ã fāsikōi chakafakĩ finakōipaoni. Jesús Ifofamisfo ã chakafayopaoni. <sup>16</sup> Nāskafaiato õikĩ Jesús ěfe chaka ea soaxona. Ē chakafafiamiskē Jesucristo ea fāsi noi. Ea askafaito õi kakĩ yora fetsafāfe iskatirofo: “Īõikapo! Na Pablo fāsi chakafafiamiskē mā Jesús aõ fāsi noi,” shināito õikĩ, “Nokori Jesús noikĩ noko ifitiro, na Pablo akai keskafakĩ, nō afe ĩpaxanō na Pablo ikai keskai Jesús fe nipanaka, nōri afe nipaxanō,” ikaxō anori shinātirofo.

<sup>17</sup> Anori shinākĩ nānori nō yoitiro iskafakĩ: “Aicho Epa Niospa, mĩ fāsi sharakōi. Meres mĩ xanĩfokōi, tsōa mia finōtiroma. Mĩ nanakama, mĩ nĩpanaka. Tsōa mia õitiroma.

Meres mĩ keyokõi tãpikõia. Meres mĩ Nioskõi, anã fato fet-sama.” Nãskafakĩ nõ Nios yoipakenaka.

<sup>18</sup> Ëfe fake Timoteoshta, a Jesús Ifofanifãfe mia yoiaito mĩ nikamiski. Niospa ato shinãmanaino anori mĩ kerexkai ato yoisharanõ mēstekõi, ěri mia yoi kerexkai yoife mĩ Niospa meka nikasharakõixõ Jesús Ifofaxõ ato yoisharafe. <sup>19</sup> A yora fetsafãfe mã Niospa meka tãpifikaxõ iskaratĩa anã Nios shinãkanima. Niospa meka nikakaspakakĩ Jesús anã chanĩmara fakanima. Fanĩrira shinãkani mã na meka tãpifikatsaxakakĩ. <sup>20</sup> Akka a feronãfake rafe Himeneo feta Alejandro iskafamisfo. Nã rafeta Nios chakafamisfo noikas-pakakĩ. Askaito õikĩ ě ato yoia: “Mã mã Satanás nikakĩ, Nios chakafakĩ, afianã Niospa mato kexeima.” Mã askafaito Satanás mato omiskõimatiro. Mato omiskõimanaito mã tãpitiro mã anã Nios chakafanõma.

## 2

### *Afeskafoxõ nõ Nios kĩfitiromē*

<sup>1</sup> Timoteo, a Nios Ifofamisfo ě mia yoiai anori ato fãsi yoife. Taefakĩ mĩ ato yoitiro iskafakĩ: “Keyokõi yorafo ato yoixokãfe. Afara yopaifãfe Nios ato yoixokãfe. Mato Niospa axõfaito aicho fakãfe akiki inimakĩ. <sup>2</sup> A xanĩfokõi fe afe rafeafo keyokõi xanĩfofo ato Nios yoixokãfe mato yonoxosharanõfo isharaxikãkĩ. Nãskakē afanã mato fekaxtefayamanõ, mã Nios shinãsharanõ, Nios Ifofasharaxiki.” <sup>3</sup> Nãskakē Nios noko ifimisto noko õikĩ noko iskafatiro: “Na ěfe fakefo isharafo. Iskara sharakõi. Na yorafoki ě inimakõira,” ixõ Niospa yoitiro. <sup>4</sup> Niospa keyokõi yorafo ifisharapai, keyokõi yorafo Jesús ato nãxoni ato chaka soaxoxikĩ a tãpikõinõfo. <sup>5-6</sup> Nios fistikõi, anã fato Nios fetsama. Nã Nios fisti ares shara. Akka na yorafo chakakõifo. Afara chakaya shara nõ ositiroma. Akka yõra ato mēraxõ afara chakafamisto Nios õikaspai, nikakaspakĩ. Akka nã yora chaka askara Nios ari katiroma. Nãskakē Cristo Jesús nãmã na mai ano oni yorafo nãxoxiki nõko chaka noko soaxoxiki. Askafakĩ, yorafo chaka soaxonano isharanõfo, ato askafaano, Nios ari nokotirofo. Nãskakē nõ tãpia Jesucristo fistichi noko Nios ari iyotiro. Nãskakē keyokõi yorafo ifipai. Nãskakē noko õimani Jesucristo keyokõi yorafo ifipai. <sup>7</sup> Nãskakē Niospa ea katonĩ aõnoa judeofoma ě ato tãpimanõ nãfãferi tãpinõfo. Yora fetsafoõnoaxri Jesús nani. “Eõxõ yoixiki,” ixõ Niospa ea yoini. Ě chanĩma, ě mia paraima. Niospa ea yoini ě ato tãpimanõ Jesús ato nãxoni chanĩmara fanõfo.

<sup>8</sup> Akka feronãfakefo ichanãkaxõ kifikani inimakani, keyokõi mã raenã faatanãkaxõ ato chaka Jesús soaxonano, ãto mēke rafe Nioskiri mēshaxotirofo Niospa õitiro. Askaifono Jesús

ato chaka soaxonano, nã Nios kïfiaifãfe ato Niospa nikatiro. Askapainõfora ixõ ã yoi.

<sup>9</sup> Nãskarifiakĩ nõ ichanãino xotofãke iskara shinãtiroma: “Sama shara safeta, teoti ichapa safeta, askata femãnãki keneta, foaromesharata, irosharakõita, ã ikaino yorafãfe, ‘Na xotofake sharakõira’ ixõ ea yoinõfo,” ixõ anori shinãyamakãfe.

<sup>10</sup> Askafatamaroko, fetsafo axosharakãfe, Nios Ifofaxõ Nios õimaxikakĩ. “Na xotofake sharakõira,” ikaxõ aãnoa yoitirofo.

<sup>11</sup> Ano fisti ichanãkaxõ xotofakefãfe ato nikakõisharatirofo. Akairi tãpisharaxikakĩ atoõxõ. <sup>12</sup> Ë fichipaima xotofãke feronãfakefo Niospa meka ato tãpimanaino. Askatamaroko feronãfakefãfe xotofakefo Niospa meka sharaõnoa ato yoitirofo.

Nãskakẽ xotofakefãfe feronãfakefo nikakõitirofo. <sup>13</sup> Akka Niospa Adãn onifakĩ taefani. Nãskaxõ chipo Evari onifani.

<sup>14</sup> Nãskakẽ Satanás Eva pãrani. Adãn anima pãrakĩ. Nãskakẽ xotofakefãfe nikakõisharatirofo. <sup>15</sup> Nãskaxõ xotofãke fake fixõ pekkosharatiro, Nios Ifo shara famaxiki. Nãskakẽ chanimara fatirofo. Mã askafaito Niospa ato ifitiro. Ato õiti inimasharanõfo a fetsafo noisharakanax ato fe isharanõfo. Isharakaxõ, shinãsharakõinõfo.

### 3

#### *Afe keskara itiromẽ a Niospa meka ato yoimis*

<sup>1</sup> Nã ã mia yoiã chanĩmakõi. A feronãfake Niospa meka yoimis ipai askara sharakõi itiro. Askatari a Nios Ifofamisfo ato kexemis ipai askarari shara. <sup>2</sup> Nãskakẽ nã isharakõimis ifife. Isharaito õikakĩ fetsafãfe yoitirofoma iskafakĩ: “Nato afara mẽxotaima chakafamis,” ixõ yoitirofoma. Askatari ãfi fistiya itiro. Kẽro fetsa kaxefamisma ikãi, shinãsharakõita isharakõimis ikãi, fãsi yonosharamis xanimisma ikãi, fetsafo sharafamiskõi ãfe pexe anoxõ yora pimamis ikãi, fẽtsa pexe yopaito ãfe pexe mẽra yora ikimamis ikãi, ato tãpimasharamis ikãi, nãskara feronãfake ifife. <sup>3</sup> Askatari pãemisma ikãi, setemit-samisma ikãi, yorafo noimiskõi ikãi, ato chakafamisma ikãi, kori noimisma ikãi, askara feronãfake shara katofe. <sup>4</sup> Afe ãfinõ ãfe fakefonõ afe isharakõimisfo itirofokĩ. Afe fakefãfe noikakĩ nikasharakõimisfo itirofo. <sup>5</sup> Akka askayamaito, afe yorafãfe a nikakaxoma askara yora Jesús Ifofamisfãferi a nikatirofoma.

<sup>6</sup> Akka a rama Jesús Ifofaa a Niospa meka ato yoimis askara katoyamafe. Aato shinãki iskafatiro: “Ë fãsi sharakõi, ã Niospa meka ato tãpimani. Tsoa fetsa ea keskarama,” ixõ shinãi Jesús shinãyamafi ãa shinãi askatiro. Satanás anori mekani: “Ë Nios finõikai,” ini. Askaito Niospa nai mẽraxõ potani nãmã. Nãskari fakĩ a rama Jesús Ifofai, Satanás ani keskari fatiro. Nãskakẽ a ato Niospa meka yoimis askara katoyamafe a rama Jesús Ifofai. <sup>7</sup> Akka askaito õikĩ a Nios

Ifofamisfāfema yoitirofo isharakōiaito ōikakī. Akka isharayamaito, tsōa yoisharatiroma. Askara yōra fanīrira chaka shināi paketiro Satanás paraino.

*Afe keskara itiromē a Nios Ifofamisfo ato kexemis*

<sup>8</sup> Nā a Nios Ifofamisfo ato kexemis nā keskara feronāfake katoxō ifife. Nāskara yora sharakōifo itirofo, āto meka mēstekōi shara itirofo, askara yorafo pāemis itirofoma, nā kori fisti shināfafāinaifoma. Nāskara feronāfake isharamisfo ifife Nios Ifofamisfo ato kexesharanō. <sup>9</sup> Na Niospa meka nō tāpiyopaonima, iskaratīa rama nō Niospa meka tāpi. Nāskakē na feronāfāke Niospa meka nikasharakōimis ifife, askatari afara chakafayamaino āfe ōiti fekaxtemisma askara ifife. <sup>10</sup> Nā Nios Ifofaafo ato kexemis ikimākai mī ōiyotiro. Askarato afe keskara yonosharaimākai mī ōiyotiro asharamimākai. Askata asharakōiaito ōikī, askara yora mī ifitiro a Nios Ifofaafo ato kexemis inō. <sup>11</sup> Mā askafono āto āfifori ato keskara sharafori itirofo. Nāskaxō anā ato meka fakī chakafatirofoma. Askatari pāemismafori itirofo. Askatari āa kakapaimisfo itirofoma. Askara yorafāfe shināsharamiskōifo itirofo. <sup>12</sup> Nāskax a Niospa meka yoimisfo fe rafekanax āfi fistiyafo itirofo. Nāskakanax ato pexe anoax isharakōitirofo, āto āfinō, āfe fakefori afe ishariatirofo, askara nikakōishariatirofo. <sup>13</sup> Nāskaxō a Nios Ifofaafo ato kexemisto yonosharakōiaito ōikakī fetsafāfe ōikaxō yoisharakōitirofo aōnoa. Nāskaxō a feronāfake mesetama fetsafo yoisharatiro: “Cristo Jesús ea ifia,” ixō ato yoitiro.

*Niospa meka chanīmakōi noko yoimis.*

<sup>14</sup> Timoteo, iskaratīa ē mia kenexō fomai, mia ari samama kapaikī. <sup>15</sup> Akka ē mia ari fena kayamaino ōikī na kene tāpixō mī tāpitiro afeskax itirofomākai a Jesús Ifofaifo. Akka Nios nīpanaka. Nāskax a Ifofamisfo Niospa fakekōifo afe ipanakafo. Nāskaxō Niospa meka mēstekōi ato yoisharaifāfe fetsafāferi ato nikasharakōitirofo. <sup>16</sup> Fetsafāfe yoikī iskafatirofoma: “Niospa meka chanīra,” ixō yoitirofoma. Jesús Niospa Fake feronāfakekōi kāini. Niospa Yōshi Sharapa, “Jesús Niospa Fakekōi,” ixō yoini. Askatari Niospa ājirifāfe Jesús ōinifo Niospa Fakekōikē. Askatari yorafāferi ōinifo Jesús Niospa Fakekōikē. Nāskaxō yorafo tāpimakōinifo ato yoisharakōikakī, akairi tāpisharakōinōfo. Askaifāfe yora fetsafāfe mai fetsafo arixō nikakakī ato chanīmara fanifo akairi Jesús shinākakī. Nāskakē Jesús anā nai mēra kani Apa Nios ano.

## 4

*Pablo yoini anā Nios shināyamaifono*

<sup>1</sup> Niospa Yōshi Sharapa noko mēstekōi yoikī iskafamis: “Jesús mā chaima oaitīa atiri yorafāfe Nios kachikiri fakani. ‘Ē



Jesús Ifofaira' ifiamisxakakī nā nāfaka ato pārafiaito anorima ato yoimisfo. Askara anori yoimisfāfe nikakaxō niafaka fisti ifofamisfo," ixō ato yoimis. <sup>2</sup> Askara yorafāfe yora fet-safo anorima yoikani āa ato pārakakī, ōiti chakayafiakaxō. Anori fisti shinākī feyafamisfo. Nāskakē afara chakafakani rāfikanima. <sup>3</sup> Askarafāfe fetsafo tāpimakī iskafakani āa ato pārakakī: "Niospa yoikī iskafamis: 'Feronāfakefo āfiyatirofoma. Askatari nami piyamakāfe,' ixō yoimis," ato fatirofo. Akka Niospa keyokōi onifani nō pinō. A Nios Ifofamisfāfe pixikakī Nios kīfiyotirofo. Nāskaxō nō pitiro afama mīshiti. <sup>4</sup> Keyokōi a nō piaifo Niospa onifakī sharakōi fani. Nāskakē nō inimakī yoitiro aicho fakī. Nāskakē nō pikaspakī chakafatiroma a nō piaifo Nioski inimakī. <sup>5</sup> Epa Niospa noko yoia: "Keyokōi shara," ixō noko yoia. Nāskakē nō, "Aicho Epa Niosi, mī noko yoinā shara inā," nō fai. Nāskaxō nō pitiro.

### *Afe keskara itiromē Jesús yonoxosharamis*

<sup>6</sup> Timoteo, na ē mia yoiai anori mī chanīmara famis. Nāskakē Jesús Ifofamisfo ato tāpimasharafe, mī Cristo Jesús yonox-omis shara ixiki. Askatari Niospa meka mēxotaima ōife a mī piai keskafakī, fāsi shināsharakōixiki, shara nixiki. <sup>7</sup> A tāpīamafāfe yoimis anori nikayamafe. Mēxotaima Niospa meka shināfafāife. Askata ōiti kerexfafāi Nios shināfafāife mī ōiti pachi fakīma. <sup>8</sup> Akka afaa meeyamai rakatsax nōko yora xokenātiro. Nō anā afaa yonopaitiroma. Akka nō mēxotaima yonoi nō mitsisipakōi itiro. Nāskara shara. Nāskafakīri nō mēxotaima Niospa meka nō ōirifakī, Nios kīfirifai nō mitsisipakōi itiro nōmēra sharafinakōia. Nāskax nō shara itiro. Nāskatari nō naax, nai mēra kaax, ariaxri nō mitsisipakōi itiro sharafinakōimāi niax Nios anoax, nōmāi Nios Ifofakatsaxakī. <sup>9</sup> Na ē mia yoiai chanīmakōi. Nāskaxō keyokōichi chanīmara fanōfo. <sup>10</sup> Nāskaxō mitsiskai nō Niospa meka yoifafāini. Nō askafaito fetsafāfe noko omiskōimatirofo a Niospa meka ōikaspaifāfe. Askai omiskōifikī nō tāpikōimis Jesús iskaratīamāi nikē. Nāskaxō Jesúsmāi noko nāxonikē, keyokōi yorafoñoax, nāskaxō a Ifofamisfo ato ifixii.

<sup>11</sup> Timoteo, na ē mia yoiai yonosharata ato tāpīmafe. <sup>12</sup> Nios Ifofafāi isharakōife. Mī isharakōiaito mia ōinōfo, ato ōimasharakōife. Askax mī isharakōixiki Nios Ifokōi faax, ato yoisharakōife mī meka pachi faxō, ato noikōisharata, nāskax isharaito ōikakī yorafāfe mia chakafakī yoinōfoma iskafakī: "Na naetapa Timoteo fanīrira noko yoi kiki nikayamakāfe," ixō mia tsōa yoitiroma. <sup>13</sup> Nā ē kayamaichāi, ato ichanāfaxō Niospa meka ato anexō, ato nikamasharakī, ato yoisharakōife. <sup>14</sup> A Nios Ifofafo ato kexemisfāfe mia māmākaxō mia Epa Nios kīfixonaifono Niospa mia amapaiyai

keskara mia axoni a Nios Ifofaafo mĩ ato tãpimasharanõ ato kexesharayanã. Akka Epa Niospa mia kaxpa tãpimanimakĩ fetsafori sharafaxõfafaĩni xateyamafe.

<sup>15</sup> Shinãfãikõĩ isharafe nã ã mia yoiai keskafakĩ. Mĩ askafaito mia tãpisharakõinõfo mĩ yorafo Niospa meka yoiaito mia tãpisharakani. Askaxõ, “Timoteo fãsi sharakõĩ,” ixõ mia yoikani. <sup>16</sup> Nãskakẽ kexemesharafe. Niospa meka mēstesharakõĩ ato yoife, isharakõita. Mĩ askafai Epa Nios fe mĩ isharakõipakenakaki. A mia nikaifori askapakenakafoki.

## 5

### *Afeska x nõ isharatiromẽ a nõ Nios Ifofaa tii*

<sup>1</sup> Anifo fãsi mekafata yoyamafe. Nã mĩ epa mĩ aka keskafakĩ, oitsifafãĩ yoisharafe. Askatari nã naetapafori mĩ ochi yafi mĩ exto aka keskafakĩ ato shinãmasharata ato yoisharafe. <sup>2</sup> Yõxafofori nã mĩ efa mĩ aka keskafakĩri shinãsharafãĩ ato yoisharafe. Mĩ chiko yafi mĩ chipi mĩ aka keskafakĩ nã xomayafo sharafo feesyamafãĩ, askara shinãtama ato yoisharafe.

<sup>3</sup> Nã kēro ifomafafo, askata fakemaisfo, askatari fafamaisfo, nãfo shinãmakiyamafe nã Jesús Ifofamisfãfe kexesharanõfo. <sup>4</sup> Akka nã kēro ifomafa fakeyakẽ, askayamai fafayakẽ afãfe kexesharatirofo. Askarifakĩ nã yome pishtakẽ ato kexesharapaonifo keskafakĩri kopikiri kexesharanõfo ãfe fakefãferi. Nãskafaiãfe fetsafãfe õi kakĩ, “Nã yorafãfe Nios nikasharakani,” ikaxõ yoisharanõfo. Nãskaito õi Nios atoki inimai. <sup>5</sup> Nã kēro ifomafa fakemais ita, fafamais ita, fenemais ita, nãskarafãfe Nios fisti shinãkĩ: “Niospa ea kexei,” ixõ shinãkĩ iskafakĩ, nã pena tii kĩfita fakish tii kĩfita famisfo Epa Nios mēxotaima kifikakĩ. <sup>6</sup> Nãskafax nã ifomafa fetsa fenemaisax kafãsatiro. Aa inimasharakõĩ nã ipaiyai keskai. Niospa meka mã shinãmakixõ, kachikiri faax, nã mã naa keskara. Shinãsharaima, chaka shinãĩ. <sup>7</sup> Timoteo, keyokõĩ ã mia yoiai na kēro ifomafa Jesús Ifofamisfo tãpimasharafe, askara tãpikaxõ nikasharakõinõfo, fetsafãfe, “Mã chakara,” ikaxõ yoitirofoma. <sup>8</sup> Akka fẽtsa afe yorafo kexesharama, ãfe pexe mēra ikiaifãfe ato kexeima nãskafakĩ chakafai. Aa keskaratokai Niospa meka nikasharama. A Jesús Ifofamato askarato afara chakafai, akka a Jesús Ifofaafãfe afe yorafo kexesharakakĩma fãsi chakafamisfo.

<sup>9</sup> A kēro ifomafa sesenta xini aka, ãfe fene fisti fe iyopaoni nã keskaraki kirika kenefe nã Jesús Ifofamisfãfe ato kexenõfo. <sup>10</sup> Nãskata nã kēroõnoa yorafãfe yoisharamisfo; nãskata ãfe fakefo pexkosharakõĩni; askatari yora fetsa ãfe pexe ano kaito atoki inimamis; fetsafo pimamis; omiskõiaito ato sharafamis;

ato feta amis; kēro askara fistichi āfe ane kenetiro Jesús Ifofamisfāfe a kexenōfo.

<sup>11-12</sup> Akka nā kēro ifomafa sesenta xinia akama, a keskaraki āfe ane mī kenetiroma. Nā kēromā āa shinākī iskafatiro: “Jesús, ē mia fisti shināpai. Mia fisti ē yopai. Ē anā feneyapaima,” ifiaxō anā fetsa anori shinātiro feneyapaikī, anā Jesús shinātiroma. Nā Niospa yoiai anori shināima āa chanī mekatiro. Askafai āa chanīaito ōikī, askara kēroki Nios inimatiroma. Nāskakē āfe ane kenetiroma. <sup>13</sup> Askara kēro fenemaisax xani itiro, pexe tii ōifofāsafakī, askai kafāsakī, ato pārafōfāsafatiro āa chanīkī. Nāskakē ato fekaxtefatiro. <sup>14</sup> Askatamaroko kēro ifomafa yōxafo famatai feneyatiro. Mā feneyaxō fake fitiro. Fake fixō āfe pexe fisti anoxō kexesharatiro. Askafasharaito ōikī yorafāfe chakafakī mekafatirofoma. <sup>15</sup> Atiri kēro ifomafafāfe Nios kachikiri fakaxō Satanás ifofafo.

<sup>16</sup> Timoteo, a Jesús Ifofamisto afe yora ifomafakē, kexesharatiro. Askatari a ifomafafo kaifoyakēma, fenemais ita, fakemais ita, fafamaisfo askara a Nios Ifofamisfāfe ato kexetirofo.

<sup>17</sup> A Nios Ifofaafāfe xanīfōfōfāfe noko kexesharakaxō noko ĩkisharamisfo Niospa meka noko tāpimanaifono nō atoki inimakī nō aicho fatiro. Askatari nō ato ināsharatiro nā afara yopaifo keskara finōfo. <sup>18</sup> Moisés kenekī yoikī iskafani: “A ato yonomanaito ato yonomakī kopifatiro.” Askatari keneni yoikī fakkaki keparanāikai. Moisés keneni yoikī iskafakī: “Oa fakka keskara nō yonomanaino trigo āfe xaka chona chona a fōfāsafatiro nō renexitiroma piifōfāsafanōfo. Askatari a noko tāpimasharamis nō kopifatiro afaa yopayamanō. Nāskafakī nō yoitiro akiki inimasharakī,” ixō yoikī keneni.

<sup>19</sup> A yora fistichi Nios Ifofamisto xanīfoōnoa mia yoiaito, chanīmara fayamafe. Akka feronāfake rafe iyamai trespa a afara chakafaito ōikaxō, mia yoiaifāfe mī ato nikatiro.

<sup>20</sup> Askaito nikakī a Jesús Ifofamisfāferi ichanākaxō yoitirofo iskafakī: “A mī chakafaa keskafakī anā askafayamafe. Nā mī chaka shināi, Jesús yoife na afarafo mī chakafakī fetsai, mī yoiaito nikakī Jesús mia chaka soaxonō.” Mī askafaito ōikani fetsafo rāfitirofo. Askaxō afaa chakafapaitirofoma rāfikaspakakī.

<sup>21</sup> Epa Nios feta Jesucristo āfe ājirifāfe mia ōikani. Nāskakē na ē mia yoiai anori askafafe. A afara chakafamisfāfe āto ferotaifi yoife. Mī kaifofa yafi mī kaifofoma ōikī, nāskarafāfe āto chaka xatenōfo ato yoife. <sup>22</sup> Ōisharata ato katofe Niospa meka ato yoimis. A kaa fisti ato katoyamafe. Ato ōisharayofe taefakī. Mī ōisharaxoma ato ifitiroma. Mī askara ifikē chipo afara chakafaira ixō, fetsafāfe mia mekafakī chakafatirofo. Nāskakē shināsharafāi ife, Timoteo. Afaa chakafayamafe.

<sup>23</sup> Timoteo, mĩ xāki pāemiski faka fisti ayakima uva ene pāepishta ayafe sharaxikĩ.

<sup>24</sup> Atiri yorafāfe afara chakafaito nō ōitiro xafakĩakōi. Akka atirifāferi afara chakafaifāferi nō ōitiro. Mā askafimisfono chipo nō tãpixii Niospa kãimanaino. <sup>25</sup> Nãskarifikĩ atirifāfe shara faifāfe nō ōitiro xafakĩakōi. Askatari fetsafāferi afara shara faifāfe nō ōitiro. Mā askafamisfono chipo nō tãpixii Niospa xafakĩakōi kãimakē afo.

## 6

<sup>1</sup> A ato yonoxomisfāfe Jesús Ifofamisfāfe āto xanĩfo shināfāi yonosharaxotirofo. Askakaxō tsōa chakafakĩ mekafatiroma āto xanĩfo. Akka āto xanĩfo yonosharaxokima chakafakĩ mekafaifāfe fetsafāfe ato iskafatirofo: “Kee, na Nios Ifofamisto yonokĩ finasharaima.” Nãskarifikĩ Niosri chakafakĩ yoi. Niospa mekari chakafakĩ yoi. <sup>2</sup> Āfe xanĩfāfe Jesús Ifofamiskē a yonoxomistori Jesús Ifofaxō askarato āfe xanĩfo noikĩ shināfāi yonosharaxotiro, akiki xanikima aō noisharakōita afe nanea ōitsakōi ixō shināsharakōitiro āfe xanĩfo.

Timoteo, nã ē mia yoiāi anori Jesús Ifofamisfo tãpimasharafe. <sup>3-4</sup> Nōko Ifo Jesucristo āfe meka fãsharakōi. Jesús meka nikax oa Nios keskara nō shara itiro. Akka a yora fētsa noko anorima yoitiro, āa shināxō. “Ēfi fãsi tãpifinakōiakĩ, ea keskarakai tsoama,” ixō āa yoi askara yōra afaa tãpiamafiax. Āa chanĩ askamis. Askara yora ato fe feratenātiro. Askakĩ meka shara yoitiro. Āa kakapaimis askara yōrari āa shinātiro: “Ea tsōa finōyamanōra,” ixō āa shinātiro. Askara feronāfākekai Niospa meka ato yoisharatiroma. Askaito ōi kakĩ feratetirofo, meepaitirofo, nikakaspaitirofo, ĩchatirofo, noikaspaitirofo, “Noko chakafaira,” ixō shinātirofo. <sup>5</sup> Akka a feratenāmisfāfe anorima fisti shināmisfo. Mā Nios shināyopaofinixakakĩ anā shināsharatirofoma. Anā ato yoisharatirofoma mēstekōi. Afāfe shināfo: “Nō Nios Ifofakatsaxakĩ nō kori ichapaya itiro,” ixō shināmisfo anori Niospa yoiamafiano. Akka fētsa shināi iskatiro: “Ēri a keskara shara ipai,” ixō shinātiro. <sup>6</sup> Akka anori shinātamaroko nō afaamaisfixō nō Nios Ifofaax, nō inimasharakōitiro. <sup>7</sup> Na nō fake kãiyaitĩa nō afaaya pakenima. Nãskairi a nō naitĩa nōkai afaaya katiroma. <sup>8</sup> A nō piāi yafi a nō rapatiyax nō inimatiro, afaa anā ichapafo fichipaitama. <sup>9</sup> Akka atiri yorafo rapati ichapaya ipaimisfāfe nonori shinākani iskamisfo: “Afara ē fipaikĩ ē fitiro, nãskax ē inimatiro,” ixō anori fisti shinātiro. Fētsa kori fisti fichipai samama shināchakatiro, afara chakafo fetsa fetsatapafo fichipaitiro. Kori ichapa fipaikĩ afeskaxoma askarato chaka shināfafāini. Askara naax, a omiskōipakenakafo mēra

katiro. <sup>10</sup> Nāskakī kori fisti noi, Niospa meka shinātama afara chakafafa fafafaīni kori fixikī. Nāskafakī Nios kachikiri famisfo. Askara yorafo āto shinā mēraxō shinākani omiskōikanax anā inimasharatirofoma.

*Pablo yoini afe keskaramāki Nios Ifofaax nō kerexkai ikai*

<sup>11</sup> Timoteo, Niospa mia katoa. Kori yafi rapati shināyamafe. Nios Ifofasharafe a keskara ixiki, afaa chakafamisma ixiki, Jesús meka chanīmara fakōixiki. Askaxō mī yorafo noimiskōi ixiki, Niospa meka Ifofakī, akka mī yorafo yoikī oitsifafāi yoisharafe. <sup>12</sup> Mia yora ichapafāfe ōiaifono mī ato yoimis: “Jesús ea nāxoni ēfe chaka ea soaxoxiki. Nā Jesús ēfe Ifo. Ē fāsi inimai,” ixō mī yoisharani. Akka anā shināmakiyamafe. Jesús mia nāxoniki nō afe nīpaxanō. Nā fistiōnoa shināfe. Satanás mia chaka shināmapaiyaito nikayamafe. <sup>13</sup> Ea nikasharafe Niospa keyokōi noko onifani noko nimaxiki. Jesucristo nā xanīfo Poncio Pilato yoini: “Ēfi Niospa Fakekōi,” ixō ratekima yoini. Iskaratīa Nios feta Jesús mia ōi. <sup>14</sup> Nāskakē Jesús meka nikasharafe. Afara ē mia yoiai keskara afe, mī askaito ōikī fetsafāfe, “Timoteo chakafamisra,” ixō yoinōfoma. Nāskara afe nōko Ifo Jesucristo nokoaitīa. <sup>15</sup> Nios fistichi Jesús nokoaitīa tāpiakī āa nīchixiki. Ares afara apaikī atiroki. Afi xanīfo efapakōiki xanīfo fētsa finōtiroma. Nā nōko Ifo efapakōi fato xanīfo fētsa finōtiroma. <sup>16</sup> Akka tsōa onifanima, aakōi ares ika. Nāskax nanakama. A chaxasharai mēra ika tsoa akiki nokotiroma. Askatari tsōa ōimisma, tsōa ōitiroma. Nāskakē keyokōichi nō aōnoa yoisharatiro: “Nios fisti sharafinakōia. Nā fistichi afara sharafo ares atiroki,” ixō yoipakenakafo. Askapainō.

<sup>17</sup> A kori ichapayafato ato yoife: “Ē kori ichapayaki tsoa ea keskarama,” ixō anori shināyamakāfe. Māto koriōnoax inimamis iyamakāfe. Askatari māto kori mato afeskafatiroma, keyotiro samama. Askatamaroko Nios fisti shinākāfe. A nō afara fipaiyai noko ināi noko fīshkoima. <sup>18</sup> Nāskakē māto korioxō fetsafo aō noisharakāfe. Fishkomītsayamakāfe. Afaa-maisfo ato inākāfe. Fishkoyamakāfe. Inākōikāfe. <sup>19</sup> Akka mā ato ināsharaito ōi Nios matoki inimai. Mato afara fāsi shara faxōi mā Nios ari nokoaitīa. Iskaratīa mā fetsafo ināsharai keskari fakī, Niospari chipo mato ināsharaxii kiki. Nāskax mā Niosnoax isharapakexatiro,” ixō ato yoife.

*Pablo mā mekai xatekī, “Timoteo, mī isharaxō ato yoi sharafe,” ixō kirika kene manamani*

<sup>20</sup> Nāskakē Timoteo, Niospa āfe meka shara mia tāpimani fetsafori mī ato yoinō. Nāskakē tāpisharayofe, āfe meka tāpisharaxō fetsafo mēstekōi tāpimaxii. Akka fetsafāfe Niospa

meka anorima yoimisfo. Aa ranã yoinõnãkakĩ kaxpakõi yoimisfo. Nãfãfe yoimisfo nõ tãpikõiara ifiakaxõ tãpiafoma. Nãskakẽ ato fe rafeyamafe. <sup>21</sup> Nãskakẽ nikayamafe. Fetsafãfe nãfo nikakanax ifofakaxõ Niospa meka kachikiri fakanax, nãfo fenoafo. Afianã chanĩmara faafoma.

Nõko Ifofãfe mato noikĩ mato kexesharanõ. Nã tii.

*Ĕkĩa Pablo.*

## Pablo Timoteo Afianã Kirika Kenexõ Fomani

### *Pablo Timoteo yoisharani*

<sup>1</sup> Ēkĭa Pablo ě mia kirika kenexõ fomai. Epa Niospa fichipaiyai keskafakĭ Cristo Jesús ea katonĭ aõnoa afe meka shara ě yoifofãsafanõ. Ea yoini iskafakĭ: “Keyokõĭ yorafo yoife iskafakĭ: ‘Jesucristo matoõnoax nãxoni mãto chaka mato soaxoxiki nã chanĩmara faafo tii afe nĩpaxanõfo,’ ixõ ato yoife nã ě mia yoiai keskafafe,” ixõ Jesús ea yoini. <sup>2</sup> Timoteoshta, ě mĩo noikĭ ě mia kirika kenexõ fomai mĩ tãpinõ. Epa Nios nõko Ifo Cristo Jesús feta mia noikĭ mia shara famanõfo. Askatari mĩ shinã mēra mia shinãmasharakõinõfo mĩ õiti fekaxtenõma.

### *Ato Jesúsnoa yoisharafe*

<sup>3</sup> A ěfe xinifãfe Epa Nios yonoxosharapaonifo keskari fakĭ, ěri a yonoxosharai. Ē mēraxõ ě afaa shinãchakayamafai ě yonoxosharai. Nãskakē ě mia Nios kĭfixõfafãini aicho fakĭ. Pena tii yafi fakish tii ě mia Nios kĭfixõfafãini. <sup>4</sup> Nãskakē mē oaino, mĩ ea shinãĭ oiaito ě mia õiferani. Nãskakē ě anã mia õisharapai, mia õi ě inimasharakõixiki. <sup>5</sup> Taefakĭkõĭ mĩ chichi Loida Jesús Ifofani. Askata mĩ efa Euniceri Jesús Ifofani. Afãfe Ifofasharakõimisfo keskafakĭ, mĩri Ifofasharai. Mē mia tãpia mĩ Ifofasharakõiaito nãskakē ě mia yoi.

<sup>6</sup> Anã shinãmakiyamafe ě mia mãmãxõ ě mia Nios kĭfixoni. Nãskakē Niospa mia katonĭ Jesús yoimis mĩ inõ. Mã chii nokakē nõ anã xofisa fatiro anã xofisanõ. Nãskarifiakĭ mĩ anã yorafo ato yoipaima mã mĩ xokenãifinaxõ askara meekĭ mĩ Nios kĭfitiro anã mia õiti fepeaxosharanõ, mĩ anã ato yoisharanõ inimayanã a mĩ taefakĭ ato yoini keskafakĭ. <sup>7</sup> Nãskakē Niospa Yõshi Sharapa noko yorafoki mesematama. Aõxõ afama mĩshti noko amatiro. Askatari noko ato noimasharai. Aõxori noko shinãmasharatiro anã nõ chakafanõma. <sup>8</sup> Askafai rãfiyamafe Jesúsnoa yorafo yoitaifãfe rãfikima. Askatari eõri rãfiyamafe. Ē Jesucristo ato yoirifaifo ea karaxa mēra iki-matifoki. Mĩri Jesús ato tãpimasharafe; mĩ askaito, mi-ari omiskõimanaifono rateyamafe. Jesúsnoax mĩ omiskõiaito, Niospa mia axoxii. <sup>9</sup> Akka Niospa afe Fake Cristo Jesús noko nĩchixoni nokoõnoax nãxoyonõ nõko chaka noko soaxoxiki. Askaxõ noko shinãni afe yora nõ inõ. Nõ yora chakafõfikē Niospa noko noimis. Taefakĭkõĭ Niospa mai onifaxoma, a inõpokoai tãpixõ, noko shinãni noko ifixixakĭ Jesúsxõ. <sup>10</sup> Jesús noko ano oamatai Niospa noko ifipaiyai anori nõ tãpipaonima. Akka rama iskaratĩa mã nõ tãpia noko ifimis

Jesucristo noko nāxoni. Nāskax iskaratīari nō nai, nō rateima omiskōipakenakafo mēra nō kairoko. Nō Nios ari kaax anā nō naxima. Jesús noko chaka soaxonano nō Nios ari nīpanaka. Mā iskaratīa nō tāpia Jesús noko nāxoni nō chiifā mēra kanōma noko ifiano.

<sup>11</sup> Niospa ea katonu na meka shara Cristoōnoa yora fetsafo ē ato tāpimanō. <sup>12</sup> Nāskakē ē karaxa mēranoax Cristoōnoax omiskōifi ē rāfima. Ē Jesús tāpikōiax chanīmara fayana. Jesús ēfe chaka taefakī ea soaxonitīa ē Epa Nios iskafakī yoini: “Epa Niosi, ea kexesharapakexafe Jesús afianā oaitīa,” ixō ē yoini keskara ea axoxii ē chanīmara fakōini.

<sup>13</sup> Na ē Cristo Jesúsnoa mia chanīmakōi tāpimana shināmakiyamafe. Ē mia mēstekōi tāpimana keskafakī, nāskari fakī ato tāpimafe. Cristo Jesús chanīmara fakī afe rafekī aōxō yorafo noife mī afe rafeakī. <sup>14</sup> Nā ē mia yoia keskara mī mēraxō shināfe, shināmakixikima. Āfe Yōshi Shara mī mēra ikano mefeta aki. Ōifāi, Niospa mia yoia keskafakī kachikiri fayamafe.

<sup>15</sup> Mā mī tāpia keyokōichi chanīmara faafo Asia mai anoafāfe ea ōifainafo. Askatari ato feta Figelo feta Hermógenesri ea ōifainafo ato fe fokākī. <sup>16-17</sup> Akka Onesíforokai askanima, eō rāfinima ē karaxa mēra ikikē. Nāafi Roma ano nokoxō pena tii ea fenafafākī ea karaxa mēranoa fichita, ea ōiyoi nā otitaiapaoni mēxotaima ea ōifaa ōifakī, ea pishta inimanu. Nāskakē nōko Ifāfe Onesíforo āfe āfinō āfe fakefonō Efeso anoxō ato noikī ato kexesharaxonō. <sup>18</sup> Onesíforo Efeso anoxori ea yonosharaxopaoni, mīfi a ōixō tāpisharakī. Jesucristo anā fotoxō noko ichanāfaxō Onesíforoki inimakōikī noikī axosharaino ē askara fichipai.

## 2

*Nō Jesús Ifofakī oa soraronō āfe xanīfo nikakōiai keskafakī nōri Nios nikasharakōitiro*

<sup>1</sup> Timoteoshta, Jesucristo āfe kerex sharaōnoax isharafe, afaa chakafaxima. <sup>2</sup> Ē yorafo Jesúsnoa yoiaito mīri ea nikafafāini. Nāskarifiāi mī ato chanīmara fasharatiro. Nāskaxō a feronāfakefāfe a shinā sharaifo ifife mī ato tāpimaxikī afāferi fetsafo tāpimanōfo.

<sup>3-4</sup> Akka soraro ōiti sharayato omiskōifikī tenetiro. Āfe pexe shināyamata āfe xanīfo fisti ifofaxō nikasharakōi. A afara yonoai keskara āfe xanīfāfe yonomanaino soraro sharapa yonosharatiro. Nāskarifikī Niospa mia yonomapaiyai keskari fakī yonosharaxōfe fanīrira fetsa shinākima. Jesúsnoax omiskōifi meseyamafe. <sup>5</sup> Askatari fetsafo xonōnōnāxikakī ĩkisi itipinīsharatirofo xonōnōnāpaikani. Askatari mīri shināsharafai Niospa mia yoiaito nikasharakōife. Akka mī



nikasharayamaito Niospa mia, “Aicho, mĩ fãsi sharakõï,” ixokai mia yoitiro. <sup>6</sup> Askatari feronãfãke yonosharamiskõï ãfe tare efafaxõ, ïkisi ãfe yono fitiro pixikĩ. Nãskarifiakĩ mĩri Jesúsnoa yonoxosharamis Jesús mikiki inimakõinõ mia afara shara inãxii. <sup>7</sup> Ë mia yoiai keskara shinãsharafe. Nõko Ifãfe mato tãpimasharai kiki.

<sup>8</sup> Nãskakẽ shinãmakiyamafe Jesucristo naafiakẽ anã Niospa otofani noko ifimis inõ. Nã David ãfe fena. Nãnori nã meka shara ã yoifafãimis. <sup>9</sup> Nã ã yoifiaito, yorafãfe Jesús Ifofaafoma õitifishkikakĩ. Ë Niospa mekasharaõnoa yoiaino ekeki õitifishkikakĩ ea karaxa mẽra ikimanafo. Ë afaa chakafayamafiakẽ ã feronãfake chaka keskarakẽ ea karaxa mẽra ikimanafo. Ea ikimafianifono Niospa meka Jesucristoõnoa ã enetiroma. <sup>10</sup> Nãskakẽ ã atoõnoax omiskõifikĩ ã tenekõï a Jesús Ifofaafo tii ã ato tãpimani chanĩmara fanõfo, Nios fe ïpaxakakĩ.

<sup>11</sup> Na meka sharakõï nikafe:

Nõ Jesúsnoax nakĩ nõ chanĩmara faax nõ afe ïpanaka.

<sup>12</sup> Askatari nõ Jesúsnoax omiskõifikĩ nõ tenei, nõ Jesús fe Epa Nios ariax xanĩfo ïpanakakĩ. Akka nõ Jesús potakĩ, “Niospa fakemara,” ixõ nõ askafaito Jesús noko yoitiro iskafakĩ: “Mã ea Niospa Fakemara faito ãri mato kopitiro iskafakĩ: Mĩ ãfe fakema,” fakĩ noko fatiro. <sup>13</sup> Askatari nõ Jesús nikayamai nõ isharayamafimisno, akka akai askarama, aroko isharakõïmis. Aatokai afaa chanĩ yoimisma, ãfe meka chanĩmakõï. Aakai õiti ranãyama.

*Afe keskara a Niospa meka yoimis shara itiromẽ Nios akiki inimanõ*

<sup>14</sup> Na ã mia yoiai anori, mefe yorafo ichanãmisfo ato shinãma fafãife. Niospa mia xafakĩa õiaino ato yoife Niospa mekaõnoa feratenãnfõfoma, feratenãkani aõnoax mekanõfoma. Akka fatotokai yoisharaimãkai fatotori yoisharaimamãkai ikaxõ tsõa tãpitiroma tãpipai kakĩ. Anorima nika kakĩ tsõa tãpitiroma. Askakani fanĩrira mekamisfo ãa chanĩkani.

<sup>15</sup> Timoteo, Niospa meka pena tii õife. Askafaxõ Niospa meka tãpisharaxõ yorafo mẽstekõï ato tãpimafafãife. Mĩ askaito Niospa mĩõnoa yoitiro iskafakĩ: “Na ea yonoxosharamis, ã akiki inimasharakõï,” ixõ mĩõnoa yoixiki. Mia askafainokai mĩ aõ rãfitiroma. <sup>16</sup> A feratenãmisfo ãto meka nikayamafe. Nõ ãto meka nikaxõ meka mẽstekõï Jesúsnoa nõ nikapaitiroma. Askaxõ anã nõ Nios Ifofapaitiroma. Chakakõï itiro. <sup>17</sup> Oa yora faraxiki finaxõ, koofi payokometiro keskafakĩ, a yõra anorima yoikĩ yorafo ãto õiti chakana fatiro. Himeneo feta Fileto askara chakakõï ato yoimisfo. <sup>18</sup> A Jesús oaitã a namisfo anã otokiaifo mã nõ tãpifekẽ, a feronãfake rafeta Himeneo feta Fileto anorima mato yoimisfo. Akka nõ tãpia mã Jesús

anã fotoaino Epa Niospa nã namisfo otofaxii. Akka nã rafeta mato pãramisfo ãa chanĩkakĩ. Iskara mato yoimisfo: “Mã finõa a mato yoimisfo keskara. A Niospa namisfo mã ato otofaa,” ixõ a refeta yoimis. Afãfe nã meka nikaxõ shinãkĩ iskafatirofo: “Ooa. Mã nõ nakẽ Niospa noko anã otofaima,” ixõ anorima shinãtirofo. Anori shinãkani Jesús shinãmakitirofo. <sup>19</sup> Akka Niospa meka chanĩmakõi. Tokirinĩfakai tsõa rafetiroma. Niospa meka nãskarari. Tsõakai ãfe meka fet-safatiroma. A chanĩma, nã yoimis keskara nãskarakõi. Tokirinĩfakĩ yõra keneakai tsõa soatiroma. Nãskarifiakĩ Niospa meka kenenifo iskafakĩ: “Nõko Ifãfe afe yorafo tãpikõia.” Nãskakaxõ, “Afe yorafãfe a afara chakafamisfo keskara potatirofo,” ixõ kenenifo.

<sup>20</sup> Feronãfãke ãfe pexe efapa sharakõi faxõ a mẽra kecho sharakõifo faa, askaxõ a kecho sharafo mẽra afara sharafo fatiro. Akka a kecho chakafo mẽra afara chakafori fatiro. <sup>21</sup> Mã mĩ chaka mĩ xatekõiax, nã fẽta xinikĩ afara chaka potatiro keskara itamaroko. Nã sapa choka keskara sharakõi mĩ itiro. Nãskax Jesús keskara shara mĩ ikaino Epa Niospa mia yonomapaiyai keskara mĩ aõxõ afara sharafo faxotiro.

<sup>22</sup> A naetapafãfe afara chakafo shinãkĩ nã apaiyai keskara faifono mĩri askayamafe. Anori shinãtamaroko Niospa fichipaiyai keskara shinãfe, Jesús chanĩmara fafãi, yorafo noikĩ, fetsafãferi shinãsharakõiaifono, Jesús Ifofaifo ato fe mẽstekõi isharakõife. <sup>23</sup> Anã ẽ mia yoinõ, ea nikasharafe. A feratenãifo ato nikayamafe. Ato fe feratenãpaiyamafe. Askara yorafo samama õitifishkitirofoki. <sup>24</sup> Niospa meka yoimisto tsoa feratetiroma. Anori askatamaroko keyokõi yorafo ato noisharafãi, ato tãpimasharatiro, tenekõisharata ato yoitiro. <sup>25</sup> Fẽtsa Niospa mekakõi nikakaspakĩ meka anorima fisti shinãito, fenãmãshta ato tãpimasharafe. Mĩ ato askafaino ãto chaka xatetiromo Niospa mefeta akaino. Askaxõ Jesús chanĩmara fakõinõfo. <sup>26</sup> Nãskafakĩ anã Niosnoa shinãsharanõfo. Oa tarapa mẽra ikia keskara Satanás ato fapai kiki. Nãskaxõ ato amapaiyai keskafakĩ ato yonofafãini. Akka mia nikaxõ Jesús ato ifitiro. Nãskaifono Satanás afianã ato afara yonomatiroma. Afianã tarapa mẽra ikia keskara ikanima.

### 3

#### *Afeskakanimãkai yorafo na mai keyoaino*

<sup>1</sup> Timoteo, õisharafe. Ẽ mia yoi Jesús chaima oaino fekaxkõi ixii kiki. <sup>2</sup> Fetsa noitama ãakõi kexemei, askatari fẽtsa ãfe kori fisti shinãfãi, ãakõi anofi inimamis ikãi, Niosnoa chaka yoimis

ikāi, askaxō āto apa yafi āto afa nikakaspamisfo ikāi, yonox-  
ofiaifāfe aichora ato famisfoma ikāi, ato noikaspamisfo, Nios-  
noa shinātama chakakōi fistis shināmisfo, <sup>3</sup> afe yorakōi noiya-  
mafāi, fetsafo noiyamata axokaspafāi, fetsafo āa pāramis  
ikāi, āa apaiyai keskafakī enemisma ikāi, mitsisipakōi ikāi,  
afara mīshti sharafo noiyamafāi, <sup>4</sup> askata a afe rafeafo ato  
chakafafāi, samama ōitifishkimis ikāi, “Ēkai tsoa keskarama,”  
ixō yoifāi, Nios noitama afara chaka fisti fakī ato inimama-  
paimiskōi ipaikani. <sup>5</sup> Askata a Nios Ifofafo ichanāifono ato fe  
ichanākaxō Niospa meka nikafikaxō shināsharakanima. “Nōri  
Nios Ifofai,” ixō āa mato pārakani. Askax āa chanīmisfo Nios  
Ifofayamafiakanax.

Askaifāfe ōi ato fe rafeyamafe. <sup>6</sup> Askara yorafāfe a fofāsakakī  
ato pāratirofo a kēro tāpisharamisfoma fanīrira ato yoimisfo ato  
anorima yoiaifāfe. Atirifāfe noko yoikōikanira ato famisfo.  
Nāskakē a xotofakefāfe noko yoikōikanira ikaxō a yoiaifo anori  
ato nikataifafo. Nāskakē a kērofāfe āa shinākani iskakakī: “Nō  
fāsi chakakakainaito, noko tāpimasharanōfora,” ixō shinākani  
anorima āto shinā mēraxō shinākaxō nāskai fekaxtetitaiāfo.  
<sup>7</sup> Nāskaxō a ato yoimis fētsari ato yoiaito, nikatai fakaxō  
Niospa meka sharakōi tsōa mēstekōi tāpinakafoma. A rama  
ikai fētsari yoiaito, nikakākiri aōxō tāpisharapaifakakī, tsōa  
tāpinakama Niospa mekakōi. <sup>8-9</sup> ĴMā mī shināimē anori aakōi  
Egipto anoa xanīfāfe Faraón israelifo ato yonomapaoni, mese-  
maxō? Askaito ōikī Niospa Moisés nīchini afe yorafo is-  
raelifo mai fetsa ari ato iyotanō. Ato askafaito Faraón ato  
nīchikaspani. Askaino a feronāfake rafe ano mokaya inifo; fētsa  
ane Janes ikaino fētsa aneri Jambres ini, nā rafe Faraón fe  
rafefo ini. A rafe Moiséski ōitifishkinifo. Nāskaxō āto xanīfo  
Faraón āa pāranifo ato Moisés nikanōma. Askafaifāfe ōikī chipo  
āto xanīfāfe tāpini Moisés a feronāfake mokaya rafe finōkōia  
ini. Mokayafiakaxō afaa tāpiama inifo. Nā rafeta Faraón  
yoinifo Moisés nikanōma. Nāskafakīri fetsafāfe Niospa meka  
mēstekōi ato nikamakaspakani. Nāskakaxō Niospa meka  
mēstekōi tsōa yoima āto shināmā anorima shinākani. Oa Janes  
feta Jambres āto xanīfo anorima yoiaifono āto xanīfāfe ato  
tāpini keskafakī. Nāskafakīri na iskaratīa na anorima yoimisfo  
āa chanīaifāfe nō ato tāpixii afāfe afaa tāpiafoma.

### *Mā Pablo mekai xatekī Timoteo yoisharani*

<sup>10</sup> Timoteo, mā mī ea ōisharakōimiskī ē ato afo tāpimanaito.  
Mā mī ea ōimiskī afeskax ē isharamāmai, Nios fisti inimama-  
paifāi, Jesús noikī chanīmara fafāi, afarafo chakafo nokoaito  
ē tenefāi, ē yorafo noifāi, <sup>11</sup> a yora chakafāfe ea Jesúsxō  
chakafaifāfe ē tenefāi, askai ē omiskōimis. Mā mī tāpia ē  
afo tenemis. Askatari mā mī tāpia a Antioquía anoa ita,

Iconio anoa ita, a Listra anoxō ea chakafafiaifāfe ē teneni. Nāskakē nā chakafoōxō nōko Ifo Nios ea kexesharamis ē tene-sharakōimis inō. <sup>12</sup> Na ē mia yoiai anori chanīma. Nō Cristo Jesús fe rafesharapaiyaito a Jesús noikaspamisfāfe noko omiskōimaxii. <sup>13</sup> A yora chakafāfe āa ato pārakani. Askatari chipo ato pārakī finakōixikani. Nāskakē afara chakafakī ato pāraifāfe ōikī Satanāsri ato pāraxii.

<sup>14</sup> Nāskakē Timoteo, na meka Jesúsnoa mī tāpisharai. A mia tāpimanafo mā mī tāpikōia. Nāskakē mī tāpisharakōi. Anori meka chanīmara fafe, shināmakikima. <sup>15</sup> ¿Mā mī shināimē yomepishtaxō mī Niospa meka tāpiakī? A mekaōnoa mī shināsharamiskī Cristo Jesús chanīmara faax nō afe isharpakenaka. <sup>16</sup> Niospa ato shināmanaino feronāfakefāfe kirika ato kenexonifo Niospa meka ato tāpimaxiakī. Fetsafāfe afara chakafaifono, nō ato Niospa meka tāpimasharatiro anā askayamanōfo. Askatari nō isharpakōikī nō Niospa meka ōikī nō tāpitiro afeska faxō nō Jesús Ifofasharatiromākī. <sup>17</sup> Akka Nios Ifofamisfāfe āfe meka nikasharakōikaxō, Nios yonoxosharakōitirofo.

## 4

<sup>1</sup> Timoteo, ē mia kaxeta yoima, nikafe. Jesús oatīa nōko xanīfokōi ixii Apa Nios feta, keyokōi yorafo namisfo yafi nifori ato yoixii. Jesús chanīmara fakanax afe nai mēra nisharapakenakafo; akka a chanīmara famisfoma chiifā mēra Niospa ato potai omiskōipakexanōfo. Nāskakē āfe Fake Jesucristo feta Niospa noko ōiaino ē mia yoi iskakakī: <sup>2</sup> Niospa meka fena fenakima ato yoife fenāmāshta shara. A nikapaiyaifo askatari a nikakaspaifori ato yoisharafe, mī ato yoisharaino āto chaka xatenōfo Jesús Ifofasharax isharanōfo. Shināsharata, Niospa meka mēstekōi yoife. <sup>3</sup> A yora chakafamai nokoaino yorafāfe Niospa mekakōi nikakaspatirofo. A nikatamaroko meka fetsafo shinātirofo, nā apaiyai keskakakī. Anori fisti shinākani. Nāskakanax ano fisti ichanākaxō anorima a fetsafāferi yoiaito nikakakī. <sup>4</sup> A Niospa mekakōi nikakaspakani a āto xinifāfe shināpaonifo keskari fakakī. <sup>5</sup> Nāskakē Timoteo, ōisharafe. Afara afeskaraito Niospa mekakōi Ifofasharafe; mī shināfenotama anori tāpisharafe. Mia omiskōimanaifono tenefe. Kafākakaikī yorafo Jesúsnoa tāpimafe Ifofanōfo. Nā mia Niospa yoiai keskakafe shināfāi.

<sup>6</sup> Iskaratīa eōnoa ē mia yoi. Anā ē samarakaima mē chaima nai ea Jesúsxō retexikani. <sup>7</sup> Mē yonosharakōitiani ēfe Ifo Jesúsxō. Ē chanīmara fatitaifaa enekima. Keyokōi Niospa ea yoiai keskara mē aka. <sup>8</sup> Nōko Ifokōichi ea ōimis ē Ifofasharakōiaito. Nāskakē ē akiki nokoaito ea afarafo ināsharaxii.

Eres fisti ě fixiima. Nã nõko Xanĩfo finakõia oaitĩa keyokõi nã Ifofaafãferi fixikani. Aõ noikĩ a manaifori ato inãsharaxii.

*Pablonõ Timoteo fisti yoini kirika kenexokĩ*

<sup>9</sup> Timoteo, ea ano orisape. <sup>10</sup> Demãs afarafo fichipaikĩ ea nonoa õifaiti, Tesalónica ano kakĩ. Askatari Crescenteri kati Galacia ano. Askatari Titori Dalmacia ano kati. <sup>11</sup> Akka na Lucas fisti efe ika. Nãskakẽ Marcos ea efexõfe ea axosharayonõ Niospa meka ato yoikĩ. <sup>12</sup> Akka ě Tíquico Efeso ano nĩchiyamea ěa. <sup>13</sup> Mĩ oaitĩa ea ěfe rakoti fexõfe a Troas ano ě faferati a Carpo pexe ano. Askata ěfe kirikari ea fẽxota, askatari kirika fetsari ea fẽxota a fakka fichisharakõi ě akiki kenemis, aari ea fexõfe. Ě afo fichipaikai.

<sup>14</sup> Na yami famis Alejandro ea fãsi mekafamis. Aato ea chakafaito õikĩ Niospa kopikiri omiskõimaxii. <sup>15</sup> Õisharafe. Alejandro miari chakafatiroki na meka shara Jesúsnoa nõ yoiaito noko meka xatemapai kiki.

<sup>16</sup> Akka ea taefakĩ xanĩfo ano iyonifo tsõakai eõnoa yoisharanima. Akka keyokõichi ea õifainifo fõkakĩ. Askafiaifono ě Nios iskafakĩ yoini: “Epa, na ea nonoa õifainaifo ato chakafayamafe,” ixõ ě Nios yoyamea. <sup>17</sup> Ea askafafiaifono ěfe Ifãfe Jesús ea potayameama, ea kexexõ. Ea askafaifono ě ratetima ěfe Ifãfe ea kexeano ģfe kerex ea inãno ě ato yoinõ. A judeofomafãfe ea yõkaifãfe keyokõi nikanõfo ě Niospa meka Jesúsnoa ato yoyamea. Ě askaito ea retepaikakĩ, oa poomãnã noko pipaiyai keskara ea fatifo ea retepaikakĩ. Ea askafafiaifono ea Niospa kexesharayamea ea tsõa retenõma. <sup>18</sup> Afara chakafo ekeki nokoaito õikĩ ěfe Ifãfe ea kexetaifa a ě akiki nai mẽra nokoaitĩa. Fãsi nõko Nios sharakõi, tsoa fẽtsakai askafatiroma. Nãskakẽ tsõa nõko Nios finõtiroma. Ares fisti sharafinakõia. Nõ aõnoa yoisharapakexanõ. Nãskapakexapainõ.

*Pablo mã mekai xatekĩ ato meka shara fomani*

<sup>19</sup> Timoteoshta, ea Prisca yafi Aquila ea yoixõfe, keyokõi yorafo Onesíforo pexe ano ikafori ea yoixõfe. <sup>20</sup> Erasto Corinto ano nẽteyamea. Trófimo isinĩ ikĩ rakakẽ ě Mileto ano rataferayamea. <sup>21</sup> Nã mechaka ikamano ekeki ofe. Eubulonõ, Pudentenõ, Linõnõ, Claudianõ, keyokõichi Jesús chanĩmara faafãfe mato yoisharapaikani.

<sup>22</sup> Nõko Ifo Jesucristo mefe ipaxanõ. Askatari Niospa mato noikõikĩ mato kexesharakõinõ keyokõi. Nã tii ě mato yoi.

*Ěkĩa Pablo*

## Pablo Tito Kirika Kenexō Fomani

### *Pablo Tito yoisharani*

<sup>1</sup> Tito, ě mia kirika kenexō fomai. Ěfi Pabluki, Niosfi ěfe Ifokōiki. Nā ea yoiai keskamis ě. Jesucristo ea nīchia ě aōnoa yoimis inō, nā Niospa katoa yorafo ě ato tāpimanō afafe Jesús chanīmara fanōfo. <sup>2</sup> Niospa mai onifatama shinākī iskafani: “Na yorafo ě ato katoano efe rafeaifono ě ato ĩkikōipakenaka efe ĩpaxanōfo,” ixō shināni. Nāskakē nō Nios Ifofapaikī nā yoiai keskara nō chanīmara fatiro. Nios ramashara chanīmisma. <sup>3</sup> Aatofi noko tāpimapaiyaitīa āfe meka shara noko tāpimani. Nāskakē iskaratīa ea nīchia ě ato āfe meka shara yoinō eōxō tāpinōfo. Nā Nios noko ifimis nō afe ĩpaxanō. <sup>4</sup> Tito, ě mia kirika kenexō fomai. Mīfi ěfe fake keskarakōikī, eōxomāi mī Nios chanīmara fakē. Epa Nios mī Ifofakē mia imasharakōipakenaka mia noikī mia shināsharamani. Nōko Ifo Jesucristori mia askafai.

### *Pablo Tito Creta ano nīchiferani ato tāpimanō*

<sup>5</sup> Tito, ě mia nīchiferati Creta ano a nō yonofai mitoxoma mī chipo mitonō. Nāskakē ě mia yoiti iskafakī: “Nā pexe rasi anoafo kexemisfo katofe nā Nios Ifofafo ichanāfono ato kexenō,” ixō ě mia yoiferati. <sup>6</sup> A Nios Ifofafo kexemis katofe afaa chaka shināmisma. Āfi fistiya inō. Āfe fakefo Jesús tāpiafo inōfo, ato kemamisma inōfo, afaa chakafamisfoma inōfo āfe fakefo. <sup>7</sup> Nā Nios Ifofafo kexemis sharakōi itiro, afaa chaka shināmisma nāmāi xanīfoax. Nā keskara yora mī katotiro nā Nios Ifofafo kexemis inō. Nā Niospa shināmanai keskara inō aōnoa afaa chaka yoiyamanōfo. Askatari kakapaimis itiro. Askatari samama ōitifishki imiskai itiro. Askatari pāemis itiro. Askatari setemit-samis itiro. Askatari yora fetsa pāraxō kori fīamis itiro. <sup>8</sup> Askatamaroko isharakōixō yorafo āfe pexe nokoaito atoki inimayanā ato ifitiro. Askatari yorafo keyokōi ato afara shara axosharakōimis itiro. Askatari āa kexemesharamis itiro mēstekōi isharakōiyanā. Niospa meka nikasharakōipai afara chakafapaifikī anā akima. Nāskaxō a Niospa fichikaspaifo anā shināima. <sup>9</sup> Niospa meka nikasharaxō kachikiri fayamafāi, nā Niospa yoiai anori chanīmara faxō fetsafori yoitiro. Xafakīakōi yoitiro. Nāskaito nikai yorafo Nioski inimanōfo. Askatari anorima yoimisfori ato tāpimatiro, akairi tāpinōfo.

<sup>10</sup> Akka nā fetsafo nikayospakōimisfo Niospa meka ato yoiaifono nikakaspakōimisfo. Nāskaxō meka fetsafaxō yoimisfo āa fanīrira yoikakī nā Moisés yoini keskara fisti nō nikanōra ikaxō. Akka nā judeofo ranāri askamisfo āa chanīkani.

<sup>11</sup> Nāskakē ato xatemafe ato pāranōfoma. Kori fisti fipaikakī anorima chakakōi ato tāpimapaikani kiki. Nāskakē ranārīto atoōxō Jesús kachikiri fayomisfoki.

<sup>12</sup> A feronāfake onāyato a inōpokoai keskaraōnoa Creta anoxō yoini: “Nono ikafo, Cretafofi chanīmisfokī, nikayospafo, pikī fisti tāpiafo, yoinā keskara pitsikōifo xanikōifo,” fani. <sup>13</sup> Nā tāpiato ato yoikōini ato pāranima. Creta anoafō chakakōi ikafo. Nāskafiaifono ato yoisharafe Titopa, anā askanōfoma, Niospa yoiāi keskara nikanōfo. Nāskaxō Niospa meka chanīmara fanōfo. <sup>14</sup> Akka judeofāfe āto xinifāfe ato yoipaonifoki anorima, āa chanīkakī. Nāskakē ato yoisharafe anā ato nikanōfoma. Askatari a Niospa meka anā nikaifāfema ato yoipaiyaifono, ato yoisharafe anā ato nikanōfoma.

<sup>15</sup> Fetsafo ōiti sharayafo, māmāi Epa Niospa ato chaka xatexonano. Nāskakē afara sharafo atonā sharakōifo. Akka a ōiti chakayafāfe āto shinā mēraxō chakakōi shināmisfo. <sup>16</sup> Askafīax chanīmisfo, “Nō Nios tāpiara,” iki, tsōa Nios shināyamafi. Askara yōra Niospa meka nikakaspakī chakafai. Nāskakē nō tāpitiro askara yora Nios fe rafemisma. Askara yōra shara shināima, afaa pishta shara fatiroma, chakakōi shināi.

## 2

*“Niospa meka ato mēstekōi tāpimasharafe,” Pablo Tito fani*

<sup>1</sup> Mīfi askaramakī, Titopa, mī ato yoisharafe. Niospa meka ato mēstekōi tāpimasharafe, mia nikasharanōfo. <sup>2</sup> Askata anifo tiiri ato yoisharafe isharanōfo. “Anā pāeyamakāfe,” ato fafe. Askafaxō ato yoisharafe: “Māri isharakāfe mā askaito ōikī fetsafāfe mato ōinōfo. Afara chakafapaikī anā ayamakāfe, kexemesharakāfe. Shara shināi ikāfe. Māto ōitinī Nios shinākī kachikiri fayamakāfe. Askata māri yorafo fe rafesharakāfe. Ato noikāfe. Māto afara afeskaraito shināchakayamakāfe, a finōmataroko Nios yoikāfe.” Nāskaxō anori ato tāpimasharafe, Titopa. <sup>3</sup> Askatari a yōxafo tiiri ato yoisharafe iskafakī: “Isharakāfe a Niospa fichipaiyai keskai. Askatari mā ranā paranōnāyamakāfe. Parakī ato chakafayamakāfe. Yōxafīax pāeyamakāfe. Askatamaroko afara sharakōifo fetsafo ato tāpimakāfe,” ixō ato yoife. Askafafe ato yoikī, a ranā askanōfo. <sup>4</sup> Nāskafaxō anā ato yoisharafe, Titopa, yōxafo tiito a naetafafo ato yoisharanōfo a tiitori tāpinōfo, nāskaxō āto fene noisharakōinōfo, āto fakefori noikōinōfo, <sup>5</sup> afara chakafapaifīkakī anā anōfoma, kexemesharanōfo, askatari āto pexe anoxō āto fakefo kexesharakōinōfo faki fofāsapaiyamanōfo, askatari ato noisharakōinōfo, askatari āto fene nikakōinōfo. Nāskaifāfe ōikī fetsafāfe Niospa meka chakara fatirofoma, nā kērofo shara niaifāfe ōikī, Nios Ifofakanax. Akka kērofāfe

Nios Ifofafiakakī anorima shināifono fetsafāfe Niospa meka chakara fatirofo, nā kērofo ōikī, chaka niaifono, Nios Ifofafi-akanax. Akka nā kērofo Nios Ifofaax shara ikaifono ōikī fetsafāfe Niospa meka chakara fatirofoma. Nāskara yōxafofofāfe ato shara tāpimatirofo, naetafafo.

<sup>6</sup> Askatari naetapafari yoisharafe iskafakī: “Māri tāpikāfe, shināsharakāfe isharaxikāki. Afara chakafapaifikī anā ayamakāfe, kexemesharakāfe,” ixō ato yoife, Titopa. <sup>7</sup> Askatari mīri isharafe. Keyokōi yorafo shara fafe. Afeskax isharatirofomākī ato ōimafe. Ato Niospa meka tāpimafe, mēstekōi ato yoisharafe, xafakīakōi. Niospa mekaki kakapaiyamafe. <sup>8</sup> Ato meka shara yoife. Mī shara yoiaito, mia fetsafāfe iskafanōfoma: “Titopa noko meka chaka yoirā,” inōfoma. Tsoa mefe feratenāyamanō. Mefe feratenāpaikani rāfitirofo. Mī afara chakafaino mia tsōa ōiyamanō.

<sup>9</sup> Askatari a ato yonomatifo ato yoife iskafakī: “Māto xanīfāfe mato yoiaito akiki inimayanā nikakōikāfe afe feratenākakima. <sup>10</sup> Nāskaxō māto xanīfo āfe afara onēyamakāfe. Shara yonoxokāfe, ramashara mā ato pāramismakī. Askara ōikī mato tāpisharanōfo mā ato yonoxosharakōiāito māmāi Niospa meka shara shinākī.” Nāskakē mātoōxō, “Niospa meka sharara,” fatirofo. Nā Nios noko ifimis nō afe īpaxanō.

<sup>11</sup> Epa Niospa āfe Fake Jesús nāmā nīchini nokoōnoax naiyonō nōko chaka noko soaxoyanā nō afe īpaxanō. Nāskakē nō tāpitiro Epa Niospa keyokōi noko noikōiāito. <sup>12</sup> Noko noikī noko tāpimani afara chakafakī nō xatenō. Noko afara chakafamapaiyāifāfe nō ato yoitiro iskafakī: “Maa, ē anā afaa chakafapaima. Ē shara nipai, ē anā chaka shināpaima,” nō ato fatiro. Nāskaxō nōko ōiti mēraxō a afara chaka nō fichipaiyai a Niospa fichipaiyaima, nōri anā fichipaitiroma. Askara fichipaitama a nō shināmakitiro. Nāskata nō isharakōitiro. Niospa noko shināmanai keskara fisti nō shinātiro. Nāskax nō shara nitiro. Yora fetsafāfe chaka shināifono nō askara shinātiro, Nios Ifofaxō. <sup>13</sup> Iskaratīa nō Jesucristo manai anā oaito nō ōisharapai. Nāfi nōko Ifokōikī. Nāfi Nioski. Nō tāpia nokoki anā oxii. Nokoki nokoaito sharafinakōia nō ōixii. Nāato noko nāxoni nō omiskōipakexanōma nōko chaka noko soaxoxiki, nō afe nīpaxanō. <sup>14</sup> Nā nokoōnoax nani. Nōko chaka keyokōi noko soaxōfaini. Nāskaxō nōko ōiti noko sharafaxōa. Nō afe yoraxō nō afara sharafapaikī nō anō.

<sup>15</sup> Nāskakē ē mia yoiāi keskafakī keyokōi yorafo ato tāpimafe, mia Niospa shināmanaino. Afara chakafāifāfe ato yoisharafe, anā askanōfoma. Niospa yoiāi keskafakī mīri ato yoisharafe, inimanōfo. Mī ato askafaito mia nikasharanōfo Niospa mia yoiāi keskarafakī akairi nikasharanōfo.



## 3

*Nios Ifofaafu shara nitirofo*

<sup>1</sup> Nāskaxō mefe yorafo ato yoisharafe, Titopa, iskafakī: “Māto xanīfofo feta nafa xanīfāfe yoiaito nikasharakāfe. Ato nikasharax a mato yoiaino keskakāfe. Askatari afara afeskaraito ato axosharakāfe. Shara shinākāfe. <sup>2</sup> Askatari ato mekafakī chakafayamakāfe. Fētsa mato yoipaiyaito ferateyamakāfe. Akiki ōitifishkiyamakāfe. Ato shināsharakāfe. Fenāmāshta ato yoikāfe,” ixō ato yoisharafe, Titopa.

<sup>3</sup> Nāskakē nōri afaa shināyopaonima. Nōko ōiti mēra nō afaa pishta shinātiroma nō ipaoni. Nō nikayospakōi nō ipaoni. Nō chaka shināpaoni. A nā nō ipaiyai keskara nō ipaoni. “E shara shināi, nā ē ipaiyai keskara ē iki,” ikax nōa nō pāramepaoni. Nō yora fetsa āfe afara fichipaipaoni. Nō ato mekafakī chakafapaoni. Chakakōi nō ipaoni, afaa pishta nō mekeaima. Nāskax nō noikaspa faatanāpaonixakikai nō xatemisma. <sup>4</sup> Mā nō askapaonino, Epa Niospa noko noikī āfe Fake fisti nīchini nōko chaka noko soaxoniyonō, nō omiskōipakexanōfoma nokoōnoax naiyonō. Nāskaxō noko ōimani afeskaxō noko noimākai. <sup>5</sup> Akka nō chaka shināmiskē noko nāxoni nōko chaka noko soaxoxiki, nokomāi noikōikī. Akka nō afara shara faōxō noko ifima. Noko noikī nōko ōiti fetsafaxō noko shināmasharai. Noko askafaano nō niax fena keskara shara nō itiro. Niospa Yōshi Sharapa noko askafatiro. Nōa nō niax nō askatiroma. Nōa nō chaka soametiroma. <sup>6</sup> Nōko Ifo Jesucristo noko nāxoni, nōko chaka noko soaxoxiki noko ikipakexakī. Nāskakē Niospa āfe Yōshi Shara noko inā nō mēra nanenō, fishkomītsatiroma. <sup>7</sup> Nāskaxō noko ōiti shara faano, nō afe rafekōitiro nokomāi noikōikī. afe rafeax nō afe nisharakōipakexatiro nā nō ipaiyai keskai.

<sup>8</sup> Titopa, ē mia xafakākōi yoiaki. Nā ē mia yoiaino keskara chanīmaki. Nāskakē Nios Ifofaafu yoisharakōife, shināsharata isharakōinōfo, yora fetsafo shara fanōfo. Askara shara ikax keyokōi nō isharatiro. <sup>9</sup> Nāskata fētsa mia feratenāito kemayamafe. Mia iskafaito: “Nōko xinifo mī tāpiama, mī ea keskarama,” mia faito kemayamafe. Askata oi mitsisipato mekaito kemayamafe. Moisés yoini keskafakī mia mekafainīfofānaito kemayamafe. Mī kemapanā sharamaki. A noko askafai yōra afaa tāpiamaki. Askara fe nō kemanātiromaki.

<sup>10</sup> Akka fētsa a Jesús Ifofaafu ato yoisharakima āa ato pārakī ato paxkanāfaino kenaxō yoisharafe mia nikasharaimākai anā askanōma. Akka mā mī yoikī rafefafiano mia nikayamaino anā afaa yoiyamafe. Askatari anā afe rafeyamafe, ares inō. <sup>11</sup> Mā mī tāpia askara yōra Nios Ifofaama. Niospa meka

nikaima, chaka shināi, ōiti chakaya. Askarato afashta shara faima. Mā āa tāpimekōia, yora chaka.

*Pablo mā mekai xatekī ato meka shara fomani*

<sup>12</sup> Askata ē mikiki Artemas iyamakī Tíquico ē mia nīchixonī. Mikiki nokokē, ekeki ofe, Nicópolis ano. Na oi pakeaitīa ē shinā ē nono Nicópolis ano itiroki, mechakaino.

<sup>13</sup> Apolos yafi Zenas kexesharafe. Nā Zenasmā noko ato yoixomiski, nōko xanīfo. A rafe mato makinoax foaifāfe ato kexesharafe. Nāskaxō afara fichipaiyaifāfe ato ināfe, aya fōtanōfo. <sup>14</sup> Askatari a Jesús Ifofaafo ato yoife yonomisfo inōfo, yonosharakōi yononōfo, yonochakama. Askarafāferi afara yopakakī fitirofo, yonokaxō. Askarafo ato yoife xanimisfoma inōfo, ato afara ināxikāki a omiskōiaifo, afaamaisfo.

<sup>15</sup> Na ēfe ikafāferi āto meka shara mia fomakani, Jesús Ifofaafāfe. A noko shināifori noko ato yoixōfe. Niospa āfe shinā shara mātō ōiti mēra nanemanō mato noikōikī. Nā tii ē mia kenexō fomai, Titopa.

*Pablo*

## Pablo Filemón Kirika Kenexō Fomani

### *Pablo Filemón yoisharani*

1-2 Ēkīa Pablo. Na karaxa mēraxō ē mia kirika kenexō fomai. Na nōko exto Timoteo feta nō mia kirika kenexō fomai. Ē Jesucristoōnoa ato yoiaito, ea nikakaspakakī ea achikaxō karaxa mēra ea ikimatifo. Nāskakē ē mia yoi, Filemón, mīfi noko keskarakī Niosnoa ato yoimis. Nāskakē nō mia noikōi. Nō mia kirika kenexō fomai, mia yafi a mefeta Jesús Ifofaafo a mī pexe anoax ichanāmisfori nō mato kirika kenexō fomai. Akka Apia nōko poi keskara, nāskakē Arquipo yafi nō ato kirika kenexō fomai. Akka nā Arquipo noko keskarari nāatori ato Niospa meka yoimis. <sup>3</sup>Niospa mato noikī mātō shinā mēra mato shināmashara mā fekaxtenōma. Epa Nios feta nōko Ifo Jesucristo mato askafanō.

### *Filemón Jesús Ifofaxō yorafo noipaoni*

4-5 Mē mia nika mī nōko Ifo Jesús noikōiaito, askatari mī chanīmara fakōinaito, askatari a Jesús Ifofaafori mī ato noisharakōia keyokōi. Mī askaito nikakī ē mia nirixō kīfixōfafāini iskafakī: “Aicho Epa Niosi, na Filemón mia Ifofasharakōia,” ixō ē mia Epa Nios kīfixomis. <sup>6</sup> Askatari mī Epa Nios Ifofasharakōiyanā mī ato afara axosharakōimis ato tāpimasharakōiyanā. Nāskakē ē Epa Nios mia kīfixomis mī tāpisharakōinō nā Cristo Jesús nō Ifofaito noko inimamamis kesfakakī. <sup>7</sup> Ē mikiki inimasharakōi mī ato noisharakōiaito nikai. Nāskakē ē mikiki inimai, efe yorashta, a Nios Ifofaa fetsafo mī ato noikī mī ato inimamasharakōiaino.

*Pablo Filemón iskafani: “Mī yonomati Onīsimō eōxō sharafafe,” ixō yoini*

<sup>8</sup> Cristo ea ifini ē āfe meka yoimis inō. Nāskakē fāsi mekainīkafā ē mia yoifitiroxakī, akka ē mia askafapaima mīmāi fetsafo ato noiyanā mī ato inimamasharakōiano. <sup>9</sup> Ē mia askafatamaroko ē mia noikōiyanā ē mia yoipai. Ēkīa Pablo mē anifokōia ē Cristo meka ato yoiaito ea nikakaspakakī karaxa mēra ea ikimatifo. <sup>10</sup> Nāskakē Onīsimōōnoa ē mia yoisharapai. Na Onīsimōfi ēfe fake keskaraki. Nono karaxa mēraxō ē Onīsimō Jesús chanīmara famati. Nāskakē Onīsimō ēfe fake keskara.

<sup>11</sup> Akka taeyoi Onīsimō mia yonoxosharapaonima. Mā askayopaofinixakī, iskaratīa mīo noikī mia axosharatiro, nā ea axōai kesfakakī. <sup>12</sup> Ē mia anā Onīsimō nīchixonī ē aō noikōifikī. <sup>13</sup> Epa Niospa meka shara ē yoiaito ea karaxa mēra ikimanifono, oa nonō efe ixō mī ea kexesharamis itikixō na

Onĩsimõ ea kexenõ ã fichipaikerana. <sup>14</sup> Akka ã mia yõkaxoma nonoxõ ea kexenõ, ã nẽtefapaima. Nãskakẽ, “Na ea Onĩsimõ anã nĩchixõfe,” ã mia faima. Nãskakẽ na Onĩsimõ mĩ efeta yonomapaikĩ ea kexenõ mĩ yoitiro. <sup>15</sup> Õitsai, Niospa anori fichipaiyaino askayameaki nãskax anã mĩ yonomati keskara ikima Nios chanĩmara faax. Mĩ yonomatifiax mikiki onekeratiki afetiama. Anã iskaratiã mia ano kaax, chaka ikima mefe rafesharakõi kiki. Anã mikikinoax faki kanakama. <sup>16</sup> Anã mĩ yonomati keskarama. Iskaratiã mã Jesús Ifofaa. Nãskax oa mefe nanea keskara mã Jesús Ifofaax. Nãskai ã aõ noiai keskafakĩ, mĩ aõ noifinakõitiro. Iskaratiã anã oa mĩ yonomati keskarama. Mã isharakõia oa mĩ exto keskara, anã oa yora fetsa keskarama.

<sup>17</sup> Nãskakẽ mĩ oa efe nanea keskaraxõ mĩ efeta Jesús Ifofai, ã mikiki nokoaino mĩ ekeki inimayanã mĩ ea ifitiro keskafakĩ, na Onĩsimõki inimayanã ifisharakõife. <sup>18</sup> Akka mia chakafaferatimãkĩ, askayamãkĩ mia nimiferatimãkĩ ea yoife ã mia kopifanõ. <sup>19</sup> Nãnori ã mia yoi mia kirika kenexõ fomayanã. A Onĩsimõ mia nimia ã mia kopifanõ ea chanĩmara fafe. Efe yorashta, mĩ ea nimia shinãfe. Mĩ ea kori nimiya-mafekẽ ã mia Jesús meka yoiyamano mĩ Jesús Ifofakeranama afe nĩpaxakĩ. <sup>20</sup> Efe yorashta, ã mia yoi nõko Ifoõxõ ea Onĩsimõ shara faxõfe. Ëfe õiti inimamasharakõife.

<sup>21</sup> Mẽ tâpia a ã mia yoiai anori mĩ ea nikasharakõi. Askatari a ã mia kirika kenexona õikĩ a finõmainĩfõfã mĩ ea axosharai. <sup>22</sup> Ë mia anã fetsari yoi. Mĩ ea Epa Nios kifixotitaifanõ. Mĩ askafaino ea karaxa mẽranoa kãimanafono ã mikiki samama nokotiro. Nãskakẽ ea mĩ pexe kene ano mĩ ea itipinĩ faxotiro, Niospa ea kãimanano ã ano oxaxinõ.

*Mã Pablo mekai xatekĩ ato meka shara fomani*

<sup>23</sup> Na Ipafras Cristo Jesúsnoa yoimis a yafi ea karaxa mẽra ikimatifo, aatori mia yoisharai. <sup>24</sup> A efeta Jesucristo yoimis, fetsafori Marcos ikaino, Aristaroco ikaino, Demãs ikaino, Lucas ikaino, nã tiito mia yoisharakõikani mikiki inimakãkĩ.

<sup>25</sup> Nõko Ifo Jesucristo mato noikĩ mato kexesharakõipainõra. Nã tii ã mato yoi.

*Ëkã Pablo.*

## Jesúsnoa Yoikĩ Fětsa Hebreofo Kirika Kenexõ Fomani

*Jesús afe Apaõxõ yoini. Nāskakē nō tāpitiro afe keskaramāki*

<sup>1</sup> Efe yora mīshtichi, ē mato kirika kenexõ fomai mā tāpinõ Jesúsnoa. Taeyoi Epa Niospa afe meka nōko xinifo israelifo yoipaoni mēxotaima. Afe ājiriõnoa ato yoipaoni. Askatari afe namapa ato yoipaoni. Askatari afe meka yoimisfoxõ ato yoipaoni. <sup>2</sup> Akka iskaratĩa noko yoia afe Fakeoxõ. Nāskakē nō tāpitiro Nios afe keskaramāki. Afe Fakeoxõ keyokõi nai mēranoafoya mai anoafoyari onifani. Nāskafata afe Fake katonni nai mēranoafoya mai anoafoyari nōko xanĩfo finakõia inõ. <sup>3</sup> Nāfi sharafinakõiaiki Apa Nios keskarakõi. Apa Nios afe keskaramāki noko õimani. Nāato keyokõi kexesharamis afe mekasharaõxõ. Askatari nokoõnoax nani nōko chaka noko soaxoxiki a keskara shara noko õi. Nāskakē nōko chaka anā shināima. Nāskata mā otoax nai mēra kani Apa fe xanĩfokõi ixiki.

*Niospa afe ājirifo Jesús ato finõkõia*

<sup>4</sup> Nāskakē nō tāpitiro Niospa Fāke ājirifo ato finõkõia. Nāskax Niospa Fake xanĩfokõi Jesús. <sup>5</sup> Akka Niospakai afe ājirifo yoikĩ iscafamisma:

Māfi ēfe Fakekõifokĩ. Ē mātõ Epaki,  
ato famisma. Akka afe Fake fisti yoikĩ iscafani:

Mĩ ēfe Fakekõi. Nāskakē mĩ fisti āto xanĩfo finakõia ipanakaki,  
ixõ yoini. <sup>6</sup> Nāskaxõ afe Fakekõi mai ano nĩchini. Nāskata afe ājirifo yoini iscafakĩ:

Keyokõichi ēfe Fake noikõikāfe. “Mĩ fāsi sharakõi,”  
ixõ yoikāfe. <sup>7</sup> Nāskata afe ājirifoõnoa yoikĩ iscafani:

Ēfe ājirifo oa nefe koshi katiro keskara ē fai, ēfe meka yoinõfo. Nāfori oa chii xoisai keskarafõ. Nāskakē nā ē ato yoiai keskafakĩ afara arisafatirofo,  
ixõ Niospa yoini. <sup>8</sup> Akka afianā afe Fakeõnoa yoikĩ iscafani:

Mĩ ea keskarari. Mĩri mĩ Nioskõi. Mĩ āto xanĩfokõi ipanaka. Mĩ keyokõi ĩkikõisharapakenaka. <sup>9</sup> Mĩ afara sharafo noikõimis, nā afara chakafo noikaspayanā. Nāskakē ē mia katonni mĩ āto xanĩfo inõ. Akka ājirifo ē ato inimamai. Akka ē mia inimamakõi,  
ixõ yoini. <sup>10</sup> Askata anā yoini,

Mĩri ea keskarakõi. Mĩ āto xanĩfokõi. Afaa oniyamatai mai yafi nai mĩ onifakĩ taefani. <sup>11</sup> Nāskakē nāfo keyokõi mitokomexii. Akka mĩ fisti keyonakama. Nā rapati mā

chapoax keyotiro keskai mai fe nai keyoxii. <sup>12</sup> Rapati chapokē potatirofo fetsa fena shara fixikakī. Nāskarifiakī mai fe nai anā sharakēma mī anā mai yafi nai pāofakī keyotiro. Anā fenashara faxiki fenashara inōfo. Akka mī fetsatiroma. Mī fisti ipanaka, ixō Epa Niospa āfe Fake yoini. <sup>13</sup> Niospakai āfe ājirifo yoikī iskafamisma:

Mā efe xanīfo ikikai efe ketaxamei. Tsaokāfe, ixokai yoimisma. Akka āfe Fake fisti yoini iskafakī:

Mī efe xanīfokōi ikano nā mia noikaspaifāfe anā mia afeska fatirofoma mīmāi keyokōi ato ikikē. Nā mia noikaspaifo mī ato ikixii, ē mia askafaino mī efe xanīfokōi ixii, ixō yoini. <sup>14</sup> Akka Epa Niospa āfe ājirifo yoini noko kexesharanōfo. Fatorafāferi Jesús Ifofaafomākī afe ipaxakakī. Nāskakē Niospa āfe ājirifo yoini a Ifofaafō kexesharanōfo.

Nāskakē nō tāpia ājirifo Jesús finōkōia.

## 2

*Jesús nokoōnoax nanixakī noko imapakenakakī. Nāskakē kachikiri fayamakāfe*

<sup>1</sup> Akka Cristo ājirifo finōkōia. Nāskakē nā meka chanīmakōi Niospa Fakeōnoa nō nikasharakōitiro, na meka shara kachikiri fayamaxiki. <sup>2</sup> Niospa āfe ājirifo nīchini āfe meka yorafo yoitanōfo nōko xinifāfe nikasharanōfo. Akka nikasharayamaifono Niospa ato omiskōimani. <sup>3</sup> Akka taefakī Jesús yoiyoni nokoōnoax chipo naxiai, nōko chaka noko soaxoxiki nō afe ipaxanō. Nānori ato yoiaito nikakaxō a afe rafemisfāfe noko yoinifo. Akka nō Jesús Ifofaino, Niospa noko ifitiro. Akka nō nikayamaino Niospa noko ifitiroma. <sup>4</sup> Askatari Niospa afara fetsa fetsatapafo tsōa atiroma keskara ato ispapaoni aōxō tāpinōfo āfe meka chanīmakōikē. Askatari āfe Yōshi Shara ato mēra naneni ato katoxō nāfāfe yonokī fetsa fetsafakī yonoxonōfo. Nāskakē nō Niospa meka chanīmara fai.

*Jesucristo nono mai anoax yorakōi ikiyoi oni, feronāfakekōi askaftax Nioskōi*

<sup>5</sup> Akka Niospa āfe ājirifo yoikī iskafanima: “Na mai fena anoax mā xanīfo ixii,” ixō yoinima. (Nāskakē nō Jesúsnoa nō shināmakitiroma nāmāi xanīfofinakōikē.) <sup>6</sup> Akka na kirika kenekī David yoikī iskafani Niospa shināmanaino:

Epa Niosi, keyokōi mī onifani. Akka nōkai afama. Nāskafekē mī noko noiyanā mī noko shināmis, noko kexesharayanā. <sup>7-8</sup> Akka mī ājirifāfe noko finōyonifo. Nāskafiano nono mai anoā mī noko xanīfo ima. Nāskakē nā mī onifanifāfe noko nikakōitirofo mīmāi noko xanīfo imasharakē,

ixõ keneni. Akka keyokõi nã Niospa onifanifo nõ ãto xanĩfo itiro. Tsoa fetsakai xanĩfo itiroma. Askafiano keyokõiichi noko nikakanima. <sup>9</sup> Akka mã nõ tãpia Niospa noko noikĩ nono mai ano Jesús nĩchini yorakõi inõ. Nãskakẽ ãfe ãjirifãfe Jesús finõyonifo. Akka mã nokoõnoax nai omiskõixõ noko chaka soaxokẽ. Epa Niospa xanĩfo finakõi imani, nãskaramãi Niospa fichipaikĩ keyokõi noko noikĩ. <sup>10</sup> Epa Niospa keyokõi onifani aõnoax keyokõi inõfo. Nãskakẽ ãfe fakefo afe isharapake-nakafo. Nãskaxõ ãfe Fake Jesús nĩchini nokoõnoax omiskõiyonõ nõ afe ãpaxanõ. ãfe Fake fisti nokoõnoax omiskõitiro nõko chaka noko soaxoxiki. Nãato Apa Nios ika ari noko iyoano nõ afe ipaxatiro. <sup>11</sup> Akka Jesús ãfe Apa Nios nãri nõko Epa. Nãskaxõ noko chaka soaxona nõ a keskara shara inõ. Nãskaxõ rãfikima noko yoikĩ iskafatiro: “Nafõ ãfe fakefo,” ixõ noko yoitiro. <sup>12</sup> Nã chanĩmara faafoõnoa Jesús Apa Nios yoikĩ iskafani:

Epa Niosi, mĩõnoa efe yorafo ã yoisharaxii. Nãskakẽ ato fe mĩõnoax ã fanãixii,  
ixõ yoini. <sup>13</sup> Nãskaxõ anã yoikĩ iskafani:

Epa Niosi, ã mia chanĩmara faaki,  
ixõ yoini. Nãskafata anã yoikĩ iskafani:

Epa Niosi, nã ea chanĩmara faafo mã mĩ ea inã ãfe fakefo inõfo,  
ixõ Jesús Apa Nios yoini. Nãskarakõi keneni David.

<sup>14</sup> Nã fakefo apa fistichi ato fake fafĩano nã yora fistiyata nã imi fistiya ikafo tsoa osiama. Nãskarifiã Jesúsri noko keskara yorakõi ipaoni. Yorakõi kãinixakĩ noko nãxonĩ Satanás yõshi chaka nõko ifo iyamanõ anã noko namapak-enõma. Nokoõnoax Jesús naitĩã Satanás ãfe kerex xateni anã noko afeska faxima. <sup>15</sup> Akka Jesús nokoõnoax nayoa-mano yorafo nõ naira ikax ratekõipaonifo. Askafiano mã nokoõnoax Jesús naxõ noko chaka soaxona afe ãpaxanõfo. Nãskakẽ napai nõ anã ratetiroma. <sup>16</sup> Akka mã nõ tãpia Jesúskaĩ onima ãfe ãjirifo afara ato axoyoi. Askatamaroko Abraham ãfe fenafo nã chanĩmara faafo, Abraham chanĩmara fapaoni keskafakĩ chanĩmara faifono ato afara axosharayoi oni. <sup>17</sup> Akka Jesús noko keskara yorakõi ini. Nãskakẽ nã nõ meemis keskarari arifi meepaoni. Yorafãfe noikas-paifono meepaoni paekõi. Askatari mekafaifono, askatari chakafamapaiyaifono, meepaoni paekõi. Nãskakẽ nokoõnoa shinãĩ. Noko potaxikima. Nãskakẽ Epa Nios noko kĩfixomis noko imasharanõ. Akka nã Jesús nokoõnoax nani nõko chaka noko soaxoxiki. Nãskakẽ noko Apa Nios kĩfixotiro iskafakĩ: “Epa Niosi, ã ato nãxonikĩ ato chaka soaxõfe nã ea chanĩmara faifo,” ixõ Apa yoitiro. Nãskaxõ noko Epa Nios kĩfixomis xanĩfokõi itiro. <sup>18</sup> Satanás Jesús chakafamapaini. Akka

Jesús omiskōifikī afaa chakafanima. Nāskakē nokori Satanás afara chakafamapaiyaito Jesús noko axosharatiro nō afaa chakafayamanō.

### 3

#### *Jesús Moisés finōkōia*

<sup>1</sup> Efe yora mīshtichi, Epa Niospa mato katoni āfe Fakekōifo mā inō, nāskaxri mā afe xanīfo inō. Niospa Jesús nīchini nokoōnoax nanō. Akka nāatori Apa Nios noko kīfixomis. Akka a ato Nios kīfixomisfo Jesús ato finōkōia. Nāskakē Jesús shināsharakōikāfe. <sup>2</sup> Akka a Niospa Jesús yoini keskara, nāskara asharakōini. Nāskatari Niospa Moisés katoni israelifo Egipto mai anoa ato ifinō, askatari āfe meka shara ato yoinō. Nā Niospa yoini keskarari Moisés asharakōini. <sup>3</sup> Akka Moisésnoa yoisharafitirofono, askatamaroko Jesúsnoa yoisharakōitirofo. Nā pexe sharaōnoa yoisharatirofono, askatamaroko nā pexe famisnoa yoisharakōitirofo. Nāskarifiakī Moisésnoa yoisharafitirofono akka Jesúsnoaroko yoikī finasharakōitirofo. <sup>4</sup> Āa pexe itiroma. Akka nā pexe famisto atiro pexesharafakī. Nāskarifiakī Epa Niospa keyokōi onifani. <sup>5</sup> Akka Moisés Epa Niospa āfe yonomati ini. Niospa yoini keskafakī, nāskarakōi ani. Āfe kaifo israelifo ato yoipaoni Niospa meka. Askatari ato kexesharapaoni. Askatari Egipto anoa ato ifixō ato iyoni. Nā Moisés apaoni keskafakī ōikī keyokōichi tāpikōitirofo Epa Niospa āfe Fake nīchiai afe yorafo ichapakōi ifinō nai mēra afe ĩpaxanōfo. <sup>6</sup> Akka Jesúska Epa Niospa āfe yonomatima. Āfe Fakekōi. Nāskakē afe yorafāfe āto Ifokōi. Akka tsoamāki afe yorafo ē mato yoinō. Nō Jesús Ifofaxō a noko yoiyoni keskafakī nō manasharai nā anā oaitīa, nō kachikiri fayamax nō afe yorakōi nō iki.

#### *Niospa fakefo aōnoax inimakōitirofo anā āto ōiti fekaxtenōma*

<sup>7-8</sup> Akka Niospa Yōshi Sharapa yoikī iskafani:

Epa Niospa mato yoiāi keskafakī nikasharakāfe. Māto ōiti kerexfayamakāfe Niospa meka nikakaspakī. Māto xinifo keskara iyamakāfe. Māto xinifo ē ifini Egipto anoa. Ē ato ififinino tsōa istoma anoxō ea nikasharanifoma. Askakimaroko Jesús mato yoiāi keskara nikasharakōikāfe. <sup>9</sup> Nā tsōa istoma anoxō māto xinifāfe ea nikakaspapaonifo nā tsōa ōiyomisma ēfe yonoshara ē ato ispafiaino. Ano afaamano a piaifo ē ato ināpaoni. Askatari ano faka-mano, ē ato ināpaoni. Ē ato xinia ranā askafafiaino ea nikakaspapaonifo. <sup>10</sup> Nāskakē ē atoki ōitifishkini. Nāskakē ē yoini iskafakī: “Ea nikatamaroko āto ōiti mēraxō afara chaka shināmisfo. A ē ato shināmapaiyai keskarakai tsōa



nikafoma.” <sup>11</sup> Nāskakē ē atoki ōitifishkikī ē atoōnoa yoini iskafakī: “Na israelifāfe ea nikakaspakani. Nāskakē a ē ato inimamapaiyai keskafakī ē ato axopakenakama,” ixō Epa Niospa nōko xinifoōnoa yoini.

<sup>12</sup> Efe yora mīstichi, ōisharakāfe. Nōko xinifo keskara iyamakāfe. Māto shinā mēraxō mā Jesús chanīmara fayamax chakakōi mā itiro. Mā askaikai nā Nios nīpanakāfe mā ipanakama. <sup>13</sup> Askatamaroko pena tii yoinōnāsharakī inimama faatanākāfe nōko Ifoxō shināsharakōixikakī. Afara chakafāfe noko pāratirofoki nō chakafanō. Akka nō nikaxō nō anā shināsharatiroma. Nōko ōiti chakakōi itiro. Nāskakē ato nikayamakāfe. <sup>14</sup> Akka nō tafakī Jesús chanīmara fakōini keskafakī eneyamax nō afe ipaxatiro. <sup>15</sup> Akka nā kirika keneano iskakī ē mato yoinō,

Epa Niospa mato yoiai keskara fisti nikasharafafāikāfe. Māto xinifāfe Epa Nios nikakaspakakī āto ōiti kerexkōi fa-paonifo. Nāskakē ato keskara iyamakāfe. Māto ōiti kerex fayamakāfe. Nāskax nikayospa iyamakāfe, ixō Niospa meka yoikī kenenifo.

<sup>16</sup> Akka, ζtsoafo Niospa tsekanimē Egipto mai anoa āfe meka nikakaspakakī kachikiri faifono? Akka keyokōi nōko xinifo Moisés Egipto mai anoa iyoni. Nāfāfe Nios nikakas-papaonifo. <sup>17</sup> Akka, ζtsoafoki Epa Nios ōitifishkinimē cuarenta xinia mā akax? Nā nikakaspayanā afara chakafaifoki ini. Nāskakē Epa Niospa tsōa istoma anoxō keyokōi ato namapakeni. <sup>18</sup> Akka, ζtsoafo Niospa yoinimē iskafakī? “A ē mato inimamapaiyai keskafakī ē anā askafapanakama,” ixō yoini. Akka nā nikayospafo ato yoikī askafani. <sup>19</sup> Akka Epa Nioskai tsōa chanīmara fanima. Nāskakanax a Niospa ato imapaiyai ano tsoa ikinima. Nāskakē tsōa anoxō tenenima inimayanā.

## 4

<sup>1</sup> Akka Epa Niospa noko yoiyoni iskafakī: “Mā ea Ifofaino ē mato anā inimamatiro. Akka mā ea Ifofayamakē ē mato inimamatiroma,” ixō noko yoiniki. Nāskakē keyokōichi nō Ifofanōkāfe. <sup>2</sup> Epa Niospa noko yoia: “Ē mato ifipai,” noko fani. Nāskarifikī Epa Niospa nōko xinifo yoikī iskafani: “Ē mato ifipai mato inimamapaixikī anā mā fekaxtenōma,” ixō ato yoini. Ato askafafiaino tsōakai nikasharanima. Kaxpakōi Epa Niospa ato yoini. <sup>3</sup> Akka Niospa Moisés shināmanaino iskafakī kirikaki kenekī yoini:

Ea nikayamaifono ē atoki ōitifishkikī. Nāskakē ē ato fāsikōi yoia iskafakī: “Mā ea nikayamaino ē mato mai shara fetsa ano imapakenakama anoax mā isharanō,”

ixõ ato yoini. Akka Epa Niospa keyokõi onifani. Mã keyokõi askafakĩ fetsaxõ teneni. Nãskafakĩri Niospa fichipai afe yorafo isharanõfo anã fekaxteyamanõfo. Iskaratĩari afe yorafo isharamapai afe isharpapakexanõfo. Akka nõa nõ Nios chanĩmara faino, Epa Niospa noko ifisharai nõ inimapakexanõfo. <sup>4</sup> Akka kirikaki Moisés keneni pena tenetiõnoa yoikĩ. Iskafakĩ keneni:

Seis nia yonokĩ Epa Niospa keyokõi onifani. Nãskaxõ pena fisti teneni,

ixõ keneni. <sup>5</sup> Askatari anã kirikaki keneni, iskafakĩ yoikĩ:

Efe isharpapakenakafoma,

ixõ kirikaki kenekĩ yoini.

<sup>6</sup> Askafiano ranãri afe isharpapakenakafo. Akka nã Niospa meka nikakaspai fo afe ipanakafoma. <sup>7</sup> Nãskakẽ Niospa shinãmanainori chipo David kirika kenekĩ yoini iskafakĩ:

Iskaratĩa Niospa meka nikakĩ mãto shinãmã shinãsharakãfe. Anorima shinãkakima, ixõ David yoini.

<sup>8</sup> Mã Moisés naano, Josué israelifo iyoni Canaán mai ano isharanõfo. Nãskaifono Niospa iskafakĩ yoini: “Nã ea Ifofaafõ efe nai mẽra isharpapakenakafo,” ixõ yoini. <sup>9</sup> Nãskakẽ mã nõ tãpia nõ Ifofaax, nõ afe isharpapakenaka. Epa Niospa afe yorafo inimamasharapai isharpapakexanõfo. <sup>10</sup> Epa Niospa keyokõi onifaxõ inimayanã teneni. Nãskarifiãri nõ Epa Nios ano kaax a nõ iyopaoni keskara nõ anã itiroma, Niospa noko inimamasharakõiaino. <sup>11</sup> Akka fekaxfiano nõ Nios Ifofakõitiro afe isharpapakexakĩ. Akka nõko xinifãfe nikayamaito Epa Niospa ato mai shara inãpaifikĩ ato inãnima. Nãskakẽ nõri ato keskara ipaima.

<sup>12</sup> Epa Nios nipanaka. Nãskarifiãri ãfe meka keyonakama, mitsisipakõia. Akka keno ikikõichi nami potexõ ãfe xaki mẽra nõ õitiro. Nãskarifiãri Epa Niospa meka fãsi finakõia. ãfe meka shara nõ mẽra ikano aõxõ nõ tãpitiro nõ shara ikamãki askayamai nõ chakamãki. <sup>13</sup> Epa Niospa keyokõi tãpia nõ õtatiroma. A nõ afara shinãxõ nõ amis keskara keyokõi tãpikõia. Akka nõri tãpia a nõ amis keskara. Nãskakẽ nõ Nios pãratiroma.

### *A Nios ato kĩfixomisfo Jesús ato finõkõia*

<sup>14</sup> Akka Jesúsfi Niospa Fakekĩ. Askatari noko Nios kĩfixomis. Nãatofi a Nios ato kĩfixomisfo finõkõiaki. Nãskax nai mẽra Nios ano kani. Nãskakẽ nõ kachikiri fatiroma nikakõisharayanã. <sup>15</sup> Nãatori meemis a Satanás noko afara chakafamapaiyai keskara. Nãskakẽ nãato tãpia a nõ meemis keskara fekaxkõia. Akka Satanás Jesúsri afara chakafamapaini. Nãskafekẽ Jesús nikanima. Nãskakẽ nokori axotiro. <sup>16</sup> Nãskakẽ nõ Nioski

ranokima nã nõ yoipaiyai keskara nõ yoitiro. Nõ yoiaito Niospa noko noikĩ noko afara axosharatiro.

## 5

<sup>1</sup> Ë mato yoinõ afeskax ato Nios kĩfixomis xanĩfo itirofomãki. Nã Niospa ato katoato nãato noko kĩfixonõ. Nã Niospa katoa noko keskara yorari itiro. Nãfi Nios noko kĩfixomis xanĩfo itiro. Nãskakẽ yorafãfe Epa Nios aicho fakakĩ a Nios ato kĩfixomisto ãfe xanĩfo afara inãmis atori Nios inãno. Askatari yorafãfe ãto chaka soapaikakĩ nã yoinã ina fexomisfo retexõ ato koofaxonõ Epa Niospa ãto chaka ato soaxonõ. <sup>2</sup> Akka nãri noko keskarari nãatori afara chakafatiro. Nãskakẽ tsõa tãpisharayamakĩ, shinãsharakima afara chakafaino, nã xanĩfãfe tanaima isharaxõ ato axosharatiro. <sup>3</sup> Nãskaxõ yorafãfe nã yoinã inafõ inãino nãato retexõ koofakĩ Epa Nios ato kĩfixomis Epa Niospa ãto chaka ato soaxonõ. Nãskatari ãri ãfe yoinã ina retexõ koofamis ari Epa Niospa chaka soaxonõ, a noko axomis keskafakĩ. <sup>4</sup> Akka ãkai tsoa katometiroma Nios ato kĩfixomis xanĩfo ixii. Nios fistichi ato katotiro Aarõn ani keskafakĩ. <sup>5</sup> Nãskarifiyai Cristo aari katomenima Nios ato kĩfixomis xanĩfokõi ixiki. Akka Apa Nios fistichi yoini iskafakĩ:

Mĩ ãfe Fakekõi. Nãskakẽ mĩ fisti ãto xanĩfo finakõia ipanakaki, ixõ yoini. <sup>6</sup> Askatari anã iskafakĩ yoini:

Mĩfi ato Nios kĩfixomis xanĩfo ipanakaki, nã xanĩfo Melquisedec ipaoni keskara, ixõ Apa yoini.

<sup>7</sup> Jesús nono mai ano ikax, mã chaima naxiki omiskõikõini. Nãskaxõ fãsikõi mekayanã oiaianã Apa kĩfini iskafakĩ: “Epa, mã keyokõi tãpia. Ea mã ifipaikĩ ea mã ifitiro ã nanõma,” ixõ yoini. Mẽxotaima nã ãpa amapaiyai keskara fisti shinãkĩ Jesús ãfe Apa nikakõini. Nãskakẽ ãfe ãpa tenemakõini axosharakõiyannã omiskõiaino. <sup>8</sup> Akka Jesús Niospa Fakekõifiax omiskõini. Omiskõifikĩ Apa nikakõini. <sup>9</sup> Nokoõnoax omiskõifikĩ Apa Niospa yoiyai keskara nikakõini. Nãskaxõ a nikaifo ato ifipakexakĩ. Nãskax noko ifimis sharakõi imis. <sup>10</sup> Epa Niospa ãfe Fake Jesús katõxõ yoikĩ iskafani: “Mĩfi nã Melquisedec keskara ikikai. Nãskakẽ a ea ato kĩfixomisfãfe ãto xanĩfokõi mã ipanakaki ato ikipakexakĩ. Nãskaxõ a eõnoa ato kĩfixomisfo xanĩfofori mã ato finõkõinĩfofãnakĩ,” ixõ ãpa yoini.

*Õisharakõikãfe. Mã Jesús kachikiri faa fãsi mesekõi itiroki*

<sup>11</sup> Ë mato yoiã Epa Niospa Jesús katoa a noko Nios kĩfixomis afe xanĩfo finakõia ixii. Akka nãõnoa ã mato fetsa yoisharapai. Nãskakẽ ã mato anã yoisharatiroma mãmã fenãmãshita tãpiaino. <sup>12-13</sup> Akka mã Niospa meka nikakĩ mã mã xinia ranã aka. Nãskakẽ tãpikõixõ mã ato yoikerana. Akka mãkai

tāpisharama. Akka a mā taefakī Niosnoa mā ato yoiyoni mā mā shināmakia. Nāskakē mato anā tāpimanōfo mā ato fenai. Nā fake yome chocho afiai yosiaima keskarakōifo, mā. Akka fake yomēkai afaa piyotiroma. Nāskarifiakī māri Niospa meka tāpisharaima. Nāskakē mā tāpiama fato sharamākī fatofori chakamakī. <sup>14</sup> Akka nō pena tii Niospa meka ōifafāikī nō tāpikōiax isharakōitiro māmāi nō tāpiax fato sharamāki, fatofori chakamāki.

## 6

<sup>1</sup> Akka nōkai fakefo keskarama. Fakefāfekai afaa tāpisharafoma. Akka nōroko tāpisharakōia. Akka fetsa ē mato yoipai a ē mato yoiyomis keskara anā ē mato yoima. Mā nō tāpia a nō afara chakafamis. Nāskakē nō rāfikōiyānā nōko chaka shināmakitiro. Nāskaxō nō Nios Ifofaino noko chaka soaxotiro nō afe ipaxanō. <sup>2</sup> Mā nō tāpia noko fētsa maotisafaino keyokōi tāpitirofo mā nōmāi Nios Ifofaino. Askatari nō tāpia noko Nios kīfixoyanā āto mifi noko māmātirofo Niospa Yōshi Sharapa noko imasharanō. Nāskatari mā nō tāpia nō Jesús Ifofaax nō naax nō anā otoxiai. Akka a Jesús nikakaspamisfo Niospa a omiskōipakenakafo mēra ato potaxii. Nāskakē nāfo mā nō tāpikōia. <sup>3</sup> Nāskakē a Niospa fichipaiyaino afara fetsafori nō tāpitiro.

<sup>4</sup> Nāskakē nō Jesucristoōnoa meka shara nikaxō chanīmara faax mā naax Nios fe nō ipaxatiro. Nāskatari Niospa Yōshi Shara noko fe iki. <sup>5</sup> Nāskakē nō Niospa meka tāpisharakōiaino a Niospa afara shara noko yoiai nō atiro. Askatari Niospa afara sharafo noko famapai afara sharafo nō atiro, āfe Yōshi Sharaōxō. <sup>6</sup> Nāskakē keyokōi nō afo tāpifixō nō Niospa Fake kachikiri faxō chakafakī mekafaxō, nō anā Ifofatiroma mā nōmāi chakafaxō a noko Ifimis. Anā tsōa noko ifitiroma. <sup>7</sup> Akka ē mato yoinō nikakapo. Oi ikaino mai mechanatiro. Nāskakē tare anoax fanafo foaisharatiro. Nāskakē a tare yonomisfo inimatirofo fanafo foaisharaino Niospamāi imasharaino. <sup>8</sup> Akka nā tare fetsa chaka anori oi ikaino, fanasharafo foaitiroma. Moxa chakafo fisti foaitiro. Nāskakē koofatirofo nā fanachakafo kooi mitokomenō. Nāskarifiakī fētsa Niospa meka shara nikafafāifikī Nios chakafakī mekafaito nā keskarrafo Niospa nā omiskōipakenakafo mēra potaxii. Nō tare shara keskarakē Epa Nios nokoki inimatiro. Akka nō tare chaka keskarakē Epa Nios nokoki inimatiro. Nāskakē noko omiskōimaxii.

*Akka mā nō tāpia nō Jesús chanīmara faax nō isharakōitiro*

<sup>9</sup> Efe yora mīshtichi, mē matoōnoa tāpisharakōia. Mākai ato keskarama. Akka Jesús Ifofaax oa mā fāi kai keskara mā Nios ari kai. <sup>10</sup> Akka Epa Nios sharakōi. Afaa chaka shināmisma. A mā sharafamis Epa Niospa tāpia, shināmakima. Askatari

mã Nios noikĩ a chanĩmara famisfo mã ato axosharamis. Nãskakẽ Epa Nios shinãmakima. <sup>11</sup> Akka Epa Nios kachikiri faxoma a mã akai keskararifakĩ, ato sharafakĩ mēxotaima Ifofasharakõikãfe, “Nioski nokoaitĩa nõ afe isharpapakexakĩ,” shinãkõikĩ. <sup>12</sup> Akka Epa Niospa meka shinãmakiyamakãfe. Epa Niospa fetsafo yoini iskafakĩ: “Mã ea Ifofakĩ mã ea manasharaito ẽ mato afara shara inãxii,” ixõ ato yoini. Nãskarifiakĩ mãri manasharakãfe, Jesús kachikiri faxoma. Mãri afara shara fixikakĩ.

<sup>13-14</sup> Niospa nõko xini Abraham yoyoni iskafaki: “Ëkĩa mĩ Nios. Ea tsõa finõtiroma. Ramashara ẽ chanĩmismo. Ë mia yoinõ mĩ tãpisharakõinõ. Ë mia axosharakõikai mĩ fenafo ichapakõi inõfo. Akka mĩkai ato tanãtiroma mĩ fenafo mĩ ichapakõikẽ,” ixõ Niospa Abraham yoyoni. <sup>15</sup> Nãskakẽ Abraham fena fenakima manakõipaoni. Nã Niospa yoyoni keskarakõi fakĩ Abraham ãfinĩ fake fini. ãfe fake Isaaca. <sup>16</sup> Akka fẽtsa noko yoikĩ iskafatiro: “Ë mia pãraima ẽfe xanĩfãfe mã ea õi. Nãskakẽ nã ẽ mia yoiãi keskara ẽ mia axoxii,” ixõ noko yoitiro. Nãskakẽ nõ tãpitiro nokokairoko pãraito. <sup>17</sup> Nãskarifiakĩ Niospa noko tãpimapai ãfe meka chanĩmakõi. A noko yoyoni keskara afeskaxõ anã fetsafatiroma. Nãskaxõ ato yoini iskafakĩ: “Ë Nioskõi. Tsõakai ea finõtiroma. Nãskakẽ nã ẽ mato yoiãi keskafakĩ mã ea chanĩmara fatiro,” ixõ ato yoini chanĩmara fanõfo. <sup>18</sup> Chanĩma Niospa a noko yoyoni keskara mã noko õimasharakõia mã nõ tãpia. Nãskakẽ noko pãratiroma. Noko yoini iskafakĩ: “Ëfe Fake ẽ matoki nĩchixii mãto chaka mato soaxonõ mã efe ipaxanõ,” ixõ noko yoini. Nãskakẽ nõ chanĩmara fai nã noko yoyoni keskara ãfe Fakeõnoax Epa Nios ano nõ afe ipaxatiro. <sup>19</sup> Nãskaxõ anã afaa fetsa nõ shinãtiroma. Nios makinoakai tsõa noko potatiroma. Nãskakẽ Epa Nios fe nõ ipanaka. <sup>20</sup> Jesús nai mēra kani nõ aõnoax chipo kanõ. Nãrixõ xanĩfokõixõ noko Apa Nios kĩfixõfafãini Melquisedec ipaoni keskaraxõ.

## 7

### *Nã Melquisedec yorafo Nios kĩfixomis ipaoni*

<sup>1</sup> Akka Melquisedecnoa ẽ mato yoinõ afe keskara ipaonimãki. Melquisedec xanĩfo ipaoni pexe rasi ãfe ane Salem anoax. Askatari ato Nios kĩfixomis ipaoni. Nã cuatro xanĩfofo yometso chakafo ato ãchõxõ Abraham ãfe pia ifitani, afama mĩshtifoya oaino, nã Melquisedec Abrahamki nokoni. Nãskata Melquisedec Abraham Nios kĩfixoni axosharanõ. <sup>2</sup> Askafaito õikĩ Abraham Melquisedec nã afama mĩshti fitanai ranãri inãni. Nã Melquisedec ãfe ane “Asharakõimis,” famisfo. Nã Salem pexe rasi anoax xanĩfo ipaoni. Nã Salem ãfe ane

“Isharakōi,” fapaonifo. <sup>3</sup> Nā Melquisedec āfe epa yafi āfe efa nō tāpiama. Āfe xiniforikai nō tāpiama. Askatari nō tāpiama a fake kānitiā. A nanitiāri nō tāpiama. Nāskakē nō Melquisedec shinākī Niospa Fakeri nō shinātiro. Nāato noko Niosnoa kīfixomis xanīfo ipanaka.

<sup>4</sup> Efe yora mīshtichi, shinākapo. Melquisedec xanīfokōi ipaoni tsoa keskarama. Akka Abraham israelifāfe taefenai āto xini iyopaoni. Abraham sharakōi ipaoni. Askafixō Abraham Melquisedec afama mīshti ināni āfe afaayamafekē. Akka Melquisedec xanīfo finakōia ini Abraham sharafiano. <sup>5</sup> Israeli xoko fetsafo Leví āfe fenafo Epa Niospa katonī. Nāfāfe āto kaifo Epa Nios kīfixopaonifo. Nāskakē Moisés yoini keskafakī nā ato Nios kīfixomisfo kori fisti rasi ato ināpaonifo. Askatari āto afama mīshtifori ato inānifo āto kaifāfe. <sup>6</sup> Akka Melquisedec Leví āfe fenayamafiano Abraham āfe afama mīshtifo fetsa fet-satapafo ināni. Nāskakē Melquisedec Abraham yoini iskafakī: “Abraham, mia Niospa axosharai,” ixō yoini. <sup>7</sup> Chanīma, keyokōi nō tāpikōia fētsa ato finōkōixō āfe meka pa ato shara fatiro. Nāskakē nō tāpia Melquisedec Abraham finōkōia. <sup>8</sup> Nāskakē nā israeli xoko fetsafāfe nā Leví fenafo afama mīshti ato ināfinifono nāfo mā nai keyonifo. Akka Melquisedec Abrahamnā afama mīshti fini. Akka Niospa meka yoikī ken-nifo Melquisedec iskaratīa nia keskara. <sup>9-10</sup> Leví fenafāfe āto xini Abraham ipaoni. Nāskaxō Abraham Melquisedec afarafo ināino Levífāfe akairi ināi keskafanifo. Nō tāpiama afetiāra nani. Nāskakē nia keskara nō famis. Nā Abraham Melquisedec afarafo ināitiā Abraham āfe fena Leví anokai fakeama ini. Chipa Leví fakeni. Nāskakē nō tāpitiro Melquisedec fistichi āto xini Abraham yafi ato finōkōia.

<sup>11</sup> Efe yora mīshtichi, shinākapo. Epa Niosxō Moisés noko yoini keskafakī Leví fenafāfe noko Nios kīfixomisfāfe noko ifi-tirofono Niospa āfe Fake nīchikeranima Apa Nios noko kīfixomis inō. Cristokai Leví āfe fena Aarón keskarama. Nā Cristo Melquisedec keskarakōi. <sup>12-14</sup> Akka tae fenai Leví āfe fena Aarón ini. Nā Aarón yorafo ato Nios kīfixomis ini fetsafāfe āto xanīfo. Akka nōko Ifo Jesús kai Leví āfe fenama, xoko fetsa ini. Nāskax Aarón keskarama. Akka nōko Ifo Jesús Judapa fena. Nā Levipa chipoko Judá. Akka, “Judapa yorafāfe yorafo ato Nios kīfixomisfo itirofora,” ixō Moisés yoinima. Askafiano Niospa āfe Fake Jesús nīchini yorafo ato Nios kīfixomis inō. Nāskatari a Moisés yoini keskara Epa Niospa fetsafani.

<sup>15</sup> Nāskakē anā ē mato mēstekōi yoisharapai. Iskaratīa xafakīakōi nō tāpishara Nios afara fetsa yoini keskara noko Nios kīfixomis āfe fena Jesús, Melquisedec keskara nokoki nokoni. <sup>16</sup> Akka Moisés yoini keskarakōi Leví āfe fenafo fisti

ato Nios kīfixomisfo itirofoki. Jesús kai Leví fenaxoma a Moisés yoini keskarañoax noko Nios kīfixomis itiroma. Askatamaroko Niospa Jesús katonni noko kīfixomis inō. Āfe sharaōxō Epa Niospa Jesús otofani. Anā nanakama. Nāskax noko Nios kīfixomis ipanaka Niospa sharaōxō. <sup>17</sup> Nānori Niospa yoiyoni David Jesucristoōnoa kenekī iskafani:

Mī Melquisedec keskara. Nāskaxō mī yorafo Nios kīfixomis ipanaka,

ixō keneni. <sup>18-19</sup> Nāskakē a Moisés yoini keskarakai nō anā ifofaima. Nokokai imasharatiroma. Askatari nōko chaka noko soaxomisma nō Nios fe ĩpaxanō. Akka Jesús āfe meka askarama. Āfe meka sharafinakōia. Epa Niospa Fake nokoki nīchini aōnoax nō afe ipanaka.

<sup>20-21</sup> Akka Epa Niospa āfe Fake yoini keskafakī kai Leví āfe fenafo anori yoinima. Niospa yora shināmanaino iskara keneni, Niospa āfe Fake Jesús yoikī iskafani:

Na meka ē mia yoiai chanīmakōi. Nāskakē ē anā fetsapak-enakama. Ē yorafāfe āto Ifokōi. Nāskakē a ē mia yoiai keskafakī yorafo mī ato ea kīfixomis ipanaka,

ixō Epa Niospa āfe Fake yoini. <sup>22</sup> Akka Apa Niospa nānori yoinikē nō tāpitiro Jesúsnoax Nios fe nō ipaxatiro. Akka Moisés meka askarama. Aōnoax Niospa yorafo nō itiroma. Akka Epa Niospa Moisésxō Leví āfe fenafo yoini keskara sharafiano akka āfe Fake Jesús yoini keskara sharafinakōia.

<sup>23</sup> Akka a āto kaifo ato Nios kīfixomisfo ichapafofiax afo natirofo. Tsoa nīpaxatirofoma. Mā fetsa nano fetsari katotirofo atori āfe yorafo Epa Nios kīfixomis inō. <sup>24</sup> Akka Jesús kai ato keskarama. Nāfi nīpanakā nāato noko Epa Nios mēxotaima kīfixomis ipanaka. <sup>25</sup> Nāskakē Apa Niosxō noko ifitiro nō afe ĩpaiyaito nokoōxō Apa Nios yoifafāini iskafakī: “Epa Niosi, ē ato nāxoniki, ato chaka soaxōfe. Nāskaxō a mī ika ano ato imafe,” ixō nokoōxō Apa yoimis. Nāskakē a nokoōnoa Apa yoia keskafakī noko nāskakōi faxoxii nō afe ĩpaxanō. Nāskax kai nō fenopakenakama.

<sup>26</sup> Akka nā Jesúsfi noko Nios kīfixomis xanīfokōikī. Apa Nios keskara sharafinakōia. Fetsafo finōkōia. Tsōakai aōnoa afaa chaka yoitiroma. Aatokai afaa chaka shināmisma yora chakafo keskarama. Nāskaxō Apa Nios ika anoafori ato finōkōia. Nāskaxō a nō yopaifo noko axosharatiro. <sup>27</sup> Akka a ato Nios kīfixomis xanīfo fetsafo keskarafo. Taefakī afāfe pena ti yoinā ina retepaonifo Epa Nios inākakī ato chaka soaxonō. Nāskakē Niospa mā ato chaka soaxonano yora fetsafāferi ato yoinā inafō inānifo, atori Epa Niospa chaka soaxonō. Akka Jesús kai ato keskarama. Jesús ato finōkōia. Nāskakē Jesús nai fistini noko chaka soaxonano Epa Nios fe

nõ ipaxatiro. <sup>28</sup> Akka Epa Niosxõ Moisés yoini keskafakĩ yorafoõnoa Epa Nios ato kĩfixomisfo inõfo ãto xanĩfofo katonifo. Akka nãfofi noko keskarafori nãfãferi afara chakafamisfo. Nãskakẽ Niospa yoiyoni keskafakĩ ãfe Fake Jesús chipo katonni nokoõxõ Nios kĩfixomis ĩpaxanõ. Aatokai afaa chakafamisma. Isharakõimis.

## 8

*Epa Niospa meka fenasharakõiyoini Jesús noko nãxonõ nõko chaka noko soaxoxii*

<sup>1-2</sup> Akka nã sharafinakõia nõ yoiyai nãfi Apa Nios xanĩfokõi ika ari afe ikaki. Nãskakẽ nõ afara yoipaiyaito nokoõxõ Apa yoipakenaka. Nãatofi noko Apa Nios kĩfixomis xanĩfokõikĩ. Nãskakẽ a ika arikai tsõa afaa fetsa onifanima. Akka Nios fistichi onifani. Nãskakẽ ariax Apa fe nokoõnoax mekakakãini. Nã ika ari nai mẽra anoa a anoxõ Nios kĩfiti pexefã keskarakõifiax finakõia. Nãskakẽ nã ě mato kenexona keskara xafakĩakõi mã tãpitiro.

<sup>3</sup> Nã ato Nios kĩfixomis xanĩfokõi inõfo Niospa ato katonni afarafo yorafãfe Nios inãkata finõfo. Askatarĩ yoinã inafõ fixõ retexõ koofaxõ ato kĩfixonõfo ãto chaka ato soaxonõ Niospa ato katonni. Nãskakẽ nã Jesús, noko Nios kĩfixomisto, nãatorĩ Nios inãni. Yoinã ina inãnima. Askatamaroko ãa noko nãxonni nõko chaka noko soaxoxiki. ãfe ãpa amapaiyai keskara ani. <sup>4</sup> Moisés yoini keskafakĩ Levĩ ãfe fenafos israelifãfe ato Nios kĩfixomis itirofo yoinã retexõ ato Nios inãnoxikakĩ Niospa ato chaka soaxonõ. Akka Jesúskaĩ Levĩ ãfe fenama. Nãskakẽ Jesús nono mai ano ixõ nokoõxõ Apa Nios kĩfimis ikeranama. Akka nai mẽra ixõ noko kĩfixomis, Niospa ato katoano. <sup>5</sup> Akka nono mai anoxõ nã Levĩ fenafãfe a anoxõ Nios kĩfiti karapa pexe mẽraxõ yonopaonifo. Nãnoxõ ãto kaifo israelifo tãpimapaikakĩ Nios ika ari afe keskaramãkĩ tãpinõfo. Askafixõ askarakõi tsõa tãpiyonima. Nãskakẽ Epa Niospa Moisés yoini iskafakĩ karapa pexe fayomanõ: “Ĕ mia yoiyai keskafakĩ a anoxõ ea kĩfiti karapa pexe fafe. ¿Mã mĩ shinãimẽ ě mia machi anoxõ tãpimana keskara nãskakõi fafe karapa pexe fakĩ? Nãskakẽ a yonomisfo tãpimafe nã ě mia yoiyai keskarakõi fanõfo,” ixõ Epa Niospa Moisés yoini. <sup>6</sup> Akka Niospa ãfe Fake Jesús yoini keskarato a Moisés yoini keskara finõkõia. Nãskakẽ Jesús Apa ika arixõ nokoõxõ Apa Nios kĩfifafãini. Akka Levĩ fenafãfekai askafapaonifoma. Epa Niospa ãfe Fake Jesús yoiyoni keskarakõi ato yoimisma. Akka nã ato yoiyoni keskara sharafiano nã ãfe Fake Jesús yoini keskararoko sharafinakõia.

<sup>7</sup> Niospa Moisés yoini keskara nõ nikasharakõixõ nõ afara chaka nõ fakeranama. Akka nõ nikasharakõima. Nãskakẽ Epa Niospa aõxõ noko ifitiroma. Nãskakẽ noko fetsa yoini



iskafakī: “Ēfe Fake ě nīchixii mato nāxonō mato chaka soaxonō. Mā Jesús Ifofaino ě mato ifixii,” ixō Epa Niospa yoini. <sup>8</sup> Akka Epa Niospa Moisésxō yoini keskarakai tsōa askara nikasharakanamax nōko xinifo nikayospakōi inifo. Nāskakē nōko Ifo Niospa yoini iskafakī:

Ē chipo na efe yorafo israelifo yafi Judapa āfe fenafo meka fena shara ě ato yoixii. Nā ě ato sharakōi axōai keskara ě ato ōimaxii. <sup>9</sup> Ē āto xinifo Egipto anoa iyonī. Nāskaxō ě ato yoisharani ěfe meka nikasharaifāfe ato kexesharafafāixikī. Ē ato yoisharafiaino ěfe meka kachikiri fanifo. Nāskakē ě ato potani. Akka a āto xinifo ě ato yoini keskarakai ě āto fenafo askara ě yoixiima. Askatamaroko ěfe meka fena shara ě ato yoixii ea nikasharanōfo. <sup>10</sup> A ě israelifo yoixiai kene fistiōxō ě ato tāpimaxima. Askatamaroko āto shinā mēra ěfe meka shara ě nanexii āto ōiti mēraxō a kirika kenea keskara sharaōxō shināsharanōfo. Nā ě ato yoiai keskakōixii shināsharaxikani. Nāskakē ě āto Epa Nioskōi ixii. Akka afo efe yorafo ixikani. <sup>11</sup> Akka anā fisti rasichi ato tāpimaxianima. Keyokōichi ea tāpīxikani. Yorafo afamafāferi ea tāpiaifono, xanīfofofāferi ea tāpikōixikani. Nāskakē anā eōnoa tsōa ato tāpimaxima akōi keyokōichi mā ea tāpikōiafono. <sup>12</sup> Ē ato chaka soaxoxii afara chakafafiaifāfe. Nāskaxō a afara chakafamisfo ě anā shināpakenakama, ixō Niospa yoini. <sup>13</sup> Nāskakē Niospa anā ato yoini iskafakī: “Meka fena shara ě mato yoinō,” ixō ato yoini. Akka a Moisés ato yoini keskarakai anā tsōa shinātiroma. Nā Moisés ato yoini keskara meka xinikōi. A mekakai anā tsōa shināpakenakama. Nāskakē nā meka shināmakipakenakafo.

## 9

*Karapa pexe kene fetsa mēraxō Epa Nios ato kīfixopaonifo. Akka iskaratīa Jesús noko kīfixomis Apa Nios ika arixō*

<sup>1</sup> Ē mato yoinō afe keskara yorafo ipaonifomakī. Akka Epa Niospa Moisés yoini afeskaxō nono mai anoxō afe yorafo ato Nios kīfixotirofomākī Niospa ato chaka soaxonō. Akka karapa pexe fanifo a mēraxō Nios kīfinōfo. <sup>2</sup> Akka a karapa pexe fanifo mēra kene rafe ini. Nā kene rekētana mēra siete rāpari oro otatia metax keskara ini. Askatari mīsari a mēra ini. Nā mīsa kamaki mēxotaima doce pāa fapaonifo. Nā kene rekētana anenifo iskafakakī: “Nios chaimashta ika,” ixō anenifo. <sup>3</sup> Akka karapa pexe fanifo mēra sama namikōi nakirafekōi potexō xītia ini. Nā kene chikaya anenifo iskafakakī: “Nono Nios ikōina,” ixō anenifo. <sup>4</sup> Nā kene rekētana ketaxamei mīsa kafāshara oroya taxa fanifo ini. A kamakixō nakas potoshara kooati ipaoni. Nāskatari kene chikaya fetsa mērari kafo oroya taxtafanifo

ini. Nã kafo mēra pãa keskara ãfe ane mãnã kecho oro mēra nanea ini. Akka Aarón ãfe chatiri nã kafo mēra naneyoamano Niospa nã Aarón ãfe chati charofo onifayoni. Nãskata Aarón ãfe chati chipo kafo mēra naneni. Nãskatari Niospa Moisés ãfe meka makexki kenexõ inãni nikanõfo. Nã makex para Niospa mekaya nã kafo mēra nanea ini. <sup>5</sup> Nãskakē nã kafo mãmākĩa Niospa ãfe ãjiri keskara raferi nia ini. Āto peta rafeta kafo fepoafõ keskara ini. Nãskakē nã Niospa ãfe ãjiri keskara rafeoxõ nõ tãpitiro Nios fãsi sharakõikē nõko chaka noko soaxomis. Askafiano akka nafoõnoakai ě mato iskaratĩa yoitiroma.

<sup>6</sup> Nãskakē nã Nios kĩfiti karapa pexe kene rekētana mēra a ato Nios kĩfixomisfo mēxotaima ikipaonifo anoxõ nakas potoshara koofaino ato Nios kĩfixoxikaki. <sup>7</sup> Akka a kene fetsa mērari tsoa ikitiroma ipaoni. Nã ato Nios kĩfixomis xanĩfo finakõia fisti ikipaoni. Xinia fisti ata ikipaoni. Nãskatari imimais ikipaonima. Yoinã imiya ikipaoni nã imi Epa Nios inãxikĩ ãfe chaka soaxonõ, askatari afe yorafori ato chaka soaxonõ. <sup>8</sup> Nãskakē Niospa Yõshi Sharapa xafakĩa noko tãpimani. Akka nã karapa pexe iyoano ãfe kene fetsa mēra tsoa ikipaonima. Nã ato Nios kĩfixomis xanĩfokõi fisti ikipaoni Nios fe mekaxiki. Yorafo Epa Nios fe mekayoxoma, Nios ato kĩfixomis xanĩfo fisti yoiyopaonifo. <sup>9</sup> Nãskakē nã ipaonifoõnoa iskaratĩa noko shinãmatiro Moisés ato yoini keskafakĩ. Karapa pexe ano yoinã ina retexõ inãpaonifo Niospa ãto chaka ato soaxonõ. Askafikanax isharapaonifoma afara chakafakaxõ shinãtaifapaonifo. <sup>10</sup> Akka Moisés ato yoini keskafakĩ a ato Nios kĩfixomisfãfe nãskakõi fanifo. Nãskaxõ afara shara fetsafori ato tãpimani Moisés meka. Afara pita, afara ayata mã fatiro ato fani. Askatari afaari mã pitiro, afaari mã ayatiroma ato fani. Askatari ato tãpimani afeskax mechokometirofomãki Epa Niospa ato nikakõinõ. Akka askafiaifono afãfekai ato chaka soaxokõitirofoma. Cristo oyoamano nãnori Niospa ato yoiyoni. Nã Cristo naitĩa aõxõ keyokõi Niospa fetsafani. Nãskakē nõ Jesús Ifofaino, Niospa nõko chaka noko soaxotiro. Nãskakē a Moisés yoini keskara anã tsõa ifofasharatiroma ãfe chaka soapaikĩ.

<sup>11</sup> Akka Cristo mã anã nai mēra kaax, noko Nios kĩfixomis xanĩfokõi ini. A Niospa noko yoiyoni keskara noko inãmis. A karapa pexe anoxõ a ato Nios kĩfixomisfãfe ato Nios kĩfixopaonifo yorafãfe anifo. Akka Jesús noko kĩfixomis ano sharafinakõia Nios fistichimãi nai fanino. <sup>12</sup> Akka Cristokai karnĩro imi fota fakka fakeshtari fonima. Askatamaroko nokoõnoax nakĩ ãfe imi foax ikisi Apa Nios ari kani. Nãskaxkai anã Jesús nanakama. Nãskaxõ nõko chaka noko soaxonano ãfe Apa Nios ari nõ katiro. <sup>13</sup> Akka chanĩma, karnĩro yafi

fakka retekaxõ ãfe imi fikaxõ nã karnĩro koofakaxõ ãfe chii mapoya nã imi osikaxõ saa saa anifo Epa Niospa ato chaka soaxonõ anã choshta keskara iyamanõfo. <sup>14</sup> Akka Cristokai afaa chakafamisma. Nãfi sharafinakõia. Niospa Yõshi Shara a nĩpanakato Jesús shinãmani. Nãskakẽ Apa yoini iskafakĩ: “Epa, ã atoõnoax naikai. Nãskakẽ ãfe imi foano eõxõ mĩ ãto chaka soaxotiro mefe yorafo inõfo,” ixõ Apa yoini. Akka a nõ Nios inimamapaikĩ nõ shinãpaoni keskara nõ anã shinãima. Akka iskaratĩa nõ Nios inimamapaikĩ nõ nikasharakõitiro. Nã Nios nĩpanaka sharafinakõia.

<sup>15</sup> Akka a Moisés ato yoini keskara sharafiano tsõa nika-paonima. Afara chakafapaonifo. Nãskakẽ nã afara chakafa-paonifo keskara Cristo fistichi ato chaka soaxotiro. Akka a Moisés yoipaoni keskara anã ato yoitiro. Nãskakẽ Cristo oni nokoõnoax naiyoi nõko chaka noko soaxoxiki nõ Nios fe ipaxanõ. Nãskakẽ Niospa noko yoini iskafakĩ: “Ekeki fekãfe ãfe Fakeõnoax efe yorafo ixikakĩ,” ixõ noko yoini. Nãskaxõ a noko yoiyoni keskara noko inãxii. <sup>16-17</sup> Iskaratĩa afara fetsa ã mato yoinõ mã tãpinõ. Nõ nayoxoma nõ yoitiro iskafakĩ ato yoikĩ: “Ë naano tsõa ãfe afarafo fiimãkai ikisi ã mato tãpimayonõ,” ixõ nõ yoitiro. Nãskakẽ nã nõ yoiyomis keskafakĩ nõ nayoxoma nõko afarafo fetsafo inãpaikĩ nõ yoitiro. Akka nõ nayoamano nõko afarafo tsõa fena fitiroma. <sup>18</sup> Nãskakẽ Niosxõ Moisés afe yorafo yoini ãto yoinã inafõ reteaifono imi fonõ. Akka a yoinã inafãfe imi foyamaino a ato yoiyoni keskafakĩ Niospa ato chaka soaxotiroma. <sup>19-20</sup> Taefakĩ Epa Niospa shinãmanaino Moisés israelifo keyokõi ato yoini nikanõfo. Mã ato yoikĩ mitoxõ, nã ifi hisopo ãfe põya pishta fini. Mã fixõ fakka fake imi yafi oveja imi fakkaya osini. Nãskaxõ ifi hisopo põya pishta fixõ oveja raniya texkeani. Nãskata nã ifi hisopo põya pishta texkeata fakka fake imiki momo momo axõ nã Niospa meka kirikaki kenea a Niospa yoiyoni keskafakĩ fakka imi saa saa ani. Askatari yorafokiri fakka imi saani. Ato yoikĩ iskafayanã: “Na imioxõ mã tãpitiro Epa Niospa noko yoiyoni keskara axii. Nãskax nõ afe yorafo itiro,” ixõ Moisés ãfe kaifo yoini. <sup>21</sup> Nãskatari nã karapa pexe a mēraxõ Nios kĩfiti Moisés imĩ saa saa ani, askatari a mēranoafori keyokõi imĩ saa saa ani. <sup>22</sup> Chanĩma, nã Epa Niospa Moisés yoini keskafakĩ Moisés imi saakano karapa pexe anoafõ keyokõi ato chaka soaxona. Akka imi foyamaino noko chaka soaxotiroma. Anã ano fato fetsama nõko chaka noko soaxotiro.

*Cristo nõkoõnoax nani noko chaka soaxoxiki*

<sup>23</sup> Nã anoxõ Nios kĩfiti karapa pexe mēranoa keskarakõifo Nios ika ari. Nãfoki ato Nios kĩfixomisfãfe yoinã imi saanifo

Niospa afo õisharanõ. Akka a karapa pexe mēranoa imifo sharafiano afāfe nōko chaka noko soaxotiroma. Askatamaroko nā Cristo nokoõnoax nai fistini nōko chaka noko soaxoxiki. Noko chaka soaxonano Nios ika ari nō katiro, a keskara shara afe ipaxakī. Askatari anokai a anoxõ Nios kīfiti karapa pexe keskarama. A Nios ika ano sharafinakōia. <sup>24</sup> Akka yorafāfe karapa pexe fanifo anoxõ Nios kīfinõfo. Nāskakē a mēra a Nios nai mēra ika keskarakōi ipaoni. Akka Cristo mā otoax a karapa pexe fanifo mēra ikinima. Askatamaroko Apa ari nai mēra kani. Nāskakē iskaratīa ari afe ika noko Apa Nios kīfixōfafāixiki. <sup>25</sup> Akka nā ato Nios kīfixomis xanīfo karapa pexe kene fetsa mēra ares fisti xinia fisti akax ikipaoni a mēraxõ Nios kīfixiki. Āfe imikōiya a mēra ikitamaroko, yoinā imiya ikipaoni. Akka Cristokai ato keskarama. Akai mēxotaima natiroma, nai fistini Apa Nios ari kaxiki. <sup>26</sup> Akka askakatsakī Cristo nokoõnoax nai ranā ranākerana nā Niospa mai onifanichāi. Akka askamisma. Jesús nai fistini ĩkisi noko keyokōi chaka soaxoxiki. <sup>27</sup> Akka keyokōi nō nai fetsexii. Nō naax keyokōi nō akiki nokoaito noko yoixii a nō niyoxõ amis keskara. Nāskakē a nō amis keskara noko yoiaino nā Jesús Ifofaafo tii afe isharaapakenakafo. Akka nā nikamisfoma omiskōipakenakafo mēra ato potaxii. <sup>28</sup> Cristo āari ināmeax noko naxõi fistini. Yora ichapafoõnoax omiskōixõ noko nāxoni. Askafiax anā āfe yorafoki oxii, noko ĩkisharaapakexakī. Nāskakē anā nokoõnoax nanakama noko chaka soaxoxiki. Askatamaroko aõnoax nō isharaapakenaka.

## 10

<sup>1</sup> Niospa Moisés yoini keskaraõxõ nō tãpitiro Cristo noko afarasharakōi faxoxiai. Nāskakē nā Moisés ato yoini keskarakai tsoa imasharatiroma. Afia Moisés ato yoini keskafakī nā xinia tii a ato Nios kīfixomisfāfe yoinā inafõ retepaonifo Niospa ato chaka soaxonõ. Askatari a Moisés yoini keskaratokai ato imasharamisma Nios fe ĩpaxanõfo. <sup>2</sup> Akka a ato Nios kīfixomisfāfe yoinā inaoxõ ato chaka soaxonaifono, tsõa anā akeranama yoinā ina retekī. Āfe chakaõxõ anā shināchakakeranama. Nāskakē anā tsõa yoinā ina retekeranama. <sup>3-4</sup> Akka askarama. Nā xinia tii cabra ato retexonaifotīa nā afara chakafamis keskara ato shināmapaonifo. Akka yoinā ina imioxõ āfe chaka ato soaxotiroma.

<sup>5</sup> Nāskakē Cristo mai ano fotoyoxoma Apa yoini iskafakī:

Epa, mīkai fichipaima yoinā ina imioxõ āto chaka soanõfo. Askatamaroko yorakōi mīa ea onifani ēfe yora ē mia inānõ. Nāskaxõ yorafoõnoax naxõ ē ato chaka

soaxoxiki. <sup>6</sup> Akka yorafāfekai mia inimamakanima yoinā ina retekaxō kooakī mī ato chaka soaxonō, ixō yoini. <sup>7</sup> Akka anā mē mia yoia iskafakī:

Mē nono mai ano fotoa a mīa amapaiyai keskara ē axiki.

Nānorikōi mī meka yoimisto eōnoa yoikī keneyoni, ixō Cristo Apa yoini. <sup>8</sup> Efe yora mīshtichi, shinākapo. Cristo Apa yoikī taefani iskafakī: “Epa, mīōxō Moisés ato yoini keskara sharafiano mī anā fichipaima. Akka nāato ato yoikī iskafani: ‘Yoinā inafō retekāfe āfe imi foano aōxō Niospa mato chaka soaxonō,’ ixō ato yoini. Akka a yoinā retexō koakaxō mia ināifāfekai afāfekai mia inimamaima,” ixō Apa yoini. <sup>9</sup> Nāskaxō anā yoikī iskafani: “Epa, ē nono mai ano ē fotoni a mīa amapaiyai keskara axiki,” ixō Apa yoini. Akka Cristo noko nāxoni noko chaka soaxoxiki. Nāskakē a Moisés ato yoini keskara nō anā nikatiroma nōko chaka Epa Niospa noko soaxonō. Nāfo mā Niospa fetsafaa. <sup>10</sup> Nāskakē a Apa amapaiyai keskai Jesucristo āari ināmeni noko nāxoxikī aōnoax nō a keskara shara inō. Nāskakē nō anā afaa fetsa fichipaima māmāi Jesús noko nai fistixonikē.

<sup>11</sup> Akka a atoōxō Nios kīfixomisfāfe pena tii yoinā ina retepaonifo Epa Niospa keyokōi ato chaka soaxonō. Askafekēkai afāfe ato chaka soaxopaonifoma. <sup>12</sup> Akka Jesucristo mā noko nai fistixoni noko chaka soaxoxiki. Nāskakē nō anā afaa fetsa yopanakama noko chaka soaxonō. Nāskakē mā nokoōnoax naax Apa Nios ari kani ariax afe xanīfokōi ikikai. <sup>13</sup> Akka mā Apa ari kanixakī iskaratīa arixō manai, a noikaspamisfo Apa Niospa ato potaitīa. Nāskakē Jesucristo Apa fe xanīfofinakōia ixii. <sup>14</sup> Nāskakē āarifi ināmei fistixō noko nāxoni nōko chaka noko soaxoxiki. Nāskaxō nō Ifofaax a keskara shara nō ixii. Nāskakē Niospa anā afaa chaka nōkoōnoa oipakenakama. Nāskakē nōri a keskara sharakōi ixii.

<sup>15-16</sup> Nānori Niospa Yōshi Sharapa noko yoiyoni iskafakī:

Efe yorafāfe, ea Ifofaifono āto shinā mēra ēfe meka ē nanexii āto ōiti mērari a ēfe meka kenea keskara ē faxii ea Ifofasharanōfo,

ixō yoini. <sup>17</sup> Nāskaxō anā yoikī iskafani:

Mā ea Ifofaino ē anā shināpakenakama a mā chakafamisfo, ixō Niospa Yōshi Sharapa yoini. <sup>18</sup> Akka mā noko chaka soaxonano, nāskakē nō anā yoinā ina inātiroma noko chaka soaxonō.

*Nios fe rafesharakōikāfe*

<sup>19</sup> Efe yora mīshtichi, nāskakē nō nai mēra ikitiro Nios ano ranotama Jesucristomāi nokoōnoax nai imi fonikē, noko chaka soaxoxiki. <sup>20</sup> A ato Nios kīfixomisfo kīfiti pexefā kene fetsa mēra xinia tii ikifistipaonifo ato Nios kīfixoxikakī. Anā iskaratīa nō

yopatiroma askara. Anã askafapanakama. Akka iskaratĩa afara fetsa fenasharakõi Jesús noko axoni. Nãskakẽ mã Jesús naino nã Nios kĩfiti pexefã kene mēranoa sama nãmĩfã faxtetani anã tsoa ikiyamanõ. Nãskakẽ nãkõi nã Nioskõi nõ kĩfitiro. <sup>21</sup> Nõko Ifo Jesús nokoõxõ Apa Nios kĩfixomis xanĩfokõi. Nãskakẽ keyokõi Niospa fakefãfe ato Ifokõi. <sup>22</sup> Nãskakẽ nõ Jesús chanĩmara fakẽ nã noko nãxonioxõ nõko õiti fena sharakõi noko faxotiro. Nãskaxõ a nõ afarafo chakafamis keskarafõ anã nõ shinãtiroma nõko õiti inimakõitiro. Nãskaxõ faka sharapa nashimana keskara noko fatiro anã afaa chaka nõko shinã mēraxõ nõ shinãnõma. Nãskakẽ Nios fe rafekãfe. <sup>23</sup> Akka nõ yoikĩ iskafamis: “Jesús nõko Ifokẽ Epa Niospa a noko yoiyoni keskara noko axoxii,” ixõ nõ yoimis. Nãskakẽ afaa fetsa shinãyamakãfe. Nã nõ shinãi fisti shinãfafãikãfe. <sup>24</sup> Akka Epa Niospa noko sharafamis. Nõri nõ shinãsharanõ afesxaxõ nõ fetsafo shinãmasharatiromãkĩ nõinã faatanãkaxõ afara axoshara faatanãnõfo. <sup>25</sup> Mã mã tãpia mã Jesús chaima oi. Akka fetsafo anã ichanãmifoma. Nãskakẽ ato keskara iyamakãfe. Nãskakẽ ichanãi xateyamakãfe. Jesúsnoa mã shinãi keskafakĩ fetsafori yoitaifakãfe mãto õiti inimasharakõinõ.

<sup>26</sup> Fatora fẽtsa mã tãpia Jesús nokoõnoax nani nõko chaka noko soaxoxiki. Nãskara mã tãpifixõ afara chakafakĩ nõko Ifo Jesús kachikiri fakĩ, askarakai Niospa ãfe chaka soaxotiro. <sup>27</sup> Nãskarafo Niospa ato omiskõimaxii. Akka Niospa ato õiaino ratei finakõixikani. Nãskakẽ Niospa ato yoixii iskafakĩ: “Emakinoax omiskõipakenakafo mēra fotakãfe, chiifã mēra,” ixõ ato yoixii. <sup>28</sup> Akka fẽtsa nã Moisés yoini keskara nikakaspakĩ afara chakafaito fẽtsa õixõ xanĩfo yoimis. Fistichi yoiyamakĩ rafeta yoitiro, askayamakĩ trespa yoitiro iskafaki: “Mã nõ õia nato afara chakafaito,” ixõ yoitirofo. Nãskakẽ xanĩfãfe yoitiro: “Na feronãfãke afara chakafaa mã natiro,” ixõ yoitiro. <sup>29</sup> Akka nã Moisés yoini keskara nikakaspaifo afo retepaonifo keskafakĩ fatorafãferi Jesús nikakaspamifokẽ Niospa ato omiskõimakĩ finakõixii. Nãskakẽ nã yora chakafãfe shinãkĩ iskafamisfo: “Mẽ nikamis Jesús ea nãxoni. Nã naino ãfe imi foni. Nãskaxõ ea katoni aõnoax ã Niospa fake inõ. Akka ã shinãikai afama. Nãskakẽ ã Jesús Ifofapaima,” ixõ anori shinãkĩ nãato Niospa Fake nikakaspakõimis. Askara meka yoikĩ Niospa Yõshi Shara chakafakĩ mekafamis, Niospa Yõshi Sharapa sharafafiamisno noikĩ. <sup>30</sup> Akka mã nõ tãpia Niospa yoikĩ iskafani: “Afara chakafãfãfe ã ato omiskõimaxii,” ixõ yoini. Askatari yoikĩ iskafani a kirika keneano: “A ea Ifofaafãfe afara chakafãfono ã ato omiskõimaxii,” ixõ yoini. <sup>31</sup> Akka fatorafãfe nõko Ifo Jesús kachikiri fakaxõ afara chakafariafãfono atonã fãsi mesekõi ixii. Nãskakẽ askarafo nã Nios nĩpanakato ato achixõ ato omiskõimakĩ finakõixii.

<sup>32</sup> Shinākapo efe yora mīsttichi. Mā taefakī Jesúsnoa tāpioxō mā Ifofani keskakakī shināmakiyamakāfe. Fetsafāfe mato Jesús Ifofatimafaifono ato nikatama mā nōko Ifo Jesús Ifofasharakōipaoni. <sup>33</sup> Nāskaxō mā Jesús Ifofasharaito ōikakī fetsafāfe mato Ichayanā mato omiskōimamisfo. Akka a Jesús Ifofamis fetsafori omiskōiaifono māri ato fe omiskōipaimis. <sup>34</sup> A Jesús Ifofaa fetsafo karaxa mēra ato ikimanifo. Nāskakē mā ato noiyanā ato inimamapai karaxa mēranoa mā ato ōikai kani ato shināmasharata ato inimamaxiki. Nāskatari nā Jesús Ifofaafāfema māto afarafo mato fiakī keyokōinifo. Mato askafafiaifono a shināchakatamaroko mā tāpini Epa Niospa nā ika arioxō mato afara mekexona afokai fenopakenakama. Nāskara tāpiax mā inimakōini. <sup>35</sup> Nāskakē a mā Jesús chanīmara faa keskakakī kachikiri fayamakāfe. Mā kachikiri fayamakē Epa Niospa mato sharafaxii noko yoyioni keskakakī. Nāskaxō afara shara mato ināxii. <sup>36-37</sup> Akka Niospa meka keneni iskai:

Cristo mā chaima matoki oi, samarakaima, ixō kenenifo. Nāskakē mā Jesús Ifofasharai keskakakī omiskōifikī tenekāfe. Epa Niospa mato ināpaiyai keskara aōxō nā mato yoyioni keskara mā fixii. <sup>38</sup> Nāskaxō anā Niospa meka kenenifo iskakakī yoikī:

Nā ea chanīmara fai ē imasharaito, nāato ea Ifofasharakōixii. Akka nā ea kachikiri faafoki ē inimaxima, ixō Niospa yoini kirika keneano. <sup>39</sup> Nāskarafāfe Jesús kachikiri fakanax omiskōipakenakofo mēra fokani. Akka nōkai askarama. Askatamaroko nō Jesús chanīmara fakōimis noko nimasharapakexanō nō afe ipaxakī.

## 11

### *Nios nikakōipaonifo*

<sup>1</sup> Akka nō Epa Nios chanīmara fakōioxō a noko yoyioni keskara noko axoyoamano nō chanīmara fai chipomāi noko axōfaito. Nāskarifiakī a noko yoyioni keskara nō ōiyamafioxō āfe mekaōxō nō chanīmara fai. Nāskara nō shinākī nō Nios chanīmara fai. <sup>2</sup> Nāskakē nōko xinifāfe Niospa ato yoini keskara chanīmara fakōipaonifo. Nāskakē Epa Nios atoki inimakōikī atoōnoa meka shara yoini.

<sup>3</sup> Akka nō chanīmara faxō nō tāpitiro Niospa āfe mekapa mai yafi nai onifani. A nō ōiyomisfoma afarafo Niospa onifani, akka iskaratīa mā nō ōitiro. Nāskakē āfe mekapas keyokōi onifani.

<sup>4</sup> Ē mato yoinō nikakapo mā tāpinō a nōko xinifo ipaonifo afe keskaramākī. Nōko xini Abel Nios chanīmara faxō oveja fake ināni nā Niospa yoini keskakakī. Nāskakē Nios akiki inimakōini. Akka āfe ochi Caínkai askara inānima. Nā Caín

Nios nikakaspayanã ãfe afarafo inãpaiyaito Niospa fichikaspani. Akka ãfe exto Abel Nios chanĩmara fakõikẽ Niospa aõnoa yoikĩ iskafani: “Mĩ ea chanĩmara fakõina,” ixõ yoini. Abel Nios chanĩmara faax mã nafianikẽ nõ Abel shinãkĩ nõ tãpitiro Nios chanĩmara faxõ nõ nikasharakõitiro. Nõ askafaino Nios nokoki inimasharakõi.

<sup>5</sup> Nõko xini Enoc aatori Nios chanĩmara fakõinax afe rafekõipaoni. Nãskakẽ nayamafiakẽ a ika ari Niospa ifirisafatani. Aõnoa yoikĩ Niospa meka kenenifo iskafakĩ: “Ë Enoc yoiai keskafakĩ ea nikakõimis. Nãskakẽ ã akiki inimakõi,” ixõ Niospa yoini. <sup>6</sup> Akka nõ Nios nikayamakĩ nõ Nios inimamatiroma. Akka nõ Nios fe ipaikõikĩ nõ nikakõitiro. Iskaratĩa Nios nia. Nãskakẽ nõ chanĩmara fatiro Niosmã ni kẽ. Askatari nõ nikapaikõikĩ chanĩmara fayanã akiki nokoaito Niospa noko afara shara faxoxii.

<sup>7</sup> Nõko xini Noéri Nios chanĩmara fakõipaoni. Nãskakẽ Niospa Noé yoikĩ iskafani: “Ë oi kaya imai faka faipafanõ ãsai fet-senõfo. Nãskakẽ kanõanãfã pexeya fafe. Mĩ fakefo fe mĩ ãfinõ ano ikanax ãsaxikanima. Nã ã mia yoiai keskafafe,” ixõ Niospa Noé yoini. Akka tsõa askara õiyomisma nãskakẽ Noé chanĩmara fakĩ kanõanãfã fani ãfe fakefo fe ãsaxikakima. Nã Noé Nios chanĩmara faax isharakõipaoni. Akka nã nikakaspai fo askapaonifoma, afãfe afara chakafapaonifo. Nãskakẽ Niospa ato omiskõimani ãsanõfo. Nãskakẽ Nios fe Noé rafeaito akiki inimakõini.

<sup>8</sup> Nõko xini Abrahamri Nios chanĩmara fakõipaoni. Nãskakẽ Niospa Abraham yoikĩ iskafani: “Nã ã mia nĩchipaiyai ari mĩ katiro. Ë mia mai inãnõ mĩnã inõ,” ixõ Epa Niospa yoini. Akka Abraham tãpia inima fakiri kaimãkai. Askafiax nã Niospa yoia keskakõini. <sup>9</sup> Nãskakẽ nã Niospa yoiyoni keskara chanĩmara faax, a Niospa nĩchia mai ano nokoax Abraham yora fetsafo mẽra kani. A keskarafo inima. Nãnoax pe xe keskara a karapa pe xe fofãsafapaoni a mẽra oxaxikaki. Nãskakẽri ãfe fake Isaaca fe ãfe fafa Jacobo nã keskara mẽra ipaonifo. Epa Niospa Abraham yoini keskafakĩ nã raferi ato yoikĩ askafani: “Ë mato mato mai inãxii,” ixõ yoini. <sup>10</sup> Nãskakẽ Abraham manapaoni. Akka Niospa yoini keskara nã mai ano ifiaxõ tãpipaoni a Nios ika ari afe ipanaka. Nãno Niospa onifanifo keyokõi sharakõifo nãfori ãfenã ipanaka. Nãskakẽ Abraham manapaoni.

<sup>11</sup> Niospa Abraham yoini iskafaki: “Mĩ ãfi Sarapa chipo fake fixii. ãfe fake feronãfake ixii. Nãskakẽ mĩ fenafo ichapakõi ixikani,” ixõ yoini. Akka Abraham anifokõi ini ãfe ãfiri yõxafokõi ini fake fimisma. Nãskakẽ Abraham ãfe shinã mẽraxõ shinãkĩ iskafani: “Epa Niospa ea yoiyoni keskara ea axõi. Nãato nã yoiai keskarakõi famis,” ixõ Abraham Nios chanĩmara fani. Nãskakẽ Abraham ãfinĩ fake fini, ãfe fake



feronāfake. Nāskakē Abraham fakeya ini. <sup>12</sup> Akka Abraham mā anifokōia ini. Nāskano āfe fenafo ichapakōifo ini. Tsōa ato tanātiroma. Nā fishifo tiikōi askatari nā mashi exe tiikōi inifo tsōa ato tanātiroma. Abraham āfe fenafo ichapakōi inifo.

<sup>13</sup> Nā ē yorafoōnoa mato rama yoia keskara atoōnoa ē mato yoinō. Nā yorafo nai mitokomenifo a Niospa ato yoiyoni keskara fikanaxma. Akka askafikaxō chanīmara fakakī ato shinā mēraxō oa ōiai keskara fanifo. Nāskakē inimakōinifo. Nāskakanax yoinānifo iskakani: “Nonokai na mai ano nō ipanakama, mai fetsa ano nō ixii,” ikax yoinānifo. <sup>14</sup> Akka nānori yoiaifāfe nō tāpitiro nāskara yorafo nono mai ano ipaitama Nios ika ari fopaikani afe ipaxakakī. <sup>15</sup> Akka a ipaonifo ano shinākani āto mai ano anā fopaikani fokeranifo. <sup>16</sup> Akka āto mai ari fopai atama Nios ika ariroko shinānifo ari nokopaikakī. Nāfāfe tāpinifo Nios ika ari sharafinakōia. Nāskakē Epa Niospa a ika ari ato pexe shara faxoni afe ipaxanōfo. Nāskakē Niospa atoōnoax inimakī ato yoikī iskafani: “Ēfi māto Nioski,” ixō atoōnoa yoini inimayanā.

<sup>17-18</sup> Anā Abrahamnoa ē mato yoinō. Epa Niospa tāpipaini Abraham chanīmara fakī nā yoia keskara akimākai. Nāskaxō yoikī iskafani: “Mī ina ea retexotamaroko mī fake fisti Isaaca ea retexōfe,” ixō yoini. Nāskatari Epa Niospa taefakī Abraham yoiyoni āfe fake fisti Isaacaōnoax āfe fenafo ichapakōi ixi-aifo. Nā afara sharafo Niospa Abraham yoiyoni keskafakī āfe fake Isaacaōxō keyokōi axoxixakī tāpimayoni. Nānori Niospa Abraham yoiaino āfe fake fisti retexō Nios inākerani. Nāskaxō Nios chanīmara fakōixō nā yoini keskakōi fani. <sup>19</sup> Nāskaxō Abraham āfe shinā mēraxō shinākī iskafani: “Epa Niospa ea yoia iskafakī: ‘Mī fake Isaaca ea retexōfe,’ ea faito ē shinā Niospa afama mīshti fatiro. Akka ēfe fake nafiakē Epa Niospa samama ea ofofaxotiro,” ixō shināni. Chanīma, āfe fake nakerani. Nāskakē Abraham shināni āfe fake nafiakē Niospa ofofaxotiro.

<sup>20</sup> Akka Isaaca nāatori Nios chanīmara fakōipaoni. Nāskakē āfe fake feronāfake rafe yoini a inōpokoai: “Jacobo yafi Esaú, chipo Epa Niospa afara shara mato faxoxii,” ato fani.

<sup>21</sup> Nāskarifiakī Jacobori Nios chanīmara fakōipaoni. Nāskakē mā chaima naito Niospa āfe shinā mēra shināmanai keskafakī āfe fafa rafe, José fake rafe, Niospa ato shara faxonōpokofai ato yoini. Ato yoita āfe chatiki mēstexō Epa Nios kīfianā aicho fani.

<sup>22</sup> Nā Joséri Nios chanīmara fakōipaoni. Nāskaxō mā chaima nakī āfe yorafo yoikī iskafani: “Chipo Epa Niospa nōko fenafo nā israelifo Ejipto anoa ato iyoxii kiki. Fokakī ēfe xaori foxikani kiki. Nā ikaifo ano ea maifaifoxikakī,” ixō ato yoiyoni.

<sup>23</sup> Moisés ãfe apa feta ãfe afa Nios chanĩmara fakõipaonifo. Nãskakẽ Moisés yomeax sharapishtakõikẽ ãfe apa feta ãfe afa õini. Nãskaxori tãpinifo mã yosixõ a Niospa yoiai keskara yonosharakõixiaito. Nãskakẽ Ejipto anoa xanĩfãfe ato yoini a israelifãfe ãto fake feronãfake yome mĩshti keyokõi ato rẽtekĩ mitokakõinõfo. Askafiaifono Moisés ãfe apa feta ãfe afa Nios chanĩmara fakaxõ ratekakima tres oxe anifo ãto fake onekakĩ xanĩfãfe ãto fake rẽteyamanõ.

<sup>24</sup> Moisés ãfe chata keskara ini Faraón. Askafafiaifono Moisés askara fichikaspani. Nãskaxõ ato yoini iskafakĩ: “Xanĩfo Faraónkai ěfe chatama. Āfe fakerikai ěfe efama,” ixõ ato yoini, chanĩmara fanõfo israelifo ãfe kaifo ini. Moisésri Nios chanĩmara fakõipaoni. <sup>25</sup> Akka Moisés shinãni iskakĩ: “Ē Ejipto anoax xanĩfãfe pexe ano ikax ěri ato fe inimasharakai xini ranã ayanã ě afara chakafatiro Nios shinãyamakĩ. Ē askapaima,” ixõ shinãni. Askapaitamaroko iskafakĩ shinãni: “Ēkai ejiptofo feta afara chakafapaima, askakimaroko ěfe kaifo fe nã Niospa inafõ omiskõiaifo keskai ěri ato fe omiskõi. <sup>26</sup> Ē Egipto anoafõ ato afara fĩapaikĩ ě ato fĩakerani. Ē fĩaxoma, ea mekafafiaifono Egipto anoafãfe, nãskanõ. Akka afarafoyafiax shara. Akka Cristo, a Niospa noko nĩchixii noko ifinõ, nã sharafinakõia. Ē Cristoõnoax omiskõifiano Epa Niospa a ika arixõ ě nokoaito afara sharakõi ea inãxii ě afe ipaxanõ,” ixõ shinãni.

<sup>27</sup> Akka Nios chanĩmara fakõinax Ejipto anoax ãfe kaifo fe Moisés kani. Ejipto anoax ãto xanĩfo akiki õitifishkifiaino akiki mesetama nã xanĩfãfe mai anoax kani. Akka Nios tsõa õiyamafitirono Moisés fisti Nios fe rafekõiax afe mekapaoni. Nãskakẽ nã Niospa yoini keskafakĩ enepaonima. <sup>28</sup> Akka Ejipto anoax israelifo foyoafomano Niospa Moisés yoini iskafakĩ: “Mĩ kaifo yoife ovejanã fake retenõfo. Nãskakaxõ nã oveja imi ãto pexe fepotifo raish anõfo, askafafono õiki ěfe ãjirinĩ ãto fake iyoafõ rẽteyamanõ, nã Ejipto anoafõ ãto fake iyoafõ ato reteaitã,” ixõ Niospa yoini. Nãskakẽ Moisés nã Niospa yoia keskara chanĩmara faxõ ãfe kaifo israelifo yoini. Nãskakẽ israelifãfe ãto fake iyoafõ nanima.

<sup>29</sup> Nãskakẽ israelifãfe Nios chanĩmara fanifo. Nãskakaxõ nã fakafã ãfe ane Ōshi pokefainifo. Epa Niospa nẽxpakĩa fakafã shinãfatanaino israelifãfe pokefainaifono ato acho Ejipto anoafõ fonifo ato retepaikani. Mã fakafã nẽxpakĩa kãiyaifono Niospa atoki fakafã yosifani. Nãskakẽ ãsai mitokomenifo.

<sup>30</sup> Akka Niospa israelifo yoini: “Nã Jericó pexe rasi kachiori siete nia foaketi fayakenõfo,” ixõ yoini. Nã pexe rasi kachiori simĩto kene keyakõi masoa ini. Nãskakẽ israelifãfe a pexe rasi

kachiori foaketi fayakenaifono nã Niospa yoini keskara nã pexe rasi maokomei fetseni. <sup>31</sup> Akka keyokõi Jericó anoafonai keyonifo. Akka nã kěro chotaferoma ãfe ane Rahab nã fisti nanima nãatomãĩ mã Nios chanĩmara faax. Akka Jericó pexe rasi ano foyoafomano israeli xanĩfãfe feronãfake rafe nĩchini ato onãti fatanõfo. Mã foafono nã rafe Rahab ãfe pexe měra ato ikimani tsõa ato fichixõ reteyamanõ. Nãskakẽ nã Rahab tsõa retenima ãfe kaifo retefikakĩ.

<sup>32</sup> Akka, ¿anã afaa fetsa ẽ mato yoitromẽ? Nã yora ichapafãfe Epa Nios chanĩmara fapaonifoõnoa ẽ mato yoikĩ keyotiroma. Nã Gedeón ikaino, Barac ikaino, Sansón ikaino, Jefté ikaino, David ikaino, Samuel ikaino nã Niospa meka yoimis fetsafoõnoari ẽ mato yoipanã êkai yoikĩ keyotiroma. <sup>33</sup> Nãskakẽ afãfe Epa Nios chanĩmara fakaxõ ãto sorarofon yoinifo a ato noikaspaifo ato retenõfo. Nãskakẽ a ato noikaspaifo ato retepaifikakĩ finõkõinifo. Akka atiri xanĩfo ikaxõ ãfe yorafo kexesharapaonifo isharanõfo. Nãskakẽ a Niospa ato yoiyoni keskara ato axosharani. Nãskatari atiri nã Nios Ifofaafãfema poomã měra ato potanifo. Askafiaifono Epa Niospa ato kexesharani poomãnã ato pinõma. <sup>34</sup> Akka atiri xanĩfo chakafãfe ato yoinifo chiifã měra ato potanõfo. Chii měra ato potafafono Niospa ato kexesharani koonõfoma. Atiri kenofãfe ato retepaifikakĩ tsõa ato retenima. A isinĩ ikani ato yora pachikõifokẽ afori Niospa ato mitsiskõi imani. Nãskakẽ nã ato noikaspaifãfe ãto sorarofãfe ato retepaifiaifono nãfãferoko ato ãchonifo ato afeskafanõfoma. <sup>35</sup> Kěrofãferi Nios Ifofaino, fake naano Niospa ato otifaxoni anã ninõ.

Akka fetsafo Nios chanĩmara fakõinafononã nã Nios Ifofaifãfema ato omiskõimanifo ato retekakĩ. Nãskaxõ ato yoikĩ iskafanifo: “Mã Nios Ifofayamaito nõ mato afeska faima mã kasharatanõ. Akka mã Ifofaito nõ mato retei,” ixõ ato yoinifo. Ato askafafiaifono tsoa Nios shinãmakinima. Nãskakẽ ato retenifo ato reteyoafomano shinãkĩ iskafanifo: “Noko retefiaifono Epa Niospa samama noko õtofatiro nõ afe ãpaxanõ,” ixõ shinãnifo. <sup>36</sup> Askatari a Nios chanĩmara faa fetsafori ato kaxemetsamafayanã ato koshaketsayanã ato cadenãnã metexkere ata ato otepkere axõ ato karaxa měra ikimanifo. <sup>37</sup> Askatari ranãri tokirinĩ ato tsakaketsakaxõ ato retenifo, ranãri sirochonõ nakirafe ato xatenifo nanõfo, ranãri kenopa ato retenifo, ato askafiaifono. Nãskakẽ nã afaamaisfãfe ano rapatiamano oveja fichi iyamai cabra fichi rapati fakaxõ safenifo. Ato retepaikakĩ ato ãchorifaifono. Nãskakẽ omiskõikõinifo. <sup>38</sup> Nãskakẽ tsõa istoma anoax machi keya anoax a mafa kini měra ikikata mai kini měrari ikinifo. Akka nã Nios chanĩmara faafo a Nios Ifofaafãfema ato shara fanifoma Niospa ato õia sharafiafono, ato chakafapaonifo.

<sup>39</sup> Nāskakē nāfo omiskōi finafikakī Nios Ifokōi fapaonifo. Nāskakē Niospa atoōnoa yoikī iscafani: “Nafāfe ea nikakōikani. Nāskakē ē atoki inimakōi omiskōifikani isharakōimisfo,” ixō Niospa atoōnoa yoini. Askafikaxō a Niospa ato yoiyoni keskara tsōa fīama ini. <sup>40</sup> Nāskakē Epa Niospa ato manamayopaoni. Akka nōri nō Nios chanīmara faax nō ato fe a Jesús ika ari nō nokoxii. Nāskakē yora fisti keskara nō ato fe ixii a keskara shara noko imaino. Nāskaxō ato feta anā afaa fetsa nō yopapakenakama. A Niospa yoiyoni keskara keyokōi noko ināxii nai mēraxō.

## 12

### *Nō Jesúsnoa shināsharatiro*

<sup>1</sup> Akka nōko xinifāfe Nios chanīmara fapaonifo. Nāskakē nōri ato keskara nō itiro. Nāskaxō a afara chakata noko nētefapaiyai keskara nāfo nō kachikiri fakōini. Nāskaxori afara chakafāferi samamakōi noko afara chakafamapaitiro. Nāfo chakari nō kachikiri fakōini a Niospa noko amapaiyai keskara fisti axiki, fena fenakima a noko yoiai keskara nō axosharakōi.

<sup>2</sup> Akka nō Jesús fisti shināfafāinō. Nāfi nōko Ifokōikī noko tāpimamiskōi. Akka nāato noko ōimakī taefanikī afara afeskara afiaino nō Nios chanīmara fakōinō. Nāskaxō a Apa yoia keskara akōipaoni. Nāskakē nōri a keskara inōkāfe. Nāskaxō mā mastakakī yorafāfe ferotaifi rāfinī fanifo. Askafafiaifono omiskōiyanā tenekōini māmāi tāpiax a chipo xanīfo ixō Apa Nios feta noko ifixiai inimakōiyanā Apa Nios ika arixō.

<sup>3</sup> Yora chakafāfe chakafafiaifono tenekōini. Nāskaxō a nokoōnoax omiskōini keskara shinākī matori omiskōimanaifono, shināchakatama māto ōiti fekaxtefayamakāfe. Nāskaxō a Niospa mato amapaiyai keskara mā enetiroma.

<sup>4</sup> Akka yorafetsafāfe mato afara chakafamapaimisfo anā mā Jesús Ifofanōma, ato nikatama mā omiskōifi mā omiskōi sharamisma. Akka Jesúsroko omiskōi finakōini. <sup>5</sup> Mā mā shināmakia keskara ē anā mato yoinō. Mā āfe fakekē, Epa Niospa mato yoini keskara āfe meka kirikano kenea iskara fētsa keneni:

Ēfe fāke, ēfi mī Ifokōikī. Akka nā ē mia yoiai keskara mī ayamaito ē mia omiskōimani mī ea nikanō, mī ea Ifofasharanō. Ē mia askafaino, akai afamara mī fatiroma. Askatari shināchakayamafe. Tāpisharafe. <sup>6</sup> Nā ē aō noiai tāpimasharai aō noikī. Ēfe fake keyokōi omiskōimani anā nikasharanō,

ixō keneni a Niospa shināmanaino. <sup>7</sup> Epa Niospa mato tāpimapaiyai keskara tāpikāfe. Nāskax omiskōifikī shināchakatamaroko tenesharakōikāfe. Nāskakē omiskōixō mā tāpitiro māmāi Niospa fakefoxō. Apafāfe āto fakefo tāpimatirofo keskafakī Epa Niospa mēstekōi nokori tāpimani. <sup>8</sup> Keyokōi

Epa Niospa âfe fakefo ato tâpimanaito mã meemisfo. Akka Epa Niospa noko tâpimamayaino nõ âfe fakekõifo itiroma. Nâskax nõri âfe yorafo itiroma. <sup>9</sup> Akka nõ yomekẽ nõko epafâfe nono mai anoxõ noko tâpimapaonifo. Nâskakẽ nõ shinãkĩ nõ ato nikakõimis. Akka Epa Niospa noko tâpimanaino nõ tenekõitiro. Nâskaxõ nõ noko tâpimapaiyai keskai nõ inimayanã nõ isharakõitiro. <sup>10</sup> Nõko epafâfe ãa shinãkaxõ noko tâpimamisfo nõ shara inõ. Akka mã nõ yosiano anã noko askafamisfoma. Nâskarifikã Epa Niospa meste shinãsharakõikĩ, nokori shara fapaikĩ noko tâpimamis a keskara shara nõ inõ. <sup>11</sup> Chanĩma, noko tâpimayanã noko omiskõimanaino nõ shara meetiroma. Paekõi mei nõ ichopaitiro. Askafixõ mã yosixõ chipo nõ shinãtiro Epa Niospa noko tâpimasharai, nõko õiti inimasharatiro shara noko imaino.

*Nõ Niospa meka nikakaspaino mesekõi ixii*

<sup>12</sup> Nâskakẽ afara afeskara afiaino shinãchakayamakãfe. Epa Niospa mato tâpimapaiyai keskara fisti akãfe. Nâskaxõ Nios Ifofakĩ kachikiri fatama nikasharafafãikãfe. Nâskatari âfe meka shara nikakĩ enepaiyamakãfe. Yora pachi keskara iyamakãfe. <sup>13</sup> Nâskax isharakõikãfe Jesús Ifofasharaxikakĩ. Mã askaito õikani nõ Jesús Ifo sharafaafoma mato fe rafepaitirofo Jesús keskara shara ipaikani.

<sup>14</sup> Nâskakẽ mēenãpaitama keyokõi yorafo fe isharafafãikãfe. Nâskatari Jesús keskara shara ipaikãfe. Akka tsoa Jesús keskara shara iyamakani afãfekai nõko Ifo õinakafoma. <sup>15</sup> Epa Niospa noko noikõikĩ âfe Fakeoxõ noko sharafa fafafãimis. Nâskakẽ a Niospa noko amapaiyai keskara akãfe fenoxikakima. Askatari mãto shinãmã afaa shinãyamakãfe. Akka mãto shinãmã mã afara shinãkĩ fetsafori mã ato afara chakafamatiro akairi askara anõfo. <sup>16</sup> Nâskatari mãto âfima fe iyamakãfe. Kērofori mãto fenema fe iyamakãfe. Akka nõ naino, nõko fake iyoato nõko afama mĩshti fitiro. Akka Esau shinãsharanima. Fonãikĩ âfe exto yõkani âfe êxto pimanõ. Nâskaxõ a âfe apa inãpaiyai shinãkima âfe exto yoini iskafakĩ: “Epa naano âfe afama mĩshtifo ã fiã ã mia inãnõ kopifikĩ,” ixõ yoini. Nâskakẽ nõ Esau keskara iyamakãfe. Atokai Niosnoa shinãpaonima. Akka a Niospa mato inãpaiyai keskara fikaspakĩma, fikãfe. <sup>17</sup> Mã mã tâpia ãpa afara shara inãpaiyai keskara fipafikĩ finima. Nâskaxõ apa yõkakĩ iskafani: “Epa, a mã inãpai keskara ea inãfe, ã mã fake iyoakõi,” ixõ oiayanã yõkafiaito ãpa inãnima mãmãi chipokoto fiano. Nâskakẽ õisharakãfe. Mã Nios nikayamai mãri Esau keskara itiro. Nâskakẽ Niospa mato inãpaiyai keskara mã fitiroma.

<sup>18</sup> Epa Niospa a nõko xinifo yoini keskara iskaratĩa noko yoimisma a keskara. Ato yoini machi âfe ane Siõn tenãmã

fotanõfo anoxõ afara fetsa ato yoixiki. Akka nã machi anoax chiifã erepafãkõi, askatari kõi fakishifãkõi, askatari nêfefãkõiyana kana piishini. <sup>19-20</sup> Nai mēranoax maneti fāsikõi chã chãisaito nikanifo. Nãskatari nai mēraxõ fāsikõi ato yoiaito nikanifo ato Niospa iskafaito: “Na machi ano tsõa mǎpetiroma. Mǎpeaifãfe tokirinĩ ato tsakakĩ retekãfe. Askatari yoinãfãferi mǎpeaito mǎ retetiro,” ixõ ato yoiaito nikanifo. Nãskakē ratekõikakĩ Moisés yoinifo iskafakakĩ: “Moisés, nõ anã Niospa meka nikapaima. Mǎchi ari mǎpei nõ narisatiro. Nãskakē Nios yoife noko anã yoyimanõ,” ixõ israelifãfe Moisés yoinifo. <sup>21</sup> Akka Moisésri nã õia keskara ato yoini iskafakĩ: “Èri fãsi ratekõi, tari tari iki,” ixõ ato yoini.

<sup>22</sup> Akka nõkai machi Siõn ano nõ kaima. Askatamaroko machi Siõn fetsa ano nõ kai, ãfe ane fetsa nã Jerusalén Fena ano a Nios ika ari. Nãskakē nãnoax ãfe ãjirifo ichanãkaxõ, “Nios sharara,” fafafaifãikani. Akka nã ãfe ãjiri ichapakõifo tsõa ato tanãtiroma. <sup>23</sup> Nãnori nõ keyokõi a Jesús chanĩmara faafo afe ixii. Akka nã Nios ika ari ãto anefo kenea afe ipaxanõfo. Nãskakē nõri nõ Nioski noko. Nãskakē noko yoixii fatofãfe Ifofakanax afe ipanakafomãki. Nã Ifofaafos a keskara shara ato nai mēraxõ imai afaa chakafamisfoma keskara inõfo. <sup>24</sup> Jesús noko nãxoyoamano tsõakai nokoõnoax nãxoyonima. Nãskakē iskaratĩa Jesús noko nãxonikē nõ Nios fe isharapakexatiro. Akka nõko xini Caín onefetsa Abel reteni. Nãskakē Epa Niospa Caín yoikĩ iskafani: “Caín, ¿afeskakĩ mĩ exto mĩ reteamē? Iskaratĩa ē mia omiskõimani,” ixõ yoini. Abel nafianixakĩ aato noko nimapaketiro, Jesús keskarama. Akka Jesús nanixakĩ noko nimapakenaka.

<sup>25</sup> Nãskakē Niospa mato yoiai keskara nikakaspayamakãfe. Nã nono mai anoxõ nõko xinifo Moisés ato yoini keskara nikayamaifãfe Epa Niospa ato omiskõimani. Akka Jesús Moisés keskarama. Nios ika ariax nokoki fotoni Niospa Fakekõiax. Nãskakē a Jesús noko yoiai keskara nõ nikayamaito nokori omiskõimakĩ finakõixii. <sup>26</sup> Akka Epa Niospa Moisés yafi nõko xinifo machi Siõn anoxõ ato yoikĩ ãfe mekapa mai naya naya ani. Nãskaxõ anã ato yoini iskafakĩ: “Anã mai fisti ē naya naya axima. Nairi ē naya naya axii,” ixõ ato yoini. <sup>27</sup> Nãskakē nã Epa Niospa noko yoini keskaraõxõ nõ tãpitiro nã afara nipatirofoma, Niospa nãfo yamafarisafataxii anã afaa inõfoma. Akka nã Niospa ato imapaiyai fisti itirofo. <sup>28</sup> Nãskatari a Nios ika ariax mai naya naya itiro. Nãskakē nãno nõ afe isharapakexatiro. Nãskakē aõnoa nõ shinãsharayanã nõ kififafãinõ. Nãskaxõ a noko amapaiyai keskara nõ axõaino nokoki Epa Nios inima sharakõixii. <sup>29</sup> Akka mǎ nõ tãpia nõko Ifo Nios nã chiifã erepafãi keskara. Akka nã ãfe meka shara

nikakaspakī kachikiri faifono Niospa chiifā erepafāi mēra ato potaxii anoax omiskōipakexanōfo. Nāskakē nō nikasharakōinō.

## 13

### *Afeskakō nō Nios inimamatiromē*

<sup>1</sup> Māfi Cristo afe yorafokī. Nāskakē mā ranā nōināi xateyama-kāfe. <sup>2</sup> Yora fetsafori mai fetsa ariax oaito mātō pexe anoxō ifisharakāfe. Nāskakēri tāpixoma fetsafāfe yorayama fiano ājirifo fiano ifimisfo.

<sup>3</sup> Nā karaxa mēra ikafori ato shinākāfe. Nāskaxō ato ōiti inimamasharakāfe. Askatari ato axosharakāfe. Nā mā ato fe karaxa mēra ika keskara shinākōikāfe.

<sup>4</sup> Feronāfakefo, mātō āfifo fe nōināsharakāfe. Nāskax isharakāfe. Askatari mātō āfima fe ipaiyamakāfe, mātō āfi fisti fe ikāfe. Kērofori mātō fenema fe ipaiyamakāfe, mātō fene fisti fe ikāfe. Akka nā āto āfima fe ikaifono, kērofori āto fenema fe ikaifono, nāskarafo Niospa ato omiskōimaxii.

<sup>5</sup> Akka kori ichapa noiyamakāfe. Askatamaroko inimakāfe afe tii mā ayamakī. Epa Niospa yoinikī iskafakī: “Ēkai mato makinoax paxkanakama. Askatari ē mato potanakama. Nāskakē a mā yopai ē mato ināxii,” ixō yoini. <sup>6</sup> Nāskakē chanīmakōi nō yoitiro iskafakī:

Afara afeskara afiaito ēfe Ifāfe ea axomis. Nāskakē ē rateima, Epa Niospamāi ea kexesharaino yorafāfe ea afeskafanōfoma, ixō nō yoitiro.

<sup>7</sup> Niospa meka yoimisfāfe mato yoinifo keskara atoōnoa shināfāfāikāfe. Nāfāfe mato shara famisfo. Nāskakaxō nōko Ifo Jesús chanīmara famisfo. Nāskakē ato keskara ikāfe nō Jesús Ifofasharakōinō.

<sup>8</sup> Akka Jesucristo nā ipaoni keskara ĩpanaka. Anākai iskaratīa fetsatiroma. <sup>9</sup> Akka fetsafāfe mato anorima yoipaikani, a tsōa nikamisma keskara. Nāskakē ato nikayamakāfe mato iskafakī yoipai ani kiki: “Nōko xinifāfe noko yoinifo keskara nō nami fetsa piaino nōko shinā mēra noko shināmasharatiro,” ixō mato yoipai ani kiki. Akka a nō piatokai nōko shinā mēra noko shināmasharatiroma. Askatamaroko Niospa noko noixō noko imasharatiro a keskara shara nō inō.

<sup>10</sup> Nāskakē nō chanīmara famis Jesucristo ifi cruz ikakinoax noko nāxoni nōko chaka noko soaxoxiki. Akka Jesucristo chanīmara fatama nā Moisés ato yoini keskara fisti chanīmara famisfo. Nāskakē afāfekai ato chaka soaxotirofoma.

<sup>11</sup> Akka nā Moisés ato yoini keskai a ato Nios kīfixomis xanīfo fisti, ares fisti pexe kene fetsa mēra ikipaoni, nā mēra yoinā ina imi ya ikikē ōikī Epa Niospa ato chaka

soaxonõ. Akka nã yoinãfãfe ato kaya pexe rasi pasotaiõ koofapaonifo. <sup>12</sup> Nãskarifiã Jesús Jerusalén pasotainoax noko omiskõixokĩ ãfe imi foax noko nãxoni nõko chaka noko soaxoxiki a keskara shara nõ inõ. <sup>13</sup> Akka nõri Jesús ipaoni keskara inõkãfe a nõ ipaoni keskara anã ixikima. Nãskaxõ ãfe kaifãfe potanifo keskafakĩ nokori nofe yorafãfe potatirofo. Nãskakaxõ Jesús ìchaketsanifo keskafakĩ nokori aõxõ ìchatirofo. Akka Jesúsnoa chaka shinãmisfo keskafakĩ nokori aõxõ chakafatirofo. <sup>14</sup> Nono mai anoax nõ omiskõifikĩ nõ shinãchakaima, mã nõmãi tâpiax nono mai ano nõ ipanakama. Askatari mã nõ tâpia a Nios ika ari nokoax nõ afe ipanaka. Nãskakẽ nã nõ manasharamis.

<sup>15</sup> Jesús noko nãxonioxõ nõ Epa Nios aicho fai. Akka nõ yoikĩ iskafatiro: “Aicho Epa Niosi, mĩ Fake Jesús ãfe Ifokõi. Aõxõ ãfe mia aicho fai,” ixõ nõ yoitiro. <sup>16</sup> Askatari ato shinãmakiyamakãfe mã afarayaxõ a afaamaisfo ato inãsharakãfe. Mã ato askafaito õikĩ Nios matoki inimasharakõi kiki.

<sup>17</sup> Akka nã ichanãti pexe anoxõ Niospa meka mato yoimisfo ato nikasharakõifafãikãfe. Nãskax nã mato yoiaifo keskakõikãfe. Nãfãfe mato kexesharamisfo mã Jesús nikasharanõ. Akka nãfãferi tâpiafo Nios ari nokoãifãfe ato yõkaxii iskafakĩ: “¿Mã ãfe meka mã ato tâpimasharamismẽ?” ixõ ato yõkaxii. Nãskakẽ ato nikasharakãfe inimakõinõfo. Akka mã ato nikayamaino inimatirofoma, shinãchakatirofo. Nãskaxõ mato axosharatiroma.

<sup>18</sup> Nokori Epa Nios kifixokãfe. Epa Niospa noko amapaiyai keskara mã nõ apaimiski. Nãskaxõ nõko shinã mëraxõ nõ afaa chaka shinãima. Nõ isharaipaikõi. <sup>19</sup> Eari Nios kifixokãfe matoki ea samama nĩchinõ ãfe anã mato fe inõ.

*Ato Nios kifixoyanã mã mekai xatekĩ ato yoini*

<sup>20-21</sup> Epa Niospa noko inimamakõimis nõ afaa shinãchakanõma. Nõko Ifo Jesús mã nokoõnoax nafiakẽ Apa Niospa ofofani Jesús keyokõi finõax noko kexemis inõ. Jesús noko nãxonionõnoax Epa Nios fe nõ afe yora ipanaka. Nãskakẽ mã afara shara yopaito Epa Niospa mato inãtiro a mato apaiyai keskara shara mã anõ. ãfe Fake Jesucristoõxõ nõko shinã mẽra noko shinãmasharax nokoki inimakõixii. Nãskakẽ keyokõichi Jesúsnoa nõ yoisharapakenaka. Nãskara sharakõi ìpanaka.

<sup>22</sup> Efe yora mĩshtichi, nã ãfe mato ichapama yoia keskara nikasharakãfe fena fenakãkima. Nã ãfe mato kenexona keskai mãto shinã mẽra mato shinãmasharaxii kiki. <sup>23</sup> ãfe mato yoipai mã nofe yorashta Timoteo iskaratĩa karaxa mëranoax mã tsekea. Akka samamashta ekeki oano ãfe kai mato ari.



<sup>24</sup> Keyokõi ichanãkaxõ a mato Niospa meka yoixomisfo yafi a mato kexemisfori nõ ato yoisharai. Akka nono Italia anoxori nã Nios Ifofaafãferi mato yoisharakani.

<sup>25</sup> Epa Niospa keyokõi mato noikĩ mato shara faxõfafãinõ. Nã ti.

## Santiago Jesús Chanĩmara Faafo Kirika Kenexõ Fomani

*Judeofo paxkanãnifono Santiago ato kene fomani*

<sup>1</sup> Ĕkĩa Santiago ě mato kirika kenexõ fomai. Epa Nios yafi nõko Ifo Jesucristo ě ato yonoxomis. Mãfi Jesucristo mã Ifofamiskĩ nã maitiofo mã paxkanãi fetseni. Ĕ mato meka shara fomai.

*Niosxõ nõ tãpisharatiro*

<sup>2</sup> Efe yora mĩshtichi, afara chakafo nokoaino, inimasharakãfe, shinãchakakakima. <sup>3</sup> Mã mã tãpiakĩ, ano afara chakafo nokoaino, mã Jesús nikakĩ finasharakõikĩ, afara chakafo nikakãkima mã tenesharakõitiro. Nãskaxõ afara chakafo mã finõinĩfofãtiro. <sup>4</sup> Mã askaino Jesús mato imapaiyai keskara mã itiro mẽxotaima mãmãi mã Jesús nikakõisharakĩ. Mã askakĩ afarafo Jesús mato amapaiyai keskara mã atiro afaa chaka shinãkima.

<sup>5</sup> Akka Niospa mato amapaiyai keskara mã tãpixoma, Nios yõkakãfe mato tãpimanõ. Mã yõkaito mato tãpimatiro. “Ea fekaxtefayamakãfe,” ixokai Niospa mato anori yoima. Inimayanã mato tãpimani. <sup>6-8</sup> Nãskata mã Nios yõkakĩ iskafakĩ shinãyamakãfe: “Ĕ Epa Nios yõkaito ea tãpimanimaraka,” ixõ anori shinãyamakãfe. Akka nã mã yõkapaiyai keskara shinãkãfe. Nãskaxõ, “Aicho, ě Nios yõkaito mã ea tãpimasharaki. Nãskakẽ ea amapaiyai keskara ea tãpimaxii,” ixõ shinãkãfe. Askatari anã afaa shinãyamakãfe. Fekaxteyamakãfe. Nãskarari nẽfefakĩ ifi fokẽ fokẽ akaito nõ tãpitiroma fakiri kaimãkai. Nãskarifiakĩ Niospa mato tãpimafiaino mã anã afara fetsa shinãkĩ mã shinãsharatiroma. Nãskakẽ mã fekaxtexõ mã shinãsharatiroma. Nãskakẽ Niospa mato afaa tãpimatiro mã fekaxteaito.

<sup>9</sup> Jesús chanĩmara fafiakani ranãri yorafo afaamaisfo. Nãskakẽ fetsafãfe ato tanakanima. “Nafokai afama,” ixõ shinãkani. Askatamaroko afaamaisfiatono Niospa ato iskafai: “Mãfi ěfe fakekõifokĩ. Keyokõi ěfenãfo mãtonãri,” ixõ Niospa ato yoini. Nãskakẽ inimatirofo. <sup>10-11</sup> Fetsafori Jesús chanĩmara faafo afama mĩshtiyafõ. Nãskakẽ feronãfake afama mĩshti ichapayato shinãkĩ iskafatiro: “Ĕ afama mĩshti ichapayafekẽ ěfe afama mĩshtifãfe ea inimamatiroma. Ĕfe afama mĩshtiõnoaxkai ě isharatiroma. Akka ěfi Niospa fakekõiax, ě afe rafepakenakakĩ. Nãskax ě inimakõi,” ixõ shinãtiro. Akka taeyoi charofo sharashta iyotiro. Askafiaino xinĩ tsofifaano, anã shara itiroma mãmãi xinĩ tsofifaano.

Nāskarifiāi feronāfake afama mīshti ichapayato shinātiro iskafakī: “Nā charo ikai keskariai fatora penata ē natiro. Mē nāxō ēfe afama mīshti ē fotiroma. Askatari ēfe afama mīshtifāferikai ea afeska fatiroma,” ixō nā feronāfāke afama mīshtiyato shinātiro. Nāskakē mā āfe afama mīshtifoōnoax isharakōiax narisatiro.

*Santiago ato tāpimani afara chakafamisfoōnoa*

<sup>12</sup> Nōko Ifāfe yoikī iskafayoni: “Nā ea noiaifi efe īpanakakī,” ixō yoyoni. Nāskakē afara chakafo nokoki nokoaino, nāskara teneyanā nōko Ifo Nios nō kachikiri fayamaito ōikī nokoki inimatiro. Nāskax a yoyoni keskai nō afe nīpanaka. <sup>13</sup> Chanīma, keyokōichi nō Jesús Ifofaxō afara chakafapaikī nōa nō yoitiroma iskafakī: “Ea Niospa afara chakafamapai,” ixō nō yoitiroma. Akka Nios sharafinakōia. Afara chakafatiroma. Tsōarikai Nios afaa chakafamatiroma, Niosmāi sharafinakōikē. Nāskakēri Niospa ato afaa chakafamatiroma. <sup>14</sup> Nāskakē nō afara chakafapaiyaino afara chaka nōo nea. Nāskatari nōko shinā mēraxō nō afara chakafapaikī nō atiro. <sup>15</sup> Ē mato yoinō, nikakapo. Kēro fistichi fake naneano fenāmāshta yositiro. Akka mā kāiax yositiro. Mā yosiax anifoax, natiro. Nāskarifiakī nōko shinā mēraxō nō afara chakafo fapai, akka afara chakafo nō shināmakiyamaxō, afara chakafo nō atiro. Nāskakē mēxotaima nō afara chakafatiro. Nāskax nō naa keskara nō itiro.

<sup>16</sup> Akka efe yora mīshtichi, anorima shināyamakāfe. Niospa afaa chakafatiromaki. <sup>17</sup> Akka Epa Niospa nai mēraxō mēxotaima noko kexesharafafāini. Nāskaxō noko afama mīshti onifaxoni. Xini onifata, fishifo onifata, oxe onifata, nāfo noko onifaxoni, afāfe noko chaxasharanō. Akka oxe ikiaito nō anā ōitiroma. Fishiri nāskarari ikiaito nō ōitiroma. Chipo kāiyaito nō anā ōitiro noko chaxasharaito. Akka Epa Nioskai askarama. Akai fetsatiroma. Noko mēxotaima sharakōi faxomis. Nokokai chakafatiroma. <sup>18</sup> Niospa ares shināyoni iskakī: “Ēfe meka chanīmakōi nikaifono ē ato fetsafaxii ēfe fakekōi inōfo,” ixō Niospa shināyoni. Nāskakē noko katokī taefani. Nāskatari a rama chanīmara faifo āfe fakekōifo ixikani.

*Niospa meka mēstesharakōi nikax askakōikāfe. Nāskakē mā chanīmara fakōinikai*

<sup>19</sup> Efe yora mīshtichi, nikasharakāfe ē mato yoisharanō. Fētsa mato yoipaiyaito, nikakaspatama nikayokāfe. Māri chipo fenāmāshta yoisharaxikakī. Akka samamashta ōitifishkiyamakāfe. Nāskakē nō ōitifishkiki nō mekatiro.

<sup>20</sup> Mā ōitifishkikikai Niospa mato afara sharafamapaiyai keskara mā atiro. <sup>21</sup> Nāskakē afara chakafo mā famis xatekāfe. Mā mā chaka xatexō mā Niospa meka nikakōisharatiro. Nāskaxō mā yoikī iskafatiro: “Epa, mī

meka shara emēra nanefe ē mia Ifofasharapaikai. Ē mia nikapaisharakōikai,” ixō anori yoikāfe. Āfe meka shara mato mēra naneano, a mato yoiyoni keskai mā afe nīpanaka.

<sup>22</sup> Āfe meka fisti nikakākima nā Niospa yoini keskakōiri akāfe. Mā mā nikafi mā askayamai māa mā pāramei, “Nō Nios Ifofara,” ixō shinākī. <sup>23-24</sup> Nā keskarafofi iskamisfokī: Espejo fikaxō āto femānā choshtakē ōikanax fechokomepaikani shināmakitirofo. Nāskarifiakani Niospa meka nikafikakī, nāskakaxō afara chakafakakī xateafoma. <sup>25</sup> Akka fētsa Niospa meka shara nikafafāikī nā yoiai keskara amis, shināmakitama. Nā keskara yōra Nios chanīmara faxō Niospa yoiai keskara amis, nāskax inimakōimis. Shinākī iskafamis: “Niospa meka sharakōi. Nā ea yoiai keskara ē aki,” ixō shināmis. Nā keskara yora isharakōitiro inimayanā.

<sup>26</sup> Akka fētsa shinākī iskafai: “Ē Jesús Ifofasharai,” ifiakī meka chaka fisti yoimis āa pārameyanā. Askara yōrakai Jesús Ifofasharama. Akikikai Nios inimaima. Nā keskara yōrakai tsoa ōimatiroma afeskax isharatiromākī. Atokairoko Nios Ifofaxō ato ōimaxiki. <sup>27</sup> Askatari nō Jesús Ifofasharaxō fakefo apamaisfoya, kēro ifomafafari nō ato kexesharatiro, omiskōiaifāfe. Nāskatari nō Jesús Ifofasharaxō a afara chakafaifo keskara nō atiroma. Nō aska sharaito noko ōi nokoki Jesús inimatiro. Nāskarafo nōko Ifo Jesús keskara sharakōi ikani.

## 2

*Yora kori ichapaya fisti sharafatama a afaamaisfori ato sharafakāfe*

<sup>1</sup> Efe yora mīshtichi, nōko Ifo Jesucristo xanīfofinakōia. Nāskakē noko noipakenaka. Yora afama mīshtifoya, afaamaisfoiyari keyokōi noko Jesús noi. Nāskatari māri Jesús chanīmara famis, noko Jesús noiai keskafakī, keyokōi noikāfe. Nā yora kori ichapaya fisti noikakīma, nā yora afaamaisfoiyari noikāfe. <sup>2-3</sup> Akka mā ichanāino feronāfake kori ichapaya oro anīcho efapa safefāi rapati sharakōi safeax mato fe ichanāiyoi oaito, mā shinākī iskafatiro: “Nafi afama mīshtifoyaki, nāskakē nō ifisharai,” ixō mā shinātiro. Nāskaxō, “Nono tsaoyofe keyokōichi mia ōinōfo,” mā fatiro. Mā askafaino, feronāfake afaamais rapati chapokōi safeax mato fe ichanāpaiyaito mā iskafatiro: “Onī nīxō ōife,” askafayamakī, “Onī nāmā tsoxō ōife,” mā fatiro. <sup>4</sup> Mā askafakī mā chakafai. Nā kori ichapaya noikī nā feronāfake afaamaisya mā ifimisma. “Jesús shināi keskara nōri nō shināi,” ixō mā yoimis. Anori yoifi mā askamisma. Feronāfake afaamaisya ifisharaxma Jesús shināi keskara mā shināima.

<sup>5</sup> Efe yora mīshtichi, ĕ mato noikōi. Akka ĕ mato yoiai keskara ea nikasharakāfe. Yorafāfe afaamaisfikaxō, Jesús chanīmara faifāfe ato noixō Niospa ato katoni afe yorakōifo inōfo. Ato yoiyoni iskafakī: “Mā ea chanīmara fakī, mā ea noikōi. Nāskakē mā efe ipanaka ĕ xanīfo ika ano. Nāskatari nā ĕfenāfo mātonāri ixii,” ixō Niospa ato yoiyoni. <sup>6-7</sup> Askafixō a afaamaisfoya mā ato ĩkisharakōima, mā ato chakafai ato ōikaspayanā. Akka shinākapo afe keskarafomākī kori ichapayafo. Nā kori ichapayafāfe mato omiskōimakani. Mā ato nimikē xanīfo ano mato iyokaxō mato karaxa mēra ikimpaikani. Askarafāfe nōko Ifo chakafakī mekafamisfo. Akka a kori ichapayafāfe mato noikanima ato kori fisti noi kakī. Akka, ĵafeskakī a kori ichapayafo mā ato ifisharapaimē mato chakafafiaifono? Akka a afaamaisfo mā ato noikaspamis.

<sup>8</sup> Akka kirikaki Niospa meka kenekī iskafanifo: “Nā mā noimekōiai keskariakī fetsafori noikōikāfe,” ixō yoinifo. Nā Niospa yoini keskara mā nikakōiax mā isharakōikai. <sup>9</sup> Akka mā fetsafo noiamax mā shara ikima, chaka mā iki. A Niospa Moisés yoini keskara mā akima. Nāskakē, “Mā nikayospakōifo,” Niospa mato fatiro. <sup>10</sup> Niospa noko yoiyoni iskafakī: “Keyokōi noikāfe,” noko fani. Akka keyokōi Niospa noko yoini keskara nō nikafikī afara fisti nō shināmakixoma nō chakafai. Nāskakē Epa Niospa noko ōi nā nō afaa nikama keskara. <sup>11</sup> Shinākāpo. Niospa noko yoini iskafakī: “Kēro fetsa fe oxayamakāfe. Xotofakeri feronāfake fetsa fe oxayamakāfe,” noko fani. Askatari, “Yora reteyamakāfe,” Niospa noko fani. Akka kēro fetsa fe mā oxayamafikatsaxakī mā yora retekī Niospa noko yoini keskara keyokōi mā nikama.

<sup>12</sup> Akka Niospa noko noikī, āfe meka noko yoini nō afaa chakafanōma. Nāskakē noko yoini keskara, nō keyokōi nikasharaito noko omiskōimanima. Akka nāfo tāpikōixō, keyokōi nō nikakōixō nō ato yoisharatiro. Askatari fetsafo sharafakāfe, askara sharakōikī. <sup>13</sup> Mā askaxō Niospa noko yoini keskara, mā yorafo noiyanā ato shinākī mā ato sharafai. Mā askafaito Niospa mato omiskōimatiroma. Akka mā yora fetsafo mā noiynamaito Niospari mato noixoma mato omiskōimatiro.

*Nō Jesús chanīmara fakōixō nō fetsafori afara sharafaxotiro*

<sup>14</sup> Efe yora mīshtichi, ĕ mato yoisharapai. Akka fētsa yoikī iskafai: “Ĕ Jesús chanīmara fai,” ixō yoifixō yorafo sharafamisma, askarakai sharama. Nāskaxō mā noko ōimani mākai Jesús chanīmara faama. Nāskakē mā Nios fe nīpanakama. <sup>15-16</sup> Akka a Jesús chanīmara faa fetsa omiskōi afaamaisyax matoki nokoaito, mā iskafatiro: “Mī rapati safesharata katāfe, matsi meyamaxiki. Askatari pisharatāfe fonāiyamaxiki,” mā

fafiakī mā kai afaa inā mī sama, askarakai sharama. <sup>17</sup> Akka mā yōra nāxokai anā fetsafo afaa sharafaxotiroma. Nāskarifiakī fetsafāfe yoikī iskafatirofo: “Ē Jesús chanīmara fai,” ifiaxō fetsafo afaa sharafaxomī sama atokai Jesús chanīmara fakōinama. Nā keskarafi yora naa keskarakī.

<sup>18</sup> Akka fētsa shinākī noko iskafatiro: “Ē Jesús chanīmara fai. Nāskakē Epa Nios ēfe Ifo,” ifiaxō fetsafokai sharafamī sama. Akka ē iskafai: “Ēri Jesús chanīmara fai. Askatari ē fetsafo sharafamī s. Nāskakē mī ea tāpitiro Nios ēfe Ifokē.” Akka mī, “Ē Jesús chanīmara fai,” ifiaxō mī fetsafo sharafamī sama. Akka, ħafeskafaxō mī ato ōimatiromē mī Jesús chanīmara faxō? Akka ē fetsafo sharafakī ē ato ōimatiro ē Jesús chanīmara fakī. <sup>19</sup> Akka mī yoimī s iskafakī: “Nios fīsti, anā ano Nios fetsama,” ixō mī yoimī s. Nāskakē mī chanīmara fai. Nā mī chanīmara fai keskara shara. Akka nā niāfaka chakafāferi chanīmara fakani Nios fīstikē. Akka chanīmara fafiakanax rateifinākōikani choakani māmāi tāpikanax a omiskōipakenakafo mēra Niospa ato potaxiaino. <sup>20</sup> Akka mī yoimī s: “Ē Jesús chanīmara fai. Nāskakē ē Nios fe nīpanaka,” ixō mī shināfikī, mī afaa sharafamī sama. Nāskakē mī shināsharaima. Akka ē mia yoisharapai. <sup>21</sup> Akka nōko xini Abrahamnoa shināfe. Niospa yoini iskafakī: “Mī fake Isaaca ea fīshkoyamafe,” fani. Askafaino Abraham āfe fake fīshkomītsanima, āfe fakekōifiano. Nāskakē Niospa Abraham ōini sharakōi māmāi nikasharakōiaino. <sup>22</sup> Akka shināpo. Abraham Nios chanīmara faxō nā yoiai keskara ani. Akka Abraham yoikī iskafanima: “Epa Niospa, ē mia chanīmara fafiāxō mā yoiai keskara ē akima,” ixō yoinima. Askafaino akiki Epa Nios inimakeranima. Abraham Nios chanīmara faxō, Niospa yoini keskara ani. Nāskakē Nios akiki inimakōini. <sup>23</sup> Taefakī kirika kenenifo Abraham Nios chanīmara fakōinaito. Nāskakē Abrahamki Nios inimani. Nāskaxō Niospa yoini: “Mīfi efe rafepakenakakī,” fani.

<sup>24</sup> Nāskaxō mā tāpitiro fetsa iskaito: “Ē Nios chanīmara fai,” ifiaxō Niospa yoia keskara akima, askara yorakai Nios fe nīpaxatiroma. Niospakai, “Ē mikiki inimai,” fatiroma. Akka fētsa chanīmara fakī, Niospa yoia keskara aki, nāfi Nios fe nīpanakakī. <sup>25</sup> Nāskarifiakī nā xotofāke Rahab Nios chanīmara faxō nā israeli rafe ato oneni tsōa ato reteyamanō. Rahab taeyoi chota feromakōi iyopaoni. Mā askapaonixakī, chipo Nios Ifofaax sharakōi ipaoni. Nāskaxō nā israeli rafe Josué ato nīchini Jericó anoāfo ato ōitanōfo onexō. Nā rafe Rahab ato oneni tsōa ato reteyamanō. Nāskaxō ato fai fētsa nīchini fotanōfo. Nāskakē nā xotofake Rahabki Nios inimani.

<sup>26</sup> Mā nō naano, nōko fero mēsho nomakinoax tsekeano, anā nōko yora shara itiroma. Nāskarifiakī nō Nios Ifofayamakī nō

isharatiroma. Nāskaxō Niosxō nō fetsafo nō axosharatiroma. Nāskaxō nō tāpitiro nō Nios chanīmara faimākai.

### 3

#### *Meka shara fisti yoikāfe*

<sup>1</sup> Efe yora mīstichi, ē mato afara fetsa yoinō. Mā Niospa meka tāpifixō nikasharaxoma mā ato tāpimapaiyamakāfe. Akka nō Niospa meka nikasharaxoma nō ato yoiaito noko nikakaxō akairi afara chakafatirofo. Nāskakē Niospa ato omiskōimafiakī, ato omiskōimasharanima. Akka nokoroko omiskōimakī finai. Nāskakē Niospa meka nikasharaxoma nō ato yoitiroma. <sup>2</sup> Akka fake yome rama finipai paketiro kerex sharaxma. Nāskarifiakī nōko mekapa nō afara chakafatiro, Nios Ifofasharaxoma. Akka fētsa meka chaka yoikīma meka shara fisti yoifafāini nā keskaratokai afaa fetsa chakafaima āa kexemesharatiro. Akka shara ifiakani tsoa shara imisma, afara chakafamisfo.

<sup>3</sup> Akka shinākapo. Āfe ifāfe āfe kamayo renexiti fatiro. Askatari afara pishta aostatiro. Nāskax a kamaki tsoax ifo kafāsatiro. Akka kamayo efapafiano nā aostamea pishta āfe yora kexetiro nā kapaiyai ari kanō. <sup>4</sup> Askatari shinākapo. Kanōa efapanāfāfiano āfe fiti pishtafakeshta. Kanōa efapanāfāfiano āfe fiti āfe ifāfe chiataxō nā iyopaiyai ari iyotiro. Faka faipafāfekē, nā iyopaiyai ari iyotiro ifāfe chiataxō. <sup>5</sup> Nāskarifiakī nōko anari efapayamafiano nō yoikī chakakōi nō yoitiro. Nāskarifiakī chii pishta nō kētefaano nefekī chii xoisafatiro. Nāskakī nōko afarafo noko kōatiro. <sup>6</sup> Nāskarari nōko ana pishtafiano, nō chakai mekaino, nōko meka efapatiro. Nāskakē nō yorafo chakana fatiro Satanás noko pāraino.

<sup>7</sup> Akka yoināfo fetsa fetsatapafoya, peyafoya, xōchixaraifori, faka mēra ikafoya nō ifofamatiro. <sup>8</sup> Akka nōko anakai tsōa ifofamatiroma noko nikanō. Nōko anā nō mekai chakakōi imis nō itiro. Nā rono pae keskarakōi. Rono paekapato noko chachiano nō omiskōitiro. Nāskarifikī nōko anā yora fetsa mekafakī, chakafakī, nō omiskōimatiro. <sup>9-10</sup> Nā nōko ana fistichi nō afara chaka yoitiro. Nāskatari nā nōko ana fistichi nō Epa Nios yoitiro iskafakī: “Epa Niospa, mī sharakōi. Mī nōko Ifo,” ixō nō yoitiro. Epa Niospa keyokōi yorafo onifani āfe ōiti keskara inōfo. Askafixō nō fetsa mekafakī chakafatiro, askafayamakī Niosnoa meka shara nō yoitiro. Efe yora mīstichi, meka sharafekai meka chaka osia shara itiroma. <sup>11</sup> Mai mēranoax faka tsekeai shara itiro, askayamai faka pota tseketiro. Nāskax nōko faka fiti anoax faka pota fe faka shara tseketiroma. <sup>12</sup> Shīko fanax xopaya foaitiroma. Askatari sātera fanax fāraya foaitiroma. Askatari faka fiti anoax faka pota tsekeaino, faka shara tseketiroma, nō mea

shara itiro. Nāskarifikā yōra āfe shinā mēraxō Jesús shinākī fena afaa chaka shināyotiroma.

*Nios fistichi noko shināsharamatiro*

<sup>13</sup> Akka fētsa mato mēraxō Niospa meka tāpisharax āfe ōiti keskara shara ikī, nā keskara yōra shara ixō mato axosharafāitiro. Nā keskara yōra āfe shinā mēra shinākī iskatatiro: “Ē afaayamafixō ē Jesucristoōnoax isharaxō, ē yorafo sharafai,” ixō shināitiro. Askaxō mā noko ōimani Jesús Ifosharafakī. <sup>14</sup> Akka mā isharaxoma, mā fetsafāfe fiai keskara mā fipaimis, askatari mā finakōia ipaimis, ato finōpaiyanā mā askaino māto ōiti fekaxtetiro. Nāskax mā isharatiroma. Nā afara chaka fisti mā shinātaifa, askarafo shināi, inimayamakāfe. Anori shināi iskayamakāfe: “Ē Niospa meka tāpishara, ē āfe ōiti keskarakōi,” iyamakāfe. Anori shinākī mā yoisharaima. <sup>15</sup> Mā askara chaka shināito Niospa mato shināmanima. Mā chaka shināi keskara nā Jesús Ifofaafāfema nāskarari shinākani, Satanās ato shināmanaino. <sup>16</sup> Fetsafāfe fiai keskarari mā fipaimis, askatari mā ato finōpaimis, askafakī nā Jesús chanīmara faafo fe mā feratenāmis. Askaxori mā ato fekaxtefapaimis. Askatari afara chaka fetsa fetsatapafa mā ato amamis.

<sup>17</sup> Akka Niospa noko mēstesharakōi noko shināmasharakōitiro. Nō shara inō, askatari nō fetsafo fe nō mēnāpaiyamanō, tanaimakōi isharakōixō fetsafo nō noisharakōitiro afara axosharayanā, askatari fetsafāfe noko yoipaiyai keskara nō nikakōitiro, askatari fetsafo omiskōiaino nō noiyanā nō axosharatiro. <sup>18</sup> Nō afara fanaxō, āfe fimi nō fitiro mā fimiyo. Nāskarifikā nō isharakōixō a Niospa apaiyai keskara nō shināsharaxō, nō fetsafo shināmasharatiro, tanaima isharakōinōfo.

## 4

*Niospa fichipaiyaima fichipaiyamakāfe*

<sup>1</sup> ¿Afeskaī mā raenā faatanāsharakōimamē? Akka māto shinā mēraxō afarafo mā chakafapai. Nāskax mā feratenā faatanāpai, ōitifishkiyanā. <sup>2-3</sup> Mā afarafo fipaikī fiamax mā ōitifishkikī finakōikī mā fetsafo meepaiyanā mā retepaitiro. Akka a Niospa mato ināpaiyai mā yōkama. Nāskakē Niospa a mato ināpaiyai mato inātiroma mā yōkayamaino. Nā afama mīshtifo mā apaiyai nā fisti mā shināi, fetsafo shinākima. Askaxō mā afara yōkafiaito Niospa mato ināima, mākōimāi mā afarafo fipaiyaito fetsafo inākima.

<sup>4</sup> Akka kēro feneyafix feronāfake fetsafo fe imis keskarakōi māri nāskarakōi. “Jesús ēfe Ifoki,” ifiaxō mā Jesús Ifofakōinama. Nā mā shināi keskara chakakōi. ¿Mā tāpiamamē



mã fetsafo feta afara chakafakĩ, mã Nios noima? A Niospa fichipaiyaima, mã fichipaiax mã Nios fe rafetiroma mãmã noikaspakĩ.

<sup>5</sup> Niospa ãfe Yõshi Shara nõ mēra naneano nõ afe rafepak-enaka. Akka shinãkapo. Nõ afara fetsa noikõikĩ nõ Nios noisharaimano ãfe Yõshi Shara shinãmitsatiro. Akka Niospa meka kirikaki kenenifo iskafakakĩ: “Epa Niospa ãfe Yõshi Shara nõ mēra naneni. Aõxõ noko noikĩ finakõi. Akka nõ Epa Nios noisharayamakĩ nõ afara fetsa noikõiaino ãfe Yõshi Shara shinãmitsatiro,” ixõ kirikaki kenenifo. Nãskakẽ kaxpa noko kenexonifoma. <sup>6</sup> Askatari Niospa meka kirikaki kenekĩ iskafanifo: “Fẽtsa Epa Nios nikakaspakĩ ãa apaiyai keskara fisti aki ãa kakapaiyanã, aa keskara fe kai, Epa Nios afe rafetiroma, akiki inimaima. Akka fẽtsa Epa Nios nikapaikĩ Epa Nios fenai afe isharpakexakĩ. Nãskakẽ Epa Nios akiki inimatiro, askara fe Epa Nios rafesharatiro,” ixõ kirikaki kenenifo. Nãskakẽ Epa Niospa ãfe Yõshi Shara nõ mēra naneano nõ fisti nõ noikõiaino Epa Niospa noko axosharai nõ Ifofasharanõ.

<sup>7</sup> Nãskaxõ yoikĩ iskafakãfe: “Epa Niospa, mã amapaiyai keskara ea amafe,” ixõ yoikãfe. Akka Satanás mato afara amapaiyaito yoikĩ iskafakãfe: “Satanás, Jesucristo ãfe Ifokĩ ea fekaxtefakima, emakinoax katãfe,” ixõ yoikãfe. Mã askafaino mato makinoax ichotanõ. <sup>8</sup> Nios Ifofasharakãfe. Mã Nios Ifofasharaino mato fe rafei. Nãskakẽ mãto chaka xatekãfe afaa chakafapaikakima. Akka fẽtsa Nios Ifofasharapaifiki, Satanásri ifofapai, askatamaroko, Nios fisti Ifofasharakãfe. <sup>9</sup> Afara chakafaxõ shinãchakakõikãfe inimakakima. “Ë afara chakafaax ã rãfikõiaito meei,” ixõ shinãkãfe. <sup>10</sup> Nãskakĩ Jesús yoikãfe iskafakakĩ: “Jesús mĩ ãfe Ifofekẽ ã mia chakafaki. Ea anã chaka soaxõfe,” ixõ yoikãfe. Mã askafaito Niospa mato inimamai. Nãskakẽ noko yoixii iskafakĩ: “Ë mia noi. Ë mia anã chaka soaxonõ, mikiki inimayanã,” ixõ noko yoixii.

### *Fetsaõnoa yoikĩ chakafayamakãfe*

<sup>11</sup> Niospa meka noko yoikĩ iskafakĩ Moisés kirikaki keneni, Niospa shinãmanaino, “Nõinã faatanãkãfe,” ixõ noko yoini. Nãskakẽ fetsafo pãrayamakãfe, ato chakafakĩ mekafayamakãfe. Mã ato chakafakĩ Niospa noko yoini keskara mã akima ato noikĩma. Akka, “Niospa meka chakara,” nõ fatiroma nikakaspakĩ. Askatamaroko nõ nikakõisharatiro. <sup>12</sup> Nios fistichi noko yoini afeskax nõ isharatimãkĩ, ares fistimãi xanĩfokõixõ. Ares fistichi tãpikõia nõ afe keskara ikamãkĩ, shara iyamai chaka nõ ikamãkĩ. Ares noko ifitiro. Akka noko ifiyamakĩ omiskõipakenakafo mēra noko potatiro. Nãskakẽ fetsafo pãrayamakãfe.

*Mā kai tāpiama a inōpokoai afe keskara iximā kai*

<sup>13</sup> Meka fetsari ē mato yoipai. Ea nikakapo. Mā kai afaa tāpiama fatora penata afara afeskara ifiaito mā yoimis iskafakī: “Na penata nō kayamai, penama nō kai pexe rasi ano. Anoxō nō xinia fisti akikai. Anoxō nō kori ichapa fixii nōko afarafo minixō,” ixō mā yoimis. <sup>14</sup> Nāskakē anorima mā shinākōimis. Mā kai afaa tāpiama fatora penata afara afeskara afiaino. Akka fakishpari nai nifi keyopaketro. Nāskax yamarisatatiro. Nāskarifiai nō nīpanakama. Fatora penata nō narisatani. <sup>15</sup> Nāskakē mā yoitiro iskafakī: “Niospa fichipaiyai keskara ē iki. Nāskakē nā apaiyai keskara ē aki,” ixō yoikāfe. <sup>16</sup> Askatamaroko mā kakapaikōimis. “Ē afara ichapa fii,” ixō mā yoifafāini. Niospa mato amapaiyai keskara mā shināima. Nā mā shināi keskara chakakōifo. <sup>17</sup> Niospa mato amapaiyai keskara mā tāpifixō mā askara atama mā afarafo chakafamis.

## 5

*Nā afama mīshti ichapayafō Santiago ato yoini*

<sup>1</sup> Nikakapo kori ichapayafāfe, mato Niospa omiskōimaxii. Nāskakē oiakāfe mā mā omiskōixikai. <sup>2</sup> Māto afama mīshtifo mā payokomea. Māto rapati sharakōifo mā nakaxfāfe pikī keyoa. <sup>3</sup> Māto kori mā mekemis mātonā fisti mā fapaikī. Mā mekeaino mā xinina. Nāskakē fetsafāfe tāpitirofo māto kori mā mekea mā xininaano, tsoa pishta ināxoma, mātonā fisti mā fapaikī. Mā askafaito Niospa mato ōi. Akka mato yoikī iskafaxii: “Māfi afara fishkomītsamiskī. Mā kai tsoa noimisma. Nāskakē ē mato omiskōimaxii,” ixō yoixii. <sup>4</sup> Shinākapo. A mato yonoxomisfo mā ato afaa ināsharamisma, mā ato feparamis finōmafāi fifiakī. Nāskakē Epa Nios yoimisfo iskafakakī: “Epa Niospa, noko axōfe nōko patoronō noko kopifamismakī,” ixō yoimisfo. Askafaifono Niospa ato nikamis. Akka a mato yonoxomisfo mā ato omiskōimanai keskara Niospa mā tāpikōia. <sup>5</sup> Askatari mā afama mīshtifoyax mā isharakōia, afaa yopatama. Afama mīshti ichapayata, ichapa pifāi, rapati ichapayata, nā afarafo mā fipaiyai fo mā fifixō fetsafo mā noimisma. Fetsafo keskarama mā isharakōikē, Niospa mato omiskōimakī finakōixii mā fetsafo noiyamaito. <sup>6</sup> Fetsafāfe afaa chakafayamafiakē mā ato pāramis xanīfo yoikī, xanīfāfe ato retemanō. Nāskatari āakai afeskax ifimetirofoma a yorafa.

*Omiskōifikī tenekāfe, Nios kīfikāfe*

<sup>7</sup> Efe yora mīshtichi, mā omiskōifi fena fenayamakāfe. Nōko Ifo kachikiri fayamakāfe. Akka nō tarepa xiki fanano fenāmāshta foaitiro. Nāskakē nō fena fenakima. Nō oi manayotiro. Akka mā choshiano nō fisharakōitiro foaisharano. <sup>8</sup> Nāskarifikī manasharayokāfe nā nōko Ifo Jesús

chaima nokoaitīa. Nāskakē āfe meka kachikiri fakākima, nikasharakāfe shināchakakākima.

<sup>9</sup> Efe yora mīstichi, feratenāyamakāfe Niospa mato omiskōimayamanō. Nā nōko Ifo Jesús chaima nokoaitīa nā yora chakafo ato omiskōimaniyoi. <sup>10</sup> Efe yora mīstichi, ē mato yoisharapai, shinākapo. Niospa meka yoimisfo Niospa meka yoikani omiskōipaonifo. Omiskōifikani fena fenapaonifoma. Nōko Ifo nikaki finakōipaonifo. Āfe meka yoikī enepaonifoma. <sup>11</sup> Nāskakē Nios atoki inimani. Askatari nōko xini Job omiskōifikī teneni. Omiskōifikī Nios potanima. Nāskakē Nios Jobki inimani. Nāskakē Niospa Job sharafarisafatani. Nāskatari Niospa Job āfe fake fetsafoya āfe ina fetsafori ichapa anā ināni. Nāskakē nōri nō Job shinākī nō tāpisharatiro Niospa noko noisharakōiaito.

<sup>12</sup> Efe yora mīstichi, ea nikasharakapo ē mato yoinō. Afara chanīma fisti yoifafāikāfe. Nāskakē, “Ēje, ē mia axōi,” ixō axosharakāfe. Akka mā yoikī iskafakī: “Maa. Ē mia axōima,” ixō anori yoita ayamakāfe. Mā askafamiskē keyokōichi tāpitirofo mā chanīkima yoimiskē. Nāskakē iskayamakāfe: “Ē mia pārāito, Epa Niospa ea omiskōimatiroki,” ixō yoiyamakāfe Epa Niospa mato omiskōimayamanō.

<sup>13</sup> Fetsa omiskōikī Epa Nios kīfitiro kexesharanō. Askatari fetsari inimai fanāitiro. “Aicho Epa Niosi, mī fāsi sharakōi,” ikax fanāitiro. <sup>14-16</sup> Askatari nā isinī ikaito Jesús chanīmara faafo āto kexemisfo kenatiro Nios kīfixonōfo. Nāskakē ichanākaxō a isinī ikai Nios kīfixoxikakī. Taefakī a mā afarafo chakafamis kāimakāfe. Nāskax mā ranā Epa Nios kīfinōnākāfe mato chaka soaxonō, askatari a isinī ikairi sharafanō. Nāskakē a isinī ikai xiniyaxō femākāfe, Epa Nios kīfixoyanā. Mā nōko Ifo chanīmara fakōixō nōko Ifo mā kīfixonaino, nōko Ifāfe a isinī ikai sharafatiro. Askatari afara chakafaino Niospa āfe chaka soaxotiro. Nō Epa Nios chanīmara fakōita nōko chakafori keyokōi kachikiri faxō nō kīfiaito noko nikakōitiro. Nō yōkai keskara noko afama mīshti axotiro.

<sup>17</sup> Nā Nios yoimis āfe ane Elías feronāfake noko keskarari ini. Nāskaxō Epa Nios fāsikōi kīfiaino oi inima. Kīfikī iskafani: “Epa Niosi, efe yorafāfe mia kachikiri faafokī, fena oi imayamafe, efe yorafāfe anā mia Ifofayonōfo,” ixō yoini. Askafaino xinia tres ata mā xinia fistiri keyoaino oi inima. <sup>18</sup> Askata anā Elías Epa Nios kīfini oi inō. Nāskakē oi ranā ikaino fanafo foisharani.

<sup>19-20</sup> Efe yora mīstichi, fētsa Niospa meka kachikiri fakī anā Jesús Ifofaimano, nā Jesús chanīmara faato yoikī iskafatiro: “A mī afara chakafamis xatefe, anā Jesús Ifofaxii,” ixō yoiaino anā Jesús Ifofatiro. Nāskaxō fētsa mā āfe chakafo

xatemanano, Niospa ãfe chaka soaxoxii. Nãskakẽ nã fer-onãfãke afara chakafapaoni Niospa ãfe chaka soaxõ, anã Niospa shinãchakaima fẽtsamãi taefakĩ ãfe chaka xatemanano. Nãskakẽ a omiskõipakenakafo mẽra kaima. Nãskakẽri mã ato yoisharatiro anã Jesús Ifofanõfo. Nã tii.

*Santiago*

## Pedro Jesús Chanĩmara Faafo Kirika Kenexõ Fomani

*Pedro Jesús Ifofaafo paxkanãifono ato kirika kenexõ fomani*

<sup>1</sup> Ĕkĩa Pedro. Jesucristo ea nĩchini aãnoa ě ato yoimis inõ. Niospa mato katonĩ afe yorafo mã inõ. Akka mato potaifono mã Jesúsnoax paxkanãnino ě mato kirika kenexõ fomai mã tãpinõ. Ponto anoafo fomata, Galacia anoafo fomata, Capadocia anoafo fomata, Asia anoafo fomata, Bitinia anoafo fomata, ě mato fomai. <sup>2</sup> Epa Niospa taefakĩ mato katonĩ mã afe yorafo inõ, ģfe Yõshi Sharaõxõ nã mato amapaiyai keskara mã anõ, mã Jesucristo nikasharakõinõ. Akka ģfe Fãke Jesús mato nãxonĩ ģfe imiõxõ mãto chaka mato soaxoxiki. Niospa mato noikĩ mãto õiti mato sharafaxonõ ixõ ě matoõnoa shinãĩ.

*Jesucristoõnoax nõ Nios fe ipaxatiro*

<sup>3</sup> Nãskakẽ nõko Ifo Jesucristo ģfe Apa Nios nõ aicho fatiro: “Mĩ fãsi sharakõĩ,” ixõ nokomãĩ noikõĩaino ģfe Fake Jesucristomãĩ nõkoõnoax naax anã otonikẽ. Nãskaxõ fake yome rama kãia keskara shara noko imai õiti fenasharayakõĩ. Nãskakẽ nõ afe isharakõipakenaka. <sup>4</sup> Nãskaxõ noko ĩkisharapakenaka nõ afe ipaxanõ. Akka nõ ģfe fakekẽ nã nai mẽraxõ noko mekexona nõkonãri ixii. Nã Niospa noko mekexona afanã afeskafatiroma, chakanari atiroma, askatari keyotiro. Charofo keskarama. Charofo sharashtafix chipo otsi fetsetiro. Nãskakẽ nãfo Niospa noko mekexona nõkonã inõ. <sup>5</sup> Akka mã Nios chanĩmara fakẽ, Epa Niospa ģfe sharaõxõ mato kexesharafafãini nã Jesús oaitĩa mã omiskõinõma, nã oaitĩa afe isharapakexakĩ a mato itipinĩshara faxoni ano.

<sup>6</sup> Nãskakẽ mã inimai finakõikakaini, omiskõifi nono mai anoax. Mã omiskõifix chipo Jesús fe mã isharakõipakenaka. <sup>7</sup> Akka mã Jesucristo chanĩmara fakõini mã oa oro keskara. Akka kooaito mã õitiro orokõimãki, chakaya osiyamaito. Nãskarifiakĩ Niospa noko tãpitiro nõ chanĩmara faimãkai, akka oro sharafiano nõroko finõinĩfofana. Akka nã oro sharafix keyotiro. Akka mã Epa Nios chanĩmara fasharakõiyã mã Jesús potayamaino Jesús anã nãmã matoki fotoax ini-masharakõixii. Iskafakĩ mato yoixii: “Aicho, mĩ ea chanĩmara fakõimis. Mĩ efe isharakõipakenaka,” ixõ mato yoixii.

<sup>8</sup> Mã Jesucristo noisharakõĩ õiyamafikatsaxakĩ. Askatari iskaratĩa mã chanĩmara fakõini õiyamafikatsaxakĩ. Nãskakẽri mã inimai finasharakõiyã mã tsoa yoisharatiroma. <sup>9</sup> Nõmãĩ chanĩmara fasharakõiax, nãskax nõ afe isharakõipakenaka.

10-11 Nã Niospa meka yoimisfãfe a inõpokoai yoikakĩ Cristoõnoa meka shara yoipaonifo, Niospa Yõshi Sharapa ato shinãmanaino. Iskafakĩ yoinifo: “A noko noikĩ noko ifimis nokoki oxii, mato omiskõioxiki mã aõnoax isharanõ,” ixõ kenenifo. Ato askafafiaino tsõa tãpisharapaonima afeskaxoma tãpisharapaipaonifo. ¿Tsoamẽ noko ifimis ixiai afetĩari oximẽ? ixõ shinãpaipaonifo. <sup>12</sup> Akka Niospa Yõshi Sharapa ato tãpimani a inõpokoai yoiaifo keskara, akka afãfe niyokaxõ õiyonifoma. Akka afãfe õiyamafiaifono mãroko mã mã õia. Akka na meka shara Jesucristoõnoa keyokõichi mã nõ nikamis. Noko yoiaifãfe Epa Niospa ãfe Yõshi Shara atoki nĩchini nai mẽraxõ Jesucristoõnoa noko yoinõfo. Nã mã nikamis keskarari Niospa ãjirifãferi tãpipaikõikani.

*Epa Niospa noko yoini Jesucristo keskara shara nõ inõ*

<sup>13</sup> Nãskakẽ itipinĩsharakãfe shinãsharakõïyanã. Nã Niospa noko noikĩ noko afara shara inãxiatĩa Jesucristo oaino. Nãskakẽ manasharakõikãfe. <sup>14</sup> Mãfi Niospa fakefoki. Nãskakẽ Epa Nios nikasharakõikãfe. Mato amapaiyai keskara mã tãpiyopaonima. Mã afara chakafapaoni keskara anã ayamakãfe. <sup>15</sup> Askatamaroko afaa fetsa shinãtama isharakõikãfe. Akka Nioskai afaa chakaya osiama. Niospa mato katonĩ a keskara shara mã inõ. <sup>16</sup> Akka Niospa meka kenekĩ iskafanifo Niospa ato shinãmanaino: “Ë isharakõimiski. Nãskakẽ isharakõikãfe,” ixõ Niospa ato shinãmanaino kenenifo.

<sup>17</sup> Shinãkapo. Mã Epa Nios kĩfikĩ Epa mã famis. Nãskax nõ ãfe fakefokẽ noko õi. Akka a ãfe meka nikamisfo Niospa ato shara fai. Akka a nikamisfoma ato omiskõimatiro. Ares fisti Epa Niospa noko õimis mẽstekõi. Nãskakẽ isharakõikãfe nono nãmãnoax. Nãskaxõ Nios shinãsharakãfe meseyanã. <sup>18</sup> Akka mãto xinifãfe mato tãpimapaonifo keskarato mato nimapakexatiroma. Mãto xinifo Nioski meseapaonifoma. ãakõĩ ipaonifo. Nãskakẽ mãri ato keskara ipaoni chaka shinãi. Mã askaito Niospa mato ifini mã anã chaka shinãyamanõ a mã ipaoni keskara Nios shinãmax. Akka shinãkapo. Mã mã tãpia a oro sharakõi mã Nios inãx mã aõnoax nĩpaxatiroma. Askatari kori exe mã inãx aõnoaxri mã nĩpaxatiroma. <sup>19</sup> Akka Cristo fistichi noko nimatiro. Atokai afaa chakafamisma, nã oveja fake meema keskara sharakõi. Jesús noko nãxonĩ ãfe imi foni noko imasharapakexakĩ nõ anã chaka inõma. <sup>20</sup> Epa Niospa mai onifatama ãfe Fake Jesús katonĩ noko nimapakexanõ. Nãskafekẽ fetsafãfe tãpiyopaonifoma, akka iskaratĩa Epa Niospa mã mato tãpimana. <sup>21</sup> Jesucristoõxõ mã Epa Nios chanĩmara fai, Epa Niospa Jesucristo otoax akiki inimakõini. Nãskakẽ mã iskaratĩa chanĩmara fakõini, Nios manakõïyanã afe ipaxakĩ.

<sup>22</sup> Akka mā mā Jesucristoōnoa meka shara nikakōixō anā afaa chaka shināyamakī. Mā mā isharakōixō mā fetsafo noikōi. Nāskakē māa ranā nōinā faatanāsharakōikāfe māto shinā sharafoyaxō shināsharakōita. <sup>23</sup> Nāskakē nā mā rama fake kāia keskara shara mā. Akka māto epa feta māto ēfa mato fake fifiakanax chipo natirofo. Akka Niospa āfe meka sharaōxō fena keskara shara noko ima, nā keyonakama.

<sup>24</sup> Akka kirika ano kenekī iskafanifo:

Keyokōi yorafo fana keskarafo, sharakōifikanax nā charofo keskarafo. Akka nā fanafo naino āfe charofo keyopaketi. Nāskarifiāi keyokōi yorafo nīpaxatirofoma, keyokōi natirofo. <sup>25</sup> Akka nōko Ifāfe āfe mekakai keyonakama,

ixō kenenifo. Nā mekaōnoa Jesucristoōnoa fetsafāfe mato yoimisfo mā afe ipaxanō.

## 2

<sup>1</sup> Nāskakē nā mā afara chakafamisfo xatekāfe. A mā ato pāramisfo, askatari a mā ato feparamisfo: “Noko sharara fanōfora,” ixō nāfori xatekāfe. Nāskatari a fētsa fiaī tii fi-pai fekaxtemis iyamakāfe. Askatari fetsafo ato chakafapai chanīmis iyamakāfe. <sup>2-3</sup> Askatamaroko nā fake rama kāiato yosixiki chocho apaiyai keskafakī, māri Niospa meka shara fichipaikāfe, oa fake yomē chocho aki yositiro keska shara ixikakī. Mā mā tāpiaki nōko Ifāfe mato shara faxōaito. Nāskakē nā Epa Niospa mato amapaiyai keskara fisti akāfe.

### *Cristo nā tokiri mitsisipa keskaraki*

<sup>4</sup> Nō pexe fakī tokiri mitsisipasharakōi nō fenatiro, pexe mitsisipa sharakōi inō. Akka tokiri mitsisipakima nō pexe faano pexe shara itiroma. Nōko Ifo Jesucristofi nāskarakī oa tokiri mitsisipakōi keskara shara. Nāskaxō afama mīshti fatiro. Nāskafekē tsōa chanīmara famisma, nōko Ifo fichipaimisfoma. Nāskaxō yoimisfo iskafakakī: “Afeskakīkai nō fichipaitiroma,” ixō yoimisfo. Akka Epa Niospa Jesús katonī noikōikī nōko Ifo inō. Nāskakē akiki fekāfe Ifofaxikakī. <sup>5</sup> Nāskarifiakī Niospa mato tokiri pexefā keskara faxii mā afe yorafokē. Askatari mā ato Epa Nios kīfixomis inō mato imaxii afaaya osiama sharakōi mā inō Jesúsnoax, Jesúsmai noko nāxonikē. Nāskakē Nios aicho fakāfe akiki inimakōikāfe, “Epa Niosi, mī fasi sharakōi,” fayanā. <sup>6</sup> Akka kirika ano kenekī iskafanifo, Niospa ato shināmanaino:

Ōikapo, ē Cristo ōia ares fisti sharakōi. Nāskakē ē katonī efe yorafo afe yora inōfo. Nā tokiri mitsisipa keskarakōiki. Nāskakē afe yorafo afe isharakōipakenakafo. Nāskakaxō Cristo chanīmara fakaxō anā afaa chaka shināpakenakafoma. Askatamaroko afe inimakōipakenakafo,

ixō Niospa yoini.

<sup>7</sup> Nāskakē nō Jesús Ifofaxō nō shinākī iskafatiro: “Jesúsfi nā tokiri kerex keskarakōikī, nāskax sharafinakōiaki,” ixō nō shinātiro. Akka a Jesús Ifofaifāfema askara shinākanima: “Oa tokiri shara nō potatiro,” keskafakani. Akka aōnoa yoikī kirika kenekī iskafanifo Niospa ato shināmanaino:

Oa tokiri pexe famisfāfe tokiri efapa shara potafono, pexe ifāfe ato yoitiro iskafakī: “¿Afeskakī na tokiri efapa mā potaimē? Potayamakāfe, efapa sharaki. Ĕ fichipaikai Ĕ akiki pexe fanō,” ixō pexe ifāfe yoitiro,

ixō yoinifo Jesúsnoa yoikakī. <sup>8</sup> Askatari kirika kenenifo iskafakakī Niospa Yōshi Sharapa ato shināmanaino:

Tokiri efapafai nēxpakīa rakano tsōa ōiamax akiki otisikaini paketirofo keskakani. Nāskarifiakani tsōa nōko Ifo chanīmara fakanaxma, oa pakeai keskarakanax fenokanax Epa Nios ika ari fopaifikani nā omiskōipakenakafo mēra fokani,

ixō kenenifo. Niospa anori yoifinino Cristoōnoa nikayamakanax fenopakenakafo. Nānori kirika kenenifo, Niospa ato shināmanaino.

<sup>9</sup> Akka māfi askaramakī. Niospa mato katonni afe yorafo mā inō. Nāfi nōko Xanīfokōikī mā yonoxotiro, fetsafori mā ato kīfixotiro Jesúsnoa ato tāpimaxiki. Noko aa keskara shara imaino mā afe yorakōi itiro. Nāskaxō aōnoa fetsafo mā yoisharatiro iskafakī: “Epa Nios sharafinakōia afara noko sharafaxomis,” ixō nō ato yoitiro. Epa Niospa mato katonni afe yorakōifo ikax xafakīakōi shara mā afe ipaxanō, anā fakish mēra ika keskara mā inōma. <sup>10</sup> Akka māakai Nios shināyopaonima, afe yorakai mā iyopaonima. Akka iskaratīa mā afe yorafo, taeyoi Niospa mato noifiaino mā tāpiyopaonima. Akka iskaratīa mato noikōiaito mā mā tāpia.

### *Nō Niospa yorafo ikax nō shara itiro*

<sup>11</sup> Efe yora mīshtichi, Ĕ mato yoisharapai ea nikasharakāfe. A Nios Ifofaafomafo fe nō ato fe ikax oa yora fetsa keskara nō iki. Askafiax nōkai ato fe ipanakama. Akka nōroko Epa Nios fe ĩpanaka. Nāskakē nā Epa Nios Ifofaafoma keskara iyamakāfe. A mato shināmapaiyaifo keskara shināyamakāfe. Mā ato keskara itiroki, Satanās mato chakafamapai kiki. <sup>12</sup> Nāskakē ato mēranoax Jesús Ifofaax isharakōikāfe. Akka afāfe mato yoikī chakafamisfo fanīrira mato mekafakakī. Nāskakē ato kopiyamakāfe. Tanaimakōi ato mēra ikāfe. Mā askaito mato ōinōfo mā afaa chakafatama mā isharakōikē a Niospa keyokōi noko ichanāfaitīa mā mai keyoaino. Nāskakē mato iskafakani: “Aicho, na yorafo fāsi sharakōifo, nō ato



chakafafiaino noko kopikanima, Niosxō noko shara famisfo. Fāsi Nios sharakōi,” ixō yoinōfo.

<sup>13-14</sup> Nōko Ifo Jesús fichipaiyai keskafakī, xanīfofo nikasharakōikāfe. Askatari a noko īkinā nōko xanīfo finakōia nikasharakōikāfe. A xanīfo fetsafori ato nikakāfe. Nā xanīfo finakōiato ato xanīfo imakī, afāfe nā afara chakafaifo ato omiskōimanōfo, askatari a afara shara famisfo ato yoisharanōfo. <sup>15</sup> Nāskakē Niospa fichipaiyai keskafakī mā fetsafo afara shara faxōfafāikāfe. Nā afaa tāpiamafāfe shara shināmisfomakī, askatari Niospa meka tāpiafomakī ōikaxō anā mato mekafatirofoma māmāi ato shara faxōaito a Niospa fichipaiyai keskafakī.

<sup>16</sup> Jesús fisti mātō Ifokōi, akka afaa fetsa shinātama isharakōikāfe. Niospa mato amapaiyai keskara fisti shinākāfe. Mā askax afaa fetsa mātō ifo itiro. Afaa chakafatama Nios yonosharaxōfafāikāfe. <sup>17</sup> Nāskakē keyokōi yorafo shināfafāikāfe. Nā Jesús Ifoafafori ato noikōikāfe. Niosnoa shinākōikāfe iskafakī: “Ē Nios noikōi nā ea yoiai keskara ē nikakōi. Ēkai nikayospapaima ea omiskōimanōma,” ixō Niosnoa shinākāfe. Nāskaxō mātō xanīfofo nikakaspayamakāfe, ato nikasharakāfe.

*Cristo noko omiskōixoni keskai nōri nō aōnoax omiskōitiro*

<sup>18</sup> Ato yonoxomisfāfe mātō xanīfofo ato nikasharakōikāfe. Nā mato sharafafos shinākakīma. Nā yora chakafāferi mato yonomamisfoki ato nikakāfe. <sup>19</sup> Mā afaa chakafayamafiakē mātō xanīfāfe mato omiskōimanaino Nios shināki tenekāfe. Mā askaito Epa Niospa matoōnoa yoisharai kiki. <sup>20</sup> Akka mā afara chakafakē mātō xanīfāfe mato omiskōimanaino, Niospa mato iskafakī yoitiro ma mā teneaito: “Mī afara sharakōifaa,” ixō mato yoitiro ma mā māmāi afara chakafakē. Akka mā afara sharafaino mato omiskōimanaifono mā omiskōifināfikī mā tenekē, nōko Ifo Niospa matoōnoa yoikī: “Sharakōifo,” mato fatiro. <sup>21</sup> Cristo nokoōnoax omiskōikōini, nāskakē nōri aōnoax nō omiskōitiro. Nāskax nō aa keskara shara itiro. <sup>22</sup> Cristokai afaa pishta chakafamisma, askatarikai tsoa pishta pāramisma. <sup>23</sup> Fetsafāfe mekafakakī īchafiaifono, atorikai kopikī tsoa īchamisma. Askatari omiskōimanaifono, “Ēri mato kopixii,” ixō ato yoinima. Askatamaroko Apaōnoa shinākī iskafani: “Epa, mī eōnoa tāpiaki. Nāskarifikī mī ato tāpikōia. Nāskakē a mī ato chipo omiskōimaxiai chanīmakōi,” ixō Apa shināni, Apamāi mēstekōi ikē. <sup>24</sup> Cristo cruznoax noko nāxoni, nōko chaka noko soaxoxiki. Nāskakē nō anā fanīrira shinātiro oa yora naa keskara nō itiro mā noko chaka soaxonano nō afe isharapakexanō. Māraki yora naato afaa shinātiro. Nāskax mēstekōi nō isharakōitiro. Nā noko omiskōixonioōnoax nō isharakōipakexanō. <sup>25</sup> Akka mā taeyoi oa oveja fenoa keskara mā iyopaoni afara chaka shināi. Akka iskaratīa mā

Cristo Ifofasharakōi, mato kexesharano oa oveja kexemisto āfe oveja kexetiro keskafakī. Nāskaxō mato kexesharakōiaino mā afe yora iki.

### 3

#### *Afeskax fene fe kēro isharatirofomāki Pedro ato yoini*

<sup>1</sup> Nāskarifiakī māri kērofāfe, mato fenefo nikasharakōikāfe. Nā Niospa meka shara chanīmara faifāfema mā isharaito mato ōikakī Niospa meka shara chanīmara fanōfo, mā afaa yoyamata mā isharakōiaino ōikakī. <sup>2</sup> Māto fenefāfe mato yoiaino ato nikakaspakakīma ato nikasharakāfe. Mā Jesús keskara shara ikaito ōikakī nōko Ifo chanīmara fanōfo. <sup>3</sup> Akka mā samasharakōi safexō, foarome sharakōita, teoti sharakōi safeta, parotameti sharakōi mā safekē, mato tsōa tāpitiroma mā ōiti sharaya iyamai mā ōiti chakayakē. <sup>4</sup> Akka mā Cristo Ifofasharakōixō mā ato ōimasharakōitiro. Māto ōiti mēraxō shināsharakōita, meka mitsisipato mā ato yoitiroma, tanaima sharakōi mā itiro. Fetsafo ōikī ato yoisharakāfe, ato fe isharakāfe. Mā askaito ōikī Niospa mato iskafatiro: “Na kērofo sharakōifo ē ōi,” ixō Niospa mato yoitiro matoki in- imayanā. <sup>5</sup> Nāskakanax kērofo ranāri Nios Ifofasharakanax isharakōipaonifo. Nāskakaxō āto fenefo nikakōisharapaonifo. <sup>6</sup> Akka nā Sara āfe fene Abraham nikakōisharapaoni, “Ēfe ifora,” fayanā. Nāskax mā isharakōiax, askatari mā meseyamax Sara āfe fenafo keskara mā itiro.

<sup>7</sup> Akka māri feronāfakēfāfe, mato āfiffo ĩkisharakōikāfe. Nā kērofokai mitsisipafomakī mato keskara. Nāskakē ato kexesharakāfe, mato feta Nios Ifofaafoki Niospa ato noikī atori ifiakī afe ipaxanōfo. Nāskakē māto āfiffo ato noisharakāfe. Mā ato noiamax ato kexesharaxoma mā kifiaito Niospa mato nikasharatiroma.

#### *Afara ato sharafaxōkani omiskōitirofo*

<sup>8</sup> Nāskakē isharakōixō keyokōichi nānori fisti shināsharakāfe. Oa mato fe yora mā noiai keskafakī ato fe nōinā faatanāsharakōikāfe. Ato shinākī ato axosharafafāikāfe. Askatari, “Nā yora afaa tāpiamafo ē finakōia,” ikaifo keskai askayamakāfe. <sup>9</sup> Fētsa mato chakafaito kopiyamakāfe. Askatari mato ĩchaito kopikiri ĩchayamakāfe. Askatamaroko ato noisharakāfe, akka Niospa noko katonikī noko sharafakī. <sup>10</sup> Niospa meka yōra kenekī iskafani, Niospa Yōshi Sharapa shināmanaino:

Mā isharapaikī afara chakafo yoyiamakāfe, fetsafo pārayamakāfe. <sup>11</sup> Afara chakafo fishtayamakāfe, ato makinoax fotakāfe. Askatamaroko afara sharafos akāfe. Afeskax mā isharatiromākī nāskax isharakōikāfe fetsafo fe. <sup>12</sup> A Niospa meka nikasharakōipaiyaino Niospa ato

kexesharakōifafāini, kīfiaifāferi ato nikakōimis. Akka a afara chakafamisfo Niospa ato nikatama ato tāpimatiro ato chakafakī,

ixō yorafāfe Niospa mekaōnoa kenenifo.

<sup>13</sup> ¿Mā afara ato axosharaino, akka tsōa mato chakafatiromē? <sup>14</sup> Akka mā askafiaino mato omiskōimanaifono inimai finasharakōikāfe. Nāskakē atoki meseyamakāfe, askatari shināchakayamakāfe. <sup>15</sup> Askatamaroko nōko ōiti mēraxō nōko Ifo kīfikī iskafakāfe: “Cristo, mīfi ēfe Ifokōiki. Mīkai afaa chakafamisma, mī sharakōi,” ixō yoikāfe. Askatari fetsafāfe mato iskafaiifāfe: “¿Afesakxō mī tāpamē mī Nios fe ipanaka?” ixō mato yoiiaifāfe ato yoixikakī īkisi itipinīsharakāfe ato tāpimasharaxikakī. <sup>16</sup> Akka māroko isharakōita ato nikasharakōikāfe, mato ōinōfo mā shara ikaito. Māto ōiti fekaxtefayamakāfe. Akka mato chakafakī mekafaiifāfe iskafakī mato yoikanax: “Na Jesús Ifofamisfāfe afara chakafamisfo,” ixō mato yoifikanax rāfitirofo māmāi isharakōikē. <sup>17</sup> Akka nō afara shara faino fetsafāfe noko omiskōimanaifono nō teneaino Epa Nios nokoki inimatiro. Akka nō afara chakafaax nō omiskōiaino nokoki inimatiro.

<sup>18</sup> Akka Cristo nokoōnoax omiskōiax nani nōko chaka noko soaxoxiki. Anākai nanakama nai fistini. Sharakōifiano retenifo. Akka nō chakakōifokē noko nāxonī. Apa Nios ano noko imapakexakī. Akka mā nafiax āfe fero mēsho nanima, anā otonī Āpa Yōshi Sharaōnoax. <sup>19</sup> Akka mā naax āfe fero mēsho Niospa Yōshi Sharaōnoax a namisfo mēra kayoni a tsoa tsetiroma ano, anoxō yoikai. <sup>20</sup> Akka nāfo nayokanaxma taeyoi nikayospakōi iyopaonifo. Nāskaifono Noéri nāno ato fe iyopaoni. Nāskakē Epa Niospa Noé manayopaoni kanōanāfā fayofaino, Noémāi Epa Nios Ifokakē. Āfe fakefori afe inifo, āto āfiffo fe. Ocho inifo. Nāskakē ato fāka āsanima Epa Niospamāi ato kexesharakē. Akka nā nikayospafo ato fakafānē āsakī mitoni. <sup>21</sup> Faka faipafāino kanōanāfā mēra ikiax Noé āfe āfi fe āsanima. Āfe fakefori āto āfiffo fe afe ikikanax āsanifoma. Ocho inifo. Nāskarifiakī fētsa noko maotisafakī faka mēra noko ikimaxō, noko fininīfofanaino nō yorafo ispai nō Jesús Ifofakī nōko chaka noko soaxonō nō afe ipaxanō. Akka nā noko maotisafafoōxokai nōko choshta nō soatiroma. Askatamaroko nō Nios yōkai nōko chaka noko soaxonō noko īkipakexanō Jesúsmāi mā naax anā otonikē. Nāskaxō nō anā shināchakatama Jesucristoōxō nō shināsharakōi Nios fe ipaxakī. <sup>22</sup> Jesús Apa ari nai mēra kani Apa Nios fe xanīfokōi ixiki. Nāskakē ājirifāfe āto xanīfofōfāfe Jesús finōtiroma nā yōshifāferi. Askatari nā yōshifāferi xanīfofiakaxō Jesús finōtirofoma Jesúsmāi finakōikē.

## 4

*Epa Niospa noko ãfe shara inãi keskafakĩ fetsafori nõ sharafaxotiro*

<sup>1</sup> Nãskakẽ nã Cristo ãfe yora omiskõini keskai, mãri nãskai omiskõixikai itipinĩsharakãfe. Akka nã omiskõiato anã afaa chaka shinãtiroma mãmãi ãfe chaka xatexõ. <sup>2</sup> Isharakõixõ nã mã apaiyai keskara mã atiroma, nã Niospa mato amapaiyai keskara mã atiro. <sup>3</sup> Mã xini ichapa finõa, nã Jesús Ifofaafãfema apaonifo keskara mã ayopaoni. Nã mã afara chakafapaiyai keskara fisti mã ayopaoni. Mãto ãfimafo mã fichipaipaoni. Kẽrofori askapaonifo. Askatari mẽxotaima mã pãepaoni, ato fe ichanãx afarafo chakafayanã ayakĩ finakõiyana. Askatari afara fetsafo mã noikõipaoni nã Nioskõi noitama. <sup>4</sup> Akka mã anã ato fe rafeyamaxõ mã anã ato feta afaa chakafayamaito õikakĩ. Nãskaxõ mato yoikĩ iskafatirofo: “Õikapo. Na yorafãfe anã nofeta afaa akanima,” ikaxõ mato chakafakĩ mekafatirofo. <sup>5</sup> Akka ato askafaifãfe Niospa ato yoixii iskafaki: “¿Afeskakĩ mãto chaka mã xatekaspakĩ na fet-safo mã ato chakafamismẽ?” ixõ ato yõkaxii. Ato askafata ato omiskõimaxii. A niyoafoya a namisfo Niospa ato omiskõimaxii, tsõa Ifofatama ãto chaka xateyamafono. <sup>6</sup> Nãskakẽ Epa Niospa ãfe meka yoimisfo nĩchini yorafãfe nayokaxoma Jesucristoõnoa meka shara nikanõfo. Nã namisfãfe niyokaxõ nikayopaonifo. Akka mã keyokõi nanifo. Nãskafikẽ fatora fetsafãfe Jesús chanĩmara fakẽ Epa Niospa nã nia keskara ato imapakenaka afe ipaxanõfo.

<sup>7</sup> Nãskakẽ meka fetsari ã mato yoinõ. Nikakapo. Mã chaima mai keyoi kiki. Nãskakẽ shinãsharakãfe, afaa chaka shinãtama. Epa Niospa mato shinãmapaiyai keskara fisti shinãkãfe. Nãskaxõ Epa Nios fisti kĩfifafãikãfe. <sup>8</sup> Nãskax noinã faatanãkõikãfe nõ noinãkõia sharaki. Fetsa noikõixõ nõ rae fatiro, a noko chakafai keskara anã shinãnõma. <sup>9</sup> Fetsafo mãto pexe ano nokoaito akiki inimayanã mãto pexe anoxõ ifikãfe, ato mekafakĩ chakafaxoma. <sup>10</sup> A Niospa ãfe Yõshi Sharapa noko tãpimanai keskafakĩ nõri fetsafo axosharatiro fetsafãferi Nios Ifofanõfo. Nãskaxõ fetsafo afara shara faxokĩ xateyamakãfe. A Niospa afe yorafo noikõiai keskafakĩ mãri ato noikõikãfe. <sup>11</sup> Mã Niospa meka yoi, nã Nioskõi mekai keskaraõxõ ato yoikãfe. Mãto shinãmã shinãxõ ato yoikakĩma. Askatari mã Niospa Yõshi Sharaõxõ mã afarafo ato shara faxõfaito õikakĩ yorafãfe iskafakĩ yoitirofo: “Aicho, Epa Nios sharakõi. ãfe Fake Jesucristoõxõ afama mĩshtifo fatiro,” ixõ yoitirofo. “Epa Niospa ares fisti afarafo shara famis, atokai afaa chakafapanakama. Ares fisti ãfe Yõshi Sharaõxõ afama mĩshti fapanaka,” ixõ yoinõfo.

*Nō omiskōifikī nō tenetiro nōmāi Jesucristo chanīmara fakī*

<sup>12</sup> Efe yora mīshtichi, omiskōifikī rateyanā shināchakayamakāfe. Mā askaito Epa Niospa tāpitiro mā Jesús Ifokōi fakē. Nāskakī shinākī iskafayamakāfe: “¿Afeskai ē omiskōimē?” ixō anori shināyamakāfe. <sup>13</sup> Askatamaroko inimakōikāfe Jesucristo omiskōiai keskai māri omiskōifikī. Askatari chipo mā inimasharakōixii Jesucristo anā nai mēranoax fotoaino. Nāskakē keyokōichi ōixikani āfe sharafoya nai mēranoax fotokē, nōko xanīfo finakōi ixiki. <sup>14</sup> Akka mā Cristo Ifo shara faino Cristoōxō mato īchaifono inimakōikāfe. Nāskakē Epa Niospa āfe sharafoya āfe Yōshi Shara matoya rafemani kiki. <sup>15</sup> Akka fatora mā fētsa mā afaa chakafamiskēma mato omiskōimanaifono tenekāfe inimayanā. Askatari yometsoyamata, askatari afara chakafakī finata iyamata, askatari fetsafāfe afara yoipaiyaifo keskara ato feta ayamakāfe omiskōixikākima. Ato keskara iyamakāfe. <sup>16</sup> Akka nō omiskōi Nios Ifofaax, nāskakē rāfiyamakāfe. Askatamaroko Epa Nios yoikāfe iskafakī: “Aicho Epa Niosi, ē mī Fāke Jesús afe yora. Nāskakē nā chanīmara faafāfema ea omiskōimanaifono ē Jesúsnoax omiskōi. Aicho,” ixō yoikāfe.

<sup>17</sup> Akka Epa Niospa yorafo keyokōi tāpimaniyoi afe keskara ikafomākī. Taefakī noko ōikī taefaiyoi nōmāi afe yorafokē. Akka chipo nā Jesús chanīmara faafomafori ato yoixii afe keskara ikafomākī. Akka iskaratīa nō omiskōiyoi, anākai nō omiskōinakama nō isharakōipakenaka, Epa Nios fe nai mēra. Akka chipo nā Niospa meka nikakaspamisfo omiskōi finakōixikani, afokai anā nīpanakafoma. <sup>18</sup> Niospa meka yoikī iskafakī kenenifo: “Nā Nios chanīmara faifo isharakōimisfo, Nios ari foyokanaxma omiskōiyotirofo. Nāskafikanax mā Nios ari nokokanax anā omiskōinakafoma. Akka nā Nios chanīmara faafāfema afara chakafamisfo nāfo omiskōi finakōipakenakafo,” ixō kenenifo. <sup>19</sup> Nāskakē nā Niospa mato yoiai keskai mā omiskōifikī shināchakayamakāfe. Nāato mato onifaniki. Nāskakē yoikī iskafakāfe: “Epa Niosi, mī ea amapaiyai keskara fisti ē apai. Meres fisti mī ea yoitiro,” ixō yoikāfe. Nāskax isharakōikāfe nā mato yoiai keskara amiski.

## 5

*Afeskax isharatirofomāki a Nios Ifofaafō Pedro ato yoini*

<sup>1</sup> Akka nā Niospa meka nikakani ichanāfono ato kexemisfo, ē mato yoisharapai ea nikasharanōfo. Nāskaxō mātō shinā mēra ēfe meka nanesharakāfe. Ēri nā Jesús chanīmara faafo ē ato kexemiski. Nōko Ifo Cristo omiskōiaito ē ōini. Anā oaino ēri afe isharaipakenaka. Tsōa a keskara ōimisma sharakōi keyokōichi ōixikani. Ēri ōixii a keskara sharafinakōia.

<sup>2</sup> Nāskakē ē mato yoi nā Jesús chanīmara faafo ichanāifono Niospa mato yoini keskafakī ato kexesharakāfe. Ato Niospa meka yoisharakāfe isharanōfo. Nāskaxō shinākī iscafayamakāfe: “Ooa, ē afara fetsafapaifikī ē Niosxō ato kexei,” ixō shināyamakāfe. Askatamaroko a Niospa fichipaiyai keskafakī ato kexesharakāfe ato noiyana. Nāskakē, “Ea Niospa ato yoimanaino ē ato yoikaspai,” ixō yoiyamakāfe. Anori shinātamaroko inimasharayanā Niospa meka ato yoisharakāfe. “Ē ato yoiato ea kori inākani kiki,” ixō shināyamakāfe. Anori shinātamaroko ato Niospa meka yoisharakāfe inimayanā. <sup>3</sup> Nāskata āto xanīfo ipaikakīma ato ōimasharakāfe afeskaxō Jesús Ifofasharax isharatirofomākī. <sup>4</sup> Mā askaito a noko kexemis, nōko Ifo Jesucristo anā nāmā fotoxō mato ōisharaxii. Nāskaxō mato afara shara ināxii a keyonakama. Nāskakē mā afe īpanaka.

<sup>5</sup> Nāskarifiakī māri naetapafāfe anifofo yafi a mato Niospa meka yoimisfo nikakōisharakāfe. Naetapafāfe anifofo fe isharakōikāfe. Nāskata mā ranā axoshara faatanākāfe. “Ē xanīfoki,” iyamakāfe. Akka, “A xanīfo nipaikani kakapaimisfoki Nios atoki inimaima. Akka a kakapaimisfomaki Nios atoki inimayanā ato afara axosharai ato noikī,” ixō kenenifo Niospa meka yoikakī. <sup>6</sup> Epa Nios finakōixō afama mīshti famis. Nāskakē kakapaimis iyamakāfe. Anori shinātamaroko iscafakāfe: “Epa Nios finakōia. Ē afaa tāpiama,” ixō yoikāfe kakapaimis ikakīma. Mā askaito Niospa ato mǎnāo mato nīchixii xanīfo keskara mā inō. <sup>7</sup> Askatari afaa shināchakayamakāfe. Afaa shinātamaroko Nios yoikāfe mato kexesharanō. Niospa mato noikī mato kexesharaino anā mǎto ōiti fekaxtefayamakāfe.

<sup>8</sup> Shināsharata mēste shinākāfe. Satanás noko noikaspakī noko chakafapai kiki, oa poomā fonāiki kafāsakī yoinā fenai keskaraxō. Satanás chakata noko afara chakafamapaimiski Niosnoa tsōa shinānōma, Satanás ato chakafamaino afe yora inōfo. <sup>9</sup> Nā mā omiskōiai keskariai nā nōko Ifo chanīmara faa fetsafori maitio anoax omiskōikani. Nāskakē Satanás mato afara chakafamapaiyaito nikayamakāfe. Mǎto Ifo fistiroko chanīmara fakāfe. Afara chakafayamakāfe. <sup>10</sup> Niospa mato noikōikī mato katonī, Cristo ika ari mā afe isharakōipakexanō nā sharafinakōia ano. Nono mai ano mā iyoax mā aōnoax omiskōiyoi. Mā askaino Epa Niospa mǎto ōiti mato kerex faxōi. Nāskaxō afara afeskara afiaino mā tenekōixō mā Jesucristo Ifofasharakōixii. <sup>11</sup> Nāatofi afama mīshtifo fapanakaki. Nā fistichi atiro keskafakī tsōa askafatiroma. Nā fistichi askafāpanaka.

*Mā mekai xatekī Pedro ato meka shara yoini*

<sup>12</sup> Ëfi Silvano shinãkõimis. Ë tãpia nã Niospa amapaiyai keskara amiskẽ. Akka nã ã mato yoipaiyai anori ea kirika kenexoni. Na kirika ichapama ã mato kenexoni mãto õiti mato inimamasharakõixonõ mã shinãsharakõinõ. Ë mato yoi chanĩmakõi Niospa noko noikõi. Nãskakẽ nãnori fisti shinãkãfe fanĩrira shinãkakima.

<sup>13</sup> Jesús chanĩmara faafo ichanãmisfo mẽraxõ Babilonia anoafãfe mato yoisharakani. Ëfe fake Marcosri mato yoisharapai. Nãfori Niospa katonu afe yora inõfo, noko akai keskafakĩ. <sup>14</sup> Mãri mã nõinã faatanãi yoinõnãsharakãfe. Mã Cristo yorakõifokĩ, nãskakẽ inimasharakõikãfe. Nã tii.

*Pedro*

## Pedro Jesús Chanĩmara Faafo Afianã Kirika Kenexõ Fomani

*Pedro Jesús Ifofaafo ato kirika kenexõ fomani*

<sup>1</sup> Ēkĩa Simón Pedro, Jesucristo ẽ yonoxomis. Aõnoa yorafo ẽfe meka shara ẽ ato yoinõ ea nĩchini. Nãskakẽ ẽ mato kirika kenexõ fomai, mã mã nõko Ifo Jesús mã chanĩmara fakĩ finakõiano ẽ akai keskafakĩ. Nã nõko Ifo Nios feta Jesucristo noko ifimis nã ẽ chanĩmara famis nãmãisharakõimiskẽ.

<sup>2</sup> Akka Epa Nios yafi nõko Ifo Jesús mã tãpikõikẽ matoõnoa shinãkĩ mato inimamakõikĩ mato õiti mato inimamaxotiro tanaima sharakõi mã inõ.

*A Nios Ifofaafo afeskax isharatirofomãki*

<sup>3</sup> Niospa noko katoni a keskara shara ikax nõ afe ĩpaxanõ. Nãatofi afama mĩshti fatiroki. Nõ Nios tãpikõikẽ afara nõ yopaito ẽfe kerex sharaõxõ noko inãxii. Nãskaxõ noko amapayai keskara nõ anõ. <sup>4</sup> Nãskakẽ noko yoiyoni keskafakĩ ẽfe kerex sharaõxõ afara sharakõifo noko axoxii a keskara sharakõi nõ inõ. Akka a nikakaspaifãfe nã afara chakafapayaiifo keskara fisti amisfo. Nãskaifono Niospa noko imasharai nõ ato keskara inõma. <sup>5</sup> Nãskakẽ nã mato imapayai keskakãfe, chanĩmara faax a keskara sharakõi ikãfe. A keskara sharakõi mã ikaino, Niosxõ mato amapayai keskara fisti tãpikãfe. <sup>6</sup> Akka nã mã apayai keskara fisti shinãkakĩma, kexemesharax aõnoax isharakõita afara afeskaraino tenekõita Niosnoa fisti shinãfafãikãfe. <sup>7</sup> Askatari keyokõi yorafo sharafata oitsifaxõ ato noifafãikãfe.

<sup>8</sup> Mã askafakĩ nõko Ifo Jesucristo mã tãpikõitiro. Nãskaxõ nã mato amapayai keskafakĩ mã yonoxosharakõitiro. <sup>9</sup> Akka mã askafayamai oa fẽxo keskara mã itiro, õisharaima. Nãskakẽ mato chaka mã mato soaxofiano mã anã shinãima, mã mã shinãmakiax. <sup>10</sup> Nãskakẽ efe yora mĩshtichi, Niospa mato ifikĩ mato shinãmani mã afe yorakõifo mã inõ. Nãskakẽ afe yorakõi isharapaikõikãfe. Shinãsharata isharakõikãfe. Askafaax mã anã afara chakafo ifoaima. <sup>11</sup> Mã askaito õikĩ mato ifisharakõixii a ika ano mã afe ĩpaxanõ nõko Ifo fe. Nõko Ifo Jesucristo noko ifimis.

<sup>12</sup> Nãskakẽ ẽ mato shinãmafafãini, mã mã tãpifekẽ, nãskakẽ iskaratĩa na meka shara mã mã tãpixõ nã fisti mã shinãkõimis. <sup>13</sup> Akka ẽ nayoxoma ẽ mato yoisharafafãini, <sup>14</sup> mãmãi nõko Ifo Jesucristo ea tãpimanano ẽ chaima naino. <sup>15</sup> Nãskakẽ mẽxotaima ẽ mato yoirifai mẽnaano nã ẽ mato yoimis keskara mẽxotaima mã shinãfafãinõ.



*“Cristo Niospa Fake chaxapakekafanaito ě õini,” ixõ Pedro ato yoini*

<sup>16</sup> Nõ mato yoimis nõko Ifo Jesucristo ěfe kerex sharaõxõ afama mĩshti fatiro. “Anã nokoki oxii,” ixõ nõ mato yoimis. A yorafãfe yoipaonifo anori nõ mato yoimisma. Akka nõko ferokõichi nõ õini, nõko Ifãfe chaxapakefofãnaito. <sup>17</sup> Askatari ěfe Apa Niospa iskafakĩ yoini: “Nafi ěfe Fakekõikĩ ě aõ noisharakõi, ě akiki inimakõi,” ixõ yoini. <sup>18</sup> Nõkõi nikani nai mēranoax mekai askaito. Nã mãchifã ano nõko Ifo fe nõ ini, nã mãchifã anoxõ nõ nikani anoax Nios mekaito.

<sup>19</sup> Akka a Niospa meka yoipaonifãfe a inõpokoai keskara yoikakĩ Jesúsnoa kenenifo keskara nõ chanĩmara fakõitiro. Nãskakē mãri mã na meka mã chanĩmara fakõitiro. Oa rãparinĩ fakish mēraxõ chaxatiro keskafakĩ, akka mã penano xafasharakõitiro. Nãskarifikĩ mã Niospa meka nikasharaino Epa Niospa mãto õiti mēra oa pena keskara mato fatiro. <sup>20</sup> Akka taefakĩ iskara tãpikãfe. A Niospa meka yoipaonifãfe ãa ãto õiti mēraxõ shinãkaxõ kenepaonifoma. <sup>21</sup> Askatari ãa ãto shinãmã shinãxõ yoipaonifoma. Askatamaroko Niospa Yõshi Sharapa ato shinãmanaino nãnorikõi ato yoipaonifo. Nãskakaxõ a Niospa Yõshi Sharapa ato shinãmanai keskara kenepaonifo.

## 2

*Fetsafãfe chanĩ fisti ato yoipaonifo*  
(Ju. 4-13)

<sup>1</sup> Akka, “Nõ Niospa meka mato yoinõra,” ixõ ãa nõko xinifo ato pãrapaonifo. Nãskarifikĩ mato mēraxõ mato pãramisfo, “Nõ Niospa meka mato yoinõra,” ikaxõ. Afãfe mato pãrakani fanĩrira mato yoikani mã anã shinãsharanõma. Akka nõko Ifo Jesús ato nãxoni afara chaka ãto ifo inõma. Nãskakē a nõko Ifãfe noko tãpimapaoni keskara chanĩmara faafoma. Nãskakē nãfo Epa Niospa ato omiskõimarifaxii omiskõipakexanõfo. <sup>2</sup> Nãfãfe afara chakakõifo ato tãpimanaifo keskafakĩ yora ichapafãfe ato nikamisfo. Nãskakaxõ atoõxõ Niospa mekaõnoa chakakõi fatirofo. Nãskakē a Niospa ato shinãmapaiyai keskara shinãkanima mã fenoafo. <sup>3</sup> Nãskakaxõ kori fisti noikõimisfo, “Nõ mato yoinõra,” ixõ mato pãrakani. Akka a afara chakafaifo keskara mã Niospa tãpia fatora penata ato tãpimani omiskõipakexanõfo. Afetĩama Niospa shinãyoni a yora chakafo ato omiskõimapakexakĩ.

<sup>4</sup> Epa Niospa ěfe ãjirifo ãto chaka ato soaxonima afara chakafãfãfe. Askatamaroko chiifã mēra ato potani, anoax fakishifã mēra ĩpaxanõfo kaninãnã ato metexkere axõ. Nã ato ichanãfaitĩa ato yoixõ ato omiskõimaxii. <sup>5</sup> Nãskatari nã yorafo Noé niyoatĩa Niospa meka nikakaspafono Niospa ãto chaka

ato soaxonima. Askatamaroko oi kaya imani faka faipafaxō a yora chakafo ato āsakī mitonō. Akka Noé fisti āsanima. Nā Noé ato yoiyopaoni iskafakī: “Nios sharakōikī mātō chaka xatekāfe a keskara shara ixikakī,” ixō ato yoipaoni. Nāskakē Noé āsanima afe yora sietefo fe Niospa ato kexesharano. <sup>6</sup> Nāskatari Niospa pexe rasi Sodoma yafi Gomorra pāoakī fet-saxō kooakī mitoni, mapokōifakī. Nāskakē nā rama chipo ixi-aifāfe tāpinōfo yora chakafo keyokōi Niospa ato omiskōimaxiai. <sup>7-8</sup> Akka Lot fisti nanima Niospa nimasharakōini. Nā fer-onāfakemāi sharakōikē, nāto ōipaoni yorafāfe anoxō chaka shināifāfe. Nā Lot fekaxtekōini, nā yora chakafo askaifāfe ōi. <sup>9</sup> Nāskakē nōko Ifāfe afe yorafo kexesharatiro afarafo ato chakafamapaiyai keskara anōfoma. Nāskaxō nā afara chakafamisfo ato omiskōimakī nā omiskōipakenakafo mēra ato potaxii anoax omiskōipakexanōfo.

<sup>10</sup> Nāskakē Niospa ato omiskōimaxii āa shinākaxō afara chakakōi famisfono, nōko Ifāfe āfe meka sharari nikakaspamisfono. Afāfekai afaa tāpiafoma. Mesetamakōi ato ĭchamisfo a nō ōimisma nai mēranoa xanīfo finakōiafo. <sup>11</sup> Akka nā ājirifo xanīfokanax afokai askamisfoma. Afāfe toa ĭchamisfoma nōko Ifāfe ferotaifi. Askatamaroko yoikī iskafamisfo: “Āa Niospa ato tāpimanō omiskōimakī,” ixō shināmisfo āfe ājirifāfe a yora chakafāfe chakafafiaifono ato afeska fapaimisfoma.

<sup>12</sup> Akka na yorafo yoinā keskarrafo, afaa tāpiafoma. Afaa shināima ikafo. Nāskakē achixō retetirofo. Afāfe afara chaka yoimisfo ōiyamafikakī, nāskakē afori naxikani na yoināfo natirofo keskakani. <sup>13</sup> Fetsafo omiskōimakatsaxakakī afori omiskōixikani. Afāfe afarafo chakakōifo fakakī sharakōimeyokani. Akka nā mato pāramisfo mato fe ichanāfo Jesús nikayamafikatsaxakakī. Anoxō mato feta piyanā mato pārapaikani. Akka māfi askaramakī mā noināsharakōita ano fisti ichanāxō mā piisharamis. Mā askafiaito a ato pāramisfo mato fe ichanāpaikani mato fanīrira chakafo yoipaikani mā anā shināsharanōma. Inimakōiyanā nā mato pārapaiyai fisti yoipaikani. <sup>14</sup> Askatari kēro fetsa ōikakī akiki nokofenepaikakī chotapaimisfo, chaka fisti shināmisfo. Akka kēromā Jesús Ifofayamaxō ato fichipai ato fe ixiki. Askatari a chanīmisfāfe Jesús Ifofasharamisfoma ato chakafamapai ato feta afarafo chakafanōfo ato ōikakī. Askatari ato afama mīshti ato fichipaimisfo mā askara feyafamisfo. Niospa nā keskara yorafo ato omiskōimani omiskōipakexanōfo, yora chakafomāiano. <sup>15</sup> Nāfo fofāsakani mā fenoafo, Niospa meka shara kachikiri fakanax nā Balaam ipaoni keskarrafo. Nā Balaam Niospa meka yoimis iyopaoni, Beorpa fake. Mā Niospa meka yoipaofinixakī kori kaya fichipaini, afara chaka shinākī. <sup>16</sup> Niospa yoiaino Balaam āfe burro nā yora mekai

keskani. Nāskaxō āfe ifo iskafakī yoini: “¿Afeskakī mī ea koshaimē?” ixō nā burropa yoini. Askafaito nikai Balaam oa yōra shināsharaima keskarakōi ini.

<sup>17</sup> Na feronāfakefo faka fiti anoa faka netsoa keskarafō. Afaakai tāpiafoma, nāskaxō Niospa meka shara noko tāpimatirofoma. Askatari mā oi fei kiki ixō, nai kōi choshta nō ōfiaino, nēfe nai kōi potatiro keskarafō. Nāskarakaxō noko pāratirofo: “Niosnoa nō mato yoirā,” ikaxō āa shināi imisfo Niosnoa yoikōimisfoma. Nāskakē Epa Niospa ato potaxii fakishifā mēra ipaxanōfo. <sup>18</sup> Nāfo chanīkani kakapaimisfo. Nāskaxō yoimisfo iskakani: “Nō tāpia keskafakī tsōa tāpiama. Nā tsōa atiroma keskafakī nō tāpikōia,” ixō āa yoikani chanīfinamisfo. Nāskakaxō a rama Nios Ifofapaikakī āto chaka xatepaiyaifo ato yoitirofo iskafakakī: “Mī fētsa āfe āfi fe ika sharakī, nāskax mī afe inimakōitiroki, nō anō kafe,” ixō fētsa iyotiro afara chakafamaxiki. <sup>19</sup> Afāfe iskafakī yoimisfo: “Mā afara shara faōnoaxkai Nios fe mā Īpaxatiroma. Akka nā mā afarafo apaiyai keskafakāfe. Nā mā apaiyai keskafaino tsōa mato xatematiroma inimayanā akāfe,” ixō ato yoikakī anorima ato yoikani. Afori isharamisfoma, āa pāramemisfo. Afara chakafo āto ifo, nāfo Satanás inafō. Nāskakē shināsharakanima. Chaka fisti shināmisfo. <sup>20</sup> Akka nōko Ifo Jesucristo nā noko ifimis, nō nikakōixō nā nikaifāfema afara chakafaifo keskafakī, anā afaa chakafakanima. Nā afara chakafo makinoax paxkatirofo anā āto ifo inōma. Akka anā afara chakafaifono afara chakakōi ato mēra nanetiro a ipaonifo keskara chakafinakōia inōfo. <sup>21</sup> Akka afo shara ikeranafo Jesús nikayamakatsaxakakī. Akka a meka shara mā nikafikatsaxakakī chipo anā kachikiri faifono ato omiskōimaki finakōixii. <sup>22</sup> Akka nōko xinifāfe Niospa mekaōnoa kenekī yoikōinifo iskafakī: “Paxta nā imis keskai ori kafāsayotiro. Chipō anā a anāpakea ano otiro. Nāskariai kochiri mīfamā raish iyotiro, nāskax fakanaki kaax choki sharata, mā choki sharafīax anā chipo mīfamā raish itiro.” Nāskari akani Niospa Yōshi Sharaōxō āto chaka potakanamax Satanás āto ifo iki. Āto chaka xatepaifikanax afianā afara chaka mēra paketirofo.

### 3

#### *Nōko Ifo Jesús anā fotoxii*

<sup>1</sup> Efe yora mīshtichi, anā ē mato kirika kenexō fomai. Taeyoi ē mato manamayonixakī, nā kirika kene rafeoxō ē mato shināmasharapai mā shināsharakōinō. <sup>2</sup> Shinākāfe, a Niospa meka yoimis sharafāfe afetīama mato yoipaonifo anori. Askatari a noko ifimisto nōko Ifo Jesús ato yoiaito

a aõnoa yoimisfãfe nikakatsaxakakĩ nãnori mato yoipaonifo keskara shinãkãfe.

<sup>3</sup> Nãskakẽ ẽ mato yoinõ shinãkõikãfe. Mã chaima Jesús oaino nã yora chakafo matoki fekanax nãfo matoki kax-emetsamapaixikani kiki ãakõi askara chakafo shinãkanax. <sup>4</sup> Nãskaxõ mato yõkaxikani iskafakakĩ: “A Niospa yoini keskai, ¿afeskai Cristo oimamẽ? Akka nõko xinifo nanifo chãikai afaa afeskaito nõ õimisma, keyokõi nãskara. Nã Niospa mai onifani chãi afaa afeskaito nõ õimisma,” ixõ yoixii. <sup>5</sup> Akka nã yorafãfe mã tãpifikaxõ shinãkanima, afetĩama Niospa nai onifafianino Niospa yoiaino fakafã nẽxpakĩa mai onifani, taeyoi fakafã iy-opaoni. Nãskakẽ Niospa ãfe mekapa fakafã nẽxpakĩa mai onifarifatani. <sup>6</sup> Askatari fakafaipafakĩ mai maiyaino keyokõi yorafo ãsai mitokomeni. <sup>7</sup> Akka mai yafi nai iskaratĩa ato mekeyoa, chipo ato koofakĩ mitokõixii. Niospa yoiaino askai fetsexii. Nã Niospa ato ichanãfaitĩa na chiifãnẽ ato koofakĩ mitoxii nã yora chakafo ato omiskõimanaitĩa.

<sup>8</sup> Nãskakẽ efe yora mĩshtichi, shinãmakiyamakãfe. Nõ õimiski xiniachãikõi. Akka nõko Ifãfe õia pena fisti xini ichapa keskara, askatari xini ichapa pena fisti keskara õi. <sup>9</sup> Nãskakẽ shinãkĩ iskafamisfo: “Nõko Ifãfe yoiyoni keskara ikamano, akka mã yoini keskara mã finõkõia,” ixõ shinãmisfo. Askatamaroko Niospa noko noikõikĩ a omiskõipakenakafo mẽra ato potapaima. Fena fenakima ato manasharamis keyokõichi ãto chaka xateyonõfo ãfe meka shara nikaxikakĩ omiskõipakexakakĩma.

<sup>10</sup> Akka nõko Ifo nokoki nokorisai tsõa manasharayaino nã yometso nõko pexe ano oaito nõ tãpitiroma keskai. Nãskarifiakĩ tsõa tãpiama afetĩara nõko Ifo nokorisai, itipinĩsharafomano. Mã nõko Ifo nokoaino chãa itakõixii. Nãskaino nai mẽranoafo koofi keyokõixii, nãskatari nono mai anoafori koofi keyokõixikani.

<sup>11</sup> Nã ẽ mato yoi ai keskai keyokõi keyoxii. Nãskakẽ tãpisharakõixõ nõko Ifo nikasharakõikãfe. Mã mã itipinĩsharakõixõ a mã apaoni keskara anã mã akimakai. A mato amapaiyai keskara fisti mã akikai. Epa Nios shinãkĩ finakõiax sharakõi ikãfe. <sup>12</sup> Fatora penata Jesús noko kiki manashara fafãikãfe. Nãskakẽ fetsafo Jesúsnoa yoisharakãfe tãpisharakõinõfo, ãto chaka xatekaxõ mã chaima Jesús oi kiki. Mã Jesús oaino nai mẽranoafo koofi mẽsho mẽshokõixikani. <sup>13</sup> Akka nai fenashara nõ manai, mai fena yafi a Niospa yoiyoni keskafakĩ afo sharafai. Akka afara chakafo ano itiroma, nã sharafos ano itirofo.

<sup>14</sup> Nãskakẽ efe yora mĩshtichi, mã Jesús manakĩ manasharafafãikãfe. Mã askaito Niospa mato õi kiki ãfe Fãkeõnoax

mã isharakõikẽ. Nioski mesekĩma is̄kafakĩ shinãfafaĩkãfe: “Epa Niospa ãfe Fakeõxõ ea noi. Ëri Epa Nios noi afe rafepakexakĩ,” ixõ anori shinãfafaĩkãfe. <sup>15</sup> Nãskakẽ mãri fekax-tekãkima. Shinãsharata isharakõikãfe. Õikapo. Nõko Ifo samarakamis fena omisma yorafãfe ea Ifofanõfora ixõ shinãmis Epa Niospa. Nãskarifikĩ nofe yora Pablo mato kirika kenexoni Epa Niospa shinãmasharaino. <sup>16</sup> Nã kirika keneai tii nõko Ifo anã oxii kiki ixõ aõnoa yoikĩ mato kirika kenexoni Pablo. Akka a atiri yoikĩ keneni afokai nõ tãpisharatiroma. Akka a Niospa meka tãpiamafãfe ãa fanĩrira yoimisfo a Pablo yoikĩ keneni anori tsõa yoimisma. Nãskarifiakĩ Niospa mekakõi yoitama, fanĩrira yoimisfo. Nãskakanax omiskõipakenakafo.

<sup>17</sup> Efe yora mĩshtichi, a ã mato yoiyai keskara mã mã tãpiaki. Nãskakẽ õisharakãfe, a chanĩmisfãfe mato yoipaiyai fo anori mã ato nikaxikima. Mã Jesús nikakõiaito mato kexesharakõitiro. Akka a fanĩrira yoimisfo mã ato nikaxõ anã mã shinãsharatiroma. Nãskaxõ fanĩrira mã shinãtiro. <sup>18</sup> Akka a noko ifimis nõko Ifo Jesucristo nikasharakõifafaĩkãfe tãpisharakõixikakĩ. Mato sharafapaiyai keskara a keskara shara ixikakĩ. Mãto õiti mẽraxõ a mato tãpimapaiyai keskara tãpisharakõikãfe. Nã fisti nõ yoikĩ iskafatiro: “Mĩ nõko Ifo, mĩõxõ afara shara nõ atiro, meres fisti mĩ sharakõi,” ixõ iskaratĩa yoita a inõpokoai keskara nõ yoipakenaka. Nãskakõipakexanõ. Nã tii.

*Pedro*

## Juan Jesús Chanĩmara Faafo Kirika Kenexõ Fomani

*Jesús noko nimasharaino nõ afe ãpaxanõ*

<sup>1</sup> Èkĩa Juan, ã mato kirika kenexõ fomai mã tâpinõ. Jesucristo ã õimixaki ã mato yoi mãri mã tâpisharanõ. Nã Jesucristo nõko Ifokõdi tae fenakõdi Nios fe iyopaonixakĩ. Akka Niospa afama mãshti onifamatai afe iyopaonixakĩ, chipo nãmã fotoxõ noko yoiaito nõ nikamis. Oa yorakõdi keskara nõ õimis. Mã õikĩ feyafaxõ nõ ramãti nõko mãfi. Nãskakẽ noko yoiaito nikayamexakĩ ã mato yoi, noko imasharanõ nõ afe ãpaxanõ. <sup>2</sup> Apa Nios ariax nokoki Jesús ftoni. Fotokẽ nõ õikĩ feyafani. Nãfi afeskapishta nakama, nãfi nĩpanakakĩ. Apa Nios fe ikatsaxakĩ nokoki ftoni. Nãskakẽ nã nõ õia keskara nõ mato yoi. <sup>3</sup> Nõ õipaonixakĩ nõ mato yoi noko yoiaito ãfe meka. Nãskakẽ nofe rafexõ nã nõ shinãi keskarari mãri mã shinãtiro. Nios feta ãfe Fake Jesucristo shinãi keskafakĩ nõri anori nõ shinãi, nõ ato fe rafekõitiro. <sup>4</sup> Nãskakẽ ã mato kirika kenexõ fomai nã kirika kene õiax mã inimakõinõ.

*Nios xafakĩakõdi ika oa luz keskara*

<sup>5</sup> Akka noko Cristo yoiyai, anori ã mato yoinõ. “Oa xinĩ chai chaxaino fakishtiroma keskara, xafakĩakõdi Nios ika. Afaa chaka afe rafemisma,” ixõ Cristo noko yoimis. <sup>6</sup> Akka anorima shinãi yora fetsafo iskakani: “È Nios fe rafea,” ifiaxõ a Niospa yoiyai anori shinãima ãa chanĩ anorima yoi. ãfe õiti sharama xafakĩakõdi ikama, fakish keskara a Niospa yoiyai anori shinãyamafi. <sup>7</sup> Nios xafakĩakõdi ikakĩ, afaa pishta chakafamisma. ãfe õiti mẽra oa fakish keskarama, xafakĩa sharakõdi ika. Akka nõri afe rafekõixõ, nõ ãfe meka nõ mẽra nanekõixõ, Niospa shinãi keskafakĩ nõri nõ shinãtiro. Nõ askara shinãx, nã Ifoaafo fe nõ ato fe rafetiro. Nãskax nõ xafakĩakõdi nitiro, Niospa Fake Jesús mãi noko nãxonikẽ. ãfe imĩ nõko chaka noko soaxõfafãini keyokõdi.

<sup>8</sup> Akka nõ yoikĩ iskafamis: “È afaa chakafamisma,” ifiax nõa nõ pãramemis. Nãskax nõa nõ chanĩkõimis. Nõko õiti mẽra Niospa meka naneama. <sup>9</sup> Akka nõ afara chakafaxõ nõko chaka nõ soapaikĩ, nõ Nios yoiaito nõko chaka noko soaxotiro. Keyokõdi noko soaxotiro noko raefakĩ, Nios mãi mẽstekõdi isharakõixõ. <sup>10</sup> Niospa yoimis: “Keyokõdi yorafãfe chakafamisfo,” noko famis yoikõikĩ. Noko askafafiaino, “Èkai afaa pishta chakafamisma, ã chaka shinãima,” ixõ yoikĩ nõ

Nios chanĩmara faima, “Āa chanĩra,” nõ Nios fai. Nāskakē āfe meka nõko õiti mẽra naneima.

## 2

### *Jesús Apa Nios noko yoixonì*

<sup>1</sup> Efe yora mĩshtichi, ě mato shināi. Mẽ mato Jesús Ifofamaxõ ě mato fakefai. Mato fakefaxõ ě mato kirika kene fomai, mã anā afarafo chakafanõma, shināsharata mã inõ. Askara Niospa fichipai. Akka nõ chakafaino Niospa fichipaima. Nāskakē nõ anā afara chakafxõ nõ nõko Ifo Jesucristo nõ yoitiro anā nõko chaka nõ soapaikĩ, nokomāi nikaito. Noko nikaxõ Apa Nios noko yoixonì iskafakĩ: “Epa, ě ato nāxonì. Eõxõ ato chaka soaxõfe, āto chaka soapaikani kiki,” Apa fatiro. Nā fistimāi mẽstekõì ixõ, afaa chakafamisma. Nāskaxõ Apa Nios noko yoixotiro. <sup>2</sup> Noko nāxonì nõko chaka noko soaxoxiki. Noko fistima, keyokõìõnoax noko nāxonì. Nõko Ifo Jesucristo noko nāxonì. Nõko chaka noko soaxõfaini nani.

<sup>3</sup> Nāskakē Cristo noko yoiai keskafakĩ nõ nikakõixõ nõ tãpisharakõitiro nõmāi afe rafexõ. <sup>4</sup> Yora fetsafo is kai: “Ē Cristo fe rafea,” ifiaxõ āfe meka nikama, āa akikiri kětāpamis, mẽstekõì ikama. <sup>5</sup> Akka nõ Niospa meka nikakõikĩ nõ aõ noikõì. Nāskafxõ nõ tãpitiro nõ afe rafekõia, Nios fe. <sup>6</sup> “Mẽ Nios fe rafekõiaki,” ixõ yoi, a Jesús imis keskara ikāfe.

### *Noko meka fena shara yoinì nõ nõināsharakõinõ*

<sup>7</sup> Efe yora mĩshtichi, ě mato yoisharakĩ ě mato kirika kenexoni. Na ě mato yoiai keskafakĩ taefakĩ mã mã nikamiskĩ. Jesús noko yoia keskafakĩ ě mato kenexonõ. <sup>8</sup> Mã mã nikafimiskē, ě mato anā fenafakĩ yoinõ chanĩma. Jesucristo noko noikõì. Nāskari fakĩ nõ fetsafo noikõì. Fetsafo noikĩ, nõko õiti mẽra xafakĩakõì iki. Anā fakish keskara ikima. <sup>9</sup> Akka, “Ē Nios fe rafea ě xafakĩakõì ika,” ixõ nõ yoifixõ nofe yorafo nõ noikaspamis, nõkai xafakĩakõì ikama. <sup>10</sup> Akka nõroko nofe yorafo noi, nõ xafakĩakõì iki. Nõ shināsharata nõ ikax, nõ anā fenotiroma. Nāskakē nõ xafakĩakõì iki, afaa pishta chaka shinātama. <sup>11</sup> Akka a afe yorafo noikaspaifo, afokai sharama. Fakish mẽra niafo keskara. Afaakai shinākanima. Āto chaka xatekaspakani. Askafikaxõ afaa tãpiafoma, fenokõiafo.

<sup>12</sup> Efe fakefāfe, mãto chakafo Jesúsxõ Epa Niospa mato soaxonano, nāskakē ě mato shinākĩ ě mato kirika kenexoni. <sup>13</sup> Afaa oniataima Epa Nios fisti iyopaoni. Efe anifo tiito, ě mato kirika kenexoni, afe keskaramāki mã mã Epa Nios tãpiakĩ. Mã mã tãpixõ mã chanĩmara famiski. Naetapafāfe, matori ě kirika kenexoni, Satanás chakata mato afara chakafamapaiyaito mã mã finõfakĩ. Nāskakēri naetapa tiito ě mato kenexõ fomai,

mã Satanás chaka finõano. Efe fakefãfe, ã mato yoikĩ kenexona mãmãi Epa Nios tãpikẽ.

<sup>14</sup> Efe anifo tiito, matori ã kirika kenexona, mã mã tãpiakĩ, afaa oniyataima Epa Nios fisti iyopaoni. Naetapafãfe, matori ã kirika kenexona, mãto õiti kerexkõifafãi Epa Nios ãfe meka shara nikakõiyã mã mã Satanás chaka finõfakĩ.

<sup>15</sup> Akka a Niospa fichipaiyamai, nõri fichipaitiroma. Afo fichipaikĩ nõ Nios shinãtiroma. Afarafo na yora chakafãfe ãto shinã mëraxõ shinãifo keskara afo fichipaiyamakãfe. Afo fichipaikĩ mã Nios shinãtiroma. <sup>16</sup> Akka a Nios shinãifoma nono nãmã ikafo ãa shinãkani iskamisfo: “Ëa ã shinãxõ mã ã apaiyai keskara ã atiro. Afara õikĩ ã fichipaikĩ ã fitiro. Ë tsoa keskarama. Ë afama mãshti shinãi. Ea keskara tsoama,” ixõ fõtsa yoitiro ãa chanĩkĩ. Aato Niospa meka shinãima, ãa shinãx askatiro. <sup>17</sup> Akka na afe keskararãfo Niospa õikaspaifo mã afo mitokomei. Nãskatari a yora chakafãfe fichipaiyaifo mã afori mitokomei. Akka mã Niospa yoiai keskara nikakõiax nõ Nios fe nĩpanaka.

### *A yora chanãaifo nõ nikatiroma*

<sup>18</sup> Efe fakefãfe, mã chaima Jesucristo anã nãmã fotoiyoi mã nõ nika. Nãskakẽ Jesús nãmã fotoyoamano, akka mã yora chakafãfe Cristo shinãmisfoma ãto xanĩfo finakõia oi taei. Nãato, “Ë Cristora,” ixõ noko pãrapaixii. Mã mã tãpia nãato Jesús noikaspamis. Akka iskaratĩa, “Ë Cristora,” ikanaifo yora ichapakõifo. Nãskakẽ mã nõri tãpia mã Cristo kayakõi samama fotoi. <sup>19</sup> Mã Cristo noikaspaifo nofe iyoafo, mã noikaspakani nomakinoax tsekeafõ. Afokai noko keskarafoma. Cristo anã shinãkanima, mã kachikiri faafo. Nãskax nomakinoax tsekeafono nõ tãpitiro afãfekai Cristo Ifofaafoma. Akka a Cristo ãto Ifokõikẽ nomakinoax tsekekeranafoma.

<sup>20</sup> Akka Cristo ãfe Yõshi Shara mãto õiti mëra nanea. Nãskakẽ keyokõichi mã mã tãpia Niospa Yõshi Sharapa mato tãpimapaiyai keskara. <sup>21</sup> Nãskata Jesucristo mã tãpikĩ finakõiakĩ. Tãpixõ mã mã chanĩmara fakĩ. Nãskakẽ ã mato kenexoni. Nãskaxõ afara mato pãraifãfe mã chanĩmara faima. Mã tãpia Jesucristo ramashara anorima ato yoimisma, mãfi chanĩmakõikĩ. <sup>22</sup> Yora fetsafo iskamisfo: “Cristokai Niospa nai mëraxõ nĩchinikeroko, akai Niospa Fakekëroko,” ixõ yoimisfo. Askafakaxõ Epa Nios yafi ãfe Fake Jesús chanĩmara fakanima. Afãfe Cristo noikaspakõikani. <sup>23</sup> Akka mã Cristo noikaspaifãfe iskafakani: “Jesús Niospa Fakema,” fakanax Epa Nios fe rafemisfoma. Afokai Niospa yorafoma. Akka a yoikĩ iskafaifo: “Jesús Niospa Fakekõi,” fakanax mãfo Nios fe rafekani.



<sup>24</sup> Nāskakē Jesúsnoa mā nikakī taefani keskakakī, āfe meka shara shināmakiyamakāfe. Nā mā nikakī taefani keskakakī, mā shināmakiyamax mā nikakōisharaino Epa Nios fe āfe Fake Jesús mato fe rafekōipakenaka. <sup>25</sup> Nāskakē Jesús noko iskafakī yoiyoni: “Ea yafi ēfe Epa mā Ifofaax, mā nofe nīpanaka, anā mā nanakama,” ixō noko yoini.

<sup>26</sup> Akka na yorafāfe Cristo noikaspaifo afāfe mato pārapaikani. Mato anorima yoipaikani. Nāskakē ē mato yoisharakī kirika kenexoni mā tāpikōinō tsōa mato pārayamanō anorima yoikī. <sup>27</sup> Akka Epa Niospa āfe Yōshi Shara mato ināni mato fe rafekōinō. Nāskakē aōxō mā mā tāpikōia. Mā anā tsoa yopaima mato tāpimanō, āfe Yōshi Sharapamāi keyokōi mato tāpimakē. A mato tāpimanai keskara chanīmakōi, mato pāratiro. Nāskakē nikakōiyanā Cristo fe rafesharakōikāfe, a Niospa Yōshi Sharapa mato yoiāi keskai. A Niospa Yōshi Sharapa mato yoini keskai shināmakikakīma Cristo fe rafesharakāfe enekakīma.

<sup>28</sup> Ēfe fakefāfe, iskaratīa Cristo nikakōiyanā afe rafekōikāfe, mā nāmā fotofaino nō akiki meseimakai nōmāi isharakōiax. Askatari nō akiki rāfimakai.

<sup>29</sup> Mā mā tāpiakī Nios isharakōimiskī afaa chakafatama. Nā isharakōimisfo nāfo Epa Niospa imasharapakenaka āfe fakefo inō. Nafofi Epa Niospa fakekōifokī.

### 3

#### *Niospa fakefo*

<sup>1</sup> Epa Niospa noko noikōi. Shināfāi ikāfe. “Ēfe fakefora,” noko famis. Akka nō āfe fakekōifo. Akka nā yora fet-safāfe Jesucristo shināifoma Nios tāpiafoma. Nāskafakīri nokori tāpiafoma, nō Niospa fakefofiano. <sup>2</sup> Efe yora mīshtichi, ea nikakāfe. Nōfi iskaratīa Niospa fakekōifokī. Nāskakē afe keskarara chipo noko Niospa imai nō tāpiama. Cristo fotoaito nō ōiax nā keskarakōi nō iki, āfe ōiti keskarakōi. <sup>3</sup> Niospa fakekē nonori nō yoi: “Ē Jesucristo fe ipanaka. Ē Jesús fe ikaino āfe ōiti keskarakōi ē ixii,” ixō shinākī nō anā chaka shināpaima. Jesucristo shināi keskarari nō shinātiro, anā chaka shināyamakī.

<sup>4</sup> Akka yora fetsafāfe ato chakafakakī, āto chaka potakaspakani, a Niospa yoiāi keskara shinākanima, afara chaka fisti shināmisfo. <sup>5</sup> Jesucristo nai ariax nokoki fotoni nōko chaka noko soaxoxiki. Akka nāatofi afaa chakafamismakī. Nā fistifi finakōiakī. Ē mato yoiāi keskara mā mā tāpiakī. <sup>6</sup> Nāskakē a afe rafeafāfe chaka shināmisfoma. Akka a ōiti chakayafāfe Jesús tāpiafoma, Jesús shinākanima. Jesús fe rafeafoma. <sup>7</sup> Ea nikasharakāfe, ē mato yoinō. Fetsa iskatiro: “Ē Niospa

meka mato yoinõ,” ixõ mato yoisharaima. Mato anorima täpimapai, akka aa nikax mã chaka nitiro. Akka a isharakõixõ shinãsharamis. Aa keskarafi yora sharakõikĩ. A Cristo ika keskarari ari isharakõia shinãsharakõita. <sup>8</sup> Akka nã afara chakafamisfo Satanás fe rafeafo. Nã Satanásmãi taeyoi õiti chakaya inino, iskaratĩari nãskara. Nãskaxõ Satanás keyokõi yorafo afara chakafapapai. Nãskakẽ Niospa ãfe Fake nokoki nĩchini. Noko nãxoxiki nokoki ftoni, nõko chaka noko soaxoxiki. Nomakinoa Satanás potatiro noko afara chakafapapaiyaito. Nãskakẽ Jesucristo Satanás finõinĩfofana.

<sup>9</sup> Akka Niospa ãfe Yõshi Shara nõmëra naneano nõ Niospa fake itiro. Nõ Niospa fakexõ nõ anã afaa chakafapaima. Nã Niospa Yõshi Shara nõko õiti mëra ikẽ nõ anã afaa chakafatiroma, nõko õiti noko fetsafaano. Nõko õiti noko fetsafaxõ, mã Niospa noko fakefa. <sup>10</sup> Fetsafãfe afara chakafamisfo, afokai Niospa fakefoma. Afofi aa ranã noinãkanima. Askarafo Niospa fakefoma. Afofi Satanás fakefoki. Nãskakẽ Satanás fakefo nõ täpitiro. Nãskafakĩri Niospa fakefo nõ täpitiro.

### *Nõa ranã nõ noinãtiro*

<sup>11</sup> Nãskakẽ taefakĩ mã Nios Ifofaxõ mã mã nikamiskĩ mato yoiaito: “Nõa ranã nõ noinãsharanõ,” ixõ mato yoiaito mã mã nikamis. <sup>12</sup> Akka nã Caín onefetsa noikaspakĩ reteni keskara iyamakãfe. Askara Satanás chaka fe rafea. Nãskaxõ onefetsa reteni noikaspakĩ, ã mato yoinõ nikakapo. A Niospa yoia keskafakĩ onefetsa Nios shinãni. Akka Caín askanima. ãfe onefetsaki õitifishkikĩ reteni. A onefetsa Nios Ifofaito õikĩ noikaspakĩ reteni, Niosri noikaspayanã. <sup>13</sup> Akka mãri Jesús Ifofaito, matori noikaspatirofo. “Ë Jesús Ifofaito ea tsõa noikaspaima kiki,” ixõ shinãyamakãfe. A mã Jesús Ifofaito a Jesús Ifofaafãfema mato noikaspatirofo. <sup>14</sup> Nõ yorafo noikõixõ nõ täpitiro nõmãi Niospa fakefoxõ. Nãskakẽ a omiskõipakenakafo mëra katama, afe nõ ipanaka. Akka a yora fetsafo noikaspai, afokai Niospa fakema. Nios fe rafeamax afe ipanakama. <sup>15</sup> Akka a yorafo noikaspai fo afofi retemitsamis keskarafoki. Afo chakakõifo. Askarafo mã mã täpia Niospa fakefoma. Askarafo Nios fe rafeafoma. Nios fe nĩpanakafoma, yorafo noikaspakanax. <sup>16</sup> Akka Jesús noko noikõikĩ, noko nãxoni. ãakõi nokoõnoax nani. Nãskarifiakĩ nõ fetsafo noikõiax nõ atoõnoax natiro. <sup>17</sup> Akka afama mĩshti ichapayafixõ, fetsafãfe afara yopaito nõ ato afaa inãmã, askara sharama. Epa Niospa noko noiai keskafakĩ, nõ ato noima. <sup>18</sup> Efe yorafãfe, ea nikakõikãfe, ã mato yoinõ. Fetsafo iskakani, ãa chanĩkani: “Ëfi yorafo noikai,” ifiaxõ ato chakafakani, atokai noikanima. Akka nõfi askaramakĩ. Nõ yorafo noisharakõixõ nõ ato shara fatiro.

*Nō Nios nikasharax nō akiki ranotiroma*

<sup>19</sup> Akka nō ato noisharakī nō tāpitiro nō fanīrira chaka shinākīma, Jesús nōko Ifokōimāiyakē. Anori shināi nō akiki meseima. <sup>20</sup> Nāskafixō nōko ōiti mēraxō nō shinākī iskafatiro: “Ē afara chakafaa,” ixō nō shināito Niospa noko ōi. Noko ōikī tāpia a nō shināi keskara. Nāskakē nōko chaka nō soapaiyaito nōko chaka noko soaxotiro. Nios nōko ōiti keskarama. Aato keyokōi tāpia. <sup>21</sup> Efe yora mīshtichi, ea nikasharakāfe. Nōko ōitinī nō shināi iskatiro: “Ē Nios Ifofaito ēfe chaka mā ea soaxona, mā ea shināsharamana,” ixō shināi, nō Nios fe rafetiro, nō akiki nō ranotiroma. <sup>22</sup> Nō askaino Epa Nios nokoki inimatiro. Nāskakē nā nō yōkai keskara noko inātiro, a noko yoiai keskaramāi nō nikasharaito, askatarimāi nō inima-masharaito. <sup>23</sup> Iskafakī noko yoini: “Ēfe Fake Jesucristo nikasharakōikāfe,” ixō noko yoini. Nāskatari a noko yoini keskai nōa ranā nō noināsharai. <sup>24</sup> Akka a Niospa noko yoini keskafakī nō nikasharakōiax Nios fe nō rafekōitiro. Askatari Niosri nofe rafekōitiro. Epa Niospa āfe Yōshi Shara nokoki nīchini. Aōxō nō tāpitiro Epa Nios nofe ikaito.

## 4

*Niafaka chakata Niospa Yōshi Shara noikaspai. Askatari Cristo noikaspai*

<sup>1</sup> Efe yora mīshtichi, fetsafāfe mato anorima yoiaifāfe ato nikayamakāfe. Iskafakī mato yoipaikani: “Nō mato Niospa meka yoi Niospa noko shināmanaino,” ifiakaxō anorima mato yoimisfo. Askafono Niospa meka ōikī mā tāpitiro a yoiaifo keskara chanīmamākī. Niospa Yōshi Sharaōxō mato yoikanimakī. Akka afokai Niospa ato afaa yoiaima. <sup>2</sup> Nāskakē ē mato yoisharai, ea nikakāfe. Fetsafāfe a Niospa meka mato tāpimasharaito mā tāpitiro. Niospa Yōshi Shara a mēra naneano yoiaito mā tāpitiro. Iskara mato yoiaito: “Jesucristo ftoni Apa ariax nai mēranoax. Nāfi yora keskara kāiniki. Aafi yorakōiki,” mato faito mā tāpitiro Niospa shināmanaino mato askafakī yoiaito. <sup>3</sup> Akka yora fetsafāfe anori yoiyamaifāfe nō tāpitiro afāfe Jesucristo noikaspamisfo, Niospa Yōshi Shara āto mēra naneama. Satanás ato shināmamis. Akka a Cristo noikaspai noko ano fexikani mā mā nikamis. Akka iskaratīa mā noko ano feafo, afāfe Cristo noikaspamisfo.

<sup>4</sup> Akka māroko askaramakī efe yorafāfe, Niosfi māto Ifokōikī, māfi Niospa yorakōifokī. Āfe Yōshi Shara mā māto ōiti mēra nanea. Akka a anorima shināifo askarafoma, Satanás yōshi āto ōiti mēra nanea. Akka Niospa Yōshi Shara mato mēra naneano mā Satanás finōkōia. <sup>5</sup> Akka fetsafāfe Nios tāpiafomano, nāskakē anorima ato yoimisfo, Satanás ato

shināmanaino. Nāskakē Satanás ifofaafāfe ato nikamis Satanasmāi āto ifokē. <sup>6</sup> Akka nōfi Niospa yorafokī. Nāskakē a Nios tāpiafāfe noko nikakōitirofo nō yoiai anori. Akka a Nios Ifofaafāfema a nō yoiai anori nikatirofoma. Akka nō tāpitiro ato mēra Niospa Yōshi Shara naneano noko nikasharaifono. Ato mēra nanexō fanīrira ato shināmanima. Akka a noko nikaifoma ato mēra Satanás nanea. Satanás ato mēra nanexō fanīrira ato shināmani. Satanás chanī finakōia. Nāskax ōiti chakaya.

### *Niospa noko noikōi*

<sup>7</sup> Efe yora mīshtichi, nō noinākōinō, Niospa noko ato noimanō. Nios fistichi noko shināmatio nō ato noinō, a fistichimāi noko noikī finakōixō. Nāskakē nō ato noikōikī nō Nios tāpia nō afe yora, nōko ōiti mā noko fetsafaano. <sup>8</sup> Niospa yorafo noikōia. Nāskaxō ato noikī noko tāpimatio. Akka a yorafo noiaifāfema, Nios tāpiafoma. <sup>9</sup> Niospa āfe Fake fisti nāmā nīchini, nāmānoax noko nāxoyonō. Nāskakē nō afe nīpaxatio, nāatomāi nōko chaka noko soaxomiskē. Nāskakē Niospa noko ōimani afeskaxō noko noimākai. <sup>10</sup> Nāskakē nō Nios noi. Akka nō Nios keskarama, nō ato noikī finamisma. Nios fistichi noko noikōimis. Noko noikōikī āfe Fake Jesús nāmā nīchini noko nāxoyonō nōko chaka noko soaxoxiki.

<sup>11</sup> Akka efe yora mīshtichi, Epa Niospa noko noikōi. Nāskakē nōa ranā nōri nō noināsharakōikāfe. <sup>12</sup> Akka tsoa pishta Nios ōimisma. Nāskafiax nō noināino, Nios nōmēra ika. Nofe ixō yorafo noko noimasharatio. <sup>13</sup> Niospa āfe Yōshi Shara nōmēra ikimakē nō tāpitiro nō Nios fe rafea, Nios nofe ikano. <sup>14</sup> Epa Niospa nai arixō āfe Fake noko nāmā nīchixonī. Āfe Fake nāmānoa nō ōipaoni. Ōipaonixakī nō ato yoimis iskafakī: “Epa Niospa āfe Fake noko nāmā nīchixonī, keyokōi nokoōnoax nanō nōko chaka noko soaxoxiki noko ifiano nō afe ipaxanō.” <sup>15</sup> Fetsa iskai: “Jesúsfi Niospa Fakeki,” ixō shināi. Aafi Nios fe rafeakī Nios afe ikano.

<sup>16</sup> Niospa noko noikōia mā nō tāpia, nō chanīmara faiyanā, Niospamāi noko noimiskē. Nō Nios chanīmara faito nofe rafexō noko yorafo noimatio. Akka nō ato noikōiaino Nios nofe ika, afe nō rafekōia. <sup>17</sup> Nō Nios noi. Nō Nios noikī finakōiax nō inimatio Jesús anā nāmā fotoano. Anā fotoxō noko iskafatio: “Nā ea Ifofaafoma tii ēfe Epa Nios ari fokani. Akka nā ea Ifofaafoma tii ēfe Epa ari fokanima, nā omiskōipakenakafo mēra fokani,” ato fatiro. Ato askafaino nōkai Nioski meseima. Nō ranoima nō afe rafekōi. Afe rafei nō Jesús keskara iki, āfe ōiti keskara nō iki. Nāskakē Jesús oaitia nō akiki meseima. <sup>18</sup> Nō Nios noikōiax nō akiki mesetiroma. Nōko shinā mēraxō nō Nios noikī finakōixō nō rate potatio.

Akka fětsa mesekĩ iskafai: “Niospa ea omiskōimani,” ixō shināi aatokai noikĩ finakōiama. Ato noikōiamax Nioski mesetiro.

<sup>19</sup> Nō Nios noiyamatai noko noikĩ taefani. Akka noko taefakĩ noinikē iskaratĩari nōri nō aō noi. <sup>20</sup> Akka fet-safo iskakani: “Ē Nios noi,” ifiaxō a Nios Ifofaafo noima, anorima yoimisfo. Mā afe yorafo ōifikĩ atokairoko noikatsax-akakĩ, Niosri noisharakanima askara ōiroko fakatsaxakakĩ. <sup>21</sup> Niospa noko yoimis: “Ea noixō nā ea Ifofaafari noikāfe,” noko famis.

## 5

### *Nō Nios Ifofakē tsōa noko afaa chakafamatiroma*

<sup>1</sup> Jesucristo Niospa Fakekōi. Nokoki nĩchini noko nima-pakexanō, nōko Ifo inō. Akka nō a chanĩmara fai nō Niospa fakefo itiro. Nāskaxō āfe Apa Nios nō noixō, āfe Fakeri nō noikōitiro. <sup>2</sup> Nō Nios noikōikĩ noko yoiai keskara nō nikai. Nāskaxō mā nō tāpia nō Niospa fakefori noikōi. <sup>3</sup> Nō Nios noikōixō āfe meka nō nikakōikĩ a noko yoiai keskara nō nikai nō fekaxteima. <sup>4</sup> Nāskakē nō Epa Niospa fakexō afara chakafāfe noko amapaiyai keskarakai nō atiroma. Niospa Fake Jesucristo chanĩmara faxō afarafāfe noko afara chakafamapaiyai keskara nō finōtiro. <sup>5</sup> Afara chakafo noko amapaiyaifo keskara Niospa noko amatiroma nō anōma. Nāskaxō Jesucristo Niospa Fake nō chanĩmara faxō aōxō na chakafo nō finōtiro anā afaa chakafaxikima. Nā chanĩmara faafāfe finōtirofo.

### *Niospa āfe Fakekōi noko ōimani*

<sup>6</sup> Mā nō tāpia Niospa āfe Fake feronāfakekōi ini. Nā Jesús mā maotisata faka mēra ikipakekafāta kainākafanaino, Epa Niospa yoini iskafakĩ: “Nafi ēfe Fakeki,” ixō yoini. Jesús naino āfe imi foaino Apa Niospa noko tāpimani āfe Fakemāiakē. Āfe Yōshi Shara chanĩmismo nōmēra nanexō noko yoimis Jesús Niospa Fakekōi. <sup>7</sup> Nā trespatō yoimisfo Jesús Niospa Fakekōi. <sup>8</sup> Jesús faka mēra maotisanini shināta, askatari naino āfe imi foni shināta, askatari Niospa Yōshi Sharapa noko yoiaino, nānorifos nā trespa shināmisfo. <sup>9</sup> Akka yorafāfe noko afara yoiaito ato chanĩmara fata a Niospa noko yoiairi nō chanĩmara fakĩ finakōitiro. Akai yora keskarama, afi Nioskōikĩ. Akka āfe Fakeōnoa noko yoiaito nō chanĩmara fakōitiro. <sup>10</sup> Akka Niospa Fake chanĩmara faxō Apa Niospa aōnoa yoini keskara āfe ōiti mēraxō chanĩmara fatirofo. Nāskafekē āfe Fakeōnoa yoimis keskara tsōa chanĩmara fayamaxō, “Nios chanĩra,” fakaxō yorafo fanĩrira shināmapaikani. <sup>11</sup> Nāskakē Nios iskamis: “Ē mato nimasharapaketiro ēfe Fake Jesúsxō,” ixō noko iskafamis. Nāskakē nō Jesús Ifofaax nō afe nĩpaxatiro. <sup>12</sup> A

Niospa Fake Ifofaifo afe nĩpaxatirofo. Akka a Ifofaima afe nĩpaxatirofoma.

*Mã mekai xatekĩ ato yoisharani*

<sup>13</sup> Mã Niospa Fake chanĩmara faaki. Nãskakẽ ã mato kirika kenexoni, mã tãpinõ mã afe nĩpanaka.

<sup>14</sup> Nõ afara sharafo nõ fichipaikĩ, a Niospa noko shinãmanaino, nõ Nios yoitiro kĩfikĩ, a Niospa fichipaiyai keskafakĩ. Nõ askakĩ nõ tãpitiro Niospamã noko nikasharamiskẽ. <sup>15</sup> Nãskakẽ nõ tãpitiro a nõ Nios yoiaito noko nikaito noko nikaxõ noko afara inãtiro nõ yõkaito.

<sup>16</sup> Akka a Nios Ifofaa fẽtsa afara chakafaito õikĩ, a Nios Ifofaa fẽtsa Nios kĩfixotiro ãfe chaka xatenõ. Akka Epa Niospa ato nimatiro isharapakexanõfo. Askafikanax fetsafãfe oa Nios Ifofaafo keskara iyokanax mã potakaxõ chaka shinãfafãikakĩ Nios kachikiri fakõinafo. Askarafokai tsõa ato nimatiroma nĩpaxanõfo. Naax omiskõipakenakafo mẽra fokani. Atoõnoa Epa Nios kĩfixokãfe ixõ ã mato yoiaima. <sup>17</sup> A Niospa noko yoiai keskara nõ nikayamaxõ nõ chaka shinãi. Askafixõ anã nõ chaka xatepaiyaito õikĩ nõko õiti noko fetsafaxotiro, nõ anã chaka shinãpaiyamanõ.

<sup>18</sup> Mã nõ Nios Ifofaano, noko fakefai. Nõ ãfe fake ixõ nõ tãpia nõ anã chaka shinãpaima, mãmã noko Niospa õiti fetsafaano. Mã nõ askano Satanás afara anã noko chakafamapaiyaito, Niospa Fakekõichi Jesús noko ifixõ noko kexesharatiro. Noko askafakẽ Satanás noko afeska fatiroma. <sup>19</sup> Mã nõ tãpia nõ Niospa fake. Akka fetsafãfe Nios nikakaspaifono, afo Satanás ato shinãmani ãto ifo inõfo. <sup>20</sup> Niospa Fake nokoki oni. Noko tãpimaniyoi ãfe Apa nõ tãpisharakõinõ. ãfe Apafi mẽstekõi ikaki. Akka nõ Jesús fe rafeax ãfe Apa feri nõ rafetiro. Nã Jesu-cristo Niospa Fake. Nãri Nioskõi. Nãskakẽ noko nimapakexatiro. <sup>21</sup> Efe yora mĩshtichi, Nios fisti Ifofakãfe. Satanás mato afara chakafamapaiyaito afe rafeyamakãfe. Askatari afara chakafo mã ifofapaikĩ afo shinãyamakãfe. Nios fisti shinãkãfe.

Nã tii ã mato kirika kenexõ fomai, efe yora mĩshtichi.

*Êkĩa Juan*

## Juan Jesús Chanĩmara Faafo Afianã Kirika Kenexõ Fomani

*Juan a Nios Ifofaafo ato kirika kenexõ ato fomani*

<sup>1</sup> Ēkĩa Juan, ě Jesús Ifofaafo ě ato kexemis ě mato kirika kenexõ fomai mã tâpinõ. Mã mã tâpia Niospa mato katonni afe yorafo mã inõ. Chanĩma, ě mato noikõi, eres fistima, a Jesús Ifofaafo feta ě mato noikõi. <sup>2</sup> Nõ mato noikõi Jesúsmãĩ nofe rafeano. Akka nã Jesús nofe rafepakenaka. <sup>3</sup> Efe yorafãfe, ě mato yoisharanõ. Nõko Epa Nios feta ãfe Fake Jesús noko noikõi. Nãskakẽ noko noikõiyana nõko õiti mẽra noko inima-masharai, nõko õiti mẽra nõ inimasharakõinõ.

<sup>4</sup> Mẽ tâpia ě inimaifinakõi ranãri mã isharakõiaino a Epa Niospa noko yoini keskai. Nãskakẽ ě matoki inimakõini. <sup>5</sup> Ea nikakãfe ě mato yoisharanõ, mã ranã noinãkãfe. Mã mã nikamiskĩ nã mã Jesús Ifofakĩ taefanĩtia. Akka ěa shinãxõ ě mato meka fena kenexonima, mã mã nikamis. Nãskakẽ mã ranã noinãsharakãfe. <sup>6</sup> Nõ Nios noikĩ a noko yoiai keskara nõ aki. Niospa taefakĩ noko yoiaito mã mã nikamiskĩ iskafakĩ yoiaito: “Mãa ranã noinãkãfe,” ixõ noko yoiaito mã mã nikamis.

*Ãa anorima yoikĩ ato pãramisfo*

<sup>7</sup> A ãa ato pãramisfo ato mẽra fofãsamisfo. Afãfe, “Na Jesucristo Niospa Fake Apa Nios ariax oni feronãfakekõi ixikĩ,” ixõ yoimisfoma. Afãfe ato pãrapaimisfo Cristo noikas-pakata imisfo. <sup>8</sup> Mãri ato keskara iyamakãfe. Shinãfai ikãfe ato keskarama. Mã askakĩ mã ato Nios yoisharaimano tâpitirofoma, fenotirofo. Akka ato Niospa meka mẽstekõi ato yoisharakõikãfe Nios tâpisharakõinõfo. Nãskakẽ mãri afara shara a Niospa mato mekexona mã fitiro, mã Nios yonox-osharakĩ.

<sup>9</sup> Akka fetsafãfe a Cristo noko yoiai keskara nikayamakaxõ ana shinãkanima, ãa fanĩrira shinãkani. Afokai Nios fe rafeafoma. Akka fetsafãfe a Cristo yoiai anori nikakanax Apa Nios fe rafekõikata ãfe Fake Cristo feri rafekani. <sup>10</sup> Akka yora fetsa matoki oxõ Cristoõnoa yoisharaima fanĩrira yoi, askara fe rafeyamakãfe. “Noko Niospa meka yoife,” fayamakãfe. <sup>11</sup> Nãskakẽ askara yora mã chanĩmara fakĩ afe rafexõ afeta mã anorima yoitiro chaka shinãkĩ.

*Mã Juan mekai xatekĩ ato yoisharani*

<sup>12</sup> Ĕ mato kirika kenexō ichapa fomapaifikĩ askatamaroko Ĕ matoki nokopai mato fe yoināxiki. Ĕ matoki nokoano nō inima faatanāsharanō.

<sup>13</sup> Nā efe yora mīshtichi, Nios Ifofafo nonoax ichanāmisfo afāferi. Nā tii Ĕ mato yoi kirika kenexō.

*Ĕkĩa Juan*



## Juan Gayo Kirika Kenexō Fomani

*Juan feronāfake yoisharani, āfe ane Gayo*

<sup>1</sup> Efe yorashta Gayo, ĕkĭa Juan. Ĕ xini ichapa amis a Nios chanĭmara faafo ĕ ato kexekĭ. Ĕ mia kirika kenexō fomai mĭ tĕpinō. Ĕ mia noikōi.

<sup>2</sup> Yamā, ĕ mia noikĭ Nios kĭfixōfafĕini mĭ yonayamanō. Mĕ tĕpia mĭ ōiti sharakōi mĕ mĭ Nios Ifofasharai. Nĕskakĕ ĕ mia kĭfixōfafĕini mia kexesharanō mĭ afeskanōma shara mĭ inō. <sup>3</sup> Mĕ mia nikamis mĭ Nios potakaspakōiaito. Nĕskaxō a Ifofafo mĭ ika anoax ekeki nokokaxō ea iskafamisfo: “Nĕ Gayopa Niospa meka nikasharai,” ixō ea yoimisfo. Nĕ nikai ĕ mikiki inimai finakōi. <sup>4</sup> Ĕfe fakefĕfe Jesŭs Ifokōifaifĕfe nikai ĕ inimakōimis. Afara fĕtsakai ea inimamakĭ iskafatiroma.

<sup>5</sup> Yamā, ĕ mia noisharai. Mĕ nika a Nios Ifofaafo yora fetsafo mĭ ato kexemis mia ano nokoafĕfe, mĭ ato ĭkisharakōia, ato ōiyamafikatsaxakĭ. <sup>6</sup> Nĕskakĕ na mĭ ato kexeafĕfe noko yoitafo mia yoikakĭ. Nĕskakĕ na Nios yoiti pexe mĕranoax ichanĕkanax fanĕikani mĕ nō nika mĭ ato noikĭ, mĭ ato ĭkisharakōia. Nĕskata ĕ mia yoikĭ iskafai: Afara ato inĕfe Niospa meka ato yoinōfo pexe tii, Niospa meka ato yoifofĕsafanōfo. Mĭ askafaino Nios mikiki inimai. <sup>7</sup> Nĕfo fofĕsamisfo Jesŭsnoa meka shara ato yoifofĕsafakani. Afara yopafĭkĕki a Jesŭs chanĭmara faafoma ato afaa yōkamisfoma. <sup>8</sup> Nĕskakĕ a Nios Ifofaafo nō ato kexesharatiro afara fichipaiyaifĕfe nō ato inĕtiro. Nō ato askafakĭ nōri ato feta Nios yonoxomis itiro.

*Yora fetsa āfe ane Diótreres chaka ini*

<sup>9</sup> A Niospa meka nikapaikani ichanĕmisfo ĕ ato kirika kenexō fomayamea ōinōfo. Akka Diótreres ea nikakaspamis, “Ĕ ĕto xanĭfo finakōia inōra,” ixō. Nĕskaxō ea ōikaspai, efe rafepaima. <sup>10</sup> Ea mekafakĭ chakafamis, ea yafi a Niospa meka yoimisfori noko chakafai. Askatari a Nios Ifofaafo fetsafo ato ifikaspamis Niospa meka ato yoiyamanōfo. Fetsafĕfe ato ifipafiaifono a Diótreres ato ifimakaspamis. “Mĕ anĕ nofe ichanĕtiro nono ĭkĭax,” ixō ato chakafamis. Nĕskakĕ ĕ matoki nokoxō ĕ mato xafakĭakōi yoi kaikai mĕ tĕpisharakōinō, afeskakĭ ato chakafaimĕkai. <sup>11</sup> Yamā, ōiti chakayafo keskara mĭri iyamafe. Akka a ōiti sharayafo keskara mĭri ife. A ato sharafamisfo Niospa fakefokĭ. Akka a ato chakafamisfo Nios tĕpimisfoma afe keskaramĕki.

*Na yora fetsari āfe ane Demetrio shara ini*

<sup>12</sup> Keyokōichi a yoisharakani Demetrioōnoa iskafakakī: “Na Demetrio feronāfake sharafinakōia,” ixō yoikani. Nōri anori yoimis. Nō anori yoiaito mīri chanīmara fatiro, mā mīmāi noko tãpixō.

*Mã mekai xatekī Juan ato meka shara fomani*

<sup>13</sup> Ë mia ichapa yoipaifikī ã anã mia kirika ichapa kenexonima. Kaxō ã mia yoisharaxiki. <sup>14</sup> Akka ã mikiki koshi nokosharapai. Ë mikiki nokoax mefe yoinōnãsharaxiki.

<sup>15</sup> Mīri isharafe, õiti fekaxteyamaxiki. Na efe ikafãferi mia meka shara fomapaikani. Mīri a mefe ikafo noko ato yoixosharafe. Nãskakē nã tii ã mia yoi kirika kenexō mia fomai.

*Ëkã Juan*

## Judaspā Jesūs Chanīmara Faafo Kirika Kenexō Fomani

*Judaspā ato kirika kenexoni a Nios Ifofafo*

<sup>1</sup> Ēkīa Judas, Santiago āfe exto. Nōko Ifo Jesucristo ē yonox-omis. Ē mato kirika kenexoni a Epa Niospā mato noikī mato ifini tii āfenākōi faxiki. Akka Epa Niospā nōko Ifo Jesucristoōxō mato kexesharafafāini. <sup>2</sup> Epa Niospā mato noikī, mato inimamasharakōinō mātō ōiti fekaxteyamanō, askatari mato noikīfinakōinō.

*Fetsafāfe chanī fisti ato yoipaonifo*

*(2 Pe. 2.1-17)*

<sup>3</sup> Efe yora mīshtichi, nōko Ifāfe noko nāxoni keskara ē yoi, a noko imapaiyai keskai nō chipo afe ixiai keskaraōnoa ē mato kenexopaifkī mē nika mā meka fetsa yopaito. Nāskakē iskaratīa ē mato kirika kenexoni mā Jesucristo nikakōiyanā mā shināfafāinō. Nānori Epa Niospā āfe Fakeōxō noko tāpimani. Nā āfe Fakeōnoa noko tāpimani keskafakī nā fisti nō yopai Ifo sharafaxiki. Akka meka fetsa mato fanīrira yoipaiyaifāfe ato nikatamaroko nā mato yoini keskara nā fisti nikakōikāfe. <sup>4</sup> Yora chakafo mato mēra fōkaxō anorima mato pārakani chaka tāpimapaikakī. Afokai Niospā yorafoma. Akka nō afara chakafamisxakī nō Epa Nios yoiaito nōko chaka noko soaxonano nō afe ipaxatiro. Nāskafekē nāfāfe fanīrira chakakōi mato yoipaikani, iskafakī mato yoipaikakī: “Mā Jesūs Ifofaxō nā mā apaiyai keskara mā atiro, mātō āfima fe mā ikaino, kērofori āfe fenema fe itirofo. Nāskaxō nā afara chaka fetsafo mā apaikī mā atiro. Mā askafaito Niospā mato omiskōimatiroma,” ikaxō fanīrira mato yoipaikani. Nōko Ifo Jesucristo fisti nikakaspamisfo. Nā keskarafōnoa Niospā shināmanaino keneyonifo Niospā ato omiskōimakī finakōixii.

<sup>5</sup> Akka mā mā tāpifekē anā ē mato yoipai nōko Ifāfe Ejipto anoa israelifo ato ifini anā omiskōinōfoma. Akka ato ififinixakī chipo a chanīmara faafoma ato keyokōi reteni. <sup>6</sup> Nāskatari Niospā āfe ājirifo taeyoi Nios fe isharayopaonifo. Nāfāferi Epa Nios yonosharaxoyopaonifo. Nios fe isharafiakatsaxakī atirifāfe afara chaka shinākakī anā Nios Ifofapainifoma. Askaifāfe ōikī Niospā kaninānā metexkereaxō fakishifā mēra ato nīchiyoni. Nāskaxō nā nikamisfoma ato omiskōimanaitīa ato ichanāfaxō nā omiskōipakenakafo mēra ato potaxii. <sup>7</sup> Nā Niospā ājirifāfe afara chakafapaonifo keskafakī Sodoma anoafō feta Gomorra anoafāfe a pexe rasi ano chaima ikafāferi nāskafapaonifo afara chakafakakī. Feronāfakefāfe āto

āfimafo chotaifono, kērofāferi āto fenemafo chotamapaonifo. Askatari feronāfakefo āa ranā chotanāpaonifo, kērofori askapaonifo āa ranā chotanākani. Nāskarafafo ōikī Niospa ato omiskōimani, chiifā tokiriya nai mēraxō atoki potani. Nā askafanioxō Niospa noko tāpimani. Nā tāpixō nō tāpitiro fatorafāfe āto chaka xateyamakanax nāskarifiakani, chiifā mēranoax omiskōipakenakafo.

<sup>8</sup> Nāskarifiakī nā chanīmisfāfe afara chaka fisti shināfafāikani. Nāskakaxō afia āto namapa ōia keskafakakī, nāskakōi fakani, āto yora chakanafakakī. Askatari Nios nikakaspakani. Nāskakaxori Niospa ājirifori ĭchamisfo. <sup>9</sup> Akka Niospa āfe ājiri Miguel xanīfokōifixō atokai Satanás ĭchanima. Mā Moisés naano Satanás Miguel fe feratenāni. Miguel Moisés āfe yora maifapaifiaino, akka Satanás Moisés āfe yora chakafapaixikī fipaini. Askafaito ōikī Miguel afe feratenāfikī ĭchanima. Yoikī iskafani: “Satanás, ě mia afeskafatiroma. Akka ěfe Ifo Niospa mia yoinō mī omiskōinō,” ixō yoini. <sup>10</sup> Akka nā feronāfakefāfe mato mēra fōkaxō nā afaa tāpiamafikaxō meka chaka yoimisfo. Askatari nā apaiyai keskara fisti famisfo, nā yoināto shināsharatiroma keskarafafo. Nāskakaxō āa afarafo chakafakanax omiskōipakenakafo.

<sup>11</sup> Ooa. Nā Caín ini keskarato. Caín āfe onefetsa noikas-papaoni. Nāskakē reteni. Askatari nā Balaam kori fisti fichipaikī Nios kachikiri fani. Na yoraforti nāskaraforti. Nāforti nā Coré keskarafafo. Nā Coré āfe xanīfo Moisés nikakaspapaoni. Nāskakē nikakaspaito Niospa reteni, nāskarifikī nā ato pāramisfo Niospa askari faxii omiskōimakī. <sup>12</sup> Akka mā noinākī ayayanā mā pimis nōko Ifo shināyanā. Akka nā yora chakaforti rāfitama mato fe ichanākaxō nōko Ifo shināmisfoma. Fetsafo noitama āakōi noimemisfo. “Nō mato yoi mato kexesharaxiki,” ifiakaxō tsōa afaa yoisharamisma. Nāfo nā nai kōi oimaīs keskarafafo. Nō nai kōi fakish ōikī mā oi feira nō fatiro inimayanā. Akka oi iyamaino nēfe nai kōi potano nō shināchakatiro. Nā ato kexemisfo keskarafofikanax afāfe nōko Ifoōnoa tsōa tāpiana. Nāskatari nā yorafo nā ifi fimimistīa fimiyamai keskarafafo. Nā ifi mā nai rafea keskarafafo, mā nakē āfe tapo tsekatirofo. Nāskarifiakī nā ato pāramisfāfe tsōa ato Jesús Ifofamatiroma afe nīpaxanōfo. <sup>13</sup> Nāfo oa fakafā poo ikī fākox potatiro keskarafafo. Nāskakaxō afāfe afaa shara yoitirofoma, mēxotaima afara chaka yoikani rāfimisfoma. Nāfo nā fishi keskarafafo. Mā fishi nāmā pakexō, anā chaxatiroma. Nāskarifiāi nā mato pāramisfo Nios kachikiri fakanax fakishifā mēra fokani, Niospa nā keskarafafo ato tāpimakī ato omiskōimakōixii anoax omiskōipakexanōfo.

<sup>14</sup> Nāskatari Enoc chipo fakani, mā Adán afetīama Epa Niospa onifanino. Akka Enoc āfe xini ini Adán. Nā

Enoc nã chanĩmisfãfe ato pãranõpokoxiaifoõnoa yoini. Nãskata aato ato yoikĩ iskafani: “Nikakapo, ẽ õia nõko Ifo oi, afe nai mẽra ikafo fe ichapakõifo tsõa ato tanatiroma afe fexikani. <sup>15</sup>Nãskaxõ ato yoipakexii nã niyoxõ amisfo keskara. Keyokõi maitio anoafõ nõko Ifoki fexikani, fatofomãki afe yorafo a afe ipanakafo ato õinõ, askayamai fatoforimãkai a chanĩmara fayamakanax omiskõipakenakafo mẽra foaifo. Akka nã nikamisfoma afe yorafoma. Akka nã chakafamisfo tii ato yoita, niyokaxõ Nios nikakaspapaonifoõnoa yoita, keyokõichi mekafakĩ chakafamisfoõnoari ato yoixii,” ixõ Enoc ato yoini. <sup>16</sup>Nãfãfe yõachepeyanã ato mekafamisfo. Nã chakafapaiyai keskara fisti shinãfafãimisfo. Askaxori fetsafo pãrakaxõ afara fĩapaimisfo ea inãsharakanira ixõ shinãfafãimisfo.

*Nã Nios Ifofafo ato yoisharani isharanõfo*

<sup>17</sup>Efe yora mĩshtichi, nã nõko Ifo Jesucristoõnoa mato yoimisfãfe mato yoinifo keskara shinãmakiyamakãfe. <sup>18</sup>Iskafakĩ mato yoinifo: “Nõko Ifo mã chaima oaino nã Jesús Ifofaafãfema mato kaxemetsama faxikani, Niospa meka nikakaspakakĩ. Nãfãfe afaa shinãtama nã chakafapaiyai fo fisti shinãfafãikani,” ixõ mato yoinifo. <sup>19</sup>Nã keskarafãfe mato paxkanã fatirofo, afarafo chakafo shinãfafãikani. Askarafo Niospa Yõshi Shara ato mẽra nanema.

<sup>20</sup>Akka efe yora mĩshtichi, kexemesharata isharakõikãfe Niospa afe meka shara nikakõiyana. Nãskakẽ kifikãfe afe Yõshi Sharaõxõ mato imapaiyai keskara mato tãpimanõ. <sup>21</sup>Nãskakẽ Jesús Ifosharakõifakãfe, Epa Niospa mato noikõiaito mã mã meemiski. Nõko Ifo Jesucristo noko noikõikĩ nõ nafiakẽ noko nimapakenaka nõ afe ipaxanõ.

<sup>22</sup>Fetsafãfe iskafakĩ shinãifono: “Ëtsa, chanĩma rakikĩa,” ixõ shinãifono, fenãmãshata ato yoisharakãfe nikasharakõinõfo. <sup>23</sup>Oa afara chiifã mẽra pakeax koofaito, nõ koshi firisafatiro keskafakĩ nãskarifiakĩ fetsafãfe afara chakafaifono ato noikĩ yoisharakãfe Jesús chanĩmara fanõfo, chiifã mẽra foyamanõfo. Akka yora chakafinakõiafori mã ato noikĩ ato yoisharakãfe xatenõfo, chiifã mẽranoax omiskõiyamanõfo. Nãskatari nõ kooyoxõ rapati chakana faxõ nõ anã fichipaitiroma. Nãskatari ato chakafo noikaspaifo keskara iyamakãfe. Ato noikõita nã afara chakafaifo keskafakĩ ato feta ayamakãfe.

*Mã mekai xatekĩ Niosnoa ato yoisharani*

<sup>24-25</sup>Nõko Ifo Nios fisti finakõia, nãato keyokõi tãpiakõia. Askatari nãato noko ifimis. Afe kerex sharaõxõ noko kexesharatiro nõ fenonõma. Nãato noko inimamasharakõi nõ nai mẽra kai, afaa chakafamisma keskarax. Nã sharafinakõia, efapakõi, afama mĩshti fatiro, tsõa atiroma keskafakĩ nõko Ifo Jesucristoõxõ atiro. Nãskarakõi mẽxotaima ipanaka. Nã tii.



## Jesucristo Juan Ōimani Keskara

*Afara afeskara ixiai anori Jesucristo Juan tāpimani*

<sup>1-2</sup> Efe yora mīshtichi, iskaratīa ē mato kirika kenexō fomai mā tāpinō. Ēkīa Juan ē mato kirika kenexō fomai. Nai mēraxō Epa Niospa Jesucristo yoini afe keskara a inōpokoai fo nāmānoafo a yonoxomisfo tāpimaximākai. Askafaito nikakī Jesús āfe ājiri ekeki nīchia. Anoxori ea ājirinī yoinō afe keskara ikimākai nāmānoafo. Ea ōimanaito mē ōia a inōpokoai fo xafakīakōi. Askaito ōikī ē kirika kenea a inōpokoai fo anori a Niospa Jesús yoia anorikōi mā tāpisharakōinō.

<sup>3</sup> Na ē mato yoiai ikataima. A inōpokoai ē mato yoiai na kirika ano. Nā ōikani fetsafori inimanōfo. Askatari a nikaifori chanīmara fakanax, afori inimaxikani. Nā ē mato yoiai keskai mā samamashta iki. Ea nikasharakāfe.

*Juan a ichanāmisfo anoafo siete Nios yoiti pexe ano a to kirika kenexō fomani tāpinōfo*

<sup>4-5</sup> Nā Asia mai anoafo a Nios Ifofaafo tii siete pexefo anoafo ē mato kirika kenexō fomai. A ē mato yoiai anori ōisharakōikāfe. Afetīama Epa Nios niyopaofinixakī iskaratīa nia. Epa Nios nīpanaka. Āfe Yōshi Sharari afe itiani. Nāskakē Epa Nios feta āfe Yōshi Sharapa, āfe Fake Jesucristo mato noikī mātō ōiti mēra mato shināmasharapainō afanā mātō ōiti fekaxtefanōma. Nāskakē nōko Ifo Jesucristo Niospa meka noko yoimis chanīmakōi. Jesúsfi Niospa Fakekōifekē retenifo. Mā retexō maifafafono Apa Niospa anā otofani anā nanakama. Fato fetsa askayomisma. Nāskaxō Apa Nios fe rafexō a xanīfofo maitio anoafo ato īkixii xanīfokōi ixō. Aatofi noko noikōiakī, āfe imi foax noko nāxonī Satanás chaka nōko ifo inōma. <sup>6</sup> Nō aōnoax nō Epa Nios afe yorakōi ixō noko yonoma-paiyai keskafakī nō anō. Nō askai afe yorakōifo ixō nōri yora fetsafo nō kīfixotiro Epa Niospa noko nikai. Nāskarafoskōi nōko Ifo Jesucristo noko imai. Nāskakē keyokōi yorafāfe aōxō iskafakakī yoipakenakafo: “Aicho, tsoa fetsakai na Jesús keskarama. Nā fisti sharafinakōia. Ares fisti nōko Ifo nīpanaka. Ares fisti keyokōi yorafo ato īkipakenaka,” ixō yoipakenakafo. Askapakexapainō.

<sup>7</sup> Ōikapo. Oa nai kōi keskara sharakōi nōko Ifo Jesús oaito keyokōi yorafāfe ōixikani. Askatari a retenifāferi ōikani, akiki rāfixikani. Oaito ōikani keyokōi yorafo a Ifofamisfo-mafo, “¿Afeskakī nō Jesús Ifofamismamē?” ikanax oiaxikani, shināmitsakōixikani.

<sup>8</sup> Epa Niospa yoia: “Afara onifataima ě iyopaoni. Ĕfi nĭpanakakĭ. Afetĭara na nŏko mai keyoai eres fisti ě ato yoitiro. Nĭskaxŏ ě afama mĭshti famis. Akka ě niyopaoni. Nĭskatari ě nĭpanaka,” ixŏ nŏko Ifo Niospa yoia.

*Nŏko Ifo Jesucristo āakŏi oa namakē ōiai keskara Juan ōimani*

<sup>9</sup> Ĕkĭa Juan, ě mĭto ochikŏi. Nĭskax mĕri Jesŭs Ifofaax mĕ efe yorakĭ. Askax mĕ aŏnoax omiskŏifikĭ, mĕ tenemis. Nĭskariai ěri aŏnoax omiskŏifikĭ ě tenei. Ĕ Niospa meka ato yoita Jesŭsnoari ě ato yoimis. Ea nikakaspakakĭ, āto xanĭfĕfe sorarofo ea achimaxŏ, fakafĕ nakirafe ea ato nĭchimana āfe nĕsimĕ, āfe ane Patmos ano. <sup>10</sup> Ĕ mato yoinŏ, ea nikakĕfe. Anoxŏ iskafani. A Jesŭs otoni penata, nomĭkonŏ, Niospa Yŏshi Sharapa ea ĭkixŏ a ea tĕpimapaiyai ea ōimana. Oa namakē nŏ ōimis keskara xafakĭakŏi ea ōimana. Askata ea kachiorixori fĕsikŏi oa xĕaiti keskarato ea yoiaito ě nika. <sup>11</sup> “Nĕ mĭ ōiaifo fetsafo kenexŏfe. A kirika kenexŏ Jesŭs Ifofamisfo tii ato fomafe. A siete Nios yoiti pexe anoafŏ Asia anoafŏ ato fomafe, afĕfe ōinŏfo. A Nios Ifofamisfo a pexe tii Efeso anoafŏ fomata, Esmĭrnĕ anoafŏ fomata, Pĕrgamo anoafŏ fomata, Tiatira anoafŏ fomata, Sardis anoafŏ fomata, Filadelfia anoafŏ fomata, Laodicea anoafŏfori nĕ mĭ ōiaifo ato kirika kenexŏ ato fomafe,” ea faa.

<sup>12</sup> Ea askafaito ě fesoakekafĕ ě ōia tsŏa ea yoimĕkai ixŏ. Ĕ ōia siete oa rĕpari efapa ōta keskara oro ě ōia. <sup>13</sup> Nĕskai rĕpari nakirafe feronĕfakē xanĭfo finakŏia nia keskara ě ōia. Ĕfe tari āfe tae fepokŏia, āfe sĭtorari orokŏi aŏ nonexemea ika. <sup>14</sup> Askata āfe foo oxokŏi. Askatari āfe fero oa chii keskara xafakĭakŏi. (Nĕskarifiakĭ xafakĭakŏi Jesŭs noko ōitiro a nŏ shinĕi keskara.) <sup>15</sup> Askatari āfe taeri chaxasharakŏia ika. Ĕfe mekari oa oi kaya feaito nŏ nikamis keskarakŏi. <sup>16</sup> Ĕfe pŏya kayakai aŏri āfe mĭfi kamaki siete fishi keskara ika. Ĕfe ana keno chainipa keskara aostamea ika. Askatari āfe femĕnĕ fafekŏi oa xini nŏ ōimis keskara ika.

<sup>17</sup> Nĕskara ōi ě pakea, oa nai keskara. Ĕ askaito ōikĭ ea ramĕ āfe mĭfi kayakai aŏxori. Ĕ askaito ea yoia iskafakĭ: “Rateyamafe. Ĕ Jesŭski. Afara onifataima ě iyopaoniki. Ĕfi anĕ nanakamaki. <sup>18</sup> Iskaratĭari ě nia. Mĕ nafianixakĭ, iskaratĭa ě nia. Ĕ anĕ nanakama. Ĕ anĕ afeska pishta nakama. Eres fisti ě ato namata, chiifĕ mĕra ě ato potatiro a ea nikakaspaamisfo. <sup>19</sup> Nĕskakē a mĭ taefakĭ ōiafo kirikaki kenefe. Askatari na mĭ iskaratĭa ōiaifŏri kirikaki kenefe. Askatari a chipŏ ixiaifŏri kenefe. <sup>20</sup> Ĕ mia yoinŏ afeskai siete fishimĕ ěfe mĕke kayakai aŏri; askatari afeskai siete rĕpari oro keskara otamĕki. Na siete fishi mĭ ōiai nĕato noko shinĕmamis siete Niospa meka yoimisfo Nios yoiti pexe mĕranoa ichanĕamisfo. Askatari nĕ



siete rãpari keskara mĩ õiai nãatori noko shinãmamis siete Nios yoiti pexe mẽranoax ichanãmisfo Nios Ifofakanax,” ixõ ea faa.

## 2

### *Jesús a Ifofaafo Efeso anoafõ ato yoini taekõifakĩ*

<sup>1</sup> Jesús ea yoia iskafakĩ: “Efeso anoxõ a ea Ifofaafo a ato Niospa meka yoimisto na kirika ato anexonaito nikanõfo, iskafakĩ kenexõfe: ‘Èkĩa mãto Ifo Jesús keyokõi yorafo èfe Epa Niospa meka yoimisfo è ato kexetaifaa. A è mato yoiai anori ea nikasharakõikãfe. <sup>2</sup> A mã ikai keskara mẽ tãpia, mẽ mato õi. Mãfi eõxõ fãsi yonosharakõimiskĩ. Afara fetsa afeskara afiaito mã tenekõimis. A yorafãfe afarafo chakafamisfo anorikai mã tãpipaimisma. Akiki mã inimapaimisma afara chakafaifono, nãskax mã ato fe rafekaspamis. Yora fetsafãferi mato yoikĩ iskafakani: “Cristo ea nĩchia è mato yoinõ,” ixõ mato yoiaifãfe, “Nõ ato nikayonõ,” ixõ mã ato nikataifaa. Fanĩrira mato yoiaito anã chanĩki yoimara mã faima mẽ mato õia mã askafaito. Anorima yoi ãa chanĩmisfo mã mã tãpia. <sup>3</sup> Nãskax mã eõnoax omiskõikĩ mã tenemis ea potakaspakĩ. <sup>4</sup> Mã anori shara shinãfimiskẽ è anã meka fetsari yoinõ. Taefakĩ mã ea noiyopaonixakĩ anã iskaratĩa mã ea anã noisharaima. Mã mã ea shinãmaki fetsea. <sup>5</sup> Shinãsharakãfe a mã taefakĩ shinãyopaoni anori. A ea noikĩ mã taefani keskafakĩ anã ea noikãfe. Askatari mã ranã mã nõinãyopaoni keskakõikãfe. Akka mã ea tanaima, oa chii nokaito nõ anã kêtéfatiro keskafakãfe ea shinãkĩ. Mã ea Ifofasharayamainokai chipo tsõa anã mato tanaima. Mã ichanãi ano anã tsoakai mato fe ichanãima. <sup>6</sup> Mã askafixõ afara fetsa mã shara famis. A feronãfake ãfe ane Nĩkoraita fanĩrira yoiaito nikakakĩ atirifãfe mato anoxõ nikakaxõ, afãferi chakafamisfo keskafakĩ èri ato noikaspai. A è noikaspai keskafakĩ mãri efeta noikaspai. <sup>7</sup> Mã pachoyakĩ ea nikakõikãfe. Niospa Yõshi Sharapa mato yoiaito nikasharakõikãfe. Satanás mato fanĩrira shinãmapaimiskĩ. A Satanás finõinĩfofã ea kachikiri fatama ea Ifofasharakõiaito, aafi Epa Nios ano è ikimaxii efe isharapakexanõ,” ixõ Jesús ea yoia anori Efeso anoafõ a chanĩmara faafõ ato è kenexonõ.

### *Jesús Ifofaafo Esmĩrnã anoafõ ato yoini*

<sup>8</sup> Anã Jesús ea yoia iskafakĩ: “A ea Ifofamisfo Esmĩrnã anoafõ a ato Niospa meka yoimis è yoinõ ea kirika kenexõfe iskafakĩ: ‘Èkĩa mãto Ifo Jesús è mato yoi mã tãpinõ. Ea nikasharakãfe. Nã afama mĩshti onifataima è iyopaoni. Iskaratĩa è nĩpanaka. Mẽ nayofinixakĩ è anã nanakama. È mato nonori yoi iskafakĩ: <sup>9</sup> Mã omiskõiaito mẽ õi. Askatari mã afaayafoma. Mã askafiaino è mato fe ikano, ea keskarari mã

shara itiro. Mē tāpia matoōnoa yora fetsafāfe meka chakay-oiāifāfe. “Nō judeofo, nō Nios Ifofamis,” ikaxō yoiaifo afokai efe yorafoma. Afofi Satanás yorafoki. <sup>10</sup> Akka a inōpokoai ē mato yoinō. Satanás ifofaafāfe fatora fetsa fisti mato karaxa mēra ikimaxikani mā ea shināmakimā kai ōixikakī. A mato mesenifaifono rateyamakāfe. Ea shināmakitama nonori shinākāfe iskafakī: “Ea retēfiaifono ē meseima, ē Nios ari kai. Ēfe Ifāfe ea potanakama. Ē ēfe Ifo noikī finakōifafāini,” ixō yoikāfe. Mā askax, nakē, ē mato ĩkipakenaka mā efe ĩpaxanō. <sup>11</sup> Mā pachoyakī nikasharakōikāfe Niospa Yōshi Sharapa mato yoiaito mā Jesús Ifofakī. Fetsa omiskōifikī ea shināmakiyamaito Satanás afeskafatiroma. Nāskax naax a omiskōipakenakafo mēra katiroma,’ ” ixō anori Jesús ea yoia a Ifofafo Esmīrnā anoafō ē ato kenexonō.

### *Jesús Pérgamo anoafō a chanīmara faafō ato yoini*

<sup>12</sup> Anā Jesús ea yoia iskafakī: “A ea Ifofamisfo Pérgamo anoafō a ato Niospa meka yoimis a ē yoipaiyai anori ē yoinō ea kirika kenexōfe tāpinōfo. Iskafakī kenefe: ‘Ēkīa māto Ifo Jesús ē mato yoi mā tāpinō. Ēfe meka oa keno chainipa takairafe ikikōiai keskaraxō, ēfe mekapas a ea noikaspai fo tii ē ato chakafatiro kopikī. <sup>13</sup> Mē tāpia a pexe rasi Pérgamo ano mā ika. A Pérgamo anoafāfe Satanás nikakōikani. Askaito ōi mā mesemisma, ea Ifosharafai. “Jesús nōko Ifokōi,” ixō mā ato yoimis. A ea Ifofamis fetsa āfe ane Antipas eōnoa ato yoimis ōikī mā reteafō noikaspakakī. Mā reteafāfe ōifiax mā atoki meseima, mā ea chai faama. Māto ōiti mēra mā shināsharakōi. “Noko retēfiaifonokai nōko Ifo Jesús nō chai faima,” ixō mā yoimis. Anori mā shināi sharakōi. <sup>14-15</sup> Akka nāno afara fetsa a sharama ē mato yoipai. Fatora mā fetsa a Balaam afara chaka yoini keskara mā shināmakikaspai. Akka taeyoi xanīfo Balac israelifo chakana famapaini. Nāskaxō Balaam yōkani: “¿Afeskaxō mī kaifo ē ato chakana famatiromē?” faito, Balaam kemani iskafakī: “Mī ato yoitiro mī fista mēra ato ikikixiki. Nā mā akai keskarari akairi anōfo. Nā nōko niosra ixō afara onifaxō a mā piāi mā ināmis. Nā israelifāfe pikanax chakananōfo māto fista mēranoax. Askatari āto āfima fe ikanax chakananōfo,” fani. Iskaratīari nāskarāfori mā fisti rasi chakanāfo nā Nicolaitafāfe ato afara chaka tāpimanaifo keskara ikafo. <sup>16</sup> Nāskakē anā iskaratīa askafayamakāfe. Nios Ifofakāfe, anā shinākāfe. Māto chaka xatekāfe shināmitsayanā. Akka mā chaka xateyamaito, ē matoki samamashta nokoxō ēfe mekapa ē mato kopikī chakafatiro mā omiskōinō. Ēfe mekafi oa keno ikiai keskarakōikī. <sup>17</sup> Mā pachoyaki ea nikakāfe. Niospa Yōshi Sharapa eōnoa mato yoiaito, nikasharakāfe. Satanás mato chakafamapai. Fētsa

Satanás nikayamaxō ea kachikiri faamano, nã ē kexesharaxii nã ēfe Epa israelifo kexesharani keskafakī. Shinākapo. Epa Niospa israelifāfe āto xinifo a piaifo ato ināni fonāikaifāfe afaa piamaifāfe Epa Niospa nai mēraxō ato pōtani oa misi keskarafō āfe ane mǎnā nã pinōfo ato pōtapaoni pena tii ato noikī. Nāskafakīri nã ea chanīmara faafo ea Ifo sharakōi faifo ē ato ināxii ēfe Yōshi Shara isharapakexanōfo. Ea ōiyamafiaifono pena tii ē āto ōiti xafasharakōi faxotiro. Askatari mā ea Ifo sharafafono isharakōiyanā mā ea chanīmara faino, akka ē mato ane fetsafaxōi tsōa tāpimisma, nã fiafistichi tāpitiro. Tokiri oxosharakōikī nã tokiriki mā mǎto ane kenea mǎto ane fena ē mato ināxii. Nāskakē ea tāpisharakōixikani. Mā ōitisharayakōi ixii, ’ ixō Jesús anori ea yoia a chanīmara faafo Pérgamo anoafō ē ato kenexonō.

### *Jesús a Tiatira anoafō a Ifofamisfo ato yoini*

<sup>18</sup> Anā Jesús ea yoikī iskafaa: “Ea Ifofafo Tiatira anoafō Niospa meka ato yoimis a ē yoipaiyai anori ē yoinō ea kirika kenexōfe iskafakī: ‘Ēkīa ē mǎto Ifo Jesús ē mato yoisharapai mā tāpinō. Ēfe fero oa chii xoisai keskara. Nāskakē ē mato tāpikōia. Ēfe taeri nã keno fakka fakka ikai keskara. Nāskakē ē mato yoikī iskafai: <sup>19</sup> “Mē mato tāpia, nã mā afara shara famis. Mā nōinākōi. Askatari mā ea chanīmara faxō mā ea Ifokōi famis. Nāskakē fetsafori mā noisharakōimis ato kexesharayanā. Mā omiskōifikī eōxō mā tenekōimis. Mā ea chanīmara fakī taefanitīa mā fetsafo sharafamis. Nāskakē iskaratīari mā ato noisharataifaa. <sup>20</sup> Mā mā askafimisno afara fetsa ē mato yoinō a ē fichipaiyaima mā anā fichipainōma. Akka kēro fisti mato fe ichanāxō, ‘Ē Niospa meka ē mato yoinō, ea nikakāfe,’ ixō mato yoipaikī, ēfe mekakōi mato yoima. Nã kēro Jezabel fanīrira mato yoikī āa mato pāramis. Mā Jesús Ifofafiamiskē mato pāramis iskafakī: ‘Mǎto āfimafo chotakāfe; kērofāferi mǎto fenemafo chotamakāfe,’ mato famis. Askatari mato yoimis iskafakī: ‘Afara fetsa yora fakaxō, nã nōko niosra ixō, a mā piyai ispaxō nōko nios nō ināira ixō, ano fisti ichanāxō, mā pitiro,’ ixō na kēro Jezabel mato yoikī mato pāramis. <sup>21</sup> A kēromā fanīrira mato yoimis mē yoitaifamis anā chakafanōma. Ē yoifiatokai āfe chaka xatepaima. <sup>22</sup> Ē yoifiaino ea nikayamaito ōikī ē isinī imaxii rakatsax omiskōinō. Askata a fetsafori a keskara a sharashināifoma āto chaka xateyamaifāfe ē ato omiskōimani. <sup>23</sup> A kēromā shināi keskarari shināifo ē ato retexii. Ē askafaito, ōikani a ea Ifofamisfo mai fetsafo arixō tāpitirofo ē keyokōi yorafo ē tāpisharakōia. Mǎto ōitinī a mā shināi anori mē tāpikōia. Tsōakai afaa pishta ekeki onetiroma. Ē keyokōi tāpikōia. Nāskakē mā afarafo shara famis ē mato shara faxii kopifakī. Akka a afarafo

chakafamisfo ē ato omiskōimaxii kopikiri. <sup>24</sup> Efe yora mīsttichi Tiatira anoafāfe, mā atiri nā kēromā mato fanīrira yoipaiyai anori mā nikamisma. Satanás ato tāpimamis keskara mā anori shināpaima. Askara shara. Nāskakē ē anā mato afaa fetsa yoima. <sup>25</sup> Nāskakē ē anā fistiri mato yoi. Na eōnoa mā tāpimis anori shināmakiyamakāfe. Ē mato ifiyoai mā eōnoa tāpimis anori shināmakiyaiyamakāfe. <sup>26-28</sup> Fētsa Satanás finōkōixō, ea fisti Ifokōifaax mā naax nā efe nīpanaka. Ē ato xanīfo imaxii. Epa Niospa ea xanīfokōi ima keyokōi ē ato īkinō. Nāskarifikī ē ato xanīfo imatiro efeta na maitio anoafō ato īkinōfo, mitsisipakōixō. Akka a fetsafāfe ēfe meka shara nikakaspaifāfe nō ato omiskōimaxii. Oa nō kesho kerexkai nō yamī moshaino moshitiro keskara afeskaxō nō anā shara fatiroma. Nāskarifikī nā nikayospamisfo nō ato omiskōimanaitīa tsoa pishta ato timamatiroma nanōfoma. Mā penaino, fishifā fisti fafeaito, keyokōichi yorafāfe ōitirofo. Aa keskara ē anā oxii ea ōisharanōfo. Ē anā nokoxō, ē ato yoixii nā ea Ifofamisfo efe isharpakexanōfo. <sup>29</sup> Mā pachoyakī ea nikasharakāfe. Niospa Yōshi Sharapa mato yoiai keskara nikasharakāfe,” ” ixō Jesūs anori ea yoia a Ifofafo Tiatira anoafō ē ato kenexonō.

### 3

#### *Jesús Sardis anoafō a chanīmara faafo yoini*

<sup>1</sup> Askata anā Jesūs ea yoia iskafakī: “A ea Ifofamisfo Sardis anoafō a ato Niospa meka yoimis a ē yoipaiyai anori ē yoinō ea kirika kenexōfe iskafakī: ‘Ēkīa mātō Ifo Jesūs ē mato yoi mā tāpinō. Niospa Yōshi Shara efe ika. Ēfi Nios yoimisfāfe āto xanīfokōiki. Ē mato yoi iskafakī: Mā ika keskara mē tāpimis. Yorafāfe matoōnoa iskafakī yoimisfo: “Nafō shara ikafo. Na Sardis anoafāfe mā Jesūs Ifofakōinafo,” ixō matoōnoa yoimisfo. Mā isharamis keskara ōikani. Māri shināmis iskafakī: “Nō shara ikara” iflax mā shara ikama. Mā ea Ifofasharakōiama. <sup>2</sup> Akka mā mā ea shināmakia. Askakakīma, anā a mā shināyopaoni anori shinākāfe. Mē tāpia Epa Niospa mato imapaiyai keskara mā isharakōiama. Ē mato yoiai keskara mā akama. Mā eōxō asharayopaoni anā iskaratīa mā anā askafaima. Mā ea shināmakipai. Nāskakē afianā ea shināsharainīfofākāfe. <sup>3</sup> Nā mā ēfe meka mātō ōiti mēra mā shināyopaoni keskafakī anā shinākāfe. A mā chakafamis keskara shinākakima; ea Ifo shara fakāfe. Akka mā ea shināyamaito ē matoki samama nokorisatiro mato omiskōimaxiki. Oa yometso tsōa tāpiamano āto pexe mēra ikirisatiro keskai, ē matoki nokorisataxii mato omiskōimaxiki. <sup>4</sup> Askaflix a mato fe ichanāmisfo fisti rasi a Sardis ano ikafāfe chakafamisfoma. Nōko rapati choshtakōi

nō pekaxō fatiro fetsa fena shara safexiki. Nāskafakīri atirito mā chaka shināpaoni keskara mā anā shināima, mā mā pota. Nāskaxō mēstekōi mā eōnoa shināi. Nāskaxō rapati fenasharakōi keskara ē mato ōitiro. Mā askano, mā ea ano nokoaito ē mato rapati oxokōi sharakōi ināxii mā efe ĩpaxanō. Mā isharakōimixakī mā efe rafepakenaka. Nā ē keskara shara ixikāki. <sup>5</sup> Tsoa ēfe meka shināmakitama ea Ifofakaxō, eōxō Satanás finōkanax afo efe isharakōipakenakafo. Afori ē ato rapati oxokōi sharakōi ināxii. Askaifāferi ēfe Epa Niospa a ea Ifofaafo tii āto ane tii kirikaki kenea. Nāskaxō āto ane kenea kirikaki a ea Ifofaifāfe tāpinōfo efe nĭpaxakāki. Askaifāfe ē āto ane soanakama. Epa Nios feta āfe ājirifāfe ōiaifono ē ato yoixii iskafakī: “Nafofi efe yorafokī,” ixō ē ato yoixii. <sup>6</sup> Mā pachoyakī ea nikasharakāfe. Niospa Yōshi Sharaōxō eōnoa a ea Ifofaafāfe yoiaito nikasharakōikāfe,’ ” ixō anori ea Jesús yoia a Ifofaafo Sardis anoafo ē ato kenxonō.

### *Jesús Filadelfia anoafo a chanĭmara faafo yoini*

<sup>7</sup> Askata anā Jesús ea yoia iskafakī: “A ea Ifofaafo Filadelfia anoafo a ato Niospa meka yoimis a ē yoinō ea kirika kenexōfe iskafakī: ‘Ēkĭa mātō Ifo Jesús ē mato yoi mā tāpinō. Ē afaa pishta chakafamisma. Ē sharaĭnakōia. Ēfe meka chanĭmakōi. Nā fichipaiyai afama mĭshti sharafo āfe pexe ano fapaoni, xanĭfo David. Akka āfe pexe fepoti chamisyano tsoa ikitiroma ipaoni, chamismaisax. Akka ato ikimanaino ikitirofo. Akka ato ikimayamaino tsoa ikitiroma. Nāskarari mā Nios ano ikipai mā ikitiroma ē mato ikimayamaino ěmāi chamis keskaraxō. Akka ē mato ikimanaino mā ikitiro Nios ano. Akka fetsafāfe ikikāfe mato faifono mā Nios ano ikitiroma. Eres fistichi ē mato ikimatiro. <sup>8</sup> A mā imis keskara mē tāpia. Mā yora ichapayamafloxō mā shināsharakōimis. A ē yoimis keskara mā ato tāpimatiro a mā amis keskara eōnoa. A ē yoimis anori tsōa mato xĭtitiroma. Yora fetsafāfe mato yoiaifo mā metsanima. Mato askafafiaifono ēfe meka mā shināmakimisma. “Na Jesús nōko Ifo,” mā ea famis. <sup>9</sup> Fetsafāfe chanĭkakī mato yoimisfo iskafakī: “Nō judeofo,” ixō mato yoimisfo. Afokai Niospa afe yorafoma, Epa Nios chanĭmara faxoma. Afāfe Satanás ifofamisfo. Nāskakē ēfe Epa fe nō āto kaifoma. Afofi āa chanĭmisfo. Shinākāfe. Nā yorafo ē ato yoimaxii iskafakī yoinōfo: “Nōkai shara shināima. Nō afama. Chanĭma, Niospa āfe Fake mato noisharakōimis,” ratokonō mai chachikaxō iskafakī mato yoixikani. <sup>10</sup> A ē mato yoimis anori mā isharakōia omiskōifikī mā tenekōimis ēfe meka nikakatsaxakī. Mā eōnoax omiskōifikī mā tenekōimis. Nāskakē mā ea shināmakimismano ē mato kexesharaxii a omiskōiai nokoaino nā maitio. Keyokōi omiskōixikani ea Ifofayamakanax. <sup>11</sup> Ē anā samama oxii matoki. Ea shināmakiyamakāfe. Mā ea Ifofakī

ea chaifayamakāfe. Mā ea chaifayamaino eōxō Epa Niospa mato ināpaiyai keskara mato ināi fetsafāfe finōfoma. <sup>12</sup> Fetsa omiskōikī ēfe meka shināmakitama tenekōifai ea Ifo sharakōi faxō ato Satanás finōkōia. Nāskakē a ēfe Epa Nios ika ano, ē ato imasharapakenaka. Anoax anā faki fonakafoma. Nāskakē ē afo tāpimaxii afomāi Epa Niospa yorafokē. Askaxō ē ato yoixii iskafakī: “Nono Epa Nios ikano, nofe mā ipanaka,” ē ato faxii. A Niospa yorafo, judeofo, Jerusalén ano ipaonifo. Akka iskaratīa Epa Nios ika ari Jerusalén fena. Jerusalén fena nai mēra. Nai mēra ifiax, chipo nāmā fotoxii. Akka fetsafo ea shināmakikanaxma afo ano ipanakafo. Nāskakē fotoxō ēfe Epa ane ē atoki nētaxii. Askatari Jerusalén fenapa aneri ē atoki nētaxii. Askatari ēfe ane fenari tsōa nikayomisma ē atoki nētaxii keyokōichi tāpinōfo ē āto Ifokē. <sup>13</sup> Mā pachoyakī ea nikasharakōikāfe. A Niospa Yōshi Sharapa ato shināmanaino yoiaifo anori nikasharakōikāfe,’ ” ixō Jesús ea anori yoia a Ifofaafo Filadelfia anoafo ē ato kenexonō.

*Jesús Laodicea anoafo a chanīmara faafo ato yoini*

<sup>14</sup> Askata anā Jesús ea yoia iskafakī: “A ea Ifofaafo Laodicea anoafo a ato Niospa meka yoimis a ē yoipaiyai anori ē yoinō ea kirika kenexōfe iskafakī: ‘Ēkīa mātō Ifo Jesús ē mato yoi mā tāpinō. Epa Niospa ea amapaiyai keskara ē fakatsaxakī āfe meka yoinō. Epa Niospa yoipaiyai keskara ē keyokōi yoimis. Ē chanīkima yoimis. Epa Niospa onifani tii keyokōi ēfi āto xanīfokōikī. Ē mato iskafakī yoi: <sup>15-16</sup> Mā amis keskara mē tāpia. Ea kachikiri fayamakaxō akka askafixō ē mato amapaiyai keskara mā fichipaikōiama. Askara sharama. Afara matsishara nō nīskakī nō inimayanā nō ayatiro. Askatari afara xana shara mā matsikē nō inimayanā ayatiro. Askafixokai afara katsa nō inimayanā ayatiroma. Katsa meei nō anāpaketiro. Nāskarifiiai ranāri yorafo afara xana keskarafō. Ea Ifo sharakōi faafo. Akka ranāri afara matsi keskarafō. Ēfe meka tāpisharafoma. Ē atoōnoax rafañā ikōini. Askafixakai mā kai xana yafi matsi keskarama. Mā katsa keskara. Afara katsa meekī nō anāpaketiro keskara ēri mato askafai. Nāskakē ē mato potaxii oa ē anāpakeai keskafakī. <sup>17</sup> Akka mā yoimis iskafakī: “Ē afara ichapaya. Ē afaa yopaima. Ē Niospa mekari tāpifinakōia,” ixō, anori mā yoifiax mā tāpiama mā chaka imis. Ooa. Ea mā yopafikī mā kaka-paimis. Niospa āfe Yōshi Sharapa mato imapaiyai keskara mā ikama. Mā katsa keskarakī. Mā imis keskara mē tāpia. Akka ē kai askara fichipaima. Askafixō ē matoōnoa shināi keskara mā kai tāpiama. Mā nā fēxo keskarafō. Fēxo afara ōitiroma. Nāskarifiiai māri ēfe mekakōi nikasharamisma. Mā yora chitoria keskarafō. Akka mā tāpiama mā chitoria keskara. Yora

chitoriato rapati yopai chitoria ixikima. Nāskarifiakī mā ea yopaima keskara ea yopafikī. <sup>18</sup> Akka ē mato yoisharapai mā afara chakafamis keskara mā anā anōma. Ea yōkakāfe ē mato tāpimanō afeskax mā ea keskara itiromākī. Eres fisti ē mato imasharatiro. Akka mā chitoria keskara. Akka ē mato rapati safemasharatiro mā anā rāfinōma. Akka rapati ē mato yoitamaroko mā afara chakafamis ē mato yoi. Akka ē mātō ōiti fetsafaxotiro ea keskara shara mā inō. Akka a afara mā chakafamis ē xafakīa ōia. Mā fēxo keskarakōi imis. Nāskakē ea yōkakāfe ē mato sharafanō, ēfe meka ē mato tāpimasharanō. <sup>19</sup> Akka ē mato noiyamakī ē anori mato yoikeranama. Askatamaroko ē mato keyokōi noikōi. Nāskakē ē mato omiskōimatiro tāpimākī mā chaka xatenō. Nāskaxō nāfori ē ato yoisharapai ea Ifo shara fanōfo. Akka a mā chaka shināmis keskara anā shināyamakāfe. Iskaratīa ēfe meka nikakōikāfe ē mato yoiāi keskara axikakī mātō chaka xatekāfe. <sup>20</sup> Shinākapo efe yora mīshtichi. Akka a yora pexe mēra ikipaikī ikisi pexe ifo kenatoshitiro pexe ifāfe ikimanō. Nāskarifiāi ē mato ano nokoxō mato yoikī iskafaxii: “Ē mefe rafepai,” ixō ē mato yoimis. Fētsa āfe shinā mēraxō ea nikaxō ea yoi: “Ifo, emēra ikife. Ē mia fichipai,” ixō anori yoiāito ē a mēra ikiax ē afe rafei. Ari efe rafei. <sup>21</sup> Fētsa afara chakafakī xatexō ea Ifosharafai nā ēfe Epa Nios ika ano efe ipasharatiro. Nāato Satanās finōa. Ēfi xanīfokōikī ari efe xanīfo itiro. Ē Satanās yafi niafaka chakafo finōkōia. Ēfe Epa Nios ika ano afe xanīfokōi ē ika. Nāskarifiāi fētsa āfe chaka kachikiri fakī, ea Ifosharafaxii ē ika anoax ari efe xanīfo ipaxatiro. <sup>22</sup> Mā pachoyakī ea nikakāfe. Niospa Yōshi Sharapa ea yoiāi keskara nikasharakāfe,’ ” ixō ea anori Jesús yoiā a Ifoafafo Laodicea anoāfo ē ato kenexonō.

## 4

<sup>1</sup> Akka nā ea taefakī yoiā, mē kenekī mitoano, ea anā yoiāito ē nika. Ea iskafaito ē anā ōia nai mēraxō oa pexe fepoti fepekemea keskaraxō. Ē nika afia ē nika keskara xāaiti āfe oi efapa keskarato ea yoiā anā ea iskafakī: “Niri ekeki māpeferafe,” ea faa. Oa namakē ōia keskara ē ōia ea iskafaito: “Nafo ē mia ispanō nafo afarafo chipo ixiaifo ē mia ispanō,” ea faa.

<sup>2</sup> Ea askafaito samama Niospa Yōshi Sharapa ea ōimana āfe tsaoti efapa sharakōi ea ōimana a xanīfāfe tsaoti ano tsaokē ē ōia. <sup>3</sup> A ē ōimismafo ē ōia sharakōifo. Nāskakē ē tāpia. Nioskōiromē ē faa. Askaito ē ōia fafesharakōiaito. Iskara ē ōia. Tokiri rafe āto ane jaspe fe cornālinā nā rafesharakōi fakka fakka sakōini. Nāskara āfe femānā ē ōia. A āfe tsaoti ano oa nāfa fai nana keskara ē ōia fafesharakōiaito. <sup>4</sup> Nā nōko Ifo tsaōa ano a kematai veinticuatro tsaotifo ē ōia. A tsaoti kamaki feronāfakefo tsaōafo ikafo. Nā feronāfakefo

Jesús Ifofamisfo ikafo. Afāfe nā ato chanīmara faifo ato kex-emisfo ipaonifo. Āto rapati oxo sharakōifo māmāi ato Niospa āfe chaka soaxonikē. Askatari xanīfāfe maiti keskara oro sharakōi safeafo ika. <sup>5</sup> A āfe tsaoti anoax kana peeitaitani oa kana piishikai keskara a mēraoa ē nika. A fesoa anori siete rāpari xofisaito ē ōia. A ē ōiaino Epa Niospa ea shināmana iskafakī: “A Epa Nios tsaono rāpari otaito ē ōia keskara, nāskarifikī Epa Niospa āfe Yōshi Shara nokoki nīchiarokomē nofe rafenō,” ixō ē shinā.

<sup>6</sup> Askatari a fesoa anori oa fakafā keskara fakka fakka ikaito ē ōia, oke mēra xafakīakōi ika. Askatari a nōko Ifāfe āfe tsaoti ano a onifanifo cuatro ano niafo ika. Askai fero icha-payayo. Takairafe fero neeafo. <sup>7</sup> Oa poomā femānā keskara fetsa ita, fetsari oa fakka fene femānā keskara ita, fetsari oa yōra femānā keskara ita, fetsari oa tete yoyai keskara ika. <sup>8</sup> Askakani āto pei ichapa seis ika, fisti rasi pei ichapayayo. Askai āto fero rasi ato neei fetsea ika. Penachāi fanāita, fakishchāiri fanāiki xatepakenakafoma. Fanāiyanā iskafakani:

Sharafinakōia, sharafinakōia, sharafinakōia, nōko Nios sharafinakōi. Nōko Niospa afama mīshti famis nā apaiyaifo. Epa Nios niyopaofinixakī, nāskakē iskaratīa nia. Askatari Epa Nios afeska pishta nakama, ikax fanāikaifo.

<sup>9-10</sup> Nāskakē aōnoax fanāikafo iskakani: “Epa Niosi, mī fisti nōko Ifo. Fato fetsakai na mī ikai keskarama. Mīfi nīsharapakenakaki. Mī sharakōi. Mī afaa pishta chakafamisma. Mī askaito nō mia Ifofasharakōi. Aicho Epa Niosi. Fato fetsakai mia keskarama,” ixō Nios fanākafo. Mā askafono nā Jesús Ifofamisfo veinticuatro xanīfofo nōko Ifo Nios āfe tsaotiki tsaono a nāmā feopakefofānafo. Feopakefofākata, āto maiti tsekakata feofafo Nios nāmā māmāi askafakatsaxakakī. Nāskaxō yoiāfo iskafakakī: “Nōko Ifo Nios mī noko maiti inā keskari fakī nōri miari mini. Mī noko ināfikē nō mia fāsi noikī na maitifo nō mia mini. Meres fisti mī noko ĩkitiro. Mī noko ifimis. Akka mī nōko Ifokōi itiro. <sup>11</sup> Mī afaa chakafatamaroko mī sharakōifamis. Akka mīōnoa fisti nō yoitiro iskafakī:

Mī nōko Ifokōi. Mī nōko Nios. Tsoa fetsakai mia keskarama shara. Mī isharapakenaka. Mīkai afaa chakafamisma. Nāskakē nō mia fāsi noi. Mī shināmās mī afama mīshti fatiro. Mī keyokōi onifani. Mī apaiyai keskara mī keyokōi onifani ato nimapakexakī,” ixō nā Jesús Ifofamisfāfe veinticuatro xanīfofofāfe yoimisfo.

## 5

*Jesús kirika kataramea tsomaxō ato yoiyoni afeskaximākai chipo*



<sup>1</sup> Askata ĕ añã õia oa ĕfe namapa õia keskara nã ĕ mato yoinõ. Nã mifi kayakai aõri nõko Ifo Nios tsaono ĕ õia kirika katarama takai rafe kenea ĕ õia, siete taxtati aõ neekĕ. <sup>2</sup> Niospa ãjiri finasharakõia ĕ õia. Fãsikõi mekayanã iskafakĩ yoia: “Na kirika taxtatinĩ taxta afeskaxõ tsõa õitiroma. Nã xanĩfo afaa chakafamisma fistichi fĕpetiro õixii. ¿Fato xanĩfãfe afaa chakafamismato fĕpetiromĕ nõ õinõ?” ixõ yoia.

<sup>3</sup> Askafixõ tsõa fĕpetiroma nai mĕranoa ikafãferi fĕpetirofoma. Askatari a nãmã ikafãferi, Niospa ãjirifãferi fĕpetirofoma a mĕra õixikakĩ. <sup>4</sup> Nãskakĕ ĕ oiai finakõiyana iskafakĩ yoia: “¡Ooa! Xanĩfo afaa chakafamisma tsõa fichiama na kirika noko fĕpexopanã a mĕra nõ õipanã,” ixõ ĕ shinã. <sup>5</sup> Askata nã veinticuatro xanĩfofãfe Jesús Ifofamis fĕtsa ea iskafaa: “Oiyamafe. Ōipo. Nõko Ifo oa ono nia. Cristo fisti nõko xanĩfo finakõi. Afama mĩshti atiro. Tsoa a keskarakõima. Nõko xinifãfe ãto xanĩfo ipaoni David ãfe fena Jesús. David xanĩfo finakõia ipaofinikĕ, Jesús finõkõia. Keyokõi ato finõa. Satanás finõta, a xanĩfo fetsafori ato finõkõia Jesús. Iskaratĩa nono Epa Nios fe ika. Nãskakĕ na siete taxtati Jesús noko fĕpexotiro nã kirika nõ õinõ. Nãskakĕ añã oiayamafe,” ea faa.

<sup>6</sup> Nãskakĕ nãnoa ovejanã fake ĕ õia ãfe mãxo sieteya, ãfe ferori nãskara ika. Reteafo keskarafix Niospa tsaoti ano nia ika. Nãnoa nã Niospa onifani cuatrofo feta a veinticuatro Nios Ifofaafo xanĩfofãfe foaketefayakenafo ika. Tsoa fetsakai a keskarama. Nãato afama mĩshti fatiro. Nã fero sietefãfe noko shinãmani Niospa ãfe Yõshi Shara nĩchiano keyokõi nã maitio ano inõ. <sup>7</sup> Akka Epa Niospa nã kirika ãfe mifi kayakai aõri tsomakĕ Jesús fĩa. <sup>8</sup> Fĩxõ tsomano nã cuatro Niospa onifanifo fe nã veinticuatro xanĩfofo Jesús Ifofamisfo a nãmã feopakefõfãnafo. Nãfãfe maneti yafi kechofo tsomafo. Nã kechofo oro fakka fakka ikai keskara mĕranoax otano ãfe kõi nofe nakas shara nai mĕra foai keskara. Nãskarifiai nã Nios Ifofamisfãfe kĩfiaifono Epa Niospa nikamis. <sup>9-10</sup> Akka nã fanãikaifo tsõa nikayomisma fanãikani, iskakani:

Mĩ afaa chakafayamafiamiskĕ mia retenifo. Mĩ noko nãxoni, mĩ imi fonĩ Satanás añã nõko ifo inõma Epa Nios ãfe fakefo nõ inõ. Nãskakĕ mĩ fistichi fitiro kirika kenea fĕpexiki noko tãpimaxiki. Mĩõnoax nã mia chanĩmara faafo tii maifo tii anofo Niospa yora itirofo meka fetsa fetsatapafãfe mekakani. Nãskakĕ nãfãferi fetsafo mĩ meka shara ato tãpimanano, mĩ ato amapaiyai keskara anõfo. Askatari nã maifo tii anofo xanĩfo mefe ixikani, ikax fanãikafo.

<sup>11</sup> Askatari ĕ õia Niospa ãjirifo ichapakõifo tsõa ato tanatiroma ichapakõi fanãikaifãfe ĕ ato nika. Nios xanĩfo tsaoti ano nã Niospa onifaa cuatrofo fe nã xanĩfofo

veinticuatrofo feta nakifayakenafo. <sup>12</sup> Fāsikōi fanāikani iskafo:

Niospa Fake Jesús oveja fake keskara yorafo nāxōa āto chaka soaxoxikī. Akka keyokōi nā maitio anoafo ato ĩkitiro, keyokōi nai mēranoafori ato ĩkitiro, nōko mai anoafori āfenā, keyokōi tāpikōiakī, afama mīshti atiro, keyokōichi mī sharakōira fapanakafo. Mī fisti nōko Ifo itiro. Aicho, mī nōko Ifo mī isharakatsaxakī mī nīpanakara,

ikax fanāikafo.

<sup>13</sup> Askata ē nika keyokōi nai mēranoafo tii fanāikaifono, mai anoafori fanāikaifono ē nika. Mai mēranoafori ē nika. Fakafā anoafori fanāikaifono iskakani:

Epa Nios āfe tsaoti ano tsoa, āfe Fake Jesús oveja fake keskara, nā rafe nōko Ifo isharakōimisfo. Keyokōichi mā sharakōira ato fapanakafo. Mares fisti mā nōko Ifo itiro. Mā afama mīshti atiro. Nāskara mā ĩpanaka,

ikanax fanāikafo.

<sup>14</sup> Askatari nā cuatro Niospa onifafāfe yoiāfo iskafakakī: “ĭAichol Askapainōra,” fata, nā veinticuatro xanīfofo Nios nāmā feopakefofānafo. Afāferi Epa Nios yafi Jesús yoisharakani.

## 6

### *Nā siete taxtati*

<sup>1</sup> Nāskata ē namakē ōiai keskara ē anā ōia. Jesús oveja fake keskara nāato noko nāxoni nāato nā kirika āfe taxtati fisti fēpeaito ē ōia. Fēpeaino ē nika nā cuatro Nios onifaa fetsa fāsikōi mekaito nai tiri ikai keskara: “Niri ofe,” ikaito.

<sup>2</sup> Askaino kamayo oxo chaima nia ē ōia. Nā kamayo kamaki fētsa kati tsomax tsoano xanīfāfe maiti Niospa maimana. Nānoax kamayonō kaa fetsafo ĩkipai xanīfo ixiki. Tsoa pish-takai nētefatiroma.

<sup>3</sup> Askata Jesús anā kirika taxtati fetsa fēpea. Fēpeaino nā cuatro Niospa onifani fetsa ē nika iskaito: “Niri ofe,” ikaito.

<sup>4</sup> Nāskafaino kamayo fetsari ōshi nokotoshia. Nā kamayo kamaki tsoa fetsari ē ōia. Keno chainipa Niospa inā aya katanō maifo tii anoafo ato shināmatanō anā isharanōfoma noikaspā faatanākanax retenānōfo.

<sup>5</sup> Askatafata Jesús anā kirika taxtati fetsa fēpea. Fēpeaino nā cuatro Nios onifaa fetsa ē nika iskafakī yoiāito: “Niri ofe,” ikaito. Anori yoiaino kamayo fetsa fisokōi nokotoshiaito ē ōia. A kamaki tsoa aō kilo tanati tsomax. <sup>6</sup> Nā cuatro Niospa onifani anoax mekaito ē āfe meka nika iskaito: “Kori texe fayamanō, feronāfāke pena fisti yonoxō kori fixō trigo kilo fisti fikī kopifatiro. Askayamakī tres kilo xiki fitiro. Kori texefayamaxō afaa fetsa fitiroma. Nāskakē xini yafi nā uva

fimi ene chakanafayamafe. Akka mā texefayamax mā fonāiki omiskōixii,” ixō yoia.

<sup>7</sup> Askata Jesús anā kirika āfe taxtati fetsa fēpea. Fēpeaino ē nika na cuatro Nios onifani fetsa, “Niri ofe,” ikaito.

<sup>8</sup> Anori askafaino kamayo fetsa pāshikōi nokotoshiaito ē ōia. Nā kamayo kamaki fetsa tsoa ika āfe ane Ato Namamis. Nāato yorafo namatiro. “Ē yorafo namapaira,” faito, “Ēje. Mī ato namatiro,” Niospa faa. Askafaito nā ato namamisto yora fetsafoya ato retenāmai. Akka atiri ato fonī namai, atiri pae fetsa fetsatapafāfe ato namaxii, atiri yoinā pōfefāfe ato yokakani. Akka yora kayakōi ato namaxiai ē ōia tsōa ato tanātiroma.

<sup>9-10</sup> Nāskata Jesús āfe kirika taxtamea anā fēpea. Fēpeaino nā Niospa meka ato yoifofāsafaifono fetsafāfe ato retefinifono mā otoafō ē ōia. Epa Nios kīfiti mīsa ano nā Jesúsnoax nanifo āto fero mēshofo ichanākanax fāsikōi mekaito ē nika is kai mekaifono: “Nōko Ifo Nios, mī keyokōi tāpikōia. Mī afama mīshti fatiro. Mī shara famis. Mīkai afaa chakafayomisma. Mī chanīmakōi. Nā mia chanīmara faafāfema mai anoafāfe noko retemisfo. Nāskakē, ¿afetīa mī ato kopimē omiskōimakī?” ixō yoiaifāfe ē nika. <sup>11</sup> Nāskakē nōko Ifāfe yoia isfakī: “Manayokāfe. Fena fena kakīma. Fetsafori mato keskarafori eōxō yonomisfo ixikani. Nāfori eōxō nā yora chakafāfe ato retekani. Akka mā ato retekī mitoafono mā nakanax mato ano nokoxikani keyokōi. Nāskakē nā ato retemisfo ē ato kopixii ato omiskōimakī omiskōipakenakafo mēra ē ato potaxii afaramāi chakafamisfokē,” ixō nōko Ifo ato yoia. Ato yoita rapati oxosharakōi chainipa ato inā, nāfāfemāi taeyoi nikani-fono nā Epa Nios Ifofasharamisfo tii ato inā.

<sup>12</sup> Askata Jesús anā kirika āfe taxtati fetsa fēpeaito ē ōia. Fēpeaino fāsikōi mai naya naya ika. Xini anā pee iyamaino, rapati fisokōichi fepoa keskara ika, fakishkōi. Oxeri ōshikōi imi keskara ika. <sup>13</sup> Oa nefe kerexepato nokoki nefekī fana fimi yome mīshti niriatiro keskara. Nāskarifi ai fishifo nai mēranoax mai ano pakei fetsea. <sup>14</sup> Askatari nai katarameake kafākē ē anā ōiama. Māchifā fe mai toomāfā mai naya naya ikaino, anā ano ikama. <sup>15</sup> Nāskakē keyokōi mai anoafō ratekōiafo. Yorafāfe āto xanīfofori sorarofāfe āto xanīfofori ratekōiafo; afama mīshtiyāfori, yora mitsisipāfori, āto yonomatifori, fetsafori ifomaisfori keyokōi nāfo ratekōiafo. A tiiri mafa kini mēra ikiafo. A tiiri māchi keya ano ichoafō tokirinīfā nāmā oneafo. <sup>16-17</sup> Askata fiisikafo iskayanā: “¡Ooa! Epa Nios nai mēra ikato āfe Fake Jesús fe iskaratīa nokoki ōitifishkikōina. ¿Nō afeskatiromē omiskōiyamaxiki? Tsōakai Nios timamatiroma noko omiskōimayamanō. Nā māchi keya anoa tokirinīfā nokoki

pakepainō Niospa noko fichinōma nō omiskōinōma,” ixō nā nikakaspamisfāfe yoiāfo.

## 7

### *Niospa ciento cuarenta y cuatro mil afe yorafo kexexii*

<sup>1</sup> Nāskata ē anā ōia oa ēfe namapa ōia keskara nā ē mato yoinō. Niospa āfe ājiri cuatro afe nai mēra imisfo ē ōia. Fetsa xini oaikiri nia, fetsa xini kaikiri nia, fetsa xini oaima anori nia, fetsa xini kaima anori nia. Askano nefe nishpa-pakekafana. Nefe nishpapakekafanaino keyokōi maifo tii anoā nii peifo takka takka ikama. Fakafāri anā poo ikama.

<sup>2</sup> Nā cuatro Niospa ato yoiāito mai yafi fakafā chakafatirofo. Askata Epa Nios nipanakato āfe ājiri fetsa ē ōia xini oaikiri-noax oaito, nōko Epa Nios āfe marakka fati feaito, a afe yorafo aō marakka faxii keyokōichi tāpinōfo Niospa afe yorafokē. Nā Niospa ājiri okī nā cuatro Niospa ājiri fetsafori fāsikōi ato yoiā iskakakī: <sup>3</sup> “Manayokāfe, nā Nios Ifofamisfo ikisi āto femānāki āfe anefo keneyonō nāfāfe Nios yonoxomisfoki keyokōichi tāpinōfo. Nāskakē fena ato chakana fayamakāfe. Mai anoāfo fakafā anoāfori, ififo ato chakana fayamakāfe. Chipō ato axikakī,” ixō ato yoiā.

<sup>4</sup> Akka ē nika mā Niospa ājirinī mā ato marakka faano ciento cuarenta y cuatro mil judeofāfe femānāki. <sup>5-8</sup> Nōko xini Israel āfe fakefo feronāfakefos doce inifo. Ato iyoakōichi āfe ane Judá. Judá āfe pefeta Rubén. Rubén āfe pefeta Gad. Gad āfe pefeta Aser. Aser āfe pefeta Neftalí. Neftalí āfe pefeta Manasés. Manasés āfe pefeta Simeón. Simeón āfe pefeta Leví. Leví āfe pefeta Isacar. Isacar āfe pefeta Zabulón. Zabulón āfe pefeta José. José āfe pefeta ato chipō fakekōi Benjamín. Nā doce feronāfake fisti rasi paxkakanax mā kaiafono nā doce feronāfake anoā Niospa ato katonī. Fetsa anoā doce mil faxō ifita, fetsa anoari doce mil faxō ifini. Nāato askafakī fetsa doce mil faxō ato ifiketsani. Nāskakē mā afo yosikanax ciento cuarenta y cuatro mil inifo.

### *Yorafā rasikōichi rapati oxokōi safeafo*

<sup>9</sup> Askata Epa Nios fe āfe Fake Jesús nā oveja fake keskara nā tsafo ano yorafā rasi niafo tsōa ato tanatiroma. Nā maitio anoāfo fisti rasi anoāfo, xoko fetsafo, meka fetsayafo ikafo, rapati oxokōi chainipa safeafo ē ōia fisti rasichi epe pei tsofāfāfe. <sup>10</sup> Nāfāfe fāsikōi yoiāfo iskakakī:

Nōko Epa Nios feta āfe Fake Jesús noko ifimis nōko Ifo Jesús oveja fake keskara nokoŋnoax nani nōko chaka noko soaxoxikī nō afe nīpaxanō,

ixõ yoiäfo. <sup>11-12</sup> Nãskata nõko Ifo xanĩfãfe tsaoti ano tsaano ãfe ãjirifãfe foaketi fayakenäfo ikafo. Nãskakẽ nã veinticutro xanĩfofo fe nã Niospa onifanifo cuatrofo nõko Ifo tsaano tsaofafo ikafo. Nãskafono nã ãjirifo nã nõko Ifo tsaano ratokonõ mai chachipakefofãkanax feopakefofãnafo Nios yoisharakakĩ iskafakakĩ:

¡Aicho! Chanĩmakõi, meres fisti mĩ isharapakemis. Meres fisti nokori mĩ imasharatiro. Mĩ keyokõi tãpia. ¡Aicho! Nã nõ yopai keskara mĩ noko axomis. Keyokõichi sharakõi mia fapanakafo. Mĩ afama mĩshti fatiro. Mĩ nãskapakenaka. Nãskaroko anõkĩ,  
ixõ yoiäfo.

<sup>13</sup> Nãskata nãnoa xanĩfo fẽtsa ea yõka: “¿Na yorafo rapati oxo chainipa safeafo tsoamẽ? ¿Fakiax feafomẽ, mĩ tãpãmẽ?” ixõ ea yõka. <sup>14</sup> “Maa. Êkai tãpiana. Mĩ tãpia. Mĩ ea yoitiro,” ã feito ea yoiä iskafakĩ: “Yorafo omiskõiaifono na yorafori fãsi omiskõinifo. Akka omiskõiaifono Niospa ãfe Fãke Jesús ato nãxoni ãto chaka ato soaxoxiki. Ato chaka soaxõ mã ato imasharakõia. Nãskakẽ ato rapati oxo shara safemana. <sup>15</sup> Nãskakẽ Epa Nios ano iskaratĩa afe ikafo. Epa Niospa ato yonomana keskara axopakenakafo. Nãskakẽ ato kexefafãini afara chaka atoki nokoyamanõ. <sup>16-17</sup> Niospa ãfe Fake Jesús Epa Nios fe imis. Nãato ato kexepakenaka. Nãskakẽ anã fonãitama, anã nomipakenakafoma. Xinĩri anã ato pipanakama. Jesús ato kexearino inimapakenakafo. Epa Niospa ãto õiti ato fepeaxoxii anã oianõfoma,” ixõ ea yoiä.

## 8

### *Nã taxtati mã keyoaino Jesús fẽpea*

<sup>1</sup> Mã kirika ãfe taxtati keyoano Jesús fẽpeaito ã õia namakẽ õiai keskara. Nã seis taxtati taefakĩ fẽpeyoa. Akka iskaratĩari fetsari fẽpea mã keyoaino. Fẽpeano Nios ika ano nai mẽranoax keyokõi nishparakafo. Media hora nishparakayoäfo. <sup>2</sup> Nishparakaifono ã õia Niospa ãfe ãjirifo siete a ketaxamei niafãfe, nãfãfe Niospa ato yoimis keskara anõfo. Niospa ato tii maneti inã nã ato yoiãitã ãto maneti chã chãisafanõfo. <sup>3</sup> Askata Niospa ãjiri fẽtsa sapa oro fakka fakka ikai keskara tsomax Epa Nios kĩfiti ano nia ã õia. Akka fẽtsa sapa kamaki nakas otaxõ naneaito ã õia. Nãskaxõ Nios kĩfiti mĩsa ano oro kamaki sapa faa. <sup>4</sup> Askano ãfe kõi nakas shara nai mẽra foa ãfe mifi kamaki sapa tsomano. Nãskarifiai Niospa yorafãfe kĩfiaifono Epa Nios ika ari nokoaito nikatiro. <sup>5</sup> Akka ã anã õia Epa Niospa ãfe ãjiri yoiaino, mĩsa kamakinoa chii fixõ ãfe sapa kamaki chii fospi faa. Fospi fata nai mẽraxõ mai ano pota. Askaino mai anoax nai fãsikõi tiiri ika pachakõi ika,

kanari piishika mairi naya naya ika. Nāskakē nā chanīmara faafoma tii ato omiskōimaxii.

*Ājirifāfe maneti chāi chāisafafo*

<sup>6</sup> Askata Niospa āfe ājirifāfe siete nā manetifo Niospa ato tii inā itipinīsharafafo chāi chāisafaxikāki.

<sup>7</sup> Askata fētsa āfe maneti chāi chāisafaino faka matsi tokoro efapafo imia osia nai mēranoax keyopakea. Chiiri imiya osia nai mēranoax mai ano pakea. Māifā kaxke fetsa koofi keyoa ififoya. Akka ranāri texea. Akka fasifo kooi keyokōia.

<sup>8</sup> Askata Niospa ājiri fētsa āfe manetiri chāi chāisafaino machi efapa chii xoisai keskara Niospa nai mēraxō nāmā pota. Fakafā mēra pakea. Askaino fakafā kaxke fetsa imi keskara ika. <sup>9</sup> Nāskakē fakafā mēranoax fafīfo ranāri naafo. Askatari kanōanāfāfori ranāri kooafo.

<sup>10</sup> Askata Niospa ājiri fētsa atori āfe maneti chāi chāisafaino fishi efapakōi xofisai chii keskara nai mēranoax pakea fakafo mēra. Akka faka fetsafo mērari pakeama. Askatari faka poyo poyo ikai ano pakea. <sup>11</sup> Nā fishifā āfe ane Mokara famisfo. Nā fishi faka mēra pakeano, faka moka paekōi ika. Nāskakē nā faka ayakanax yorafo ranāri nai fetseafō.

<sup>12</sup> Askatari Niospa ājiri fētsa āfe manetiri chāi chāisafaino xinī anā chaxasharama. Ōxeri anā chaxasharama. Askatari fishifāferi anā ranārito chaxasharama. Nāskakē penafekē tsōa anā ōisharatiroma. Fakish finakōia ika. Tsōa askara fakish ōiyomisma.

<sup>13</sup> Ē nāfo ōiaino tetepafā keskara keya yoyaito ē nika. Fāsikōi mekayanā yoia iskafakī: “¡Ooa! Yorafāfe Nios nikakas-pakanax omiskōikani finakōixikani. Niospa ājiri tres fetsafāfe āto maneti chāi chāisafaifono mai ano ikafo omiskōifinaxikani,” ixō tetepafā keskarato yoia.

## 9

<sup>1</sup> Askatari Niospa ājiri fētsa āfe maneti chāi chāisafaino nai mēranoax oa fishi keskara nāmā pakeaito ē ōia. Nāskata nā niafaka chakafo kinifā fakishifā mēra ikafo ano kaa. Nā kinifā fepotiya. A mēranoaxkai kaitirofoma. Akka nā nai mēranoax nāmā pakea Niospa chavis inā aato kinifā fakishifā mēranoa ato kāimanō. <sup>2</sup> Fēpeaino mafa kinifā mēranoax kōinifā nai mēra foa. Nāskakē xinī chaxasharama. Nai fakishkōi ika. <sup>3</sup> Askata nā kōinifā mēranoax kōketsere keskara ichapa rasi mai ano fotoa. Niospa ato pōfekōi ima nifo keskara inōfo. <sup>4-5</sup> Ē nika iskaito: “Mai ano fasifo fanafo ififo chakana fayamakāfe. Akka nā Niospa yorafo femānāki keneafō, ato tekayamakāfe. Akka nā keneamafo mā ato tekatiro. Akka ato reteyamakāfe. Ato retetamaroko cinco oxe ato amakāfe ato omiskōimakī,” ixō ato yoia. Nāskakē kōketserefāfe ato

tekafo nã chanĩmara faafoma nifo keskara paekõĩ meafõ omiskõiafo. <sup>6</sup> Nãskakẽ kõketserefãfe cinco oxe ato omiskõimana nã chanĩmara faafomafo napaixikani, tenetirofoma mekani. Askafikanax nakanima.

<sup>7</sup> Iskaratĩa na kõketserefo afe keskaramãkĩ ẽ mato yoinõ mã tãpinõ. Kamayofõ itipinĩ faax a kamaki tsaõax katiro fetsafo reteikai. Nãskarifiã na kõketserefo nã kamayo keskarafo. Kamayo kamaki tsaõxõ fetsafo reteikai keskara ãta, xanĩfãfe ãfe oro maiti maia keskara ãta, ãto fẽso feronãfãke fẽso keskara ãta, <sup>8</sup> ãto foo kẽrofãfe foo keskara ãta, ãto piti poomãnã piti keskara ãta, <sup>9</sup> ãto xochi ano rapati kerexkõĩ keskara safemanano ato tsakapaiyaifõ a mẽra ikitiroma ãta, ãto petafo pei pei ikĩ kamayonõ karo keskara niniaino pachakõĩ ãta, fetsafo retenãifo keskara ãta, <sup>10</sup> keyokõĩ tsitsisyãfo. ãto tsitsisi yora chachitiro nifo pae keskara. ãto tsitsisi yorafo omiskõimatiro. Mã oxe cinco finõano anã ato omiskõimatirofõma. <sup>11</sup> Nã kinĩfã fakishifã mẽra niafaka chakafo ikafo anoa ãto xanĩfãfe ane israelifãfe mekapa Abadõn famisfo. Griego mekapari Apoliõn famisfo. Nõko mekapari, “Yorafo Retemis,” nõ famis.

<sup>12</sup> Akka taeyoi a omiskõiaifo mã finõfiano, akka nãno raferi a finakõia finõama.

<sup>13</sup> Askata Niospa ãjiri fẽtsa ãfe maneti chãĩ chãisafaino, Epa Nios kĩfiti oro mĩsa shara ano fakka mãxo cuatro nia ika. Nã mĩsa nakirafenoax mekaito ẽ nika iskafakĩ ãfe ãjirinĩ yoiaino ãfe maneti tsofaxõ nika. <sup>14</sup> “Nã cuatro niafaka chakafo menexemexõ nã faka efapa Eufrates anoxõ manaifo ato mẽpetãfe fotanõfo,” ixõ ãfe ãjirinĩ yoia.

<sup>15</sup> Nã tsekeafõ penata Niospa ato yoiaino ichapakõĩ ato retenõfo. Nãskakẽ nã niafaka chaka cuatro Niospa itipinĩfani mai kaxke fetsa ano ikafo ato retexinõfo. <sup>16</sup> Ẽ nika dos cientos millones sorarofo kamayo kamaki tsaõafãfe fetsafo retexikakĩ.

<sup>17</sup> Askata Epa Niospa oa namakẽ õia keskara ea õimana nã sorarofo yafi ãto kamayofõ ẽ õia iskara. ãto xochi ano oa chii ereai keskara kerexkõĩ ãto xochi ano safeafõ ikafo. Askatari nanakõiri ika, chaxtari ika a aõ xorakomeafõ. Akka a kamayofãfe ãto mapo poomã mapo keskarafo. ãto ãxfã mẽranoax kõi fe chii ereai keskara. <sup>18</sup> Chii fe kõi xofisakĩ ãto ãxfã mẽranoax kãifaikĩ ato retepakeafõ yorafo ichapakõĩ ranãri naafõ. <sup>19</sup> ãfe ãxfã feta ãfe tenẽri yorafo retetiro. ãfe tene rono pae keskara. ãfe tene mapoya ika. Nãõ yorafo omiskõimana nanõfo.

<sup>20</sup> Tsoa nayamafixõ ãto chaka xateafõma Epa Nios Ifofaxikakĩma. A niafaka chakafo ifofamisfo xateafõma. Nãskakẽ oro nimofõ fakãta, a kerexkõĩ fakkai fakkaisai nimofõ fakãta, keno ãfe ane bronze nimofõ fakãta, ifi nimofõ fakãta, tokiri nimofõ fakãta; nãfo askafaxõ, “Nãfo

nōko nios. Nō aō noi,” ixō yoimisfo. Afāfe ōiyamafiaifono, askatari mekayamafiaifono, askatari kafāsayamafiaifono, nāskakē afo kīfimisfo. Epa Niospa nā āto kaifo yafi yora fetsafo omiskōimafiaito ōifikanax āto chaka xateafoma Epa Nios Ifofapaikanima. <sup>21</sup> Ato retekakī xatemisfoma, askatari koshoiki xatemisfoma, askatari āto āfima chotamisfo, kērofāferi āto fenema chotamamisfo, yometsoriai xatemisfoma nāfo xateafoma. Tsōa āto chaka xateama. Nōko Ifo Jesús Ifofaxikakima. Nāfo chakakōifikaxō āto chaka xateafoma nōko Ifo Jesucristo Ifofasharaxikakima.

## 10

### *Epa Niospa āfe ājirinī kirika tsoma*

<sup>1</sup> Askata ē ōia Niospa āfe ājiri fetsa mitsisipakōi nai mēranoax fotoaito, nai kōiya. Āfe maiti nāfa fai keskara maia. Āfe femānā xinī chaxai keskara. Āfe kishi rafe chii keskara. <sup>2</sup> Kirika fepekemea tsomax nia ika. Āfe tae kayakai aōri fakafā femākīa paia. Akka āfe tae oshkiori mai ano paia ika. <sup>3</sup> Askata āfe meka poomā efapato meka keskara ē nika. Askatari ē nika naitiriki fetseaito. <sup>4</sup> Mē nikaxō nā yoiāfo keskara ē kenekerana. Akka nai mēranoax Nios ika anoa meka fetsa ē nika ea yoiāito iskafakī: “Nā mī nika keskara āto meka keneyamafe. Mī tsoa tāpimatiroma,” ixō ea yoiā.

<sup>5-7</sup> Askata nā Niospa āfe ājirinī takai fetsa fakafā aōri paita takai fetsari mai ano paixō anā yoiā. Epa Nios nā nipanakato nai onifaa. Askatari nai mēra ikafo onifaa. Askatari mai onifaa. Mai ano ikafori onifaa. Askatari fakafā onifaa. Fakafā mēra ikafori onifaa. Nā Nioskōichi āfe ājiri yoiā iskafakī: “Epa Niospa ea ōiaino chanīmakōi ē mato yoi. Epa Niospa anā manaima. Āfe ājiri fētsa āfe maneti manekī chāi chāisafaino Epa Niospa axiai keskara āfe meka yoimisfāfe yoiāifo keskara yorafāfe tāpinifoma. Iskaratīa a Nios yoimisfāfe yoinifo keskara mā askakōia,” ixō Niospa ājirinī ea yoiā.

<sup>8</sup> Askata anā nai mēranoax mekaito ē nika ea yoiā iskafakī: “Oa Niospa ājiri fakafāki paita mai ano paiax nia ano katāfe. Nā kirika kataramēa fēpexō tsoma fīatāfe,” ea faa.

<sup>9</sup> Askata ē Niospa ājiri ano kaxō ē yoiā iskafakī: “Nā kirika pishta ea ināfe,” ē faito, “Nakīa, fife. Ōixō tāpikōife. Mā tāpikōixō mī tāpitiro nā meka chanīmakōi. Niospa meka shara. Askatari mī tāpitiro na meka yoiāifo keskara yorafo omiskōikani. Mīri tāpixō mī fāsi shinātiro,” ea faa.

<sup>10</sup> Nāskaxō ē kirika pishta fita ē ōia. Ea yoiā keskara chanīmakōi mē tāpikōia. Nā Niospa meka sharafinakōia. Nāskakē nā inōpokoai yoiā keskara yorafo omiskōixikani. Nā ōiax ē shināmītsakōia. <sup>11</sup> Ē askano, anā ea yoiā: “Niospa



afe yorafo yoipaiyai keskara anã ato yoife. Afarafo ixiai yorafoõnoa yoife, manifetsafoõnoari yoife, xanĩfofoõnoari ato yoife,” ea faa.

## 11

*Nõko Ifo Jesús yorafo yoipaiyai anori feronãfake rafeta ato yoixikani*

<sup>1</sup> Askata na tanati metro keskara ea inãyanã ea yoia iskafakĩ: “Não Nios kĩfiti pexefã anoã ãfe chainipa yafi ãfe xãki tanatãfe. Anoxõ Nios kĩfiti mĩsari tanafe. Askatari a mẽranoax fanã ikanaifo ato tanasharafe afe tiito Epa Nios fanã ixokanimãkai, askatari afe tiixori kĩfikanimãkai ato tanasharafe. <sup>2</sup> Akka a ketokonõ mapoafõ a israelifoma ato tanayamafe; afãfe na Jerusalén anoafõ ato chakafakani oa fãkka nõ afara faanano fãkka peamanaino kãitiroma keskafakani ato. Cuarenta y dos oxe amaxõ ato askafaxikani. <sup>3</sup> Nãskakẽ nõ feronãfake rafe ãfe ato nĩchixii. Nã rafeta nõ ãfe ato yoipaiyai anori ato yoixikani. Un mil dos cientos sesenta pena ato yoixikani ãfe meka. A rafeta ãto rapati chapokõ safexõ ato õimaxikani. A ato chakafamisfãfe, ato õikakĩ a afara chakafamisfo shinãxikani,” ixõ ea yoia.

<sup>4</sup> Nãskakẽ Niospa afe yorafo yoipaiyai keskara nõ rafeta yoimisfo. A rafe oa ifi olivo keskara. ãfe xini fospia keskariai, a feronãfake rafe Niospa Yõshi Shara ato mẽra nanekõiafo. Askatari afia rafe oa rãpari õtai keskara. Mã fakishkẽ rãpari otakẽ nõ õisharakõitiro. Nãskarifikĩ nõ rafeta Niospa Yõshi Sharaõxõ ato tãpimaxikani Niospa meka. Mã isharakõikaxõ ãto Ifãfe meka ato fe yorafo yoixikani. <sup>5</sup> Na Niospa meka yoimis rafe fetsafãfe ato chakafapaiyaifono, ãto axfa mẽranoax chii kãitiro ato koofaxii nanõfo. Nãskakẽ nõ rafe tsõa ato chakafatiroma. <sup>6</sup> Epa Niospa ato yoiaino, nõ rafeta ãto mekapa oi nesefatirofo anã fena oi iyamanõ nõ ato yoiaifotĩa. Askatari faka yafi ãa ãto mekapa fetsafatirofo oa imi keskara inõ. Askatari afara afeskarafapaikakĩ ãto mekapas afara meseni fetseaifo fatirofo pae fetsa fetsatapafori fatirofo.

<sup>7</sup> A feronãfake rafeta mã ato yoikĩ senẽfaafono, a chakakõi mai kinĩfã mẽranoax Satanás shinãmanaino, tsekeinãkafã a feronãfake rafe retexii. <sup>8</sup> Mã reteafono, fãi nẽxpakĩa pakeax rakaxikani nõ Jesús mastanifo ano, a Jerusalén ano. Nã Jerusalén anoafãfe nõko Ifo Jesús ãfe meka shinãmisfoma. Nãskakẽ nõ aõnoa yoitiro iskafakĩ: “Na Sodoma ano ikafo feta Egipto ano ikafãferi, afaa shinãpaonifoma. Nãskakẽ chakakõi ipaonifo anoafõ. Nãskarokõi Jerusalén anoafori.” Nãskax nõ feronãfake rafe Jerusalén anoax nakanax ãto yora fai nẽxpakĩa rakaxii. <sup>9</sup> Nãskakẽ yora fetsafo a mai fetsa ari ikafãfe, xoko fetsafãferi, meka fetsayafãferi, a feronãfake rafe rakafãfe ato

ōixikani. Nāskafono āto xanīfofofāfe, “Ato fena maifayamakāfe,” ixō ato yoixikani ato noikaspakōikakī. Nāskakē tres nia ato ōixikani. <sup>10</sup> Askaito ōikani a mai ano ikafo atoki inimaxikani. Askakanax atoki inimakakī fista axikani. Aa ranā kaxpa afarafo inānōnāxikani. Yoikani iskaxikani: “Anā na rafeta noko fekaxtefakanima kiki,” ikanax inimasharakōikani. “Anā nōko chaka noko yoikanima,” ikanax yoināxikani.

<sup>11</sup> Askafiaifono mā tres nia oxata nayoafono anā chipo Niospa ato otofaxii a feronāfake rafe. Askaito ōikani a ato mǎnāo nikaxō ato ōiaifo, afo mesexikani, ratekōixikani, askaifāfe ato ōikani. <sup>12</sup> Askata nā feronāfake rafe otokāta nai mēranoax mekaito nikakani ato iskafaito: “Niri ekeki māpeferakāfe,” ato faito nikakani a rafe āto ferotaifi ronoinīfofākani nai kōi mēra māpefainifokani. Askaifāfe a ato noikaspaifāfe ato ōikani. <sup>13</sup> Askata samama atoya mai naya naya iki finakōia. Pexefā rasi fisti rasi potaito ē ōia. Askaino siete mil yorafo naafo. A naamafāferi ratekakī Nios yoiafo, “Nios mīfi afama mīshti fatirokī,” faafo.

<sup>14</sup> Mā afo askayoa anā chipo finakōixii.

### *Niospa ājiri fētsa āfe maneti chāi chāisa faa*

<sup>15</sup> Akka Niospa ājirinī chipokōitakī nā sietepa āfe maneti chāi chāisafaino, nai mēra Epa Nios ika ariax fāsikōi mekaifāfe ē nika iskai mekaifāfe:

Iskaratīa na nōko Ifo Cristo xanīfokōi iki nāmānoax nai mēra ika keskarari ixii nāatixō xanīfo īpanaka, ixō yoiafo. <sup>16-17</sup> Akka nā Jesús chanīmara faafo ato kexemisfo nā veinticuatro feronāfakefo tsaokanax a Nios nāmā feopakefofā nafo Nioski inimayanā iskafafo:

¡Aicho, mī fāsi sharakōiki! Mī afama mīshti famiski. Mī Yōshi Sharapa ato īkinā. Afama mīshti onifaaxma mī iyopaonixakī. Iskaratīari mī nia. <sup>18</sup> A mai fetsa anoafāfe mia noikaspamisfo mikiki ōitifishkikōikakī mefe ikaspakakī. Afama mīshti chakafamisfo. Askaifāfe ōikī, mīri ato kopikī ato omiskōimaxii atoki ōitifishkikōixō. Akka a mia Ifofamisfo mī ato ināsharakōixii afara sharakōifo. Akka a mia yonoxoyanā mī meka mēxotaima yoimisfo afo mī ato ināsharakōiketsaxii, a mia chanīmara famisfo tii; keyokōi afaamaisfo ita, a xanīfori a afama mīshti ichapayaforti mī ato ināsharakōixii a mia Ifofamisfo tii. Akka nā yorafo chakafamisfo, mī ato omiskōimaxii, a amēranoax, omiskōimisfo mēra mī ato potaxii, ixō yoiafo.

<sup>19</sup> Askata a Nios kīfiti pexefā nai mēranoax fepekemeaito ē ōia. Nānoa Niospa kafo ē ōia, nā kafo mēra a Niospa israelifo yoini kirika kenea nanea ika. Askatari ē ōia kana pee ikaito

nairi tiri ikaito ē nika, mīamāfanēri mai naya naya akaito ē ōia, nai mēranoaxri oi kaya ikaino, oi nami keyopakeaito ē ōia.

## 12

### *Kēro yafi kapetafā keskara nai mēranoa Juan ōini*

<sup>1</sup> Askata ē afianā ēfe namapa ōia keskara ē mato yoinō a ea Niospa ispaito ē ōiafo nā inōpokoai fo ōikī ē tāpinō a tsōa ōimismafo. Ē kēro ōia āfe rapati oa xini pee ikai keskara safea ika nai mēranoax. Oxe kamaki paiya keskara. Askatari āfe maiti ano fishi doce aō neafo. <sup>2</sup> Askata nā kēro mā chaima fake kākī, fāke pāefai. <sup>3</sup> Askainori fetsari ē ōia a tsōa ōiyomisma keskara nai mēranoax. Nā Satanás oa ronofā keskara efapanāfakōi ōshimāfa, askai mapo ichapayakōi si-ete mapoya, askai a āto xanīfokōichi maiti sharakōi keskara maiya siete faxō, askatari āfe māxofori diez ika. <sup>4</sup> Askata āfe tene fininīfofā nai mēshanānaino nai mēranoax fishi rasi pakea. (Naskarifakī Epa Niospa ājirifo Satanás atiri ato chakana fama ato īkipaikī, “Ea ifofakāfe,” ixō ato feparapaikī. Nāskakē a keskara niafaka chakafo ato īkinō Niospa nāmā potani nāmāxō ato īkinō.) Nāskakē mā kēro chaima fake kāiyaino, a ronofānē kexei āfe fake pīapaikī kāiyaito. <sup>5</sup> Askata a kēro fake kāi feronāfake mitsisipakōi. Nāskakē yorafo manifo tii, ato kexesharakōixii āto xanīfo finakōia ixii. Mēstekōi ato yoisharakōixii nikasharakōinōfo. Askafiaito a fake yome rama afa kāiyaito ronōfānē pipaiyaino Niospa ifirisafaa nai mēranoax afe xanīfokōi inō. <sup>6</sup> Askaito ōifaini afa ichoachāi tsōa istoma ano a Niospa afetiama itipinī faxoni ano Satanás afeskafanōma arixō Niospa kexenō cuarenta y dos oxe akaino Niospa kexesharanō.

<sup>7</sup> Askatari ē anā ōia Satanás āfe inafō fe nā ājiri Miguel āfe inafō nai mēranoax retenāpaiyaifono Satanás ato finōpaiyaino. Nāskaxō Satanás Niosri finōpaina. <sup>8-9</sup> Akka Satanás ato finōpaifikī ato finōnima. Nāskakē fanī itirokēma Niospa nāmā potani āfe inafōya. Taeyoi ājiri iyopaoni. Nāskaxō nāato keyokōi yorafo maifo tii anoafō ato pāramis anorima ato yoikī chaka shinānōfo, chaka nīpaxakakī.

<sup>10</sup> Askaito ē anā nika meka efapato mekai iskaito: “¡Aicho! Epa Niospa mā Satanás nirixō nāmā potaki, mēxotaima āakōi noko fanīrira pārarifaito. Nāskakē Epa Niospa Satanás finōinīfofana. Nāskakē Satanás anā nōko ifo ikima, anā fanīrira noko shināmanima, Epa Nios fisti nōko Ifokōi iki. Askatari āfe Fake Jesucristori nōko Ifokōiri iki. Nā rafe nōko Ifokōi. <sup>11</sup> Nāskakē Jesús Ifofaxō mēxotaima nō yoimis niri nai mēra oyoxoma nō yoiyopaoni nāmāxō iskafakī: ‘Nōko Ifo Jesús, Niospa Fakekōi, oa oveja fake keskaraxō noko nāxoni nōko

chaka noko soaxoxiki,' ixõ nõ yoimis mēxotaima. Askatari nõ Niospa meka ato yoimis. Nāskai nõ meseima, 'Noko retefiaifono, nõ inimasharai,' ixõ anori mēxotaima nõ yoimis. Askaxõ nõ Satanás finõinĩfofana. <sup>12</sup> Nāskakē mări nono nai mēranoax inimakāfe Niosnoax. Nā chanĩmara faafāfe Jesúsxõ mã Satanás finõkõiafo. Akka Satanás Niospa nāmā potani nai mēraxõ. Askafaino õitifishkiki nāmā fotoxõ yorafo chakafa-paikõi. ¡Ooa! Yorafo ono mai anoax fe fakafā mēranoaxri omiskõikani. Satanás mã tāpia afetiara Jesús mai ano fotoai tsõa anā afaa chakafanõma. Nāskara mã tāpiax Satanás õitifishkikõikĩ keyokõi maifo anoafõ ato chakafamapai omiskõinõfo Jesús fe ĩpaxanõfoma," ixõ nai mēranoax mekaito ě nika.

<sup>13</sup> Mã afo nikakĩ ě anā õia afia ě õiyoa keskara. Mã Niospa Satanás nāmā potano, Satanás shinākĩ iskafai: "Na kēro ě akiki nokoxõ omiskõimanikai," ixõ shināki Satanás chĩfafaina. <sup>14</sup> Nāskakē Niospa nā kēro tetepafā pei keskara inā aõ katanõ tsõa istoma ano. Nā afetiama Epa Niospa itipinĩ faxoni ano mã kaxõ anoxõ piinõ cuarenta y dos oxe akĩ, nā ni-afaka chakata ronõfā keskarato afeskafanõma. <sup>15</sup> A kēro ari ikano chakafapaikai Satanás ari kai. Mã kaxõ chaima nikaxõ āfe axfapa faka siiakĩ faka faipafānē iyotanõ āsapaikĩ. <sup>16</sup> Askafaito õikĩ Niospa mai kaxkexoni a mēra faka faipafā ikikaitanõ a kēro afeskafanõma. <sup>17</sup> Nāskaito õi Satanás a kēroki õitifishkikõina. Nāskax nā kēromā āfe fakefoki kaa ato retepai, nāfāfemāi Niospa meka nikakõisharaifono isharakõiyana Jesús Ifofasharakõiyana. <sup>18</sup> Askata ě anā õia Satanás fakafā kesemē nia.

## 13

### *Fakafā mēranoax yoinā keskara mesekõi kãinākafana*

<sup>1</sup> Askata ěfe namapa ě õia keskara afianā ě mato yoi. Ě õiaino fakafā mēranoax yoinā keskara mesekõi kãinākafanaite ě õia. Nā yoinā põfe keskaraõnoa ě mato yoinõ. Ea nikasharakāfe. Nā fistifiax mapo ichapaya, siete mapoya. Askatari āfe mãxo rasi diezya. A āfe mãxo rasi xanĩfāfe maiti maimakĩ fetsa. Nāskaxõ Epa Nios mekafakĩ chakakõi faa. Āfe femānāfoki ane fetsafo chakakõifo nēta. <sup>2</sup> Askai oa poomā keskara āfe yora. Askatari āfe tae oa osopa tae keskara. Askatari oa poomā axfa keskara. Nāskara Niospa ea õimana ě tāpinõ a feronāfāke Satanáõxõ tāpikifinakõia, oa xanĩfo finakõia keskara ixii nāmānoax. Satanás āfe yõshi ināno ato yoimis ixii, afama mĩshti fakĩ fetsaki ato õimaxii. <sup>3</sup> Āfe mapo fetsa ano mã mãpeafiafono anā otoax afianā nia. Nā mai tio anoxõ yora rasichi õikani askaito: "Kee, ¿afeskax otoamē mã nākõina nõ

ōia?” ixō yoikani. Nāskaito ōikī ifofaxikani. <sup>4</sup> Nāskakē ifofakaxō yoikani Satanás iskafakī: “Mī fāsi sharakōi. Mī afama mīshti famis,” fakaxō ifofakani. “Nāskaxō nā yora pōfekōi inō mī yōshi mī inā nōko xanīfokōi inō. Nāskaxō nō mia chai faima,” fakaxō yoikani. Askatari oa yoinā keskara akiki inimakakī fanāixokani iskafakakī: “Mia keskarakai tsoama. Mī fāsi sharakōi. Miakai tsōa chakafatiroma. Mī fistichi ato finōkōia,” fakaxō yoikani fanāikakī.

<sup>5</sup> Askatari anā Nios chakakōifakī yoia iskafakī: “Fato fet-sakai ea keskarama. Ē Nios finōkōia,” ikax, āa chanī Nios chakafakī finakōimis. Nāskafekē Niospa yoixii: “Cuarenta y dos oxe finōta mī anā afaa fatiroma xanīfokōixō afara fet-safo sharafakī.” <sup>6</sup> Nios noikaspakī mekafakī fetsaito ē nika iskafaito: “Fato Nioskai nai mēra ikama. Anā ano Niosma. Mā kaxpakōi mā Nios Ifofai,” ixō yoia. “A yora namisfāfekai fato Nios Ifofamisma,” ato fakī fetsai. <sup>7</sup> Askatari Satanás ifofakaxō ato afara shināmānaino yorafāfe a Jesús Ifofamisfo ato finōpaikī ato retepaikani āto xanīfo ipaikakī. Askatari maitio anoafo, xoko fetsafo, meka fetsafoya keyokōi āto xanīfo ikani a feronāfake xanīfo chakakōi a Satanás yōshi a mēra nanea. <sup>8</sup> Askafaxō yoisharaxikani akiki inimakakī: “Mī fāsi finakōia, mī nōko nioskōi,” ixō yoixikani akiki inimakakī. Askaifāfe tāpixō nōko Ifo Niospa atoki kirika keneama a Ifofaafāfema ōikī. Mai onifataima mā tāpixō Niospa āto anefo āfe kirikaki kenenī fatofāfe Jesús Ifofaimākai. Akka nā Jesús ovejanā fake keskara noko nāxoni noko īkipakexakī.

<sup>9</sup> Mā pachoyakī ea nikasharakāfe. <sup>10</sup> “Nā Satanás ifofaafāfe mato karaxa mēra ikimakaki mato ikimaxikani. Askatari mato kenopa retekakī mato retexikani.” Nāskakē efe yora mīshtichi, shināchakayamakāfe. Nā nō Jesús chanīmara faafo tii nō omiskōifikī, nō tenekōixii nōko Ifo Jesús shināmakitama.

<sup>11</sup> Askatari ē anā ōia oa namakē ōia keskara. Mai mēranoax kāinākafanaito ē ōia yoinā pōfe fetsa keskara. Āfe māxo tiixo pishta rafe oveja fakenā keskara. Askai fāsikōi mekai oa poomā keskara āfe meka mēxakōi chai potai. Askaito ē ōia. <sup>12</sup> Akka nā yoinā pōfe taeyoi fakafā mēranoax kāiyaito afama mīshti atiroxakī nāato yoiaino nā rama oatori afama mīshti atiro nā fētsa aka keskafakīri nāskaxō yorafo tii īkitiro. Keyokōi maifo tii anoafo ato yoia iskafakī: “A yoinā keskara mā mapoki rerafo mā nayofiax afianā mā otoa nā fisti ifofakāfe. ‘Na nōko ifora,’ fakāfe,” ixō ato yoia. <sup>13</sup> Afama mīshti tsōa atiroma keskara ato ispa yorafāfe chanīmara fanōfo. Nāskata yorafāfe āto ferotaifi nai mēranoa chii fotomana. <sup>14</sup> Satanáōxō nāskarīfakī yorafo pāra niosra fanōfo. Askafata ato yoia: “Nā yoinā pōfe keskara retēfiafono mā otoa nā nimofonōfā faxō inākāfe a keskara faxō,” ixō ato yoia. <sup>15</sup> Nānori ato yoiaino

mã nimofonõfã mãpeakano xãkaitiroma. Askafiano Satanáõxõ xãkaima mekanõ, askatari a siete mapoya mekayamaifo ato retenõ. <sup>16</sup> Askata anã ato yoia iskafakĩ: “Maitio ikafãfe ãto mẽke kayakai aõri kenenofo askayamakĩ ãto femãnãki kenenofo.” Nã yoinã põfe keskara fakafã mẽranoax kãiato ãfe ane keneyamakĩ ãfe número ato kenemana. Keyokõi ato kenemana. Fakefo kenemata, xinifori kenemata, afama mĩshtifoyari kenemata, afaamaisfori kenemata, inafomari kenemata, inafori kenemana. Tsoa pishta finõmanama. Keyokõi nã yoinã põfe keskarato ãfe ane atoki kenemana. <sup>17</sup> Tsõa nã ane keneyamaxõ afaa fitiroma. Askatari afaa inãmitsatiroma a piaifori tsõa fitiroma, a rapati yopaifori tsõa fitirofoma.

<sup>18</sup> Nãskakẽ Niosxõ shinãsharatirofo nã yoinã põfe keskara ãfe número tãpitirofo. ãfe número tãpixõ ãfe aneri tãpitirofo. Nã yoinã põfe keskarafix feronãfakekõi, ãfe número seiscientos sesenta y seis.

## 14

*Jesús chanĩmara faafo ciento cuarenta y cuatro mil akiki fanãikani*

<sup>1</sup> Askata ãfe namapa ã õia keskara afianã ã mato yoinõ. Nã Jesús ovejanã fake keskara mãchifã ãfe ane Siõn ano nia ã õia. Askatari ciento cuarenta y cuatro mil afe yorafo afe niafo ika. ãfe ane Jesús yafi Epa Nios ãto ane femãnãki kenea ã õia. <sup>2</sup> Nãskatari nai mẽranoa meka efapakõi ã nika. Faka põoitifã keskara ã nika, nai tiri ikai keskarari pachakõi ã nika. Meka efapari ã nika yora ichapa fanãikanaifono ãto manetiya ichapa rasi fanãikanaifãfe ã nika. Nã manetinĩ ãfe ane arpa. <sup>3</sup> Fana fena tsõa nikayomisma Epa Nios ferotaifi fanãixõafo. Nãnoxori nã cuatro Niospa onifanifãfe nikakani. Askatari nã veinticuatrofãfe nikakani. Nã ciento cuarenta y cuatro mil nono mai anoa Jesús ato ifini, nãfãfe na fana fena tãpitirofo. Tsoa fẽtsakai tãpitirofoma. <sup>4</sup> Nã ciento cuarenta y cuatro mil yorafãfe nõko Ifo Jesús Ifokõi famisfo. Afara chaka shinãtamaroko Jesúsnoa shinãfafãikani. Aato ato ifimis ato nãxonixakĩ Epa Nios yafi ãfe Fake Jesús Ifokõi fakanax ãfe yora inõfo. Ato iyopaiyai ari afe fomisfo. Ato katoa afe yorakaxõ ato yoiai keskara anõfo. <sup>5</sup> “Nãfãfe chanĩkĩ yoimisra,” ixõkai tsõa atoõnoa yoitiroma. Jesúsnoax isharamisfo. Aõxõ afaa chakafamisfoma.

*Niospa ãfe ãjiri trespa yoiafo*

<sup>6</sup> Askata ã õia Niospa ãjiri fẽtsa nai mẽra ika fãsi keyakõi yoyakĩ keyokõi yorafo maifo tii anofo ato meka shara yoia. Yorafo keyokõi yoita, xoko fetsafo tii yoita, nã meka fetsa fetsatapafãfe meka yoimisfori yoita, nã mani fetsafo tiiri ato

meka shara yoia. Epa Nios nipanakaõnoa ato yoia. <sup>7</sup> Mekakĩ fāsikõĩ ato yoia iskafakĩ: “Nios shinākāfe. Nikakõikāfe. A noikõikāfe. ‘Mĩ sharakõĩ, mĩ afama mĩshti mĩ atirora,’ fakāfe. Iskaratĩa Niospa nã keyokõĩ chakafamisfo ato omiskõĩmani. Nãato nai onifani, mairi onifani, fakafāri onifani, faka sharari onifani. Nãskakē a noikāfe: ‘Mĩ nõko Ifo Nios sharakõĩ,’ fakāfe,” ato faa.

<sup>8</sup> Askata Niospa ājiri fētsa mã mekai keyoano fetsari nokotoshixõ iskafakĩ yoia: “Babilonia ano pexe rasi iyopaoni. Iskaratĩa anã ano tsoa ikama. Nãnoxõ yorafāfe afara chaka shināpaonifo. Fetsafori afara chaka ato famapaonifo ato keskara inõfo. Askaifāfe Epa Niospa ato omiskõĩmani anã ano inõfoma. Nãskakē Babilonia anã anoma,” ixõ Niospa ājirinĩ nai mēra ikato yoia.

<sup>9-11</sup> Askata afianã Niospa ājiri fetsari nai mēranoax nokotoshixõ meka fāsikõĩ yoia iskafakĩ: “Fētsa nã yoinã pōfe keskara yafi āfe nimofu keskara nikakõikĩ yoimis iskafakĩ: ‘Nã ēfe nioskõĩ,’ ixõ anori yoikĩ āto mēkeki kenenifo, askayamakĩ āto femānāki na yoinã pōfe keskarato āfe ane keneafāfe Epa Nios atoki õitifishkikõixii. Nãfo Niospa ato fāsi kerexkai omiskõĩmaxii. Chiĩ mēra ato potafianokai keyonakafoma. Jesús āfe ājirifo sharakõĩfo feta õiaino a omiskõĩpakenakafo mēra Niospa ato potaxii chakamāi famisfono, Nios nikakaspakakĩ. Pae meekakĩ xatenakafoma. Tsõa ato ifitiroma, nã yoinã pōfe keskarato āfe ane āto mēkeki keneafono, askayamakĩ ato femānāki keneafono. Nãskakē pena tii ita, fakishchāi ita, omiskõixikani tenepakenakafoma,” ixõ Epa Niospa āfe ājirinĩ yoia.

<sup>12</sup> Nãskakē efe yora mĩshtichi, mãto õiti inimamasharakāfe. Omiskõĩfikĩ tenekāfe. Niospa noko yoini keskara akāfe. Nõko Ifo Jesús kachikiri fayamakāfe.

<sup>13</sup> Askata ē meka nika nai mēraxõ ea yoiaito: “Ē mia yoiāi keskara kenefe. Fatorafu nõko Ifo Jesúsnoax nai, inimakõixikani,” ixõ ea yoia. “Chanĩmakõĩ. Mã nakanax anã omiskõĩtirofoma. Epa Niospa ato ama keskara akõikanax, nãskakē inimakõixikani. Nãfāfe fetsafo shara faxomisfono Nios atoki inimasharaxii. Akka Epaki nokoafono ato ināsharaxii,” ixõ Niospa Yõshi Sharapa yoia.

*Nã chakafamisfoki Nios õitifishkikõikĩ maifo tii anoafu ato ichanāfai ato omiskõĩmaxii*

<sup>14</sup> Akka ēfe namapa õia keskara afianã ē mato yoinõ. Ē afara fetsa õia nai kõi oxokõĩ kamaki feronāfake tsaokē ē õia. Ē õikĩ iskafaa: Xanifāfe maiti orokõĩ maiya, askatari keno extea ikikõĩ tsoma ika. <sup>15</sup> Akka āfe ājiri fetsa Nios kĩfiti pexefā anoax kaxõ fāsikõĩ yoia iskafakĩ: “Nã maifo tii ano mã fanafu õshia.

Nāskakē iskaratīa mā fanafo chetekani. Akka mī keno exteato taxtexō ichafafe,” faa. Nānori yoifiki fanakōifoōnoa yoiama. Niospa yorafoōnoa yoia iskafakī: “Iskaratīa keyokōi Jesús chanīmara faafo tii ifife Epa Nios fe ika anoax ichanākanax afe ĩpaxanōfo,” ixō yoia.

<sup>16</sup> Askata nā nai kōi kamaki tsaoto afe kenopa fanafo taxtea keskafakī afe sharaōxō a chanīmara faafo tii ifia afe ĩpaxanōfo.

<sup>17</sup> Askata ē ōia nai mēranoa ājiri fetsari Nios kīfiti pexefā anoax kaito, aatori keno extea ikiai tsomax. <sup>18</sup> Afianā ājiri fetsari Nios kīfiti mīsa anoax kaa. Nāato Niospa maifo tii anoax koatiro. Nāatori keno extea ikiai tsomax fāsikōi mekeyanā yoia: “Nā uva fimi mā pachiaki. Mextexō ichafafe,” ixō yoia. Nāskarifikī Epa Niospa afe ājiriōxō a nikakaspamisfo ichanāfaxii. <sup>19</sup> Nāskata nā Niospa ājirinī afe keno extea ikiai tsomaxō uva xatexō afe tsinīti mēra nanea afe ene fonō. Nāskarifikī Niospa ājirifāfe nā Niospa meka nikakaspamisfo ato ichanāfai. Akka Nios atoki ōitifishkikōixō ato omiskōimani. <sup>20</sup> Nios ika anoxō ato omiskōimanama. Iskafakī ēfe namapa ē ōiai keskara ea ōimana. Fetsafāfe ato retexikani āto imi ichapa foxii. Askara tsōa ōiyomisma. Āto imifo kamayofa tesanākōixii. Āto imi chaikōi trescientos kilometros foxii. Ato imi noakōi un metro ixii, nakirafekōi. Nāskarifikī nā Epa Nios nikakaspamisfo omiskōixikani ato omiskōimanaitīa.

## 15

*Epa Nios afe ājiri siete afianā ato yoia mai anoafō ato omiskōimanō*

<sup>1</sup> Askata anā ēfe namapa ē ōia keskara ē mato yoinō. Afara fetsa tsōa ōiyomisma nai mēranoa ē ōia. Ē ratekōia. Akka Nios nā yora nikayospafoki ōitifishkiki. Nāskakē afe ājiri siete ato yoia keyokōi mai anoafō ato omiskōimanōfo. Mā askafafono Epa Niospari ato omiskōimani. Akka anā tsoaki ōitifishkixō, Niospa ato omiskōimatiroma.

<sup>2</sup> Askata ē ōia fakafā feroikima raka chiiya osia keskara. Nāno yorafā rasi niafo ika. Nā yorafāfekai yoinā pōfe keskara ifofaafoma; afe nimofori ifofaafoma; afe numerori āto yoraki keneafoma. Nāfāfe ato finōkōiafo. Nā fakafā feroikima raka chiiya osia keskara a kesemē maniafo. Epa Nios ato tii maneti ināpakea. Nā maneti afe ane arpa. <sup>3</sup> Taeyoi Nios yonoxomiskōi Moisés ipaoni. Nā Moisés afe rāfifō finōkōiax fanāini keskara nāskarifikai āto arpa tsomakaxō Jesús shinākakī fanāikani a Moisés fanāini keskara iskafakakī:

Ifo, mīfi Nioski. Mī afama mīshti atiro. Mī amis keskara sharakōi. Tsoa fētsakai atiro. Mī mai fetsa anoafori keyokōiōnoax mī āto xanīfokōi ipanaka. Mī shināmis keskara mēstekōi ikōina. <sup>4</sup> Ifo, keyokōi mikiki mesekakī



mia nikasharapainōfo. Mī afama mīshti tsōa ōiyomisma mī atiro. Keyokōi maitio anoafāfe anori yoipakexanōfo. Mī fistichikai afaa chakafamisma. Mī shara fisti famis. Afetiara mī ato apaiyaitīa mī ato omiskōimaxii a chakafamisfo. Chanīmakōi mī ato askafaxii. Keyokōichi mā fēkaxō mia shinākani inimayanā fanāikani, ixō yoiaifāfe ē nika.

<sup>5</sup> Askata afianā ē ōia nai mēranoa Nios ika anoa. Ea fēpexona Nios ika ano ē ōinō. <sup>6</sup> Nios ika mēranoax āfe ājiri siete ichanāfo. Rapati oxokōi chainipa choshtama fafeai safeafo, oro ōshi keskarato xonexemeafo. Nāfāfe mai anoafo ato omiskōimakani omiskōinōfo. <sup>7</sup> Nāskakē nā cuatro Niospa onifaa fētsa Niospa āfe ājiri sietefo ato oro kecho ināakea. Nios nā nipanakato nā Ifofaafoma mai anoafoki ōitifishkikōikī nā kechofo mēra afara chakafo fospi faa nāskaxō chipo atoki ājirifāfe nachiakeafono omiskōinofo. <sup>8</sup> Nios ika mēra kōinīfā nashfiai keskara. Niospa āfe kerex shara a mēra fospia. Nāskatari a mēraxō chaxasharai. Akka mai anoxō nā Nios nikakaspamisfo Niospa ājirifāfe ato omiskōimakani omiskōinōfo. Nāskakē a ato omiskōimanai xateamano tsoa Nios ika ano ikitirofoma.

## 16

### *Nikayospafo Niospa ato omiskōimani omiskōinōfo*

<sup>1</sup> Askata Nios ika ariax fāsi mekaito ē nika. Niospa ājirifo siete ato yoia iskafakī: “Niospa a nikakaspamisfo mai ano ikafo atoki ōitifishkikī nā kechofo mēra afara chakafo fospi faa atoki nachitakāfe,” ixō ato yoia.

<sup>2</sup> Nikakaxō Niospa ājiri fētsa taefakī āfe kecho mēranoa nai mēraxō mai ano nachia. Nāskatari nā yoinā pōfe keskarato āfe ane āto mēkeki keneyamākī āto femānāki keneafō, āfe nimofō keskarari ifofaafō nāfo kooyoi fetsekaxō paekōi meexikani.

<sup>3</sup> Askata afianā Niospa ājiri fētsa āfe kecho mēranoa nai mēraxō fakafānaki nachia. Mā nachiano fakafā ōsinātana nā yora reteafono āfe imi foa keskara. Nāskakē keyokōi nā fakafā mēranoax nai fetseafō.

<sup>4</sup> Askata afianā Niospa ājiri fētsa āfe kecho mēranoa nai mēraxō fakafoki nachia, askatari mai mēranoax faka tsekeafokiri nachia. Nachiaino fakafo fe mai mēranoax faka tsekeafō fe imi keskara osiafo. <sup>5-6</sup> Askatari Niospa āfe ājiri fetsa mekaito ē nika. Nā faka kexemisto iskafakī yoia: “Epa Niosi, mī tsoa onifataima mī iyopaoni. Nāskakē nā mī iyopaoni keskarari iskaratīari mī nīpanaka. Mī shara fisti amis. Aicho, iskaratīa nā mia nikakaspamisfo mī ato omiskōimani chanīmakōi. Āto chaka xatekaxō mī Fake Jesús Ifokōi fanōfo, mī meka ato yoimisfori nā Jesús Ifofaafāfema ato reteafō.

Nāskakē nā mia Ifofaaafoma mī kopikiri ato namai chanīma. Mefe yorafo omiskōimamisfo. Nāskakē ato kopikiri nā mia Ifofaaafoma mī ato omiskōimani omiskōinōfo. Chanīmakōi ato omiskōimani,” ixō Niospa ājirinī yoia.

<sup>7</sup> Askatari Nios nai mēra ika anoa nā kīfiti ano fistixō Epa Nios kīfimisfo anoa ē fetsa nika yoikī iskafaito: “Nōko Ifo Nios, mī ājirinī yoia keskara chanīmakōi. A mia nikakaspamisfo mī ato omiskōimatiro. Chanīma, mī mēstekōi ixō mī ato omiskōimani,” ixō yoia.

<sup>8</sup> Askata Niospa ājiri fētsa Nios ika arixō āfe kecho mēranoa afara chaka xiniki nachia. Akiki nachiano xini chii keskara ikano yorafo koofafo. <sup>9</sup> Xini xanakōiaino yorafo koofafo. Kookani omiskōiafo. Mā tāpiyomisfo Niospa ato omiskōimafiaino āto chaka xateafoma. Nios Ifofatamaroko. Iskafakī yoimisfo: “Niospa noko chakafai. Nios chakakōi,” ixō yoiafo. “Nios shara. Afama mīshti fatiro,” ixōkai tsōa anori yoipaikanima.

<sup>10</sup> Askatari Niospa āfe ājiri fētsa Nios ika arixō āfe kecho mēranoa nā yoinā pōfe keskara chakakōikī afe ikafokiri atoki nachia. Nachiano nā yoinā pōfe keskara ifofafo ika ano fakishkōi ika. Nāskakē keyokōichi paekōi meafō, aripe iyanā. <sup>11</sup> Nāskai omiskōifikakī āto chaka xateafoma. “Niospa noko iskafai. Nios chakakōi,” ikaxō āto chaka xateafoma.

<sup>12</sup> Askatari anā Niospa ājiri fētsari nai mēraxō āfe kecho mēranoa faka efapa āfe ane Eufrates kamaki nachia. Mā nachiano nā Eufrates netsorisatana. Nāskakē xanīfofo xini oaikirinoax fekani, mā Eufrates netsokōiano, āto sorarofō feta pokeferakani.

<sup>13</sup> Askatari ē niafaka chakakōifo tres fexko keskara ē ōia. Fetsa ronōfā keskara nā Satanás āfe āxfa mēranoax kāikaina, fetsari nā yoinā pōfe keskarato āfe āxfa mēranoax kāikaina, fetsari: “Ē Niospa meka ē mato yoimisra,” iki, a chanīmisto āfe āxfa mēranoax kāikaina. <sup>14</sup> Nā tres niafaka chakafāfe tsōa afaa ōiyomisma keskara afama mīshti yorafo ispafo. Keyokōi xanīfofo a ano fokani ato ichanāfanō nōko Ifo Jesús afe yorafo retenōfo. Nāskatari nōko Niospa afama mīshti famisto afe yorafo ispaxii.

<sup>15</sup> Askatari nōko Ifo Jesús ato yoiaito ē nika iskafakī ato yoia: “Ea nikakāfe. Yometso tsōa yoiyamano koshikōi pexe mēra ikirisatiro afara onexikī. Nāskarifikakī ē tsoa tāpimanima nā ē matoki nokoaitīa. Ē matoki samamashta nokorisai. Mā itipinīsharakaxō ea manasharakanax inimasharaxikani. Akka tsoa itipinīsharayamano ē matoki nokoaitīa keyokōi yorafāfe ea ōikani afāfekai ea Ifofasharama. Nāskakē rāfikōitirofo,” ixō yoia.

<sup>16</sup> Nānori nōko Ifo Jesús yoifiano nā tres niafaka chakafāfe keyokōi xanīfofo maifo tii anoafō ichanāfaa Niospa yorafo

retepaikī. Ato ichanāfai nā mai āfe ane israelifāfe mekapa Armagedón famisfo anoxō.

<sup>17</sup> Askata Niospa ājiri fētsa anā nai mēraxō āfe kecho mēranoa nachia. Mā nachiano Epa Nios meka fāsikōi is kai: “Mē keyokōi aka,” ixō yoiaito ē nika.

<sup>18</sup> Askatari fāsikōi kana piishikai ita, afarafo pachakōifo ita, nai tiri iki ikai ita, mai naya naya ita, askarafokai tsōa ōiyomisma. Nā feronāfake onifakī taefanitīa tsōa mai naya naya iki finakōiaito askara tsōa ōiyomisma. <sup>19</sup> Akka nā Babilonia anoax mai naya naya ikaino mai tres kaxketani. Maifo tii anoari āto pexe rasi nā mai naya naya ikaino maokomea. Nā Babilonia anoafō anā Niospa shināni afara chakafamisfono. Nāskakē atoki ōitifishkikōikī ato omiskōimani omiskōinōfo. <sup>20</sup> Nāskatari nā mai toomāfā anoafō yamarisatana. Keyokōi māchifāfori yamarisatana. <sup>21</sup> Nāskatari oi nami matsi tokorofo efapakōi āfe efe cincuenta kilo nai mēranoax yorafoki pakea. Askafiaito ōikakī āto chaka xateafoma. “Nios chakakōi. Na oi nami efapakōi nokoki potai,” ixō yoiaifāfe ē nika.

## 17

### *Mai fetsa anoafō kēro feroma keskarafō*

<sup>1</sup> Askata anā ēfe namapa ē ōia. Afara afeskara ixiai keskara anā ea ōimana. Nā Niospa ājiri sietepa kecho tsomafo ikafo akka fistichi ea yoia: “Niri ofe. Na pexe ichapa rasi fakafāfo chaimashta anoafō chakakōifo. Kēro feromakōi keskarafō Nios nikakaspakani. <sup>2</sup> Akka keyokōi xanīfofo maifo tii anoafō ato fe chaka imisfo. Nāskakē atoŋnoax afori chakakōifo ikafo. Nā kēro feromakōi keskara ikafo chakafakani. Akka nā Niospa ato omiskōimaxiai keskara ē mia ōimanō,” ixō ea yoia.

<sup>3</sup> Ea askafaino ē anā namakē ōia keskara ē ōia. Epa Niospa Yōshi Sharaōxō ājirinī ea iyoa tsōa istoma ano ea iyoa. Nānoa kēro ē ōia yoinā pōfe ōshikōi kamaki tsaokē. Nā yoinā pōfekōi āfe yora tiixō ane ichapato kenea ika. Keyokōi nā anefo kenekī Nios mekafakī chakafaa. Nā yoinā pōfe āfe mapo sieteya. Āfe māxo diezya. <sup>4</sup> Nā kēromā sama chainipa yafi nana ōshi safea ika. Oro fakka fakka ikai keskara safea. Askatari makex keskara fakka fakka ikai sharashta yafi fetsa āfe ane perla oxoshara, nāri safea ika. Nā kēromā kecho oro tsoma a mēra afara chakakōi naneato, a mēra nanea keskara yorafo afara chakakōi fetsa fetsatapafo chakafama. Āto mēra nanexō ato afara chaka shināmana. Ato pāemata, chanīmis ato imata, āto āfima chotamisfo ato imata, āto fenema chotamamisfo ato imata, nāskara chakakōifos ato imamis. <sup>5</sup> Āfe femānāki kenea keskara tsōa tāpimisma. Iskara kenea: “Babilonia anoafō tosa keskarafoma. Nā kēro feromakōichi Nios nikakaspai

keskarafo. Nāskakē fetsa fetsatapafo chakafakī finakōimisfo,” ixō kenea. <sup>6</sup> Nā kēro feroma keskarato Jesús chanīmara faifo ichapakōi ato retea inimayanā. Nāskaito ōikī tāpia. “Choo, na kēromātsi ato retemiski,” ixō ē shinā. <sup>7</sup> Ē askaito Niospa ājirinī ea iskafaa: “¿Afeskai mī ratemetsamaimē? Ē mia yoinō, ea nikapo. Na kēro yafi nā yoinā keskaraōnoa ē mia yoinō. Na yoinā pōfe keskara siete mapoya askatari diez māxoya tsōakai askara tāpiyomisma. Akka iskaratīa ē mia tāpimani. <sup>8</sup> Nā yoinā pōfe mī ōiai yoinākōima. Nāfi xanīfo efapa chakakōi. Nāato Nios nikakaspamis. Taeyoi niyopaoni. Anā iskaratīa niama. Askafīax chipo nā niafaka chakafo kinīfā mēra ika anoax kaixii. Nānoax kāifekē Epa Niospa a omiskōipakenakafo mēra potaxii anā anoax faki kanakama. Akka nā taefakī mai onifakī taefanitīa yorafāfe āto anefo Niospa āfe kirika kenenī, nāfo afe ipanakafoma. Akka a āfe kirikaki āto anefo keneama, afo Nios fe ipanakafoma. Nāfāfe yoixikani iskafakakī: ‘¡Kee, ōikapo! Mā nafianixakī afianā mā otoa,’ ixō yoixikani.

<sup>9</sup> “Akka fētsa Niosxō mēstekōi shinākī nāato nā ē rama kenea keskara tāpitiro. Nā yoinā pōfeōnoa ē mato yoinō, ea nikasharakāfe. Āfe mapo siete mapokōima. Nā siete mapoxō xanīfoōnoa noko tāpimai. Nā ikafo siete māchifā. Nānori nā kēro feroma ika. <sup>10</sup> Cinco xanīfofo anā anoma. Mā nanifo. Fisti iskaratīa nia. Fetsari chipo ixii xanīfoi. A chipokōi xanīfoixai xanīfoi chaima. <sup>11</sup> Nā yoinā pōfe keskara ōshi ē mia yoia, ari yoinākōima, xanīfo chaka fetsa. Nā xanīfo siete ipaonifo keskara nāri chakakōi. A iyopaonikai iskaratīa anā xanīfoma. Nāskakē nāri fetsafo fe omiskōipakenakafo mēra kai anoax anā kāinakafoma.

<sup>12</sup> “Askatari nā māxo diez mī ōiai māxokōima. Nāōxō diez xanīfofo noko tāpimani. Nāfo xanīfofo iyoafoma. Chipo mani fetsafo anoax nā diez āto xanīfofo itirofo. Na yoinā pōfe keskara fe xanīfo ixikani. Askafīkanax xanīfoi chai samaraka kanima. <sup>13</sup> Nāskakē nā diez xanīfofofāfe shināmisfo: ‘Na yoinā pōfe keskara nōko xanīfo iki kiki,’ ixō shinākani. Nāskakē, ‘Mī noko yoiai keskara nō atiro,’ ixō nā diez xanīfofofāfe nā feronāfake yoinā pōfe keskara yoikani. <sup>14</sup> Nāskaxō nā feronāfake yoinā pōfe keskarato nōko Ifo Jesús afe yorafoya noikaspai, xanīfofo fetsafāferi ato noikaspaxikani. Nā yoinā pōfe keskarato nā diez xanīfofo feta Jesús yafi afe yorafo retepaikani. Retemapafiaifono Jesús ato kanāxii. Niospa ato katoa afe yorafo kena a Ifofamisfo. Nāfāfe afara afeskarafi-aito nōko Ifo kachikiri famisfoma. Nōko Ifo Jesús xanīfo fetsafori ato ĭkitiro. Nōko Ifo finakōixō keyokōi ato ĭkitiro. Akka tsōakai nōko Ifo Jesús finōtiro,” ixō nā Niospa ājirinī ea yoia.

<sup>15</sup> Askano afianā ea yoia iskafakī: “Na mī ōiai nā kēro fero- makōi keskara, fakafā femākīa tsoa nā fakafākai fakafākōima,

askatari yorafo mai fetsa anoafō, meka fetsayafō. <sup>16</sup> Nā diez xanīfofo feta nā xanīfo yoinā pōfe keskarato nā kēro feroma keskarakaxō noikaspakōixikani. Keyokōichi āfe afara fīaxikani anā aya inōma. Nāskakē anā tsoa nā kēro feroma keskara fe ipaikanima. Poomānā retexō koshi pikī keyotiro. Nāskafakīri nā diez xanīfofo feta nā xanīfo yoinā pōfe keskarato nā kēro feromakōi keskara chakafaxikani omiskōimayanā. Askafaxō chīi koofaxikani anā ninōma. <sup>17</sup> ‘Mī noko yoiai keskara nō atiro,’ ixō nā diez xanīfofofāfe xanīfo yoinā pōfe keskara yoikani. Akka Niospa anori ato shināmana a apaiyai keskara fanōfo. Askata taeyoi Niospa yoiyoni nā inōpokoai keskara nāskarākōi ixii. <sup>18</sup> Na kēro feromakōi keskara mā ōiai kērokōima, akka nā pexefā rasi Babilonia keskara. Babilonia anoa yorafo chakakōifo. Nāfāfe manifo tii anoa ato ikināno ato chakafakani ato keskara ikaxō,” ixō Niospa ājirinī ea yoia.

## 18

*Ājiri fētsa yoia iskafakī: “Iskaratīa Babilonia pexe rasi mā keyoa,” ixō yoia*

<sup>1</sup> Askata anā ājiri fetsa nai mēranoax mai ano fotoaito ē ōia. Epa Niospa yoia nā xanīfo fētsari afama mīshti atiro. Nāato chaxaito maifo tii anoxō ōikani. <sup>2</sup> Fāsikōi yoia iskafakī:

Pexefā rasi Babilonia anoafō mā keyoa, anā anoma. Iskaratīa anā ano tsoa ikama, askatamaroko niafaka yōshi chakakōifo ano ika, askatari peya yōshi chakakōifori ano ika. <sup>3</sup> Nā kēro chakapa yorafo ato māmā pae ayamatiro keskafakī, nāskarifiakī nā Babilonia anoafāfe yora fetsafo mai fetsa anoafō ato afara chakafamafo ato keskara inōfo. Āto xanīfofori ato askafamafo. Askatari afara sharafos fichipaimisfo. Nāskakē a afama mīshtifo ato minimisfo, afara ichapayakōifo, ixō yoiaito ē nika. Niospa inapa askara ato yoia a Niospa keyoxiai a Babilonia anoafō.

<sup>4-8</sup> Yoikī askafatanaino nai mēranoax mekaito ē meka fetsa nika is kai mekaito:

Babilonia ano ikafāfe fāsi afara chakafakī finakōiafo. Nā afara chakafamisfo Epa Niospa ato ōia chakakōifaifāfe. Nāskakē ato omiskōimaxii. Nā Babilonia anoafāfe fetsafo afara chakafamamisfono afori. Epa Niospa ato omiskōimakī finakōixii omiskōinōfo. Nā Babilonia ano ikafāfe āto shinā mēraxō mā shināfo iskafakakī: “Nō Nios yopaima. Afara fetsafori nō yopaima. Nō isharakōimis. Oa xanīfokōi isharamis keskara nōri nāskamis, xanīfo keskara. Nōkai oa kēro ifomafa keskarama. Nō omiskōitiro. Askatamaroko nō isharapakenaka,” ixō kakapaimisfāfe yoimisfo. Akka Epa Niospa ato fāsi omiskōimani omiskōikakī tenēnōfoma. Akka nā ea chanīmara

faafāfe, ea nikasharakāfe. Epa Niospa mā ato samamashta omiskōimani anā isharayamanōfo. Atiri ē ato namai, atiri ē ato omiskōimani, a piaifori ato kēyoi. Nāskakē fonāikani. Nāskatari atiri ē ato koofaxii kooi fetsenōfo. Tsōa atiroma keskara Epa Niospa afama mīshti atiro. Nāskakē Epa Niospa mato yoi iskafakī: “Efe yora mīshtichi, Babilonia anoafō keskara iyamakāfe. Ato fe rafeyamakāfe. Ato feta chakafayamakāfe ē ato omiskōimanai keskafakī, matori ē omiskōimanōma,” ixō Epa Niospa ato yoixii kiki, ājirinī faito ē nika.

<sup>9</sup> Askano Babilonia kooaino mai fetsa anoafāfe āto xanīfofofāfe ōikakī manoxikani. Nāfāferi Babilonia anoxō afara chakafakī tāpinifo. Nāskakē ato feta Epa Nios chakafakakī potakani afara chakafaxikakī. Nā Babilonia anoa keskarafori afāfe afama mīshti ichapa fimisfo. <sup>10</sup> Babilonia kooaino nā xanīfofo ratekōixikani chai inoaxri fetsafo mesexikani.

¡Ooa! Babilonia anoafō fato yora fetsafo keskarafoma. Mā tāpikōisharafikē samamashta Epa Niospa mato omiskōimani mā kooi fetsenō. ¡Keexto! Koshikōi Babilonia mā kooi keyoa. Nōri iskayamapainō, ixō shinākani xanīfofofāfe ratekōiyanā.

<sup>11</sup> Nāskatari maifo tii anoafō āto afama mīshtifo minimisfo oiaxikani shināmitsakani. “¡Ooa! Mā Babilonia kooi keyoa. Iskaratīa anā nōko afama mīshtifo noko tsōa fiatiroma. <sup>12</sup> Nōko oro ōshishara fiayamata, a kerexkōi fakkai fakkaisai fiayamata, nōko tokirinī fakeshta fakkai fakkaisai fiayamata, nōko tokiri fetsa āfe ane perla fiayamata, nōko sama sharafinakōia fiayamata, nōko sama nana shara fiayamata, sama fetsa fetsatapafo fiayamata, nōko ifi nakas sharakōi fetsa fetsatapafo fiayamata, tokiri keskara kerexkōi oxosharakōi āfe ane mārfil nāato afarafo onifaa fiayamata, afe keskarara ifi sharakōifo fiayamata, firo shara āfe ane bronze fiayamata, keno fetsa āfe ane firo fiayamata, tokiri āfe ane mārmoŀo fiayamata, nāfo kopikōifo noko anā fiakanima. <sup>13</sup> Akka nō pīchamis afama mīshtifoya osixō, nā itsa sharafoya fetsa fetsatapafoya osixō, afo noko tsōa fiatiroma. Askatari a nakas shara āfe ane incienso, fetsari mūrri, fetsari pirofomā, fetsari vinō, fetsari xini, fetsari arinā, fetsari trigo, askatari nōko yoinā inafori ovejari, kamayori, nōko karori, yonomatifori, nāfo noko anā tsōa fiatiroma. <sup>14</sup> ¡Ooa! Babilonia anofāfe nā afara fetsa fetsatapafo fichipaikakī anā fitirofoma. Keyokōi afara sharafo fichipaikakī mā fimis anā anoma mā fenokōia anā mā fipanā. Mā afaa yopakima mā fimis. Mā kai anā fitiroma. Keyokōi nā mātonā mā keyoa,” ixō nā ināmitsamisfāfe yoixikani.

<sup>15</sup> Nā mai fetsa anoa fēkaxō afama mīshti minikaxō kori ichapa fimisfāfe mā noko kaxō chaima nīxō ato

ōikani, ratekōiyanā, oiakani, askatari shināmitsakōikani. <sup>16</sup> Yoikī iskafaxikani: “¡Ooa! Fato fetsakai Babilonia anoafō keskarama. Ato fe yorafāfe rapati sharakōifo safeafō. Rapati ōshi sharafo, askatari oro teoti safeafō, tokiri fakkai fakkaisai keskarari menexemeafō, perlari askari faafō. <sup>17-19</sup> Koshikōi na afama mīshtisharafo mā keyokōia,” ixō yoixikani.

Nāskarifiāi nā kanōanāfā āfe ifofāfe shinākani, a kanōanāfā mēra fomisfāferi shinākani, a kanōanāfā nexa yonomisfāferi shinākani, a kanōanāfā mēra fokaxō, ato afama mīshti minikaxō kori fimisfāferi shinākōikani. Babilonia kooaito chai ixō ōikani manokakī shināxikani. “¡Ooa! Fato peXe fetsakai Babilonia keskarama. Na Babilonia fistiōxō kanōanāfānē āfe ifofāfe kori ichapa fimisfo. Akka a aya imisfo koshikōi mā keyoa,” ixō a kanōanāfāō yonomisfāfe yoixikani.

<sup>20</sup> Askaifono keyokōi Epa Nios ika anoafō inimakāfe. Babilonia anoafāfe a Jesús chanīmara faafō ato omiskōimamisfo, Epa Niospa ato kopikī omiskōimaxii. Nāskakē keyokōi a Jesús chanīmara faafō fe, Jesúsxō āfe meka yoipaonifo fe, a Niospa meka inōpokoai yoimisoro inimakāfe.

<sup>21</sup> Akka Epa Niospa āfe ājiri fetsa mitsisipakōichi tokiri efapakōi fininīfōfāta fakafā mēra potaxō yoia iskafakī: “Na tokiri kerexkai ē potai keskafakī, nāskafakīri Epa Niospa na peXe rasi anoafō Babilonia kerexkai omiskōimana kooi keyonō. Mā keyokōikanax anā ano tsoa ikima. <sup>22</sup> Nāskakē anā Babilonia anoax manetifo, xāitifo, maneti fetsafori, afo anā tooxikama. Askatari anā tsoa fanāikama. Tsōakai anā ato nikatirofoma. Askatari a yonomisfo anā ano ikafoma. Askatari a aō xiki reneafō nō anā nikatiroma. <sup>23</sup> Anā luzri ōtapakenakama. Feronāfāke kēro fiaino inimaifāfe mā nikamis keskara anā tsoa askara mā nikapakenakama. Babilonia anoa a ināmitsamisfāfe tāpikōikani. Nāfāfe ichapakōi fimisfo. Askatari koshōiti tāpixō yora fetsafo pāramisfo. Askafikanax mā keyoafō.

<sup>24</sup> “Babilonia anoafāfe a Niospa meka yoimisfo, fetsafori a Jesús chanīmara faafō, fetsafori mai fetsa anoafō ato retemisfo Jesús ōikaspakakī. Niospa meka mato yoipaiiaifono mā ato nikakaspamiskē, Niospa mato omiskōimana,” ixō Niospa ājirinī yoia.

## 19

*Nios ika anoax fanāiki iskakani: “¡Aicho! Nōko Ifo Nios sharakōi,” ikaxō Niosnoa afara sharafo fanāikani*

<sup>1-2</sup> Askata nai mēra ikafo ichapakōi āto meka ē nika, fāsikōi iskaifāfe:

A fetsafāfe chakafamisfo Epa Niospa ato omiskōimani. Chanīmakōi, ato omiskōimani. ¡Aicho! Nōko Ifo Nios fāsi

sharakōi. Nāato nōko chaka noko soaxona nō afe nīpaxanō. Aōnoa fisti nō yoitiro iskafakī: “Mī nōko Ifokōi. Fato fet-sakai mia keskarama afara sharafamis. Mī sharaōxō mī afama mīshti fatiro,” ixō keyokōichi yoipakenakafo. Epa Niospa Babilonia anoafō atoōnoa iskafakī yoia: “Nā Babilonia anoafō nā kēro feromakōi keskarafo. Nā chakafamisfoōxō maifo tii ano ikafori ato chakafama. Nāskakē Babilonia anoafāfe ea fāsi chakakōi famisfo. Efe yorafori ato omiskōimakani nanōfo. Nāskakē ē ato kopia omiskōimakī,” ixō Epa Niospa yoi,

ixō yoiāifāfe ē nika. <sup>3</sup> Afianā meka fetsari ē nika nai mēranoafāfe yoiāifāfe iskafakakī:

¡Aicho! Nōko Ifo fāsi sharakōi. Afaa chakafamisma. A chakafamisfo chanīmakōi ato omiskōimani. Ato chiifā mēra potano afo kooi nishpapakenakafoma,

ixō yoiāifāfe ē nika.

<sup>4</sup> Askanori Epa Nios tsoa ano nā veinticuatro xanīfori nā Nios onifani cuatro a nāmā feopakekafakī iskafakī yoiafo: “Askapainō. ¡Aicho! ¡Nōko Ifo fāsi sharakōi!” ixō yoiāifāfe ē nika. <sup>5</sup> Askata Epa Nios tsoa ano a ē meka fetsa nika iskafakī yoiaito:

Epa Nios yonoxomisfāfe xanīfofōfāfe askatari afamafōfāfe mato Niospa yoia keskara mā apaikōimis. Māri Epa Nios yoikāfe iskafakī: “¡Aicho! ¡Epa Niosi, mī sharafinakōia!”

ixō yoiaito ē nika.

*Feronāfake āfiyakī fista atiro inimakī. Nāskarifikī Jesús nai mēraxō noko fista axoxii nokoki inimakī*

<sup>6</sup> Askatari ē anā nika yōrafā rasi mekaifāfe nā fakafā poo ikai keskara, askatari fāsikōi nai tiri ikai keskarari ē nika āto meka:

¡Aleluya! Nōko Ifo Nios tsōa atiroma keskara afama mīshti fatiro. Nā nōko Xanīfo finakōia. Maifo tii anoafō noko īkitiro. ¡Aicho! ¡Nōko Ifo Nios sharafinakōia! <sup>7-8</sup> Akka feronāfake kēro fiaino nā kēro inimakōi itipinīsharatiro āfe fene fe fianāxiki. Nāskarifiāi nōko Ifo Jesús fe iskaratīa afe yorafo afe ipanakafafo. Akka afe yorafo mā itipinīsharafo afe ipaxakakī. Akka āfinī āfe fene inimamapai itipinīsharatiro. Sama fena sharakōi patsaxō safetiro afe fianāxikī. Nāskarifiakī nā Jesús Ifofamisfāfe itipinīshara fatirofo. Epa Niospa ato shara fapaikī, ato chaka soaxoni Jesús fe īpaxanōfo. Nāskakē nō inimai. Tsoa fetsakai mia keskarama afara shara famis, ixō yoiafo. Niospa yorafāfe Jesúsxō fetsafo sharafamis. Nāskakē Niospa ato rapati sharafinakōi safemana Jesús fe ipasharanōfo.



<sup>9</sup> Askatari ājirinī ea yoia: “Ē mia yoiai keskara kenefe iskafakī: ‘Ēfe Fake Jesús iskaratīa keyokōi afe yorafo ichanāfai afe ĩpaxanōfo. “Niri fekāfe,” ato faino, nikakanax inimakōikani. Nāskakaxō ēfe Fake feta pikani afe ipaxakakī, ixō Epa Niospa yoia. Nāskakē Epa Nios āfe meka mā chanīmara fatiro,” ixō ea yoia.

<sup>10</sup> Ea yoiaino ē a nāmā feopakekafana, “Mī fāsi sharakōi,” ixō yoixiki. Ē askafaino ea yoia iskafakī: “Ea askafayamafe. Ēri Nios yonoxomiski mī axomis keskafakī, a Nios Ifofaa fet-safāferi askafamisfokī. Jesús mato yoiai keskara mā kachikiri famisma. Nāskakē Nios fisti nāmā nō feopakekafā yoitiro: ‘Mī fāsi sharakōi. Mī ēfe Ifokōi,’ ixō anori fisti nō yoitiro. Nā Niospa meka yoimisfāfe yoimisfo keskarifakī ēri Jesúsnoa yoimis Epa Niospa ea shināmanaino,” ixō ājirinī ea yoia.

*Jesús mai ano afianā oxiai keskara yoi*

<sup>11</sup> Akka ē anā ēfe namapa ōia keskara anā ē mato yoinō mā tāpinō. Epa Nios ika anoa nai mēranoa ē ōia. Fepoti fepekemea keskara ē a mēra ōia. Nāskara Epa Nios ika ari xafakīakōi ē ōia. Nāno kamayo oxokōi ē ōia. Nā kamayo kamaki Jesucristo nōko Ifo tsaao. Āfe ane ichapa. Āfe ane rafeōnoa ē mato yoinō. Fētsa, “Nā Yoia Keskara Akōimis.” Akka āfe ane fetsari, “Chanīmisma.” Nāato chanīmakōi yora chakafo omiskōimani. Niospa meka nikakaspamisfono a omiskōipakenakafo mēra ato potaxii. <sup>12</sup> Āfe fero rafe chii xofisai keskara. Fakishi chii xofisaino yōra ōisharatiro. Nāskarifakī nōko Ifāfe yorafāfe āto ōiti mēraxō shināifo keskara tāpia. Xanīfāfe maiti sharakōifo ichapakōi maiafo ika. Āfe femānāki āfe ane kenea. Ares fisti nā ane tāpia. <sup>13</sup> Rapati chainipa safea. Nā rapati imiki momoa. Nāskara ōikī ea shināmana Jesús noko nāxoni. Āfe ane fetsari, “Niospa Meka,” famisfo. <sup>14</sup> Afe yorafo nai ariax kamayofo oxokōi kamaki āto Ifo kachiori fokani. Āto rapatifo oxokōi chainipa safeafo. Nā rapati oxokōi rama pātsaxona keskarafafo. <sup>15</sup> Āfe axfa mēranoa keno chainipa ikiaikōi ē ōia. Akka āfe kenoma, āfe meka. Āfe mekapas maifo tii anofo nikayospamisfo omiskōimani. Maifo tii ato ĩkinā, fetsafo nikayospamisfo ato kerexkai omiskōimakōi. Āfe meka nikakaspamisfono Nios ōitifishkikōini. Akka Jesúsxō ato omiskōimani, omiskōipakenakafo mēra ato potaxii. <sup>16</sup> Jesús āfe ane fetsa āfe rapati chainipaki kenea mānākiri keneta maikiriri kenea iskafakī: “Xanīfo maifo tii anofo āto Xanīfo finakōia, askatari āto Ifo finakōia,” ixō kenea.

<sup>17-18</sup> Askatari ē ōia ājiri fetsa xini ano nīxō fāsikōi yoia iskafakī: “Xanīfofo ikaino, sorarofafo āto xanīfofo ikaino, āto

xanĩfofo fe rafea ikaino, feronãfakefo mitsisipafo ikaino, kamayofo ikaino, a kamayofo kamaki tsaofafo ikaino, keyokõi Niospa meka nikakaspamisfo ikaino, ato yonomatifoma ikaino, a ãto yonomatifo ikaino, yora afamafori ikaino, a yora finakõiafo ikaino, keyokõi Niospa ato namaxii,” ixõ yoia. Nãskakẽ ishpfifo ato yoia: “Fekãfe ãto nami pixikakĩ,” ixõ nã ãjirinĩ ishpfifo kena.

<sup>19</sup> Askatari afianã ẽ õia a nõko Ifo Jesús noikaspai nã yoinã põfe keskara yafi maifo tii anoa xanĩfofo ãfe sorarofoya ẽfe namapa õia keskara ẽ õia. Mã ichanãfo Jesús ãfe kamayo kamaki tsaokẽ afe yorafoya retepaikani. <sup>20</sup> Akka ato retetamaroko Jesús ato achia chiifã mẽra ato potaxiki. Nã ato pãramisto, “Ë Niospa meka mato yoimis,” ifiax ãa chanĩmis. Nãato na yoinã põfe keskaraõxõ tsõa atiroma keskara famis Satanás yõshixõ. Nãskaxõ keyokõi yorafoki kenea nã marakkaõxõ yoinã põfe keskara tãpixikani. Nããfe yoimisfo iskafakakĩ: “Mĩ ẽfe nios. Ë mia noi,” ixõ anori yoinã põfe keskara yoimisfo. Akka nã ato pãramisto yõra atiroma keskafakĩ afama mĩshti faito nããfe õiafo. Nãskakẽ ato pãrakõia. Nã yoinã põfe keskara fe nã ato pãramis naafomano iriyafi Jesús ato chiifã mẽra pota. <sup>21</sup> Nã rafeta ãto inafõ Jesús ãfe kamayo kamaki tsaõxõ ãfe mekapa ato reteaino nai fetseafõ. Mã naafono ishpfifo atoki ichanãkaxõ ãto nami pikani mãyakõiafo.

## 20

### *Jesús Satanás achixõ nexaxii mil xinia*

<sup>1</sup> Askata Niospa ãjiri Nios ika ariax fotoaito ẽ õia, chamis keskara tsoma. Nã niafaka chakafo kinifã fakishifã mẽra ikafoki atoki fepoti fepoa keskara ẽ õia. Nã Niospa ãfe ãjirinĩ fepotinĩ ãfe chamis yafi kaninã efapa tsoma ika. <sup>2</sup> Tsomaxõ nã ronõfã keskara achia. Nã ronõfã keskara nã niafaka chakakõi Satanás. Nã achixõ nexa. <sup>3</sup> Nãskaxõ kinifã fakishifã mẽra pota. Potata akiki fepokõia mil xinia a mẽra inõ anã yorafo pãranõma. Mã mil xinia finõano afianã kãimayoxii samarakatama chaimashta anã mai ano kafãsayonõ.

<sup>4</sup> Askata xanĩãfe tsaotifo Epa Nios ika anoa ẽ õia. Jesús afe yorafo yoia nã tsaoti kamaki tsaofafono, “Mã yoitiro fatofomãkĩ omiskõipakenakafo mẽra foaifoma, akka fatoforimãkĩ a omiskõipakenakafo mẽra foaifo.” Askano nãnoari ẽ õia nã Jesús chanĩmara faafõ yamĩ ato textenifo. Ato texteyoafomano yoiyopaonifo: “Jesús nõko Ifo,” fayopaonifo. Niospa meka ifofamisfono, nãskakẽ ato textenifo. Akka nããfekai nã yoinã põfe keskara yafi ãfe nimofõ yoimisfoma iskafakakĩ: “Mĩ nõko ifõ nios. Nõ mia noi,” ixõkai anori yoimisfoma. Askatari aõ ato tãpinõfo ãto mẽke yafi ãto femãnã kenemisfoma. Nãskakẽ

nā yoinā pōfe keskara atoki òitifishkikī ato textemani. Mā nai fetsefiafono Jesús ato otoani. Mā otokaxō Jesús feta maifo tii anoafō mil xinia yorafo tii ato ìkināfo. <sup>5</sup> Nāfo mā otoa-fono mā mil xinia keyoano fetsafori Epa Niospa ato otoaxii. <sup>6</sup> Shinākapo efe yora mīshtichi, mato yoiai keskara. Noko Epa Niospa otokakī taefaxii. Noko katonī afe yorafo nō inō. Epa Nios feta Cristo noko yoiai keskara nō fetsafo Epa Nios kīfixomis. Nō omiskōifikatsaxakī Jesúsnoax omiskōifikatsaxakī naax nō omiskōipakenafo mēra kanakama. Askatamaroko Cristo ika anoxō a feta fetsafo nō ìkixii. Nāskakē Jesús keskara shara ikax nō fāsi inimaxii.

*Satanás kinīfā chaikōi mēranoa kāimayoi anā yorafo pāranō. Ato askafaino koshikōi anā kinīfā mēra potaxii anā kāipakexanōma*

<sup>7-8</sup> Askata mā mil xinia finōano Satanás kinīfā fakishifā mēranoa anā kāimayoxii anā maifo tii anoafō ato pārayonō. Askata mā kāixō nā Nios nikakaspaifo maifo tii anoafō ato ichanāfai nā Niospa yorafo ato retemaxii. Ichanākani ichapakōifo. Nā Nios nikakaspamisfo tsōa ato tanātiroma. Gog anoax fekāta, Magog anoax fekāta, ikanax ichanāfo Nios nikakaspamisfo. <sup>9</sup> Maifo tii anoafō ato ichanāfaxii Niospa yorafo ìkafo anoafō ato cheteakenōfo ato retexikakī. Ato askafaifono Epa Niospa afe yorafo noikī ato ifixii. Nā yorafo Satanás ichanāfaa ono nai mēraxō atoki chiifā potano nai fetsekani anā tsoa pishta ninakama. <sup>10</sup> Akka nā Satanás niafaka chakata yorafo feparamiskōikē Epa Niospa chiifā mēra pota. Nā taefakī nā yoinā pōfe yafi nā ē mato Niosnoa mato yoimisra iki a chanīmis ato mērari Satanás niafaka chaka Epa Niospa pota. Nā tii chiifā mēranoax omiskōikani xatenakafoma.

*Jesús chanīmara faafoma ato omiskōimaxii*

<sup>11</sup> Askata xanīfāfe tsaoti oxokōi efapakōi ē òia. Nāno Epa Nios tsoa. Akka mai fe nai anā ano ikama. <sup>12</sup> Askata ē òia nā xanīfofo fe nā yora afamafori nakanax Epa Nios tsoa ano niafo. Nāno niafono Epa Niospa āfe kirikafo fēpea. Kirika fetsari fēpea. Nā kirikaki nā Ifofamisfo atoki kenea. Akka a Ifofamisfoma atoki keneama. Akka nā kirikanā āfe ane Nīpamisfo. Nā nayoxoma aponifo keskara kirikafo mēra keyokōi Epa Niospa mā kenenī. Nāskakē nā afara chakafapaonifo keskara atoki kenexō ato ispai tāpinōfo chanīmakōi ato omiskōimaxii. <sup>13</sup> Nā āsamisfo fe mai anoax namisfori askatari fetsafori nafi-akanax otoyokanīma keyokōi namisfo Epa Nios āfe ferotaifi feafo. Nā chakafamisfo tii Epa Niospa ato omiskōimapakea. <sup>14</sup> Keyokōi nā Niospa meka nikakaspamisfo Epa Niospa ato chiifā mēra pota. Mā nafianifono iskaratīa afianā ato chiifā

mēra potaito ē ōia. Nānoax omiskōikani xatepakenakafoma. <sup>15</sup> Akka nā kirika āfe ane “Nīpamisfo” a mēra Epa Niospa āto ane kenemisma, nāfo chiifā mēra pota. Nāskara ē ōia Epa Niospa ea ōimanaino a ixiāi keskara mai keyoaino.

## 21

### *Nai yafi mai fenakōi Epa Niospa onifaxii*

<sup>1</sup> Akka nā ēfe namapa ōia keskara Epa Niospa anā ea ōimana. Ē ōia nai yafi mai fenakōi Niospa onifaa. Nā nai yafi mai taefakī onifani yamarisatana. Fakafāri yamarisatana. <sup>2</sup> Askano ē ōia Niospa yorafo nāfāfe Jesús Ifo shara famisfo nai mēranoafo Epa Nios ika ariax fotokani. Nāfo ikafo Jerusalén fena ano. Nā Jerusalén fena Nios ika ariax nāmā fotoa nāno ikafo. Fotoaifono ē ōia fāsi sharakōi. Akka kēromā āfe sama sharakōi safetiro itipinīsharaxikī fene fe fianāxiki. Nāskari fakī Epa Niospa nā Jerusalén fena itipinīshara faa sharakōi inō afe yorafo nāno afe nīpaxanōfo. <sup>3</sup> Askano Epa Nios tsoa anoa meka achakōi ē nika. Yoia iskafakī: “¡Aicho! Iskaratīa Epa Nios yorafo fe ixikiki. Ato mēra ixii nāfo afe yorafo inō, nā yora fisti keskara. <sup>4</sup> Ato kexesharaxii anā tsoakai omiskōitiroma. Ato noikī oiaifono Epa Niospa ato shināmasharaxii āto fēo tereaxoxii anā shināchakakakima tanaima inimanōfo. Ato kex-eaino tsoakai anā natiroma, anārikai manomitsai oiakanima, anārikai paemekanima. Afara chakafo iyopaoni keskarakai anā askanakama,” ixō yoia.

<sup>5</sup> Askata Niospa āfe tsaoti kamaki tsoaxō yoikī iskafaa: “Ē keyokōi fenafai,” ixō Niospa yoia. “Ēfe meka chanīmakōi. Nāskakē nā mī nikai keskara kenefe,” ixō ea yoia.

<sup>6</sup> Askaxō anā Niospa ea yoia iskafakī: “Mē aka. Iskaratīa ē yoiyoni keskara mē keyoa. Afara onifataima ē iyopaoni. Afetīara maifo tii keyoai eres fisti ē yoitiro. Ē keyokōi īkinā. Ēfi nīpamiski. Fetsa nōamāikī yoitiro iskafakī: ‘Ē faka fenakōi naxikima,’ ixō yoitiro. Nāskarīfai fetsa ipaisharapaikōikī yoitiro iskafakī: ‘Ēa ē isharatiroma. Ē Nios yopakōi,’ ixō anori yoiaito ē inimakī ifitiro, efe īpaxanō. <sup>7</sup> Fētsa ea kachikiri fatamaroko nā naitīa ea Ifofasharaxō nāato keyokōi nā ē mia yoia keskara fixii. Ē kaxpa ināxii. Ē āfe Nios ixii. Akka ēfe fake ixii. <sup>8</sup> Akka fetsa ratei eōnoax omiskōikaspakī ea kachikiri faa, askatari fētsa ēfe meka nikakaspamis, fētsari afara chakafo fetsa fetsatapafo xatekaspai, askatari fetsari retemitsamis, fetsari āto āfima chotamis, askatari kēromāri āto fenema chotamamis, fētsari koshoiti tāpiāx nā niafaka chakafo fe rafemis, askatari fētsari ea noitamaroko afara fetsa noikī, ‘Na ēfe nioski,’ famis. Nāskakē askarafo fe nā chanīmisfo afokai efe nīpanakafoma. Chiifā mēra nā omiskōipakenakafo

mēra ipanakafo. Anoaxkai faki fonakafoma,” ixõ Epa Niospa ea yoia.

### *Jerusalén Fena*

<sup>9</sup> Askata Niospa ājirinī siete kecho keskara mēra afara chakakōi fospia maifo tii ano nachixii ato omiskōimanõ fētsa ekeki oxõ yoikī iskafaa: “¡Ofe! Ē mia afara sharakōi õimanõ. Akka feronāfāke mā āfiyaxõ kexesharatiro. Nāskarifikī Jesús chanīmara faafo afe yorafo ifia. Ofe. Ē mia õimanõ,” ea faa. <sup>10-11</sup> Askano Niospa Yõshi Sharapa ea ĩkināino Niospa ājirinī ea machi efapa keyakōi ano ea iyoa keyokōi ě õinõ. Jesús chanīmara faafo nā Nios ika anoafõ ato chaka soaxona nāfo nai mēranoa Epa Nios ika ariax fotoaifāfe ea õimana. Na māchifā keyakōi anoxõ ea õimana. Nāfo ika ano āfe ane Jerusalén Fena. A mēra ikafo Jesús Ifo shara famisfo. Epa Niosri ato fe ika. A ato fe ika ano fakkai fakkais isharai. Tokiri fakkai fakkais ikai keskara sharafinakōia. Nā tokiri āfe ane jaspe fēxta shara, tokiri fetsa āfe ane cristal. Shara fakkai fakkais ikai keskara. <sup>12</sup> Nā tokiri kenea efapa Jerusalén foake tii fayakena. Nā kene keyakōi doce fepotiya. Nā doce fepoti ano Niospa ājiri niafo kexesharaxikakī. Israel iyopaonito āfe fake doce ipaoni. Nā docefāfe āto fakefo paxkanifo. Nāskakē fepoti tii āto anefo doce kenea. <sup>13</sup> Nā kene keya āfe fepoti ichapaya. Xini oaikiri tres ikaino, xini kaikiri tres ikaino, xini kaima anori tres ikaino, xini oaima anori tres ika fepoti ichapaya. <sup>14</sup> Nā kene keyakōi tokiri doce efapanāfā kamaki kenea. Jesúsnoa yoimisfāfe āto anefo nā tokiri doceki kenea.

<sup>15</sup> Niospa ājirinī nā ea taefakī yoiato, nāato tanati oro tsoma, Jerusalén Fena tanaxii, āfe kene yafi āfe fepoti tanaxiki. Nā tanati tafa chainipa keskarafiax oro õshi keskara sharakōi. <sup>16</sup> Nā Jerusalén Fena āfe kene keya senēsharakōi. Āfe chainipa fe āfe xākī nātixõ rafe. Āfe keyari nātixori. Niospa inapa tana dos mil dos cientos kilometro āfe chainipa fe, āfe xākī, āfe keyari. <sup>17</sup> Āfe kenefo keyakōi a akiki kenea sesenta y cuatro metros. Nā Niospa ājiri yorafāfe tanamis keskari fakī nāatori metropa tana.

<sup>18</sup> Nā Jerusalén Fena sharakōi. Nā manishomo fēxta nõ õimis keskara sharafiax õshi keskara. Nāõxõ Epa Niospa Jerusalén Fena onifaa. Askatari a kenea keyakōi nā tokirinī āfe ane jaspe Niospa onifaa. <sup>19</sup> Tokiri sharakōifo fetsa fet-satapafo Epa Niospa onifaa, nā doce tokiri kamaki nā kene keya tsoa. Taeyoi jaspeki iyoa. Āfe pefeta zafiroki ika. Āfe pefetari agataki ika, āfe pefetari esmeraldaki ika, <sup>20</sup> āfe pefetari onīceki ika, āfe pefetari cornālināki ika, āfe pefetari crisolitoki ika, āfe pefetari beriloki ika, āfe pefetari topacioki

ika, āfe pefetari crisoprasaki ika, āfe pefetari jacintoki ika, āfe pefetari amātistaki ika; nāfo sharakōifoki nā kene Epa Niospa nimainīfofāni. <sup>21</sup> Nā kene keyapa āfe fepotifo perla oxo efapa Niospa onifaa. Nā perla tokiri keskara oxo sharakōi. Nā perla fistiōxō fepoti fisti onifaa. Nāskakē doce fepoti onifaa nā perlaoxō. Nā Jerusalén Fena āfe fai manishomo fēxta sharakōi keskara oke rafe nō ōitiro. Manishomo fēxta keskara sharafix oro ōshi keskara shara.

<sup>22</sup> Akka Epa Nios kīfiti pexefā anoma. Epa Niospa nā afama mīshti fatiroxakī nōko Ifo Jesús noko fe Jerusalén Fena mēra imisfo. Askatari yorafāfe Epa Nios kīfiti pexefā nā anā yopanakafoma. <sup>23</sup> Nāskarifikā anā xini yafi oxo yopakanima Epa Nios fe Jesús ato fe ikano. Epa Nios nāno ato fe ixō ato chaxaxoni. Jesúsri ato askafaxōi ōisharakōinōfo. Anā afaa yopakanima. <sup>24</sup> Mai fetsa anoaxri fofāsatirofo Epa Niospa ato chāxano. Xanīfofori Jerusalén Fena mēra ikikaxō a aya imisfo afara sharafo ināxikani. <sup>25</sup> Nāno fakishri anā ikima. Fakishpakenakama. Akka anā Jerusalén Fena āfe fepotifo fepopakenakama. <sup>26</sup> Akka fetsafori maifo tii anoax Jerusalén Fena mēra ikikakī a aya imisfo ato afara sharafo ināxikani. <sup>27</sup> Akka afara chaka nā Jerusalén Fena mēra ikitiroma. Nā chaka shināmisfo fe a afara chakafamisfo, a ato pāramisfori afo ikitirofoma. Akka Jesús āfe kirika mēra āto ane keneano afe ipaxatirofo. Nāfo fisti Jerusalén Fena mēra ikitirofo Jesús fe ipasharaxikakī.

## 22

<sup>1-2</sup> Askano ēfe namapa ōiai keskara Niospa ājiri fētsa ea ōimana afe keskaramāki Nios ika ano. Nios fe Jesús tsaoa anoax faka shara fakkai fakkaisai keskara kafani, fai nēxpakīa. Afara choshta a mēra ikitiroma. Nāno ikafāfe nā faka shara ayapaiyaitīa ayatirofo, nāskakē nomipakenakafoma. (Nāskarifiakī nāno Niospa noko potapakenakama noko ikipakenaka.) Nānori fai nēxpakīa ifi nia ika. Faka takai raferi nii xokoa ika. Nāno ikafāfe nā nii fimi pipaiyaitīa pitirofo. Nāskakē fonāipanakafoma. Nāskarifiāi Nios nofe ikano nō aōnoax omiskōitiroma nō nisharapakenaka. Nā ifi oxo tii fimimis. Āfe pei tsasimisma xachoko fena shara ipanaka. Nāskarifiāi nā chanīmara faafo tii maifo tii anoax Niosnoax meema sharakōi ipanakafo. <sup>3</sup> Nā Jerusalén Fena ano Epa Nios fe Jesús nofe ixii. Nō ato fe yorakōixō nō ato noikōixii. Nō āto yonoxomiskōi nō ixii. Atoki fanāisharayanā nō ato yoisharapakenaka. Akka nōko mai xini ano afara chaka fetsa fetsatapafo imis. Akka iskaratīa nā Jerusalén Fena ano afara chaka a mēra itiroma. <sup>4</sup> Nānoax nōko Ifo fe āfe femānāki ōinōnāfafāixikani. Āto femānāki āfe ane ato nētamana. <sup>5</sup> Nōko

Ifo Nios ari ikafo ato penafaxõa. Nãskakẽ anã rãpari yafi xini yopatirofoma. Anokai anã fakishima. Nãskax afe xanĩfo ipanakafo.

### *Jesús chaima oi*

<sup>6</sup> Askata Niospa ãjirinĩ anã ea yoia: “Nõko Ifo Niospa ãfe Yõshi Sharaõxõ a ãfe meka yoimisfo ãto õiti mẽraxõ ato tãpimamis a afara afeskara ixiai keskara afe yorafori ato tãpimanõfo. Nãskarifiakĩ iskaratĩa ãfe ãjiri fetsa nĩchia afara afeskara ixiai keskara a yonoxomisfo tii ato tãpimanõ. Nã ã mia yoiai keskara chanĩmakõi. Keyokõi ãfe meka mã chanĩmara fatiro,” ixõ ea yoia.

<sup>7</sup> Akka yoikĩ iskafaa nõko Ifo Jesús yoia iskafakĩ: “Ë nai mẽranoax mai ano matoki nokorisai. Nã mã õia a inõpokoai a mã nikafori, nãfo mã kenetiro. Akka nãfo chanĩmara fakakĩ kachikiri fayamakanax inimakõixikani,” ixõ Jesús ea yoia.

<sup>8</sup> Ëkĩa Juan ã nika, askatari ã õia ea Niospa ãjirinĩ õimanaino. Nãskakẽ ã a nãmã feopakekafana ãfe Ifo keskara shinãi. Nãskaxõ, “Mĩ fãsi sharakõi,” ã fakerana. <sup>9</sup> Ë askafaito ea yoia iskafakĩ: “Ea askafayamafe. Ëri mia keskaraki. Mĩ ikaino, Jesús chanĩmara faafo ikaino, ãfe meka yoimisfo ikaino, keyokõi nã mã rama kenea keskara chanĩmara faafo fe, ãri mato keskara nõko Ifo Nios ã yonoxomis. Akka Epa Nios fisti mã Ifofatiro. Nã fisti nãmã mã feopakekafatiro,” ea faa.

<sup>10</sup> Askata afianã ea yoia iskafakĩ: “Nã mã kenea oneyamafe. Nã mã kenea keskara samama askakõi. Nãskakẽ a mã kenea keskara keyokõi yorafãfe tãpinõfo. <sup>11</sup> Akka mã Jesús nokoaino nã nikakaspamisfãfe chakafakĩ finakõixikani. Yora chakafamisfãferi nãskari faxikani chakakõi fakakĩ. Akka nã Niospa yoiai keskara amisfãfe nãskararakõi fakakĩ mimakõi faxikani Niospa yoiai keskara akakĩ. Nã Jesús keskara shara imisfo nãfori isharakõixikani ãto Ifo ifosharakõifakani,” ixõ Niospa ãjirinĩ ea yoia.

<sup>12</sup> Nãskaxõ Jesús anã yoia iskafakĩ: “Ea nikasharakãfe. Ë matoki samama nokorisai. Nokoxõ ã mato yoiyoa keskara ã mato inãsharaxii. Nã afara shara famisfo ã ato shara fata nã afara chakafamisfo ã ato omiskõimaxii. <sup>13</sup> Afarafo onifataima ã iyopaoni. Ëfi nĩpamiskĩ. Ë niixatepakenakama. Nã mãto mai keyoai eres fisti ã yoitiro,” ixõ ea yoia.

<sup>14</sup> Anã Jesús yoia iskafakĩ: “Nõ Jerusalén Fena mẽra ikixõ, nã ifi ãfe fimi pipaiyaitĩa nõ pitiro. Nãskarifiã nõ Epa Nios fe ikaino ares fisti noko nimapakexatiro. Nã Jesús chanĩmara faafo ato chaka soaxona nãfo fisti Epa Niospa ato ikimatiro afe ipaxanõfo. <sup>15</sup> Nãskakẽ nã yora chakakõi paxta põfe keskarafa fe, a koshoiti tãpiafo, nã koshoiti chanĩmara faifori, feronãfãke ãfe ãfima chotamis, kërofãferi ãto fenema

chotamamisfo, retemitsamisfori, Nioskōima noikī ifofamisfori, chanīmisfori, nā chanī noimisfori, askara yorafokai Jerusalén Fena mēra ikitirofoma.

<sup>16</sup> “Ēkīa Jesús, ěfe ājiri matoki nīchia ě mia yoia keskara nā ea Ifofaafō tii ichanāfo anoxō ato tāpimanō. Ēkīa David āfe fena. Ēfi nā fishi efapa penaino ōimisfo keskarakī. Nā fishi ōikī nō tāpitiro mā penaino. Nāskarifiai mē chaima oaino tāpikanax itipinīsharatirofo Jerusalén Fena mēra efe ipaxakakī,” ixō Jesús ea yoia.

<sup>17</sup> Askano Niospa Yōshi Shara feta Jesús afe yorafāferi yoikakī iskafatirofo: “Jesúski fekāfe,” ato faifono, fetsafāferi nikakaxō ato yoitirofo: “Jesúski fekāfe,” ato fatirofo. Fētsa nōamā ikī faka yopai, faka ano katiro mā ayax anā nōamā itiroma. Nāskarifiai fētsa āfe chaka xatepai, Jesúski otiro Epa Nios fe ipaxakī. Afaa inātama Jesús chanīmara faax, afe ipaxatiro.

*Juan mā mekai xatekī Jesús yoiai keskara kenei*

<sup>18</sup> Ēkīa Juan, afara ixiai keskara ě mato kenexona. Ē mato kenexonai keskara chanīmakōi. Nā meka ě mato yoiai nikasharakāfe. Ē mato kenexona keskara akka fētsa afianā meka fetsa shinākī keneax, na kirika mēra kenea mā ōiai keskara omiskōipakenakafo chanīmakōi Epa Niospa keyokōi nāfo omiskōimaxii. <sup>19</sup> Askatari a afara afeskara ixiai keskara ě kenea fētsa na meka atiri soakē Epa Niospari āfe ane soaxii āfe kirika mēranoa. Nāskakanax nā Jerusalén Fena shara mēra ikitirofoma. Ē kenea keskara soakanax nā Epa Nios afara shara yoiyoni keskara, aya ipanakafoma.

<sup>20</sup> Jesús yoia keskara nānori ě mato kenexona. Nāato yoikī iskafaa: “Chanīma, ě matoki samama nokorisai,” ixō yoia. Askapainō. Nōko Ifo Jesús orisapainō.

<sup>21</sup> Mā Niospa yorafo. Afara afeskara afiaino nōko Ifo Jesús mato noixō māto ōiti mato fēpeaxosharapainō. Askapainōra. Ēri mato fāsi shināi. Nā tii.

*Ēkīa Juan*